


# AIREPA VAE REO OVOI



The New Testament in the Rotokas Language of Papua New  
Guinea

AIREPA VAE REO OVOI

The New Testament in the Rotokas Language of Papua New Guinea  
Nupela Testamen long tokples Rotokas long Niugini

copyright © 1982 Wycliffe Bible Translators, Inc.

Language: Rotokas

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.  
You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.  
For other uses, please contact the respective copyright owners.

2016-09-20

---

PDF generated using Haiola and XeLaTeX on 4 Mar 2019 from source files dated 4 Mar 2019  
1713bce3-5a15-5918-82c1-6b80c12df3bb

## Contents

.	.	.	1
MATYU	.	.	3
MAK	.	.	59
LUK	.	.	91
JON	.	.	153
APOSEL	.	.	196
ROM	.	.	249
1 KORIN	.	.	279
2 KORIN	.	.	308
GALESIA	.	.	328
EFESAS	.	.	339
FILIPAI	.	.	349
KOLOSI	.	.	356
1 TESALONAIIKA	.	.	363
2 TESALONAIIKA	.	.	369
1 TIMOTI	.	.	373
2 TIMOTI	.	.	382
TAITAS	.	.	388
FAILIMON	.	.	392
HIBRU	.	.	394
JEMS	.	.	417
1 PITA	.	.	425
2 PITA	.	.	434
1 JON	.	.	440
2 JON	.	.	448
3 JON	.	.	450
JUT	.	.	452
REVELESEN	.	.	455
Bible reading	.	.	486
REOARA VITUARO	.	.	498

**Airepa Vae Reo Ovoi**  
**The New Testament in the Rotokas language of Papua New**  
**Guinea**  
**Nupela Testamen long tokples Rotokas long Niugini**

*Airepa Vae Reo Ovoi*

The New Testament in the Rotokas language of Papua New Guinea  
[roo]

Translation by Wycliffe Bible Translators

© 1982 Wycliffe Bible Translators, Inc.

Print publication, 1982 by Bible League International

Web version

© 2014, Wycliffe Bible Translators, Inc.  
<http://www.Wycliffe.org>

<http://pngscriptures.org>

<http://www.ScriptureEarth.org>

This translation is made available to you under the terms of the Creative Commons license (Attribution-No Derivative Works).

https:

[creativecommons.org/licenses/by-nd/4.0/](http://creativecommons.org/licenses/by-nd/4.0/)

Your are free to share — to copy, distribute and transmit the text under the following conditions:

- Attribution. You must attribute the work to *Wycliffe Bible Translators* (but not in any way that suggests that they endorse you or your use of the work).
- No Derivative Works. You may not alter, transform, or build upon this work.
- In addition, you have permission to port the text to different file formats, as long as you don't change any of the text or punctuation of the Bible.

Notice — For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-No Derivative Works license. Em i tok olsem yu ken givim kopi long narepela manmeri. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Na tu, yu no ken senisim Tok.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik strem samting i no orait long dispela tok orait, strem tok, salim Buk Baibel, o tainim Tok bilong God long nupela tok ples, yu ken askim mipela.

Olgeta tok orait na lo long tok ples English i stap long <http://creativecommons.org/licenses/by-nc-nd/4.0/legalcode>.

Sapos yu gat askim long dispela, plis askim mipela.

## MATYU Irapa Reoro Vo Vukuo Iava

Irvu disaipel irara iava rera ro Matyu. Ira-ia ovaisivu toupaiveira vao oiso, Livai. Uva oearovu tarai irara oearoa oiso purapaaveira, Ira vo vuku rigatoreva aue-ia 60 o 70 yia Jisas vo kavauaro isivaaro iava. Ovusa oearovu oiso purapaaveira aue-ia 80 o 90 yia Jisas vo kavauaro isivaaro iava oa rigatoreva.

Ro Matyu Jiu-pato, riro oirao pie vovouto-a rutu. Osa-a eisi osa iava Jiu vo rugorugoroaro ora voea vo tarairoaro sirova vo vukuo rigatoreva. Uva voari tuariripa vuuta-ia uva oisoa rerare tuepaave, oiso ra voeao Jiu tuvetuvereve Pauto vo Saraaro-ia koatasa. Eva-a oa vituaro iava Matyu Jisas iava rigatoreva, uvare rera raga ita arureva Pauto, oisore ra oirara rutu tuvetuvepareve Pauto vaaro Reo Ovoi oirao piepaoro. Ora oreorovu oureva Olpela Testamen iava varao oara Jisas iava oisoa tavipape. Eisi osa iava uvuipai ra Jiu-pa irara ora voea vo reoaro raga-ia Jisas eveiive oiso, O ita, Pauto reraaro rutu ro Mesaia.

Jisas riroara ruu reoro vatepareva oirara sипosipopaoro. Uva vara rigatoreva Matyu oara Pauto vo Saraaro iava oisoa tavitavipape (Mt 13:1-52).

1. Jisas Krais kavauaro iava vo Betlehem urui-ia, ora rera aao iraraaro vaisiaraaro, 1:1-2:23.
2. Jon Baptais ira pievira oirarapa sипosiporeva, 3:1-12.
3. Jon Jisas baptaisreva vo uukova Jodan. Oa iava avaroepa Jisas raaka tapi iare vo uva kokarapato Seten rera-ia kokaraparoepa, 3:13-4:11.
4. Jisas Galili taere sovara-ia virireva rera vo kovoroaro ravoto kovoro purapaoro, 4:12-18:35.
5. Jisas Galili iava avaroepa oaravu kovoara purapaoro vore Jerusalem-ia, 19:1-20:34.
6. Turarovira koataroepa Jisas Jerusalem urui-ia ovoiopa wik-ia toupasa, ouruia-ia oeavu rera kotoiva evao parikou-ia, 21:1-27:66.
7. Jisas tova tapi iava vorevira toreroepa. Oa iava disaipel irara iare ora karekeroepa. Uva voea arureva vorarore Vearo Siposipo kosi piepasa, 28:1-20.

### *Jisas Krais Aao Iraraaro Vaisiaro-a Voeao (Luk 3:23-28)*

<sup>1</sup> Voea-a voeao Jisas Krais aao iraraaro. Uva vaiterei-a vaitereo Ebrahim vaio ora Devit rera aaotoareiaro ro Jisas.

<sup>2</sup> ✖ Oire uva Ebrahim-a Aisak aitearo. Ari Aisak-a Jekop aitearo. Uva Jekop-a Juda aitearo ora araoko irara oaro.

<sup>3</sup> ✖ Ari Judas-a Peres aitearo ora Sira vo araorei. Uva aakova oaezi-a o-ia Tema. Uva Peres-a Hesron aitearo. Uva Hesron-a Ram aitearo.

<sup>4</sup> Ari Rama-a Aminadap aitearo. Uva Aminadap-a Nason aitearo. Ari Nason-a Salmon aitearo.

<sup>5</sup> Uva Salmon-a Boas aitearo. Ari aakova-a o-ia Rehap. Uva Boas-a Obet aitearo ari aakova o-ia Rut. Uva Obet-a Jesi aitearo.

<sup>6</sup> Ari Jesi-a King Devit aitearo. Uva Devit-a Solomon aitearo. Oire uva Solomon aakoaro-a Yuriaia vatuvavaaro tuariri.

<sup>7</sup> ✖ Uva Solomon-a Riaboam aitearo. Ari Riaboam-a Abaisa aitearo. Uva Abaisa-a Esa aitearo.

<sup>8</sup> Ari Esa-a Jehosafat aitearo. Uva Jihosafat-a Joram aitearo. Uva Joram-a Asaia aitearo.

<sup>9</sup> Ari Asaia-a Jotam aitearo. Uva Jotam-a Ehas aitearo. Uva Ehas-a Hesekaia aitearo.

<sup>10</sup> Ari Hesekaia-a Manasa aitearo. Uva Manasa-a Emos aitearo. Uva Emos-a Josaia aitearo.

<sup>11</sup> Ari Josaia-a Jekonaia aitearo ora oeavu araoko irara oaro. Oire uva vo vuuta vao oa-ia vo arao touiva Jekonaia arao osa Babilon vata Isrel-pa irara ouiva voea tovosa vo tauai vego-ia Babilon-ia.

<sup>12</sup> ✖ Uva voa Babilon-ia toupaoro Jekonaia Sialtel kavaureva. Oa iava Sialtel-a

Serababel aitearo.

<sup>13</sup> Uva Serababel-a Abaiat aitearo. Ari Abiata-a Elaiakim aitearo. Uva Elaiakim-a Eso aitearo.

<sup>14</sup> Ari Eso-a Sedok aitearo. Uva Sedok-a Ekim aitearo. Ari Ekim-a Elaiat aitearo.

<sup>15</sup> Ari Elaiat-a Eliesa aitearo. Uva Eliesa-a Matan aitearo. Uva Matan-a Jekop aitearo.

<sup>16</sup> Ari Jekop-a Josep aitearo. Uva Josep-a Maria valuatoaaro, o-ia iria Jisas kavaueva. Uva rera-a ro ira vaisiiva oiso, Krais.

<sup>17</sup> Oire uva Ebrahim isivaaro iava katai tau vo resura (14) aao ora kavakavauaepa. Oa iava Devit-ia aue pura piropa katai tau vo resura (14) aaoro. Uva rera vo vuutaaro isivaaro iava ora kavakavauaepa. Oa iava oavu ita katai tau vo resura (14) aaoro ora puraaepa, voeao oea vo karekeepa vao-ia ovuuta-ia touiva vo Babilon-ia. Uva voa toupaoro Babilonia oavu ita katai tau vo resura (14) aaoro ora kavakavauaepa. Uva vo sara-a eva oa isivaaro iava Krais kavauroepa.

### *Maria Jisas Kavaueva*

(Luk 2:1-7)

<sup>18</sup> Oire uva va-a vao Jisas Krais kavauarao iava vo siposipo. Uva aakova-a o-ia Maria iria reesiiva, oiso ra oira oureve Josep. Uva rera ou asavira toueva osa vasevagevira kakae kovu-ia taraiopa ora oira-ia vao oa purareva Tugoropato Uraurato.

<sup>19</sup> ♦ Uva rera ro oira oiratoaaro torevoko vovouto. Ira viapau oiso rugooparoepa ra reo goru sirova Maria arii piereve. Uva oiso ruipaparoepa ra oisivi raga oira kavureve. Reasiparoepa ra riro irara oira-ia taraiave. <sup>20</sup> Oire uva va-ia Josep rirovira rugorugoo iraoparoepa, osa purapurapato enselto Turaro reraaro urioroepa aue-ia urusia rera iare. Uva oiso puraroepa purapurapato, "Josep, Devit aaotoaaro-a vii. Opeita uriripau riakova oara ou arapa Maria. Vo reo uvuri! Ari kakaeto karekeroi oira kovuaro-ia. Eera ira vaterevorao Tugoropato Uraurato oirapa. <sup>21</sup> ♦ Uva kakaeto kavauevere, ra rera vaisiri oiso Jisas. Eake iava? Uvare oirara oaro rutu iava vuriara verareverevara opesi pieoro, ra ora rerapa voea oureve vorevira vova vuria iava."

<sup>22</sup> Vara rutu-a varao oiso karekeepa profet vo reoaro oirao piesa. Oreoa vatereva Turaro profet gisipoaro-ja oiso, <sup>23</sup> ♦ 'Uvatal! Oiso iriavu iria viapau oiratoa vaiva uusiopa iria oiso kakaeto kavaueve. Oa iava rera vaisiivereva Emanyuel.' Uva vo vaisio oa vituaro oiso toupai, Pauto vigei tapo toupareveira. <sup>24</sup> Oire uva Josep uusia iava toreroepa. Oa iava oiso pierava osa Turaro purapurapatoaaro rera tavireva. Oa iava oira oureve Maria.

<sup>25</sup> ♦ Uva viapau oiso oira tapo oisoa uusiparo vore osa kakaeto kavaueva. Oa iava oiso rera vaisireva, Jisas.

## 2

### *Tarai Irara Urioaepa Jisas Kekesa*

<sup>1</sup> ♦ Maria Jisas kavaueva Betlehem urui-ia vo Judia taere-ia, vo osa voa oisoa Herot turaroparo. Oire uva vo vuuta-ia eva oeavu riro tarai irara aaviikoara-ia oea taraioro urioaepa Jerusalem iare tauai iava, vo uva ravireo kae uviroparoveira. <sup>2</sup> ♦ Uva oiso akeiva, "Ovu-ia kakaeto kavauroe ro Turaro oae Jiu? Igei aaviiko sirova utuie iria rera reesipae. Iria kae oviro vova uvava ravireo kaeparo viroveira. Oa iava urioiei rera-ia vuurapa vaisi purasa." <sup>3</sup> Oire uva King Herot vo reo uvureva. Oa iava rikerikeparoepa rirovira uriripaoro ora voea rutu voeao Jerusalem urui sovara-ia. <sup>4</sup> Uva Herot va iava reipa irara gurileva voeao pris irara oea oisoa tauopaave, ora riro tarai irara oea oisoa taraipaave aue-ia Reo Taisi. Oa iava voea akepareva oiso, "Aa vo uruio-ia kavaurovere Krais?" <sup>5</sup> Uva rera taviiva oiso, "Ari Betlehem urui-ia vo Judia taere-ia osa profet irara voari tuariri Pauto vo reoaro rigatoiva oiso,

<sup>6</sup> ♦ 'Vii vao vo Betlehem urui-a vo rasio-ia vo Judia taere-ia. Viapau oiso gare vaisi urui-a vii vo Judia taere sovara-ia. Uvare vii sovara iava iravu reito karekeroverea. Ira ragai voeao tuvetuvereverea voeao tokioro voeao Isrel.'

♦ 1:19: Diu 24:1   ♦ 1:21: Lu 2:21   ♦ 1:23: Ais 7:14   ♦ 1:25: Eks 13:2   ♦ 2:1: Lu 2:4-7   ♦ 2:2: Jer 23:5

♦ 2:6: Mai 5:2

<sup>7</sup> Oire uva oisi-a eisi osa iava Herot oavu iare vataua paua riro tarai irarare keeraroepa voeao oea oisoa aaviikoara-ia taraipaave. Oa iava oiso voea akereva, “E ovirovu voki putevoiva, o-ia taraitae vo osa kaeo viro?” <sup>8</sup> Oa iava voea arureva Betlehem iare. Uva oiso voea tavireva, “Kasikasi pievira rutu rerare taraasa avata. Ra rera keketavora, ragai tavisa voreta. Ra ragai tapo rera-ia vuurapa vaisi puraa.”

<sup>9</sup> Oire uva King Herot vo reoaro uvuiva. Uva avaapea. Oa iava oira eira aaviiko kekeiva oira raga iria keke rovoiva, iria vova kaeo viropa uva ravireo kaeparo viroveira. Uva vo kepao aivaro rueva uvavi-ia kakaeto toupareva. <sup>10</sup> Oire uva aaviiko kekeoro voeare vovousiro roru iraova rutu. <sup>11</sup> ♦ Uva koataaaepa vo kepa-ia kakaeto kekesa ora rera aakovaaro Maria. Oa iava voa kokoto rekuoro takua viropa rera-ia vuurapa vaisi puraoro. Oa iava moni tagiro oaive karuiva. Oire va iava rerapa oaravu vatevateara vateiva auero gol, ora frankinsens avuo geesi ovi, ora oavu mer vearo geesia iisi ovi. <sup>12</sup> Uva urusia-ia Pauto oiso voea vosireva, “Teapi vorepata Herot iare.” Oire uva va iava oraivavu raga gaeoro kareaepa voea vo taerearo iare.

#### *Josep Aao Avaapea Isip Iare*

<sup>13</sup> Oire uva kareaepa vo aao kavuoro. Oa iava enselto Turaro reraaro Josep iare karekeroepa urusia-ia. Uva oiso puraroepa rerare, “Toreu ra ovii avaorei oarava tapo avau torioro Isip iare. Uva voa toupatavere Isip-ia ragai vo reoarore tuepaoro. Oa-ia vii taviavere ra kareu vorevira vo avaoreiva, uvare Herot kakaeto uposa rerare taraaparevere.” <sup>14</sup> Uva va-a vao oa iava Josep aao ora vaseaepa vokiaro Isip iare. <sup>15</sup> ♦ Uva voa touiva osa Herot kopiroepa. Uva oisi-a oiso osa pura piropa profetato vo reoaro oirao piesa oiso osa vo reo vatereva Turaro Pauto tuariri oiso puraoro, ‘Ragai oviiota oaare keeraraepa Isip-ia kavusa.’

#### *Herot Voea Tavireva Kakae Vure Uposa*

<sup>16</sup> Herot oiso tarairoepa, Voeao aaviikoara-ia taraipa irara ragai keaivora. Oa iava rirovira rutu kasipu iraoparoepa. Uva oeavu arureva vo kakaero rutu uposa oea vo peva ivaro-ia tugura asavira toupaiva vo Betlehem urui-ia, ora vo uruiro ouruiroa tutuu pie visivi oisoa toupaive. Aue iava uvare vaore rugooroepa osa tarai irara aaviiko iava rera taviiva oiso, Tuariri o aaviiko kaeo viropa. <sup>17</sup> Oire uva oiso osa varao puraiva Jeremaia vo reoaro oirao pieoro ro profet. Uvare oisi puraroepa voari tuariri oiso, <sup>18</sup> ♦ ‘Gau guruko uvuivoi Rama urui-ia, sirao pie guruko rutu. Ovusa Resel gau iraopaevoi ovii irarapa. Uva viapau irai uvuiparoi ra oira vovouaro sisireve, uvare ovii vure rutu viapau toupai. Oea rutu kopiiiae.’

#### *Josep Ovii Avaorei Tapo Isip Iava Vorevira Kareroepa*

<sup>19</sup> Uva Herot vo kopiaro isivaaro iava Turaro Pauto reraaro enselto Josep iare karekeroepa urusia-ia, vo osa Isip-ia toupareva. <sup>20</sup> Uva oiso puraroepa, “Toreu! Ra ovii avaorei oarava ora vaseu Isrel iare. Ari ro kopiroera ira kakaeto uposa aueparoera.” <sup>21</sup> Oa iava Josep ovii avaoreiaro tapo avaroepa Isrel rasi iare. <sup>22</sup> ♦ Uva voa pou virooro Akeleas iava uvureva, uvare aiteto Herot vo tavukiaro oureva. Uva Judia taere-ia turaroparoepa. Eva-a oa iava Josep rirovira uririparoepa voa tou arapa. Uva Pauto oavu-ia urusia Josep ravaavira tavireva. Oa iava Galili taere iare avaroepa <sup>23</sup> ♦ voa tousa atoia Nasaret urui-ia. Oire uva eisi osa piereva oiso osa va puraiva profet irara voari tuariri. Oreoa oirao piereva oisi voa touoro, uvare oiso puraaepa, ‘Ira vaisiiverea oiso, Nasaret-pato.’

#### *Jon Baptais Reoa Kosi Piereva (Mak 1:2-8; Luk 3:1-18; Jon 1:18-19)*

<sup>1</sup> Uva vo voki-a vao oa-ia Jon Baptais urioroepa raaka tapi tousa oiso Judia-ia. Uva voa oiso siposipo rovoroepa. <sup>2</sup> Oa-ia oiso puraroepa voeare, “Sopaura oavisii poreta, ra vuri

♦ 2:11: Sam 72:10-11   ♦ 2:15: Hos 11:1   ♦ 2:18: Jer 31:15   ♦ 2:22: Lu 2:39   ♦ 2:23: Ais 11:1

vovouro kavuta. Uvare Pauto vo Saraaro tutuu pievoi, ra karekepe vova vuvuiua iava.”

<sup>3</sup>◊ Rera ro Jon ira iava taviroepa profet Aisaia ira oiso puraroepa, ‘Iravu ira keeraparoi vo raaka tapi oiso purapa, Turaro vo raivaaro vatatopopata va ravaaoro oa-ia pouro viroverea.’

<sup>4</sup>◊ Oire uva Jon apota visivi toupaoro aue kamel oruaro iava oisoa rera-ia kuvuparo kuvupato ora takipa iro aue iava bulmakau rakari. Uva aio oaro-a vao-ia siiko ora koisi. <sup>5</sup> Uva vo voki-a vao oa-ia voeao Jerusalem vata, ora voea rutu vova Judia distrik, ora voeao vova Jodan taere-ia rutu urioaepa rera iare Jon. <sup>6</sup>◊ Oa iava vuri vovouro oaiive kosi pieiva rera iare. Osa iava Jon voea-ia Tugoropa Sisu Baptais purareva vo uukova-ia o Jodan.

<sup>7</sup> Oire uva Jon riro irara kekereva lotua-ia irapa irara voeao Farisi-pa irara ora oearovu Sadyusi-pa irara, oearea rutu urioaepa Baptais ousa. Oa iava voeare oiso puraroepa, “Visii vao rakoru ovii iraraaro vuri irara. Irouto visii vosipare, oa iava toripata Pauto vo kasipuaro asavira? <sup>8</sup> Visii iava sopaura poreta, ra vuri vovouro oavisii kavuta. Oa iava oirao pie vovou oavisii poeravira karekepere oearovupa. <sup>9</sup> Opeita oiso vovoupata ora visii raga vovouaro-ia, Ebrahim-a igei aitearo oa iava igei-a Pauto oiraraaro rutu. Easi Pauto raga uvuipa vo avekero iava kakae vure purareve. Ra oiso pieive, Ebrahim ovii iraraaro. <sup>10</sup> Torara eira iriae ravaavira evaova vituaro-ia. Oire vo evaro oiso toupai osa visii, varao oara viapau oiso vearovira kuepape oara rutu taru toepaiverea vara vikipasa tuitui kasi-ia.

<sup>11</sup> “Ragai visii baptaispaavoi uukoa raga-ia visii reesioro visiigoa vovouisiro oavisii poretavora. Ari ro ira ragai sirova uturovere, ira vo goruaro ragai vo goruaro-ia putevere, uvare rei vaisito-a. Uva viapau uvuiparai ra rera vaaro tasipa kaea, uvare akukuto-a ragai. Ari rera visii vatorevere vao baptaisa Tugoropato Uraurato vaaro visii reesipaoro Tugoropato Uraurato vo goruaro-ia ora tuituia vo goruaro. <sup>12</sup>◊ Ira vururua-ia pitupare wit ragipasa oira rakariaro verapaoro. Oa iava oira aioaro orirurevere vo aio kitupa tapi oira rakariaro vikioro tuitui kasi-ia vao roko asa kasi.”

### *Jisas Baptaisreva Jon (Mak 1:9-11; Luk 3:21-22)*

<sup>13</sup>◊ Vo voki-a vao oa-ia Jisas Galili-ia kavureva uuko ovi iare avaoro vao Jodan, oiso ra baptaisa oureve Jon vavaearo-ia. <sup>14</sup> Osa Jon rerare korukoruparoepa oiso purapaoro, “Ae, apeisi ragavira ragai iare uriouei? Easi ragai uvuiparai ra vii ruvara-ia Baptaisa oua?”

<sup>15</sup> Oire Jisas rera vo reoaro pukoreva oiso puraoro, “Eagara, oisi va purave Pauto vo vovouaro sirova utuoro.” Oa iava Jon rerapa vasereva.

<sup>16</sup>◊ Oire Baptaisa oureve Jisas. Uva ikauvira uuko ovi iava veraro viropa osa vuvuiua karu piropa. Uva Pauto reraaro Tugoropato Uraurato kekereva osa oiso vararoepa osa kurue. Uva Jisas-ia pitusa rerereva. <sup>17</sup>◊ Oa iava reoreoa varaepla vuvuiua iava oreoaa-ia oiso puraroepa Pauto, “Rera-a eera Oviitoa oaa. Ira kavikopaaveira rutu rera-ia rorupaoro.”

## 4

### *Seten Kokraparoepa Jisas-ia (Mak 1:12-13; Luk 4:1-13)*

<sup>1</sup> Vo Tugoropato Uraurato Jisas siporeva kuval rasi iare vo uva viapau oirara vai toupaive. Uva voa Seten rera-ia kokara ragaparoepa. <sup>2</sup>◊ Uva Jisas oisoa aio kavuvira toupareve varao-ia vo resura tau (40) vokiro ora vo resura tau (40) ruparo. Oa iava ogoeroepa. <sup>3</sup> Uva rera ruvara iare kokrapato tutuu pierava oiso purasa, “Vosa vii Pauto Oviitoaaro rutu, oire ore aveke reou ra opovira ora poreo.” <sup>4</sup>◊ Uva Jisas rera aatoreva rera vo reoaro tuuoro oiso, “Tugoropata Reo oiso purapai,

◊ 3:3: Ais 40:3   ◊ 3:4: Sek 13:4   ◊ 3:6: Ap 19:4, 18   ◊ 3:12: Mal 3:3   ◊ 3:13: Jo 1:31-34   ◊ 3:16: Ais 11:2, 42:1   ◊ 3:17: Sam 2:7   ◊ 4:2: Eks 34:28   ◊ 4:4: Diu 8:3

*‘Viapau oiso opoa raga tootooa vatepai oiratoapa. Ari oirato uvuiparoi ra tootooa oupareve vo reoro-ia oara vatepareveira Pauto.’”*

<sup>5</sup> Uva va-a vao oa iava Seten rerava avaroepa ouruivu iare Jerusalem urui Rovopa Kepa Tugoropa Kepa kukuearo-ia rera tovosa viara-ia rutu. <sup>6</sup> ♦ Uva rera tavireva, “Vosa vii Pauto Oviitoaaro rutu, oire ora vikiu vova rasiuaarore. Aue iava uvare Tugoropa Reo oisi purapai,

‘Ari ita, ensel irara oaro arurevere Pauto, ra vii pituive vo ora voea vavaearo-ia. Ra viapau vii iava kokotoa tatu piro avekeara-ia.’”

<sup>7</sup> ♦ Uva Jisas rera tavireva ita oiso, “Tugoropa Reo oiso purapai, ‘Opeita Turaro Pautoa oavisii-ia kokarapata.’”

<sup>8</sup> Oire va iava Jisas oureva aia ita Seten oavu iare pukuia-ia riro kaekae pukui. Uva voava varao rutu-ia osararovu rutu Jisas kareke piepareva Seten, varao kekekeke pie sararo vo rasio iava. <sup>9</sup> Uva va iava oiso puraroepa Seten, “Vosa ragai-ia vuurapa vaisi purari ragai iare taku virooro, oire eva-a oa iava vii vateavere osararovu rutu.” <sup>10</sup> ♦ Osa iava rerare oiso puraroepa Jisas, “*Verau Seten! Tugoropa Reo oiso purapai, Pautoa raga-ia vuurapa vaisi purapata eera visii reraaro Turaro. Rara rera raga vo kovoaro purapata eera Kataitoa raga.*”

<sup>11</sup> Uva oisi-a eisi osa iava Seten rera kavureva. Oa iava oearovu enselpa irara urioaepa Jisas tauvasa.

*Jisas Kovo Rovoroepa Vo Galili-ia  
(Mak 1:14-15; Luk 4:14-15)*

<sup>12</sup> Uva Jisas Jon iava uvureva osa rera tovoiva tuukepa kepa-ia. Oa iava Galili taere iare avaroepa. <sup>13</sup> Oire uva voava Nasaret-ia kavureva Kapaneam-ia toupasa. Uva voa vo Kapaneam urui oa Galili rovu ruvara-ia toupaiveira. Oiso ragavira Sebyulan Distrikrei sovara-ia ora Naptalai. <sup>14</sup> Vo taererei iare avaoro profetato Aisaia vo reoaro oirao pierava oreoa-ia oiso puraroepa Jisas iava,

<sup>15</sup> ♦ ‘Vo rasio Sebyulan ora vo rasio Naptalai vo raivao-ia vore toko rovu Jodan-ia toapaoro Galili-ia rupa vovou irara voaaro. <sup>16</sup> ♦ Voeao oirara rutu oea rupa pitupitu-ia oisoa toupaive oea riroa aviavia kekeiverea. Ora voeao-ia roroverea riroa aviavia, oea vo urauraaro kopiivira toupaiveira vo ovusa rupa rugooovira toupaiveira.’

<sup>17</sup> Vo voki-a vao oa-ia Jisas ora rera vo siposipoaro rovoreva. Va poerapaoro oiso puraroepa, “*Poreta viro vuriara oavisii iava. Ari Pauto vo Saraaro vova vuvuiua oa tutuu pievoi!*”

*Vo Jisas Keeraroepa Vo Resurare Oira Atari Oupa Irara Oiso Ra Rera Sirova Utupaave  
(Mak 1:16-20)*

<sup>18</sup> ♦ Jisas vokapareva toko rovu vatuar-ia vao vo Galili. Uva voa vo araoreo kekerева Saimon araorei, ro ira oisoa oiso vaisipaive Pita ora araokoto Andru. Vo osa kuverava vikivikipasiva toko rovu-ia, uvare vo kovo purapatoarei-a aue atari. <sup>19</sup> Uva vaiterei tavireva Jisas oiso, “*Ragai sirova utusi, ra vei siposipoa oira ivupasa ragai iare.*” <sup>20</sup> Uva ikauvira kuverava kavusiva rera taveosa utuoro.

<sup>21</sup> Oire gare visivi vokaoro avaroepa. Oa iava vo araoreo-ia pouro viropa Jems araorei ora Jon, Sebedi oviitoareiaro. Osa oavu sovara-ia toupaiva uvuoa ora ro aiteto Sebedi. Uva voa kuverava torevokopaiva oira rekorekopaoro. Uva voa vo araorei kekeoro vaitereire keeraroepa. <sup>22</sup> Oa iava ikauvira uvuoa kavusiva ora aiteto tapo Jisas sirova utuoro.

*Jisas Oirara Siposipopareva Ora Voea Tapo Porete Piepareva  
(Luk 6:17-19)*

<sup>23</sup> ♦ Voraro rutu virireva vo taereo-ia vao vo Galili vo oirara rutupa siposipopao Reo Taisi Uvupa Keparo-ia aue Sinagog voea varaaro. Uva voeapa Vearo Siposipo kosi piepareva aue iava Pauto vo Saraaro. Oa iava oupiarovu iava oirara porete piepareva, ora

♦ 4:6: Sam 91:11-12    ♦ 4:7: Diu 6:16    ♦ 4:10: Diu 6:13    ♦ 4:15: Ais 9:1-2    ♦ 4:16: Ais 42:7    ♦ 4:18: Jo 1:35-42    ♦ 4:23: Mk 1:39

orekeroyu rutu varao oara oisoa varaura vuri piepaive oirara rutu iava. <sup>24</sup> ♦ Siposipoara rutu viriva rera iava voraro ruture Siria taere sovara-ia. Uva va-a eva vituaro iava vuri upia irara rutu sipopaiva rera iare osasararovu rutuva aue upia, ora voearo oearoa-ia oisoa vuri tungararo toupaive, ora voearo oearoa koakoapeko upiarova oisoa toupaive, ora voearo oearoa oisoa keran upiarova toupaive. Oa iava voea rutu porete piereva. <sup>25</sup> Uva riro irara rutu vova Galili taere, Dekapolis uruiro, Jerusalem-ia, ora Judia-ia, ora vova uukova Jodan ivirovira oearoa rutu rera sirova utupaaepa.

## 5

*Vo Jisas Voeapa Siposiporeva Pukuia-ia Kukuearo-ia Toupaoro*

<sup>1</sup> Uva riro irara kekereva. Oa iava iparoepa pukuia-ia. Uva voa rera utuoro ora guruaepa rera voeaaro disaipel. Oa iava voea rutupa voa siposiporeva pauvira toupaoro.

*Jisas Siposiporeva Vao Iava Oiraopa Roru*

(Luk 6:20-23)

<sup>2</sup> Oire uva Jisas voea vatepareva reoa oiso purapaoro voeare,

<sup>3</sup> “Oire voeo oea apotavira toupaiveira oea roruiverea. Aue iava rara oiso ora voea-ia taraiipaave, Igei apota irara Pauto vo taraiaropa evoea oea Pauto vo Saraaro-ia toupaiveira.

<sup>4</sup> ♦ “Ari voearo oearoa gaupaise siraopaoro, oearoa roruiverea, aue iava rara Pauto voeapa gavaurea vaterere.

<sup>5</sup> “Ari voearo oearoa kave vovouvira toupaiveira, oearoa roruiverea. Aue iava rara voeapa vara rutu vaterere Pauto varao oarare voeapa reo ovoi purareva vara vatesa ora rera vo Saraaro iavirava.

<sup>6</sup> ♦ “Ari voearo oearoa ovovourovu rutupa torevoko vovouro ruipa iraopaave, oiso osa ro ira ogopearo auepa aio ora rogepareve auepa uuko, evoearo oearoa roruiverea. Uvare Pauto voea vo ruiparoaro uvui pieoro vateroverea voeapa.

<sup>7</sup> “Ari voearo oearoa oearovupa siraopaave oea roruiverea, rara Pauto voeapa siraoro.

<sup>8</sup> “Ari voearo oearoa airerei vovouvira toupaiveira, oearoa roruiverea, rara Pauto kekeive.

<sup>9</sup> ♦ “Ari voearo oearoa gavaure vovou kataia goru piepaiveira vo oirara rutu ruvara-ia, oearoa roruiverea. Oeare oiso puraroverea Pauto, Ragai ovii iraraaro visii.

<sup>10</sup> “Ari voeo oea Pauto vo ruipaaro sirova toupaiveira, oire va iava vuria oupaiveira voeao ruvara-ia oea viapau oirao pie vovouro vai, oea taru roruiverea, uvare Pauto vo Saraaro-ia toupaiveira.

<sup>11</sup> “Ari vosa visii kekepaive vo osa ragai sirova utupataveira. Oire visii takaupaise ora visii vuri piepaive, ra oreoreorovu rutu purapaise kuuvu vaisiro visiire ragai iavirava, visiigoa rorutaverea. Oire vo osa oisi eisi visii piepaive visii vuri piepaoro, ra roru iraopata. <sup>12</sup> ♦ Uvare riroa toupaive roria visii vaaro vuvuiua-ia. Ari ita, voari tuariri uva oiso ragavira profet irara oisoa tarioapaise voea-ia vuri pitupituro purapaoro, voeao profet irara oea visiipa oisoa irapaave.

*Ro Oirao Pie Vovouto Ira Oiso Toupare Osa Avaka Ora Aviavia*

(Mak 9:50; Luk 14:34-35)

<sup>13</sup> “Oire visii vao oiso toupata osa avaka voeapa vo rasio-ia. Ari vosa avaka vo sipeiaro opesipe, ra apeisi ragavira vorevira avaka vo sipeiaro vorepe? Ari vosa oisi pieive vovueoro, ra viapau kovo va vao avaka. Oa iava va vikipaive, ra voava va-ia tasiasipaive oirara rutu.

<sup>14</sup> ♦ “Visii-a vao visiigoa oiso toupata osa aviavia rasito vaaro. Oire vosa oai riro urui vai toupaive pukuia vai kukuearo-ia, ra viapau voa utopape. <sup>15</sup> Vosa iravu vuravu rukuereve, oire ra viapau oiso oira tovoreve baket soparo-ia. Ari uvuipa ra oira tovoreve viaevira tebol ivara-ia. Ra voava kepa rutu soparo-ia roropaeve voea rutupa aviavia vatepaoro. <sup>16</sup> ♦ Eisi osa aviavia oavisii roro piepata vo oirara rutu osireiaro-ia. Ra vearo kovo oavisii kekepaive vao oa purapata. Oa iava Aite oavisii vaisiaro kae piepaivre ro vova vuvuiua.

*Pauto Vaaro Iava Reo Taisi*

♦ 4:24: Lu 2:2   ♦ 5:4: Ais 61:2-3   ♦ 5:6: Ais 55:1-2   ♦ 5:9: Ro 8:14   ♦ 5:12: Je 5:10   ♦ 5:14: Fl 2:15

♦ 5:16: 1 Pi 2:12

<sup>17</sup> ♦ “Opeita oiso rugoopata, Ragai uriorai Reo Taisi verasa vao Moses vaaro ora voeao profet irara. Viapau! Easi, va uvui piesa uriorai vo reoro rutu oirao pieoro. <sup>18</sup> Oiraopavira rutu visii tavipaa, Oa-a vao Reo Taisi oa vo tugurasa osa auero rutu karekeperea varao oara Reo Taisi sovara-ia toupaiveira. Uva vuvuiua opesiperea ora rasito, ari viapau oavi gare rigatovi vai opesiperea vova Reo Taisi Pauto vaaro. <sup>19</sup> ♦ Oire vosa ro ira oavivu gareavi putepareve vao iava Reo Taisi, ora vosa oearovu tarai piepareve oisi piepasa, ira vaisiaro garerovere vo Pauto vo Saraaro-ia. Ari vosa ro ira vearovira Reo Taisi sirova utuparoveira oirara rutu tarai piepaoro oisi piesa, ira riro vaisi oureverea vo Pauto vo Saraaro sovara-ia vao vo vuvuiua. <sup>20</sup> Visii tavipaavoi oiso, Vosa torevoko vovouro oavisii viapau Farisi vo vovouroaro-ia puteve varao torevoko vovouro ora voeao Reo Taisi-ia tarai irara, oa iava viapau uvuipatai ra Pauto vo Saraaro-ia koatata.

#### *Kasipua Vo Pitupituaro Iava*

(Luk 12:57-59)

<sup>21</sup> ♦ “Oire vo reo uvutavora oreoa ouiva aao irara oavi oa oiso purapai, ‘Opeita oira upopau. Oire vosa iravu visii iava iravu uporeve, uva rera-a eera ira kortua-ia kosiro virovere.’ <sup>22</sup> ♦ Ari ita, visii tavipaavoi oiso, Ro ira araokotoaarore kasipuparo ira rovirieia-ia kosiro virovere. Ora ro ira araokoto oaro takaupareve eera-a ira rovopatoa-ia kosiro virovere kaunsel. Ora ro ira oiso puraro, Vii-a kokoropatoa rutu, ira tuitui kasi iare avaroverevo vo kasio oa viapau rokopaive.

<sup>23</sup> “Oire vosa rovopa kue oavisii vatesa tapo auepata Pautoa iare roru vaisi purapaoro, oire araokotoa oavisiire rugoo rovota, uvare rera-ia reoai visiire kasipua. <sup>24</sup> Oire rovopa kuero oavisii tovo rovota rerava ora reo rovosa. Ra kasipua opesi pie rovota. Oire ra voreta taru rovopa kue oavisii vatesa.

<sup>25</sup> ♦ “Vosa iravu visii tovosa aueparo kortua-ia, oire uva uvuipatai ra ikauvira rera tapo ora agiagi rovota. Teapi rera visiiva avaro reo rovirieipato vavaearo-ia visii tovosa. Oa iava visii vaterevere polis irarapa. Oire evoea visii tovoive tuukepa kepa-ia. <sup>26</sup> Visii tavipaavoi oiraopavira oiso, Vosa vao visii vaaro voria vo osa tuukepa kepa-ia toupata. Ra viapau va rutu opesi pieta ropa reo rovirieipato, ra viapau oiso tuukepa kepa iava kosi uvirota.

#### *Otopa Pitupituaro Iava*

<sup>27</sup> ♦ “Visii vao vo reo uvutavora oa oiso purapapeira, ‘Opeita ora oupa oaesi vuri piepasi.’ <sup>28</sup> ♦ Ari ita, oiraopavira oiso visii tavipaavoi, Vosa iravu iriavu kekereve riakova, ra rerare sopaua ora sitape oirava garagarakooro. Oire ra va raga rerapa vo vovou purave oirare o riakova. Uva va-a eva oa-ia reo goru gasire vao ora oupa taisi vaaro.

<sup>29</sup> “Vosa ro oirapapato osireito vii kove pierere vuria iare, oire rera tateri rera-ia vikisa. Vearopai vosa orekerovu vova varaua opesipe. Ra viapau oiso ita vii iava varaua oara rutu vikiive vore tuitui kasi vao oa viapau rokopaive. <sup>30</sup> Ora vosa oirapapa vavae vii kove pieive vore vuria, oire vo vavae tokori va-ia vikisa. Vearopai vosa orekerovu vova varaua oara opesipe, ra viapau oiso vii iava varaua oara rutu vikiive vore tuitui kasi vao oa viapau rokopaive.

#### *Ora Oupa Vo Pitupituaro Kavuaro Iava*

(Matyu 19:9; Mak 10:11-12; Luk 16:18)

<sup>31</sup> ♦ “Tuariri vo reo karekeepa oiso, ‘Vosa iravu oirato iriavu kavureve riakova, oire oira vatereve oavu pepa vao oa-ia reo goru iava oreovu toupaive, oiso ra viapau oira oureve vorevira.’

<sup>32</sup> Ari ita, visii tavipaa oiso, Vosa ro ira riakovaaro kavureve o iria viapau otopa pitupitu purapaeve, eera-a ira riakova oaro takau piererevoi reo goru-ia vao ora oupa. Oire ra iravu queve. Osa iava rera tapo ita reo goru gasirevoi ora oupa.

#### *Reo Ovoi Vo Pitupituaro Iava*

<sup>33</sup> ♦ “Oire oavu reoa vao oa ouiva aao irara oavisii tuariri oa iava va uvutavora. Oa oiso purapai, ‘Opeita vii vaaro reo ovoi puteri. Ari varao purari rutu oarare reo ovoi purarivora Turaropa vara purasa.’ <sup>34</sup> ♦ Ari ita, visii tavi iraopaa oiraopavira oiso, Opeita viara-ia vaisi ragapata

---

⊗ 5:17: Ro 3:31    ⊗ 5:19: Je 2:10    ⊗ 5:21: Eks 20:13    ⊗ 5:22: Je 2:20    ⊗ 5:25: Pro 25:8    ⊗ 5:27: Eks 20:14    ⊗ 5:28: Pro 6:25    ⊗ 5:31: Diu 24:1-4    ⊗ 5:33: Lev 19:12    ⊗ 5:34: Je 5:12

reo ovoi purapaoro. Viapau rutu uvuipatai ra vuvuiua vaisi ragapata oreorovu goru pie ragapaoro. Eake iava? Uvare paupa tugoropa Pauto vaaro aue vuvuiua. <sup>35</sup> ♦ Ora opeita rasitoa tapo vaisi ragapata vo oreorovu goru pie ragapaoro. Oavu eva garea paupa oaro Pauto vo rasito uva tasipareveira. Ora viapau uvuipatai ra Jerusalem-ia vaisi ragapata vo oreorovu goru pie ragapaoro. Uvare rei-a urui Turaro vo uruiano. <sup>36</sup> ♦ Ora opeita ora visii kukearaaro-ia rei piepata oreorovu ora visii vo rugooaro-ia. Aue iava uvare viapau rutu uvuipatai ra kukue iava oavu orua popote pieta, eke voua rupa pieta. Viapau rutu. <sup>37</sup> ♦ O ita, uvuipatai oiso purapasa, Iu ita! ora Viapau rutu! Ari vosa ovaisivu outavere ita uvavuva va siguvasa va vao Iu ora Viapau, ra oiso purape, Seten vaaro.

*Ora Tuutuukopa Pitupitu Iava  
(Luk 6:29-30)*

<sup>38</sup> ♦ “Ari ita, visii vo reo uvutavora oreoa tuariri karekeepa oiso, ‘Vosa iravu vii osireiaro vuri piereve, oire vii ita rera osireiaro vuri pieri. Ari vosa iravu vii reuriaro vuri piereve, oire ita vii ita rera reuriaro vuri pieri.’ <sup>39</sup> ♦ Ari ita, oiraopavira visii tavipaavoi oiso, Opeita voearova ora tuutuukopata oea visii-ia vuria pura rovopaiive. Vosa iravu visii tautauaraaro tapareve, oire rerapa ita ovaratavu poreta aia. <sup>40</sup> Ari vosa iravu visii tovo vovouparo kortua-ia, ra visii reraaro ourevee siglis, oire vo popota rutu vateta ora kuvupato. <sup>41</sup> Ari vosa irouto riroto visii kae piereve orekevu-ia, oiso ra katai vuuta-ia va kaepaoro vokata. Oire rera tavita oiso, Erao vuuta-ia viipa va kaepaio. <sup>42</sup> ♦ Ari vosa ro ira visii arepareve orekevure, oire rera vateta. Ora vosa ro ira visii ruvara-ia ou ragasa aeuparo, opeita rerare isivapata.

*Keripa Irara Tapo Ora Agiagipasa  
(Luk 6:27-28, 32-36)*

<sup>43</sup> ♦ “Ari ita, vo reo uvutavora oa tuariri karekeepa oiso, ‘Vii vao voeaopa siraopau ora vii vate iraraaro. Oire ra voeaopa raga tapo ora kasipupau oea viiva ora keripaave.’ <sup>44</sup> ♦ Ari visii oiso tavipaa, Katai vovou purapata voeaopa siraopaoro oearoa visiiva ora keripaave. Oire Pautoa iare variripata ra voea tauvapareve voeo oea visiire vuri vovoupaave. <sup>45</sup> Eisi osa iava oiso uvuipatai oiso kareketa, Aite ovii iraraaro visii ro ira vuvuiua-ia toupareveira oirara rutupa siraopaoro. Oiso osa ravireo kae piepareveira voeaopa vuri irara ora vearo irara. Ora aue tapo kokeva kove piepareveira voeaopa torevoko irara ora voeaopa tapo riro vakuvaku irara. <sup>46</sup> Vosa voeaopa ragapa siraopata oea visii tapo ora agiagipaaveira, ra eake vori outa rera ruvara-ia Pauto va iava vao? Easi voeaopa vuri irara takis oupa irara oea vai pasi viapau oisi vai piepaiveira tapo oiso, raa? <sup>47</sup> Ari vosa vate irara oavisii raga tapo ora reopata, ra va iava rei vaisi outaverea, raa? Viapau. Uvare voeaopa rupa vovou irara tapo oisi piepaiveira oiso. <sup>48</sup> ♦ Oisi vo vovou purapataveira osa vo vovou purapareveira Aite oavisii ro vuvuiua-ia touto torevoko vovoutoa rutu.

## 6

*Oearovivu Tauvapasa*

<sup>1</sup> “Oire visii vao-ia vatatopo iraopata. Teapi taavoko ragapata oearovu osireiaro-ia visii varaaro purapaoro vearo pitupituro. Vosa oisi piepatavere, ra viapau voria vai oavisii outa vo Aite oavisii ruvara-ia vo vuvuiua-ia.

<sup>2</sup> ♦ “Vosa apota irarapa orekerovu vatepata voea tauvapasa, ra opeita va kareke piepata oirara rutu osireiaro-ia. Uva va-a eva osa voearo toupaiveira riro kuuvu irara oearoa oiso varao-ia utavepaaveira vo Reo Taisi Uvupa Kepa aue Sinagog vo raivara sirova ora voea vaisiaro rei piepaoro. Uva oisi-a eisi osa oiraopavira rutu visii tavipaa oiso, Voea-a evoea riro kuuvu irara oea voria oave ou ovoiivora ora voea vaaro. <sup>3</sup> Oire vosa apota irara tauvapata, ra viapau oiso voearo tavitavipata va iava vate irara oavisii vao iava oa purapata voeapa vatauvira. <sup>4</sup> ♦ Oa-ia taraiipa Aite oavisii osa eisi vara purapatavoi rera osireiaro-ia. Oa iava va-ia voria outavere Pauto ruvara-ia.

---

⊗ 5:35: Ais 66:1    ♦ 5:38: Eks 21:24    ♦ 5:39: Pro 24:29    ♦ 5:42: Diu 15:8    ♦ 5:43: Lev 19:18    ♦ 5:44:  
1 Ko 4:12    ♦ 5:48: Lev 19:2; Je 1:4    ♦ 6:2: Ro 12:8    ♦ 6:4: Kl 3:23-24

*Variripa Pitupitu Iava  
(Luk 11:2-4)*

<sup>5</sup> “Oire vosa visii oiso variria purapata, ra viapau oiso va purapata osa voeao riro kuuvu irara. Oearoa tore ruipapaaveira, ra variripaave vo Sinagog Keparo sovara-ia. Ora vo raivara sirova, oiso ra voea kekepaive. Uva oiraopavira rutu visii tavi iraopaa oiso, Voea evoea riro ratarataa vovou irara oea voria oaive ou ovoiivora vo osa oirara raga rei vaisi pieivora. <sup>6</sup> ♦ “Oire vosa variri vovoupata, ra tugiaravi iare koatapata rataoara tupapaoro voa variripasa Aite oavisii iare. Ira vo toupareveira vatau urui. Eera Aite oavisii ira visii-ia taraiparoveira osa vatauvira variripata. Oa iava vara-ia voriaro outaverea.

<sup>7</sup> ♦ “Ora vosa variripata, opeita riroara rutu purapata reo akukuro oiso rutu osa voeao rupa vovou irara. Oea oiso rugoopaa ra riro reoreoro vai rutu purapaise ra Pauto voea uvupareve.

<sup>8</sup> Opeita voeao vo pitupituroaro sirova utupata. Pauto Aite orekerovu rutu-ia taraipa varao oarapa ruipapataveira. Varao oara-ia viapau rera arepata oara-ia taraiparoi.

<sup>9</sup> ♦ “Visii uvuipatai ra oiso variripata,  
Igei Aitearo eisi toupari vuvuiua-ia, vii vaisiaropa avivikepaiei vii vaisiaro kae piepaoro rutu.

<sup>10</sup> Vi vo Saraaro urio pieri. Vi vo vovouaro puraive eisi vuvuiua, oiso osa raga igei uvui iraopaei ra va sirova utuio vo rasito.

<sup>11</sup> Vo vokio igei vateri aioa vao vo vokio iare.

<sup>12</sup> Igei varaaro vuri vovouro verari, vo rara oeavu iava oaravu vuriara vera rovopaoi voeao oea igei vuri piepaiseira.

<sup>13</sup> ♦ Opeita igei tovopari kokara-ia. Vara asavira igei vatatopo piepari kokarapatoapa tugarato Seten.

<sup>14</sup> “Oire uvuta. Vosa oearovivu iava vuri vovouro vera rovopataveira varao oara purapaiseira visii-ia, osa iava Aite oavisii visii iava vuri vovouro oavisii verapareve. <sup>15</sup> Ari vosa viapau oisi eisi piepata, ra ita viapau Aite oavisii visii iava vuri vovouro verapareve.

*Aio Kavupa Pitupitu Iava*

<sup>16</sup> ♦ “Oire vosa aio kavupata rugooara oavisii vatepasa Pautoa-pa, ra opeita ora sirakoisi piepata oiso osa voearo riro kuuvu irara. Aio kavupaoro ora sira keke piepaaveira, oisore ra va iava taraipaave oirara oiso, Eari aio kavupai. Uva oiraopavira rutu visii tavipaa oiso, Oea-a evoea riro ratarataa vovou irara oea voria oaive ou ovoiivora, vo osa oirara raga rei vaisi pieivora.

<sup>17</sup> Ari vosa aio kavupata rugoo vatepaoro rerapa. Oire korovo tovo rovopata vo ora visii kukearo-ia, ora puaura oavisii tapo sisu rovopata. <sup>18</sup> Oire eva-a oa iava oearovu viapau oiso taraipaavere oiso, Voeao aio kavupai. Ari ita, Aite oavisii raga vara-ia taraiparovere. Eera Aite ira visii-ia taraiparoveira osa vatauvira aio kavupata. Oa iava vara-ia voria outavere rera ruvara-ia.

*Vearopara Gurupa Pitupitu Iava  
(Luk 12:33-34)*

<sup>19</sup> ♦ “Visii vao viapau oiso uvuipatai ra veeropara gurupata vo-ia vo rasio-ia. Ari ita, vo rasio-ia atarike kare orekerovu vuri piepaiseira ora aue asikauru. Uva aue tapo kavirupa irara kovokovoara kasuraara tokopaiseira orekerovu kavirupasa. <sup>20</sup> ♦ Ari vosa veeropara gurupata vo Pauto vo uruiaro sovara-ia, uvare voa viapau atarike kare toupaiveira, ora viapau varao asikauruara, ora viapau voeao kavirupa irara oea kasuraara tokopaiseira orekerovu kavirupasa. <sup>21</sup> Oire vo uva veeropara oavisii toupaivere, vo-a vo uva visii vararo rutu rugorugooara oavisii toupaiveira varao rugoopasa veeropara.

*Osireito-a Aviaviaro Varaua  
(Luk 11:34-36)*

<sup>22</sup> ♦ “Oiso-ia osireitoarei-a aoa auepa sopaua. Vosa osireiara oavisii roroioara, oire sopaura oavisii rutu tapo roroiovira aviavivira toupaive. <sup>23</sup> Ari vosa osireiara oavisii vuriara, oire oisi raga ita sopaura oavisii rupavira toupaive. Eisi osa raga ita oiso vosa vo aviavio visii sopao-ia rupavira toupaive, oire ra voava rirope rutu vo rupa vearo vovou rakusa.

◊ 6:6: 2 Kin 4:33 ◊ 6:7: Ekl 5:2 ◊ 6:9: Jo 17:6 ◊ 6:13: 2 Te 3:3 ◊ 6:16: Ais 58:5 ◊ 6:19: Pro 23:4  
◊ 6:20: 1 Ti 6:19; 1 Pi 1:4 ◊ 6:22: Mk 7:22

*Vaiterei Iava Tokipatoarei, Uva Irai Viapau Uvuiparoi Ra Vaiterei Roaropa Kovopareve  
(Luk 16:13)*

<sup>24</sup> “Viapau irai uvuiparoi ra aitereipa kovo tokipatoarei vai kovopareve. Ra ita iravure vuri vovoupaoro iravu ragapa vearovira kovopareve vo iravupa reasipaoro. Oire visii vao-ia viapau rutu uvuiipatai oiso ra kasi pievira rugoopata vaiterei rutu vo kovoreiarore oiso-ia, Pauto vo kovoaro-a vao, ari monito vo kovoaro-a vao.

*Pautoa-ia Rugorugoopasa Rutu Rera-ia Raripaoro  
(Luk 12:22-31)*

<sup>25</sup> ♦ “Eisi osa iava oiso visii tavipaavoi, Opeita rirovira rugorugoopata vo ora visii varaarore aue aioara ora uukoara oavisii varao oara visiipa vearo tou vatepaiveira. Ora varao varoara varaura oavisii oritopasa. Eake-a vao rovopa rutu, tootooa eke aioa vore varaua? Ora eake-a vao rovopa rutu, varaua eke varoa varaua oritopasa? <sup>26</sup> ♦ Oire uva kokio kare kekepataveira oea viapau oiso kukara paupaveira. Ora viapau oiso aio gurupaveira, ra vo tovopave aio gurupa keparo-ia. Ari ita, Aite oavisii ro vova vuvuiua-ia voea aio piepareveira. Easi pasi Aite vo tokiaro visiipa kokio kare vaaro-ia putepaveira vaopa oa vatepareveira visiipa? <sup>27</sup> ♦ Oire iroutoa vaiei visii iava ira uvuiparoi ra ivaara vai sigusiguvarere ora rera vo tootooaro uvuioro, vo rara rirovira rutu rugorugooparo ora rera tootooarore?

<sup>28</sup> “Visii vao eakere tuuparare rirovira rutu rugorugoopataveira? Vearovira rutu rugoopata auere kokookoara oara ratau tou ragapaiveira. Ari ita, viapau oiso ora varapa kasivaripapeira ora tuupara vaire taraapaoro. <sup>29</sup> Ari ita, visii tavipa aue iava King Solomon riro orekeroru rutu-ia pituto ira ora rera raga ora oritoroepa. Uva viapau oiso vearo oritoa vaiaro rera oaiaro oiso osa vao-ia vearoa rutu kokookoa. <sup>30</sup> Iu, isiso kouro toupai varuparo. Oire uva vokipavira vo kouro tateivere vara vikisa tuitui kasi-ia. Uva vara evara okouroa oritopareveira Pauto. Oire uva apeisi-a? Uva viapau uvuiparoi Pauto ra oisi visii tapo oritopareve? Ari ita oiraopavira, viapau oiso uvuivira rutu raripatai rera-ia! <sup>31</sup> Eisi ra opeita rirovira rugorugoopata oiso, Eake vai aiopere, o eake vai-a ukaioviovere, o eakero vai-a ora tuupaviovere? <sup>32</sup> [Ari ita, rupa vovou irara oisi eisi rugorugoopavira varare varao.] Oara rutu-ia taraiparoveira Aite oavisii ro vova vuvuiua varao oarapa ruipapataveira. <sup>33</sup> Oire vearovira rutu rugorugoopata, ra vo rugoo-ia tagau rovopata Pauto vo Saraarore rugoo rovopasa ora rera vo ruipaaro tape. Ra va iava Pauto visii-ia osireoparoverea. Oiso-ia osa iava viapau uvuiipatai ra rera vo tokiaropa apotavira toupataverea. <sup>34</sup> Eisi osa iava visii viapau uvuiipatai ra vo vokiore rugorugoopata vokipavira. Ovokia-ia tavaka uvuivira toupai. Teapi vo vokio iava vo tavakao takuvupata vo vokio iavapa ora vokipavira.

## 7

*Oearovu Vo Rugorugooroaro Rovirieipa Pitupitu Iava  
(Luk 6:37-38, 41-42)*

<sup>1</sup> ♦ “Opeita oirara togapata ikauvira reoara-ia. Uva va-a eva osa Pauto visii tapo ikauvira togarevereia visii rovirieioro. <sup>2</sup> Uva vo pitupitu-a vao oa purapataveira oearovu-ia oirara voea toga ragapaoro reoara-ia ora voea rovirieipaoro, evo pitupitu purarevereia Pauto visii rovirieioro. Vao oa purapataveira oirara-ia voea rovirieipaoro, uva va-a eva oa kareke pierevereia Pauto visiipa. <sup>3</sup> Eakere koroto kekepaoro rera sisipari eera araokoara osireiaro-ia? E viapau ora vii osireiaro-ia evo keposire rugoo rovo asapau? <sup>4</sup> Keposiu-a evoua vii osireiaro-ia. Uva apeisi ragavira uvuiipau ra araokoara taviri oiso, Araoko, oiso ruipaparai ra koroto veraa eera vii osireiaro-ia? <sup>5</sup> Uva vii-a eva riro kuuvuto. Viigoa ora vii iava evo keposi vera rovori oa vii osireiaro tupapai. Oa iava utupavira araokoara osireiaro-ia vuravuravirere vearovira ra koro verau.

<sup>6</sup> ♦ “Oire opeita orekeroru vatepata kaakau karepa varao iava oara tugoropapeira. Vosa oisi voeapa vara iava piepata, oa iava visii sirova utuavere visii aiosa. Opeita vearovpara tapo varao aasiara vikipata koie karepa. Teapi vara-ia tasiasipave vara uverepaoro ora vo kare tasiaro-ia.

*Oirato Uvuiparoi Ra Kasivarivira Variriparo  
(Luk 11:9-13)*

<sup>7</sup> “Areri variria-ia, ra viipa vatereve oa arepari. Ora taraari, ra va kekeri. Ora rataoa totori, ra viipa karureve Pauto. <sup>8</sup> ♦ Voea rutu voeao oea Pautoa-pa variripaave oea orekerovu oupaive. Ora ro ira orekerovure taraapareve, ira vara kekepareve. Ora ro ira rataoa totoreve, irapa karureve Pauto.

<sup>9</sup> “Vosa oviiota vaiaro irai aitetoa vai visii iava, ra irai arepareve oiso purapaoro, Aite, opoa vai ragaipa. Oire ra aveke vai vatereve? <sup>10</sup> Ora vosa aitetu ruvara-ia atari arero, ra rerapa vuriva vai rakoru vai vatereve, raa? <sup>11</sup> Eisi osa toupai oiso, Vosa visii vuri irara oaravu veearopara vatevateara vatepata ovii kakaero oavisiipa, uva va-a eva oa iava ro veearotoa rutu Pauto orekerovu veearopara rutu vateparevere pute pievira voeapa oea rerare variripaaveira.

<sup>12</sup> ♦ “Ovovourovu rutupa ruipapata oiso ra vara purapaive oirara visiipa. Oire vo vovouro raga pura rovopata voeapa, uvare va-a vao Reo Taisi rutu vituaro ora vao profet irara vo sipoipoaro vituaro.

*Gare Rataovi Tootoopa  
(Luk 13:24)*

<sup>13</sup> “Visii vao-ia koatapatai gare rataoavi-ia. Ari vao raiva vore opesipa tapi riroa rutu ora riro paraka. Oa sirova utupaaveira riro irara oirara. <sup>14</sup> Ari vao raiva oa riaaro pipigovira toupaiveira vavagisia rutu vore Tootoopa ratao-ia. Oire uva kataipa iraravi raga va vao pipigo raiva gaeiverea pasi voa koatasa.

*Visii Vao Ora Vatatopo Iraopata Profet Irarapa Voeao Riro Kuuuu Irara  
(Luk 6:43-44, 13:25-27)*

<sup>15</sup> ♦ “Oire voeao vatatopata riro kuuuu irara profet irara. Oea visii iare uriopaavere sipsip rakariro-ia ora kuvupaoro visii keasa oiso, Vearo pitupitu igei vaaro. Uva oiraopavira rutu vara sovara-ia oiso rutu toupaivere osa vavarai kare kaakau kare vo kareo vuri kare. <sup>16</sup> ♦ Uva voeae eveipatavere varao iava voeae vo kueroaro. Ari ita, viapau uvuiapatai ra veearoara vai oupata aioara vai vo evaro iava rokarokapa ovaro. <sup>17</sup> Eisi osa raga veearo ova aio kuero purapaiveira veearopara, ora vao oava vuri kuero purapaiveira vuri ova. <sup>18</sup> Oire vao veearo ova oa viapau uvuipai ra vuri kue vai purave. Ora vosa vao vuri ova oa viapau uvuipai ra veearo kue vai purave. <sup>19</sup> ♦ Oeva toeivere va-ia vikisa tuitui kasi-ia. <sup>20</sup> Uva voeae eveipatavere varao iava voeae vo kueroaro, ra vara iava oiso taraipata voeae-ia, Riro kuuuu irara voeao-ia profet irara.

*Viapau Vii-ia Taraiparai*

<sup>21</sup> ♦ “Visii rutu vao-ia oirara viapau ra oiso rugorugoopata, Oirara rutu ragai vaisipaoro keerapaaveira oiso, Turaro, Turaro, oisore ra koataave Pauto vo Saraaro-ia. Viapau rutu. Ari voeao raga oea ragai Aitearo vo ruipaaro sirova utupaaveira ro vo vuvuiua, oea raga rera vo Saraaro-ia koataaverea. <sup>22</sup> Ari ita, riro irara rutu vo vokio-ia vao oa uriopereea utupaua ragaire oiso puraaverea, Turaro, Turaro. Igei-ia vao igoa vii vaisiaro sovara-ia Pauto vo reoaro vatepaooveira. Ora oearovu tapo iava vuri tuglararo kosi piepaooveira vii vaisiaro raga-ia, uvare riro gorutoa vii. Ora oaravu rutu ravoto kovoro oara tapo purapaooveira. <sup>23</sup> ♦ Oire uva vo voki-ia eva oa-ia voeae taviaverea oiso, Viapau visii-ia taraiparai. Voreta ragai ruvara iava. Visii-ia riro vuri pitupituro purapa irara.

*Vaitereo Iava Kepa Paupatoarei  
(Luk 6:47-49)*

<sup>24</sup> ♦ “Ro ira ragai vo reoaro uvureve ra va sirova uturo, eera-a ira oiso touparevere, Ira-ia veearo rugorugoo toupae. Oa iava kepa oaro paureva avekeara ivara-ia. <sup>25</sup> Ra vosa kokeva koveopa, ora vosa pirutupe ae uuko, ora vosa kiuvu vusireve goruava, oire vara rutu goruaro evara vo kepa-ia ora iupe, ra viapau oiso kovepe. Aue iava uvare simen votopaoi avekeara-ia vo rasito sovara-ia. <sup>26</sup> Ari vosa ro ira ragai vo reoaro viapau uvureve, ora viapau va

♦ 7:8: Jer 29:12-13    ♦ 7:12: Ro 13:8-10    ♦ 7:15: Jer 23:16; Re 16:13    ♦ 7:16: Je 3:12    ♦ 7:19: Jo 15:2, 6

♦ 7:21: Hos 8:2; Ro 2:13    ♦ 7:23: Sam 6:8    ♦ 7:24: Je 1:22-25

sirova uturo, ira oiso toupare, Rera-a eera kokoropato. Ira kepa oaro paureva rogara raga ivara-ia. <sup>27</sup> Uva kokeva urioopa koveoro. Uuko oviro tapo pirutuepa, ora kiuvu tapo vusireva goruava, oire vara rutu evara goruaro vo kepa gugiugiva. Oa iava kove ovoiepa vuri ovoioro.”

*Pauto Vo Goruaro Iava Oisoa Siposipareve*

<sup>28</sup> ♦ Oire uva Jisas vo siposipo opesi pierrevoiva, riro irara rutu oirara tavetave iraopaiva vo reo-ia vao rera vaaro. <sup>29</sup> Eake iava? Uvare viapau oiso voeapa siposiporeva osa voeao tarai irara vao-ia Reo Taisi. Ari oiso rutu toupai, Goruava voeapa siposiporeva.

8

*Oirato Porete Pierewa Jisas Ira-ia Oisoa Lepra Upia Toupaive*

(Mak 1:40-44; Luk 5:12-14)

<sup>1</sup> Oire uva pukui iava vararoepa, oa iava riro irara rutu rera sirova utuaepa. <sup>2</sup> Uva iravu ira-ia oisoa lepra upia toupaive Jisas iare tutuu pierewa. Oa iava kotupiuarei rekuoro takuro viropa rera ruvara-ia oiso puraoro, “Turaro. Vosa ruipapau, ra ragai porete pieri.” <sup>3</sup> Uva Jisas rera-ia vavaea taku pieoro oiso puraroepa, “Oiso ruipaparai, ra sisigarueu.” Osa-a eisi osa iava lepra upia opesi ovoiepa. Oa iava sisigarueroepa. <sup>4</sup> ♦ Uva Jisas rera tavireva oiso, “Vearovira rutu ora vatatopo iraopaei. Opeita irai taviparivere. Viapau. Ari varaua oara karekesa avapau pris irarapa. Ra tauoa vai purari oiso osa Moses tuariri puraroepa. Oa iava oirara rutu taraiavere oiso, Upia rutu vii iava opesiepa.”

*Rom Amiaro Reitoaaro Kovopatoaaro Ira Porete Pierewa Jisas*

(Luk 7:1-10)

<sup>5</sup> Vo Jisas Kapaneam urui-ia koataroepa. Uva iravu ami viurupa irara katai vovoto (100) oirara reitoaaro urioroepa rera goruvira rutu aresa. <sup>6</sup> “Turaro. Ragai reraaro kovopato upiaparoi. Uva reraei kepa-ia. Ira iava keruara rutu kopiepa aue-ia kerau upia.” <sup>7</sup> Uva Jisas rera tavireva oiso, “Ira porete piesa urioravere rara.” <sup>8</sup> ♦ Oire uva rera ro viurupa irara reitoaaro rera vo reoaro pukooro oiso puraroepa, “Turaro. Viapau oiso vearto-a ragai ra ragai vo kepaaro-ia ora kiuu. Ari oiso raga ruipaparai ra vo raga touoro rerare reoreou osa poretero. <sup>9</sup> Ari ita, ragai tapo ro reroarovi toupaavoi ira reesiiva kepten rutu ragai tokipasa. Uva ragai raga oearovuva toupaavoi viurupa irara katai vovoto (100), oea ragai reroarovi ita toupai. Oire uva oiso-ia vosa irai arua voeao iava oiso, Avau, ra avaro. Oire ita, iraire keerara oiso, Uriou, ra urioro. Ra ita kovopatoa oaa ragai reraaro tavia oiso, Vao purari, oire oai purareve.” Oiso puraroepa ami reitoaaro. Uva evo reo oa kosi pieva Jisas vo goruaro. <sup>10</sup> Oire uva Jisas varao rutu uvureva rera ruvara-ia. Oa iava rirovira rutu vara-ia rugorugoo iraoparoepa. Uva voeao tavireva oea rera sirova utupaaepa oiso, “Oiraopavira rutu visii tavipaavoi oiso-ia, Viapau oiso irai kekeavora Isrel-ia oiso osa ro-ia amipa irarapa irapato ira-ia oirao pie vovou toupai.

<sup>11</sup> ♦ “Oire vo reore rugoopatai oiso, Riro irara oisova uriopaavere uvarovu rutuva vo uvava ravireo kaeparo viroveira ora vova uva rokopareveira. Vo uva aueva Ebrahim pauaverea aioa-ia ora Aisak ora Jekop vo vuvuiua Pauto vo Saraaro-ia. <sup>12</sup> Ari ita, oirara rutu voeao Jiu-pa irara rera voeao oea reesireva ora rerapa, oea iava oeavu kosi piererevea vore rupa tapi voeao siguoro ora rera vo tokiaro sovara iava. Oea vurivira gaupaiverea ora voeao reuriaro kuripaoro ora voeapa siraopao.”

<sup>13</sup> Oire uva Jisas viurupa irara reitoaaro tavireva oiso, “Kareu vaviopavira. Vii vaaro oirao pie vovou oa oiraopavira karekepere viipa.” Oa iava vo vuuta raga-ia eva porete ovoiroepa rera kovopatoaaro.

*Pita Aigevaaro Iria Porete Pierewa Jisas*

(Mak 1:29-31; Luk 4:38-39)

♦ 7:28: Mk 1:22, 6:2; Jo 7:46   ♦ 8:4: Lev 14:3-4, 10   ♦ 8:8: Sam 107:20   ♦ 8:11: Mal 1:11

<sup>14</sup> ♦ Jisas koataroepa Pita vo kepaaro-ia. Voa Pita aigevaaro kekereva osa voa kukue upia iava urua-ia gerefira toupaeva. <sup>15</sup> Oa iava oira vavaearo-ia pitureva. Oire uva kukue upia oira kavu ovoiva. Oa iava voava porete ovoioro Jisas-pa aioara vatatopo ovoieva.

*Jisas Oirara Rutu Ora Riakora Porete Piepareva*

(Mak 1:32-34; Luk 4:40-41)

<sup>16</sup> Uva ovaiaro riro irara rutu oirara ora riakora sipopaiva rera iare Jisas voearo oearoa-ia oisoa vuri tugararo rutu toupaive. Oa iava voa voeare reoreoparoepa tugara voea sigupaoro voeo vuri tugararo rutu. Uva voea rutu upiapa irara vorevira poretepaapea.

<sup>17</sup> ♦ Uva oisi-a eisi osa vara purapareva vo reo oirao piepaoro oa purareva Pauto Aisaia gisipoaro-ia ro profetato oiso puraoro,

‘Eera ira upiara rutu vo vavataaro kaereverea vara verapaoro vigei iava.’

*Voeao Oea Jisas Sirova Utusa Ruipa Ragapaave*

(Luk 9:57-60)

<sup>18</sup> Jisas riro irara oirara kekereva oea ora guruaepta rera kovokovopaoro. Oa iava ora rera voearo disaipel tavireva oiso, “Vova iviropavie vavo varata iare.” <sup>19</sup> Oire uva iravu riro taraito Reo Taisi-ia urioroepa oiso rerare purasa, “Tisato. Vosa ragaipa ruipapau, oire ra vegei rutu avave vo uruiro iare uvaroare avapau.” <sup>20</sup> Uva Jisas rerare ora rera iavirava oiso puraroepa, “Ari ita, Akau kare vo tavukiroaro toupai uusipa tavukiro rasiuaaro, ora kokio kare oea vo epitaroaro toupai. Ari ropa Oirato Oviitoaaro Ro Ropoto viapau oiso tavukia vaiei rerapa kukuearo vasepasa.” <sup>21</sup> Oa iava iravu disaipelto Jisas tavipareva oiso, “Ragai ava rovoparai aite tova rovosa, eke?” <sup>22</sup> ♦ Oa iava Jisas oiso rerare puraroepa, “Eagara, voeaoe kopii rugoo irara, oea raga ora tovapaavere osa ragai sirova utuu.”

*Jisas Riroto Kiuvu Rite Pierava*

(Mak 4:36-41; Luk 8:22-25)

<sup>23</sup> Jisas uvua sovara-ia koataroepa. Oa iava disaipel irara rera sirova utuaepa voa.

<sup>24</sup> Oire rirova purepava kiuvuva toko rovu ivara-ia urioopa. Oa iava rirovira rutu uvuoaa petopetopaiva toru kouro osa voa Jisas uusiparoepa. <sup>25</sup> Oire uva va-a vao oa iava disaipel urioaepta rera tore piesa oiso puraoro, “Turaro. Igei tauvari! Easi opesipavie.” <sup>26</sup> ♦ Uva voeare oiso puraroepa, “E apeisi iava uriripatai? Easi gare visivi raga raripatai ragai-ia.” Uva voava toreroepa purepava kiuvuva rakote pie ovoisa ora uuko ovi vara ruture reooro.

<sup>27</sup> Oa iava ora voea raga va-ia tavetavepaoro oiso ora reopaaepa, “Avoeao, eaketo-a irao ro oirato ira gisipoaro uvu ovoivoi vo vatakore kiuvu ora uuko ovi?”

*Oiratoarei Iava Aiterea Iava Vuri Tugararo Verareva Jisas*

(Mak 5:1-17; Luk 8:26-37)

<sup>28</sup> Jisas ovaratavu iava toko rovu-ia pouro viropa vo Gadara vase vaaro. Oire uva voa aitereivu oiratoarei rerava aivarosiva raivaaro aiterea-ia oisoa vuri tugararo toupaive. Oa iava vavaraisiepa tova uruiro-ia uusipaoro. Uva eisi osa iava oisoa oirara ora riakora vo raiva vao viapau oisoa gaepaive vaiterei asavira. <sup>29</sup> ♦ Uva rirovira rutu oivepaoro vaiterei iava keerapaaepa oiso purapaoro, “Vii Pauto Oviitoaaro! Apeisi vai igei piesa uriouei? Vuuta igei vaaro tugura asavira toupaivoi ovusa igei rirovira upia piesa vagevagevira uriouei.” <sup>30</sup> Ovusa oavu koie ragui tauaivi toupaiva aiopaoro. <sup>31</sup> Uva voea voeao vuri tugararo goruvira rutu Jisas arepaiva oiso purapaoro, “Vosa igei kosi piepari, ra vavore igei sипори koie ragui sovara-ia.”

<sup>32</sup> Uva va-a vao oa iava voea tavireva oiso, “Avata!” Uva vaiterei kavuoro koie ragui-ia koatasavaaepa. Uva voava vo ragui riro varivarivira rutu ikauoro varaaepa oavu-ia ora vikisa vagapa toko rovu sovara-ia. Oa iava voa gisiaepa kopii ovoioro.

<sup>33</sup> Uva koie tokipa irara toriiva riro urui-ia kare uvirosa. Uva voa toupaoro voeapa siposipopaiva varao iava oara rutu karekeepa vaiterei-ia tapo aiterea-ia oisoa vuri

tugararo toupaive. <sup>34</sup>◊ Oire uva oirara rutu voeao vo uruia iava Jisas-va aivarosa avaaepa. Oa iava rera kekeoro rerare oiso puraaepa, “Vova igei vo rasiaro iava avau uvai ragare.”

## 9

*Jisas Iravu Oirato Porete Pierева Ira-ia Oisoa Kerau Upia Toupaive  
(Mak 2:1-12; Luk 5:17-26)*

<sup>1</sup> Jisas uvuoasovara-ia koataroepa ovaratavu iare voresa voa vo toko rovu-ia. Uva voava vorevira karero viropa vore rera vo uruiaro torevokoaro-ia. <sup>2</sup>◊ Uva iravu upiapato kaepaoro urioaepa rera iare ira iava keruara rutu kopiiipa. Oire uva Jisas rera vurareva peperava uru ivara-ia osa voa gerefira toupareva. Oa iava voea vararo eveioro rari vovouro oiso puraroepa rerare, “*Sopaua oara kavepe viire. Vuria oara vera ovoiavoi vii iava.*”

<sup>3</sup> Evo reo uvupaoro voeao tarai irara aue-ia Reo Taisi oiso rugorugoopaaepa, Easi ro Pauto toviparevoi.

<sup>4</sup> ◊ Ari ita, vo ovusa Jisas voea vararo-ia tarairoepa rugorugooara. Oa iava oiso puraroepa voeare, “*Eakere eisi ora visii vovouroaro ragaire vurivira rugorugoopatai?*” <sup>5</sup> Ari aa vo reo irao-a oa avekatapai rutu ragaipa, ra va-ia oiso purara, Vuria oara vera ovoiavoi vii iava, eke oiso purara, Toreu ra yokari? <sup>6</sup> Oa-a vao-ia oa purapaavoi visiipa ro vearo pieoro. Oire va kekepaoro oiso purapata ragai iavirava, Oirato Oviitoaaro Ro Ropoto vo goruaro vao-ia oiraopa. Oa-a vao *uvuipai vuriara rutu verapasa oirara iava voeao rasitoa-ia tou irara.*” Oire uva va-a vao oa iava rerare upiapato oiso puraroepa Jisas, “*Toreu, ra uruara kaepaoro kareu vii vo kepaaro iare.*” <sup>7</sup> Uva oisi-a eisi osa iava avaroepa tore ovoioro rera vo kepaaro iare. <sup>8</sup> ◊ Oa iava oirara rutu va vao kekeoro va-ia tavetave iraopaiva. Uva taraipaaepa oiso, Pauto vo goruaro iava vo karopo vao-ia oa vatereva oirarapa. Oa iava Pauto vaisiaro kae pieiva.

*Vo Jisas Matyu-re Keeraroepa  
(Mak 2:13-17; Luk 5:27-32)*

<sup>9</sup> Jisas vokapaoro iravu kekereva osa pauparoepa moni oupa kepa-ia gavman vo kepaaro. Rera vaisiaro Matyu. Oa iava voa rerare oiso puraroepa, “*Matyu, ragai sirova utuu.*” Uva rera sirova utu ovoisa toreroepa.

<sup>10</sup> Oire uva kepa-ia toupareva voa aiooro. Uva voa riro irara rutu takis oupa irara ora riro irara vuri irara oearea rutu rera tapo aiosa urioaepa. Oa iava voea tapo aiopareva ora rera voeaprodisaipel. <sup>11</sup> ◊ Oire uva Farisi va vao kekeiva. Oa iava disaipelre oiso puraaepa, “*Uva apeisi visii reraaro tuvetuvepato voea tapo takis oupa irara ora voeao vuri vovou irara aiopare?*”

<sup>12</sup> Uva Jisas vo reo uvuoro oiso puraroepa, “*Voeao upia asa irara viapau oiso ra avapaave ruvarupatoa iare. Viapau. Ari voeao raga oea-ia upiara toupaive, oea raga uvuipai rera iare avapaave ruvarupato.*” <sup>13</sup> ◊ Visii vao-ia taraia ousa avata vo reo porearo-ia, oreoa Tugoropa Vuku sovara-ia toupaiveira oiso, ‘Vaopa reasiparai tauo purapa pitupitu. Ragoa vaopa ruipaparai tauva vatepa pitupitu.’ Oire viapau oiso voeaore keerasa urioraera torevoko vovou irara. Viapau. Ari voeaore keerasa urioraera rupa vovou irara vuri irara, oiso ra ora voea vararo iava vuriara oaiive porea viro.”

*Jisas Akepaiva Vo Aio Kavupa Pitupitu Iava  
(Mak 2:18-22; Luk 5:33-39)*

<sup>14</sup> Uva vo vuuta-a eva oa-ia Jon voeaprodisaipel urioaepa oiso purasa rerare, “Uva apeisi iava igei rutu vao-ia aio kavupaioveira ora Farisi-pa irara osa vii voeaprodisaipel viapau oisi piepaise?”

<sup>15</sup> ◊ Oa iava Jisas voea tavireva oiso, “*Vosa irai oiratoa vai pitu pie asavira toupareve vo raga sara irara ruvara-ia, ra viapau oiso vovousopaave aioa purapaoro vao ora ousapa aio. Aue iava uvare utupauavi ora voea iava rera veraivere vo osa riako ouro. Oire ra viapau ita voea tapo sara irara toupareve. Uva vo vuuta-a eva oa-ia oisoa aio kavupaave taru voea sara irara rerapa*

◊ 8:34: Ap 16:39   ◊ 9:2: Ap 23:11   ◊ 9:4: Lu 6:8, 9:47, 11:17   ◊ 9:8: Ap 4:21, 11:18, 21:20   ◊ 9:11: Ga 2:15   ◊ 9:13: Hos 6:6; 1 Ti 1:15   ◊ 9:15: Ap 13:2-3, 14:23

siraopaoro, uvare tauaipa voea arova. Osa eisi ragai voeaaro toupaivoi. Oa vituaro iava viapau aio kavupaiveira vo ragai tapo toupaoro.

<sup>16</sup> “Viapau rutu irai uvuiparoi ra ruta vai varoa vai taporeve voava airepa. Vosa oisi pieive, ra ita rutapa karikari piro airepa arova. Ra karia ita riro iraope. <sup>17</sup> Uva viapau irai uvuipa ra tuariripa rakari vai sovara-ia wain ovi vai airepa vai kuvureve. Vosa oisi piereve, ra meme rakariaro kari piro. Ra wain koko viro ovusa va tapo meme rakari opesi ovoipe. Ari vosa aue raga-ia airepa kuvupaave, ra vearovira raga oriruvira toupaive va-ia.” Eisi osa voea vo akearo aatoreva Jon voeaaro disaipel.

*Jisas Reito Jiu Oviivaaro Porete Piereva Ora Iriavu Iria Rera Vaaro-ia Varoa Pitueva  
(Mak 5:22-43; Luk 8:41-56)*

<sup>18</sup> Oire uva Jisas vo reo raga vao purareva, ovusa ro reito urioroepa kokoto rekusa rera ruvara-ia. Oa iava oiso puraroepa, “Vo vokio raga-ia oviiva oaa kopioi. Uva oiso ruipaparai ra uriou oira-ia vavaea tovosa, ra vorevira tooo.” <sup>19</sup> Uva va iava Jisas rera sirova uturoepa ora disaipel irara tapo.

<sup>20</sup> Uva voa-a evoa uva iriavu riakova toupaeva iria-ia oisoa kekira koveparo vokiara rutu-ia. Uva oisi raga toupaoro katai tau erao (12) ivaro-ia tuguraopa. Oire uva oira o rera isivaaro-ia urioopa varoa vatuar-ia pitusa rera vaaro Jisas. <sup>21</sup> Uvare ora vovouaro raga-ia oiso rugorugoopaopa, Vosa rera vaaro-ia varoa pitua, ra va iava vearovira poreteoro. <sup>22</sup> Oire uva Jisas ora poreroepa oirare oiso purasa, “Oviiva oaa. Vii iava sopaua varaaape kaveoro. Ari vii vaaro oirao pie vovou oa vii ravotovira porete pievoi.” Uva vo vuutavi raga-ia eva varaa ovoiopa porete ovoiopo.

<sup>23</sup> Oa iava Jisas voa vo pouro viropa reito vo kepaaro-ia ovusa pupipaiva ora riroa gau guruko purapaiva oirapa gaupaoro. <sup>24</sup> Uva oiso puraroepa Jisas voeare, “Verata vova. Viapau oiso o kopioe kakaeva. Iria uusi ragapaoi.” Oa iava rera agesipaiva. <sup>25</sup> Oire uva oirara rutu veraiva. Oa iava koataroepa Jisas oira vo tugiaro-ia oira vavaearo-ia pitusa. Oa iava tore ovoiopa. <sup>26</sup> Uva vo tavitavi vao vokava voraro vo taere-ia vo rasio-ia.

*Jisas Voosito Vaio Vearo Piereva Ora Iravu Vaaruuto*

<sup>27</sup> ♦ Uva voava vo urui kavureva Jisas. Oa iava voosito vaio rera sirova keerapaoro utupasiepa oiso purapaoro, “Vii Jisas vegei aaotoaaro, Devit Oviitoaaro. Vegeivipa siraou.” <sup>28</sup> Oa iava koataroepa oavu-ia kepa. Uva voa vaitereo voosito vaio Jisas iare uriosiepa. Uva vaitereire oiso puraroepa, “Easi ragai vai-ia raripasiei, oiso ra vao puraa?” Uva oiso purasiepa, “Iu, Turaro!” <sup>29</sup> Uva vavaerei tovoreva vaiterei osirearo-ia aarovira oiso puraoro, “Va-a vao oa reivira karekepere vei vaarova oirao pie vovou.” <sup>30</sup> Oire uva vaitereire osireiara karu piropa. Uva va iava Jisas vaitereipa riro goru reo vatereva oiso puraoro, “Opeita irai tavipasi vao iava.” <sup>31</sup> Oa iava voava kosi virooro rera iava Jisas siposiposa kosisi viropa. Uva voraro rutu viriva vo taereo-ia vo rasia vao.

<sup>32</sup> Oire uva voava avasieiva, iravu ita sipoiva kapuu gisipoto rera iare ira-ia oisoa vurito tugarato toupareve. <sup>33</sup> Oa iava rera ro vurito tugarato kosi piereva rera iava. Uva voaviva vorevira reoroepa. Uva va iava vao-ia rirovira rutu tavetave iraopaiva oiso purapaoro, “Viapau rutu oiso oai karekeepa Isrel-ia oiso osa vao-ia.” <sup>34</sup> ♦ Oa iava Farisi oiso ora reopaaepa, “Easi eera tugara kare reitoaaro vo goruaro iava varao purapare ro Jisas.”

*Jisas Oirara Rutupa Siraoparoepa*

<sup>35</sup> Uva voava Jisas voraro rutu virireva riropa uruiro-ia ora garepa uruiro-ia Vearo Siposipo kosi piepaoro Pauto vo Saraaro iava. Ora oupiarovu rutu tapo iava voea porete piepareva ora oovovourovu iava raveraveara. <sup>36</sup> ♦ Oire uva voa-a evoa uva oeavu riro irara oirara kekeoro siraoroepa voeapa. Eake iava? Uvare voea varaaro rugorugooara piro piropaeapa. Oa iava vurivira rutu toupaiva oiso rutu osa sipsip ragui voeao oea viapau tokipatoa vai oaiive. <sup>37</sup> ♦ Uva eisi osa iava oiso disaipelre puraroepa, “Riroara rutu aioara vioroe oara oiso toupai osa oirao pie asa irara vo ragai-ia Jisas. Osa viapau kovopa irara vai vo voea

♦ 9:27: Lu 18:38-39   ♦ 9:34: Lu 11:15   ♦ 9:36: Esi 34:5; Sek 10:2   ♦ 9:37: Jo 4:35

tavatavipasa. <sup>38</sup> Eisi osa iava uvuipatai ra rore Turaro Pauto variri iraopata ira ruvara-ia toupaiveira vo kovo. Ra va iava kovopa irara vai siporeve vo kovo aioaro gurusa.”

## 10

*Katai Tau Erao (12) Aposel Vaivaisiaro  
(Mak 3:13-19; Luk 6:12-16)*

<sup>1</sup> Jisas katai tau eraore keeraroepa voea iava oea oisoa rera sirova utupaave aue disaipel, auere voeapa goruaro karutusa vuri tugararo kosi piepasa, ora aue okopiirovu rutu iava voea porete piepasa, ora oaravu rutu raverave vovouro verapasa vova varaura.

<sup>2</sup> Oire uva voea katai tau erao (12) vaivaisiaro-a voeao aposel irara oiso-ia, rovopato-a ro-ia Saimon, uva ovaisivu-a vao rera raga-ia aue Pita, ora araokoto aue Andru, ora Jems ro Sebedi oviitoaaro, ora ro araokoto Jon. <sup>3</sup> Ora Filip, ora Batolomyu, ora Tomas, ora Matyu ro moni oupato, ora Jems Alfias oviitoaaro, ora Tadias. <sup>4</sup> <sup>◇</sup> Ora Saimon Selot, ora Judas Iskariot ro ira Jisas kosi piereva keripa irara vavaearo iare.

*Jisas Katai Tau Eraopa Aposel Kovo Vateroepa  
(Mak 6:7-13; Luk 9:1-15)*

<sup>5</sup> <sup>◇</sup> Oire uva Jisas voea voeao katai tau erao siporeva vao kaepasa Vearo Siposipo. Uva voeapa reo vatereva oiso, “Visii vao opeita ratau toupa irara iare avapatavere aue Jentael. Ora opeita tapo Sameria uruiro-ia ora kiupatavere. <sup>6</sup> <sup>◇</sup> Ari visii vao voeao raga iare Isrel-pa irara avapatatai oea opesikoaepa rutu oiso rutu osa sipsip ragui voeao oea opesikopaaveira. <sup>7</sup> Ari ava iraopatai ra oiso ragavira sипопота, Pauto vo Saraaro vao vova vuvuiua tutuuvoi. <sup>8</sup> Uva oearovu porete piepatavere upiapa irara, ora oearovu kopiipa irara rutu vorevira tore piepatavere, ora voearo tapo leprapa irara sisigarue piepatavere, ora oearovu iava vuri tugararo tapo kosi piepatavere. Oire vo goru vao oa outavoi oa-ia viapau oiso voria vaiei. Uva oisi raga ita voea vatetavere akukuvira, ra viapau oiso vori oupata ita va-ia.

<sup>9</sup> “Viapau oiso uvuipatai ra moniara vai kaeoro avata vo resipotara oavisii-ia. <sup>10</sup> <sup>◇</sup> Visii vao viapau uvuipatai ra oapara vai-ia pitupaoro tapo avatavere varao vokapa oaparo ora aue kuvupara vai. Ari katakataivira oaraiva avatavere ora aue tasipara aue tapo tooroara. Oire vosa ro ira vearovira rutu kovoparevere, ira aioa vatea ouparevere voeao ruvara-ia oea tauvaparevere, aue iava uvare voea vaaro-a rerare rugoopasa rera tokipaoro.

<sup>11</sup> “Vosa visii vao ouruirovu-ia riropa uruiro karepata virovere, eke ouruirovu garepa uruiro, oire vearovira rutu oirara eveipatavere oiso, Aa ro avuo-a vearo vovouto kovu taraa vovouto. Oire rera tapo toute vo tugurasa uva vo urui arova ita avata. <sup>12</sup> Vosa okepavu-ia koatata, oire vearo voki purata oirarava ora riakora voeao vo kepa-ia tou irara. <sup>13</sup> Vosa vearo vovou irara vai visiiva ora aatopaavere, oire ra voeapa ita kave vovouro oavisii vatepata. Ari vosa viapau visii aatopaive, oire visii iare ita vorevira visii vararo kave vovouro vorepape varao torevokoara. <sup>14</sup> <sup>◇</sup> Ora vosa ouruivu iava visiipa reasipaave vo visii uvu arapa ora reasipaave visii tapo paupa arapa, ra voa ita kavuta. Ra kokotoara tovetove rovota auere rasi voare voeao vo vuriaro reesipaoro. <sup>15</sup> Oiraopavira rutu oiso osa visii tavipaavoi oiso, Vo vokio vao oa-ia oirara rovirieireverea Pauto, ovokia-ia vo siitoka oa ouverea vo uruireo Sodom ora Gomora urui, ouruirea oisoa vuri pitupitu purapaive vo tuariri. Oa-ia puteverea vo uruio vo vavataaro oa-ia visiipa reasipaave.

*Okasipurovu Rutu Karekepere*

<sup>16</sup> <sup>◇</sup> “Uvuta! Visii sipopavaoi oiso rutu osa sipsip ragui akau kare vuutaaro iare, riro sipsip aio kare. Eisi osa uvuipatai ra kasivarivira rutu rugoo rovopata oiso osa o rakoru riro kasivari rugorugoova, ora oiso osa ro-ia kurue kave vovouto, aiterea vo pitupituaro sirova utupata. [Ra viapau vuri rugorugoora vai purapata.] <sup>17</sup> Oire vatatopo iraopatavere voearopa oearovu oea visii sipopavere Kaunsel irara iare, ra visii rovirieipavie visii ragipaoro voeao vo keparoaro sovara-ia varao Reo Taisi Uvupa Keparo, Sinagog. <sup>18</sup> Ari ita, oiso purapaavere,

<sup>◇</sup> 10:4: Jo 13:26; Ap 1:13    <sup>◇</sup> 10:5: Ap 8:5, 25    <sup>◇</sup> 10:6: Esi 34:5    <sup>◇</sup> 10:10: 1 Ko 9:7    <sup>◇</sup> 10:14: Ap 13:51

<sup>◇</sup> 10:16: Ro 16:19

Oari Jisas voeaaro-a evoea. Oa iava oiso visii oupaive vore gavman irara oaive vavaearo-ia, ora vore turaro irara oaive vavaearo iare tapo. Oisore ra voea rutupa ora voeao ratau tou irara tavitavipata ragai vaisiaro iava. <sup>19</sup> Uva visii kosi piepaiverea kortua iare, ra opeita uriripata oiso rugorugoopaoro, Apeisi purapai? O Apeisi ragavira vo reo purapai? Viapau. Ari evo vuuta raga-ia visiipa Pauto rera vo rugooaro vateparevere. <sup>20</sup> Ra viapau oiso ora visii orugooaro iava tavita. Viapau. Ari Tugoropatoaaro Aite oavisii ira raga reoreoparovere visii gisipoaro-ia.

<sup>21</sup> “Oearovu voearo oea araoko irara oaive oiso vatepaiverea vore gavman vavaearo iare, oiso ra voea kopii piepareve. Ora oearovu oea ovii irara oaive kosi piepaivere gavman vavaearo iare. Ora tapo oiso-ia ovii irara aite irarava ora keripaavere ora aako riako, ra voea vatepaivere gavman vavaearo iare, ra voea kopii piepareve. <sup>22</sup> ✩ Vo vuuta-ia vao riro irara rutu visiire vuri vovou iraopaavere. Eake iava? Uvare ragai vaisiaro-ia toupata. Ari vosa ro ira goruvira rutu Pautoa-ia rugooa tovopareve vo tugurasa Ovoipa Voki-ia, eera-a ira taru oureverea Pauto ora rera vo Saraaro iare. <sup>23</sup> Ari vosa visii-ia oai puraive suria vai vo ouruii-ia riro urui vai, oire visii vao torioro ita avata ourui iare ita. Ari ita, oiraopavira rutu visii tavipaa, Asi viapau oiso kovoara oavisii potu pietavere vo uruiara rutu-ia varao vo Isrel-ia vo osa Oirato Oviitoaaro ragai vorevira vorera vore rasito.

<sup>24</sup> ✩ “Voeao tarai taraapa irara viapau oiso uvuipaai ra tarai vatepatoa-ia putepaive ro voea reraaro. Ora kovopa irara tapo viapau uvuipaai ra reito oaive-ia putepaive. <sup>25</sup> Vosa tarai taraapato oiso toupareve osa ro-ia tarai vatepato rera reraaro, uva vearovai oisi. Ari vosa kovopato oiso toupareve osa ro reito rera reraaro, uva oisi vearovai ita. Vosa vo vaisio vateive ragaipa visii reitoaaro, Bielsebul [ovaisio porearo vao oiso purapai, Seten], ra va iava vearovira taraipata oiso, Visii-a ragai voearo visiigoa tapo vurivira rutu takaupavire.

#### *Opeita Vigei Iavapa Irarapa Uriripata*

(Luk 12:2-7)

<sup>26</sup> “Visii vao viapau uvuipatai rutu ra uriripata voearo oirara. Ari ita, orekerovu rutu vatauara poeravira karekepereea utupaua. Ora vara rutu varao vatau reoro oara rutu poeravira karekepereea ra vara-ia taraiae oirara. <sup>27</sup> Vo reo-a vao oa puraavoi visiipa rupa-ia, oreoa taru vatepatavere vo ravireo-ia roroiovira. Ora vo reo oa ogaga visivi raga oa uvutavoi vao-ia, oreoava uvuipatai ra ora reopa tapiro-ia toupaoro vo reo-ia riropavira reopata. <sup>28</sup> ✩ Ra visii vao opeita uriripatavere voearo oea visii varaaro vuri piepaivere. Ari ita, ra ratarataavira kopiipata osa urauraara oavisii viapau kopiipape. Viapau. Ari ro raga Pauto irapa uvuipatai ra avivikepata. Ro ira uvuipa ra visii iava varaura rutu ora urauraara oavisii opesi piereve vo vuri tapi.

<sup>29</sup> “Garetoareivi voripaiveira kokioatoarei katai toeia-ia akukutoarei. Ari vosa aite oavisii reasiparo, ra viapau oiso kataitoavi kokio kove ragaro vore rasito. <sup>30</sup> ✩ Ari ita, visii kukuearo-ia oruara oavisii vieirevora Pauto Aite oavisii. <sup>31</sup> Eisi osa iava viapau uvuipatai ra uriripata vaopa, uvare viapau oiso toupavereira osa kokio kare akuku kare vo Pauto osireiaro-ia.

#### *Ro Ira Jisas Vaisiaro Iava Tavitaviparo*

(Luk 12:8-9)

<sup>32</sup> ✩ “Ro ira ragai vaisiaro iava tavitavirovere oirara rutu osireiaro-ia, ira iava ita taru tavitavereea Aite osireiaro-ia ro vo vuvuiua. <sup>33</sup> Ari ro ira ragaire isivaroverea vo oirara rutu osireiaro-ia, ragai tapo ita irare isivaravereea vo Aite osireiaro-ia.

#### *Vo Jisas Upoa Kareke Piesa Urirooepa*

(Luk 12:51-53, 14:26-27)

<sup>34</sup> “Visii vao viapau oiso ra oiso rugoopata, Ragai vo upo vo rasito opesi piesa urioraera. Viapau. Ora oiso tapo viapau oiso gavaurea vaiva urioraera, ari aue ragava toorio urioraera upo purapasa.

<sup>35</sup> ✩ Ari vao purasa urioraera ora keripa pitupitu oiso ra, ‘Ovii irara aite irara tapo ora upopaave. Osa ita ovii riakoro aako riakoro tapo ora upopaave, ovusa vaireo aako riakoro taato riakoro tapo ora upopaave.’

<sup>36</sup> Ari ita, katai kepa raga-ia oa-ia tou irara ora voeava upoavereea.’

✩ 10:22: Dan 12:12   ✩ 10:24: Jo 13:16, 15:20   ✩ 10:28: Ais 8:11-13   ✩ 10:30: Ap 27:34   ✩ 10:32: Ro 10:9; Re 3:5   ✩ 10:35: Mai 7:6

<sup>37</sup> “Oire vosa irouto aitetorei ragapa siraoparo, ra viapau ragaipa oisi sirao rovoparo rutu, eeraapa ira viapau oiso vaisiaverea oiso, Vatetoa oaa. Ora vosa irouto ovii vavuatareiaro ragapa siraoparo, ra viapau oiso ragaipa sirao rovoparo rutu, eera ita-a ira viapau oiso vaisiaverea oiso, Vatetoa oaa. <sup>38</sup> Ari ro ira rera vaaro riro vavata siitoka viapau oiso oureve va kaesa ragai sirova utuoro, eera-a ira viapau vaisiaverea oiso, Vatetoa oaa. <sup>39</sup> ✩ Ari vosa ro ira ora tootooaro ragare taraapareve kovopaoro, ira vaaro tootoo taru opesiperea. Ari ro ira ragai raga-ia rugoopaoro rera vaaro tootoo eakapareve, ira oiraopa tootoo rutu oureverea taru.

*Ro Iava Ira Vearoa Voria Oureverea  
(Mak 9:41)*

<sup>40</sup> ✩ “Ari ro ira visii vearepareve, eera-a ira ragai tapo vearepare. Ari vosa ro ira ragai tapo vearepareve, ira Pautoa tapo vearepare ro ira ragai siporeva. <sup>41</sup> Ari ro ira profetato veareoreve aue iava uvare Pauto reraaro-a, ira voria oureverea oiso rutu osa vao profet irara vo voriaro. Ari vosa ro ira iravu veareoreve torevoko vovouto, aue iava uvare torevoko vovou-a rera vaaro oa purapareveira, ira-a eera voria oureverea oiso osa torevoko vovou irara vo voriaro. <sup>42</sup> ✩ Ari vosa irouto voeao iava ragai voeao iravivu vatereve uukoa rera ukaio pieoro, uvare rera-ia taraiparo oiso, Ro Jisas sirova utuparoveira, oire uva oiraopavira oiso visii tavipaavoi ro iava oirato, Ira vao voria rutu ou iraoreverea taru.”

## 11

*Jon Oearovu Disaipel Irara Rera Voeaaro Arureva Jisas Iare  
(Luk 7:18-35)*

<sup>1</sup> Jisas vo reo vaterева kovoara purasa auepa katai tau erao (12) disaipel rera voeааро. Vao isivaaro iava vo uruio kavuoro avaroepa vo uruiro iare tutuu pie uruiro voa voeapa siposiposa.

<sup>2</sup> Vo osa Jon tuukepa kepa-ia toupaoro Krais vo kovoaro iava uvureva. Oa iava oeavu arureva rera voeааро iava disaipel rera iare Jisas. <sup>3</sup> Uva rera-ia pou viropaoro rera akepaiva oiso, “Esa vii-a vao viigoa iava tapiroepa Jon oiso, Iravu urioroverе? Eke aa ro-a irare tuepaiei, eke irai raga?”

<sup>4</sup> Oire uva Jisas voeа vo reoаро pukooro oiso puraroepa, “Vorepata Jon tavisa varao iava orekerovu rutu oara uvuta ora vara keketa oiso-ia, <sup>5</sup> ✩ Voosi irara vorevira vuraivoi. Ora voeаро oearoa iava kokotoara oisoa kopiipape oea tapo vorevira vokaivoi. Ora voeа оеа-ia lepra upiaaro toupaiveira oea tapo sisigarueai. Ora voeаро uvagi irara oea tapo reo uvuai vorevira. Ora voeа kopii irara rutu oea vorevira toootopai. Ora voeа tapo apota irara oeapa Vearo Siposipo puraavoiva, va uvuivoi. <sup>6</sup> ✩ Ari vosa irouto ragai goruvira oirao pieparevere rutu, eera-a ira taru rorupareve!”

<sup>7</sup> Oire uva va iava Jon voeааро disaipel vorevira kareaepa ovusa Jisas voeа isivaaro iava oirara rutu tavitavireva Jon iava. Oiso puraroepa voeа akeoro, “Eake-a vao kekesa avataera vo raaka tapi vo vokio-ia oa-ia Jon iare avataera? Esa pito isiva-ia aisia va ratesa avataera ovusa kiuju vaisi vurevureparevora, raa? Viapau. Uvare Jon viapau oiso raveravea vaiva siposipoparevora oiso osa pito isi. <sup>8</sup> Visii vao eake kekesa avataera? Easi pasi irai vaiva oiratoa vai ratepasa avataera osa veartoа vai-ia kuvuparoera kuvutoa vai? Voeаро iava, pasi, irai oirara oeаро veарopara-ia kuvuparo kepaara raga sovara-ia toupaiveira reipa irara vo keparoaro. <sup>9</sup> Ari eake irao-a oare avataera? Irai vai profetatoa vai kekesa, eke? Iu. Visii tavipaavoi oiso, Eera profetato Jon ira oearovu rutu-ia putepareveira profet irara.

<sup>10</sup> ✩ Aue iava uvare rera iava tавiepa Tugoropa Vuku oa-ia oiso puraepa, ‘Uvuta! Ro sipopaavoi reo kaepato. Ira viipa irarovere, eera ira raiva oara vatatoporevere va ravaaoro viipa.’

<sup>11</sup> Visii tavipaа oiraopavira oiso, Jon Baptais kataito ira oirara rutu-ia putereva voeao oea karekeape vo rasio-ia. Ari ita, vosa aa ro avuo-a ro ira Pauto vo Saraaro-ia akaipavira toupareve, eera-a ira Jon-ia putepare rei vaisi oupaoro.

✩ 10:39: Jo 12:25   ✩ 10:40: Ga 4:14   ✩ 10:42: Mt 25:40; Hi 6:10   ✩ 11:5: Ais 35:4-6   ✩ 11:6: Ro 9:32

✩ 11:10: Mal 3:1

<sup>12</sup> "Voea riro kasipu irara oea rirovira kaureopaaveira Pauto vo Saraarore, uvare oiso ruipaaveira ra Pauto vo Saraaro-ia pituive rutu va vuri piepaoro. Voea vo pitupituaro vao oa rovoiva rutu vo Jon Baptais vo vokiaro-ia. Uva touvira vo vovou voka piepaivoi vo vokio iare. <sup>13</sup> Varao voeao rutu profet irara ora vao Reo Taisi Moses vaaro oearoa rutu Pauto vo Saraaro iava oisoa tavitavipaave vo tugurasa Jon Baptais vo vuutaaro-ia. <sup>14</sup> Oire vosa vo reo uvu ruipapata, ra oiso ragavira taraita, Jon eera-a Ilaija, ira vo urioaro iava tavitaviepa vo reo.

<sup>15</sup> ♦ Ro ira-ia kokito toupareve, oire uvureve!

<sup>16</sup> "Uva aa voeao oea uvuipaai ra voeao tapo ora areiiave vo vokio iavapa irara? Uva voeao evoea oea oiso toupaivoi osa kakae vure, oea paupaa vo uupa tapi okakaerovure keerapaoro. <sup>17</sup> Oiso purapaoro,

Igei visiipa pupiara-ia pupi ragapaio osareasipatai roru arapa. Ora vo osa gau guruko tapo pura ragapaio osareasipatai gau arapa.

<sup>18</sup> Jon urioroepa aio kavuvira ora viapau ukaioparoepa aue-ia wain ovi vai aue korovo. Oa iava oiso puraaepa, Ira-ia eera tugarato vurito toupare. <sup>19</sup> Oire uva Oirato Oviitoaaro ragai urioraepa oearovu tapo aiopasa ora ukaiopasa. Oa iava oiso purapaaepa, Rera keketa riro aioto ora riro ukaioto riroara-ia aue wain oviro korovo. Eera-a takis oupa irara vatetoaaro ora voeao vuri irara. Ari ita, Pauto vo goruaro-a vegei vo kovoaro vituaro ora Jon. Eva-a oa iava vegei vo kovoaro kuearo eveipaivere."

### Siraovira Rutu Ouruirovu-ia Varao Oara Viapau Sopaura Oaive Porepai

(Luk 10:13-15)

<sup>20</sup> Oire ouruirovu-ia uva Jisas riroara purareva ravoto kovoro oirara porete piepara. Uva viapau oiso oearovu iava sopaura oaive porepa piropa. Uva vo voki-a vao oa-ia Jisas voeare kasipuroepa oiso puraoro, <sup>21</sup> ♦ "Siraovira rutu visiipa vao Korasin urui, ora siraovira rutu visiipa Betsaida urui. Vosa ragai oai ravoto kovo vai puraavori Taia uruireipa ora Saidon urui voari rutu tuariri oiso osa vao-ia oa puraavora visii ruvara-ia, oa iava tuariri vuri irara Taia vata ora Saidon vata oearea rutu vuri varorovi raga-ia tuupaaeri ra vo tuurova gavutara raga ivara-ia paupaaave vuri vovouro oaiiveva ariipaoro. Uva va-a eva oa iava vo vovouro evara tavario pirori. <sup>22</sup> Oiraopavira rutu oiso osa visii taviapaavoi oiso, Vo vokio vao oa-ia oirara rovirieireverea Pauto ovokia-ia vo siitoka oa ouverea vo uruireo Taia ora Saidon urui, oarea-ia puteverea vo tavaka visii vaaro. <sup>23</sup> ♦ Ari ita, visii vao Kapaneam vata visiigoa kaeta viroverea vuvuiua iare ora rei vaisipaoro, eke? Viapau. Easi visii oiso vara pieverea vuri tapire. Vosa ragai oai ravoto kovo vai puraavori Sodom urui-ia voari rutu tuariri oiso osa vao-ia oa puraavora visii ruvara-ia, oire ra vo vokio-ia vearovira toupaive Sodom urui. <sup>24</sup> Oiraopavira rutu oiso osa visii taviapaavoi oiso, Vo vokio vao oa-ia oirara rovirieireverea Pauto ovokia-ia vo siitoka oa ouverea vo uruio Sodom urui, oa-ia puteverea rutu vo siitoka visii vaaro."

### Ragai Iare Uriota Reareaa Ousa

(Luk 10:21-22)

<sup>25</sup> ♦ Vo voki-a vao oa-ia Jisas oiso puraroepa, "Aite, vii reipau vo vuvuiua-ia ora vo rasito. Vearovira rutu, uvare varao rutu vatauriva voeao asavira riro tarai irara, oa iava voeao vara karekeparivorao akaipa irara. <sup>26</sup> Iu ita Aite, vii vo ruipaaro oisi raga toupai oiso osa va puraparivoi.

<sup>27</sup> "Ragai Aitearo vara rutu vasereva ragai vavaearo-ia. Uva viapau irai tarai Oviitoa-ia, ari Aitetoa raga kataito ira raga tarai raga-ia. Ora viapau oiso irai tarai Aitetoa-ia, ari Oviitoa raga ragai tarai parai rera-ia, ora voeao oirara oeapa Aite oaa kareke piesa aueparai.

<sup>28</sup> ♦ "Oire visii vao raverave vovou irara orekerovu vavataara kaepaoro visiigoa rutu uriota ragai iare ra visii vatea reareaa. <sup>29</sup> ♦ Ragai vo siposipoaro-a oiso osa evaova kaepa ova vao oa ragai vutuoaro-ia toupaivoi. Oa outa ra va kaeta vo ora visii vutuoaro-ia, ra ragai ruvara-ia tarai outa. Eake iava? Uvare ragai raga gavaure vovou purapaa vo oirara, uvare ora gare pieparai ragai raga. Auere ra visii vao reareaa outa ora visii varaaro-ia urauraara.

♦ 11:15: Re 13:9 ♦ 11:21: Jna 3:7-8 ♦ 11:23: Ais 14:13 ♦ 11:25: 1 Ko 1:26-29 ♦ 11:28: Jer 31:25

♦ 11:29: 1 Pi 2:21

<sup>30</sup> Vao kae ova ragai vaaro oa tovopaa visii vutuoaro-ia vearoa rutu, oa-ia visii vutuo piepaavoi oa-ia viapau oiso vavataa vaiei. Uva vao rutu-a Vearo Siposipo oa-ia visii kae piepaa varaata.”

## 12

*Kovo Arapa Tugoropa Pitupitu Sabat-ia  
(Mak 2:23-28; Luk 6:1-5)*

<sup>1</sup> ♦ Ovokivu-ia Sabat voki utupavira Jisas vokapareva kukara kovo sovara-ia rera voeaaro tapo disaipel ogoevira toupaoro. Oa iava vo kovo iava tueaepa aue kukara. Uva vara aioiva voea raga disaipel irara. <sup>2</sup> Uva va vao kekeiva Farisi. Oa iava rerare oiso puraaepa, “Kekeri vo pitupituo oa purai voeao disaipel oapa tugoropapeira vo vokio Sabat voki.” <sup>3</sup> ♦ Uva Jisas voea akereva oiso, “Easi viapau pasi vo sипосипо виеипатавеира вао иава оса тuariri rutu Devit ogoevira toureva ora rera voeaaaro tapo? <sup>4</sup> Oa-a vao oa iava Pauto vo kepaaro-ia koataaaepa oavu bret aiosa. Oa-ia oisoa Pauto-ia vuurapa vaisi purapaise. Oa iava oisoa tugoropape rutu voeaoa akuku irara raga. Uva oisoa pris irara raga va aiopaise. <sup>5</sup> Easi pasi viapau vo sипосипо виеипатавеира oa vo vukuo-ia toupaiveira oa-ia Reo Taisi toupaiveira vao Moses vaaro? Oa voeao iava tavipapeira pris irara oea oisoa Tugoropa Kepa-ia tauo koko vatatopopaise. Uva oisi eisi kovopaoro Sabat vokiro rutua-ia oisoa Reo Taisi-ia tagaupaise. Uva va iava viapau viria vai voea-ia. <sup>6</sup> Visii tavipaavoi oiso, Orugooovuei oa vo rugoo-ia putepaivoi orugooa purapataveira vore Tugoropa Kepa aue Tempel. <sup>7</sup> ♦ Ari vosa vearovira rutu vo reore rugoo rovota oreoa oiso purapai, ‘Ragai reasiparai auepa tauo, ragoa kaviko vovou ragapa ruipaparai oirara ruvara iava.’ Ra va iava viapau voeaa-ia kasipua tovopata oea-ia viapau viria vai. <sup>8</sup> Easi Oirato Oviitoaaro raga ira uvuiparoi vo oirara rutu vo pitupituroaro rovirieipasa, varao opitupituroa purapaisevo Sabat voki-ia.”

*Vo Sabat-ia Jisas Vuri Vavaeto Porete Pierava  
(Mak 3:1-6; Luk 6:6-11)*

<sup>9</sup> Uva voa vo kavureva Jisas Reo Taisi Uvupa Kepa iare aue Sinagog avaoro voea Jiu vo kepaaro. <sup>10</sup> ♦ Uva voa toupareva iravu vuri vavaeto ira iava vavae keruepa. Oa iava oearovu oiso vovoupaaepa ra Jisas tavatavaeive. Oa iava rera akeiva oiso, “E vearovai ra Sabat vokiaro-ia vo kovo purapape oirara ruvarupaoro, eke?” <sup>11</sup> Oa iava Jisas oiso voeare puraroepa, “Vosa irai visii iava iriaiaro sipsip vai rikui vai-ia koveo Sabat voki-ia, ra va iava oiso taraipavio rera-ia, Easi pasi ro viapau oiso sipsip kae pieparoveira vorevira rikui iava, raa? <sup>12</sup> Easi viapau sipsip ragui voriaro oirato vo voriaro-ia putepaiveira? Viapau. Oire uva va-a eva oa iava uvuipatai ra oirara tapo tauvapata Sabat voki-ia Reo Taisi oavisii sirova utupaoro.” <sup>13</sup> Oa iava oiso rera tavireva rera ro puko vavaeto, “Vavaea oara irairari va torevokooro.” Uva oisi va pierava. Oa iava oiso pieva osa ovavaevu vearo ovoipaoro. <sup>14</sup> Uva va-a vao oa iava Farisi voava vo toreoro avaaepa ora reosa, oiso ra rera upoive.

*Kovopatoa Rutu Jisas Pautoa-pa*

<sup>15</sup> Vosa Jisas vo reo-ia vao tarai ovoiroepa, oire va iava voa kavuoro avaroepa. Uva riro irara oirara rera sirova utupaaepa. Uva voa-a vo uva riro irara upiapa irara ravotovira porete piepareva. <sup>16</sup> Oa iava oiso voea tavipareva voea vosipaoro, “Opeita vao iava tavipatavere ragai iava poeravira.” <sup>17</sup> Eisi osa iava vo reo purareva Pauto profetato gisipoaro-ia Aisaia vao oirao pieoro oa purareva Jisas,

<sup>18</sup> ♦ ‘Ro-ia ragai reraaro kovopato ira ropoavora rera reesioro. Ira kavikopaaveira rutu vovouisi-ia rera-ia rorupaoro. Ira-ia ragai reraaro Tugoropato Uraurato tovo pieaverea. Ira vao kosi piereve ragai vaaro oirara rovirieipa pitupitu vo ratau tou irarapa.

<sup>19</sup> Eera ira viapau kaureoparoverea ora viapau oiso rirovira keeraparoverea takatovira reopaoro vo raivaro.

<sup>20</sup> Aisivu pito isi aisia vikopi. Uva viapau oiso ra vaisi sigu piereve voava. Iravu wik vuravu iava ira gavagavaruvira rovapa. Oire ra va iava rera viapau oiso roko piereve rutu. Oire kovopareverevo vo toupaoro vo tugurasa uva ovovourovu rutu vo pitupituroaro-ia rera vaaro torevoko pitupitu puteve.

<sup>21</sup> Uva oearovu osararovu iava ratau tou sararo rera-ia raripaaverea rerare tuepaoro.'

*Uva Jisas Vaisiiva Oiso, "Bielsebul Vo Goruaro-ia Kovopareveira"*

*(Mak 3:20-30; Luk 11:14-23, 12:10)*

<sup>22</sup> Uva vo voki-a vao-ia oa-ia iravu sipoiva oirato ira-ia oisoa toupareve virito tugarato. Ira iava osireitoarei voosisiepa, ora gisipo tapo rera iava tupao viropa. Oa iava Jisas rera ravotovira porete piereva. Uva vorevira vurareva ora reoreoroepa tapo. <sup>23</sup> Oire uva va-a vao oa-ia voeao riro irara tavetave iraopaiva. Oa iava oiso puraaepa, "Easi pasi Devit Oviitoaaro-a ro-ia ira roporeva Pauto, eke?" <sup>24</sup> Uva va iava Farisi va uvuoro oiso puraaepa, "Easi oiso ragavira vao vituaro toupai. Oa vituaro iava tugara vera purapareveira aue vo goruaro iava Bielsebul tugara kare turaroaro."

<sup>25</sup> Ari ita, tuariri tarai rovoroepa voea varaaro-ia rugorugooara. Oa iava voeare oiso puraroepa, "Vosa oeavu oirara oavu katai sara ora roopa pieave, oire ora upoave ra va iava ora opesi pie ovoiave. Ora vosa oeavu katai urui iava eke katai kepa iava, ra ora roopa pieave vo sararei puraoro, oire ra ora upoave ra vo urui eva eke vo kepa eva viapau toupaise, ora opesi pie ovoiave. <sup>26</sup> Ari vosa Seten voeao sigureve ora rera voeao tugara kare, oire ra va iava rera vo saraaro pute ovoireve. Ra apeisi ragavira rera vo saraaro goruvira toupaise?

<sup>27</sup> ♦ Vosa oiraopavira Bielsebul ragai tauvareve vo tugara kosi piepaoro, oire ra irou voeao oea visii tauvapaiseira vatepaise gorua tugara kosi piepasa? Oire voea evoea visii raga voeao oea raga oiso visii vo vovouroaro ratarataa vovouro oavisii oiso kareke pieive, Visii-a vakuvakupaaverea. <sup>28</sup> ♦ Ari ita, vosa Pauto reraaro Uraurato ragaipa gorua vatepareveira, oire ra rera vo goruaro-ia tugara kosi piepaa. Ra va iava oiso taraipata, Pauto vo Saraaro pou pirora visii iare osa viapau va eveitavora.

<sup>29</sup> "Apeisi-a uvuipa irai oiratoa vai ra riro varivaritoa vai kepaa vaiaro-ia koatato vore, ra auero vaiaro kavirusa? Easi viapau uvuipai. Ari vosa rera tuuke rovoreve iroiro-ia, oire va iava orekerovu rutu rera varaaro kavirureve.

<sup>30</sup> "Vosa irouto ro ira viapau oiso ragai tapo kovopareve, ira-a eera ragaire isivapa. Ora vosa irouto ro ira viapau ragai iare oirara gurupareve, uva rera-a eera ira oirara sikasikapareveira ragai arava.

<sup>31</sup> "Uva eisi osa iava visii taviapaoi oiso, Pauto vuriara rutu verarevere ora orekerovu rutu takau reoro varao oara purapaiseira oirara rutu. Ari vosa ro ira Tugoropato Uraurato takaupareve rera akai piepaoro, eva-a oa-ia viapau Pauto uvuipa ra va verareve rera iava va vao vuria oaro.

<sup>32</sup> Vosa ro ira oavu purareve takau reo ragai-ia, oa-ia uvuipa Pauto ra va verareve. Ari vosa ro ira Tugoropato Uraurato takaupareve, oa-ia viapau uvuipa Pauto oiso ra va verareve rera iava. Eva rera vaaro vuria oava toupareverevo vo vokio ora vo vokiri utupavira rutu. Viapau va-ia opesia vaiei.

*Vo Vuri Ova Kuearo Iava Toupai*

*(Luk 6:43-45)*

<sup>33</sup> "Vosa vearo ova, oire vo eva kuearo tapo vearovira toupaise. Ari vosa vuri ova, oire vo eva kuearo tapo vurivira toupaise. Oire ra va iava vearovira vo evarei eveipari oiso, Vearo ova vao oa kuearo oiso toupai, ari vuri ova vao oa kuearo oiso toupai. <sup>34</sup> Visii vao-ia rakoru ovii iraraaro. Visiigoa uvuipatai vearo reo purasa, raa? Apeisi ragavira? Uvare vuri irara visii! Eake iava? Uvare eakero epao visii sopaaaro-ia evara oara raga visii gisipoaro iava kosipa piroveira. <sup>35</sup> Ro vearto oirato ira sopaaaro-ia vearpa rugorugooro toupaise. Oire ra oisi raga ita vearo reoro kosi piepareve. Ari ro vurito ira sopaaaro-ia vuri rugorugooro toupaise. Ra ita oisi raga ita vuri reoro kosi piepareve.

<sup>36</sup> "Ari ita, oiso visii tavi iraopaa, Varao reoreo akukuro raga oara purapaiseira oirara rutu, oarare Pauto voea rutu akereverevo vo vokio-ia oa-ia oirara rutu rovirieirevere. <sup>37</sup> Oire uva va-a

♦ 12:27: Ap 19:13-16    ♦ 12:28: Dan 2:44, 7:14

vao osa ragavira Pauto visii oirara eveipaoro visii rovirieirevere oiso, Vearoto-a ro ari vurito-a ro vara iava varao oara gisipoara oavisii iava kosipapi.”

*Vo Oearovu Oirara Jisas Akepaiva Ravotoara Kekepasa  
(Mak 8:12; Luk 11:29-32)*

<sup>38</sup> ♦ Uva vo voki-a vao oa-ia tarai irara Reo Taisi-ia oiso puraaeapa ora oearovu Farisi-pa irara, “Tisato. Igei oiso ruijpapaei ra oai purari ravotoa vai, ra oai kekeio.”

<sup>39</sup> Oa iava oiso puraroepa, “Oirara voeao vuri irara oirao pie asa irara vo vokio iava oea taraa ragapaiveira oiso, Eake ravoto reesi vai kekeoro oirao pieive? Ari ita, ragai arepata, uva viapau oiso ra visiipa va puraa. Ari vao raga vao oa keketaverea oiso osa piereva Jona ravotovira.” <sup>40</sup> ♦ Vo tuariri uva Jona vo peva-ia voki toureva ora vo peva-ia rupa riroto atarito sopaarioa. Uva eisi osa ragai ro Oirato Oviitoaaro vo peva-ia voki touaverea ora vo peva-ia rupa vo rasito sovara-ia.” Uva Jisas ora rera iava vo reo tavipareva voeapa oiso, <sup>41</sup> ♦ “Utupaua Pauto oirara rovirieirevere vo vokio-ia oa-ia voeao Niniva kortua-ia torevarea. Oire ra vo vokio iavapa irara togaive reoara-ia. Eake iava? Uvare Jona vo reoaro uvuiva vao oa-ia voeao tavireva. Oa iava sopaaura oaiive poreiva. Ari ita, vo toupare ro ira Jona-ia putepare vo osa viapau rera vo reoaro uvupata vovouisiro oavisii poresa.” <sup>42</sup> ♦ Vo osa vo voki-a vao oa-ia Pauto oirara rovirieirevere ovusa kwin o oisova Siba rovirieia-ia torevarea. Oire ra voeao vo vokio iavapa irara togaeverea reoara-ia. Eake iava? Uvare oira o kwin tauai rutuva urioopa Solomon vo taraiaro uvusa, uvare riro taraito-a. Ari ita, uva vo touparevoi ro ira Solomon-ia puteparevoi.” [Jisas ora rera raga iava voeao tavipareva.]

*Vurito Tugarato Voreroepa  
(Luk 11:24-26)*

<sup>43</sup> “Vo osa iravu iava kosiro viro ro-ia tugarato rera kavuoro vore avaoro raaka tapi voa ora rerapa toua vaire taraasa reareaa taraapaoro. Oire ra taraa ragaparevora.” <sup>44</sup> Oiso puraro, Voreparai vo kepao iare uva tou rovopaaavora tuariri. Oire vorero vo kepa kekesa vo rara vo kepa viouive, ra vo kepa-ia viapau irai. <sup>45</sup> ♦ Oire uva va-a vao oa-ia oisoa oeavu erao vatara tugara tuvetuvepareve ora rera iare, voeao oea vo vovouroaro vuri vovouro oisoa rera vo vovouroaro-ia putepaive rutu. Oire uva voeae rutu tapo koataro vorevira voeae tapo toupasa voa. Ra va iava rera vo touaro ro oirato vuri iraope rutu vo touo-ia puteoro oa-ia rera ro rovopato tugarato oisoa rera sopaaro-ia tou rovopareve. Uva oisi raga ita voeao toupaiverea vuri irara vo vokio iavapa irara.”

*Jisas Aakoaro Ora Rera Araoko Iraraaro Urioaepa Rerare  
(Mak 3:31-35; Luk 8:19-21)*

<sup>46</sup> ♦ Jisas touvira oirara vatepareva reoara osa aakova urioopa ora araoko irara, oisore ra rera tapo ora reoave. Uva ratau toupaiva. <sup>47</sup> Oa iava iravu rera tavireva oiso, “Aako oara uvuri ora araoko irara oara vo avao ratau torepaa. Oea vii kekesa auepaai.” <sup>48</sup> Oa iava Jisas rerare oiso puraroepa, “Irouva aako? Ora irou irara araoko irara oaa?” <sup>49</sup> Oire uva ora rera voeaaaro-ia disaipel pirooro oiso puraroepa, “Aako keketa ora araoko irara oaa.” <sup>50</sup> ♦ Vosa irouto Aite vo vovouaro sirova utuparo ro ira vuvuiua-ia toupare, eera araokotoa oaa ora taataava oaa ora aako.”

### 13

*Vo Toupai Reo Ruu Oiratoa Iava Ro Aio Takuraro Vikipato Varuparo  
(Mak 4:1-9; Luk 8:4-8)*

<sup>1</sup> Uva vo voki raga-ia Jisas kepa iava kosiro viropa toko rovu ruvara-ia paua. <sup>2</sup> Uva riro irara rutu oirara ora guruaepa rera ruvara-ia. Oa iava oavu-ia uvuoja kaero viropa voa paua ovusa oirara rutu rogaraua-ia torepaaepa. <sup>3</sup> Uva riroara rutu reoara purareva voeapa voa aue-ia ovoovo reo. Oa-ia oiso puraroepa voeare, “Iravu iava uvupata ira avaroera wit kokoro vikisa varuparo.

♦ 12:38: 1 Ko 1:22    ♦ 12:40: Jna 1:17    ♦ 12:41: Jna 1:2, 3:5    ♦ 12:42: 1 Kin 10:2    ♦ 12:45: 2 Pi 2:20-22  
♦ 12:46: Jo 2:12    ♦ 12:50: Jo 15:14

<sup>4</sup> “Uva vikivikiparoera aue wit osa oaravu vo kovepaera raivaaro osa kokio kare voa vara aiopasa uriopaaera. <sup>5</sup> Osa oaravu vo kovepaera avekeara ivara-ia vo uva viapau riroa vai rasia vai toupaive. Uva eisi-a osa iava ikauvira kova ragapaera. <sup>6</sup> Vo osa ravireo kaeparo viro vara raverave piesa vara erako pieoro, aue iava uvare viapau vavurupara vai vara piepaivora vara wit kovaro. Oa iava kopiipaera. <sup>7</sup> Ari oaravu vo kovepaera kokopa kouro sovara-ia varao rokarokapara. Oa iava vara ururao papatapaivora rokarokapa kouro vara ruupasa. <sup>8</sup> Vo osa oaravu witara vo kovepaera vearo rasi-ia, uva voa rirovira rutu witara kuepaera oiso, oaravu katai vovoto (100) kuero, ari oaravu katai vatara tau (60) kuero, ari oaravu vo peva tau (30) kuero. <sup>9</sup> Vosa irai-ia kokitoa vai karuvira toupareve, vearpai ra va uvureve, uvare uvupatoa ita kokito.”

*Jisas Vo Pitupituaro Vo Reo Ruuro Purapasa  
(Mak 4:10-12; Luk 8:9-10)*

<sup>10</sup> Uva disaipel irara rera voeaaro urioaepa oiso purasa rerare, “Eakere reo ruuro purapariveira voeare?” <sup>11</sup> Oa iava voeare oiso puraroepa, “Ari ita, Pauto visii kareke pierrevora aue iava vatau reoro vituaro varao Pauto vo Saraaro-ia oara toupaiveira. Ari voeao, viapau. <sup>12</sup> Vosa iravu orekerovu-ia pitupareve. Ra ita Pauto oaravu ita vatereve, ra riroara rutu pura piro rerapa. Ari vosa ro ira oaravu-ia garearavi pitupareve oara evara opesi ovoiperea rera arova. <sup>13</sup> ♦ Ari ita, ragai reo ruu vituaro iava voeapa oiso ragavira puraparai. Uva vura ragapaivo osa viapau vo reo vituaro eveipaivo. Ora va uru pie ragapaivo osa viapau va-ia taraipaa. <sup>14</sup> ♦ Oire voea-a evoea oea-ia vo reo oirao pievira karekepai oa purareva Aisaia profetato oiso puraoro, ‘Visii vao reoara uvu ragapata oa iava viapau taraipatai vara vituaro-ia. Vara vura ragapata uva viapau orekevu avu vai eveipatavoi.

<sup>15</sup> ♦ Aue iava uvare voea ita iava rugorugooara vavagisiepa ora kokiara voea iava uvagiepa, uvare voea raga ora uvagi pieaepa. Ora osireiara oaiive voea iava aauepa, uvare voea raga ora voosi pieaepa. Aue vituaro vosa viapau oisi eisi ragavira toupaive, ra va iava vearovira vurapaise ora voea varaaro iava osireiara. Ora vearovira tapo uvupaise voea varaaro iava kokiara vo rara tapo voea vaaro rugorugooara karuvira toupaive. Ra va iava ragai iare ora goripaave, ra voea porete piepaa vorevira.

<sup>16</sup> “Ari ita, visii vao rorupata, uvare visii varaaro osireiara uvuipai orekerovu kekepasa, ora kokiara visii varaaro uvuipai oreorovu uvupasa. <sup>17</sup> ♦ Oiraopavira rutu oiso osa visii tavipaa oiso, Tuariri riro irara profet irara ora oearovu torevoko irara oea oisoa ruipapaave orekerovu Pauto vo Saraaro iava vara kekepasa, ra va iava viapau vara kekepaise varao oara kekepatavoi vo vokio. Ora varapa ruipapaave vara uvupasa varao reoara raga ita viapau vara uvupaise, varao-ia oara oupatavoi ragai ruvara-ia vo vokio.

*Reo Ruu Vituaro Aviavi Piereva Jisas Aue Iava Ro Aio Takuraro Vikipato  
(Mak 4:13-20; Luk 8:11-15)*

<sup>18</sup> “Visii uvuta ro iava oirato ira-ia reo ruu vituaro toupai aue iava wit takuraro varao oara vikiparevora varuparo. <sup>19</sup> Oire vo osa oisoa oirara rutu voeao vo Pauto vo Saraaro-ia reoara rutu oisoa uvupaise, ra viapau roroipaave vara-ia. Uva va-a eva oa-ia oiso toupai osa takuraro kove ragapapeira raivaro. Oire ra Seten ikaureve vo takuraro verasa varao oara oisoa pau ragapareve Pauto voea sopapro-ia. <sup>20</sup> Uva oaravu wit takuraro kovepaepa vo uva rirovira toupaiva avekeara. Oa oiso toupai, Ro ira ikauvira Pauto vo Saraaro iava vo reo uvureve, ra va iava rorupareve rutu. <sup>21</sup> Osa viapau rera sopapro-ia oriruvira toupaive vo reo oa uvupareve. Oreoa oiso toupai osa ikopito ro ira viapau avekeara rutu-ia goruvira pitupare rokopaoro. Oire utupauavi oearovu Pauto vo reoaro tekipasa opitupiturovu purapaise ro oirato vuri piepaoro. Oa iava rera vaaro rari vuku viapau uvupai ra gorupe vo osa va kavureve. <sup>22</sup> ♦ Oire vo osa oaravu wit takuraro kovepaepa vo uva kokopa kouro toupai uva va-a eva oiso ragavira toupai, Ro ira Pauto vo reoaro uvu ragareve varao rirovira vovousopaoro vo rasio-ia oiso osa varao orekerovu varaura oritopasa ora auero moniara. Uva var-a eva oara oisoa Pauto vo reoaro vuri piepave vo

♦ 13:13: Jer 5:21 ♦ 13:14: Ais 6:9-10 ♦ 13:15: Hi 5:11 ♦ 13:17: Hi 11:13 ♦ 13:22: Ro 12:2; 2 Ko 4:4

rera sopaaro-ia, ra viapau aio kue vai rera-ia karekepe. <sup>23</sup> Ari vao wit oa kovepe vo vearo rasia oa oiso toupai, Ro ira reo uvuro vo rara rerapa aviatave, oire ra vare rugooparo. Oa iava rerapa kuepe oiso, katai vovoto (100), ora katai vatara tau (60), ora vo peva tau (30)."

#### *Reo Ruu Aue Iava Isiso Kou Vuri Kou Oa Karekepapeira Varuparo*

<sup>24</sup> ♦ Oire uva Jisas oavu reo ruu vatereva ita voeapa oa-ia oiso puraroepa, "Pauto vo Saraaro oa oiso toupai, Iravu oirato vearo takuraro wit takuraro vikipareva varuparo vo rera voaro.

<sup>25</sup> Ari ita, vo osa oirara rutu uusiate osa rera ro keripato urioro. Oire ra vuri takuraro isiso takuraro vikireve wit takuraro sovara-ia. Oa iava vorero. <sup>26</sup> Oire uva wit kovo kovaepa. Oa iava kuesa aeapaepa. Uva vuriva isiso kekeiva vo kovo sovara-ia. <sup>27</sup> Oa iava kovopa irara avaaepa ro iare ira vo kovoaro-a. Uva rerare oiso puraaepa, Turaro. Igei oiso rugoopaei, Vearoara rutu wit takuraro vikirivora varuparo. Uva eake iava vuri kou isiso kou karekei?

<sup>28</sup> "Oire uva oiso voeare puraroepa, Easi keripatoa va-ia eera ira eisi evo kovo pierevo. Oa iava kovopa irara oiso rerare puraaepa, Uva apeisi vovoupau? Ra avaio oira aruosa eira vuriva isiso? <sup>29</sup> Uva voeare oiso puraroepa, Viapau. Teapi aruopaoro isiso kou vuri kou sovara-ia wit tapo tatepata. <sup>30</sup> Vairei rutu eakata, ra vairei rutu riroere vo tugurasa uva vairei kuearo tokopere. Oire ra visii tavia visiigoa vo kovoaro-a. Ra oira vuriva isiso guru rovotavere oira tutuukeoro vo tuukero kasisa. Oa isivaaro iava wit kuearo gurutavere ragai vo kepaaro-ia aio orirupa kepa."

#### *Vo Toupa Mastet Kuearo Iava Ora Yis Reo Ruu*

(Mak 4:30-32; Luk 13:18-21)

<sup>31</sup> ♦ Jisas voea vatereva oavu reo ruu oa-ia oiso puraroepa, "Sara vao Pauto vaaro oa oiso rutu toupaiveira, Oavu aioa oa oiso vaisipaiiveira, mastet. Uva iravu oirato oaravu oureva vara paua rera vo kovoaro-ia va kuearo iava. <sup>32</sup> ♦ Gare isivi rutu aisia-ia putepaiveira orekerovu rutu kuearo. Uva vosa kovape, ra kovaoro ipape, ra vara rutu-ia puteve evaoara riropavira rutu rao puraoro. Ra virata kokioro uriopaave epitapasa voa."

<sup>33</sup> ♦ Oire uva oavu ita kosi piereva reo ruu voeapa oa-ia oiso puraroepa, "Vao Sara Pauto vaaro oa oiso rutu toupaiveira osa yis. Vosa iriavu riakova va oueve va tapo uveresa aue tapo plaua, oire va iava va vao plaua kae piro riropaoro."

#### *Jisas Tavitaviparoepa Reo Ruu Raga-ia*

(Mak 4:33-34)

<sup>34</sup> Vo reoro rutu varao oara-ia Jisas voeapa oirara rutu oiso siposipopareva ruuvira. Uva viapau oiso oai-ia voeapa aviavi pievira taviparoepa. Ari ruuvira raga voeapa siposipopareva. <sup>35</sup> ♦ Uva eisi-a osa vo reoa vao oa iava siposiporeva voeapa vo reo oirao piesa oa vatereva profetato. Oa-ia oiso puraroepa, 'Ragai gisipo karuavere ruuvira reororo. Ora vo reoro iava tativavere vatau reoro, oreoroa oisoa toupaive vova vo rasio rovoaro.'

#### *Reo Ruu Vituaro Aviavi Pierava Jisas Vuri Kou Iava Isiso Kou*

<sup>36</sup> Oire uva Jisas voea arova oirara avaroepa kepa iare. Oa iava voa rera iare rera voearo disaipel irara utuaepa oiso rerare purasa, "Igei taviri vao iava reo ruu aue iava isiso kou vao oa karekeepa vo varuparo. Va vituaro kosi pieri igeipa."

<sup>37</sup> Uva voea vo reoaro pukooro Jisas oiso puraroepa, "Ro oirato ira vearo takuraro vikireva eera-a Oirato Oviitoaaro Ro Ropoto. <sup>38</sup> ♦ Uva va-a vao kovo vo-ia rasitoa rutu-ia. Ari aue-ia vao-ia wit takuraro kuearo, voeao oirara oea Pauto vo Saraaro sovara-ia toupaiveira. Uva isiso vuriva oiso osa oearovu vuri irara Seten voearo. <sup>39</sup> ♦ Eera ro-ia keripato ira oisoa isiso takuraro vikipareve, ira-a vuriara aue Seten. Oire uva vo voki-a vao-ia aio kovo aioaro gurupa voki, vao-ia ovoiopa vuuta oa-ia aioara guruiverea voeao-ia purapurapa irara ensel. <sup>40</sup> Ovokia-ia taru vuriva isiso guruiverea oira vikisa tuituia-ia. Eisi raga osa pieiverea Ovoiopa Vuuta-ia vao vo rasitoa-ia. <sup>41</sup> Uva Oirato Oviitoaaro enselpa irara siporevereera ora rera voearo. Ra orekerovu rutu ouive varao oara oirara oirao pie vovouroaro vuri

❖ 13:24: Lu 13:18-20    ❖ 13:31: Mai 4:1    ❖ 13:32: Esi 17:23    ❖ 13:33: Ga 5:9    ❖ 13:35: Sam 78:2; Ro 16:25-26    ❖ 13:38: Jo 8:44    ❖ 13:39: Re 14:15

piepaiveira ora voeao tapo oirara oearoa vuri pitupituro purapaiveira. Oea vova veraiverea Pauto vo Saraaro-ia.<sup>42</sup> Uva vo voea vikiiverea riroa-ia tuitui kasi. Uva vo kasi-a vao-ia tuitui kasi oa-ia vurivira gaupaiverea siraovira ora reuriara oaive kuripaoro.<sup>43</sup> Oire uva vo voki-a vao oa-ia voeao Pauto voeaaro oirara torevoko irara sisikorepaiverea aviavipaoro oiso rutu roropaoro osa ravireo vo Aitetoo oaive vo Saraaro sovara-ia. Ari ita, ro ira-ia kokito toupareve oire vo siposipo orirureve.

#### *Reo Ruu Ro Iava Oirato Ira Moni Bokis Kekereva*

<sup>44</sup> ♦ “Vao-ia Pauto vo Saraaro oa oiso rutu toupaiveira osa moni bokis vao oa oisoa vataupape varuparo kovoia-ia. Uva iravu va kekereva. Oa iava va vataureva ita vorevira. Uva va-ia rorupaoro kareroepa oaravu rutu-ia moni ousa ora rera varaaro. Uva vara voriiva rera ruvara-ia. Oa iava vo moni-ia vo rasi vorireva ora rerapa.

#### *Reo Ruu Vao-ia Aue Iava Aasi Isi Riro Vori Isi Rutu*

<sup>45</sup> “Vao-ia Pauto vo Saraaro oa oiso rutu toupaiveira osa ro iravu oirato ira oisoa aasi isirore taraapareve vaisiro voripasa.<sup>46</sup> Oire uva aisivu kekereva vearo isi rutu. Oa iava orekerou rutu-ia ora rera varaaro monia ousa avaroepa. Oa iava vaisi vorireva vaisio vearo isi rutu aasi isi.

#### *Reo Ruu Kuverava Iava*

<sup>47</sup> ♦ “Pauto vo Saraaro oa oiso rutu toupaiveira osa kuverava o iria oisoa vikipaive toko rovu-ia. Oire ra oira-ia osasararovu rutu kuverapaive aue atari.<sup>48</sup> Oire vosa agasio kuverava, ra oira ivuoro oira vera pieive. Ra pauave vearopa kare rovirieisa voea guruoro atari kare. Ra vo kareo tovoive vearopa kare vo pekuri-ia vo kareo vuri kare vikipaoro.<sup>49</sup> Eisi osa toupai vao-ia Ovoiopa Vuuta osa pieiverea vo rasio-ia voeao enselpa irara. Oea urioaverea vearopa irara sovara iava vuri irara roporopopaoro<sup>50</sup> voeao vikipasa tuitui kasi-ia. Oire uva voa-a evoa uva vurivira siraopaaaverea gaupaoro ora reuri oaive raga kuripaoro.”

#### *Oirato Ro Ira Airepara Ora Rutaara Oupareveira*

<sup>51</sup> Uva Jisas oiso voea akereva, “Asi visii vai taraiptatai varao vituaro-ia reoara?” Uva oiso rera taviiva, “Iu.”<sup>52</sup> Oa iava Jisas voeare oiso puraroepa, “Oire vo osa voeao voeao tarai irara Reo Taisi-ia vao Moses vaaro oea uvuipaaia Pauto vo Saraaro-ia tapo tarai oupaave. Oea oiso toupaivoi osa ro ira kepa tokipareve rera vaaro kotokoto gurupa kepa. Oire ra voa koatara oaravu ousa airepara ora rutaara, ra vara rutu kosi piereve.”

#### *Vo Jisas-re Isivaaepa Nasaret Vata*

(Mak 6:1-6; Luk 4:16-30)

<sup>53</sup> ♦ Oire uva Jisas reo ruuro pura rovorevoiva, vo urui kavuoro avaroepa.<sup>54</sup> Uva voare avaroepa vo ora rera vo taerearo rutu-ia voa Pauto vo reoaro vatesa oirarapa Reo Taisi Uvupa Kepa Sinagog. Uva va-a vao oa iava ora sitaaepa. Oa iava rirovira tavetave iraopaa oiso purapaoro, “Vo tarairo-ia ora varao ravotoara, ovu irao vara ourevorao rera ro-ia?<sup>55</sup> ♦ Esa kepa paupatoa avu oviitoaaro-a ro-ia, eke? Easi viapau oiso Maria oviitoaaro-a ro-ia? Ora viapau oiso rera araoko iraraaro-a voeao-ia, Jems vase ora Josep, ora Saimon, ora Judas evoea?<sup>56</sup> Ora vairo taataa riako rutu airoa vigei tapo toupaiveira? Oire uva ovu rutu-a vo uva varao ou iraorevorao?<sup>57</sup> Oa iava Jisas voeare oiso puraroepa, “Ari ita, profetatoapa avivikepaaaveira vo uruiara rutu. Ari vo ora rera vo uruiaro rutu uva viapau avivikea vaiiei rerapa ora vo rera vo kepaaro rutu-ia.”<sup>58</sup> Uva va-a vao oa iava viapau uvuiparoepa ra riroara vai rutu purareve ravotoara vai vo urui-ia vao rera vaaro. Aue iava uvare viapau rerapa avivikepaaepa ora oisoa rera vo reoroaro reroaropae.

## 14

#### *Jon Baptais Kopiiroepa*

(Mak 6:14-29; Luk 3:19-20, 9:7-9)

<sup>1</sup> Oire uva vo vuuta-a vao oa-ia Herot ro Galili vata turaroaro Jisas iava uvureva.<sup>2</sup> Oa iava ora rera voeao kovopa irara tavireva oiso, “Jon Baptais eera ira tova tapi iava toreroin ravotopa goru ouoro.” Oire oiso-ia osa ragavira iava Jon-ia rugooroepa. Aue

♦ 13:44: Ais 55:1   ♦ 13:47: Mt 22:10   ♦ 13:53: Mt 7:28   ♦ 13:55: Jo 6:42

vituar iava uvare <sup>3-5</sup>  $\diamond$  Herot ira Herodias oureva rera araokotoaaro Filip valuavaaro. Iriapa oisoa Herot-re oiso puraparo Jon, "Viapau uvipai ra araokotoara riakovaaro ouri. Viapau oisi torevokopapeira." Oa iava Herot Jon-ia rovorovosiparoepa, oiso ra rera uporeve. Uva aue ragapa uririparo Jiu-pa irara, oa iava viapau voa rera uporeva. Aue iava uvare voeao Jiu-pa irara oiso rugorugoopaaepa, Profetato ro-ia Jon. Oa iava Herot Jon raureva rera tuukesa sen iro-ia. Uva rera tovoreva tuukepa kepa-ia.

<sup>6</sup> Oire uva vo voki-a vao oa-ia Herot kavaueva aakova ovokia-ia aioa purareva vo voki-a rugorugooro vao oa-ia rera kavaueva. Uva oearovu rutu tapo pauroepa vo aio-ia vao-ia. Uva vo aio aiopaiva osa Herodias oviivaaro urioopa vearovira rekurekusa rauraupaoro voea rutu osireiaro-ia. Oa iava oira vurapaoro rirovira Herot rorupareva rutu ovusa rekurekupaeva. <sup>7</sup> Uva reo ovoi purareva oirare oiso puraoro, "Vosa eakepa ruipapau, oire ragai taviri, ra vii vatea oai." <sup>8</sup> Uva aakova Herodias oirapa orugoovu vateeva oa-ia oiso puraopa, "Jon Baptais kukuearo tokopari. Ra ragaipa oira tovori tauo vai-ia."

<sup>9</sup> Uva eisi-a osa puraoiva, King Herot sopaaro vavataroepa. Oire uva vorevira vo reore rugorugooroepa ita oa purareva voea osireiaro-ia oiso puraoro, "Vosa eakepa ruipapau, oire ragai taviri, ra vii vatea oai." Oa iava oira vo rugooaro iava pura ovoi piropa. <sup>10</sup> Oa iava iravu arureva tuukepa kepa iare Jon Baptais kukuearo tokosa. <sup>11</sup> Uva rera kukuearo sipoiva iriavu-ia tauo. Uva oira vateiva o tavauruva vo koko. Oa iava vo koko siposa avaopa aakovapa. <sup>12</sup> Uva voeao Jon voeaaro disaipel oea urioaepa varaua ousa rera iava vroua tovasa. Uva rera tovaiivoiva Jon, avaaepa Jisas tavisa.

#### *Jisas Ravoto Aio Purareva Vo Vavae Tukupa (5,000) Aue Oira*

(Mak 6:31-44; Luk 9:10-17; Jon 6:1-13)

<sup>13</sup> Jisas vo reo uvurevoiva, vo uruio kavuoro avaroepa oavu-ia uvuoia ipasa uvavure avasa kuvala tapi uva viapau oirara vai toupaive. Rera raga voare avaroepa. Oire uva rera iava uvuoro oirara rutu uruiara oaive kavuoro rogaraua-ia utuaepa toko rovu sirova rera iare. <sup>14</sup> Uva voava Jisas veraro viropa. Oa iava riro irara rutu kekereva oirara. Uva voeapa siraoroepa. Oa iava voea iava oearovu upiapa irara porete pierava ravotovira.

<sup>15</sup> Uva vokiarovi rera voeaaro disaipel urioaepa rera iare oiso purasa, "Kuvau tapi-a voi-ia uva viapau oirara vai toupaiveira. Uva apeisi viapau voeao arupari, ra avaave aioara vai vorisa ora voeapa voraro uruiara vo vuutavio-ia? Teapi ogoevira voeare vokipe." <sup>16</sup> Oa iava Jisas voeare oiso puraroepa, "Eake iraore avaavere? Visii raga voea vateta aioara vai."

<sup>17</sup> Uva oiso puraaepa rerare, "Viapau oiso igei aioa vaiei vo-ia. Ari vo vavaevi raga aue bret oava toupaio ora kataitoarei atari." <sup>18</sup> Uva voeare oiso puraroepa, "Varaviva uriota vore ragai iare."

<sup>19</sup>  $\diamond$  Uva oirara tavireva ora riakora oiso, "Pauta evoa isiso kou ivara-ia." Oa iava vo vavae oureva breteara ora ataritoarei. Uva vara-ia pitupaoro vuvuiua-ia vurareva vearo vaisi puraoro. Oa iava breteara rekarekareva disaipel vatesa. Uva oirara vatevateiva vara.

<sup>20</sup> Voea rutu aioiva, oa iava vukuaepa. Oire uva ururukoara guruguruiva varao oara arova vukuaepa. Uva oisi raga disaipel irara katai tau erao (12) agasi pieiva aue pekuri. <sup>21</sup> Uva voea voeao oirara oea rutu vo aio aioiva vao vo vavae tuku rutu (5,000). Ari ita, viapau riakora vieiiva ora kakae vure.

#### *Jisas Toko Rovu Ivara-ia Vokapareva*

(Mak 6:45-52; Jon 6:15-21)

<sup>22</sup> Uva Jisas rera voeaaro disaipel tavireva oiso, "Uvuoia-ia irata vavo oisore iviropa varata toko rovu iava." Oire uva oiso ruipaparoepa ra oirara ruture koruro, ra voreave kareoro uruiara oaive iare. <sup>23</sup>  $\diamond$  Uva rera raga oavu-ia pukuia-ia iparoepa voa varirisa. Oire uva voa toupareva osa rerare ovaiae. <sup>24</sup> Osa tauai rutu avaaepa uvuoia-ia disaipel irara raga. Oa iava vo rovu toko rovu vuruvuruaro rutu-ia ora tovoaepa. Uva voa riroto kiuvu voeare vusireva. Oa iava toruva uvuoia sisiputapaevoa voeava. <sup>25</sup> Uva avipaepa ovusa Jisas voea iare uturoepa toko rovu ivara-ia vokapaoro voea ruvara-ia pou virosa, ovusa ravireo kae viro asavira toupareva. <sup>26</sup> Oa iava rera tueiva osa vokapaoro urioparoepa toko

$\diamond$  14:3-5: Lev 18:16, 20:21

$\diamond$  14:19: 1 Sml 9:13; Lu 24:30

$\diamond$  14:23: Lu 6:12

rovu ivara-ia voea iare disaipel. Uva rirovira rutu rikerikepaoro oivepaoro uriripaaepa rera asavira. Oa iava oiso puraaepa, “Avoeao, asi tugarato-a ro!” <sup>27</sup> Uva ikauvira Jisas voeare oiso puraroepa, “Opeita uriri ragapata. Sopaura oavisi goru pieta. Easi ragai-a vao ragoa uturai.”

<sup>28</sup> Uva Pita rerare oiso puraroepa, “Vosa vii-a vao Turaro, oire ragaire keerau. Ra vii iare oisi eisi vokaoro uriora vo vao ivara-ia rovua.” <sup>29</sup> Uva Jisas oiso puraroepa, “Uriou.” Oa iava Pita uvuoia iava rere ovoioro voka rovoparoepa uuko rovu ivara-ia Jisas iare. <sup>30</sup> Uva kiuvu sovooro uririroepa. Oa iava roko rovosa auepaoro osa oiso puraroepa, “Turaro! Ragai-ia pituri!”

<sup>31</sup> Oire ikauvira Jisas vavaea tovoreva Pita-ia pituoro. Uva oiso puraroepa, “Gareavi raga-a eva raria oava touparivoi. Eakere vo rugorugoorei rutuva toupari?” <sup>32</sup> Oire uva voava kaesi viropa uvuoia iare osa kiuvu rakote ovoiroepa. <sup>33</sup> ♦ Osa voeao oea uvuoia toupaiva oea oiso purapaaepa rera-ia vuurapa vaisi purapaoro, “Oiraopatoa rutu vii Pauto Oviitoaro.”

*Jisas Riro Irara Upiapa Irara Porete Pierava Genesaret Urui-ia  
(Mak 6:53-56)*

<sup>34</sup> Uva toko rovu ivirooro rereiva Genesaret iare. <sup>35</sup> Uva voeao voava vo-ia rera eveiiva oiso, Eari Jisas-a ro-ia. Oa iava reo vikiaepruruiara rutu iare varao Genesaret taere sovara-ia. Oa iava upiapa irara rutu sipoiva rera iare. <sup>36</sup> ♦ Osa iava rirovira rutu rerare oiso purapaaepa, “Jisas, igeipa vaseri eera iava kuvupato, ra rera raga vatuaroo-ia pitupaoro poretepaio.” Uva va iava oisi voeapa rera iava ora vaseroiva, rera vatuaroo-ia pitupaoro porete ovoipaaepa voea rutu.

## 15

*Pauto Vo Siposipoaro Aao Irara Vo Siposiporoaro-ia Putepaiveira  
(Mak 7:1-13)*

<sup>1</sup> Oire uva vo vuuta-a vao oa-ia Farisi ora oearovu Reo Taisiro-ia tarai irara oea Jerusalem iava urioaepruruiara Jisas iare. Uva oiso puraaepa, <sup>2</sup> “Apeisi iava voeao disaipel Reo Taisi-ia tagau iraopaineira vigei aao iraraaro varaaro? Aue-ia vosa aiosa auepaave, ra viapau oiso vavaeara sisu rovoave Tugoropa Reo Taisi sirova utupaoro.”

<sup>3</sup> Oa iava Jisas voea vo reoaro pukooro oiso puraroepa, “Apeisi ragavira iava ora visii raga vo pitupituroaro sirova utupataveira Pauto vaaro-ia tagaupao Reo Taisi? <sup>4</sup> ♦ Pauto oiso puraroepa, ‘Aitetoarei oarapa ora aakoara ora avivikepau. Ari vosa ro ira aitetoarei takaupareve, eera-a ira kopii pieivere oearovu.’ <sup>5-6</sup> ♦ Uva visii oiso purapataveira oirara siposipopoaro, Aako ora aite viapau uvuiparai ra vei vatea varao vei tauvapasa. Uvare vara rutu varao vate rovoavora Pautoa-pa. Vosa eisi oirara tavitavipata oiso, Eagara, uvuipatai ra oisi eisi aite irara oavisi piepata. Oire eva-a oa-ia Pauto vaaro Reo Taisi akaipa piepatavere visii vo pitupituroaro rigaoro ora visii iare. <sup>7</sup> ♦ Visii vao-ia riro ratarataa vovou irara, visiigoa reesireva Aisaia vearovira rutu oiso puraoro,

<sup>8</sup> ‘Voea rutu ragai vaisiaro kae pie ragapai gisipoaro raga iava osa voea sopaaro tauaipai rutu ragaipa.

<sup>9</sup> ♦ Oea oirara varaaro reo goruro iava tavipaaveira. Uva viapau oiso vo reo-a eva Pauto vaaro. Eisi osa iava ragai-ia vuurapa vaisi pura ragapaineira.’”

*Varao Oara Oirara Vuri Piepaiveira  
(Mak 7:14-23)*

<sup>10</sup> Oire uva Jisas oirara ruture keeraroepa ora rera iare. Uva oiso puraroepa voeare, “Visii uvuta vearovira rutu, ra vare rugoopata. <sup>11</sup> Viapau oiso vao oa aiopare oirato oa rera sopaaro vuri piepaivoi. Ari varao-a oara rera sopaaro iava kosipa piroi, evara oara oirato vuri piepaivoi.”

♦ 14:33: Sam 2:7; Ap 8:37; Ro 1:4    ♦ 14:36: Mt 9:20; Mk 3:10    ♦ 15:4: Eks 20:12; Diu 5:16    ♦ 15:5-6: Eks 21:17    ♦ 15:7: Ais 29:13    ♦ 15:9: Kl 2:18-22

<sup>12</sup> Uva vo voki-a vao oa-ia urioaepa disaipel rera tavisa oiso, “Farisi vii vo reoaro uvuivo. Oa iava vuri vovoupai. E pasi va vai-ia taraiuei vao?”

<sup>13</sup> ♦ Uva Jisas oiso puraroepa, “Aite toupare eisi vuvuiua ira auero rutu ketoo piepareveira. Ari varao oara viapau ketoo pierere oara rutu evara taterevereera iroara tapo.” <sup>14</sup> ♦ Voea eakata uvare voea-a voosi irara oea raiva purapai oearovupa voosi irara. Ari ita, vosa vaiterei raga voositoarei ora tuvetuvepaoro avapasi raiva-ia, ra kovesi rikui-ia vaiterei rutu.”

<sup>15</sup> Uva Pita Jisas aatoreva, “Oire vo reo vituaro karuri vao-ia reo ruu. Ra va uvuio.”

<sup>16</sup> Uva Jisas oiso puraroepa, “E avoeao, visii tapo viapau rugorugooara vaiei?” <sup>17</sup> Easi visii viapau taraipatai auero rutu-ia varao oara gisipo-ia rokopaiveira vore sare. Oire ra sare vo vikieve vore gare kepa. <sup>18</sup> ♦ Ari vao oa gisipo iava kosipa piroveira vovouisi rutu iava, oa-a eva oirato vuri piepaiveira. <sup>19</sup> ♦ Oire uva vo rugooro-a varao vuri rugooro oara kosipa piroveira oirato sopaaro iava, oira upo, otopa pitupituro, kaakau kare vo pitupituro, kaviru, keakea reo, reo toga. <sup>20</sup> Oara rutu oirara vuri piepaiveira. Ari vosa ro ira vavae sisu asavira aioa-ia pitureve, viapau oiso eva-ia vuria vai epao.”

### *Riakova Kenan Iava Oira Iria Oisoa Jisas-ia Rari Iraopao*

(Mak 7:24-30)

<sup>21</sup> Jisas vo uruio iava avaroepa vo taereo iare oa-ia oisoa vo uruireo toupaive Taia urui ora Saidon urui. <sup>22</sup> ♦ Uva iriavu riakova Kenan iava ratau tou irara iava oira, iria oiso keeraopa rerare, “Turaro vii-a Devit Oviitoaro viigoa roporeva Pauto. Ragaipa siraou. Vurito tugarato kakaeva oaa vuri piepareveira.” <sup>23</sup> Uva viapau Jisas oira vo reoaro aatopareva. Oa iava disaipel urioaepa rera tavisa oiso, “O riakova keerapaoro vigei sirova utupaoi. Oirare koruu.”

<sup>24</sup> Uva Jisas voeare oiso puraroepa, “Pauto ragai siporevora voeao raga iare Jiu, oea oiso toupaiveira osa sipsip ragui voeao vova Isrel-ia oea opesikoaeapa.” <sup>25</sup> Uva riakova urioopa rekusa ora taku virosa rera ruvara-ia oiso puraoro, “Turaro, ragai tauvari!” <sup>26</sup> Uva Jisas oirare oiso puraroepa, “Teapi aioara oupe kakae vure varaaro kaakau karepa vara vikisa.” <sup>27</sup> Uva oiso puraopa, “Turaro, oiraopavira eisi purauei igeire ratau tou irara. Ari ita, kaakau kare ururukoara aiopaiveira varao oara tebol iava kovekovepapeira.” <sup>28</sup> ♦ Oa iava Jisas oiso puraroepa, “Ae auoo, vii vaaro riroa rutu raria. Oapa ruipapauoi, oiso ra vii-ia karekepe.” Uva vo vuuta raga-ia eva voaviva porete ovoiopa kakaeva.

### *Jisas Riro Irara Upiapa Irara Porete Piepareva Ravotovira*

(Mak 7:31-37)

<sup>29</sup> Uva voa vo kavuoro avaroepa Jisas toko rovu ruvara iare vao vo Galili. Uva voa pukuia-ia iparoepa paua. <sup>30</sup> ♦ Uva riro irara oirara ora riakora urioaepa rera ruvara iare ora gurupasa vuri kokoto irara sipopaoro rera iare, ora voosi irara, ora regorepa keru irara, ora voeao oea iava oisoa gisipoara kapuuvira raga toupaive, ora oearovu rutu oearoa tapo uriopaaepa rera kokotoaro ruvara-ia voea tovopasa. Uva voava voea porete piepareva ravotovira. <sup>31</sup> ♦ Uva rirovira rutu tavetave iraopaiva. Aue iava uvare reoreo asa irara reoreoaepa, ora voeao regorepa keru irara oea tapo vearpaaepa vorevira, ora voeao vuri kokoto irara oea tapo vorevira vokapaiva, ora voeao voosi irara oea tapo vorevira vuravuraiva. Uva eisi osa iava Pauto vaisiaro kae pieiva rera-ia vuurapa vaisi puraoro ro Jiu reraaro.

### *Jisas Vo Resura Tuku Rutu (4,000) Aio Pierewa Ravotovira*

(Mak 8:1-9)

<sup>32</sup> ♦ Uva Jisas disaipelre keeraroepa. Oa iava oiso puraroepa voeare, “Sirao iraoparai voeaopa oirara, uvare vo peva rutu-ia voki ragai tapo toupaivoi aio asavira. Uva reasiparai ra ogoevira voea arua. Teapi osireiara voeare avavaraopape raveravepaoro ogoetao iava raivaaro karepaoro.” <sup>33</sup> Oa iava disaipel rera akeiva oiso, “Uva ovu opoara vai toupai voeapa, ra voeae aio piepe? Ari raaka tapi raga vo-ia.” <sup>34</sup> Uva Jisas voeae akereva oiso, “Visii ovirovua

♦ 15:13: Ais 60:21 ♦ 15:14: Ro 2:19 ♦ 15:18: Je 3:6 ♦ 15:19: Ro 14:14-21 ♦ 15:22: Mt 9:27 ♦ 15:28:

Lu 7:50, 17:19 ♦ 15:30: Lu 7:22 ♦ 15:31: Mt 9:8 ♦ 15:32: Mt 9:36

*toupai aue bret?*" Uva rera taviiva, "Ari erao vatara (7) aue bret oarava toupaio ora garearavi atariara."

<sup>35</sup> Oa iava Jisas oirara rutu tavireva oiso, "Pauta evoa rasiuaaro." <sup>36</sup> ♦ Uva erao vataraia bret ora aue atariara vearo vaisi purareva Pautoa-ia. Oa iava voava vara rekarekareva. Uva disaipel vatevatereva. Oa iava evoea oirara rutupa vara vatevateiva. <sup>37</sup> Uva voea rutu vukuaepa. Oa iava aio opesiaeapa. Uva ururukoara guruguruiva. Oa iava erao vatara (7) pekuri agasi pieiva. <sup>38</sup> Uva voea rutu vieiaro-a voeao oirara vo resura tuku (4,000) rutu. Uva viapau oiso riakora tapo vieiiva ora kakae vure. <sup>39</sup> Oa iava Jisas voea aru ovoioro kaero viropa uvuoia-ia avaoro Magadan taere iare.

## 16

### *Ravotoara Kekepasa Rirovira Ruipapaaepa Rutu (Mak 8:11-13; Luk 12:54-56)*

<sup>1</sup> Vo Farisi urioaepa voearei ora Sadyusi-pa irara Jisas-ia kokarasa, oiso ra voea osireiaro-ia ravotoa vai purareve Pauto vo goruaro-ia karekeoro. <sup>2</sup> Ari Jisas voea vo reoaro pukooro oiso puraroepa, "O ita, visii vao visiigoa oiso purapataveira vo ovaiarov, Vuvuiua revasivira kekepi. Ari vokipavira raipipere. <sup>3</sup> Ora vokipaua oiso purapataveira, Rukuta rupapaoi. Oa iava vuvuiua revasipai. Uva kiuvu vusirevere ora kokeva koveovere vo voki-ia. Iu ita, visii ita vuvuiua vo reesiaro kekepataveira. Oire vearovira rutu vara rovirieipata. Ari varao kekepataveira oara vo vuuta vao reesipaiveira osa viapau vara eveipata. <sup>4</sup> ♦ Oiraopavira, oirara voeao vuri irara oirao pie asa irara voeao vo vokio iava oea taraa ragapaiveira oiso, Eake ravoto reesi vai kekeoro Pauto oirao pieive? Ari ita, ragai arepata, uva viapau oiso ra visiipa va puraa. Ari vao raga oa keketaverea oiso osa piereva Jona vo peva voki-ia ora vo peva rupa peva." Uva Jisas voea arova avaroepa.

### *Reo Ruu Vao-ia Aue Iava Yis Farisi Ora Sadyusi Vaaro (Mak 8:14-21)*

<sup>5</sup> Oire voeao-ia disaipel oea toko rovu iviropaooro uriopaaepa auere bret ovaupaoro. <sup>6</sup> Uva Jisas oiso puraroepa voeare disaipel, "Visii vao-ia uutuvira rutu toupata vaore yis Farisi ora Sadyusi vaaro." <sup>7</sup> Oa iava oiso ora voea raga ora reopaaepa, "Ari eake-a viapau aioara vaiva urioviei, oa iava oiso vigeire reopa?" <sup>8</sup> ♦ Oire uva Jisas voea-ia tarairoepa. Oa iava oiso puraroepa, "Uva eakere oiso ora reopatai, Vigeire reopa aio arapa varao oarare ovauviei uriooro? Ari ita, visii vao gareavi ragava toupatavoi raria. <sup>9</sup> Easi pasi ragai vo goruaropa sopaihvira toupata, raa? E viapau vaore rugoopatai bret vavae oa vateavora voeaopa vo vavae tuku (5,000) rutu aue oira, eke? Ora ovirovua pekuri oara agasi pietavora aue-ia aio ururukoro? <sup>10</sup> Ora pasi viapau vaore erao vatara breteara rugoopatai oara vateavora vo resura tuku (4,000) rutupa aue oira? Uva ovirovua pekuri oa agasi pietavora? <sup>11</sup> Apeisi iava viapau oiso taraiapatai, Viapau visii tavipaavo aue iava bret? Visii vao ora vatatopo iraopata uutupaoro vaore yis Farisi ora Sadyusi-pa irara vaaro."

<sup>12</sup> Oire uva va iava oiso taraiapatai, O asi viapau oiso vigeire reopatai ra vaopa vatatopopavio yis vao plaua kae piepa. Viapau. Ari vaopa Farisi ora Sadyusi vo siposipoaro oapa vigei vatatopo pieparevoi.

### *Pita Jisas Vaisireva Oiso, Krais (Mak 8:27-30; Luk 9:18-21)*

<sup>13</sup> Jisas oiso ragavira avaroepa Sisaria taere Filipai-ia. Uva vo vuuta-a vao oa-ia disaipel akereva oiso, "Apeisi ragavira ragai vaisipaiveira oirara?" <sup>14</sup> ♦ Uva oiso puraaepa, "Ari oearovu oiso vii vaisipaiveira, Jon Baptais, ovusa oearovu oiso, Ilaija, ari oearovu oiso Jeremaia, ora oearovu oiso purapaa, Vii iravu voea iava profet irara." <sup>15</sup> Uva Jisas oiso voea akereva, "Ari apeisi visii raga ragai vaisipata?"

♦ 15:36: 1 Sml 9:13   ♦ 16:4: Jna 3:4-5; Mt 12:39   ♦ 16:8: Mt 6:30, 8:26, 14:31   ♦ 16:14: Jo 1:21

<sup>16</sup> Uva Saimon Pita rerare oiso puraroepa, “Vii-a Krais Pauto Oviitoaaro, ro Tootoo Ovoi ira vii arureva vore.”

<sup>17</sup> ♦ Oa iava Jisas oiso puraroepa rerare, “*Saimon, Jona oviitoaaro roruri, uvare viapau oiso vo rasitoa iava irai vii tavirevoi vo vaisio iava. Viapau. Ari Aite raga ro ira toupareveira vuvuiua-ia ira vo vaisio iava vii tavirevoi oiraopa.*” <sup>18</sup> Uva vii tavipaa oiso, Pita, oiso toupari osa aveke o peka pie asava. Lotua vituaro aveke-ia iria-ia vo Lotu pauavere. Uva kopiia vo goruaro viapau uvuipai oiso ra vo Lotu opesi pieive. <sup>19</sup> ♦ Uva viipa ki vateavere karupava o iria-ia uvuipau ra karuri Pauto Saraaro-ia oearovu oirara koata piepasa. Vosa eake pitupituro-ia taraipau vova rasito, oire ra vara iava o pitupiturovure korukorupau, oarare korukorurovere vuvuiua-ia. Ari vao oa iava vaseri vo rasito, oa iava vaserevere Pauto vova vuvuiua.” <sup>20</sup> Uva Jisas goruvira rutu voeare oiso puraroepa voeao disaipel, “*Opeita irai tavipatavere oiso ragai vaisipaoro, Ro Krais Pauto reraaro vigei Tuvetuvepato.*”

*Jisas Vo Ora Rera Iava Disaipelpa Ravaa Reo Vatereva Oiso Voea Tavioro, Ragai Kopiiravere Ora Vorevira Toreravere*  
(Mak 8:31-9:1; Luk 9:22-27)

<sup>21</sup> ♦ Oire vo vuuta-a vao oa iava vo vokia Jisas ora rera iava roroio pievira disaipel tavitavireva voea vosipaoro. Oiso puraroepa, “*Jerusalem iare avaravere turaro irara iare voea rutu, ora voeao pris, ora voeao oea Reo Taisi-ia taraipai, oiso ra voa riroara vai siitokaara ouavere vo osa ragai upoive. Oire ra vo peva voki-ia vorevira torera.*”

<sup>22</sup> Uva Pita rera auauoro avaroepa vatuarore rerare oiso pura rovosa, “Turaro. Easi viapau vao vii-ia karekepere!” <sup>23</sup> Uva Jisas ora poreroepa Pita-re oiso purasa, “*Seten. Ragai isivaaro-ia ora tovou. E ragai-ia kokrapau ragaire korupaoro Pauto vo ruipaaro pura arapa? Eva vii vaaro rugorugooa, viapau oiso Pauto vaaro-a. Oirara raga vo rugooaro eva.*”

<sup>24</sup> ♦ Oa iava voeare disaipel oiso puraroepa, “*Vosa irai ragai sirova utu vovouparo, oire ra ora rera iava vaisia vara pie rovoreve. Ra ora rerapa vavata siitoka kaeoro uturo ragai sirova, vo vavata vao oa oiso toupai osa evao parikou.*” <sup>25</sup> Ro ira tootooa virivaripareve, oava eva opesiroverea tootooaro. Ari ro ira tootooaro vatereve vo oearovupa ragai vo ruipaaro sirova utupaoro, eera-a ira tootooaro tapo virivariavere taru. <sup>26</sup> Aa vao-a vearoa oa ourevereira oirato vo rasio-ia vo rara auero rutu vo rasio iava oureve, vo osa tootooa oaro rutu viki ragapareve rasito oaraaro-ia rugorugooapaoro? Eake vai ourevereira vorevira tootoo oaro-ia tavariovira? Viapau oavu avu vaiei rerapa. <sup>27</sup> ♦ Oirato Oviitoaaro Ro Ropoto kerariava voreroverea Aiteto vaaro. Ora ae tapo enselpa irara oirara vorisa kovoara oaiive uvuivoro oiso osa uvuivira kovoivora. <sup>28</sup> ♦ Oiraopavira visii tavipaa oiso, Oearovuei vo-ia visii iava oea viapau tuguraaverea kopiia-ia oea tootoovira toupaiverea osa ragai Oirato Oviitoaaro turarovira urioraverea osa ragai kekeive.”

## 17

*Vo Sisikorevira Karekeepa Jisas Iava Varaua*  
(Mak 9:2-13; Luk 9:28-36)

<sup>1</sup> Uva katai vatara (6) aue voki putevoiva, Jisas vo Pita vase oureva, ora Jems araorei ora Jon. Uva voea tapo iparoepa oavu-ia riro pukui, uva voa raga toupaiva. <sup>2</sup> Uva Jisas iava varaua ora tavarioepa vo voea osireiaro-ia. Oa iava sisikorevira kekero viropa osa rera iava kagave aviavieva sirusiruoro rutu oiso osa ravireo. Varoara tapo rera varaaro popotevira keke piropa oiso osa aviavia. <sup>3</sup> Uva voa-a evoa uva Moses vaio ora Ilaija Pauto ruvara iava ora karekesiepa Jisas iare vo pukuia kukuearo-ia. Uva voa rera tapo ora reopasiepa osa voea disaipel vo peva siituepaiva. <sup>4</sup> Uva va-a vao oa kekereva aue Pita. Oa iava Jisas-re oiso puraroepa, “*Turaro, vearovira rutu vo touei vigei rutu vao. Apeisi vovoupaei ra kepa peva vai paui oiso, vii okepai, ari Moses okepai, ari Ilaija okepai?*”

<sup>5</sup> ♦ Uva oisi raga puraoepa osa rukuta popoteva voea taturusa urioopa riro aviaviva. Uva oavu reo guruko karekeepa ruruta sovara-ia. Uva oavu reo guruko karekeepa rukuta

❖ 16:17: 1 Ko 15:50; Ga 1:16 ❖ 16:19: Jo 20:23 ❖ 16:21: Lu 17:25 ❖ 16:24: Jo 12:25 ❖ 16:27: Ro 2:6

❖ 16:28: Je 5:7 ❖ 17:5: 2 Pi 1:17; Ais 42:1

sovara-ia oa-ia oiso puraroepa Pauto, “Eera-a ira Oviitoa oaa, ira kavikopaaveira rutu rera-ia rorupaoro. Ira vo reoaro uvuta!”

<sup>6</sup> Uva voea disaipel vo reoreo vao uvuoro takua viropa rasiuaaro, uvare va uvuoro rirovira rutu uriri iraoaepa. <sup>7</sup> Uva Jisas urioroepa voea ruvara iare. Oa iava-ia pituoro oiso puraroepa, “Opeita uriripata. Toreta.” <sup>8</sup> Oa iava vuravuraiva. Uva viapau oiso irai kekeiva oiratoa vai. Ari Jisas raga. <sup>9</sup> Oire uva pukuia iava varapaoro touvira Jisas oiso goruvira rutu voea vosipareva oiso purapaoro, “Vao-ia oa keketavoi opeita va iava tavipatavere. Ari vo raga osa ragai tova urui iava vorevira tote rovoraverea.”

<sup>10</sup> ♦ Uva disaipel oiso rera akeiva, “Apeisi ragavira iava tarai irara Reo Taisiro-ia oiso purapaaveira, Ilaija urio rovoroverea, ra rera sirova uturo Pauto reraaro vigei tuvetuvesa?”

<sup>11</sup> Uva oiso puraroepa, “Ari ita, oiraopavira Ilaija urio rovoroverea orekerovu rutu torevoko rovosha. <sup>12</sup> ♦ Uva visii tavipaavoi oiso, Ilaija urio rovoroera uva ora voea-ia rera goguivora. Oa iava rera-ia oiso vo pitupituro puraivora eisi raga ita osa ragai pieiverea ragaipa siitoka vateoro ita.” <sup>13</sup> Uva oisi-a eisi osa Jisas puraroepa. Oa iava disaipel rugorugooaepa oiso, O! Ari Jon Baptais iavirava Ilaija vaisirevo.

*Jisas Iravu Viovokoto Ravotovira Porete Pierava Ira-ia Oisoa Vurito Tugarato Oisoa Toupareve (Mak 9:14-29; Luk 9:37-42)*

<sup>14</sup> Oire uva oirara rutu ruvara iare avaaepa. Oa iava voa rera ruvara-ia rekusa urioroepa iravu oirato <sup>15</sup> ♦ oiso puraoro, “Turaro. Siraou ragai oviitoaaropa. Ira kokopeko upia tapo purapareveira. Oa iava varaua rerare vurivira toupaiveira. Ari ita, vokiara rutu-ia koveparoveira tuitui kasiro iare. Ora vokiara rutu-ia tapo uuko oviro iare koveparoveira tuutuusipaoro. <sup>16</sup> Rera sipoavorao oeavu iare disaipel vii voeapro. Uva viapau oiso uvuiaerao oiso ra rera porete pieive.”

<sup>17</sup> Uva Jisas oiso puraroepa, “Ael! Visii vao-ia visiigoa-ia viapau oirao pie vovou vai toupai. Visiigoa viapau torevoko vovou vaiei. Uva ovirovu-ia vuuta visii tapo toupaaverea? Ora ovirovu purapaaverea visii vo vovouroaro-ia kasikasipaoro, osa viapau goruvira ragai vaaro-ia pitupata? Rera sipota ragai iare!” <sup>18</sup> Uva Jisas rerare ro tugarato kasipuvira reoroepa rera kosi pieoro viovokotoa iava. Oa iava rera iava upia opesi ovoiepa.

<sup>19</sup> Oire uva voea raga disaipel urioaepa Jisas iare rera akepasa oiso, “Apeisi ragavira iava viapau uvuipaiei tugara kosi piepasa?”

<sup>20</sup> ♦ Uva voea tavireva oiso puraoro, “Raria oavisii garepaei oa iava viapau uvuipatai. Iu, oiraopavira eisi osa visii tavipaa, Vosa rari vukuro vai toupaive oiso osa mastet kuearo garepa takurarovi rutu, oire va iava vo pukuiore oiso purata, Toreu ra vova avau uvaire. Ra avape. Vosa oisi eisi visii varaaro rariara oisi toupaive, oa iava uvuipatai osasararovu rutu purasa kovo oisi eisi. <sup>21</sup> [Uva viapau oraivai epao tugara kosi piepa raiva vai. Ari vao raga vosa aio kavu rovopata variria purapasa katai rugoo raga-ia.]”

*Jisas Erao Pievira Ora Rera Iava Taviroepa Oiso, Kopiiravere Ra Vorevira Torera (Mak 9:30-32; Luk 9:43-45)*

<sup>22</sup> ♦ Uva avaaepa Galili iare. Oa iava voa Jisas disaipel vosireva oiso puraoro ora rera iava, “Tutuu pievoi ra Oirato Oviitoaaro Ro Ropoto tovoive oirara vavaearo-ia. <sup>23</sup> Ra rera upoive rera kopii pieoro. Oire voava vo pevapa vokia vorevira torerovere.” Oa iava disaipel vovouaro rirovira vavataaepa.

*Jisas Moni Vikireva Lotupa Kepa-ia Takisoro*

<sup>24</sup> ♦ Oire uva Kapaneam-ia pou virosa avaaepa. Uva voeao moni oupa irara urioaepa Pita ruvara-ia oiso akesa, “E visii tuvetuvepatoaaro avu moniara vai vikipareveira vo kepa-ia Rovopa Kepa Tugoropa Kepa takis voripaoro, eke?”

<sup>25</sup> Uva Pita oiso puraroepa, “Iu.” Oa iava koataroepa kepa-ia. Uva Jisas reo rovoroepa oiso rera akeoro, “Saimon. Apeisi rugoopau voeao-ia turaro irara vo rasio tokipa irara. Irou

♦ 17:10: Mal 4:5-6   ♦ 17:12: Mt 11:14, 14:3, 10   ♦ 17:15: Mt 4:24   ♦ 17:20: Lu 17:6; 1 Ko 12:9   ♦ 17:22:

Lu 18:31, 24:6-7   ♦ 17:24: Eks 30:13, 38:26; Ro 13:7

*ruvara-ia oisoa moni oupaave, ora voea raga vo ovii irara oaive ruvara-ia, eke oearovu raga voeao tauai irara?"*

<sup>26</sup> Oire uva va-a vao oa iava Pita oiso puraroepa, "Ari voearo ruvara-ia oisoa moni oupaave tauai irara iava voea." Oa iava Jisas oiso puraroepa, "O ita, oa vituaro-a vao oa iava voeao ovii irara oaive viapau moni vikipaaveira takispaoro. Osa ita viapau uvuiparai ra monia vai vatea takisoro vo kepao-ia Aite oaa vo kepaaro. <sup>27</sup>  $\diamond$  Ari ita, teapi voea kasipu piepe. Uva oiso vii tavipaa, Avau toko rovu iare ataritoa vai kaa piesa. Uva rovotoa vai kaa pierivere, ra irai gisipoaro gaari. Ra monia vai ouri. Oire ra oaiva voreu vegeipa takis vorisa Tugoropa Kepa-ia vao uvui pieoro vegei vaaro."

## 18

*Disaipel Jisas Akeiva Oiso, Irou Riropai Sara-ia Vao Vova Vuvuiua?*  
(Mak 9:33-37; Luk 9:46-48)

<sup>1</sup> Uva vo vuuta-a vao oa-ia disaipel urioaepa Jisas iare oiso akesa, "Irou vai oearovu rutu-ia putepai vo Sarao-ia Pauto vaaro?"

<sup>2</sup> Oire va iava Jisas iravure kakaeto keeraroepa. Oa iava rera tore piereva voea vuutaaro-ia. <sup>3</sup>  $\diamond$  Uva oiso voeare puraroepa, "Visii tavi iraopaoavi oiraopavira oiso, Vosa visii vovouisiro oavisii iava viapau poreta viro, ra viapau oiso Pauto vo Saraaropa ruipapata osa ro-ia kakaeto vapa ruipaparoveira, uva viapau uvuita koatasa vo Pauto vo Saraaro-ia. Viapau rutu!

<sup>4</sup> Vosa ro ira ora akaipa pieparo ra oiso karekero osa ro-ia kakaeto, ira oearovu rutu-ia putepare Sara-ia Pauto vaaro.

<sup>5</sup>  $\diamond$  "Ari vosa irai visii iava ragai vaisiarore rugoopaoro oiso irai tauvareve kakaetao vai, ira-a eera ira ragai tauvapare.

*Vuri Pitupitu Oa Oirato Vaaro Vuri Piepaiveira Raria*  
(Mak 9:42-48; Luk 17:1-2)

<sup>6</sup>  $\diamond$  "Ari ita, vosa irai oiratoa vai ira kakaeto raria vaiaro vuri piereve voeao iava kakae vure oea ragai-ia rariipaaveira, uva vearopai oiso ra oeai rera-ia riroa vai aveke vai tuuive rera okoearo-ia rera roko piesa avakava vuruvuruaroo-ia.

<sup>7</sup> "Siraovira rutu oirara-ia voeao vo rasio-ia oea oearovu kove piepaiveira vuri vovou-ia. Oiraopavira rutu vao-ia vuri pitupitu oa karekeperea. Ari ita, uva siraovira rutu-a ropa ira voea kove piepareveira vuria-ia. <sup>8</sup> Oire vosa ovavaevu visii kove pieve ora okokotovu, vearopai va tokoro va-ia vikiu, ra katai vavae ragava ora katai kokoto toupari. Oa iava uvuipau ra vearo tootoo-ia ouri. Teapi vo vavaerei rutuva ora vo kokotoarei rutuva touparivora, vara rutuva vii vikiiverea tuitui kasi iare okasia viapau rokoa vai vo vuri tapi. <sup>9</sup>  $\diamond$  Ari ita, vosa osireito vii kove piereve vuri vovou-ia, oire rera tateri rera vikisa, ra kataitoa ragava toupari. Oa iava uvuipau ra tootooa rutu-ia karekeu. Teapi vaiterei rutuva touparivora, vaitereiva vii vikiiverea vo tuituia-ia vao oa viapau rokopaive.

*Reo Ruu Aue Iava Sipsip O Iria Opesikoopa*  
(Luk 15:3-7)

<sup>10</sup>  $\diamond$  "Visii vao vatatopo iraopata. Teapi oiso keapata voeao vuutaaro-ia kakae vure akaipa irara raga. Visii tavi iraopaoavi oiso, Vo vuvuiua uva enselpa irara epao voeao oea kakae vure tokipaiseira oea vokiara rutu-ia Aite puaaro kekepaiveira ira touparevoi vo vuvuiua-ia. <sup>11</sup>  $\diamond$  [Eake iava uvare ragai-a vao Oirato Oviitoaaro Ro Ropoto urioraera oirara ousa vorevira voeao oea opesikoaepa, ra va iava voea vorevira vorea Pautoa-re.]

<sup>12</sup> "Apeisi vai rugorugoopatai? Vosa irai oiratoa vai katai vovoto (100) sipsip ragui tokipareve. Oire vosa iriavu opesikoo, ra viapau oirare taraapareve, eke? Iu! Ra ita aue raga kavu piro vo resura vatara tau vo resura vatara (99) pukuia-ia vo uva vo ragui tokipareve, ra oirare kataiva rororo. Ra voava oirare taraasa avaro o iria opesikoo. <sup>13</sup> Oiraopavira visii tavipaavoi oiso, Vosa vorevira

$\diamond$  17:27: Jo 6:61  $\diamond$  18:3: Mt 19:14; 1 Pi 2:2  $\diamond$  18:5: Lu 18:17  $\diamond$  18:6: Lu 17:1-2; 1 Ko 11:19  $\diamond$  18:9: Mt 5:29  $\diamond$  18:10: Sam 34:7; Ap 12:11  $\diamond$  18:11: Jo 3:16

oira oureve o iria opesikoo, ra rirovira rorupareve rutu. Vo roruo-ia pute pievira oa tou rovopai vao-ia vo resura vatara tau vo resura vatara (99) sipsip vo rara vorevira oira oureve vo ragui iare.<sup>14</sup> Eisi osa raga vao toupai Aite oavisii vo vovouaro ro vova vuvuiua. Ira vaopa reasiparoveira, opeita iravu opesikoro voeao iava garepa kakaerovi.

#### *Araokoto Torevokopa Pitupitu Ro Ira Vuria Purapareve*

<sup>15</sup> ♦ “Oire vosa araokotoa vai oavisii vuria purareve visii-ia, oire avata rera iare, ra rera tapo pauta rera aviavi piesa. Ra rugooro vaore vuria oa purareve visii-ia. Uva oiso rutu toupai, Rera agiagita vo rara visii vo reoaro uvureve.<sup>16</sup> Ari vosa viapau visii uvureve, oire aitereivu outa ra visii peva rutu avata rera iare. Uva eva oiso toupai, Vaiterei evaiterei o vo peva oea rutu katai reo purapaoro vii vo reoaro oirao piepai, oiso osa purapapeira Tugoropa Vuku.<sup>17</sup> Ari vosa viapau visii vo reoaro uvureve, oire oirao pie vovou irara gururi voea tavisa va iava vao-ia voeao lotupa irara. Oire ra vosa voa evoa viapau visii rutu uvureve, ra oiso rerare purata, Auoro, oirao pie asato rutu vii kaviruto, takis oupato.

<sup>18</sup> “Oiraopavira oiso osa visii tavipaa oiso, Auero rutu varao oarare korukorupatai vo rasio-ia, Pautoa tapo oarare korukorurovere vo vuvuiua-ia. Ari varao oara rutu tapo vasepata vo rasito, Pautoa tapo-a oara vaseparevere vo vuvuiua-ia visiipa.

<sup>19</sup> ♦ “Uva vorevira ita aia visii tavipaavoi oiso, Vosa visii iava aiterei katai vovou purasi ora vaiterei-ia vo orekevu avu vai-ia, oire varirisi. Ra Aite oisi va purareve vaitereipa.<sup>20</sup> Iu, vosa vaiterei o vo peva ragai vaisiarore rugoo rovoave, oire uvavivu ora guruave, ra voa voea vuutaaro-ia toua voea tapo.”

#### *Reo Ruu Kovopatoa Java Ro Ira Varao Ou Ragaara Kavu Ragapareve*

<sup>21</sup> ♦ Oire uva vo voki-a vao oa-ia Pita Jisas iare urioroepa. Oa iava voa oiso rera akereva, “Vosa ovirovu purareve araokotoa oaa vuriara ragai-ia, oire ra ovirovu-ia vuuta rera iava vara veraa? Erao vatara (7) vuutaro-ia?”

<sup>22</sup> ♦ Oa iava Jisas rerare oiso puraroepa, “Easi viapau oiso eisi vii tavipaa oiso, Erao vatara vuutaro-ia. Ari oiso vii tavipaavoi, Erao vatara tau vuutaro-ia ora erao vatara vuutaro (77).

<sup>23</sup> “Uva oisi-a eisi osa Sara vao vova vuvuiua oisi toupaiveira oiso, Uva iravu turaro oiso ruipaparoepa ra ou ragaaro torevokoreve kovopa irara varaaro voeao rera voeapro. <sup>24</sup> Oa iava rovoroepa vara torevokopaoro. Uva rera iare iravu sipoiva oirato ira varaaro oiso uvuipaepa katai tau ipu kina (K10,000) rutu-ia.<sup>25</sup> ♦ Ari ita, osa viapau monia vai toupaiva rera ruvara-ia kovopato. Oa iava turaro rerare oiso puraroepa, Vearopai vii-ia voriparai ora riakova oara ora kakae vure rutu voeao vii voeapro ora orekerovu rutu varao vii varaaro oara rutu vatepaa iraipa. Oire ragaipa visii voriaro vatereve irai vao opesi piesa osa ragai ruvara-ia monia ou ragariva.<sup>26</sup> Oire uva oisi-a oiso-ia osa iava rera ro kovopato takuro viropa vo rasia vao oiso puraoro turarore, Turaro reito ragaivipa siraou tue rovooro ragaire. Oara rutu vore piepaa varao.<sup>27</sup> Oa iava turaro rerapa siraoroepa. Uva vara eaka ragareva varao ou ragaara.

<sup>28</sup> “Uva rera kovopato kosiro viropa iravu iare kovopato ira tapo oisoa kovopareve. Oa iava rerare oiso puraroepa rera okoearo-ia pituoro, Auoro! Ragai vaaro vore pieri erao vovoto kina (K200) rutu.

<sup>29</sup> “Oa iava rera eera ira oisoa tapo kovopareve ira takuro viropa rerare oiso puraoro, Ragaivipa siraou tue rovooro ragaire. Oa vore piepaavere rara viipa.<sup>30</sup> Vo osa roari reasiparoepa. Oa iava rera tovoreva tuukepa kepa-ia, oiso ra voa toureve ave vore piepaa vao oa ou ragareva.

<sup>31</sup> “Oire uva va vao kekeiva kovopa irara. Oa iava rirovira kasipuaepa rutu. Uva vara rutu varao rera vo vovouroaro karekesa avaaepa turaro oaiivepa.<sup>32</sup> Oa iava turaro rerare keeraroepa ro kovopato rera akesa oiso, E vii-a vao vurito viigoa vao purarivo? Ari ita, riroara rutu eaka ragaavorao vii vore pieoro, uvare ragaire ora siraao pieuerao.<sup>33</sup> Oa iava ita viipa siraoraerao. Uva apeisi iava viapau eerapa ita siraouerao vii tapo kovopato?<sup>34</sup> Uva va vao oa-ia rirovira rutu kasipuroepa ro rera reitoaaro. Oa iava rera vatereva voeao vavaearo iare riro upia vate irara, oiso ra voa toureve vao rutu vore pieoro oa ou

◊ 18:15: Lev 19:17   ◊ 18:16: Diu 19:15; 2 Ko 13:1   ◊ 18:19: 1 Jo 5:14   ◊ 18:21: Lu 17:4   ◊ 18:22: Kl 3:13

◊ 18:25: 2 Kin 4:1

ragareva.” <sup>35</sup> ♦ Oire uva vo reo opesi pieoro Jisas oiso puraroepa, “Vosa viapau oisi oiso araoko irara oavisi iava viapau vuriara verapata, ra oisi raga ita Aite ro vova vuvuiua visii oisi pieparevereia oiso-ia.”

## 19

### *Jisas Vao Iava Reoroepa Ora Oupa Pitupitu Putearo (Mak 10:1-12; Luk 16:18)*

<sup>1</sup> Oire uva Jisas vo reoara rutu opesi pierava. Oa iava Galili-ia kavureva Judia taere iare oiso ragavira ivirovira Jodan. <sup>2</sup> Uva riro irara rutu oirara rera sirova utupaaepa. Uva voea iava upiara rutu porete piepareva ravotovira.

<sup>3</sup> Oa iava vo Farisi rera tavatavaesa urioaepa oiso rera akepaoro, “Vosa oirato ora rera vo ruipaaro-ia riakovaaro kavu ovoireve, uva apeisi-a Reo Taisi vai pasi oisi purapai, Oiso vearopai oisi?”

<sup>4</sup> ♦ ♦ Oa iava vo reo pukooro Jisas oiso puraroepa voeare, “E viapau vo sipoisipo vieipataveira oa toupaiveira Tugoropa Vuku-ia vao rovoa iava? Oa-ia Pauto oiratoarei pura rovoreva ora riakova ora oupa pitupitu iava” <sup>5</sup> ♦ oiso purapaoro,

‘Vosa oirato aitetoarei kavureve ora aakova. Ora vosa riakova tapo rera oiraaro ra kataito purasi ora vaiterei-ia.’

<sup>6</sup> Eisi osa iava viapau uvuipasiei ra oiso toupasi, Vaiterei. Viapau. Ari oiso piesivoi kataiuu varaua. Eisi osa va vao Pauto otavosia purareva oa-ia viapau uvuiparoi irai ra va sikareve.”

<sup>7</sup> ♦ Oire uva Farisi rerare oiso puraaepa, “Ari eakere Moses igei vatereva vao Reo Taisi oiso, Vo osa oirato reo ovoi rigatooro riakova vatereve, ra oira sigureve?”

<sup>8</sup> Uva Jisas voeare oiso puraroepa, “Riro kaureo irara visii visiigoa vo rugooroaro paivuruvira toupaiveira. Oa iava Moses visii vaipa va vao karureva, oiso ra riakora sigupata. Osa viapau rutu tuariri rutu vo pitupitu oisoa toupaive. <sup>9</sup> Ari ita, visii tavipaa oiso, Vosa ro ira riakovaaro kavureve o iria viapau otopa pitupitu purapaeve, eera-a ira ora oupa vo taisiaro-ia tagaure vo osa iriavu riakova oureve ita.”

<sup>10</sup> Va-a vao oa iava disaipel rerare oiso puraaepa, “O ita, vosa Reo Taisire rugooro irai vao ora oupa taisi oiso, Riro gorua rutu-a vao ora oupa taisi. Eerapa vearopa-a ira viapau ousa vo pitupitu purarevori rovoa-ia.”

<sup>11</sup> ♦ Oa iava Jisas voeare oiso puraroepa, “Ari ita, viapau oiso oirara rutupa-a vo reoa vao-ia ora riakora. Viapau. Ari voeao raga vaaro-a oeapa va vatereva Pauto. <sup>12</sup> Aue iava uvare oearovu kavupaiseira aako riakoro oisi raga, ra viapau va iava riakova vai oureve, ora voearo oearoa kakae pura arapareasipaoro ora itakorepaaveira, ora voearo oearoa vaore rugooopaaveira Pauto vo Saraaro vova vuvuiua. Ari vosa aa ro avuo ro ira vo reo vao sirova utu ruipaparo, oire rera eakata, uvare rera vo reasiaro-a vao riako ou arapa.”

### *Jisas Garepa Kakaero Viraakoreva (Mak 10:13-16; Luk 18:15-17)*

<sup>13</sup> Va-a vao oa iava garepa kakaero sipoiva rera iare. Oa iava oiso ruipapaaepa ra voea kukuearo-ia ora rera vavaearo tovoreve varirioro, ovusa disaipel voeare korupaaepa.

<sup>14</sup> Uva Jisas oiso puraroepa, “Kakae vure eakata, ra urioave ragai iare. Opeita voeare korupata. Ari Pauto vaaro Sara voea vaaro oiso osa voeao garepa kakaero.” <sup>15</sup> Oire uva voea kukuearo-ia vavaearei tovoreva. Uva va eva purarevoiva, voea arova avaroepa.

### *Vo Viovokotoa Iava Toupaivoi Ro Riro Kotokoto Guruto (Mak 10:17-31; Luk 18:18-30)*

<sup>16</sup> Iravu viovokoto Jisas iare urioroepa oiso purasa, “Tisato. Eake vai puraa vearo pitupitu vai, ra oai iava Tootoo Ovoi oua?”

---

❖ 18:35: Je 2:13    ♦ 19:4: Jen 1:27    ♦ 19:4: 1 Ko 14:20; 1 Pi 2:2    ♦ 19:5: Jen 2:24; Ef 5:31    ♦ 19:7: Diu 24:1-4    ♦ 19:11: 1 Ko 7:7-9

<sup>17</sup> Oa iava Jisas oiso rerare puraroepa, “Eakere ragaire eisi purauei? Ari kataitoa raga-a vearotoa rutu Pauto. Vosa rera vaaro Reo Taisi rutu sirova utuu vearovira, oire va iava vo Tootoo ouri.”

<sup>18</sup> ♦ Oa iava oiso Jisas akereva, “Aa vao-a Reo Taisi?” Uva Jisas oiso puraroepa, “Vao-ia Reo Taisi oiso-ia, Opeita oira upopau, opeita otopau, opeita kavirupau, opeita kuuvupau oearovu iava, <sup>19</sup> aiteara vaiopa avivikepau ora aakoara, ora oearovu rutupa siraopau oiso osa ora viipa siraopauveira.”

<sup>20</sup> Oa iava viovokoto oiso puraroepa, “Otaisiroa rutu varao Reo Taisiro sirova utuparaveira. Uva eake vai ragapa potepaavoi?”

<sup>21</sup> Oa iava Jisas oiso rera tavireva, “Ari ita, vosa vearo vovou rutu purasa aeupau, oire auero rutu-ia vii varaaro vori rovou. Oa iava uvuipau vara voriaro vaterivora voearopa apota irara, ra ragai sirova utuu. Eva oa iava viipa varao pere vuvuiua-ia vearopara.”

<sup>22</sup> Uva vo reo uvureva rera ro viovokoto. Oa iava rerare sopaua vavataepa. Uva avaroepa, uvare riroara rutu-a orekerovu rera varaaro.

<sup>23</sup> Oire uva va iava Jisas ora rera voeaarore disaipel oiso puraroepa, “Ari ita, vavagisi-papeira rutu voeaopa riro kotokoto guru irara vore ora kiupa arapa Pauto vo Saraaro sovara-ia.

<sup>24</sup> Uva ita, vavagisipai vao tavaatoa iava vo rito vo osa rirova vai vo kare iava kamel kare iriai voa koatasa aeupao. Uva oisi rutu rirovira vavagisi iraopai ropa riro vori guruto vore koatapasa Pauto vo Saraaro-ia.”

<sup>25</sup> Uva tavetave iraopaiva rera-ia. Oa iava oiso puraaepa, “Uva apeisi-a? Iroutoa vai-a ira uvuipa Tootoo Ovoi ousa?”

<sup>26</sup> ♦ Oa iava Jisas voeava vurapareva tuupavira. Uva oiso puraroepa, “Viapau uvuipa oirato. Ari Pauto raga uvuiparoi irai oisiri avu pierrevora, rera vo Saraaro iare koataro.”

<sup>27</sup> Uva Pita rerare oiso puraroepa, “Ari ita, igei auero oaio rutu kavuiovora vii sirova utupasa. Uva va iava eake vai ouioverea?”

<sup>28</sup> ♦ Uva Jisas voeare oiso puraroepa ora rera iava, “Oiraopavira visii taviipaavoi. Vo utupaua orekerovu rutu isivaaro iava varao ora airepavira karekepaperea osa varao vo rasitoa-ia torevoko rovorevere Pauto, ovuutaroa-ia oiso Oirato Oviitoaaro Ro Ropoto kerariava pouro virovere paupa-ia vao king vo vuutaaro. Eva-a oa-ia visii tapo pautaverea aue katai tau erao (12) paupara, visiigoa ragai sirova utupataveira. Oire katai tau erao (12) aue sara vova Isrel oea taavataverea voea rovirieioro. <sup>29</sup> Voeao oirara ora riakora oea ragai vaisiarore rugoopaoro orekerovu rutu kavuiovora oiso-ia, araoko irara, ora taataa riako, ora aite irara, ora aako riako, ora kakae vure, ora voea varaaro rasiara, oea vara-ia varao pute pievira rutu oaravu rutu ouiverea taru aue tapo Tootoo Ovoi. <sup>30</sup> Ari ita, uva voeao oea visii sirova oisoa utupaave, evoea oea visiipa iraaverea vo Pauto vo Saraaro sovara iare. Ovusa voeao oea visiipa oisoa irapaave, oea taru visii sirova utuaverea.

## 20

### Wain Kovo-ia Kovopa Irara

<sup>1</sup> “Iu, Pauto vo Saraaro oa oiso toupaiveira osa iravu oirato ira vaaro-a riroa rasia. Oire vokipaua rutu ovokivu-ia avaroepa oearovu kovopa irara ousa wain kovo-ia kovosa rera vaaro. <sup>2</sup> Uva oearovu tapo kovopa irara ora reoparoepa katai vovou raga-ia, oisore ra katai vovou raga puraive. Ra katakataivira katai voki voriaro oupaive katai kina. Oa iava voeae arureva voa kovosa wain kovo-ia. <sup>3</sup> Oire vo peva vuuta isivaaro-ia avaroepa ita oearovu kekesa vo uva oisoa aivaropaine osa tou ragapaiva voa. <sup>4</sup> Oa iava oiso voeae tavireva, Visii tapo avata wain kovo-ia kovosa, ra va iava uvuivira visiipa monia vai vateavere. <sup>5</sup> Uva avaaepa. Oire ravireo vuuta-ia ora ovaiaro avaroepa ita. Uva oisi raga ita piererva.

<sup>6</sup> “Oire vokiarovi vo vavae vuuta-ia avaoro oearovu ita kekereva osa touiva. Uva oiso puraroepa voeare, Eakepa tou ragapatavoi vo-ia ro rutu-ia ravireo? <sup>7</sup> Uva rerare oiso puraaepa, Ari aue iava uvare viapau irai igei vatepare kovoia vai. Oa iava oiso voeare puraroepa, Oire visii tapo avata, ra kovota wain kovo-ia.

<sup>8</sup> ♦ “Oire uva vokiepa voeare. Oa iava rera ro ira vo kovoaro-a wain kovo ira tokipato tavireva oiso, Kovopa irarare keerau voea vorisa. Uva voeao iava rovouvere utupa irara voeao-ia rekasisipa irapa kovo irara.

<sup>9</sup> “Oire uva voeao oea vo vavae vuuta-ia kovo rovoaepa oea karea viropa katai kina raga ousa katakataivira. <sup>10</sup> Uva voeao oea irapavira rutu kovo rovoiva oea karea viropa ita. Uva oiso keapaaepa, Vigei riroa vai pute pievira oupau, osa viapau. Ari oisi raga ita katai kina katakataivira ouaepa voea rutu. <sup>11</sup> Oire uva oisi-a oiso osa ouaiva, vara agarupaiva rerare reopaooro ro ira vo kovoaro-a. <sup>12</sup> ♦ Oiso puraaepa, Evoeare oea utupavira kovoivo oea katai vuutavi raga-ia kovoivoi. Uva voeao vo voriaro vaearivo rutu igei vaarova uvuipai. Ari ita, igei vao riro vavata kovoro rutu pura rovopaiovo rirotoa-ia ravireo.

<sup>13</sup> “Oa iava oiso puraroepa iravure oirato voea iava rera, Vatetoa oaa. Katai reo puravevo, oisore ra katai kina raga oupata visii rutu katakataivira. Uva viapau visii vuri pieavoi. <sup>14</sup> VII vaaro voria ouri, ra vava kareu, uvare ragai vo ruipaaro-a, oa iava oisi raga eisi voeao voriavoi utupa irara rutu oiso osa vii vo voriaro. <sup>15</sup> ♦ Apeisi ragavira? Ra vosa orekevu avu vai purasa auepara vao-ia monia ragai vaaro, uva viapau oisi uvuiparai, eke? Vearo pitupitu puraavoi, uva va-ia agarupari.” <sup>16</sup> Oire uva vo reo opesi pieoro voeae iavirava oiso puraroepa, “Ari ita, uva voeao oea visii sirova oisoa utupaae, evoea oea visiipa iraaverea vo Pauto vo Saraaro sovara iare. Ovusa voeao oea visiipa oisoa irapaave, oea taru visii sirova utuaverea.”

*Jisas Ora Rera Iava Vo Pevapa Tavi Purareva Oiso, Kopiiravere Ra Vorevira Torera  
(Mak 10:32-34; Luk 18:31-34)*

<sup>17</sup> Jisas Jerusalem iare ipasa aueparoepa. Oa iava disaipel ragare keeraroepa, uvare voeae raga tapo ora reo ruipaparoepa vo vokapaoro raivaaro. Uva oiso puraroepa voeare, <sup>18</sup> ♦ “Uvuta! Ipaviejerusalem iare uva Oirato Oviitoaro Ro Ropoto tovopai reipa irara vavaearo-ia pris irara ora voeao tarai irara Reo Taisi-ia. Oea rera tovopai kortua-ia. Ora reo goru puraivere rera kopii piesa. <sup>19</sup> ♦ Ra rera vateive oearovupa ratau tou irara iava. Ra rera tovipaive rera ragipaoro. Oire rera tapaive evao parikou-ia. Uva taru vo pevapa vokia torerovere kopia iava tootooro vorevira.” Eisi osa voeao tavireva ora rera iava.

*Jems Araorei Ora Jon Oiso Vovoupasiepa Ra Reipasi  
(Mak 10:35-45)*

<sup>20</sup> ♦ Vo vokio-ia aakova vaitereo oviitoarei sipooro Sebedi oviitoareiaro, rekueva rasiuaaro Jisas areoro orekerovure. <sup>21</sup> Oa iava Jisas oira akereva oiso, “Eake vaipa ruipapauwei?” Uva oiso Jisas tavieva, “Oiso ruipaparai ra reo ovoi purari vaitereopa oviitoarei oaa. Ra oiso pausivereea utupaua, iravu vo pauroverea oirapapa varata, ari iravu vo koike varata vo osa turarou.”

<sup>22</sup> Uva Jisas oiso puraroepa vo araorei iare ovoovovira, “Viapau taraipasiei vao-ia oare akepasi. E uvuipasiei ra o-ia kap ukaios iria-ia ukaioravere, iria agasioi aue iava tavaka?” Oa iava oiso rera tavisiva, “Iu, uvuipaveiei.”

<sup>23</sup> ♦ Oa iava Jisas vaitereire oiso puraroepa, “Oiraopavira rutu. O-ia kap iria-ia ukaiosivere ragai oiraaro. Uva irouto-a ira vo oirapapa varata-ia ora koike varata ragai sirova paurover? Uva vo reoa vao viapau oiso ragai vo reoaro-a. Viapau. Ari varao-ia paupara oara ravaarevora Aite oearovupa oirara voeao oea reesireva.”

<sup>24</sup> Uva vo reoa vao uvuiva voeae katai tau (10) disaipel. Oa iava vo araoreire aveavepaaepa. <sup>25</sup> Uva va-a vao oa iava Jisas voeare keeraroepa ora rera iare. Uva oiso puraroepa voeare, “Taraipatai oearovu-ia reipa irara oea ratau tou irarapa turropaa, oea-ia kae pievira oearovupa toupaiveira uvare pute pievira goruava toupaiveira. Oire ita, oearovu reipa irara rutu voeae-ia pute pievira rutu toupaive. <sup>26</sup> Uva vo pitupitu-a vao-ia oa viapau uvuipai ra visii vuutaaro-ia toupaive. Viapau. Ari ro ira oisi ora rei pieparo vo visii vuutaaro-ia ira oiso toupareverea kovopato visii tauvapaoro. <sup>27</sup> Ari vosa ro ira visiipa rei ruipaparo ira oiso toureverea, Visii reraaro kovopato. <sup>28</sup> ♦ Oiso rutu osa ragai ragoa urioraera vore.

♦ 20:8: Lev 19:3; Diu 24:15   ♦ 20:12: Je 1:11   ♦ 20:15: Diu 15:9   ♦ 20:18: Mt 16:21   ♦ 20:19: Ap 2:23, 3:13   ♦ 20:20: Jo 9:38   ♦ 20:23: Ap 12:2; Re 1:9   ♦ 20:28: Fl 2:7; Ais 53:10

Uva viapau oiso ruipaparaveira ra oearoi ragai kovopaive oirara vai. Ragoa urioraepa kovo purasa voea tauvaoro. Ora ragai vaaro tapo tootooa vatesa va iava vaseoro oirara rutupa voea oriuoro.”

*Jisas Voositoarei Porete Pierewa Ravotovira  
(Mak 10:46-52; Luk 18:35-43)*

<sup>29</sup> Oire uva Jeriko iava avaroepa. Oa iava oirara rutu Jisas sirova utuaepa. <sup>30</sup> ♦ Uva voa vaiterei voositoarei raiva vatuaro-ia pausiepa, vo osa rera iava uvusiva Jisas osa vokapareva. Uva oiso puraoro rerare keerapasiepa, “Turaro. Vii-a Devit Aaotoaaro. Vegeivipa siraou.” <sup>31</sup> Oa iava riro irara vaitereire korukorupaaepa oiso purapaoro, “Avaitereo, ora tape piesi!” Osa gausiva ita rirovira rutu. Uva oiso purasiepa ita, “Vii-a Devit Aaotoaaro. Vegeivipa siraou!”

<sup>32</sup> Oa iava Jisas voavi toupaoro vaiterei aatooro oiso puraroepa, “Eake vai-a oapa ruipapasiel ra oai puraa veipa?”

<sup>33</sup> Uva oiso rera tavisiva, “Turaro. Vegei oiso ruipapaveiei ra vegei osireiaro karuri.”

<sup>34</sup> Oa iava Jisas vaitereipa siraoroepa. Uva vaiterei osireiaro-ia vavaea tovoreva. Uva va iava vorevira vurasiva. Osa iava rera sirova utusiepa.

## 21

*Jisas Turarovira Koataroepa Jerusalem-ia  
(Mak 11:1-11; Luk 19:28-40; Jon 12:12-19)*

<sup>1</sup> Oire Jerusalem iare avapaoro Betfasi urui iare tutuu pieivoiva, Oliv Kovo Pukui varataaro-ia aitereivu disaipeltoarei ira pierewa vaiterei aruoro oiso, <sup>2</sup> “Vo urui-ia kareu virosa irasi. Ra voa donki kekesi ovusa variaua riara-ia toupaeve oviitoa tapo oira reraaro. Uva vo avaorei rutu karusivere ra vaitereiva voresi ragai iare.” <sup>3</sup> Oire ra vosa irai vei akepareve oiso, Eakere evaiterei avaorei oupasi? Ra oiso tavis, Iria-ia Turaro vo kovoaro toupaivoi. Oai iare vaitereo oupavevoi. Ra vaiterei iava vasereve ikauvira veipa.”

<sup>4</sup> Vo reo oirao piesa vao karekei oreoa purareva profetato oiso,

<sup>5</sup> ♦ ‘Vii Saion vata taviuvvere oiso, Eera visii reraaro King ira urioparoi visii iare gavaure vovouto. Ira donki kakae ivara-ia paupaoro urioparo.’

<sup>6</sup> Oire uva vaiterei vaitereo disaipeltoarei oisi vaiterei piesiva donki avaorei vaitereiva voreoro oiso osa Jisas vaiterei tavireva. <sup>7</sup> Oa iava varoara tovosiva vaiterei ivaria oara ivara-ia popotapavira pauparoepa Jisas. <sup>8</sup> Uva riro irara oirara ora riakora ora voea varaaro varoara parakapaoro vara tovopaiva raivaaro. Osa oearovu evaoara tosipaoro vara tovopaiva voa raga raivaaro. <sup>9</sup> ♦ Uva voea oirara ora riakora pireripaoro rerava irapaaepa, osa oearovu utupaaepa kaku piepaoro oiso purapaaepa, “Hosana Devit aaotoaaro-ia Pauto rera viraakoreve, ro-ia ira uriopa Turaro vaisiaro sovara-ia! Hosana vore viara-ia Pauto!”

<sup>10</sup> Oire uva Jisas Jerusalem urui-ia koataroepa. Oa iava oirara rutu ora riakora voeao vo urui-ia tou irara oea rera kekeoro paripariiva rutu oiso purapaoro, “Avoeo! Iroutoa rutu-a ro-ia?”

<sup>11</sup> ♦ Oa iava oirara ora riakora vokapaoro oiso puraaepa rerare, “Profetato ro-ia Jisas, Nasaret iava rera vo Galili taere sovara-ia.”

*Vo Jisas Oirara Sigureva Tempel Sovara Iava  
(Mak 11:15-19; Luk 19:45-48; Jon 2:13-22)*

<sup>12</sup> Uva Jisas Rovopa Kepa-ia aue Tempel koataroepa. Oa iava voava oirara rutu sigureva vo osa voa ora voripaaepa vo kepa sovara-ia. Uva voa tebolara petopetoreva oara-ia orekerovu-ia moniara ora tuutukopaaepa, ora varao paupara oara-ia paupaoro ora tuutukopaaepa kurue kare-ia. <sup>13</sup> ♦ Uva oiso voeare puraroepa, “Tugoropa Vuku oiso purapapeira, ‘Ragai vo kepaaro-a vao-ia oa vaisipaiveira oiso, Variripa kepa.’ Uva oiso rutu va piepatavoi, vataupa tapi kavirupa irara voaro.”

♦ 20:30: Mt 9:27; Sam 89:1-5    ♦ 21:5: Ais 62:11; Sek 9:9    ♦ 21:9: Sam 118:26    ♦ 21:11: Jo 6:14, 7:40

♦ 21:13: Ais 56:7; Jer 7:11

<sup>14</sup> Uva voa toureva Tempel sovara-ia osa oearovuva uriopaaepa voosi irara ora kotupipa irara rera iare voa. Oa iava voea ravotovira porete pie ovoipareva. <sup>15</sup> Uva reipa irara pris ora oearovu tarai irara Reo Taisi-ia vao ravotoa kekeiva. Oa iava kakae vure uvuiva osa kaku piepaiva Tempel sovara-ia oiso purapaoro, “Hosana Devit Aaotoaaria!” Osa-a eisi osa iava vuri vovou iraopaaepa rutu rirovira kasipupaoro. <sup>16</sup> ♦ Uva oiso puraaepa rerare, “E pasi vo reo uvurivoi oa purai viire?” Oa iava Jisas voeare oiso puraroepa, “Iu. Oa uvuavoi. Esa viapau vo reo vieipataveira oa oiso purapai, ‘Vii garepa kakaero oiso pieriva ora voeao sikeo irara roroara-ia tou irara ra vii-ia vuurapa vaisi purapaive?’”

<sup>17</sup> Oire uva voea kavuoro kosiro viropa uruia iare vao Betani voa tousa vo rupa-ia vao.

*Vo Jisas Reoroepa Oa Iava Fik Ova Erakoepa  
(Mak 11:12-14, 20-24)*

<sup>18</sup> Oire uva vokipaua rutu Jisas voreroepa riro urui iare. Uva voa rirovira rutu ogoeroepa. <sup>19</sup> Oa iava oevavu kekereva fik ova raivaaro. Uva vo eva iare avaroepa. Uva viapau oiso kuea vai kekereva voa. Ari guruvara raga toupaiva voa. Uva vo evare oiso puraroepa, “Viapau oiso ra kuepauvereita.” Oa iava ikauvira erako ovoiepa.

<sup>20</sup> Uva disaipel va vao kekeiva. Oa iava tavetave iraopaiva oiso purapaoro, “Apeisi iava fik ova ikauvira erako ovoiei?”

<sup>21</sup> ♦ Uva Jisas voea vaaro pukoreva oiso, “Ari ita, oiraopavira visii tavidaa oiso, Vosa oirao pie vovou rutu purapata vakuvaku asavira, oire ra oiso piepata osa vo evaore fik ova pieavo oa iava erakoei. Ari ita, ra viapau oiso va raga vao purapata. Ari uvuipatai ra vaore pukuia tapo oiso purata, Toreu ra ora vikiu vore avakava-ia. Oire ra oisi pieive. <sup>22</sup> ♦ Uva vo osa rariipaoro rutu variripata orekerovupa ruipapaoro, oa iava uvuipatai ra vara oupata.”

*Jisas Akeiva Oiso, Irou Vaore Vii Reesiva  
(Mak 11:27-33; Luk 20:1-8)*

<sup>23</sup> ♦ Uva Tugoropa Kepa-ia aue Tempel koataroepa Jisas. Oa iava oirara rutu siposiporeva voa. Uva reipa irara pris ora oearovu Isrel iava oearoa rutu urioaepa rera akesa, “Eake reesia vao vii vaaro oa iava vo kovo purapari? Irou vii vateva vo reesi?”

<sup>24</sup> Oa iava Jisas voea aatooro oiso puraroepa, “Ragai tapo ita visii akepaavoi oavure. Vosa ragai gisipoaro pukota, oire ra ragai tapo ita visii aatoa visii tavioro ragai vo reesiaro iava. <sup>25</sup> Oire vo baptaiso Jon oa puraparevora, ovuva vo karopoa oa urioera Pauto ruvara-ia, eke vova oiratoa raga? Ra ragai tativa!” Uva ora rugorugoo piepaaepa oiso, Apeisi avu purapavie? Vosa oiso puravio, Vova Pauto, ra oiso purarovere, Uva apeisi viapau va oirao piepata?

<sup>26</sup> ♦ Ari vosa oiso puravio, Oirato vaaro, uva riro irarapa uriripavie, uvare oirara rutu oiso rugorugoopaa oiso, Jon-a profetato rutu. <sup>27</sup> Oa iava oiso purapaaepa, “Viapau taraipai.” Uva Jisas voea tavireva, “Ragai tapo ita viapau visii tavia vo reesi iava oa iava vo kovo purapavora.

*Reo Ruu Iravu Oviitoareiaro Iava*

<sup>28</sup> “Apeisi rugoopatai? Iravu oirato ira oisoa oviitoareiaro toupasi. Oa iava avaiotoa iare avaroepa oiso rera arusa, Oviitoa oaa avau wain kovo-ia kovosa vo vokio. <sup>29</sup> Uva rera vo reoaro pukooro oiso puraroepa avaioto, Reasiparai. Oire va isivaaro iava vovouisi poreoro ita avaroepa kovosa. <sup>30</sup> Oire uva kikootoa iare avaroepa aiteto oiso raga ita rera tavisa. Oa iava oiso puraroepa, Iu aite. Avaparai! Uva viapau oiso avaroepa <sup>31</sup> ♦ Oire uva vaiterei-a vaitereo oviitoarei, uva aa ro aiteto vo reoaro sirova uturoepa?” Oa iava oiso puraaepa, “Ari avaioto.”

Uva Jisas voeare oiso puraroepa, “Oiraopavira rutu visii tavi iraopaa oiso, Voeao kavirupa irara takis oupa irara ora vairo otopa riako oea Pauto vo Saraaro-ia koata rovoaverea iraoro visiipa.

<sup>32</sup> Eake iava? Uvare Jon torevoko pitupitu kareke rovosa urio rovoroepa visiipa. Uva

♦ 21:16: Sam 8:2 ♦ 21:21: Mt 17:20; Je 1:6 ♦ 21:22: Je 5:16 ♦ 21:23: Ap 4:7, 7:27 ♦ 21:26: Mk 6:20

♦ 21:31: Lu 7:29, 50

viapau rera oirao pietava ovusa voeao takis oupa irara ora otopa riako rera oirao pieiva. Ari ita, uva va keketava oa iava viapau oiso vovouisiro oavisii poretava rera oirao pieoro.

*Reo Ruu Vao Voeao Iava Vuri Irara Oea Oisoa Wain Kovo Tokipaive  
(Mak 12:1-12; Luk 20:9-19)*

<sup>33</sup> ♦ “Reo ruu uvuta vao oa oiso purapai, Iravu wain kovo paureva. Uva vo kovo rirore kasura purareva. Oa iava voa rikui tekareva auere gerepara pigipato masin. Uva voa uitupa kepa paureva vo kovo ruvara-ia. Oa iava oiso oeavu kovopa irara tavireva, Vo kovo toki ragapatavere ragai vo kovoaro monia purapaoro ragai vaaro. Voea tavirevoiva, voea tovo pieoro vo kovo-ia otaerevu iare avaroepa. <sup>34</sup> Uva oivavu sovara-ia oeavu arureva kovopa irara rera voeao vo kovo iare, oiso ra vo kovo kuearo iava oarai ouive rerapa voeao ruvara-ia voeao oea oisoa vo kovo tokipaive. <sup>35</sup> Oire uva voeao oea arureva rera kovopa iraraaro oea ouiva voeao wain kovo tokipa irara. Oa iava voea iava iravu ragipaiva, ari iravu kopii pie ovoiiva, ari iravu vurokoiva aue-ia aveke. <sup>36</sup> Uva rera ro ira vo kovoaro-a oeavu ita arureva kovopa irara rera voeao riro iraravi rutu. Oa iava oisi raga ita voeao pieiva. <sup>37</sup> Oire uva ovoiokuvira rutu rera oviitoaaro rutu siporeva voeao iare oiso rugoopaoro, Ira vai-ia taru gisipoaro uvuivre ragai rutu oviitoaaro. <sup>38</sup> ♦ Oa iava oiso ora reoaepa voeao wain kovo tokipa irara, Rera-a ro-ia turaro oviitoaaro rutu. Irare ra rera upoera, rera varaaro rutu oupe. Ra oisi iavirava kovoa tokipe ora vigeipa. <sup>39</sup> Uva va iava rera-ia pituiva vo kovo sovara-ia. Oire voava rerava kosia viropa vo kovo vatuar-ia rera kopii piesa. <sup>40</sup> Uva apeisi vai rugorugoopatai vo siposipo uvupaoro? E utupavira urioroverea ro ira vo kovoaro-a? Ra eake vai-a vao oa purasa uriorovere voeao vo kovo tokipa irara, raa?”

<sup>41</sup> Oa iava Jisas-re oiso puraaepa, “Ari voeao rutu taru uporeverea voeao vuri irara. Ra oeavu raga ita tovo piereve vo kovo-ia. Uva vo aio oupa vuutaaro-ia vo kovo iava oupaoro rerapa vatepaaverea torevokovira.”

<sup>42</sup> ♦ Uva voeare oiso puraroepa Jisas, “Esa pasi vo reo vaio vieipataveira Tugoropa Vuku-ia oa oiso purapapeira,  
‘O-ia aveke iria veraiva voeao kepa paupa irara oira-ia kepa paupa arapa, eira rutu ita-a avekeva rovopava rutu kukuuvu tuuta oa eisi pierева Pauto Turaro. Uva evo kovo purareva oa vigei osireiaro-ia ravotovira toupaiveira.’”

<sup>43</sup> Ari ita, Pauto rera vo Saraaro-ia visii Jiu rui piereverea oeavu raga vatesa voeao oea vearo kue purapaveira va-ia. <sup>44</sup> [Ari vosa ro ira kovero oira ivara-ia o-ia aveke ra ora pegepegeoro ita. Ari vosa oira o aveke koveo irai ivara-ia, oire ra garepa visivi rutu rera taritaoro koveo.]

<sup>45</sup> Oire uva voeao pris ora Farisi va vao reo ruu uvuiva oa purareva Jisas. Oa iava rera oriorisioro oiso puraaepa, “Asi vigeire oiso puraparoi.” <sup>46</sup> Uva va-a vao oa iava oiso vovou ragapaaepa ra rera-ia pituive. Uva rirovira rutu uriripaaepa ita oirara rutupa voeao oea oisoa oiso purapaave rerare, Jisas profetato.

## 22

*Reo Ruu Vao Riako Oupa Aio Iava Vao-ia Rei Voki  
(Luk 14:16-24)*

<sup>1</sup> Oire uva oavu ita purareva reo ruu voeare oa-ia oiso puraroepa, <sup>2</sup> ♦ “Vao Pauto vo Saraaro oa oiso rutu toupai osa iravu reito king, ro ira oiso vo pitupitu purareva vo osa oviitoaaro riako ousa aueparo rei voki-ia. Oire riroa aioa purareva rera ro reito, <sup>3</sup> uvare oearovu oisoa reesi rovopareve oiso, Voeaore kaokaoravere rara vo aio iare. Oire pura piro vo voki vao oa-ia vo aio purareve. Oa iava rera voeao arureve, Voeaore keerasa avata. Ari vo osa reasipaave vo aio iare urio arapa. <sup>4</sup> Oa iava oisoa oeavu arupareva ita rera voeao kovopa irara oiso puraoro, Visii avata ita voeare keerasa ita oeare keera ragaraerao. Ra oiso voeavita, Uvuta. Ragai vaaro vatatopoei aioa, varao-ia oa puraavo oiso-ia bulmakau kare ora

♦ 21:33: Ais 5:1-7    ♦ 21:38: Sam 2:8; Hi 1:2    ♦ 21:42: Sam 118:22-23; 1 Pi 2:7    ♦ 22:2: Mt 13:24

voeao taoropa kare. Ragai vo karearo oea upoavo. Oa iava vara rutu-ia vatatopoavo. Ari uriota va iare vao riako oupa aio.

<sup>5</sup> “Uva eisi-a osa kaokaosa avaapea voea voeao kovopa irara voeare, osa reasipaapea ita vo kaokao uvu arapa. Uva voava ora sikasikaapea oiso oearovu ora voea vo kovoroaro iare vikuiva, osa oearovu ora voea vo kovoroaro purapasa sara kovoro avaaepa.” <sup>6</sup> Osa oeavu kovopa irara rauiva reito voeaaro voea vuri piesa voea kopii pieoro. <sup>7</sup> Uva oisi-a oiso osa iava rera ro reito rirovira rutu kasipuoro rera voeaaro arureva viurupa irara. Oa iava avaaepa voea opesi piesa voeao oea kovopa irara upoiva. Oa iava voea vo uruiano-ia tapo piuaepa.

<sup>8</sup> “Uva va-a vao oa iava reito rera voeaaro kovopa irara tavipareva oiso, Aioa vao oa vatatopoe tuariri. Oa iare voeare keera ragarae oea reesi rovoavora. Uva viapau uvuipaa ra urioave, uvare viapau uvuivira toupai voea vo rugorugooroaro.” <sup>9</sup> Oa iava visii tavipaa oiso, Vusita riro raiva iare voa siituepasa oearoire oirara vai ora riakora vai. Ra oeaire keerapaoro oiso purapata, Uriota riako oupa aio iare. <sup>10</sup> Uva eisi-a osa puraroepa, oa iava avaaepa kovopa irara riro raiva iare oirara rutu gurusa ora riakora voearo tapo vuri irara ora voeao vearo irara. Oa iava voea rutu paua urioaepa kavatao kepa-ia. Uva agasiepa voea iava.

<sup>11</sup> ♦ “Oire uva voa paupaaepa oirara rutu vo aio-ia osa reito koataroepa voea kekesa. Oa iava voea sovara-ia iravu kekerева ira viapau vearovira oritooro urioroepa vo vokia eva riako oupa aio-ia.” <sup>12</sup> Oa iava rerare oiso puraroepa reito, Vatetoa oaa. Apeisi iava viapau vearotoa vai-ia kuvutoa vai kuvuoro uriouei vo aio iare? Osa viapau rera aatopareva. <sup>13</sup> Oa iava rera voeaaro tavireva oiso, Rera vavaearo tuuketa ora kokotoarei tapo. Ra oisi rera pieoro rera kosi pieta vova eisire rupa-ia. Ra voa rupavira toupaoro ora reuriaro kuripareve ora rerapa siraopaoro. <sup>14</sup> Uva oisi-a eisi osa Pauto kaokaoparoveira riro irarare. Ari katakataipa irara raga ora rerapa reesipareve koatapasa rera vo Saraaro-ia.”

*Vo Jisas Akeiva Takis Moni Vatesa Sisa-pa  
(Mak 12:13-17; Luk 20:20-26)*

<sup>15</sup> Oire uva Farisi oiso vo reo purasa avaaepa, “Eake reo vai-ia rera tavatavaepe, ra oa iava rera piro piepe ro Jisas?” <sup>16</sup> Osa iava Herot aruiva disaipel tapo voeao Farisi voeaaro. Oa iava Jisas iare avaaepa oiso purasa, “Tisato, igei vii-ia taraipaiei oiso, Vi-a oiraopa reotoa rutu. Uva oiraopa vovou rutu vii vaaro oa iava oirara rutupa siposipopariveira Pauto vo pitupituaro iava. Uva viapau oiso oearovure rugoopauveira oiso, Teapi ragaire vuri rugoo puraive. Viapau. Ari katai reoa raga purapariveira oirara rutupa.” <sup>17</sup> Uva oisi-a eisi osa iava igei tavipari, Apeisi rugoopaei? E torevokopai ra rerapa Sisa takisvio moni vateoro ro gavman vigei reitoaaro, eke viapau?”

<sup>18</sup> Uva Jisas voea vo reoaro oriorisioro oiso puraroepa, “Visii vao riro ratarataa vovou irara. E ragai tavatavaepata?” <sup>19</sup> Ragai roro pie rovota oai iava takispa moni vai.” Oa iava oavuva urioaepa rera vatesa Jisas. <sup>20</sup> Uva oiso voea akereva, “Irouto puaaro-a ro-ia? Ora irouto vaisiaro-a?”

<sup>21</sup> ♦ Oa iava oiso puraaepa, “Ari Sisa.” Uva oiso puraroepa, “Vosa Sisa vaaro, oire rera vateta Sisa. Ari vosa Pauto vaaro, oire Pautoa-pa va vateta.”

<sup>22</sup> Uva vo reo-a vao oa uvuoro rirovira rutu va-ia rugorugoo iraoaepa. Oa iava rera arova avaaepa.

*Jisas Akeiva Oiratoa Iava Ro Ira Kopiilo Ra Vorevira Torero  
(Mak 12:18-27; Luk 20:27-40)*

<sup>23</sup> Oire uva vo voki raga vao oa-ia reipa irara Sadyusi-pa irara vova lotua Jisas akesa urioaepa. [Evoea oea oisoa kopiipa irarare oiso purapaave, “Viapau oiso torepaverea vorevira kopii tapi iava.”] <sup>24</sup> ♦ Uva oiso rerare puraaepa, “Tisato, Moses oiso puraroepa, Vosa iravu kakae pura asavira kopiilo riakovapa, oire ra araokoto ita oira oureve. Oire rerapa ro kopiito oira-ia kakaeto purareve araokoto.” <sup>25</sup> Oire vo tuariri erao vatara (7) rutu oaraovu oea oiso igei ruvara-ia toupaive. Oea iava iravu avaioto iriavu arova riakova kopiiloepa kakae pura asavira. Oa iava kikooto ita aia oira oureve.” <sup>26</sup> Uva eraopato ora

♦ 22:11: 2 Ko 5:3; Kl 3:10-12; Re 3:4, 16:15, 19:8   ♦ 22:21: Ro 13:7   ♦ 22:24: Diu 25:5

vo pevapato oisi raga ita piesiva oira arova. Oa iava vo arao rutu vo rekasiaepa erao vatara rutu-ia oirapa kakae asavira raga kopiipaoro. <sup>27</sup> Oire uva vo arao rutu opesiaepla kopiioro. Oa iava vo arao isivaaro iava kopiopa ita oira. <sup>28</sup> Uva vo vokio-ia oa-ia oirara rutu toreaverea vova kopiia-ia. Uva irouto vo arao iava oira oureverea? Aue iava uvare vo arao rutu oisoa oira oupaise oira arova kopiipasa.”

<sup>29</sup> Oa iava Jisas oiso voea vo reoaro pukooro oiso puraroepa, “Viapau oiso taraipatai Tugoropa Vuku vo rigatoaro-ia. Ora viapau tapo taraipatai Pauto vo goruaro-ia tapo. Eisi osa kokoropavira ora reopatai. <sup>30</sup> Oire vo vokio oa-ia oirara rutu kopiia iava vorevira toreaverea oa-ia viapau oiso voreria vaiei riako ou vai. Ari oiso raga toupasa vorevira toreaverea osa purapurapa irara ensel voeao vuvuiua.

<sup>31</sup> “Uva vo reo-a vao oa iava visii akepa voea iava voeao kopii irara oea torepaaverea. Asi viapau pasi vo reo vieipataveira oreoa iava Pauto visii tavireva? Oa-ia oiso puraroepa, <sup>32</sup> ♦ ‘Ragai-a Pauto oaive Ebrahim, ora Aisak, ora Jekop voeao oea urauraaro tootoovira toupaiverea.’ Ari ita, uva va-a vao vituaro iava oiso purapai, Viapau oiso kopii irara reraaro-a Pauto. Ari Pauto-a voea reraaro oea tootoopai.” <sup>33</sup> Oire uva voeao voeao oea vo reo uvuoro vao-ia ora sitaaepa va-ia tavetavepaoro.

*Vo Toupai Reo Taisi Vao Rovopa Rutu Pauto Vaaro  
(Mak 12:28-31; Luk 10:25-28)*

<sup>34</sup> Uva voa-a vo uva Sadyusi-pa irara tape pierava Jisas voeao vo reoaro tuuoro. Oa iava Farisi va iava uvuoro urioaepa. Oire voava voearei rutu ora guruaepa rera ruvararia. <sup>35</sup> Uva voearei rutu iava iravu riro reo kerisito Reo Taisi-ia toupareva. Ira oiso vovouparoepa ra Jisas tavatavaereve rera akeoro. <sup>36</sup> Uva oiso puraroepa, “Tisato. Aa vao-a reo goru oa vara rutu-ia reo goruro pute iraopai?”

<sup>37</sup> ♦ Oa iava Jisas vo akeo aatooro oiso puraroepa, “Reito Pauto vii reraaro irapa sopaua oara rutu vateri, ora rugorugooara rutu, ora taraiara rutu varao vii varapro rera ragapa vateri.

<sup>38</sup> Va vao-ia reo goru oa reipai rutu ora rovopa rutu. <sup>39</sup> ♦ Uva eraopa oa vava areiivira raga oiso purapai, Ora vii sopapro rutu vatepari voeao oea vii ruvara-iavi toupaiveira, oiso rutu osa ora viipa siraopauveira. <sup>40</sup> Vo taisireo Reo Taisi rutu vituaro varao Moses vase ora profeta irara varapro.”

*Jisas Farisi Akereva Ora Rera Iava Krais  
(Mak 12:35-37; Luk 20:41-44)*

<sup>41</sup> Vo uvuru raga-ia toupaiva Farisi osa Jisas oiso voeao akereva, <sup>42</sup> “Apeisi rugorugoopatai Krais-ia. Irou aaotoaaro?” Oa iava oiso rera taviiva, “Ari Devit aaotoaaro.”

<sup>43</sup> Uva oiso puraroepa voeare, “Uva apeisi iava Devit vaterava Tugoropato Uaurato vo rugoo oa iava Krais-ia Turaro vaisi tovoreva oiso puraoro,

<sup>44</sup> ♦ ‘Turaro Pauto ragai reraarore Turaro oiso puraroepa, Vo paupauverea oirapapa varata-ia vo tugurasa ovokia-ia voeao vii voeapro keripa irara tovoaverea vii kokotoaro reroaro.’

<sup>45</sup> Ari ita, Devit raga turarovira Krais vaisireva. Uva apeisi ragavira? Uvare Devit aaotoaaro-a ro Krais ira Devit sirova kavauroepa.”

<sup>46</sup> Oa iava viapau oiso irai uvuiparoepa vo reo pukosa Jisas vaaro. Uva voa-a evoa uva rovoaepa uriripaoro rera ake arapa vorevira.

## 23

*Tisa Irara Vo Pitupituroaro Aue-ia Reo Taisi Voearei Ora Farisi  
(Mak 12:38-39; Luk 11:43, 46, 20:45-47)*

<sup>1</sup> Utupavira Jisas oirara rutu tavireva ora voeao rera voeapro disaipel. <sup>2</sup> ♦ Uva oiso puraroepa, “Voeao tisa irara tarai irara Reo Taisi-ia voearei ora Farisi oearea reesiiva oeavu oavu-ia paupa vo uva oisoa Moses varapro Reo Taisi aviavi piepaive. <sup>3</sup> Uva oisi-a eisi osa vao oiraopo reo rutu va vatepaiveira visiipa. Uva uvuipatai ra va uvupatai, ra va sirova

♦ 22:32: Eks 3:6, 16; Hi 11:16 ♦ 22:37: Diu 6:5 ♦ 22:39: Lev 19:18; Ro 13:9; Je 2:8 ♦ 22:44: Sam 110:1; Ap 2:34; Hi 1:13, 10:13 ♦ 23:2: Esr 7:6, 25; Nie 8:4

utupata. Ari vao voea vo pitupituaro, viapau oiso vao Reo Taisi sirova utupaaveira oa-ia voeao oirara siposipopaiiveira. Eva-a oa vituaro iava viapau rutu oiso ra voea vo pitupituroaro sirova utupata. <sup>4</sup>◊ Ora riro vavatapa ruuro tuukepaiveira oirara yutuaaro-ia vara tovopasa, vo osa ora voea raga viapau varavi-ia pitupaive sipareoaravi raga iava voea tauvapaoro oea vara kaepaive. <sup>5</sup>◊ Uva vara rutu purapaiveira oiso ra oirara vara kekepaive. Iu. Riropa pakoro oara oisoa purapaive Tugoropa Reo-ia pakopasa vara-ia. [Oire varava riro kaekaepavira variripaave.] Ora aue tapo papaapa varoro oara-ia oisoa oritopaave, oara oisoa kokotoara rutu iare vara piepaive. [Oire ra vara vituaro-ia riro paraka turua purapaive va iava ora reesipasa, oiso ra oirara rutu vara iava oiso aeupaave vara kekepaoro, O, riro tarai irara voeao Tugoropa Reo-ia.] <sup>6</sup>◊ Ora oisoa rovopa tavukipa ruipapaave paupa vo aiopa vokia. Ora vao tapo paupa vo Reo Uvupa Kepa-ia Sinagog oa-ia oisoa paupaave reipa irara. <sup>7</sup>◊ Ora oiso tapo ruipapaave ra oirara rutu voeapa ora avivikepaoro oiso voeare purapaave, Vearo voki, vo uruiara rutu sovara-ia. Ora oiso tapo purapaave, ra oiso voea vaisipaive, Tisa irara.

<sup>8</sup> “Uva oiso ruipaparai ra viapau oisi visii vaisipaive oiso, Tisa irara. Viapau. Ari kataitoa raga, visii reraaro Tisato. Ari visii rutu-a katai arao rutu. <sup>9</sup>◊ Uva vo rasio-ia viapau uvuipatai ra irai rei piepata irai vaisipaoro oiso, Vigei aitearo. Viapau. Ari kataitoa raga Aite oavisii ira oiso toupare vuvuiua-ia. <sup>10</sup>◊ Ora viapau tapo ra oiso visii vaisipaive, Turaro. Viapau. Ari kataitoa raga visii reraaro, Ragai ita Krais. <sup>11</sup>◊ Ari vosa ro ira visiipa reiparo, ira-a eera uvui iraopa ra ora vaisiro oiso, Visii reraaro kovopato. <sup>12</sup>◊ Ari ro ira ora vaisiaro raga kae piepareve, ira-a eera vaisiaro akaipa pierevere Pauto. Ovusa ro ira ora rera vaisiaro vara piepareve, ira vaisiaro kae pierevere utupaua Pauto.

*Jisas Tisa Irara Ora Farisi Tavireva Vao Iava Vuri Pitupitu Oa Oisoa Purapaive  
(Mak 12:40; Luk 11:39-42, 44, 52, 20:47)*

<sup>13</sup> “Oire visii vao tarai irara Reo Taisi-ia ora visii Farisi visiigoa vatatopo iraopata riro kuuvu irara rutu visii. Visiigoa rataoa tupapataveira vao Pauto vo Saraaro iava vo oirara rutu osireiaro-ia. Ora visii ruture tupapataveira vo osa oearovu koata ruipa ragapaave. Oire ra visii raga vo vovouroaro-ia paipaipaive oearovu rara visii raga voeare tupapata.

<sup>14</sup> “[Visii vao tarai irara Reo Taisi-ia ora visii Farisi visiigoa vatatopo iraopata riro kuuvu irara rutu visii. Ora riro rароe riakore vo keparoaro ou raga irara. Visiigoa vao oirara osireiaro-ia riro kaekaepa variriro purapataveira vuriara oavisii vataupaoro. Oire uva va-a eva oa vituaro iava vuria rutu oupataverea riroa voria vuria.]

<sup>15</sup> “Visii vao tarai irara Reo Taisi-ia ora visii Farisi visiigoa vatatopo iraopata, riro kuuvu irara rutu visii. Visiigoa avakava-ia viripataveira ora voraro vo rasio rutu-ia kataitoa ragare taraapaoro disaipelto, oiso ra visiipa disaipelparo. Oire ra oisi rera pietavora, rera ava pieta Vuri Tapi iare. Ra visii raga vo vovouroaro sirova uturo ita oiso osa vara sirova utupataveira visii. Uva va iava eva visii vo voriroaro-ia vuriara rera vo voriaro vuria rutu pute pievira karekepe.

<sup>16</sup> “Visii vao-ia visiigoa oearovu tuvetuvepataveira raivara-ia oiraravoosipaoro. Visiigoa vatatopo iraopata. Visiigoa ora visii vo siposiporoaro vatepataveira oearovupa. Oire ra oiso voeare purapata, Vosa irouto Tempel vaisi ragapaoro reo ovoi purareve, ra oiso puraparo, Oiraopavira rutu, oa oiso toupaivoi kiuvu reo raga eva. Ari vosa irouto ro ira gol vaisioro reo ovoi purareve vao oa Tempel sovara-ia toupaiveira, oire ra viapau uvuipa ora rera raga vo reoaro gasireve.

<sup>17</sup> ◊ “Visii kokoropa irara ora voosi irara. Eake vai-a vao oa reipai? Gol pasi oa reipai, eke Tugoropa Kepa aue Tempel oa gol tugoro pievira karekepapeira, ra va iava rei vaisipape? <sup>18</sup>◊ Ora vao tapo osa ora visii vo siposiporoaro iava oaravu vatepataveira oearovupa. Uva voeare oiso purapata, Vosa irouto eravao raga vaisipaoro oiso puraro, Oiraopavira rutu, oa oiso toupai kiuvu reo raga eva. Ari vosa irouto tauoa eravao-ia toupaive osa oiso puraro, Oiraopavira rutu, oire ra viapau uvuipa ora rera raga vo reoaro gasireve. <sup>19</sup>◊ Visii vao voosi irara. Eake vai reipai? E pasi tauoa reipapeira, eke eravao tauoa rei piepaiveira. Oa iava tugoropavira karekepapeira, eke? <sup>20</sup>◊ Uva eisi osa iava oisoa oirato eravao oirao piepaoro oiso puraparo, Oiraopavira rutu, ora orekerovu rutu varao oara oira ivara-ia toupaive. <sup>21</sup>◊ Ari vosa ro ira

Tempel vaisioro oisi puraro oiso, Oiraopavira rutu, oire uva rera-a eera ira voa Pauto tapo vaisire. Eake iava? Uvare Pauto voa toupareveira Tugoropa Kepa vao Tempel. <sup>22</sup> ♦ Ari vosa ro ira vuvuiua-ia vaisioro oisi puraro oiso, Oiraopavira rutu, oire uva rera-a eera ira Pautoa tapo vaisire voa. Eake iava? Uvare Pauto voa pauparoveira.

<sup>23</sup> “Visii vao tarai irara Reo Taisi-ia ora visii Farisi riro kuuvu irara. Visii vao garepa aiorovi iava akuku aioro katakataivira vara vatevate ragapataveira varao iava tautauara rutu iava. Oiso osa varao aiorovi taraipara utuuva geesi piepataveira aue-ia geesi kouro Pautoa-pa tauoa purapasa. Owsa varaoe reipara ovaupataveira rutu oiso osa varao-ia oira rovirieipa pitupitu oiraopa, ora oirarapa siraopa pitupitu, ora oirao piea vo pitupituro. Oire rovopa vao-ia vosa varao purapata, ra viapau oiso gareparavire tapo ovaupata vara purapa arapa. [Oiso osa vao-ia taraipa aioro utuuva geesi piepa.] <sup>24</sup> Visii toupata oiso rutu osa voosi irara. Visiigoa oisore auepataveira ra oirara tuvetuvepata vo raivao-ia oa-ia auere ora kasivaripataveira kuvikuvi kare veraverapaoro roviara iava. Ari vosa koie ra oira rutu kopata.

<sup>25</sup> “Visii vao tarai irara Reo Taisi-ia ora visii Farisi riro kuuvu irara visii. Visiigoa kap iava varaua raga sisupataveira ora dis, owsa vara sopaaro agasipape varao iava kavirupa pitupituro ora varao ora aio piepa pitupituro visii raga vararo. <sup>26</sup> Vii Farisi voosito! Viigoa kap sopaaro sisigarue pie rovopari, ra oira vararo tapo sisigarue epao.

<sup>27</sup> ♦ “Visii vao tarai irara Reo Taisi-ia ora visii Farisi riro kuuvu irara. Visiigoa vatatopo iraopata. Visiigoa oisi rutu toupataveira osa tova urui. Oa ivara-ia vatoe kerarire vearo kekepapeira vo ragava ivara-ia. Owsa rikuara sovara-ia riroara oira eruro keruara toupaive, ora oaravu rutu eruara. <sup>28</sup> Eisi osa visii iava varaura sopaaro toupaiveira. Oire ra oearovu rutu oirara visii vararo kekepaoro oiso keapaave, Torevoko irara, owsa visii iava sopaura oavisii agasipape varao iava ratarataa vo pitupituro ora varao tapo Reo Taisiva kaureopa pitupituro.

*Jisas Voea Rutu Tisa Irara Tavireva Oiso, Vuri Vori Outaverea  
(Luk 11:47-51)*

<sup>29</sup> “Visii tarai irara Reo Taisi-ia ora visii Farisi riro kuuvu irara. Visiigoa vatatopo iraopata. Visiigoa tova uruero oritopataveira vo uruero uva voeao tovaiva torevoko irara ora profet irara.

<sup>30</sup> Oire oiso purapataveira, Vosa voari rutu toupaiovori igei aao iraraaro vo vuutaario-ia tuariri, oire ra viapau voea tauvapaio profet irara upopao. <sup>31</sup> ♦ Uva evo reo oa purapatavoi ora visii iavirava oa-ia vaisipatavoi oiso, Igei aao iraraaro oea oisoa profet irara upopaiive. <sup>32</sup> ♦ Visii vo pitupitu vao ovoi pie iraopata, oa rovoiva visiipa aao irara oavisii voari tuariri. <sup>33</sup> Visii rakoru kare, ora rakoru kare ovii iraraaro. Apeisi-a oiso osa rugorugoopatai vao-ia reesia vore Vuri Tapi? Viapau visii ouverea, raa? Uva ovu rutu iare toritaverea?

<sup>34</sup> “Uva va-a eva oa vituaro iava voeao siposa aueparai visii vuruvuruaro iare riro tarai irara profet irara, ora tisa irara. Oea iava oearovu upopataverea, vo rara kare uviropaave visii vuruvuruaro iare. Ari oearovu tapapataverea evao parikouro-ia voeao iava, ora oearovu ragipataverea Tugoropa Keparo sovara-ia. Ora voeao tapo iava oearovu sigupataverea oururopu iava, ora voeao tariopataverea ra avapaave oururopu iare. <sup>35</sup> ♦ Uva eisi-a osa iava vao visii-ia karekepereea oa puraiva visii aao iraraaro voeao-ia vo rasio-ia. Ari ita, torevokoto Ebel ira kopii pieiva rera upooro. Oire rera-ia rovoaepa oa iava Sekaraia-ia pou piropa vo pitupitu raga eera Berekia oviitoaro. Uva voeao-a evoea oea upoiva Tempel iava vo tugi vuutaaro-ia ora eravao. Uva evoea-a oea-ia eva puraiva ovuria eva oa vorevira visii-ia kare piervereira Pauto. <sup>36</sup> Oiraopavira oiso visii tavipaavoi vao iava oa puraiva voari tuariri oa voriaro vuriaro ouiverea voeao vo vokio iavapa irara.”

*Jisas Gaureva Jerusalem-ipa  
(Luk 13:34-35)*

<sup>37</sup> ♦ Oiso puraroepa, “Ae! Visii vao Jerusalem vata! Ae, visii Jerusalem vata! Visiigoa profet irara upopataveira voeao vurukopaoro aveke-ia. Pauto kovopa irara oaro oea sipo ragapareveira

⊗ 23:22: Sam 11:4    ⊗ 23:27: Ap 23:3    ⊗ 23:31: Ap 7:51-52    ⊗ 23:32: 1 Te 2:16    ⊗ 23:35: Jen 4:8; Sek 1:1

⊗ 23:37: 2 Kro 24:21

vokiara rutu-ia. Ari ita, visii kakae vure oaa guru ragapaaveira oiso osa kokootu aakova ovii irara rakupaeveira putaeuarei-ia, osa ragaire korukorupata ora visii-ia.<sup>38</sup> Oire oiso visii tavipaavoi, Uruia oavisii vao kuvaupai rara.<sup>39</sup> ♦ Uvare oiraopavira visii tavipaa, Viapau oiso ragai keketavere vorevira vo rekasisa utupaua, vo vuuta-a eva uva oiso purataverea, Pauto viraakoa vateri ropa ira urioroi Turaro vaisiaro-ia.”

## 24

### *Jisas Tugoropa Kepare Reoroepa Oiso Ra Opesi Ovoipe (Mak 13:1-2; Luk 21:5-6)*

<sup>1</sup> Uva kosiro viropa vova Rovopa Kepa-ia Tempel osa disaipel rerare ravaaepa, vo osa voava urioparoepa. Oa iava Tugoropa Keparore rerare oiso puraaepa, “Auoro, vo keparo kekeri Tugoropara.”<sup>2</sup> ♦ Oa iava Jisas voeare oiso puraroepa, “Iu! Oara kekepata evara reipa keparo. Uva oiraopavira rutu oiso visii tavipaavoi, Viapau iriai aveke vai eakave iriai ivara-ia aveke vai osa toupaive. Oara evara kururu piroverea koveoro.”

### *Jisas Voea Tavireva Aue Iava Riroa Tavaka (Mak 13:3-13; Luk 21:7-19)*

<sup>3</sup> Uva vo tou-ia vao-ia pauroepa vo pukuia-ia Oliv Kovo-ia. Oa iava voa rera iare urioaepa disaipel. Uva voa rera eripaiva rera akepaoro oiso, “Igei taviri oiso, Aa vo vuutao-a vao oa-ia evara karekeperea? Uva eake vai-a vao oa iava vo vuuta eveiioverea oiso, Vao vii vo vokiaro vao oa-ia kareuvverea, ari vao ovoiopa vuuta?”

<sup>4</sup> ♦ Oa iava Jisas voeare oiso puraroepa, “Visii ora vatatopo iraopata, teapi irai visii kearevere.”<sup>5</sup> Riro irara uriopaaverea ragai vaisiaro raga-ia ora vaisipaoro, ra oiso purapaave, Ragai raga-a vao Krais. Uva riro irara rutu oirara ora riakora keakeapaiverea.<sup>6</sup> Uva oiso upoa gurukoaro uvutaverea, ora va iava siposipo ovusa uvavu toupaive. Ra opeita rirovira rugorugoopata ora sitapaoro vo osa va vao kosi piro. Aue iava uvare va-a eva oa kareke rovpore, ra vovio vo utupaua ovoiopa voki karekeperea rara.<sup>7</sup> ♦ Oiso-ia oearovu oirara upoa kosi piepaiverea oearovu-ia oirara, ovusa osararovu osararovuva ora upoavverea. Ovusa ogoe vuutaro kosi piroverea voraro rutu ora ravurikeara.<sup>8</sup> Uva varao oiso rutu toupaiveira osa riakova oisoa kakaetoava upia rovopao rera kavausa.

<sup>9</sup> “Vo vuuta-a vao-ia oa-ia visii oupaiverea visii vao kovopa irara oaro Pauto vatepasa upia ora kasipua visii upopao tapo. Uva osararovu rutu iava oiso visiire vuri vovoupaaverea rutu. Eake iava? Uvare vaisia oaa visii-ia toupai.”<sup>10</sup> Uva vo vuuta-a vao oa-ia oearovu voea varaarore ovauaverea oirao pie vovouro. Ra araoko irara oaive iava gasipaive keripa irarapa ora voeare kasipupaoro rutu.<sup>11</sup> Riro irara rutu tapo profet irara oea karekeaverea oirara rutu keakeesa.<sup>12</sup> Oiso-ia vuri pitupituro rutu karekeperea riro irara-ia. Oa iava ora voeapa siraopa vovouro oaive kavuiverea.<sup>13</sup> ♦ Ari vosa ro ira viapau raveraveparo vo tugurasa ovoiopa vuuta iava vo voki-ia, uva rera-a eera ira oureverea Pauto ora rera iare.<sup>14</sup> ♦ Ari ita, oearovu Vearo Siposipo kosi piepaivere Pauto vo Saraaro iava siposipopao voraro rutu rasitoa rutu-ia. Ra va iava oirara rutu vo siposipo-ia taraipaave vao-ia. Oa isivaaro-ia karekeperea vao-ia ovoiopa voki.

### *Vuri Siitoka Rutu Karekeperea (Mak 13:14-23; Luk 21:20-24)*

<sup>15</sup> ♦ “Oire uva va-a vao riroa rutu vuria oa keketaverea. Eva-a oa vituaro iava vo reo purareva Daniel tuariri voa toupaoro vo Tugoropa Tapi. [Ari ita, ro ira vo reo vieireve vao-ia, oire ra vearovira vare rugooparo.]<sup>16</sup> Uva vo vuuta-a vao-ia oa-ia oirara rutu Judia-ia touiverea, ra uriripaoro voava tori iraoive pukuia iare.<sup>17</sup> Ari vosa ro ira kepa ivara-ia kiuvu oupaoro uvuruparovere, ra viapau oiso voava rerereve auero rutu gurusa varao rera varaaro.<sup>18</sup> Ari vosa ro ira varuparo toureverea, oire ra viapau oiso voava ora porero kuvuparare

♦ 23:39: Sam 118:26; Mt 21:9   ♦ 24:2: Jo 2:19   ♦ 24:4: Jer 29:8; 2 Te 2:3   ♦ 24:7: Ais 19:2; Sek 14:13

♦ 24:13: Re 2:7   ♦ 24:14: Ro 10:18   ♦ 24:15: Dan 9:27

rugoro varao rera varaaro. <sup>19</sup> Siraovira rutu vairoviopa taruko riako, ora vairo airoa sikeo kakaero roro piepaiverea vo voki-ia vao. <sup>20</sup> Variripatavere tuepaoro. Teapi torita vo kiuvupa vuuta eke vao-ia Tugoropa Voki ra Reo Taisi oaro Pauto gasita vokaoro Tugoropa Voki iava vo reo. <sup>21</sup> ♦ Aue iava uvare vo vuuta-ia eva riroa rutu toupaiverea tavaka. Uva viapau oiso oai va-ia putepai vao iava oa pura piropa voari tuariri oa vao vo vokio-ia tugurapai. Va rutu vao isivaaro iava viapau oiso otavakai perea voari rutu utupaua oiso osa va vao-ia. <sup>22</sup> ♦ Ari vosa Pauto viapau vo vuuta vao poteku piepareve, ra oirara rutu opesiae. Ari ita, voeo ragare rugoro vo vuuta poteku pierevere oea reesireva ora rerapa.

<sup>23</sup> “Vo vuuta-ia vao oire vosa irai visii tavipareve oiso, Krais-a ro vo-ia ira keketa. Eke oiso puraro, Varo vavo-ia, oire ra viapau rera vo reoaro oirao piepata. <sup>24</sup> ♦ Ora oearovu keakea irara krais irara ora oearovu profet irara oearoa rutu toreaverea karekeoro riropara rutu purapaoro ravotoara. Ora oaravu pisipisa kovoro oara tapo ravotovira puraiverea. Ari ita, vosa uvuipaave, oire ra oirara rutu ivuive ora voea iare voeo oea reesireva Pauto ora rerapa. <sup>25</sup> Uvuta! Vao iava visii vosiavoi ravaavira, ra uutupata.

<sup>26</sup> “Eisi vosa visii tavipaire, Rera keketa varo ira vavo toupare kuvau tapi. Oire ra viapau voea vo reoaro uvuipaoro voare avapata. Ora vosa oiso visii tavipaire, Ro-ia kepa sovara-ia ira vataupa. Oire ra viapau oiso voea vo reoaro oirao piepata. <sup>27</sup> Taraipataveira varakeotoa-ia ira parakaupaoro voraro rutu aviavipareveira vuvuiua-ia. Eisi osa parakauoro voreraverea Oirato Oviitoaaro Ro Ropoto vo oirara rutu osireiaro-ia.

<sup>28</sup> “Uva osa-a eisi osa vatau asavira ruega kare ora gurupaaveira eru karero aiopasa.

#### *Utupaua Oirato Oviitoaaro Urioroverea*

(Mak 13:24-27; Luk 21:25-28)

<sup>29</sup> ♦ “Vo osa vo voki vao tavakapa voki isivaaro iava ravireo ruparovere, ora kekira tapo oiso viapau rororeverea. Aaviikoara kovekovepere vova vuvuiua iava. Orekerovu rutu goruara vova vuvuiua ravurikepere. <sup>30</sup> ♦ Uva vo vuuta-a vao oa-ia ragai vo reesiaro vuvuiua-ia karekepere. Oire uva oirara rutu vo rasio-ia va kekeoro gauiverea, vo rara ragai Oirato Oviitoaaro tueverea ovusa rukuta sovara-ia uriora riroa rutuva gorua ora keraria ragai vaaro. <sup>31</sup> ♦ Oire utaveoro varapaavere vo rara ragai voeaaro aruave enselpa irara, ra voea guruive voeo oea ropoava voraro rutuva vo rasito rekasiaro-ia.

#### *Fik Ova Oa Aue Reesipaireveira Vuuta Vao Rovirieipa Pitupitu Iava*

(Mak 13:28-31; Luk 21:29-33)

<sup>32</sup> “Visii uvuipatai ra vao-ia fik ova tarai oupata vo rara airepa guruvaro kosi pieive. Oire ra va iava oiso taraita, Uukoa toupai vai-ia, oa iava poretevira toupaivoi. Ra va iava oisi ragavira taraipata raipipa vuuta tutuu piepai oa-ia ravireo rororovere. <sup>33</sup> ♦ Eisi ragavira ita osa iava uvuipatai ra ragai iava taraipata oiso, Reraei ira ratao riaaro-ia ora tovoroi koatasa. <sup>34</sup> Oiraopavira rutu visii tavi iraopaavoi oiso, Oirara rutu voea vo vuuta-ia eva viapau oiso voea rutu kopiiavere vosa vara rutu evara kareke rovoperea. <sup>35</sup> ♦ Oire oiso-ia vuvuiua opesiperea ora rasito. Ari ragai vo reoaro viapau rutu oiso opesiperea.

#### *Viapau Irai Taraipa Vuuta-ia Ora Vo Vokio Oa-ia Voreroverea*

(Mak 13:32-37; Luk 17:26-30, 34-36)

<sup>36</sup> “Uva viapau irai taraiparoi vo voki-ia ora vo vuuta-ia, ora purapurapa irara voeo ensel oaro tapo voeo vo vuvuiua oea viapau taraipaai, ora Oviitoaaro tapo viapau taraipa. Ari Aitetoa raga taraipa Pauto. <sup>37</sup> ♦ Vo pitupituro oara puraiva vo Noa vo vuutaaro-ia osa raga eisi osa ita pieiverea vo vuutao-ia oa-ia voreraverea Oirato Oviitoaaro Ro Ropoto. <sup>38</sup> Voari tuariri uva rirova pirutuva kareke asavira toueva ovusa vo vuuta-ia vearovira aiopaiva, ora vearovira ukaiopaaepa osa oearovu vo vuuta-ia vearovira raga riako oupaaepa. Oire vo tugurasa urioaepa oisi raga piepaoro uva Noa uvuoa sovara-ia koatarioepa, va vaisiaro, aka. <sup>39</sup> Ari ita, viapau oiso oisi rugoopaaepa. Oa iava akukuvira raga toupaiva osa

◊ 24:21: Dan 12:1    ◊ 24:22: Ais 65:8-9    ◊ 24:24: Re 13:13    ◊ 24:29: Ais 13:10; Esi 32:7    ◊ 24:30: Dan 7:13    ◊ 24:31: Sek 9:14    ◊ 24:33: Je 5:9    ◊ 24:35: Mt 5:18    ◊ 24:37: Jen 6:5, 7:6-23

rirova pirutuva urioopa voea rutu oirara ora riakora turosa. Uva oisi raga ita-a eisi osa pieiverea vosa Oirato Oviitoaaro vorero vo uva viapau rera vorearore rugorugoopaave. <sup>40</sup> Ari vo osa aiterei toupasiverea varuparo vai. Oire uva vaiterei iava iravu oureverea Pauto iravu arova voa raga. <sup>41</sup> Ari vo osa airei riakorirei vai plaua purapaerevereau bret, osa Pauto vairei iava iriavu oureve iriavu arova voa raga. <sup>42</sup> Uva eisi osa iava vearovira rutu uutupata. Viapau oiso taraiataveira vo vokio-ia oa-ia Turaro oavisii voreroverea. <sup>43</sup> ♦ Vare vao rugoo iraopata. Oire rovovira rutu ro ira vo kepaaro-a kepa oiso rugorugooparo, Esa vokiaro vai urio viarovere kavirupato, ra uutuparo. Ra viapau oiso rera eaka ragapareve ovusa rera vo kepaaro tatepareve koatasa. <sup>44</sup> ♦ Uva visii tapo vao-ia vatatopopata tuevira vokiara rutu-ia vaore rugopaooro oa-ia Oirato Oviitoaaro voreroverea. Vo ovuutai-ia viapau oiso ra oiso rugoopata, Uriorovere rara. Oire uva vo vuuta-a vao oa-ia oirara rutu rerapa vovou vakuvakuvira touiverea oiso purapaoro, Viapau oiso vo vokio uriorovere. Ovoki-a eva oa-ia voea sita piereverea.

*Vo Toupai Oiratoarei Iava Kovopatoarei Oiso Iravu-a Vearoto, Ari Iravu-a Vurito  
(Luk 12:42-46)*

<sup>45</sup> “Oire irouto-a ro kovopato ira oisoa toupareve, Eera vearo rugorugooto ora vearo kovo purapato. Oare rera tovoreva reito ro rera reraaro oearovu-ia kovopa irara vuravurapasa voea tokipaoro ora aio vatepasa vo ora rera vo vuutaroaro-ia. <sup>46</sup> ♦ Oire utupaua reitoa ro voreroverea, ra rera kekereve ro kovopato ovusa vo kovo purapareve oiso osa vare rera tavireva, ra va-ia rera ro kovopato rorureve. <sup>47</sup> Uva oiraopavira rutu visii tavipaavoi oiso, Auero rutu rera varaaro tokipasa rera tovoreva kovopato. <sup>48</sup> Ari vo osa ro kovopato vurito ora rera raga ora keaparo oiso purapaoro, Ragai reraaro reito viapau uvipa ra ikauvira urioro. <sup>49</sup> ♦ Oire rovoro ora rera voeapro upopaooro kovopa irara aue raga purapaoro ukaio ora aue tapo aio oearovu tapo oirara. <sup>50</sup> Oire rera ro vurito kovopato reraaro reito voreroverea vo vokio-ia ovokia-ia viapau oiso rerare tuero. Viapau oiso rrare tueroverea viapau rera-ia taraipaoro osa urioro. <sup>51</sup> ♦ Ra kovopato oaro vurivira rutu uporeve rera ragipaoro. Ra voava rera tovoreve voeao ruvara-ia riro kuuvu irara. Ra voea rutu voa ora reuri oaiive kuripaive ora voeapa siraopaoro evoa opesipa tapi.

## 25

*Reo Ruu Vao Katai Tau (10) Iava Tavauru Riako*

<sup>1</sup> “Vo vuuta-a eva oa-ia Pauto vo Saraaro iava oiso karekeperea osa vairoo tavauru riako katai tau (10) rutu. Airoa vuravuara oaiive ouoro avaaepa rova aivarosa ira reesiiva oiso ra riakova oureve. <sup>2</sup> ♦ Uva ovavaevu-a vaaruu vovou riako vairo raga iava, ari ovavaevu-a vearo rugorugoo riako. <sup>3</sup> Oire uva vairoo vaaruu vovou riako vuravuara ragava avaaepa osa viapau aue kerasina vai vara iare auere vosa vara iava ita opesipe, ra ovuva ita oarai tovoive vara-ia? <sup>4</sup> Ovusa vairoo vearo rugoo riako kerasin oviro tapo ora vairo varaaro kaeiva vuravuara. <sup>5</sup> ♦ Uva rera ro riako oupato viapau urioroepa ikauvira. Oa iava ruraiva. Uva va iava uusiaeapa.

<sup>6</sup> “Uva vo voki vuuta-ia oavu keera urioepa vairore oiso purasa, Rera ro riako oupato ira urioroi. Avata rerare korotosa. Ra rerava aivaroro rerava uriota! <sup>7</sup> Oire va iava vuravuara vatatopopava. <sup>8</sup> Uva vairoo vaaruu vovou riako oiso puraaepa vairore vearo rugorugoo riako, Ae, igeipa kerasinara vai vateta. Ari igei varaaro iava opesiei. <sup>9</sup> Oa iava vairo vearo rugorugoo riako vo riako aatooro oiso puraaepa, Viapau varao kerasinara vigei rutuva uvuipai. Oara igei raga varaarovu uvuipai. Ari avata evoraro voripa kepa vai-ia oarai vorisa. <sup>10</sup> ♦ ♦ Uva avaaepa kerasin vorisa ovusa riako oupato urioroepa. Osa vairo airoa vatatopopava airoa raga rera tapo koataaeapa kepa-ia rera tapo paua riroa-ia aio vao ora oupa aio. Uva rataoa voea ururao tupa piropa.

♦ 24:43: 2 Pi 3:10    ♦ 24:44: 1 Te 5:6    ♦ 24:46: Re 16:15    ♦ 24:49: Lu 21:34    ♦ 24:51: Mt 8:12, 25:30

♦ 25:2: Mt 7:24    ♦ 25:5: 1 Te 5:6    ♦ 25:10: Re 19:9    ♦ 25:10: Lu 13:25

<sup>11</sup> ♦ “Oire uva utuaepa vairo airoa uutupaaepa. Oa iava voa pou virooro oiso puraaepa, Turaro, turaro, igeivire karuri! <sup>12</sup> Oa iava vairo vo keeraaro uvuoro vairore oiso puraroepa, Oiraopavira rutu visii taviipaavoi, viapau taraiparai visii-ia.” <sup>13</sup> ♦ Uva reo ruu opesioro oiso puraroepa Jisas ora rera iava, “Eisi osa toupai oiso, Vearovira rutu uutupata. Viapau taraipatai vuuta-ia ora voki-a vao oa-ia uriorovere Oirato Oviitoaaro.

*Reo Ruu Kovopa Irara Iava Voeao Oea Moni Ruuro Ouiva  
(Luk 19:11-27)*

<sup>14</sup> “Vao Pauto vo Saraaro oa oiso rutu toupaiveira osa ro iravu oirato ira uvavu vokasa aueparoepa. Oa iava rera voeaarore keeraroepa kovopa irara voea vavaearo-ia varao tovosa rera varaaro, oiso ra vara purapaive vara tokipaoro. <sup>15</sup> Oire vo voki-a vao oa-ia voea vo pitupituarore rugorugoo rovoroepa ora voea varaaro tapo goruara voea voeao kovopa irara katakataivira. Oa iava monia roo pierava voeapa oiso, iravu vatereva vo vavae tuku kina (K5,000), ari iravu vatereva erao tuku kina (K2,000), ari iravu vatereva katai tuku kina (K1,000). Uva oiso va puraoro voeapa avaroepa vokasa. <sup>16</sup> Uva avaroepa osa rera isivaaro iava ro ira vo vavae tuku kina oureva, ira va-ia eva oavu sara kovo purareva. Oa iava oavu ita kareke pierava oisi va-ia kovooro pute piea vo vavae tuku. <sup>17</sup> Ari ro ira erao tuku kina oureva ira va-ia eva oavu sara kovo purareva. Oa iava oavu ita kareke pierava oisi va-ia kovooro pute piea erao tuku. <sup>18</sup> Ovusa ro ira katai tuku kina oureva, oa iava vare rikui tekareva va tovosa rasiuaaro. Uva voa-a vo uva rera reraaro reito vo moniaro vataureva.

<sup>19</sup> “Oire uva riro kaekae vuuta rutu puteva. Oa iava va isivaaro iava reito oaive voea iare kovopa irara urioroepa vorevira. Uva oiso rugooparoepa ra voea tapo reoa torevokoreve varao iava moniara oara-ia voea pitupitu pierava. <sup>20</sup> Uva ro ira vo vavae tuku kina oureva, oa iava oavu ita karekereva vo vavae tuku kina va sipooro. Uva oiso puraroepa, Reito, ragai vaterivora vo vavae tuku kina (K5,000). Va kekeri vao-ia oa-ia sara kovo puraavora. Uva oavu ita ouvora vo vavae tuku kina pute piea. <sup>21</sup> Oa iava rera ro reito oaro oiso rerare puraroepa, Vii vearto-a rutu kovopato. Viigoa vearoa purarivorao ora vearovira kovoa tokirivorao. Oire varavi tapo gareparavi kasivarivira tokipariveira, uva eisi osa iava vii tovopaa riropaara rutu orekerovu tokipasa. Uriou ra roruri ragai tapo.

<sup>22</sup> “Ari ro ira erao tuku kina (K2,000) oureva, ira tapo urioroepa. Oa iava oiso puraroepa, Reito, ragai vaterivora erao tuku kina. Va kekeri vao-ia oa-ia sara kovo puraavora. Uva oavu ita ouvora erao tuku kina pute piea. <sup>23</sup> Oa iava reito oiso rera tavireva, Vearto ita vii kovopato. Viigoa vearoa purarivorao ora vearovira kovoa tokirivorao. Oire varavi tapo gareparavi kasivarivira tokipariveira, uva eisi osa iava vii tovopaa riropaara rutu orekerovu tokipasa. Uriou ra roruri ragai tapo.

<sup>24</sup> ♦ “Uva ro tapo urioroepa ira katai tuku kina (K1,000) oureva. Ira oiso puraroepa, Reito, vii-ia taraiparai riro kasivarito vii, viigoa vo kovoro tatepariveira oara viapau oiso paupariveira. Ora varao tapo oara vikipaiveira oearovu vara paupaoro kukaraara vo rasio-ia. Oire uva vara tapo ou ragapariveira. <sup>25</sup> Uva eisi osa iava uririraepa. Oa iava vao vatauava katai tuku kina vo rasito. Va kekeri vao-ia vii vaaro!

<sup>26</sup> “Uva reito oaro rerare oiso puraroepa, Vurito-a rutu vii kovopato riroreasito. Uva pasi taraipauveira ragai-ia oiso, Ragai vo kovoro tatepaaveira oara viapau oiso paupaaeveira. Ora varao tapo oara vikipaiveira oearovu vara paupaoro kukaraara. Uva eva tapo ou ragapaaeveira?

<sup>27</sup> Uva eakepa ragai vaaro monia tovo asariva beng-ia? Oa iava voa va iava pute piea tapo ouavori? <sup>28</sup> Oire rera ruvara iava va outa ro vatesa ira vo vavae tuku kina-ia (K5,000) pitupareva. <sup>29</sup> Eake iava? Uvare oirara rutu vao raga-ia pitupai uva oavu ita vatepaa voeapa tauvavuvira pute piea. Ari ita, vosa iravu viapau orekerovu-ia pitupareve, oire gareavi raga-ia pitupareve eva oa-ia rera itoavere rera ruvara iava. <sup>30</sup> ♦ Uva oiso voea tavireva rerare vurito kovopato, Rera siguta evoare rupa-ia. Ra voa toupaoro ora rera raga iava reuriara kuripareve ora rerapa siraopaoro.

♦ 25:11: Mt 7:21-23

♦ 25:13: Mt 24:42, 44

♦ 25:24: Jo 10:28-29; 2 Ti 2:19

♦ 25:30: Lu 13:28

*Oirato Oviitoaaro Oirara Rutu Rovirieirevereua Utupaua*

<sup>31</sup> “Utupaua turarovira urioraverea aueva keraria voea tapo enselpa irara. Uva va iava paupa-ia uvururaverea vao king paupaaro. <sup>32</sup> ✩ Oirara rutu vova rasito ragai ruvaria ora guruaverea, ra voava voea rovirieaverea oiso osa sipsip ragui ora meme ragui toupaiveira oiso, sipsip ragui uvavu, meme ragui uvavu. <sup>33</sup> Eisi osa voeao sipsip ragui tovoaverea vo ora ragai vaaro-ia oirapapa varata, ovusa meme ragui oisova tovoave koike varata-ia. <sup>34</sup> ✩ Oa iava voea-a voeao oirara oea toupai oirapapa varata-ia oea taviaverea oiso, Visii viraakoreva Aite oaa. Visiigoa uriota ra va outa Sara oa puraava visiipa voari rutu rasito rovoaro-ia. <sup>35</sup> ✩ Eake iava? Uvare vo tuariri oisoa ogoevira toupaa osa ragai aio vatepata. Ora vosa uuko regapara, ra ragai vatepata uukoara. Ragai ita vao ouruivu raga iava tаветето ragoare oisoa keerapata vorarore ora visii vo keparoaro-ia. <sup>36</sup> Vosa tapo oisoa varo apotapara, ra ragai vatepata varoara. Ora vosa tapo oisoa upiapara, ra ragai ruvarupata. Ora vosa tapo oisoa tuukea-ia toupaa, osa voa ragai kekepasa uriopata.

<sup>37</sup> “Uva oisi-a eisi osa iava voeao torevoko irara ragai aatooro oiso puraaverea, Turaro. Aa vo vokio vii kekeiovora osa ogoeipauera uva vii vateiovora aioara? Ora aa vo vokio uuko regapauera oa iava vii vateiovora ae uuko? <sup>38</sup> Ari aa vo vokio-ia vii kekeoro oiso puraiera, Uriou, vii-a tаветето ouruivu raga iava vore igei vo keparoaro? Ora aa vo vokio-ia apotapauera aeua varo oa iava viipa vaaro vateiera? <sup>39</sup> Ari aa vo vokio-ia vii kekeiovora osa upiapauera, ora tuukea-ia touparivora, uva aaviopavira vii kekesa urioiera?

<sup>40</sup> ✩ “Uva oiso voeare puraraverea, Ragai visii tавипаавоi oiraopavira oiso, Varao oara oisoa purapata ro-ia akaipato ragai araoko iraraaro iava rera, uva ragai-ia ita rera ragoa-ia vara puratavora.

<sup>41</sup> “Oa iava voeao taviaverea oea koike varata-ia toupai oiso, Opesi irara visii. Visiigoa ragai kavupata tuitui kasi iare avaoro vao oa viapau opesipape. Okasia tovoreva Aite aeua Seten ora voeao purapurapa irara ensel Seten voeao. <sup>42</sup> Eake iava? Vosa oisoa ogoevira toupaa, osa viapau ragai vatepata aioara vai voari tuariri. Ora vosa oisoa uuko regapara tapo, uva viapau oisoa ragai ukaio piepata. <sup>43</sup> Ari ita, ragai-a tаветето ouruivu raga iava, uva viapau oisoa ragaire keerapata vorarore ora visii vo keparoaro iare. Ora vosa oisoa varo apotapara, osa viapau ragai vatepata varoara vai. Ora vosa oisoa upiapara, ora vosa oisoa tuukea-ia toupaa, osa viapau ragai kekepasa uriopata.

<sup>44</sup> “Uva eisi osa iava voea tapo ragai vo reoaro pukopaiavera oiso purapaoro, Turaro. Aa vo vokio-ia vii keke ragapaiovora osa ogoevira touparivora, ora vosa uuko regapauera, ora vosa ouruivu raga iava vii-a tаветето, ora vosa varo apotapauera, ora vosa upiapauera, ora vosa tuukea-ia touparivora osa voa viapau vii tauvapaiovora?

<sup>45</sup> “Uva voea aatoaverea oiso puraoro, Oiraopavira visii tavi iraopavira, Ari ita, varao oara oisoa viapau purapata ropa akaipatoavi voeao iava ragai araoko irara oaro rera, oire uva ragai-ia ita rera ragoa oisoa reasipata oisi vara purapa arapa. <sup>46</sup> Uva eisi osa ragavira iava voeao oirara vuria oaiive voriaro ouiverea ae-ia upia ora siitoka ora voeapa vokiara rutu-ia. Osa voeao torevoko irara Tootoo Ovoi ouive vao oa viapau opesipape.”

## 26

*Turaro Irara Reipa Irara Reo Goru Puraiva Jisas Uposa*

(Mak 14:1-2; Luk 22:1-2; Jon 11:45-53)

<sup>1</sup> Oire uva Jisas rera vo siposiporoaro opesi pierava. Oa iava rera voeao disaipel tavireva oiso, <sup>2</sup> ✩ “Visii taraiapatai oiso ragavira vo vokirei isivaaro iava Tagausapa Vurei Pasova pura pirovere, ra ragai kosi pieivere ragai vuri piesa evao parikou-ia.”

<sup>3</sup> Uva vo voki raga-ia Rovopato Pristo tauo purapato vo keparo-ia ora guruaepa Kaifafas voearei rutu pris irara ora reipa irara vova Isrel. <sup>4</sup> Uva oiso ragavira Jisas-re reo goru puraiva ra rera tuve pieive. Oire ra voava kaviruvira rera rauive, ra rera kopii pieive.

<sup>5</sup> ✩ Uva oiso puraaepa ora voea ragare, “Avoeao, asi viapau uvuipavieie ra vao purape

---

✩ 25:32: Esi 34:17, 20   ✩ 25:34: Re 13:8, 17:8   ✩ 25:35: Je 1:27   ✩ 25:40: Pro 14:31, 19:17   ✩ 26:2: Jo 13:1   ✩ 26:5: Mt 27:24

vao-ia vo vokio-ia oa-ia riroa aioa purapapi. Teapi oirara rutu ora sitaoro upoa vai kosi pieive.”

*Riakova Riro Geesia Ovi Sanda Ovi Petoeva Jisas Kukuearo-ia  
(Mak 14:3-9; Jon 12:1-8)*

<sup>6</sup> ♦ Jisas Betani-ia toureva leprapato vo kepaaro-ia Saimon. <sup>7</sup> Uva iriavu riakova urioopa aueva korovo ovi sanda aue-ia popotepa tou vearoa Alabasta, oiso osa aveke. Uva vo ovi kokoeva Jisas kukuearo-ia rera rei pieoro osa tebol-ia pauparoepa. <sup>8</sup> Oa iava oearovu disaipel irara va tueoro oiso ora reopaaepa, “Avoeo, uva apeisi o vao pire ragapae korovo ovi? <sup>9</sup> Ari ita, vosa oira vateeri iraipa, oire va iava oira-ia riroa vai voria vai vatereve vigeipa irai. Oire ra oai vatepe voeaopa apota irara.”

<sup>10</sup> Oa iava Jisas voea vo vovouaro-ia tarai ovoiroepa. Oa iava oiso puraroepa voeare, “Eakere o vovouaro vavata pie ragapata? Iria vearo pitupitu purae ragai-ia! <sup>11</sup> ♦ Easi apota irara visii tapo toupaiverea vokiara rutu-ia. Ari ragai viapau oiso visii tapo toupaavere. <sup>12</sup> Ari o riakova iria o petoe sanda ragai varaaro-ia tova iare, oa puraevoi ragai-ia ravaavira. <sup>13</sup> Oiraopavira visii tavipaavoi oiso, Vo uvarovu rutu uva Vearo Siposipo kosi piepaiverea rasitoa rutu-ia, ra va-ia vao tapo ora reopaaave vare rugoopaoro oa puraevoi o-ia riakova ragai-ia.”

*Judas Reo Ovoi Purareva Jisas Iava Vearo Vaisi Puraoro Turaro Irarapa  
(Mak 14:10-11; Luk 22:3-6)*

<sup>14</sup> Vo vuuta-a vao oa iava vo vokia avaroepa iravu voea iava katai tau erao (12) disaipel. Rera vaisiaro, Judas Iskariot. Ira avaroepa reipa irara iare pris <sup>15</sup> ♦ oiso purasa, “Eake vai vate ruipapatai ragaipa, ra visii riara iare rera karekea?” Oire uva va iava rera vateiva vo peva tau (30) aue silva moniro. <sup>16</sup> Uva voava rovoroepa rerare raiva taraapaoro oiso, Aa vo voki avuo-ia Jisas kosi piepaa voea vaveaaro iare?

*Jisas Ovapa Aio-ia Vao Tagausapa Vurei Pasova Disaipel Tapo Aioreva  
(Mak 14:12-21; Luk 22:7-14, 21-23; Jon 13:21-30)*

<sup>17</sup> Uva vo rovo vokiaro-ia Yis Asa Aio aue bret oa-ia disaipel urioaepa Jisas akesa, “Ovu-ia viipa ravaavira aioa vai puraiovore aue Pasova Vurei vai?” <sup>18</sup> Oa iava oiso voea tavireva, “Kareta viro evoare Jerusalem urui sovara-ia irai iare. Ra oiso irai tavita, Tisato oiso puraroi, Ragai vo vuutaaro tutuu pievoi. Uva Pasova Vurei aiosa ruipaparai voea tapo disaipel vo vii vo kepaaro-ia.” <sup>19</sup> ♦ Oire voea disaipel oisi va puraiva oiso osa voea tavireva Jisas-pa va ravaaoro Pasova Vurei.

<sup>20</sup> Oa iava ovaiarovit tebol-ia pauroepa voea tapo katai tau erao (12) disaipel rera voeааро. <sup>21</sup> Uva aiopaiva ovusa oiso puraroepa, “Oiraopavira visii tavipaa, Iravu visii iava ira ragai kosi pieparevoi rara.” <sup>22</sup> Oa iava vovouisiro rutu vavataepa voeare siraoro. Uva voava rovoaepa rera-ia ora veraoro rera akeoro oiso, “Turaro, esa ragai-a?” <sup>23</sup> ♦ Uva voea aatoreva oiso, “Easi eera ira bretea rupu pieri tapi rovu-ia va aiosa ragai tapo, ira-a eera ira ragai kosi piererevere. <sup>24</sup> Iu. Oirato Oviitoaaro avapa kopiia-ia oiso osa Tugoropa Vuku taviepa ragai iava. Ari ita, siraovira rutu rerapa ro ira Oirato Oviitoaaro kosi piererevere. Vearopai vosa viapau aakova rera kavauevori?” <sup>25</sup> Uva Judas rera kosi piesoto ira rera akereva oiso, “Tisato. Esa ragai-a pasi?” Oa iava Jisas oiso puraroepa, “Iu ita, vii raga-a eva viigoa eisi purauei.”

*Vo Jisas Kovukovu Aio Komunion Vatereva Disaipelpa  
(Mak 14:22-26; Luk 22:15-20; 1 Korin 11:23-25)*

<sup>26</sup> ♦ Uva voa-a vo aiopaiva uva Jisas bret oureva va-ia vuurapa vaisi purasa Pautoa-ia. Oa iava va puteputereva voeapa disaipel va vatevatesa. Uva oiso puraroepa, “Va-a eva ragai varaaro oa ouri ra va aiori.” <sup>27</sup> Oa iava kap-ia wain karo oureva. Oa iava Pautoa-ia vuurapa vaisi purareva va-ia. Uva voava voea vateoro oiso puraroepa, “Ieta, visii rutu

♦ 26:6: Mt 21:17 ♦ 26:11: Diu 15:11 ♦ 26:15: Eks 21:32; Sek 11:12 ♦ 26:19: Diu 16:5-8 ♦ 26:23: Sam 41:9; Dan 9:26 ♦ 26:26: 1 Ko 10:16

vao-ia ukaiota. <sup>28</sup> ♦ Eira revasiva oaa iria paruevere ragai iava osa kopiira oirara rutu iava vuriara veraoro Pauto vaaro Reo Ovoi oirao pieoro. <sup>29</sup> ♦ Ragai oiso visii tavipaa, Vo vuutao iava vo vokia vo utupaua uva viapau ukaioravere wain karova-ia. Ari ita, vo raga uva airepa karova-ia ukaioraverea utupaua visii tapo Aite vo Saraaro sovara-ia.”

<sup>30</sup> Oa iava iriavu-ia eraaepa erava. Uva voava kosia viropa Oliv Kovo Pukui iare avasa.

*Jisas Vo Pita-re Oiso Puraroepa, Ragaire Isivauverere Rara*

(Mak 14:27-31; Luk 22:31-34; Jon 13:36-38)

<sup>31</sup> ♦ Oa iava Jisas oiso voeare puraroepa, “Visii rutu varaaro oirao pie vovouro vuripai ragaipa vo rupao-ia vo rara ragai arova torita. Ari ita, aue iava uvare Tugoropa Vuku oiso purapapeira, ‘Pauto sipsip ragui tokipato uporeverea, ra rerare rorooro sika viro sipsip ragui.’”

<sup>32</sup> ♦ Uva vorevira toreravere kopiaa iava, ra va iava visiipa irara Galili iare.” <sup>33</sup> Oire Pita rerare oiso puraroepa, “Ari ita, vosa voea rutu varaaro oirao pie vovouro vuripere viipa, eagara osa ragai vaaro oirao pie vovou viapau oiso ra vuripe!” <sup>34</sup> Oa iava Jisas Pita aatoreva oiso purapaoro, “Pita, oiraopavira vii tavipaa oiso, Vo vokiaro vo osa kookai gau asavira tourevere ovusa vo peva purari ragai vaisiaro taeapaoro.” <sup>35</sup> Uva Pita oiso puraroepa rerare, “Viapau rutu. Asi vii tapo kopiiravere vo rara viapau vii vaisiaro taeaa.” Oa iava voea rutu disaipel oisi aga puraaepa.

*Jisas Variriroepa Getsemani-ia*

(Mak 14:32-42; Luk 22:39-46)

<sup>36</sup> Oire uva Jisas voea tapo avaroepa uvavure uva oiso vaisipaise oiso, Getsemani. Oa iava voeare disaipel oiso puraroepa, “Vovio toupatavora, osa vavoviore avara voa varirisa.”

<sup>37</sup> Oa iava Pita vase oureva ora Sebedi oviitoareiaro. Uva voea tapo avaroepa. Oire uva rerare sopaua rirovira rutu siraoepa. <sup>38</sup> ♦ Uva voa oiso voea tavireva, “Ragaire sopaua rirovira rutu vavatae siraoro, osiraoa vao oiso rutu sovoa oa iava kopiirai vao-ia. Vo toutes ragai tapo uutupaoro, ra ragai vo vavataaro sovota.” <sup>39</sup> ♦ Oire voava gare visivi avaoro kopukopua ivara-ia gerevira koveroepa. Oa iava voa variri ovoiroepa oiso puraoro, “Aite. Vosa ruipapau ra ragai iava o kap verari iria agasioi rutu aue iava siraoa vo vavataaro. Uva viapau uvuipau ra ragai vo ruipaaro sirova utuu. Viapau. Ari vii raga vo ruipaaro sirova utuu.”

<sup>40</sup> Uva voreroepa Pita vase kekesa osa uusipaaepa. Oa iava oiso puraroepa Pita-re, “E viapau uvuipatai ra ragai tapo uututa katai vuutavi vai raga-ia, raa? <sup>41</sup> ♦ Uutupaoro variripata. Teapi kokarapa vovou visii iare uriope visii kove piesa. Ari ita, vovouisiro oavisii ruipapai oiso ra ragai tapo toutes, ovusa varauraro oavisii raga visii iava raveravepai.”

<sup>42</sup> Oire uva voreroepa ita erao pie vuuta-ia voare ita varirisa oiso, “Aite. Vosa o-ia kap viapau oiso uvuipaei ra oira verari ragai arova, iria-ia ukaioparai, uvare vii vo ruipaaro-a oa purasa-a.” <sup>43</sup> Oa iava voreroepa ita voea iare osa uusipaaepa, uvare voeare rurapaiva osireiara. <sup>44</sup> Uva voava voea arova voreroepa ita vo peva pie vuuta-ia varirisa oiso raga osa variri rovoroepa rovovira.

<sup>45</sup> Oa iava voava voea iare urioroepa disaipel. Uva voeare oiso puraroepa, “E touvira uusipatai reareapaoro? Oire uvuta! Vuuta vao tuguraei oa-ia Oirato Oviitoaro kosi piepai vo vuri vovou irara vavaearo iare. <sup>46</sup> Toreta ra avavio. Rera keketa! Ro-ia ira ragai kosi pierveoi. Ira-a ro ira urioroi.”

*Judas Jisas Kosi Piereva Keripa Irara Vavaearo Iare*

(Mak 14:43-50; Luk 22:47-53; Jon 18:3-12)

<sup>47</sup> Oire uva vo Jisas touvira reoreoparoepa, ovusa Judas pouro viropa voea iava rera voeao katai tau erao (12). Ira riro irara tuvetuveoro urioroepa oea toorioara kaepaoro urioaepa ora aue kakuara voeao oea aruiva pris irara voearei rutu ora reipa irara vova Isrel. <sup>48</sup> Uva rera ro ira rera kosi piereva voeapa ira oavu reesia tovoreva voeapa oiso puraoro, “Vosa rerava uugaaravere, oire ra rera-ia pitu ovoita.” <sup>49</sup> Uva voava ikauvira urioroepa Jisas iare oiso puraoro, “Vearo rupa Tisato.” Uva rerava uugaa ovoiroepa. <sup>50</sup> Oa

⊗ 26:28: Eks 24:6-8    ♦ 26:29: Ap 10:41    ♦ 26:31: Jo 16:32; Sek 13:7    ♦ 26:32: Mt 28:7, 10    ♦ 26:38: Jo 12:27    ♦ 26:39: Jo 6:38; Fl 2:8    ♦ 26:41: Mt 6:13

iava Jisas oiso puraroepa rerare, “*Vatetoa oaa, vao oare uriouei oire va pura ovoiri ikauvira!*” Uva evo reo isivaaro iava tupe ovoiaepa rera rauoro Jisas.

<sup>51</sup> Iravu ro ira Jisas tapo toupareva ira toorio gororeva. Oa iava Rovopato Pristo kovopatoaaro uvareoaro pakoreva rera toeoro. <sup>52</sup> ♦ Oa iava Jisas rera tavioro oiso puraroepa, “*Toorio vore pieri eera rera vo tavukiaro-ia, uvare oirara rutu toorioara-ia ora upopai, oara-a evara voea upovereaa voea varaaro viria oavie kare pieoro.*” <sup>53</sup> ♦ Easi pasi vii viapau taraipaei oiso osa ragai uvuiparai vosa oisi oai purasa ruipapara, oire ra Aite area, rá va iava ragai vatereve riro tuku (tausen) vai rutu aue enselpa irara vai ragai-ia tuesa. <sup>54</sup> ♦ Ari vosa oisi oai purasa auepara, ra apeisi ragavira Pauto vo reoaro oiraopavira karekepe, vo reo oa oiso puraepa, Oiso ragavira oiso pieri?”

<sup>55</sup> Uva vo vuuta-a vao oa-ia voeare oiso puraroepa Jisas, “*E ragai ousa uriotai evarava toorioara ora evara ragi vurukoro? Ari ita, oisopai rutu visiipa, Kavirupato ira tuukesa uriotai. Vokiara rutu-ia oirara rutu oisoa sipoipopaa Tugoropa Keparo-ia osa eakepa voa ragai rau asapata?*” <sup>56</sup> Ari ita, profeta irara vo rigatoroaro ragai iava oirao piesa ragai-ia oara rutu varao kareke piepaa.” Oa iava disaipel rera arova tori ovoiiva.

*Jisas Rovirieiiva Kaunsel Irara Osireiaro-ia*  
(Mak 14:53-65; Luk 22:54-55, 63-71; Jon 18:13-14, 19-24)

<sup>57</sup> Oire rera rauoro rerava avaaepa Rovopato vo kepaaro iare Pristo Kaifas vo kepao, oa-ia voeo rutu toupaiva Reo Taisi-ia tarai irara ora reipa irara. <sup>58</sup> Uva evoa tauaivi Pita rera sirova utuoro riro sitavi-ia kasura-ia rekasiroepa vao Rovopato Pristo vo kepaaro kasuraaro. Oa iava voa koataroepa paua oeavu ruvara iare polis irara. Aue iava uvare oiso ruipaparoepa ra vao kekereve oa purapai rera-ia Jisas.

<sup>59</sup> Oire uva reipa irara pris ora Kaunsel irara oea rutu oiso ora reopaaepa, ra irai oiratoa vai reesive. Ra irai rera iava Jisas kuuvuro kortua-ia vo kuuvu-ia. Ra oa iava rera upoive.

<sup>60</sup> ♦ Oire uva va iava oearovu riro irara urionaaepa. Oa iava oaravu-ia kuuvu reoro rera toga ragapaiva. Aue iava uvare viapau oiso oai vituaro oiraopavira kekepaiva, oisore ra oai iava rera kopii pieive. Uva va-a vao isivaaro iava aitereivu pousi viropa <sup>61</sup> oreovuva rera iavirava vo reo oa purareva. Uva oiso purasiepa, “Easi ro oiso puraroepa, Ragai uvuiparai ra Pauto vo kepaaro Rovopa Kepa Tugoropa Kepa pakoa. Ra ita vorevira vo peva raga-ia voki vo kepa paua ita.”

<sup>62</sup> Oire uva Rovopato Pristo toreoro Jisas-re oiso puraroepa, “Ereasipauei vo reo eva aato arapa, raa? Apeisi vo reo-a eva oa-ia vii togapaivoi?” <sup>63</sup> ♦ Osa viapau Jisas reoparoepa. Uva Rovopato Pristo rerare oiso puraroepa ita, “Ragai vii ake iraopaavoi Pauto vaisiarore ro Tootoopato, ra igei tavi iraori oiso, E vii-a Krais Pauto Oviitoaaro, viigoa vigei Jiu-pa irara tuvetuvepasa urionera, eke?”

<sup>64</sup> ♦ Uva Jisas rera aatooro oiso puraroepa, “*Eisi osa purauei. Uva visii tavipaavoi oiso, Vo vuutao iava vo vokia vo utupaua uva ragai-a vao Oirato Oviitoaaro keketaverea, ovusa paupara vo oirapapa varata-ia vao Pauto, ro ira goruara rutuva toupareveira. Uva rukuta sovara-ia tapo vorevira urioraverea vova vuvuiua-ia.*”

<sup>65</sup> ♦ Oire uva oisi-a osa puraroiva Jisas, Rovopato Pristo ora rera iava kuvupato karikarioro kasipuroepa oiso puraoro, “Pauto toviparevoi! Uva viapau ita uvuipavie i ra oeaire keeravio rera vo reoaro rovirieisa. Ira ro Pauto tovipare! Ari ita, rera uvutavoi ita! <sup>66</sup> Uva apeisi vai rugoopatai?” Oa iava oiso puraaepa rerare, “Ira-a eera uvuipa ra kopiro. Ira-ia viria epao!”

<sup>67</sup> Oa iava rera kagavearo-ia ruipaaepa oearovu rera tapatapapaoro. <sup>68</sup> Uva oiso rerare puraaepa, “Vosa oiraopato-a vii profetato, oire igei taviri, Irouto vii tapare?”

*Pita Jisas Taeareva Oiso Puraoro, Viapau Taraiparai Eera-ia*  
(Mak 14:66-72; Luk 22:56-62; Jon 18:15-18, 25-27)

<sup>69</sup> Uva Pita ratau pauparoepa kepa kasuraaro sovara-ia osa voa iriavu kovopava rera iare urioopa oiso purasa, “Vii tapo-a ita iravu viigoa oisoa Jisas tapo toupari ro

♦ 26:52: Jen 9:6; Re 13:10    ♦ 26:53: Dan 7:10    ♦ 26:54: Lu 24:25, 44, 46    ♦ 26:60: Sam 27:12, 35:11

♦ 26:63: Ais 53:2-11    ♦ 26:64: Sam 110:1    ♦ 26:65: Ap 14:14

vova Galili.” <sup>70</sup> Oa iava Pita oiso puraroepa voea rutu osireiaro-ia, “Easi viapau eva-ia taraiparai osa purapaei.” <sup>71</sup> Oire uva Pita kosiro viropa rataoa riaaro iare. Oa iava voa iriavu ita kovopava oiso puraopa rera kekeoro voeao tavioro oea voa toupaiva, “Easi iravu-a ro ira oisoa Jisas tapo toupareve ro vova Nasaret.” <sup>72</sup> Oa iava Pita taearoepa ita erao pievira oiso puraoro, “Oiraopavira rutu vavo oiso viara-ia, viapau taraiparai rera-ia eera.” <sup>73</sup> Oa iava oearovu ita utupauavi toreoro ita oiso rerare puraaepa, “Oiraopavira rutu. Easi iravu-a ita vii voea iava. Viigoa eveipaio reoa iava vii vaaro.” <sup>74</sup> Oire uva ovoiopa reo-ia oiso voeava kaureopaoro oiso puraroepa, “Avoeo! Oiraopavira rutu viapau rera-ia taraiparai eera. Vosa viapau oiraopa reo vai purapaavori, ra va iava Pauto ragai vuri piereve rutu.” Oire oisi reoroiva, kookai gaureva. <sup>75</sup>  $\diamond$  Osa iava Pita vo reore rugooroepa vao oa-ia Jisas rerare oiso puraroepa, “Vo osa kookai gau asavira tourevere, ovusa vo peva purari ragai vaisiaro taeapaoro.” Oa iava kosiro viropa Pita rirovira gaupasa.

## 27

*Jisas Sipoiva Pailat Iare**(Mak 15:1; Luk 23:1-2; Jon 18:28-32)*

<sup>1</sup> Oire uva avia sikereva ovusa reipa irara pris ora turaro irara voeao vova Isrel ora reopaaepa, oiso ra rera upoive Jisas. <sup>2</sup>  $\diamond$  Oa iava rera tuukeiva iroiro-ia rerava avapaoro rovopatoa iare Pailat Rom gavman iava rera.

*Judas Kopiiroepa**(Aposel 1:18-19)*

<sup>3</sup> Oire uva rera ro Judas ira Jisas kosi piereva, ira rera-ia voea tuereva osa rera Jisas ivaoiva kopiia-ia. Oa iava rerare vovouisi ora poreepa. Uva oiso vovouparoepa ra silva moni vo peva tau (30) vore piereve voeapa voeao reipa irara pris ora turaro irara. <sup>4</sup> Oa iava oiso puraroepa, “Ari ita, ragai vao ragoa vuria puraavo, uvare ro kosi pieavo oirato ira-ia viapau vuria vaiei. Ira ivaoivo kopiia-ia.” Oa iava oiso puraaepa, “Viapau oiso igei vaaro-a. Vii raga vaaro-a vao vuria.” <sup>5</sup>  $\diamond$  Uva va iava Judas monia vikireva Tempel sovara-ia. Uva voava voea arova avaroepa iroiro-ia ora kaasa.

<sup>6</sup> Oire uva voeao reipa irara pris irara vo moni vao silva ouoro oiso puraaepa, “Oira upo voriaro vao-ia oa-ia viapau uvuipavie i ra vao tapo va takuvupe Tugoropa Kepa-ia tou moni.” <sup>7</sup> Oa iava vo moni-ia oreovu goruiva vao. Oa iava iravu vo rasiaro voriiva katai vovou raga-ia, ira oisoa pitoka puraparo. Oire va iava vo rasi ouiva voeaoopa tauaipa irara, auere ra voea tovapaise voa. <sup>8</sup> Uva oiso vo rasi vaisiiva, Revasi Tova rasi. Oire uva touvira vo vaisiei toupai vo vokio voa. <sup>9</sup>  $\diamond$  Eisi osa oreovu toupaiseira Pauto oreoa purareva profet Jeremaia gisipoaro-ia. Uva oisi-a eisi osa oiraopavira karekeepa vao-ia oa oiso purapai,

‘Vao ouiverea vo peva tau (30) aue silva moni Isrel-pa irara oa reesiiva oiso ra ro voriive oirato. <sup>10</sup> Ro vo rasiaro vorisa pitoka purapato. Eisi osa ragai tavireva Turaro.’

*Pailat Jisas Akepareva**(Mak 15:2-5; Luk 23:3-5; Jon 18:33-38)*

<sup>11</sup> Jisas tore pieiva reito gavman osireiaro-ia. Oire uva rera-a eera rovopato gavman ira rera akepareva oiso, “E vii-a Jiu reraaro king, raa?” Uva Jisas oiso puraroepa, “Vii raga ita-a eva viigoa eisi purauei.” <sup>12</sup>  $\diamond$  Oa iava reipa irara pris ora turaro irara rera togapaiva oaravu-ia reoara. Osa viapau oarai pukopareva vo reoro iava. <sup>13</sup> Uva va iava Pailat rerare oiso puraroepa, “Easi pasi viapau vo reoro vaio rutu uvupari oara-ia vii togapai?” <sup>14</sup>  $\diamond$  Uva viapau rutu oiso Jisas oreoi aatoreva vo Pailat-pa oreoiaro. Uva va-a eva oa iava ro rovopato gavman tavetave iraopareva.

*Pailat Taviroepa Jisas Tapasa**(Mak 15:6-15; Luk 23:13-15; Jon 18:39-19:16)*

$\diamond$  26:75: Jo 13:38  $\diamond$  27:2: Ap 3:13  $\diamond$  27:5: Ap 1:18  $\diamond$  27:9: Sek 11:12-13  $\diamond$  27:12: Mt 26:63  $\diamond$  27:14:

1 Ti 6:13

<sup>15</sup> Uva vo ivara rutu-ia uva oisoa ro rovopato gavman oiratoa vai kosi piepareve tuukepa kepa iava vo vokia vao oa-ia oisoa Tagausapa Vurei Pasova aiopaive, vo rara oirara rutu irai arepaive. <sup>16</sup> Uva vo voki-a vao oa-ia iravu oirato vuritoa rutu toupareva tuukepa kepa-ia rera vaisiaro, Barabas. <sup>17</sup> Uva oirara rutu ora guruaepa. Oa iava Pailat oiso voea akereva, “Aa ropa ruipapatai ra visiipa rera kosi piea Barabas eke Jisas ro ira vaisipaiveira oiso, Krais?” <sup>18</sup> Ari ita, Pailat voeao-ia tarairoepa oiso osa oisoa rera riiriipaive. Oa-a eva oa iava rera kosi pieivora kortua iare.

<sup>19</sup> ♦ Pailat paupa-ia pauparoepa vo kepa-ia oa-ia oisoa oirara rovirieipareve. Oire uva voa-a evoa uva toureva ovusa vatuava rerare oavu tavia ava pieeva oiso puraoro, “Viapau oiso uvuipaei ra orekevu avu vai purari eera-ia torevokoto. Vo vokiaro ira kekeavo urusa-ia. Uva riroa rutu sovoavo vavata vo rera kekeoro.”

<sup>20</sup> Uva voeao reipa irara pris ora voeao turaro irara oearea oirara rutu vovouaro tore pieiva, oiso ra Pailat arepaoro oiso puraave, “Barabas eakaoro Jisas kopii pieri!” <sup>21</sup> Oire uva ro rovopato gavman oiso voea akereva ita, “Iroutoapa ruipapatai vaitereo iava, ra rera vorevira eakaa visiipa?” Oa iava oiso puraaepa ita, “Ari Barabas!” <sup>22</sup> Oire uva oiso puraroepa Pailat, “Ari apeisi ro piepaavoi Jisas ira vaisipaiveira oiso, Krais?” Oa iava oiso puraaepa raga pieoro, “Rera kotori evao parikou-ia!” <sup>23</sup> Uva Pailat oiso voeao akereva, “Eake rutupa? Eakea vuri-a oa purarevora?” Osa rirovira rutu raga piepaoro oiso raga purapaaepa oiso, “Rera kotori evao parikou-ia!”

<sup>24</sup> ♦ Uva Pailat ora rera-ia oiso aueroepa, Easi viapau uvuiparai ra oavu vai purasa rera-ia. Teapi riroa rutu karekepe upoa. Eisi osa iava uukoa oureva ora rera iava vavaea sisusa voea rutu osireiaro-ia oiso puraoro, “Viapau vuria vaiei oiso ra oai iava rera upoa. Ari ae oavisii-a visii raga.” <sup>25</sup> Oa iava voeao rutu oiso puraaepa, “Oa-a eva vuria uvuipai ra va kekepaioverea ora voeao igei aao kakleroaro!” <sup>26</sup> ♦ Eisi osa iava Pailat Barabas iava vasereva voeapa. Oire uva Jisas iava vasereva voeapa upo pura irara, oiso ra rera ragi rovopaooro rera tapaive vo evao parikou-ia.

*Jisas Tovipaiva Upo Pura Irara  
(Mak 15:16-20; Jon 19:2-3)*

<sup>27</sup> Oire uva voeao upo pura irara oaro ro Pailat oea Jisas koata pieiva gavman vo kepaaro-ia. Oa iava vo rerare voeao rutu voeao upo pura irara ora guruaepa. <sup>28</sup> Uva voa rera iava kuvupara veraiva iravu raga tavari pieoro revasito rera reesioro oiso, Vii-a king. <sup>29</sup> ♦ Uva oavu kukuvaipa puraiva rokarokapa iro iava. Oa iava va tovoiva rera kukuearo-ia. Uva pito isi-ia rera tooro pieiva oisova oirapapa vavae-ia. Oa iava rerare kokoto rekupaoro oiso purapaaepa, “Jiu reraaro king! Vearo voki rutu!” rera tovipaoro. <sup>30</sup> ♦ Uva rera-ia ruipaaepa. Oire voava vaisi pito isi ouoro rera kukuaro ragiiva vaisi-ia. <sup>31</sup> ♦ Uva rera tovi rovopaoivoiva, kuvupato veraiva rera iava. Uva voava ora rera reraaro-ia kuvupato rera kuvuiva vorevira. Oa iava rerava avaaepa rera tapasa evao parikou-ia.

*Jisas Tapaiva Eva Parikou-ia  
(Mak 15:21-32; Luk 23:26-43; Jon 19:17-27)*

<sup>32</sup> ♦ Oire uva voa-a vo uva rera tapo avapaaepa. Oa iava voa avapaoro iravu kekeiva oirato Sairini iava, rera vaisiaro, Saimon. Oa iava voa rera aruiva goruvira rutu Jisas vaaro kaesa evao parikou.

<sup>33</sup> Oa iava uvavu poua viropa opukuivu-ia, va vaisiaro, Golgota. Oa porearo oiso toupaiveira, Kukue Pukui [ae iava uvare oiso kekepa piroveira osa kukue keru]. <sup>34</sup> ♦ Uva voa rera vateiva wain ovi va uvareoro oavu tapo itakopa ovi. Oire uva vapa reasiparoepa ukaio arapa, uvare vo gisipo raga-ia vo ovi sovoreva itakovira. <sup>35</sup> ♦ Oa iava rera tapaiva evao parikou-ia. Uva rera varaaro-ia kuvupara satu visiko purapaiva vara roo piepaoro ora voeapa. <sup>36</sup> Uva voa toupaiva rera-ia uutupaoro. <sup>37</sup> Vo rera kukuaro isivaaro uva vo reo rigatoiva oreoa-ia rera togaiva tavaa iare. Uva oiso vo reo rigatoiva, KING OAIYE JIU.

---

❖ 27:19: Ap 12:21 ❖ 27:24: Diu 21:6-8; Sam 26:6 ❖ 27:26: Ais 53:5 ❖ 27:29: Sam 69:19; Ais 53:3 ❖ 27:30: Ais 50:6 ❖ 27:31: Ais 53:7 ❖ 27:32: Hi 13:12 ❖ 27:34: Sam 69:21 ❖ 27:35: Sam 22:18

<sup>38</sup> ♦ Oire uva voa-a vo uva rera ruvara-ia Jisas aitereivu tapaiva riro kavirutoarei oiso iravu vova oirapapa varata, ari iravu vova koike varata. <sup>39</sup> Uva oirara rutu ora riakora voa rera tovipaoro putepaiva rerare kukue pikupikupaoro oiso purapaaepa, <sup>40</sup> “Vii-a vao Tugoropa Kepa pakopato. Vo peva raga-ia voki vo kepa paupasa vorevira! Oire ora vii avu raga ora tauvau ita, uvare vii-a Pauto Oviitoaaro. Evoava evao parikou-ia rereri!” <sup>41</sup> Uva voea tapo voeao reipa irara pris ora turaro irara oea tapo rera akaipa piepaiva oiso purapaoro, <sup>42</sup> “Ari oearovu raga oisoa tauvapareve. Uva viapau uvuipa ra oisi ora rera raga ora tauvaro? E rera ro Isrel reraaro king? Uva eakepa ra evao parikou kavureve, ra va iava rera-ia oiraovio! <sup>43</sup> ♦ Ira ro oisoa Pauto oirao piepareve oiso purapaoro, Ragai-a Pauto Oviitoaaro. Uva eakepa ra Pauto rera tauvareve, vo rara rera-ia vovouparo!” <sup>44</sup> Oire uva vaiterei-a vaitereo oira upopatoarei ora kavirupatoarei aiterea tapo kotoiva evao parikourei-ia uva Jisas vuruvuru-ia siva. Ari ita, vaiterei apo akaipavira vo reo raga purapasiva rerare Jisas.

### *Jisas Kopiiroepa*

(Mak 15:33-41; Luk 23:44-49; Jon 19:28-30)

<sup>45</sup> ♦ Oire uva ravireo vuuta-ia ravireo utoroiva, rupa rovoepa vo rasitoa rutu-ia. Uva vo peva rutu-ia vuuta (3 klok) rekasidepa vo rupa. <sup>46</sup> ♦ Uva vo peva vuuta ruvara-iavi Jisas koikoiroeva oiso puraoro, “Eli, Eli, lema sabaktani?” Oa oiso ragavira porearo toupai, “Pautoa oaa, Pautoa oaa, Eakere ragaivi kavupari?” <sup>47</sup> Oa iava voearo oea rera ruvara-ia toupaiva oea rera uvuoro oiso puraaepa, “Easi profetatoare keerapa ro Ilaija.” <sup>48</sup> ♦ Uva iravu ikaureva pupupua rupu piesa aue-ia uureopa ovi viniga ovi. Oa iava evao rao-ia vo ovi vatepareva rerapa Jisas. Osa oearovu oiso puraaepa, <sup>49</sup> “Tue rovou, ra Ilaija rera rere piesa urio rovoro, pasi.” <sup>50</sup> Oire Jisas rirovira koikoiro vovoua vikireva kopii ovoioro.

<sup>51</sup> Uva vo voki raga-a vao oa-ia riroua varoua vo rataoa-ia touua Pauto vo topisiaro iava oua vo Tugoropa Kepa-ia aue Tempel vuritavira kari piropa vo rutuva viara-ia vo ruture rasiuaaro. Vouao oua kari pirora, oiso ra oirara rutu Pauto ruvara iare tutuu pieive. Ovusa rasito tapo rikerikeroepa. Oa iava riropa avekero tapo poroporo piropa. <sup>52</sup> Osa tova urui tapo karu piropa vo uva voeao Pauto voeaaro oea oisoa tovapaive toreaepa tootoooro vorevira. <sup>53</sup> Uva voe-a voeao oea tova urui iava toreaepa vo vokio isivaaro iava oa-ia toreroepa Jisas. Oa iava voe rutu karea viropa Tugoropa Urui iare Jerusalem. Osa iava voa voe rutu kekeiva oearovu. <sup>54</sup> Uva voa reito oaiive tapo viurupa irara toupaiva Jisas-re uutupaoro. Uva vao kekeiva osa rasito rikerikeroepa ora orekerovu rutu varao oara rutu karekeepa. Oara rutu kekeoro rirovira rutu uriripaaepa. Oa iava oiso puraaepa, “Oiraopavira rutu rera ro Pauto Oviitoaaro!”

<sup>55</sup> ♦ Voa riro riako toupaiva vairo airoa Jisas sirova utuaepa Galili-ia kavuoro rera tauvapao. Uva vairo-a evairo airoa tauaivi torepao rera siituepaiva <sup>56</sup> oiso-ia, iriavu-a o-ia Maria Makdala iava, ora iriavu ita Maria, Jems araorei aakoaro ora Josep. O tapo Sebedi oviitoareiaro aakoaro, ora airorovu tapo.

### *Aveke Rikui-ia Jisas Tovoiva*

(Mak 15:42-47; Luk 23:50-55; Jon 19:38-42)

<sup>57</sup> ♦ Uva vo ovaiarovi iravu Arimatia iava rera riro monito, rera vaisiaro, Josep ira urioroepa. Uvare iravu Jisas disaipeltoaaro rera-a. <sup>58</sup> Ira Pailat-ia pouro viropa Jisas kopiire rera aresa. Oa iava Pailat rera voeaaro tavireva, “Vo kopii vatesa rerapa.” <sup>59</sup> Uva Josep vo kopii oureva rera tavurusa airepa-ia varoa popotea. <sup>60</sup> ♦ Oa iava rera tovoreva aveke rikui-ia rera vaaro oa ravaavira teka ragaiva iriavu-ia aveke. Uva vo rikui iare iriavu rirova aveke perireva vo riku riaaro ivitasa oira-ia. <sup>61</sup> Ovusa Maria vaio o Makdala iava ora iriavu Maria airea paupaereiepa vo tova ruvara-ia.

### *Pailat Uutupa Irara Tovoreva Tova-ia Uutusa*

---

❖ 27:38: Ais 53:12    ❖ 27:43: Sam 22:8    ❖ 27:45: Amo 8:9    ❖ 27:46: Sam 22:1    ❖ 27:48: Sam 69:21  
 ❖ 27:55: Lu 8:2-3    ❖ 27:57: Ap 13:29    ❖ 27:60: Mk 16:4

<sup>62</sup> Uva aio ravaapa voki putevoiva vao Sabat iare. Oa iava vo voki isivaaro iava avaaepa reipa irara pris voearei ora Farisi oearea rutu ora guruaepa rera ruvara-ia Pailat. <sup>63</sup> ♦ Oire uva voa oiso puraaepa rerare, “Oreovu vao-ia oare rugooiei Jisas vo reoaro. Oa ia oiso puraroepa rera ro riro kuuvuto, *Vo pevapa voki isivaaro iava vorevira toreravere*, vo osa touvira toupareva vo. <sup>64</sup> Uva eisi osa iava vii rugoo piepaiovai, ra taviu va iava. Oire ra vii voeaaro upo purapa irara tovorai vo tova-ia uutupasa vo peva rutu-ia voki. Auepa teapi rera voeaaro disaipel rera kavirusa urioave, ra oirara rutu tavitavive va iava kuuvuvira oiso, Vorevira toreroe tova urui iava. Teapi vo kuuvuo-ia rovopa puteve vo kuuvuo utupa.” <sup>65</sup> Oa iava Pailat oiso voea tavireva, “Oire uutupa irara vai tavita, ra avata avukivira rutu vo tova rukusa oiso osa ruipapatai.” <sup>66</sup> ♦ Uva va iava avaaepa vo tova-ia uutupasa. Oa iava pisikui reesivira tovoiva o ivara-ia aveke iria taku pievira tovoiva vo tova-ia. Oisore ra va-ia oovaupaave [auepa teapi irai vo tova kavirureve.]

## 28

### *Jisas Vorevira Toreroepa Tova Iava* (Mak 16:1-10; Luk 24:1-10; Jon 20:1-18)

<sup>1</sup> ♦ Oire uva Sabat voki topekakao vo putevoiva, ravireo sikerereva vo vokio iava wiki-ia vituaro vo voki. Oa iava vaireo urioereiepa Maria Makdala ora o iriavu Maria vo tova kekesa. <sup>2</sup> Vo osa rasito ravurike ovoiroepa rirovira rutu. Uva Turaro reraaro purapurapato ensel vuvuiua iava vararoepa aveke vera ovoisa oira peka pieoro. Oa iava voava oira ivara-ia pauparoepa. <sup>3</sup> ♦ Uva rera iava varaua rutu sisikorepaiva aviavipaoro. Ora varoa kuvupara rera iava oisi raga popotevira rutu toupaoro roropaiva. Viapau oiso oai aviaviaro uvuipa ra rera vo aviaviaro-ia puteve. <sup>4</sup> Uva va-a vao oa iava voeao uutupa irara rirovira rutu rope kopii puraiva rirovira rutu uriripaoro. Uva oiso paaepa rutu, Voeapa kopiipai.

<sup>5</sup> Oa iava enselpato Maria vaiore oiso puraroepa, “Teapi uriripaere. Taraiparai vei-ia veigoa urioereie Jisas-re vurasa ro ira kotoivorao evao parikou-ia. <sup>6</sup> ♦ Viapau oiso vo touparevoi. Ira toreroi vorevira oiso osa puraroera voviri. Ari ita, urioereiei vo tavukio raga kekesa uva toupaivo vo kopii. <sup>7</sup> Ra ikauvira voreere disaipel irara tavisa oiso, Vorevira toreroe tova iava. Ira visiipa iraroi Galili iare. Rera kekesa utupatai. Uva vo reo-a vao ragai vo reoaro oa vateavoi veipa oare rugoopaerevere.” Oiso osa puraroepa enselto.

<sup>8</sup> Oa iava vairei riakorirei rirovira rutu uriripaereiepa ora rirovira tapo rorupaereva. Uva ikauvira rikui raga ruvara iava avaereiepa disaipel tavisa. <sup>9</sup> ♦ Uva voa-a vo uva Jisas vairei iare pouro viropa raivaaro. Oa iava vairei kekeoro oiso puraroepa, “*Vearo voki rutu.*” Oa iava rera iare tutuu pieereva rerapa avivikepaoro rera kokotoaro-ia pitusa. Uva rera ia vuurapa vaisi puraereva. <sup>10</sup> Oire uva Jisas vaireire oiso puraroepa, “*Opeita uriripaere. Avaere arako irara oaa tavisa, ra Galili iare avaave uva ragai kekeivere.*”

### *Vo Utupua Irara Vo Reoaro-a Vao-ia*

<sup>11</sup> ♦ Oire touvira avapaereiepa osa oearovu voea iava vo tova-ia uutupa irara karea viropa vo Jerusalem urui iare reipa irara pris tavitavisa varao rutu iava orekerovu oara karekeepa voa. <sup>12</sup> Uva va-a vao oa iava voea rutu ora guruaepa pris irara ora turaro irara. Oire vo pau-a vao oa-ia oavu reoa goruiva. Oa iava riroa monia vateiva voeaopa vo tova-ia uutupa irara <sup>13</sup> oiso voea vosipaoro, “Teapi eisi tavitavipatavere. Ari oiso raga purapatavere, Rera voeaaro disaipel urioae voava rera kavirusa osa uusivira touioovo. <sup>14</sup> ♦ Ari ita, vosa rovopato gavman vo reo iava vao uvurevere, oire ra rera vovouaro poreio. Ra va iava viapau visii-ia vuria vai karekepe.” <sup>15</sup> Uva eisi osa iava monia-ia pituoro voea vo reoaro sirova utuaepa. Oa iava oisi raga vo reo sikataiva Juda taere iare. Oa iava oisi va purapaivoi vo vokio-ia tapo.

⊗ 27:63: Mt 16:21; Mk 8:31; Jo 2:19   ⊗ 27:66: Mt 28:11-15   ⊗ 28:1: Mt 27:56   ⊗ 28:3: Dan 7:9, 10:6   ⊗ 28:6: Mt 12:40, 20:19   ⊗ 28:9: Jo 20:14-18   ⊗ 28:11: Mt 27:65-66   ⊗ 28:14: Mt 27:2

*Jisas Ora Karekeroepa Disaipel Irara Iare Voea Tavisa, Avata Oirara Siposipopasa  
(Mak 16:14-18; Luk 24:36-49; Jon 20:19-23)*

<sup>16</sup> ♦ Vo katai tau katai (11) disaipel irara vokapaoro avaaepa Galili iare. Oa iava vo pukuio-ia poua viropa oare Jisas voea tavireva oiso ra voare avaave. <sup>17</sup> Uva voa-a vo uva rera kekeiva Jisas. Oa iava rera-ia vuurapa vaisi puraiva. Ari ita, vosa oearovu voea iava viapau oiso rera oirao piepaiva. <sup>18</sup> ♦ Oa iava Jisas voea iare tutuu piereva. Oire voava voea tavireva oiso, “Pauto vo goruro rutu vuvuiua iava ora vo rasito vatereva ragaipa. <sup>19</sup> ♦ Oiso osa iava uvuipatai ra oirara rutu vo rasitoa-ia disaipel pieta ragai voeaaro. Voea baptaisoro voea reesita Aite vaisiaro-ia, ora Oviito, ora Tugoropato Uraurato. <sup>20</sup> Rara voea siposipopata vo reoro rutu iava oara vateavora visiipa. Oire ra vearovira rutu vara sirova utupaave. Ragai uvu iraopata! Ragoa visii tavipaa oiraopavira rutu oiso, Visii tapo toupaaverea vokiara rutu-ia vo tugurasa vo rasio vo vuutaaro opesiaro-ia.”

## MAK

### Irapa Reoro Vo Vukuo Iava

Ro ira vo vukuo rigatoreva ira oisoa vaisipaise Jon Mak. Rera raga ita ira oisoa Pol vaio ora Pita tauvapareve Pauto vo kovoaro purapaoro (Ap 13:5, 13 ora 1 Pita 5:13). Oearovu oiso rugorugopaaeira, Ira raga ita ro ira torireva viurupa irara asavira vo osa Jisas ousa urioaepa Oliv Kovo sopaaaro-ia (Mk 14:51-52). Uva vo vuku rigatoreva 60 o 70 yia Jisas vo kavauaro isivaaro iava.

Mak rigatoreva voeaopa Rom-pa irara oea oisoa ruipapaave ra vo siposiporo uvupaise oara oirato vo goruaro iava oisoa tavipape. Eva-a oa iava rirovira tavitaviroepa Mak varao iava riro goru kovoro ravoto kovoro oara oisoa purapareve Jisas vo Pauto vo goruaro iavirava.

Uva vo vukuo sovara-ia Jisas vaisireva oiso, Pauto Oviitoaaro (Mk 1:1 ora Mk 15:39), ora oiso tapo Oirato Oviitoaaro Ro Ropoto. Ari kataitoa raga-a, Jisas ira riro siitoka ou rovorevoiva, vorevira voreroepa Pauto Aite iare. Uva vo utupavira voreroverea oirao pie vovou irara rera voeaaro ou piesa ita (Mk 8:38; Mk 13:26, ora Mk 14:62).

1. Jon Baptais iava vo osa Vearo Siposipo kosi piereva raiva puraoro oa-ia pouro viropa Jisas, 1:1-13.
2. Jisas Galili taere sovara-ia virireva rera vo kovoroaro ravoto kovoro purapaoro, 1:14-9:50.
3. Jisas vova avaroepa Galili-ia vore Jerusalem, 10:1-52.
4. Turarovira koataroepa Jisas Jerusalem urui-ia ovoiopa wiki-ia toupasa, ouruia-ia oeau rera kotoiva evao parikou-ia, 11:1-15:47.
5. Jisas vorevira toreroepa vova kopiia-ia, 16:1-8.
6. Vorevira toreroepa Jisas vo pevapa voki-ia, oa iava ovokivu-ia disaipel irara iare ora karekeroepa ora oearovu iare tapo, 16:9-20.

#### *Jon Baptais Vo Siposipo*

*(Matyu 3:1-12; Luk 3:1-9, 15-17; Jon 1:19-28)*

<sup>1</sup> Rovoaro Vearo Siposipo Jisas Krais iava, Pauto Oviitoaaro.

<sup>2</sup> ♦ Oa iava oiso va rigatoreva profetato ro reo topa piepato, Aisaia. Oreoa oiso purapai, ‘Uvuri. Ro iava ira ira pieavoi vii iare reo kaepato. Ira raiva oara vatatopoparevere va ravaaoro viipa.’

<sup>3</sup> ♦ ‘Iravu ira keeraparoi vo raaka tapi oiso purapa, Turaro vo raivaaro vatatopopata va ravaaoro oa-ia pouro virovere.’

<sup>4</sup> Uva vo reo-a vao oirao pieoro karero viropa Jon baptais vatepato vo raaka tapi. Uva voeapa siposipopareva Jon, oiso ra porea viro ra baptaisa ouive, vo rara Pauto voea iava vuriara verareve. <sup>5</sup> Uva voea rutu avaaepa rera iare voea rutu voeao vova Judia taere ora vova riro urui Jerusalem. Uva vuriara oaive kosi piepaoro vo vuuta raga-ia baptaisa ouiva Jon ruvara-ia vo uukova Jodan.

<sup>6</sup> ♦ Uva Jon ae kamel oruaro iava oisoa rera-ia oiso kuvuparo kuvupato, ora takipa iro bulmakau rakari. Uva rera vo aioaro-a vao-ia siiko ora koisi. <sup>7</sup> Uva oisi siposipopareva, “Ro ira utuparoi ira ragaipa reipa. Uva viapau uvupara ra rerapa akaipa kovo vai pura ragaa, oiso osa vao rera vaaro tasipa oa-ia viapau uvuparai ra va akaipavira vera ragaa. <sup>8</sup> ♦ Uva visii baptaispaavoi ae-ia uukoa. Ari rera visii baptaisrevere Tugoropato Uaurato vo goruaro-ia visii reesipaoro rutu.

#### *Jon Jisas Baptaisreva*

*(Matyu 3:13-17; Luk 3:21-22)*

<sup>9</sup> Ovuuta-a eva isivaaro iava Jisas Nasaret iava Galili-ia urioroepa. Oa iava Jon rera baptaisreva vo Jodan sir. <sup>10</sup> ♦ Oa iava veraro viropa voava uukova sirova. Uva voava

♦ 1:2: Mal 3:1   ♦ 1:3: Ais 40:3   ♦ 1:6: Lev 11:22   ♦ 1:8: Ais 44:3; Joe 2:28   ♦ 1:10: Jo 1:32

vuvuiua kekereva osa karu piropa. Uva Tugoropato Uraurato oiso vararoepa osa kurue rera-ia pitusa. <sup>11</sup> ♦ Uva reoreoa varaepa vuvuiua iava oa oiso puraepa, “Vii-a ragai Oviitoaaro rutu. Viigoa-ia roru iraopaavoi rutu vii kavikopaoro.”

*Seten Jisas-ia Kokaraparoepa*

(Matyu 4:1-11; Luk 4:1-13)

<sup>12</sup> Uva ikauvira Tugoropato Uraurato rerava avaroepa raaka tapire vo uva viapau oirara vai. <sup>13</sup> ♦ Uva voa toureva aue-ia vo resura tau (40) voki, osa Seten voa rera-ia kokara ragaparoepa. Uva okarerovu rutu tapo touporeva vavarai kare, osa enselpa irara voa rera tokipaiva.

*Jisas Ora Rera Vo Kovoaro Rovoreva Galili-ia*

(Matyu 4:12-17; Luk 4:14-15)

<sup>14</sup> Oire uva Jon tovoiva vo tuukepa kepa-ia. Osia isivaaro-ia Jisas urioroepa vore Galili. Uva voa siposipopareva Pauto vaaro iava Vearo Siposipo. <sup>15</sup> ♦ Uva oiso puraroepa, “Vo vuuta vao-ia oa pou piroi oapa tutuu piei ra karekepe vo vuutao iare oa-ia Pauto ora rera vo Saraaro tokirevere. Poreta viro, ra Vearo Siposipo oirao pieta.”

*Vo Jisas Ataripa Resua Roporeva*

(Matyu 4:18-22; Luk 5:1-11)

<sup>16</sup> Jisas Galili rovu vatuarto-ia vokareva. Uva Saimon vaio kekereva vaiterei ora Andru vo araorei, ovusa varuerepasiepa. Uvare vaiterei-a pakupatoarei moni oupasa. <sup>17</sup> Uva Jisas vaitereire oiso puraroepa, “Ragai sirova utusi, ra vei siposipoa oira ivupasa ragai iare.”

<sup>18</sup> ♦ Oa iava ikauvira raga kuverava kavusiva rera sirova utuoro.

<sup>19</sup> Uva oisivi vokaoro Jems-ia pouro viropa Sebedi oviitoaaro vo araorei ora Jon, vo osa uvuo-ia kuverava murupaoro toupasiva. <sup>20</sup> Uva vaitereire keeraroepa. Osia iava Sebedi aiteto kavusiva uvuo-ia ora kovopa irara utupaoro rera sirova.

*Jisas Vurito Tugarato Verareva Oiratoa Iava*

(Luk 4:31-37)

<sup>21</sup> ♦ Uva Kapaneam-ia karea viropa. Uva voa-a vo uva Sabat Voki-ia Reo Taisi Uvupa Kepa-ia Sinagog koataroepa. Uva voa oirarapa siposiporeva. <sup>22</sup> ♦ Oa iava rera vo siposipoaro-ia tavetaveiva, uvare rera vo reoaro-ia gorua toupaiva. Viapau oiso rera-ia osa voeao oea Reo Taisi iava siposipopaeveira.

<sup>23</sup> Uva voa toureva Sinagog sovara-ia evoa uva touporeva iravu oirato ira-ia oiso touporeve tugarato. <sup>24</sup> ♦ Uva-a vo uva oirato iava tugarato oiveoro oiso puraroepa, “Eake vai purari igeire vii Jisas vova Nasaret? Vii uriouei igei opesi ovoi piesa, eke? Ari ita, taraiparai vii-ia. Vii-a Torevokotoa rutu vova Pauto.” <sup>25</sup> Uva Jisas rerare koruoro oiso puraroepa, “Ora tape pieu, ra eera arova kosiu viro.” <sup>26</sup> Oa iava voeao tugaro-ia taketokoaepla rera rikerike pieoro, osa rirovira oiveroiva, rera iava kosia viropa. <sup>27</sup> Uva voeao rutu tavetaveiva. Oa iava voeao raga ora akeakepaaepa oiso, “Eake irao vao-ia? E airepa siposipo-a oa karekei vo goruova oa iava tugaro-ia rera uvui?” <sup>28</sup> Osa iava ikauvira rera iava vo siposipo viriva voraro rutu vo Galili taerero sovara-ia.

*Jisas Pita Aigevaaro Porete Pierava*

(Matyu 8:14-15; Luk 4:38-39)

<sup>29</sup> Uva Jisas tapo kosia viroiva Sinagog iava. Oa iava koataaepa voeao disaipel ora Jems vaio ora Jon, vo kepa-ia Saimon vaio vo kepaaro ora Andru. <sup>30</sup> Uva-a vo uva Saimon aigevaaro kukue upia puraiva. Oa iava oira iava Jisas taviiva. <sup>31</sup> Uva avaroepa oira-ia pitusa vavaea-ia oira tore pieoro. Oa iava kukue upia oira kavu ovoiva. Oa iava voeao aioara vatastopo ovoieva.

*Riro Irara Porete Pierava Jisas Ovaiarov*

(Matyu 8:16-17; Luk 4:40-41)

♦ 1:11: Sam 2:7; Ais 42:1   ♦ 1:13: Sam 91:11-13   ♦ 1:15: Ga 4:4; Ef 1:10; Ap 20:21   ♦ 1:18: Mt 19:27

♦ 1:21: Mt 4:23   ♦ 1:22: Mt 7:28   ♦ 1:24: Jo 6:69; Ap 3:14

<sup>32</sup> ✩ Uva vo ovaiarovu ravireo ovusa rokoreva uva rera iare oearovu upiapa irara siposa urioaepa, ora oearovu tugara upo irara. <sup>33</sup> Oirara rutu voeao vo uruio iava vao riroa oea vo uvuruaro kepa rataoaro tupaiva. <sup>34</sup> ✩ Uva-a vo uva oirara iava oupirovu rutu ruvarureva, ora oearovu oearoa iava vuri tugararo kosi pierava. Uva tugare koruroepa oiso ra ora tape pieave, uvare rera-ia taraiapaaepa.

*Jisas Siposipopaoro Virireva Galili-ia  
(Luk 4:42-44)*

<sup>35</sup> ✩ Vo vokipakou rutu-ia Jisas toreroepa. Oa iava voava kosi virooro avaroepa varirisa kuvala tapi. <sup>36</sup> Uva Saimon vase ora voeao oea rera tapo vokapaiva oea rerare taraapaoro utupaaepa. <sup>37</sup> Oa ava rera kekeoro rera taviiva oiso, “Oirara rutu viire taraapaivoi. <sup>38</sup> ✩ Oa iava voeare oiso puraroepa, “Irata. Ra voraro tutuu pievira ourui iare avavio, ra oa-ia voa siposipoa vao iava oa vituaro rutu iava vore urioraera.” <sup>39</sup> ✩ Uva oiso ragavira avaaepa Galili-ia. Uva voa siposiporeva Sinagog sovara-ia Jiu vaaro, ora tugara kosi pie tapo purareva voraro rutu vo Galili taerero sovara-ia.

*Jisas Iravu Lepra Sisigarue Pierava  
(Matyu 8:1-4; Luk 5:12-16)*

<sup>40</sup> ✩ Uva rera iare Jisas urioroepa iravu ira-ia oisoa lepra upia toupaive. Ira rera areoro rerare rekureva oiso puraoro, “Vosa apeisi vovoupau ra ragaivi porete pieri.” <sup>41</sup> Uva Jisas rerapa siraoroepa rutu. Oa iava rera-ia pitureva vavaea tovooro. Uva rera tavireva oiso, “Rui paparai ra sisigarueu.” <sup>42</sup> Uva va-a eva lepra upia rera kavuva. Oa iava veororoepa. <sup>43</sup> Uva goruvira rera vosipareva rera arupaoro. <sup>44</sup> ✩ Osa iava rerare oiso puraroepa, “Opeita irai taviparivere. Viapau. Ari varaua oara karekesa avapau pris irarapa. Ra tauoa vai purari oiso osa va iava visii taviva Moses vo rigatoaro. Oire ra oearovu rutu taraiavere oiso, Upia rutu vii iava opesiei.” <sup>45</sup> ✩ Ari ita, avaroepa voraro rutu siposipopaoro. Osa-a eisi vituaro iava Jisas viapau uvuiparoepa ra avaro ouruirovu iare. Ari ratauro raga toupareva kuvala tapiro-ia. Osa iava rera iare urioaepa oirara vova voraro rutu.

## 2

*Jisas Kerauto Porete Pierava  
(Matyu 9:1-8; Luk 5:17-26)*

<sup>1</sup> Uva ovokirovu isivaaro iava vo Kapaneam-ia pouro viropa. Uva voa rera iava tavia avaepa vo osa kepa sovara-ia toupareva voa. <sup>2</sup> Uva riro irara rutu ora guruiva, agasiepa. Uva viapau oiso oavi viapaa vai touva vo kepa rataoaro-ia. Uva-a vo uva voeapa siposiporeva va iava vao Vearo Siposipo. <sup>3</sup> ✩ Uva oresuravu iravuva kerauto kaepaoro urioaepa. <sup>4</sup> Ari ita, viapau uvuiaevo vo kaeva koatasa, uvare riroa ita uvurua. Osa iava kepa kukuuvuaro tokoiva Jisas aivarova. Oa iava vo kae vara pieiva. <sup>5</sup> Uva Jisas voea varaaro oirao pie vovouro kekereva. Oa iava kerautore oiso puraroepa, “Oviitoa oaa. Viitaa varaa viria verapi.”

<sup>6</sup> Vo osa oearovu voavi paupaaepa Reo Taisi-ia tarai irara, oea oiso ora rugorugoo piepaaepa ora voea raga vovouaro-ia. <sup>7</sup> ✩ Eake vituaro iava eisi puraroi rera ro-ia? Ira Pauto toviparevoi rera reroaropao. Irou vai uvuipai vuriara verapasa. Easi Pautoa raga. <sup>8</sup> Uva Jisas voea sovoreva ora rera iava sopaua-ia. Oa iava voea oiso akereva, “Eakere eisi ragaire vurivira rugorugoopatai ora visii raga sopaua-ia?” <sup>9</sup> E aa vo reo irao-a oa avekatapai rutu ragaipa, ra va-ia oiso purara, Vuriara oara verapi, eke oiso, Toreu ra urua vii vaaro kaeri, ra vava kareu vokapaoro? <sup>10</sup> Ari ita, ragai-ia taraiapatai ragoa ro arua oiso, Urua kaeri ra vava kareu vokapaoro, auere ra va kekepaoro oiso purapata raga iavirava, Oirato Oviitoaaro Ro Ropoto vo goruaro vao-ia oiraopa. Oa vao uvuipai vuriara verapasa oirara iava voeao vo rasitoa-ia tou irara.” <sup>11</sup> Oire kerauto tavireva oiso, “Vii tavipaavoi, Toreu, ra urua oara kaeoro ra kareu vii vo kepaaro iare.” <sup>12</sup> ✩ Uva tore ovoiroepa urua oaro kaesa. Uva

✩ 1:32: Mk 4:24   ✩ 1:34: Mt 4:23; Ap 16:17-18   ✩ 1:35: Mt 14:23   ✩ 1:38: Ais 61:1   ✩ 1:39: Mt 4:23-25

✩ 1:40: Mk 10:17   ✩ 1:44: Lev 13:49, 14:2-32   ✩ 1:45: Jo 6:2   ✩ 2:3: Mt 4:24   ✩ 2:7: Ais 43:25   ✩ 2:12: Mt 9:33

kareroepa ora karekesa voeare. Oa iava rera-ia tavetavepaiva. Uva Pautoa-ia vuurapa vaisi puraiva oiso puraoro, “Viapau oiso oai kekeiova oiso-ia.”

*Vo Livai Oureva  
(Matyu 9:9-13; Luk 5:27-32)*

<sup>13</sup> ♦ Uva vorevira pouro viropa toko rovu rogaraaro-ia. Uva riro irara rutu oirara ora guruaepa voa rera iare. Oa iava voa voeapa siposiporeva. <sup>14</sup> ♦ Uva Jisas voava avapaoro Livai kekereva, Alfias ovitoaaro, vo osa vo pauparoepa takis oupa kepa-ia moni vikipa tapi. Uva rera tavireva oiso, “Ragai sirova utuu.” Oa iava toreoro rera sirova utu ovoiroepa.

<sup>15</sup> Uva aiosa avaroepa Jisas voavi pauoro Livai vo kepaaro-ia. Uva riro irara voeao moni oupa irara ora voeao vuri vovou irara, oea tapo toupareva, ora disaipel irara voeao rera voeao. Aue iava uvare riro irara rutu rerare utupaaepa. <sup>16</sup> ♦ Uva voeao Reo Taisia taraipa irara Farisi iava voea oea rera tueiva osa vuri vovou irara tapo aiopareva ora takis oupa irara. Uva voea disaipel akeiva, “Uva apeisi moni oupa irara tapo aiopare ora vuri vovou irara?” <sup>17</sup> ♦ Uva Jisas va uvureva. Oa iava oiso puraroepa voeare, “Voeao upia asa irara viapau oiso ra avapaave ruvarupatoa iare. Viapau. Ari voeao raga vuri vara irara. Ari ita, voeare torevoko vovou irara viapau oiso keerasa urioraera. Ari voeao-a vuri vovou irara, oiso ra vuriara oaiive iava porea viro.”

*Aio Kavupa Pitupitu Iava  
(Matyu 9:14-17; Luk 5:33-39)*

<sup>18</sup> Uva Jon voeao disaipel ora Farisi urioaepa voeao aio kavu irara. Oa iava oeavu Jisas akeiva oiso puraoro, “Uva apeisi Jon voeao disaipel voearei ora Farisi voeao aio kavupai, oiso ra vearovira lotu purapaive, vo osa vii voeao disaipel viapau oiso aio kavupaaveira?” <sup>19</sup> Uva Jisas voea akereva, “E vosa voeao oea saratoaaro riakoparo, oea uvuipaai ra aio kavuave rera tapo touoro, eke? Asi viapau, uvare toupare voea tapo. <sup>20</sup> ♦ Ari ita, ovokivu oa uriopere oa-ia ora voea iava rera veraivere vo osa riako ouro. Oire evo voki oa-ia oiso aio kavuavere siraopaoro.”

<sup>21</sup> Uva vo reo-a vao oa iava oiso puraroepa, “Viapau rutu irai uvuiparoi ra ruta vai ora airepa varoa vai taporeve. Vosa oisi piereve, ra ita ruta karikari piro airepa arova. Ra karia ita riro iraope. <sup>22</sup> Oire vosa airepa ovi wain ovi ora riro piepe, ra viapau rutu irai uvuiparoi ra va vao airepa ovi wain ovi kuvureve ruta tou-ia aue iava meme rakariaro, auepa uvare tuakaka. Vosa oisi va piereve ra pokon piro vo oviva, ra va iava vuri ovoipe. Ari vosa airepa ovi raga kuvureve airepa tou-ia, ra oriruvira toupaive.”

*Disaipel Kukara Tueiva Sabat Voki-ia  
(Matyu 12:1-8; Luk 6:1-5)*

<sup>23</sup> ♦ Uva poua viropa kukara kovo-ia Sabat voki-ia. Uva rera voeao disaipel kukara tuepaoro rovoaepa vo kovo sovara-ia vokapaoro. <sup>24</sup> Uva rerare oiso puraaepa Farisi, “Kekeri. Uva apeisi iava oiso piepai Sabat voki-ia oa-ia viapau uvuipaai, uvare Reo Taisi putepaivoi?”

<sup>25</sup> Oa iava voea akereva Jisas, “E viapau va vieipataveira vao iava osa piererva Devit tuariri rutu, ira ogoevira toureva ora voeaovio oea tapo toupareva? <sup>26</sup> ♦ Oa-ia ita koataroepa Pauto vo kepaaro-ia vo vuutao-ia oa-ia Abaiata prisparoepa. Uva bret aioreva vao oa-ia viapau uvuipa akukutoa vai ra va aioreve. Va vao bret oa oisoa vatepaive Pautoa-pa ra va kekepareve. Pris irara raga uvuipaai va aiopasa. Uva rera voeao vaterema oea tapo oisoa toupareve?”

<sup>27</sup> ♦ Uva voea tavireva, “Sabat voki oirato tauvapasa pura piropa. Viapau oiso oirato puraro viropa Sabat vokipa oiso ra rera tokipaive. <sup>28</sup> Easi Oirato Oviitoaaro raga ira uvuiparoi vo oirara rutu vo pitupituroaro rovirieipasa varao opitupituroa purapaiveira vo Sabat voki-ia.”

♦ 2:13: Mk 1:45   ♦ 2:14: Mt 8:22   ♦ 2:16: Ap 23:9   ♦ 2:17: 1 Ti 1:15   ♦ 2:20: Lu 17:22   ♦ 2:23: Diu 23:25   ♦ 2:26: 1 Sml 21:1-6; 2 Sml 8:17   ♦ 2:27: Eks 23:12

*Jisas Pakoeto Ruvarureva  
(Matyu 12:9-14; Luk 6:6-11)*

<sup>1</sup> Uva voava ita vo ovokivu-ia uva vorevira koataroepa Reo Taisi Uvupa Kepa-ia Jiu vaaro, osa voa toupareva iravu oirato kopii vavaeto. <sup>2</sup> ♦ Uva rera-ia siituepaaepa oiso vosa rera porete piereve vo Sabat voki-ia, ra rera iava gasiive oai iava. <sup>3</sup> Uva rera pakoeto tavireva, “Toreu ra uriou vore.” <sup>4</sup> Oa iava voea akereva Reo Taisi iava oiso puraoro, “Apeisi torevokopai vao Sabat voki vearoa purapasa, eke vuria purapasa? Oira porete piepasa, eke oira upopasa?” Oa iava ora tape pieaepa ita. <sup>5</sup> Uva kasipuvira poreroepa voeare, uvare voea iava sopaura vavagisipaepa. Oa-a vao oa iava rerare vovouisi vavataepa. Uva rera pakoeto tavireva, “Vavaea irairari va torevokooro.” Uva va irairareva. Oa iava rerare vavaea vearo ovoiepa. <sup>6</sup> ♦ Uva Farisi ora reosa avaaepa voeao tapo King Herot tauvapa irara oiso, “Apeisi vai iava rera upope?”

*Riro Uvuru Touva Toko Rovu Vatuarto-ia Rogaraua-ia  
(Matyu 12:15-21)*

<sup>7</sup> ♦ Jisas rera voearo tapo disaipel vararoepa vore toko rovu. Oa iava voeareo vova Galili-ia ora Judia-ia oearea rutu rera sirova utupaaepa. <sup>8</sup> Ora voeao Jerusalem iava ora vova Idumia, ora vova ivirovira Jodan ora voeao Taia-ia vatuarto ora Saidonia. Ogururoa rutu-a voeao oea rera iare urioaepa, uvare riro-a Jisas vo kovoaro oa iava uvuiva. <sup>9</sup> Osa iava voea tavireva disaipel irara oaro, oiso ra uvuoia vai ravaaive. Teapi oirara urioave ra rera tavuruoro ora guruvae. <sup>10</sup> Uvare voa riro irara rutu porete pie rovorevoiva, oearovu oupiarovuva vo uvuru ugapaoro koatapaaepa Jisas-ia rirupasa. <sup>11</sup> ♦ Uva tugara irara rera kekeiva. Oa iava rerare takua viropa oiveoro oiso puraoro, “Vii-a Pauto Oviitoaaro.” <sup>12</sup> ♦ Oa-a eva oa iava voea vosireva riro goruvira oiso puraoro, “Opeita ragai iava tavidatavere poeravira.”

*Katai Tau Erao (12) Roporeva Jisas  
(Matyu 10:1-4; Luk 6:12-16)*

<sup>13</sup> ♦ Uva Jisas iparoepa pukuia-ia, uvare oiso ruipaparoepa ra oeai reesireve. Oa iava voeare voeao keeraroepa. <sup>14</sup> Uva katai tau erao (12) roporeva oiso ra rera tapo toupaive. Oa iava voea vaisireva oiso, Aposel irara. Ra va iava voea siporeve oearovu rutupa sipoipopasa. <sup>15</sup> Uva gorua voeapa karoporeva vaore, oiso ra va iava tugara kosi piepaive. <sup>16</sup> ♦ Voea-a voeao katai tau erao oiso, Saimon-a ro ira-ia vo vaisio tovoreva, Pita. <sup>17</sup> Ora Jems Sebedi oviitoareiaro ora Jon, vo araorei vaisireva oiso, Boanesis. Va vituarto iava uvare riro varakeo reotoarei-a. <sup>18</sup> Andru ora Filip, ora Batolomyu, ora Matyu, ora Tomas. Jems oviitoaaro Alfias ora Tadias ora Saimon Selot. <sup>19</sup> Ora Judas Iskariot, ro ira Jisas kosi piereva keripa irara vavaearo iare.

*Vo Jisas Vaio Vo Reoaro Toupai Ora Bielsebul  
(Matyu 12:24-32; Luk 11:14-23, 12:10)*

<sup>20</sup> Oire uva Jisas kepa-ia koataroepa. Oa iava voa rera iare vorevira ita ora guruaepa oirara rutu. Osa-a eisi osa iava viapau uvuaepa oiso ra aioive, uvare riro uvuru rutu-a. <sup>21</sup> ♦ Uva Jisas sara iraraaro va iava vao uvuiva. Osa iava urioaepa rera ou piesa, uvare oeavu oirara oiso puraaepa, “Easi ro kokoropa.”

<sup>22</sup> Uva voea Reo Taisi-ia tarai irara urioaepa Jerusalem iava varaoro. Uva oiso puraaepa, “Ira-ia pouparo viroveira tugara reipato rera vaisiaro, Bielsebul. Ira vo goruaro iavirava tugara kosi piepareveira.” <sup>23</sup> Oa iava Jisas voeare keeraroepa ruu reo purasa voeapa oiso, “Apeisi ragavira ra Seten uvuipa ra ora siguro?” <sup>24</sup> Vosa osarai ora aveavepaave, ra viapau vearovira toupaive. <sup>25</sup> Ora vosa oaaoi ora sikaave katai kepa vai ora upooro, uva viapau uvuipaaai ra oisi iava vearovira touive. <sup>26</sup> Ra vosa Seten ora vuri

♦ 3:2: Lu 14:1, 20:20   ♦ 3:6: Mk 12:13   ♦ 3:7: Mt 4:25   ♦ 3:11: Mt 14:33   ♦ 3:12: Mk 1:25, 34   ♦ 3:13: Mt 5:1; Lu 9:1   ♦ 3:16: Jo 1:42   ♦ 3:21: Jo 10:20; Ap 26:24

pieparo, ra viapau goruvira toupareve. Ra rera vo saraaro toko ovoi piro, ra oisi iava opesi ovoiro.”

<sup>27</sup> ♦ Uva vo reo-a vao oa-ia oiso puraroepa, “*Viapau irai uvuipa ra koata ragaro vo goruto vo kepaaro-ia rera varaaro kavirusa. Ari vosa rera tuuke rovoreve iroiro-ia ro goruto, oire ra rera varaaro kavirureve.*

<sup>28</sup> “*Oiraopavira rutu visii tavipaa oiso, Pauto vuriara rutu verarevere ora orekerovu varao takau reoro varao oara purapaiveira oirara.* <sup>29</sup> Ari vosa ro ira Tugoropato Uraurato takaupareve rera akaipa piepaoro, eva-a oa-ia viapau Pauto uvuipa ra va verareve rera iava va vao vuria oaro. Oa touvira rera vuri piepaiverea vokiara rutu-ia.” <sup>30</sup> Uva Jisas oiso puraroepa uvare oearovu oiso purapaaepa, “*Ira sopapro-ia ro tugarato touparevoi.*”

#### *Jisas Aakoaro Iava Ora Araoko Iraraaro*

(Matyu 12:46-50; Luk 8:19-21)

<sup>31</sup> Uva aakova ora araoko irara oavaoa karea viropa ratau tousa uvava aruaepa rerare, oiso ra vo avao iare urioro. <sup>32</sup> Ari ita, riro uvuru rutu Jisas tavarupaiva. Uva rera taviiva oiso puraoro, “*Kekeri. Aakoara ora vii araoko iraraaro oavaoa oiso torepaa ratau. Oea vii kekesa aepeaai.*” <sup>33</sup> Oa iava voea vo reoaro pukooro oiso voea akereva, “*Irouva aako ora irou irara araoko irara oaa?*” <sup>34</sup> Uva ora poreroepa voea iare oea rera tapo toupaiva voeare oiso purasa, “*Visii-a aakoa vase ora visii-a vao ragai araoko iraraaro.*” <sup>35</sup> Uvare ro ira Pauto vo vovouaro sirova utuparo, ira ita-a eera araokotoa oaa ora taataava oaa ora aako.”

## 4

#### *Vo Oirato Vuruara Vikipareva Kovoa-ia*

(Matyu 13:1-9; Luk 8:4-8)

<sup>1</sup> ♦ Uva vorerivira ita voea siposipopaoro rovoroepa vo toko rovu-ia Galili-ia. Uva riro uruiro rera tavarupaiva. Oa iava kaero viropa uvuo-ia voa paua, osa toko rovu ivara-ia toupaeva. Uva va-ia pauroepa ovusa vo uvuru rogaraua-ia toupaiva. <sup>2</sup> Uva voava voea siposiporeva riroara rutu-ia ovoovo reoro oara-ia oiso puraroepa voeare,

<sup>3</sup> “*Uvuta. Iravu oirato avaroera wit koko vikisa varuparo.*” <sup>4</sup> Uva vara vikiparevora osa oaravu vo kovepaera raivaaro. Uva kokio kare vara aiopasa uriopaaera. <sup>5</sup> Ovusa oaravu avekepa tapiro kovepaera vo uva viapau rirovira toupaive rasia vai vearoa vai. Oa iava ikauvira raga kova ovoiera. <sup>6</sup> Uva ita, ravireo kaero viro vara raverave piesa vara erako pieoro. Aue-ia ita uvare viapau vavurupatoa vai ita. Oa iava raveraveera. <sup>7</sup> Ari oaravu kovepaera kokopa kouro sovara-ia varao rokarokapara. Uva kokopa kou varare tavaruporo riroera. Oa iava viapau kueera ita. <sup>8</sup> ♦ Ari oaravu koveera vearo rasi-ia. Oa iava vearovira raga kovaera. Uva vearovira kueera rirovira. Oaravu aue-ia uvuipaera peva tau (30), ari oaravu aue-ia katai vatara tau (60), ari oaravu aue-ia uvuipaera katai vovoto (100).” <sup>9</sup> Uva oiso puraroepa, “*Vosa irai-ia kokitoa vai karuvira toupareve, vearovai ra va uvureve, uvare uvupatoa ita kokito.*”

#### *Vo Ovoovo Reo Vituaro Toupai*

(Matyu 13:10-17; Luk 8:9-10)

<sup>10</sup> Uva oearovu oirara Jisas arova kareaepa ora katai tau erao (12) disaipel. Ora oearovu oea rera tapo toupaiva, oea rera akeiva vo reoro porearore varao ovoovo reoro. <sup>11</sup> ♦ Oa iava voea raga tavireva oiso, “*Vo reo vao oa vataupai, oa vituaro iava visii tavirevora Pauto ora rera vo Saraaro iava. Ari ita, voeo oea ratauvira toupaiveira ragai vo vovouaropa, oeapa vo siposipo puraavoi ovoovovira.*” <sup>12</sup> ♦ Ari ita,

“*Vura ragapaivo osa viapau vo reo vituaro eveipaivo. Ora va uru pie ragapaivo osa viapau va-ia taraipai oisopa, Teapi porea viro ra vuriara oaiive vera piro voea iava.*”

#### *Ovoovo Reo Aue Iava Wit Koko Vikipato Aviavi Pierева Jisas*

(Matyu 13:18-23; Luk 8:11-15)

♦ 3:27: Ais 49:24-25    ♦ 4:1: Mk 2:13    ♦ 4:8: Jo 15:5; Kl 1:6    ♦ 4:11: 1 Ko 5:12; Kl 4:5    ♦ 4:12: Ais 6:9; Ro 11:8

<sup>13</sup> Uva Jisas voea tavireva, “Vosa viapau vao-ia taraipata ovoovo reo, uva apeisi ragavira oreorovu-ia taraipatavere ovoovo reoro? <sup>14</sup> Wit koko vikivikipato ira oiso toupare osa ro ira Pauto vo reoaro paupare. <sup>15</sup> ♦ Uva varao oara kovepai raiva-ia, uva evoa ora paupai reoa. Ovusa uvupaive ra Seten ita urio ovoiro vo reo kaviru ovoisa vao oa oisoa voea sopaaro-ia toupave. <sup>16</sup> Ari varao oara ora paupape avekepa tapiro oa oiso toupai, Oea-a vo reo uvuivoi. Oa iava va ou ovoivoi roruvira raga. <sup>17</sup> Vo osa viapau ikopitoa vai va-ia, vo osa ovurirovu rutu sasararo pou piro vare vao Pauto vo reoaro. Oire ra va iava ikauvira vo reo kavuive. <sup>18</sup> Ari oearovu oiso toupai, Oea vuutaaro-ia wit koko kovepai rokarokapa kou sovara-ia. Evoea ita oea vo reo uvuivoi. <sup>19</sup> Ari ita, rirovira rutu rugorugooopaa varao ruture vo rasio iava vara, uvare oiso rugooopaa ra riroara vai rutu gurupaive moniara vai ora orekerovu rutu riiriipaive. Oara rutu evara oara Pauto vo reoaro tavurupaiveira. Eisi osa vituaro iava viapau vo reo eva kuea vai voea sopaaro-ia. <sup>20</sup> Ari ita, oearovu oiso toupai osa veearoa rasia, oa iava voa vearovira ora pauepa. Uva voa vo reo tokiiva va sirova utuoro. Oa iava rirovira kueepa oiso, oaravu uvuipaepa peva tau-ia (30), ari oaravu katai vatara tau-ia (60), ari oaravu uvuipai katai vovoto-ia (100) uvuiepa.”

#### *Vuravu Vatauiva Baket Reroaro (Luk 8:16-18)*

<sup>21</sup> Uva voea akereva, “E vuravu kaepatavoi ra oira tovota baket sopaaro-ia, ora uruara ita reroaro oira tovota voa? Viapau. Easi tebol ivara-ia oira tovopata. <sup>22</sup> ♦ Ari ita, orekerovu rutu vatauvira toupaiveira oara rutu poeravira kosi pirovere. Ora varao oara rakupareve, oara rutu poerareverea rara utupaua. <sup>23</sup> Vosa irai-ia kokitoa vai karuvira toupareve, vearovai ra va uvureve, uvare uvupatoa ita kokito.”

<sup>24</sup> ♦ Uva voeare oiso puraroepa, “Vearovira rutu uvupata. Vosa gare visivi uvupata, eva-aa oa iava gare visivi taraipatavere. Ari vosa rirovira rutu uvupata, osa iava uvuipatait ita ra taraipatavere rutu. Vosa vearovira rutu vo reo sirova utupata, eisi osa iava vo reo-ia vearovira tarai iraopataverea. <sup>25</sup> ♦ Vosa vo taraio kovo piereve, ira ita uvuiparoi ita vorerivira ourovvere. Ari vosa ro ira viapau garea vai-ia pitureve, ira uvuiparoi ita apotarovere rutu.”

#### *Ovoovo Reo Aue Kovaaro Iava Wit Koko*

<sup>26</sup> ♦ Uva oiso puraroepa voeare, “Pauto vo Saraaro oiso rutu toupai osa oirato ira wit takuraro vikiparoi vo rasitoa-ia. <sup>27</sup> Uva kareroe vokiaro uusisa. Uva avitoa-ia eraoroe osa kovae. Osa viapau vara-ia taraiparoe. <sup>28</sup> Rasito raga iava kovapapeira varao witara. Uva rovovira rovopa vakipa kae rovo piro. Ari va isivaaro iava kuepe viorosa. <sup>29</sup> ♦ Uva vioroepa vo kue. Oa iava rotureva, vo uvare rotupa vuuta-ia tuguraepa.”

#### *Ovoovo Reo Mastet Vuruaro Iava (Matyu 13:31-32; Luk 13:18-19)*

<sup>30</sup> Uva ita oiso akereva, “Aa vao oiso toupai Pauto vo Saraaro? Ora aa vo reo ovoovo reo vava ovoovopai, oa iava uvuipatai oai iava ra va-ia roroipata? <sup>31</sup> Oiso rutu toupaivoi osa oavu aiao oa oiso vaisipaiveira, mastet. Oeva iava oisoa aisivu pauive ra kovape. Ra rirovira rirope. Gare isivi rutu aisia-ia putepaiveira orekerovu rutu kuearo. <sup>32</sup> Uva vosa kovape, ra kovaoro ipape. Ra vara rutu-ia puteve evaara riropavira rutu rao puraoro. Osa iava virata kokioro pitupaiive vuavuapasa voa, ora voa epitapaave tapo.”

#### *Jisas Siposipopaoro Ovoovo Reo Purareva (Matyu 13:34-35)*

<sup>33</sup> ♦ Oire uva vo reoro-ia ovoovo reoro voea tavitavireva, oiso ra uvuiave vara uvusa. <sup>34</sup> ♦ Uva ita, viapau oiso voeapa vo reoro aviavi pierava varao ovoovo reoro. Ari vosa disaipel irara oaro raga tapo oisoa toupareve, ra voea ragapa orekerovu rutu aviavi piepareve.

---

♦ 4:15: Mk 2:23, 26    ♦ 4:22: Mt 10:26    ♦ 4:24: Lu 6:38    ♦ 4:25: Mt 13:12, 25:29    ♦ 4:26: Mt 13:24  
♦ 4:29: Re 14:15    ♦ 4:33: Jo 16:12    ♦ 4:34: Jo 16:25

*Purepa Kiuvu Rite Pierava Jisas  
(Matyu 8:23-27; Luk 8:22-25)*

<sup>35</sup> Ovaiarovu vuri eveivei-ia voea disaipel tavireva oiso, “Irata, ra ouruiara ivirovio ovarata-ia.” <sup>36</sup>◊ Uva vo uvuru arova kaea viropa uvuoia rera tapo Jisas. Vo osa oaravivu garepa uvuoro oara voea sirova utuepa. <sup>37</sup> Uva vusireva riroto kiuvu. Oa iava sigato kaero viropa uvuoia sovara iare ora va ivara-ia. Uva gareavi raga kavu piropa, ra agasio uukova uvuoia. <sup>38</sup> Vo osa rera oira vituaro-ia uusiparoepa orave ivara-ia kukue otarapaoro. Uva rera eraopaiva oiso purapaoro, “Tisa, e viapau vao sovoparivoi oa iava viapau igeipa siraopau? Oa-ia igeipa tutuu pievoi ra kopiiio.” <sup>39</sup> Oa iava Jisas erao ovoiroepa. Uva kiuvu rakote piesa reoroepa ora rirova toruva tavireva, “Varau ra ora siroi pieu.” Uva kiuvu rerereva riteoro. <sup>40</sup>◊ Oa iava Jisas voea akereva oiso, “Eakepa uriripatai? Ari ita, vosa raria vai toupaive, oire ra viapau uriripata.” <sup>41</sup> Osa uriri iraopaoro ora voea raga oiso puraaepa, “Easi iroutoa rutu-a ro, uvare kiuvu rera uvu ovoire ora uukova?”

## 5

*Tugara Kosi Pierava Oiratoa Iava Gerasa Taere-ia  
(Matyu 8:28-34; Luk 8:26-39)*

<sup>1</sup> Uva Jisas ora rera voeaaro disaipel rereiva ivirovira rovua iava vao Gerasa taere-ia sovara-ia. <sup>2</sup> Oire vosa uvuoia iava rereiva uva oiratoava aivarivoiva, ira tova urui iava kosiro viropa. Ro ira-ia oisoa toupaive tugara. <sup>3</sup> Uva voa raga oisoa toupareve tova urui-ia. Uva viapau oiso ra oiratoa vai uvuilo rera tuukesa voa aue-ia sen iro vai. <sup>4</sup> Ari ita, vokiara rutu-ia oisoa rera vavaearaaro tuuke ragapaive sen iroro-ia. Ora oaravu oara-ia oisoa rera kokotoaro taki ragapaive, ovusa vara rutu tokotokopareve. Viapau rutu irai uvuiparo ra rera tuukereve rera tarai piesa. <sup>5</sup> Oire vo osa vokiara rutu-ia aue-ia aviaviororo ora vo vokiaroro uva oisoa toupareve vo pukuiara ora vo tova uruilo. Ra gaupareve ora rera raga ora upopaoro vorarova varaua iava aue-ia aveke ora tatupaoro.

<sup>6</sup>◊ Uva Jisas tuepaoro tauai ikaureva rerare taku virosa. <sup>7</sup>◊ Oa iava rirovira oivepaoro oiso puraroepa, “Apeisi vai ruipapaei ragaire vii Jisas? Pauto Oviitoaro ro oiso rutu viara-ia. Ragaipe. Vii arepaavoi vo Pauto vaisiaro sovara-ia oiso, Opeita ragai tekipari.” <sup>8</sup> Oiso puraroepa oiso-ia uvare Jisas rerare oiso puraroepa, “Oiratoa iava kosi virou eera vii tugarato.” <sup>9</sup> Oa iava Jisas rera akereva oiso, “Irouto-a vii vaisiaro?” Uva rera tavireva, “Vaisia oaa Riro Irara, uvare riro irara igei tugara.” <sup>10</sup> Uva tuupavira oiso raga rera akepareva oiso puraoro, “Opeita igei sigupari tauai vaire.”

<sup>11</sup> Uva oisoa koiepa tapatapa toupaive pukuia-ia vatuaroo-ia. Oa oisoa aiopaise. <sup>12</sup> Uva Jisas akeiva oiso puraoro, “Igei siguri ra koie kare soparo-ia rokoio.” <sup>13</sup> Uva voea iava vasereva. Oa iava voea tugara kosia viropa vo koie kare-ia koatasa. Uvava koie kare ikauoro varaaepa vaesia-ia ora vikisa rovu-ia. Oa iava kopiliaepa uuko ovi sovara-ia. Voea rutu uvuiaro erao tuku (2,000).

<sup>14</sup> Uva koie tokipa irara toriiva vorarore uruiara-ia ora uvarovu tapo tavitavipasa. Oa iava urioaepa aue kekesa vao oa purareva. <sup>15</sup> Uva urioaepa Jisas iare. Oa iava rera kekeiva ira-ia oisoa toupaive riro irara tugara, osa varo tuuava pauparoepa ora torevoko rugoo tapo. Oa iava uririaepla. <sup>16</sup> Oire voea-a voeao oea ruvara-ia tugara kosi pierava rera iava ro-ia, oea oearovupa siposipopaiva vao iava, uvare oisoa tugara rera-ia toupaive ora aue iava koie ragui. <sup>17</sup> Oire eva-a oa iava Jisas aruiva, oiso ra uruia oaive iava avaro.

<sup>18</sup>◊ Osa-a eisi osa iava koataroepa uvuoia-ia. Uva rera ro ira-ia oisoa toupaive tugara ira ruipaparoepa oiso ra rera sirova utuparo. <sup>19</sup> Uva Jisas rerare koruoro rera tavireva oiso, “Avau vore uruia oara ora sara irara oara iare. Ra voea taviri aue iava siraoa oa-ia vo kovo purare Turaro vii-ia.” <sup>20</sup> Oire uva avaroepa vo uruilo iare Dikapolis oa porearo oiso vaisipaiseira, Katai Tau Uruiro. Uva voa vao iava tavitaviroepa riro kovo oa purareva Jisas rera-ia. Osa iava uruiara rutu tavetaveiva va iava.

◊ 4:36: Mk 5:2, 21 ◊ 4:40: Mk 16:14 ◊ 5:6: Mt 4:9 ◊ 5:7: Ap 16:17; Hi 7:1 ◊ 5:18: Ap 16:39

*Vo Jisas Reito Oviivaaro Porete Pierava Ora Iriavu Riakova Iria Rera Varoaro-ia Pitueva  
(Matyu 9:18-26; Luk 8:40-56)*

<sup>21</sup> Oa iava Jisas iviroroepa ovaratavu iare. Uva riro irara ora guruaepa rera iare. Uva vo raga toureva uuko ovi vatuarto. <sup>22</sup> Uva Jiu vaaro Reo Taisi Uvupa Kepa tokipato urioroepa. Rera vaisiaro ro-ia, Jairas. Uva Jisas kekeoro takuro viropa vo rera kokotoaro-ia rekuoro. <sup>23</sup> Oa iava oiso puraroepa rirovira rutu rera areoro, “Kakaeva oaapa tutuu piepai ra kopii. Vii arepaavoi ra vavaea oara tovari oira-ia, ra va iava poreteo ora tooo vorevira.” <sup>24</sup> Oire uva Jisas rera sirova uturoepa. Uva riro irara vaiterei sirova utuaepa. Oa iava tutututuu piepaiva.

<sup>25</sup> ♫ Uva iriavu riakova iria-ia oisoa kekira koveparo vokiara rutu-ia. Uva oisi raga toupaoro katai tau erao (12) ivaro-ia tuguraopa vo upia purapaoro. <sup>26</sup> Uva riro irara rutu iare oisoa ava ragapao, oiso ra oirapa vo ruvaru purapaive, ra opesipe vo kopii. Uva oisoa voeapa ora vori via pie ragapao. Vo ovusa vo kopii oirare riropape rutu, ovusa ora apota pie ragapao. <sup>27</sup> Uva Jisas iava uvueva, oa iava riro uvuru sovara-ia rera iare koataopa, oiso ra oira porete piereve. Uva varoa vatuarto-ia pitueva vao rera vaaro. <sup>28</sup> Aue iava uvare oira raga oiso ora rugoopaopa, Vosa rera vaaro-ia pitua varoa, ra veearora poreteoro. <sup>29</sup> Uva vo vokia-a eva opesiepa upia. Uva varaua sovoeva uvare varaaepa. <sup>30</sup> ♫ Oisi-a eisi osa iava varaua sovoreva Jisas oiso, Easi iravu iare avai gorua ragai iava. Oa iava ora poreroepa voeare oiso puraoro, “Irou varoa-ia pituwoi?” <sup>31</sup> Uva rera voeaaro disaipel rera akeiva oiso, “E vo uvuruo vurapari oea vii iare tutuu piepai. Uva apeisi iava oiso akepari, Irouto ragai-ia piture?” <sup>32</sup> Oa iava voea vuravurapareva oiso ra ro kekereve ira rera-ia piturevoi. <sup>33</sup> Osa riakova raga va vao ravaeva oa oira-ia karekeepa. Oa iava rikerikepaopa uriripaoro. Uva rekueva rera kokotoaro-ia. Oa iava oiraopavira rera tavieva. <sup>34</sup> ♫ Uva Jisas oiso puraroepa oirare, “Oviiva oaa. Vii vaaro oirao piea vii porete pievoi ravotovira. Avau gavaurea-ia, ari vearouei.”

<sup>35</sup> Uva eisi puraparoepa ovusa Sinagog tokipato voeaaro poua viropa oiso tavisa, “Vii oviivaaro kopioi. Uva uvuipau ra rerare koruu eera Tisato. Ra oirape iria kopioi.” <sup>36</sup> Uva Jisas voea uvupaoro rera tavireva Sinagog tokipato oiso, “Opeita uriripau. Ragai oirao pieri.” <sup>37</sup> Uva voeare koruroepa. Oa iava voea raga oureva oiso-ia, Pita-a ro, ora Jems, ora Jon araokotoaaro Jems. <sup>38</sup> Uva karea viropa voa vo Jairus vo kepaaro-ia. Oa iava gauara uvuiva. Uva voeae kekereva vo ovusa siraopaaepa gau iraopaoro rutu. <sup>39</sup> ♫ Uva Jisas koataroepa. Oa iava voeare oiso puraroepa, “Eake iraopa gaupata? Ari o kakaeva viapau oiso kopioi. Iria uusipaoi.” <sup>40</sup> Oire uva rera agesipaiva rutu. Oa iava voeae kosi piereva. Uva aitetoarei ora kakaeva aakoaro rera sirova utuaepa, ovusa koataroepa vo uva toupaeva kakae kopii. <sup>41</sup> Oire oira vavaearo-ia pituoro vo reo purareva, “Talita kumi.” Oa porearo oiso purapai, “Tavauruva, ragai vii tavipaa oiso ra toreu.” <sup>42</sup> Oire uva oira-a eira tavauruva vaviopavira raga toreopa voka ovoisa. Oa iava oira-ia tavetave iraoiva rutu. Oira uvuiaro riroaro aue-ia uvuipaoi katai tau erao (12) ivaro. <sup>43</sup> Uva Jisas voeae vosireva va iava vao-ia oa purareva oiso, “Teapi irai uvureve oira iava. Oire ra aioa vai vateta oirapa ra oai aioeve.”

## 6

*Viapau Jisas-pa Oisoa Avivikepaave Vo-ia Nasaret-ia  
(Matyu 13:53-58; Luk 4:16-30)*

<sup>1</sup> Uva Jisas voa kavureva vore rera vo taerearo rutu iare. Oa iava rera sirova utuaepa rera voeae disaipel. <sup>2</sup> ♫ Uva Sabat voki tuguraepa. Uva avaroepa siposiposa vo Reo Taisi Uvupa Kepa-ia. Uva tavetave iraopaiva rera vo siposipoaro uvupaoro. Osa iava oiso puraaepa, “Ovu irao ro vo pitupituro ourevora? Iroutoa vai rera vaterevora vo tarairo? Ora vao ravoto kovo, oa purapare ora rera vavaearo-ia? <sup>3</sup> ♫ Easi viapau oiso kepa paupato rera ro-ia Maria oviitoaaro, raa? Uvare oiratoa raga-a ro-ia. Ari ita, araoko irara voeao Jems vase ora Josis, ora Judas, ora Saimon, ora taataa riakoaro vairo airoa vigei tapo

---

❖ 5:25: Lev 15:25    ❖ 5:30: Lu 5:17    ❖ 5:34: Je 2:16    ❖ 5:39: Jo 11:11    ❖ 6:2: Mt 4:23    ❖ 6:3: Mt 12:46, 11:6

toupaiveira.” Uva rerare kasipuaepa. <sup>4</sup>◊ Uva Jisas voeare oiso puraroepa, “Vosa oearovu voeo ouruirovu raga iava, evoea-a oea profetatoapa avivikepaaveira. Ari viapau oiso voeao rera vo taerearo rutu-ia tou irara rerapa avivikepaaveira, ora sara irara oaro, ora voeao oea vo aao vo kepaaro-ia toupaiveira.” <sup>5</sup>◊ Osa iava viapau uvuipa ra riropa ravotoro vai purapareve voa. Ari uvuipa ra vavaea raga tovopareve voearovio-ia upiapa irara voea porete piepaoro. <sup>6</sup>◊ Uva Jisas tavetave iraopareva voea vo vovouroaro-ia varao oirao pie asa vovouro. Vo osa avaroepa siposiposa uruiara rutu-ia oirarapa.

*Jisas Katai Tau Eraopa Disaipel Kovo Vateroepa  
(Matyu 10:5-15; Luk 9:1-6)*

<sup>7</sup>◊ Uva voea voeao katai tau erao (12) oeare keeraroepa. Oa iava voea arureva toatoa pievira. Uva voeapa gorua karoporeva auere ra va iava tugara kosi piepaive. <sup>8</sup>◊ Uva goruvira voea tavireva oiso, “Teapi oaravu avu vai kaepatavere vokapaoro. Ari ae raga tooroara vai. Viapau ae breteara vai ora oapara vai ora moniara vai.” <sup>9</sup>◊ Ari ae raga tasipara. Ora viapau oiso ra vaiterei kuvupatoarei, ari kataitoa raga. <sup>10</sup>◊ Vosa ourui-ia kareta virora, uvuipatai ra koatata katai kepa vai-ia. Eova uva toupaoro uvuipatai ra oirara-ia kovopata uruia sovara-ia. Oire voava visii rutu ita kosita viro ita ra avata. <sup>11</sup>◊ Vosa ourui visiipa reasipape visii uvu arapa, ra voa kavuta ora visii iava kokotoara iava poupou tovetoveoro, voea vo kaureoroaro reesioro.” <sup>12</sup>◊ Uva avaaepa siposiposa oiso ra oearovu rutu iava sopaura poreive. <sup>13</sup>◊ Uva riro irara rutu iava tugara kosi piepaiva. Uva gorua ovoovopaoro korovo oviro tovopaiva voeao-ia oea upiaarava toupaiva. Oa iava porete ovoipaaepa.

*Jon Baptais Kopiiroepa  
(Matyu 14:1-12; Luk 3:19-20, 9:7-9)*

<sup>14</sup>◊ Uva King Herot uvureva varao iava, uvare uvarovu rutu Jisas vaisiaro virireva. Osa iava eisi oeau oiso puraaepa, “Easi pasi Jon Baptais vai-a eera, ira vorevira tootooroi. Ira uvuipa ra evo kovoro ravoto kovoro purapareve ita.” <sup>15</sup>◊ Vo osa oearovu oiso purapaaepa, “Easi Ilaija-a eera profetato.” Osa oearovu oiso purapaaepa, “Profetatoa rutu-a eera oiso rera osa tuariripato.”

<sup>16</sup>◊ Oa iava Herot oiso puraroepa, “Easi Jon vai-a eera ro ira tokoavora, ira vorevira toreroe.” <sup>17-19</sup>◊ Vao iava osa Herot voea arureva tuaririvi oiso ra rera rauive aue Jon. Ra rera tuukeive vo tuukepa kepa auepa Herodias riakovaaro Filip araokoto iria ita oureva Herot. Uva Herodias aveave iraopaopa rirovira rerare, uvare Jon Herot-re kasipuroepa oiso puraoro rerare, “Vuria purari ora vii araokotoaaro riakooro. Viapau oisi torevokopapeira. Oa iava Herodias oiso ruipapaopa ra Jon kopiiro. Uva viapau uvuipaopa. <sup>20</sup>◊ Vo osa Herot avivikeparoepa Jon-pa, uvare rera-ia taraiparoepa oiso, Vearo vovouto ora vearo sopato. Oa iava yearovira rera tokipareva. Oire vosa uvureva, oa iava ruruvutuepa rugooaro rerare. Oa iava oiso ruipaparoepa ra rera rutu tuu pievira rera uvureve.

<sup>21</sup>◊ Uva pou piropa vo vuutao oa iava vo vokia kavauroepa Herot, ovokia-ia uvuipa oiso ra oira vo ruipaaro kosi pieeve. Uva vo vokia voeapa aioa purareva reipa irara oaro, ora ami iava ofisa irara, ora oira vasi irara vova Galili. <sup>22</sup>◊ Oire uva koataopa Herodias oviivaaro rekurekusa. Osa iava eisi Herot yearovira rutu oira vo rekurekuaro tuereva ora voeao oea rera tapo paupaaepa. Uva reito king oira tavireva tavauruva, “Vosa eakepa ruipapau, ra vii vatea va.” <sup>23</sup>◊ Uva oiso puraroepa oirare reo ovoi puraoro, “Vao oa areri ragai ruvara-ia oa-ia uvuiparai ra viipa va vatea. Eagara vosa eake vatea ragai varaaro iava oara tokipaaveira, oara-ia pute piea vai rutu-ia uvuiparai ra vii vatea oai.”

<sup>24</sup>◊ Oire uva va iava avaopa aakova akesa oiso, “Eake vai arepaa?” Uva aakova oira taviaeva, “Ari Jon Baptais iava kukue.” <sup>25</sup>◊ Oa iava ikauvira rutu voreopa vore reito. Uva oiso puraopa, “Vao-ia oapa ruipaparai. Ra va vateri ragaipa Jon Baptais iava kukueva, ra rera kukuearo tovori aue-ia tauo vai.” <sup>26</sup>◊ Uva rerare sopaua vavataepa rutu, uvare viapau

---

◊ 6:4: Jo 4:44   ◊ 6:7: Lu 10:1   ◊ 6:12: Mt 11:1   ◊ 6:13: Je 5:14   ◊ 6:15: Mt 16:14   ◊ 6:17-19: Lev 18:16, 20:21   ◊ 6:23: Est 5:3, 6, 7:2

oiso uvuiparoepa ora rera vaaro reo ovoi gasireve, vao oa purareva oira uvuru osireiaroia. <sup>27</sup> Oa iava iravu arureva voeao iava viurupa irara rera voeaaro. Uva rera tavireva oiso ra Jon kukuearova urioro. Uva avaroepa rera tokosa tuukepa kepa-ia. <sup>28</sup> Uva vo kokova voreroepa tauo-ia. Oa iava vo kokoa vatereva oirapa tavauruva. Uva vo kokova avaopa aakova vatesa.

<sup>29</sup> Uva disaipel irara voeao Jon voeaaro rera iava uvuoro urioaepa vo kopii ousa. Oa iava rera tovaiva vo tova urui.

*Jisas Riro Irara Rutu Aio Pierewa Vo Vavae Tuku Rutu (5,000)*

(Matyu 14:13-21; Luk 9:10-17; Jon 6:1-13)

<sup>30</sup> Uva aposel irara vorevira kareaepa Jisas iare rera tavitavisa varao iava oara puraiva ora varao oara iava sipoipoiva. <sup>31</sup> ♦ Uva oirara rutu ora voreripaaepa. Oa iava Jisas-pa ora rera voeao aposel viapau vuutaa vai toupaiva oiso ra oai-ia aioive. Eisi osa iava Jisas voea tavireva oiso puraoro, “Oire irata ra vigei raga avavio uvavire kuval tapi vai, ra voa reareata gare visivi.” <sup>32</sup> Oa iava ipaaepa uvuoia-ia. Oa iava rera tapo avaaepa uvavure kuval tapi.

<sup>33</sup> Uva riro irara rutu voea tueiva vo uva avaaepa. Oa iava taraiapoa voea-ia. Uva rovoaepa ikaupaoro vova atoiaro oaiive. Osa iava Jisas-re vaseoro voge rovopoapora voa poua viropa.

<sup>34</sup> Oa iava Jisas vera uviroroepa rogaraua iare, vo osa riro irara rutu kekereva. Oa iava oiso voeapa siraoroepa, uvare oiso rutu paepa voeapa osa sipsip kare, voeao oea viapau tokipatoa vai. Oire uva Jisas rovoroepa voea sipoipopora riroara rutu iava. <sup>35</sup> Uva ravireo rokosa aueparoepa, oa iava disaipel irara urioaepa rera iare rera tavisa oiso, “Voavi-a vo-ia kuval tapi. Uva vokiei vigeire. <sup>36</sup> Voea aruri ra avaave uvaire ora ouruiro iare, ra aioara vai voriive ora voeapa.” <sup>37</sup> ♦ Oa iava voea tavireva oiso, “Voea vateta aioara vai.” Uva rerare oiso puraaepa, “E apeisi-a, ruiipapau ra vaova avaio vao-ia erao vovoto kina (K200) bret vorisa voeapa, eke?” <sup>38</sup> Uva voea akereva, “Aa voviroa aue bret, oara epao visii ruvara-ia?” Oire uva va iava rera taviiva oiso, “Easi vo vavaevi raga aue bret ora kataitoarei ataritoarei.”

<sup>39</sup> Uva voea tavireva oiso ra voea pau pieive isiso kou-ia. <sup>40</sup> Uva pauaepa guruvira roopavira. Oeavu aue-ia uvuipaaepa katai vovoto (100), ari oeavu aue-ia uvuipaaepa vo vavae tau (50). <sup>41</sup> Uva bret vavae oureva ora ataritoarei. Uva viara-ia vurareva vo vuvuiua vuurupa vaisi puraoro. Oa iava vara puteputereva. Uva vara vatereva disaipel, oiso ra voea roo pieive vara rutu-ia. <sup>42</sup> Oa iava voea oirara rutu aiooro vukuaepa. <sup>43</sup> ♦ Oa iava vara ururukoaro guruguruiva. Uva aue-ia uvieipa katai tau erao (12) pekuri. <sup>44</sup> Voea uvuiaro voeao oirara raga ouvurua bret aioiva aue-ia uvuipaaepa vo vavae tuku (5,000) oirara.

*Jisas Toko Rovu Ivara-ia Vokareva*

(Matyu 14:22-23; Jon 6:15-21)

<sup>45</sup> ♦ Uva Jisas voea disaipel aru ovoireva uvuoia-ia, oiso ra iraave eisire Betsaida iare voea iava vaseoro oirara. <sup>46</sup> Oa iava voeava tavariooro varirisa iparoepa pukuia-ia.

<sup>47</sup> Uva vokiepa rerare osa uvuoia-ia touvira vokapaiva toko rovu vuutaro-ia, vo osa Jisas raga touvira vo pukuia-ia toupareva. <sup>48</sup> ♦ Uva voea tuereva Jisas osa ora takau piepaaepa tuaapoapora kiuvu iare. Oa iava voea iare vokipaua rutu vokiroepa vo osa ravireo kae viro asavira toureva. Uva avaroepa vo toko rovu ivara-ia vokapaoro voeava aivarosa. <sup>49</sup> Uva rera siituepaiva osa uuko rovu ivara-ia vokapaoro urioroepa. Uva oiso keapaaepa, Rera urauraaro. Uva rerapa uriripaaepa gaupaoro. <sup>50</sup> ♦ Vao iava uvare rera vurapaoro rirovira rutu uriri iraopaaepa. Oa iava voeare reoroepa oiso puraoro, “Ora tape pieta. Opeita uriri ragapata. Easi, ragai-a vao,” osa puraroepa Jisas voeare. <sup>51</sup> Uva vo osa iparoepa uvuoia-ia, uva kiuvu opesiroepa. Osa-a eisi osa iava rera-ia tavetave iraopava. <sup>52</sup> Ari ita, uvare viapau roroiopaaepa vo kovo-ia oa purareva bret-ia. Osa iava eisi rera eveiivori rera vo goruaro iavirava. Ari voeare vavagisivira raga toupaiva rugooara.

♦ 6:31: Mk 3:20   ♦ 6:37: 2 Kin 4:42-44   ♦ 6:43: Mk 8:14-21   ♦ 6:45: Mk 8:22   ♦ 6:48: Mt 13:35, 24:43

♦ 6:50: Mt 9:2

*Upiapa Irara Porete Pierava Jisas Genesaret-ia*  
*(Matyu 14:34-36)*

<sup>53</sup> ♦ Uva iviroaepa. Oa iava veraa viropa vo Genesaret urui-ia. Oire uvuo a tuuiva vo tokorovu vatuaroo-ia. <sup>54</sup> Uva vera uviroaepa, oa iava rera evei ovoiiva. <sup>55</sup> Uva tariripaaepa voraro rutu upiapa irara kaepaoro rakorako ururo-ia rera iare. Uva ouruirovu iava uriopaaepa Jisas iava uvupaoro vore uva toupareva. <sup>56</sup> ♦ Oire oa iava Jisas uvarovure oisoa avaparo garepa uruirovu iare ora riropa uruero. Uva oisoa upiapa irara tovopaaive vo uupa tapiro. Uva rera arepaiva oiso ra varoa vatuaroo-ia pitupaive ra porete ovoipaave. Oa iava va-ia pitupaiva, uva porete ovoipaave voea rutu.

## 7

*Pauto Vaaro Reo Taisi Oisoa Voea Aao Iraraaro Vo Taviaro-ia Putepaive*  
*(Matyu 15:1-9)*

<sup>1</sup> Uva Farisi rera ruvara-ia ora guruaepa ora Reo Taisi-ia tarai irara, oea vova urioaepa Jerusalem-ia. <sup>2</sup> ♦ Oa iava eva disaipel irara tueiva rera voeaaro osa aiopaiva vavae sisu asavira raga, vo pitupituo Farisi vaaro gasipaoro. <sup>3</sup> Uva Farisi-pa irara ora Jiu-pa irara vo pitupituaroo-a vao-ia vosa viapau vavaeara sisu rovoive, ra viapau uvuipaaai ra aioive. Aue iava aao irara vo sipoipoaro oisoa sirova utupaave. <sup>4</sup> Ora vosa aivaropa tapirova kareave, ra viapau vavae sisuave, ra ita viapau aioive ita. Uvare vo pitupituro rutu-a varao voea aao iraraaro vararo oisi, vao kap sisupa, ari vao pitoka sisupa, ora tauoara varao oara oisoa purapaaive bras-ia. <sup>5</sup> Uva Farisi ora Reo Taisi-ia tarai irara rera akeiva oiso, “Uva apeisi iava vii voeaaro disaipel viapau vigei aao iraraaro vo pitupituroaro sirova utupaa? Uva viapau vavae sisuai, oa iava aioivoi.” <sup>6</sup> ♦ Uva Jisas voeare oiso puraroepa, “Oiraoei ravaa reo vao profetato Aisaia oa-ia torevokovira rutu visii reesioro va rigatoreva riro ratarataa vovou irara visii.

‘Voea rutu raga vaisiaro kae pie ragapai gisipoara raga iava, osa voea sopaaro tauaipai rutu ragaipa.’ <sup>7</sup> Oirara raga vo sipoipoaro iava sipoipoaiveira, ra oiso purapaaive, Va vao-ia Pauto vo reoaro. Eisi osa iava ragaipa akukuvira rutu lotu ragapaaveira.’

Eisi osa puraroepa Aisaia. <sup>8</sup> Oa ita kavutava Pauto vaaro Reo Taisi oirato raga vo sipoipoaro sirova utupasa.”

<sup>9</sup> Uva voea tavireva, “Pauto vaaro Reo Taisi gasi iraopatavoi, oisore ra ora visii vo pitupituaroo raga tokipata. <sup>10</sup> ♦ Uvuta! Moses oiso puraroepa,

‘Aako oarapa ora avivikepau ora aiteara. Ari ro ira aitetoarei takau pareve, eera-a ira kopii pieivere oearovu.’

<sup>11-12</sup> Vo osa visii oiso purapataveira, Aako ora aite viapau uvuiparai ra vei vatea varao, uvare Pautoa-pa vara rutu vate rovoavora. <sup>13</sup> Vosa oisi piepata eisi, oire eva-a oa-ia Pauto vaaro Reo Taisi akaipa piepataveira visii vo pitupituroaro rigapaoro oearovu iare. Uva riroara rutu-a oara purapataveira.”

*Varao Iava Toupai Oara Sopaura Vuri Piepaiveira*  
*(Matyu 15:10-20)*

<sup>14</sup> Uva Jisas voeare keeraroepa ita. Oa iava voeare oiso puraroepa, “Visii rutu uvuta! Ra roroiota vao-ia. <sup>15</sup> Viapau oiso vao oa aiopare oirato oa rera sopaaro vuri piepaivoi, ari vao-a oa rera sopaaro iava kosipa piroi. Evara-a oara oirato vuri piepaivoi. <sup>16</sup> [Vosa irai-ia kokitoa vai karuvira toupareve, veeropai ra va uvureve, uvare uvupatoa ita kokito.]”

<sup>17</sup> ♦ Uva koataroepa kepa-ia oirara rutu arova ratau. Oa iava voa disaipel rera voeaaro rera akeiva vao iava ruu reo. <sup>18</sup> Oa iava voeare oiso puraroepa. “E viapau taraia vaiei visii-ia oiso osa evoea oearovu? Uva viapau vara eveipatavoi varao oirato sopaaro-ia ora kiupai. Uva viapau rera vuri piepaivoi. <sup>19</sup> ♦ Ari ita, aue iava uvare viapau ora kiupai sopaau-ia, ari vo raga sare-ia. Ra vorevira vusive.” Uva vo reo-a vao oa-ia aioara ruture oiso puraroepa,

❖ 6:53: Jo 6:24-25 ❖ 6:56: Mt 9:20 ❖ 7:2: Lu 11:38 ❖ 7:6: Ais 29:13 ❖ 7:10: Eks 20:12; Diu 5:16; Lev 20:9 ❖ 7:17: Mk 9:28 ❖ 7:19: Ro 14:1-12; Kl 2:16

“Vearoara varao aioara rutu aiopasa.” <sup>20</sup> Uva va-a vao oa iava oiso puraroepa, “Ari vaoa-ia vuri vovou oa oiratoa iava kosipapi oa rera vuri piepai. <sup>21</sup> Ari ita, vo vuri rugooro-a varao oara kosipapi oirato sopapro iava vuri rugorugooro oiso-ia, otopa pitupituro, kaviru, oira upo, riako riirii, <sup>22</sup> ☩ Oearovu vaaro riirii, vuri vovou, keakea reoro, getegete, roruoru, reo toga, egaega, ora kokoropa vovou. <sup>23</sup> Evara rutu oara kosipa piroveira visii sopapro iava oara oirara vuri piepaivoi.”

*O-ia Finisia-pava Iria Jisas Oirao Pieva Rutu  
(Matyu 15:21-28)*

<sup>24</sup> ☩ Uva evoava ita toparo viropa Jisas aue iare avaoro Taia-ia. Uva voa okepavu-ia voea asavira koataroepa. Ari ita, viapau oiso uvuiparoepa ra tou ragareve rera raga. <sup>25</sup> Oa iava vo voki raga-ia eva iriavu rera iava uvuoro rera iare urioopa, iria oisoa oviivaaro-ia tugara toupaise. Oa iava rera kokotoaro-ia Jisas rekueva. <sup>26</sup> Oire uva osaravu raga iava oira, vo sarao vo-ia Finisia oea oisoa Siria taere-ia toupaise. Iria Jisas areeva oisore ra tugara kosi piereve oviiva iava. <sup>27</sup> Uva oiso oira tavireva, “Kakae vure aio pie rovopai. Viapau oiso vearpai ra kakae vure vo kuroroaro aio kuroro oupe vara vikisa kaakau karepa.”

<sup>28</sup> “Oiraopavira ita Turaro,” osa puraopa riakova, “Uvare kaakau kare uvuipaaei ururukoara raga aiopasa varao oara kovepapeira vova tebol iava kakae vure vaaro.”

<sup>29</sup> Oa iava Jisas oiso oirare puraroepa, “Kareu ari tugarato kosirovi oviiva oara iava, uvare vearo reo purari.” <sup>30</sup> Uva pouo viropa oira vo kepaaro-ia. Oa iava oviiva kekeeva urua ivara-ia uusivira, vo uvare tugarato oira iava kosiro viropa.

*Jisas Uvagito Vaaruuto Vearo Pierava  
(Matyu 15:29-31)*

<sup>31</sup> Oire va-a eva oa iava vorevira virireva Taia taere iava vore Saidon-ia putasa aue iare Galili Rovu. Ora aue-ia tapo putereva Katai Tau Uruiro-ia, Dekapolis. <sup>32</sup> ☩ Uva iravuva urioaepa uvagito vaaruuto. Oa iava Jisas areiva oiso ra rera-ia vavaea tovoreve. <sup>33</sup> ☩ Oa iava voea arova rerava avaroepa kuval tapire. Uva voa sipareo tovoreva rera kokiaro-ia ora ruiroepa. Oa iava aia ita arevuota-ia pitureva. <sup>34</sup> Uva vuvuiua-ia vurareva. Uva vovou iparoepa rerare oiso puraoro, “Efata.” Oiso ragavira oa porearo toupai, “Auero rutu karu piroi.” <sup>35</sup> ☩ Uva karu ovoiro viropa kokito rerare, osa arevuoto tapo vase ovoireva. Osa-a eisi osa iava torevokovira reo ovoiroepa. <sup>36</sup> ☩ Uva Jisas riro goruvira rutu voea vosi ragareva va iava vao oiso ra viapau iraipa taviave. Ari ita, riro goruvira rutu voea vosi ragapareva vo osa ora gorupaaepa rutu va iava vao siposipapaoro. <sup>37</sup> Uva tavetaveiva rutu oiso purapaoro, “Avoeao, vearoa rutu purarevo ro-ia voeao uvagi irara oea uvu piepaoro, ora vaaruu irara reoreo pierovo,” eisa osa purapaaepa.

## 8

*Jisas Vo Resura Tuku Rutu (4,000) Aio Pierava  
(Matyu 15:32-39)*

<sup>1</sup> Uva vo vokia-a vao oa-ia riro uvuru toupai. Viapau aioa vai voeapa. Uva voeare keeraroepa rera voeaaro disaipel voea tavisa oiso, <sup>2</sup> ☩ “Siraoparai voeaopa uvare vo pevaiia voki touivo vigei tapo. Uva viapau aiopaivo.” <sup>3</sup> Vosa voeare koruvio, ra voreave vorarore ora voea vo uruiroaro. Ra raveraveave vo raivaaro, uvare oearovu riro kaekae tapirova uriopaaerao.” <sup>4</sup> Oa iava disaipel rera akeiva oiso, “Uva ovu vai voea aio piepai. Ari raaka tapi raga-a vo.” <sup>5</sup> ☩ Eisi osa iava oiso voea akereva, “Ovirovua bret oa epao visii ruvara-ia?” Oa iava oiso puraaepa, “Ari erao vataro.”

<sup>6</sup> Uva voeae pau pierava vo rasito. Oa iava aue oureva erao vataro (7) bret. Uva vara-ia vearo vaisi purareva vara puteputeoro. Osa iava vara vatereva rera voearoepa disaipel, oiso ra voea vatevateive taru. <sup>7</sup> ☩ Uva toupai atari kare gare karevi raga. Uva vo kare-ia

---

⊗ 7:22: Mt 6:23    ☩ 7:24: Mt 11:21    ☩ 7:32: Mk 5:23    ☩ 7:33: Mk 8:23    ☩ 7:35: Ais 35:5-6    ☩ 7:36: Mk 1:44, 5:43    ☩ 8:2: Mt 9:36    ☩ 8:5: Mk 6:38    ☩ 8:7: Mt 14:19

ita aia vearo vaisi purareva. Oa iava voea tavireva oiso, “*Voea vateta atari kare.*” <sup>8</sup> Uva voea aioivoiva, vukuaepa. Oa iava ururukoara guruiva erao vatara pekuri agasi pieoro vara-ia. <sup>9</sup> Uva voea rutu uvuiaro-a voea oiso toupaiva, vo resura tuku (4,000). <sup>10</sup> Oa iava voeare koruroepa. Uva rera tapo voeava tavari ovoioro uvuoia ipa ovoiroepa ora disaipel irara tapo vore avasa vo Dalmanuta taere.

*Vo Oearovu Jisas Arepaiva Oiso Ra Ravotoara Vai Kekeive*  
(Matyu 16:1-4; Luk 12:54-56)

<sup>11</sup> ♦ Uva Farisi-pa irara urioaepa rera akesa oiso, “*Ruipapaiei ra ravota vao purari vo goruo kareke pieoro vuvuiua iava.*” Oisi-a eisi osa kokarapaaepa. <sup>12</sup> Oa iava Jisas-re sopaua vavataepa. Osa iava oiso puraroepa, “*Eake vaire voeo vo vuutao iavapa irara ravoto arepaai? Oiraopavira rutu oiso visii tavipaavoi, Viapau rutu uvuiparai ra ora ragai vo ravotoaro vituaro kareke piepaa visiipa.*” <sup>13</sup> Oa iava voea arova voa kae viroroepa uvuoia iare. Uva avaroepa ivirosa ovaratavu iare.

*Jisas Oovoovoa Purareva Yis-ia Vao Farisi-pa Irara Ora Herot*  
(Matyu 16:5-12)

<sup>14</sup> Uva disaipel ovauaepa auere bret ora voeapa osa kataiavi raga toupaiva vo uvuoia. <sup>15</sup> ♦ Osa-a eisi osa iava Jisas voeare oiso puraroepa ovoovovira, “*Vaopa yis vatatopopatai Farisi-pa irara vaaro ora ro Herot.*” <sup>16</sup> Uva oiso puraaepa ora voea raga, “Aue iava ita oiso vigei tavirevoi, uvare viapau bretea vaiei.” <sup>17</sup> ♦ Uva Jisas vo reo sovoreva, oa iava oiso puraroepa, “*Apeisi iava eisi ora reopatai oiso, Viapau vigei bretea vaiei? E viapau sovopata ora viapau taraiptai? E sopaura oavisii vavagisipai?*” <sup>18-19</sup> ♦ Ari ita, osireiara oavisii epao, uva viapau vara iava vurapataveira. Ora kokiara oavisii, uva viapau vara iava uvupataveira. E viapau vaore rugoopatai oa-ia vo vavae tukupa (5,000) vo vavaea bret puteputeavora. Uva ovirovua pekuri oara agasi pietavora?” Oa iava rerare oiso puraaepa, “*Katai tau erao (12) aue pekuri.*” <sup>20</sup> Eisi osa iava voeare oiso puraroepa, “*Ari ita, ovokivu-ia resura tuku (4,000) vao aioivora erao vatara bret. Uva ovirovua aue pekuri oa agasi pietavora aue-ia bret ururukoro?*” Oa iava oiso puraaepa, “*Erao vatara.*” <sup>21</sup> ♦ Osa iava eisi voea akereva oiso, “*E touvira vo kovo vituaro iava taraitavere vao-ia, raa?*”

*Jisas Voosito Vura Pierava Betsaida-ia*

<sup>22</sup> ♦ Uva Betsaida urui-ia poua viropa. Oa iava iravu sipoiva rera iare voosito. Uva Jisas arepaiva oiso ra rera-ia pitureve. <sup>23</sup> ♦ Oa iava Jisas rera vavaearo-ia pituoro rerava kosiro viropa uruia iava. Uva Jisas rera osireiaro-ia ruiroiva, rera-ia vavaearei tovoreva. Oa iava oiso rera akereva, “*E oavu avu vai vurapari?*” <sup>24</sup> Uva voosito vurareva viara-ia oiso puraoro, “*Ari ita, oirara siituepaavoi oea vokapaivoi.*” Uva voeapa oisi pai evaoara oara vokapaivoi.” <sup>25</sup> Uva Jisas vorerivira ora rera iava vavaearei rera-ia ita tovoreva. Oa iava rera ro voosito tuupavira vurareva. Uva porete ovoiroepa roroiovira vuravura ovoioro. <sup>26</sup> ♦ Osa iava eisi Jisas rera aruoro oiso puraroepa, “*Kareu vii vo kepaaro iare. Ra opeita vo uruio iare vorevira voreu.*”

*Pita Jisas Vaisireva Oiso, Krais*  
(Matyu 16:13-20; Luk 9:18-21)

<sup>27</sup> ♦ Uva Jisas avaroepa rera voearo tapo disaipel vo urio iare vo Sisaria voa raga Filipai. Uva voare avapaoro voea akereva oiso, “*Apeisi oirara ragai vaisipaiseira?*” <sup>28</sup> Uva oiso rera taviiva, “*Ari oearovu oiso purapaaveira, Jon Baptais eera, osa oearovu oiso purapaave, Ilaija eera ro profetato.*” Ari oearovu oiso purapaaveira, Vii iravu voea iava profet irara.” <sup>29</sup> ♦ Oa iava voea akereva, “*Ari apeisi visii raga ragai vaisipata?*” Oa iava Pita oiso puraroepa, “*Ari vii-a Krais ro Ropoto viigoa arureva Pauto vore.*” <sup>30</sup> Uva voea vosireva oiso, “*Opeita eisi ragai iava oearoipa tavipatavere.*”

♦ 8:11: Mt 12:38-39; Jo 6:30 ♦ 8:15: Lu 12:1 ♦ 8:17: Ais 6:9-10 ♦ 8:18-19: Jo 6:13 ♦ 8:21: Mk 6:52

♦ 8:22: Mt 11:21 ♦ 8:23: Mk 7:33 ♦ 8:26: Mt 8:4 ♦ 8:27: Jo 6:66-69 ♦ 8:29: Jo 6:69, 11:27

*Ravaavira Voeapa Tavitaviroepa Ora Rera Iava Kopiia Jisas  
(Matyu 16:21-28; Luk 9:22-27)*

<sup>31</sup> Va vao isivaaro iava voea siposipooro rovoroepa ora rera iava oiso, “Oirato Oviitoaaro riroara siitokaara ourevere. Irare isivaavere taru oira vasi irara, ora pris irara voeao reipa irara, ora Reo Taisi-ia tarai irara, ora rera upovire. Ra vo peva pie voki-ia torero vorevira.” <sup>32</sup> ♦ Uva poeravira eisi voea tavirevoiva, Pita rera-ia pituoro Jisas oureva rera tape piesa oiso puraoro, “Opeita oiso purapau.” <sup>33</sup> Uva voeao disaipel vurasa ora poreroepa. Osa iava Pita vo rugooaro torevokopasa oiso puraroepa, “Seten, ragai isivaaro-ia ora tovou. Viapau rutu rugoopauei Pauto varaarore. Ari varao ragare rugoopau oirato varaaro,” osa puraroepa Jisas.

<sup>34</sup> ♦ Oa iava oirara ruture keeraroepa ora disaipel irara ora rera iare. Uva voeare oiso puraroepa, “Vosa ro ira vovouparo ra ragai sirova uturo, oire ra ora rera iava vaisia vara pie rovoreve. Oa iava uvuipa ra ora rerapa vavata siitoka kaereve, oiso osa vao evao parikou ragai sirova utupaoro vokiara rutu-ia.” <sup>35</sup> Ari ro ira tootooa virivaripareve, oava eva opesiroverea tootooaro. Ari ro ira tootooaro vatereve vo oearovupa ragai vo ruipaaro sirova utupaoro ora vao iava Vearo Siposipo eera-a ira tootooaro tapo virivariavere taru. <sup>36</sup> Aa vao-a vearoa oa ourevereia oirato vo rasio-ia, vo rara auero rutu varao vo rasio iava oureve, ovusa tootooaa oaro rutu viki ragapareve? <sup>37</sup> Uva eake vai ourevereia vorevira tootooaro-ia tavariovira? <sup>38</sup> ♦ Ro ira ragaipa ariiro ora ragai siposipoaropa tapo vo oearovu osireiaroia voeao iava riro otopa irara ora voea vuri vovou irara, irapa ita eera utupaua Oirato Oviitoaaro ariiroverea vo vokio-ia oa-ia voreraverea vo Aiteto vaarova keraria, ora voeao tapo tugoropa irara ensel irara.”

## 9

<sup>1</sup> ♦ Uva Jisas voea tavireva oiso, “Oiraopavira visii taviipaavoi, Oearovuei visii iava oea toupai vo-ia oea kopii asavira toupaoro Pauto vo Saraaro keke rovopaivere, vo osa goruvira karekepe.”

*Jisas Iava Varaua Sisikorevira Karekeepa  
(Matyu 17:1-13; Luk 9:28-36)*

<sup>2</sup> ♦ Uva katai vatara vokiro putevoiva, Jisas Pita vase tapo iparoepa ora Jems ora Jon pukuia iare riro pukui vo uva varaua rera iava ora tavarioepa. <sup>3</sup> Varoara tapo oara sisikoreva. Uva viapau oiso irai vo rasio iava ra oisi eisi sisikoreve osa evara varoara. <sup>4</sup> Uva Ilaija vaio ora Moses ora karekesiepa. Uva vaiterei siituepaiva ovusa Jisas tapo ora reopasiepa. <sup>5</sup> Oa iava Pita Jisas-re oiso puraroepa, “Tisa, vo toupai vearovira. Uva igei uvuipaiei ra kepa peva vai pauio oiso, viipa okepai, ari Moses okepai, ari Ilaija okepai aue guruva keparo vai.” <sup>6</sup> Oisi-a eisi osa pura ragaroepa Pita uvare rirovira rutu uririparoepa. Oa-a eva oa iava viapau vearovira rutu reoroepa. <sup>7</sup> ♦ Uva rukuta voea ruueva, osa oavu reo guruko karekeepa rukuta sovara-ia, oa-ia oiso puraroepa Pauto, “Eera rutu ragai Oviitoaaro ira kaviko iraopaaeira rutu. Ira uvu iraopata.” <sup>8</sup> Osa iava ora vura ragapaaepa. Uva viapau oiso iravu avu vai kekepaiva, ari Jisas raga.

<sup>9</sup> Uva vo osa varapaaepa pukui iava, uva Jisas voea vosipareva oiso ra viapau oearoi taviipaivere vao iava oa kekeivoi. Ari vo raga osa Oirato Oviitoaaro tore rovorovere kopii tapi iava. Uva oisi-a eisi osa ora rera raga iava voea tavireva. <sup>10</sup> Uva vo tavi uvu ovoiiva, oiso ragavira ora akepaaepa, Eake rutu-a torea vituaro porearo? <sup>11</sup> ♦ Oa iava rera akeiva oiso puraoro, “Uva ari eakere Reo Taisi-ia tarai irara oiso purapaaveira, Ilaija ira urio rovorovere?” <sup>12</sup> ♦ Osa-a eisi osa iava voea tavireva oiso, “Oiraopavira ita oiso osa ragaipa irarovere Ilaija, ira auero rutu torevokoreve. Ari apeisi vo rigato oa oiso purapapeira, Ro-ia Oirato Oviitoaaro ira taru siitoka ourevereia, ora rera akaipa piepaivereia?” <sup>13</sup> Ari ita, visii taviipaavoi oiso, Ilaija ira urioroera voviri. Uva oirara oisoa ora voea raga vo ruiparoaro sirova oisoa utupaae. Eisi osa vara sirova utuaiva, opitupiturovu rutu puraiva rera-ia oiso osa Tugoropa Vuku purapai.”

---

❖ 8:32: Jo 18:20 ❖ 8:34: Mt 10:38; Lu 14:27 ❖ 8:38: Mk 13:26 ❖ 9:1: Mt 24:30; Lu 22:18 ❖ 9:2: Mk 5:37 ❖ 9:7: Mk 1:11; 2 Pi 1:17-18 ❖ 9:11: Mt 11:14 ❖ 9:12: Sam 22:6; Fl 2:7

*Jisas Viovokotoa Iava Tugarato Kosi Pierava  
(Matyu 17:14-21; Luk 9:37-43)*

<sup>14</sup> Oire uva vo peva evoea disaipel iare poua viropa. Uva voa riro irara rutu oirara kekeiva osa voa ora gurupaaepa voeo tapo Reo Taisi-ia tarai irara, oea disaipel irara tapo ora reopaaepa ora kaureopaoro. <sup>15</sup> ♦ Oa iava voea rutu Jisas kekeiva rera-ia tavetavepaoro. Uva ikuiva rerava ora reosa. <sup>16</sup> Uva voea disaipel akereva Jisas, “Eake-ia evoea tapo ora reopaoro voeava ora kaureopatai?”

<sup>17</sup> Uva iravu voea iava Jisas iare urioroepa. Oa iava rerare osa puraroepa, “Tisa, ragai oviiotaaro vaaruuto ira vaaruu piepareveira vurito tugarato. Irava uriorai vii iare. <sup>18</sup> Ovuutarovu rutu-ia vurito tugarato rera-ia goruvira rutu pitupaoro rera-ia vikipareveira rasiuaarore. Oa iava ruiruisoara karekepapeira rera gisipoaro-ia, ora tapo vo osa ora rera iava reuriara aiopareveira. Vo osa ora rera iava varaua rutu tuukaupe. Uva eva-a oare vii voeaaro ake ragaavora disaipel. Uva viapau oiso uvuipaaerao ra rera kosi pieive tugarato.”

<sup>19</sup> Uva Jisas vo reo uvurevoiva, voeare oiso puraroepa, “Avoeo! Visii vao-ia visiigoa viapau oirao pie vovou vai toupai. Ovirovuro-ia vuuta uvuiparai ra visii tapo toupaa. Ora ovirovuro-ia vuuta uvuiparai ra visii ateate piepaoro ragai eisi piepata? Viovokotoava uriota eera ragai iare.” <sup>20</sup> ♦ Uva rera iare rerava avaaepa. Uva Jisas vurareva tugarato, oa iava kakaeto tuutuusi pierava. Oa iava koveroepa rasiuaaro vereverekooro ruiruisopa akutaoro.

<sup>21</sup> Uva Jisas aiteto akereva oiso, “Ovirovua voki oa-ia oiso tourevora?” <sup>22</sup> Oa iava Jisas tavireva aiteto oiso, “Ari ita, riroara rutu vokiara oara-ia oisi raga rovoroepa, osa rera tovopareveira tugarato eto kasiro-ia ora vo uuko oviro-ia, oiso ra rera kopii piereve. E uvuipauei oavu avu vai purasa ra vegeivipa siraou vegei tauvasa?” <sup>23</sup> ♦ Eisi osa iava oiso Jisas rera akereva, “Eakere eisi purauei oiso, E uvuipau? Ari ita, ro ira oirao piepareve rutu, irapa uvuipa ra oaravu rutu oiraopape rerapa.” <sup>24</sup> Uva aiteto rirovira gauoro oiso puraroepa, “Ragai oirao pie iraopaaeveira. Uva oiso ruipaparai ra ragai vo oirao piearo vao-ia riro pieri.” <sup>25</sup> Uva Jisas uvurua kekereva osa ora guru ovoiaepla. Oa iava tugaratoare oiso puraroepa, “Vii tugarato vaaruuto uvagito, viire goruvira reoparai ra kosi viro rera varaua iava. Ra opeita vorevira ita voreu rera iava varaua iare.” <sup>26</sup> Oa iava oiveroepa tugarato kakaeto rirovira tuutuusi pieoro. Oire uva rera iava ovoivira kosi ovoiro viropa. Uva oiso paepa kopiito kakaeto. Oa iava oearovu oiso purapaaepa, “Kakaeto kopii ovoiroi.” <sup>27</sup> Eisi osa iava Jisas rera vavaearo-ia pitureva rera tore piesa. Oa iava tore ovoiroepa rera ita.

<sup>28</sup> Uva Jisas koataparoepa osa oiso rera akepaiva disaipel, “Eake rutu vituaro iava viapau uvuipaierao tugara verapasa?” <sup>29</sup> Uva voea tavireva, “Viapau oiso oavu avu vai-a oa uvuipai. Ari variria raga-ia.”

*Jisas Vorevira Voea Tavireva Ita Ora Rera Vaaro Iava Kopiia  
(Matyu 17:22-23; Luk 9:43-45)*

<sup>30</sup> Oire uva evo urui kavuiva, oa iava Galili-ia puteoro avaaepa. Uva oiso rugooparoepa, Teapi vo voka-ia taraiave oearoi, <sup>31</sup> ♦ uvare rera voearo raga disaipel ora rera iava siposiposa ruipaparoepa. Uva voeare oiso puraroepa, “Iravu Oirato Oviitoaaro kosi piererevere oirara vavaearo iare, oiso ra rera upoive. Vosa kopiirovere, ra torerovere ita vorevira vo pevapa voki-ia.” <sup>32</sup> ♦ Uva viapau roroipaaepa vo siposipo-ia. Oa iava rerapa uriripaaepa rera ake arapa va iava.

*Irouto-a Rutu Rovopato Oirara Rutu Iava?  
(Matyu 18:1-5; Luk 9:46-48)*

<sup>33</sup> Uva Kapaneam-ia poua viropa. Oa iava koata ovoiroepa kepa-ia. Uva voa disaipel akepareva, “Eake-ia ora reopatae eisi raivaaro?” <sup>34</sup> ♦ Uva viapau reopaaepa, uvare ora reopaoro vokapaiva vo raivaaro vao-ia oiso, Irou vai oiso rovope voeapa. <sup>35</sup> ♦ Uva Jisas

◊ 9:15: Mk 14:33 ◊ 9:20: Mk 1:26 ◊ 9:23: Mk 11:23; Lu 17:6; Jo 11:40 ◊ 9:31: Mt 16:21; Mk 8:31 ◊ 9:32: Jo 12:16 ◊ 9:34: Lu 22:24 ◊ 9:35: Mt 20:26-27

pauroepa katai tau eraore (12) keeraoro disaipel. Oa iava oiso voea tavireva, “*Vosa irai ira vovouparo ra ita ira pievira rutu ora tovoro, eera-a ira oirara rutupa kovorevere oiso osa ovoiokuto akaipato.*” <sup>36</sup> Oa iava iravu oureva kakaeto rera tore piesa voea vuutaaro-ia. Uva rera kaverukooro rera-ia pitureva oiso puraoro voeare, <sup>37</sup> ♦ “*Oire vosa irai tauvareve kakaetao vai vo ragai vaisiaro-ia, ira ita-a eera ira ragai tauvapare. Uva viapau oiso ragai raga, ari ro tapo ira ragai siporeva.*”

*Ro Ira Viapau Vigeiva Keriparo Ira Vigeiva Tavosivira Toupare  
(Luk 9:49-50)*

<sup>38</sup> ♦ Uva Jon rera tavireva oiso puraoro, “Tisa, iravu kekeiovora ira vuri tugararo kosi pieparevorao vii vaisiaro-ia. Uva rerare koruierao uvare viapau oiso vigei iava rera-a.”

<sup>39</sup> Oa iava Jisas voeare oiso puraoro, “*Opeita rerare korupata. Vosa irai vao ravoto kovo purapareve vo ragai vaisiaro sovara-ia, oire ra viapau rutu oiso ra ragai takaupareve.*” <sup>40</sup> Ari ro ira viapau vigeiva keriparo, ira-a eera vigeiva tavosivira toupare. <sup>41</sup> ♦ Oiraopavira visii tavipaavoi. Vosa irouto voeao iava ragai voeao iravivu vatereve uukoa vai rera ukaio piepaoro, ae iava uvare ragai vaisiaro-ia Krais kovopareveira ira vo vorio ou iraoreverea taru Pauto ruvara-ia.

*Vo Kokara Toupai Auere Vuri Vovou Purapasa  
(Matyu 18:6-9; Luk 17:1-2)*

<sup>42</sup> “*Vosa iroutoa vai vo kakaeo kove piereve ragai-ia kavusa okakaea ragai oirao piepaiveira, uva ita vearpai vosa oiso vo vovou purasa aueparo, oire voea rutu rera-ia rirova vai aveke vai kotoive iriai tuuoro rera okearo-ia rera roko piesa riku rovu-ia.*” <sup>43</sup> ♦ Ari vosa vii iava vavaea raga vii kove pieve vore viria, oire vo vavae tokori. Oa iava vearpai ra vava avau vao katai vavaea vore uva tootooa viapau opesipape. Oa iava viapau oiso avauverea vore opesipa tapi eto kasi-ia vo vavaerei rutuva. <sup>44</sup> [Vo uva aviko kare viapau opesipaave varaura aiopaoro, ora viapau rokopaive eto kasi voava.] <sup>45</sup> Ari vosa vii iava kokoto vii kove pieve viria purasa, ra va poturi. Oa iava vearpai ra katai kokotova avau vore uva tootooa viapau opesipape. Oa iava viapau vii vikiiverea vore opesipa tapi vo eto kasi-ia. <sup>46</sup> [Vo uva aviko kare viapau opesipaave varaura aiopaoro, ora viapau rokopaive eto kasi voava.] <sup>47</sup> Ari vosa iravu vii iava osireito vii kove piereve viria purasa, oire vearpai ra rera tateri. Oa iava vearpai ra kataitoava koatau vo Pauto vo Saraaro sovara-ia. Oa iava viapau vii vikiiverea vore opesipa tapi eto kasi-ia. <sup>48</sup> ♦ Vo uva aviko kare viapau opesipaave varaura aiopaoro, ora viapau rokopaive eto kasi voava.

<sup>49</sup> ♦ “*Oire uva oirara rutu ruuvarea eto kasi oiso osa aioara ruupaiseira avakara vara vearo piepaoro.*” <sup>50</sup> ♦ Vearoa rutu avaka aioara vearo piepa. Ari vosa opesipe sipeia va iava, ra apeisi ragavira vorevira va sipei pieta ita. Oire oisi ita toupata visii vao-ia oiso osa avaka sipei vuutaaro. Osa ragavira ora vovou oavisii tokita kavevira visii rutu vearoa puraoro oiso osa avaka (sol).”

## 10

*Jisas Siposiporeva Aue Iava Ora Oupa Pitupitu  
(Matyu 19:1-12; Luk 16:18)*

<sup>1</sup> Jisas vo uruio kavuoro avaroepa Judia taere iare. Oa iava uukova Jodan-ia ivioreva. Uva riro irara vorevira voreaeapa rera iare, oa iava voea rutu siposiporeva, uvare rera vo pitupituaro-a oirara rutu siposiposa.

<sup>2</sup> Uva Farisi-pa irara urioaeapa rera-ia kokarasa oiso puraoro, “E vearpai oiso-ia vao-ia Reo Taisi, vosa iravu vatuava vaiaro kavu ovoireve?” <sup>3</sup> Oire uva voea vo reoaro pukooro oiso puraoro, “*Ari aa vo reo goru reo vatereva Moses visiipa?*” <sup>4</sup> ♦ Oa iava rera aatoiva oiso puraoro, “Moses oiso puraoro, Uvuipai vosa riakova kavuoro oavu rigatoreve reo ovoi, ra va-ia oira sigureve.” <sup>5</sup> Oa iava Jisas oiso voea tavireva, “*Ari ita, riro kaureo vovou irara*

◊ 9:37: Jo 12:44, 13:20   ◊ 9:38: Nam 11:27-29   ◊ 9:41: Mt 10:42   ◊ 9:43: Mt 5:29-30, 25:41   ◊ 9:48: Ais 66:24   ◊ 9:49: Lev 2:13   ◊ 9:50: Ro 12:18   ◊ 10:4: Diu 24:1-4

visii, oa iava vo taisi vao reo taisi rigatoreva. <sup>6</sup> ♦ Ari ita, vo rasito rovo oaro-ia, uva Pauto oirato purareva ora riakova.

<sup>7</sup> ♦ ‘Oire vearovai vosa viovokoto aitetoarei kavureve riako ouoro.

<sup>8</sup> Ra kataivira rutu toupaoro vo tou-ia kataiua varaua purasi.’

Osa-a eisi osa iava viapau oiso toupasi vaiterei, ari oiso piesivoi kataiua-ia varaua toupasivoi.

<sup>9</sup> Vosa vaitereo aiterea pitu pierewe Pauto vaiterei aivaro pieoro, uva viapau irai uvuipa ra vaiterei vorevira sikareve.”

<sup>10</sup> Uva vorevira koataaeapa kepa sovara-ia ita. Oire uva voa disaipel rera akeiva vo reo iava. <sup>11</sup> ♦ Uva voea tavireva oiso, “Ro ira riakova oaro kavu ovoireve iriavu raga ousa, uva va-a eva oa-ia otopa pitu purare iriavuva ita. <sup>12</sup> Ora vosa iriavu riakova oirato kavu ovoieve iravu ousa, eva-a oa-ia rerava otopa pitupitu purapaevoi.”

### *Jisas Kakae Vure Viraakoreva*

(Matyu 19:13-15; Luk 18:15-17)

<sup>13</sup> Uva vao isivaaro iava kakae vureva urioaepa oiso ra voea-ia pitureve. Uva disaipel irara voeare korupaaepa. <sup>14</sup> Oa iava Jisas voea kekeoro kasipuroepa. Uva oiso puraroepa, “Voea eakata oea kakae vure sipopai ragai iare. Opeita voeare korupata. Pauto vo Saraaro-a vao oa toupaivoi voeapa oiso osa voeao kakae vure. <sup>15</sup> ♦ Oiraopavira rutu visii tavipaavoi, vosa irouto viapau oiso vo ruipaaro toupaive osa ro kakaeto ira vaopa ruipaparoveira Pauto vo Saraaro, oire uva rerā-a eera ira viapau uvuipa oiso ra Pauto vo Saraaro sovara-ia toupareve.” <sup>16</sup> ♦ Oa iava kakae vure oureva voea kaverukooro. Uva voea viraakosa voea rutu-ia vavaeareiaro tovoreva.

### *Viovokotoa Iava Ro Riro Kotokoto Guruto*

(Matyu 19:16-30; Luk 18:18-30)

<sup>17</sup> ♦ Vo osa Jisas voka rovopareva vo raivaaro uva iravu rera iare ikaureva. Uva rekuoro rerare oiso puraroepa, “Tisa Vearoto. Eake vai puraa, ra Tootoo Ovoi oua?” <sup>18</sup> Uva Jisas rera akereva oiso, “Apeisi iava ragai vaisipari oiso, Vearoto? Asi viapau iraiei veartoia vai. Ari kataitoa raga Pauto Vearotoa rutu. <sup>19</sup> ♦ Taraipau vao-ia Reo Taisi Pauto vaaro oa oiso purapai,

‘Opeita otopau, opeita oira upopau, opeita kavirupau, opeita oearovu iava kuuvupau, opeita oearovu keakeapari orekerovu karutupaoro, ora aiteara vaio ora aakoarapa avivikepau.’”

<sup>20</sup> Uva oiso Jisas tavireva, “Tisa, easi varao rutu oisoa tokipaa vova rovoaro osa kakaevira oisoa toupaa.” <sup>21</sup> Oa iava Jisas rera-ia vurareva rerapa siraooro. Uva rerare oiso puraroepa, “Ari ita, vosa vearo vovou rutu purasa auepau, oire auero rutu-ia vii varaaro vori rovou vara-ia moni ouoro apota irarapa oarai vatesa. Eva-a oa iava uvuipau ra vearoa ouriverea vo vuvuiua. Oire ra uriou ragai sirova utuoro.” <sup>22</sup> Uva vo reo-a vao oa-ia rera tavaka pierewe. Oa iava rerare vovouisi vavataepa. Osa iava avaroepa, uvare riro vori guruto-a.

<sup>23</sup> Uva Jisas voeava vurapaoro ora poreroepa rera voeapro disaipel tavisa oiso, “Ari ita, vavagisipapeira rutu voeaopa riro kotokoto guru irara vore ora kiusa Pauto vo Saraaro sovara iare.” <sup>24</sup> ♦ Uva disaipel irara vo reo iava rera-ia tavetave iraopaiva. Oa iava Jisas oiso voeare puraroepa, “Kakae vure oaa oirara. Vavagisipai rutu voeaopa oea moni raga-ia rugorugoopaaveira vore koatapasa Pauto vo Saraaro-ia. <sup>25</sup> Ari ita, vavagisipai vao tavaatoia iava vo rito vosa rirova vai vo kare iava kamel kare iriai voa koatasa auepao. Ari ita, uva oisi rutu rirovira vavagisi iraopai ropa riro vori guruto vore koatapasa Pauto vo Saraaro-ia.” <sup>26</sup> Uva tavetave iraopaive rera-ia. Oa iava oiso puraaepa rerare, “Uva apeisi-a. Iroutoa vai-a ira uvuipa Tootoo Ovoi ousa?” <sup>27</sup> ♦ Oa iava Jisas voeava vurapareva tuupavira. Uva oiso puraroepa, “Viapau uvuipa oirato, ari Pautoa raga uvuiparoi irai oisiri avu pierewora, rera vo Saraaro iare koatato.”

<sup>28</sup> Uva Pita rerare oiso puraroepa, “Ari ita, igei auero oaio rutu kavuiovora vii sirova utupasa.” <sup>29</sup> Uva Jisas rera vo reoaro pukooro oiso puraroepa, “Oiraopavira rutu visii

♦ 10:6: Jen 1:27, 5:2 ♦ 10:7: Jen 2:24; 1 Ko 6:16 ♦ 10:11: Ro 7:3 ♦ 10:15: Mt 18:3; 1 Pi 2:2 ♦ 10:16: Mk 9:36 ♦ 10:17: Lu 10:25 ♦ 10:19: Eks 20:12-16; Diu 5:16-20 ♦ 10:24: Sam 52:7 ♦ 10:27: Jer 32:17

tavipaavoi oiso, Viapau irai oaravu avu vaiaro rutu kavupare. Ari ita, vosa oiso-ia irai vara rutu kavureve oiso, kepa-a vao, ari araoko irara, ari taataa riako, ora aitetoarei ora aakova, ora kakae vure oaro, ora rasiara oaro rutu vo ragai tauvasa utuoro aue-ia tapo Vearo Siposipo,<sup>30</sup> rera-a eera ira riroara pute pievira rutu ourevere kepaara, ora araoko irara ora taataa riako, ora aite irara, ora rasiara oaro rutu, ora varao sirova tapo tavakaara vo voki-ia uva utupaua taru Tootoo Ovoi ouparevere. <sup>31</sup> Ari ita, uva voearo oea visii sirova oisoa utupaave, evoea oea visiipa iraaverea vo Pauto vo Saraaro sovara iare. Ovusa voeao oea visiipa oisoa irapaave, oea taru visii sirova utuaverea.”

*Voea Ita Tavireva Ora Rera Vaaro Iava Kopiia Vo Peva Pievira Jisas  
(Matyu 20:17-19; Luk 18:31-34)*

<sup>32</sup> ♦ Uva vokapaoro raivaaro ipapaaepa Jerusalem iare vo osa Jisas voeapa iraparoepa. Oa iava rirovira tavetave iraopaiva disaipel irara, vo osa oearovu uriripaaepa oea tapo rera sirova utupaaepa. Oa iava rera voearo ragapa disaipel rovoroepa siposipooro varao iava oara karekepape utupaua rera-ia. <sup>33</sup> Uva oiso puraroepa, “Uvuta! Ipavie iore Jerusalem-ia. Uva voea ragai-a vao Oirato Oviitoaaro Ro Ropoto tovopaivere reipa irara vavaearo-ia pris irara ora voearo Reo Taisi-ia tarai irara. Oea reo ovoi puraivere oiso, Rera kopii pieta. Oa iava voearo ragai kosi pieivere osararovu iava voea. <sup>34</sup> ♦ Ra ragai akaipa piepaive, ora ragai-ia ruipaave, ora ragai ragipaive, ora ragai upoive. Oire vosa vo peva voki puteve, ra toreravere vorevira.”

*Vaitereo Vo Ruipaaro Iava Jems Vaio Ora Jon  
(Matyu 20:20-28)*

<sup>35</sup> Uva Sebedi oviitoareiaro Jems araorei ora Jon uriosiepa oiso purasa, “Tisa, vaopa ruipapaveieie ra va purari vegeipa oa arepave vii ruvara-ia.” <sup>36</sup> Oa iava oiso vaiterei akereva, “Eake-a vao oapa ruipapasiei ra va puraa veipa?”

<sup>37</sup> ♦ Uva oiso purasiepa, “Vegeipa vase ra irai pauro vo oirapapa varata oara-ia, osa irai vo koike varata oara-ia vovio uva tokipauveira turaropaoro vii vo goruaro-ia.”

<sup>38</sup> ♦ Uva Jisas oiso puraroepa vaitereire ovoovovira, “Viapau tarapasierei vao-ia oare arepasi. E uvuipasiei ra tavakao ousi oa oupaa o-ia ukaiooro kap iria agasipaoi aue iava siitoka? E uvuipasiei ra koatasi vo tavakao-ia oa-ia koataparai?”

<sup>39</sup> ♦ Oa iava oiso purasiepa, “Uvuipaveieie.” Uva Jisas oiso puraroepa, “O ita. Ukaiosivere o-ia iria-ia ukaioparai. Ora vo tavakao-ia tapo koatasivere oa-ia koataparai.” <sup>40</sup> Uva viapau oiso ragai vaaro-a ra vei pau piea varei-ia oiso, iravu oirapapa varata iava, osa iravu koike varata iava. Ari Pauto auearo-a ira aitereivu reesirevora, oa iava tavukiarei vatatoporevora vaitereipa.”

<sup>41</sup> Oire vosa katai tau disaipel va iava vao uvuiva, uva kasipuaepa vaitereire Jems araorei ora Jon. <sup>42</sup> Uva Jisas keeraroepa voearere oiso puraoro, “Taraipatai voearo-ia ratau tou irara oea vo kovoaro oiso toupaiveira, Oearovu oirara tokipasa. Oea ora rei vaisi piepaaveira voear. Ora voea iava oearovu riro goruva toupaiveira oea oirarapa kovo vatepaaveira.” <sup>43</sup> ♦ Ari visii viapau oisi eisi toupatavere osa evoea. Ari ro ira ruipaparo oiso ra rera raga ora rei piero visiire, eera-a ira taru visii tauvapaoro kovorevere. <sup>44</sup> Ari ro ira iraparo visiipa, eera-a kovopato oavisii vo utupaua. <sup>45</sup> Oiso rutu osa urioraera vore. Uva viapau oiso kovopa irara vai ousa ora ragaipa, ari kovo purapasa oeavu tauvapaoro. Ora vaore tapo ragai vo tootooaro vatepasa voea rutupa oirara vorevira voripaoro vuri vovou sovara iava.”

*Voositoa Batimias Ira Vura Piereva Jisas  
(Matyu 20:29-34; Luk 18:35-43)*

<sup>46</sup> Va isivaaro iava Jeriko-ia poua viropa. Oire vo osa vo uruio kavureva disaipel irara tapo, ora oearovu riro irara, uva iravu voosito Batimias ro oviitoaaro Timias ira raivaaro pauroepa arepaoro. <sup>47</sup> ♦ Uva Jisas ro vova Nasaret ira iava uvureva. Oa iava

♦ 10:32: Mk 8:31, 9:31; Lu 9:22   ♦ 10:34: Mt 26:67, 27:30; Mk 14:65   ♦ 10:37: Mt 19:28   ♦ 10:38: Jo 18:11

♦ 10:39: Ap 12:2; Lu 22:25-27   ♦ 10:43: Jo 13:14   ♦ 10:47: Mt 9:27

rerare keeraroepa oiso purapaoro, "Jisas Devit Oviitoaaro. Ragaipa siraou." <sup>48</sup> Oa iava riro irara rerare reopaaepa oiso purapaoro, "Auoro, ora tape pieu," osa keeraroepa ita rirovira rutu. Uva oiso puraroepa ita, "Vii Devit Oviitoaaro. Ragaivipa siraou." <sup>49</sup> Oa iava Jisas voka tuuke piererva oiso puraoro, "Rerare keerata." Uva rerare keeraaepla voosito oiso, "Toreu, ra roruri, uvare viire keerapa." <sup>50</sup> Osa iava varo rakuraku veraoro tokaoro toreroepa Jisas iare uriooro. <sup>51</sup> ☩ Oa iava Jisas rera akereva oiso, "Eake vaipa ruipapau ra oai puraa viipa?" Uva oiso puraroepa, "Tisa, ragaivi vura pieri vorevira." <sup>52</sup> ☩ Uva Jisas rera tavireva, "Ora poreu ra avau. Aue iava uvare vii raga vaaro oirao piea vii vorevira ravotovira porete pie ovoivoi." Oa iava vearovira vura ovoirevoiva, Jisas sirova utu ovoiroepa raivaaro.

## 11

*Jisas Turarovira Koataroepa Jerusalem-ia  
(Matyu 21:1-11; Luk 19:28-40; Jon 12:12-19)*

<sup>1</sup> ☩ Uva tutuu pieiva vokapaoro Jerusalem iare. Oa iava Betfasi urui-ia poua viropa ora Betani-ia vo uva Oliv Kovo Pukui toupaiveira. Oa iava Jisas voava aitereivu arureva voea iava voeao katai tau erao (12) disaipel. <sup>2</sup> Uva oiso vaiterei tavireva, "Vavo oiso avasi vavo uruio-ia. Vosa karesi virovere voa, ra gareva vai kekesi donki iria tuu iro riara-ia toupaevi, o iria-ia viapau irai vokapareva uvare koruova. Ra oira karusi, ra oira ivupaoro uriosi. <sup>3</sup> Vosa irai vei akepareve oiso, Eakere purapasi? Ra rera tavisi oiso, Iria-ia Turaro vo kovoaroei. Iria vore pierere vere rara." <sup>4</sup> Oa iava avasiepa. Uva oira donki kekesiva kakaeva osa tuu iro-ia toupaeva kepa rataoaro riaaro-ia vo raivaaro. Oire uva oira karusiva. <sup>5</sup> Vo ovusa oeavu voa toupaoro vaiterei akepaiva oiso, "Eakere eira donki karupasi?" <sup>6</sup> Uva voeaa tavisiva oiso osa Jisas vaiterei tavireva. Osa iava vaiterei iava vaseiva vorevira. <sup>7</sup> Oa iava oirava voresiepa donki vore Jisas. Oa iava oira ivara-ia varoara tovoiva varao oara-ia pauroepa. <sup>8</sup> Uva vo voki-a vao oa-ia riro irara rutu varoara oaiive-ia urupaiva raiva-ia, osa oearovu evaoara tosipaiva vegoaro vara tovopasa raivaaro rera-ia rorupaoro. <sup>9</sup> ☩ Oire uva oearovu irapaaepa osa oearovu ita utupaaepa. Oearea rutu rerava rorupaoro kaku piepaiva oiso purapaoro,

"Hosana! Vigei Kae Pietoaaro! 'Pauto ira viraakopare ro-ia ira uriopa vo Turaro Pauto goruaro sovara-ia.' <sup>10</sup> Rera-ia vuurapa vaisi purape, eera ira turarorovere oiso rutu osa Devit ro vigei aaotoaaro ira turaroroepa. Vuurapa vaisi purape Pauto-ia, Reitoa rutu. Hosana vore viara-ia Pauto!"

<sup>11</sup> Uva Jisas karero viropa vo Jerusalem. Uva voa koataroepa Rovopa Kepa-ia Tugoropa Kepa Tempel. Uva voa orekerovu rutu vuravurareva. Oa iava vorevira Betani iare katai tau erao (12) disaipel tapo kareroepa, uvare ravireo rokosa aueroepa.

*Fik Ova Vao Oapa Kasipuroepa Jisas  
(Matyu 21:18-19)*

<sup>12</sup> ☩ Oa iava vokiaepla Betani iava voreoro. Uva vo voka-a vao oa-ia ogoeroepa. <sup>13</sup> Uva oevavu fik ova evaova kekereva tauaivi, riro guruva ova rutu. Oa iava vo eva iare urioroepa oiso ra voava kueara vai oureve. Uva vo evao-ia pou virooro kasikasiroepa vura ragaoro, oiso ra kuea vai kekereve osa guruvara raga oiso voa toupaive. Aue iava uvare kuepa vuuta-ia viapau tuguraaepa. <sup>14</sup> Oa iava Jisas vo evare oiso puraroepa, "Viapau irai vii kuearo aiopareverea vokiara rutu-ia." Vo osa rera voeaaro disaipel rera uvuiva.

*Orekerovu Vuriara Sigureva Jisas Tempel Iava  
(Matyu 21:12-17; Luk 19:45-48; Jon 2:13-22)*

<sup>15</sup> Uva urioaepla vore Jerusalem-ia Tempel-ia koatasa. Uva oeavu oirara sigureva osa uupaaepa voa orekerovu-ia ora tuutuupaaoro vo Tugoropa Kepa sovara-ia. Uva tebolara petopetoreva voeare oea ora tuutuupaaepa aue-ia moni, ora paupara oaiive voeao oea kurue kare-ia ora tuutuupaaepa. <sup>16</sup> Uva voeare korukoruoro rutu goruvira oiso

◊ 10:51: Jo 20:16 ◊ 10:52: Mt 9:22; Lu 7:50, 8:48, 17:19 ◊ 11:1: Mt 21:17 ◊ 11:9: Sam 118:26 ◊ 11:12: Lu 13:6-9

puraroepa, “Viapau rutu oiso ra ora visii varaarova oapara oavisii vo Tugoropa Kepa sovara-ia ora putepata.” <sup>17</sup>◊ Uva va isivaaro iava voea siposiporeva oiso puraoro voeare, “Tugoropa Vuku oiso purapapeira, ‘Ragai vo Kepaaro-a vao oa oiso vaisipaiveira, Variripa Kepa.’ Ari visii vo kepao oiso piepata, vataupa tapi kavirupa irara vaaro.”

<sup>18</sup>◊ Uva voeao pris reipa irara ora voeao Reo Taisi-ia tarai irara oea vo reo uvuiva. Oa iava raiva taraapaaepa oiso ra rera upoive. Aue iava uvare rera uriripaiva, uvare oearou rutu tavetavepaiva rera vo siposipoaro-ia.

<sup>19</sup> Oire vo osa vokiaroviepa voeare, oa iava kosia viropa voava vo riro uruia-ia.

*Fik Ova Iava Vao Raverave Ova Vao Oare Reoroepa Jisas  
(Matyu 21:20-22)*

<sup>20</sup>◊ Oire uva vokipaua avaaepa. Uva voa avapaoro fik ova kekeoro puteva osa raveraveepa vo eva vavurupaaro tapo. <sup>21</sup> Oa iava Pita Jisas vo reoarore rugoooro oiso puraroepa, “Tisa. Vao kekeri fik ova oevaro ovoieivira reouerao. Oa iava erakoerao.”

<sup>22</sup> Oa iava Jisas rera vo reoaro pukooro oiso puraroepa, “Pautoa-ia oirao pie vovouro oavisii towota. <sup>23</sup>◊ Oiraopavira rutu visii tavipaa, Vosa oirao pie vovou rutu purapata vakuvaku asavira, oire ra vaore pukuia oiso purata, Toreu ra ora vikiu eisi avakava. Oire ra oisi pieive, vo rara evo reo oirao piepata rutu. <sup>24</sup>◊ Osa-a eisi osa iava visii tavipaa oiso, Vosa variripata orekerovure arepaoro, oire ra vara oirao piepata, ra vara oupata.

<sup>25</sup>◊ “Oire vosa torepata variripasa, ari vosa iravuva ora aveaveu, oire va eaka pie rovori. Oisore ra vii vaaro vuri vovou verareve Aite oavisii ro vova vuvuua. <sup>26</sup>[Ari ita, vosa viapau oiso iravu iava viapau oiso vuri oaro vera rovori, ra viapau vii Aitearo vii iava vuri oara verareve ro ira vuvuua-ia toupareveira.]”

*Oeavu Jisas Akepaiva Rera Vaarore Reesia  
(Matyu 21:23-27; Luk 20:1-8)*

<sup>27</sup> Uva va vao isivaaro iava voreaepla Jerusalem iare. Uva voa Tempel sovara-ia vokapaoro urioaepa Jisas iare voeao Reo Taisi-ia tarai irara, ora pris reipa irara, ora oira vasi irara. <sup>28</sup> Oa iava oiso rera akeiva, “Eake reesi-a vao vii vaaro oa iava vo kovo purapari? Irou vii vateva vo reesi?”

<sup>29</sup> Oire uva Jisas voeare oiso puraroepa, “Visii akea ra ragaipa vo reo vituaro pukota. Ra visii tavia ita vo reesi iava oa-ia varao purapaa. <sup>30</sup>◊ Oire e baptaisa vao Jon oa puraparevora, ovuva vo reesia oa urioera Pauto ruvara-ia, eke vova oiratoa raga? Oire ita ragai tavita.”

<sup>31</sup> Uva ora rugorugoo piepaaepa oiso, Apeisi avu purapavie. Vosa oiso puravio, Vova Pauto, ra oiso purarovere, Uva apeisi viapau va oirao piepata? <sup>32</sup>◊ Ari vosa oiso puravio, Oirato vaaro. Uva ora voea ragapa uriripaepa, uvare voea rutu oirara oisi taraipaaepa oiso, Rera-a ro profetatoa rutu. <sup>33</sup> Oa iava oiso purapaaepa, “Viapau taraipaiei.”

Uva Jisas voea tavireva oiso, “Ragai tapo ita, viapau oiso ra visii tavia vo reesi iava oa-ia vo kovo purapaaavora.”

## 12

*Oovoovo Reo Wain Kovo Iava Ora Vo Kovo Tokipa Irara Iava Tapo  
(Matyu 21:33-46; Luk 20:9-19)*

<sup>1</sup>◊ Uva rovoroepa voeapa siposipapaoro aue-ia oovoovo reoro oiso, “Iravu wain kovo paureva. Uva vo kovo rirore kasura purareva. Oa iava rikui tekareva auepa pigipava masin gerep. Uva voa kepa paureva uutupa kepa vo kovo-ia. Uva oeavu kovopa irara tavireva auere ra vo kovo tokipaive moni oupaoro ora rerapa. Oire uva va-a vao oa iava avaroepa otaerevu iare uvavu.

<sup>2</sup> Uva oivavu-ia iravu kovopato rera reraaro siporeva, oiso ra kovoia iava kuearoa vai oureve voea ruvara-ia vo kovo tokipa irara. <sup>3</sup> Oa iava rera rauiva. Uva rera ragipaivoiva, viapavira rera siguiva vorevira. <sup>4</sup>◊ Oire uva iravu ita ava piereva ita. Oa iava rera kukuearo gagoagoiva rera tapatapaoro. Uva rera vuri pieiva. <sup>5</sup> Oa iava iravu ita arureva ita. Osa

◊ 11:17: Ais 56:7; Jer 7:11 ◊ 11:18: Mt 21:46, 7:28 ◊ 11:20: Mt 21:19 ◊ 11:23: Mt 21:21 ◊ 11:24: Mt 7:7; Jo 14:13-14, 15:7 ◊ 11:25: Kl 3:13 ◊ 11:32: Mt 14:5 ◊ 12:1: Ais 5:1-7

iava rera kopii pie ovoiiva. Uva oisi raga oisoa piepaive oiso oearovu oisoa ragi ragapaive, ari oearovu oisoa kopii pie ovoipaise. <sup>6</sup> Uva kataitoavie i ra toupare rera oviitoaro, ira oisoa kavikopareve rutu. Oa iava ovoikuvira rera utu pierave ita *voea iare oiso rugoopaoro, Ira vai-ia taru gisipoaro uvuivere oviitoa oaa.* <sup>7</sup> Oa iava oiso ora reoaepa voea voeao oea oisoa kovo tokipaive, Rera ro-ia reito oviitoaro rutu. Irare ra rera upope. Ra rera vaaro ouoro vo kovo vao tokipe ora vigeipa. <sup>8</sup> Oa iava rera rauiva rera kopii pie ovoisa. Oire wain kovo sovara iava vo kopii kosi pieiva.”

<sup>9</sup> Uva vo reo-a vao ovoovo reoa oa iava oiso akereva Jisas, “*Uva eake vai purarevere ro ira vo kovoaro-a vao-ia wain kovo? Oire uva ro ira uriorovere voeao vo kovo tokipa irara opesi piesa voeae rutu kopii pieoro. Oire ra ita oeavu raga ita tovo pierave vo kovo tokipasa ita.* <sup>10</sup>  $\diamond$  E viapau vo reo vieitavora Tugoropa Vuku-ia oiso,

‘O-ia aveke iria veraiva voeao kepa paupa irara oira-ia kepa pau arapa, eira rutu ita avekeva rovopava rutu kukuuvu tuuta. <sup>11</sup> Easi, vo kovo purareva Turaro, oa vigei osireiaro-ia ravotovira toupaiveira’?’

<sup>12</sup> Uva oiso ruipa ragapaaepa ra Jisas ouive rera kortusa voeao reipa irara Jiu iava. Ari ita, oeavu ragapa oirara uriripaaepa, uvare oiso taraipaaepa, Asi vao ovoovo reo vigei togapare vo-ia. Uva rera kavuoro avaaepa.

*Jisas Akeiva Takis Moni Iava  
(Matyu 22:15-22; Luk 20:20-26)*

<sup>13</sup>  $\diamond$  Uva va-a vao oa iava oeavu Farisi ora voeao tapo King Herot tauvapa irara oea sipoiva rera iare oiso ra ora rera oaiaro-ia ora rera raga ora kove piero. <sup>14</sup> Uva evoearei rutu urioaepa. Oa iava rerare oiso puraaepa, “Tisa, taraipaii vii-ia, uvare vii-a oiraopa reotoa rutu. Ari vaeavira rutu voeae rutu siposipopari vo Pauto vo pitupituaro iava. Oire uva apeisi-a? E torevokopai ra Sisa-pa takisvio moni vateoro, eke viapau?”

<sup>15</sup> Ari ita, tarai ovoiroepa voea vo kuuvuaro-ia. Uva voeae akereva, “*Eakere ragai-ia kokarapatai? Oire ragai vateta moni isi vai ra aisi eveia.*” <sup>16</sup> Uva aisivu vateiva. Uva voeae akereva oiso, “*E irou puaaro-a vao-ia vo kiro-ia?*” Uva rera taviiva, “Ari Sisa.” <sup>17</sup>  $\diamond$  Oire va iava oiso puraroepa, “*Vosa Sisa varaaro, oire Sisa-pa vara vateta. Ari vosa Pauto varaaro, oire Pautoa-pa vara kare pie iraota.*” Oa iava vo reo iava rirovira rutu rugorugoo iraopaaepa.

*Jisas Akeiva Oiratoa Iava Ro Ira Kopiilo Ra Vorevira Torero  
(Matyu 22:23-33; Luk 20:27-40)*

<sup>18</sup> Uva Sadyusi-pa irara urioaepa rera iare voeao oea oisoa viapau kopiia torearo iava oirao piepaive. Oa iava oiso rera akeiva, <sup>19</sup>  $\diamond$  “Tisa, Moses oiso igeipa rigatoroepa, Vosa irai araokotoa vαιaro kopiilo, vo osa riakovaaro toupaeve kakae pura asavira raga. Ra ita araokoto oira oureve rerapa ro kopiito oira-ia kakaeto purasa. <sup>20</sup> Uva erao vatara oaraovu oea oisoa toupaive. Oea iava avaioto riakoparoepa. Oa iava oira arova kopiiloepa osa viapau kakaetoa vai. <sup>21</sup> Uva ro kikooti oira ita oureva. Uva kopiiloepa ita, osa ita viapau kakaetoa vai. Uva peva piepato oisi raga pie ragareva ita. <sup>22</sup> Uva oisi raga piepaoro oira arova opesiaeepa vo arao rutu erao vatara, osa viapau kakaetoa vai kavaupaaive. Uva utupaua vo arao isivaaro iava kopiia ovoiopa. <sup>23</sup> Oire uva vo vokio-ia oa-ia oirara rutu toreaverea vova kopiia-ia, uva irouto vo arao iava oira ourevere? Uvare voeae voeao erao vatara rutu oea oira ouiva.”

<sup>24</sup> Oa iava Jisas voeare oiso puraroepa, “*Rugorugooara oavisii pirovira avapai. Aue iava uvare viapau taraiptatai aue-ia Tugoropa Vuku vo rigatoaro ora goruaro Pauto.* <sup>25</sup>  $\diamond$  Vo kopiia iava toreia-ia viapau oiso riako ou vai, uvare viapau ora oupaaverea. Viapau. Ari oisi rutu oiso toupaiverea osa enselpa irara vo vuvuua-ia.

<sup>26</sup>  $\diamond$  “*Oire ari voeao-ia kopii irara vosa toreave vorevira, uva viapau voeae iava vieipataera vo siposipo-ia oa-ia gare kairi evaoa rovaepa. Osiposipo-ia Moses tavireva Pauto oiso, ‘Ragai-a Pautoaaro Ebraham, ora Pautoaaro Aisak, ora Pautoaaro Jekop?’* <sup>27</sup> Oire vo Pauto vo

$\diamond$  12:10: Sam 118:22-23; Ap 4:11; 1 Pi 2:7     $\diamond$  12:13: Mk 3:6; Lu 11:54     $\diamond$  12:17: Ro 13:7     $\diamond$  12:19: Diu 25:5

$\diamond$  12:25: 1 Ko 15:42, 49, 52     $\diamond$  12:26: Eks 3:6

rugorugooaro vuraaro-ia voeao tootoovira toupai oea kopiaepa. Oa-a vao oa iava oiso puraroepa, Ragai Pauto oaiive voeao oea tootoopai. Ari rugorugooara oavisii viapau oiso torevokopai.”

*Rovopa Rutu Reo Taisi  
(Matyu 22:34-40)*

<sup>28</sup> Oire uva iravu urioroepa Reo Taisi iava siposipopato voea uvusa osa ora akepaaepa. Uva Jisas vo reoaro eveireva osa voeao vo reoroaro pukopareva. Osa iava rera akereva oiso, “Aa vao-a rovopa rutu Reo Taisiro rutupa?” <sup>29</sup> ♦ Oa iava Jisas rera vo reoaro pukoreva oiso puraoro, “Vao-ia rovopa rutu Reo Taisi oiso purapapeira,  
‘Isrel-pa irara uvuta. Ro-ia Turaro Pauto oavi, rera raga ira turaroparoveira.

<sup>30</sup> Ira-ia sopaura oavisii rutu tovota, ora rugorugooara oavisii rutu, ora taraiara oavisii rutu, ora goruara oavisii rutu.”

<sup>31</sup> ♦ Ari erao piepa vao-ia oiso,  
‘Voeaopa oea vii ruvara iavi toupaiveira siraopau rutu, oiso rutu osa ora viipa siraopauveira.’  
Viapau oiso oarai Reo Taisiro vai vareo-ia putepaiveira.”

<sup>32</sup> Uva Reo Taisi-ia taraito rera tavireva, “Oiraopavira Tisa. Ari kataitoa raga Turaro Pauto. Uva viapau iraiei turaro vai oiso osa ro-ia. <sup>33</sup> ♦ Uva vosa rera-ia vii iava sopaura rutu tovori, ora rugorugooara rutu, ora vii vaaro gorua rutu, ora vao tapo-ia oiso ra iravupa siraopau oiso osa ora viipa siraopauveira, oire uva vara-a varao oara korouupa pitupitu-ia putepaiveira, opitupitua-ia oisoa korouupa kare riipu piepaiveira.”

<sup>34</sup> Uva Jisas rera-ia tarairoepa uvare vearovira rera vo reoaro pukopareva. Oa iava rera tavireva oiso, “Viapau oiso tauaipauei Pauto vo Saraaropa.”

Osa-a eisi osa iava voeao rutu uriripaaepa Jisas ake arapa vorevira.

*Vo Devit Oviitoaaro Iava Akea Toupai  
(Matyu 22:41-46; Luk 20:41-44)*

<sup>35</sup> Vo osa Jisas siposiporeva Tugoropa Kepa-ia Tempel, uva oiso puraroepa, “Easi eake iava Reo Taisi-ia tarai irara oiso purapaai, Asi Krais Devit aaotoaaro ro vo rasio raga iava.” <sup>36</sup> ♦ Aue iava ita uvare rera raga Devit vatereva Tugoropato Uraurato vo rugoo oa iava oiso puraroepa,

“Turaro Pauto ira oiso puraroepa rore ragai Turaroaro, Pauu vo oirapapa varata vao-ia vo vuutaore tuepaoro oa-ia vii voearo keripa irara tovoaverea vii kokotoaro reroaro, vo rara voea-ia puteri.”

<sup>37</sup> ♦ Ari ita, Devit raga ira turarovira Krais vaisireva. Uva apeisi-a, Krais rera aaotoaaro Devit ira Devit sirova kavauroepa?” Uva riro uvuru rera vo reoaro roruvira uvuiva.

*Reo Taisi-ia Tarai Irara Vo Pitupituroaro  
(Matyu 23:1-36; Luk 11:37-54, 20:45-47)*

<sup>38</sup> ♦ Uva voeao siposipopao voeao tavireva oiso, “Ora vatatopopata evoeapa Reo Taisi-ia tarai irara oea vearovara-ia kuvupaaikuvupara varoara, ora oiso uvare vaopa tapo ruipapaaveira, oiso ra oearovu oirara voeapa ora avivikepao oiso purapaave, Vearo voki voeare vo aivaropa tapi.” <sup>39</sup> Ora oiso tapo osa varao ruipapaaveira rovopara paupara varao Reo Taisi Uvupa Keparo sovara-ia touara. Ora varao tapo vasivasi tapiro roro pie visivi vo vureipa vokiro-ia. <sup>40</sup> Evoea oea auero ou ragapaaiveira raroetapi, roro kaekaepavira variripaaveira ita. Evoea ita oea riroa siitoka ouiverea. Va-a eva vuri oaiive voriaro oearovu rutu varaa-ia oara putepaverea rutu.”

*Raroeva Siraao Vatea Moni isi Vikieva  
(Luk 21:1-4)*

<sup>41</sup> ♦ Uva ipa pie visivi pauroepa Jisas vo moni oupa tapi. Uva voeao siituepareva osa moni vikipaaepa voa. Uva voeao riro moni irara oea tapo riopara moniara vikipaiva.

<sup>42</sup> Osa-a eisi osa iriavu urioopa raroeva apotavavi. Uva aisireivivu vikieva moni isirei gare

♦ 12:29: Diu 6:4   ♦ 12:31: Lev 19:18; Ro 13:9; Ga 5:14; Je 2:8   ♦ 12:33: Hos 6:6   ♦ 12:36: Sam 110:1; Hi 1:13

♦ 12:37: Jo 12:9   ♦ 12:38: Lu 11:43   ♦ 12:41: Jo 8:20; 2 Kin 12:9

isireivi bokis iare. Uva ora takuvuepa, uva aue raga-ia uvuipaepa katai tau toea (10t). <sup>43</sup> ♦ Uva disaipel irarare keeraroepa ora rera iare. Oa iava voea tavireva oiso, “Oiraopavira rutu vikioi apotavavi ita voeao-ia puteoro oea riropa moni vikipai.” <sup>44</sup> Ari ita, voea rutu vikiae riroara iava ita, osa oiravi ita iria ora oira iava sopaua rutu tapo vikievo oa-ia oearovu rutu-ia puteevoi.”

## 13

*Jisas Voea Ravaavira Tavitavireva Tugoropa Kepa Tempel Opesiaro Iava  
(Matyu 24:1-2; Luk 21:5-6)*

<sup>1</sup> Uva kosiro viropa vova Tempel, osa iravu voea iava disaipel rerare oiso puraroepa, “Tisa kekeri. Vearopara-ia avekeara ora vearo keparo-ia.” <sup>2</sup> ♦ Oa iava Jisas voeare oiso puraroepa, “O ita, oara kekepata riropa keparo. Ari viapau iriai aveke vai eakave iriai ivara-ia aveke vai osa toupaive. Oara rutu evara kururu piroverea koveoro.”

*Vo Siiotoka Rovoaro Iava Toupa Oa Karekepere Vo Ovoio Voki  
(Matyu 24:3-14; Luk 21:7-19)*

<sup>3</sup> ♦ Uva-a vo uva pauparoepa Jisas vo pukuio-ia Oliv Kovo Pukui aueva Tempel tuuravira pauparoepa, osa rera akepaiva vatau visivi voeao Pita vase, ora Jems, ora Jon aue tapo Andru. <sup>4</sup> “Igei taviri. Aa vo vokio ora purapere vara varao, ora eake ravaa reesiro-a oara ora purapere vara-ia?”

<sup>5</sup> ♦ Uva Jisas oiso puraroepa voeare, “Vatatopopata. Teapi visii piro piereve oiratoa vai.

<sup>6</sup> Riro irara rutu uriopaaverea ragai vaisiaro-ia, ra oiso puraave, Ragai-a vao Krais. Ra riro irara vai keakeapaive oirara vai.

<sup>7</sup> “Vo osa upoara siposipoaro iava uvutavere vara oara tauai toupaive visiipa ora tutuu pievira visiipa, ra viapau oiso uriripata. Uvare vara-a varao oara pou pirovere taru. Uva viapau oiso vara varao opesiapa tutuu piepai, ari orekerovu urio rovopapere <sup>8</sup> oiso-ia, osararovu osararovuva ora upoaverea. Ari gavman tapo ora rera ragava aia ita gavman ora uporovere. Ravurikepaperea otaererovu-ia, ora ogoepa vokiro oara poupa piroverea voraro rutu. Uva vara rutu-a varao oara-ia siitoka rovoaro pura pirovere.

<sup>9</sup> ♦ “Voeaopa vatatopo iraota oea visii vateiverea auepa Kaunsel irara oea visii ragipaiverea vo keparo-ia Sinagog keparo. Ora oiso tapo osa visii tore piepaiverea vo reipa irara osireiaro-ia, ora vo king irara osireiaro-ia, uvare ragai sirova utupataveira. Uva voea-a voeao turaro irara oeapa tavitavipatavere ragai vo kovoaro iava. <sup>10</sup> Ari ita, vo osa Vearo Siposipo uvu rovoiverea oirara rutu osararovu rutu iava. Oa isivaaro iava taru Opesi Voki pou piro. <sup>11</sup> Vosa visii sipopaiverea voeapa oea visii rovirieipaiverea kortua-ia. Oire uva opeita uriripata oiso rugorugoopaoro, Apeisi purapaei voea vo reoroaro pukopaoro. Rera raga visii vatereverea eva oa iava tavitavipatavere. Viapau oiso visii-a visiigoa reoreotaverea, ari Tugoropato Uraurato vo visii gisipoaro-ia. <sup>12</sup> ♦ Oiso-ia tapo, iravu araokoto vatereverea vore gavman vavaearo iare, oiso ra rera kopii pierevere. Ora aiteto oviito vatereverea iravupa ra rera kopii pierevere. Ari ovii irara aite irarava kerlaverea ra voea upoive. <sup>13</sup> Ari ita, oirara rutu visiire vuri vovou iraopaaverea, uvare ragai vaisiaro-ia toupataverea. Ari ro ira goruvira rutu Pautoa-ia rugooa tovopareve vo tugurasa Ovoipa Voki-ia, eera-a ira taru oureverea Pauto ora rera vo Saraaro iare.

*Vuria Rutu Karekepere Vo Utupaua  
(Matyu 24:15-28; Luk 21:20-24)*

<sup>14</sup> ♦ “Vosa vao keketaverea oa uvuipai riroa vuria pura iraopasa aue-ia Tugoropa Tapi, oire ra uriripaoro torita visii vao Judia-ia tou irara pukuiara iare. [Ari ro ira vao vieipareve, oire tarairo va-ia vao]. <sup>15</sup> Ro ira kepa ivara-ia toupareve, viapau oiso uvuipa ra vararo oavu avu vai ousa vo kepa oaro-ia. <sup>16</sup> Ro ira toupareve varuparo, viapau uvuipa ra ora rakurakupaarore vorero varoa. <sup>17</sup> ♦ Ari vo riakovio airoa tarukovira toupaiverea, oriakoa sirao iraoaverea

---

♦ 12:43: 2 Ko 8:12 ♦ 13:2: Lu 19:44; Ap 6:14 ♦ 13:3: Mk 5:37 ♦ 13:5: Ef 5:6; 1 Te 2:3 ♦ 13:9: Mt 10:17 ♦ 13:12: Mai 7:6; Mt 10:21 ♦ 13:14: Dan 9:27, 11:31, 12:11 ♦ 13:17: Lu 23:29

tavaka ouoro, ora vairo sikeo kakaero roroopa riako vo voki-ia. <sup>18</sup> Variripata. Oa iava viapau pou piroverea vo tavakaro varao vo kiuvupa vuuta-ia. <sup>19</sup> ♦ Oire vo vokio-ia oa-ia rasito rovoreva Pauto vo vokio-ia pou virosa vao-ia, uva varei sovara-ia vareo viapau oiso oavu avu vai tavaka vai vareo sovara iava oai vo tavakao-ia putepai oa urioperea utupaua riroa rutu. Oire ita vara isivaaro iava varao viapau oiso otavakai ita urioperea oiso osa vo tavaka vao-ia. <sup>20</sup> Vosa viapau rugorugoparoeri Pauto vo vuutao poteku piesa, ra viapau oiso iraipe tootoovira toupaoro. Ari voea ragare rugoooro vo vuuta poteku piereverea voeao oea roporeva ora rerapa.

<sup>21</sup> “Vosa irai visii tavipareve oiso, Ro keketa Pauto reraaro Ropoto. O ita, Rera keketa ro, oire ra viapau oiso rera vo reoaro oirao piepata. <sup>22</sup> Riro irara rutu krais irara kuuvu irara oea urioavere. Ora riro irara profet irara kuuvu irara oea ravaavira oreorovu puraiverea ora ravoto kovoro. Oara-ia voeao piro pieiveraea vosa uvuipaave voea oea roporeve Pauto. <sup>23</sup> Ari ita, visii vatatopo piepaa varao iava visii tavitavi rovopao.

*Pauto Reraaro Iava Ropoto Vorearo Iava  
(Matyu 24:29-31; Luk 21:25-28)*

<sup>24</sup> ♦ “Uva tavakapa vuuta isivaaro iava ravireo ruparoverea ora kekira tapo. <sup>25</sup> Aaviikoara kovekovepere vova vuvuiua iava. Orekerovu rutu goruara vova vuvuiua ravurikepere. <sup>26</sup> ♦ Vo voki-a vao oa-ia ragai Oirato Oviitoaaro tueiveraea oirara rutu, ovusa iriavu rukuta sovara-ia uriora riroa rutuva gorua ora riroa ragai vaaro keraria. <sup>27</sup> Uva voea aruaverea enselpa irara oaa, ra voea guruive voeao oea roporeva ora rerapa voraro rutuva vo rasito rekasiaro-ia.

*Fik Ova Iava Voea Tavireva  
(Matyu 24:32-35; Luk 21:29-33)*

<sup>28</sup> “Oire uva vo evao fik ova taraitavere rara rovovira airepa guruvaro kosi pieve rovo guruvaro. Ra oiso taraita, Raipipa vuuta tutuu piepai oa-ia ravireo rororovere. <sup>29</sup> Ari ita, visii tapo varao iava taraitavere vara kekeoro, ra oiso aueta, Ragaipa karepa vuuta tutuu pievoi. <sup>30</sup> ♦ Oiraopavira visii tavipaavoi, Oirara rutu voeao vo vuuta-ia eva viapau oiso voea rutu kopiaverea vo osa vara rutu evara kareke rovopere. <sup>31</sup> Oire oiso-ia vuvuiua opesiperea ora rasito, ari ragai vo reoaro viapau rutu oiso opesiperea.

*Viapau Oiso Oiratoa Vai Taraipa Karepa Vuuta-ia  
(Matyu 24:36-44; Luk 17:26-30, 34-36)*

<sup>32</sup> ♦ “Uva viapau irai taraiparoi vo voki-ia ora vo aua-ia. Ora enselpa irara tapo voeao vo vuvuiua oea viapau taraipaai. Ora Oviitoaaro tapo viapau taraipa. Ari Aitetoa raga Pauto ira karepa voki rutu-ia taraipa.

<sup>33</sup> ♦ “Vearovira rutu uutupata. Uvare viapau taraipatai vo vuuta-ia vao oa-ia urioperea. <sup>34</sup> Oiso rutu osa iravu aapaapauroepa ouruivu iare kepaaro kavuoro. Uva kovoara rovirieireva kovopa iraraaropa. Uva goruvira rutu ratao tokipato tavireva oiso ra vara rutu tokipareve. <sup>35</sup> Oire visii vao vatatopo iraopatai tuepaoro, uvare viapau taraipatai rera-ia eera reito ira voreroverea rera vo kepaaro kekesa ovaiaro eke voki vuuta-ia, eke vosa kookai kare gaupaise, eke vokipaua. <sup>36</sup> Teapi visii sita piesa urioro visii kekeoro osa uusipata. <sup>37</sup> Uva va-ia vao visii tavipaa ravaavira ora oearovu rutu, ra ora vatatopopata rutu.”

## 14

*Reipa Irara Ora Reoaepa Oiso Ra Jisas Upoive  
(Matyu 26:1-5; Luk 22:1-2; Jon 11:45-53)*

<sup>1</sup> ♦ Oire uva reipa irara pris irara ora Reo Taisi-ia tarai irara oea raiva taraapaaepa ora voeaa-ia, oisore ra oa-ia kaviruvira rera rauive. Ra rera upoive vo vokireo isivaaro iava, ovokirea-ia aioa pura pirovere Pasova Vurei ora oaiorovu Yis Asa Aioro aue Bret. <sup>2</sup> Oire

⊗ 13:19: Dan 9:26, 12:1; Joe 2:2    ♦ 13:24: Sef 1:15    ♦ 13:26: Dan 7:13; 1 Te 4:16; 2 Te 1:7, 10    ♦ 13:30: Mk 9:1    ♦ 13:32: Ap 1:7    ♦ 13:33: Ef 6:18; 1 Te 5:6; Kl 4:2    ♦ 14:1: Mk 11:18

uva vo voki-ia rugoopaoro oiso ora reopaaepa, “Teapi vo vokiro raga-ia varao oara-ia aioara purapa pirovere rera-ia pituera, oearoi ora sitaoro kasipuave vigei uposa.”

*Iriavu Sanda Ovi-ia Rera Atoatoeva Vo Betani Urui-ia  
(Matyu 26:6-13; Jon 12:1-8)*

<sup>3</sup> ♦ Uva Jisas toureva Betani-ia ro leprapato vo kepaaro-ia Saimon. Uva voa pauroepa aiopaoro ovusa iriavu riakova urioopa ueva korovo ovi sanda, oovia vaisipai oiso, nad. Oa oisoa purapaive ae iava airepa ruu piero. Oa toupaiva ae-ia popotepa tou vearoa Alabasta oiso osa aveke. Ipa pie vori ovi oava urioopa. Uva vo ovi keeva, oa iava va kokoeva Jisas kukuearo-ia. <sup>4</sup> Uva oearovu oiso ora reopaaepa kasipupaoro, “Apeisi o vao ropi ragapae korovo ovi? <sup>5</sup> Ari uvuipaoi ra va-ia monia vai oueve korovo ovi vo peva vovoto kina (K300), ra oai vateeve voeaopa apota irara.” Uva ora reopaaepa rirovira rutu oirare kasipupaoro. <sup>6</sup> Oa iava oiso puraroepa Jisas, “Oirape, ra va puraeve. Eakere oira vovouaro vavata pie ragapata? Vearo pitupitu rutu purapae ragaipa. <sup>7</sup> ♦ Ari ita, apota irara oea toupaiveira touvira rutu visii tapo vokiara rutu-ia. Vosa oisi voeapa oaravu tauvaara purasa ruipapata, uva uvuipatai oisi eisi purapasa. Ari ragai viapau oiso visii tapo toupaavere touvira. <sup>8</sup> Oira o iria va puraevoi oiso osa uvuioi va purasa. Iria ita ragai iava varaua atoato rovoevo ravaavira korovo ovi-ia, auere vava ragai tovasa. <sup>9</sup> Oiraopavira rutu visii tavipaavoi, Vo uvarovu rutu uva Vearo Siposipo kosi piepaiverea vo rasio-ia, ra va-ia vao tapo ora reopaaave vare rugoopaoro oa puraevoi o-ia riakova ragai-ia.”

*Reo Ovoi Purareva Judas, Oiso Ra Jisas Kosi Piereve Keripa Irarapa  
(Matyu 26:14-16; Luk 22:3-6)*

<sup>10</sup> ♦ Uva iravu voea iava katai tau erao (12) disaipel ro Judas Iskariot ira avaroepa reipa irara iare pris voea ravaavira tavisa, “Visiipa Jisas kosi pieavere.” <sup>11</sup> Uva Judas vo reoaro uvuoro roruiva rutu. Oa iava ovoivira rera taviiva ae iava moni. Osa-a eisi osa iava ora rerapa raiva taraaroepa, oiso ra Jisas kosi piereve voea vavaearo iare.

*Jisas Tagausapa Vurei Aioreva Rera Voeaaro Tapo Disaipel  
(Matyu 16:17-25; Luk 22:7-14, 21-23; Jon 13:21-30)*

<sup>12</sup> ♦ Uva vo rovo vokiaro-ia Yis Asa Aio ae Bret oa-ia sipsip kakae-ia korouua oisoa puraive. Oa iava vo vokia vao disaipel irara Jisas akeiva oiso, “Ovu-ia viipa ravaavira aioa vai puraiovore Tagausapa Aio Pasova Aio vai?” <sup>13</sup> Uva disaipeltoarei arureva oiso, “Karesi viro urui iare. Vosa iravuva aivarosivere osa uuko ovi vai kaepareve rirova-ia pitokava, ra rera sirova utusi. <sup>14</sup> Uva iravu vo kepaaro koatarovere. Oire ro ira vo kepaaro-a irare oiso purasi, Ro-ia Tisato ira oiso puraroi, Ovu-ia ragai vo tugiaro epao tavete tugi uva Pasova Vurei aioavere disaipel irara oaa tapo? <sup>15</sup> Uva vei kareke pierevere riro tugia oa toupai ravaavira vo viara-ia. Uva voa aioara ravaasivere vigei rutupa.” <sup>16</sup> Uva disaipeltoarei karesi viropa urui iare. Uva va kekesiva vao oare Jisas tapiroepa. Oa iava voa Pasova Vurei vatatoposiva.

<sup>17</sup> Uva vokiarovi pouro viropa Jisas ora katai tau erao disaipel. <sup>18</sup> ♦ Oa iava aiopaiva osa Jisas voeare oiso puraroepa, “Oiraopavira visii tavipaa, Iravu visii iava ira ragai kosi pierevere oearovupa.” <sup>19</sup> Oa iava vovouisiro rutu vavataepa voeare siraororo. Uva voea rutu oisi raga puraaepa, “Easi viapau ragai-a?” <sup>20</sup> Oa iava oiso voea tavireva, “Ro katai tau erao iava disaipel, ira vavae roko pierie breteva tapi rovu viipaoro va-ia ragai tapo, eera-a ira ragai kosi pierevere. <sup>21</sup> Iu, Oirato Oviitoaaro avapa kopilia-ia oiso osa Tugoropa Vuku taviepa ragai iava. Ari ita, siraovira rutu rerapa ira ragai kosi pierevere. Vearopai ita vosa viapau aakova rera kavau rovoevori.”

*Vo Jisas Komunion Aio Vatereva Disaipelpa  
(Matyu 26:26-30; Luk 22:15-20; 1 Korin 11:23-25)*

<sup>22</sup> ♦ Oire vo osa aiopaiva uva Jisas bret oureva va-ia yearo vaisi purasa. Uva va puteputeoro vara vatereva voeapa oiso puraoro, “Ieta, vao outa ragai iava varaua.” <sup>23</sup> ♦ Oa

---

⊗ 14:3: Lu 7:37-39    ♦ 14:7: Diu 15:11    ♦ 14:10: Lu 22:3-4; Jo 6:71    ♦ 14:12: Eks 12:11    ♦ 14:18: Mk 14:44-45    ♦ 14:22: Mk 6:41, 8:6; 1 Ko 11:23-25    ♦ 14:23: 1 Ko 10:16

iava kap-ia wain karo oureva va-ia vearo vaisi purasa. Uva voea vaterева va. Oa iava voea rutu ukaoaepa oira iava. <sup>24</sup> ♦ Uva oiso voea tavireva, “Eira ragai iava revasiva iria paruevere ragai iava vo osa kopiira voea rutupa oirara Pauto vaaro Reo Ovoi oirao pieoro. <sup>25</sup> Oiraopavira ita visii tavipaavoi, Viapau oiso ra vorevira ita vao-ia wain ovi ukaioravere. Ari vo raga uva airepa karova-ia ukaioravere utupaua vo Pauto vo Saraaro-ia.”

<sup>26</sup> Uva iriavu-ia eraaepa erava. Oa iava ipaaepa Oliv Kovo Pukui iare.

*Jisas Pita Tavireva Oiso, Ragai Taearivere  
(Matyu 26:31-35; Luk 22:31-34; Jon 13:36-38)*

<sup>27</sup> ♦ Uva Jisas voeare oiso puraroepa, “Ragai arova toritavere ragai raga kavuoro, uvare oisi ita va iava rigatoiva vo Pauto vo reoaro-ia oiso, ‘Pauto sipsip ragui tokipato uporevere ra rerare rorooro sikaa viro sipsip ragui.’

<sup>28</sup> ♦ Vo osa kopiiia oaa iava toteoro visiipa iraravere Galili iare.” <sup>29</sup> ♦ Uva Pita rerare oiso puraroepa, “Vosa voea rutu vararo oirao pie vovouro vuripere viipa, eagara osa ragai vaaro oirao pie vovou viapau oiso ra vuripe.” <sup>30</sup> Uva Jisas rerare oiso puraroepa, “Oiraopavira rutu vii tavipaavoi, Vo osa kookai touvira erao piepa gau purarevere vo vokiaro, ovusa vo peva purari ragai vaisiaro ora taeapaoro.” <sup>31</sup> Uva oisi-a oiso osa iava Pita goruvira rutu rera tavitavipareva oiso, “Viapau rutu. Asi vii tapo kopiiravere, vo rara viapau vii vaisiaro taeaa.” Uva voea rutu disaipel oea oisi raga puraaepa oiso osa puraroepa Pita.

*Jisas Vaaro Variria Oa Purareva Getsemani  
(Matyu 26:36-46; Luk 22:39-46)*

<sup>32</sup> Uva avaaepa ae iare Getsemani-ia. Oa iava rera voeaaro disaipel tavireva oiso, “Vovio pautaera osa avara variri rovosa.” <sup>33</sup> Uva Pita vase tapo avaroepa voea Jems ora Jon. Oa iava rovoroepa rirovira rutu siraoro osa vovouisi rerare vavataepa rutu. <sup>34</sup> ♦ Uva voea tavireva ita oiso, “Ragaire sopaua rirovira rutu vavatae siraoro. Osiraoa vao oisi rutu sovoa, oa iava kopiirai vao-ia. Vo tou rovopaoro uitupata.” <sup>35</sup> Uva gare visivi avapaoro gerevira koveroepa rasiua arore. Uva voa variriroepa oiso ra rera-ia puteve vao tavaka vuuta. <sup>36</sup> ♦ Uva oiso puraroepa, “Aite. Vosa ruipapau ra ragai iava o kap verari iria agasioi rutu ae iava siraao vo vavataaro. Uva viapau uvuipau ra ragai vo ruipaaro sirova utuu. Viapau. Ari vii raga vo ruipaaro sirova utuu.”

<sup>37</sup> Uva voreroepa voea kekesa osa uusipaaepa. Uva Pita-re oiso puraroepa, “Saimon. Eari uusipaeui? E viapau uvuipaeui ovuutavi-ia tokisa?” <sup>38</sup> ♦ Utupata ora variripata. Teapi kokarapa vovouro visii iare uriope visii kove piesa. Ari ita, vovouisiro oavisii ruipapai oiso ra ragai tapo toutes, osa varauraro oavisii raga visii iava raveravepai.”

<sup>39</sup> Uva voreroepa ita varirisa. Oa iava oiso raga ita variriroepa. <sup>40</sup> Uva ita voreroepa voea kekesa osa uusipaaepa, uvare rura iraopaiva rutu. Uva viapau reoavi vai ra oai iava rera aatoive.

<sup>41</sup> Uva ita, vo peva piepa vuuta-ia voreroepa rera ita. Uva voea tavireva, “Touvira uusipatai reareapaoro? Oire uvuta! Vuuta-a vao tuguraei oa-ia Oirato Oviitoaaro kosi piepai vo vuri vovou irara vavaearo iare. <sup>42</sup> Toreta ra avavio. Ro keketa ira ragai kosi pierevoi. Ira-a ro ira urioroi.”

*Jisas Kosi Piereva Judas Keripa Irarapa Oiso Ra Rera Kortuive  
(Matyu 26:47-56; Luk 22:47-53; Jon 18:3-12)*

<sup>43</sup> Uva Jisas touvira reoreoparoepa, ovusa pouro viropa Judas, iravu ita voea iava voeo katai tau erao (12). Ira riro irara tapo urioroepa auerova kakuara ora toorioara, voeo oea aruiva rovopa irara pris irara ora Reo Taisi-ia tarai irara, ora oira vasi irara. <sup>44</sup> Uva oisi-a oiso osa voea ravaavira tavireva oiso, “Ro irava uugaaparai, ira-ia pitu ovoita rerava avasa.”

<sup>45</sup> ♦ Uva urioroepa Judas rera iare ava ovoioro oiso purasa, “Tisa.” Oa iava rerava uugaa ovoiroepa. <sup>46</sup> Oa iava rera-ia pituiva rera rauoro.

♦ 14:24: Eks 24:8; Hi 9:20 ♦ 14:27: Sek 13:7 ♦ 14:28: Mk 16:7 ♦ 14:29: Jo 13:37-38 ♦ 14:34: Jo 12:27

♦ 14:36: Ro 8:15; Ga 4:6; Jo 5:30 ♦ 14:38: Lu 11:4; Ro 7:23; Ga 5:17 ♦ 14:45: Mt 23:7

<sup>47</sup> Uva iravu ruvara-ia toupareva ira toorio gororeva. Uva Rovopato Pristo reraaro kovopato iava uvareoua pakoreva voua toeoro. <sup>48</sup> Uva Jisas voeare oiso puraroepa, “E oiso rutu *ragaire taraapata osa kavirupato?* Oa iava toorioara *kaepata ora aue kakuara vo ragai-ia pitusa?*” <sup>49</sup> ♦ Ari ita, siposipopaa vokiara rutu-ia visiipa vo Tugoropa Kepa-ia. Uva eakepa viapau *vua ragai-ia pitu asatavora?* Oire uva va-a eva oa iava *vearopai ra va vao Tugoropa Rigato oirao pieve vao oa pura piropa vo ragai-ia.*” <sup>50</sup> ♦ Oa iava voeao disaipel rera arova tori ovoiiva.

#### *Vo Viovokoto Torireva Gapuvira*

<sup>51</sup> Uva iravu viovokoto Jisas sirova uturoepa ira varoa-ia tuuparoepa. Uva rera-ia pituiva. <sup>52</sup> Oa iava varoa iava vase ovoioro gapuvira raga torireva rera ita.

#### *Jisas Rovirieiiva Kaunsel Irara Osireiaro-ia*

(Matyu 26:57-68; Luk 22:54-55, 63-71; Jon 18:13-14, 19-24)

<sup>53</sup> Uva Jisas-va avaaepa Pristoia iare ro Rovopato, vo uva ora gurupaaepa pris irara voeа reipa irara, ora voeao oira vasi irara, ora Reo Taisi-ia tarai irara. <sup>54</sup> ♦ Uva tauaivi Pita rera sirova uturoepa. Oa iava rera tapo koataroepa vo Rovopato vo tugiaro, oa reroarova oisoa toupaive rera vo kepaaro-ia Pristo. Uva polis irara tapo pauparoepa eto kasi-ia tuituipaoro.

<sup>55</sup> Oire uva reipa irara pris irara oearovu reipa irara Jiu iava oearea ora reoreopaaepa oiso ra Jisas togapaive oara iava reoara vai, auere ra rera kopii pieive oara iava. Uva taraa ragapaiva. <sup>56</sup> Ari ita, oearovu riro irara rera togapaiva oreorovu-ia kuuvu reoro rera vo kovoaro iava. Uva viapau oiso vaea reoro-a. Osa-a eisi iava viapau oreoi puraiva vao oiraopa reo vai rutu. <sup>57</sup> Uva va-a vao isivaaro iava oearovu torepaaepa oiso kuuvupasa oiso-ia, <sup>58</sup> ♦ “Easi oiso rera uvuiova osa oiso puraroepa, Avoeo, vao Tempel pakoavere oa puraiva vavaeara iava. Ra vorevira vo kepa paua ita vo pevavi *raga-ia* voki. Vo kepao oa viapau uvuipaoi ra vavae-ia oira paureve.” <sup>59</sup> Uva ita, viapau vaea reorovi-a varao oara purapaiva rerare.

<sup>60</sup> Uva Rovopato Pristo toreroepa voea vuutaro-ia. Oa iava Jisas akereva oiso, “Ereasipaei vo reo eva aato arapa, raa? Apeisi vo reo-a eva oa-ia vii togapaivoi?” <sup>61</sup> ♦ Ora uru pie ragapaoro viapau oiso rera vo reoaro pukopareva.

Oa iava Jisas akereva rera ita Rovopato Pristo, “Easi vii avu-a Ropoto Krais Pauto Reraaro rutu. Ro Oviitoaaro ira-ia vuurapa vaisi purapaioveira?” <sup>62</sup> ♦ Oa iava Jisas rera vo reoaro pukooro oiso puraroepa, “Ragai rutu vao-ia. Uva Oirato Oviitoaaro *ragai ragoa kekeriverea osa paura vo oirapapa varata-ia Pauto vaaro ira-ia riroa gorua toupaiveira.* Ora vo osa rukuta kouro sovara-ia voreraverea vova vuvuiua.” <sup>63</sup> Oire uva oisi-a eisi osa puraroiva Jisas, Rovopato Pristo ora rera iava kuvupato karikarioro kasipuroepa rutu oiso puraoro, “Uva aa vo reore taraapai toga reo?” <sup>64</sup> ♦ Ari rera uvutavoi osa Pauto tovipare! Uva apeisi vovoupatai?” Oa iava voeа rutu katai reo puraoro rera iava vaseiva oiso ra rera kopii pieive.

<sup>65</sup> Uva oearovu rerapa rui vikipaaepa. Uva rera puaaro tavuruoro rera tapatapapaoro rerare oiso purapaaepa, “Taviu, irouto vii tapare?” Oire uva va-a vao oa iava polis irara rera taparakopaiva.

#### *Pita Jisas Taeareva*

(Matyu 26:69-75; Luk 22:56-62; Jon 18:15-18, 25-27)

<sup>66</sup> Uva Pita otugivivu-ia toupareva reroarovi. Uva Rovopatoapa Pristo oiraaro kovopava urioopa <sup>67</sup> ♦ Pita kekesa osa tuituiparoepa. Oa iava rerava vurapaoro rerare oiso puraopa, “Easi vii vai tapo-a iravu Jisas reraaro ro vova Nasaret-ia.” <sup>68</sup> Oa iava taeaparoepa oiso purapaoro, “Viapau taraiparai vao-ia oare oisi purapaei.” Oa iava kosiro viropa rataoa riaaro iare. Uva kookai kokorokureva. <sup>69</sup> Oa iava ita rera kekeoro

♦ 14:49: Ais 53:7; Lu 19:47   ♦ 14:50: Sam 88:8; Mk 14:27   ♦ 14:54: Jo 18:18   ♦ 14:58: Jo 2:19; Ap 6:14

♦ 14:61: Ais 53:7   ♦ 14:62: Dan 7:13   ♦ 14:64: Lev 24:16   ♦ 14:67: Mk 1:24

voeao tavieva oira o kovopava oea rera ruvara-ia toupaiva, “Easi iravu-a ro voea iava.”  
 70 ♦ Oa iava ora taearoepa ita.

Oire uva gare visivi rerare Pita oiso purapaaepa, “E auoro. Easi vii-a iravu voea iava, uvare vii-a ita Galili iava.” 71 Oa iava ora rerare vuri reo purareva goruvira rutu ora takauoro oiso puraoro, “Avoeao, viapau rutu taraiparai eera-ia ira iava ragaire eisi purapatai.” 72 Uva kookai erao pie gau purareva. Oa iava Pita ora rugoo pieroepa Jisas vo reoarore, vo reo oa iava rera tavireva Jisas, “Kookai touvira erao piepa gau purarevere vo vokiaro ovusa vo peva purari ragai vaisiaro taeapaoro.” Uva ora rugoo pieoro vo reore Pita gau ovoireva rirovira rutu.

## 15

### *Jisas Sipoiva Pailat Ruvara Iare Ro Rom Gavman Iava Rera (Matyu 27:1-2, 11-14; Luk 23:1-5; Jon 18:28-38)*

1 ♦ Uva vokipakou rutu ora reopaaepa reipa irara pris irara, ora Reo Taisi-ia tarai irara, ora oira vasi irara, ora voeao rutu Kaunsel irara ora reoaepa. Oa iava Jisas tuukeiva. Uva voava rera ivuoro avaaepa Pailat iare Jisas vatesa rerapa. 2 Uva Pailat rera akereva, “E vii-a Jiu reraaro king, raa?” Uva Jisas rera aatoreva, “Iu. Eisi osa purau.” 3 Osa iava riroara rutu-ia reoara Jisas togaiva pris irara. 4 Oa iava Pailat vorerivira ita rerare oiso puraroepa, “E reasipau voea aato arapa? Oire uvuri. Easi riro reoro-ia vii togapaivoi.” 5 ♦ Osa Jisas viapau reoparoepa. Oa iava Pailat tavetave iraopareva.

### *Vo Jisas Vatereva Rera Kopii Piesa (Matyu 27:15-26; Luk 23:13-25; Jon 18:39-19:16)*

6 ♦ Vo osa Tagausapa Vurei vao Pasova pura piro ra oisoa iravu tuukepato karupareve Pailat voeapa ro irapa ruipapaave rera kosi piesa. 7 Oire uva iravu ro-ia Barabas ira toupareva oeavu tapo tuukepa irara voeao-ia oea gavman oaiveva ora upopaoro iravu kopii pieiva. 8 Uva poua viropa Pailat ruvara-ia rera aresa oiso, “Vo pitupitu purari oiso osa vara purapariveira.” 9 Uva Pailat oiso puraroepa, “E oiso vovoupatai ra rera karua visiipa ro Jiu reraaro king?” 10 Ari ita, rera Pailat voeao-ia tarairoepa oiso osa oisoa Jisas vo goruaro riiriipaive. Oa iava Pailat-pa rera vateiva Jisas. 11 ♦ Uva reipa irara pris irara oearovu rutu vovouaro kasipu piepaiva, oiso ra aue Barabas karureve voeapa. 12 Oa iava Pailat voeaeakereva ita, “Eake vai purapaa visiipa ro-ia ira vaisipata oiso, Jiu reraaro king?” 13 Uva rirovira ora reoaepa, “Ae! Rera tapata evao parikou-ia!” 14 Uva Pailat oiso puraroepa, “Eake rutupa? Eakea vuri-a oa purarevora?” Oa iava ita voea rutu rirovira ita oiso puraaepa, “Ae! Rera tapata evao parikou-ia!” 15 ♦ Uva Pailat oiso vovouparoepa ra voea rutu vovouaro roru piereve. Oa iava ro Barabas karureva voeapa. Oire uva Jisas vatereva oearovupa. Oa iava rera ragi rovopaoro rera iava taru vasereva voeapa, oiso ra rera tapaive vo evao parikou-ia.

### *Vo Upo Pura Irara Jisas Akaipa Pieiva (Matyu 27:27-31; Jon 19:2-3)*

16 ♦ Oa iava upo pura irara rerava koataaepa gavman vo kepaaro-ia, okepa oisoa vaisipaiwe oiso, Pretoriam. Uva voa ora guruaepa voea rutu upo pura irara. 17 Uva Jisas tuuiva varoa-ia revasipa varo, ora kukuvaipa puraiva rokarokapa iro iava. Oa iava rera kukuvaiva va-ia rera turaro pieoro kuuvuvira. 18 Uva rerare oiso puraaepa avivikevira, “Riro kaekaevira turarovira touri vii vao Jiu reraaro king!” 19 Oa iava aueia pito tapoko rera ragiiva rera kukuearo. Osa ita rera-ia rui vikipaaepa rerare taku viropaooro kuuvuvira. 20 Uva voa rera tovi rovopaivoiva, revasipa varo veraiva rera iava. Oa iava rera vaaro rutu-ia rera tuuiva vorevira. Uva rerava avaaepa rera tapasa.

⊗ 14:70: Ap 2:7    ⊗ 15:1: Mt 5:22; Jo 18:28    ⊗ 15:5: Ais 53:7    ⊗ 15:6: Mt 27:15; Jo 18:39    ⊗ 15:11: Ap 3:14    ⊗ 15:15: Jo 19:1, 16    ⊗ 15:16: Ap 10:1

*Jisas Tapaiva Vo Eva Parikou*  
*(Matyu 27:32-44; Luk 23:26-43; Jon 19:17-27)*

<sup>21</sup> ♦ Oire uva Saimon ro vova Sairini, Aleksanda vaio ora Rufus aitearo ira urioroepa uvavuva. Uva rera aruiva goruvira evao parikou kaesa vao Jisas vaaro.

<sup>22</sup> Uva avaaepa uvavure voa vaisiaro Golgota-ia. Oa porearo oiso toupaiveira, Kukue Keru Pukui. <sup>23</sup> Oa iava rera vateiva wain ovi va uvereoro oavu tapo itakopa ovi, oiso ra ovirei rutu-ia ukaioro. Vo osa vo ovipa reasioepa. <sup>24</sup> ♦ Oa iava rera tapaiva evao parikou-ia, vo osa rera varaaro-ia varoara ora roo pieaepa ora voeapa. Oa iava varare satu visiko purapapaiva.

<sup>25</sup> Aue-ia vo resura vatara vuuta-ia (9 klok) vokipaua, ovuuta-ia rera tapaiva. <sup>26</sup> Oa iava vo vaisio rigatoiva oa vituaro iava rera tapaiva oiso puraoro, JISAS KING OAIIVE JIU.

<sup>27</sup> Uva rera tapo aitereivu tapaiva kavirupatoarei oiso-ia, iravu oirapapa varata iava, ari iravu koike varata iava. <sup>28</sup> [Va vao Tugoropa Vuku iava vo rigato oa oirao pieiva rera-ia va karekeoro, uvare oiso purapapeira, ‘Oa-ia oiso rugooaepa, Iravu ro vuri irara iava rera.’]

<sup>29</sup> ♦ Oire vo osa oearovu rera-ia putepaoro rerare kukue pikupikupaoro oiso purapaaepa, “Aika, ari vii-a vao viigoa Tugoropa Kepa pakosa auepauera. Oire vo kepa vorevira paupari vo peva-ia aue voki! <sup>30</sup> Oire ora tauvau ra evao parikou iava varau!”

<sup>31</sup> ♦ Uva pris irara reipa irara, ora Reo Taisi-ia tarai irara tapo rera akaipa piepaiva rerare oiso purapapaoro, “Ia, ari oearovu oisoa tauvapareve. Uva viapau oiso ra oisi ora rera raga ora tauvaro. <sup>32</sup> Oire vosa vii oiraopatoa rutu Ropoto Krais Pauto reraaro vii Isrel reraaro King, oire varau evoava evao parikou. Ra vii oirao pieio va iava!” Vo osa vaitereo tapo aiterea tapo rera tapaiva rera akaipavira reopasiepa.

*Jisas Kopiiroepa*  
*(Matyu 27:45-56; Luk 23:44-49; Jon 19:28-30)*

<sup>33</sup> Oa iava ravireopa vuuta-ia (12 klok), ravireo utoroiva, rupa rovoepa voeare aue-ia rekasisa vo peva vuuta (3 klok) vokiarovi vo taere rutu-ia vao. <sup>34</sup> ♦ Oa iava vo peva vuuta-ia rirovira oiso puraroepa Jisas, “Eloi, Eloi lama sabaktani.” Oa vao porearo oiso purapapeira, “Pautoa oaa, Pautoa oaa. Eakere ragaivi kavuri?” <sup>35</sup> Oa iava rera oisi uvuiva voeao oea toupaiva rera ruvara-ia. Oire uva oiso puraaepa, “Uvuta. Keeraroi Ilaija-re.”

<sup>36</sup> ♦ Uva iravu ikaureva iruta rupu piesa aue-ia uureopa viniga ovi. Oa iava evao rao-ia vo ovi vatepareva rerapa Jisas oiso purapapaoro, “Tue rovota osa Ilaija rera rere piesa urio rovoro pasi.” <sup>37</sup> Uva Jisas rirovira gauoro vovouisi vikireva kopii ovoioro.

<sup>38</sup> ♦ Osa riroua varoua Tempel rataoa-ia kotovira touua, oua vurita piropa varei puraoro vova Pauto vo topisiaro viara iava rovoepa vore rasiusaaro. <sup>39</sup> Oa iava ro ira oisoa katai vovoto (100) viurupa irara tokipareve rera Jisas eveireva vosa kopii ovoiroepa. Oa iava oiso puraroepa, “Oiraopavira! Oviitoaaro Pauto eera-a!”

<sup>40</sup> ♦ Uva riakora tapo toupaiva voa rerava vurapaoro tauaiva. Uva aue tapo toupaeva vao Maria aue iava Makdala ora iriavu ita Maria Jems aakoaro ro avaioto, ora Josis, ora Salomi. <sup>41</sup> Uva voea-a voeao oea rera oisoa sirova utupaave rera tokipaoro vo osa toupareve Galili, ora airovu riro riako rutu airoa tapo rera sirova utuaepa Jerusalem iare.

*Aveke Rikui-ia Jisas Tovoiva*  
*(Matyu 27:57-61; Luk 23:50-55; Jon 19:38-42)*

<sup>42</sup> ♦ Uva vo ovaiarovu vo vokio ovokia oisoa vaisipaise, Aio Ravaapa Voki vo vokio iare Sabat voki. <sup>43</sup> ♦ Ovokia-ia urioroepa Josep vova Arimatia ro torevoko vovouto Kaunselto. Ro ira oisoa Pauto vo Saraarore tapo rugorugooparo vare tuepaoro. Ira Pailat iare uriri asavira avaroepa. Uva Jisas kopire rera arepareva. <sup>44</sup> Oa iava Pailat rirovira rugorugooroepa, uvare ikauvira kopii ovoiroepa Jisas. Uva ro ira oisoa katai vovoto (100)

---

♦ 15:21: Lu 23:26; Ro 16:13   ♦ 15:24: Sam 22:18   ♦ 15:29: Sam 22:7; Jo 2:19   ♦ 15:31: Sam 22:8   ♦ 15:34: Sam 22:1   ♦ 15:36: Sam 69:21   ♦ 15:38: Hi 10:19-20   ♦ 15:40: Sam 38:11; Jo 19:25   ♦ 15:42: Diu 21:22-23  
 ♦ 15:43: Ap 13:50, 17:12; Lu 2:25, 38

viurupa irara tokipareve rerare keeraroepa Pailat. Oa iava rera akereva, “E kopiiroe Jisas?”<sup>45</sup> Uva viurupa irara tokipato vo taviaro uvureva oiso, Kopiiroe. Oa iava Jisas iava varaua vatereva Josep-pa.<sup>46</sup> Oa iava rera Josep ouavu vorireva varoua popoteua. Oa iava Jisas rere piereva rera tavurusa va-ia varoa popotea. Oa iava rera tovoreva aveke rikui-ia, oa ravaavira teka ragaiva rirova-ia aveke. Uva vo rikui iare iriavu rirova aveke perireva iria-ia vo riku riaaro ivitasa.<sup>47</sup> Uva vao isivaaro iava Maria Makdala vairei ora iriavu ita Maria Josis aakoaro airea tapo voa kekeereva vo uva Jisas tovoiva.

## 16

### *Jisas Vorevira Toreroepa Tova Iava (Matyu 28:1-8; Luk 24:1-12; Jon 20:1-10)*

<sup>1</sup> ♦ Oire uva Sabat voki isivaaro iava Maria Makdala, ora Maria aue Jems aakoaro ora Salomi airoa vearo geesipara voriiva, oiso ra varava avaave Jisas varaaro kipusa.<sup>2</sup> Vo vokipakou rutu-ia vo vokio-ia rovopa voki wik iava oa-ia avaaepa tova urui iare. Vo ovusa ravireo kaeparo viropa.<sup>3</sup> ♦ Oa iava ora akeakepaaepa voa oiso, “Esa, irou vai vigeipa vao aveke veravere vova rikui riaaro iava?”<sup>4</sup> Uva voava vurapaiva tuupavira. Oa iava ore rirova aveke vura ragaiva iria voava peri ovoio viropa.<sup>5</sup> Uva koatapaaepa rikui-ia. Uva voa iravu kekeiva viovokoto ira oirapapa varata-ia pauparoepa popotetoea-ia kuvupaoro. Oa iava ropeaepa.

<sup>6</sup> Uva vairo tavireva oiso puraoro, “Opeita uriripata. Jisas ro vova Nasaret-ia, ro ira kopii pieivora, irare taraapatavoi ita, ira vorevira toreroi. Viapau oiso vo touparevoi. Keketa. Vo uva ita rera tovoivorao. Uva viapau.<sup>7</sup> ♦ Oire voreta disaipel tavisa rera voeaaro Pita tapo. Ira ita iraroe eisi Galili-ia. Uva voa rera keketavere oiso osa visii tavirevora.”

<sup>8</sup> Uva rikui iava torioro voreaeaosa rikerikepaoro ora ropepaoro tapo. Uva viapau oiso oearoiva ora reopaaepa, uvare rirovira uriripaaepa.

### *Jisas Ora Karekeroepa Maria Iare O Vova Makdala (Jon 20:11-18)*

<sup>9</sup> ♦ Uva toreroepa Jisas vokipakou-ia avitoava rovopa voki rupaaro iava vo wik iava. Oa-ia Maria o vova Makdala iriare ora karekeroepa rovovira. O iria iava erao vatara sigureva aue tugara.<sup>10</sup> Oa iava voea tavitavisa kareopa voeao oea oisoa rera tapo toupaive. Vo osa gau eraro-ia gaupaoro gaupaiva.<sup>11</sup> Oire vo osa oisi uvuiva oiso, Vorevira tootooro toreroi, oa iava rera kekeeva. Uva viapau oiso oira vo reoaro oirao piepaiva.

### *Jisas Ora Karekeroepa Disaipeltoarei Iare (Luk 24:13-35)*

<sup>12</sup> Oire va isivaaro iava vaitereore ita ora karekeroepa pisavira aiterea raiva-ia vokapasiva.<sup>13</sup> Oa iava va iava voeapa tavitavisa karesiepa. Uva ita, viapau oiso vaiterei vo reoroaro oirao piepaiva.

### *Jisas Katai Tau Katai Siporeva Voraro Ruture Aueva Rera Vo Goruaro (Matyu 28:16-20; Luk 24:36-49; Jon 20:19-23)*

<sup>14</sup> ♦ Oire uva voea-ia katai tau katai (11) iare ora karekeroepa osa aiopaiva. Oa iava voeare aveavevira reoroepa aue-ia kaureo rugoo oaive ora aue vavagisi vovouro oaive. Aue iava uvare viapau voeao reoaro oirao piepaiva oea rera kekeiva vo osa toreroepa.

<sup>15</sup> Uva voea tavireva oiso puraoro, “Avata voraro ruture vo rasio-ia Vearo Siposipo iava tavitavisa oirara rutupa.”<sup>16</sup> Ro oirato ira ragai oirao pierevere ra baptaisa oureve, ira-a eera ira ourevere Pauto ora rera iare. Ari ro ira viapau oirao pieparevere ira iava viapau oiso opesipaperea rera vaaro vuri vovou.<sup>17</sup> Uva varao ravaa reesiro toupavere voeao-ia oea oirao piepaiveira oiso-ia, Taraiavere tugara kare sigupasa vo raga ragai vo

---

♦ 16:1: Lu 23:56; Jo 19:39    ♦ 16:3: Mk 15:46    ♦ 16:7: Jo 21:1-23    ♦ 16:9: Jo 20:11-18    ♦ 16:14: Lu 24:36-38; Jo 20:26

goruaro-ia, ora pisa reoro-ia ora reopaaverea. <sup>18</sup> Oea rakoru-ia pituivere, ora itakopara-ia ukaioavere. Uva varei rutu evarei uvuipai oirato kopii pieve. Ari ita, viapau oiso voea vuri piepaivere ita vareo. Oea ita vavaeara oaive tovopaivere voeao-ia upiapa irara voea porete piepaoro.”

*Jisas Iparoepa Vuvuiua Iare  
(Luk 24:50-53; Aposel 1:9-11)*

<sup>19</sup> ♦ Oire uva vo tavitavia vao isivaaro iava Pauto rera ipa pie ovoireva Turaro Jisas vuvuiua iare vo uva pauparoveira oirapapa varata iava Pauto vaaro. <sup>20</sup> ♦ Uva va-a vao oa iava ava ovoiaepta voraro ruture rera iava siposiposa. Vo osa Turaro voea vo siposiporoaro oirao piereva aue-ia ravoto kovoro.

## LUK Irapa Reoro Vo Vukuo Iava

Rera-a ro Luk ira oisoa dokta kovo purapareve. Voea iava rera ro Jentael-pa irara. Uva rera vo rigato purareva aue-ia 60 o 70 yia Jisas vo kavauaro isivaaro iava.

Luk oisoa vokapareve Pol tapo vo vuutao-ia oa-ia oisoa Pol tapo toupareve vo Troas urui-ia (Ap 16:10-41). Uva vo vuku-a vao oa rigatoreva Pol tapo toupaoro vo tuukepa kepa-ia (Ap 27:1-28:16).

Oa iava vo siposipo oa rigatoreva Jisas iava, oa-ia oiso puraroepa, Jisas ira oiso rutu oisoa toupareve vo rasio-ia oiso osa oirara. Ira siraoa vo vavataaro sovoreva oiso rutu osa vigei oirara. Ira rirovira voeao rutupa oisoa siraoparo voeao oiso-ia, kakae vure, ora vairo rare riako, ora voeao apotapa irara, ora voeao upiapa irara, ora oearovu rutu tapo oirara. Luk riro reoro rigatoreva variria vo pitupituaro iava (Lu 3:21, 5:16, 6:12, 11:1, 22:32, 23:24-26), ora aue iava Tugoropato Uraurato vo kovoaro iava tapo (Lu 4:1-14, 10:21, 24:49).

1. Ira pie reo vao iava oa ora karekepere, 1:1-4.
2. Vaiterei kavauaro iava Jon Baptais vaio ora Jisas, ora vo osa rioparoepa Jisas, 1:5-2:52.
3. Jon Baptais voraro virireva oirarapa siposipopaoro, 3:1-20.
4. Jon Jisas baptaisreva vo uukova-ia Jodan. Oa iava avaroepa Jisas raaka tapi iare vo uva kokarapato Seten rera-ia kokaraparoepa, 3:21-4:13.
5. Jisas Galili taere sovara-ia virireva rera vo kovoroaro ravoto kovoro purapaoro, 4:14-9:50.
6. Jisas Galili iava avaroepa vore Jerusalem iare Jeriko urui-ia puteoro, 9:51-19:27.
7. Turarovira koataroepa Jisas Jerusalem urui-ia ovoiopa wiki-ia toupasa, ouruia-ia oeau rera kotoiva evao parikou-ia, 19:28-23:56.
8. Vorevira toreroepa Jisas vo pevapa voki-ia, oa iava ovokivu-ia disaipel irara iare ora karekeroepa ora oearovu iare tapo, 24:1-53.

### *Luk Vo Siposipo Rigatoreva Auepa Tiofilas*

<sup>1</sup> Reito Tiofilas, vo tuariri uva oearovu rovoaera siposipoara rutu rigatooro varao rutu iava oara karekereva Pauto igei rutu vuutaaro-ia. <sup>2</sup> ♦ Vo eoa gisipoaro sirova utuaera oea Jisas vo kovoaro kekeiva ora voea osireiaro iava voari rovoa-ia ora vo vokiara rutu-ia tapo. Aue iava uvare voeoa oea oisoa oiso toupaive, Pauto vo reoaro kosi piepa irara. Uva voeoa evoea oea igei vateivora vo siposiporo varao. <sup>3</sup> ♦ Uva oisi-a eisi osa iava ragai tapo ita vo siposipo rigatopaavoi, oiso ra viipa reito Tiofilas va sipoa, vo rara vara rutu vituarore taraa rovopaavoi vearoviria. Ra va iava torevokovira vara rigatoa oiso rutu osa tuariri karekeepa. <sup>4</sup> Eisi osa iava uvuipau ra vara-ia vearoviria taraiu oiso, Oiraopara varao oara-ia vii siposipoivora Jisas vo kovoaro iava.

### *Vo Sekaraia Tavireva Enselto Jon Iava Ira Kavaurovere*

<sup>5</sup> ♦ Vo osa King Herot reiparoepa ro vova Judia taere-ia, osa vo vuuta-ia oisoa iravu korouou purapato pristo toupareve. Rera vaisiaro, Sekaraia voeao iava pris irara Abaisa voeao. Ari o-ia tapo Ilisabet vatuava vo sarao iava oira pris irara voeao Eron voeao. <sup>6</sup> ♦ Aiterea vaitereo oisoa torevokovira rutu oisoa toupasi Pauto osireiaro-ia. Uva varao Reo Taisiro rutu oara oisoa oirao piepasi, ora varao Pauto vo reoroaro. Oa-a vao oa iava viapau viria vai vaiterei-ia. <sup>7</sup> Vo osa viapau vaiterei ovitoa vaiaro, uvare Ilisabet-a asaova. Oa iava viapau oiso kakae kavaupao. Uva avuka ragasiepa kakae kavau asavira.

♦ 1:2: Hi 2:3; 1 Pi 5:1   ♦ 1:3: Ap 11:4, 18:23, 1:1   ♦ 1:5: 1 Kro 24:10   ♦ 1:6: Jen 7:1

<sup>8</sup> Oire uva ovokivu-ia Sekaraia pris kovo purareva Pauto osireiaro-ia vo vuutao-ia oa-ia oisoa rera voeaaro pris kovo purapaive. <sup>9</sup> ♦ Uvare oisi rera reesiiva voea vo pitupituaro sirova utupaoro, oiso ra Tugoropa Tugi-ia koataparo vao Turaro Pauto vaaro, aue korouou kuparero purapasa. Otugia-a vao oa Rovopa Kepa Lotupa Kepa Tempel sovara-ia rutu oisoa toupaive. <sup>10</sup> ♦ Oire uva vo vuuta vao korouou kupare purapa vuuta oa-ia riro irara rutu Jiu ora guruaepa varirisa ratauva. <sup>11</sup> Uva Sekaraia purapurapato enselto kekereva eravao vatuarto-ia oirapapa varata iava, uvare voa rera ruvara iare karekeroepa. <sup>12</sup> Oa iava voa rera kekeoro rirovira ora sitaroepa. Uva uririparoepa. <sup>13</sup> Uva enselto rerare oiso puraroepa, "Sekaraia. Teapi uriripau. Ari Pauto vii vaaro variria uvurevoi. Uva vii tavipaavoi oiso, Viit valuavaaro Ilisabet veipa oviito oaesi kavauevere. Oa iava oiso rera vaisirivere rara, Jon. <sup>14</sup> Osa iava vii iava sopaua vearovira touvere ora tapo rorurivere. Ra riro irara tapo roruivere rera-ia ovusa kavauro. <sup>15</sup> Ira rei vaisirovere kovopaoro vo Turaro Pauto osireiaro-ia. Uva viapau rutu oiso ukaioparovere varao-ia riro gorupara aue wain oviro, vo oviro oara uvuipai oirara kokoro piepasa. Ira-ia goruvira touparevere Tugoropato Uraurato rera iava sopaua uvui piepaoro vo vuutao-ia vao vo osa aakova kovuaro-ia touparevere, ora vo osa kavauro. Uva vukuparovere Tugoropatoa-ia Uraurato. <sup>16</sup> Ira riro irara roroiovira soporeparevere voeao vova Isrelia. Ra Turarore poreave ro voea reraaro Pauto oaive. <sup>17</sup> Ira-ia Tugoropato Uraurato ora gorua toupaivere, ro Uraurato ora vo goruo oarea oisoa Ilaija-ia toupaive vo osa Pauto vo reoaro kosi piepareve voari tuariri. Ra iraparo Reitoapa Turaro. Eera oviitoara ira vo aaoro rutu vovouaro porerevere ra ora agiagiave ora voeao tapo riro kaureo irara. Oire ra va iava vearo rugoo ouive voeao torevoko vovou irara vaaro. Ora voeao tapo oirara rera voeao ravaarevere ra Reitoare Turaro tuevira toupaive rera vo kovoaro purapasa."

<sup>18</sup> Uva va-a vao oa iava Sekaraia rerare enselto oiso puraroepa, "Uva eake iava oiso puraravere, Oiraopa reo vao-ia? Easi ragai avukaraerao vegei rutu ora riakova oaa."

<sup>19</sup> ♦ Oire oa iava enselto oiso rera aatoreva, "Ragai-a Gebriel ragoa Pauto ruvara-ia to reparaveira. Ari ita, uva Pautoa raga-a ira ragai arurevoi oa iava uriorai vii tavisa vao iava vearo siposipo vii oviitoaaro iava. <sup>20</sup> ♦ Oire uvuri! Viit iava gisipo kapuuvevoi, uvare viapau ragai vo reoaro oirao pieparivoi. Ra viapau reopau vo rutu rekasisa, uva vara rutu varao karekepere ragai vo reoroaro oirao pieoro."

<sup>21</sup> Oire uva voeao rutu oirara rerare tue ragapaaepa Sekaraia oiso purapaoro, "Eake vai karekei Tugoropa Tugi-ia rerare oa iava viapau vigei tavisa kosiro viroi?" <sup>22</sup> Uva va isivaaro iava kosiro viropa. Oa iava viapau voeapa reoara vai vatereva. Uva va iava oiso taraiaepla, Easi oavu avu rutu kekerevoi evoa Tugoropa Tugi sovara-ia. Uva vavaea ragai voeare reoreoparoepa uvare gisipo rerare kapuuveva. <sup>23</sup> Oa iava Sekaraia vo kovoaro vao korouou purapa kovo opesiepa. Uva vorevira kareroepa ora rera vo uruiaro iare. <sup>24</sup> Oire uva va-a vao osa kakae kovu pura piropa oira kovuaro-ia Ilisabet. Oa iava oisoa toupaeve vo kovuva vo raga oira vo kepaaro raga sovara-ia vo vavae rutu sovara-ia aue kekira. Oa iava oiso puraopa, <sup>25</sup> "Ari ita, kakae kavau asava ragai. Uva Turaro Pauto ragaipa siraoroi. Oa iava oiso ragai pierevoi ariia veraoro ragai iava oirara rutu osireiaro iava."

#### *Enselto Maria Tavireva Jisas Iava Ira Karekerovere*

<sup>26</sup> ♦ Uva katai vatara-ia (6) kekira kakae kovuva toupaeva Ilisabet-ia, ovusa Pauto purapurapato Gebriel arureva ouruivu iare vo uruio Galili taere-ia. Va vaisiaro, Nasaret.

<sup>27</sup> Osa iava avaroepa iriavu iare tavauruva riakova iria reesiiva oiso ra oirato oira oureve. Rera vaisiaro, Josep, King Devit aao iraraaro iava rera. Uva oira vaisiaro-a, Maria o-ia iria viapau oiratoa vaiva uusiopa. <sup>28</sup> ♦ Oa iava Gebriel oira iare avaroepa. Uva oirare oiso puraroepa, "Vearovira Maria. Pauto vii viraakopare viipa siraoro. Oa iava Turaro vii tapo toupareveira vii tauvapaoro."

<sup>29</sup> Oire uva Maria vo reo vao uvuevoiva, oirare sopaua vavataepa rirovira rutu oiso rugorugoopaoro, Apeisi raga reo-a vao-ia?

♦ 1:9: Eks 30:7-8    ♦ 1:10: Lev 16:17    ♦ 1:19: Mt 18:10    ♦ 1:20: Esi 3:26, 24:27    ♦ 1:26: Mt 2:23

♦ 1:28: Dan 9:23

<sup>30</sup> Oa iava purapurapato enselto oiso oira tavireva, “Maria. Opeita uriripau. Pauto vo vovouaro veearopa vii-ia. <sup>31</sup> ♦ Uvuri! Kakae kovu purapapi vii-ia rara, ra iravu kavauri kakaeto ira vaisirivere oiso, Jisas.

<sup>32</sup> ♦ “Ira turarovira toupareverea. Oa iava oiso rera vaisiiverea, Pauto Oviitoaaro ro oiso viara-ia. Oa iava Pauto turarovira rutu rera tovorevere oiso rutu osa rera aaotoaaro King Devit. <sup>33</sup> ♦ Ira taru Jekop voeaaropa Jiu-pa irara turoparoverea vokiara rutu-ia. Ra rera vaaro tokia viapau oiso opesiperea.”

<sup>34</sup> Oa iava Maria rerare enselto oiso puraopa, “Uva apeisi ragavira karekepere va vao-ia, uvare oira ou asavira toupaavoi.”

<sup>35</sup> Oire uva enselto oira vo reoaro pukooro oiso puraroepa, “Ari! Tugoropato Uraurato ira vii iare uriopa, vo osa Pauto vo goruaro vii ruuve. Eisi osa iava rera reraaro kakaeto kavaurivere rara utupavira. Uva va-a eva vituaro iava oiso rera vaisipaivere oiso, Roroio Vovoutoa Rutu Pauto Oviitoaaro.

<sup>36</sup> “Uvuri! Easi Ilisabet sarava oara iria avukaopa rutu. Iria-ia kakaetao epao oira kovuaro-ia. Iriare tuariri oisoa oiso purapaave, Viapau uvuipaoi ra kakaetao vai kavaueve. Ovusa vo vokio-ia oira kovuaro-ia kakae kovuei. Ari ita! Katai vataro (6) kekira oira vaaro oa putevoi. <sup>37</sup> Pauto uvui iraopa auero rutu purapasa.” Uva oisi-a eisi Maria tavireva enselto vo osa vairei reesipareva vaseo airea kakaetaorei kavausa aeapaereiepa.

<sup>38</sup> Oa iava Maria rera vo reoaro aatooro oiso puraopa, “Ari ita! Ragai-a Turaro oiraaro kovopava. Ira uvuipa ra ragaipa oisi va purareve oiso osa purauei.” Oa iava enselto oira arova avaroepa.

### *Maria Ilisabet Kekesa Avaopa*

<sup>39</sup> Oire uva vo vuuta iava vao vo vokia Maria toreoro ikauvira avaopa ouruivu iare pukuiara vuutaaro-ia vo Judia taere-ia. <sup>40</sup> Oa iava Sekaraia vo kepaaro-ia koataopa. Uva voa Ilisabet-va vearo voki puraeva. <sup>41</sup> Uva Ilisabet Maria uvueva osa oirava vearo vokieva. Ovusa kakaeto oira kovuaro-ia toupareva Ilisabet. Uva voa toritoripareva. Oa iava Tugoropatoa-ia Uraurato agasiopa Ilisabet. <sup>42</sup> ♦ Oa iava rirovira rutu goruvira reoopa oiso puraoro, “Vii-ia riroa viraakoa toupaivoi Pauto vaaro. Oa vituaro iava vii vo roruardo oriakorovu rutu vo roruroaro-ia putepaivoi. Uva eera tapo kakaeto vava touparevoi iraei vii kovuaro-ia. <sup>43</sup> ♦ E apeisi vai ragai iare taveteevoi Turaro aakoaro. Asi viapau riro vaisivavi-a ragai? <sup>44</sup> Ari ita! Viu uvuavoi ovusa ragaiva vearo vokirivoi vo pou virooro. Oa iava kakaeto ro iraei ragai kovuaro-ia vo uvava ora sitaoro rorurevoi. <sup>45</sup> Viu-a vao riakova viigoa roruava touparivoi vo rera vo reoaro oirao pieoro oiso osa vii tavirevo. Uva oisi oiraopavira vii-ia karekepere.” Eisi osa puraopa Ilisabet oirare Maria.

### *Erava Maria Oiraaro*

<sup>46</sup> ♦ Maria oiso puraopa,

“Ragai iava sopaua oaa Turaro vaisiaro kae piepaivoi. <sup>47</sup> ♦ Oa iava ragai reraaro uraurato Pautoa-ia roruparevoi ro ira ragai virivaripareveira. <sup>48</sup> ♦ Ragai-a vao rerapa kovopava. Ragai akaipavavi raga ragoapa siraoroi. Vo vokio ora vo utupaua uva oirara rutu ragai iava oiso purapaavere, Pauto oirapa riroa vaterevoi rorua. <sup>49</sup> ♦ Aue iava uvare riro gorua rutu purare ragai-ia. Rera raga ro Tugoropa Vaisitoa Rutu, ira riro kovo purapareveira. <sup>50</sup> ♦ Ira vaaro siraoa voeaopa toupae oea rera rei piepaiveira rerapa avivikepaoro. Oire uva oisi raga ita voeaopa tapo siraoparoverea ovii irara oiraraaro. <sup>51</sup> Ira iava vavae-a riro goru kovo purava. Ora voea sikasikareva voea siguoro voeo riro kaureo irara oea oisoa ora rei vaisi piepaave ora voea raga. <sup>52</sup> Ira reipa irara vaisiaro vara pierava voeo raga ita pieoro akaipa vaisi iraravi. <sup>53</sup> Ira voeo sopaaro vuku piepareveira oea iava sopaura ogopeapeira veearoparapa. Vo osa voeo vore pierave riro kotokoto guru irara, vo osa viapau oarai ouive rera ruvara-ia.

❖ 1:31: Ais 7:14 ❖ 1:32: Ais 9:6-7 ❖ 1:33: Hi 1:8 ❖ 1:42: Het 5:24 ❖ 1:43: Lu 2:11 ❖ 1:46: 1 Sml  
2:1-10; Sam 34:2-3 ❖ 1:47: Sam 35:9 ❖ 1:48: Sam 138:6 ❖ 1:49: Sam 71:19, 111:9 ❖ 1:50: Sam 103:17

<sup>54</sup> ♦ Uva rerapa kovopa irara tauvarevo vigei vao Isrel, uvare rera vaaro re siraao rugooroe. <sup>55</sup> Oiso osa puraroepa vigei aao iraraarore oiso, Ebrahim-pa siraoparaverea ora rera voeaaro utupa irara voari rutu tugurasa utupa vokiro rutu-ia.”

<sup>56</sup> Maria vo peva-ia kekira Ilisabet tapo toupaeva. Oa iava vorevira ora oira vo uruiaro iare kareopa.

### *Ilisabet Jon Kavaueva*

<sup>57</sup> Oire uva oira vo vuutaaro pou piropa. Oa iava oviito kavaueva Ilisabet. <sup>58</sup> ♦ Uva voeao oira vo uruiaro-ia tou irara ora sara irara oea rutu vo siposipo iava vao uvuiva. Vo uvare Turaro Pauto oirapa siraoroepa rutu. Uva va-a eva oa iava oira tapo rorupaiva.

<sup>59</sup> Uva vo peva vatarapa voki (8) pou piropa. Oa iava vo voki-ia urioaepa rera kakaeto iava rakari verasa rera-ia vo vaisio tovooro, Sekaraia, aiteto vaisiaro. <sup>60</sup> Vo osa aakova oiso puraopa, “Viapau. Ari vao iava oiso rera vaisipai, Jon.” <sup>61</sup> Uva oirare oiso puraaepa, “Uvare saratoa vai oara oisi ovaisiea oa oisi toupai, oa iava oisi ruipapuae?” Viapau!”

<sup>62</sup> Oire oa iava vavaeara raga-ia Sekaraia akeiva oiso, “Aa vo vaisio-a vao oa iava rera vaisipai ro-ia vii oviitoaaro?” <sup>63</sup> Uva slet pero arereva. Oa iava vo vaisi vao Jon-pa rigatoreva va-ia voeapa. Uva rirovira rugorugoopaepa. <sup>64</sup> Oire uva vo vuuta raga-ia Sekaraia iava gisipo karu ovoio viropa. Oa iava arevuoto rera iava vorevira vearoroepa. Uva va iava Pautoa-ia vuurapa vaisi pura ovoireva. <sup>65</sup> Uva voeao rera vo uruiaro-ia tou irara uririaeapa. Oa iava vara rutu iava varao vo siposipo viriva vo Judia pukuiro vo taerearo rutu-ia. <sup>66</sup> ♦ Uva va iava oirara rutu vo siposipo vao uvuoro rirovira rutu tavetavepaiva rugorugoopaoro vo ora voea iava sopaura-ia. Uva oiso puraaepa, “Esa apeisi vai ragavira utupaua touparevere rera ro kakaeto?” Ari ita! Uvare tarapaaepa oiso, Pauto vo goruaro toupai rera-ia.

### *Sekaraia Oiraaro Erava*

<sup>67</sup> ♦ Oire uva Tugoropato Uraurato Sekaraia sopaaro-ia koataroepa rera vuku pieoro ro kakaeto aitetoaaro. Oa iava ravaa reo purareva oiso puraoro,

<sup>68</sup> ♦ “Turaro vaisiaro-ia vuurapa vaisi purape, ro Pauto Isrel reraaro. Ira vigei oirara tauvasa urioroi ora rera voearo. Uvare vigeipa oraivavu purareva oraiva iavirava uvuipavieie ra virivarivira toupape. <sup>69</sup> ♦ Uva vova rera kovopatoaaro Devit ira sara iraraaro iava iravu riro goruto oirato tore pierveoi vigei oupasa vorevira ora rerapa vova vuria iava. <sup>70</sup> Eisi osa siposiporeva voari tuariri profet irara gisipoaro-ia voeao torevoko vovou irara. <sup>71</sup> Oa-ia oiso puraroepa, Vigei virivaripareverevoeao vavaearo iava oea vigeiva keripaaveira, ora voeao tapo vavaearo iava oea vigeire vuri vovoupaaveira rutu. <sup>72</sup> Ira vigei aao iraraarore oiso puraroepa, Visii tauvapaaverea. Oire uva va-a vao Reo Ovoi oare rugoooro va oirao pier vigeipa. <sup>73-75</sup> ♦ Eisi osa puraroepa rore vigei aaotoaaro Ebrahim va vao Reo Ovoi puraoro oiso, Vigei vorevira vore ovoireverevoeao vavaearo iava vigeiva keripa irara. Ra va iava rera vo kovoaro purape uriri asavira. Rara avivikepavio rera osireiaro-ia aue torevoko vovou purapaoro vokiara rutu-ia.

<sup>76</sup> ♦ “Oire uva vii-a vao kakaeto viigoa vaisiiverea oiso, Profetato Pauto reraaro ro oiso rutu viara-ia. Viigoa irauvere Turaropa raiva vatatopopaoro. <sup>77</sup> Uva oirara rutu siposiporevevoeao rera voearo. Oire ra vo reoro iava taraiave oiso, Ira taru voeao iava vuri vovouro verapareverevoeao vorevira oupaoro ora rerapa. <sup>78</sup> Aue vituaro iava uvare rirovira vigeipa siraopa vovou purapareveira Pauto ro vigei reraaro. Osa oiso piepareverevoeao ro ira ora rera iava aviavi piea vatepareverevoeao vigeipa. <sup>79</sup> Osa iava voeaoopa aviavia vatepareverevoeao kopia vo goruaro sovara-ia toupaveira voeao rupa vovou irara. Uva vigei kokotoaro torevokoreverevoeao vigei tuvetuvepaoro. Ra va iava gavaure vovou vo raivaaro-ia vokape.”

Eisi osa puraroepa Sekaraia.

◊ 1:54: Sam 98:3   ◊ 1:58: Jen 19:19   ◊ 1:66: Lu 2:19, 51; Jen 39:2; Ap 11:21   ◊ 1:67: Joe 2:28   ◊ 1:68: Sam 72:18   ◊ 1:69: Sam 89:17, 132:17   ◊ 1:73-75: Ro 6:18   ◊ 1:76: Mal 3:1, 4:5

<sup>80</sup> Oire uva riroroepa rera kakaeto. Uva rera iava varaua ora uraurato goruvira karekeepa. Oa iava vo toureva raaka tapi vo tugurasa uva ora karekeroepa Isrel-pa irara osireiaro-ia ro auve Jon.

## 2

*Maria Jisas Kavaueva  
(Matyu 1:18-25)*

<sup>1</sup> ♦ Vo vuuta-ia vao oa-ia King Sisa Ogastas oavu reo ovoi purareva, oiso ra vo voki-ia oirara rutu vieiaro vaivaisiaro ouive. <sup>2</sup> Oire uva rovopa voki rutu-a va vao oa-ia vaisi oupaaepa oirara rutu iava. Ovusa aue Sairinias voa reiparoepa gavmanpaoro vo Siria-ia vo vo voki-ia eva. <sup>3</sup> Uva oisi-a eisi osa iava voea rutu oirara vo urui iare eva voeä rutu vo uruiaro torevokoaro avaaepa, oiso ra voea rutu vaivaisiaro vieiaro ouive voa. <sup>4</sup> ♦ Ari ita, Josep-a Devit sara iraraaro iava rera. Oa iava ora rera vo uruiaro iava gare urui avaroepa vao Nasaret vo Galili taere-ia. Oa iava voare vo Judia avaroepa vo King Devit vo uruiaro-ia uva oisoa vaisipaive oiso, Betlehem-ia. <sup>5</sup> Uva oira tapo Maria avaroepa voare o iria reesiiva rerapa, oisore ra vaiterei rutu vaisiaro tapo ouive voa. Vo osa kakae kovuva toupaeva Maria. <sup>6</sup> Uva vo urui raga-ia vao Bethlehem urui touvira toupasiva. Oa iava voa kakaeto kavausa auveopa. <sup>7</sup> Oire uva bulmakau kare vo kepaaro-ia toupaoro rera eera avaiotoa rutu ira kavaueva voa, uvare tavetepa irara vo kepaaro agasiepa. Oa iava voa rera ruueva varoa-ia. Uva voa rera uusi pieeva bokis-ia o iria-ia oisoa bulmakau kare aiopapae.

*Purapurapa Irara Ensel Sipsip Tokipa Irara Taviiva*

<sup>8</sup> Uva voa-a vo uva oearovu sipsip tokipa irara toupaiva vo urui vatuar-ia voea vo raguairoaro tokipaoro vokiaro. <sup>9</sup> ♦ Uva Turaro reraaro ensel voea iare urioroepa. Uva voa Turaro vaaro keraria voeare sisikorevira aviaviva. Oa iava rirovira rutu uririaepla. <sup>10</sup> Uva enselto oiso puraroepa voeare, “Opeita uriripata. Uvuta! Ragai visiipa Vearo Siposipo sipoavoi vao oa oirara rutu roru pie iraovere. <sup>11</sup> ♦ Vo voki-ia vao oa-ia iriavu riakova kakaeto kavauevoi vo King Devit vo uruiaro sovara-ia. Ro ira visii ourevere vorevira vova vuria iava. Eera Krais Turaro ira Pauto oiraraaro tuvetuvepareverea. <sup>12</sup> ♦ Uva ora visii vo reesiroaro iava rera vo kavauaro-ia taraitai eisi osa. Uva rera kakaeto keketavere ira ruuevo varoa-ia rera uusi piesa bulmakau kare aiopavaaro-ia bokis.”

<sup>13</sup> Oire uva voavi ragava riro irara rutu vuvuiua-ia tou irara poua viropa vuvuiua iava vo toupasa enselto ruvara-ia. Oa iava Pautoa-ia vuurapa vaisi purapaoro oiso purapaaepa erapaoro, <sup>14</sup> ♦ “Pauto vaisiaro-ia vuurapa vaisi purata vo vuvuiua rutu-ia. Ra gavaure vovou rutu outa vo rasitoa-ia toupaoro visii vao visiigoa-ia rorupareveira Pauto.”

*Sipsip Tokipa Irara Jisas Kekesa Avaaepa*

<sup>15</sup> Oire uva enselpa irara voea arova voreaepla vuvuiua iare. Oa iava voeao sipsip tokipa irara ora reoepla oiso “Irata, ra avavio voare Bethlehem-ia. Ra va avu kekepe vao oa karekei voa oa iava Turaro Pauto vigei tavirevoi.” <sup>16</sup> Oa iava ikauvira avaaepa. Uva vaiterei Maria vaio ora Josep kekeiva voa osa voa toupasiva. Ovusa kakaeto bulmakau kare aiopavaaro-ia bokis uusiparoepa. <sup>17</sup> Uva rera kekeivoiva, vo reo vao taviiva oa uvuiva rera iava ro-ia kakaeto vo enselto ruvara-ia. <sup>18</sup> Oire uva voea rutu oirara vo reo uvuiva sipsip tokipa irara ruvara-ia, oea vo reo-ia rirovira rugorugoopaaepa. <sup>19</sup> ♦ Vo osa Maria vo reoro rutu varao ora oira sopapro-ia orirupaeva. Oa iava voa varare rugoopaopa rutu. <sup>20</sup> ♦ Uva sipsip tokipa irara vorevira kareaepa Pautoa-ia vuurapa vaisi purapaoro. Oa iava rirovira rutu rorupaiva Pautoa-ia vara-ia varao oara rutu uvuiva, ora vara rutu tapo kekeiva oiso osa enselpa irara voea taviiva.

*Jisas Vateiva Vaisia*

---

♦ 2:1: Lu 3:1 ♦ 2:4: Lu 1:27 ♦ 2:9: Ap 5:19 ♦ 2:11: Jo 4:42 ♦ 2:12: 1 Sm 2:34; Ais 7:14 ♦ 2:14: Ais 57:19 ♦ 2:19: Lu 2:51 ♦ 2:20: Mt 9:8

<sup>21</sup> ♦ Uva vo peva vatarapa voki (8) pou piropa, oa iava Jisas rakari veraiva rera-ia vo vaisio tovo ovoioro, Jisas-pa vaisi. Ari ita, vo osa vo kovutoa-ia pou viro asavira toureva, ovusa enselto vo vaisi iava rera vaisireva.

*Simion Vaio Ora Ana Jisas Kekesiva Lotupa Kepa Sovara-ia*

<sup>22</sup> ♦ Oire uva vo vuuta-a vao oa pou piropa vo avaorei rutu sisigarue piesa oiso osa Moses vaaro Reo Taisi puraepa. Oa iava aiteto avukarei vo kakaeva avasiepa Jerusalem iare Pauto Turaro vatesa rera. <sup>23</sup> ♦ Oiso osa oisoa rigatoa purapape vo Turaro vaaro-ia Reo Taisi oiso,  
‘Vosa avaio kakae kavaueve aakova, oire ra Turaropa Pauto rera vateive rera reesioro rerapa.’

<sup>24</sup> Oa iava oiso ruipapasiepa tapo ra pristo korououa vai tapo purareve vaiterei vo vovouaro sirova. Oiso osa puraepa Turaro vaaro-ia Reo Taisi oiso,  
‘Viovokotoarei kurue vaio, eke tavaururirei vai uruvaurirei.’

<sup>25</sup> Oire uva iravu oirato Jerusalem-ia toupareva rera vaisiaro Simion. Torevokotoa rutu ora tapo riro aviviketo Pautoa-pa. Ira oisoa rerare ro tueparo ira Isrel-pa irara vorevira ourevirea ora rerapa vova viria iava. Vo osa Tugoropato Uraurato oisoa Simion sopaaro-ia toupareve. <sup>26</sup> ♦ Ari ita, Tugoropato Uraurato rera tavireva ravaavira oiso, “Viapau ikauvira kopiuvere. Viapau. Ari Krais keke rovorivere, ira arureva Turaro Pauto vore rasitoa-ia rera voeaaro tuvetuvepasa.” <sup>27</sup> Uva Tugoropato Uraurato Simion tuvetuvepaoro koataroepa Rovopa Kepa Lotupa Kepa Tempel sovara-ia, vo osa aiteto ora aakova Jisas kakaeva uriosiepa vo pitupituo purasa osa oisoa purapape Reo Taisi. <sup>28</sup> Oire uva Simion Jisas kavaureva ora rera vavaearo-ia. Oa iava Pautoa-ia vuurapa vaisi purareva rerava oiso puraoro,

<sup>29</sup> “O Turaro Pauto. Ro iava vii reraaro kovopato vaseri ra vova avaro, uvare ragai vo vovouaro gavaurevira toupai. Ra va iava vii vo reoaro oirao pieri oreoa purariva voari tuariri. <sup>30</sup> ♦ Aue iava uvare ragai iava osireitoarei oaa vao kekesivoi oa purarivoi auere vorevira igei ora viipa ousa vova viria iava. Va-a eva oa iava kopiisa vovouparai. <sup>31</sup> Vii vao ravaarivora oirara rutu osireiaro-ia <sup>32</sup> ♦ eva aviavia. Oa-a vao aviavia vatepareverevo osararovu rutu vo rugorugooroaro karupasa, oiso ra vii vo raivaaro-ia taraiave. Ra va iava vii voeaaro Isrel riro vaisi ouive.”

<sup>33</sup> Aitetoarei ora aakova rirovira rutu rera-ia Simion tavetave iraopasiva vo reo iava vao oa purareva. <sup>34</sup> Oire uva Simion voea vaterева viraakoa. Oa iava Maria tavipareva oiso,

“Uvuri! Ro-ia kakaeto ira oearovu rutu Isrel-pa irara kove pievereve ora riro irara tapo tore pievereve tapo. Ra oiso toupareve, Reesia Pauto vaaro. Uva riro irara rutu rera takupaivere rara. <sup>35</sup> Eisi osa iava riro irara varaaro rugorugooara roroiovira karekepere, [Uva iravu toorio ira avuavuaro oiso toupare osa siraoa ira vii sopaaro togarevere.]”

<sup>36</sup> Oire uva iriavu profetava riakova toupaeva voa. Oira vaisiaro, Ana o-ia Fanyuel oviivaaro ro vova Asa-pa irara. Iria erao vatara (7) ivaro-ia valutato tapo toupaeva. Oa iava kopiiloiva, rera isivaaro-ia avukaopa rutu raroevira. <sup>37</sup> Uva vo peva vatara tau vo resura (84) ivaro-ia oira vaaro oa-ia tuguraopa. Uva viapau oisoa Tugoropata Kepa Tempel kavupaeve. Ari ita, oisoa aioara kavupao katai rugoo purapasa variripaoro, uvare oisoa Pauto vo kovoaro-ia pitupaeve vo vokiaro ora tapo ravireo-ia. <sup>38</sup> Oire uva vo vuuta ragai-ia vao urioopa Pauto-ia vearo vaisi purasa. Oa iava oira tapo sipoipoeva rera iava ro kakaeto voeapa irara voeao oea oisoa Pauto-re tuepaave, oiso ra Jerusalem vore pievere ora rerapa.

*Josep Nasaret Iare Kareroepa Vorevira*

<sup>39</sup> Oire uva vara rutu varao puraiva oiso osa Pauto vaaro Reo Taisi puraepa. Oa iava ora voea vo uruiaro iare vorevira kareaepa vao vo Galili taere-ia gare uruivi Nasaret-ia.

♦ 2:21: Lu 1:31, 59   ♦ 2:22: Lev 12:2-6   ♦ 2:23: Eks 13:2, 12   ♦ 2:26: Sam 89:48   ♦ 2:30: Ais 52:10

♦ 2:32: Ap 13:47

<sup>40</sup> ✩ Uva kakaeto riroroepa goruoro rutu. Oa iava vearopa tarairo rera-ia karekeepa. Uva Pauto vaaro tapo viraakoa toupaiva rera-ia.

*Viovokovira Toupaoro Jisas Lotupa Kepa Tempel Sovara-ia Toupareva*

<sup>41</sup> ✩ Jisas aitearo avukarei ipasiepa ovokivu-ia Jerusalem iare, vao iare Tagausapa Vurei aue Pasova, oa oisoa purapa piro vo ivara rutu-ia katakataivira. Ra Pauto vaarore siraao oisoa rugorugoopaave vorevira vo osa voea tauvareva Isip iava voea kosi pieoro. <sup>42</sup> Uva Jisas katai tau erao (12) ivaro-ia uvuviroepa. Oa iava vo voki vao vo pitupituaro sirova utuaepa Pasova Aio purapa voki. <sup>43</sup> Uva vo vokiroa varao Pasova Aio purapa vokiro oara opesieiva, vorevira kareaepa. Ovusa Jisas viovokoto voa raga touvira toupareva Jerusalem-ia. Uva aitetoarei viapau rera-ia taraipasiepa vo osa touvira voa toupareva. <sup>44-45</sup> Uva oiso keapasiepa, Oearoi tapo vokapare. Oa iava riro sita rutu purasiva rera kavuoro. Oire uva va iava voeao vuruvuru-ia vate irara oaesia ora sara irara vuravura ragasiva rerare. Uva taraa ragapasivoiva rerare, katai voki rutu isivaaro iava vorevira voresiepa Jerusalem iare rerare taraasa voa. <sup>46</sup> Uva voa raga rerare taraapasiva vo peva rutu-ia voki peva. Oa iava voa rera kekesiva Tempel atoaro, osa voa pauparoepa tisa irara vuutaro-ia vo voea varaaro reoara uru piepaoro. Uva toupareva, ora voea tapo akepareva vorevira vara iava. <sup>47</sup> ✩ Vo ovusa rera vo reoroaro uru piepaiva. Uva rera-ia rirovira rutu tavetave iraopaiva aue iava rera vaaro taraia rutu, ora vo reo vearovira oa purareva voea aatooro. <sup>48</sup> ✩ Oa iava aitetoarei voa rera kekeoro ora sitasiepa rutu. Uva aakova rerare oiso puraopa, “Ae kakaeto. Eakere vegeivi oiso pierivoi oa iava viire taraa raga vasipavevoi?” <sup>49</sup> Uva oira vo reoaro pukooro oiso puraroepa, “Ari eakere ragaire taraa rovo asasivo Aite vo kepaaro-ia? Uva kasikasi ragapasiei ragaire taraa ragapaoro?” <sup>50</sup> Oa iava vo reo-ia vavagisipasiepa eva oa purareva vaitereire.

<sup>51</sup> Uva va-a vao oa iava vaiterei tapo kareroepa. Oa iava Nasaret-ia karea viropa. Uva voa oisoa vokiara rutu-ia vaiterei gisipoaro sirova utuparo. Ari ita, uva aakova vara rutu varao-ia orirupaeva oara kekeeva vo rera ruvara-ia. <sup>52</sup> ✩ Oire uva Jisas riroroepa. Oa iava taraia rera vaaro vearovira rutu karekeepa. Uva Pauto ora oirara rutu rerare vearo vovouaepa rutu.

3

*Jon Baptais Siposiporeva  
(Matyu 3:1-12; Mak 1:2-8; Jon 1:19-28)*

<sup>1</sup> ✩ Taibirias Sisa Rom-pa irara tokireva katai tau vo vavae (15) ivaro sovara-ia. osa Pontias Pailat gavmanpaoro toupareva Judia-ia. Uva vo vuuta-a vao oa-ia aue Herot reiparoepa Galili taere-ia, ovusa voraro araokoto Filip reiparoepa Ituria taere ora Trakonaitis, vo osa ro Laisenias Abilin taere-ia reiparoepa. <sup>2</sup> Vo osa Anas vaio ora Kaifas pris kovo-ia reipasiepa. Vo vuutao-ia oa-ia Jon Sekaraia oviitoaaro vo rasitoa-ia toupareva kuvau tapi. Uva Pauto vo reoaro urioepa rera iare voa. <sup>3</sup> Uvava-a eva oa iava voraro rutu avaroepa Jodan oirara rutupa siposipopaoro, oiso ra sopaura oaiive poreive. Ra va iava baptaisa ouive rara Pauto voea iava vuri vovouro vera rovoreve. <sup>4</sup> ✩ Oiso osa profet Aisaia vo vukuarto-ia oisoa rigatoa toupaive,

‘Iravu ira keeraparoi vo raaka tapi oiso purapa, Turaro vo raivaaro vatatopopata va ravaaoro oa-ia pouro virovere. <sup>5</sup> Oiso ra goreara rutu agasi pieive pukuiara erioro vara vaeaoro. Regorepa raivarao tapo torevokooro ra torevokope. Ora varao tapo vuri raivarao oara vearo pieive rara. <sup>6</sup> Ra va iava oirara rutu vo kovo vao kekeive Pauto oa purapare vigei vorevira ousapa vuriara iava.’

<sup>7</sup> Oire uva riro irara rutu oirara urioaepa Jon vavaearo-ia baptaisa ousa. Oa iava oiso voeare puraroepa. “Visii vao rakoru ovii iraraaro! Irouto visii vosipare, oa iava toripata Pauto vo kasipuaro asavira? <sup>8</sup> Visii iava sopaura poreta, ra vuri vovouro oavisii kavuta.

✩ 2:40: Lu 1:80, 2:52 ✩ 2:41: Eks 23:15; Diu 16:1-6 ✩ 2:47: Mt 7:28 ✩ 2:48: Mk 3:31-35 ✩ 2:52: 1  
Sml 2:26 ✩ 3:1: Mt 27:2 ✩ 3:4: Ais 40:3-5

Oa iava oirao pie vovouro oavisii poeravira karekepere oearovupa. Opeita ora visii raga vo vovouroaro iava oreorovu kareke piepata oiso purapaoro, Ebrahim-a igei aitearo. Oa iava igei-a Pauto oiraraaro rutu. Ari ita, visii tavi iraopaavoi, Pautoa raga uvuipa vo avekero iava kakae vure purapasa. Ra oisi pieive, Ebrahim ovii iraraaro.<sup>9</sup> Torara eira iriae iavaavira evaova vituaro-ia. Oire vo evaro oiso toupai osa visii. Varao oara viapau oiso vearo kuero vai kaepaive oara rutu taru toepaiverea vara vikipasa tuitui kasi-ia.” Eisi osa puraroepa Jon.

<sup>10</sup> ♦ Uva voea rutu Jon akeiva oiso puraoro, “Eake vai puraio?”<sup>11</sup> ♦ Oa iava oiso puraroepa voea aatooro, “Ro ira vaiterei kuvupatoarei, oire iravu vatereve ropa apotato. Ari ro ira aioara toupaive, oire oisi raga ita piereve iravupa oaravu vateoro,”<sup>12</sup> Uva oearovu tapo takis oupa irara urioaepa, oiso ra voea tapo baptaisa ouive rera ruvara-ia. Oa iava rerare oiso puraaepa, “Tisa. Eake vai purapaio?”<sup>13</sup> Oa iava voeare oiso puraroepa, “Ari moni oupatai oiso osa gavman visii tavirevora. Oire ra viapau vo reesi iava ita pute pievira oarai ita ou ragapata.”<sup>14</sup> Uva oearovu tapo ita viurupa irara rera akeiva oiso, “Eake vai purapaio?” Oa iava oiso voeare puraroepa, “Viapau oiso ra oira upopata ora viapau oiso ra kuuvuvira voea rovirieipata kortua-ia voea varaaro ivu ragapasa moniara. Ari voriara oavisii raga rekasiaro reesiaro-ia rorupata.”

<sup>15</sup> Oire uva voeare vovouisiro riro varivarivira toreepa. Oa iava rirovira rugoru-goopaaepa oiso puraoro, “Easi, Jon-a ro-ia Krais, eke?”<sup>16</sup> Uva va iava Jon voea vo reoaro pukoreva oiso purapaoro, “Visii baptaispaavoi uukoa raga-ia visii reesioro visiigo vovouisiro oavisii poretavorao. Ari ro ira ragai sirova uturovere, ira vo goruaro ragai vo goruaro-ia putevere uvare riro vasitoa-a. Uva viapau oiso uvuiparai ra rera vaaro tasipa kaea, uvare akukutoavi raga-a ragai. Ari rera visii vaterevere vao baptaisa Tugoropato Uraurato vaaro visii reesipaoro aue-ia Tugoropato Uraurato vo goruaro-ia ora eto kasi vo goruaro-ia.”<sup>17</sup> ♦ Ira vururua-ia pitupare wit ragipasa oira rakariaro verapaoro. Oire ra oira aioaro gurureve rera vo kepaaro-ia wit kepa vo aio kitupasa voa. Oa iava oira rakariaro kasirevere vao-ia tuitui kasi-ia oa viapau rokopaive.”

<sup>18</sup> Jon oreorovu rutu tapo purareva voea iava sopaura tore pieoro. Uva vo pitupitu-a vao oa purareva vearo siposipo purapaoro oirara rutupa.

### *Vo Herot Jon Tuukereva*

<sup>19</sup> ♦ Oire uva Jon tuu pievira Herot tavireva rera vaaro iava vuria, ro voea reraaro rovopato gavman. Aue iava uvare vuria purareva aue-ia Herodias araokoto valuavaaro ouoro. Ora opitupiturovu rutu tapo-ia oara oisoa purapareve rera Herot.<sup>20</sup> Uva varao vuriara oara oisoa purapareve rera Herot uva vo vuria vao puteva rutu, uvare vao riroa rutu vuria purareva Jon tovooro tuukepa kepa-ia.

### *Jon Jisas Baptaisreva*

(Matyu 3:13-17; Mak 1:9-11)

<sup>21</sup> ♦ Uva vo vuuta-a vao oa-ia oirara rutu baptais rovopaaepa. Oa iava voa raga ita Jon Jisas tapo baptaisreva. Oire voa baptaisroiva, variri ovoiroepa voa. Uva vuvuiua karu piropa.<sup>22</sup> ♦ Oa iava Tugoropato Uraurato vararoepa. Uva oiso rera kekeiva osa kurue. Uva Jisas-ia pitusa rerereva. Oa iava vuvuiua iava Pauto vo reoaro varaevoa oa oiso puraepa, “Vii-a ragai Oviitoaaro rutu viigoa kaviko iraopaaveira. Uva vii-ia rorupaaveira rutu.”

### *Jisas Aao Iraraaro Vaisiaro*

(Matyu 1:1-17)

<sup>23</sup> ♦ Jisas ora rera vo kovoaro rovoreva vo peva tau (30) ivaro-ia uvuivira toupaoro. Uva oirara rutu rerare oiso puraaepa, “Eera-a Josep oviitoaaro.”<sup>24</sup> Oiso-ia Josep-a Hilai oviitoaaro, ari Hilai-a Matat oviitoaaro, ari Matat-a Livai oviitoaaro, ari Livai-a Melkai oviitoaaro, ari Melkai-a Janai oviitoaaro, ari Janai-a Josep oviitoaaro,<sup>25</sup> ari Josep-a Matataias oviitoaaro, ari Matataias-a Emos oviitoaaro, ari Emos-a Neam oviitoaaro,

♦ 3:10: Ap 2:37   ♦ 3:11: Je 2:15-16   ♦ 3:17: Ais 30:24; Mai 4:12   ♦ 3:19: Mt 14:3-4; Mk 6:17-18   ♦ 3:21: Lu 5:16   ♦ 3:22: Sam 2:7; Ais 42:1; Ap 10:38   ♦ 3:23: Jo 8:57

ari Neam-a Eslai oviitoaaro, ari Eslai-a Nagai oviitoaaro, <sup>26</sup> ari Nagai-a Meat oviitoaaro, ari Meat-a Matataias oviitoaaro, ari Matataias-a Semen oviitoaaro, ari Semen-a Josek oviitoaaro, ari Josek-a Joda oviitoaaro, <sup>27</sup> ✡ ari Joda-a Joanan oviitoaaro, ari Joanan-a Resa oviitoaaro, ari Resa-a Serababel oviitoaaro, ari Serababel-a Sialtel oviitoaaro, ari Sialtel-a Nerai oviitoaaro, <sup>28</sup> ari Nerai-a Melkai oviitoaaro, ari Melkai-a Edai oviitoaaro, ari Edai-a Kosam oviitoaaro, ari Kosam-a Elmadam oviitoaaro, ari Elmadam-a Er oviitoaaro, <sup>29</sup> ari Er-a Josua oviitoaaro, ari Josua-a Eliesa oviitoaaro, ari Eliesa-a Jorim oviitoaaro, ari Jorim-a Matat oviitoaaro, ari Matat-a Livai oviitoaaro, <sup>30</sup> ari Livai-a Simion oviitoaaro, ari Simion-a Juda oviitoaaro, ari Juda-a Josep oviitoaaro, ari Josep-a Jonam oviitoaaro, ari Jonam-a Elaiakim oviitoaaro, <sup>31</sup> ✡ ari Elaiakim-a Melia oviitoaaro, ari Melia-a Mena oviitoaaro, ari Mena-a Matata oviitoaaro, ari Matata-a Netan oviitoaaro, ari Netan-a Devit oviitoaaro, <sup>32</sup> Devit-a Jesi oviitoaaro, ari Jesi-a Obet oviitoaaro, ari Obet-a Boas oviitoaaro, ari Boas-a Salmon oviitoaaro, ari Salmon-a Nason oviitoaaro, <sup>33</sup> ari Nason-a Aminadap oviitoaaro, ari Aminadap-a Atmin oviitoaaro, ari Atmin-a Anai oviitoaaro, ari Anai-a Hesron oviitoaaro, ari Hesron-a Peres oviitoaaro, ari Peres-a Juda oviitoaaro, <sup>34</sup> ✡ ari Juda-a Jekop oviitoaaro, ari Jekop-a Aisak oviitoaaro, ari Aisak-a Ebrahim oviitoaaro, ari Ebrahim-a Tira oviitoaaro, ari Tira-a Neho oviitoaaro, <sup>35</sup> ari Neho-a Serak oviitoaaro, ari Serak-a Reu oviitoaaro, ari Reu-a Pelek oviitoaaro, ari Pelek-a Ebe oviitoaaro, ari Ebe-a Sela oviitoaaro, <sup>36</sup> ari Sela-a Kenan oviitoaaro, ari Kenan-a Apaksat oviitoaaro, ari Apaksat-a Siem oviitoaaro, ari Siem-a Noa oviitoaaro, ari Noa-a Lamek oviitoaaro, <sup>37</sup> ari Lamek-a Metusala oviitoaaro, ari Metusala-a Inok oviitoaaro, ari Inok-a Jaret oviitoaaro, ari Jaret-a Mahalalel oviitoaaro, ari Mahalalel-a Kenan oviitoaaro, <sup>38</sup> ✡ ari Kenan-a Inos oviitoaaro, ari Inos-a Set oviitoaaro, ari Set-a Adam oviitoaaro, ari Adam-a Pauto oviitoaaro.

## 4

*Jisas-ia Kokaraparoepa Seten  
(Matyu 4:1-11; Mak 1:12-13)*

<sup>1</sup> Vo Tugoropato Uraurato iava vukuroepa Jisas. Oa iava uukova iava veraro viropa Jodan. Oire voava voreroiva, Tugoropato Uraurato rera tuvetuvepaoro avaroepa kuuvatapirore. <sup>2</sup> ✡ Oa iava resura tau (40) vokiro rutu-ia toureva. Uva voa Seten rera-ia kokara ragaparoepa,

Oire uva vo vuuta-a vao oa-ia oisoa aio kavuvira toupareve. Oa iava vo vokiro varao opesieiva, ogoeroepa rera Jisas. <sup>3</sup> Osa iava Seten rera tavireva oiso, “Vosa vii Pauto Oviitoaaro rutu, oire o taviri aveke ra opovira ora poreo.” <sup>4</sup> ✡ Uva Jisas rera aatoreva oiso puraoro, “Viapau. Uvare Pauto vo reoaro oiso purapai, ‘Opoa raga viapau uvuipai ra oiratoapa tootooa vatepaise.’”

<sup>5</sup> Oire uva voaviva Seten rera ipa pierava. Oa iava osasararovu ruture voava rera kareke pierava varao vo rasitoa-ia katai vuutavi raga-ia. <sup>6</sup> ✡ Uva va iava rera raga Seten oiso Jisas tavipareva, “Vo goruro rutu-a varao oara vatepavoi viipa, ora vao tapo riro vaisi vo vara iavirava, uvare vara rutu-a evara ragai varaaro. Uva oiso toupai, Vosa irai vate ruipapara vara, oire ra irai vatea vara. <sup>7</sup> Vosa ragai-ia vuurapa vaisi purapaoro taku virou, oire ra vii ragapa vara rutupe varao.” <sup>8</sup> ✡ Uva Jisas oiso puraroepa, “Pauto vo reoaro oiso purapai, ‘Pauto raga-ia vuurapa vaisi purapata eera visii reraaro Turaro. Rara rera raga vo kovoaro purapata eera kataitoa raga.’”

<sup>9</sup> Uva voa-a vo uvava rerava Jisas avaroepa Seten Jerusalem iare Rovopa Kepa Lotupa Kepa kukuearo-ia rera tovosa viara-ia rutu. Oire uva voa rera tavipareva oiso, “Vosa vii-a Pauto Oviitoaaro rutu, oire vo toreu ra voava ora vikiu. <sup>10</sup> ✡ Uvare vo rigato toupai oa oiso purapai, ‘Pauto voeao arurevere enselpa irara ra vii tokiive vii-ia uutupaoro.’ <sup>11</sup> Uva oreovu oiso purapai, ‘Oea vii-ia pituivere ora voea vavaearo iava. Ra viapau oiso avekeara vai-ia ora upou kokotoa iava.’”

✡ 3:27: Mt 1:12    ✡ 3:31: 1 Kro 3:5    ✡ 3:34: Jen 11:24, 26    ✡ 3:38: Jen 5:1-2    ✡ 4:2: Eks 34:28    ✡ 4:4: Diu 8:3    ✡ 4:6: Jo 12:31    ✡ 4:8: Diu 6:13    ✡ 4:10: Sam 91:11-12

<sup>12</sup> ♦ Oire uva Jisas oiso puraroepa, “Easi, oreovu oiso purapai, ‘Opeita Turaro Pauto oavisii-ia kokarapata.’”

<sup>13</sup> Vo kokaraara rutu purareva Seten rera-ia. Uva voa Jisas kavureva Seten ovokivure ita tueoro.

*Jisas Ora Rera Vo Kovoaro Rovoreva Galili-ia  
(Matyu 4:12-17; Mak 1:14-15)*

<sup>14</sup> ♦ Oire uva Tugoropato Uraurato vo goruaro iavirava vorevira voreroepa Jisas Galili iare. Uva voa rera iava vo siposipo viriva voraro rutu vo taere-ia vao-ia. <sup>15</sup> ♦ Uva oisoa oirara rutu siposipopareve voea vo keparoaro-ia, Reo Taisi Uvupa Keparo Sinagog. Oa iava oirara rutu rera-ia rei vaisi purapaiva.

*Nasaret Vata Isivaaepa Rerare Jisas  
(Matyu 13:53-58; Mak 6:1-6)*

<sup>16</sup> Oire uva Jisas Nasaret iare avaroepa. Ari ita, kakaevira oisoa vo urui-ia toupareve. Oa iava voa toupaoro riroroepa. Uva Sabat voki-ia voa Sinagog-ia koataroepa ora rera vo pitipituaro sirova utuoro. Uva voa toreparoepa Pauto vo reoaro vieipasa. <sup>17</sup> Uva oisi-a eisi osa iava profet Aisaia vo vukuarto vateiva rerapa. Oa iava va-ia vo rigato kekereva oa oiso purapapeira,

<sup>18</sup> ♦ ‘Turaro Pauto reraaro Uraurato ira epao ragai-ia. Ira ragai reesirevora rera vo reoaro iava siposiposa voeaopa apotapa irara. Eera ira ragai arurevora voeaopa tuukepa irara siposipopasa, oiso ra tuukea iava kosipaa viro. Ora voeaopa siposipopasa voosi irara, oiso ra vorevira vuravurapaive. Ora oearovu rutu tauvapasa voeo oea riro vavatapara rutu siitokaara kaepaiveira. <sup>19</sup> ♦ Ora voea rutu oirara tavitavipasa vo vuutao iava Turaro vaaro, ro ira ora rera voeaaro ourevere vorevira ora rerapa.’

<sup>20</sup> Oire Jisas vukua kapu piereva. Oa iava uutupatoapa va vatereva. Uva va isivaaro iava pauparoepa voa Sinagog-ia, ovusa voeao oea tapo voa toupaiva oea rerava tuupavira rutu vurapaiva.

<sup>21</sup> Uva voa rovoroepa voea tavitavipaoro oiso, “Oiraopavira rutu vo rigato-ia Pauto vaaro. Oa oiraoei vo vokio vo osa vo reo uvutavoi.” <sup>22</sup> ♦ Uva va iava rera egaegaiva rutu, uvare vo reoro iare rugoopaaepa vearo reoro oara karekereva ora rera gisipoaro iava. Oa iava oiso puraaepa, “Apeisi ragavira? Easi pasi viapau Josep oviitoaaro ro-ia?”

<sup>23</sup> Uva oiso voeare puraroepa, “Oiraopavira rutu! Osa ita vo reo puratavere ragaire oiso, Ruvarupato ora vii raga iava varaua porete pieri. Ora oiso puratavere, Eva-ia ravoto kovo oa purarivora Kapeneam-ia evoa oa uvuiovora, osa raga ita eisi osa va purarivere vo ora vii vo uruiaro rutu-ia.” <sup>24</sup> Uva oiso puraroepa, “Oiraopavira rutu visiire oiso puraparai, Oirara viapau uvuipaai ra irai profetatao vai gisipoaro uvupaise vo ora rera vo uruiaro rutu-ia. Ari ita, voa rera reroaropaise. <sup>25</sup> ♦ Uva ita, oiraopavira oiso puraparai, Voeao Ilaija vo vuutaaro iava oea iava riro riako toupai Isrel-ia airoa vatua iraraaro kopiliaepa. Vo vokio-ia oa-ia vuvuiua tupa piropa rutu. Oire uva viapau kokeva vai vo peva ivaro rutu-ia ora katai vatara kekira vai-ia. Uva voava riroto ogoeto karekeroepa voraro rutu. <sup>26</sup> Ari ita, oiso-ia viapau oiso Ilaija arureva Pauto iriai iare riakova vai vova Isrel oira tauvasa. Viapau. Ari o ratau touva tauvasa rera arureva iria vo kavauopa Sarefat urui-ia. Iria oisoa raroevira toupaeve vo Saidon-ia. <sup>27</sup> ♦ Oiso osa tapo voari tuariri vo vuutao-ia oa-ia profet Ilaisa epao. Oa-ia riro irara leprapa irara oisoa toupaive Isrel-ia. Oire uva viapau voea iava irai porete piereva Ilaisa. Ari aue raga Neman ro vova Siria ratau touto ira vearo piereva.” Jisas evo reo purareva vo Jiu iavirava voeao riro reo uvu asa irara.

<sup>28</sup> Oire uva Reo Taisi Uvupa Kepa-ia toupaoro vo reo uvuiva rerare kasipu iraopaoro.

<sup>29</sup> Uva voava vusiiva rera sitasa. Oa iava rera ivupaoro kosia viropa vo urui isivaaro iava oa oisoa pukuia-ia kukuearo-ia toupaive. Uvare oiso vovoupaaepa ra voava Jisas-ia vikiave vara pievira. <sup>30</sup> Osa voea raga sovara-ia vokaoro avaroepa voea gogu pieoro.

---

⊗ 4:12: Diu 6:16    ♦ 4:14: Mt 9:26    ♦ 4:15: Mt 9:35, 11:1    ♦ 4:18: Ais 61:1-2    ♦ 4:19: Lev 25:10    ♦ 4:22: Sam 45:2    ♦ 4:25: 1 Kin 17:1, 8-16    ♦ 4:27: 2 Kin 5:1-14

*Jisas Iravu Vurito Tugarato Verareva Iravu Iava Oirato*  
*(Mak 1:21-28)*

<sup>31</sup> ♦ Uva Kapaneam urui iare avaroepa vo Galili taere sovara-ia. Oa iava voa Sabat voki-ia oirara rutu tarai piepareva voea siposipopoaro. <sup>32</sup> Uva rera vo siposipoaro uvuivoiva, vovouisiro oaiive rirovira rutu ipaepa. Uvare rera vo reoaro-ia gorua toupaiva. <sup>33</sup> Oire uva voa Sinagog-ia iravu oirato toupareva. Ira-ia vurito tugarato oisoa toupareve. Oa iava voa toupaoro rirovira rutu oiveoro keeraroepa oiso puraoro, <sup>34</sup> ♦ “Auoro Jisas Nasaret iava! Eake purasa uriouei igei-ia? Igei opesi ovoi piesa, eke? Vii-ia taraiparai, Tugoropato Paulo reraaro.”

<sup>35</sup> ♦ Oa iava Jisas rerare koruroepa oiso puraoro, “Eakau! Eera iava kosi virou.” Oa iava rera tugarato oirato-ia vikiroepa rasiua arore. Uva voa koveroepa voea vuutaaro-ia. Osa iava rera arova ava ovoiroepa rera tugarato. Vo osa viapau viria vai purareva rera-ia oirato. <sup>36</sup> Oa iava voea rutu ropeaepa. Oire ora voea vovouro arova taavi iraopaiva oiso ora reopaoro, “Avoeao! Apeisi raga reo irao-a vao-ia oa iava voeaore vuri tugararo reoroi? Easi ro vai-ia reesia vaiei ora gorua vai. Oa iava rera uvu ovoipaiveira ra oirara arova ava ovoipaave?” <sup>37</sup> Uva oisi-a eisi osa iava rera iava Jisas viriva vo siposipo vao-ia voraro rutu vo taere-ia vao-ia.

*Jisas Pita Aigevaaro Porete Pierева*  
*(Matyu 8:14-15; Mak 1:29-31)*

<sup>38</sup> Uva Sinagog iava kosiro viropa Jisas. Oa iava Saimon vo kepaaro-ia koataroepa. Vo osa voa Saimon vatuavaaro aakoaro riro upia-ia kukue upia toupaeva. Uva va-a eva oa iava rerare Jisas keeraaepa vo oira porete piesa. <sup>39</sup> Uva voa oira ruvara-ia toresa urioroepa vo upia iare reosa. Uva oira iava opesi ovoiepa vo upia. Oire voava vearo ovoioro rerapa aioara vatatopo ovoieva.

*Jisas Riro Irara Porete Pierева Ravotovira*  
*(Matyu 8:16-17; Mak 1:32-34)*

<sup>40</sup> ♦ Uva vo ovaiarovi ovusa ravireo rokopareva, uva rera iare oearovuva vuri vara irara urioaepa, ora voearo tapo tugara oearoa oisoa upopai. Oa iava voea rutu porete piereva ravotovira voea-ia vavaarei tovopoaro. <sup>41</sup> ♦ Oire uva riro irara rutu iava kosia viropa. Uva voea evoea vuri irara tugara oea rirovira oiveoro oiso puraaepa, “Vii-a Paulo Oviitoaaro.” Osa iava voeare koruparoepa rera iava oreoi pura arapa, uvare taraipaaepa oiso, Rera ro-ia Krais.

*Jisas Kovopaoro Virireva Uruiara Rutu-ia*  
*(Mak 1:35-39)*

<sup>42</sup> Oire uva avitoava eraoroepa Jisas. Oa iava rokoreva uvavure kuvala tapi voa varirisa. Uva voa-a evoa uva toureva osa rerare taraa ragapaiva. Oa iava rera kekeoro voa oiso rugoopaaepa ra ora voea raga iare rera voreive. <sup>43</sup> Oa iava voeare oiso puraroepa, “Oiso ruipaparai ra Vearo Siposipo iava siposipoa aue iava Paulo vo Saraaro voraro ouruirovu-ia tapo. Aue vituaro iava uvare Paulo ragai arurevora okovoa purasa vao-ia.” <sup>44</sup> ♦ Oa iava vo Judia Distrik-ia riro keparo-ia Reo Taisi Uvupa Keparo siposiporeva va iava vao Vearo Siposipo voeapa.

## 5

*Jisas Pita Tavireva Oa Iava Rirovira Atarioepa*  
*(Matyu 4:18-22; Mak 1:16-20)*

<sup>1</sup> Oire uva ovokivu-ia rogaraua-ia toreparoepa vo toko rovu vatuarto-ia vao vo Gensesaret. Uva ovaisivu-a vao-ia oiso Galili. Uva voa oirara rutu Jisas tapo toupaiva ora voea-ia paipaoro vo reo vao Paulo vo reoaro uvupasa. <sup>2</sup> Uva voa uvuoarei kekereva uvuoarei rogaraua-ia vo toko rovu-ia. Uva voa voeao atari oupa irara vo uvuoarei iava veraa viropa kuverara sisupasa. <sup>3</sup> ♦ Oire uva vo uvuoarei iava oavu-ia kaero viropa aue Saimon vo

---

♦ 4:31: Mt 4:13   ♦ 4:34: Sam 16:10; Dan 9:24   ♦ 4:35: Mt 8:26   ♦ 4:40: Mk 5:23; Mt 4:23   ♦ 4:41: Mt 4:3   ♦ 4:44: Mt 4:18-22; Jo 1:40-42   ♦ 5:3: Mt 13:1-2

uvuoaro. Oa iava Jisas rera tavipareva oiso, “*Vo uvuo gare visivi topari rogaraua iava rovua iare.*” Oire uva vo uvuo-ia paupaoro Jisas voeapa sipoipareva oirara.

<sup>4</sup> ♦ Uva voeapa sipoiporevoiva, rera Saimon tavireva oiso, “*Uvuo viru pieri vavore uva riro rokopai. Ra voava kuverava roko pieta. Ra atari kare vai ivuta.*” <sup>5</sup> Uva Saimon oiso puraroepa, “Turaro. Easi igei kasivarivira rutu kovo ragaiovo vo rupao-ia. Uva viapau okarei ivuivo ue atari. Ari ita, vii uvuavoi osa ragai tavitaviri. Uva oisi va purapaavoi.” <sup>6</sup> Oa iava oisi oira pieiva. Uva riro kare atari kare ivuiva. Oa iava kuverava toko rovoopa. <sup>7</sup> Oisi-a eisi osa iava oearovure puepueiva ora voea raga iava, voeao oea ouvuovu raga-ia toupaiva. Oiso ra urioave voea tauvasa. Oa iava urioaepa. Uva voea rutu vo uvuoarei agasi pieiva vo kare-ia atari kare. Uva roko rovoepa vo uvuoarei rutu vo kare vavatapaoro. <sup>8</sup> Uva va-a vao oa kekerevoiva Saimon Pita, Jisas kokotoaro ruvara-ia kokoto rekuoro pauroepa oiso puraoro, “Turaro, ragai ruvara iava avau. Ari ragai-a vurito.” <sup>9</sup> Uvare vo kare evoea atari kare kekerevoiva okarea ivuiva. Oa iava rirovira rutu roperoepa. Ora voeao oea rera tapo toupaiva oea tapo ropeaepa. <sup>10</sup> Aue ovitoareiaro tapo Sebedi, Jems araorei ora Jon aiterea rera tapo oisoa kovopasi aue Saimon, aiterea tapo ora sitasiepa. Uva va-a vao oa iava Jisas Saimon-re oiso puraroepa, “*Teapi uriripau. Ari utupaua oiso oirara ivurivere rara ragai iare.*” <sup>11</sup> ♦ Oa iava uvuoarei rere pieiva rogaraua iare, vo osa auero rutu voeae varaaro kavuiva rera sirova utuoro.

*Jisas Iravu Oirato Sisigarue Pierava, Ira-ia Oisoa Lepra Upia Toupaive  
(Matyu 8:1-4; Mak 1:40-45)*

<sup>12</sup> ♦ Vo riro urui-ia toureva Jisas. Uva voa-a evoa ouruia-ia iravu oisoa toupareve oirato ira-ia oisoa lepra upia toupaive. Oa iava Jisas kekeoro kokotoarei-ia rekureva varirioro rerare. Oiso puraroepa, “Vosa ragaipa ruipapau ra ragai porete pieri.” <sup>13</sup> Oa iava Jisas rera-ia vavaea tovooro oiso puraroepa, “*Oiso ruipaparai ra sisigarueu.*” Oa iava vaviopavira raga rera iava vo upia eva lepra upia opesiepa. <sup>14</sup> Uva Jisas riro goruvira rutu rera vosireva oiso puraoro, “*Opeita irai ita taviparivere. Viapau. Ari avapauei ora vii iava varaua karekesa aepea pris koruoua vai puraoro oiso osa purapapeira Reo Taisi vao Moses vaaro. Ra va iava oirara rutu oiraopavira oiso taraiave, O ari vii-a vao viigoa iava upia opesiei rutu.*” <sup>15</sup> ♦ Vo ovusa vara iava vo sipoiporevoiva avaepa varao oara rutu purareva Jisas voeae-ia. Oire uva va-a eva oa iava riro irara rutu urioaepa rera vo reoaro uvusa. Ora oiso tapo ra upiara iava voeae tapo porete piepareve varao voeae varaaro. <sup>16</sup> ♦ Oire uva voeae arova rera raga avaparoepa uvavure kuvalu tapivi voa variripasa.

*Jisas Iravu Oirato Porete Pierava Kerauto  
(Matyu 9:1-8; Mak 2:1-12)*

<sup>17</sup> ♦ Ovokivu-ia oirara tarai piepareva ovusa oearovu ratarataa vovou irara aue Farisi ora tisa irara tapo voeao Reo Taisiro-ia tarai irara, oea tapo paupaaepa voa voeao oea vo uruilo iava urioaepa oiso-ia, Galili-ia vo, ari Judia-ia, ora Jerusalem-ia. Vo osa Pauto vo goruarova Jisas toupareva ogorua iava oirara porete piepareva. <sup>18</sup> Uva oresuravu iravu-ia kaepaoro urioaepa. Ira-ia kerau upia oisoa toupaive keruara rutu-ia. Oire uva oiso ruipapaaepa ra rera kaepaoro urua-ia koataave Jisas iare atoaro voa rera tovosa. <sup>19</sup> Vo osa oirara rutu iava tupapaa piropa. Oa iava oiso aeupaaepa ra apeisi vai ragavira rera koata pieive rera iare voa atoaro. Oire uva va iava vo kepa ivara iare rera kaepaoro ipaaepa. Oa iava kukuuvua veraiva voava iroiro-ia rera vara piesa urua tapo voa vo voeae rutu oirara vuutaaro-ia. Oa iava rera tovoiva vo uva Jisas toupareva. <sup>20</sup> ♦ Uva Jisas voeae varaaro oirao pie vovouro eveirevoiva, rerare oiso puraroepa, “*Vatetoa oaa, vii iava vuri vovouro veraayoi.*”

<sup>21</sup> ♦ Oire uva va-a vao oa iava voeao riro tarai irara Reo Taisi-ia ora voeao Farisi oearea rutu ora voeae raga ora reopaaepa. Oa iava voeae iava oearovu riro irara oiso puraaepa, “Avoeo! Iroutoa rutu-a ro-ia ira vao tovi reo purare Pautoa-ia? Irou vai uvuipai vuriara verapasa? Easi Pautoa raga.” <sup>22</sup> Uva Jisas voeae vo rugorugooroaro-ia tarai ovoiroepa.

❖ 5:4: Jo 21:6    ❖ 5:11: Mt 19:29    ❖ 5:12: Lu 17:11-19    ❖ 5:15: Mt 9:26    ❖ 5:16: Mk 6:46    ❖ 5:17: Mt 15:1    ❖ 5:20: Lu 7:48-49    ❖ 5:21: Ais 43:25

Oa iava voeare oiso puraroepa, “Eakere eisi ragaire vurivira rugorugoopatai ora visii raga sopaaro-ia? <sup>23</sup> Ari aa vo reoa-a vao oa-ia avekata vaiei ragaipa ra oa-ia oiso purara, Vii iava vuri vovou veraavoi? Eke oiso, Toreu ra vokari? <sup>24</sup> Uva oiso ruipaparai ra oiraopavira rutu taraita oiso, Oirato Oviitoaaro Ro Ropoto ragai raga goruava toupaaveira vo rasio-ia. Vao oa iava uvuiparai varao verapasa vuri vovouro. Eisi osa iava oiso purarai rore ira iava keruara rutu kopiiepa, Toreu, ra vii vaaro ouri urua, ra avau vore vii vo kepaaro iare.” <sup>25</sup> Oire uva va-a vao oa iava voea rutu oirara osireiaro-ia toreroepa urua ouoro vao oa-ia uusiparoepa. Uva rera vo kepaaro iare vava avaroepa. Oa iava voa Pautoa-ia vuurapa vaisi purareva karepaoro. <sup>26</sup> <sup>◇</sup> Oire uva oirara rutu ropeaepa ora sitaoro. Oa iava Pautoa-ia vuurapa vaisi puraiva rerapa avivikeoro. Osa iava oiso puraaepa, “Vo vokio rutu-ia oavu raga ravotoa rutu kekei.”

*Jisas Livai-re Reoroepa  
(Matyu 9:9-13; Mak 2:13-17)*

<sup>27</sup> Uva utupavira Jisas vokapaoro avaroepa. Oa iava iravu oirato kekereva ovusa takis oupa kepa-ia pauparoepa. Rera vaisiaro ro-ia, Livai. Uva rerare Jisas keeraroepa oiso puraoro, “Uriou ragai sirova utusa.” <sup>28</sup> Oire tore ovoiroepa rera varaaro rutu kavuoro, osa toupaiva vo Jisas sirova utuoro.

<sup>29</sup> <sup>◇</sup> Uva rera Livai oavu riroa aioa purareva rerapa Jisas ora rera vo kepaaro-ia. Oa iava oearovu riro irara takis oupa irara va iare urioaepa ora oearovu tapo vuri irara. Oea rutu vaiterei tapo paupaaepa aiopaoro. <sup>30</sup> <sup>◇</sup> Uva va-a vao oa iava Farisi ora Reo Taisi-ia tarai irara iava voeare kasipupaoro oiso purapaaepa disaipel ruvara-ia voeao Jisas voearo, “Uva apeisi iava takis oupa irara tapo voeao kavirupa irara aiopatavoi ora oearovu voeao vuri vovou irara?” <sup>31</sup> Oa iava Jisas voea vo reoaro pukooro oiso puraroepa, “Ari ita! Voeao upia asa irara oea viapau oiso ruvarupatoa iare avapaaveira. Viapau. Asi upiapa irara raga oea ruvarupatoa iare avapaaveira. <sup>32</sup> <sup>◇</sup> Ari ita, viapau oiso voeaore keerasa urioraera torevoko vovou irara. Viapau. Easi voeaore keerasa vuri vovou irara urioraera, oiso ra sopaura oaive iava porepaa viro vova viria.”

*Vo Toupa Aio Kavupa Pitupitu  
(Matyu 9:14-17; Mak 2:18-22)*

<sup>33</sup> <sup>◇</sup> Oire uva Jisas taviiva oiso, “Voeao Jon voeaaro disaipel oea oiso aio arapa kavupaise rirovira rutu variripaoro vo riro vuutaro rutu-ia. Ora voeao Farisi vo disaipelaro oea tapo oisi raga oisoa piepaive. Ari vii voeaaro disaipel oea aioara rutu aiopaaiveira ora ukaiopaaveira.” <sup>34</sup> Oa iava Jisas voeare oiso puraroepa, “Easi visii uvuipatai vai pasi ra vova sara irara vai aio kavu piepata oea iava rera sarato riako ousa aueparo, vo oea raga ruvara-ia toupareve, eke? Ari viapau uvuipai. <sup>35</sup> <sup>◇</sup> Oire uva utupavira ora voea iava rera veraive oearovu vo oea riako ouro. Ra va iava tauaivira toupaoro viapau oiso vorerivira voea tapo toupareve evoea sara irara. Oire uva vo voki-a vao oa-ia aio kavuave taru rerapa siraopaoro. Osa eisi ragai voeaaro tapo toupaivoi. Oa vituaro iava viapau aio kavupaaiveira vo ragai tapo toupaoro.”

<sup>36</sup> Uva Jisas voeapa oavu reo ruu tapo vaterева. Oa-ia oiso puraroepa, “Viapau oiso irai uvuiparoi ra airepatoa vai kuvupatoa vai karireve, ra rutatoa vaiva oai turureve karia vai-ia. Oire vosa irai oisi oai piereve, ra rera raga airepato vuri piereve. Ra va iava va vao airepa varoa viapau oiso areiivira kekepa piro vao tapo ruta. <sup>37</sup> Ora viapau irai uvuipa ra airepa wain ovi vai kuvureve ruta rakari vai-ia aue meme. Oire vosa irai oisi oa-ia piereve airepa wain vai kuvuoro, ra ita va vao ruta rakari karikari piro vo oea riropape airepa wain. Ra va vao wain ovi rasiua arore koko piro. Oire ra ita meme rakari tapo vuri ovoipe. <sup>38</sup> Uva oirato uvuiparoi ra airepa rakari-ia airepa wain kuvureve. <sup>39</sup> Ari ro ira rutapa-ia ukaioro wain, ra ita viapau oiso auepa airepa ruipaparo. Oire ra oiso puraro, Va vao vearpai uvare airepa-ia putepai aue wain!”

<sup>◇</sup> 5:26: Lu 7:16    <sup>◇</sup> 5:29: Lu 15:1    <sup>◇</sup> 5:30: Ap 23:9    <sup>◇</sup> 5:32: 1 Ti 1:15    <sup>◇</sup> 5:33: Lu 7:18; Jo 3:25-26  
<sup>◇</sup> 5:35: Lu 9:22, 17:22

*Jisas Akeiva Tugoropa Voki Iava  
(Matyu 12:1-8; Mak 2:23-28)*

<sup>1</sup> ♦ Ovokivu-ia Sabat voki Jisas wit kovo sovara-ia vokapareva. Vo osa voa rera voeaaro disaipel okokorovu ouiva aue wit. Oa iava vara ruviruviiwa ora voeapa vara aiosa. <sup>2</sup> ♦ Uva oeavu ratarataa vovou irara Farisi-pa irara oiso puraaepa, “Easi varao tugoropapeira Sabat voki-ia. Uva apeisi iava oiso pieivoi?” <sup>3</sup> ♦ Oa iava Jisas oiso puraroepa, “Easi pasi, viapau vao vieipataveira osa tuariri rutu Devit ora rera voeaaro tapo ogoeroepa? <sup>4</sup> ♦ Uva Devit Pauto vo kepaaro-ia koataroepa bret ousa pristo ruvara-ia, vao oa oisoa Pauto osireiaro-ia toupaive. Va-a vao tugoropa bret oa oisoa aiopaive korouou purapa irara raga pris irara. Ari ita, uva Devit va aioreva rera voeaaro tapo Reo Taisi-ia gasioro. Osa-a eisi osa ragai voeaaro tapo viapau oiso vuria vai purapaivoi wit aiopaoro vo vokio-ia.” <sup>5</sup> ♦ Oa iava oiso puraroepa ora rera iava Jisas voea ruture, “Oirato Oviitoaaro raga ira uvuiparoi vo oirara rutu vo pitupituroaro rovirieipasa varao opitupituroa purapaiveira vo Sabat voki-ia.”

*Jisas Sabat Voki-ia Iravu Vuri Vavaeto Ravotovira Porete Pierava  
(Matyu 12:9-14; Mak 3:1-6)*

<sup>6</sup> ♦ Vo oavu-ia Sabat voki Reo Taisi Uvupa Kepa-ia Sinagog koataroepa. Oa iava voa oirara tarai piepareva siposipopaoro. Uva voa iravu oirato toupareva ira iava oirapapa vavae vuriepa kopiiro. <sup>7</sup> ♦ Uva riro tarai irara Reo Taisi-ia voearei ora Farisi oearea rerava siituepaaepa Jisas. Uvare oiso ruipapaaepa ra oai iava rera tavatavaeive. Vo rara taraiave rera-ia oiso, Ari Sabat voki-ia va purarevoi upiapa irara porete piepaoro. <sup>8</sup> ♦ Uva rera raga voea oriorisi ovoioro voea vo vovouroaro-ia tarai ovoiroepa. Oa iava rera tavireva ira iava vavaea kopiepa oiso, “Uriou. Ra vo-ia torevira toupari.” Oa iava toreroepa. <sup>9</sup> ♦ Uva Jisas voeare oiso puraroepa, “Visii akea oiso, Apeisi purapai vao Reo Taisi vigei vaaro, ra vuria purapape, eke vearoa purape oirara-ia vo Sabat voki? Ora oirato porete piepe, eke rera kopii piepe?” <sup>10</sup> ♦ Uva voea rutu-ia vuraoro rera tavireva oiso, “Vavaea irairari va torevokooro.” Uva oisi va pierava. Oa iava rera iava vavaea torevoko ovoiepa vorevira. <sup>11</sup> ♦ Oire uva rirovira rutu kasipu iraopaaepa. Oa iava voea raga ora reopaoro oiso purapaaepa, “Avoeao! Eake vai purapere ro-ia Jisas?”

*Jisas Katai Tau Erao Reesireva Aue Aposel  
(Matyu 10:1-4; Mak 3:13-19)*

<sup>12</sup> ♦ Uva vo vuuta-a vao oa-ia Jisas iparoepa pukuia-ia varirisa Pautoa iare. Oa iava avia-ia rekasiroepa variripaoro. <sup>13</sup> ♦ Uva ravireo kaero viroiva, voeare keeraroepa disaipel voea rutu oea oisoa rera sirova utupaave. Uva voea iava katai tau erao (12) reesireva. Oa iava voeapa aposelpa vaisi vatereva voeao reo kaepa irara rera voeaaro. <sup>14</sup> ♦ Uva voea katai tau erao vaivaisiaro-a voeao-ia, Saimon [uva Jisas rera-ia Pita-pa vaisi tovoreva], ari Andru, Saimon araokoaro, ora Jems araorei ora Jon, ora Filip, ora Batolomyu. <sup>15</sup> ♦ Ari Matyu, ora Tomas, ora Jems aue Alfias oviitoaaro ora aue Saimon, rera raga aue Selot. <sup>16</sup> ♦ Ora Judas, Jems oviitoaaro, ora Judas Iskariot ro ira Jisas kosi pierava keripa irara vavaearo iare.

*Jisas Oirara Rutu-ia Kovoreva  
(Matyu 4:23-25)*

<sup>17</sup> ♦ Uva Jisas katai tau erao (12) tapo vararoepa tuuria iare voa toresa oearovu tapo riro irara disaipel rera voeaaro. Oa iava voa riro irara rutu voea tapo toupaiva vorarova voea Judia Distrik ora Jerusalem ora voraro tapova avakava sirova aue ruvara-ia Taia-iarei ora Saidon-ia. <sup>18</sup> ♦ Oea rutu uriopaaepa rera vo reoaro uvupasa. Ora oiso tapo ra voea iava upiara verapareve. Ora voea ro oea-ia oisoa vuri tungararo toupaive oea tapo urioaepa. Oa iava Jisas voea rutu ravotovira porete pie ovoipareva vo tungararo kosi piepaoro. <sup>19</sup> ♦

---

❖ 6:1: Diu 23:25 ❖ 6:2: Eks 20:10, 23:12; Diu 5:14 ❖ 6:3: 1 Sml 21:6 ❖ 6:6: Lu 13:14, 14:3; Jo 9:16 ❖ 6:8: Mt 9:4 ❖ 6:12: Mt 14:23; Lu 9:28 ❖ 6:13: Mk 6:30 ❖ 6:16: Ju 1 ❖ 6:17: Mt 4:25; Mk 3:7-8 ❖ 6:19: Mk 3:10

Uva voea rutu oirara rera-ia vavaeara tovo ruipapaaepa. Aue iava uvare rera vo goruaro ava ovoipaepa oirara porete pie ovoipaoro.

*Vo Taviroepa Voeaore Oea Rorupaive Ora Oea Gaupaise  
(Matyu 5:1-12)*

<sup>20</sup> Oire uva Jisas ora rera voeaaro-ia disaipel vuraoro oiso puraroepa,

“Visii vao apota irara Pauto vo taraiaropa visiigoa roruta, uvare visii-ia Pauto vo Saraaro-ia toupataveira.

<sup>21</sup> ♦ “Ora visii vao visiigoa ovovourovu rutupa torevoko vovouro ruipa iraopata oiso osa ro ira ogoeparo aeua aio visiigoa rorupata. Uvare Pauto visii vo ruiparoaro uvui pieoro vaterovere visiipa.

“Ora visii vao visiigoa gaupataveira visiigoa tapo roruta. Aue iava uvare utupaua taru agesitavere rorupaoro aeua-ia Pauto vaaro kaviko vovou.

<sup>22</sup> ♦ “Vo utupaua oirara rutu visii vuraivere osa ragai sirova utupata. Ra va iava visiire rirovira rutu vuri vovou iraopaaave. Oire ra vurivira rutu visii vaisiaro akaipa piepaive visii tovipaoro. Oaa eva oa-ia uvuipatai ra rorupata. <sup>23</sup> ♦ Vosa oisi visii piepaive, ra va-ia rorupata vearo vovoupaoro rutu. Uvuta! Riroa rutu epao voria visii vaaro vuvuiua-ia. Ari ita, voeao aao irara oaiive oea oisi raga eisi oisoa profet irara piepaive voari tuariri.

<sup>24</sup> ♦ “Ari visii vao-ia riro moni guru irara visiigoa ora vatatopo iraopata. Eake iava? Uvare visii roru piepaiveira varao oara-ia pitupataveira varao vo rasio iava. Oara rutu opesipere visii arova vo utupaua.

<sup>25</sup> ♦ “Visii vao visiigoa aiopatavoi oa iava vukupatai, visiigoa ora vatatopo iraopata rutu. Visiigoa taru ogoetavere utupaua.

“Ora visii vao visiigoa agesipataveira, visiigoa ora vatatopo iraopata. Visiigoa gautavere utupaua, ra visii osireiaro-ia gau oviro varape. <sup>26</sup> ♦ Ora vatatopo iraopata. Teapi visii vaisiaro-ia vuurapa vaisi pura ragapaive oiso rutu osa oisoa voari tuariri voea aao iraraaro piepaive oearovu iava profet irara riro kuuvu irara. Aue vituaro iava uvare oisoa oearovu roru pie ragapasa oreorovu raga kuuvu reo oisoa purapaive.

*Vo Keripa Irarava Ora Agiagipa Pitupitu Toupa  
(Matyu 5:38-48)*

<sup>27</sup> ♦ “Ari ita, visii tavipaavoi vao visiigoa ragai vo reoaro uvutavoi, oiso ra voearova agiagipata oea visiiva ora keripaaveira. Ora voea tapo ora vearo vovoupata oea visiiva ora vuri vovoupaaveira.

<sup>28</sup> ♦ Ora voeaopa tapo vearo vovou vatepata oea visii vuri piepasa oreorovu purapaiveira. Ra tapo variripata voea tauvapasa voearo oea visii tovipaive. <sup>29</sup> Vosa irai vii tautauaro tapareve, oire otautauvu ita poreri rerapa, ra va tapareve ita. Ora vosa irai vii kuvupatoa vaiaro itopareve, opeita rerare korukorupau. Rera vate vo popota rutu ora siglis. <sup>30</sup> ♦ Vosa irai vii arepareve orekevu avu vaire, rera vateri oai. Ora vosa irai vii oavu avu vaiaro oureve, oire ra viapau oiso va voreri vorevira rera ruvara-ia. <sup>31</sup> ♦ Ari vosa vo vovouroa vo oarapa ruipapata oiso ra oirara vara purapaive visiipa, oire ra visii tapo oisi vara pura rovopata voeapa.

<sup>32</sup> “Ora vosa voea ragapa sira oavosii vatepata voearo oea visiipa sira oavouro oaiive vatepaive. Ra eake vai vearoa outa Pauto ruvara-ia, raa? Ari ita! Oiraopavira voearo vuri irara oea oisi raga ora voeapa sira oavouro oaiive vatepaiveira voearo oea voeapa sira oavouro oaiive vatepaive. <sup>33</sup> Ora vosa voeaopa vearo vovou purapata oea visiipa vearo vovou purapaive. Oire ra eake-a vearoa oa outa Pauto ruvara-ia? Oiraopavira, voearo vuri irara oea oisi raga ora voeapa sira oavouro oaiive vatepaiveira voearo oea voeapa sira oavouro oaiive vatepaive. <sup>34</sup> Ari vosa voeapa orekerovu vatepata ra oisi rugoopata, Vorevira visiipa vara kare piepaive. Oire aa vao-a vearoa oa outavere Pauto ruvara-ia va-ia vao, raa? Ari ita, voearo vuri irara orekerovu vatepaiveira voearo oea voeapa sira oavouro oaiive vatepaive. <sup>35</sup> Voeao agiagipata oea visiiva ora keripaaveira, ora voearo vearo vovou purapata, ora voeapa orekerovu vatepata. Ra viapau varare vorevira rugoopata

◊ 6:21: Ais 61:3 ◊ 6:22: 1 Pi 4:14 ◊ 6:23: Kl 1:24 ◊ 6:24: Je 5:1 ◊ 6:25: Ais 65:13 ◊ 6:26: Jo 15:19 ◊ 6:27: Ro 12:20 ◊ 6:28: Ap 7:60 ◊ 6:30: Diu 15:7-8, 10 ◊ 6:31: Mt 7:12

*oiso ra oarai kare piepaive visiipa vara iava. Oire vosa oisi oiso piepata, ra va iava riroa rutu voria visii vaaro. Uva voeapa siraopaoro oea viapau vearo vaisi purapaiveira visii-ia, uva oiso purapaoro oiso rutu toupata, Pauto ovii iraraaro ro oiso viara-ia. Uvare ro Aite ira voeapa siraoparoveira oea viapau rera-ia vearo vaisi purapaive. Ora voeao vuri irara oea ora voea raga-ia rugorugooopaaveira, oea tapopa vereopa vovou purapareveira.* <sup>36</sup> *Oirarapa siraopata oiso osa Aite oavisii siraoparoveira.*

**Vo Oirara Rovirieipa Pitupitu Toupai Oiso Osa Jas  
(Matyu 7:1-5)**

<sup>37</sup> ♦ “Opeita oirara vo vovouroaro rovirieipata oiso osa jas, eva-a oa iava viapau ita Pauto visii rovirieirevere. Ora vosa viapau oirara toga ragapata oreororu-ia, oa iava ita Pauto viapau visii ita togarevere vo utupaua. Ari oiso ruipaparai ra oirara iava vuriara vera ragapata, oa iava ita Pauto visii iava vuri vovouro verarevere. <sup>38</sup> ♦ Orekerovu avu vai vatepata oearoipa. Oa iava Pauto visiipa ita oarai vaterevere oisi ragavira ita osa vao, osa visiipa vavaeara agasi pierere rutu Pauto pute pievira visiipa vateoro. Vo uvuio-ia oa-ia oearovupa oaravu vatepata, oire uva vo uvui raga-a eva oa-ia visii vaterevere ita Pauto.”

<sup>39</sup> ♦ Oire uva Jisas oavu tapo reo ruu vatereva voeapa oa-ia oiso puraroepa, “Easi pasi, voositoa vai uvuipa ra irai voositoa vai tuvetuvepareve raiva vai-ia pasi, eke? Uva viapau. Ra ita vaiterei rutu kovesi vo rikui-ia. <sup>40</sup> ♦ Viapau oiso tarai taraapato rera reraaro-ia puteparevoi tisato. Ari vorara tarai rovoro, oire ra rerava tisato oaro areiireve.

<sup>41</sup> “Eakere korotoava vurapari eera araokoara osireiaro-ia, osa viapau riro perore rugoo rovopau eva vii osireiaro-ia? <sup>42</sup> Uva apeisi ragavira uvuipau ra araokoara taviri oiso, Araoko, ragai oiso ruipaparai koroto veraa eera vii osireiaro iava. Vorara viapau ora vii iava evo keposi riroa rutu viapau vera rovori, vao vuri vovou oa vii tupapai? Ari ita, riro ratarataa vovoutoa rutu vii. Viigoa riro pero rutu vera rovori eva vii osireiaro iava. Viigoa ora osireiaro sisiro rovori vearovira. Oa iava araokoara osireiaro sisirorivere rara. Oire ra va iava vearovira vuravurapaoro koro verauvure araokoara osireiaro iava.

**Vo Vuri Ova Iava Toupaiveira Vao Oa Vuri Kue Purapaiveira  
(Matyu 7:17-20, 12:33-35)**

<sup>43</sup> ♦ “Vao vearo ova oa viapau oiso vuri kuero vai purapaiveira. Eisi osa raga ita vao vuri ova oa viapau oiso vearo kuero vai purapaiveira. <sup>44</sup> ♦ Oire uva oirara oisoa vo eva kuearo keke rovopaise auere tarai rovosa vearovira oiso, O vearo ova, eke vuri ova. Oirara viapau oiso ra rokarokapa iroiro-ia fik ova kuearo oupaive. Ora viapau oiso ra kapuasisi kourou sovara-ia wain kuearo oupaive. <sup>45</sup> ♦ Ari ita, ro vearoto oirato ira-ia vearo rugorugoo rutu toupaive vo rera sopaaoro-ia, eva-a oa vituaro iava vearo pitupituro ita purapareveira. Ari vosa ro ira-ia vuri rugorugooro toupaive, oire ra oisi raga ita vo pitupituro kosi piepareveira varao oara iava rera iava sopaua agasipapeira, vo rara vova rera gisipoaro-ia kosipa piro reoara.

**Kepa Paupa Pitupiturei Iava  
(Matyu 7:24-27)**

<sup>46</sup> ♦ “Eakere ragai vaisipatavoi oiso, Turaro, Turaro. Vo osa viapau ragai sirova utupataveira varao-ia oara-ia visii tavipaaveira? <sup>47</sup> ♦ Ari ro ira ragai iare urioparo ragai vo reoaro uvupasa ora ragai vo reoaro purapasa, ira-a eera oiso toupares osa ro ira iava visii tavipaavoi. <sup>48</sup> Ro-ia oirato ira kepa paureva. Oire uva riro kaekaevira rikui teka rovoreva. Oa iava voava aue simen tovoreva rirova-ia aveke oira voto pie rovooro rutu vo rasito sovara-ia. Ra oira ivara-ia vo kepa tore piererva o-ia aveke. Uva utupaua pirutuva urioopa. Oa iava viapau uvuipa vo kepa tatesa. Ari va vurevure ragapaeva. Eake iava? Uvare vearovira rutu vo kepa paureva goruvira. <sup>49</sup> Ari ita, ro ira ragai vo reoaro uvu ragareve ra viapau va sirova uturo, oiso osa ro oirato ira rasito raga-ia kepa paureva. Uva viapau simen tovo rovoreva vo rasito sovara-ia. Oa iava pirutuva vo kepa-ia ora vikiopa ovusa ikauvira peka ovoi piropa. Oa iava vuri ovoiepa rutu.”

⊗ 6:37: Ro 2:1    ♦ 6:38: Je 2:13    ♦ 6:39: Mt 15:4    ♦ 6:40: Mt 10:24; Jo 13:16, 15:20    ♦ 6:43: Mt 7:16, 18,  
20    ♦ 6:44: Mt 12:33    ♦ 6:45: Mk 7:20    ♦ 6:46: Mt 7:21    ♦ 6:47: Je 1:22-25

*Jisas Rom Ami Keptentoaaro Kovopatoaaro Porete Pierewa Ravotovira  
(Matyu 8:5-13)*

<sup>1</sup> ♦ Oire uva Jisas vo reo oirarapa vaterevoiva, Kapaneam-ia kare uvirosa avaroepa.  
<sup>2</sup> Ovusa voa Rom ami keptentoaro toupareva ira reroaro katai vovoto (100) viurupa irara oisoa toupaive. Ira reraaro kovopato toupareva ira oisoa kavikopareve rutu. Uva upiaparoepa kovopato. Oa iava tutuu pieepa rerapa rutu oiso ra kopiilo. <sup>3</sup> Oire uva rera kepten Jisas iava uvureva osa toupareva. Osa iava oearovu tuvetuvepa irara Jiu iava voea arureva rera ou piesa, oiso ra urioro rera ro kovopato porete piesa. <sup>4</sup> Uva rera ia poua viropa Jisas. Oa iava goruvira rutu rera kegipaoro oiso purapaaepa, “Vearotoa rutu ira reraaro-ia uvuipau ra rera vearo pieri rera tauvaoro. <sup>5</sup> Ira vigeipa sopaua rutu vatepareveira vigei vao Jiu. Uva rera raga vigei vo kepaaro paurevora vao Reo Taisi Uvupa Kepa Sinagog.”

<sup>6</sup> Oire uva Jisas voea tapo voreroepa. Oa iava kepa iare tutuu pierewa. Uva rera ro kepten oearovu arureva ora rera vate iraraaro rera tavisa Jisas oiso, “Turaro. Viipe. Teapi ora reasi pie ragau. Ari ita, viapau oiso vearoto-a ragai, ra uriou ragai vo kepaaro-ia koatasa. <sup>7</sup> Uva oisi-a eisi osa rugoorai oiso, Viapau vearoto-a ragai, ra vii iare uriora. Uva oiso ruipaparai ra evoa ragava reou, ovusa ro ragai reraaro kovopato porete ovoiro vorevira. <sup>8</sup> Eake iava? Uvare ragai tapo ro ita reroarovi toupaavoi ira ragaipa kovo vatepareveira. Ari ita, ragai raga oeauvuva toupaa viurupa irara oea ragai reroarovi toupaiveira. Oa iava oiso voea piepaaeveira. Vosa irai arua voea iava oiso, Avau. Oire ra irai avaro. Ari vosa iraire voea iava keerara oiso, Uriou. Ra ita irai urioro. Ari vosa ragai kovopatoaaro tavia oiso, Vo kovo purari. Oire ra oai purareve.” Oiso puraroepa kepten. Uva evo reo oa kosi pieva Jisas vo goruaro.

<sup>9</sup> ♦ Uva Jisas vo reo vao uvuoro rirovira rutu rugorugoo iraoparoepa rerare ro oirato. Oire voava ora poreroepa voeaore riro irara oiso purasa, “Oiso visii tavipaavoi, Oiraopavira rutu, Viapau oiso irai oirao pie vovoutoa vai kekeavora Isrel-ia oiso osa ro-ia Rom amipa irara irapato.” <sup>10</sup> Oa iava voeo oea arureva rera kepten oea vorevira voreeaepa kepa iare. Uva voa rera kovopato kekeiva osa porete ovoiroepa ravotovira.

*Jisas Viovokoto Porete Pierewa Nen Iava Rera*

<sup>11</sup> ♦ Uva utupa visivi Jisas ouruivu iare avaroepa vo urui vaisiaro vao-ia, Nen. Uva rera voeaaro disaipel ora riro irara rutu oea rutu rera tapo avaaepa. <sup>12</sup> Oire uva riro ratao iare tutuu pierewa vao vo urui vo rataoaro, ovusa iravu oirato kaepaoro kosia viropa kopiito. Uvava aakova oisoa raroevira toupaeve ro raga tapo kataito oviito. Iria sirova utupaaepa riro irara oirara vo kae sirova.

<sup>13</sup> Uva Turaro oira o riakova kekereva. Oa iava rera iava sopaua siraoepa rutu. Osa iava oirare oiso puraroepa, “Auoo. Opeita gaupari.” <sup>14</sup> ♦ Oire uva vo kes ruvara iare avaroepa va-ia pitusa vao urua peperava uru. Uva voeo oea vo kes kaepaiva oea voavi torepaaepa. Oa iava Jisas oiso puraroepa, “Viovokoto. Vii tavipaa oiso, Vorevira toou, ra toreu.” <sup>15</sup> Oa iava rera ro ira kopiiroepa ora porete ovoioro toreroepa voa paupasa. Oire voava rovoroepa reoreopaoro. Oa iava Jisas aakovapa rera vatereva. <sup>16</sup> ♦ Uva oisi-a eisi osa iava oirara rutu rirovira rutu ropeaepa. Oa iava Pautoa-ia vuurapa vaisi puraiva oiso puraoro, “Iravu ro-ia reito profetato. Ira vigei vuutaaro-ia pouro viroi.” Uva aia ita oiso puraaepa, “Pauto ro-ia ira vo pouro viroi rera voeaaro oirara tauvasa.” <sup>17</sup> Uva rera iava Jisas vo siposipo viriva oiso Judia Distrik sovara-ia ora uvarovu rutu.

*Jon Baptais Disaipeltoarei Arureva Jisas Iare  
(Matyu 11:2-19)*

<sup>18</sup> Uva vara rutu iava voeo Jon voeaaro disaipel rera taviiva. <sup>19</sup> Oa iava voea iava aitereivure keeraroepa disaipeltoarei. Uva vaiterei arureva Jon oreovu siposa Turaropa.

♦ 7:1: Mt 7:28   ♦ 7:9: Lu 7:50   ♦ 7:11: 1 Kin 17:17-24   ♦ 7:14: Lu 8:54; Ap 9:40   ♦ 7:16: Lu 1:65; Jo 6:14

Oa-ia oiso puraroepa, “Tuariri oeavu oirara oisoa oiso purapaave, Iravu oirato ira urioroverea Pauto reraaro. Easi vii vai-a vao viigoa uriouei? Eke iravu raga-a irare tuepaioveira?”<sup>20</sup> Uva Jisas iare uriosiepa aitereivu. Oa iava oiso purasiepa, “Jon Baptais vegei arurevoi vii iare ira oiso puraroe, Easi vii vai-a vao viigoare tuepaiei osa uriouei. Eke irai raga-a irare tuepaiei?”

<sup>21</sup> Oire uva vo vuuta-a vao oa-ia Jisas riro irara ravotovira porete piepareva oea-ia oupiarovu rutu oiso toupaive oiso-ia, oearovu-ia oisoa vuri tugararo toupaive, ari riro irara voosi irara oearoa tapo vorevira vuravura piepareva.<sup>22</sup> Uva oiso puraroepa vaitereire, “Voresi Jon tavisa varao rutu iava oara kekesivoi ora varao oara uvusivoi oiso-ia, voosi irara vorevira vuravuraivoi. Ora voeao vuri kokoto irara oea tapo vorevira vokaivoi. Ora voeao leprapa irara oea tapo vorevira sisigarueai. Ora voeao uvagi irara oea tapo reo uvuai. Ora kopii irara oea tapo vorevira toreai. Ora voeao apotapa irara oea tapo Vearo Siposipo uvuivoi.”<sup>23</sup> Ari ita, ro ira ragai goruvira oirao pieparevere rutu ira uvuipa ra viraakoa ouoro rorupareve vo ragai.”

<sup>24</sup> Oire uva Jon vaitereiaro disaipeltoarei karesiepa. Oa iava oirara rutu tavireva Jisas Jon iava oiso puraoro, “Eaketo-a ro ira kekesa avataera vo raaka tapi vo vokio-ia oa-ia Jon iare avataera? Esa pito isi vai-a aisia va ratesa avataera, ovusa kiuvu vaisi vurevureparevora, raa? Viapau. Uvare Jon viapau oiso raverave vaiva siposiporevora oiso osa pito isi.”<sup>25</sup> Eke eake-a oa kekesa avataera voa. Easi pasi visii vai irai vai kekesa avataera osa vearopara vai-ia kuvupara vai kuvuparoera voa? Eke viapau? Oearoi pasi oea vai-ia vearopa kuvuro vaiva toupaivora voa ora varao vearopara voea varaaro-ia, varao oarava toupaiveira king irara vo voea vo keparoaro-ia.<sup>26</sup> Ari eake irao-a oa kekesa voa avataera? Easi irai vaia eera profetato? Iu. Ragai visii tavipaa oiso, Eera profetato Jon ira oearovu rutu-ia profet irara puterevora rei vaisi oupaoro.<sup>27</sup> Voari tuariri uva Jon iava Pauto Tugoropa Vuku-ia taviroepa oiso,

‘Ragai Pauto iravu sipopaa reo kaepato. Ira viipa iraparoverea viipa raiva vatatoposa.’

<sup>28</sup> Uva oiso visii tavipaavoi, Jon voeao rutu-ia puterevora oea vo toupaiveira rasitoa-ia. Ari ro ira Pauto vo Saraaro-ia ora akaipa pieparoi, ira ita Jon-ia puteparevoi rei vaisi oupaoro.”

<sup>29</sup> [Oire uva vo reo-a vao oa uvuiva Jisas oa purareva. Oa iava voea rutu ora reopaaepa ora voeao takis oupa irara oea rutu oiso puraaepa, “Iu. Ari Pauto vo pitupituar-a torevokoa.” Oreoroa varao voea varaaro oirao piepaoro baptaisa oupaiva Jon vavaearo-ia.<sup>30</sup> Vosa voeareo ratarataa vovou irara Farisi ora voeao riro tarai irara Reo Taisi-ia oearea viapau oiso baptaisa ouiva Jon ruvara-ia. Eva-a oa vituaro iava isivaaepa vaore vearo raiva Pauto vaaro.]

<sup>31</sup> Uva va-a vao oa iava Jisas voeare oiso puraroepa, “Uva eake vai-a vao oa visii vao vo vokio iavapa irara reesiavere oiso apeisi raga irara?”<sup>32</sup> Visii vao visiigoa oiso rutu toupatavoi osa voeao kakae vure oea uruia vuutaaro-ia paupaaepa okakae vure keerapaoro. Oiso purapaaepa,

Ari ita, igei visiipa pupiara-ia pupi ragapaio, osa kovaa arapareasipatai. Ora visiipa gau eraro-ia kovaa ragapaiei, osa gau arapareasipatai tapo.<sup>33</sup> Uva Jon Baptais urioroera. Uva viapau breteara vai aioparevora. Ora tapo viapau wain oviro vai-ia ukaioparoera. Oa iava eva oisoa oiso purapata rerare, Vuri tugararo ira-ia toupaiveira ro-ia Jon.<sup>34</sup> Oire uva Oirato Oviitoaro ragai urioraera aiopassa ora ukaiopasa tapo aue-ia wain. Oa iava oiso purapataera, Rera keketa eera riro aioto ora riro ukaioto riroara-ia aue wain oviro. Takis oupa irara vatetoaro ora voeao vuri irara. Eisi osa ragaire purapataveira visii.<sup>35</sup> Pauto vo taraiaro-a vegei vo kovoaro vituaro ora Jon. Eisi osa vegei vo kovoaro kuearo eveipaiavere.”

### Iriavu Riakova Jisas Kokotoaro Iisieva Aue-ia Korovo Ovi

<sup>36</sup> Oire uva iravu Farisi-pato Jisas-re keeraroepa rera tapo aiosa. Oa iava rera iare avaroepa. Uva pauroepa aiosa.<sup>37</sup> Uva voa iriavu vo urui-ia vuriva riakova toupaeva. Oa iava voa toupaoro rera iava Jisas uvueva ovusa rera tapo Farisi-pato aiopareva

◇ 7:22: Ais 29:18; Lu 4:18 ◇ 7:27: Mal 3:1 ◇ 7:30: Mt 22:35 ◇ 7:34: Lu 5:29, 15:1-2 ◇ 7:36: Mt 26:6-13; Jo 12:1-8

vo rera vo kepaaro. Oa iava oira o riakova oavu vearo ovi rutu sanda ovi ouoro urioopa, oovia popotepa tou-ia aveke tou sovara-ia toupaiva. <sup>38</sup> Uva Jisas isivaaro iare avaopa rera kokotoaro ruvara iare. Oa iava gaupaea, vo osa oira osireiaro iava gau oviro kovekovepaepa rera kokotoaro iare Jisas. Oa iava ora oira oruaro-ia vara posiposi piepaeva rera kokotoaro iava. Oire vo osa rerapa avivikepaoro rera kokotoarova uugaapaoro rera kokotoaro kipupaeva aue-ia sanda ovi.

<sup>39</sup> Uva va-a vao oa kekereva rera ro Farisi-pato, ira rerare Jisas oiso rugorugooparoepa ora rera raga sopaaro-ia, Vosa oiraopatoa rutu rera ro profetato, oire ra va iava oira-ia tarairo iria rera-ia vavaea tovosa uriooi. Ora varao-ia tapo oira vovouroaro tarairo vara eveioro. Ra oiso auero, Vuriva o-ia otopava.

<sup>40</sup> Uva Jisas Farisi-pato vo rugooroaro pukoreva oiso puraoro rerare, “Saimon. Ragai reo-a vao oava oiso ruipaparai ra vii vatea va.” Osa iava Saimon rerare oiso puraroepa, “Oire Tisato vo reo kosi pieri.” <sup>41</sup> ♦ Oa iava Jisas oiso puraroepa, “Aitereivu oiratoarei aiterea iravu vaaro moni ou ragasiva oiso, iravu aue uvuiaro vo vavae vovoto kina (K500), ari iravu aue vo vavae tau kina raga (K50). <sup>42</sup> Oire uva viapau oiso uvuisiepa oiso ra varei kare piesi vorevira rerapa ro oirato. Oa iava vaitereipa varei eaka ragareva. Oire uva iroutoa vaiiei vaiterei iava ira pute pievira rorupaoro ora rera iava sopaua vaiaro vaterevere rerapa ro oirato?”

<sup>43</sup> “Ari ro oirato ira riroa rutu ou ragareva,” osa puraro Saimon. Oa iava Jisas oiso puraroepa, “Ari ita, torevokovira oisi rugoouei eisi.”

<sup>44</sup> ♦ Oa iava oirare ora poreroepa o-ia riakova oiso purasa rerare Saimon, “E oira kekeri o-ia riakova? Ari ita, vii vo kepaaro-ia koatasa uriorae. Uva viapau ragai vaterivo uukoa vai kokoto sisusa vao ragai iava vigei vo pitupituaro sirova utupaoro. Osa o riakova ragai kokotoaro sisuevoi ora oira osireiaro iava gau ovi-ia. Oa iava ora oira iava orui-ia vo ovi posiposi pieevoi.

<sup>45</sup> Ora viapau oiso ragaiva uugaaue. Ari ita, vosa koatarae uva oisi raga ita oiso osa toupaavoi vaviopavira. Oa iava oira o-ia riakova iria ragai kokotoarova uugaapaoi touvira ragaipa avivikepaoro. <sup>46</sup> ♦ Ari ita, ragai kukuearo viapau iisirivo korovo ovi vai-ia. Ari o riakova ragai kokotoaro iisievoi vao-ia korovo ovi aue sanda. <sup>47</sup> Oire uva oisi-a eisi osa iava vii tavipaavoi oiso, Oira-a o riakova iria ora oira iava sopaua rutu vate iraoevoi ragaipa, uvare oira varaaro-a riroara vuriara, oara yerarevora Pauto. Ari ita, Pauto oavivu garea vuria verareve iravu iava oirato, oire ra oisi raga ita ro oirato ora rera iava gare visivi sopaua vatereve iravupa oirato.” <sup>48</sup> Oa iava Jisas o riakova tavireva oiso, “Vii iava vuriara veraavoi.” <sup>49</sup> Uva rera tapo paupaaepa oirara tebol-ia voeao oea voa rovoaepa rerare oiso puraoro, “Avoeao! Iroutoa rutu-a ro-ia ira vuriara verapare?” <sup>50</sup> ♦ Uva Jisas oirare oiso puraroepa, “Ari ita, ragai oirao pierivoi, oa iava vii iava vuriara veraavoi. Avau, ra kave vovouvira toupari.”

## 8

### *Vo Airorovu Riakora Jisas Sirova Utuaepa Rera Tapo Vokapaoro*

<sup>1</sup> Oire uva utupa visivi riropa uruilo-ia virireva Jisas ora garepara-ia tapo voraro voka-paoro. Uva Vearo Siposipo vao Pauto vo Saraaro iava voeapa oirara oisoa siposipopareve. Uva voeaa disaipel katai tau erao (12) rera tapo vokapaiva. <sup>2</sup> ♦ Ora airorovu riakora airoa iava tuariri tugara verapareva Jisas ora oupiarovu rutu. Airoa-a vairo oriakora rera tapo vokapaiva oiso-ia, iriavu o-ia Maria [iria vova Makdala urui iava]. Iria iava Jisas erao vatara (7) aue tugara verareva. <sup>3</sup> Ora aue Joana rera Susa vatuavaaro, ro ira Herot vo kepaaro-ia oisoa tokipareve. Ora o-ia Susana, ora airorovu rutu tapo rera tapo avapaaepa airoa Jisas tauvapaiva ora voeaa disaipel aue-ia moniara varao vairo varaaro.

### *Reo Ruu Vao Oirato Iava Ira Wit Takuraro Vikipareva Varuparo (Matyu 13:1-9; Mak 4:1-9)*

<sup>4</sup> Uva oirara rutu urioeaepa ora gurusa Jisas iare voeao vova uruiara rutu iava. Oa iava voeaa vatereva oavu ruu reo. Oa-ia oiso puraroepa, <sup>5</sup> “Uva iravu oirato avaroera wit

♦ 7:41: Mt 18:28   ♦ 7:44: Het 19:21   ♦ 7:46: Sam 23:5   ♦ 7:50: Lu 8:48   ♦ 8:2: Mt 27:55-56

takuraro vikisa varuparo. Oa iava vara vikiparevora. Uva oaravu raivaro kovepaera. Oa iava voa vara-ia tasiasipaivora oirara. Uva kokio kare vara aiopasa uriopaaera voa.<sup>6</sup> Uva oaravu witara kovepaera vo uva avekeara toupaivora. Oa iava voa kova ragapaera osa viapau aue uukoa vai. Uva vorevira kopii ovoipaera voa erako ovoipaoro.<sup>7</sup> Ari oaravu witara vo kovepaera vo kokopa kouro sovara-ia varao rokarokapara. Oa iava voa vo kovaro ururao papatapaivora vara ruupaoro witara.<sup>8</sup> <sup>◇</sup> Ari oaravu witara vo kovepaera veearopa rasiroia. Oa iava voa rirovira rutu kuepaera oiso, oaravu katai vovoto (100) kuero puravora.” Uva Jisas oisi oiso puraroepa. Oa iava rirovira oiso ita puraroepa, “Ro ira-ia kokito toupareve, oire vo siposipo orirureve va kuverapaoro ora rera sopaaro-ia.”

*Jisas Vo Pitupituaro Reo Ruu Purapasa*

(Matyu 13:10-17; Mak 4:10-12)

<sup>9</sup> Oire uva rera voeapro disaipel va vituarore vao reo ruu rera akeiva.<sup>10</sup> <sup>◇</sup> Oa iava oiso puraroepa Jisas, “Pauto raga visii tavipare vao vatau reo vituaro iava rera vo Saraaro iava vo reo. Ari oearovupa oirara reo ruuro raga vatepaaveira, oiso ra osireiara voea iava vura ragapaive, vo osa viapau vo reoro vituaro eveipaise. Ora vo reoro tapo uvu ragapaive, osa viapau taraipaise vara vituaro-ia.”

*Vo Toupai Wit Takuraro Vituaro Iava Vao Reo Ruu*

(Matyu 13:18-23; Mak 4:13-20)

<sup>11</sup> <sup>◇</sup> “Vao reo ruu vituaro oiso toupai, Vao-ia wit takuraro oara oiso toupai, Eva Pauto vo reoaro.<sup>12</sup> Oaravu witara vo kovepaepa raivaro oa oiso toupai, Oirara vo reoro uvupaiva, oa iava Seten urioparoepa vo reoro verapasa voea sopaaro iava. Uvare oiso rugorugooparoepa, Teapi vo reo oirao pieive, ra va iava Pauto voea vorereve vorevira ora rerapa.<sup>13</sup> Ari oaravu vo kovepaepa uva rirovira avekeara toupaiva, oa vituaro oiso toupai, Voeao-ia oirara oea ikauvira Pauto vo Saraaro iava vo reoro uvupaoro vara oupaiva vara-ia rorupasa rutu, osa viapau voea iava sopaaura-ia oriruvira toupaive vo reo. Oreoa oiso toupai osa ikopito ro ira viapau avekeara rutu-ia goruvira toupare o pitupare. Oire utupauavi oearovu Pauto vo reoaro tekipasa opitupiturovu purapaise voeo oirara vuri piepaoro. Oa iava voea vaaro oirao pie vovou viapau uvupai ra gorupe vo osa va kavuive.<sup>14</sup> Ari varao witara oara kokopa kouro-ia kovepaepa oa vituaro oiso toupai, Oirara evoea oea reoara uvu ragapaoro vokapaiva vo osa orugorugoorovu rutuva toupaiva vo ora voea vo touaro iava, ora orekerovu rutuva rugorugooporo moniara oaiive, ora varao veearopara rutu oara-ia oisoa rorupaise. Oire uva vara-a varao oara Pauto vo reoaro oisoa vuri piepaive rutu vo voea iava sopaaura. Ra viapau aio kue vai voea-ia karekepe.<sup>15</sup> Vo osa varao veearopa rasiro-ia kovepaepa witara oara vituaro oiso toupai, Evoea oirara oea reo uvupaaepa, oa iava vara goruvira orirupaisa ora voea iava sopaaura varao veearopaura. Oa iava kuepaepa voeapa vo osa goru vovouvira toupaive.

*Vo Aviavi Iava Toupai Oa Vatauiva Baket Sovara-ia*

(Mak 4:21-25)

<sup>16</sup> <sup>◇</sup> “E oirara vuravu rukuepaiveira ra oira vataupaise baket sovara-ia, eke uruara reroaro, raa? Viapau! Asi oirara vuravu tovopainveira tebol ivara-ia viaevira. Oire ra voava roropaeve osa vo aviaviva vurapaoro koatapaavere voeo oea vo kepa-ia toupaiveira.<sup>17</sup> <sup>◇</sup> Ari ita, varao oara vatauvira toupaiveira oara rutu poeravira ora karekeperea. Ora varao rutu varao oara taturupareve oirato, oara rutu tapo oiso utupaua poeravira ora karekepe. Oire ra va iava oirara vara-ia taraiave.

<sup>18</sup> <sup>◇</sup> “Ora vatatopo iraopata visii vao-ia ra veearovira reo uvu iraopata. Vosa irai oiratoa vai oisi vo reo-ia vao pitireve, oire ra ita Pauto aviavi pievira oreorovu ita vatereve rerapa. Ari ro ira oiso kearo, Vo reo ou ovoiavoi va-ia orirusa. Oire uva rera-a eera ira iava vo tarai eva verarevere Pauto.”

*Jisas Aakoaro Iava Ora Rera Araoko Iraraaro*

(Matyu 12:46-50; Mak 3:31-35)

<sup>◇</sup> 8:8: Mt 11:15    <sup>◇</sup> 8:10: Ais 6:9-10; Jer 5:21; Esi 12:2    <sup>◇</sup> 8:11: 1 Te 2:13; 1 Pi 1:23    <sup>◇</sup> 8:16: Mt 5:15; Lu 11:33  
<sup>◇</sup> 8:17: Mt 10:26    <sup>◇</sup> 8:18: Mt 13:12, 25:29; Lu 19:26

<sup>19</sup> Vo vuutao iava vo vokia aakova ora rera araoko iraraaro urioaepa Jisas iare, vo osa riro irara rutu ora gurupaaepa. Oa iava viapau uvuipaaepa ra rera iare tutuu pieive. <sup>20</sup> Uva oearovu rera taviiva oiso, “Aakoara vase-a ora araoko irara oiso torepaa ratau. Oea vii kekesa aepeaai.” <sup>21</sup> ♦ Uva voea vo reoaro pukooro oiso puraroepa, “Ro oirato ira Pauto vo vovou sirova utuparo eira-a ragai aakoaro ora ragai araokotoaaro.”

*Jisas Kiuvu Rakote Pierava  
(Matyu 8:23-27; Mak 4:35-41)*

<sup>22</sup> ♦ Ovokivu-ia Jisas oavu-ia kaero viropa uvuoa disaipel iraraaro tapo. Oa iava voeare oiso puraroepa, “Oiso ragavira ivirovira toko rovu avapaviei.” Osa iava voare avaapea. <sup>23</sup> Uva uvuoa ikauvira avaaepa vo osa Jisas uusiparoepa va-ia. Oire uva riroto kiuvu vusireva voeare uuko rovu-ia. Uva tutuu piepa voeapa oiso ra opesiave. <sup>24</sup> ♦ Oa iava Jisas tore piesa avaaepa oiso puraoro rerare, “Reito! Rokosa tutuu piei.” Oa iava toreroepa kiuvu rakote piesa ora rirova toruva. Oa iava vo vatako rutu rakote ovoiepa vao kiuvu ora toruva. Oa iava uuko rovu viapau oiso ora vurevurepaepa. <sup>25</sup> Uva voeare disaipel oiso puraroepa, “Ovu-ia visii varaaroit oirao pie vovouro?” Osa iava rirovira rutu rugorugoopaoro voea raga ora reopaaepa oiso purapaoro, “Avoeao! Irouto-a ro-ia ira vo vatakore kiuvu ora uuko ovi reoroi, oa iava rera gisipoaro uvu ovoivoi?”

*Jisas Iravu Iava Kokoropato Vurito Tugarato Verareva  
(Matyu 8:28-34; Mak 5:1-20)*

<sup>26</sup> Oire uva Gegesa-ia poua viropa Galili-ia vo toko rovu isivaaro-ia. <sup>27</sup> Oa iava Jisas uvuoa iava rerereva, osa iravu oirato vo urui iava vao urioroepa rera iare, ira-ia oisoa vuri irara tugara toupaive. Ari ita, riro kaekaevira rutu oisoa varo tuu asavira toupareve. Ora tapo viapau kepaara vai-ia toupareve. Viapau. Ari tova urui raga-ia oisoa toupareve. <sup>28</sup> ♦ Uva Jisas kekereva rera ro. Oa iava rirovira rutu oiveoro koveroepa rasiua arore rera kokotoaro ruvara-ia Jisas-pa avivikepaoro. Oa iava voava rerare riro akutaroepa oiso puraoro, “Jisas. Vii-a Pauto Oviitoaaro ro oiso rutu viara-ia. Viire variriparai oiso ra viapau ragai vuri pieri.”

<sup>29</sup> Uva oisi-a eisi osa puraroepa tugarato Jisas-re, uvare Jisas tugarato kosi piesa aepearoepa oiratoa iava. [Aue iava uvare oisoa oiratoa-ia toupaoro rera varivari piepareve. Ra va iava sen tokopareve ora hankap, vorara vara-ia rera tuuke ragapaive. Oa iava oisoa rera tuvetuvepaoro vorarore kuvala tapiro rerava avaparo tugarato uva viapau oisoa oirara vai toupaive.]

<sup>30</sup> Uva oisi-a eisi osa iava Jisas rera akereva oiso, “Irou vaisito-a vii?” Uva oiso puraroepa, “Ragai-a, Riro Irara.” Aue iava uvare riro irara rutu tugara irara oea koataaaepa rera sovara iare. <sup>31</sup> ♦ Oa iava voeo vuri irara tugara rirovira rutu Jisas-re oiso purapaaepa, “Teapi igei sigupari vuri tapi vaire rikui vai sovara iare.”

<sup>32</sup> Uva oavu koue ragui oa pukuia-ia ororoaro-ia aiopaoro voa toupaiva gare pukui raga. Uva va-a eva oa iare Jisas kegi iraopaiva oiso purapaoro, “Igei tariori vavore koue ragui-ia koatapasa.” Osa iava voea sipo pierava voare. <sup>33</sup> Oa iava voeo vuri irara tugara rera iava ro oirato kosia viropa. Uva avaaepa koue ragui-ia koatasa. Oa iava vo ragui vao riro varivarivira ikauro varaaepa vagapa-ia ora vikioro toko rovu-ia rokosa. Uva voa gisi ovoiaepta kopioro.

<sup>34</sup> Oire uva va vao kekeiva voeao oea oisoa vo ragui tokipaive. Oa iava toriiva oirara rutu tavitavisa voeao oea riro urui-ia oisoa toupaive ora uvarovu rutu tapo. <sup>35</sup> Uva oirara rutu va vao kekesa urioaepa. Oa iava Jisas ruvara-ia poua viropa, ovusa rera kokotoaro ruvara-ia pauparoepa varoa-ia tuupaoro, rera ro ira iava tugara kosia viropa. Uvare rera iava rugorugoara roroioepa vorevira. Uva va vao kekeoro rirovira rutu voea iava vovouisiro uririepa Jisas vo goruaro asavira. <sup>36</sup> Oire uva voeao oea va vao kekeiva opitupitua purareva Jisas. Oa iava siposipopaiva va iava vao oa purareva ro oirato ira-ia

---

♦ 8:21: Lu 11:28; Jo 15:14   ♦ 8:22: Mk 6:47-52; Jo 6:16-21   ♦ 8:24: Lu 5:5, 4:39   ♦ 8:28: Mk 1:24   ♦ 8:31: Ro 10:7; Re 20:1, 3

tuariri vuri tugararo oisoa toupaive. <sup>37</sup>◊ Oa iava oirara rutu voeao vorarova Gegesa oea Jisas-re oiso puraaepa, “Vo kavuoro ava iraopaei,” uvare uriripaaepa. Oire uva va-a vao oa iava Jisas uvuoia kaero viropa vorevira karesa. <sup>38</sup> Uva rera ro ira kavuiva tugara Jisas kegipareva rutu oiso purapaoro, “Rui paparai ra vegei rutu kareve.” Oa iava Jisas vorevira rerare koruroepa oiso puraoro, <sup>39</sup> “Voreu atoia vo vii voaaro. Ra voa sipoipori varao iava Pauto oara purare vii-ia.” Oa iava voare kareroepa voea rutupa oirara sipoiposa vo rera vo uruiaro vara rutu iava varao Jisas oara purareva rera-ia.

*Jisas Reito Oviivaaro Ravotovira Porete Pierava Ora O Iria Rera Iava Varoa-ia Pitueva  
(Matyu 9:18-26; Mak 5:21-43)*

<sup>40</sup> Oire uva Jisas vorevira kareroepa uuko rovu iviropaoro. Oa iava oirara rutu rera-ia rorupaiva. Uvare rerare tuepaaepa voea rutu, osa vorevira kareroepa voea iare. <sup>41</sup> Oa iava iravu pouro viropa rera vaisiaro, Jairas reito Reo Taisi Uvupa Kepa iava rera. Ira urioroepa Jisas kokotoaro ruvara-ia rekusa. Oire uva voava goruvira rutu rerare oiso puraparoepa, “E uvuipauei ra urio iraou vore ragai vo kepaaro-ia?” <sup>42</sup> Ira oviivaaro kataivavi raga. Iria katai tau erao (12) iva-ia uvuipaopa. Oire uva tutuu piepa oirapa oiso ra kopio. Oa iava voare Jisas avaroepa.

Uva riro irara rutu oirara rera kovokovoiva voa rerare ora guruoro. <sup>43</sup> Uva voa-a evoa uva iriavu riakova voea tapo toupaeva. Iria-ia kekira oisoa koveparo vokiara rutu-ia. Uva aue rutu uvuiaro-ia toueva rera ragava kekira katai tau erao (12) ivaro vo osa oira oupareve. Uva va-a eva oa-ia oisoa riroara moniara viki ragapaeve riro irara rutupa ruvarupa irara, vo rara oira ruvarupaive. Osa viapau irai oisoa oira iava vo upia opesi piepareve. <sup>44</sup> Oire uva urioopa rera isivaaro iare tutuu pieoro Jisas. Uva voaviva rera iava varoa vatuar-ia pitueva. Oa iava vagevagevira raga revisi upia opesi ovoiepa oira iava posiposi ovoioro. Uva viapau oiso vorerivira ita oira oupaiva vo upia eva. <sup>45</sup>◊ Uva Jisas ora rera-ia oira sovooro oiso puraroepa, “Irouto ragai-ia piture?” Oa iava voea rutu taeaaepa oiso puraoro, “Ae, igei viapau.” Uva Pita oiso puraroepa rerare, “Reito. Easi voeao vaio-a riro irara rutu oea vii kovokovoivoi viire ora guruoro.” <sup>46</sup>◊ Oa iava Jisas oiso puraroepa, “Iravu ira ragai-ia piturevoi. Oa iava oavure gorua rororai, oa avaei ragai iava irai vearo piesa.” <sup>47</sup> Oire uva oira o riakova iria taraiopa. Uva viapau oiso uvuipaopa ra rerare vatauo. Oa iava rerapa uriripaoro rirovira rikerikepaopa. Uva rera ruvara-ia rekusa urioopa vo oirara rutu osireiaro-ia. Oa iava voea rutupa tavitaviopa vao vituaro iava oa iava vavaea tovoeva Jisas-ia pituoro. Uva oiso puraopa, “Ragai iava ikauvira raga upia opesi ovoiei.” <sup>48</sup> Oa iava Jisas oiso oirare puraroepa, “Oviiva oaa, vii vaaro oirao pie vovouaro oa vii ravotovira porete pie ovoivoi. Avau. Ra vii iava sopaua gavaurevira toupaive.”

<sup>49</sup> Oire uva touvira reoreoparoepa, ovusa iravu oirato ro Jairas vo kepaaro iava urioroepa rera tavisa oiso, “Vii oviivaaro kopioi rutu. Teapi touvira Tisato pugu piepari va iava vao.” <sup>50</sup> Oire uva Jisas va vao uvureva. Oa iava rera vo reoaro aatooro oiso puraroepa, “Eakepa uriripauei? Ragai oirao pieri. Oviiva oara ravotovira poretepaoi vorevira tootoooro.” <sup>51</sup> Oa iava Jisas avaroepa Jairas vo kepaaro iare. Uva voa voea rutu kosi pierava. Vo osa voeao raga tapo voare koataro Pita vase ora Jon, ora Jems, ora aiteto avukarei, vaitereo uvava oviiva. <sup>52</sup>◊ Ovusa oirara rutu oirapa kakaeva gaupaiva. Uva va-a vao oa iava Jisas voeare oiso puraroepa, “Opeita gaupata. Viapau oiso kopioi rutu. Easi eira uusi ragapaoi.” <sup>53</sup> Oire uva rera agesipaiva rutu. Eake iava? Uvare oiso taraiipaepa, Iria o kopioe rutu. <sup>54</sup>◊ Oa iava Jisas oira vavaearo-ia pituoro oirare oiso puraroepa, “Kakaeva toreu.” <sup>55</sup> Oa iava tootooa oira iava kakaeva vorevira voreepa oira iare. Uva ikauvira vaaraa ovoiopa. Oa iava Jisas oiso voea tavireva, “Oirapa aioara vai vateta.” <sup>56</sup>◊ Uva aitetoarei rirovira rope iraopasiepa. Oa iava Jisas goruvira rutu oiso vaiterei tavireva, “Opeita irai tavipasivere.”

---

◊ 8:37: Ap 16:39   ◊ 8:45: Lu 5:5   ◊ 8:46: Lu 5:17   ◊ 8:52: Jo 11:11, 13   ◊ 8:54: Jo 11:43   ◊ 8:56: Lu 9:21

## 9

*Jisas Kovoa Vatereva Katai Tau Eraopa Aposel  
(Matyu 10:5-15; Mak 6:7-13)*

<sup>1</sup> ♦ Oire uva voeare katai tau erao (12) disaipel keeraroepa. Oa iava voea vatereva riroa gorua ora reesia tapo voeapa aue rei vaisi, oisore ra va iavirava vuri tugararo kosi piepaive, ora oaravu rutu tapo upiara. <sup>2</sup> ♦ Uva voea arureva Pauto vo Saraaro iava siposipopasa ora upiapa irara tapo porete piepasa. <sup>3</sup> Oire uva oiso voea tavipareva, “Viapau oiso ra oaravu avu vai rutu kaepatavere vokapaoro. Ora viapau oiso ra tooroara vai-ia pitupatavere vokapaoro, ora oapara vai, ora opo, ora moniara vai. Ora viapau oiso ra eraeraovira kuvupara vai-ia pitupata tapo ora visiipa. Uvare voea auearo-a visii tokipasa voeao oea tauvapasa avapatai.” <sup>4</sup> Vosa okepai-ia koatata, oire ra vo kepa raga-ia toute vo tugurasa uva vo kepa-ia toupaoro ouruivu iare topa uvirosa auepata ita. <sup>5</sup> ♦ Ari vosa viapau visii oupaive vore ora voea vo kepaaro-ia, oire ra vo urui eva kavuoro avata. Ra ora visii iava kokotoaro iava rasiara tovetoveta voare voea vo vuriaro reesipasa. Ra va iava ora voea vo pitupituroarore evara rugooave.” <sup>6</sup> Uva va-a eva oa iava avaaepa Vearo Siposipo purapasa vo uruiara rutu-ia. Uva upiapa irara rutu tapo ravotovira porete piepaiva vorevira.

*King Herot Jisas Iava Uvureva  
(Matyu 14:1-2; Mak 6:14-16)*

<sup>7</sup> Oire uva King Herot Galili iavapa irara reitoaaro ira vara rutu iava varao uvureva. Oa iava vavagisiparoepa rutu. Eake iava? Uvare oearovu oiso purapaaepa, “Jon eera ira tova tapi iava vorevira toreroi.” <sup>8</sup> ♦ Osa oearovu oiso purapaaepa, “Easi Ilaija eera ira vorevira ora karekeroi.” Vo osa oearovu oiso purapaaepa, “Easi reo topa piepato-a profetato eera tuariripato ira vorevira toreroepa.” <sup>9</sup> ♦ Oa iava ro Herot oiso puraroepa, “Jon kukuearore ragai voeaaro aruavora. Ari iroutoa rutu-a ro ira iava siposipovaivoi oirara?” Oire uva va-a vao oa iava oiso ruipaparoepa ra Jisas kekereve rutu.

*Jisas Vo Vavae Tuku (5,000) Aio Piererva  
(Matyu 14:13-21; Mak 6:30-44; Jon 6:1-13)*

<sup>10</sup> Uva vorevira rera voeaaro aposel irara kareaepa Jisas iare. Oa iava rera tavipaiva varao rutu iava oara puraiva. Osa iava voea raga roporeva voea ouoro oirara rutu sovara iava. Uva ouruivu iare voea tapo avaroepa, oiso ra reareaave. Vo urui vaisiaro, Betsaida urui. <sup>11</sup> Uva va iava uvuivoiva, voea sirova utuaepa. Uva viapau oiso Jisas voeare koruroepa. Uva voea rutupa Pauto vo Saraaro iava siposipopareva. Ora oearovu rutu tapo upiapa irara ravotovira porete piepareva. <sup>12</sup> Ovaiarov iatai tau erao (12) Jisas iare urioaepa rerare oiso purasa, “Voeao taviri ra evoraro uruiara vai-ia uusisa avaave. Ora voeapa aioara vai voripaive voraro. Ari kuvala tapi-a vo-ia uva toupai. Uva viapau oirara vai toupaive.” <sup>13</sup> ♦ Oa iava Jisas voea tavireva oiso, “Visii raga voeapa aioara vai vateta.” Uva oiso puraaepa, “Viapau riroara vaiei vo igei vara. Ari vo vavaevi raga vao-ia bret ora kataitoarei ataritoarei oaravia rutu-a varao toupai. Esa oiso vaio ruipapauwei ra voeapa aioara vai vorisa avaao, eke?” <sup>14</sup> [Aue rutu vao vo vavae tuku (5,000) rutu uvuiaro oirara, vo osa viapau riakora ora kakae vure vievieiiva voeao oea toupaiva.]

Uva Jisas rera voeaaro disaipel tavireva oiso, “Voea totoevira pau pieta oiso, oeavu vo vavae tau (50) uvavivu, ra oeavu vo vavae tau uvavivu pauave, osa oeavu ita vo vavae tau uvavivu pauave.” <sup>15</sup> Oa iava disaipel oisi voea roorookavira paupau pieiva. Osa iava voea rutu oirara rutu pau pieiva. <sup>16</sup> ♦ Oire uva Jisas bret vavae ouoro ora ataritoarei vara rutuva vuvuiua-ia vurareva vearo vaisi puraoro. Oa iava vara puteputeoro voeapa disaipel vara vatereva, oiso ra vara vateive voeapa oirara. <sup>17</sup> Uva voea rutu uvuivira aioiva. Oa iava ururukoara guruiva varao oara kavu piropa. Oara-ia katai tau erao (12) aue pekuri agasi pieiva.

♦ 9:1: Mk 3:13-14   ♦ 9:2: Lu 10:1, 9   ♦ 9:5: Ap 13:51   ♦ 9:8: Mt 16:14   ♦ 9:9: Lu 23:8   ♦ 9:13: 2  
Kin 4:42-44   ♦ 9:16: Lu 22:19; Ap 2:42, 20:11

*Pita Jisas-pa Taviroepa Oiso, Vii-a Krais  
(Matyu 16:13-19; Mak 8:27-29)*

<sup>18</sup> ♦ Ovuutavu-ia rera raga Jisas variriroepa vo osa disaipel irara rera tapo toupaiva. Oa iava voa oiso voea akereva, “Apeisi ragai vaisipaiseira oirara?” <sup>19</sup> ♦ Oa iava rerare oiso puraaepa, “Ari oearovu oiso vii vaisipaiseira, Jon Baptais, osa oearovu oiso, Ilaija ira oisoa reo topa piepa kovo purapareve voari tuariri. Ari oearovu oiso, iravu tuariripato profetato roari ira vorevira toreroepa.” <sup>20</sup> ♦ Oa iava oiso ita voea akereva, “Ari apeisi visii raga ragai vaisipata?” Oa iava Pita oiso puraroepa, “Ari vii-a Krais ro Ropoto viigoa arureva Pauto vore.”

*Jisas Ora Rera Iava Taviroepa Oiso, Kopiiravere Ra Vorevira Torera  
(Matyu 16:20-28; Mak 8:30-9:1)*

<sup>21</sup> ♦ Oire uva vo reo-a vao oa iava Jisas goruvira voea vosireva oiso, “Opeita oisi ragai iava irai tavita.” <sup>22</sup> Oa iava topa pievira oiso voea tavireva ora rera iava. “Oirato Oviitoaaro oiso riroara vai siitokaara vai oureve. Uva lotupa irapa irara, ora reipa irara pris, ora voeao Reo Taisi-ia tarai irara rerare isivaavere. Uva rera upoivere, ra vo pevapa voki-ia vorevira torerovere.”

<sup>23</sup> ♦ Oa iava oiso voeare puraroepa, “Vosa ro ira ragai sirova utu ruipaparo, oire ra ora rera iava vaisia vara pie rovoreve. Oa iava uvuipa ra ora rera vo vavataaro kaereve, oiso osa vao evao parikou ragai sirova utupaoro vokiara rutu-ia.” <sup>24</sup> Ro ira tootooaro virivaripareve, oava eva opesiroverea tootooaro. Ari ro ira tootooaro vatereve vo oearovupa ragai vo ruipaaro sirova utupaoro eera-a ira tootooaro tapo virivariavere taru. <sup>25</sup> Vosa irai sara kovo vai purareve, ra auero rutu oureve varao vo rasio-ia, vo osa eisi piepaoro ora vuri piero, oire aa vao-a vearoa oa oureveera oirato vo rasio-ia? <sup>26</sup> ♦ Vosa irai ragaiipa ariiparo vo oearovu osireiaro-ia ora ragai vo sипosipoарo пао. Uva oisi-a eisi osa rerapa ita ariiraverea ragai vao Oirato Oviitoaaro, vo osa ragai vaarova keraria vorera. Ora vao Aiteto, ora voeao tugoropa irara enselpa irara vaaro keraria, oea rutu osireiaro-ia rerapa eera ariiraverea rara. <sup>27</sup> ♦ Oiraopavira rutu visii tavi iraopaavoi oiso, Ari ita, oearovu oirara visii iava toootovira toupaiverea oea viapau tuguraaverea kopiia-ia. Oea Pauto vo Saraaro keke rovoivere taru.”

*Jisas Iava Varaua Avokorivira Karekeepa  
(Matyu 17:1-13; Mak 9:2-13)*

<sup>28</sup> ♦ Jisas vo reo purareva, oa iava utupavira vo peva vatara vokiro isivaaro iava vo peva vao ourevea oiso, Pita, Jon, ora Jems. Uva voeа tapo iparoepa oavu-ia riro pukuia oiso ra voa variriro. <sup>29</sup> Voa variriparoepa. Uva rera iava puaua avokorivira karekeepa, osa rerare kuvupara tapo popoteepa rutu oiso sisikoreoro osa aviavia. <sup>30</sup> Oa iava voa aitereivu oiratoarei rera iare ora karekesiepa voava Pauto vo uruiaro. Uva evaiterei Jisas tapo ora reopasiepa Moses vaio ora Ilaija. <sup>31</sup> ♦ Aiterea Pauto vaaro-ia karekesiepa keraria eva aviavia. Uva voa ora reopasiepa aue tapo Jisas varao iava oara purarevere Jerusalemia kopiioro Pauto vo vovouaro sirova utuoro. <sup>32</sup> Oire uva Pita vase iava osireiara rurava. Oa iava oiso ruipapaaepa ra uusiave, osa viapau oiso uusipaaepa. Oa iava vorevira voea iava osireiara pariiva Jisas vaaro keraria kekesa, ora vaitereo tapo aiterea rera tapo torepasiepa. <sup>33</sup> ♦ Oire uva va-a vao oa iava Jisas arova avasa auepasiepa ovusa Pita Jisase oiso puraroepa, “Reito. Igei-a vao vo toupaio vearpai ra kepa peva vai paui oiso, Vii okepai, ora Moses okepai, ora Ilaija okepai.” [Aue iava uvare Pita viapau vearovira taraiparoepa va-ia vao oa iava oisi eisi puraroepa.]

<sup>34</sup> Oire uva touvira raga vo reo vao purapareva osa iriavu rukuta voea ruueva. Oa iava rirovira rutu uriri iraoaepa. <sup>35</sup> ♦ Oira sovara-ia o rukuta oreovu Pauto vo reoaro oiso puraepa, “Eera-a ragai Oviitoaaro ira reesiavora rera ropooro. Ira uvu iraota.” <sup>36</sup> Uva

♦ 9:18: Jo 1:49, 11:27    ♦ 9:19: Mk 9:11-13    ♦ 9:20: Jo 6:69    ♦ 9:21: Mt 16:20    ♦ 9:23: Mt 10:38

♦ 9:26: 2 Ti 2:12; 1 Jo 2:28    ♦ 9:27: Jo 21:22    ♦ 9:28: Lu 3:21    ♦ 9:31: 2 Pi 1:15    ♦ 9:33: Lu 5:8, 8:24, 45

♦ 9:35: 2 Pi 1:17-18

oisia oiso osa puraeiva vo reo vao, voa rera raga kekeiva osa toreparoepa. Oa iava ora tape piaeapa. Uva viapau irai tavipaiva va iava vao oa kekeiva voa.

*Jisas Ravotovira Iravu Viovokoto Porete Pierewa Vurito Tugarato Veraoro  
(Matyu 17:14-21; Mak 9:14-29)*

<sup>37</sup> Vokipavira pukuia iava vokiaeapa voava varaoro, osa oeavu riro irara rera iare Jisas urioaepa raivaaro rerava aivarosa voa. <sup>38</sup> Uva iravu oirato voea iava Jisas-re keeraoro oiso puraroepa, “Tisato, goruvira rutu vii arepaavoi oiso ra oviitoa oaa kekeri kataitoavi raga. <sup>39</sup> Ira-ia pitupareveira iravu vurito tugarato. Oa iava rirovira oivepaoro ikaupavira kove ovoiparoveira vurivira rutu. Ra popotevira rera gisipoaro-ia kosikosipa piro aue ruiruiso. Ari ita, rera iava varaua vuri pie iraopareveira. Ra va iava viapau oiso ikauvira rera eakapareveira. <sup>40</sup> Oa iava vii voearore gau ragapaavorao disaipel, oiso ra rera ro vurito tugarato kosi pieive. Osa viapau uvuipaerao.”

<sup>41</sup> Oa iava Jisas rera aatooro oiso puraroepa voeare, “Ae visii vao-ia oirara vo vokio iava. Viapau oiso oirao pie vovou vaiei visii-ia. Vuri sopa irara rutu-a visii. Ovirovu-ia vuuta visii tapo toupaaveira? Ora ovirovu purapaavere visii vo vovouroaro-ia kasikasipaoro, osa viapau goruvira ragai vaaro-ia pitupata?” Uva va-a vao oa iava rerare ora poreoro oiso puraroepa, “Oviito oarava uriou.” <sup>42</sup> Oire uva rera raga kakaeto urioroepa. Oa iava rera vurito tugarato rera-ia vikiroepa rasiua arore rera sisiputaoro rutu vurivira. Osa iava Jisas rerare tugarato kasipuroepa rera kosi pie ovoioro rera iava ro kakaeto. Oa iava vorevira aiteto vatereva rera. <sup>43</sup> ♦ Oire uva voa-a vo uva oirara rutu vao riroa Pauto kerariaro vo goruaro kekeiva. Oa iava ora sitaaepa rutu va-ia tavetavepaoro.

*Jisas Erao Pievira Ora Rera Iava Taviroepa Oiso, Kopiravere  
(Matyu 17:22-23; Mak 9:30-32)*

Oa iava rirovira rutu vara iava rugorugoo iraopaaepa varao oara purareva. Oa iava Jisas voea disaipel tавireva oiso. <sup>44</sup> “Vearovira rutu ora visii iava kokiara gereta, ra vo reo uvuoro va oriruta. Uvare utupauavi Oirato Oviitoaaro vateivere keripa irara vavaearo iare.” <sup>45</sup> ♦ Osa iava viapau vo reo vituaro-ia taraipaaepa vao vatau reo oa purareva ora rera iava voeare. Oa iava viapau vo reo-ia taraipaaepa vearovira. Uva vo reore ake arapa uriripaaepa rera asavira.

*Irouto-a Reito?  
(Matyu 18:1-5; Mak 9:33-37)*

<sup>46</sup> Uva voea raga disaipel reoa-ia ora upopaaepa oiso ora reopaoro, Iroutoa rutupa ro ira vigei iava reiparoi? <sup>47</sup> Uva Jisas voea vo rugorugooaro-ia tarairoepa vao oa toupaiva voa voea iava sopaura. Oa iava iravu oureva kakaeto garetoavi ora rera ruvara-ia rera tore piesa. <sup>48</sup> ♦ Uva voeare oiso puraroepa, “Ro ira ro kakaeto tauvaparevo ragai vaisiaro-ia, rera-a eera ira ragai tauvapare. Ora ro ira ragai tauvapare, ira ita ro tauvapare ira ragai arureva vore. Ari ita, ro ira gare visivi rutu toupare akaipavira visii rutu vao-ia vuutaaro-ia, ira-a eera rovopatoa rutu visii rutupa vo Pauto osireiaro-ia.”

*Ro Ira Viapau Visiiva Keriparo Uva Rera Eera Vatetoa Oavisii  
(Mak 9:38-40)*

<sup>49</sup> Jon oiso puraroepa, “Reito, iravu oirato kekeivo osa vuri tugararo kosi piepare vii vaisiaro-ia. Ari ita, vo osa viapau vii sirova utuparoveira oiso osa igei vii sirova utupaioveira. Uva va-a eva oa vituaro iava rerare koruie.” <sup>50</sup> ♦ Uva Jisas rerare oiso puraroepa, “Eakere rerare korutae? Ari ita, ro ira viapau vigeiva ora keriparo, eera-a ira vigeiva tavosivira toupare.”

*Vo Sameria-pa Irara Ora Voea Vo Uruiaro-ia Korukorupaoro Jisas Siguiva*

<sup>51</sup> ♦ Vo vuuta-a vao oa tutuu pieiva oa-ia Pauto oiso ruipaparoepa ra Jisas kae pierewe vorevira vuvuiua iare. Oire uva vo vuuta iava vo vokia rovoroepa rera vo ruipaaro tovooro, oiso ra Jerusalemi iare avaro. <sup>52</sup> ♦ Osa iava oeavu ira pierewa vo reova vao ora rera

♦ 9:43: 2 Pi 1:16   ♦ 9:45: Lu 2:50, 18:34   ♦ 9:48: Mt 10:40; Jo 12:44, 13:20; Mt 23:11-12   ♦ 9:50: Mt 12:30

♦ 9:51: Lu 13:22   ♦ 9:52: Mt 10:5; Jo 4:4

java. Uva ouruivu-ia karea viropa Sameria vo uruiaro. Oa iava rera varaaro vata toposa aueaepa. <sup>53</sup> Vo osa voea voeao vo uruia vao rerapa Jisas reasi iraopaaepa vova ora voea vo uruiaro-ia. Aue iava uvare oiso taraipaaepa rera-ia, Ari ro-ia Jiu ira Jerusalem iare avaparoi, osaravu rutu iava rera. <sup>54</sup>  $\diamond$  Uva va vao kekesiva vaitereo Jems vaio ora Jon. Oire oa iava Jisas-re oiso purasiepa, “Turaro, apeisi vovoupaei ra tuitui kasire keeravio. Ra voeao oirara kasisa varape vova vuvuiua iava?” <sup>55</sup> Uva Jisas vaitereire kasipuoro vaiterei tape piesa ora poreroepa. <sup>56</sup> Oa iava ouruivu raga iare topaa viropa ita.

*Irouto Ro Ira Jisas Sirova Utu Ruipaparo  
(Matyu 8:19-22)*

<sup>57</sup> Oire uva raivaaro vokapaoro avapaaepa. Uva voa iravu oiso Jisas tavipareva, “Voraro ouruiroa rutu-ia vokapaoro avapauvere, uvaroa vii sirova utuparavere.” <sup>58</sup> Uva oirato vo vovouaro rutu kareke piesa oiso puraroepa rerare, “Aakau kare varaaro rikuara toupaiveira rasiuaaro. Ora kokio kare oea tapo varaaro epitara toupaiveira. Ari ragai Oirato Oviitoaaro viapau oiso oai epao tavukia vai ragai ora raga iava kukue uusi piepasa.”

<sup>59</sup>  $\diamond$  Uva va-a vao oa iava Jisas oiso iravu tavireva, “Ragai sirova utuu.” Oa iava rera ro oiso puraroepa, “Vearopai ra ragai iava vase rovori. Ra aite tova rovosa vore rovora, vo rara kopiilo.” <sup>60</sup> Uva Jisas rerare oiso puraroepa, “Eagara, voeape evoea kopii rugoo irara ra ora voea raga ora tovapaave. Osa vii Pauto vo Saraaro iava siposiposa avau.”

<sup>61</sup> Uva iravu ita rera tavipareva oiso, “Turaro, oiso ruipaparai ra vii sirova utupara. Uva apeisi vovoupau? Ra ragai iava vase rovori auere ra sekan rovosa vore rovora ragai voearova.” <sup>62</sup> Oire uva Jisas rerare oiso puraroepa, “Ro ira ora rera vo kovoaro-ia pitu rovoreve, oire ra voava orugorugoovu ita porero utupavira, ra apeisi ragavira rera vo kovoaro vearovira rutu karekepe? Ira-a eera viapau uvuiparoi vo kovo-ia pitureve Pauto vo Saraaro-ia okovoa toupaiveira.”

## 10

*Jisas Erao Vatara Tau Erao (72) Siporeva Rera Vo Kovoarova*

<sup>1</sup>  $\diamond$  Vo utupavira Turaro erao vatara tau erao (72) reesirevoiva, voea eraeraopavira siporeva. Uva iraaepa rerapa uruiara rutu iare, varao reipa uruiro ora garepa uruiro tapo. Uva utupavira rera raga avasa ae paroepa vo uruiro iare varao. <sup>2</sup> Oire uva Pauto vo kovoaro reesi oiso puraroepa voeare, “Riroara aioara vioroe, oara oiso toupai osa oirao pie asa irara vo ragai-ia Jisas. Osa viapau kovopa irara vai vo voea tavitavipasa. Eisi osa iava variripatavere rore ira vo kovoaro-a. Ra va iava kovopa irara vai siporeve rerapa aioara gurusa ae oirara.

<sup>3</sup> “Uvuta! Visii sipopaavoi oiso osa sipsip kakaero aakau kare vuutaaro iare, okarea vo kakaero aiopaveira. <sup>4</sup> Opeita moni oaparo vai kaepatavere, ora ogataara vai, ora aue tasipa su. Teapi ora visii vo vuutaroaro pute pie ragapata ora reoreo ragapaoro oearovu tapo voraro raivaaro. <sup>5</sup> Oire vosa oai-ia kepa vai koatasa ae pata, oire ra oisi pura rovota, Visii vao vo kepa iava kave vovouvira toutes. <sup>6</sup> Vosa irai kave vovoutoa vai vo kepa-ia toupareve, oire ra va vao kave vovou tovota rera-ia. Ra rera iare vira piro. Ari vosa viapau oisi irai, oire ra visii vaaro kave vovou vao oa vateta oa visii iare ita vorevira vorepere, vo rara irai viapau va oupareve. <sup>7</sup>  $\diamond$  Oire ra voa katai kepa raga-ia toupata. Ra vo kepa raga-ia aiopata ora ukaiopata tapo varao oara vatepave visiipa voa. Aue iava uvare ro ira Pautoa-pa kovopareve oirara tauvapaoro, irapa torevokopai oiso ra tauvaa oupareve oearovu ruvara-ia, voeao oea tauvapareve voea tokipaoro. Ari ita, viapau uvuipatai ra okeparovu iare ora sikasikapata. Ari uvuipatai ra katai kepa raga-ia toupata.

<sup>8</sup> “Oire vosa ourui-ia kare uvirota, ra voa visii ouive vorarore ora voea vo keparoaro-ia. Oire ra aioara aiopata varao oara visiipa vatepave. <sup>9</sup> Upiapa irara porete piepata voa vo urui-ia. Ra oisi voea tavipata tapo, Pauto vo Saraaro tutuu piepaivoi visii iare. <sup>10</sup> Ari vosa ourui-ia kareu virota vao oa-ia visiire korukorupaave, oire ra vo urui vuutaaro-ia toresa

$\diamond$  9:54: 1 Kin 1:10, 12     $\diamond$  9:59: Mt 8:21, 22     $\diamond$  10:1: Mt 10:1; Mk 6:7     $\diamond$  10:7: Mt 10:10; 1 Ko 9:14; 1 Ti 5:18

avata voava voea siposiposa <sup>11</sup> oiso puraoro, Ae! Poupopou rasiro igei kokotoaro-ia votoei. Oire uva visiipa Pauto vo kasipuaro kareke piepaiovai vara vorevira tovetoveoro ora igei kokotoaro iava. Ra va iava oiso yearovira taraita, Ari ita, Pauto vo reoaro visiire keera ragapai osa va uvu ragapatavoi. [Ari ita, tutuu pie ragavoi Pauto vo Saraaro ovusa vapareasipatai]. <sup>12</sup> ♦ Oire uva visii tavipaa vao iava Ovoiopa Voki oa-ia Sodom vata voeao ea oisoa vuri pitupitu purapaive, oea vo siitokaaro ouiverea, oa-ia visii vo siitokaaro puteverea riroa rutu.

*Siraovira Rutu Vo Uruiropa Oara-ia Viapau Ora Voea Iava Sopaura Oaive Porepaive  
(Matyu 11:20-24)*

<sup>13</sup> ♦ “Siraovira rutu visiipa vo Korasin urui. Ora siraovira rutu visiipa Betsaida urui. Vosa ragai oai ravoto kovo vai puraavori Taia uruireipa ora Saidon voari rutu tuariri, oiso osa vao-ia oa puraavora visii ruvara-ia, oa iava tuariri vuri irara Taia vata ora Saidon vata oearea rutu vuri varorovi raga-ia tuupaaeri. Ra vo tuurova gavutara raga ivara-ia paupaave vuri vovouro oaiveva ariipaoro. Oa iava sopaura oaive voea iava pore pirori vova vuriara oaive iava. <sup>14</sup> Oiraopavira rutu oiso osa visii tavipaavoi oiso, Vo vokio vao oa-ia oirara rovirieirevere Pauto ovokia-ia vo siitoka ouverea vo uruireo Taia uruirei ora Saidon, oa-ia puteverea rutu vo tavaka visii vaaro. <sup>15</sup> Ari visii Kapaneam vata visiigoa kae viro ruipapataveira vuvuiua iare, oiso ra rei vaisipata, raa? Ari viapau. Easi visii vara piereverea vuri tapire.”

<sup>16</sup> ♦ Oa iava oiso Jisas rera voeao disaipel tavireva, “Ro ira visii gisipoaro uvureve, oire uva rera-a ita eera ira ragai gisipoaro uvurevoi. Ari ro ira visiire isivaroi, eera-a ita ragaire isivaroi ora ro tapore Pauto ira ragai arurevora vore.”

*Erao Vatara Tau Erao (72) Kovopa Irara Oea Vorevira Kareaepa*

<sup>17</sup> Oire uva utupa visivi erao vatara tau erao (72) vorevira kareaepa. Oa iava rorupaiva oiso puraoro, “Turaro, igei vii vaisiaro iavirava voeao reopae vuri irara tugara. Oa iava igei vo reoaro uvupaivo rutu, vo osa oearovu iava voea kosi piepaio. <sup>18</sup> ♦ Oa iava Jisas oiso voeare puraroepa, “Seten tueava osa oiso vararoepa osa parakauoro vuvuiua iava koveoro, vo uvare viapau gorua vai epao rera oaiaro. <sup>19</sup> ♦ Uvuta! Ragai visiipa gorua vatepaavoi. Oa iava ro-ia putetavere ira vigeiva keriparoveira Seten. Ra va iava vo kareo rutu-ia tapo puteta voea-ia tasioro rakoru kare ora siikopi kare. Ra va iava viapau visii vuri piereve ro vurito. <sup>20</sup> ♦ Opeita rorupaoro oiso purapata, Vuri tugararo igei vo reoroaro uvupaiveira. Viapau. Ari Pauto-ia roru iraopata ira visii vaivaisiaro rigatoreva rera vo uruiaro-ia oiso puraoro, Ragai voeao-a visii.”

*Jisas Rorupareva Rutu Oa iava Vearo Vaisi Purareva Pauto-ia Aiteto  
(Matyu 11:25-27, 13:16-17)*

<sup>21</sup> ♦ Vo vuutao-ia Tugoropato Uaurato rorua kareke piereva Jisas sopaaro-ia. Oa iava oiso puraroepa, “Aite, vii Reito Turaro vuvuiua-ia ora vo tapo rasitoa-ia. Vii-ia vearo vaisi puraavoi. Uvare viigoa varao rutu vatauriva voeao asavira oirara oea-ia taraiara toupai vo ora voea vo rugorugooaro-ia. Oa iava voeao raga kareke pieriva oea oiso toupaiveira osa garepa kakaero. Iu ita. Aite, vii raga vo ruipaaro osa oiso yearovira toupaiveira.”

<sup>22</sup> ♦ “Aite ragai vavaearo-ia varao rutu tovoreva. Uva viapau irai oiratoa vai taraipa rutu ragai-ia Oviito. Ari Aite raga kataito. Ira ragai tarai iraopata raga-ia. Ora viapau irai Aite-ia taraipa rutu. Viapau. Ari ragai raga rera-ia tarai iraoparai, ora voeao oea-ia Aiteto kareke piepareveira Oviito ora rera vo ruipaaro sirova.”

<sup>23</sup> Oire uva voea raga disaipel Jisas tapo toupaiva. Oa iava voea iare ora poreroepa oiso puraoro, “Oearovu oirara roruive vosa oarai kekepaive varao oara kekepatavoi vo vokio ragai ruvara-ia. <sup>24</sup> ♦ Ari ita, visii tavipaavoi oiso, Voari tuariri uva riro irara profet irara ora king irara oearoa orekerovu rutupa varao oisoa ruipapaave, oiso ra vara kekepaive varao Pauto vo Saraaro iava oara kekepatavoi. Uva viapau oisoa vara kekepaive. Ora

♦ 10:12: Mt 10:15, 11:24   ♦ 10:13: Lu 6:24-26   ♦ 10:16: Mk 9:37; Jo 13:20   ♦ 10:18: Jo 12:31; Re 9:1, 12:8-9

♦ 10:19: Ap 28:5   ♦ 10:20: Sam 69:28; Dan 12:1; Hi 12:23; Re 13:8, 21:27   ♦ 10:21: 1 Ko 1:26-29   ♦ 10:22:

Mt 28:18   ♦ 10:24: 1 Pi 1:10

vara tapopa ruipapaave oiso ra vara uvupaive varao oreoroa ragai iava. Uva viapau vo reo oisoa uvupaive.”

### *Vo Sameria-pato Ora Rera Keripatoaaropa Siraoroepa*

<sup>25</sup> Oire uva iravu taraito Reo Taisi-ia toreroepa Jisas-ia kokarasa rera tavatavaeoro. Ira oiso puraroepa, “Tisato. Eake vai-a uvuiparai ra oai puraa. Ra va iava Tootoo Ovoi oua vao oa opesi asavira toupai?” <sup>26</sup> Oa iava Jisas rerare oiso puraroepa, “Oavu rigato-a oa toupai Reo Taisi-ia. Oire uva apeisi ragavira rugorugoopau va vieipaoro?” <sup>27</sup>  $\diamond$  Uva Jisas vo reoaro aatooro oiso puraroepa, “Turaro eera-a vii reraaro Pauto. Ira ragapa vii iava sopaua rutu vateri, ora vii vaaro rutu tapo rugorugoara rutu, ora gorua, ora taraiara rutu rera ragapa. Ora eisi osa ropa siraopau ira vii ruvara-iavi toupareveira, oiso rutu osa ora viipa siraopauveira.” <sup>28</sup>  $\diamond$  Oa iava Jisas oiso rera tavireva, “O ita! Torevokovira vo reo aatori. Uva oisi-a eisi osa iava uvuipaei ra va iava Tootoo Ovoi rutu ouri.”

<sup>29</sup> Ari ita, ovusa rera ro riro taraito oiso ruipaparoepa ra ora rera raga vaisiaro raga veareoreve. Oa iava Jisas-re oiso puraroepa, “Iroutoa irao-a ira ragai ruvara-iavi toupareveira?” <sup>30</sup> Oa iava Jisas rera vo reoaro topa piepaoro oiso puraroepa,

“Iravu oirato ira Jerusalem iava vararoepa Jeriko iare. Uva vuri irara riro kaviru irara rerava aivaroiwa raivaaro. Oa iava auero rutu rera vararo ouiva voa rera vurivira rutu upooro. Oa iava kopii ragaroepa rutu. <sup>31</sup> Oire uva iravu korouou purapato pris ira vo raiva gaepareva. Oa iava voa rera vatayatareva vo raiva vatuaroi-ia avaoro. <sup>32</sup> Uva iravu ita Livai ira oisoa Tugoropa Kepa-ia kovopareve, ira ita oisi raga rera kekeoro rera vatavatareva.

<sup>33</sup> “Oire uva iravu Sameria-pa irara iava rera, voeao oea oisoa voeava Jiu ora keripaave, ira voa rera kekeoro rerapa rirovira rutu siraoroepa. <sup>34</sup> Oa iava rera ruvara iare tutuu piererva. Uva voa rera-ia aue wel petoreva. Ora wain ovi tapo oa ro iava kokoroepa vorarore kapuaria, oiso ra opeisipe. Oa iava rera kae piererva ora rera oiraaro iare donki. Osa iava rerava avaroepa rera tovosa oavu-ia tavete uusi piepa kepa. Oire uva voa-a evoa uva vearovira rutu rera tokireva. <sup>35</sup> Vokipavira moni erao kina (K2) vaterева ropa ira vo kepaaro-a va vao tavete uusi piepa kepa. Uva oiso rera tavireva, Vearovira rera tokipari. Ari vosa vii oaiaro-ia rera tokirivere, oire vosa vorevira vorera ra viipa oai kare piea vorevira. <sup>36</sup> Oire ra apeisi rugorugoopaei? Iroutoa vai-a vo pevao iava ira oisi eisi rera piererva vo uvare rera ruvara-iavi toupare, ro ira vuri pieiva kavirupa irara?” <sup>37</sup> Uva va-a vao oa iava rera ro Reo Taisi-ia taraipato oiso puraroepa, “Ari ro oirato ira rerapa siraoroepa rera tauvaoro.” Uva Jisas oiso puraroepa rerare, “O ita, uva oisi raga piesa avapaei.”

### *Vo Mata Vaio Iava Toupari Ora Maria*

<sup>38</sup>  $\diamond$  Oire uva vokapaoro avaparoepa raivaaro disaipel iraraaro tapo. Oa iava ouruivuia karea viropa. Uva iriavu riakova, oira vaisiaro, Mata iria rera ou pieeva ora oira vo kepaaro iare, oiso ra aioa vai vateeve rerapa. <sup>39</sup>  $\diamond$  Uva oira Mata taevaaro toupaeva Maria. Oa iava urioopa Maria rera Turaro kokotoaro ruvara iare. Uva voava rera vo reoaro uru piepaeva. <sup>40</sup> Vo osa Mata riro kovo rutu purapaeva aioara ravaapaoro rerapa. Oa iava oirare rugorugoara viriva rutu. Uva Jisas iare urioopa oiso purasa, “Turaro. Asi ragai taevaaro ragai arova avaoi. Oa iava ragai raga varao-ia virikasiparai vara vatatopopaoro aioara. Oire uva apeisi vai-a vao rugorugoopaei? Oiso ruipaparai ra oira aruri ragai tauvasa.” <sup>41</sup> Oire uva oira aatooro oiso puraroepa ro Turaro, “Mata. Eakere riro rugorugooro rutu purapari ora vii iava sopaua vavata pie ragapaoro? <sup>42</sup>  $\diamond$  Ari ita, kataia ragapa poteparivoi oa vearovai viipa. Oa-a vao oa purasa oira vo vovouaro tovopaevo Maria, oiso ra ragai vo reoaro uru piepaeva. Ari ita, viapau uvuipaveiei ra va vao vearo ruipa verave oira iava.”

### *Vo Toupari Variripa Pitupitu Iava (Matyu 6:9-15, 7:7-11)*

<sup>1</sup> ♦ Oire uva uvavu variripaoro toureva Jisas. Oa iava variri opesiroiva, iravu disaipelto rerare oiso puraroepa, “Vearopai Turaro ra igei tarai pieri variria vo pitupituaro iava, oiso osa Jon ora rera voeaaro tarai piererva disaipel.” <sup>2</sup> Osa iava Jisas oiso voea tavireva, “Vosa variripata, ra oiso purapata,

Aite. Vii vaisiaropa avivikepaiei va kae piepaoro rutu, uvare Tugoropa Vaisito-a vii. Vii vaaro Sara urio pieri poeravira.

<sup>3</sup> Vo vokio igei vateri aioa vao vo vokio iare.

<sup>4</sup> ♦ Igei varaaro vuri vovouro verari, vo rara oearovu iava oaravu vuriara vera rovopaoio voeao oea igei vuri piepaiveira.

Ora vosa kokarapara igei iare tutuu piepaive, oire varapa igei vatatopo piepari oiso, teapi vara-ia koveiovore.”

<sup>5</sup> Uva Jisas oiso puraroepa, “Easi pasi, visii iava irai epao ira vatetoa vaiaro epao. Uva eera ovokivu-ia voki vuuta-ia avaroepa rera tavisa oiso, Ragaipa bret peruva vai vateri vatetoa oaa. <sup>6</sup> Ari iravu ragai saratoaaro urioparoi raivaaro ragai iare. Uva viapau aioa vaiei oa vateavere rerapa. <sup>7</sup> Oire uva rera ro ira kepa sovara-ia toupareva ira rerare oiso puraroepa, Auoro tupavo. Viapau uvuipaei ra ragai pugu pie ragari uusi arapa. Ari ita, kakae vure uusiai ragai tapo urua-ia. Uva viapau uvuiparai viipa oavu avu vai vatesa! Oire uva apeisi-a? <sup>8</sup> Visii taviaavoi, Vosa taraiparoeri oiso, Ragai vatetoaaro ro-ia, oire ra viapau rerapa aioa vai vatereva. Uva kasivarivira rutu rera arepareva. Uva va-a vao vituaro iava rera vatereva aioara. <sup>9</sup> ♦ Osa iava oiso visii taviaavoi, Pautoa-pa variripata arepaoro, ra va iava visiipa vara vatepareve. Taraapata, ra vara kekepata. Rataoa totota, ra Pauto visiipa karureve. <sup>10</sup> Ari ita, voeao oirara oea Pautoa-pa variripaave, ra va iava orekerovu oupaive. Ari ro ira orekerovure taraapareve, ra rera ita vara kekepareve. Ari ro ira rataoa totoreve, irapa eera Pauto karurevere, vo rara rera vaaro uvureve variria.

<sup>11</sup> “Oire vosa irai oviitoa vайaro visii iava irai aitetoa vai arepareve oiso purapaoro, Aite. Ragaipa ataritoa vai vateri, ra irai aioa. Uva apeisi-a? Ra aiteto rakoru vai vatereve rerapa, raa? Viapau.

<sup>12</sup> Ora vosa rera oviito rera aiteto arepareve, oiso ra rera vatereve aue takura vao va aiosa. Ra pasi vuritoa vai vatereve aue siikopi? Easi eva tapopa viapau. <sup>13</sup> Oire visii vao vuri irara visiigoa vearovpara vatepataveira ovii irara oavisiipa. Uva oisi-a eisi osa iava vearovira rutu taraipavio va-ia vao, Osa ragavira Aite vearotoa rutu ro vova vuvuiua-ia Tugoropato Uaurato pute pievira vatepareveira voeao oea rera arepaiveira rerare variripaoro.”

### Vo Oiso Puraaepa, Jisas Bielsebul Tapo Kovopare (Matyu 12:22-30; Mak 3:20-27)

<sup>14</sup> ♦ Oire uva Jisas iravu vurito tugarato kosi piererva iravu iava oirato ira iava gisipo kapueva. Uva rera iava rera ro tugarato avaroepa. Oa iava ro kapuu gisipoto vorevira reoreoroepa. Uva va-a vao oa iava tаветаве iraopaiva rirovira rutu rugorugoopaoro.

<sup>15</sup> Ovusa oearovu oiso purapaaepa, “Easi ro voeao vuri irara tugara kosi piepare aue Bielsebul vo goruaro iava, ro vuri irara tugara turarotoaaro.” <sup>16</sup> ♦ Vo osa oearovu oiso purapaaepa rera arepaoro, “Ravotoa vai purari. Ra oai iava vii-ia taraiio oiso, O oiraopavira vii vao arureva Pauto vuvuiua iava.” Uva va-a vao oa-ia oiso ruipapaaepa ra va iava vao rera tavatavaeive. <sup>17</sup> ♦ Ari ita, osa voeao vo vovouroaro-ia tarai rovoroepa. Oa iava oiso voeare puraroepa, “Vosa oeavu oirara oavu katai sara ora roopa pieave, oire ora upoave. Ra va iava ora opesi pie ovoiave. Ora vosa oeavu katai kepa iava, ra ora roopa pieave vo keparei puraoro. Oire ra ora opesi pie ovoiave ita. <sup>18</sup> Vosa Seten rera raga ita Bielsebul ira vo saraaro ora sikaave, ra apeisi ragavira gorua oupaive ora voea-ia? Eisi osa ragaire purapatai oiso, Aue Bielsebul vo goruaro iava vuri tugararo kosi pieparevo. Asi viapau oiso uvuipaii ra voea raga ora kosi piepaave. Uvare voea raga ita-a. <sup>19</sup> Oire vosa Bielsebul oiraopavira ragai tauvapareve vo osa vuri irara tugara verapaa, oire ra irou visii voeao tauvapaise vuri tugararo verapasa, raa? Uva voea-a evoea visii raga voeao oea visii vo vuriaro karekeivere poeravira rara. <sup>20</sup> ♦ Ari vosa Pauto vo goruaro ragai tauvapaise voeao vuri irara tugara

❖ 11:1: Mk 1:35 ❖ 11:4: Mt 18:35; Mk 11:25 ❖ 11:9: Je 1:5-8; 1 Jo 5:14-15 ❖ 11:14: Mt 9:32-34 ❖ 11:16: Mt 16:1; Mk 8:11 ❖ 11:17: Jo 2:25 ❖ 11:20: Eks 8:19

kosi piepaoro, oire ra va iava oiso taraita, Pauto vo Saraaro pou pirora visii iare osa viapau va eveitavora.

<sup>21</sup> “Vosa riro varivaritoa vai ora irai okepaiaro-ia uituparo togava vaiva, ra va iava vearovira rutu vara rutu rera varaaro oriruvira toupaive. <sup>22</sup> Oire ra irai riro varivaritoa vai karero viro rera iare. Ra rera-ia putereve varao rutu itooro rera ruvara-ia togara ora toorio varao upo purapara oara-ia rariparo. Ra va iava vara rera varaaro roo piereve oearovu rutupa.

<sup>23</sup> ♦ “Vosa irouto ro ira viapau oiso ragai tapo kovopareve, ira-a eera ragaire isivapa. Ora vosa irouto ro ira viapau ragai iare oirara gurupareve, ari ita uva rera-a eera ira oirara sikasikapareveira ragai arova.

#### Vurito Tugarato Vorevira Voreroepa

(Matyu 12:43-45)

<sup>24</sup> “Vosa iravu iava kosiro viro ro-ia tugarato vore avaoro raaka tapi voa ora rerapa toua vaire taraasa rearea taraapaoro. Oire ra taraa ragaparevoiva, oiso puraro, Voreparai vo kepa iare uva tou rovopaaavora tuariri. <sup>25</sup> Oire vorero vo kepa kekesa, vo rara vo kepa viouive va rekooro.

<sup>26</sup> ♦ Uva va-a vao oa-ia oisoa oeavu erao vatara tugara tuvetuvepareve ora rera iare, voeao oea vo vovouroaro vuri vovouro oisoa rera vo vovouroaro-ia putepaive rutu. Oire ra voeae rutu tapo koataro vorevira voeae tapo toupassa voa vo oirato sopaaro-ia. Ra va iava rera vo touaro ro oirato vuri iraope rutu vo touo-ia puteoro oa-ia rera ro rovopato tugarato oisoa rera sopaaro-ia tou rovopareve.”

#### Vo Rorua Rutu Oupa Pitupitu Iava Toupai

<sup>27</sup> ♦ Jisas vo reo purareva ovusa riro irara toupaiva. Oea vuruvuru-ia iriavu riakova toupaeva. Iria oiso puraopa keeraoro, “O-ia iria vii kavaueva ora vii roro pieeva iria rirovira rorupae, uvare viraakoava toupaevoi.” <sup>28</sup> ♦ Vo osa Jisas oira vo reoaro aatooro oiso puraroepa, “Viapau. Asi voeao-a oea Pauto vo reoaro uvupaoro va sirova vearovira utupaave, oea roruve.”

#### Oearovu Ruipapaaepa Oiso Ra Ravotoa Vai Kekeive

(Matyu 12:38-42; Mak 8:12)

<sup>29</sup> ♦ Uva rirovira ora gurupaaepa. Oa iava oiso voeae tavireva, “Visii vao vo vokio iavapa irara vuri irara. Visiigoa ragai arepata oiso ra ravoto reesi vai puraa ora ragai reesipasa. Ra oai keketa. Osa viapau oiso ra visiipa va puraa. Ari vao raga-a vao oa keketaverea oiso osa pierева Jona ravotovira. <sup>30</sup> Vo tuariri uva Jona ro reo topa piepato profetato vao reesia karekereva voeaoa Niniva, vo osa ravotovira vo pevapa voki-ia vova atarito sopaaro iava vorevira toreroepa oirara vuutaaro-ia. Oire uva oisi-a eisi osa pieaverevira ravotovira visiipa va vao reesia karekeoro visiigoa vo vokio-ia toupatavoi. <sup>31</sup> ♦ Uva vo osa vo vokia-a vao oa-ia Pauto oirara rovirieirevere, ovusa kwin o oisova Siba rovirieia-ia toreoverea aue kort. Oire ra voeao vo vokio iavapa irara togaeverea reoara-ia. Eake iava? Uvare oira o kwin tauai rutuva urioopa Solomon vo taraiaro uvusa, uvare riro taraitoa. Ari ita, uva vo touparevoi ro ira Solomon-ia putepare. Vo osa viapau rera vo reoaro uvupata vovouisiro oavisii poresa. <sup>32</sup> ♦ Utupaua Pauto oirara rovirieirevere vo vokio-ia oa-ia voeao Niniva kortua-ia toreavere. Ra vo vokio iavapa irara togaive reoara-ia. Eake iava? Uvare Jona vo reoaro uvuiva vao oa-ia voeae tavireva. Oa iava sopaura oaive poreiva. Ari ita, vo toupare visii vuutaaro-ia ro ira Jona-ia putepare.” Eisi osa puraroepa Jisas ora rera iava tavipaoro.

#### Varaua Vo Aviaviaro

(Matyu 5:15, 6:22-23)

<sup>33</sup> ♦ Uva oiso puraroepa, “Viapau vuravuara rukuepaiveira, ra vara tovopaise rikuara sovara-ia vo kepaara sovara-ia, eke vo baket vai reroaro. Viapau. Asi vo tebol ivara-ia oira tovopaiseveira. Ra voeao oea koatapaave vo aviavi kekepaoro vao-ia aviavia. <sup>34</sup> ♦ Oiso-ia osireitoarei-a aoa auepa sopaua. Vosa osireiara oavisii roroiovira toupaive, oire sopaura oavisii rutu tapo roroiovira ita aviavivira toupaive. Ari vosa osireiara oavisii tapo

❖ 11:23: Lu 9:50 ❖ 11:26: Hi 10:26; 2 Pi 2:20 ❖ 11:27: Lu 23:29 ❖ 11:28: Lu 8:21; Jo 15:14 ❖ 11:29: Mt 6:4 ❖ 11:31: 1 Kin 10:1; 2 Kro 9:1 ❖ 11:32: Jna 3:5 ❖ 11:33: Mk 4:21; Lu 8:16 ❖ 11:34: Mt 6:22-23

rupavira toupaive, oire oisi raga ita tapo sopaura oavisii rupavira toupaive. <sup>35</sup> Oisi-a eisi osa raga ita ora vatapopata. Teapi eva aviavia oa visii sopapro-ia toupai rupape. Ra va iava viapau vearo rugoro eveita. <sup>36</sup> Oire vosa visii iava rugorugooara rutu aviavivira toupaive, ra viapau oa visii vara iava rupapape. Oire ra oiso aviavipaive osa vuravu o iria roropaeve visii rutu-ia.”

*Vuri Pitupitu Puraiva Farisi Voearei Ora Tisa Irara*

(Matyu 23:1-36; Mak 12:38-40; Luk 20:45-47)

<sup>37</sup> ♦ Vo reo-a vao oa purareva Jisas. Oa iava iravu ratarataa vovouto Farisi-pato rerare keeraroepa oiso ra rera tapo aioreve. Osa iava Jisas koataroepa tebol-ia pausa. <sup>38</sup> Oire uva rera ro Farisi-pato rerava vurapareva osa voa paupaoro aiopareva, uvare viapau vavaea sisu rovoreva Reo Taisi sirova utupaoro. Oa-a vao oa iava rirovira rutu rugorugoo iraoparoepa. <sup>39</sup> Uva Turaro oiso rerare puraroepa, “Visii vao-ia Farisi visiigoa kap iava varaura raga sisigarue piepataveira ora aue dis, osa visii iava sopaura oavisii agasipape varao iava kavirupa vovouro ora varao vuri pitupituro. <sup>40</sup> Visii vao evao kukue irara. E Pauto auero iava varaura raga purareva, uva viapau tapo vara sopapro purareva, raa? <sup>41</sup> Ari ita, vao oa visii sovara-ia toupaive oa-ia uvuipatai ra va-ia voeao apota irara tauvata. Oire vosa oisi oiso piepata, ra va iava visii iava auero rutu sisigaruepape.

<sup>42</sup> ♦ “Visii vao-ia Farisi visiigoa ora vata topo iraopata. Visiigoa vao garepa aiorovi iava akuku aioro katakataivira vara vatevate ragapataveira varao iava tautauara rutu iava. Oiso ra utuuva geesi purapata Pautoa-pa korouou purapaoro. Uva eisi osa piepaoro torevoko pitupituro vatawata iraopataveira ora varao visii varaaro Pautoa-pa siraopa vovouro. Eisi osa vo pitupituro purapata korouou purapasa. Oire ra viapau opitupiturovu varao reipara kavupata. Ra va iava visiipa torevokopape.

<sup>43</sup> “Visii Farisi ora vata topo iraopata. Visiigoa oirara rutu osireiaro-ia pau ruipapataveira Reo Taisi Uvupa Keparo sovara-ia vo rovopara-ia paupa tavukiro. Ora riro oiso ruipa irara visii ra oirara rutu visiiva vearo voki purapaise visiipa ora avivikepaoro voraro uupa tapirovi.

<sup>44</sup> “Visii vao-ia ora vata topo iraopata. Visiigoa oiso rutu toupataveira osa tova vao oa rasito sovara-ia toupaiveira. Oire ra oirara viapau va-ia taripaoro va ivara-ia tasiasipaoro vokapaise vo eruro ivara-ia. Eisi osa visii iava sopaura toupaiveira vao iava vuri vovouro.”

<sup>45</sup> Oire uva iravu riro taraito Reo Taisi-ia ira rera vo reoaro aatooro oiso puraroepa, “Tisato. Asi vii eisi purapaoro igei tapo tovitarivoi.” <sup>46</sup> Oa iava Jisas oiso puraroepa, “Visii vao tarai irara Reo Taisi-ia visiigoa ora vata topo iraopata. Visiigoa riro vavatapa ruuro-ia oirara ogata piepataveira varao visii raga varaaro reo goruro. Vo osa ora visii raga tapo viapau varavi-ia pitupata sipayoaravi raga iava voeao tauvapasa oea vara kaepaive.

<sup>47</sup> ♦ “Visii ora vata topo iraopata, uvare voari tuariri aao irara oavisii oiso profet irara upopaise. Oa iava voeao vo tova uruiroaro oritopataveira. <sup>48</sup> Oire uva oisi raga-a oiso osa piepaoro visii vo rugorugooro karekepatavorao oiso purapaoro, Vearo pitupituro-a vao oa puraiva voeao igei aao iraraaro voeao profet irara upooro. Uva va-a vao oa iava voeao vo tovaroaro oritopataveira. <sup>49</sup> ♦ Aue iava uvare Pauto ora rera taraiaro-ia riroa oiso puraroepa, Voea iare profet irara sipoaverea ora voeao aposel irara. Oa iava voeao iava oearovu tariopaverevoeao upopasa. Ra oearovu tapo voeao iava vuri piepaive. <sup>50</sup> Uva va-a eva oa-ia voeao vo vokio iava voeao vo vuriaro vo voriaro ouivere. Aue iava uvare profet irara upopavira voari tuariri rutu. Uva vo vokio-ia tugurasa urioi oisi raga piepaoro oiso.

<sup>51</sup> ♦ Osa raga ita voari tuariri uva Ebel uporeva araokoto ro torevoko vovouto. Oire ira-ia rovoepa. Uva Sekaraia-ia pou virosa vo pitupituro raga urioepa. Uva oeavu tapo ita oea upoiva Tugoropa Kepa iava vo tugi vuutaaro-ia ora eravao. Uva voeaa-evoeaa oea iava eva puraiva ovuria oiso eva oa vorevira visii-ia oiso kare pierevere Pauto.

<sup>52</sup> “Visii riro tarai irara Reo Taisi-ia visiigoa ora vata topo iraopata. Aue iava uvare ki veratavora o tarai oupava. Oa iava Tugoropa Vuku karupataveira ovukua-ia taraia toupaiveira. Oire uva va-a vao oa-ia ora visii ruture raiva tupatava. Vo osa oearovu oiso ruipa ragapaave ra koataave. Oa-a eva oa-ia visii raga vo vovouaro-ia paipaipaiveira oearovu, aue iava rara visii raga voeare tupapata.”

<sup>53</sup> Oire uva Jisas vo kepa iava kosiro viropa. Oa iava voearei voeareo Farisi ora Reo Taisi-ia tarai irara kasipu iraoaepa. Oa iava rera togapaiva oreorovu-ia. Vo osa oaravu rutu akeara purapaiva rera akepaoro, <sup>54</sup> oiso ra rera tavatavaeive. Oire ra oreoi uvuivora rera gisipoaro iava rera iava gasiive kortua iare.

## 12

### *Ora Vatatopo Iraopata Vaopa Kuuvupa Pitupitu (Matyu 10:26-27)*

<sup>1</sup>  $\diamond$  Riro tukuro rutu (tausen) oirara ora guruaepa. Oa iava voea iava tupu piropa rutu. Oire uva vo vuuta-a vao oa-ia Jisas ora rera voearore disaipel reo rovoroepa. Uva oiso puraroepa, “Avoeao. Vaopa kuuvu pitupitu ora vatatopo iraopata. Oa oiso rutu toupaiveira osa vao yis Farisi vo pitupituaro voeao riro ratarataa vovou irara. <sup>2</sup>  $\diamond$  Ari ita, varao oara rutu vataupapeira, oara karekepere utupaua poeravira vore viaea-ia. Uva ita, tavuruvira oisoa toupave, oire ra utupaua oirara vara-ia taraipaave. <sup>3</sup> Oire vo reoro oara purapataveira vo rupa-ia, oreoroa uvuivere vo ravireo-ia. Ari vo reo oa-ia ogaogavira ora reopataveira vo kepaara sovara-ia, oarava torepavere oearovu voraro ora reopa tapiro vara iava siposipopaoro.

### *Oirato Uvuipa Ra Uririparo Kataitoa Ragapa (Matyu 10:28-31)*

<sup>4</sup>  $\diamond$  “Vate irara oaa, visii tavipaavoi oiso, Opeita voeao ragapa uriripata oea visii iava varaura raga kopii piepaiveira. Uva voea evoea viapau uvuipaai ra utupaua oavu avu vai ita puraive vo visii-ia. <sup>5</sup>  $\diamond$  Ari visii tavi iraopaavoi rutu ro iava irapa uvuipatai ra rerapa uriri iraopata. Ro-ia Pauto irapa uriri iraopata. Ira uvuiparoi ra oirato kopii pie ovoireve. Uva toupai tapo rera vaaro gorua vore utupaua uva oirara vikirevere vore vuri tapi. Iu, eisi osa visii tavi iraopaavoi oiso, Eera irapa uriri iraopata.

<sup>6</sup> “Ari ita, taraipatai oiso, Oirara vo vavae kokio kare garepa kare voripaiveira aue-ia erao toea (2t). Osa Pauto viapau oisi iravire ovauparo eisi. <sup>7</sup>  $\diamond$  Ari ita, visii tokipaoro visii kukuearo iava oruara rutu vieireva. Uva va-a eva oa iava viapau uvuipatai ra uriripata. Visii vaaro voria vo kareo voriaro-ia putepaiveira garepa kare kokio kare. Eva-a oa vituaro iava Aite vearovira visii tokipareveira.

### *Vo Jisas Iava Siposipopa Pitupitu Toupaivoi (Matyu 10:32-33, 12:32, 10:19-20)*

<sup>8</sup>  $\diamond$  “Visii tavipaavoi oiso, Vosa irai ragai vaisiaro iava tapiro vo oirara rutu osireiaro-ia oiso puraoro, Eera-a ragai reraaro Turaro. Oire uva ira-a eera vaisiaro iava tavraverea ita, ragai Oirato Oviitoaro vo enselpa irara osireiaro-ia voeao Pauto voearo. <sup>9</sup> Ari ro ira ragaire isivarao vo oirara rutu osireiaro-ia, ragai tapo ita irare taru isivaraverea vo Pauto voearo enselpa irara osireiaro-ia.

<sup>10</sup> “Ari ita, ro ira ragaire oavu takau vaisi purareve vuria, oa-a eva verarevere Pauto rera iava. Ari vosa ro ira Tugoropato Uraurato-ia takau vaisi purareve, uva va-a eva oa-ia Pauto viapau rutu oiso uvuipa ra evo vuri verareve rera iava.

<sup>11</sup>  $\diamond$  “Oire vosa visii rovirieisa kortua-ia visii sipopaivere vorarore voea vo keparoaro-ia Sinagog. Ora vosa vorarore gavman irara osireiaro-ia ora reipa irara kort purasa visii sipopaivere uvare ragai sirova utupataveira, oire ra viapau oiso uriripata voeapa oiso rugorugoopaoro, Apeisi ragavira reoara pukopaiovere? <sup>12</sup> Uvare vo vuutavi raga-ia Tugoropato Uraurato visii tavirevere vo reo iava oa-ia voea vo reoroaro pukosa auepata.”

### *Reo Ruu Vao-ia Riro Monitoa Iava Oirato Ira Kokororoepa*

<sup>13</sup> Oire uva iravu voea iava oirara ira Jisas-re oiso puraroepa, “Tisato, oiso ruipaparai ra araokotoa oaa taviri. Ra auero roo piereve varao aite varaaro. Oire ra ragaipa oarai vatereve.” <sup>14</sup>  $\diamond$  Oa iava Jisas rerare oiso puraroepa, “Irouto ragai reesirevora vei rovirieisa.

$\diamond$  12:1: Mt 16:6     $\diamond$  12:2: Lu 8:17; Ef 5:13     $\diamond$  12:4: Jo 15:14-15     $\diamond$  12:5: Hi 10:31     $\diamond$  12:7: Mt 12:12; Ap 27:34     $\diamond$  12:8: Mk 8:38; 2 Ti 2:12; 1 Jo 2:23     $\diamond$  12:11: Mk 13:11; Lu 21:14     $\diamond$  12:14: Mai 6:8; Ro 2:1, 3

*Ora veipa auero roo piesa vei aitearo varaaro?”* <sup>15</sup> Oa iava voeare oiso puraroepa, “Avoeao. Ora vatatopo iraopata. Ra vearovira rutu uutupata. Opeita orekerovu riiriipata. Ari ita, ro ira riroara rutuva toupareve orekerovu, oire uva uvuipa ra vara-ia riro kaekae tootoo tapo oupareve? Easi viapau!”

<sup>16</sup> Uva voeapa oavu reo ruu vatereva Jisas. Oa-ia oiso puraroepa, “Aio kovo iravu riro monito oirato vaaro, okovoa rirovira aio puraera.” <sup>17</sup> Osa iava ora rera raga sopaaro-ia oiso rugorugooparoera, Eake vai puraa? Viapau oiso kepa vaiei ragai oaiaro oa uvuipai varao aioara gurusa oa-ia vara oriuoro. <sup>18</sup> Uva oiso puraroepa, Oiso ragavira va purapaavoi. Vara rutu varao aio kitupa keparo pakopaavoi vara rigaoro. Oire ra riroa rutu puraa va-ia vao. Ra va iava vara rutu witara gurua voa ora varao vearovpara ragai varaaro vo kepa-ia. <sup>19</sup> ♦ Ra ora ragai raga ora tavira oiso puraoro, Riroara rutu vearovpara vii varaaro. Oara vearovira touvora riroara rutu-ia ivara voarire utupaua tapo uvuivira. Oire reareau aiopaoro, ora ukaiopaoro tapo, ora roruvira touri. <sup>20</sup> ♦ Oa iava Pauto oiso puraroepa rerare, Auoro. Kokoropato-a vii, viigoa kopiipaei vo rupao raga-ia. Osa vara rutupe varao oara vatatoporivo. Oire uva iroutoa vai vii varaaro ourevere? <sup>21</sup> Eisi osa ragavira ita oearovu orekerovu rutu vo rasio raga iava voea varaaro gurupaiseira ora voeapa vo Pauto osireiaro-ia. Vo osa Pauto voea vaisipareveira oiso, Apota irara raga voea.”

### *Pautoa Raga-ia Raripasa*

(Matyu 6:25-34)

<sup>22</sup> Oire uva Jisas ora rera voeaarore disaipel oiso puraroepa, “Osa-a eisi osa iava visii taviipaavoi oiso, Opeita ora visii varaarore rugorugoopata rutu tootooara oiso purapaoro, Eake vai aiopao? Ora eake vai-ia varaura oaio rakurakupao? <sup>23</sup> Aioarei ora varoa viapau oiso uvuipai ra visiipa vearo tootoo vai vatepaive. <sup>24</sup> ♦ Oire voeaore kokio kare rugoopata oea viapau wit taraapaaveira, ora tapo viapau oiso aio gurupaaveira. Uvare viapau voea kepaa vaiaro aio gurupasa ora orekerovu oaiive tovopasa. Ari ita, Pauto voea vatepareveira aioara. Oire uva visii oirara voriaro vo kare vo voriaro-ia putepaiveira rutu. Oa iava Pauto pute pievira visii tokipareveira. <sup>25</sup> ♦ Iroutoa vaiei visii iava ira uvuiparoi ra ivara vai sigusiguvarere ora rera vo tootooaro uvuioro, vo rara rirovira rutu rugorugooparo ora rera tootooarore? <sup>26</sup> Oire vosa viapau uvuipatai ra oiso oavi gareavi vai purata ivara siguapaoro, ra eakere riroara ruture vovousopata?

<sup>27</sup> ♦ “Vearovira rutu rugoopata auere kokookoara oara ratau tou ragapaiseira. Ari ita, viapau oiso ora varapa kasivaripapeira kovopaoro ora rakurakupara vai turupaoro. Ari ita, visii taviipaau ae iava King Solomon riro orekerovu rutu-ia pituto, ira oisoa ora rera raga ora oritoparo tuariri rutu. Uva viapau oiso vearo oritoa vaiaro rera oaiaro vearoara rutu oiso osa varao-ia kokookoara. <sup>28</sup> Iu, isiso kouro toupai varuparo. Uva vokipavira vo kouro tosiivire vara vikisa tuituia-ia. Uva vara-a evara okouroa oritopareveira Pauto. Oire uva apeisi-a? Easi uvuiparoi Pauto ra oiso visii tapo orito iraopareve? Ari ita, oiraopavira viapau oiso uvuivira rutu raripatai rera-ia. <sup>29</sup> Eisi ra opeita rirovira rugorugoopata oiso, Eake vai aiopere, o eake vai-ia ukaioviovere? Ra varare taraapata. <sup>30</sup> ♦ Ari ita, rupa vovou irara oisi eisi oiso rugorugoopaa veira varare varao. Va-ia vao taraiparoveira Aite oavisii ro vova vuvuiua oiso, Vosa viapau aioara vai, ra ogoepaoro kopiitavere. <sup>31</sup> Eisi uvuipatai ra vao ruture rugorugoo iraopata Pauto vo Saraaro vare taraapasa. Ra va iava vara tapo evara vatereve visiipa.

### *Vearopara Gurupasa Vo Vuvuiua-ia*

(Matyu 6:19-21)

<sup>32</sup> ♦ “Opeita uriripata sipsip ragui ragai voearo. Ari Aite oavisii reo ovoi purareva rera vo Saraaro vatesa visiipa, oiso ra va iava oearovu oirara tokitavere voeapa reipaoro Pauto tapo toupao. <sup>33</sup> ♦ Ari auero rutu vateta oearoipa. Ra vara voriive. Oire voeao vateta vo moni oea apotapaaveira voea tauvapaoro. Ra vaore moni bokis taraata oa viapau

⊗ 12:19: Ekl 11:9; Je 5:5    ♦ 12:20: Jer 17:11; Sam 39:6    ♦ 12:24: Jop 38:41    ♦ 12:25: Sam 39:5    ♦ 12:27:  
1 Kin 10:4-7    ♦ 12:30: Mt 6:8    ♦ 12:32: Jo 21:15-17    ♦ 12:33: Mk 6:20

vuripapeira. Oire ra va-ia vearovpara guruta vo vuvuiua varao oara viapau opesipape vo vuvuiua-ia. Aue iava uvare kavirupa irara viapau voare tutuu piepaiveira. Ora viapau rivute kare vara vuri piepaiveira voa. <sup>34</sup> ♦ Oire uva vo tavuki-a vao visii vaaro oa-ia visii varaaro vearovpara toupaiverea, uva vo tavuki-a eva oa-ia visii vo vovouaro toupaiverea vearovparare rugoopaoro.

#### *Kovopa Irara Iava Voeao Oea Vatatopopaa Uutupaoro*

<sup>35</sup> “Goruvira tuuta aue-ia takipa iroro. Oire ra vuravuara rukueta vatatopovira tuevira tousa. <sup>36</sup> Ra oiso rutu tuepaoro toutes, Oea reore reito tuepaoro toupaivoi. Ira riroa iava riako oupa aio kareparoi. Oa iava rerare tuepai vo osa voava kareparo. Ra voava tupa totosa pouro viro. Oire ra rerapa karuive ikauvira. <sup>37</sup> Ra voava kareoro voea iare pouro viro osa torevira raga toupaive voea kovopa irara. Oire ra va iava rirovira rutu roruive. Ari ita, oiraopavira visii tavipaavoi oiso, Ora rera raga vaisiaro vara piepaoro ro reito tuu iro goruvira takirevere. Oa iava voava voea tavirevere paua tebol-ia. Ra rera raga voa voeapa aioara vatevaterevere. <sup>38</sup> Ari vosa voki vuuta rutu-ia pou virooro urioro, eke vo osa rovo gau purapareve kookai, ra voea kekereve osa viapau uusipaave. Oire ra va iava roruive voea kovopa irara.

<sup>39</sup> ♦ “Vaore rugoopata vao-ia. Vosa rera ro ira vo kepaaro-a tarairo oiso, Vo vokio-ia kavirupato urioparoi. Oire ra viapau oiso rera eaka ragaparevori osa vo kepai tateoro kavirusa koataparo. Viapau. <sup>40</sup> ♦ Oire uva visii tapo vatatopopatavere tuevira. Aue iava uvare Oirato Oviitoaaro vo voki-ia uriorovere oa-ia viapau taraipata oiso, Vo vokio-ia uriorovere.”

#### *Vearotoa Iava Kovopato Ora Iravu Vurito Kovopato*

(Matyu 24:45-51)

<sup>41</sup> Oire uva Pita oiso puraroepa, “Turaro. Easi vii vao reo ruu vatepari igei ragapa, eke oirara rutupa tapo?” <sup>42</sup> ♦ Oa iava Jisas oiso puraroepa, “Easi, aa ro-a ro tokipato ira toupare vearo rugorugoo vaiva, ra va iava osivu avu rutu ora rera vo kovoroaro tokipareve? Vosa ro ira oisi ragavira oiso-ia toupareve, oire uva rera-a eera ira reesirevere reito rera voeaaro kovopa irara tokipasa. Ora voeapa aio vatepasa vo voea vo vuutaroaro-ia aiopa vuutaro. <sup>43</sup> Oire ra utupavira rera reitoaaro vorevira vorero. Uva rera reraaro kovopato kekerevere, vo osa varao rutu purareve oiso osa rera tavireva voari tuariri. Oire ra va iava rorureve rera ro kovopato. <sup>44</sup> Oiraopavira visii tavipaavoi oiso-ia, Reito oaro oiso rera tovoreve auero rutu tokipasa varao rera varaaro. <sup>45</sup> Oire ra pasi ora rera raga sopaaro-ia rera ro kovopato oiso rugorugooro, Viapau uvuiparoi ragai reraaro reito, ra vorevira vorero ovoki-ia ikauvira. Oire ra va iava rovoro oearovu kovopa irara upopaoro. Ora airorovu kovopa riako tapo upopareve. Ra va iava rovoro aiao raga purapaoro, ora ae ukaio spak vuri reoreoro raga purapaoro. <sup>46</sup> Oire vosa oisi piepareve osa rera ro reito vorevira vorero ovokivu-ia, ovusa vo voki-ia rera ro kovopato viapau rerare tuero. Vo voki-ia vao oa-ia oisoa viapau rerare rugorugoopaoro toupareve. Oire ra va iava rera ro reito rera vuri piereve rutu. Ra va iava vo vuri tapi rera tovoreve voea ruvara-ia oea viapau vearovira ora voea vo kovoroaro tokipaise.

<sup>47</sup> ♦ “Kovopato oiso taraiparo rutu rera reraaro reito vo vovouaro-ia. Uva viapau rerare tuevira vatatoporoi, uvare viapau rera vo vovouaro sirova utuparoveira. Oire uva rera-a eera ira vurivira rutu uporevere taru reito. <sup>48</sup> ♦ Ari ro kovopato raga ira viapau oisoa taraipa vo reito vo ruipaaro-ia, oire ra oiso raga ita tarai asavira viapau vearo kovo vai purareve. Oire ra va iava oisivi raga ita gare visivi rera uporeve reito. Ora iroutoa rutu-a ro ira vearo taraiva toupareve, ira ita uvuiparoi ra vearo kovo purareve rera vo taraiaro oirao pieoro vo oearovu osireiaro-ia. Ora vosa Pauto irai ruvara-ia oisi oiso oai riro kovo vai tovoreve oiso ra va purareve, oire ra utupavira Pauto oiso ruiparo ra vearoa vai kekereve vo kovo-ia vao oa tovoreva.

#### *Jisas Vo Kovoaro Oa Oirara Roo Pieva*

(Matyu 10:34-36)

❖ 12:34: Mt 6:21 ❖ 12:39: Mt 24:43; Re 3:3, 16:15 ❖ 12:40: Mt 24:44; Mk 13:33 ❖ 12:42: Lu 7:13 ❖ 12:47: Nam 15:30; Diu 25:2 ❖ 12:48: Lev 5:17

<sup>49</sup> “Urioraera tuituia kasisa vo rasitoa-ia. Uva oiso ruipaparai ra ikauvira vuvuoro vuriara rutu rovape vo rasio iava. <sup>50</sup> ♦ Oa vituaro iava oiso ruipa iraoparai ra ikauvira baptaisa vai oua, ra vo tavakao opesipe vao oa ragaipa siitoka vatepaiveira. Obaptaisa iava sopaua rirovira rutu ragai iava siraope. Ra vo tugurape uva opesipere vo sirao utupaua. <sup>51</sup> Esa pasi oiso vaio keapatai, Varao rutu upoara opesi piesa urioraera vo rasio-ia, raa? Viapau. Easi oiso oiraopavira visii tavipaavoi, Ragoa voea oirara oisi piesa urioraera, ra ora voea iava voearei puraive ora tokopaoro. Oa iava oeavu ragai vo reoaro uvuive osa voea-ia oeavu raga viapau. <sup>52</sup> Vo voki-a vao oa-ia oira vavae toupaivere katai kepa-ia. Oire uva voava ora voea-ia voearei puraivere ora voea-ia tokoro oiso, operuvavu aitereivuva oraupoave ragai iavirava. Osa ita aitereivu vo peruvava ora uposi ita. <sup>53</sup> ♦ Ora vo osa aite irara ovii irarava oraupoavere. Ovusa ita voea-ia ita ovii irara aite irarava oraupoavere. Osa ovii riako aako riakova ora upopaa. Ovusa aako riako ovii riakorova oraupoave. Ovusa oirato aakovaaro taatovava ora upopao. Ovusa oirato vatuavaaro oirava ita taatova oira ita ora upopao.”

*Vo Pitupituo Varao-ia Taraipasa Oara Karekesa Auepape  
(Matyu 16:2-3; Mak 8:11-13)*

<sup>54</sup> Oire uva Jisas oirara ruture oiso puraroepa, “Rukuta kekepataveira vo osa uriopaoi vova uva ravireo rokopareveira. Oire ra va iava ikauvira oiso purata, Kokeva kovesa auepaoi. Ari oiraopavira iria kovepaoi rara. <sup>55</sup> ♦ Oire uva oisoa kiuvu tapo sovopao oiso purapata, Ravireo rirovira kasiraoparoi rara. Ari ita, uva oiraopavira osa karekeparoveira eisi. <sup>56</sup> ♦ Avoeao! Riro ratarataa vovou irara rutu visii. E vearovira rasito vo reesiaro kekepataveira ora vuvuiua, raa? Oire uva apeisi iava viapau vo vokio vo reesiaro eveipata varao iava oara purapaavorao.

*Vo Toupai Ora Agiagipa Ro Tapo Irai Vii Iava Gasisa Aueparo  
(Matyu 5:25-26)*

<sup>57</sup> “Oire eakere visii raga vearovira rutu rugorugoo rovo asapataveira. Ra va iava viapau torevoko rugooro rovirieipata varao purapaoro? <sup>58</sup> Vosa touvira raivaaro vokapaoro avapasi ro tapo ira vii iava gasireve, oire ra raivaaro raga tousi. Oire uva vo vuuta-a eva oa-ia uvuipau ra rera tapo vorevira ora agiagi. Teapi rera eera viiva avaro reo rovirieipato vavaearo-ia vii tovosa. Oa iava vii vatererevere polis irarapa. Oire evoea vii tovoive tuukepa kepa-ia. <sup>59</sup> ♦ Oiraopavira visii tavipaavoi, Viapau rutu uvuipaei oiso ra ikauvira tuukepa kepa iava kosi virou. Ari vo raga rara varavio rutu garepa pitupituro vuriara vori rovori. Ora varao riopara varao rutu oara voriaro opesi pie rovorivere rutu.”

## 13

*Ro Ira Iava Sopaua Viapau Pore Piro Ira Opesiroyvere*

<sup>1</sup> ♦ Oire uva ovokivu-ia oeavu oirara toupaiva oea Jisas tavipaiva oeavu iava Galili iava, oea uporeva Pailat voea iava revasiva karasa. Oa iava oira uverereva varao tapo oara-ia Pautoa-pa korouua purasa auepaaepa voeao Jiu-pa irara. <sup>2-3</sup> ♦ Uva Jisas voea vo reoaro aatooro oiso puraroepa, “O ita, oiso rugoopataveira, Voeao raga pute pievira vuri vovou purapaiveira oea rirovira tavaka siraaro oupaiveira oiso rutu osa voeao oea uporeva Pailat. Ovusa oeavu oea vearovira toupaiveira viapau vuri vovou purapaiveira. Uva visii tavipaavoi, Viapau torevokopai evo rugorugoo, uvare vaeapai voeare rutupa. Oa vituaro iava uvui iraopai ra vovouisi oaiive poreive Pautoa iare. Oa vituaro iava vosa viapau visii vao sopaura oavisii poreta vova vuri vovouro oavisii iava, oire uva va-a eva oa vituaro iava visii rutu opesitaverea taru oisi raga ita eisi. <sup>4</sup> ♦ Oire voeao-ia katai tau vo peva vataro (18) rutu oirara voeao-ia oea rakuva riro kaekae kepa koveoro vo uuko rovu vatuaroo-ia vao Siloam, oa iava kopiiaea. Oire uva apeisi rugoopatai? Voeao vo vuriaro oearovu vo vuriaro-ia putepaivoi voeao oea epao Jerusalem-ia, uvare oisi raga kopiiaea, raa? <sup>5</sup> Torevokovira visii tavipaavoi oiso, Viapau

---

♦ 12:50: Mk 10:38; Jo 12:27   ♦ 12:53: Mai 7:6; Mt 10:21   ♦ 12:55: Mt 20:12   ♦ 12:56: Mt 16:3   ♦ 12:59: Mk 12:42   ♦ 13:1: Mt 27:2   ♦ 13:2-3: Jo 9:2-3   ♦ 13:4: Lu 11:4

rutu. Ari ita, vosa viapau visii vao sopaura oavisii poreta vova vouri vovouro, oire uva va-a eva oa vituaro iava visii rutu opesitaverea taru oisi raga ita eisi.”

#### *Reo Ruu Vo Evao Iava Oa Viapau Aio Kuero Vai Purapaive*

<sup>6</sup> ♦ Oire uva oavu reo ruu kosi piererva oa-ia oiso puraroepa, “Iravu oirato varuparo fik ova paureva wain kovo-ia rera vaaro. Uva utupavira urioroepa vo eva kekesa, oiso ra aio kue vai kekereve vo osa viapau oiso kuepape vo eva.” <sup>7</sup> ♦ Oa iava rera roari vo kovo tokipato tavireva rera ro reito oiso puraoro. Uvupari? Vo peva rutu-ia aue ivaara oara sovara-ia oisoa urio ragapara vo eva ivia ragapasa, osa viapau aioara vai vo eva-ia. Oire uva vii taviipaavoi ra vo eva toeri. Eake iava? Uvare rasia goruaro opesi pie ragapaiveira. Osa viapau aioara vai vo evao iava toupai.” <sup>8</sup> Oa iava ro kovo tokipato oiso puraroepa, Reito, eaka rovou. Ra vo eva vituaro eri rovoavere bulmakau opokoaro tovo rovosa voa gorua vatepasa.” <sup>9</sup> Easi pasi, uvuipai ra oiva-ia kuepe vo eva vao. Vosa viapau, oire ra vo eva tateri.”

#### *Iriavu Riakova Iria Ravotovira Porete Piererva Jisas Sabat Voki-ia*

<sup>10</sup> Jisas ovokivu-ia Sabat voki voeapa siposiporeva Reo Taisi Uvupa Kepa Sinagog sovara-ia, <sup>11</sup> ovusa voa iriavu riakova toupaeva iria-ia vurito tugarato oisoa toupareve. Oire uva oira-ia oisoa toupaoro oirapa riroa upia rutu oisoa vatepareve katai tau vo peva vatara (18) ivaro rutu sovara-ia. Uva va-a vao oa iava oira iava avuaua puko piropa. Osa iava viapau oisoa torevokovira torepao.” <sup>12</sup> Oire uva Jisas oira kekereva. Oa iava oirare oiso puraroepa, “Vii iava upia opesi pieavoi.” <sup>13</sup> ♦ Uva oira kukuearo-ia vavae tovoreva. Oa iava ravotovira raga torevokovira tore ovoiopa. Osa iava Pautoa-ia vuurapa vaisi pura ovoieva. <sup>14</sup> ♦ Vo osa ro ira oisoa Sinagog-ia reiparo rirovira rutu kasipu iraoparoepa, uvare Jisas vo voki-ia vao oa purareva oira ravotovira porete pieoro. Oa iava oiso puraroepa reito voeare, “Ari katai vatara (6) vokiro toupai visiipa kovopasa, ovokiroa-ia uriopata ruvarupa tauva oupasa. Uva viapau uvuipatai ra vore uriopata varao purapasa vo vokio-ia vao Sabat voki.” <sup>15</sup> ♦ Oa iava reito vo reoaro pukooro oiso puraroepa Jisas, “Avoeao! Riro ratarataa vovou irara rutu visii. Easi Sabat Vokiro-ia avapataveira bulmakaupa kepa iare vo karere karupasa voeaore bulmakau kare, ora aue donki kare tapo auere vo kare ukaio piepasa, eke?” <sup>16</sup> ♦ Ari o-ia riakova eira iriavu aue Ebraham aaovaaro Jiu-pava, iria tuukereva Seten aue rutu uvuiaro-ia katai tau vo peva vatara ivaro (18). Oire uva va-a eva oa iava oira iava vo tuuke karuavoi oira porete piepaoro vo vokio sovara-ia vao Sabat voki. Uva apeisi-a? Oira-ia vuria puraavoi?” <sup>17</sup> Oire uva oisi-a eisi osa puraroepa. Oa iava voeao rerava keripa irara rirovira ariiaepla rutu. Osa oirara rutu rirovira roru iraopaiva vara rutu-ia varao veiaropara oara oisoa purapareve.

#### *Reo Ruu Mastet Kuearo Iava Ora Aue Yis*

(Matyu 13:31-33; Mak 4:30-32)

<sup>18</sup> Uva va-a vao oa iava voea oirara akereva Jisas oiso, “Aa vao oiso toupai Pauto vo Saraaro?” <sup>19</sup> Oa-a eva oiso rutu toupaiveira, Oavu aio kue oa vaisipaiveira oiso, mastet. Oa iava aisisu oureva gare isivi rutu iravu oirato vaisi paua varuparo vo ora rera vo kovoaro-ia. Oa iava voa rirovira rutu riroepa oiso osa evaova. Uva va iava oisoa kokio kare vo eva raoaro-ia pitupaoro epitapasa uriopaave voa.”

<sup>20</sup> Oire uva Jisas oiso ita puraroepa, “Apeisi ragavira vai uvuiparai ra Pauto vo Saraaro ovoovoaa? Eake vai-ia?” <sup>21</sup> Oa oiso toupai osa aue yis. Vao yis oa oueva iriavu riakova aue tapo plaua dram va uveresa. Oa iava utupavira va vao plaua kae piropa riropaoro.”

#### *Gareavi Rataaoa*

(Matyu 7:13-14, 21-23)

<sup>22</sup> ♦ Oire uva Jisas vokapaoro avaroepa ouruirovu-ia reipa uruiro ora varao tapo garepa uruiro. Oirara rutu tarai piepaoro vokapaoro avaparoepa. Uvare oiso vovouparoepa ra Jerusalem-ia kare uviroro.” <sup>23</sup> Oa iava iravu oirato oiso rera akereva, “Turaro. Esa Pauto katakataipa iraravi vai vorevira ourevereora ora rerapa pasi, raa?” Oa iava Jisas oiso rerare

❖ 13:6: Mt 21:19 ❖ 13:7: Mt 3:10, 7:19; Lu 3:9 ❖ 13:13: Mk 5:23 ❖ 13:14: Eks 20:9; Lu 6:7 ❖ 13:15: Lu 7:13 ❖ 13:16: Lu 19:9 ❖ 13:22: Lu 9:51

puraroepa,<sup>24</sup> “Ora visii vo vovouroaro goru pie iraota. Oa iava uvuipatai ra vaovio gare rataoia koatata Pauto vo Saraaro iare taru. Visii tavi iraopaavoi oiso, Riro irara rutu oiso ruipapaave oiso ra koataave, vo osa viapau uvuipaai.<sup>25</sup> Ari ita, vo utupaua uva ro ira vo kepaaroa ira rataoa tuparevere. Oire ra ratau torepasa uriota vo ratao totopaoro. Uva oiso purapataverea, Reito. Rataoa karuri igeipa. Osa iava oiso visii akereverea, Ovu iava visii? Viapau visii-ia taraiparai.<sup>26</sup> Oire ra oiso purapata, *Easi igei vii tapo aioiovora ora ukaioiera, vo uva igei vo uruiaro vuutaaro-ia torepao igeipa sipo sipo parivora.*<sup>27</sup> Oire uva visiire oiso puraroverea, Avoeo! Ovu iraova visii? Viapau visii-ia taraiparai. Visii-a riro vuriara pura irara. Visiigoa ragai ruvara iava vova avata.<sup>28</sup> Oire uva voeao Ebraham vase ora Aisak ora Jekop, ora voeao rutu reo topa piepa irara profeta irara oea rutu keketaverea, ovusa Pauto vo Saraaro-ia toupaive. Ovusa visii raga ratau toupata ora visiipa vurivira rutu gaupaoro, ora visii iava reuri oavisii raga kuripaoro siraovira.<sup>29</sup> Vo osa oirara rutu vorarova rutu vo rasio-ia ora aivarao piesa urioaverea pauoro vo Pauto vo Saraaro sovaraia aiopaoro veartoia tebol.<sup>30</sup> Ari ita, uva voeao oea visii sirova oisoa utupaave, evoea oea visiipa iraaverea vo Pauto vo Saraaro sovara iare. Ovusa voeao oea visiipa oisoa irapaave, oea taru visii sirova utuaverea.”

#### *Jisas Gaureva Jerusalem-pa*

(Matyu 23:37-39)

<sup>31</sup> Oire uva vo vuutavi raga oa-ia torevokovira urioaepa Farisi oiso rera tavisa, “Avau vova uvai ragare. Ari King Herot vii uposa aueparoi.”<sup>32</sup> Oa iava Jisas oiso voeao tavireva, “Voreta oiso rera tavisa Herot ro ira vuri rugoo purapareveira kaakau aakauto. Uvuri! Vo vokioia ora vokipavira uva vuri irara tugara kosi pieavere, ora upiapa irara porete piepaavere. Oire uva vo pevapa voki-ia ragai vo kovoaro opesi pieavere.”<sup>33</sup> Ari ita, vo vokio ora vokipavira ora vo vokipari-ia utupa uva vokapaoro avaravere Jerusalem iare. Aue iava uvare voeao vo kovoaro-a profet irara upopasa oea Jerusalem-ia toupaiveira. Teapi oeai raga ragai upoive ourui raga-ia.

<sup>34</sup> “Ae! Visii vao Jerusalem vata! Ae, Visii Jerusalem vata! Visiigoa profet irara upo iraopataveira. Ora voeao vuroko iraopataveira ae-ia avekeara Pauto oea sipo ragapareveira visii iare. Visii ovii iraraaro-ia guru ruipa ragapaaveira oiso osa kokootu ovii irara taturupaeveira putaeuarei-ia. Vo osa visii vao reasipataveira ragaipa.”<sup>35</sup> Uvuta! Pauto visii vo uruiaro kavurevoi. Uva oisi-a eisi osa iava visii tavipaavoi, Viapau oiso ragai keketaverea vorevira vo rekasisa utupaua, uva oiso purataverea ragaire ragoa roporeva Pauto, Pauto vearoa viraakoa vatereva ropa ira urioroi Turaro vaisiaro-ia.”

## 14

#### *Iravu Oirato Ira Iava Varaua Rutu Tuvuuropa Ira Vorevira Porete Pierewa Jisas*

<sup>1</sup> Uva ovokivu-ia Sabat voki Jisas aiosa avaroepa iravu vo kepaaro iare ro Farisi reraaro reito. Osa voa Jisas siitueiva kasikasi pievira.<sup>2</sup> Oire uva iravu oirato ira iava varaua tuvuuropa rera ruvara-ia toupareva.<sup>3</sup> Uva Jisas rera kekeoro voeao Reo Taisi-ia tarai irara akereva voearei rutu ora ratarataa vovou irara Farisi oiso, “E pasi, uvuipavieei ra Sabat voki-ia upiapa irara ruvarupape, eke viapau?”<sup>4</sup> Uva ora tape pieaepa. Osa iava rera oureva. Uva rera vorevira ravotovira porete pierewa. Oa iava rera iava vasereva. Uva avaroepa.<sup>5</sup> Oire uva oiso voeare puraroepa, “Vosa irai oviitoa vaiaro visii iava, eke bulmakau vai kove rikui vai-ia uukopava vai, oire ra viapau pasi ikauvira rera vorevira kae pierewe vo voki-ia vao Sabat voki, raa?”<sup>6</sup> Oa iava ariipaoro viapau rera vo reoaro vao aatoiva.

#### *Ro Ira Ora Rera Raga Ora Akaipa Pieparo*

<sup>7</sup> Oire uva Jisas voeai siituepareva, ovusa vo aio iare urioaepa varao raga-ia rovopara paupasa paupara. Osa iava voeapa oavu reo ruu vatereva. Oa-ia oiso puraroepa,<sup>8</sup> “Vosa

---

<sup>◇</sup> 13:24: Mt 7:13    <sup>◇</sup> 13:27: Mt 7:23, 25:41    <sup>◇</sup> 13:28: Mt 8:11-12    <sup>◇</sup> 13:32: Hi 2:10, 7:28    <sup>◇</sup> 13:34: Mt 23:37-39; Lu 19:41    <sup>◇</sup> 13:35: Sam 11:8; Mt 21:9    <sup>◇</sup> 14:1: Mk 3:2    <sup>◇</sup> 14:3: Mt 12:10; Mk 3:4    <sup>◇</sup> 14:5: Eks 23:5; Lu 13:15    <sup>◇</sup> 14:8: Pro 25:6-7

*irai viire keeraro kaokaooro, oire ra avau vao iare riako oupa aio. Ra viapau oiso paupau vao-ia rovopa paupa. Auepa teapi rera ro iravure ita keerarovere, ro rei vaisitoa rutu ro ira vii vaisiaro-ia pute pievira toupare.* <sup>9</sup> *Oire ra rera ro ira veire keeraro ira urioro oiso puraoro viire, Evoava rovopa-ia paupa verau eerapa. Ra va iava rirovira rutu ariioro vuria-ia paua rereri.* <sup>10</sup> *Ari vosa irai viire keeraro, oire ra avau vo aio iare. Ra isivauaro rutu pauu. Oire vosa oisi pieri, ra rera ro ira viire keeraro urioro viire oiso purasa, Vatetoa oaa, uriou vo paua viara-ia ragai ruvara-ia. Oire ra oisi vii piereve oiso-ia. Oa iava uvuipau ra riro vaisi rutu ouri vo oirara rutu osireiaro-ia voeao oea tapo aiopari.* <sup>11</sup>  $\diamond$  *Ari ita, vosa ro ira ora rera raga vaisiaro kae piepareve, uva rera-a eera Pauto ira vaisiaro akaipa piereverea. Osa ro ira ora rera vaisiaro akaipa piepareve, eera-a Pauto ira vaisiaro kae piereverea taru.”*

### *Oirarare Kaokaopa Vo Aioa Iare*

<sup>12</sup> *Oire uva Jisas oiso puraroepa rerare ro ira rerare keeraroepa vo aio iare, “Vosa oai aioa vai purarivere, ra viapau oiso ora vii vate iraraarore keerau, ora araoko irara vai oara, ora vii sara irara vaiaro, ora oearoi vii iavapa irara vai voearo riro moni irara. Auepa teapi vorevira viire keeraave, ra avau voea vo kepaaro iare aiosa. Oire ra vo aio vao vii vaaro kare pieive viipa vorevira.*

<sup>13</sup> *Viapau. Ari vosa oai riroa vai purari aioa vai. Oire ra voeaore apota iraravi keerau, ora voeao vuri vara irara, ora voeao vuri kokoto irara, ora voeao voosi irara.* <sup>14</sup> *Oire uva voeaa-evoea oea viapau uvuipaai ra viipa oaoi puraive vo aio kare pieoro oa purarivora voeapa. Ari ita, uva oisi-a eisi osa iava uvuipau ra roru iraopari. Eake iava? Uvare Pauto viipa vo aio vao purareverea vo vokio-ia oa-ia voeao torevoko irara toreaverea vova tova urui-ia.”*

### *Reo Ruu Vao Riroa Iava Aioa (Matyu 22:1-10)*

<sup>15</sup>  $\diamond$  *Uva va isivaaro iava iravu voea iava voeao oea rera tapo aiopaiva ira vo reo vao uvureva. Oa iava rerare Jisas oiso puraroepa, “Ro ira Pauto vo Saraaro sovara-ia paupaoro aiopareverea, ira uvuipa ra roru iraopareve.”* <sup>16</sup> *Uva Jisas rerare oiso puraroepa, “Iravu ira riroa aioa purasa aueparoepa. Oire uva va iare riro irarare keeraroepa kaokaooro vo aio iare oiso ra urioave.* <sup>17</sup>  $\diamond$  *Oire uva vo vuuta rutu-a vao vo aio vaaro oa karekeepa. Oa iava voeare rera voeaaaro arureva kovopa irara, oiso ra voeare avaave oeare kaokaoa pura rovopareva. Oa iava oiso voeare puraaepa, Uriota aiosa. Ari auero rutu vatatopoe.* <sup>18</sup> *Uva voeae rutu vaea reo raga ita purapaiva oiso, Viapau uvuipai oiso ra evo aio iare avavio. Oire uva va-a vao oa-ia iravu oiso puraroepa, Oavu aio kovo voriavo. Vearovira rutu ari viapau uvuiparai ita ra evo aio iare uriora. Uvare oiso ruipaparai vo kovo keke rovosa ava rovora.* <sup>19</sup> *Ari iravu oiso voea tavireva, Ari ita, katai tau voriavo aue bulmakau kovopa kare. Oire uva oiso vovouparai ra voeae akeakesa avara. Vearovira kaokaoa-ia. Ari viapau uvuiparai oiso ra evo aio iare uriora.* <sup>20</sup>  $\diamond$  *Uva ita, iravu voeare oiso puraroepa, Ari ita, vaviopavira raga riako ourai. Oa iava viapau uvuiparai ra uriora evo aio iare.*

<sup>21</sup> *“Oire uva oisi-a eisi osa iava kovopa irara voreaeapa reito tavisa va iava vao-ia. Oa iava rera ro ira vo kepaaro-a rirovira rutu kasipuparoepa. Uva oiso kovopa irara tavireva, Ikauvira avata oiso ragavira riropa raivarao iare, ora varao garepa raivarao varao vorarore riropa urui sovara-ia. Voeaore avata apota irara rutu, ora voeao vuri vara irara, ora voosi irara, ora voeao vuri kokoto irara. Oire ra voeae rutu koata piesa uriota vo ragai vo kepaaro-ia.”* <sup>22</sup> *Oa iava voeae kovopa irara oiso puraaepa, Ari ita, reito vii vo reoaro puraiovora. Ari touvira oaravu-a varao paupa tavukiro viapavira.*

<sup>23</sup> *“Oa iava ita rera ro reito voeae tavireva oiso, Avata vorarore riropa raivarao, ra voa kasuraara gaeta varao aio kovoro. Oire ra voava voeae rutu ivuoro voreta voeae koata piesa vo-ia ragai vo kepaaro. Uvare oiso ruipaparai ra ragai vo kepaaro agasipe rutu.* <sup>24</sup>  $\diamond$  *Uva oiso visii tavi iraopaavoi, Voeao iava oeare keera ragaraerao oea viapau rutu uvuipaai ra vo aio ouive ragai vaaro.”*

---

$\diamond$  14:11: Mt 23:12; Lu 18:14; Je 4:6; 1 Pi 5:5-6       $\diamond$  14:15: Re 19:9       $\diamond$  14:17: Pro 9:2, 5       $\diamond$  14:20: Diu 24:5; 1 Ko 7:33       $\diamond$  14:24: Ap 13:46

*Vearovira Rutu Rugorugoo Rovoparo Ra Jisas Sirova Uturo  
(Matyu 10:37-38)*

<sup>25</sup> Riro irara rutu Jisas tapo vokapaiva. Uva voeare ora poreoro oiso puraroepa, <sup>26</sup> “Oire vosa ro ira ragai sirova utu ruipaparo, oire ra aitetoareire isiva rovoro ora aakova, ora riakovaaro, ora kakae vurearo, ora araoko iraraaro, ora taataa riakoaro, ora vao tapo rera vo tootooaro raga. Vosa viapau oisi pie rovoreve ragaire pute pievira rugoopasa, oire uva viapau oiso rera-a eera ragai reraaro-a disaipelto. <sup>27</sup> ♦ Ora ro tapo ira viapau ragai sirova utuoro ora rerapa evao parikou ae siraoa vo tavakaaro kaereve. Oire uva rera-a ita eera viapau oiso ragai reraaro-a disaipelto.

<sup>28</sup> “E apeisi-a? Vosa irai visii iava riro kaekae kepa vai pausa aueparo viara-ia ruture. Oire ra pau rovoparo vo kepa voriarore vearovira rutu rugoo rovopasa oiso rugoopora, Esa ragai vo moniaro uvuipai avu ra va-ia vo kepa vao opesipe, eke viapau? <sup>29</sup> Vosa viapau oisi vo kepa pie rovoreve, ra va iava utupavira simen tovoreve. Oire ra viapau oiso ikauvira vo kepa opesi piereve. Ra ita, riro irara rutu rera agesipaoro rera tovipaive. <sup>30</sup> Ra oiso puraave, E rera-a ro ira vo kepa rovorevorao? Uva apeisi viapau vo kepa opesi pierovo?

<sup>31</sup> “Ora vosa irai king vai iraiva ita king vai ora uposa avaro. Oire ra oiso pau rovoro vearovira rutu rugorugoo rovosa. Aue iava uvare rera voeaaro-a katai tau tuku rutu (10,000) viurupa irara voeao rera voeaaro. Vo osa roari iravu erao tau tuku rutuva (20,000) urioro voeao rera voeaaro viurupa irara. Uva va-a eva oa iava vearovira rutu oiso ora rugorugoo pie rovosa pauro oiso, Esa pasi uvuiparai ra rera roari king upoa rera siguoro, eke viapau? <sup>32</sup> Ari vosa oiso rugooparo, Viapau uvuiparai. Ra va iava rerava keripatoapa tauaivira toupareve. Oire ra va iava oearovu arupareve rera iare roari rera arepasa, oiso ra vearo reoa vai purasi vo upo opesi piesa.

<sup>33</sup> ♦ “Osa raga ita oiso-ia, vosa irai visii iava vearo rugoo-ia varao ruture rera varaarore isiva rovoparo vara iava vase rovopora, oire ra oiso toupareve, Ragai reraaro disaipelto.

*Vo Toupai Avaka Iava Uvakoa  
(Matyu 5:13; Mak 9:50)*

<sup>34</sup> “Avaka vearoa rutu. Ari vosa va vo sipeiaro opesipe, ra uvuipai ra oai purape vare? Ra oai iava vorevira sipeipe, raa? <sup>35</sup> ♦ Vo avaka vao-ia oiso-ia, oa-ia viapau uvuipavie ra va tovopape varuparo ae tapo bulmakau eekoaro vao uverepaoro, auere gorua vatepasa rasiapa. Oire ra va iava avaka vera ovoiive. Ari vosa ro ira-ia kokito toupare, oire vo siposipo orirureve va kuverapaoro ora rera sopaaro-ia.”

## 15

*Reo Ruu Sipsip Java O Iria Opesikoopa  
(Matyu 18:12-14)*

<sup>1</sup> ♦ Takis oupa irara ora oearovu vuri irara oearea rutu Jisas iare urioaepa rera vo siposipoaro uvusa. <sup>2</sup> ♦ Uva va-a vao oa iava ratarataa vovou irara Farisi ora voeao tarai irara Reo Taisi-ia oearea rutu rirovira kasipu iraopaaepa oiso purapaoro, “Rera-a ro-ia vuri irara vatetooaro. Ira voea tapo aiopareveira.”

<sup>3</sup> Uva oisi-a eisi osa iava vao reo ruu vaterева Jisas voeapa. <sup>4</sup> “Vosa irai visii iava oaiaro ae katai vovoto vai (100) sipsip. Oire vosa iriai voava opesikoo. Oire ra rera ro ira vo raguiaro-a ae raga kavureve vo resura vatara tau vo resura vatara (99), ovusa aiopaise toupaoro uvavivu. Osa avaro oirare o taraasa sipsip iria opesikoo. Osa iava oirare voraro kasivarivira taraapareve. Ra vova oira oureve vorevira. <sup>5</sup> Oire vo osa oira ouro, ra oira kaverukopaoro vorevira karero oira-ia rorupaoro. <sup>6</sup> Oire ra ora rera vo kepaaro iare urioro oirava. Ra voava ora rera iavapa irarare keeraro voeao rera vate iraraaro. Ra voava urioave ora gurusa. Oa iava voa voea tavireve oiso, Ragai tapo rorupata. Uvare iriavu sipsip ragai oiraaro opesikoora virataoro. Oa iava oirare taraaavoi vorevira oira ousa. <sup>7</sup> ♦ Uva oisi-a oiso osa visii tavipaavoi, Oiso osa raga

❖ 14:27: Mt 16:24; Mk 8:34; Lu 9:23 ❖ 14:33: Fl 3:7; Hi 11:26 ❖ 14:35: Mt 11:15 ❖ 15:1: Lu 5:29 ❖ 15:2: Mt 9:11 ❖ 15:7: Lu 19:10; Je 5:20

ita vuvuiua-ia rorupaiveira oearovu-ia oirara oiso, Voea torevoko vovou irara vo resura vataru tau vo resura vataru (99). Aue iava gareara voea varaaro vuri vovouro. Oire uva vara iava vorevira porepaa virove sopaura oaive iava. Ari ita, vosa irai viritoa vai iava sopaua vai oisi oiso vorevira pore piro, oire ra va iava riroa rutu rorua karekepe pute pievira vuvuiua-ia.

### *Reo Ruu Moni Iava Vao Oa Opesikoepa Voraro*

<sup>8</sup> “Vosa iriai riakova oaiaro katai tau (10) aue monia vai. Oire ra utupaua aisivu voava monia-ia opesikope. Ra vaisire vuravu rukueeve vo aviaavia kepa iava vearovira rutu viousa vuravurapaoro. Oire uva vaisire taraapaeve vo tugurasa uva vaisi kekeoro vaisi oueve vorevira. <sup>9</sup> Oire vaisi ouoro keerao oearovure voeo oira iavapa irara. Ra va iava urioave oira ruvara-ia ora gurusa. Ra voa voea tavieve oiso puraoro, Ragai tapo rorupatavoi. Uvare aisivu moni isi ragai vaisiaro opesikoera. Uva taraaavo vaisire, oa iava vorevira vaisi kekeavo. <sup>10</sup> Uva oisi-a eisi osa raga ita Pauto voeaaro purapurapa irara ensel rorupaiveira, vo rara kataitoavi raga viritoavi vorevira ora rera iava sopauaaro porereve.”

### *Viovokoto Ira Aiteto Kavureva*

<sup>11</sup> ♦ Jisas oiso puraroepa, “Iravu oirato ira-a vaiterei oviitoarei. <sup>12</sup> ♦ Uva kikooto oiso puraroepa, Aite. Ragai vateri varao oara iava ragai tativira oiso, Veipa oiso varao roo piea vovio utupauavi. Oire ra ragai oai oua, rara ragai vateri oai. Uva vearo vaisi purareva aiteto. Oa iava vara rutu roo pievira vaitereipa. <sup>13</sup> Ikauvira raga rera ro kikooto auero rutu gurileva ora rerapa. Oa iava varava ouruivu iare tauai rutu avaroepa. Osa iava vara rutu moniara oisoa viki ragapareve opitupiturovu rutu-ia vuriara. Uva oisi-a eisi osa oisoa piepareve rera ro kikooto. <sup>14</sup> Oire uva vara rutu moniara varao vikireva. Uva va-a vao oa iava ogoeto karekeroepa voa vo taere sovara-ia. Uva viapau monia vai rerapa vao rera tauvapasa. <sup>15</sup> Osa iava iravu ruvara-ia kovo ousa avaroepa voava rera vo taere-ia. Uva vuri kovovi raga iare rera siporeva vo ora rera vo rasiaro iare, oiso ra koie ragui tokipare voa. <sup>16</sup> Uva oevavu kuearo iava eva ova vo ragui oisoa aio piepareve, uvare vo ragui raga vaaro-a aioa. Oire uva oisoa rera tapo oiso ruipaparo ra vo ragui tapo aiopareve. Uvare viapau irai rerapa aio vatepasa.

<sup>17</sup> “Uva va-a vao oa iava rera rugorugooa karu piropa. Oa iava oiso puraroepa, Aite voeaaro kovopa irara oea riroa rutu aioara aiopaoro toupaiveira. Ari vo uva toupaavoi uva vuri iraorai ogoetoo iava. <sup>18</sup> Eagara, uvava vo kareparai aite iare. Ra oiso rerare purara, Aite, asi Pautoa-ia vuria puraavora ora vii-ia tapo. <sup>19</sup> Uva viapau oiso vearoto-a ragai, ra oiso ragai vaisipari, Vihi oviitoaaro ragai. Viapau. Ari ragai tovopari oiso, Iravu ragai viipa kovopato. <sup>20</sup> ♦ Oire uva voava kareroepa rera iare aiteto.

“Oa iava tauai rutu urioparoepa, osa aiteto rera tuereva. Uva va-a vao oa iava aiteto iava rirovira rutu sopaua sirao iraoepa. Uva voava ikaureva oviitoa-ia pitu ovoisa. Oire uva rerava uugaa ovoiroepa. <sup>21</sup> ♦ Oa iava oviito oiso rerare puraroepa, Aite. Ragai Pautoa-ia vuria puraavora ora vii-ia tapo. Uva viapau oiso vearoto-a ragai, ra oiso ragai vaisipari vii oviitoaaro ragai. <sup>22</sup> Oa iava aiteto rera voeaaro kovopa irara tativira oiso, Roari rovopato kuvuto ragai reraaro ouoro uriota ikauvira, ra rera-ia rera kuvuta. Ring vai tapo rera sipareoaro-ia tovopatavoi. Ra va iava vorevira reesia oureve oiso, Ragai oviitoaaro-a rutu. Ora tasiparei vai rera kokotoaro-ia tapo tovopatavoi. <sup>23</sup> Ra taoropa koruou vai bulmakau upooro oaiva tapo uriota. Ra oai aiopaoro rera tapo *rorupe*. <sup>24</sup> ♦ Eake iava? Uvare rera ro ira opesikoroepa oiso rutu osa kopiito ragai oviitoaaro. Oire uva vo vokio vorevira ita ira tootooroi. Ira-a ro opesikoroepa. Oa iava vorevira rera kekeoro rorupai ita. Osa iava rovoaepa rera tapo aiopaoro rorupaoro.

<sup>25</sup> “Vo ovusa avaioto varuparo toupareva kovoia-ia. Uva voava kareparoepa. Oa iava kepa iare kare uviro tutuuroepa. Uva voava pupi guruko uvureva ora aue raurauara. <sup>26</sup> Uva va-a vao oa iava iravure kovopato keeraroepa oiso rera akesa, Eake-a vao oa purapai? <sup>27</sup> Uva oiso kovopato rera tativira, Ari vii araokotoaaro ira vorevira karero viroi. Oa iava aiteara taoropa koruou uporevo aue bulmakau. Uvare rera iare vorevira voreroe oviito, osa

♦ 15:11: Mt 21:28   ♦ 15:12: Diu 21:17   ♦ 15:20: Jen 45:14, 46:29   ♦ 15:21: Sam 51:4   ♦ 15:24: 1 Ti 5:6

viapau oiso oavu avu vai vo rera varaaro-ia. <sup>28</sup> Uva va-a vao oa iava avaioto rirovira rutu kasipu iraoparoepa. Osa iava reasiparoepa koata arapa. Oa iava aiteto kosiro viropa rera vovouaro vuavua piesa rerare kavevira ora reooro. <sup>29</sup> Uva aiteto vo reoaro pukooro oiso puraroepa avaioto, Ari ita, riroara rutu-ia ivara vii vo kovoaro-ia pitu ragapaaveira oiso rutu osa ro kovopato akukutoavi. Osa viapau ovokivi-ia vii varaaro-ia reo goruro tagaupaa vara gasipaoro. Uva va-a eva oa iava viapau ragaipa oavi meme kakae vai vatepariveira, oiso ra ragai voeaaro tapo vate irara oaa roru oai aiooro. Osa viapau rutu.

<sup>30</sup> Vo osa eera ovito oara vii varaaro rutu opesi pie ragaparevora vairoropa otopa riako. Oa iava vorevira kareroi. Uva rerare rugoro rera taropava bulmakau uporivoi.

<sup>31</sup> “Oa iava aiteto rerare oiso puraroepa, Oviitoa oaa. Vokiara rutu-ia toupaveaira vegei rutu. Osa iava auero rutu-a varao vii varaaro vo ragai vo kepaaro sovara-ia. <sup>32</sup> Uva vo vokio-ia roru iraopai, auere ra vigei iava sopaura vearope rorupaoro rera-ia ro araokotoa oara. Ira opesikoroepa rutu oiso rutu osa kopiito. Oa iava totooroi. Osa iava vorevira rera kekepai ita.”

## 16

### Tokipatoa Iava Ira Oisoa Vuri Kovo Purapareve

<sup>1</sup> ♦ Oire uva Jisas ora rera voeaaro disaipel tavireva oiso, “Iravu riro monito ira reraaro kovo tokipato oisoa toupareve. Uva oearovu rera iare ro riro monito urioaepa. Oa iava rera ro kovo tokipato togapaiva oaravu-ia reoara. Varao oara-ia oiso purapaaepa, Eera vii reraaro kovo tokipato ira auero rutu viki ragapareveira. <sup>2</sup> Oa iava rerare keeraroepa ro kovo tokipato. Uva oiso rera akereva, Auoro. Apeisi ragavira vii iava uvuavoi? Avau auero rutu torevokovira vieisa, varao oara oisoa oupari oeavu ruvara-ia, ora varao oara oisoa vikipari oaravu voripaoro ragai varaaro. Uva viapau rutu uvuipaei oiso ra vorevira kovo tokipau.

<sup>3</sup> “Oire uva rera ro kovo tokipato ora rugorugoo pie iraoparoepa vo ora rera raga vovouaro-ia. Oa iava oiso puraroepa ora rera ragare, Esa eake vai purapaavoi? Uvare reito ragai sigurevoi vao iava kovo tokipa kovo. Viapau rutu ragai-ia gorua vai ei vo aio kovo vai purapasa. Ora rirovira rutu arii iraoparai oearovu goruvira are arapa auere aioara vai. <sup>4</sup> Oire oavure rugoorai. Vosa va puraa vao-ia, ra va iava ragai ou piepaive vorarore ora voea vo keparoaro-ia, vo rara reito ragai verareve. <sup>5</sup> Oa iava katakataivira voea ruture keeraroepa voeo oea oisoa orekerovu rutu ou ragapaive rera ruvara-ia ro-ia reito. Oire uva iravu kovo tokipato iare urioroepa. Oa iava oiso rera akereva, Ovirovuei varao oara oisoa ou ragapari ragai reraaro ruvara-ia reito? <sup>6</sup> Uva oiso puraroepa, Katai vovoto (100) auero wel dramro. Oa iava oiso puraroepa, le, tiket oa-ia reo goru purarivora vara ouoro. Oire vara rutu vievieioro vara iava vo vavae tau (50) raga rigatori ikau visivi vara vieiaro tavariooro. <sup>7</sup> Oire uva iravu ita rera iare urioroepa. Oa iava rera ro kovo tokipato oiso rera akereva, Aa voviroa varao akuku ouara vii varaaro? Uva oiso puraroepa, Ari katai vovoto (100) auero wit bekro. Oa iava oiso rera arureva. Vao ouri tiket. Ra vii vaaro tavariori varao vieiaro rigatooro vo peva vatara tau raga (80).

<sup>8</sup> ♦ “Oire uva va-a vao oa iava ro reito rera reraaro vurito kovopato oiso tavireva, Auoro, kasivarivira rutu vii vo kovoaro purarivo oirara varaaro gare piepaoro varao oara oisoa ou ragapaive ragai ruvara-ia. Uvare eisi piepaoro voea roru pierivo ora vii-ia.

“Ari ita, oiraopavira voeo oirara oea vo rasio raga-ia rugorugooaveira oea kasivarivira rugorugooaveira ora voea vate iraraaro roru piepasa, oea raga ita vo pitupituar oearovu vo pitupituroaro-ia putepaiveira voeo torevoko vovou irara. Aue iava uvare voeo torevoko vovou irara kasivari rugoo asavira voeo vo kovoaro purapaveira ora voea voeaaro vate irara tauvapasa.

<sup>9</sup> “Oire uva visii tavipaavoi vao iava moni vo rasio-ia vuria, vo osa vuri rugoro-ia osivu ragavira va kovo piepata. Uva vara moniara vearovira kovo piepata. Ra vara-ia visii voeaaro vate irara roru piepata. Oire vosa opesipe moni ou vo rasio iava ora orekerovu rutu, ra visii vo pitupituar iavirava visii oureve Pauto vo ora rera vo uruiaro iare, oa-ia toupaivoi Tootoaa opesi asa vo vokiara rutu-ia.

<sup>10</sup> ♦ “Vosa irai orekerovi garepara vai vearovira tokipareve, oire ra ita oisi raga reipara vearovira rutu tokipareve. Ari ro ira viapau torevokovira kovopareve varavi-ia garepara, oire ra

♦ 16:1: Lu 15:13   ♦ 16:8: Jo 12:36; Ef 5:8; 1 Te 5:5   ♦ 16:10: Mt 25:21

ita oisi raga viapau oiso reipara-ia torevokovira kovopareve tapo. <sup>11</sup> Vosa viapau va-ia vao vuri moni vearovira va kovo piepataverea vo rasio-ia, ra irou rutu visii vatepaive oiraopara vai? Ra oarai tokipata vearovira, raa? <sup>12</sup> Vosa viapau vearovira oearovu varaaro tokipata, ra irou visii vatepaive orekerovu avu vai, oiso ra oarai-ia pitupata, raa?

<sup>13</sup> ♦ “Viapau kataitoa vai kovopatoa vai uvuiparoi ra aiterei rutupa reitoarei vai okovoreiaro-ia pitupareve. Oire vo osa iravure vuri vovoupaoro iravu ragare vearo vovouparo, eke rerapa ruipaparo rutu roaripareasipaoro. Ari ita, visii vao viapau uvuipatai ra vo rugoorei rutu sirova ututa oiso, Pauto-a ro, ari vao moniapa.

#### Vo Toupai Reo Taisi Iava Ora Pauto Vo Saraaro

<sup>14</sup> ♦ Voeao Farisi oea moniapa ruipa iraopaaveira rutu vare rugoo iraopaoro. Oa iava vo reoro rutu uvuiva Jisas oreoroa purareva. Oire uva rera tovipaiva va iava vao. <sup>15</sup> ♦ Uva Jisas oiso puraroepa voeare, “Ari ita, visii oiso ruipapataveira ra ora visii vo pitupituroaro vearovra vovouro karekepata oirara rutu osireiaro-ia. Vo osa Pauto visii vo vovouroaro-ia taraiparoveira torevokovira. Oire ra oirara visii vo pitupituroaro kekepaoro oiso purapaave, Torevoko vovouro rutu varao. Vo osa Pauto osireiaro-ia vuivuvivira rutu kekepa piro.

<sup>16</sup> “Reo Taisi vo reoroaro Moses vaaro ora profet irara vo reoroaro oara rutu oisoa toupaive oirarapa torevoko rugoo vatepasa. Oa iava vo rutu tugurasa urioepa Jon Baptais vo vuutaaro-ia. Oire uva Jon vo vuutaaro isivaaro iava Pauto vaaro Vearo Siposipo rera vo Saraaro iava vo uruiara rutu-ia kare pirorao. Osa iava oirara rutu kasivarivira kovopai, oiso ra Pauto vo Saraaro-ia koataaave.

<sup>17</sup> ♦ “Utupaua vuvuiua ora rasito oiso opesiperea taru, ovusa Reo Taisi iava viapau oavi gare rigatovi vai opesiperea vao Pauto vo reoaro.

#### Jisas Reoroepa Riako Kavupa Pitupitu Iava

(Matyu 5:31-32, 19:9; Mak 10:11-12)

<sup>18</sup> ♦ “Vosa oirato riakova kavureve iriavu raga ousa, oire ra va-ia ora oua vuri pierere otopa pitupitu purapaoro. Ora vosa ro ira oira oureve o iria kavu rovoreve roari, uva rera-a eera ira ora oupa vo taisiaro vuri pierenvoi otopa pitupitu purapaoro.

#### Lasaras Iava Vao Apotatoavi Ora Ro Riro Monito Ira Viapau Oisoa Sopauaaro Porepareve Vo Pauto-ia Rugoopasa

<sup>19</sup> “Tuariri iravu riro monito ira oisoa toupareve. Uva oisoa vokiara rutu-ia vearovra kuvuro-ia kuvuparo revasipara. Ora vokiara rutu-ia vearo aio rutu oisoa tapo aiopareve riro rorua oupasa ora rerapa. <sup>20</sup> ♦ Ovusa rera vo kepaaro rataoaro ruvara-ia iravu apotato oirato toupareve. Rera vaisiaro, Lasaras riro kapukapuato vova varaua-ia. <sup>21</sup> Oa iava oisoa rurukopara kavopareve rera ro riro monito reraaro tebol reroarova. Oire ra varavi-ia ora reravi iava kovuto vuku pie ragapareve. Uva voa oisoa kaakau kare rera kapuaaro veaveapasa uriopaave ora voea arevuoaro-ia.

<sup>22</sup> ♦ “Oire uva rera ro apotatoavi kopiiroepa. Oa iava enselpa irara rera kaeiva Ebraham ruvaria rera tovosa, uva oisoa rera tapo toupareve. Oire uva rera isivaaro iava rera ro riro monito kopiiroepa. Oa iava rera tovaiva. <sup>23</sup> Uva vo toupare vuri tapi riro siitoka oupa tapi rutu. Uva voava taraapavira tuupavira aue Ebraham vaio vurapareva, ovusa Lasaras rera sirova toreparoepa, ovusa tauaviria toupasiva rerapa. <sup>24</sup> ♦ Oire uva voa-a vo uvava rera ro riro monito keeraroepa oiso puraoro, Aite Ebraham. Ragaivipa siraou. Lasaras aruri, ra sipareo rupu pieoro urioro ragai iava arevuoato-ia oira tovosa. Ra rera vuavua pierere gare visivi. Ari ita, vurivira rutu upia sovo iraopaavoi vo kasio-ia.

<sup>25</sup> ♦ “Vo osa Ebraham oiso puraroepa rera aatooro, Oviitoa oaa. E rugoopauei voarire tuariri uva tootoovira touparivora vearovra aiopaoro, ora vara oupaoro ora viipa? Osa ro-ia Lasaras ora rerapa vuriara oisoa oupareve. Uva va-a eva oa iava rerare sopaua vearovira toupaivoi vo uruio-ia, osa vuri siitoka ouparivoi ita vii. <sup>26</sup> Ora oavu tapo vo vigei vuutaaro-ia oa tovoreva Pauto vigeipa tugivira rirova apui. Eira iria-ia viapau uvuipaii ra oira iviropaoro

♦ 16:13: Mt 6:24   ♦ 16:14: 2 Ti 3:2; Lu 23:35   ♦ 16:15: 1 Sml 16:7; Pro 21:2   ♦ 16:17: Ais 40:8; Mt 5:17-18

♦ 16:18: Mt 5:31-32, 19:19; Mk 10:11; 1 Ko 7:10-11   ♦ 16:20: Ap 3:2   ♦ 16:22: Jo 13:23   ♦ 16:24: Mt 25:41

♦ 16:25: Lu 6:24

visii iare uriopaave. Ora voea tapo ita eisiva viapau uvuipaai ra oira-ia iviropaoro vore uriopaave igei iare.

<sup>27</sup> “Oa iava riro monito oiso puraroepa, Ari ita, aite Ebraham. Oiso viire keeraparai ra Lasaras aruri. Ra aite vo kepaaro iare avaro. <sup>28</sup> Okepa-ia toupai vo vavae voeo ragai araoko iraraaro. Oire uva oiso ruipaparai ra goruvira rutu Lasaras voea tavirevere aepea, teapi voea tapo ita vore urioave riro-ia siitoka. Vo osa viapau voea iava sopaura pore rovo piro vova vuri vovouro.

<sup>29</sup> ♦ “Ari Ebraham rera aatooro oiso puraroepa, Ari ita, reoreoara toupaiveira voea ruvara-ia, oreoa rigatoiva tuariri rutu Moses ora voeo profet irara. Uva vii voeaaro araoko irara uvuipaai ra evo reoreo sirova utupaave. <sup>30</sup> Uva riro monito oiso puraroepa, Viapau aite Ebraham. Viapau oiso evara uvuipai. Ari vo raga osa irai kopiitoa vai tovaa vai iava toreoro voea iare avaro. Oa iava uvuipaai ra sopaura oaive iava porea viro vova vuri vovou. <sup>31</sup> Uva va-a vao oa iava Ebraham oiso rera tavireva, Ari ita, vosa viapau Moses ora profet irara viapau vo reoroarore rugoopaave, oire ra apeisi ragavira ita irai oreoiaro oirao pieive, vo rara tova tapi vai iava vorevira vorero voea tавisa?”

## 17

### Vuri Pitupitu Iava Oa Oirato Vaaro Oirao Piea Vuri Piepaiveira

(Matyu 18:6-7, 21-22; Mak 9:42)

<sup>1</sup> ♦ Jisas ora rera voeaaro disaipel tavireva oiso, “Oiraopavira rutu, oaravu rutu vo vokio kareke iraopapeira oirara rutu kove piepasa, oiso ra vuri vovouro purapaise. Ari ita, uva siraovira ropa ira oisi vo pitupituro kareke pieparevoi vo vokio oirara kove piepasa. <sup>2</sup> ♦ Vosa irai oiratoa vai irai raverave vovoutoa vai oirao pie vovouaro vuri piereve voeo iava raverave vovou irara oea ragai-ia raripaaveira, oire uva vearpai oiso ra oeai rera-ia rirova aveke vai tuuive rera okoearo-ia rera roko piesa avakava vuruvuruaro-ia.

<sup>3</sup> ♦ “Ora vatatopo iraopata. Vosa araokotoa oara vuria purareve, oire rera tarairi. Oire vosa ora rera iava sopaua vorevira porereve vo rara vii vo reoaro uvureve, ra va iava rera iava va vuria verari. <sup>4</sup> Ari vosa vii-ia voreripavira vuria purareve rirovira vo katai voki-ia, oire ra katakataivira vara rutu isivaaro iava vii iare urioparo oiso purapasa, Ragai iava sopaua pore piroi vova vuria oa puraavo vii-ia. Oire ra va iava uvui iraopaei ra rera iava vara rutu evara vuriara verapari katakataivira.”

### Oirao Pie Vovou

<sup>5</sup> ♦ Uva aposel irara Turarore oiso puraaepa, “Igei vararo oirao pie vovouro riro pieri rutu.” <sup>6</sup> ♦ Uva Turaro oiso voeare puraroepa, “Eagara ita, vosa visii varaaro oirao pie vovouro oisivi raga toupaive oiso osa mastet kuearo garepa takurarovi rutu, oire ra va iava evare riropa eva oiso purata, Vavurupara rutu iava tate uviro, ra avau vavore avakava sovara-ia. Ra voa ora pauu ita. Oire ra va iava visii gisipoaro sirova utupe ita. Aue iavirava visii varaaro oirao pie vovouro.

### Vao Kovopato Vo Kovoaro

<sup>7</sup> “Vosa visii iava irai kovopatoa vai varuparo vai gaaripareve rasia porepaoro, eke sipsip ragui vai tokipareve. Oire ra voava karero viro kepa iare. Ra pasi, rera reitoaaro rerare keeraro oiso, Uriou ikauvira pausa ra aiori? <sup>8</sup> ♦ Viapau. Ari oiso vaio rera tavireve, Varoa tavario rovori. Ra ragaipa aioara ravaari. Oa iava varava uriou. Ra aio rovoa ora tapo ukaio rovora. Oa iava utupavira aiorivere ukaiooro tapo. <sup>9</sup> Ra apeisi-a? E rera-ia roru vaisi purareve ro kovopato vo rara rera gisipoaro sirova vearovira utuparo, raa? Ari viapau rutu. <sup>10</sup> Oire uva oisi-a eisi osa iava visii tapo uvuipatai vosa orekerovu rutu kovoara opesi pie rovopata oiso osa Pauto visii tavireve, oire ra va iava oiso purata, Igeivi-a viapau vearo irara kovopa irara, ra va iava vearo vaisi ouio reito ruvara-ia. Igoa vo kovo raga purapaioveira. Ari viapau oaei.”

### Katai Tau Leprapa Irara Oea Sisigarue Pierева Jisas

♦ 16:29: Jo 5:45-47 ♦ 17:1: Mk 9:42; 1 Ko 11:19 ♦ 17:2: 1 Ko 8:12 ♦ 17:3: Mt 18:15 ♦ 17:5: Mk 6:30

♦ 17:6: Mt 17:20, 21:21; Mk 9:23; Lu 7:13 ♦ 17:8: Lu 12:37

<sup>11</sup> ♦ Oire uva Jisas vo raivao Jerusalem iare gaeoro avaroepa. Oa iava Sameria-iarei vuruvuruaro-ia vokapaoro avaroepa ora Galili-ia. <sup>12</sup> ♦ Uva voa ouruivu-ia karero viropa. Oire voava katai tau leprapa irara urioaepa rera iare raivaaro. Uva voava tauaivi torepaaepa <sup>13</sup> keerapaoro oiso, “Jisas, Reito. Igeipa siraou!” <sup>14</sup> ♦ Oa iava Jisas voa voea vuraoro oiso voeare puraroepa, “Avata ora visii iava varaura karekesa korouu purapa irarapa pris irara.” Oa iava vokapaoro avapaaepa. Uva voa voeare varaura sisigarue ovoiepa. <sup>15</sup> Uva voa voea iava iravu ora rera iava varaua kekereva uvare sisigarueepa. Oa iava voreroepa. Uva rirovira Pauto vaisiaro-ia vuurapa vaisi purapareva. <sup>16</sup> ♦ Uva voa Jisas ruvara-ia kokotoaro rekureva rera-ia vearo vaisi puraoro. Ro Sameria iava rera. <sup>17</sup> Uva va-a vao oa kekereva Jisas, oa iava oiso puraroepa, “Eari keaparai oiso katai tau rutu sisigaruei. Uva ovu-ia avaai vo resura vatara?” <sup>18</sup> Easi pasi, viapau irai voreparoi Pautoa-ia vuurapa vaisi purasa? Ari ita, ro-ia kataitoavi raga uvavu ragava rera ratau touto.” <sup>19</sup> ♦ Oire uva Jisas oiso rerare puraroepa, “Toreu ra avau. Vii vaaro oirao pie vovou vii ravotovira porete pievoi vorevira.”

*Pauto Vo Saraaro Oa Karekeperea*

(Matyu 24:23-28, 37-41)

<sup>20</sup> ♦ Uva Farisi oiso Jisas akeiva, “Aa vo vuutao-ia Pauto vo Saraaro karekeperea?” Oa iava voea aatooro oiso puraroepa, “Vosa Pauto vo Saraaro karekepere, oire ra oirara viapau oiso va kekeive ora voea osireiaro iava.” <sup>21</sup> Ra viapau irai oiso purarovere, Keketa va vao vo-ia. Eke, Asi va vao-a vavo oiso. *Oire uvuta! Pauto vo Saraaro epao visii vuutaaro-ia.*”

<sup>22</sup> ♦ Uva va-a vao oa iava Jisas ora rera voeaaro disaipel tavireva oiso, “Easi utupaua oiso ruipa ragapatavere ra ragai Oirato Oviitoaaro kekesa katai vokivi vai raga-ia, osa viapau.” <sup>23</sup> Oire uva oearovu visii tavitavipaivre oiso, Keketa. Asi ro-a vo-ia toupare. Eke, Varo vavo-ia. Oire ra viapau rutu uvuipata ra voea sirova utupata. <sup>24</sup> E varakeotoa-ia taraipataveira? Ira parakaupareveira voraro ruture vuvuiua-ia roropaoro. Oire uva oisi-a eisi osa ragai Oirato Oviitoaaro pieoro karekeraverea vo oirara rutu osireiaro iare katai vuutavi raga-ia. <sup>25</sup> Ari ita, riroara vai siitokaara vai kae rovopaa. Oa iava voea vo vuutao iava voea ragaire isivapaavere.

<sup>26</sup> ♦ “Vo pitupituro-ia oara puraiva vo Noa vo vuutaaro-ia. Oire uva oisi raga ita eisi osa pieiverea vo ragai Oirato Oviitoaaro vo vuutaaro-ia.” <sup>27</sup> Uva voea rutu oisoa aiopaive, ora ukaiopaave, ora vearovira raga riako oupaave. Oa iava voa vo rekasisa urioaepa oisi raga piepaoro uva Noa sip uvuo-ia koataroepa vo tuariri rutu. Osa iava rirova pirutuva karekeopa. Uva oirara rutu gisiaepa oira-ia. <sup>28</sup> ♦ Osa raga ita-a eisi pieiva vo Lot vo vuutaaro-ia tapo voari tuariri. Uva oisoa aiopaive, ora ukaiopaave, ora orekeroru voripaive, ra oearovupa vara sipopaive moni oupasa. Ora aio kovoro paupaave, ora kepa paupaave. <sup>29</sup> Oire uva Lot Sodom-ia kavuoro avaroepa. Uva vo voki raga vao oa-ia tuitui kasi karekeepa, oa-ia vitavokovira kovekoveoro vuvuiua iava oiso osa kokeva. Oa iava oirara rutu kopii pieva voa. <sup>30</sup> Uva oisi raga ita eisi osa pieiverea vo vokio-ia oa-ia Oirato Oviitoaaro karekeroverea poeravira ragai raga ita.

<sup>31</sup> “Uva vo voki raga-ia ro ira kepa ivara-ia touparevere, vo osa rera varaprovo vo kepa sovara-ia toupaive, ira viapau oiso voava rere rovoreve vara ou rovosa rera varaprovo, uvare viapau vuutavi toupaive. Eisi osa ro ira varuparo touparevere, ira viapau oiso voava karero ora rera vo kepaaro iare rera varaprovo ousa.” <sup>32</sup> Vearovira rutu rugoopata Lot valuavaarore. Iria porepaoro kopii ovoiopa. <sup>33</sup> ♦ Ari vosa ro ira ora rera tootooaro ragare taraapareve kovopaoro, oa taru rera iava opesi ovoipere. Ari vosa ro ira ragai-ia vovoupaoro ora rera iava tootooa eaka ragapareve, ira-ia Oiraopa Tootoo rutu toupaiveira.

<sup>34</sup> “Visii tavipaavoi oiso, Vo voki iava vo rupa-a vao oa-ia aiterei atarapasiverea katai uru vai-ia. Oire ra voava Pauto irai raga oureverea vaiterei iava iravu kavuoro vo osa toupareve.” <sup>35</sup> Ari airei

---

♦ 17:11: Lu 9:51-52   ♦ 17:12: Lev 13:46   ♦ 17:14: Lev 13:2, 14:2   ♦ 17:16: Mt 10:5   ♦ 17:19: Mt 9:22; Mk 5:34   ♦ 17:20: Lu 19:11   ♦ 17:22: Mt 9:15; Mk 2:20   ♦ 17:26: Jen 7:1-24   ♦ 17:28: Jen 18:20-33, 19:24-25   ♦ 17:33: Lu 9:24

riakorirei vai plaua purapaereverea auere bret, osa Pauto iriavu raga ita oureve vairei iava iriavu arova voa osa toupaeve. <sup>36</sup> Ari aiterei oiratoarei vai varuparo vai toupasiverea osa Pauto vaiterei iava iravu raga ita oureve iravu arova voa raga osa toupareve.” <sup>37</sup> Uva va vao uvuoro oiso puraaepa disaipel, “Turaro, ovu-a vo uva va eva karekeperea?” Oa iava Jisas ruuvira raga voea tavireva oiso, “Ari vo uva okarerovu rutu kopiipaaveira, uva ruega kare ora gurupasa rerepaiveira eru karero aiopasa.”

## 18

### *Reo Ruu Vao Vo Osa Riakova Reo Rovirieipatoare Keeraopa Oira Tuvasa*

<sup>1</sup>◊ Oire uva Jisas oavu reo ruu vatereva voeapa voea tarai piepaoro, oiso ra variripaave vokiara rutu-ia reasi asavira. <sup>2</sup> Uva oiso puraroepa, “Ouruivu-ia iravu reo rovirieipato oisoa toupareve ira viapau Pautoa-pa uririparo ora avivikepaoro. Ari viapau oiso ra oirarare vearo vovouparo. <sup>3</sup> Uva iriavu rareeva riakova oisoa toupaeve vo urui-ia uvava valuato kopiiroepa. Oire uva vokiara rutu-ia oisoa uriopao rera ro reo rovirieipato tavidasa oiso, Keripato ragai vuri piesa aeeparoi. Oiso ruipaparai ra ragai tauvari va-ia vao-ia kort puraoro torevokovira! <sup>4</sup> Uva voari rovovira viapau oiso vovouparoepa ra oira tauvareve rera ro reo rovirieipato. Uva utupavira oiso puraroepa ora rerare, Oiraopavira rutu viapau oiso Pautoa-pa uririparai. Ora tapo viapau oiso oirarare rugorugooparaveira voeapa avivikepaoro. <sup>5</sup>◊ Ari ita, oira o-ia rareeva ragai pugu pie iraopaeveira. Oire ita, eagara ra oira tauvaa kort puraoro oirapa. Teapi ora voreri vasipao. Ra va iava ragaire varaua reasipe rutu.” <sup>6</sup> Oa iava Turaro Jisas voeare oiso puraroepa, “E vo reo vao uvutavoi, oreoa purarevora ro-ia vurito reo rovirieipato, raa? <sup>7</sup>◊ Uva apeisi-a voea-ia oirara Pauto oea reesipareveira ora rerapa, oea rerare gaupaveira arepaoro vo aviajaro ora vo vokiaro tapo? Oire uva apeisi-a? Ra viapau Pauto voea tauvareve, raa? Ra ateate piepaoro toupareve? <sup>8</sup> Ari ita, ira uvuipa ra ikauvira voea tauvapareve. Uva va-a eva oare rugoopaoro visii akepaavoi oiso, Ovirovua vao oirara voeao oea goruvira ragai-ia raripaaveira oea perea ovusa vorevira vorera ragai Oirato Oviitoaaro rara?”

### *Reo Ruu Farisi Iava Ora Takis Oupa Irara*

<sup>9</sup>◊ Oearovu oea ora voea raga-ia raripaaveira oiso, Igei torevoko irara, ovusa oeavure oiso purapaave, “Vuri irara voeao.” Oire uva voea-a evoea oeare Jisas oavu reo ruu purareva. <sup>10</sup> Uva oiso puraparoepa, “Aitereivu oiratoarei aiterea oiso ruipapasiepa ra variris. Oa iava Rovopa Kepa Tempel iare ipasiepa oiso, iravu-a ratarataa vovouto Farisi-pato, ari iravu-a takis oupato. <sup>11</sup>◊ Oire uva rera ro Farisi-pato toreroepa ora rera sopaua raga iava oiso variripasa, Pauto, ragai viapau oiso osa oearovu vuri irara voeao oea kavirupaaveira, ora varao tapo kuuvu pitupituro purapaaveira, ora riakorava otopa pitupituro tapo purapaaveira. Ora viapau oiso toupaavoi osa ro-ia takis oupato. Eisi osa iava vii-ia vearo vaisi purapaavoi. <sup>12</sup> Ari ita, vo wikiara rutu-ia eraeraovira vo vokirei-ia aio kavuparaveira vii ragare rugoopaoro. Uva vara rutu varao oara oupaaveira oara iava katai taupara putepaaveira viipa oavu vatepasa voava. <sup>13</sup> Oire ro takis oupato ira tauaviva toreparoepa reasipaoro vuvuua vura arapa taraaoro. Ira ora kopukopuaro raga tapatapapareva siraoporo. Uva oiso puraparoepa, Pauto, ragaivi vurito ragaopa siraou.

<sup>14</sup>◊ “Oire uva visii tavipaavoi oiso, Ro-ia takis oupato ira iava vuriara verareva Pauto. Osa iava rera vaisireva oiso, Torevokoto ro-ia oirato. Oa iava vorevira kareroepa ora rera vo uruiaro iare. Vo ovusa ro Farisi-pato ora rera varaarova vorevira kareroepa, oiso osa raga ita varava vuriara urioroepa. Aue vituaro iava uvare ro ira ora rera raga vaisiaro kae piepareve, ira vaisiaro akaipa pierevere Pauto. Ari ro ira ora rera vaisiaro akaipa piepareve, ira taru vaisiaro kae pierevere utupaua Pauto.”

### *Jisas Kakae Vure Viraakoreva (Matyu 19:13-15; Mak 10:13-16)*

◊ 18:1: Lu 11:5-8; Ro 12:12   ◊ 18:5: Lu 11:8   ◊ 18:7: Re 6:10; Ro 8:33; Kl 3:12; 2 Ti 2:10   ◊ 18:9: Lu 16:15  
◊ 18:11: Mt 6:5   ◊ 18:14: Mt 23:12; Lu 14:11; 1 Pi 5:6

<sup>15</sup> Oire uva garepa kakaero sipoiva Jisas iare. Uvare oiso ruipapaaepa ra voea-ia vavaeareiaro tovoreve varirioro. Uva disaipel irara voea tueoro voeare korupaaepa. <sup>16</sup> Oa iava Jisas ora rera ruvara iare voeare kakae vure keeraroepa oiso puraoro, “*Kakae vure eakata. Ra urioave ragai iare. Opeita voeare korupata. Ari ita, Pauto vo Saraaro oa oiso voea-ia toupaiveira oea oiso purapaa viroveira osa voeao-ia garepa kakaero.*” <sup>17</sup> ♦ Oiraopavira rutu visii tavi iraopaavoi oiso, Voeao-ia kakae vure riro rari irara rutu ragai-ia. Vosa irouto viapau oiso vo ruipaaro toupaive osa ro kakaeto ira vaopa ruipaparoveira Pauto vo Saraaro, oire uva rera oirato ira viapau uvuipa oiso ra Pauto vo Saraaro sovara iare koataro.”

*Iravu Reito Riro Kotokoto Gurupareve*

(Matyu 19:16-30; Mak 10:17-31)

<sup>18</sup> ♦ Oire uva iravu Jiu-pato reito oiso rerare puraroepa, “Vearoto Tisato. Eake vai-ia uvuiparai ra oai puraa, ra Tootoo Ovoi oua?” <sup>19</sup> Oa iava Jisas oiso rerare puraroepa, “*Eakere eisi ragai vaisipari oiso, Vearoto? Vo osa kataitoa raga-a vearto Pauto.*” <sup>20</sup> ♦ Ari ita, aue-ia taraipaeui vao-ia Reo Taisi Moses vaaro. Oa oiso purapapeira, Opeita otopau. Ora opeita oira upopau. Ora opeita kavirupau. Ora opeita oearovu iava kuuvupau. Aiteara vaiopa ora aakoara tapo avivikepau.” <sup>21</sup> Oa iava ro reito oiso puraroepa, “Ari ita, vo osa kakaevira oisoa toupaa, uva va eva Reo Taisi oisoa uvupaa va tokipaoro.” <sup>22</sup> Uva Jisas rera vo reoaro uvuoro oiso puraroepa, “*Ari oavivu ragapa touvira poteparivoi vao-ia oiso-ia, Auero rutu-ia vii varaaro vori rovouvere vara-ia moni ouoro apotapa irarapa oarai vatesa. Vosa oisi pieri oiso, ra va iava vearoa ouri vuvuiua-ia. Oire ra ragai sirova utuu.*” <sup>23</sup> Osa vo reo uvuoro vao vovouisi vavatareva rutu rera ro reito. Eake iava? Uvare riro monitoa rutu-a.

<sup>24</sup> ♦ Oa iava Jisas rera-ia vurapaoro oiso puraroepa, “*Oiraopavira ita. Voeapa voeao riro kotokoto guru irara vavagisi iraopapeira varaova ora kiu arapa vore Pauto vo Saraaro-ia.*” <sup>25</sup> Ari ita, vavagisipai vao tavaatoa iava vo rito, vosa rirova vai vo kare iava kamel kare iriai voa koatasa auepao. Uva oisi rutu rirovira vavagisi iraopai ropa riro moni guruto vore koatapasa Pauto vo Saraaro-ia.” <sup>26</sup> Oire uva va vao uvuoro oearovu oiso puraaepa, “Vosa oisi eisi, uva iroutoa vai uvuiparoi ra va eva Tootoo Ovoi oureve?” <sup>27</sup> ♦ Oa iava Jisas voeare oiso puraroepa, “*Ari ita, vao oa viapau purapareve oirato, Pauto oa-ia uvuiparoi ra va purareve.*”

<sup>28</sup> Uva va iava Pita oiso puraroepa rerare, “Uvupari? Igei varaaro uruiara kavuiova vii raga sirova utuoro.” <sup>29</sup> Oa iava Jisas oiso voeare puraroepa, “*Oiraopavira visii tavi iraopaavoi oiso, Voea rutu oea Pauto vo Saraarore rugoopaoro orekerovu rutu kavupaaiveira oiso-ia, kepaara varao, ari vatua riakoro, ari araoko irara, ari aite irara, ari kakae vure voea voearo.*” <sup>30</sup> Oeapa riroara rutu vatepare Pauto vo vokio-ia voea varaaro-ia pute pievira. Oire va iava utupavira Opesi Asa Tootoo oupaiverea.”

*Jisas Vo Peva Piepa Tavi Purareva Ora Rera Iava Oiso, Kopiiravere Ra Vorevira Torera*

(Matyu 20:17-19; Mak 10:32-34)

<sup>31</sup> ♦ Oire uva voea katai tau erao (12) oureve disaipel. Oa iava oiso voeare puraroepa, “*Uvuta vao. Vo vokio-ia ipapaviei Jerusalem iare. Oire ra vo reoro rutu oiraope profet irara vo reoroaro oara rigatoiva ragai iava ro Oirato Oviitoaaro.*” <sup>32</sup> Uvare ragai vateivere voeao vavaearo iare osararovu iava voea. Oire ra va iava ragai tovipaive, ora ragai vuri piepaoro ragai-ia ruipaave tapo. <sup>33</sup> Ra ragai ragipaive ragai kopii piepaoro. Ra vo pevapa voki-ia vorevira torera voava kopii tapi tootoopaoro.” <sup>34</sup> ♦ Oa iava voeao disaipel viapau oiso vo reo-ia vao aviavipaepa oreoa ruureva voeare. Uva va-a vao oa iava viapau oiso vearovira taripaapea vo reo vituaro-ia.

*Jisas Iravu Voosito Porete Piereva Riro Oira Areareto*

(Matyu 20:29-34; Mak 10:46-52)

<sup>35</sup> Oire uva Jisas Jeriko urui ruvara-ia karero viropa vo uva iravu voosito oisoa raiva vatuar-ia pauparo. Uva oisoa moni areparo oirara rutu ruvara-ia. <sup>36</sup> Uva voava riro

♦ 18:17: Mt 18:3    ♦ 18:18: Lu 10:25    ♦ 18:20: Eks 20:12-16; Diu 5:16-20; Ro 13:9    ♦ 18:24: Pro 11:28

♦ 18:27: Jop 42:2    ♦ 18:31: Lu 9:51; Sam 22    ♦ 18:34: Mk 9:32; Lu 9:45

irara iava uvureva, ovusa vokapaoro uriopaaepa voare. Oa iava oiso voea akepareva, “Eake purapaivoi?” <sup>37</sup> Uva oiso rera taviiva, “Ari Jisas ro vova Nasaret-ia ira vokapaoro vigei-ia puteparevoi.” <sup>38</sup> ♦ Oa iava rirovira oiso puraroepa, “Jisas! Vi-a Devit aaotoaaro. Ragaivipa siraou!” <sup>39</sup> Oire uva irapa irara rerare kasipupaaepa oiso purapaoro, “Auoro! Ora tape pieu.” Ovusa rirovira rutu keera iraoparoepa oisi raga purapaoro oiso, “Vii-a Devit aaotoaaro! Ragaipa siraou.” <sup>40</sup> Uva Jisas voari toresa urioroepa. Uva voava voea tavireva oiso, “Voea tavita ra rera sipoive ragai iare.” Uva tutuu pieoro rera iare urioroepa. Oa iava Jisas rera akereva, <sup>41</sup> “Eake vaipa ruipapau, ra oai puraa viipa?” Uva oiso puraroepa, “Turaro. Oiso ruipaparai ra vuraa.” <sup>42</sup> ♦ Oa iava Jisas rerare oiso puraroepa, “Vorevira vurari. Uvare vii raga vaaro oirao piea vii vorevira ravotovira porete pie ovoivoi.” <sup>43</sup> ♦ Oire uva oisi-a eisi osa iava vorevira vurareva. Oa iava Jisas sirova utu ovoiroepa. Uva Pautoa-ia vuurapa vaisi pura ovoireva, osa oirara rutu va vao kekeiva. Oa iava voea rutu Pautoa-ia vuurapa vaisi puraiva.

## 19

### *Vo Toupa Sakias Iava Vo Siposipo*

<sup>1</sup> ♦ Jisas Jeriko iare vokapaoro karero viropa. <sup>2</sup> Oire uva vo urui eva kavupasa aueroepa, vo osa iravu oirato voa toupareva rera vaisiaro, Sakias rera ro takis oupa irara reitoaaro. Uva rera-a riro monito. <sup>3</sup> Uva oiso ruipaparoepa ra Jisas-ia tarairo oiso, Iroutoa rutu-a? Ari viapau oiso uvuparoepa ra rera kekereve, uvare riro irara rutu Jisas utopaiva. Uvare ita potekuto-a rera Sakias. <sup>4</sup> ♦ Oa iava ikauvira iparoepa oevaovu-ia riro ova, uvare oiso rugooparoepa ra Jisas kekereve rutu. Ari ita, oiso taraiparoepa, Vo raivao-ia vokapaoro uriorovere Jisas. <sup>5</sup> Oire uva Jisas voavi pouro viropa. Uva voa vo viara-ia vurareva. Oa iava oiso puraroepa rerare, “Sakias. Ikauvira varau evoava. Ari vo vokio-ia vii vo kepaaro-ia toupaa.” <sup>6</sup> Uva oisi-a eisi osa iava ikauvira vararoepa, uvare rera iava sopaua rirovira rutu roruva. Oa iava rera tapo Jisas avaroepa ora rera vo kepaaro iare. <sup>7</sup> Oire uva oirara rutu va vao kekeoro aveavevira reoreopaaepa oiso purapaoro, “Uva apeisi vurito vo kepaaro-ia koataro rera tapo tousa?” <sup>8</sup> ♦ Ari toreroepa rera Sakias oiso purasa, “Reito. Oiso ruipaparai ra ora ragai varaaro rutu roo piea oiso, oavu voeaopa apota irara. Ora varao tapo kare piea oara oisoa ou ragapaa kuuvuvira oearovu ruvara-ia katakataivira. Uva voeapa oiso vara kare piepaavere iravu vaaro rekasiaro-ia oresuravu tovoa rerapa pute pievira.” <sup>9</sup> ♦ Oire uva Jisas rerare oiso puraroepa, “Vo vokio-ia Pauto voeao oea vo kepa-ia toupaiveira oea vorerevoi ora rerapa vova vuriara oaiive iava. Ari ita, uvare vii tapo-a iravu Ebraham aaotoaaro. <sup>10</sup> Ragai-a vao Oirato Oviitoaaro ragoa oirara ousa urioraera voeao oea opesikoaepa, ra va iava voea vorevira voreea Pautoa-re.”

### *Katai Tau Iava Kovopa Irara Voeao Oea Moni Ouaepa*

<sup>11</sup> ♦ Oire uva vo reo-a vao oa uvuivoiva, oavu reo ruu vatereva voeapa. Eake iava? Uvare tutuu pierava Jerusalem iare. Vo osa oiso keapaaepa, Vo voki raga-ia Pauto vo Saraaro roroiovira ora karekepai. <sup>12</sup> ♦ Oa iava oiso puraroepa, “Iravu reito ira oiso ruipaparoepa ra tauai ruture avaro, oisore ra voa rera king pieive. Ra va iava vorevira karero. <sup>13</sup> Uva katai taure kovopa irara keeraroepa rera voeapro. Oa iava voeapa katakataivira erao tau kina (K20) vatereva. Uva oiso voea tavireva, Vao-ia sara kovoro vai puratavere vore tuepaoro uva vorevira voreravere.

<sup>14</sup> “Vo osa rera vo uruiaro iava voea rerare vuri vovoupaaepa. Oa iava voea arova avaroepa. Uva voeao rera iavapa irara oearovu aruiva ora voea raga iava rera sirova utupasa. Oa iava oiso purasa utuaepa, Igei reasipaei ra ro igeipa kingparo turaropaoro.

<sup>15</sup> “Oire rera king pieivoiva, voava vorevira voreroepa vore rera vo uruiaro-ia. Oa iava oiso puraroepa, Oirarare keerata voeao oeapa moniara vateavora. Aue iava keeraparai voeare uvare oiso ruipaparai ra taraira oiso, Aa voviro kareke pieivora katakataivira vara rutu iava moniara.

♦ 18:38: Mt 9:27   ♦ 18:42: Mk 5:34; Lu 17:19   ♦ 18:43: Mt 9:8   ♦ 19:1: Lu 18:35   ♦ 19:4: Ais 9:10

♦ 19:8: Eks 22:1; Nam 5:7   ♦ 19:9: Ro 4:16; Ga 3:7   ♦ 19:11: Ap 1:6   ♦ 19:12: Mt 25:14-30; Mk 13:34

<sup>16</sup> “Oire uva iravu iraroepa oiso purasa, Reito, vii vaaro-ia monia sara kovo puraavora aue rutu erao tau kina (K20). Oa iava va-ia pute piea ouavora aue rutu erao vovoto kina (K200) rutu.

<sup>17</sup> ♦ Uva va iava king oiso rera tavireva, Viit vearto raru kovopato. Viigoa vearto vira gareparavi-ia vurapariveira vara vearto raru tokipaoro. Oire uva va-a eva oa iava vii vatepaavoi oavu reesia. Ra va iava katai tau raru tokipari aue riropa uruiro (10 taun).

<sup>18</sup> “Oire uva erao pieto ita rera iare pouro viropa oiso purasa, Reito, vii vaaro-ia erao tau kina sara kovo puraavorao. Oa iava aue katai vovoto kina (K100) pute piea ouavorao va-ia ita. <sup>19</sup> Osa iava king oiso rera tavireva, Viit tovopaavoi, ra vo vavae tokipari riropa uruiro (5 taun).

<sup>20</sup> “Oire uva iravu ita kovopato rera iare pouro viropa. Oa iava rerare oiso puraroepa, Reito, vii vaaro-a vao erao tau kina vo-ia. Oa ruuava aue-ia varoa va oriruoro. Oa iava vo toupaiveira.

<sup>21</sup> Eake iava? Uvare vii-ia oisoa taraipara, Riro kasivarito raru varao ou ragapaoro oara tovopaivora oearovu. Ora varao aioara oara paupaiveira oearovu raga, oara tapo tatepariveira vii raga. Eisi osa iava viipa oisoa uriripara varao moniara kovo pie arapa.

<sup>22</sup> ♦ “Oa iava rera ro king rerare kovopato oiso puraroepa, Viit vurito kovopato. Viigoa iava gasipaavoi vii raga vo reoaro-ia. Ari ita, ragai-ia oiraopavira oisoa taraipau oiso, Riro kasivarito ragai varao ou ragapaaveira oara tovopaivora oearovu raga. Ora varao tapo tatepaaveira oara paupaiveira oearovu raga. <sup>23</sup> Ari apeisi iava viapau va vao ragai varao moni tovo asariva beng-ia? Oa iava voreraeri voava va ousa aue tapo pute piea vai interes. <sup>24</sup> Oire uva oiso puraroepa voeaore oea tutuu pievira rera ruvara-ia toupaiva. Vao outa eva erao tau kina. Ra eera vateta ira erao vovoto kinava touparevoi.

<sup>25</sup> “Oa iava oiso rerare puraaepa, Reito. Easi rerapa erao vovoto kina pura piroi.

<sup>26</sup> ♦ “Uva oiso puraroepa, Oiraopavira raru oiso visii tavipaavoi, Oirara raru oea oisi varai-pitupaivoi, uva voeapa ita oarai vatorevere Pauto pute pievira. Ari vosa viapau oisi oai-ia pitupareve irai, oire ra gareavi raga-ia pitupareve, eva-a oa verarevere rera ruvara iava Pauto.

<sup>27</sup> Ari evoea oea oiso purapaaveira ragaire, Reasipaiei rerapa oiso ra igeipa kingparo turaropaoro. Oire uva voea evoea ragava keripa irara. Uva voeava uriota vore ragai osireiaro-ia voea uposa.”

### *Jisas Turarovira Jerusalem-ia Karero Viropa*

(Matyu 21:1-11; Mak 11:1-11; Jon 12:12-19)

<sup>28</sup> ♦ Oire uva Jisas vo reo vao purareva. Oa iava vokapaoro iraroepa vo raivao gaepaoro oa-ia oisoa Jerusalem iare ipapaave. <sup>29</sup> Oa iava Betfasi urui ruvara-ia pouro viropa vo uruirei ora Betani-ia vo pukuio-ia oa oisoa vaisipave oiso, Oliv Kovo Pukui. Oire uva voava aitereivu disaipeltoarei ira piereva vo uruiri iare oa oiso oisiriva pute pievira vo pukuio-ia toupaive. <sup>30</sup> Uva oiso vaiterei reesiresireva, “Vo uruiri iare irasi, ra vo urui-ia kareu virosi. Oire ra voa gareva kekesivere donki, osa variaua riara-ia toupaeve, iria-ia viapau oisoa irai pauparo voari tuariri uvare koruova. Oire ra voava oira karuoro oirava voresivere.

<sup>31</sup> Vosa irai vei akepareve oiso, Eakere eira donki karupasi? Oire ra oiso ragavira irai tavisi, Iria-ia Turaro vo kovoaroei.”

<sup>32</sup> ♦ Oire uva Jisas vaiterei arureva. Oa iava avasiepa. Uva oisi vara raru kekesiva oiso osa vaiterei tavireva. <sup>33</sup> Uva oira iava iroiro karupasiva o-ia donki. Oa iava voe-a oea oiraaro-a oea oiso vaiterei akeiva, “Eakere eira koruova donki karupasivoi?” <sup>34</sup> Uva va-a vao oa iava oiso voea tavisi, “Iria-ia Turaro vaaroei kovo.”

<sup>35</sup> Uva oirava koruova donki voresiepa rera iare Jisas. Uva vaiterei varoara tovosiva oira ivara-ia. Uva vara ivara-ia Jisas pau piesiva. <sup>36</sup> ♦ Uva oira ivara-ia paupaoro avaroepa, ovusa voea raru oirara varoara-ia uruiva parakavira raivao vo raiva oritopasa. <sup>37</sup> Oire uva voava tutuu pieoro avaroepa vo raivao-ia vova varapaoro Oliv Kovo Pukui iava. Oa iava riro irara rera voeapro disaipel irara rovoaepa rorupaoro. Uvare varao ruture rugooaepa ravotoara oara oisoa kekepaive, vorara vara purapareve. Oa iava rirovira raru raga pieiva Pauto-ia vuurapa vaisi puraoro. <sup>38</sup> ♦ Oiso purapaoro kaku piepaiva,

♦ 19:17: Lu 16:10   ♦ 19:22: 2 Sml 1:16   ♦ 19:26: Lu 8:18   ♦ 19:28: Mk 10:32; Lu 21:37   ♦ 19:32: Lu 22:13   ♦ 19:36: 2 Kin 9:13   ♦ 19:38: Sam 118:26

“Reito king vaisiaro rei piepe. Ira urioroi Turaro Pauto vaisiaro-ia. Uvare Pautoa iava sopaua vearoigiveipa oirara, uvare kasipua opesiei. Oire ra Pauto vaisiaro rei piepe ro oiso vuvuua-ia viara-ia rutu.”

<sup>39</sup> Oire uva oearovu ratarataa vovou irara Farisi iava voava vo uvuru vao sovara-ia toupaiva, oea Jisas-re oiso purapaaepa, “Tisato! Evoea disaipel tapetaperi vii voeaaro. Opeita eisi piepaive.” <sup>40</sup> ♦ Oa iava voeare oiso puraroepa, “Ari ita, visii tavipaavoi oiso, Vosa voea varaaro gisipoara tuupaive, oire ra varao avekeara raga kaku piepaive vuurapa vaisi puraoro.”

#### *Jisas Jerusalem-iapa Gaureva*

<sup>41</sup> ♦ Oire uva tutuu piererva Jisas voare vo Jerusalem urui-ia. Oa iava vo urui kekeoro siraovira gaureva <sup>42</sup> oiso puraoro, “Vosa vo vokio raga-ia vao-ia vo pitupituo-ia vearovira taraitai oa oiso toupai, Visiipa gavaure vovou vatepai, ra va iava vearoita. Ari ita, vo vokio-ia opitupitua vao vataupai. Ra viapau va keketa.” <sup>43</sup> ♦ Uvuta! Vo utupaua uva ovuutavu karekeperea oa-ia visii voearo keripa irara uutuva purasa urioaverea, o ora upopava visii ururao visii kovokovooro voraro rutu. <sup>44</sup> ♦ Oire uva visii kepikepiivereea visii vuri pieoro rutu. Vii urui ora ovii irara oara voeao oea epao vii urui sovara-ia oea toupai. Uva viapau oiso vii iava iriai aveke vai eakaiverea, oiso ra iriai toupaeve vo *iriai ivaria ita. Eake iava? Uvare viapau vo vuutao eveitavoi oa-ia Pauto urioroi visii tauva ragasa visii oriruoro.*”

#### *Jisas Voea Sigureva Osa Ora Tuutuupaaepa Ora Voripaoro Tugoropa Kepa Sovara-ia (Matyu 21:12-17; Mak 11:15-19; Jon 2:13-22)*

<sup>45</sup> Uva Rovopa Kepa-ia Tugoropa Kepa Tempel koataroepa. Oa iava rovoroepa voava voeasigupaaoro, ovusa sara kovoro purapaiva voa Tempel sovara-ia. <sup>46</sup> ♦ Uva oiso voeare puraroepa, “Tugoropa Vuku oiso purapai,  
‘Ragai vo kepaaro eakata eva oa oiso toupai Variripa Kepa ragai vaaro.’

Oa oiso rutu piepatavoi,  
‘Vataupa tapi uva visii vao kavirupa irara vataupaaveira sara kovoro oavisii purapaoro.’”

<sup>47</sup> ♦ Oire uva vokiara rutu-ia voeа tarai piepaoro voa toureva vo kepa sovara-ia vao Tempel. Oa iava voeao reipa irara pris ora voeao tarai irara aue-ia Reo Taisi, ora voeao tapo oirara rutu reipa irara oea rerare raiva taraapaaepa, oiso ra oai iava rera upoive.

<sup>48</sup> Vo osa oirara rutu goru iraopaaepa rera vo reoaro uvupaoro. Oire uva oisi-a eisi osa iava voeao reipa irara viapau oiso uvuipaaepa oiso ra oraivai kekeive rera uposa.

## 20

#### *Jisas Akeiva Oiso, Irouto Vii Vatereva Vo Reesi? (Matyu 21:23-27; Mak 11:27-33)*

<sup>1</sup> ♦ Ovokivu-ia Jisas voea siposipopareva Rovopa Kepa Tempel Tugoropa Kepa sovara-ia Vearo Siposipo-ia. Uva voea reipa irara korouou purapa irara pris ora voeao Reo Taisi-ia tarai irara, ora voeao tuvetuvepa irara Jiu iava oea urioaepa rera iare Jisas. <sup>2</sup> ♦ Oa iava rerare oiso puraaepa, “Igei taviri oiso, Eake reesi-a vao oa iava varao kovoara purapariveira? Uva irou-a vao oa vii vateva vo reesi eva?” <sup>3</sup> Oa iava voea aatooro oiso puraroepa, “Ari ita, uva ragai tapo ita visii akepaavoi oreovu iava, ra ragai tavita.” <sup>4</sup> Irouto-a ro ira Jon vatereva vo kovo oa iavirava oirara baptaisreva, Pauto eke oirara raga?” <sup>5</sup> Oire uva voea raga ora reopaaepa oiso purapaoro, “Vosa oiso puravio, Pauto ruvara iava va, ra ita oiso puraro, Uva apeisi viapau va oirao piepata?” <sup>6</sup> ♦ Ari vosa oiso puravio, Ari oiratoa raga vaaro, oire ra oirara rutu va iava vigei vurokoive aue-ia aveke voeao oea goruvira rutu Jon oirao piepaiveira oiso purapaoro, Profetato Jon.” <sup>7</sup> Oire uva oisi-a oiso osa iava rera vo reoaro aatooro oiso puraaepa, “Viapau oiso igei eva-ia Jon vo baptaisaro

♦ 19:40: Hab 2:11 ♦ 19:41: Lu 13:34-35 ♦ 19:43: Ais 29:3; Jer 6:6 ♦ 19:44: Mt 24:2; Mk 13:2 ♦ 19:46: Ais 56:7; Jer 7:11 ♦ 19:47: Mt 26:55; Jo 7:19 ♦ 20:1: Mt 26:55; Lu 8:1 ♦ 20:2: Jo 2:18; Ap 4:7 ♦ 20:6: Mt 14:5; Lu 7:29

taraipaiei oiso, Ovu iava karekeepa.” <sup>8</sup> Oa iava Jisas voeare oiso puraroepa, “*Ragai tapo ita viapau uvuiparai ra visii tavia vo reesi iava oa iava vo kovo purapavora.*”

*Vuri Irara Iava Reo Ruu Oea Oisoa Wain Kovo Tokipaise*  
(Matyu 21:33-46; Mak 12:1-12)

<sup>9</sup> ♦ Uva oisi-a oiso osa puraroiva, voeapa reo ruu vaterева oiso puraoro, “*Iravu oirato ira wain kovo paureva. Oa iava vo kovo-ia kovopa irara tovoreva, oiso ra vo kovo-ia sara kovo puraive. Vo osa rera ouruvu iare avaroepa tauai rutu voa toupasa.*” <sup>10</sup> Oire uva aio oupa vuutaiia vo kovo iava iravu kovopato rera reraaro arureva voea iare voeao oea oisoa vo kovo-ia kovopaise vao wain kovo. Uvare oiso ruipaparoepa ra rera vateive oarai aioara vai vo kovo iava. Vo ovusa voeao oea oisoa vo kovo-ia kovopaise rera ro upoporo viapavira rera siguiva vorevira. <sup>11</sup> Oa iava iravu ita kovopato voea iare arureva reito. Oire uva rera upooro rera vuri pieiva. Oa iava oisi raga akukuvira rera sigu ragaiva ita. <sup>12</sup> Oa iava vo peva piepato arureva voea iare. Uva rera upooro rera kosi pieiva rera-ia vikioro rataure. <sup>13</sup> Osa iava rera ro ira vo kovoaro-a oiso vovouparoepa, Eake vai puraa? Oire ra ro ragai oviitoaro rutu arua ira kavikopaaveira rutu. Ira vai-ia taru gisipoaro uvuivere. <sup>14</sup> Oa iava voeao oea oisoa vo kovo-ia kovopaise rera tueiva. Uva voea raga ora reopaaepa oiso, Rera-a ro ira utupaua auero rutu varao aiteto varaaro oureverea. Avoeo! Rera upope. Ra va iava vigei raga vo kovo-ia pitupere. <sup>15</sup> Osa iava vo kovo iava rera kosi pieoro rera-ia vikiaepla rataure vo wain kovo vatuaroi-ia rera kopii pieoro. Oire uva ro ira vo kovoaro-a wain kovo, eake vai purareverea voea-ia? <sup>16</sup> ♦ Ira uriorovere taru voea kopii piesa voeao oea oisoa vo kovo-ia kovopaise vao wain kovo. Oire ra va iava oearoi raga vatereve vo kovo.” Uva vo siposipo uvuiva oa purareva Jisas. Oa iava oiso puraaepa, “Ae! Teapi eisi vai piereverea.”

<sup>17</sup> ♦ Oa iava Jisas voeava vurapaoro oiso puraroepa, “*Eake-a vo reo vituaro vao oa toupai Tugoropa Vuku-ia?*”

‘*O-ia aveke kovopa irara iria veraiva, iria oiso karekeopa o aveke rovopava rutu kepa iava kukuuvuva.*’

<sup>18</sup> ♦ *Oirara rutu oisoa o-ia aveke ivara-ia kovepaave ora tarita ovoipaoro. Ari vosa oira o aveke irai ivara-ia koveoverea, oire ra irai tarita ovoieve garepa visivi oiso rutu osa poupou.*”

<sup>19</sup> Oire uva voeao voeao Reo Taisi-ia tarai irara ora reipa irara pris oiso taraipla, Easi Jisas vigei togaparevoi vao-ia reo ruu. Uva va-a eva oa iava oiso vovoupaaepa ra voa raga rera-ia pitu ovoiive. Uva oirara ragapa uriripaaepa rera-ia pitu arapa.

*Jisas Akeiva Sisa-pa Takis Vatesa*  
(Matyu 22:15-22; Mak 12:13-17)

<sup>20</sup> Oire uva rera siituepaiva. Oa iava oeavu tagorovira aruiva rera iare. Uva kuuvuvira oisoa torevoko pitupitu pura ragapaise rera ruvara-ia, vo osa rera siituepaiva. Uvare oiso rugoopaaepa ra ora rera raga vo reoaro-ia rera iava gasiive auepa reito gavman. Ra gavman vavaearo-ia rera tovoive. <sup>21</sup> ♦ Oisi-a eisi osa rerare oiso puraaepa, “*Tisato, vii vo reoaro-a torevokoa oa vatepariveira oirara rutupa. Uvare viapau oiso rei vaisi irarapa uriripauveira. Viapau. Ari vaeavira rutu oirara rutu tarai piepariveira Pauto vo pitupituaroi-ia. Oa uvupaiseira oiso purapasa, Oiraopavira rutu!*” <sup>22</sup> Uva apeisi vai vovoupaei vao-ia vigei vaaro Reo Taisi? E torevokopai ra Sisa-pa takispavie?” <sup>23</sup> Vo osa Jisas vo kuuvu-ia tarairoepa va eveioro. Oa iava oiso puraroepa voea tavioro, <sup>24</sup> “*Oire oa-ia monia vai ragai kareke pieta. Vao oa-ia irou puaaro toupai? Ora irou vaisiaro toupai vo va varaaro-ia?*” Uva oiso puraaepa, “*Ari King Sisa!*” <sup>25</sup> ♦ Oa iava Jisas oiso puraroepa, “*Oire rera vaaro Sisa oa rera vateta Sisa. Ari vao Pauto vaaro, oire ra Pauto vateta va.*” <sup>26</sup> Oire uva va-a eva oa iava viapau oiso rera rauiva vao-ia rera vo reoaro vo oirara osireiaro-ia. Oa iava rirovira rutu rugorugoo iraopaaepa vo reo-ia vao oa pukoreva voeare. Osa iava ora tape pieaepa rutu.

♦ 20:9: Ais 5:1-7; Mt 25:14   ♦ 20:16: Lu 19:27; Ro 3:4, 6, 31   ♦ 20:17: Sam 118:22-23   ♦ 20:18: Ais 8:14-15  
♦ 20:21: Jo 3:2   ♦ 20:25: Ro 13:7; Lu 23:2

*Jisas Akeiva Rore Ira Kopiilo Ra Ita Vorevira Torero  
(Matyu 22:23-33; Mak 12:18-27)*

<sup>27</sup> ♦ Oire uva Sadyusi-pa irara iava oeavu urioaepa rera iare Jisas [oea oisoa oiso purapaave, “Voeao kopii irara, viapau uvuipaai ra vorevira torepaave.”] <sup>28</sup> ♦ Oa iava rerare oiso puraaepa, “Tisa, Moses oreovu rigatoreva vigeipa oiso, Vosa iravu kakae pura asavira kopiiro riakovapa, oire ra araokoto oira ita oureve. Oire ra rerapa ro kopiito oira-ia kakaeto purareve araokoto. Eisi osa toupai Reo Taisi. <sup>29</sup> Uva oeavu erao vatara rutu (7) oaraovu oea oisoa toupaive. Uva avaioto vo arao iava riakova oureve. Oire uva kakae kavau asavira kopiiroepa oira arova. <sup>30</sup> Uva kikooto ita oira oureve o-ia riakova. <sup>31</sup> Oire uva vo pevapato ita oisi raga oira oureve ita. Uva oisi raga-a eisi osa vo arao rutu voeao oira oisoa oupaive. Oa iava kakae kavau asavira raga oira arova vo arao rutu oisoa kopiipaave. <sup>32</sup> Uva vo arao isivaaro iava utupavira kopiiopa. <sup>33</sup> Oire uva vo vokio-ia oa-ia kopii irara oiso vorevira toreaverea, uva iroutoapa oira perea o-ia? Ari ita, vo arao voeao erao vatara (7) oea oisoa oira oupaive. Oa iava voea rutu vatavaaro-a.”

<sup>34</sup> Oa iava Jisas voeare oiso puraroepa, “Voea-ia oirara ora riakora vo vokio iava, voea-a oea ora oupaaveira. <sup>35</sup> Ari voeao oirara Pauto oeare oiso puraroverea, Uvuipatai ra vorevira tootoota toreoro, voeao oea viapau oiso ora oupaaverea. <sup>36</sup> ♦ Oea viapau uvuipaai ra kopiiave ita. Oea oiso raga ita toupaiverea oiso osa purapurapa irara ensel, vo rara Pauto voea vorevira tore pievere kopii tapi iava. Oire ra oiso toupaive rera ovii iraraaro Pauto. <sup>37</sup> ♦ Ari ita, Moses tapo roroio pievira rutu vigei tavireva oiso, Kopii irara vorevira torepaaverea kopii tapi iava, vo siposipo oa-ia gare kairi evaoa rovaepa. Oa-ia ita oiso puraroepa Pauto, Ragai-a Pautoaaro Ebrahim, ora Pautoaaro Aisak, ora Pautoaaro Jekop. Voeao oea urauraaro tootoovira toupaiverea. <sup>38</sup> ♦ Ari ita, viapau oiso kopii irara reraaro-a Pauto. Viapau. Ari voeao reraaro oea tootoopaa rutu vo rera osireiaro-ia.”

<sup>39</sup> Oire uva oisi-a eisi osa puraroiva, oearovu riro tarai irara iava Reo Taisi-ia oiso puraaepa, “Tisato. Vearovira rutu eisi osa reouei.” <sup>40</sup> Oire uva va-a vao oa iava uriripaaepa vorevira Jisas ake arapa.

*Jisas Farisi Akereva Auere Krais-pa Vaisi Vituaro Iava  
(Matyu 22:41-46; Mak 12:35-37)*

<sup>41</sup> Oire uva oiso voea akereva, “Apeisi iava oiso purapataveira, Asi Krais Devit aaotoaaro ro vo rasio raga iava? <sup>42</sup> ♦ Uvare vao-ia Sam Vuku Devit raga voari tuariri oiso puraroepa Krais iava, ‘Turaro Pauto reore ragai reraaro Turaro oiso puraroepa, Vova pauu ragai vaaro-ia oirapapa varata <sup>43</sup> yo tugurasa uva voeao viiva keripa irara tovoaverea taru vii kokotoaro reroaaro.’”

<sup>44</sup> Oire uva rera raga Devit turarovira Krais vaisireva. Uva apeisi ragavira ita oiso purapataveira, Krais Devit aaotoaaro, ira Devit sirova kavauroepa?”

*Jisas Voea Vosireva Voeaopa Oea Reo Taisi Iava Siposipopaaiveira  
(Matyu 23:1-36; Mak 12:38-40; Luk 11:37-54)*

<sup>45</sup> Oirara rutu touvira toupaiva Jisas vo reoaro uvupaoro. Oa iava disaipelre oiso puraroepa, <sup>46</sup> ♦ “Vearovira rutu Reo Taisi-ia tarai irarava siitueta. Evoea riro oiso ruipa irara, ra riro kaekaepa kuvuparo-ia kuvupaave oritopaoro. Ra varava vokapaive. Evoea oea rirovira oiso ruipapaaveira ra voeava oirara oiso purapaave avivikepaoro, Vearo voki, voraro uupa tapiro. Ora oiso tapo ruipapaaveira ra rovopa tavuki-ia paupaave vo Reo Taisi Uvupa Keparo sovara-ia. Ora riro varaopa ruipa irara rovopara paupara vo vurei aiopa vokiro-ia. <sup>47</sup> Oea vo riakoro vo keparoaro-ia koatapaaveira vairo varaaro ou ragapasa vairo keakeapaoro raroe riakora. Oire ra vo pitupituro vataupaoro riro kaekaepa variriro purapaive. Uva oisi-a eisi osa iava voea vaaro voria riroa rutu ouiverea siitoka vavata.”

♦ 20:27: Ap 23:6, 8    ♦ 20:28: Diu 25:5    ♦ 20:36: Ro 8:16-17    ♦ 20:37: Eks 3:6    ♦ 20:38: Ro 6:10-11  
♦ 20:42: Sam 110:1; Ap 2:34    ♦ 20:46: Lu 11:43

## 21

*Apotava Riakova Iria Tauoa Vateeva Pautoa-pa  
(Mak 12:41-44)*

<sup>1</sup> ♦ Oire uva Jisas voeava vurapareva vo Rovopa Kepa Tugoropa Kepa sovara-ia toupaoro, ovusa voa sirao vate vikipaiva bokis-ia moni tovopaoro o Pauto oiraaro. <sup>2</sup> ♦ Oa iava iriavu apotava raroева tuereva Jisas, ovusa gare isirei-ia vikiopa moni isirei bokis iare. <sup>3</sup> Uva va-a vao oa iava Jisas oiso puraroepa, “Oiraopavira visiire oiso puraparai, O-ia apotapava raroева iria gare isireivi vikievoi ora oira iava sopaua rutu tapo, oa-ia oearovu rutu-ia puteevoi. <sup>4</sup> Osa voeao oea riroara moniara toupaivoi oara iava oaravu-ia sirao vate viki ragapaivoi Pautoa-pa. Ovusa o apota iraopaoi rutu. Oa iava ora oira vaaro rutu viki ovoievoi moni-ia. Uva viapau oai ora oirapa aio voripasa.”

*Vo Jisas Oiso Puraroepa, Tugoropa Kepa Opesi Ovoiperea  
(Matyu 24:1-2; Mak 13:1-2)*

<sup>5</sup> ♦ Uva oeavu oirara ora reopaaepa Rovopa Kepa-ia Tempel oiso, uvare vo kepa oritoiva vearovara-ia avekeara ora varao sirao vatero oara oisoa vatepaive Pautoa-pa. Oa iava Jisas oiso puraroepa, <sup>6</sup> ♦ “Vara-a oara kekepatavoi. Ari vo vuutao-ia vao oa urioperea, ra viapau iriai aveke vai eakave iriai ivara-ia aveke vai osa toupaive. Oara rutu evara kururu piroverea koveoro. Vo osa vara rutu-ia vikiavere voraro voeao keripa irara.”

*Jisas Riroa Iava Siraoa Ora Tavaka Disaipel Tavireva Oarea Karekeperea  
(Matyu 24:3-14; Mak 13:3-13)*

<sup>7</sup> Uva rera akeiva oiso puraoro, “Tisa, aa vo vuutao-a oa-ia va vao vuria karekeperea? Uva eake iava va reesiovere, ra va iava oiso va eveiio, O, ari va-a vao oa karekesa tutuuvoi?” <sup>8</sup> ♦ Oa iava Jisas oiso puraroepa voeare, “Voeaopa ora vatatopo iraopata vearovira. Teapi visii keaive. Riro irara rutu uriopaaverea ragai vaisiaro-ia ora vaisipaoro, oiso purapaaverea, Ragai raga-a vao-ia Krais. Uva oiso tapo purapaaverea, Vo vuutao-a vao-ia oa tutuu pievoi. Oire ra viapau oiso voea sirova utupata. <sup>9</sup> Ari ita, utupaua uva riroara iava tatuaraupoara uvutaverea taru. Oire ra viapau oiso rikerikepata uriripaoro. Oara-a evara kareke rovoperea, ovusa Ovoiopa Voki kareke asavira touve.”

<sup>10</sup> ♦ Uva oiso voeа tavireva, “Osaravu oa osaravu tapo ora upoaverea. Ovusa iravu king voeаaro iravu king voeаaro tapo ora upoaverea. <sup>11</sup> Uva riroara aue ravurikeara karekeperea vo rasitoa-ia, ovusa uvarovu rirovira ogoepaave. Ora riroara upiara karekeperea, ovusa vuvuiua-ia riroara reesiara keketaverea ora osasararovu rutu, varao oara visii uriri pieverea ora karekepaoro.

<sup>12</sup> ♦ “Oire uva vara-a varao oara ora kareke asavira toupaiverea, ovusa visii ragai voeаaro visiigoa oiso raupaive visii vuri piepasa. Ora tapo visii iava gasipaiverea Reo Taisi Uvupa Keparo sovara-ia visii rovirieipasa kortua-ia. Oa iava visii tovopaiverea tuukepa keparo-ia. Aue iava uvare oiso vovoopaaverea ra ragai vaisiaro akaipa piepaise eisi piepaoro. Ora king irara puaaro iare visii sipopaiverea ora gavman irara oisore ra ragai iava sipoipopata. <sup>13</sup> Oire uva va-a vao visii vo raivaaro vao iava Vearo Siposipo tavitavipaoro. <sup>14</sup> ♦ Uva oisi-a eisi osa iava uvui iraopatai ra rugorugooara oavisii rukupata. Auepa teapi oraivaroi vatatopo rovopata ravaavira, oa-ia voeа aatotaverea reoreoara oavisii-ia. <sup>15</sup> Ari ita, ragai raga visii gisipoaroria reoparaverea visiipa vearoa taraia vatepaoro. Oire ra voeao oea visiiva keripaave, viapau oiso uvuipaave ra visiiva ora kaureopaave vo reo-ia vakupaoro vao oa vatepaa visiipa.

<sup>16</sup> “Ora voeao tapo aite irara oavisii, ora aako riakoro oavisii tapo, ora araoko irara, ora taataa riakoro oea tapo visii tovopaiverea vo visiiva keripa irara vavaearo-ia. Oire ra visii iava oearoi upopaiverea. <sup>17</sup> ♦ Ora oirara rutu tapo oea visiire vuri vovou iraopaverea. Eake iava? Uvare ragai vaisiaro toupaverea visii-ia. <sup>18</sup> Ari ita, ra viapau oiso visii kukuearo iava

♦ 21:1: Mk 12:41-44 ♦ 21:2: Mk 12:42 ♦ 21:5: Mk 13:1 ♦ 21:6: Lu 19:44 ♦ 21:8: Lu 17:23 ♦ 21:10: Ais 19:2 ♦ 21:12: Jo 16:2 ♦ 21:14: Lu 12:11-12 ♦ 21:17: Mt 10:22

ouai orua vai opesiko ragape, vo rara virivarivira toupataverea Pauto vavaearo-ia. <sup>19</sup> ♦ Goruvira rutu toupataverea. Ra va iava visii vaaro Oiraopa Tootoro outaverea vorevira.

*Jisas Jerusalem-re Oiso Puraroepa Ra Opesi Ovoiperea*  
(Matyu 24:15-21; Mak 13:14-19)

<sup>20</sup> ♦ “Ari ita, vo utupaua uva viurupa irara keketaverea, ovusa Jerusalem-ia kovokovoiverea. Oire ra va iava vo vuuta eveita oiso, Uruia vuri piepa vuuta vao-ia oa tutuu pievoi. <sup>21</sup> Uva vo voki-a vao oa-ia Judia-ia tou irara uriri iraopaaverea, ra toriiverea pukuiara iare. Ovusa voeao oea Jerusalem urui sovara-ia toupaiveira oea uvui iraopaa ra va kavuiverea uvai ragare avaoro. Ovusa voeao oea vo urui vatuarto-ia toupaiveira viapau oiso uvuipaai ra karea viro vo urui sovara iare. <sup>22</sup> ♦ Uvare vo voki-a eva oa-ia Pauto vuriara vorevira kare piererevira. Oire ra oisi iava vo reo oa epao Tugoropa Vuku-ia oiraope rutu. <sup>23</sup> Uva siraovira rutu-a vairopa taruko riakovi, ora vairopa tapo airoa sikeo kakaero roro piepaiverea vo vuuta-ia eva. Ari ita, riroa rutu siraoa oa vo rasio-ia karekeperea. Uva va-a eva Pauto vo kasipuaro oa voeao ia voeao oirara karekeperea. <sup>24</sup> ♦ Uva aue-ia toorioara voeao toepaiverea. Ra va iava keripa irara voeao tuukeive. Oire voava voeao ouoro voeava avaave osararovu sovara iare. Ra voa toupaive, ovusa osararovu raga iava Jerusalem-ia tasive vo urui upooro. Oire ra oisi raga toupaive vo vuutao rutu-ia rekasisa, oa-ia oearovu vova ratau tou irara iava oea osararovu iava opesiaverea.

*Oirato Oviitoaaro Ira Voreroverea*  
(Matyu 24:29-31; Mak 13:24-27)

<sup>25</sup> ♦ “Uva oaravu rutu reesiara karekeperea taru aue-ia ravireo ora kekira ora aaviikoara. Ora vo rasitoa-ia uva oirara rutu vovouaro vuriaverea rutu uririoro auepa toruva gurukoaro uvuoro, ovusa pokoo viro avakava-ia. <sup>26</sup> Oirara rutu varao iava rirovira rugorugoopaaverea oara vo rasio-ia karekeperea. Oire ra va iava voeare vovouisiro rirovira uriri iraopape rutu. Ra avavaraopaoro osireiara iava kovepaaverea. Eake iava? Uvare aaviikoara ora tavariopaoro vuvuiua-ia rikerikepaperea. <sup>27</sup> ♦ Vosa va vao karekeperea, oire uva ragai Oirato Oviitoaaro tueiverea oirara rutu, ovusa iriavu rukuta sovara-ia uriora riro rutuva gorua ora riroa ragai vaaro keraria. <sup>28</sup> ♦ Oire uva vara-a evara oara rovopaperea karekepaoro. Uva vo vuuta-a eva oa-ia toretaverea ora visii iava torevokovira kukueara kae pieoro taraasa. Uvare vo vuuta-a eva Pauto vaaro visii vorevira ousa, oa pou virosa tutuu piepai.”

*Fik Ova Oa Vo Pitupituardo-a Vuutara Rovirieipasa*  
(Matyu 24:32-35; Mak 13:28-31)

<sup>29</sup> Oire uva va-a vao oa iava oavu reo ruu vaterева Jisas voeapa. Oa-ia oiso puraroepa, “Fik ova kekepataveira ora oevarovu tapo. <sup>30</sup> Oire vosa vo evao keketa ovusa aruapaive airepa guruvaro purapaoro, oire ra va iava taraita oiso, Raipipa vuuta tutuu piepai oa-ia ravireo rororovere. <sup>31</sup> ♦ Eisi raga ita-a oiso osa vara keketaverea varao ovusa karekepape. Oire ra vara iava vearovira taraita oiso, Pauto vo vuutao rutu tutuu pievoi. Vao oa-ia ora rera voearo vorevira ouparevoi rara ora rerapa voeao tokipasa.

<sup>32</sup> “Oiraopavira rutu oiso osa visii tavipaavoi, Oirara rutu voeao vo vuutao iava oea kopii asavira toupaiverea, ovusa vara evara karekeperea. <sup>33</sup> ♦ Vuvuiua ora rasito oara rutu opesiperea, vo osa ragai vo reoaro viapau rutu oiso opesipe.

*Disaipel Irara Vearovira Rutu Uutupaave Ora Vatatopopaoro*

<sup>34</sup> ♦ “Ari ita, vearovira rutu uutupata. Teapi aio ragapata vo vokiara rutu-ia spak ragapaoro. Ora viapau oiso ra varao ragare rugorugoopata tapo varaura vo ruiparoaro. Uvare vo pitupituro-a evara oara uvuipai ra visii vuri piepaive. Ovusa vao Turaro vo vokiaro ravotovira raga visii iare pou piro. Oiso rutu osa kuverava atari kare-ia poupa viroveira voeao kuverapaoro sita pievira. <sup>35</sup> Oire uva vo voki-a vao oa voeao oirara rutu kuveraverea vo oea rasitoa rutu-ia toupaiveira

---

♦ 21:19: Re 2:7   ♦ 21:20: Lu 19:43   ♦ 21:22: Ais 63:4; Dan 9:24-27   ♦ 21:24: Dan 8:13, 9:27, 12:7; Re 11:2  
♦ 21:25: 2 Pi 3:10, 12   ♦ 21:27: Re 1:7, 14:14   ♦ 21:28: Lu 18:7   ♦ 21:31: Mt 3:2   ♦ 21:33: Lu 16:17  
♦ 21:34: Mk 4:19; Lu 12:45; 1 Te 5:6-7

voea-ia vakoravira pou virooro. <sup>36</sup> ✩ Vuutara rutu-ia vokiara rutu-ia uutupata toupaoro Pautoa iare variripaoro, ra visii vatepareve gorua. Oire ra va iava vara rutupa varao oara virivaripata oara visii-ia karekepaperea. Ora vo osa tapo vo utupavira uva ragai ruvara-ia toretaverea vo ragai osireiaro-ia.”

<sup>37</sup> ✩ Vokiara rutu-ia Jisas oisoa oirara rutu siposipopareve voea tarai piepaoro vo Tempel-ia. Oire uva vokiaro pukuia-ia oisoa toupasa vorevira kareparo vao oa vaisipaiveira oiso, Oliv Kovo Pukui. <sup>38</sup> Uva oirara rutu oisoa vokipaua rutu torepaoro rera iare uriopaave rera vo reoaro uvupasa Tugoropa Kepa-ia, vo osa voea siposipopareve.

## 22

### *Judas Reo Ovoi Purareva Jisas Vatesa Reipa Irarapa (Matyu 26:1-5, 14-16; Mak 14:1-2, 10-11; Jon 11:45-53)*

<sup>1</sup> ✩ Oire uva vo voki-a vao tutuu pieva oa-ia Jiu-pa irara bret-ia aioive vao oa-ia viapau yisa vai. Vo vokiore oisoa rugorugoopaave oa-ia Pauto Isip iava Isrel-pa irara oureva voea oriruoro. Ovokia-a vao oa oiso vaisipaive oiso Tagausapa Pasova Ovapa Vurei. <sup>2</sup> ✩ Uva voea reipa irara voeao iava korouou purapa irara pris, ora voeao riro tarai irara Reo Taisi-ia oea rutu rirovira uriripaapea oirara asavira. Oa iava oiso puraaeapa, “Apeisi vai ragavira rera upopai rara ro-ia Jisas?”

<sup>3</sup> ✩ Oire uva va-a vao oa iava Seten Judas sopaaro-ia ora kiuroepa. Ro ira oisoa vaisipaive oiso, Iskariot. Voea iava katai tau erao (12) disaipel rera. <sup>4</sup> Oire uva voea tapo reipa irara ora reoroepa pris ora reipa irara voeao oea Rovopa Kepa-ia Tempel oisoa uutupaaave. Oea rutu ruvara-ia raiva taraaroepa Jisas kosi piesa voea vavaearo iare. <sup>5</sup> ✩ Osa iava rirovira rutu rorupaiva. Oire uva oavu reoa goruiva rerapa moni vatesa. <sup>6</sup> Osa iava Judas voea vo reoaro aatoreva oiso puraoro, “Vearopai.” Uva va-a vao oa iava ora rerapa raiva taraaroepa rera kosi piesa Jisas voea vavaearo iare. Oa iava oiso aueparoepa ra arakasi vuuta vai kekereve vao oa-ia viapau oirara vai Jisas tapo toupaive.

### *Disaipeltoarei Tagausapa Vurei Vatatoposiva (Matyu 26:17-25; Mak 14:12-21; Jon 13:21-30)*

<sup>7</sup> ✩ Vao Tugoropa Voki Yis Asa Bret vo vokiaro oa karekeepa. Oire uva vo vokia-a vao oa-ia oisoa sipsip vai kopii pieive koruova vai ae iare Tagausapa Vurei Pasova. <sup>8</sup> ✩ Osa iava Jisas Pita vaio arureva ora Jon oiso puraoro, “Irapasiei ragaipa Pasova Vurei vatatoposa ravaavira ra va aiope.” <sup>9</sup> Oa iava oiso rera akesiva, “Ovu-ia vo aio ravaaveare?” <sup>10</sup> Uva oiso vaiterei tavireva, “Uvusi. Jerusalem-ia kare uvirosvire. Oire iravu veiva aivarorevere raivaaro. Ira uuko ovi kaeparevere rirova-ia pitokava. Ra rera sirova utusi vo kepa-ia koatasa oa-ia koatasa kareparovere.” <sup>11</sup> Oire uva rera-a ro ira vo kepaaro-a tavi rovosivere rerare oiso puraoro, Tisa oiso puraroi, Ovu-ia ragai vo tugiaro epao tavete tugi oa-ia ragai voeao tapo disaipel Pasova Vurei aiopaavere? <sup>12</sup> Oa iava vei tavirevere oiso, Otugivu-a vao riroa oa epao oiso viara-ia. Oa-ia ae epao tebolara ora paupara. Oire ra vo tugi-ia Pasova Vurei ravaasi.” <sup>13</sup> Uva va-a vao oa iava avasiepa. Oire uva oisi va kekesiva oiso osa Jisas taviroepa. Osa iava Pasova Vurei ravaasiva voa.

### *Jisas Komunion Aio Vatereva Voeapa Disaipel (Matyu 26:26-30; Mak 14:22-26; 1 Korin 11:23-25)*

<sup>14</sup> Oire uva vo vuuta-a vao oa pou piropa, oa iava Jisas tebol-ia pauroepa. Uva voea aposel irara rera tapo voa pau ovoiaepla. <sup>15</sup> Uva voa oiso voea tavireva, “Oiso ruipa iraoparai ra visii tapo vao Pasova Vurei aio rovopaavoi, uvare utupavira riroa siraoa oupaavoi rara. <sup>16</sup> ✩ Uva visii tavipaavoi oiso, Viapau vorerivira Pasova aioavere ita vo rutu rekasisa uva va vao oiraopere rutu Pauto vo Saraaro sovara-ia.”

---

✩ 21:36: Lu 18:1 ✩ 21:37: Mk 11:19 ✩ 22:1: Jo 11:47-53 ✩ 22:2: Mt 12:14 ✩ 22:3: Jo 13:2 ✩ 22:5: Sek 11:12 ✩ 22:7: Eks 12:18-20; Diu 16:5-8 ✩ 22:8: Lu 19:29; Ap 3:1 ✩ 22:16: Lu 14:15; Re 19:9

<sup>17</sup> Oire uva kap oureva. Oa iava oira-ia okaroru puraoro va-ia vearo vaisi purareva Pautoa-ia. Oa iava oiso puraroepa, “Vao outa, ra va roo pieta ora visiipa. <sup>18</sup> Uvare oiraopavira visii tavipaavo oiso, Vo vokio ora vo utupaua uva viapau wain kuearo-ia ukaioraverea vo rutu tugurasa uva Pauto vo Saraaro karekepereea.” <sup>19</sup> Oa iava bret oureva va-ia vearo vaisi purasa Pautoa-ia. Uva va puteputeoro voeapa va vatepaoro oiso puraroepa, “Vao-ia ragai iava varaua. Oa vatepaavoi visii tauvapasa. Oa iava ragaire rugoopataverea.” <sup>20</sup> Oire uva va aioivoiva ita, oisi raga pierava ae-ia wain karo kap-ia ouoro. Oava oiso puraroepa, “Eva airepa agiagi Pauto vaaro o-ia revasiva ragai iava. Iria petoavoi visii tauvasa.

<sup>21</sup> ♦ “Ari! Rera kekepata ro-ia ira vavaearo ragai vate ruipaparoi voeao vavaearo iare ragaiva keripa irara. Ro-ia ira ragai tapo touparevoi vo-ia tebol. <sup>22</sup> ♦ Iu. Ragai Oirato Oviitoaaro vo raivao sirova uturavere Pauto oa reesireva ragaipa. Ari ita, uva siraovira rutu rerapa ro ira ragai kosi piepare rara voeaopa ragaiva ora keripa irara.” <sup>23</sup> Osa-a eisi osa iava voea raga ora akeakepaaepa oiso puraoro, “Iroutoa rutu-a vigei iava ira vo pitupitu vao puraparevoi?”

#### *Disaipel Irara Ora Kaureopaaepa Ora Voea Raga Oiso, Irouto Vigei Iava Reiparoi?*

<sup>24</sup> Oire uva voea disaipel ora kaureopaaepa ora reopaaepa. Uva oiso purapaaepa, “Iroutoa vai vigei iava reiparoi?” <sup>25</sup> Oa iava voeare oiso puraroepa Jisas, “King irara osararovu voeaaro oiso toupaiveira reipa irara voea voeaaro. Oa iava voeao oea-ia gorua toupaiveira voea oirara oaiive voeao tokipaveira. Oea oiso ora vaisipaaveira oiso, Vigei vearo pitupitu purapa irara oirarapa. <sup>26</sup> ♦ Ari viapau uvupatai ra oisi piepata oiso. Viapau. Ari vosa ro ira visiipa oiso reiparo, ira oiso viovoko visivi visii reroarovi toupareve. Ari ro ira visiipa reiparo, ira oiso tou iraopareve visii kovopatoaaro visii tauvapaoro. <sup>27</sup> Irouto-a reito? E pasi ro-a ira aioa-ia pauparoi? E pasi kovopato rerapa aio tovoparoi sipopaoro? Eera ro ira aioa-ia pauparoi, eera raga ita. Ari ita, ragai visii vuruvuruaro-ia toupaavoi oiso, Kovopato visii tauvapaoro.

<sup>28</sup> ♦ “Voari tuariri uva orekeroru karekepaera ragai-ia varao tavaka vovouro. Oara ragaipa riroara vavatara vatepaivora, vo osa ragai tapo toupatavora. Uva viapau ragai kavupatavora.

<sup>29</sup> ♦ Ari ita, Aite ragai reesireva oiso ra oirara rutupa reipaoro voea tokipaa. Eisi raga ita osa visiipa vo reesi vateaverea. <sup>30</sup> ♦ Oiso ra tokia vao ragai vaaro oa-ia aiotaverea ora ukaiotaverea vo ragai reraaro-ia tebol. Uva oiraopavira king varaaro-ia paupara paupataverea. Oa iava voa toupaoro oiso toupataverea, Reo rovirieipa irara visii vigeipa Isrel katai tau erao (12) sararo Jiu-pa irara.

#### *Jisas Pita-re Oiso Puraroepa, Ragaire Isivauvere*

*(Matyu 26:31-35; Mak 14:27-31; Jon 13:36-38)*

<sup>31</sup> ♦ “Auoro Saimon, Saimon uvuri! Seten visiire arereva oiso ra visii roporoporeve voeao raverave vovou irara veraveraoro. Oiso osa wit rogetaaro veraverapaiveira oira aioaro ariarava.

<sup>32</sup> ♦ Ari ita, vii tauvapaoro varirirai, oiso ra vii vaaro oirao pie vovou viapau raveravepape. Ra va iava ora poreuverea vorevira voreoro ragaire. Oa iava arakoo irara oara goru pieriverea rutu.”

<sup>33</sup> Oa iava Pita rerare oiso puraroepa, “Turaro. Easi vatatoporai, oiso ra vii tapo tuukea iare avara. Ora oiso tapo ra vii tapo kopiira.” <sup>34</sup> Uva Jisas Pita-re oiso puraroepa, “Vo rupao-ia vo osa kookai gau asavira touparevere, ovusa vo peva purari oiso purapaoro, Viapau taraiparai eera-ia Jisas.”

#### *Bokis Moni Iava Ora Ogataara Ora Toorio*

<sup>35</sup> ♦ Oa iava Jisas voea rutu tavireva oiso, “Voari tuariri uva visii sipoava. Uva viapau auero vai kaeoro avataepa moni bokisro vai, ora ogataara vai, ora tasipara vai, ora toorioara vai. Uva vo vuuta-a eva oa-ia oaravu avu vaipa apotataepa, eke viapau?” Oa iava oiso puraaepa, “Viapau.” <sup>36</sup> Oire Jisas oiso voeare puraroepa, “Ari ita, irouto vo vokio-ia moni bokis vaiva toupareve, oire ra vava avaro ae tapo ogata. Ora ae tapo toorio vai. Ari vosa viapau iraipe

♦ 22:21: Jo 13:21-30   ♦ 22:22: Ap 2:23, 4:28   ♦ 22:26: Lu 9:48   ♦ 22:28: Hi 2:18, 4:15   ♦ 22:29: 2 Ti 2:12  
 ♦ 22:30: Lu 14:15; Re 19:9   ♦ 22:31: Jop 1:6-12; Amo 9:9   ♦ 22:32: Jo 17:9, 15, 21:15-17   ♦ 22:35: Mt 10:9;  
 Lu 9:3, 10:4

*ira ruvara-ia, oire ra kuvupatoa vai-ia monia vai ou rovoreve ora rerapa irai toorio vai vorisa oa-ia.* <sup>37</sup> ♦ Eake iava? Uvare Tugoropa Vuku oiso puraepa, ‘Rera tapo takuvuiverea vuri pitupituro purapa irara tapo.’ Oire uva oiso visii tavipaavoi ra vo reo eva oiraope rutu vao oa karekeepa ragai iava. Ari ita, vo reoro rutu varao Tugoropa Vuku oara purava ragai iava, evara-a oara oiraosa aeupai rutu.” <sup>38</sup> Uva disaipel irara rerare oiso puraaepa, “Turaro. Kekepari? Easi igei ruvara-ia vaiterei-ia vaitereo toorio vaio vo-ia.” Oa iava voeare oiso puraroepa, “Ovoiei.”

*Jisas Variria Purareva Getsemani-ia*  
(*Matyu 26:36-46; Mak 14:32-42*)

<sup>39</sup> ♦ Oire uva Jisas riro urui kavuoro avaroepa Oliv Kovo Pukui iare oiso osa raga oisoa piepareve vokiara rutu-ia. Oire uva disaipel irara rera sirova utuaepa voare. <sup>40</sup> ♦ Oa iava voa pou viro ovoioro oiso voea tavireva, “Variripatai. Ra va iava varao kokarapara viapau visii-ia poupa piro visii kove piepaoro.” <sup>41</sup> Oa iava voea arova gare visivi avaroepa. Uva voavi kokoto rekuroepa varirisa oiso puraoro, <sup>42</sup> ♦ “Aite. Vosa ruipapau ra ragai iava o kap verari iria agasioi rutu aue iava siraoa vo vavataaro. Uva viapau uvuipau ra ragai vo ruipaaro sirova utuu. Viapau. Ari vii raga vo ruipaaro sirova utuu.”

<sup>43</sup> Uva va-a vao oa iava iravu ensel vuvuiua iava vararoepa rera goru piesa. <sup>44</sup> Oire uva riroa siraoa sovoreva Jisas ora rera-ia. Oa iava goruvira rutu variriroepa. Uva rirovira rutu pupuraki iraoroepa oiso osa revasiva iria kosikosio viropa rera iava rasius arore kovekovepaoro.

<sup>45</sup> Uva variri opesiroiva, rera voeaaro iare voreroepa disaipel. Oa iava voea kekereva, ovusa uusipaaepa. Uvare rirovira siraopaaepa, oa iava rurapaiva. <sup>46</sup> Osa iava voea erao piepaoro oiso puraroepa voeare, “Eakere uusipatai? Toreta ra varirita. Teapi kokarapa vovouro visii iare uriope visii kove piesa.”

*Judas Jisas Tovoreva Keripa Irara Vavaearo-ia*  
(*Matyu 26:47-56; Mak 14:43-50; Jon 18:3-12*)

<sup>47</sup> Oire uva Jisas touvira raga reoreoparoepa, ovusa riro irara rutu urioaepa. Uva rera ro Judas voeo raga iava aposel irara ira voeapa iraroepa. Oa iava Jisas iare tutuu piereva rerava uugaasa. <sup>48</sup> Uva Jisas oiso puraroepa rerare, “Judas. E Oirato Oviitoaarova uugaapaei, oiso ra keripa irarapa rera kosi pieri, eke?”

<sup>49</sup> Oire uva voeo disaipel irara oea Jisas tapo toupaiva, oea voea kekeoro voea-ia taraiaepla oiso, Asi vo vuuta-a vao oa-ia karekepai vao vuria. Oa iava oiso puraaepa, “Turaro, oiso ruipapaiei ra voeao upoio vara-ia toorioara, eke?” <sup>50</sup> Oire uva va-a vao oa iava iravu voea iava Rovopato Pristo kovopatoaaro uvareoaro toereva rera pakooro oisova oirapapa varata-ia. Oa iava voava koveepa. <sup>51</sup> Uva Jisas rera kekeoro oiso puraroepa, “Ae! Vo pitupituo eakari!” Oa iava rera kokiaro-ia vavaea tovoreva rera iava uvareoua vore pieoro. Osa iava rera iava vorevira vearoepa.

<sup>52</sup> ♦ Oire uva Jisas voea voeo reipa irara pris irarare vo reoro purapareva, ora voeo Tempel-ia uitupa irarapa reipa irara, ora voeo Jiu-pa irara oira vasi irara oea rutu urioaepa rera rausa. Uva voeare oiso puraroepa, “E toorioarava uriotai ora kakuara, eke? Oire uva oiso pai rutu visiipa, Kavirupatoa vai ira tuukesa uriotai varava evara, raa?” <sup>53</sup> ♦ Ari ita, vokiara rutu-ia oisoa visii tapo toupaa vo Tempel-ia. Uva eakepa oisoa voa ragai-ia pitu asapata? Eagara! Va purata. Uvare vo vuuta vao-ia visii vaaro oa-ia rupa vovou vo goruaro riropai rutu.”

*Pita Oiso Puraroepa, Viapau Eera-ia Taraiparai Jisas*  
(*Matyu 26:57-58, 69-75; Mak 14:53-54, 66-72; Jon 18:12-18, 25-27*)

<sup>54</sup> ♦ Oire uva oisi-a oiso osa reoroiva, rera-ia pituiva. Oa iava rerava avaaepa. Uva rera koata pieiva Rovopato Pristo vo kepaaro-ia. Uva Pita rera sirova uturoepa. Oa iava voa rerapa tauaivi toureva. <sup>55</sup> Uva voa vo kepa kasuraaro sovara-ia tuitui kasi puraiva. Oa iava

◊ 22:37: Ais 53:12; Mk 15:28   ◊ 22:39: Lu 21:37   ◊ 22:40: Mt 6:13   ◊ 22:42: Jo 5:30, 18:11   ◊ 22:52: Lu 22:4, 37   ◊ 22:53: Jo 12:27   ◊ 22:54: Mt 26:58; Mk 14:54

vo kasi-ia tuituipaoro paupaaepa. Oire uva voa-a evoa uva Pita voea tapo pauparoepa. <sup>56</sup> Uva iriavu kovopava rera kekeeva, ovusa pauparoepa tuituipaoro. Oa iava tuupavira rerava vurapaoro oiso puraopa, “Easi ro tapo oisoa Jisas toupareve.” <sup>57</sup> Vo osa Pita oiso puraroepa ora taeaoro, “Auoo, viapau eera-ia taraiparai irare purauei.” <sup>58</sup> Oire uva va ita isivaaro iava iravu ita rera kekereva. Oa iava oiso puraroepa, “Auoro! VII tapo iravu voea iava.” Oa iava Pita oiso puraroepa, “Easi ragai viapau.” <sup>59</sup> Oire uva katai vuuta putevoiva, va isivaaro iava iravu ita rirovira oiso puraroepa, “Oiraopavira. Ari rera tapo eera oisoa tapo toupareve. Rera ro-ia Galili iava.” <sup>60</sup> Vo osa Pita oiso puraroepa, “Auoro! Viapau evo reo-ia taraiparai oa purapari.” Oire uva oisi raga oiso puraparoepa Pita, osa ikauvira kookai gau ovoireva. <sup>61</sup> ♦ Uva Turaro Jisas ora poreroepa Pita-va tuupavira vurasa. Oa iava Pita vo reore rugooroepa oa purareva rerare Turaro oiso puraoro, “Vo rupao-ia kookai gau asavira touparevere, ovusa vo peva purari oiso purapaoro, Viapau taraiparai eera-ia Jisas.” <sup>62</sup> Uva va-a vao oa iava Pita atoarova kosiro viropa rataure. Oa iava voa rirovira rutu gau iraoreva siraopaoro.

*Jisas Agesipaoro Rera Upopaiva  
(Matyu 26:67-68; Mak 14:65)*

<sup>63</sup> ♦ Oire Jisas rauivoiva, rera tovipaiva rera upopaoro. <sup>64</sup> Uva rera iava osireito tavuruiva varoa-ia. Oa iava oiso puraaepa rerare, “Oire profet reo purari. Irouto vii taparevoi? Uvare ora vaisipauveira, Profetato-a ragai.” <sup>65</sup> Oa iava rera-ia oreorovu rutu takau reoro purapaiva rera-ia.

*Jisas Rovirieipaiva Kaunsel Irara Ruvara-ia  
(Matyu 26:59-66; Mak 14:55-64; Jon 18:19-24)*

<sup>66</sup> ♦ Ravireo kaero viropa ovusa reipa irara Isrel iava ora guruaepa, ora voeao tapo riro tarai irara Reo Taisi-ia. Oa iava ora voea voeaaro iare Kaunsel irara rerava Jisas avaaepa. Uva oiso puraaepa, <sup>67</sup> “Igei taviri. VII-a Krais viigoa roporeva Pauto, eke?” Oa iava oiso puraroepa, “Vosa visii tavia, ra viapau va oirao pieta. <sup>68</sup> Ora vosa visii akepaa oarai iava reoara vai, ra viapau ita ragai vo reoaro pukopata. <sup>69</sup> Ari vo vokio ora vo utupaua taru, uva Oirato Oviitoaaro oirapapa varata-ia pauparovere vao Pauto vaaro vo uva riroa gorua toupaiveira.”

<sup>70</sup> ♦ Oa iava voea rutu oiso puraaepa, “O! Ari vii raga-a vao Pauto Oviitoaaro, raa?” Uva oiso puraroepa, “Ari ita, oiraopavira eisi osa ragai vaisipata oiso, Ragai raga ita vao-ia.” <sup>71</sup> Oire uva oiso puraaepa, “Avoeao! Ra eake vaisi vai uvupe vuri vaisi vai rera ruvara-ia. Uvare ora rera gisipoaro-ia vo reo purarevoi oreoa uvuei ita.”

## 23

*Jisas Rovirieiiva Pailat Ruvara-ia Kortua-ia  
(Matyu 27:1-2, 11-14; Mak 15:1-5; Jon 18:28-38)*

<sup>1</sup> Oire uva voea rutu rerava avaaepa Pailat iare. <sup>2</sup> ♦ Oa iava voa rovoaepa rera iava gasioro. Uva oiso puraaepa, “Rera-a ro-ia ira kekeiovora vo osa igei sara iraraaro piro pieparevora. Uva igeire tapo koruroera Sisa-pa takis vate arapa. Ari ita, ora vaisiparoveira oiso puraoro, Ragai raga-a Krais. Ragai king.” <sup>3</sup> ♦ Oire uva Pailat rera akereva oiso, “E vii-a Jiu reraaro king, raa?” Oa iava Pailat aatooro oiso puraroepa, “VII raga ita eisi purauei.” <sup>4</sup> ♦ Uva va-a vao oa iava Pailat reipa irara pris irara ora Jiu-pa tuvetuvepa irara oearea rutu tavioro oiso puraroepa, “Viapau oiso oavu avu vai viria vai kekeavoi ro-ia Jisas.” <sup>5</sup> Oa iava goruvira oiso puraaepa, “Ae! Ira-a eera vurivira oirara rutu sita piepareveira voeaa si posipopaoro vo Judia taere-ia. Uva Galili iava rovoroepa evo pitipitu raga purapaoro. Oa iava vo rutu pouro virorao va raga purapaoro vo ruture.”

*Jisas Rovirieiiva Herot Ruvara-ia*

---

♦ 22:61: Lu 22:34   ♦ 22:63: Jo 18:22-23   ♦ 22:66: Mt 27:1; Mk 15:1   ♦ 22:70: Mt 27:11; Lu 23:3   ♦ 23:2:  
Lu 20:22; Jo 19:12   ♦ 23:3: Lu 22:70; 1 Ti 6:13   ♦ 23:4: 1 Pi 2:22

<sup>6</sup> Oire uva Pailat va uru pieparevoiva, voea akereva oiso, “Esa rera ro-ia Galili taere iava, raa?” <sup>7</sup> ♦ Oa iava rera taviiva vo osa rera-ia Jisas taraiparoepa oiso, Vo rasio iava rera orasia oisoa tokipareve rera King Herot. Osa iava Pailat rera iare Herot Jisas siporeva, vo osa Jerusalem-ia toupareva.

<sup>8</sup> ♦ Oire uva Herot rera kekereva Jisas. Oa iava rirovira rorupareva. Uvare tuariri rutu oisoa rera iava uvupareve. Oa iava oisoa rera keke ruipaparo rutu. Oire uva oiso ruipaparoepa ra Jisas oai purareve ravotoa vai, ra oai kekereve. <sup>9</sup> Uva oisi-a oiso osa iava Herot rera akepareva orekerovu ruture riroara. Vo osa Jisas viapau rerapa oreoi pukopareva vara iava. <sup>10</sup> Oa iava reipa irara pris ora voeao tarai irara Reo Taisi-ia oearea rutu vovio rera ruvara-ia toresa urioaepa uvavi-ia rera rovirieipaiva. Uva va iava goruvira rutu rera togapaoro rera iava gasipaiva. <sup>11</sup> ♦ Osa iava Herot ora rera voeaaro viurupa irara oea rutu Jisas akaipa piepaiva. Ora rera tovipaiva tapo. Osa iava iravu vearto kuvuto ouiva rera-ia rera kuvusa. Oa iava rera vore pieiva aue iare Pailat. <sup>12</sup> ♦ Ari ita, voari tuariri uva oisoa Herot Pailat tapo ora keriparo. Uva vo vuutao raga-ia ora agiagisiepa.

*Pailat Jisas Tapasa Evaao Parikou-ia Taviroepa*

(Matyu 27:15-26; Mak 15:6-15; Jon 18:39-19:16)

<sup>13</sup> Oire uva Pailat reipa irarare pris keeraroepa, ora Jiu voeaaro tuvetuvepa irara tapo, ora voeao rutu oirara. Uva ora gurusa urioaepa. <sup>14</sup> Oa iava voeare oiso puraroepa Pailat, “E rova uriotai ragai iare, oa iava oiso puratai, Ira-a ro oirara rutu vo pitupituroaro piro piereva? Uva rera akeavo vo visii osireiaro-ia torevokovira. Oire uvuta! Viapau oavu avu vai vuria vai kekeia rera-ia ro-ia vao oa iava rera iava gasitavoi. <sup>15</sup> Oiso osa raga ita aue Herot ira rera vore pierevorao vore vigei iare, uvare viapau vuria vai kekerevora rera-ia ro-ia. Oire uvatal! Ro viapau oiso oavu avu vai vuria vai purarevora, ra oai iava rera kopii piepe. <sup>16</sup> Uva voeaopa rera vate rovopaavoi, ra rera ragiive. Oa iava rera iava vaseavere rara. [ <sup>17</sup> Oire uva oiso toupaiveira vo pitupituo Tagausapa Vurei Pasova vo pitupituar. Ra va-ia Pailat iravu kosi piereve tuukepa kepa iava voea iare.]

<sup>18</sup> ♦ Oa-a vao oa vituaro iava voea rutu oirara rirovira kaku pieoro raga pieiva oiso purapaoro, “Rera kopii pieoro Barabas iava vaseri tuukepa kepa iava igei iare!” <sup>19</sup> Ari ita, Barabas ira oavu upoa kosi piereva gavmanva vo riro urui sovara-ia. Uva oirato tapo kopii piereva. Oa-a eva oa iava rera tovoiva tuukepa kepa-ia. <sup>20</sup> Oire uva Pailat voeare ita reoa purareva ita. Uvare Jisas iava vasesa aueparoepa. <sup>21</sup> Oa iava kaku pieoro ita oiso puraaepa, “Rera tapari evao parikou-ia!” <sup>22</sup> Oa iava ita vo peva pie vuuta-ia vorevira voea ita akereva oiso, “Eakepa? Ro oirato Jisas, aa vao vuri pitupitu purarevora? Viapau oiso rera-ia vuria vai kekeavoi, ra oai iava rera kopii piepe. Uva va-a vao oa iava oiso ruipaparai ra ragai voearopa rera vate rovoa, ra rera ragi rovoive. Ra rera iava vasea.” <sup>23</sup> Vo ovusa rirovira rutu goru iraopaaepa. Oa iava goruvira rutu voea rutu raga piepaoro rerare oiso puraaepa, “Rera tapari evao parikou-ia!” Osa iava voea vo reoaro uvuparevoiva Pailat, goruvira vorevoreripavira rera iava vasereva. <sup>24</sup> Uva va-a eva oa iava Pailat reo goru purareva voea vo ruipaaro sirova utuoro. <sup>25</sup> Uva ro-ia riro kaureoto gavmanva ora upo purapato ira tovoiva tuukea-ia, ira arepaiva oirara, oiso ra rera vore piereve Pailat vorevira voeapa. Osa iava Pailat Barabas iava vasereva voeapa voea vo ruipaaro sirova utuoro. Ari rera Jisas tovoreva keripa irara vavaearo-ia.

*Jisas Tapaiva Evaao Parikou-ia*

(Matyu 27:32-44; Mak 15:21-32; Jon 19:17-27)

<sup>26</sup> Oire uva rerava Jisas avaaepa. Uva iravu-ia oirato pituiva aue Saimon, aue iava rera Sairini urui. Uvare rerava aivaroiava ovusa riro urui-ia kare uvirosa aueparoepa. Oa iava rera vutuoaro-ia evao parikou tovoiva vao Jisas oa kaepareva. Oa iava vava rera sirova uturoepa.

♦ 23:7: Lu 3:1 ♦ 23:8: Lu 9:9; Mk 6:14 ♦ 23:11: Jo 19:2-3 ♦ 23:12: Ap 4:27 ♦ 23:18: Ap 3:13-14

<sup>27</sup> ♦ Ovusa riro irara rera sirova utupaaepa. Riro riako tapo airoa rerapa gau eraroria gaupaoro utupaaepa rerapa siraopaoro. <sup>28</sup> Oa iava Jisas vairore oiso purasa ora poreroepa, “Avairo Jerusalem iava. Opeita gaupata ragaipa. Easi veiaropai ra ora visiipa gaupata ora voearopa visii ovii iraraaro tapo.” <sup>29</sup> Uvuta! Vo utupavira uva ovuutavu urioperea uva oiso puraaverea, Vairo riako, ora vairo kavau asa riako, ora vairo airoa viapau kakae vure roro piepaiva, airoa rutu roruive, uvare viapau ovii irara vai epao siraoa vo vavataaro oupasa. <sup>30</sup> ♦ Vo vuutao-ia oa-ia oiso puraaverea pukuiarare, Igei rakuoro koveta. Ora varaore garepa pukuirovi tapo oiso puraaverea, Igei tavuruoro koveta. <sup>31</sup> Aue iava uvare vosa vo vokio-ia oiso ragai piepaivoi osa vo evao oa-ia uuko ovi toupaivoi, oire ari eake vai puraive vao-ia erako ova?” [Ro Jisas ira oiso toupare osa eva ova vo eva-ia uuko ovi toupai vearoa. Uva erako ova oa oiso toupaivoi vao erako ova osa voeao vuri irara vova Jerusalem-ia.]

<sup>32</sup> ♦ Oire uva Jisas oiso puraroiva, rerava avaaepa ora aitereivu tapo vaitereo aiterea oisoa vuri pitupituro rutu purapasi. Uvare oiso vovoupaaepa ra vaiterei tapo rera upoive Jisas. <sup>33</sup> Uva va-a vao oa iava uvavu poua viropa va vaisiaro, Kukue Keru Pukui-ia opukuia-a vao oa-ia rera tapaiva evao parikou-ia. Oire uva evaiterei tapo tapaiva voa oiso-ia, Iravu oisova oirapapa varata vao Jisas, ari iravu oisova koike varata. <sup>34</sup> Oire uva Jisas oiso puraroepa, “Aite! Voeao iava vuriara verari. Oea viapau va-ia taraipaa vao oa puraivoi ragai-ia.” Uva kuvupara-ia satu visiko purapaiva vara roo piepaoro ora voeapa. <sup>35</sup> Vo ovusa oirara rutu voeava vurapaiva. Ari voeao tuvetuvepa irara Jiu iava oea oiso puraaepa, “Ari oearovu raga oisoa tauvapari. Oire vosa vii oiraopatoa rutu Ropoto Krais Pauto reraaro, oire uva va iava vii raga uvuipau ra ora tauvau.” <sup>36</sup> ♦ Uva voa voea tapo viurupa irara rera tovipaoro putepaiva. Oa iava rera vateiva aue viniga itakopa ovi <sup>37</sup> oiso purapaoro, “Vosa vii Juda kingaro rutu, oire ra ora vii raga ora tauvau.” <sup>38</sup> Oire uva oavu rigatoa rera kukuearovi-ia toupaiva. Oa oiso purapaepa, JISAS KING OAIIVE JIU.

<sup>39</sup> Uva vaitereo aiterea tapo rera kotoiva aiterea iava iravu rerare oiso puraroepa rera tovipaoro Jisas, “E vii-a Krais, raa? Oire vii raga ora tauvapaoro vigei rutu tapo tauvari.” <sup>40</sup> Ovusa iravu vaiterei iava rera uvuoro kasipuoro oiso puraroepa, “Easi vii tapo evo siitoka ourivoi, oiso osa reraei. E viapau Pautoa-pa uriripau ei, raa?” <sup>41</sup> Vegei tapo torevokovira vo siitoka ouvevoi oa torevokopai vegei vo pitupituroarova. Ari ro-ia ira viapau vuria vai purareva.” <sup>42</sup> Oa iava oiso puraroepa, “Jisas. Vosa turarouvere, uva evo vuuta-ia ragaivire rugoouvere.” <sup>43</sup> Uva Jisas oiso rerare puraroepa, “Oiraopavira rutu vii tavipaavoi oiso, Vo vokio-ia ragai tapo tourivoi vo Peradais-ia vo roru oupa tapi.”

### Jisas Kopiiroepa

(Matyu 27:45-56; Mak 15:33-41; Jon 19:28-30)

<sup>44</sup> Oire uva ravireo vuuta uvuiaro rutu-ia kopiiroepa. Oa iava ravireo utoroiva, rasitoa rutu-ia rupaepa vo rutu tugurasa vo peva vuuta-ia (3 klok) ovaiaro. <sup>45</sup> ♦ Vo osa va vao varoua oua oisoa Rovopa Kepa-ia Tempel kotovira toupaive vo rataoa-ia touua Pauto vo topisiaro iava, oa ariarava oua vuritavira rutu kari piropa, oiso ra oirara rutu Pauto ruvara iare tutuu pieive.

<sup>46</sup> ♦ Uva Jisas rirovira rutu oiveoro keeraoro oiso puraroepa, “Aite! Ragai vii vavaearo-ia urauratoa oaa tovoavoi.” Uva oisi-a oiso osa pura ovoioro vovouisi vikireva kopii ovoioro.

<sup>47</sup> Oire uva va-a vao oa kekereva ro viurupa irara reitoaaro. Oa iava Pauto vaisiaro kae piereva rera-ia vuurapa vaisi puraoro. Oiso puraroepa, “Oiraopatoa rutu ro-ia, torevokoto Jisas.”

<sup>48</sup> Osa-a eisi osa voea rutu oirara voeao oea urioaepa siituesa oea vara rutu varao kekeiva oara karekeepa. Oa iava ora voea iava kopukopuara tapatapapaoro kareaepa sirao iraopaoro.

<sup>49</sup> ♦ Vo osa rera Jisas vate iraraaro tauaivi toko pievira torepaaepa, voeao oea Galili rutu iava utuaepa rera sirova. Airorovu tapo riakora airoa vara rutu varao siitueiva.

⊗ 23:27: Lu 8:52    ♦ 23:30: Ais 2:19    ♦ 23:32: Ais 53:12    ♦ 23:36: Sam 69:21    ♦ 23:45: Eks 26:31-35; Hi 9:8    ♦ 23:46: Sam 31:5    ♦ 23:49: Sam 38:11; Lu 8:2-3

*Jisas Iava Varaua Tovoiva Aveke Rikui-ia  
(Matyu 27:57-61; Mak 15:42-47; Jon 19:38-42)*

<sup>50-51</sup> ♦ Oire uva iravu oirato voa toreparoepa. Rera vaisiaro, Josep eera Juda vo uruiaro iava vao oa oisoa vaisipaive oiso, Arimatia uvava rera-a veearoto torevoko vovouto eera. Reipa irara iava rera-a Kaunsel irara voea vo Jiu. Ari ita, ira ro viapau oiso voeao Kaunsel irara vo vovouaro sirova utuparo vao Jisas kopii piepa vovou. Ari oisoa Pauto vo Saraarore rugooparo vare tuepaoro. <sup>52</sup> Ira-a ro ira Pailat iare avaroepa Jisas kopii aresa rera ruvara-ia. <sup>53</sup> Oire uva va-a vao oa iava vo kopii rere piereva rera tavarusa popotepaua-ia varoua. Oa iava rera tovoreva oavu-ia tova urui. Uva voa-a vo uva rikui tekaiva ravaavira aveke-ia rirova voari tuariri uva oirara-ia viapau oisoa irai tovapaise. <sup>54</sup> Oire uva vo voki-a vao orekerovu ravaapa voki aue iare Sabat voki oa-ia Josep vao purareva. Oa iava Sabat vokipa tutuu pieva oiso ra karekepe.

<sup>55</sup> Oa iava vairo riakora Jisas sirova utuaepa Galili rutu iava, airoa Josep sirova ita utuaepa voare vo tova siituesa oiso, Apeisi avu ragavira rera tovaparevoi? Oire uva va-a eva oa tapo kekeiva. <sup>56</sup> ♦ Uva rera siitueivoiva, vorevira kareaepa ora vairo vo uruiaro iare. Oa iava voa korovo oviro ravaasa kareaepa varao veearopa geesi oviro. Oire uva Sabat voki-ia reareaaepa oiso osa oisoa purapape Reo Taisi.

## 24

*Jisas Toreroepa Vorevira Tootoopaoro  
(Matyu 28:1-10; Mak 16:1-8; Jon 20:1-10)*

<sup>1</sup> ♦ Oire uva rovo voki rutu-a vao wik vituaro iava, ovokia-ia avaaepa tova iare vo ovirova varao riro geesi oviro aue korovo oara ravaa rovoiva. <sup>2</sup> Uva avekere vura ragaiva iria pekaiva vo tova riaaro iare. Oa iava viapau vo tova-ia toupaeva. <sup>3</sup> Uva va-a eva oa iava voa koataaaepa. Oire uva voa viapau rera iava varaua kekeiva Turaro Jisas. <sup>4</sup> ♦ Oa iava rirovira rugorugoo iraopaoro vavagisipaaepa rutu. Uva voa aitereivu oiratoarei kekeiva, ovusa voavi ruvara-ia torepasiepa. Aiterea iava kuvupara rutu sisikorepaiva. <sup>5</sup> Oa iava rirovira rutu uririaepla vo riako vairo. Oire uva takua viropa rasiua arore. Vo ovusa vaiterei oiso vairore purasiepa, “Eake-a vao oare rore taraapatai ro tooototo vova kopii irara voaro? <sup>6</sup> Viapau oiso vo touparevoi. Ira vorevira toreroe. Ari ita, vo reore rugoo iraota oa vaterevora visiipa vo osa Galili-ia touparevora. <sup>7</sup> Vo uva oiso puraroepa, Ragai vatepaivoi rara vuri irara keripa irara vavaearo iare. Ra ragai tapaive evao parikou-ia rara. Oire uva vo pevapa voki-ia toreravere vorevira.”

<sup>8</sup> ♦ Oiso osa iava vo reore rugooaepa Jisas oa purarevora. <sup>9</sup> Oire uva tova tavukiaro kavuoro vorevira kareaepa katai tau katai (11) disaipel tavisa ora oearovu rutu. <sup>10</sup> ♦ Oiso Maria o Makdala iava, ari aue Joana, ari Maria Jems aakoaro airoa rutu toupaiva. Ora airorovu airoa tapo toupaiva, ovusa vo reo iava vao voea aposel irara tavipaiva. <sup>11</sup> Ari voeao aposel irara keapaaepa oiso, Kiuvu reo raga-a oa tavipaivoi. Oa iava viapau oiso vo riako vo reoaro oirao piepaiva. <sup>12</sup> Vo osa Pita ikauvira avaroepa vo tova iare. Oa iava takuro viropa uva voa kokepareva. Uva varoara raga kekereva osa voa toupaiva. Oa iava vorevira voreroepa kepa iare. Osa iava rirovira rutu rugorugoo iraoparoepa tavetavepaoro va-ia vao oa karekeepa.

*Aitereivu Jisas Tapo Vokapasiva Vo Raivao-ia Vo Emeas  
(Mak 16:12-13)*

<sup>13</sup> Oire uva vo voki raga-a vao oa-ia aitereivu voea iava vokapasiva gare uruivi iare. Va vaisiaro aue-ia, Emeas. Aue iava Jerusalem-ia oisoa vo raiva-ia avapaave voare Emeas. Uva aue-ia oisoa uvuipape voare katai tau katai vuuta rutu (11 kilomita). <sup>14</sup> Oa iava voa vokapaoro avapasiepa varao rutu-ia ora reopaoro oara karekeepa. <sup>15</sup> Oire uva voa ora reopaoro vokapasiva. Uva rera Jisas vaiterei ruvara-ia ora karekeroepa. Oa iava vaiterei

♦ 23:50-51: Lu 2:25   ♦ 23:56: Mk 16:1; Eks 12:16, 20:10   ♦ 24:1: Lu 23:56   ♦ 24:4: Ap 1:10   ♦ 24:8: Jo 2:22   ♦ 24:10: Lu 8:1-3

tapo vokapaoro avaparoepa. <sup>16</sup>◊ Ari vaiterei iava osireiara aauepa. Oa iava viapau oiso rera eveipasiva oiso, Jisas ro-ia.

<sup>17</sup> Oire uva oiso vaitereire puraroepa vaiterei akeoro, “*Eake-a vao oa-ia ora reopaoro avapasiei?*” Uva oisi-a oiso osa puraroiva, ruusiva siraoro rutu. <sup>18</sup> Oa iava iravu rera vaisiaro, Kliopas rera aatooro oiso puraroepa, “Riro irara rutu ouruirovu iava voia Jerusalem-ia toupaivoi. Ari vii vai pasi kataito, viigoa viapau pasi taraipaei vao-ia oa karekeerao oiso Jerusalem-ia vo vuutao raga-ia, raa?” <sup>19</sup>◊ Uva vaiterei akereva Jisas oiso, “*Eake-a?*”

Oa iava oiso purasiepa, “Auoro! Vao-ia oa karekeei ro-ia Jisas vova Nasaret eera profetato. Ira oisoa riro gorupa kovoro purapareve, ora riro gorupa reoro tapo vo Pauto osireiaro-ia ora vo tapo oirara rutu osireiaro-ia. <sup>20</sup> Aue tapo uvare voeao reipa irara pris irara ora voeao tuvetuvepa irara vigei voeaaro rera tovoivorao voeao gavman irara vavaearo-ia. Oa iava voea gavman irara reo goru puraivorao rera uposa. Uva rera tapaivorao evao parikou-ia. <sup>21</sup> Ari ita, voari tuariri uva oisoa igei rera oirao piepaio, Eera ira voea oirara karurevereia Isrel-pa irara vova tuukea-ia. Iu. Ora oreovu tapo vao iava rera vo kopiiaro isivaaro iava vo vokio-ia vo pevapa voki vo vokio. <sup>22</sup> Ari ita, airovua vairo igei iava airoa igei sita pievoi rutu. Uvare vokipaua rutu vokiae voarire tova-ia. <sup>23</sup> Oa iava voa viapau rera iava Jisas varaua kekeivo. Osa iava vorevira voreae igei tavisa. Ari ita, uva voa oearovu enselpa irara tapo kekeivo oea oiso puraae, Ira tootoovira touparevoi. <sup>24</sup> Oa iava oearovu igei iava voare tova-ia tavariivo. Uva oisi raga ita va kekeivo oiso osa vo riako taviae. Vo uvare voa viapau rera kekeivo.”

<sup>25</sup> Oire uva Jisas vaitereire oiso puraroepa, “*Ari ita, viapau oiso visii-a rugorugooa vaiei. Uvare visii iava sopaura vavagisi iraopapeira. Oa iava viapau vo reoro oirao piepataveira profet irara oara iava oisoa tavipaave voari tuariri.*” <sup>26</sup>◊ E apeisi-a? Esa pasi viapau taraipataveira oiso, Vo raga osa Krais siitoka ou rovo iraoreve, oire ra utupavira rera vaaro keraria ora gorua oureve?” <sup>27</sup> Uva vova varao rovoepa Moses vo reoaro-ia vo pou virosa voea rutu profet irara. Oa iava vaitereipa siposiporeva oiso vo reo rutu varao oara Tugoropa Vukuia oisoa toupaive, vo reoro iava rovopaoro oreoroa rigatoiva Moses ora profet irara. Oara rutu oisoa rera raga iava tavitavipape.

<sup>28</sup> Oire uva vo urui iare tutuuiva vao oa iare avapasiepa. Oa iava Jisas oiso rovoroepa ra vo urui-ia vaiterei veraoro putereve rera raga avaoro. <sup>29</sup> Vo osa rera voresivoiva, oiso purasiepa, “Vo tou rovori vegei tapo. Uvare ravireo rokorevoi. Uva rupasa auepai.” Oire uva vaiterei tapo tousa koataroepa. <sup>30</sup> Oa isivaaro iava aiosa auepaaepa. Uva vaiterei tapo pauroepa rera Jisas. Uva bret oureva va-ia vearo vaisi purasa Pautoa-ia. Oa iava vaitereipa va puteputereva vaiterei vatevatesa vara. <sup>31</sup> Uva oisi-a oiso osa va purarevoiva, vaiterei iava osireiara karu piropa roroiooro. Oa iava vearovira rutu rera-ia taraisiepa rera eveioro. Uva va isivaaro iava vaiterei arova opesikoroepa avaoro. <sup>32</sup> Oire uva ora reopasiepa vaiterei raga oiso, “Ari ita, vo osa vokapavevo raivaaro, ovusa vegei tavitaviparevo aue iava Tugoropa Vuku vituaro iava. Uva oiraopavira ita, vegei iava vovousirei roruoro rirovira rutu kovatae rera vo reoaro sovooro.”

<sup>33</sup> Oire uva vo voki raga-ia Jerusalem iare vore karesiepa katai tau katai (11) disaipel iare pou virosa ora oearovu. Uva ora guruaepa voea rutu <sup>34</sup>◊ oiso puraoro, “Oiraopavira rutu Turaro Jisas vorevira toreroi Saimon ira kekerevo.” <sup>35</sup> Oa iava voeapa siposiposiva varao iava oara vaiterei iare karekeepa raivaaro. Uva oiso purasiepa voeare, “Easi eera vegeipa bret puteputerevo. Oa iava rera-ia taraiveie rera eveioro.”

### *Jisas Ora Karekeroepa Rera Voeaaro Iare Disaipel (Matyu 28:16-20; Mak 16:14-18; Jon 20:19-23)*

<sup>36</sup> Oire uva oisi-a oiso osa ora reopaoro toupaiva, ovusa Jisas voea vuutaaro-ia ora tore pieoro ora karekeroepa voea iare. <sup>37</sup> Uva rirovira rutu ora sitaaepa. Oa iava uriripaaepa rutu oiso keapaoro, Iravu uraurato tugarato ira voea iare pouro viroi. Oa iava rera kekeivoi. <sup>38</sup> Uva voeare oiso puraroepa, “*Eakepa vurivira rutu ora sitatai? Ari eakere visii iava*

◊ 24:16: Jo 21:4   ◊ 24:19: Lu 7:16, 13:33   ◊ 24:26: Hi 2:10; 1 Pi 1:11   ◊ 24:34: 1 Ko 15:5

*sopaura ragai-ia vakuvaku asapai?* <sup>39</sup> ♦ Ragai vavaearo keketa ora ragai kokotoaro viupara kekesa. Easi ragai raga-a vao, ragoa toupaavoi. Oire ragai-ia pituta ora visii varaaro iava vavaeara, uvare tugaratoa-ia viapau keruara vai toupaiveira oiso osa varao oara ragai-ia toupaivoi oara kekepatavoi ragai-ia.” <sup>40</sup> Oire uva oisi-a oiso osa puraroepa ora rera iava vavaearei karekeoro ora kokotoarei voeapa. <sup>41</sup> Oa iava rirovira rutu roru iraopaiva. Ari touvira viapau rera oirao piepaiva rutu. Uva rirovira rutu rugorugoo iraopaaepa. Osa iava voea akereva oiso, “*Esa aioara vaiei voraro?*” <sup>42</sup> Oa iava rerapa ataria vateiva oa oriiva.

<sup>43</sup> ♦ Uva va ouoro va aioreva ovusa rera siituepaiva rugorugoo iraopaoro.

<sup>44</sup> Oire uva voeare oiso puraroepa, “*Voari tuariri uva visii tapo toupaavora, uva visii taviavora vo reoro rutu iava varao ragai iava vo Reo Taisi-ia vao Moses vaaro, ora varao rutu oara rigatoiva profet irara vao-ia Vukua voea vaaro, ora vo Sam. Uva vo reoro rutu-a varao oara oiraoei.*” <sup>45</sup> Uva va-a vao oa-ia voea vovouaro roroio piereva. Oa iava Pauto vo reoroaro-ia taraiaepta rutu. <sup>46</sup> ♦ Osa iava voeare oiso puraroepa, “*Tugoropa Vuku oiso purapapeira, Krais tavaka vo vavataaro kae rovo iraoreve. Oa iava vo pevapa voki-ia vorevira torerovere taru tova tapi iava.*” <sup>47</sup> Oa iava rera vo kovoaro iava siposipo iraopavere vo oirara rutupa voraro rutu okovoia-ia raiva purareva Pautoa iare. Ra va iava voea iava sopaura oaive vorevira pore piro vova vuri vovouro oaive. Oire ra Pauto voea iava vuriara oaive verareve. Uva vova Jerusalem-ia vo siposipo vao rovo iraopatavoi rara. <sup>48</sup> ♦ Uva uvui iraopatai ra vara iava varao siposipota oara keketavo rutu. <sup>49</sup> ♦ Oire uvuta! Va-a vao-ia oa iava Aite taviroepa voari tuariri, ira-a ro ira visiipa vatepaavoi Tugoropato Uraurato. Uva rera sipoavere visiipa vo osa vo urui-ia Jerusalem urui-ia tou rovota. Oa-ia visii iare va vao rera vo goruaro vuvuiua iava varapere visii-ia okovorovu purapasa oearovupa oirara vao Pauto vo kovoaro.”

#### *Pauto Jisas Kae Piereva Vuvuiua Iare*

*(Matyu 16:19-20; Aposel 1:9-12)*

<sup>50</sup> ♦ Oire uva voava vo voea tuvetuvereva ae-ia ruture Betani-ia. Oa iava vavaea kae piereva voea vateoro viraakrovopaiavoivaoa vao Pauto vo goruaro iava. <sup>51</sup> ♦ Oire uva voa-vo uva voea viraakopareva touvira, ovusa Pauto rera kae piereva vuvuiua iare. <sup>52</sup> Uva voa raga rera-ia Jisas vuurapa vaisi pura, Jerusalem iare voreaepla. Oa iava rirovira rutu rorupaiva rutu. <sup>53</sup> ♦ Oa iava vao oisoa vokiara rutu-ia Rovopa Kepa-ia Tempel toupaive. Uva Pauto-ia vuurapa vaisi purapaoro rorupaive rera-ia.

---

♦ 24:39: Jo 20:27   ♦ 24:43: Ap 10:41   ♦ 24:46: Ais 50:6; Hos 6:2   ♦ 24:48: Ap 1:8   ♦ 24:49: Jo 14:16;  
Ap 1:4   ♦ 24:50: Ap 1:12   ♦ 24:51: 2 Kin 2:11   ♦ 24:53: Ap 2:46

## JON

### Irapa Reoro Vo Vukuo Iava

Iravu-a ro Jon katai tau erao disaipel iava rera, ira oisoa kaviko iraopareve rutu Jisas. Vaitereo ora Pita aiterea oearovupa disaipelpa irara oisoa irapasi. Uva Jisas vo araoreire keeraroepa ora Jems vo osa sara kovo purapasiva atari oupaoro ora aitetoa tapo Sebedi (Mk 1:19-20). Oa iava aitetoe kavuoro utusiepa ora kovopa iraraaro Jisas sirova utuoro.

Oire uva vo rera vaaro-ia rigatoa Jisas iava poeravira rutu tavitaviroepa oiso, Rera raga Pauto ira oiravira karekeroepa vo rasio-ia toupasa oiso rutu osa vigei oirara. Uva viapau riroara vai siposipoara vai rigatoreva Jisas vo kovoaro iava, viapau. Ari Jisas vo siposiporoaro iava ora rera vo kovoaro vituaro iava rigatoreva Jon, oiso ra oirara uvuipai ra roroiovira taraiave oiso, Jisas-a ro Krais, Pauto Oviitoaaro rutu. Ira iavirava uvuipavieia Tootoo Ovoi oupe vo rera vaisiaro-ia ora rera vo goruaro-ia.

Uva Pentikos Voki isivaaro-ia Jon toupareva Pita tapo vo Jerusalem-ia (Ap 3:1, 4:23). Oire vaitereo aiterea Kristen irara tauvasiva voeao oea oisoa Sameria-ia toupaive (Ap 8:14-25).

1. Aviavi pie reoro aue iava Pauto vo Reoaro rera raga ita Krais, 1:1-18.
2. Jon Baptais vo tavitaviaro iava, ora vo osa Jisas rera vo kovoaro rovopasa voeao disaipel ropo rovoreva, 1:19-51.
3. Voraro virireva Jisas rera vo kovoaro ravoto kovoro purapaoro, okovoroa iavirava lotupa irapa irara Jiu reoa puraiva Jisas kopii piesa, 2:1-50.
4. Jerusalem-ia toupaoro disaipel irara siposiporeva ora rera iava. Oa iava oeavu rera kotoiva evao parikou-ia, 13:1-19;42.
5. Jisas tova tapi iava vo pevapa voki-ia vorevira toreroepa. Oa iava disaipel irara iare ora karekeroepa, 20:1-29.
6. Vo toupai vao vituaro iava oa iava Jon vo vukuo rigatoreva, 20:30-31.
7. Galili-ia Jisas disaipel tapo toureva, 21:1-25.

#### *Reo-a Vao Oa-ia Tootooa Toupaiveira Oa Oiravira Karekeepa Ro Vaisiaro Jisas Krais*

<sup>1</sup> ♦ Voari tuariri vo uva vo rasio pura asavira touva Reoa raga touva. Oa-a Reoa oa Pautoa tapo touva. Uva oisi-a eisi osa Pauto toureva, osa-a eisi osa Reoa raga touva. <sup>2</sup> Oa tuariri rutu Pautoa tapo touva. <sup>3</sup> ♦ Oreoa orekerovu rutu vituaro. Oa iavirava Pauto orekerovu rutu purareva. Ari ita, viapau oiso oai oraivai raga iava karekeepa. Viapau. Ari Reoa raga-a orekerovu rutu vituaro. <sup>4</sup> ♦ Oa-a Reoa Tootooa rutu vituaro. Oa iava va Tootooa oirara rutupa Aviavia. <sup>5</sup> Uva va-a eva Aviavia oa rupapa aviavia vatepaiveira vare roropaoro. Osa iava eisi rupa viapau oiso vo Aviavi papuaiseira.

<sup>6</sup> Oire uva iravu oirato urioroepa rera vaisiaro Jon, ro ira arureva Pauto. <sup>7</sup> Ira urioroepa oiraopa reo siposiposa. Va iava vao Aviavia tavitaviroepa voeae rutupa, oiso ra va iava vao Aviavia uvuoro oirao pieive. <sup>8</sup> Uva rera-a viapau oiso va eva Aviavia. Viapau. Ari eera urio ragaroepa va iava vao Aviavia tavitavisa.

<sup>9</sup> Oaviavia rutu-a eva oiraopa. Oa oirara rutupa aviavia vatepaiveira. Rera-a eera Aviaviaro oirara rutupa ira urioroepa vo rasio iare. <sup>10</sup> Oa raga-a eva Reoa oa urioepa vo rasio-ia tousa. Uva rera-a ro ira iavirava Pauto vo rasio rutu purareva. Uva oirara voeae vo rasio-ia oisi iavirava viapau oisoa rera eveipaise. <sup>11</sup> Osa iava vararoepa vo tousa uva purareva rera voaaro. Ari ita, uva viapau oiso voeao rera voeao rera rera ouiva. <sup>12</sup> Vo ovusa oearovu raga voeae iava rera eveipaise. Oa iava voeae voeao rera ouiva voeao oea oisoa rera-ia oirao pieipaise. Oa iava voeae voeao rera ouiva voeao rera ouiva. <sup>13</sup> Ari voeao oea oiso toupaiveira, Pauto ovii iraraaro viapau oiso eisire voeae kavauivora aite irara ora aako riakoro oaive. Ora viapau oiso varaua raga vo ruipaaro-ia. Ora viapau oiso vo oiratoa raga vo ruipaaro-a. Viapau. Ari

♦ 1:1: Kl 1:17; 1 Jo 1:1   ♦ 1:3: Hi 1:2   ♦ 1:4: Sam 36:9

Pautoa raga ora rera vo ruipaaro-ia voea kareke piepareveira oiso rutu, ra oiso toupaive, Rera ovii iraraaro rutu.

<sup>14</sup> ♦ Oa raga-a vao-ia Reoa oa oiravira ora poreepa. Osa iava igei vuutaaro-ia toureva. Oa iava igei rera vaaro keraria kekeiova. Vao keraria-a rera vaaro ro-ia Kataitoa raga Oviito Aite ira arureva oa iava urioroepa. Ira-ia vereopa vovou toupaiveira ora aue oiraopa pitupitu. Oara rutu iava agasiroepa. <sup>15</sup> Uva Jon Baptais rera iava tavioro oiso puraroepa, “Eera oirato tuariri rutu ira iava visii taviavora oiso-ia, Ro ira ragai sirova uturovere ira ragaipa reiparoveira. Eake iava? Uvare tuariri rutu toureva ovusa ragai kavau asavira touava.”

<sup>16</sup> Ari ita, vigei rutu ovatevatearovu rutu vorevoreripavira siraovatero oisoa oupape rera ruvara-ia. Varao oara rutu iava agasiroepa. <sup>17</sup> ♦ Eake iava? Uvare Pauto vigeipa Reo Taisi vatereva Moses vavaearo-ia. Ari va vao riroa rutu vereopa vovou ora oiraopa pitupitu oara rutu Jisas Krais iavirava karekeepa. <sup>18</sup> Viapau oiso irai gare visivi Pauto kekereva. Viapau rutu. Ari rera raga ro-ia Pauto Oviitoaaro ira Aiteto ruvara-ia oisoa toupareve. Oire uva va-a eva oa iava Aitetoa rutu iava oisoa vigei soporepareve.

#### *Jon Baptais Tavitaviroepa*

(Matyu 3:1-12; Mak 1:7-8; Luk 3:15-17)

<sup>19</sup> Oire uva Jiu iava voea reipa irara oearovu tauo purapa irara pris irara aruiva ora oearovu tapo Livai-pa irara voeao oea oisoa Tugoropa Kepa tokipaive. Oea Jerusalem iava urioaepa Jon akesa oiso, “Vii-a irouto?” <sup>20</sup> Uva Jon roroio pievira rutu voeapa siposiporeva. Uva oisi siposipopao oiso voeapa oreoi vairupaoro oai vataupareva. Ari oisi raga siposipopareva oiso purapaoro, “Viapau oiso Krais-a ragai ro ira roporeva Pauto, oiso ra Jiu-pa irara tuvetuvereve.” <sup>21</sup> ♦ Oa iava rera akeiva “Ari apeisi-a. VII-a profetato Ilaija, eke?” Oa iava oiso puraroepa, “Viapau.” Uva oiso ita puraaepa, “Asi rera vai-a vii ro profetato viigoare tuepaoiveira. Ro ira iava tuariri reo purareva Moses?” Uva voeao vo reoaro pukooro oiso puraroepa, “Viapau.” <sup>22</sup> Osa iava rerare oiso puraaepa, “Ari irouto-a vii? Igei oiso ruipapaiei ra voeao oreoiaro pukoio oea igei aruivoiva, urioie. Apeisi-a oiso osa purapaei ora vii ragare?” <sup>23</sup> ♦ Oa iava Jon oiso puraroepa profetato Aisaia vo reoroaro sirova utuoro, “Ragai-a iravu gisipoaro. Ragoa vo toupaoro raaka tapi oiso keeraparai, Turaro vo raivaaro torevokota.”

<sup>24</sup> Uva Farisi oearovu aruiva ora voea raga iava. Oa iava avaaepa rera iare. <sup>25</sup> Uva rerare oiso puraaepa, “Ari viapau vii-a Krais, eke viapau vii-a Ilaija, ora viapau vii-a profetato. Vosa viapau Krais vii, uva apeisi ragavira vii reesirevora oa iava oirara rutu baptaisparivoi?” <sup>26</sup> ♦ Oa iava Jon voeare oiso puraroepa, “Ari ita, voea baptaispaaveira uukoa raga-ia. Vo ovusa visii vuutaaro-ia iravu toupareveira ira viapau eveipataveira. <sup>27</sup> Ro ira ragai sirova utuparoi. Uva viapau oiso vearto-a ragai, ra rera vaaro iava tasipa tuukea karua.” <sup>28</sup> Vo reoro rutu purareva Betani urui-ia ovaratavu iava uuko ovi iviropavira vo ovio Jodan vo uva Jon oirara baptaispareva.

#### *Jisas Ira-a Sipsip Kakae Pauto Vaaro*

<sup>29</sup> ♦ Uva vokipaua Jon Jisas tuereva osa vokapaoro urioparoepa rera iare. Oa iava Jon oiso puraroepa, “Va kekepata eva tauo puraso kakae Sipsip Kakae Pauto vaaro. Oa vuriara veravere oirara rutu iava vo rasio-ia. <sup>30</sup> Eera ira iava tuariri taviraepa oiso puraoro, Iravu oirato ragai sirova uturovere ira ragaipa reiparoi rutu. Eake iava? Uvare tuariri rutu toureva vo osa kavau asavira ragai touava. <sup>31</sup> Ari ita, viapau vearovira rera-ia tarai rovoraepa. Oa iava urioraepa oirara rutu baptaisisa uukoa raga-ia ro oirato kareke pieoro voeaopa Isrel-pa irara.”

<sup>32</sup> ♦ Oire Jon oiraopa reo vatepaoro oiso puraroepa, “Uraurato tueavora ovusa vuvuiua iava vararoera oiso rutu osa kurue rera kukuearo ariaraaro toupasa. <sup>33</sup> ♦ Ari ita, viapau rera-ia tarai rovoraepa vo ovusa ro ira ragai arureva oirara rutu baptaisisa uukoa raga-ia. Ira ragai tavirevora oiso puraoro, Uraurato kekerivere. Ira vararovere iravu kukuearo

♦ 1:14: Jen 3:15; Re 19:13   ♦ 1:17: Ro 3:24   ♦ 1:21: Diu 18:15   ♦ 1:23: Ais 40:3   ♦ 1:26: Ap 1:5

♦ 1:29: Ais 53:7   ♦ 1:32: Mt 3:16; Mk 1:10; Lu 3:22   ♦ 1:33: Ap 1:5

ariaraaro iare oirato. Eera ira oirara baptaispareverea rara aue-ia Tugoropato Uraurato. Oa iava aue-ia vukupaaverea Uraurato vo goruaro. <sup>34</sup> Uva ragai raga rera kekeava. Oa iava rera iava tavitaviparai oiso purapaoro, Oiraopavira rutu, uvare Pauto Oviitoaaro-a rera ro-ia.” Oiraopavira rutu Jon osa oiso puraroepa.

### *Jisas Disaipel Resura Oureva*

<sup>35</sup> Oire uva ovokivu vokipakouaro-ia Jon aitereivu tapo disaipeltoarei rera vaitereiaro toreroepa. <sup>36</sup> Uva voa-a vo uvava Jisas tuereva ovusa vokapaoro urioparoepa. Oa iava Jon oiso puraroepa, “Eva Sipsip Kakae Pauto Oviiaro.” <sup>37</sup> Uva disaipeltoarei rera uvusiva ovusa oisi puraroepa oiso. Oa iava Jisas sirova utusa avasiepa. <sup>38</sup> Uva Jisas vaiterei akesa ora poreroepa ovusa rera sirova utupasiepa. Oa iava oiso puraroepa vaitereire, “Eakere taraapasivoi?” Oa iava rerare oiso purasiepa, “Rabai, ovu-ia touparivoi? Aa vo kepao-ia?” [Ovaisi-a vao, Rabai porearo oiso toupai, Tisato.] <sup>39</sup> Uva vaitereire oiso puraroepa, “Uriosi kekesa.” Oa iava avasiepa vo kepa kekesa voa oa-ia toupareva. Uva voa voeare vokiepa, vo uvare vo resura vuuta rutu-a vao oa-ia rera pousi viropa voa.

<sup>40</sup> ♦ Andru, Saimon Pita araokotoaaro eera iravu vaiterei iava vaitereo aiterea Jon vo reoaro uvusivoiva, avaroepa Jisas sirova utusa. <sup>41</sup> ♦ Uva Andru araokotoare taraa rovosa avaroepa ae Saimon. Oa iava rera tavireva oiso, “Igei Mesaia kekeiovvoi.” [Ovaisia porearo-a vao oiso, Krais.] <sup>42</sup> ♦ Oa iava Andru rera tapo avaroepa Jisas iare. Uva voa Jisas rera kekeoro oiso puraroepa, “Vii-a vao Saimon Jon oviitoaaro. Viigoa vaisiaro perea utupavira oiso, Sifas.” [Ovaisia porearo-a vao oiso, Pita eera Aveke.]

### *Jisas Filip Vaio Roporeva Ora Nataniel*

<sup>43</sup> ♦ Oire uva Jisas Galili iare vokioro Filip kekeoro rera tavireva oiso, “Ragai sirova utuu.” <sup>44</sup> [Uva rera-a Filip ae iava Betsaida-ia, Andru vo uruiaro rutu vaiterei ora Pita.] <sup>45</sup> ♦ Uva Filip Nataniel kekesa avaroepa. Oa iava rera tavireva oiso “Ro ira iava tuariri Moses reoa rigatoreva Reo Taisi-ia. Ora ae tapo profet irara oea rera iava va rigatoiva, eera ira kekeiovorao ro Jisas Nasaret iava Josep oviitoaaro.” <sup>46</sup> Uva oisi-a eisi osa iava Nataniel rerare oiso puraroepa, “Esa pasi oavu avu vai vearoa vai uvupai avu ra Nasaret-ia karekepe, raa?” Uva va-a vao oa iava Filip rerare oiso puraroepa. “Urio ragau kekesa.”

<sup>47</sup> ♦ Oire uva Jisas Nataniel siituepareva ovusa urioparoepa rera iare. Oa iava rerare oiso puraroepa, “Keketa ro-ia Isrel-patoa rutu. Ira-ia viapau kuuvua vai toupaivoi.” <sup>48</sup> Oa iava Nataniel rera akeoro oiso puraroepa, “E apeisi iava ragai-ia maraiuera?” Uva Jisas oiso puraroepa, “Ari ita, vo osa Filip viire keera asavira tourevora ovusa fik ova vituaro-ia touparivora, ovokia-a eva oa-ia vii keke rovoavora.” <sup>49</sup> Oa iava Nataniel oiso puraroepa, “Tisato, vii-a Pauto Oviitoaaro. Vii Isrel-pa irara reraaro rutu Kingto.” <sup>50</sup> Uva Jisas rerare oiso puraroepa, “Vii tavipaavoi vao iava osa vii keke rovoavora fik ova vituaro-ia. Uva va vai-ia pasi oiraopau vao, raa? Uva utupavira oaravu kekepariverea oara vao-ia putepaiverea rara.” <sup>51</sup> Uva Jisas rera ita vorerivira tavireva oiso puraoro, “Oiraopavira rutu eisi osa visii tavipaavoi oiso, Vo utupavira vuvuiua keketaverea ovusa karu piro, ra purapurapa irara ensel keketa voa Pauto voeaaro ovusa voare ipapaave ora voava varapaave Oirato Oviitoaaro iare ragai.”

## 2

### *Iravu Oirato Ira Riako Ouroepa Kena-ia*

<sup>1</sup> ♦ Vo pevapa voki-ia iravu oirato riakova oureva Kena-ia oiso Galili taere sovara-ia. Uva Jisas aakoaro voa kavatao kepa-ia toupaeva. <sup>2</sup> Uva Jisas-re tapo keeraaepa ora igei rera voeaaro disaipel va vao ora oupa pitupitu kekesa. <sup>3</sup> Uva wain ovi opesieiva, aakova Jisas tavieva oiso, “Voeao viapau wain ovi vaiei.” <sup>4</sup> Oa iava Jisas oiso oirare puraroepa, “Riakova, ragai auearo. Viapau oiso vii auearo-a. Uvare ragai vo vuutaaro tugura asavira toupaivoi [ovuuta-ia ragai vaisiaro roroiovira kareke pieavere].” <sup>5</sup> Oa iava aakova

⊗ 1:40: Mt 4:18-22    ⊗ 1:41: Dan 9:25    ⊗ 1:42: Mt 16:18    ⊗ 1:43: Mt 10:1-6    ⊗ 1:45: Hi 11:1-6    ⊗ 1:47: Sam 32:2, 73:1; Ro 9:4, 6    ⊗ 2:1: Jo 4:46

kovopa irara tavioro oiso puraopa, “Vosa eake reo purapareve visiire, uvuipatai ra oisi va sirova ututa.”

<sup>6</sup> Oire uva voa toupaiva aue katai vataro (6) pitokaara avekeara oara-ia Tugoropa Sisu oisoa purapaive vo vavaeara oaiive-ia aue Jiu. Oara oisoa uvuipape vo osa vara uukopaoro vara agasi piepaive oiso uvuivira erao tau (20) galen ora vo peva tau (30) galen aue uuko vo kataiva-ia pitokava. <sup>7</sup> Oa iava varare Jisas voea tavireva oiso, “Uukoara vai kuvuta vo pitokaara rutu-ia.” Uva vara agasi pieiva rutu. <sup>8</sup> Jisas voea tavireva oiso, “Oarai kokota. Ra ro vatesa avata ira aioa-ia tokipa.” Oa iava varava avaaepa. <sup>9</sup> Oire uva rera ro ira vo aio-ia tokiparoepa vo ovi togovireva, ovusa wainvira ora poreepa. Uva viapau taraiparoepa oiso, Ovu-ia vo ovi ouivo. Vo osa voea raga kovopa irara taraippaaepa voeao oea varia uuko kuvupaaepa. Oa iava rera ro aioa-i tokipato rerare ro riako oupato keeraroepa <sup>10</sup> oiso puraoro, “Oirara rutu vearopa oviro wain oviro roo pie rovopaaiveira. Oire ra rirovira ukaioave, ra va isivaaro iava taru wain turi-ia akukuara raga ukaio ragaave. Uva viapau oisi eisi pieri. Uvare vo vuuta-a vao oa-ia veiaropara wain oviro roo pieparivoi oirara rutupa vo oviro oara rukurivo.”

<sup>11</sup> ♦ Oire uva vao rovopora rutu ravotoa Jisas oa purareva oiso Kena urui-ia Galili taere sovara-ia. Oa-ia rera vaaro keraria vo goruaro kareke piereva voeapa. Oa iava voeao disaipelpa irara rera voeaaero rera oirao pieiva rutu.

<sup>12</sup> Uva va vao isivaaro iava Jisas Kapaneam iare tavetereva aakova tapo, ora araoko irara, ora igei disaipel irara. Uva voa ovokirovu-ia vo urui-ia touiova.

*Jisas Voripa Irara Sigureva Tugoropa Kepa Iava Ave Tempel  
(Matyu 21:12-13; Mak 11:15-19; Luk 19:45-46)*

<sup>13</sup> ♦ Vo Tagausapa Vurei Pasova Vureipa Jiu vaaro tutuu pieepa oiso ra karekepe, ovusa Jisas Jerusalem iare iparoepa. <sup>14</sup> Uva voa Rovopora Kepa Tugoropa Kepa Tempel sovara-ia oirara rutu kekereva, ovusa orekerovu-ia voriara ora tuutuupaaepa aue-ia tapo sara kovoro purapaoro bulmakau kare, ora aue sipsip, ora kurue kare, vo kareo okarea-ia oisoa tauo purapaive. Uva voa voea kekereva ovusa paupaaepa oisi eisi vara-ia ora piepaoro. <sup>15</sup> Uva kopirovu kekereva Jisas. Oa iava rera-ia aue purareva ragi vuruko. Osa iava vaia voea oirara tarioreva voava vo Tempel-ia vo kareva aue sipsip ora bulmakau. Uva voeaa varaaero petopetoreva moniara voeao oea moni tavariopaaepa varao tapo tebolara voeaa varaaero. <sup>16</sup> ♦ Uva va-a vao oa iava voeare oiso puraroepa voeao oea sara kovoro purapaiva kurue kare-ia, “Vo kareva kosita viro. Opeita Aite oaa vo kepaaro oiso piepata, Vori oupa kepa.” <sup>17</sup> Uva igei disaipel oreovure rugooiepa oa epao Tugoropa Vuku-ia oa oiso purapapeira, ‘Kasivarivira rugorugoo iraoparaveira vii vo kepaarore oiso vovoupaoro, ra vearovira touve.’

<sup>18</sup> Oire uva va vao kekeivoiva, reipa irara Jiu iava oiso puraaepa, “Eake ravoto rutu-a vao oa-ia igei kareke pierivoiva, uvuipaei ra vii-ia taraiio oiso, Viigoa eva vo reesiva touparivoi oiso piepasa, raa?” <sup>19</sup> ♦ Uva Jisas voeare oiso puraroepa, “Tugoropa Kepa vao Tempel rigapata okepa rara tore pieavere ita vo pevapa voki-ia.” <sup>20</sup> Uva va-a vao oa iava voeaa Jiu oiso puraaepa, “Vo resura tau katai vataro (46) ivaro-ia vo kepao pauiva. Uva apeisi-a? Vo pevavi raga-ia voki uvuipaei ra vo kepao vorevira tore pieri, raa?”

<sup>21</sup> ♦ Jisas vo kepaore Tugoropa Kepa Tempel oisi eisi puraroepa varaua vouao ora rera iava. <sup>22</sup> ♦ Oire vo tore vokiaro vo osa Pauto vorevira tova tapi iava rera tore piereva ovokia-a eva oa-ia igei disaipel rera vo reoarore rugooiepa vao oa purareva. Oa iava Pauto vo rigatoaro oirao pieiova ora vo reo vao oa purareva Jisas.

*Jisas Oirara Rutu-ia Tarairoepa*

<sup>23</sup> Oire uva Jisas Jerusalem-ia toureva va-ia vao Tugoropa Voki Pasova Vurei vaaro. Uva riro irara rutu oravotorovu rutu kekeiva varao oara purapareva voa. Uva varaa-evara oara iava rera oirao pieiva rutu. <sup>24</sup> Osa Jisas viapau oiso voea vo oirao piearo oirao piepareva. Viapau. Oa-a eva vituaro iava viapau oiso voea vavaearo-ia ora tovoroepa.

♦ 2:11: Jo 1:14    ♦ 2:13: Diu 16:1-6    ♦ 2:16: Lu 2:49    ♦ 2:19: Mk 14:58    ♦ 2:21: 1 Ko 6:19    ♦ 2:22: Lu 24:6-8

<sup>25</sup> ✩ Eake iava? Uvare taraiparoepa voea rutu-ia. Viapau oiso vavagisivira toureva ra irai rera tavireve vo oirara vo pitupituroaro iava. Viapau. Ari rera taraiparoepa voea vo sopapro-ia.

## 3

*Jisas Nikodimas Tapo Ora Reoroepa*

<sup>1</sup> ✩ Iravu ro oirato toupareva rera vaisiaro, Nikodimas ratarataa vovoutoa rutu Farisipato. Uva iravu-a voea iava reipa irara Jiu voeaaro. <sup>2</sup> Ira urioroepa Jisas iare vokiaro oiso rerare purasa, “Tisato. Igei taraipaiei oiso, Pauto vii siporevora oiso rutu osa iravu tisato. Ari voa viapau Pauto irai-ia toupareve, ra viapau uvuipa ra vo ravotoro purapareve irai oara purapariveira.”

<sup>3</sup> ✩ Oa iava Jisas rerare oiso puraroepa, “Oiraopavira rutu oiso osa vii tavipaavoi oiso, Vosa ro ira viapau airepavira kavauro, ira viapau uvuiparoi ra Pauto vo Saraaro kekereve ora viapau Pauto vo goruaro sovopareve.”

<sup>4</sup> Oa iava Nikodimas oiso puraroepa, “Apeisi ragavira irai avukaoro uvuiparoi ra vorevira ita kavauro? E pasi uvuiparoi ra vorevira aakova kovuarto-ia koataroera vorevira rera kavaueve ita, raa?”

<sup>5</sup> ✩ Oire uva Jisas rera vo reoaro pukooro oiso puraroepa, “Oiraopavira rutu osa vii tavipaavoi oiso, Vosa viapau uukoa-ia kavau rovoro oirato, ora tapo vosa viapau Tugoropatoa-ia Uraurato ita kavauro, ira viapau uvuipa ra Pauto vo Saraaro-ia koataro ora viapau Pauto vo goruaro sovopareve. <sup>6</sup> Ari ro oirato ira oiravira kavauro eera oiratoa raga. Ari ro ira Tugoropatoa-ia Uraurato kavauro, eera oirato ira sopapro-ia Tugoropato Uraurato toupareveira. <sup>7</sup> Opeita rirovira rutu rugorugoo iraopau vo osa oiso vii tavipaavoi, Vorevira kavauu airepavira. <sup>8</sup> Kiuvu ora rera raga vo ruipaaro sirova utuparoveira uvarovu vuvurepaoro avapaoro. Uva rera vo gurukoaro uvupariveira, ra viapau taraipau oiso, Ovu iava urioparoi, eke ovu-ia avaparoi. Ari ita, oirara rutu uvuipaai ra kiuvu vo goruaro kekepaise. Uva oisi-a eisi osa roroiovira rutu Pauto vo Uauraaro ora rera vo goruaro eveiparivere vo osa vorevira kavaupau, ra airepa rugooro purari.”

<sup>9</sup> Oa iava Nikodimas rerare oiso puraroepa, “Uva apeisi ragavira va vao uvuipai ra karekepe?”

<sup>10</sup> Osa iava eisi Jisas rerare oiso puraroepa, “Ari apeisi ragavira-a va-ia vao? Uvare vii-a Isrel-pa irara tuvetuvepato. Oa iava viapau va-ia vao roroiopeaei, raa? <sup>11</sup> Oiraopavira rutu oiso osa vii tavi iraopavoi oiso, Igei varao-ia reopaei oara-ia taraipaiei. Ora varao iava siposipopaiovoi oara kekeiovora. Osa visii vao vo reore isivapataveira oreoa vao oa iava oiraopavira rutu siposipopaiovoi. <sup>12</sup> Visii tavipaaveira vara iava varao vo rasio iava. Uva viapau vara oirao piepataveira. Vosa visii tavia ita varao iava vuvuiua iava, ra apeisi ragavira vara oirao piepata ita rara, raa? <sup>13</sup> Viapau oiso irai vuvuiua iare iparoepa. Ari Oiratoa raga Oviitoaaro-a ragai ragoa vuvuiua kavuoro vararaepa. Ira raga-a ita ragai Kataito. <sup>14</sup> Tuariri Moses brasva rakoru toorotoa-ia kae pievere kuvala tapi iria purareva. Eisi raga ita osa Oirato Oviitoaaro kae pieverea rara evao parikou iare. <sup>15</sup> Ra oisi iavirava oearovu oirara rutu iava ragai oirao pieive. Ra va iava Tootoo Ovoi ouive.

<sup>16</sup> ✩ “Oreoa vituaro iava oiso toupai, Pauto ora rera vaaro sirao vovou rutu oirara rutupa vatepareveira voeao oea vo rasio-ia toupaiveira. Eva-a oa vituaro iava ro kataitoa raga Oviito voeapa vatereva, oisore ra oirara rutu iava oearovu rera oirao pieive. Ra va iava viapau opesiave. Viapau. Uva uvuipaai ra Opesi Asa Tootoo ouive. <sup>17</sup> Pauto viapau oiso Oviito siporeva oirara rovirieipasa voeao vo rasio-ia oiso osa ro reo rovirieipato ae jas. Viapau. Ari eera siporeva vorevira voea kae piepaoro voea oupasa ora rera iare. <sup>18</sup> Ro ira Pauto Oviitoaaro oirao piepareve ira viapau rovirieia vai. Ari ro ira viapau rera oirao piepareve eera ira opesi ovoirovere rovirieia-ia. Eake iava? Uvare viapau Kataitoa raga Oviito Pauto Oviitoaaro oirao piepareve. <sup>19</sup> Uva va-a vao rovirieia vituaro oa oiso toupai, Aviaviaro oirarapa oa-a vao oa pou pirora vo tuaririvi vo rasio-ia, ovusa oirara rupapa ruipapaaveira. Eake iava? Uvare vuri pitupitu-a voea vaaro. <sup>20</sup> ✩ Uva voeao oea vuri pitupitupa ruipapaaveira

✩ 2:25: Jo 6:61, 64, 13:11   ✩ 3:1: Jo 7:50   ✩ 3:3: Ta 3:5; Je 1:18   ✩ 3:5: Ef 5:26   ✩ 3:16: Ro 5:8   ✩ 3:20: Ef 5:11, 13

oea aviaviava ora upopaaveira oiso reasipaoro, Teapi voea vo pitupituroaro vuriara poeravira karekepape. Eva-a oa iava viapau uriopaaveira aviavia iare.<sup>21</sup> ♦ Ari ro ira oirao pie vovou rutu purapareve ira aviavia iare urioparoveira. Oire ra va iava oirara vearovira rutu rera vurapaive. Ra oiso puraave rerare, Eera ira ora rera vo kovoaro purapareveira Pauto vo rugooaro-ia.”

#### *Jon Poeravira Rutu Siposiporeva Jisas Iava*

<sup>22</sup> Oire uva va vao opesieiva, Jisas rera voeaaro tapo disaipel avaroepa oisore Judia Distrik sovara-ia. Uva voa igei tapo toupaoro oearovu baptaispareva Jisas ora rera vaisiaro-ia. <sup>23</sup> Uva aue tapo Jon Baptais voea rutu tapo baptaispareva vo aue-ia Inonia aue ruvara-ia Selim-ia uva oisoa toupaive riroara uuko oviro. Uva oirara rutu iava oearovu baptaisa ousa urioaepa voa. <sup>24</sup> Vo ovusa Herot Jon tovo asavira toupareva tuukea-ia.

<sup>25</sup> Uva va-a vao oa iava oreorovu kosi pieiva Jon voeaaro disaipel ora iravu Jiupato. Oreoroa-ia ora reopaaepa baptaisa vo pitupituaro iava. <sup>26</sup> Oa iava voea disaipel Jon voeaaro rerare avaaepa. Oa iava oiso Jon tavipaiva, “Tisato, ro-ia oirato ira vii tapo touparevora oiso Jodan-ia iviropavira uva rera iava siposipoparivora, ira-a ro ira oirara rutu iava voea baptaisparevoi ora rera iava. Oa iava voea rutu rera iare avapaae. Ari apeisi viapau oeai uriopaa vii iare?” <sup>27</sup> ♦ Uva Jon voea vo reoaro pukopaoro oiso puraroepa. “Vosa Pauto iraipa viapau kovoai vai vatereve, ra viapau oiratoa vai raga uvuiparo oavu avu vai purasa. <sup>28</sup> Ari ita, visii raga ita vao visiigoa vo reo uvutavora oa puraavora tuaririvi oiso, Viapau oiso Ropoto Krais-a ragai. Ari Pauto ragai ira pierevora. Oa iava iraraera rerapa ro Krais ira ragai sirova uturovere. <sup>29</sup> ♦ Oire vosa irai riakova vai oureve, ra rerapa oirape ro ira oira oureve. Ra sarato toreparo rera gisipoaro uvupasa. Ra oisi iava rorupareve rutu rera uvupaoro rera ro ira riakova oureve. Uva ragai tapo oiso rutu rorupaavoi, uvare sarato oaa ira iare oirara rutu ora gurupaaveira. <sup>30</sup> Ira vaisiaro uvui iraopa ra reiparo, ovusa ragai vaisiaro varapara.”

<sup>31</sup> ♦ Ro ira viara iava urioroera ira oirara rutupa reipa. Ari ro ira rasitoa iava karekero eera ita vo rasio iava rera-a. Ira varao rutu iava vo rasio-ia reoreoparoveira. Ari ro ira vuvuiua iava urioro ira oirara rutu-ia putepareveira eera. <sup>32</sup> Ira varao iava siposipareveira oara rutu kekereva ora vara rutu iava uvureva. Ari viapau irai vara iava vo reoro oupaoro vara-ia goruvira rutu pitupareveira. <sup>33</sup> ♦ Vosa ro ira vo reo oureve, ra va iava goruvira vo reo-ia pitupareve. Ora tapo vosa ro ira iureve vo Pauto vo reoaria, eera-a ira oiraopa pitupitu kareke piepareveira Pauto vaaro. <sup>34</sup> Uva Pauto Oviito arurevora, oa iava urioroera. Oa iava Pauto vo reoaro iava siposipareveira. Eake iava? Uvare Tugoropato Uaurato vatereva Pauto. Oa iava rera-ia vukuparoveira. <sup>35</sup> Ari ita, Pauto Oviito kaviko iraopareveira. Oa iava orekerovu rutu vateparevora rera vavaearo iare. <sup>36</sup> ♦ Ro ira Oviitoaaro oirao piepareve, ira-ia Tootoo Ovoi toupaiveira. Ari vosa ro ira viapau Pauto Oviitoaaro vo reoroaro sirova utuparo, ira-a eera viapau uvuiparoi ra Tootoo Ovoi oureve. Viapau. Ari Pauto vaaro kasipua ira-ia eera toupaiverea opesi asavira rutu.

#### 4

#### *Jisas Riakova Tapo Ora Reoparoepa Sameria Iava*

<sup>1</sup> Vo vuuta-a vao-ia oa-ia oeavu ratarataa vovou irara Farisi oea iava oreovu uvuiva vao oa oiso purapai, Jisas oearovu rutu oupaoro riro irara rutu disaipel baptaisparevoi. Oa-ia Jon-ia puterevoi rutu. <sup>2</sup> Uva viapau Jisas voea baptaispareva. Ari igei raga rera voeaaro disaipel igoa voea oirara baptaispaiova. <sup>3</sup> Uva Jisas oisi oiso-ia tarairoepa oiso, Farisi vo reoaro-a vao oa uvuivoi oiso, Oirara baptaisparevoi Jisas aue-ia Jon putepaoro. Oa iava Judia-ia kavuoro vorevira kareroepa Galili iare. <sup>4</sup> Oa iava vo raivao gaereva oa Sameria-ia vuruvuruiaaro-ia oisoa toupaive.

♦ 3:21: 1 Jo 1:6   ♦ 3:27: 1 Ko 4:7; Hi 5:4   ♦ 3:29: Mk 2:19, 20   ♦ 3:31: 1 Jo 4:5   ♦ 3:33: Ro 4:11  
♦ 3:36: Jo 5:24, 6:47

<sup>5</sup> ♦ Oire uva riro urui-ia karero viropa vao Sameria taere-ia oa oisoa vaisipaive oiso, Saika vo rasio ruvara-ia Jekop oa tuariri rutu vatereva oviitoapa Josep. <sup>6</sup> Ouruia-a eva oa-ia vao uuko oupa riku oisoa toupaive oa purareva Jekop. Uva Jisas vokapaoro avaroepa voare. Oa iava varaua rerare raveraveepa riro kaekae voka-ia. Osa iava vo riku vao uukopa ruvara-ia pauroepa Jisas aue rutu torevokoaro-ia ravireo vuuta 12 klok.

<sup>7</sup> Oire uva voava iriavu riakova Sameria-ia urioopa uukosa. Uva Jisas oirare oiso puraroepa, “Ragaipa uukoa vai. Ragoa rirovira rutu uuko regaparai.” <sup>8</sup> Vo ovusa igei disaipel irara riro urui iare kareio viropa aio vorisa. <sup>9</sup> ♦ Uva va-a vao osa oira o Sameria iava rerare oiso puraopa, “Easi vii-a Jiu-pato? Oea viapau oiso Sameria-pa irara tapo paupaaveira. Uva ragai-a vao Sameria iava. Uva apeisi-a oiso osa iava eisi purauei oiso, Ragaipa uukoa vai. Ragoa uuko rega iraoparai?” <sup>10</sup> Oa iava Jisas oirare oiso puraroepa, “Vosa taraipau Pauto vaaro-ia vatevatea, ra oisi iavirava va iava ro-ia taraiu ira vii areparevoi oiso purapaoro, Ragaipa uukoa vai. Ragoa uuko regaparai. Oire ra oisi iavirava rera vai areri pasi vaore uukoa oa-ia Tootoo Ovoi toupaiveira. Ra oisi iava va iava vii vatereve.” <sup>11</sup> Oa iava riakova rerare oiso puraopa, “Turaro. Viapau baketa vaiei vii iriaiaro, uvare vo rikuo uukopa rokovira rutu toupai. Uva oisi-a eisi osa iava vo uuko eva oa-ia Tootoo Ovoi toupaivoi oa ovu ourivere, raa? <sup>12</sup> Oa-a vao uuko riku oa vatereva igeipa aaoto oaio Jekop. Aue iava uvare rera raga va-ia oisoa ukaioparo ora rera ovii iraraaro tapo, ora bulmakau raguiro, ora sipsip raguiro voeao rera voeapro. Uva vii vai pasi rera vai-ia puteparivoi, raa?” <sup>13</sup> Oa iava Jisas oirare oiso puraroepa, “Ari ita, oiraopavira rutu oirara rutu-ia voeao oea vo rikuo iava ukaiopaaveira. Oea ita vorerivira uuko regapaaveira. <sup>14</sup> Ari vosa irai vao-ia uukoa ukaioro oa vate ruipaparai, ra viapau vorerivira uuko regaparo. Viapau rutu. Oire uva vo uukoa-a vao oa vate ruipaparai, oa oiso rutu toupai tuputupue riku. Oa rera iava sopaua-ia toupaiverea. Oire ra voava vusivusipaive rerapa tootooa vatepaoro vao oa uvuipai toupaive vo vokiara rutu-ia.” <sup>15</sup> Oa iava riakova rerare oiso puraopa, “Turaro. Vo uuko vate iraori ragaipa. Oa iava viapau uvuiparai ra voreripavira uriopara uukopasa vo rara uuko regapara.”

<sup>16</sup> Osa-a eisi osa iava Jisas oira tavireva oiso puraoro, “Avau vatuato oarare keerasa. Oa iava vorevira vore voreuvera.” <sup>17</sup> Oa iava Jisas aatoeva oiso puraoro, “Viapau ragai oiratoa vai oaa.” Osa iava Jisas oirare oiso puraroepa, “Vii-a ita vao viigoa oiso purauei, Ragai viapau oiratoa vaiei. Ari ita, uva oiraopavira oisi ita eisi purauei. <sup>18</sup> Eake iava? Uvare voari tuaririvi vo vavae rutuva oirara oisoa tou rovopari. Oire uva eera ita irava touparivoi, viapau oiso vii reraaro rutu-a. Ari ita, evo reo vii vaaro oiraopai.” <sup>19</sup> Uva rerare oiso puraopa, “Turaro. Ragai vii-ia tarai iraorai oiso, Profetatoa rutu vii, viigoa ragai vo rugooaro sisiro iraopari. <sup>20</sup> ♦ Ari ita, voari tuariri rutu voeao Sameria-pa irara igei aao irara oaio oisoa vo pukuio-ia ora gurupaave lotupasa. Ari visii Jiu oiso purapatai, Vo uva Jerusalem-ia toupaiveira uva oirara uvui iraopai ra voa Pautoa-pa lotupaave.”

<sup>21</sup> Oire uva Jisas oiso puraroepa, “Riakova, ragai vo reoaro oirao pie iraori. Ovuutavu urioperea taru oa-ia viapau oiso lotutaverea Aitepa vo pukui raga-ia eva. Ora viapau oiso rerapa lotupataverea tapo Jerusalem raga-ia. <sup>22</sup> ♦ Visii ropa lotupataveira ira-ia viapau oiso taraipataveira. Ari igei Jiu igoa ropa lotupaioveira ira-ia taraipaioveira. Eake iava? Uvare Pauto vo kovoaro-a vao vorevira oirara oupara ora rera iare ro iavirava ira Jiu-pa irara iava karekeroepa. <sup>23</sup> Ari ita, tutuu pievoi vo vuutapa eva oiso ra karekepe uva karekei. Ra oirara rutu oiraopavira rutu lotupaave vuurapa vaisi purapaoro ora voea vo urauraro oaive iavirava Aitepa ora varao voea vo vovouroaro oiraopara. Oeare taraapareveira Aite evoea oea oisi eisi ragavira rera-ia vuurapa vaisi purapaiive. <sup>24</sup> Pauto-a uraurato. Oa iava uvuipai oirara rera-ia vuurapa vaisi pura iraopaiive. Vo osa ora voea vo urauraroaro iavirava vuurapa vaisi pura iraopaiive, ora voea vo vovouroaro oiraopar rutu.” <sup>25</sup> Uva riakova rera tavioro oiso puraopa, “Taraiparai oiso, Mesaia uriorovere ro ira vaisipaiveira oiso, Krais. Vosa uriorovere, ra vigei tavireve orekerovu rutu iava.” <sup>26</sup> Uva Jisas oira tavireva oiso, “Easi ragai raga-a vao ragoa vii tapo ora reoparai.”

<sup>27</sup> Uva oisi-a oiso osa puraroepa ovusa rera voeaaro disaipel igei igoa vorevira urioiepa. Oa iava rirovira rutu rera-ia rugorugoo iraopaeipa, uvare oira tapo eira riakova ora reoparoepa. Uva viapau oiso irai oira akepareva oiso, “Eake vai ou ruipapauei?” Eke, “Eakere vii Jisas eira tapo ora reopaei?” <sup>28</sup> Oire uva oira o riakova ora oira oiraaro kavuoro uuko kaepava pitokava kareopa riro urui iare oirara rutupa tavitavisa. <sup>29</sup> Oiso puraopa, “Avoeao, uriota oirato kekesa ira ragai vo pitupituaro sisiro iraorevo opitupitua oisoa purapaa voari tuariri. Oa iava ragai tavirevo. Esa pasi Krais vai-a vigei muvetuvepatoaaro, eke?” <sup>30</sup> Uva va-a vao oa iava riro urui iava urioaepa rera kekesa Jisas.

<sup>31</sup> Ovuuta-a vao oa-ia uriopaaera ovuuta-ia igei disaipel rerare oiso puraiepa, “Tisato. Tepa aio iraori taru.” <sup>32</sup> Oa iava igeire oiso puraroepa, “Ragai oaravu aioara toupai. Oara-ia viapau taraipatai.” <sup>33</sup> Uva igei raga disaipel oiso ora reopaeipa, “Easi pasi irai vai rerapa oai aioa vai siporevo?”

<sup>34</sup> Oa iava Jisas igei tavioro oiso puraroepa, “Ragai vaaro-a vao-ia aioa oa oiso toupaivoi, Ro vo ruiipaaro sirova utuparai ira ragai arureva. Eva oa oiso toupai osa vao aioa oa aiopaavoi. Uva uvui iraoparai ra rera vo kovoaro opesi pie rovoa.

<sup>35</sup> “Visii vao visiigoa oiso purapataveira, Vo resuraei touvira aue kekira, ra aio oupa vuuta karekepe. Ari oiso rutu visii tavipaavoi, Vuravurata ra riro irara keketa oea uriopaaeira ragai iare. Voeao oea sopaura oaiive oiso toupai osa vo kuero okueroa vioro varavaravira toupai. Oea oiso rutu toupai, ragai oirao piesa aeppaai. <sup>36</sup> ♫ Voeao oea ragai vo reoroaro iava sipoipapaiveira oea oiso toupaiveira takuraara vikipaiveira. Oea oiso toupai ragai vo reoroaro paupa irara vo oirara sopapro-ia. Ousa aia oearovu ita oea ragai vo reoroaro aviavi piepaiveira oea oiso toupai kuero rotupa irara. Oire vo reo uvupaoro oearovu ragai oirao piepaive. Ra va iava Tootoo Ovoi ouive. Eva-a oa vituaro iava voea takuraara paupa irara ora kue rotupa irara voea rutu rorupaive, uvare ragai-ia oirao pieppai. Eva rorua voearei vo kovoreiaro iava. <sup>37</sup> Oiraopavira rutu oirara oiso purapaaveira, Iravu raga-a vo kovo paupato ari iravu-a vo kovo kuearo rotupato. <sup>38</sup> Oisi-a eisi osa iava visii aruavora vo kovoro kueroaro rotupasa okovoroa evara viapau oiso pau rovotavora. Ari oeavu raga vo kovoro pau rovoivora. Va-a vao osa oirara sipoipopro rovoivora oeavu Vearo Siposipo ragai iava. Vo osa oirarapa Vearo Siposipo aviavi piepatavora. Oa iava ragai-ia oirao pieppivora.”

<sup>39</sup> Oire uva va-a vao oa iava riro irara Sameria vo uruio iava voea oira reoroaro uvuoro Jisas oirao pieiva rutu. Eake iava? Uvare oira eira oiso puraopa, “Ira ragai tavitavirevoi varao iava muariri oisoa oara purapaa.” <sup>40</sup> Oisi-a eisi osa iava voea Sameria-pa irara urioaepa rera iare. Oa iava rera pieoro oiso puraepa, “Igei tapo vo tou rovori.” Uva vo vokirei-ia tou rovoreva vo urui-ia voea tapo. <sup>41</sup> Osa iava riro irara rutu rera raga vo reoroaro uvuoro rera-ia oirao pie iraoiva rutu. <sup>42</sup> ♫ Uva oirare oiso puraepa, “Viapau oiso vii raga vo taviaro uvuoro eera oirao pieiovovi oirato. Viapau. Ari igei rera vo reoroaro uvuiovovi. Oa iava taraiae oiso, O ari rera raga ro-ia ira oirara rutu vorevira oureverea vo rasio iava ora rera iare.”

#### *Jisas Reito Kovopatoaaro Oviitoaaro Ravotovira Tore Pierava*

<sup>43</sup> Uva vo vokirei vareo opesiepa oarea isivaaro iava Jisas vo uruio kavureva Galili iare avaoro. <sup>44</sup> ♫ Uva va-a vao osa Jisas sipoipapaoro voeare oiso puraroepa, “Profetato ro reo topa piepato ira viapau vaisia vaiei rera oaiaro vo rera vo taerearo rutu-ia.” <sup>45</sup> Osa iava Galilia kare uvirosa avaroepa. Uva voa Galili-pa irara rera-ia roru iraopaeipa, uvare voea iare avaroepa. Uva voea tapo varao kekeiva oara purareva voa evoa Jerusalem-ia vo vokio-ia Tugoropa Voki oa-ia Tugoropa Vurei pura piropa aue Pasova vao Tagausapa Vurei.

<sup>46</sup> ♫ Uva voava ita aue iare karero viropa Kena-ia vo Galili taere sovara-ia. Ouruia-a eva oa-ia uukoa wainvira porereva. Uva Kapaneam urui-ia iravu ofisato reito toureva. Ira oviitoaaro-ia upia toupaiva. <sup>47</sup> Uva Jisas iava uvureva ovusa Judia iava ora vaseroepa Galili iare uriooro. Oa iava rera iare avaroepa goruvira rutu rera tavisa, oiso ra vararo rera oviitoaaro porete piesa irapa tutuu pieppa oiso ra kopiro. <sup>48</sup> ♫ Uva Jisas oiso rera

❖ 4:36: Ro 1:13 ❖ 4:42: 1 Ti 4:10 ❖ 4:44: Mt 13:57-58 ❖ 4:46: Jo 2:1-11 ❖ 4:48: Dan 4:2

tavireva, “Vosa visii vao ravoto kovoro viapaua vai kekepata, ra viapau oirao pie vovouro vai purapata.” <sup>49</sup> Oa iava rera ro ofisato rerare goruvira rutu oiso puraroepa, “Reito. Ikauvira varau. Teapi oviitoa oaa kopiro.” <sup>50</sup> Uva Jisas oiso puraroepa rera aruoro, “Avau oviitoara tootoovira touparevoi.” Uva Jisas vo reoaro oirao piepaoro vorevira voreroepa. <sup>51</sup> Oire uva vaova kareparoepa ovusa kovopa irara rera voeaaro raivaaro rerava aivarovala. Oa iava voa oiso rera taviiva, “Oviitoara vorevira tootooroi.” <sup>52</sup> Uva oiso voea akereva, “Aa vo vuutao-a vao oa-ia gare visivi tootooroi vorevira?” Oa iava oiso puraaepa, “Ari aruvea aue-ia ravireo sipoko. Oa rutu-ia upia rera kavuovo.” <sup>53</sup> Oa iava aiteto oiso tarairoepa, O ari vo vuuta raga ita-a vao oa-ia ragai tavirevo oiso puraoro, “Oviitoara vorevira tootooroi.” Oire uva oisi-a eisi osa iava Jisas oirao pierava ora voeao rera voeaaro, oea tapo Jisas oirao pieiva rutu. <sup>54</sup>  $\diamond$  Uva Jisas Judia iava urioroepa vore Galili taere-ia. Uva va vao erao pie ravoto oa purareva voa vo Galili taere-ia.

## 5

*Jisas Iravu Oirato Vorevira Porete Pierava Toko Rovua Vao Vo Betesa*

<sup>1</sup> Oire uva va-a vao opesieiva, oavu Tugoropa Voki Jiu vaaro pou piropa. Oa iava Jisas Jerusalem iare iparoepa.

<sup>2</sup>  $\diamond$  Uva voa-a vo Jerusalem-ia uva riro ratao toupai sipsip ragui vaaro. Uva oavu gareavi toko rovu toupaiveira oa oiso vaisipaiveira, Betesa vo Hibru reo-ia. Uva voa vo rovu vatuar-ia ovavaevu aue kiuvupa keparo toupaiveira. <sup>3</sup> Uva vo keparo-a varao kiuvupa keparo oara-ia riro irara voosi irara, ora voearo vuri kokoto irara, ora voearo oearoa oisoa keran upiaro iava kopiipaave. [Uva auere voa oisoa tuepaoro toupaive vo osa ora vurevurepe uuko rovu. <sup>4</sup> Aue iava uvare ovokirovu-ia Turaro Pauto reraaro purapurapato ensel oisoa varaparo vo rovu sovara iare vao toko rovu voava va vurevurepasa. Oire ra vo rovu vao ora vurevurepe. Ra iravu ira rovoro vo rovu sovara iare, vosa apeisi rera vaaro upia, oa iava vorevira vearovoro.]

<sup>5</sup> Uva va-a vao osa oisoa iravu voa toupareve vo kiuvu oupa kepa-ia. Ira vo upiaaro aue rutu-ia uvviepa vo peva tau vo peva vatara ivaro rutu (38 ivaro). <sup>6</sup> Uva voa Jisas vo gerepa kekereva. Osa iava rera-ia oiso tarairoepa, Riro kaekaevira rutu oisoa upiaparo. Oa iava Jisas oiso rera tavireva, “E oiso ruipapau ra va iava eva vii vo upiaaro vorevira vearovira karekeu?”

<sup>7</sup> Oire uva rera ro upiapato rera vo reoaro pukooro oiso puraroepa, “Turaro. Viapau oiso irai ra ragaivi siporeve uuko rovu sovara-ia ragai tovosa vosa ora vurevurepe. Ari ragaivi raga ora akeake ragaparaveira oiso ra avara. Vo ovusa oearovu ragai-ia putepaoro voare ava rovopaaave.”

<sup>8</sup>  $\diamond$  Uva oisi-a eisi osa iava Jisas rera tavireva oiso, “Toreu. Ra urua ouoro vava vokari.”

<sup>9</sup>  $\diamond$  Oire uva ikauvira raga rera iava varaua vearo ovoiepa. Oa iava vokareva urua ouoro vao rera vaaro vava avasa.

Oire uva Sabat voki-a vao. <sup>10</sup> Oa iava Jiu rerare ro ira vorevira poreteroepa oiso puraaepa, “Auoro. Sabat voki-a vao. Oa-ia viapau rutu uvui iraopaei ra ora vii vo uruaro kaepari vo voki-ia vao Tugoropa.” <sup>11</sup> Oa iava voeare oiso puraroepa, “Easi ro-a ira ragai vorevira porete pierenvoi ira oiso ragai tavirevoi, Vii uruaro ouoro vava vokari.” <sup>12</sup> Oa iava rera akeiva oiso, “Iroutoa rutu-a ira vii tavirevoi oisi osa iava vii vaarova urua ouoro vava vokari, raa?” <sup>13</sup> Oire uva rera ro ira vorevira poreteroepa ira viapau oiso tarapiroepa. Uvare riro irara rutu oirara oea-ia ora riroirooro Jisas avaroepa.

<sup>14</sup>  $\diamond$  Uva utupa visivi Jisas rera tavireva Tugoropa Kepa-ia Tempel rera kekeoro oiso, “Uvuri. Vorevira poreteue. Uva viapau rutu uvuipaei ra ita vorevira vuria vai purari ita. Viapau rutu. Teapi pute pie upia vai rutu ita vii-ia karekepe.” <sup>15</sup> Osa iava avaroepa Jiu tavisa oiso, “Rera-a ro oirato ira ragai vorevira porete pierenvorao aue Jisas.”

<sup>16</sup> Oire uva oisi-a eisi osa iava rovoaepa rera Jisas vuri piepaoro, uvare Sabat voki-a oa-ia va eva purareva. <sup>17</sup> Uva Jisas voeare oiso puraroepa, “Aite oaa vokiara rutu-ia

$\diamond$  4:54: Jo 2:11, 23     $\diamond$  5:2: Nea 3:1     $\diamond$  5:8: Mt 9:6     $\diamond$  5:9: Jo 9:14     $\diamond$  5:14: Mk 2:5

*kovopareveira. Osa raga ita ragai tapo kovopaavoi ita.”* <sup>18</sup> ♦ Uva va-a vao oa iava voea Jiu oiso vovoupaaepa rutu ra Jisas kopii pieive rera upooro. Eake iava? Uvare viapau oiso vao ragapa-a Sabat voki vo taisiaro reo goru. Ari ue tapo uvare oiso puraroepa, Pauto-a rera rutu Aitetoaaro. Uva vo reo-a eva oa-ia oiso rutu rera raga ora kareke pieparoepa Jisas, Oiso rutu toupare osa Pauto.

#### *Pauto Oviitoaaro-ia Reesia Toupai Kovo Purapasa*

<sup>19</sup> Oire uva Jisas voeare oiso puraroepa ora rera iava, “*Oiraopavira rutu oiso-ia osa visii tavipaavoi, Viapau uvuiparai ra ora ragai vo vovouaro iava oavu avu vai puraa. Viapau rutu. Ari vao raga-a oa purapaa oa kekeava ovusa Aitetoa oaa va purapareva. Oire ra ragai tapo ita rera Oviitoaaro ragoa uvuiparai oisi raga va purapaa.*

<sup>20</sup> Aite ruipa iraoroepa ragaipa, ra va iava ragai kareke pieрева varao iava oara purareva. Uva ita, ragai tavirevere okovorou iava ita riopara rutu oara varao-ia putepaivere rutu. Ra va iava rirovira rutu rugorugoo iraopata vara-ia tavetavepaoro. <sup>21</sup> ♦ Aite ro ira kopii irara vorevira tootoo piepaoro voea vatepareveira tootooa vorevira. Uva oisi raga ita-a eisi osa oearovu vatepaavoi tootooa vorevira voeaopa oea reesipaaveira ora ragaipa. <sup>22</sup> ♦ Aite viapau irai rovirieipareveira taavaa vai-ia kort. Oara rutu varao rovirieia purapa kovoro oara vaterева ragaipa. <sup>23</sup> ♦ Oa iava oirara rutu uvui iraopaa ra ragai vaisiaro kae piepaive osa raga ita oiso uvuipaa osa Aiteto vaisiaro kae piepaiveira. Ro ira viapau ragai vaisiaro kae piepareve, eera ira viapau Aite vaisiaro kae pieparevoi ro ira ragai arureva vore rasito puaaro-ia.

<sup>24</sup> “*Oiraopavira rutu oiso osa visii tavipaavoi oiso, Ro ira ragai vo reoaro uvupareve, eera-a ira ro oirao piepareve ita ira ragai arureva oa iava urioraera, ira-ia Tootoo Ovoi toupaiveira rutu. Ira ita viapau oiso kortua-ia karekeroverea. Viapau. Ari ira kopiia-ia puterevora vore ivirooro Tootoo Ovoi vo raivaaro-ia.*

<sup>25</sup> “*Oiraopavira rutu oiso osa visii tavipaavoi oiso, Vo vuuta-a vao oa karekesa auepapeira. Uva vo vuuta-a vao oa karekeiei vo vokia-ia oa-ia kopii roro tou irara Pauto Oviitoaaro gisipoaro uvuivere. Oire ra voea evoea ragai vo reoaro uvuoro tootooave rutu.*

<sup>26</sup> Ari Aite-a Tootooa rutu vituaro, uvare rera raga ita. Oa iavirava gorua vaterева ragaipa rera Oviitoaaro. Oire uva ragai tapo ita oisi raga ita toupaavoi osa rera, Tootooa rutu vituaro. <sup>27</sup> Ragai-a vao Oirato Oviitoaaro ragoa roporeva Pauto. Oa vituaro iava Aite ragai vaterева reesia oirara rutu rovirieipasa taavaa-ia kort. <sup>28</sup> Visii vao opeita rugorugoo iraopata vaore oa oiso purapai, Tutuuvoi vo vuutao oa-ia oirara rutu tova uruiro iava ragai gisipoaro uvuivere. <sup>29</sup> Uva tova uruiro iava kosipaa piroverea voeao oea vearo pitupituro purapaiveira. Oea vorevira toreaverea taru Tootoo Ovoi rutu ousa. Ari voeao oea vuri pitupituro purapaiveira oea tapo ita vorevira toreaverea voeao vo pitupituroaro vo voriaro ousa taavaa-ia kort.

#### *Oearovuei Oea Oisoa Jisas-re Rutu Vaaro Rutu Vituaro Iava Oiraopavira Siposipopaiva*

<sup>30</sup> ♦ “*Viapau rutu uvuiparai ra oavu avu vai puraa ora ragai vo vovouaro iava. Vo reo oa uvuava Aite ruvara-ia oreoa-a eva raga ita sirova utuparaverea oirara rovirieipaoro kortua-ia. Uvare ragai vo rovirieiaro-a torevokoa rutu. Uvare viapau oiso ora ragai raga vo ruipaaro sirova utuparaveira. Ari ro raga vo ruipaaro sirova utuparaveira ira ragai arurevora vore.*

<sup>31</sup> “*Vosa ora ragai raga vo reoaro iava siposipopaa, ra va iava vo reo eva viapau oiso oiraopape.*

<sup>32</sup> Ari iravu toupare ro Aite ira uvuiparoi ra ragai vo reoaro iava oiraopavira rutu siposipopareve. Taraiparai oiso, Rera vo reoaro oiraopai ragai iava, eisi osa oiraopai rutu.

<sup>33</sup> “*Voari tuariri Jon iare oreovu sipotavora ragai iava akesa. Oa iava oiraopa reo rutu iava siposiporevora.*

<sup>34</sup> ♦ Ragai viapau oiso rerare rugorugoo iraoparai rutu, Irouto ro ira ragai iava siposiporevora. Viapau. Ari oiso ruipa iraoparai ra Pauto visii vorevira oureve. Eisi osa iava vo reo puraavoi vo reo iava Jon vo reoaro oisi osa ra rera vo reoarore rugoopata. <sup>35</sup> Jon oiso tourevora osa vuravu aviavipava. Osa iava eisi oirarapa aviavia vaterевора. Oire uva oisi iava visii iava sopaura vearoepa. Oa iava poteku vuutavi-ia rorutavora rera vo aviaviaro-ia.

<sup>36</sup> “*Ari oaravu epao oara Jon-ia putevoi vo osa ragai iava oiraopavira siposiporevora. Oara oiso toupari, Varao kovoara oara vaterевора Aite ragaipa oisore ra vara purapaa. Oara iava evara oirara tavipaiveira ra oiso taraipaave, Aite ragai arureva oa iava urioraepa.*

<sup>37</sup> ♦ Uva Aite tapo ira ragai

✉ 5:18: Jo 7:1, 19, 10:30-33    ✉ 5:21: Ro 4:17, 8:11    ✉ 5:22: Ap 17:31    ✉ 5:23: 1 Jo 2:23    ✉ 5:30: Jo 8:16, 4:34    ✉ 5:34: 1 Jo 5:9    ✉ 5:37: Diu 4:12; 1 Ti 1:17

rutu iava siposipoparevora. Ari viapau oisoa rera gisipoaro uvupata gare visivi. Viapau rutu. Ora viapau oisoa rera puaaro kekepata. <sup>38</sup> Uvare tapo rera vo reoaro viapau visii sopaaaro-ia toupaiveira. Eake iava? Uvare viapau eera vo reoaro oirao piepataveira Aite ira ragai arureva. <sup>39</sup> Ari ita, riro goruvira rutu Pauto vo rigatoaro aue Tugoropa Vuku vieipaoro va-ia tarai iraopataveira oiso rugorugoopaoro, ra oisi va iavirava Tootoo Ovoi oupata. Origatoa raga-a eva oa ragai rutu iava viaevira rutu siposipopaveira, <sup>40</sup> vo osa ragai iare urio arapareasipataveira vo Tootoo eva oupa arapa.

<sup>41</sup> “Viapau oiso ruipaparai ra irai ragai rei vaisi piepareve vova oirara. <sup>42</sup> Ari visii-ia taraiparaveira visiigoa sopaaaro-ia Pautoa-pa siraopa vovou viapau toupaive. <sup>43</sup> Aite oaa vaisiaro-ia urioraera. Uva viapau ragai vo reoaro uvupataveira. Vosa irai urioro vo ora irai raga vaisiaro-ia, ra irai vo reoaro uvuta. <sup>44</sup> Visii vao visiigoa oearovu raga ruvara-ia vuurapa vaisipa ruipapataveira. Vo osa viapau oiso rugoopata oiso, Vearopai vosa oai purape ra va iava Kataitoa raga Pauto ruvara-ia vuurapa vaisi oupe. Oire uva apeisi ragavira-a oiso osa iava uvuipatai ra ragai oirao pie iraopata, raa? <sup>45</sup> ♦ Viapau oiso ra ragai-ia rugorugoo ragapata oiso, Visii iava gasiavere Aitepa. Viapau. Ari ro raga Moses ira oirao piepataveira oiso, Ira visii tauvarevere, ira-a eera ira visii iava gasirevere. <sup>46</sup> Vosa rera vo reoaro oirao pietavori Moses, oire ra oisi ragavira ragai oirao piepatavori tapo. Eake iava? Uvare rera-a eera ira ragai iava vo reo rigatoreva. <sup>47</sup> Ari vosa viapau vo reo oirao piepata oa rigatoreva, ra apeisi ragavira ragai vo reoaro oirao piepata, raa?”

## 6

*Jisas Vo Vavae Tukupa (5,000) Aio Vateroepa  
(Matyu 14:13-21; Mak 6:30-44; Luk 9:10-17)*

<sup>1</sup> Uva vo reo opesieiva, Jisas toko rovu iava ovaratavu iare urioroepa. Vao toko rovu Galili-ia oa vaisipaveira ovaisivu iava vao oiso, Taibirias. <sup>2</sup> ♦ Uva riro irara rutu riro ravotoro kekeiva oara purareva upiapa irara-ia. Osa iava rera sirova utupaaepa. <sup>3</sup> Uva-va uva Jisas iparoepa pukuia iare. Oa iava voa pauroepa igei tapo ae disaipel. <sup>4</sup> Oire uva Tagausapa Vurei Pasova vo vuutaaropa tutuu pieepa oiso ra karekepe. Evo voki-a Tugoropa Voki Jiu vaaro. <sup>5</sup> Uva Jisas vuravurapareva. Oa iava riro irara rutu oirara kekereva ovusa utupaaepa rera iare. Osa iava Filip akereva oiso puraoro, “Ovu-ia breteara vai voripai voeaopa oirara, ra oarai aioive?” <sup>6</sup> ♦ Uva oisi-a eisi osa Filip akeakeparoepa vo osa rera raga taraiparoepa vao-ia oa purapare rara.

<sup>7</sup> Uva va-a vao oa iava Filip rerare oiso puraroepa, “Vosa aue-ia erao vovoto kina (K200) bret vorivio, ra pasi viapau vai voea-ia uvuipe vo osa garepa visivi ouave voea voeao-ia.”

<sup>8</sup> Uva iravu disaipelto Andru aue araokotoaaro Saimon Pita, ira oiso puraroepa rerare, <sup>9</sup> ♦ “Iravu viovokoto ira vo touparevoi ira varaaro vo vavae epao bret ora vaiterei ataritoarei. Ari ita, uva viapau vai uvuipai pasi voea-ia voeao-ia riro irara rutu.” <sup>10</sup> Oa iava Jisas oiso puraroepa, “Voea tavita, ra pauave evoa isiso kou ivara-ia.” Uva voea rutu uvuiaro-a voeao-ia oiso-ia, vo vavae tuku rutu uvuiaro (5,000). Uva voa-a evoa uva pauaepa.

<sup>11</sup> Oa iava breteara ouoro Jisas vara-ia vearo vaisi purareva. Oa iava voeapa oirara vara roo piereva. Uva oisi raga ita ataritoarei piereva voeao roo pieoro, voeao vo ruiparoaro uvui pieoro. <sup>12</sup> Uva uvuivira aioivoiva, igei disaipel tavireva oiso, “Aio ururukoro guruta evara oara touvira toupaivoi. Teapi oarai opesiko ragape.” <sup>13</sup> Oa iava vara guruguruiova. Uva katai tau erao (12) pekuriara agasiepa vo vavae iava vao bret vo ururukoro-ia oara iava aiooro vukuaepa.

<sup>14</sup> ♦ Oire uva vo ravoto vao kekeivoiva, voeao oiso puraaepa, “Oiraopavira rutu rera-ia ro-ia, Profetato ira vo rasio iare urioroera irare tuepavioveira.” <sup>15</sup> ♦ Uva Jisas voeao-ia tarairoepa oiso, Rera ousa uriopaa orae voeapa, ra oiso toupareve, Voea reraaro reito king. Uva va-a eva oa iava rera raga pukuia iare voreroepa.

*Jisas Toko Rovu Ivara-ia Vokapareva  
(Matyu 14:22-23; Mak 6:45-52)*

♦ 5:45: Ro 2:17; Jo 9:28    ♦ 6:2: Jo 2:11    ♦ 6:6: 2 Ko 13:5    ♦ 6:9: 2 Kin 4:43    ♦ 6:14: Jen 49:10; Diu 18:15,  
18    ♦ 6:15: Jo 18:36

<sup>16</sup> Oire uva vuri eveveia-ia Jisas voeaaro disaipel igei toko rovu iare varaipepa. <sup>17</sup> Uva uvuoia kaeio viropa. Oa iava va-ia toko rovu ivara-ia avaiepa, uvare oiso vovoupaiepa ra Kapaneam iare avaio. Uva rupaepa ovusa Jisas voa igei iare pou viro asavira toureva. <sup>18</sup> Uva voa riro gorutoa rutu kiuvu purepato igeire vusireva. Ira uuko rovu sigasiga piereva. <sup>19</sup> Uva voa rera-ia tuepaoro avapaiepa aue uvuiaro-ia vo peva vuuta, eke vo resura vuuta rutu-ia (6 kilomita). Uva voava ora poreiepa Jisas aivar rera kekesa, ovusa toko rovu ivara-ia vokapaoro utuparoepa. Uva voa-a vo uva uvuoia iare tutuu pierevoiva, uriripaiepa. <sup>20</sup> Oa iava voa igeire oiso puraroepa, “*Asi ragai-a vao. Ragoa visii iare uturai. Opeita uriri ragapata.*” <sup>21</sup> Oire uva voare uvuoia rera kae pieoro rera-ia rorupaiova ovusa ikauvira uvuoia vo pou piropa uvare avapaiepa.

#### *Jisas-re Taraapaiva Oirara*

<sup>22</sup> Uva vokipavira voea oirara touvira toupaiva iviropa varata-ia vao toko rovu iava. Uva Jisas viapau vo uvuoia kaero viropa igei tapo disaipel. Viapau. Ari igei raga vo uvuoia ipaiepa avaoro. Eisi osa iava oirara taraiaepla, uvare katai uvuovi raga oa voa touva. Oa iava Jisas viapau voea tapo avaroepa va-ia. <sup>23</sup> Ari ita, vo osa oaravu uvuoara Taibirias iava vara voavi ruvara iare vera piropa vovio uva Turaro breteara-ia vearo vaisi purareve, vao oa aioiva. <sup>24</sup> ♦ Oire uva voea oirara rutu roroaepa Jisas-re ora disaipel. Uva viapau oiso voea kekeiva osa voa toupaiva. Oa iava ipaaepa uvuoara-ia Taibirias iava oara-ia urioaepa. Uva aue iare Kapaneam-ia avaaepa rerare Jisas voa taraasa.

#### *Jisas-a Bret-ia Vuvuiua Iava Va-a*

<sup>25</sup> Oire uva rera Jisas kekeiva iviropavira toko rovu-ia. Oa iava rerare oiso puraaepa, “Tisato. Aa vo vuutao iava vo vokio-ia vore uriouei?” <sup>26</sup> Oa iava Jisas oiso puraroepa, “*Ragai oiso oiraopavira visii tavipaavoi, Viapau oiso ra varare varao rugorugoopata ravotoara oara keketavo oa iava ragaire taraapatavoi. Viapau. Ari oa aiotavorao ita eva bret oa iava visii iava kovuara vukuerao. Eva-a oa vituaro iava ragaire taraapatavoi.*” <sup>27</sup> ♦ Viapau oiso ra kovopata vo aio eva oupasa oa vuripapeira. Viapau. Ari vo aio ou iraopata oa vokiara rutu-ia toupaiveira. Eva-a tootooa vo aioaro, oa vokiara rutu-ia toupaiveira vearovira. Vo aio Oirato Oviitoaro ragai oa vateaverea visiipa. Aue iava uvare Pauto Aite ragaipa reesia vatereva.”

<sup>28</sup> Oa-a eva oa iava rerare oiso puraaepa, “Eake vai uvuipai ra oai puraio, ra Pauto vo kovoaro puraio?” <sup>29</sup> ♦ Oa iava Jisas voeare oiso puraroepa, “Pauto vo kovoaro oiso toupai, Visii ro oirao pie iraota Pauto ira ragai arurevora vore.”

<sup>30</sup> Oire uva rera akeiva oiso puraoro, “Eake-a reesia oa kekeiovore vii-ia, ra vii oirao pieio. Ora tapo eake kovo-a vao ravoto kovo oa purarivoi, ra va kekeiovora, vii vo reoaro oirao pieio? <sup>31</sup> ♦ Vigei aao iraraaro aue aioiva kuvala tapi mana voari tuariri rutu oiso osa Tugoropa Vuku purapai. Uvare vuvuiua iava vo bret vatereva voeapa oa iava va aioiva.”

<sup>32</sup> Uva oisi-a oiso osa iava Jisas voea tavioro oiso puraroepa, “*Oiraopavira rutu oiso osa visii tavipaavoi, Viapau oiso Moses visii vatereva bret vao vova vuvuiua-ia. Viapau. Ari Aite rutu-a ira oiraopa bret vatepareveira vova vuvuiua-ia visiipa.*” <sup>33</sup> Vao bret Pauto oa vateparevora, Ro ira vuvuiua kavuoro vararoepa oirarapa tootooa vatesa voeao vo rasio-ia.” <sup>34</sup> Oa iava rerare oiso puraaepa, “Turaro. Igeipa va eva bret vateri vokiara rutu-ia.” <sup>35</sup> Oa iava Jisas oiso voea tavireva, “*Ragai raga-a ita bret vao Toootoo Vatepa. Ari ro ira ragai iare urioro ira viapau oiso uvuiparoi ra ogero vorevira. Ora vosa ro ira ragai oirao piepareve ira ita viapau oiso uvuiparoi ra vorevira uuko regaro ita.*”

<sup>36</sup> “Ari ita, visii tavipaavoi, Ragai kekepatavoi ovusa viapau oiso ragai-ia oirao piepataveira. <sup>37</sup> Oiraravi voeao Aite ragaipa oeavi-a vatereva, oisore ra voeavi rutu ragai iare uriopaave. Oire vosa ro ira ragai iare urioro, irare viapau uvuiparai ra rerare isivapara. Viapau rutu.

<sup>38</sup> Aue iava uvare ragai-a vao ragoa vuvuiua iava vararaera vore. Uva viapau oiso ora ragai raga vo ruipaaro sirova utusa-a. Viapau. Ari ragai vararaera ro vo ruipaaro sirova utusa ira ragai arurevora vore oa iava urioraera. <sup>39</sup> Uvare ro vo ruipaaro-a ira ragai arurevora, vao oiso ragavira viapau uvuiparai ra oearoi kavua voeao rutu iava oea vatereva Pauto Aite ragaipa. Viapau. Ari oea rutu ita evoea vorevira tore pieaverea voea tootoo pieoro

♦ 6:24: Mt 14:34; Mk 6:53   ♦ 6:27: Ais 55:2; Jo 4:14   ♦ 6:29: 1 Jo 3:23   ♦ 6:31: Eks 16:15; Nam 11:8

vo Ovoiopa Voki-ia. <sup>40</sup> Aite oaa vo ruipaaro oiso toupaiveira, Oirara rutu voeao oea Oviitoa oaa kekepaoro rera oirao piepaive oea uvuipaii ra Tootoo Ovoi oupaive vao oa viapau opesia vai. Evoea oea vorèvira tore pieaverea voeapa tootooa vateoro Ovoiopa Voki-ia.

<sup>41</sup> “Ragai raga-a ita vao bret ragoa vuvuiua iava vararaera.” Uva oisi-a oiso osa puraroiva, Jisas Jiu-pa irara kasipu iraopaaepa. Oa iava rirovira rutu reoreopaaepa. <sup>42</sup> Uva oiso purapaaepa, “Avoeao! Eaketoa vai irao-a rera ro-ia Jisas Josep oviitoaaro? Ari ita, vigei rutu tarai iraopavioveira aitetoarei-ia ora aakova. Uva eake vai iava oiso puraroi, *Ragai vuvuiua iava vararaera?*”

<sup>43</sup> Uva Jisas voeare oiso puraroepa, “Teapi rirovira rutu ora reo ragapata ora visii raga vuutaaro-ia. <sup>44</sup> Viapau rutu irai uvuiparoi ra ragai iare urio ragaro. Viapau rutu. Easi Aite raga-a. Vosa irai ivureve vo ragai iare, oire ra rera-a eera urioro ragai iare. Uva rera ita-a eera ira vorevira tore pieaverea taru voari Ovoiopa Voki-ia. <sup>45</sup> ♦ Vo reo toupaivoi vo vukuo-ia profet irara vaaro oiso, ‘Pauto oirara rutu tarai piervereia.’

*Oire ra voeae rutu rera uvuive vo rera ruvara-ia Aite taraia ouoro. Ra va iava ragai iare urioipaave.*

<sup>46</sup> “Viapau oiso irai Aite kekereva. Ari ragai raga-a ragoa Pautoa tapo oisoa toupa ragoa urioraera. Uva ragai raga ita-a ragoa Aite kekeava. <sup>47</sup> Oiraopavira rutu oiso osa visii tavi iraopavoi oiso, Vosa ro ira ragai oirao piepareve, eera-a ita ira-ia Tootoo Ovoi rutu toupaivoi. <sup>48</sup> Ragai raga-a ita bret Tootooa Vatepa. <sup>49</sup> Tuariri aao irara oavisii mana aioiva kuvalu uva raga-a vo uva kopiiaepa voari tuariri. <sup>50</sup> Ari bret oa vuvuiua iava varaepa. Vosa irouto ro ira va iava aio ruipaparo, ira viapau uvuiparoi ra kopiro. <sup>51</sup> Ragai raga-a ita bret vao Tootoo Vatepa ragoa vuvuiua iava vararaera. Vosa irai va vao bret iava aioro, ira uvuiparoi ra tootoovira toupareve ovoieivira rutu. Oa-a vao bret uvuiparai ra rera vatea vao-ia ragai iava varaua. Oua vatepavoi oirara rutupa voea vo rasio-ia ra tootoovira toupaive.”

<sup>52</sup> Oire uva va-a vao oa iava voeao Jiu ora voeae raga ora kaureopaoro oiso purapaaepa, “Eaketoa vai-a ro ira uvuiparoi ra ora rera iava varaua vatereve vigeipa? E uvuiparoi ra ora rera iava voua vatereve, ra voua aiope rera iava, raa?”

<sup>53</sup> Oa iava Jisas oiso voeare puraroepa, “Oiraopavira osa visii tavipaavoi, Vosa viapau Oirato Oviitoaaro iava varaua aiota, ora vosa viapau ragai revisiaro-ia ukaiota, ra viapau Tootoo Ovoi outa. <sup>54</sup> Ari ro ira ragai iava varaua aioeve ora ragai revisiaro-ia tapo ukaioro, ira tootooparoverea vokiara rutu-ia. Ora ira vorevira tore pieaverea Ovoiopa Voki-ia rera tootoo pieoro. <sup>55</sup> Eake iava? Uvare ragai iava varaua-a oiraopa rutu aioa. Ora revisiva oiraopava rutu ukaiopava. <sup>56</sup> Ro ira ragai iava varaua aioeve ora ragai iava revisativa ukaioro, ira ita-a eera ragaiva ora tavosivira rutu toupare, ovusa ragai rerava ora tavosivira rutu tapo toupaavoi. <sup>57</sup> ♦ Aite ira tootoovira toupareveira ira ragai arurevora oa iava urioraera. Oa iava ragai Aite vo goruaro-ia tootoovira toupaavoi. Osa-a eisi osa uvuiparoi ro ira ragai iava varaua aioeve, oire ra va iava tootoovira toupareve ragaiva ora tavosipaoro. <sup>58</sup> Vao bret oa vuvuiua iava varaepa oa viapau oiso vo bretova vaeavira toupaivoi oa aioiva vigei aao iraraaro tuariri. Oa iava kopii ovoiaepla. Viapau. Ari vosa ro ira vo breto aioeve, ira-a eera uvuiparoi ra vokiara rutu-ia tootooparo.” <sup>59</sup> Vo Jisas voeae siposipopareva Reo Taisi Uvupa Kepa Sinagog sovara-ia vo Kapaneam-ia uva reo eva vatereva voeapa.

#### *Jisas-ia Tootoo Vatepa Reo Rutu Toupaiveira*

<sup>60</sup> Oire uva riro irara disaipel vo reo vao uvuiva. Oa iava oiso puraaepa. “Vo reo vavagisi iraopai. Irou vai uvuipai ra vo reo uvuve?” <sup>61</sup> ♦ Vo osa ora rera iava sopaua-ia voeae-ia tarairoepa Jisas oiso, Vo reo iava vao disaipel rirovira rutu oiso ora reopaa. Uva va-a vao oa iava voeare oiso puraroepa. “Evo reo ragai vo reoaro visii vo rugorugoroaro vuri piepaivoi, raa?” <sup>62</sup> Ari vosa Oirato Oviitoaaro ragai tueta ovusa ipara vore uva oisoa toupaave tuariri, ra apeisi? <sup>63</sup> ♦ Urauratoa raga tootooa vatepareveira oiratoapa. Varaua-a viapau oiso

◊ 6:45: Ais 54:13 ◊ 6:57: Jo 3:17 ◊ 6:61: Mt 11:6 ◊ 6:63: 2 Ko 3:6

Tootoo Ovoi vituaro-a. Ari vo reo oa vateavoi visii vo urauraroaro aio piepasa. Oa iava uvuipai ra visiipa tootoo vatepaive vo reo.<sup>64</sup> Osa oearovu visii vuutaaro iava vo reo vao viapau oirao piepaivoi.” Ari ita, Jisas voea-ia tarai ovoiroepa oea viapau rera vo reoaro oirao piepaiva. Ora tapo osa ro-ia tarairoepa ira keripa irarapa rera kosi piereve.<sup>65</sup> Oa iava oiso puraroepa. “*Ari ita, va raga vituaro-a vao oa iava visii taviavo oiso. Vosa Aite viapau oirato oisi piereve, ira viapau uvuipa ra ragai iare urioro.*”

<sup>66</sup> Orea vao vituaro iava riro irara disaipel irara Jisas kavuoro sikaa viropa. Oa iava viapau oiso rera tapo vorerivira touiva.<sup>67</sup> Oire uva Jisas igei katai tau erao (12) akereva oiso, “*E visii vai tapo ragai kavuoro avapatai?*”

<sup>68</sup> Oa iava Saimon Pita oiso puraroepa, “Turaro. Ra irou iare avaio? Uvare vii raga-a viigoa-ia Tootoo Vatepa Reo toupaivoi.<sup>69</sup> Uvare igei vii raga-ia vovouisi oaio tovoiova vii raga oirao piepaoro. Uvare ita vii raga-ia taraiiepa oiso, Viia Tugoropato Pauto reraaro rutu.”

<sup>70</sup> Osa iava Jisas oiso igei akereva, “*Apeisi ragavira iava visii katai tau erao (12) oiso ropooro visii reesiavora, ovusa iravu epao visii vuutaaro-ia vurito ira ragaiva keripa?*” <sup>71</sup> Auere oiso puraroepa Judas Saimon oviitoaaro Iskariot. Eera-a iravu igei iava vao katai tau erao (12) disaipel. Aue iava uvare rera-a eera ira utupavira Jisas kosi piereve voeaopa oea rera upoive.

## 7

### *Araoko Iraraaro Rutu Viapau Jisas Oisoa Oirao Piepaive*

<sup>1</sup> Oire uva va vao opesieiva, Jisas oiso ragavira vokareva Galili taere-ia. Uva auue Jiu rera uposa aupeaaepa vo Judia-ia. Oa iava voare ava arapa reasiparoepa. <sup>2</sup> Uva va vao Tugoropa Voki Jiu vaaro oa oiso oisoa vaisipaise Oovapa Voki auue-ia Rovopa Kueroia. Ovoki-a vao oapa tutuu pieepa. <sup>3</sup> Uva oisi-a eisi osa iava araoko irara rera arupaiva oiso, “Vo uruio iava avau Judia Distrik iare. Ra voa vii voeaaro disaipel vo kovoro kekeive oara puraparivoi. <sup>4</sup> Ari ita, vosa irai oavu avu vai purasa aueparo, ra riro vaisi oureve vo oirara osireiaro-ia. Ra viapau oiso uvuiparoi ra vatau tapi vai oai purareve. Oire vosa oiso varao puraparivoi, uva uvuipaeui ra viaevira rutu torepau oirara rutu osireiaro-ia.” <sup>5</sup> Uva voea tapo-a araoko iraraaro oea oisoa viapau rera oirao piepaive. Oa iava oisi eisi puraaepa. <sup>6</sup> Va-a vao oa vituaro iava Jisas oiso voeare puraroepa. “*Ragai vo vuutaaro tugura asavira toupaivoi oa-ia ragai vaisiaro karekeavere. Ari visii raga vo vuutaroaro-a varao-ia.*” <sup>7</sup> Voeao oirara rutu vo rasio-ia viapau uvuipaaei ra visiiva ora keripaave. Ari ragai ragava ora keripaaveira. Eake iava? Uvare vo pitupiturore reoreoparaveira vuriara oara purapaiseira vurivira rutu. <sup>8</sup> Uva oiso visii taviavao, Visii raga avata voare evoa Oovapa Voki-ia. Ari ragai viapau oiso va iare eva Oovapa Voki avaparai. Aue iava uvare ragai vo vuutaaro tugura asavira toupaivoi.” <sup>9</sup> Osa oiso-ia voea tavireva. Oa iava vo raga Galili-ia toureva.

### *Jisas Rovopa Kuero Iava Oovapa Voki-ia Toureva*

<sup>10</sup> Uva voea Jisas araoko iraraaro avaaepa Oovapa Voki kekesa. Oa iava rera tapo voare uturoepa vatauvira. Viapau oiso viaevira voare iparoepa. <sup>11</sup> Uva va-a vao osa voea Jiu rerare taraa ragapaiva va-ia vao Oovapa Voki oiso puraoro, “Ovu irao ro epao?” <sup>12</sup> Voea rutu rirovira rutu rera-ia ora reopaaepa. Uva oearovu oiso purapaaepa, “Avoeao. Asi vearto-a eera.” Ovusa oearovu oiso purapaaepa, “Viapau. Ari oirara rutu keakea iraopareveira eera.” <sup>13</sup> Vo osa oearovu Jiu-pa irarapa uriripaoro vatau visivi raga rera-ia ora reopaaepa.

<sup>14</sup> Uva vo voki rutu-a vao Oovapa Voki oa vo vuutaaro-ia Jisas Tugoropa Kepa iare iparoepa oirara rutupa siposiposa voa. <sup>15</sup> Osa iava voea Jiu iava voea reipa irara rirovira rutu oiso rugorugoo iraopaaepa oiso puraaepa, “Eake rutu-a vao oa iava rera vo vukuara vieiparevoi. Viapau oiso taraiia vai oureve rera ro oiso osa voeao tarai irara rutu tisa

---

<sup>◇ 6:67:</sup> Mt 10:2    <sup>◇ 6:68:</sup> Mt 16:16; Ap 5:20    <sup>◇ 6:71:</sup> Jo 13:26    <sup>◇ 7:2:</sup> Lev 23:34; Diu 16:16    <sup>◇ 7:7:</sup> Jo 15:18-19, 3:19-20    <sup>◇ 7:13:</sup> Jo 9:22

irara.” <sup>16</sup>◊ Oa iava Jisas voeare oiso puraroepa, “Vo reo oa vatepaavoi visiipa viapau oiso ragai raga vo reoaro-a. Viapau. Ari Pauto vo reoaro-a ro ira ragai siporevora ragai aruoro. <sup>17</sup>◊ Vosa irai Pauto gisipoaro sirova utu ruiipa iraoparo, ra ragai vo reoaro iava vao tarairo oiso, Oiraopavira vo reo Pauto iava poupa piroi, eke ora ragai raga vo vovouaro iava oiso reoparai. <sup>18</sup>◊ Ro ira ora rera raga vo vovouaro iava reoreoparo, ira-a eera oiso vovoupa ra ora rera raga ora vaisiaro kae piepareve. Ari vosa ro ira roari vaisiaro kae pie ruipaparo ira rera siporeve, ira-a eera torevokoto. Ira-ia viapau vuria vai toupai.

<sup>19</sup>◊ “Tuariri Moses visii vatereva Reo Taisi. Uva apeisi iava viapau irai visii iava viapau vo taisi sirova utuparoveira? Eake-a vao oapa ragai kopii piesa auepatai, raa?” <sup>20</sup>◊ Oa iava rerare oiso puraaepa, “Iravuei vurito uraurato vii-ia. Uva irou vii uposa auepai, raa?” <sup>21</sup>◊ Ua Jisas voeare oiso puraroepa, “Ari ita, vo kovo-ia tavetave iraopatavoi vao-ia, Oirato vorevira porete pieavo vo Sabat voki-ia. Oa iava rirovira rutu rugorugoo iraopatai eisi. <sup>22</sup>◊ Easi Moses visiipa rakari verapa pitupitu vatereva. Opitupitua-a eva oa viapau Moses iava kosi piropa. Oa-a eva voeari iare vigei aao iraraaro karekeepa. Uva visii kakae vure rakariaro rooroopaoro voea rakariaro verapataveira vo voki-ia eva Sabat voki, vosa vo voki-a eva rakari verapa voki rera vo vokiaro kakaeto. <sup>23</sup>◊ Oiso rugorugoopataveira ra vearovira rutu Moses vaaro Reo Taisi sirova utu iraopata. Oa iava kakae vure rakariaro rooroopataveira va-ia Sabat. Oire uva voa-a vo Sabat uva ragai iravu oirato vorevira porete pieavorao. Uva eakepa ragaire kasipupatai, raa? <sup>24</sup>◊ Opeita orekerovu rovirieipata ora visii iava osireiara raga-ia oiso osa ragai piepatavoi. Ari uvui iraopatai ra oearovu sopaaro rutu-ia tarai rovopaoro voea vo rugooroaro kerikerisipata.”

#### Oeavu Oirara Oea Oiso Puraaepa, Easi Krais Vai-a Ro-ia?

<sup>25</sup>◊ Oearovu Jerusalem iava oiso puraaepa, “E apeisi-a rera ro uposa auepaaai, eke? <sup>26</sup>◊ Rera kekepata eera ira viaevira rutu reoreoparoi. Oa iava viapau oiso oreovu avu vai purapaivoi rerare. Easi pasi oiraopai rutu, uvare vai reipa irara taraiapai rera-ia oiso, Krais vai pasi, raa? <sup>27</sup>◊ Ari ita, vigei taraipavie rera vo uruiaro rutu-ia. Ari vosa Krais karekero, ra viapau irai taraiparo rera vo uruiaro rutu-ia.”

<sup>28</sup>◊ Oire uva Jisas Tugoropa Kepa-ia Tempel toupareva voeapa siposipapaoro. Uva rirovira rutu gisipo karureva voeare oiso puraoro, “Ragai-ia taraipatai ita. Ora ragai vo uruiaro rutu-ia tapo taraipatai. Ari ita, osa viapau oiso ora ragai raga vo vovouaro iava urioraera. Ari Aitetoa oaa raga ragai arurevora, oa iava urioraera. Ira vo vovouaro-a oiraopa. Uva viapau visii rera-ia taraipatai. <sup>29</sup>◊ Ragai ira-ia taraiparai uvare rera tapo oisoa toupaa rera voaaro. Oa iava voava ragai arurevora vore.”

<sup>30</sup>◊ Uva oisi-a eisi osa iava rera tuukesa auepaaepa. Vo ovusa rera vo vuutaaro tugura asavira toupaiva. Oa iava viapau irai rera-ia vavaea vai tovoreva. Viapau. <sup>31</sup>◊ Uva riro irara rutu oisi iava rera oirao pieiva. Oa iava oiso puraaepa, “Vosa Krais pouro virovere, ra pasi riroara ravotoara vai purareve. Oara vai-a uvuipai ra vo ravotoro-ia puteve oara purarevoi ro-ia, eke?”

#### Oeavu Polis Irara Aruiva Jisas Tuukesa

<sup>32</sup>◊ Oire uva Farisi ratarataa vovou irara voea oea uvuiva uvare oirara rutu oreorovu rutu purapaiva rerare Jisas. Osa iava reipa irara Pris ora aue Farisi oearovu polis irara aruiva. Oa iava urioaepa oiso ra rera tuukeive Jisas. <sup>33</sup>◊ Uva va-a vao oa iava Jisas voeare oiso puraroepa, “Gare visivi visii tapo toupaavoi. Ra ro iare vorera ira ragai arurevora vore. <sup>34</sup>◊ Uva ragaire taraa ragapatavere. Ra viapau oiso ragai keketa. Ora viapau tapo oiso ra vo urui-ia pouta viro vao oa iare avaravere. Vao iava uvare viapau oiso uvuipatai ra voare avata.” <sup>35</sup>◊ Oire uva voea raga Jiu ora reopaaepa oiso purapaoro, “Ovu iare avarovere vo uva viapau rera kekeperea? Easi pasi vigei iavapa irara vai iare avarovere voeao oea vigei arova sikasikaaepa vorarore avaoro vo voea vo uruiroaro iare Grik-pa irara? Uva voea tarai pieparevere vai Grik, raa? <sup>36</sup>◊ Uvare oiso puraroi, Ragaire taraa ragapata. Ra viapau

◊ 7:16: Jo 3:11; 8:28; 12:49   ◊ 7:19: Eks 24:3   ◊ 7:22: Lev 12:3; Jen 17:10   ◊ 7:24: Lev 19:15   ◊ 7:27: Mt 13:55   ◊ 7:28: Jo 8:14   ◊ 7:31: Jo 8:30; Mt 12:23   ◊ 7:33: Jo 13:33   ◊ 7:34: Jo 8:21, 13:33   ◊ 7:35: Je 1:1; 1 Pi 1:1

*ragai keketa. Ora oiso tapo puraroi, Ra viapau voare avata vo uvare avaravere voa tousa. Uva aa vao-a vo reo vituaro, raa?"*

#### *Vo Toupai Uukoa Iava Vao Tootoo Vatepa*

<sup>37</sup> ♦ Ovoiopa voki vaopa Oovapa Vurei, reipa voki rutu oa-ia Jisas toreroepa rirovira rutu reooro oiso purasa, "Vosa irai uuko regapaoro urioro, ira-a eera uvuiparoi ra urioro vo ukaiosa ragai. <sup>38</sup> ♦ Oiso-ia osa Pauto vo rigatoaro oiso purapapeira, 'Ro ira ragai oirao piepareve ira-a eera sopapro-ia uuko ovi Tootoo Vatepa ovi karekepapere rera iava vusivusipaoro.'"

<sup>39</sup> ♦ Oire Jisas vo ruu reo purareva ro iava Tugoropato Uraurato ira ouiverea vo rara rera oirao piepaive Jisas. Uvare vo vokia-a eva oa-ia Jisas touvira keraria ou asavira toureva. Aue iava uvare rera eera Tugoropato Uraurato urio asavira toureva irare eisi puraroea.

#### *Oirara Ora Roo Pieaepa*

<sup>40</sup> ♦ Oire uva oearovu oisi eisi vo reo uvuoro oiso puraaepa, "Oiraopavira rutu rera-ia ro-ia profetato irare tuepavioveira." <sup>41</sup> Ovusa oearovu oiso puraaepa, "Eera Krais." Ari oearovu oiso puraaepa, "Ra viapau oiso Galili iava uriorovere Krais. <sup>42</sup> ♦ Tugoropa Vuku taviepa Krais iava ro Devit voeaaro iava rera. Ira Betlehem-ia pouro virovere vo uruio-ia oa-ia tuariri Devit tou rovoreva." <sup>43</sup> ♦ Oisi-a eisi osa iavirava ora voeare-i-a varei puraiva ora roo pieoro Jisas iavirava. <sup>44</sup> Uva oearovu oiso vovoupaaepa ra rera tuukeive. Uva viapau oiso irai rera-ia vavaea vai tovoreva.

#### *Reipa Irara Jisas Viapau Oirao Piepaiva*

<sup>45</sup> Oire voea polis irara vorevira voreaeaepa reipa irararei iare Pris ora Farisi. Oa iava voeare oiso puraaepa, "Eakepa viapau rerava voretai?" <sup>46</sup> ♦ Uva polis irara voeare oiso puraaepa, "Ari ita, voari tuariri uva viapau oisoa irai oiso reoparo osa ro reoparoi." <sup>47</sup> Osa iava Farisi voeare oiso puraaepa, "Easi visii vai tapo pasi keakeaparevoi, raa? <sup>48</sup> ♦ E pasi oearoi igei vai iava Farisi, o voeo iava reipa irara irai vai keketavo ovusa rera vo reoroaro oirao pieparevo, raa? Viapau. <sup>49</sup> Uvare akuku iraravi raga-a evoea oirara oea Jisas vo reoroaro uvupaoro viapau taraiapai Reo Taisi-ia vao oa-ia vuria puraivoi Pauto osireiaro-ia, osa iava opesikoaverea rara."

<sup>50</sup> Oire uva iravu-a ro-ia Nikodimas ira tuariri avaroepa Jisas iare. Voea iava rera, ira voeare oiso puraroepa, <sup>51</sup> ♦ "Esa vigei vaaro Reo Taisi oiso toupaivoi ra iravu iava akukuvira gasi ragape, eke? Uvui iraopavie i ra rera vo reoaro uvupe. Oire ra va iava vearovira tarai rovovio vao-ia oa pura rovoreve."

<sup>52</sup> Oa iava rerare oiso puraaepa, "Easi vii tapo-a iravu Galili iava, raa? Vearovira rutu Pauto vo reoaro viei rovori, ra taraiu. Viapau irai profetatoa vai uvuiparoi ra Galili iava karekero."

#### *Riakova Ora Oua Vuri Pieeva*

[<sup>1</sup>Oire uva voea rutu oirara sikasikaaepa vorarore ora voea vo keparoaro avaoro, ovusa Jisas Oliv Kovo Pukui iare avaroepa. <sup>2</sup> Oa iava vokipakou rutu voava vokiroepa Tugoropa Kepa iare vao Tempel. Uva riro irara rutu voa rera iare urioaepa. Oire uva paupaoro voea tarai piepareva. <sup>3</sup> Uva voa-a vo uva riro tarai irara ora ratarataa vovou irara Farisi iriavuva riakova urioaepa rera iare. Aue iava uvare oira kekeiva iravu tapo. Oa iava ora voea vuruvuruaro rutu-ia oira tore piesa urioaepa. <sup>4</sup> Uva oira iava Jisas tavipaoro oiso purapaaepa, "Tisato. O riakova iria ora oua vuri pieovo. Uva oeavu oira-ia poua viro osa eisi pieevorao. <sup>5</sup> ♦ Vao-ia Reo Taisi Moses igei tavireva oiso puraoro, Vosa oiso

♦ 7:37: Ais 55:1; Re 22:17 ♦ 7:38: Ais 12:3 ♦ 7:39: Joe 2:28; Jo 20:22 ♦ 7:40: Mt 21:11 ♦ 7:42: Jer 23:5; Mai 5:2 ♦ 7:43: Jo 9:16, 10:19 ♦ 7:46: Mt 7:28-29 ♦ 7:48: Jo 12:42 ♦ 7:51: Diu 17:6, 19:15 ♦ 8:5: Lev 20:10; Diu 22:22

iriavu riakova viria puraeve, oire ra oira vurokope aue-ia aveke. Ra oisi iava eisi apeisi purau?"<sup>6</sup> Oiso osa puraaepa rera-ia kokarapaoro. Uvare oiso vovouppaaepa ra oaire reoa vai taraaive rera-ia. Auere ra oreoi iava rera iava gasiive taru. Vo osa Jisas takuro viropa rasia-ia rigatopaoro ora rera iava sipayeo-ia.

<sup>7</sup> ♦ Oire uva rera akepaiva voreripavira. Oa iava voava toreoro voeare oiso puraroepa, "Vosa irai visii vuruvuruaro-ia toupareve ro ira-ia viapau viria vaipe, ira uvuiparoi ra rovova vai-ia aveke vai oira vuro rovoreve o-ia riakova." <sup>8</sup> Uva takuro viropa ita vo rasi rigatosa ita. <sup>9</sup> ♦ Oisi uvuivoiva, voea rutu ora voea-ia vesipaoro kosikosia viropa oiso, reipa irara rovovira ira rovoaepa. Oa iava oearovu tupepaaepa utupaoro. Osa iava rera raga Jisas kavuiva. Uva rera raga oira tapo toupareva, ovusa torepaoa voari rera puaaro-ia.

<sup>10</sup> Oire uva Jisas toreoro riakova akereva oiso, "Ovu-ia oirara epao? E viapau irai epao vii iava gasiparevoi, raa?" <sup>11</sup> ♦ Oa iava riakova oiso puraoa, "Reito. Easi viapau irai epao." Oa iava Jisas oiso puraroepa, "Ari ita, ragai tapo viapau oiso vii iava gasipaavoi. Avau vova, ra viapau ita vorerivira oai viria vai purari.]

#### *Jisas Ira-a Rasitoapa Aviavia*

<sup>12</sup> Jisas voea tavioro oiso puraroepa, "Ragai-a rasitoapa aviavia. Ro ira ragai sirova uturo ira viapau uvuipa ra rupa-ia vokareve. Viapau. Ari aviavia-ia touparevoi vao Tootoo Vatepa vituaro." <sup>13</sup> ♦ Oa iava Farisi rerare oiso puraaepa, "Easi vii ora vii raga vo reoaro-ia siposipopariveira. Eva-a oa iava vii vo reoaro iava viapau oarai oirao piepaioveira." <sup>14</sup> ♦ Osa iava Jisas voeare oiso puraroepa, "Oiraopavira rutu ita. Ora ragai raga vo reoaro iava siposipopaaaveira. Ari ita, vo osa oiraopa reo rutu-a ita vao ragai vo reoaro. Eake iava? Uvare vo urui-ia taraiparaveira vao oa iava urioraepa. Oa iava vo urui-ia taraipaoro voare avaravere. Vo osa visii viapau voa taraipatai vo uva vo urui iava urioraera. Ora vo uva ragavira avaravere uva tapo viapau taraipatai. <sup>15</sup> Visii vao visiigoa oearovivu oirara rovirie iraopataveira vo vovoou-ia vo rasio-ia. Ari ragai viapau irai rovirieipaaaveira. <sup>16</sup> Ari vosa ragai irai rovirieia, oire ra torevokovira rutu irai rovirieia. Eake iava? Uvare viapau oiso ragai raga kataito. Viapau. Ari iravuei Aite, ro ira ragai arurevora. Ira ragai tapo kovopareveira. <sup>17</sup> ♦ Vo visii vaario-ia Reo Taisi oiso toupai, Vosa vaiterei katai reo raga iava siposipopasi, oire ra vaiterei vo reoaro torevokopape rutu. <sup>18</sup> Ari ita, ragai raga ora ragai iava siposipopaaaveira ora vo osa Aite ragai arurevora. Ira tapo ragai iava oiraopavira tavitaviparoveira."

<sup>19</sup> Oire uva voea rerare oiso puraaepa, "Ovu-ia vii Aitearo epao?" Oa iava Jisas voeare oiso puraroepa, "Viapau oiso ragai-ia taraipatai. Eisi osa viapau Aite ooa-ia taraipata."

<sup>20</sup> ♦ Vo reo pukoreva Jisas monipa tugi-ia toupaoro. Vo osa oirara tarai piepareva voa evoa Tempel-ia. Uva oisi-a oiso osa iava viapau irai rera tuukepareva voa, uvare rera vo vuutaaro tugura asavira touva.

#### *Vo Toupa! Uvare Viapau Uvuipaei Ra Voare Avau Uvare Avaparai*

<sup>21</sup> ♦ Jisas vorerivira oiso voea tavireva, "Avarai vore uva ragaire taraa ragapatavere. Ari ita, kopiipataverea visii varaarova vuriara oavisii, vo rara Aite viapau visii iava vara vera rovopareve. Oa iava viapau uvuipatai ra vo poupata viro uvare avaparai." <sup>22</sup> Uva va-a eva oa iava Jiu reipa iraraaro oiso puraaepa, "Apeisi ragavira eisi reoroi oiso, Viapau uvuipatai ra vo uruio iare avata oa iare avaparai? Asi evo reo vai porearo oiso vaio toupai, Ra rera raga ora uporo, eke?" <sup>23</sup> Uva voeare oiso puraroepa, "Visii reroarova. Ari ragai viara iava. Uvare visii-a vao vo rasio iava. Ari ragai viapau vo rasi iava vao-ia. <sup>24</sup> ♦ Osa iava visii taviavoi oiso, Kopiipatavere ovusa vuriara oavisii visii-ia touvira toupaive. Ari ita, vosa viapau ragai vo reoaro oirao piepata vo uvare ora ragai raga iava visiipa siposipopaaavoi. Oire uva oisi-a eisi osa iava vuriara oavisiiiva kopiipatavere ovusa touvira visii-ia toupaive."

<sup>25</sup> Uva rera akeoro oiso puraaepa, "Iroutoa irao-a vii?" Oa iava Jisas oiso puraroepa, "Ragai raga ita vao-ia oiso osa ora ragai iava tuariri visii taviavora. <sup>26</sup> Riro reoro rutuva toupaavoi. Oara-ia uvuiparai ra visii vo pitupituroarore reoreora. Ora visii vo vovouroaro

❖ 8:7: Diu 17:7 ❖ 8:9: Ro 2:22 ❖ 8:11: Jo 3:18, 5:14 ❖ 8:13: Jo 5:31 ❖ 8:14: Jo 18:37, 13:3 ❖ 8:17: Diu 17:6 ❖ 8:20: Mk 12:41; Jo 7:30 ❖ 8:21: Jo 7:34, 36 ❖ 8:24: Mk 13:6

tapo rovirieia oiso osa jas ro reo rovirieipato. Ari ro ira ragai arurevora ira vo vovouaro-a oiraopa rutu. Ora vo reoro rutu oara uvuava rera ruvara-ia, evara-a oara iava siposipopaaaveira oirara rutupa voeao vo rasio-ia.”

<sup>27</sup> Oire uva viapau roroioaepa. Vo uvare voea tavipareva Aitetoa iava. <sup>28</sup> ♦ Uva osa-a eisi osa iava Jisas oiso voea tavireva, “*Voari utupaua oiso Oirato Oviitoaaro kae pietavere rera kotosa. Uva vo vuuta-a eva oa-ia taraitaverea, Oiraopavira oisoa ora rera iava siposipopareve. Oire ra oisi iavirava taraita. Ari ragai viapau oiso oavu avu vai purapaavo ora ragai raga vo rugorugooaro iava. Viapau. Ari ragai vo reo iava siposipopaaavo oa iava ragai tavireva Aite.*” <sup>29</sup> ♦ Aite ragai siporeva ira ragai tapo toupareveira. Uva viapau oiso ragai kavurevora ra ragai raga toupaa. Viapau. Uvare vokiara rutu-ia varao purapaaveira oarapa ruipaparoveira.”

<sup>30</sup> Oire uva oisi-a oiso osa puraroiva, oirara rutu iava oearovu rera oirao pie iraoiva.

*Oiraopa Reo Rutu Uvuipai Ra Visii Oiso Pieve, Viapau Oiso Ra Akukuvira Iraipa Kovo Ragapata Oiso Rutu Osa Voeao Oea Tuukepa Kepa-ia Toupaiveira*

<sup>31</sup> ♦ Oire uva Jisas Jiu tavireve, voeao oea rera oirao pieiva oiso, “*Vosa vokiara rutu-ia ragai vo reoaro vearovira uvupata, oire ra va iava visiipe oiso, Ragai rutu voeaaro disaipel.*” <sup>32</sup> ♦ Ra oisi iava oiraopa reo rutu-ia taraita. Oa iava oiraopa reo rutu uvuipai ra oiso visii pieve, Viapau uvuipatai ra akukuvira iraipa kovo ragapata. Oiso osa ro ira tuukepa kepa-ia toupareva.”

<sup>33</sup> Oa iava rera vo reoaro pukooro oiso puraaepa, “*Igei-a Ebraham iava vo sara. Viapau oiso irai igei iava akukuvira kovo ragapareveira iraipa. Uva apeisi iava eisi puruae oiso, Viapau oiso akukuvira iraipa kovo ragapatavere?*”

<sup>34</sup> ♦ Uva Jisas oiso puraroepa, “*Oiraopavira rutu oiso osa visii tavipaavoi, Irou irara voeao oea vuri vovou purapaiveira. Uva varao vuri vovouro oavive oara voea tuukepaiveira. Oa iava akukuvira kovo ragapaiveira vaopa vearo rugoo viapavira.*” <sup>35</sup> Oviito ira vearovira kepaaro-ia aiteto toupareveira eva kepaaro rutu. Ari ro ira tuukepa kepa-ia toupareveira akukuvira kovo ragapaoro, uva viapau kepaaro rutu-a va vao. <sup>36</sup> Ragai-a vao Oviitoaaro ragoa uvuiparai ra tuukepa kepa iava visii kosi piea vao iava vuri vovou. Oa iava uvuipatai ra vearovira toupata vo Aite oaa vo kepaaro.

<sup>37</sup> “*Taraiparai oiso, Ebraham sara iraraaro visii. Uva apeisi viapau ragai vo reoaro visii sopaaoria toupaivoi, raa? Eisi osa iava oiso ruipapatai ra ragai upooro ragai kopii pieta.*” <sup>38</sup> ♦ Ari ita, ragai siposipopaaaveira varao rutu iava oara kekepaaveira Aite oaa ruvara-ia, ovusa visii evo pitupituro purapataveira oara oupataveira ro ruvara-ia visii aitearo.”

*Visii Aitearo-a Seten*

<sup>39</sup> ♦ Oire uva rerare oiso puraaepa, “*Eari igei aitearo Ebraham.*” Oa iava Jisas oiso puraroepa, “*Vosa oiraopavira visii Ebraham ovii iraraaro, oire ra rera vo pitupituroaro rutu tapo purapata oiso osa rera Ebraham oisoa piepareve.*” <sup>40</sup> Visiipa oiraopa reo rutu iava siposipo iraopavoi varao oara uvuavora Pauto ruvara-ia. Oara-a varao oarapa vo vokio-ia ragai uposa aeupatai. Ari ita, viapau oiso Ebraham oisi oiso pierava. <sup>41</sup> ♦ Oiraopavira uvare ora visii aitearo vo pitupituro purapataveira.”

Uva va-a eva oa iava rerare oiso puraaepa, “*Easi igei aako riakoaro viapau oiso otopa vovouro vai purapaoro igei kavaupaivora. Igoa-a kataitoa raga Pauto ovii iraraaro.*”

<sup>42</sup> ♦ Oa iava Jisas oiso puraroepa, “*Vosa oiraopavira rutu rera Pauto visii aitearo rutu, oire ragaipa siraopata. Eake iava? Uvare ragai oisoa Pauto ruvara-ia toupaa. Ora vo uvare tapo rera vo ruipaaro-ia urioraera. Viapau oiso ora ragai vo ruipaaro-ia vore urioraera.*” Viapau. Ari Pauto ragai arurevora oa iava vore urioraera. <sup>43</sup> Uva eakepa viapau ragai vo reoroaro-ia roroiopatai? Oa vituaro vao-ia oiso toupaivoi, Viapau oiso uvuipatai ra ragai vo reoroaro uvupata riro vavagisiara.

<sup>44</sup> ♦ “*Visii-a Seten ovii iraraaro. Uvare goruvira rutu rera vo vovouaro sirova utu iraopataveira eera visii aitearo. Ari ita, voari tuariri rera-a eera riro oira upoto, ora tapo viapau oisoa oiraopa*

♦ 8:28: Jo 3:14, 12:32   ♦ 8:29: Jo 4:34   ♦ 8:31: 2 Jo 9   ♦ 8:32: Ro 8:2; Je 2:12   ♦ 8:34: Ro 6:16; 2 Pi 2:19

♦ 8:38: Jo 5:19, 30   ♦ 8:39: Ro 9:7; Ga 3:7   ♦ 8:41: Ais 63:16   ♦ 8:42: 1 Jo 5:1   ♦ 8:44: 1 Jo 3:8

vovou rutu sirova utuparo. Uvare oiraopa vovou rutu viapau oisoa rera-ia toupaive. Uvare kuuvu reoro raga oisoa purapareve ora rera raga vo reoroaro torevokoaro. Eera-a riro kuuvuto, uvare rera raga-a kuuvu reoro rutu vo vovouaro vituaro. <sup>45</sup> Ari ragai oiraopa reoro rutu iava siposipapaaveira. Uva apeisi viapau vo reoro oirao piepataveira? Uva kuuvu reoro raga oirao piepataveira ro aite oavissi vo reoroaro Seten. <sup>46</sup> Iroutoa vai visii iava uvuiparoi ra ragai iava oai vuria vai kosi piereve vao oa toupaive vo ragai-ia, raa? Ari ita, oiraopa reo rutu kosi piepaavoi. Uva apeisi iava oisi eisi viapau ragai vo reoaro oirao piepatavoi, raa?

<sup>47</sup> ♦ Ari Pauto ovii iraraaro rutu rera vo reoroaro rutu uvupaiveira. Ari viapau oiso rera ovii iraraaro-a visii. Oa iava viapau rera vo reoroaro uvupataveira.”

#### *Ebrahim Kareke Asavira Toureva Vo Vuutao-ia Oa-ia Touava*

<sup>48</sup> ♦ Oa iava voea Jiu rerare oiso puraaepa, “Eari, igei viire oiso purapaioveira, Sameria iava vii. Viigoa-ia iravu vurito tugarato toupareveira. Uva oiraopavira vai oisi eisi purapaioveira viire, eke?” <sup>49</sup> Uva Jisas oiso puraroepa voeare, “Ragai viapau tugaratoa vaiva toupaaveira. Viapau. Ari Aite oaa raga vaisiaro kae piepaaveira, ovusa visii ragai vaisiaro akaipa piepata. <sup>50</sup> ♦ Ari ragai raga viapau oiso uvuiparai ra ora vaisi oaa kae piepaa, uvare iravu raga uvuiparoi ra ragai vaisiaro kae piepareveira. Uvare rera-a eera oirara vo vovouroaro rovirieipato. <sup>51</sup> ♦ Oiraopavira rutu oiso osa visii tavipaavoi, Vosa irai ragai vo reoaro sirova uturo, ira-a eera viapau uvuiparoi ra kopii ovoiro.”

<sup>52</sup> Oire uva voea Jiu rerare oiso puraaepa, “Tarai iraoiei vii-ia. Viigoa-ia touparevoi vurito tugarato. Easi Ebrahim kopii ovoiroepa, ora voeao reo topa piepa irara profet irara oea tapo kopiliaepa. Uva apeisi-a oiso osa iava oiso purauei, Vosa irai vearovira rutu ragai vo reoaro sirova uturo, eera-a ira viapau uvuiparoi ra kopii ovoiro? <sup>53</sup> E apeisi-a? Easi pasi vii vigei aaotoaaro-ia puteparivoi Ebrahim, raa? Ira kopiiroepa ora voeao profet irara oea tapo kopiliaepa. E vii raga apeisi ora kareke piesa aeupaei?”

<sup>54</sup> ♦ Uva Jisas voea aatoreva oiso puraoro, “Vosa ora ragai raga vaisiaro kae piepaa, ra oisi iavirava ragai iava vaisia akukupapavira raga toupaive. Ari Aite raga-a ira ragai kae piepareveira ro irare oiso purapataveira, Visii reraaro Pauto, <sup>55</sup> vo osa viapau rera-ia taraipataveira. Ari ragai rera-ia taraiparaveira. Vosa oiso purapara, Viapau rera-ia taraiparai, oire ra oisi iava riro kuuvutoape ragai oiso osa visii. Ari rera-ia taraiparai. Osa iava vearovira rera vo reoroaro sirova rutu utuparaveira.”

<sup>56</sup> ♦ “Aaoto oavissi Ebrahim rorureva vo vuutao-ia ragai vaaro-ia taraioro, oa iava urioraera vo rasio iare. Uva oisi-a eisi osa iava rera iava sopaua roruva rutu taraioro.” <sup>57</sup> Uva va-a vao oa iava Jiu rerare oiso puraaepa, “Easi vii viapau vo vavae tau (50) ivaro-ia tugurauera avukaoro. Uva apeisi-a? Rera vai kekeriva Ebrahim, raa?” <sup>58</sup> ♦ Uva Jisas oiso puraroepa, “Oiraopavira rutu oiso osa visii tavipaavoi, Vo osa Ebrahim kareke asavira toureva, ovusa vo vuuta-a eva oa-ia ragai voari tuariri touava.”

<sup>59</sup> Oire uva oisi-a eisi osa iava rerare avekleara kae pie ragaiva, oiso ra vara-ia rera vurokoive. Vo osa Jisas voava Tugoropa Kepa-ia vatauvira kosiro viropa.

#### 9

#### *Vo Toupai Voosito Iava Vo Siposipo*

<sup>1</sup> Uva vokapaoro Jisas avaroepa. Oa iava iravu voosito oirato kekereva. Aakova oisi raga rera kavaueva voosivira. <sup>2</sup> ♦ Uva voa igei disaipel Jisas akeiova oiso, “Tisato. Irou vaaro-a vuria oa iava aakova oiso ro voosivira kavauevora? E rera raga vo vuriaro oa iava oisi karekeroepa? Eke aitetoreai vaaro vuria oa purasiva?”

<sup>3</sup> ♦ Uva Jisas igeire oiso puraroepa, “Viapau ro oirato vuria vai purareva, ora aitetoreai ora aakova, ra oisi iava eisi voosivira karekero. Viapau. Ari vaore ro oiso toupareveira, ra rera-ia Pauto vo kovoaro viaevira rutu roroiovira karekepe. <sup>4</sup> Vosa ravireo touvira touparevoi, uva uvui iraopavieei ra Pauto vo kovoaro-ia pitupe va puraoro. Uvare rupa urioei oa-ia viapau irai

---

⊗ 8:47: 1 Jo 4:6    ♦ 8:48: Jo 7:20, 10:20    ♦ 8:50: Jo 5:41    ♦ 8:51: Hi 11:5    ♦ 8:54: Jo 16:14    ♦ 8:56: Mt 13:17; Hi 11:13    ♦ 8:58: Jo 1:1; Re 1:8    ♦ 9:2: Eks 20:5; Esi 18:20    ♦ 9:3: Jo 11:4

uvuipa ra kovoreve. <sup>5</sup> Vosa ragai vo rasio-ia touvira *toupaavoi*, *uva ragai-a aviavia voeaopa oea vo rasio-ia toupaiveira.*"

<sup>6</sup> Uva oisi-a oiso osa iava vavaea-ia ruiroepa. Oire rasia uverereva va tovure pieoro. Oa iava rera osireiaro vavoreva vo tovure-ia. <sup>7</sup> ♦ Uva Jisas rerare oiso puraroepa, "Avau sisusa uuko rovu-ia va vao Siloam." [Oa porearo oiso toupai, Rera aruiva]. Oa iava avaroepa sisusa. Uva vorevira vorepaoro vuravurareva.

<sup>8</sup> Uva va-a vao oa iava voeao rera vo uruiaro iava ora oearovu tapo voeao oea oisoa rera kekepaive ovusa pauvira raga tou rovopareve, oea rutu rerare oiso puraaepa, "E rera-a ro-ia ira oisoa rirovira moni areparo oirara rutu ruvara-ia, eke viapau?" <sup>9</sup> Uva osa iava rerare oiso puraaepa, "Iu. Rera raga-a ita ro-ia." Ovusa oearovu oiso purapaaepa. "Viapau. Easi oisi raga keketo-a ro-ia. Ari ita, uva iravu raga." Oa iava rera raga voeare oiso puraroepa, "Easi ragai raga-a ita vao-ia."

<sup>10</sup> Uva rera akeiva oiso, "Uva apeisi-a oiso osa iava vii iava osireitoarei vuravurasivo, raa?" <sup>11</sup> Uva voeare oiso puraroepa, "Ari ro oirato ira vaisipaiveira oiso, Jisas ira rasia uvererevo va tovure pieoro ae tapo uukoa. Oa iava vo tovure-ia ragai osireiaro vavooro oiso puraroe ragai aruoro, Avau sisusa vavo uuko rovu-ia Siloam. Oire uva voa sisuoro vuravura ovoiavo. Oa iava uvuirai orekerovu kekepasa." <sup>12</sup> Uva eisi osa iava oiso rera akeiva, "Ovu-ia rera epao?" Uva oiso voeapa taearoepa, "Viapau taraiaparai."

#### *Farisi-pa Irara Vo Ravoto Vituarore Taraapaiva*

<sup>13</sup> Oire uva rera tapo ro voosito tuariri ira voosivira oisoa toupareve avaaepa Farisi iare voeao ratarataa vovou irara. <sup>14</sup> Uva Sabat voki-a vao oa-ia Jisas va vao rasia tovure pieoro va-ia rera iava osireito karureva. <sup>15</sup> Osa iava vorerivira ita rera akeiva oiso puraoro, "Apeisi ragavira rutu-a oiso osa iava vii iava osireitoarei vuravurasivo?" Oa iava oiso voea tavireva, "Ragai osireiaro vavorevo tovurea-ia rasia. Oa iava sisusa avaraiva, ragai iava osireitoarei vuravura ovoisivo roroio ovoioro." <sup>16</sup> ♦ Osa iava oearovu Farisi oiso puraaepa, "Viapau oiso Pauto rera siporeva, uvare viapau oiso Sabat voki vo pitupituard sirova utuparoveira ora vao Reo Taisi." Oa iava eva oearovu oiso puraaepa, "Uva apeisi ragavira-a ro ira-ia vuria toupaive, ra oaiva varao purapareve ravotoara, raa?" Oire uva-a vao oa iava ora voearei-ia vo uvururei purapaiva.

<sup>17</sup> Uva rera akeoro ita oiso puraaepa, "Uva apeisi vai purapaei rerare ro ira vii iava osireitoarei vura pierevo?" Oa iava oiso puraroepa, "Ari profetato eera."

<sup>18</sup> Oiraopavira rutu ira-a ro oisoa voosivira toupareve. Oa iava vo vokio vuravurarevoi. Uva voeai Jiu vo reo vao viapau oirao piepaiva. Oa iava aitetoareire keeraaepa vaitereo uvava oviitoa rera ro ira iava osireitoarei karusi viropa. <sup>19</sup> Vaiterei akeoro oiso puraaepa, "E rera vai-a ro vei oviitoaaro, pasi? Ira iava oisoa oiso purapasi, Ira kavaueva aakova, ovusa voosivira raga toureva. Oire uva apeisi iava vuravurarevoi?"

<sup>20</sup> Osa iava aitetoarei voea tavisiva oiso, "Ari ira-ia taraiapaveiei eera vegei oviitoaaro, osa raga voosivira aakova rera kavaueva. Oa iava oisi raga karekeroepa. <sup>21</sup> Uva vo vokio viapau taraiapaveiei oiso osa ragavira iava rera iava osireitoarei aviavisivoi. Ora tapo viapau taraiapaveiei oiso, Irouto rera osireiaro karurevo. Rera ake iraota. Ira riroroera. Ira uvuipa ra ora rera raga tavitaviro."

<sup>22</sup> ♦ Oire uva aitetoarei voea tavidivisa oisi eisi, uvare Jiu asavira uriripasiepa, voeao oea oiso purapaaepa reo goru puraoro, Vosa irai Jisas oiso vaisirevere, Ari Krais-a eera, oire ra oisi iavirava irai siguive vova Reo Taisi Uvupa Kepa Sinagog. <sup>23</sup> Oa-a vao oa vituaro iava aitetoarei voea tavidivisa oiso purasiepa, "Ora visii raga rera aketa. Ira riroroera. Osa iava uvuipa ra ora rera raga visii tavitavireve." <sup>24</sup> ♦ Oire uva rerare vorerivira keeraaepa ro ira voosivira tou rovopareve. Oa iava rerare oiso puraaepa, "Pauto vaisipaoro oiraopavira rutu taviu. Uvare Jisas-ia taraiapaei oiso, Vurito."

<sup>25</sup> Oa iava voeare oiso puraroepa, "E vurito-a eera, eke viapau? Uvare viapau taraiaparai rera vo vovouaro-ia. Ari ita, oiso raga ora ragai-ia taraiaparai osa oisoa tuariri voosivira raga toupaa. Uva vo vokio raga-ia ragai iava osireitoarei aviavisivoi karu uviro ovoioro."

♦ 9:7: Lu 13:4; Jo 11:37 ♦ 9:16: Mt 12:2 ♦ 9:22: Jo 7:13, 12:42 ♦ 9:24: Jos 7:19; 1 Sml 6:5

<sup>26</sup> Oa iava oiso rera akeiva, “Eake rutu purarevo viire? Apeisi ragavira rutu vii iava osireitoarei karurevo, raa?”

<sup>27</sup> Oire uva voeare oiso puraroepa, “Visii tavi ovoiavo ita. Uva apeisi ragavira uvusa auepatai ita? Easi visii vai tapo oiso ruipapatai ra oiso pieta, Rera voeaaro disaipel, raa?”

<sup>28</sup> Oa-a eva oa iava rera takaupaoro oiso puraaepa, “Vii raga ita rera disaipeltoaaro. Ari igei-a Moses voeaaro disaipel. <sup>29</sup> Uvare taraipaiei oiso, Pauto Moses vaterева reoa. Ari ovu irao rutu iava evo oira urioei? Ira-ia viapau taraipaiei.”

<sup>30</sup> Uva oiso puraroepa, “Avoeao. Avokoria vao-ia. Oa-ia viapau taraipatai oiso-ia. Uvare oiso purapatai, Ovu iava urioroe? Ira-ia viapau taraipaiei. Rera raga-a ita ro ira ragai iava osireitoarei aviavi pierovo. <sup>31</sup> ♦ Taraipavie oiso, Pauto viapau oiso vuri irara vo reoroaro uvupareveira. Ari vosa ro ira rerapa lotuparo ora rera vo reoroaro rutu sirova utuparo eera Pauto, ra va iava rera Pauto vo reoroaro uvupareve vara purapasa. <sup>32</sup> Vokiara rutu-ia voari tuariri viapau oisi osiposipoi oisoa toupaive irai iava ira voositoa vai osireiaro vura piereva ro ira voosivira raga kavaueve aakova vai. <sup>33</sup> Vosa Pauto viapau ro siporevor vo rasio iare, ra viapau oiso uvuiparoeri oaravu avu vai purapasa.”

<sup>34</sup> Oa iava rerare oiso puraaepa, “Auoro! Aakoara vii kavaueva vuri pitupitu raga-ia. Osa iava oisoa vurivira rutu toupari. Apeisire auepaei, ra igei tarai pieri, raa?” Uva oiso pura ovoioro rera siguiva vova Sinagog.

#### Vovouisi Osireiaro Aisia Voosivira Toupaiveira

<sup>35</sup> Uva Jisas rera iava uvureva uvare rera siguiva. Oa iava rerare taraapareva. Oa iava rera kekerevoiva, rera akereva oiso, “E Oirato Oviitoaaro Ro Ropoto oirao pieparivoi, eke viapau?” <sup>36</sup> Oa iava rerare oiso puraroepa, “Reito. Iroutoa rutu-a Oirato Oviitoaaro? Rera iava ragai taviri, ra rera oirao piea.” <sup>37</sup> ♦ Osa iava Jisas oiso puraroepa ora rera iava, “Ira kekerivoi ro-ia ovusa vii tapo ora reoparoi.” <sup>38</sup> Uva oisi-a eisi osa iavirava oiso puraroepa, “Turaro. Ragai vii oirao pieavoi.” Oire eisi pura ovoioro takuro viropa Jisas-ia vuurapa vaisi pura ovoisa.

<sup>39</sup> ♦ Oire uva Jisas oiso puraroepa, “Ragai urioraera vo rasio iare oirara rovirieisa. Osa iava voearo vuravura asa irara vuravurapaiveira. Ovusa voeao oea vuravurapaiveira oea iava osireiaro voosipapere rara.” <sup>40</sup> ♦ Uva oearovu Farisi iava voa rera ruvara-ia toupaiva. Uva rera uvuoro rerare oiso puraaepa, “E apeisi-a? Igei tapo-a voosi osirei irara, raa?” <sup>41</sup> ♦ Uva Jisas voeare oiso puraroepa, “Vosa vovouisiro oavisii osireiaro visiire voosivira toupaive, oire ra oisi iava viapau uvuipaai ra oea visii togapaise aue-ia reo. Ari ita, oiso purapataveira, Igei iava vovouisiro osireiaro aviavipaveira oiraopara rutu-ia taraipaoro. Oire uva oisi-a eisi osa iava uvuipaai ra visii togapaise oeavu aue-ia reo.”

## 10

#### Reo Ruu Sipsip Kovokovo Iava

<sup>1</sup> “Oiraopavira rutu oiso visii tavipaavoi, Ro ira viapau rataoa rutu-ia vao sipsip kovokovo vaaro koatitaro, ora vosa uvavu ragava putereve vo kovokovo kukuearo-ia voare koataoro, ira-a eera oiso toupare, Kavirupato ira orekerovu rutu ou ragapareveira. <sup>2</sup> ♦ Ari vosa ro ira rataoa rutu-ia koataparo, ira-a eera sipsip ragui tokipatoaaro rutu. <sup>3</sup> Rataoa tokipato ira rataoa karupareveira ropa ira sipsip ragui tokipareveira. Oa iava sipsip ragui rera gisipoaro uvupaveira vo osa vo ragui vaivaisiarore keeraparo vo raguio rera voearo. Osa iava oisoa vo ragui kosi piepareve rataure vo ragui tuvetuvepaoro. <sup>4</sup> Uva oisoa vo ragui sipsip ragui ora rera voearo kosi piepareve rataure. Oire ra vo raguipa iraro. Vo rara vo ragui sipsip ragui rera gisipoaro eveipaoro rera sirova utuave. <sup>5</sup> Viapau uvuipaai ra iravu raga sirova utuave. Viapau. Ari eera asavira oisoa toripaive, uvare viapau rera gisipoaro eveipai eera iravu raga.” <sup>6</sup> ♦ Va-a vao reo ruu Jisas oa voeapa vaterева. Uva viapau roroioopaepa vo reo vituaro-ia vao oa purareva voeare.

#### Vearoto Sipsip Ragui Tokipato

♦ 9:31: Sam 34:15; Pro 15:29   ♦ 9:37: Jo 4:26   ♦ 9:39: Jo 5:22, 27; Mt 13:13   ♦ 9:40: Ro 2:19   ♦ 9:41: Jo 15:22, 24   ♦ 10:2: Mk 6:34   ♦ 10:6: Jo 16:25

<sup>7</sup> ♦ Uva va-a vao oa iava Jisas voeare ita oiso puraroepa, “Oiraopavira oiso visii tavipaavoi, Ragai-a vao rataoaro sipsip ragui vova kovokovo. <sup>8</sup> Voeari oirara oea ragaipa iraaepa oea-a kavirupa irara oea oisoa urio ragapaave sipsip kavirupasa, osa viapau sipsip kare voea gisipoaro uvupaoro voea iare utupaave. <sup>9</sup> Ragai raga ita ratao-a. Vosa irai ragai iare urioro koatasa vo kasura sovara-ia, ira-a eera orirurevere Pauto vo rara koatitaro. Ra voava ita kosiro viro aio oupasa. Ra oisi raga ora voreripaoro urioparo koatapasa ita.

<sup>10</sup> “Kavirupato viapau oiso orekerovu avu vaire urioparoveira. Ari sipsip ragui kavirupasa urioparoveira voea upopaoro vo kare vuri piepasa rutu. Ari ragai vaore urioraera, ra tootooa rutu oupaive. Oire ra oisi iava voea-ia agasipape rutu vo tootoo. <sup>11</sup> ♦ Ragai vearto sipsip ragui-ia tokipato. Uvare rera raga vearto sipsip ragui tokipato ira ora rera iava tootooaro viki ragarevereera rara vo ragui iavirava. <sup>12</sup> Ari ro kovopatoa raga ira voria ragare kovopareve, viapau oiso sipsip ragui tokipatoa rutu-a. Uvare viapau oiso rera vo raguiaro-a sipsip ragui. Eva-a oa vituaro oiso toupai, Ro ira aakau kare tueoro torirevere sipsip ragui kavuoro. Ra oisi iava aakau kare sipsip ragui aiopaoro vo ragui sikasikapaive. <sup>13</sup> Eake iava? Uvare eera voria ragare kovoparevoi. Viapau oiso sipsip raguire rugooparo.

<sup>14</sup> “Ari ita, ragai-a vearto sipsip kare tokipato. Ragoa vo ragui-ia taraiparaveira, ovusa vo ragui tapo ita ragai-ia taraiipaave. <sup>15</sup> Oiso-ia Aite ragai-ia taraiparoi, ovusa ita Aite-ia taraiparai. Oa iava ora ragai iava tootooa oaa vikiavere rara sipsip ragui tauvaoro. <sup>16</sup> Oire uva oraguirovu tapo tou ragapaiveira sipsip ragui. Uva viapau oiso vo kovokovo iava vo raguiro-a. Oraguiroare tapo oiso ruipaparai ra vo raguiro tuvetuvea. Ra va iava ragai raga gisipoaro uvuive. Ra oisi iava katai ragui rutu puraa viro ora takuvuoro. Osa iavirava kataitoa raga pere vo ragui rutu tokipato ae ragai. <sup>17</sup> ♦ Osa raga vituaro iava Aite ragaipa vo sirao vatereva vare, oiso ra ora ragai vaaro tootooa viki ragaa vo raguipa ototooa vorevira ouaverea. <sup>18</sup> ♦ Viapau oiso irai ragai iava tootooa verarevere rara. Viapau. Ari ragai raga-a ragoa vare rugoopaooro va viki ragapaavoi vao tootooa. Ari ita, gorua toupaivoi ragai vaaro tootooa viki ragasa. Ora oiso osa tapo toupaivoi vo goruo vo tootoo vorevira ita ousa. Oare oisi vo reo ouavora Aite ruvara-ia vare vao.”

<sup>19</sup> Oire uva voeao Jiu vo reo vao uvuoro ora voea-ia voearei ita puraiva ora roo pieoro oisi vo reo iavirava. <sup>20</sup> Uva oisi-a oiso osa iava riro irara rutu oiso purapaaepa, “Vurito tugarato ira-ia toupare eera oa iava kokoroparoi. Uva eakere rera vo reoaro uvupatavoi?”

<sup>21</sup> ♦ Ovusa oearovu voe iava oiso purapaaepa, “Viapau oiso vo reo-a vao ro vo reoaro ira-ia vurito tugarato toupareve. Eari apeisi ragavira vurito tugarato uvuiparoi ra voeao voosi irara osireiaro vorevira vura piepareve, raa?”

### Jiu Jisas-va Keriaepa

<sup>22</sup> Uva Jerusalem-ia Tugoropa Voki karekeepa vao oa-ia oisoa Oovapa Vurei purapaive vo vokio reesipaoro oa-ia Tugoropa Kepa Tempel vorevira rataoaro karuiva voari tuariri. Ovuuta-a eva riro uteo vuuta. <sup>23</sup> Uva voa Tempel sovara-ia Jisas vokareva rakorako uru ivara-ia vao oa paureva Solomon. <sup>24</sup> Oire uva voa-a vo uva Jiu rera kovokovosa urioaepa ora guruoro rera iare. Oa iava voa rerare oiso puraaepa, “Auoro. Aa vo vokio igeipa aviavi pievira rutu ora vii iava sипosiporivere? Vosa vii rutu Krais, oire igeipa roroio pievira rutu tavi iraou.”

<sup>25</sup> ♦ Uva Jisas voeare oiso puraroepa, “Visii tavipaavora vo vaisio iava. Uva viapau oiso oirao piepataveira. Uvare vo kovoro rutu varao oara purapaaveira Aite vaisiaro-ia oara iava ragai vaisiaro oiraopavira karekeparaveira. <sup>26</sup> Ari ita, oearovu raga-a visii. Viapau oiso ragai vo raguiaro iava sipsip ragui visii-a. Osa iava viapau oirao piepataveira. <sup>27</sup> Ari ragai vo raguiaro sipsip ragui ragai gisipoaro uvupaiveira. Oa iava ragai tapo vo ragui-ia taraiparaveira. Osa iava eisi ragai sirova utupaaveira. <sup>28</sup> ♦ Oa iava vo ragui vatepaaveira Tootoo Ovoi vao vokiara rutu iarepa. Ra oisi iava viapau oiso opesikopaave. Viapau rutu. Uva viapau irai uvuiparoi ra vo ragui verareve ragai vavaearo iava. <sup>29</sup> Aite oaa ragaipa oragui vatereva, uvare rera gorutoa rutu ira orekerovu rutu-ia pute iraopareveira. Uva

❖ 10:7: Jer 23:1-2; Esi 34:2 ❖ 10:11: Ais 40:11; 1 Pi 5:4 ❖ 10:17: Ais 53:7-8, 12 ❖ 10:18: Hi 5:8 ❖ 10:21: Jo 9:32-33 ❖ 10:25: Jo 5:36 ❖ 10:28: Jo 17:2-3; 1 Jo 2:25

viapau oiso irai uvuiparoi ra vo ragui verareve vova Aite vavaearo iava. <sup>30</sup> Ragai ora Aite vegoa-a kataitoarei rutu.”

<sup>31</sup> Osa-a oiso osa vituaro iava voea Jiu avekeara kae pie ragaiva, oiso ra rera vurukoive vara-ia. <sup>32</sup> Oa iava Jisas voeare oiso puraroepa, “Visii tue pieavora riroara rutu-ia veearopa kovoro Aite varaaro. Ari aa vo kovo-a vao oa-ia rugorugoopaoro ragai vurukosa aeupatai evara-ia avekeara, raa?”

<sup>33</sup> Osa iava voea Jiu rerare oiso puraaepa, “Viapau oiso igei okovoi-ia veearoa vai rugorugoopaoro vii vurukosa aeupaei. Viapau. Ari aue iava uvare Pauto toviparivoi vii vao oirato akuku raga. Ora tapo vaopa uvare ora vii ragare oiso purapaei, Vii-a Pauto.”

<sup>34</sup> ♦ Uva Jisas voeare oiso puraroepa, “Apeisi ragavira? Uvare rigatoa oiso toupaivoi vo visii vaaro-ia Reo Taisi oreoa-ia Pauto ora rerapa oeavu reipa irara reesireva voari tuariri oiso puraoro, Visii-a pau irara. <sup>35</sup> Uva voea voeao tuariri oea iare Pauto vo reoaro avaepa vao oa oiso puraepa, Voea-a pau irara. Ari ita, Tugoropa Vuku viapau uvuipai ra oku pieive.

<sup>36</sup> Uva Aite ragai reesioro ragai arureva vo rasio iare. Uva oisi-a eisi osa iava oiso purarai, Ragai-a Pauto Oviitoaaro. Uva eakere oiso purapatai, Pauto toviparivoi, raa?

<sup>37</sup> “Vosa viapau Aite vo kovoaro purapaa, ra opeita ragai vo reoaro oirao piepata. <sup>38</sup> ♦ Ari ita, ragai rera vo kovoaro purapaavoi. Vosa irai ragai vo reoroaro oirao pie arapareasiparo, oa iava uvuiparoi ra vo kovoro raga oirao piepareve oara purapaavoi. Osa iava uvuipatai rutu ra taraita ora vearovira rugorugoota oiso-ia, Ragai-ia toupare Aite, ovusa ita ragai Aite-ia toupaavoi.”

<sup>39</sup> Uva rera tuuke rovosa aeupaaepa ita, ovusa voea vatavataoro avaroepa.

<sup>40</sup> Uva Jisas vorevira voreoro uukova Jodan ivioreva. Oa iava vo pouro viropa uva tuariri Jon oirara baptaisreva. Uva voa toureva. <sup>41</sup> ♦ Oire uva voa riro irara rutu rera iare urioaepa. Oa iava oiso puraaepa, “Oiraopavira rutu. Viapau oiso Jon oravotoi purareva. Ari vo osa Jon rera iava ro reoara rutu purareva, oara-a oiraopara rutu.” <sup>42</sup> Uva voa-a vo uva riro irara rutu rera oirao pieiva rutu.

## 11

### *Vo Lasaras Iava Toupari Uva Kopiiroepa*

<sup>1</sup> ♦ Uva iravu upiaproero eera Lasaras aue iava rera Betani urui-ia. Uva-a vo Betani-ia Maria vo voaorei vo uruiaro ora Mata. <sup>2</sup> Eira Maria iria oiso vo utupaua sanda kokoeva Turaro kokotoaro iare. Oa iava kokotoarei posiposi pieeva ora oira oruaro-ia. Uvava taataato-a eera Lasaras ira upiaproero. <sup>3</sup> Uva va-a vao oa-ia taataarirei keeraereiepa Jisas-re oiso puraoro, “Turaro. Ro ira kavikopariveira ira upiapro.” <sup>4</sup> ♦ Oa iava Jisas vo reo uvuoro oiso puraroepa, “Viapau ovoievira rutu kopiipasa eva upiaro. Ari auere-a keraria vo goruaro kareke piepasa vao Pauto vaaro. Ra oisi iavirava ragai vaisiaro kae pieive rara.”

<sup>5</sup> Uva Mata ora Maria ora Lasaras ovavuutapa oisoa rirovira siraoparo Jisas. <sup>6</sup> Uva Lasaras iava uvureva uvare upiaproero. Oa iava vo vokirei-ia toureva vo uruia eva oa-ia toureva. <sup>7</sup> Uva utupavira igei disaipel tavioro oiso puraroepa, “Irata ra vorevio Judia Distrik iare.”

<sup>8</sup> Oa iava igei disaipel rerare oiso puraiepa, “Tisato. Airevi raga ita voa vii vurukosa Jiu aue ragaae. Uva voare ita voresa aeupaei, raa?”

<sup>9</sup> ♦ Jisas oiso puraroepa, “Asi viapau pasi oiso katai tau erao (12) vaiei o ravireo-ia, eke? Vosa ro ira ravireo-ia vokapareve, ra viapau oiso koveparo. Eake iava? Uvare vo rasio aviaviaro kekeparevoi vokaparo. <sup>10</sup> Ari vosa vokiaro vokapareve, ra koveparo, uvare viapau aviavia vai rerapa.”

<sup>11</sup> Uva oisi-a eisi osa pura rovoroiva, oiso ita puraroepa, “Vatetoa oavi Lasaras uusiroi. Ira tore piesa avaparai.” <sup>12</sup> Oa iava igei rerare oiso puraiepa, “Turaro. Vosa uusiroe, uva uvuiparoi ra vorevira torero poreteoro, eke?” <sup>13</sup> Jisas Lasaras kopiaro iava eisi puraroepa. Oa iava oiso keapaeipa, Ira uusi ragaparo.

♦ 10:34: Sam 82:6 ♦ 10:38: Jo 14:10-11 ♦ 10:41: Jo 2:11 ♦ 11:1: Mk 11:1; Lu 10:38 ♦ 11:4: Jo 9:3

◊ 11:9: Lu 13:33; Jo 9:4, 12:35

<sup>14</sup> Osa iava Jisas aviavi pievira oiso igei tavireva, “*Lasaras ira kopiiroe rutu.*” <sup>15</sup> Uva visiire rugorugoopaoro rorupaavoi. Aue iava uvare viapau rera tapo touavo vo vokia eva. Osa iava rera iare avapaviei ra oiraota.”

<sup>16</sup> Uva Tomas ro ira oisoa vaisipaise oiso, Didimas tavarato, igei disaipel arupareva oiso purapaoro, “Oire irata, ra Tisato tapo kopiisa avavio.”

#### *Jisas-a Oirato Vorevira Vo Torearo Vituaro Ora Tootooa*

<sup>17</sup> Oire uva Jisas avaroepa. Uva pouro viropa. Oa iava tarairoepa oiso, Lasaras vo resura rutu-ia voki toureva tova-ia. <sup>18</sup> Betani-ia uva Jerusalem-ia ruvara-ia toupaiveira aue uvuiaro-ia vo peva vuutara (3 kilomita). <sup>19</sup> Uva-a vo uvare riro irara rutu Jiu iava urioaepa Mata voaorei ora Maria vo vovouaro varaata piepasa, uvare taataato vairei arova kopiiroepa. <sup>20</sup> Uva Mata Jisas iava uvuoro avaopa raivaaro rerava aivarosa. Ovusa Maria kepa raga sovara-ia paupaoro toupaeva.

<sup>21</sup> Oire uva Mata rerare oiso puraopa, “Turaro. Vosa vo tourivori, ra viapau taataatoa oaa kopiilo. <sup>22</sup> ♦ Ari taraiparai oiso, Vosa Pautoa iare variri, ra vii vatereve oavu avu vai vii vo ruipaaro sirova.”

<sup>23</sup> Oa iava Jisas oiso oira tavireva, “*Taataatoara vorevira to reparoi, rara.*” <sup>24</sup> ♦ Uva Mata rerare oiso puraopa, “Ari ita, ragai oiso taraiparai, Ira Ovoiopa Voki-ia toreroverea vo rara tootooro rera raga vo vokiri-ia oa-ia oirara rutu vorevira torevarea.” <sup>25</sup> ♦ Uva Jisas oira tavireva, “*Ragai raga ita vorevira torea vituaro ora tootooa vituaro eva-a ita ragai raga. Ro ira ragai oirao piepareve eagara vosa kopiilo, ira ita taru oiso tootoovira toupareverea.*” <sup>26</sup> Ora voeo oea tootoovira toupai ragai oirao piepaoro oea viapau uvuipaa ra ovoieivira kopii ovoipaave. Viapau. Ari evoea uvuipaa ra tootoovira raga toupaive vokiara rutu-ia. Eva-a vai vao oirao pieparivoi, eke viapau?”

<sup>27</sup> ♦ Osa iava Mata rerare Jisas oiso puraopa, “Aure, Turaro. Viil oirao piepaa, uvare vii-a Krais Pauto Oviitoaaro. Viil vao viigoa iava Pauto tapiroepa, oiso ra uriou vo rasio iare.”

#### *Jisas Gaureva*

<sup>28</sup> ♦ Mata oiso puraopa. Oa iava taevare keerasa avaopa Maria. Oire uva oira ou pieoro vatuarore oirava voreopa. Uva voa gare visivi oiso oira tavipaeva, “Tisato eera ira urioroi vo tousa. Ira viire keeraparoi.” <sup>29</sup> Uva Maria vo reo uvuoro ikauvira avaopa Jisas iare.

<sup>30</sup> Oire uva Jisas kare uviro asavira toureva. Uvare voari raga toupareva uva Mata rerava aivaroeva. <sup>31</sup> Ari ita, vo osa Jiu-pa irara Maria tapo toupaiva kepa-ia oira vovouaro varaata piepaoro. Uva voa-a evoa uvava oira tueiva ovusa ikauvira kosio viropa. Oa iava oira sirova utuaepa uvare oiso keapaaepa, Tova-ia gaupasa avaoe.

<sup>32</sup> Oire uva Maria vo pouo viropa uva toureva Jisas. Uva voa rera kekeoro rera kokotoaro ruvara-ia rekuoro takuo viropa rerare oiso puraoro, “Turaro. Vosa vo tourivori, ra viapau oiso taataatoa oaa kopiilo.”

<sup>33</sup> ♦ Uva voa Jisas oira vurareva ovusa gaupaeva. Ora voea tapo kekereva Jiu-pa irara oea oira tapo urioaepa. Oea tapo gaupava. Osa iava vurivira rutu rera iava sopaua vavataepa kopii vaarore kasipu iraopaoro aue siitoka. Oa iava siraoroepa rutu. <sup>34</sup> Osa iava oiso akereva, “*Ovu-ia rera tovatavo?*” Uva rerare oiso puraaepa, “Turaro. Uriou vo tova kekesa.”

<sup>35</sup> Osa iava Jisas gaureva ora rera sopaa raga-ia. <sup>36</sup> Oa iava Jiu rerare oiso puraaepa, “Rera kekepatavoi. Ro ira ro kaviko iraopareveira.” <sup>37</sup> ♦ Ovusa oearovu oiso purapaaepa, “Ira-a eera oearovu osireiaro vura pieparevora voosi irara. Easi pasi, viapau vai uvuiroeri vai, ra ro tauvarevora, viapau vai kopiiloeri?”

#### *Jisas Lasaras Vorevira Tore Pierava*

<sup>38</sup> ♦ Jisas rirovira siraoa vo vavataaro sovorevoiva ora rera sopaa-ia, vo pouro viropa uva toupaiva vo tova aveke rikui-ia. Uvare iriavu-a rikui iria tekaiva rirova rutu-ia

---

♦ 11:22: Jo 9:31 ♦ 11:24: Dan 12:2; Jo 5:28-29 ♦ 11:25: Jo 1:4, 5:26 ♦ 11:27: Mt 16:16 ♦ 11:28: Mt 26:18; Lu 22:11 ♦ 11:33: Jo 12:27 ♦ 11:37: Jo 9:6-7 ♦ 11:38: Mt 27:60

avekeva. Uva iriavu o rikui riaaro veropava aveke tupapaeva. <sup>39</sup> Uva Jisas voea tavioro oiso puraroepa, “Aveke verata o-ia.” Oa iava Mata o uvava taataato ira kopiiroepa iria oiso puraopa, “Turaro. Easi kopiiroerao. Vo resura voki putevorao rera isivaaro-ia. Uva eru geesi viapau kosi pirovere rara, eke?” <sup>40</sup> Oa iava Jisas oirare oiso puraroepa, “Ari apeisi vii tavi rovoavo? Uva oiso purarae, Vosa oirao pieri, osa iava uvuipauei ra keraria vo goruaro kekeri Pauto vaaro.” <sup>41</sup> ♦ Oire uva aveke veraiva.

Oa iava Jisas viara-ia vuraoro oiso puraroepa, “Aite. Vi-iā vearo vaisi purapaavoi, uvare ragai vaaro variria uvurivoi.” <sup>42</sup> ♦ Taraiparai oiso, Vi-iā ragai vo variriroaro uvupariveira varao oara purapaaveira. Ari voeare oirara rugooparai. Oa iava vo varirio puraavoi, oisore ra oisi vo reo uvuoro vao oirao pieive osa ragai arurivora vore.”

<sup>43</sup> Eisi puraroiva, rirovira rutu rerare keeraroepa oiso puraoro, “Lasaras! Kosiu viro!” <sup>44</sup> Oa iava rera kopiito kosiro viropa kokoto tuukerova ora vavaeara varao oara tuukeiva aue-ia varo iroro. Ora rera puaaro tapo tavuruiva oavu-ia varoa oa oisi raga toupaiva. Oa iava Jisas oiso voea tavireva, “Varoara verata. Ra oisi iava vokareve.” Uva oisi pieiva rera-ia.

### *Reipa Irara Reo Goru Puraiva Jisas Uposa (Matyu 26:1-5; Mak 14:1-2; Luk 22:1-2)*

<sup>45</sup> ♦ Riro irara Jiu iava urioaepa Maria tapo va kekesa vao oa purareva. Uva va-a eva oa iava rera Jisas oirao pieiva rutu. <sup>46</sup> Osa oearovu ratarataa vovou irara aue Farisi iare avaaepa voea tavisa va iava vao oa purareva Jisas.

<sup>47</sup> Osa iava reipa irara pris voeao tauo purapa irara voearei ora Farisi Kaunsel irara guruiva. Oa iava voea oiso akeiva, “Apeisi rera piepai ro ira riroara rutu ravotoara pura vasiparevoi?” <sup>48</sup> Vosa rera eaka ragapapere, oire ra oisi raga piepareve. Ra va iava oirara rutu rera raga oirao piepaive. Vosa oisi eisi ra Rom gavmanaro rera voearo arureve, ra urioave vigei vaaro Rovopa Kepa Tugoropa Kepa pakosa. Ora orekerovu rutu vuri pieive varao vigei varaaro ora voeao vigei voearo.”

<sup>49</sup> ♦ Oire uva iravu oirato rera vaisiaro, Kaiafas vo vuuta iava eva vo iva-ia pris kovo-ia reiparoepa. Ira voeare oiso puraroepa, “E viapau gare visivi taraipatai?” <sup>50</sup> Opeita voeaoe rugorugopata. Vosa kataitoavi vai raga kopiilo oirara rutupa tootooaro vateoro, eva vearoa rutu visiipa. Teapi oirara rutu voeao vigei voearo opesi ragaave.”

<sup>51</sup> Uva viapau oiso ora rera vovouaro iava oiso vo reo purareva. Ari eera pris kovo-ia reiparoepa vo iva sovara-ia voa-ia. Oa iava Pauto iava vo reo urioepa. Oa iava ravaavira oiso puraroepa, Jisas kopiirovere Jiu-pa irarapa tootooaro vateoro. <sup>52</sup> ♦ Uva viapau oiso Jiu ragapa tootooaro vatereve kopiiro. Viapau. Ari eera kopiirovere Pauto ovii iraraaro rutu gurusa. Voeao oea vo rasio-ia sikasikavira toupaiveira. Ra va iava katai irara raga puraive.

<sup>53</sup> Uva vo voki-a eva Jiu reipa iraraaro rovoaepa reoa puraoro Jisas uposa. <sup>54</sup> ♦ Eva vituaro iava viapau oiso poeravira vokapareva Juda taere vuruvuru-ia. Uva vo taere kavureva eva. Osa iava uvavure avaroepa kuvala tapi ruvara-ia vo uruio iare riro urui oa voavi oisoa toupaive oa oisoa vaisipaive, Efraim. Uva vo uruia eva toureva igei disaipel tapo.

<sup>55</sup> ♦ Oire uva Tagausapa Vurei Pasova vo vuutaropa tutuu pieepa Jiu vaaro. Uva Pasova vurei oa touvira toupaiva ovusa oirara rutu uruiara rutu iava Jerusalem iare ipaaepa, oisore ra ora voea raga ora sisigarue pie rovoave oavu-ia tugoropa pitupitu voea vaaro. <sup>56</sup> Uva osa iava Jisas-re taraapaiva. Uva Tugoropa Kepa Tempel sovara-ia torepaaepa. Oa iava voea raga voa ora reopaaepa oiso purapaoro, “Apeisi vai rugoopatai visii vao? Easi viapau pasi eera Tugoropa Voki kekesa urioparoi vai?” <sup>57</sup> Uva voeao reipa irara pris irararei ora Farisi oiso reesia puraiva. Vosa irai Jisas-ia taraiparovere vo osa ovu-ia toupareve, oire irai rera iava taviro. Oa iava uvuipaai ra uvai rera tuukeive.

♦ 11:41: Jo 17:1 ♦ 11:42: Jo 12:30 ♦ 11:45: Jo 2:23 ♦ 11:49: Mt 26:3 ♦ 11:52: Ais 49:6; Jo 10:16  
♦ 11:54: 2 Kro 13:19 ♦ 11:55: Mt 26:1-2

## 12

*Maria Sanda Petoeva Jisas Kokotoaro Iare  
(Matyu 26:6-13; Mak 14:3-9)*

<sup>1</sup> ✩ Oire uva touvira katai vatara vokiro toupaiva aeua Tagausapa Vurei Pasova oiso ra karekepe. Uva vo vuuta-ia Jisas Betani iare avaroepa Lasaras vo uruiaro iare ro ira vorevira tore pieрева tova iava. <sup>2</sup> Oa iava vo urui-ia Jisas-pa aioa puraiva. Uva Mata urioopa aio tokesa. Oire voa Lasaras voea tapo oirara pauparoepa oea Jisas tapo paupaaepa. <sup>3</sup> ✩ Uva Maria aue uvuiaro katai vavata (paun) korovo ovi oueva. Oovia vaisipai oiso, Nad. Oovia puraiva aue iava airepa ruu piero. Ipa pie voriva rutu. Oa iava oira-ia Jisas kokotoaro kipueva. Uva ora oira iava orui-ia rera kokotoaro posiposi pieeva. Oira vearo geesi va vaaro vao sanda kepa sopaaro vogisi pieva. <sup>4</sup> Uva iravu disaipelto Judas Iskariot ro ira Jisas kosi pievere keripa irarapa ira oiso puraroepa, <sup>5</sup> “Eakepa iraipa vo ovio sanda ovi vate asapai, ra va vorireve irai? Oa iava uvuipavieie ra va-ia aue vo peva vovoto kina (K300) oupe vo ovi-ia. Ra oai apota irara vai vatepe rara.” <sup>6</sup> Uva viapau oiso apota irara-a oeare rugorugoopaoro oisi eisi puraroepa. Viapau. Ari ora rera ragare-a, uvare rera-a riro kaviruto. Ira oisoa moni bokis tokipaoro va kavirupareve.

<sup>7</sup> Uva oisi-a eisi osa iava Jisas voeare oiso puraroepa, “Oira eakata eira. Iria eisi pieevoi ragai kipuoro vo vokio iare ravaavira ovokia-ia ragai tovoivere tova-ia. Uvare ragai vo vokiaro tutuu pievoi. <sup>8</sup> ✩ Apota irara visii tapo vokiara rutu-ia toupaiveira. Ari ragai viapau oiso visii tapo toupaavere touvira.”

*Reipa Irara Pris Reo Goru Puraiva Lasaras Uposa*

<sup>9</sup> ✩ Oire uva riro irara Jiu iava taraipaaepa oiso, Jisas vo uruio-ia touparevoi. Oa iava rera iare urioaepa. Uva viapau oiso rera raga kekesa urioaepa. Viapau. Ari vao iava tapo-a, uvare Jisas Lasaras tuaririvi vorevira tore pieрева tova tapi iava. Oa iava rer tapo kekesa urioaepa. <sup>10</sup> Uva oisi-a oiso osa iava reipa irara reo goru puraiva, oiso ra Lasaras tapo upoive. <sup>11</sup> Eake iava? Uvare riro irara rutu Jiu iava Lasaras-re rugoopaoro voea kavuiva reipa irara pris Jisas raga oirao piesa.

*Jisas Jerusalem-ia Karero Viropa Oiso Osa King*

*(Matyu 21:1-11; Mak 11:1-11; Luk 19:28-40)*

<sup>12</sup> Oire uva vo vokio isivaaro riro irara Pasova vurei-ia toupaoro Jisas iava uvuiva oiso, Urioparoi vore Jerusalem-ia. <sup>13</sup> ✩ Osa iava sorapita raoro ouiva. Oa iava varava rerare korotosa avaaepa raivaaro. Oa iava raga piepaiva varava kaku piepaoro rerava oiso purapaoro,

“Hosana! Ro vaisiaro kae piepe ira urioroi Reito Turaro vaisiaro-ia Isrel-pa irara reraaro King!”

<sup>14</sup> Uva Jisas iriavu donki kakae kekereva. Oa iava oira ivara-ia paupaoro urioroepa oiso osa Tugoropa Vuku purapapeira,

<sup>15</sup> ✩ ‘O Saion-pa irara. Opeita uriripata. Visii reraaro King keketa. Eera-a ira urioroi aue-ia paupaoro donki kakae.’

<sup>16</sup> ✩ Oire uva rovoa-ia igei disaipel viapau oiso va vituaro-ia taraiiepa. Ari rera vo torearo isivaaro iava Jisas keraria oureva. Ovuuta-a eva oa-ia vorevira ora rugorugoo pieiepa vaore osa Tugoropa Vuku purapapeira rera iava. Osa iava tapo oirara ruture rugooiepa voeao oea orekerovu purapaiva vo rerare.

<sup>17</sup> Tuariri Lasaras kopiiroepa. Oa iava tova-ia toureva. Uva riro irara Jisas tapo toupaiva ovusa Lasaras-re keeraroepa rera vorevira tore pieoro. Uva va-a vao oa iava riro irara tavitavi iraopaaepa va iava vao oa purareva Jisas. <sup>18</sup> Osa iava rera iava uvuiva oirara, uvare ravotoa purareva. Oa iava raivaaro rerava aivarosa avaaepa. <sup>19</sup> ✩ Uva oisi-a eisi osa

---

✩ 12:1: Lu 7:37-39   ✩ 12:3: Jo 11:2; Mk 14:3   ✩ 12:8: Diu 15:11; Mk 14:7   ✩ 12:9: Mk 12:37   ✩ 12:13: Sam 118:25-26; Jo 1:49   ✩ 12:15: Sek 9:9   ✩ 12:16: Mk 9:32   ✩ 12:19: Jo 11:47-48

iava voea raga Farisi ora reopaaepa oiso purapaoro, “Va eva keketavoi. Visiigoa voeare korukoru ragapataveira, osa viapau. Uva oirara rutu rera raga sirova avaai.”

### *Oearovu Grik Jisas Keke Ruipapaaepa*

<sup>20</sup> Oirara rutu Jerusalem iare ipaaepa Pautoa-pa lotusa vo vokia vao Tugoropa Voki Oovapa. Uva oearovu tapo Grik-pa irara voare ipapaaepa. <sup>21</sup> Uva Grik-pa irara urioaepa Filip iare aue iava rera Betsaida vo Galili taere sovara-ia. Uva oiso rerare puraaepa, “Auoro. Oiso ruipapaiei ra Jisas kekeio.” <sup>22</sup> Oa iava Filip avaroepa Andru tavisa. Uva vaiterei rutu avasiepa Jisas tavisa. <sup>23</sup> Uva Jisas vaitereire oiso puraroepa, “Easi Oirato Oviitoaaro ragai vo vuutaaro-a vao oa pou piroi. Oa-ia keraria oupaavoi. <sup>24</sup> ♦ Oiraopavira rutu oiso osa vei tavipaavoi ragai vo vuutaaro iava oiso, Vosa wit takura viapau rasiua arore kovepe kopiisa voa, ra va raga kataia toupaive. Ari ita, vosa kopiilo, oire voava vorevira torero riro kouro aioara karekeoro. <sup>25</sup> ♦ Ari ro ira ora rera iava tootooa-ia virivirioparo ira iava opesi ovoipere eera. Ari ro ira tootooaro vatereve vo oearovupa ragai vo ruipaaro sirova utupaoro, eera-a ira ora rera vaaro tootooa oureverea vao Tootoo Ovoi rutu. Oa viapau opesia vai. <sup>26</sup> ♦ Vosa irai ragai vo kovoaro-ia pitureve, ira uvui iraopa ra ragai sirova uturo, oiso ra ragai tapo toupareve, Kovopatoa oaa vo uva toupaaverea. Vosa ro ira ragai vo kovoaro-ia pitupareve, irapa rei vaisi vatereverea Aite oaa taru.

### *Uvuipaai Ra Oirato Oviitoaaro Vaisiaro Kae Pie Iraopaise*

<sup>27</sup> ♦ “Vo vokio ragai iava sopaua vavataei. Uva apeisi puraparai? E uvuiparai ra oiso vaio pasi purara, Aite vao verari oa ragai-ia karekesa auepai? Eke viapau uvuiparai ra eisi purara? Viapau. Uvare va raga-a eva oare poura viropa vo vuutari-ia oa-ia siraoa vo tavakaaro ouavere. <sup>28</sup> ♦ Aite. Uvuipauei ra ora vii vaisiaro rei pieri oisi iavirava oiso.” Eisi osa puraroepa Jisas. Oa iava Pauto vo reoaro vuvuiua iava varaepla. Oreoa-ia oiso puraroepa, “Tuariri ora ragai iava vaisia rei pieavora. Oire uva vorerivira ora ragai vaisiaro rei piepaavoi rara.” <sup>29</sup> Oirara voeao oea rera ruvara-ia tutuu pievira torepaaepa oea vo guruko uvuiva. Oa iava oiso puraaepa, “Varakeoto ira pokoro viroi.” Ovusa oearovu oiso puraaepa, “Iravu purapurapato enselto ira rera tapo ora reoparoi.”

<sup>30</sup> Oire uva Jisas voeare oiso puraroepa, “Viapau oiso ragai tauvasa oiso vo reo karekeei. Viapau. Ari visii tauvasa-a. <sup>31</sup> ♦ Vo vokio Pauto oirara rutu voeao vo rasio-ia rovirieiparevoi. Vo vuuta-a vao oa-ia vo rasio vo pitupituaro vo goruardo tokoparevoi Seten vo goruardo-ia pute iraoro. <sup>32</sup> Vo vokio vo rasio-ia toupaai. Uva vovio utupauavi ragai kae pieivere ragai kotooro rara. Uva vo vuuta-a eva oa-ia oirara rutu vo rugooroaro ivuavere ora ragai iare. Ra oisi iavirava ragai oirao pieive.” <sup>33</sup> Uva oisi-a oiso osa puraroepa ora rera vo kopiaro reesioro.

<sup>34</sup> ♦ Oa iava oearovu rutu rera vo reoaro pukooro rerare oiso puraaepa, “Igei oiso vo reo uvuiova Reo Taisi-ia, Krais oiso touvira rutu toupareve. Uva eake-a vao oa vituaro iava oiso puruaepli, Oirato Oviitoaaro kae pieivere rera kotooro? Uva aa ro rutu-a ro Oirato Oviitoaaro, raa?”

<sup>35</sup> Oa iava Jisas oiso voea tavireva ora rerare, “Gare vuutavi raga-ia aviavia visii tapo toupaivoi. Uva uvui iraopatai ra vo aviavio-ia vakata. Teapi rupa visii tavuruve. Ro ira rupa-ia vakopareve oire ra viapau taraiparo oiso, Ovua avaparoi. <sup>36</sup> Vo osa aviavia vaviopavira visii tapo touvira toupai, oire uva uvui iraopatai ra vo aviavi oirao pie iraota. Oa iava uvuipatai ra oiso rutu kareketa, Visii-a aviavia-ia vokapa irara rutu.”

### *Riro Irara Rutu Jiu Viapau Oiso Jisas Oisoa Oirao Piepaive*

Vo reo-a vao oa purarevoiva, Jisas voeakavuoro avaroepa voea osireiaro iava vatausa. <sup>37</sup> Ari ita, rera oisoa siitue ragapaine Jiu, ovusa riro ravotoro rutu pura ragapareve. Ovusa viapau rera oirao piepaive oisi iavirava. <sup>38</sup> ♦ Uva oisi-a eisi osa iava profetato Aisaia vo reoaro oiraoepa vao oa iava oiso puraroepa,

❖ 12:24: 1 Ko 15:36   ❖ 12:25: Mt 10:39; Mk 8:35; Lu 9:24   ❖ 12:26: Jo 14:3; 1 Te 4:17   ❖ 12:27: Mt 26:38-39

❖ 12:28: Mk 1:11, 9:7   ❖ 12:31: 2 Ko 4:4; Ef 2:2   ❖ 12:34: Sam 110:4; Ais 9:7   ❖ 12:38: Ais 53:1; Ro 10:16

‘Turaro Pauto. Irouto igei vo reoaro oirao piepare? Irouto-a ro ira Turaro Pauto vo goruaro eveiparevoi? Viapau rutu oiso iraiei.’

<sup>39</sup> Uva viapau oiso uvuipaavere ra Jisas oirao piepaive. Oa vituaro iava Aisaia oiso oreovu rigatoreva. Oa-ia oiso puraroepa,

<sup>40</sup> ♦ ‘Pauto voea osireiaro voosi ovoi piererva. Ora voea vo rugorugooroaro tapo tupareva.

Osa iava viapau uvuipaai ra oaravu avu vai kekepaive ora voea osireiaro iava. Ora vo vearo rugoo-ia voea iava sopaura-ia. Oire ra oisi iavirava viapau ora voea iava sopaura oaiive porepaive. Osa iava viapau uvuiparai ra voea porete piepaa. Viapau rutu.’

<sup>41</sup> ♦ Ari ita, voari tuariri Aisaia ira Krais vaaro keraria kekereva. Oa iava vo reo purareva rera ragare Krais.

<sup>42</sup> Riro irara reipa irara Jiu iava rera oirao pieiva. Osa Farisi ragapa uriripaaepa. Oa iava viapau ora voea vo oirao pieroaro iava tavitavipaepa, uvare oiso rugoopaaepa, Teapi vigei siguive Reo Taisi Uvupa Kepa iava Sinagog. <sup>43</sup> Aue iava uvare oiso raga oisoa ruipa iraopaave ra oirara voea vaisiaro kae piepaive. Vo osa oisivi raga Pautoa-re oiso rugoopaaave. Ra voea vaisiaro-ia vearo vaisi purapareve.

### *Jisas Vo Reoaro-a Vao Oa-ia Oirara Rovirieirevereia*

<sup>44</sup> ♦ Oire uva Jisas rirovira rutu reoaro oiso puraroepa, “Ro ira ragai oirao piepareve ira viapau oiso ragai raga oirao pieparevoi. Ari Aite tapo oirao pieparevoi ro ira ragai arureva vore.

<sup>45</sup> Ora ro ira ragai kekereve eera ita-a ira Aite tapo kekepare ro ira ragai arureva. <sup>46</sup> Vo rasio iare oiso rutu urioraera osa aviavia vaore, oiso ra oirara rutu ragai oirao pieive.

Ra oisi iava viapau oiso rupa-ia toupaive. <sup>47</sup> ♦ Vosa irai ragai vo reoaro uvupareve, ra viapau va oirao piepareve va sirova utupaoro, eera-a ira viapau rovirieaverea oiso osa ro reo rovirieipato. Viapau oiso ragai urioraera ra oiso toupaa, Oirara rovirieipato ragai.

Viapau. Ari uriorae voea vorevira virivarisa rutu. <sup>48</sup> Ro ira ragaire isivaparo vo rara viapau ragai vo reoaro oupareve, ira rovirieiverea ragai vo reoaro raga vo Ovoiopa Vokicia. Uvare ragai vo reoaro, Oiraopa Reo rutu oa toupai oiso rutu osa reo rovirieipato. <sup>49</sup> ♦ Viapau oiso ora ragai raga vo vovouaro iava oiso reoreoparai. Viapau. Ari Aite-a ira ragai siporeva. Eera ira ragai taviparevoi vo reoro ruture vara purapasa vara rutu tapo iava siposipopoaro. <sup>50</sup> Taraiparai Aite vo reoaro-ia. Oa tootooa kareke piepaiveira vao Tootoo Ovoi vokiara rutu iarepa. Eisi osa iava vo reoro rutu varao purapaa oiso osa Aite varare puraroepa.”

## 13

### *Jisas Disaipel Irara Kokotoaro Sisureva*

<sup>1</sup> Tagausapa Vurei Pasova vo vuutaaro kareke assavira touva. Uva Jisas tarairoepa vo vuutao-ia oa karekeei oa-ia vo rasio kavurevere Aitetoa iare avaoro. Uva oisoa oirara kaviko iraopareve voeao rera voeao oea vo rasio-ia toupaiveira. Okavikoa vao rera vaaro oa vo rutu tugurasa urioepa uva kopiiroepa.

<sup>2</sup> ♦ Oire uva ovaiarovai aiopaoro toupaiva. Vo osa Seten ora rera vo rugorugooroaro suria tovo rovoreva Judas Iskariot sopaaro-ia ro Saimon oviitoaaro, oisore ra Jisas kosi piereve keripa irara vavaearo iare. <sup>3</sup> ♦ Uva Jisas tarai rovoroepa oiso, Aiteto orekerovu rutu vatereva rera vavaearo iare. Uva vao-ia tapo oiso tarai rovoroepa, Pauto Aite rera arureva oa iava urioroepa vore. Ora uva vorevira voreroverea rara Pautoa iare. <sup>4</sup> Oire uva aiopa tapiva toreroepa varoa verasa ora rera iava vao oa-ia oisoa ora rakurakuparo. Oa iava aue taul oureva rera-ia tuusa. <sup>5</sup> Osa-a eisi osa pierervoiva, uuko ovi petoreva aue iare dis. Uva rovoroepa igei disaipel kokotoaro sisupaoro. Uvare oiso rutu ora pieroepa, Akukutoavi raga kovopato. Uva voava igei kokotoaro posiposi piepareva vorevira taul-ia.

<sup>6</sup> Uva Saimon Pita iare ora viruroepa. Oa iava Pita oiso rera akereva, “Turaro. E ragai kokotoaro tapo sisuparivoi?”

❖ 12:40: Ais 6:9-10 ❖ 12:41: Ais 6:1-4 ❖ 12:44: Mt 10:40 ❖ 12:47: Jo 3:17 ❖ 12:49: Jo 14:31 ❖ 13:2: Mk 14:10 ❖ 13:3: Hi 2:8; Jo 8:42

<sup>7</sup> Oa iava Jisas rerare oiso puraroepa, “Vao oa purapaavoi oa-ia viapau taraipauei. Utupavira oa-ia taraiuvure rara.”

<sup>8</sup> ♦ Uva Pita rerare oiso puraroepa, “Viapau oiso ra ragai kokotoaro sisuri. Viapau rutu.” Uva Jisas oiso puraroepa, “Eakepa Pita? Vosa viapau vii sisua, ra viapau uvuipauei ra oiso toupari, Ragai reraaro disaipelto.” <sup>9</sup> Oa iava Saimon Pita rerare oiso puraroepa, “Eagara. Ragai kokotoareiaro sisuri, ora vavaearei, ora kukue.”

<sup>10</sup> Uva Jisas oiso puraroepa, “Ro ira ora rera iava varaua rutu sisu rovoreve ira sisigarue ovoiroi ita. Oa iava uvuiparoi ra kokotoaro raga ita sisureve. Ari ita, sisigaruevira toupatavoi. Uva viapau oiso visii rutu-a.” <sup>11</sup> Aue iava uvare tarairoepa ro-ia ira rera kosi pieparevoi rara keripa irarapa. Uva va-a vao oa iava oiso puraroepa, “Viapau oiso visii rutu sisigaruetai.”

<sup>12</sup> Oire uva Jisas voea sisu rovorevoiva, vorevira varoa-ia ora rakurakuroepa. Oa iava vorevira pauroepa. Uva voea akereva oiso, “E vao-ia taraiptatai oa puraavoi visii-ia?” <sup>13</sup> ♦ Ari ita, ragai vaisipataveira oiso, Tisato, ora oiso, Turaro. Uva vearovira rutu-a, uvare oisi eisi purapataveira ragaire. Osa raga ita-a eisi osa toupaavoi. <sup>14</sup> ♦ Oiraopavira rutu, uvare Turaro-a ragai, ora Tisato. Ragoa visii iava kokotoara sisuavoi. Oire uva visii tapo ita uvui iraopatai ra ora visii araoko iraraaro kokotoaro tapo oisi sisupata. Ra voeapa ora vaisiaro oavisii gare piepata. <sup>15</sup> ♦ Uva visii tapo uvui iraopatai ra oisi ragavira vioevira oisi piepata, oiso osa va vao ovoovovira puraavoi visii-ia. <sup>16</sup> Oiraopavira visii tavipaavoi oiso, Kovopato viapau putepare rera reraaro-ia reito. Ora ro ira okovovu iare avaro, ira viapau oiso uvuipa ra roari-ia putepareve ira rera arurevora, avaro. <sup>17</sup> Uva vo ovoovia taraitai oa puraavo visii osireiaro-ia. Oa iava uvuipatai ra va sirova utupaoro oarai purapatavora, roru iraopata.

<sup>18</sup> “Viapau oiso visii ruture oiso purarai. Ari ragai voeao-ia taraiparai oea ora ragaipa reeresiava ragai voearo. Ari ita, uvare va vao oare Tugoropa Vuku oiso puraepa oa oiraoperea rara. Oiso osa Tugoropa Vuku-ia oiso purapai, ‘Ro ira ragai tapo bret iava aioroera ira kokotoarei kae pieire ragai-ia tasisa.’”

<sup>19</sup> Uva va vao kareke asavira toupai osa rera iava visii tavipaavoi. Uvare oisi karekepera rara. Ra oisi iavirava ragai oirao pieta raga ita vao-ia Krais. <sup>20</sup> Oiraopavira visii tavipaavoi oiso, Vosa aa ro avuo ro ira kovopatoa oaare vearo vovou rutu purapareve ro ira arua, ira ita vearo vovou rutu purapareveira ragai tapo-ia. Oa iava ita rera vegei-ia ora Aite tapo-ia vearo vovou rutu purapareveira.”

### Judas Jisas Vatesa Aueparoepa Keripa Irara Vavaearo Iare (Matyu 26:20-25; Mak 14:17-21; Luk 22:21-23)

<sup>21</sup> ♦ Oire uva Jisas sopauaaro vavata iraoepa. Oa iava oiso voeare puraroepa, “Iravu epao visii iava ira ragai kosi pieparevoi keripa irarapa rara.” <sup>22</sup> Uva oisi-a eisi osa puraroiva, igei raga disaipel ora igeiva vurapaiova tuupavira oiso purapaoro, “Viapau taraipavie irooto-a”. <sup>23</sup> Uva ragai Jon rera reraaro disaipelto Jisas kopukopuar-ia otarapaoro pauparaepa. Ragoa oisoa kaviko iraopareve rera Jisas. <sup>24</sup> Osa iava Saimon Pita kukue pikuoro ragaire oiso puraroepa, “Rera akeri. Iroure eisi puraroei?” <sup>25</sup> Oa iava rera kopukopuar-ia tutuu pieoro rutu ogaga visivi oiso rera akeava, “Turaro. Iroure eisi purauei?” <sup>26</sup> ♦ Uva Jisas oiso puraroepa, “Aioa vai tovopaavoi tapi rovu-ia. Ra rera vatea ro raga ita-ia.” Osa iava aioa tovoreva kap-ia. Oire va ouoro va vaterева Judas-pa Saimon Iskriot oviitoaaro.

<sup>27</sup> ♦ Oire uva Judas aioa ourevoiva, Seten rera sopauaaro-ia ora kiuroepa. Oa iava Jisas rerare oiso puraroepa, “Vosa va pura ruipapau. Uva uvui iraopaei ra ikauvira raga va purari.”

<sup>28</sup> Uva viapau oiso irai tebol ruvara-iavi paupaoro oisi iava vo reo vituaro-ia tarairoepa oreoa purareva Judas-re. <sup>29</sup> ♦ Uva oearovu igei iava disaipel oiso keapaaepa vao iava, uvare Judas moni bokis-ia pitupareveira. Oa iava oiso keapaaepa, Jisas rera taviparevoi orekerovu avu vai vorivorisa Tugoropa Vurei iare. Eke oarai vatevatesa apota irarapa.

<sup>30</sup> Uva Judas aioa ourevoiva, ikauvira kosi ovoiro viropa ovusa rupa ovoiepa.

---

❖ 13:8: Jo 3:5 ❖ 13:13: Fl 2:11 ❖ 13:14: 1 Pi 5:5 ❖ 13:15: 1 Pi 2:21 ❖ 13:21: Jo 12:27 ❖ 13:26: Jo 6:71 ❖ 13:27: Lu 22:3 ❖ 13:29: Jo 12:5-6

### *Airepa Reo Taisi*

<sup>31</sup> ♦ Uva Judas kosiro viroiva, Jisas oiso puraroepa ora rera raga vaisipaoro, “Vaviopavira Oirato Oviitoaaro Ro Ropoto keraria vo goruaro ourevoi, uvare Pauto vo kerariaro rera-ia karekei.” <sup>32</sup> Vosa ragai Oirato Oviitoaaro Pauto vaaro keraria vo goruaro kareke piea oirarapa, ra Pauto ita ragai vo kerariaro vo goruaro tapo kareke pierere poeravira oirarapa. Ra torevokovira Pauto oisi pierere, uvare ragai vo kerariaro vituaro rera-ia toupaiveira. <sup>33</sup> ♦ Ovii irara oaa. Gare visivi raga visii tapo toupaavoi. Uva ragaire taraa ragapatavere. Oiso osa Jiu taviava oiso-ia osa visii tavipaavoi tapo. Viapau rutu uvuipatai ra voare avata vo uvare avaparai. <sup>34</sup> ♦ Visii vateavoi airepa reo goru. Oa-ia oiso purarai, Ora visii iava sopaura rutu vatepata araoko irara oavisiipa siraopaoro. Oiso osa ragai ita ora ragai iava sopaura rutu vate rovoavora visiipa siraopaoro. Eisi raga ita osa uvui iraopatai ra ora visii araoko iraraaropa siraopata. <sup>35</sup> Vosa araoko irara oavisiipa siraopata. Oa iava uvuipai ra oirara rutu oiso taraipaave, Visii-a ragai voeaaro rutu disaipel irara.”

### *Jisas Pita Tavipareva Oiso, Ragaire Isivauvere Rara.*

(Matyu 26:31-35; Mak 14:27-31; Luk 22:31-34)

<sup>36</sup> ♦ Oire uva Saimon Pita rerare oiso puraroepa, “Turaro. Ovu-a vo uvare avauvere?” Uva Jisas oiso puraroepa rerare, “Vo uvare avaravere, uvare viapau oiso uvuipaei ra ragai sirova voare utuu. Ari ita, voari utupavira ragai sirova utuuvverere.”

<sup>37</sup> Oa iava Pita rerare oiso puraroepa, “Turaro. Eake iava viapau uvuiparai ra vii sirova utura? Uvare ora ragai iava tootooa oaa vikisa aueparai vii tauvaoro.”

<sup>38</sup> ♦ Uva Jisas rerare oiso puraroepa, “O ari ragai tauvaoro ora vii vaaro tootooa vikirivere, eke? Oiraopavira rutu oiso osa vii tavipaavoi, Vo osa kookai gau asavira touparevere, ovusa ragai vaisiaro vatauri vo peva piepa taea-ia.”

## 14

### *Jisas-a Raiva Tootoo Vatepa Vore Aiteto*

<sup>1</sup> ♦ “Opeita visii iava sopaura oavisiipa siraopape. Ari Pauto oirao piepata ora ragai tapo ita. <sup>2</sup> Vo Aite oaa vo kepaaro-ia oa-ia riroara rutu toupaiveira tugitugiara. Vosa viapau oisi eisi toupaivori, ra viapau oiso visii tavi rovoavori. Ari oiraopavira avaparai visiipa uruia ravaasa. <sup>3</sup> Oire vo osa avaparai visiipa uruia ravaasa, uva voava vorevira voreraverea visii ou piesa. Ra ragai tapo toutes voa. Osa-a eisi osa vo urui-ia eva touavere. Oa-ia ita visii tapo ragai tapo toupatavere. <sup>4</sup> Uva taraipatai raiva-ia vo urui iare vao oa iare avaparai.”

<sup>5</sup> Uva Tomas oiso rera akereva, “Turaro. Ovu-a vo uvare avapaei? Viapau oiso igei taraipaiei. Apeisi ragavira iava uvuipaiei ra vo raiva-ia taraiio eva voare?”

<sup>6</sup> ♦ Oa iava Jisas oiso puraroepa, “Ragai raga ita-a vao-ia raiva, uvare ragai-a Oiraopa Rutu vituaro. Ora ragai-a Tootooa tapo vituaro rutu. Viapau irai uvuiparoi ra oraivai raga iava Aite-ia pouro viro. Viapau rutu. Ari vo raga ragai. <sup>7</sup> Vosa ragai-ia taraipataeri, ra oisi iavirava Aite oaa-ia tapo taraipata. Oire uva vaviopavira rovota rera-ia taraipaoro. Uvare ita rera kekepatavere.”

<sup>8</sup> Uva Filip oiso rerare puraroepa, “Turaro. Igei kareke pieri Aiteara iava. Ra oisi iavirava igei vo ruiparoaro uvui pierere.”

<sup>9</sup> Jisas rerare oiso puraroepa, “Filip. Riro kaekae vuutaro rutu-ia oisoa visii tapo toupaa, osa viapau ragai-ia taraipau, raa? Ro ira ragai kekepareve, eera ita-a ira Aite tapo kekepareveira. Uva apeisi iava oiso purauei, Igei kareke pieri Aiteara iava? <sup>10</sup> ♦ Easi viapau vai ragai oirao piepariveira vo osa Aite tapo toupaaveira, ovusa ita Aite oaa ragai tapo toupareveira, raa? Vo reo oa vatepaaveira visiipa, uva viapau oiso va purapaaveira ora ragai raga vo rugorugooaro iava. Easi Aite ragai tapo toupareveira ira ora rera vo kovoroaro purapareveira. <sup>11</sup> Ragai vo reoaro oirao pieiraota aue-ia uvare Aite-ia toupaa, ovusa Aite ita ragai-ia toupare. Vosa

♦ 13:31: Jo 7:39; 1 Pi 4:11 ♦ 13:33: Jo 7:33-34 ♦ 13:34: Lev 19:18; Jo 15:12; 1 Jo 2:7, 3:11, 4:10 ♦ 13:36: Jo 21:18; 2 Pi 1:14 ♦ 13:38: Jo 18:27 ♦ 14:1: Jo 16:23-24 ♦ 14:6: Jo 10:9 ♦ 14:10: Jo 10:38, 5:19, 12:49

vo reopa viapaeri, oire ra vo kovoro ruture rugoo iraopata oara purapaaveira. Osa iava uvuipatai ra vo kovoro iavirava ragai oirao piepata.

<sup>12</sup> “Oiraopavira rutu oiso visii tavipaavoi, Vosa irouto ragai oirao piepareve vo kovoro iava oara purapaaveira, ira-a tapo ita eera ira uvuiparoi ra oisi vara purapareve. Ari ita, oa iava uvuiparoi ra pute pievira rutu okovorovu riroara purapareve. Oire vo kovoro evara vo kovo-ia ragai vaaro puteve. Eake iava? Uvare avaparai Aite iare. Ra voa toupaoro Tugoropato Uraurato vara pieavere visii tauvapasa.” <sup>13</sup> ♦ Ra varao orekerovu rutu oarare variripata ragai vaisiaro-ia oara-ia uvuiparai ra vara purapaa. Osa iava uvuipai ra Aiteto vo kerariaro goruaro karekepe ragai iavirava. <sup>14</sup> Vosa ragai vaisiaro oirao piepaoro variripata orekevure, ra va puraa taru.

#### *Jisas Reo Ovoi Purareva Vorevira Tugoropato Uraurato Vara Piesa*

<sup>15</sup> ♦ “Vosa ragai kavikopaoro ragaipa ora visii iava sopaura oavisii rutu vatepata, eva-a oa iava ragai vaaro reo goru sirova vearovira rutu utu iraopatavere.” <sup>16</sup> Oa iava uvuiparai ra varirira Aite iare. Ra oisi iavirava visii vatereve iravu visii Tauvapato visii sopaura oavisii goru piepaoro vokiara rutu-ia. <sup>17</sup> ♦ Ro-ia Tugoropato Uraurato Oiraopara Rutu Kareke Piepato. Ira-ia viapau uvuipai oirara rutu iava oearovu vo rasio-ia ra rera viapau oupaive, uvare viapau rera eveipaiiveira, ora viapau rera-ia taraipaaveira. Ari ita, visii raga rera-ia taraipatavere. Eake iava? Uvare visii tapo toupareveira osa iava visii sopapro-ia toupare.

<sup>18</sup> “Teapi keapata oiso, Visii kavupaavoi, ra oiso rutu toupata osa virakoi kakaero. Viapau. Ari visii iare vorevira voreraverea rara.” <sup>19</sup> Tutuu piepai ra oirara rutu voeao vo rasio-ia tou irara viapau ragai kekeive vorerivira. Ari visii raga taru ragai kekepatavere ragoa tootoovira toupaa. Eva-a oa vituaro iavirava visii tapo ita tootoovira toupatavere. <sup>20</sup> ♦ Ovokia-ia eva taraitavere oiso-ia, Ragai Aite tapo ora tavosipara. Ra ita ragai tapo ora tavosipata, ovusa ragai ita visii tapo ora tavosipara. <sup>21</sup> Ro ira ragai vaaro reo goru oureve ra oisi iavirava vearovira rutu va sirova utuparo, ira-a eera ragaipa ora rera iava sopaura rutu vateparevoi ragai kavikopaoro. Ora ro ira ragai kavikopareve, ira ita kavikoparevere Aite. Ora ragai tapo ira tapo kavikopaaverea rera iare roroiovira rutu ora karekepaoro.”

<sup>22</sup> Osa-a eisi osa puraroepa Jisas. Uva iravu raga Judas viapau oiso ro-a Iskariot, ira Jisas-re oiso puraroepa, “Turaro. Apeisi iavirava igei iare roroiovira ora karekeuverea, vo osa oisi eisi viapau roroiovira ora karekeu oirara rutu-ia voeao vo rasio-ia?” <sup>23</sup> ♦ Jisas rera vo reoaro pukooro oiso puraroepa, “Vosa ro ira ragai kavikopareve, ira-a eera vearovira rutu ragai vo reoaro sirova utuparo. Oa iava Aite rera kavikoparevere. Osa iava vegei aaorei rutu rera iare uriovere rera tapo toupasa vokiara rutu-ia.” <sup>24</sup> Ari ro ira viapau ragai kavikopareve, ira-a eera viapau vearovira ragai vo reoaro sirova utuparoveira. Oire uva vo reo-ia vao-ia oa uvutavoi viapau oiso ragai vo reoaro-a. Ari Aite vo reoaro-a ro ira ragai arureva vore.

<sup>25</sup> “Tou visivi visii tapo toupaoro visii tavipaavoi varao iava.” <sup>26</sup> Ari ita, Tauvapatoa rutu ro Tugoropato Uraurato ira ragai vaisiaro-ia arurevere Aite. Eera ira visii tarai pieparevere orekerovu rutu-ia. Ora visii vo rugorugooro toretore pieparevere. Oire ra oisi iavirava vo reoro ruture rugoopata oara vatepaaveira visiipi.

<sup>27</sup> ♦ “Visii kavusa aeeparai. Ra oisi iava visii vatea gavaure vovou vaore, oiso ra visii-ia toupaive. Eva gavaure vovou oa vatepaavoi visiipa ragai vaaro. Viapau oiso visiipa vao oiso gavaure vovou vateavoi osa voeao oirara vo rasio-ia visiipa gavaure vovou vate ragapaiiveira. Opeita visii iava sopaura oavisii vavata ragapape. Ora opeita uriripata.” <sup>28</sup> Vo reo uvutavoi ita oa vateavoi visiipa oiso, Visii kavuavoi avaoro, oa iava vorevira voreraverea. Vosa ragaipa sirao rovotaeri, oa iava uvuipatai ra ragai-ia rorupata ovusa Aite oaa iare avara. Ra voa toupaoro visiipa Tugoropato Uraurato vara pieavere. Ari ita, Aite reiparoi rutu. Ira ragai-ia putepareveira. <sup>29</sup> Va-a vao oa pou viro asavira toupaivoi oa iava vo vokio visii taviavoi. Oa-a eva vovio utupa visivi karekepere taru vo osa Aite iare avara. Ra oisi iavirava taru ragai vo reoroaro oirao pieta.

<sup>30</sup> “Viapau oiso vorevoreripavira visiipa riro reoro vai rutu purapaa. Eake iava? Uvare vo rasio vo pitupituaro goruaro, rera raga-a Seten ira urioroi. Ira viapau rutu uvuiparoi ra ragai vo goruaro-ia putepareve.” <sup>31</sup> Ari ita, uvare oiso ruipaparai ra oirara voeao vo rasio-ia

♦ 14:13: Je 1:5; Jo 15:16 ♦ 14:15: 1Jo 5:3 ♦ 14:17: Jo 16:13; 1Jo 4:6; 1Ko 2:14 ♦ 14:20: Jo 10:38 ♦ 14:23:

Re 3:20 ♦ 14:27: Kl 3:15

taraiave, Ragai Aite oaa kaviko iraopaavoi. Oa iava oisi piepaaveira oiso osa Aite ragai tavipareveira. Oire toreta ra vova avavio.

## 15

*Jisas Ira-a Wain Ova Rutu*

<sup>1</sup> ♦ “Ragai-a wain ova oiraopa ova. Ari Aite oaa-a vo kovo tokipatoa rutu. <sup>2</sup> Oirara voeao oea ragai oirao piepaiveira oea oiso rutu toupai osa sipukau raoro ragai iava oraorua kuepapeira. Ari ro ira viapau ragai oirao piepareve, ira tokorevere Aite oiso osa rurui raoro oara tokopareveira ro kovo tokipato. Oire uva ro ira oirao pie vovou purapareveira, ira sopaaaro iava orugoorovu vuri rugooro oaiive verapareveira Aite. Oiso ra rirovira rera vo kuearo kareke piereve ae oirao pie vovouaro-ia. Oiso rutu osa ruipapaoro ro kovo tokipato evao raoro tokopareve. <sup>3</sup> Uva visii sopaaaro iava vuri rugooro oavisii vera pirora ae iavirava Tugoropa Reo, oreoa iava visiipa siposipapaavora. <sup>4</sup> ♦ Ragai tapo ora tavosipaoro toupata. Ra ragai tapo ita visii tapo ora tavosipaoro toupaa. Uvare viapau raoa kue oupai vosa viapau evaova varaaro-ia toupaive. Oiso rutu osa visii visiigoa viapau uvuipatai ra oirao pie vovouro purapata vosa viapau ragai tapo ora tavosipaoro toupata.

<sup>5</sup> “Ragai-a wain ova rutu. Ari visii-a raoara. Ro ira ragai tapo ora tavosipaoro toupareve ovusa ragai tapo ita rera tapo ora tavosipaoro toupaa, ira-a eera ira rirovira rutu aio kue purapareveira. Ari vosa viapau ragai-ia toupata, oa iava viapau oiso uvuipatai ra oavu avu vai purapata. <sup>6</sup> Vosa viapau irai ragai tapo ora tavosiparo, ira taru eera verarevere Aite oaa oiso osa evao rao vao oa erakope. Ra va iava vo raoro guruguruive vara-ia vikisa tuitui kasi-ia vara kasioro.

<sup>7</sup> ♦ “Vosa ragai tapo ora tavosipaoro toupata. Ora vosa ragai vo reoaro visii-ia toupaive. Ra oisi iavirava uvuipai ra variripata visii vo ruipaaro arova katai vovou purapaoro ragai-ia. Ra va iava visii vo ruipaaro uvureve Aite oaa va purasa. <sup>8</sup> Vosa rirovira rutu aio kuero vai purapata, ovovoua iavirava eva eisi vuurapa vaisi oupareveira Aite. Osa iava uvuipatai ra oiso rutu toupata, Ragai voeaaro visii disaipel. <sup>9</sup> Aite ragai kavikopareveira. Eisi raga osa visii kavikopaaveira. Oa iava vokiara rutu-ia uvuipatai ra oiso toupata, Ragai voeaaro rutu oea kavikopaaveira. <sup>10</sup> Vosa vearovira rutu ragai vaaro reo goru sirova utupata, eva-a oa iava uvuipatai ra ragai vo siraoaro sovara-ia toupata. Oiso raga ita osa Aite vaaro sirova reo goru vearovira utuparaveira. Oa iava rera vo siraoaro sovara-ia toupaaveira. <sup>11</sup> Oiso ruipaparai ra ragai vo roruar visii-ia toupaive. Ra oisi iavirava vo roru eva visii sopaaaro agasi piepaive rutu. Eva-a oa vituaro iava vo reo purapaavoi visiire.

<sup>12</sup> “Ragai vaaro-a vao reo goru oiso toupaiveira, Ora visii araoko iraraviaro kaviko iraopata. Oiso osa ragai ita visii kaviko iraopaaveira. <sup>13</sup> ♦ Vosa irai ora irai iava tootooa vainero vikireve ora irai vate irara vainero tauvaoro, oire uva viapau oiso ovovouie siraopa vovou vai oa vao-ia putepaiveira. <sup>14</sup> Vosa oiso rutu piepata osa visii tavipaavoi, oa iava uvuipatai ra oiso rutu toupata, Ragai vate iraraaro rutu visii. <sup>15</sup> Kovopa irara viapau uvuipatai ra vao-ia taraipaave oa purapareve voea reitoaaro. Eisi osa iava oisi viapau visii vaisipaavoi vorerivira oiso, Kovopa irara. Aue iava uvare reoara rutu vateavorao visii siposipapaoro ae iava Aite. Oreoroa ouava rera ruvara-ia. Eva-a oa iava oiso visii vaisipaavoi, Vate irara oaa.

<sup>16</sup> ♦ “Viapau oiso ora visiipa ragai reesitava. Viapau. Ari visii ora ragaipa ropooro visii reesiava ragai raga. Oa iava visii tovoava kovo-ia. Osa iava uvuipatai ra avataera, aio kuero purata. Osa iava visii vo aioroaro uvuipai ra toupaive opesi asavira. Eisi piepaoro uvuipatai ra ragai vaisiaro-ia variripata Aite iare. Ra visii vatereve oavu avu vai. <sup>17</sup> Visii vateavorao reo goru vaore, oiso ra ora visii araoko iraraviaro kavikopata.

*Rasitoa-ia Tou Irara Disaipela Keripaaverea*

<sup>18</sup> ♦ “Vosa oirara voeao vo rasio-ia visiiva keripaave, osa iava uvuipatai ra taraita oiso, Oea-a evoea ragaiva keri rovoaera rovovira. <sup>19</sup> ♦ Vosa visii vao vo rasio rutu iava-a voeae, ra oisi iavirava visii agiagipave oearovu. Vo uvare visii-a voeae iavapa irara. Ari ita, viapau oiso visii-a vo rasio iava. Viapau. Aue iava uvare visii reesiavora oiso ra vo rasio vo pitupituaro kavuta. Eva-a oa iava oirara voeao vo rasio-ia visiiva ora keripaaverea. <sup>20</sup> Vearovira

◊ 15:1: Ais 5:1-7; Esi 19:10    ◊ 15:4: 1 Jo 2:6    ◊ 15:7: Jo 14:13    ◊ 15:13: Ro 5:7-8    ◊ 15:16: Jo 6:70

◊ 15:18: 1 Jo 3:13    ◊ 15:19: Jo 17:14

rutu vo reore rugoo iraopatavere oa puraavoi visiipa oiso, Viapau oiso kovopato rera reitoaaro-ia putepareveira. Osa-a eisi osa iava voea evoea oisoa ragai upopaive, eisi raga osa visii upopaivere. Ari ita, vosa ragai vo reoaro sirova utupaaeri, oire ra oisi raga ita visii vo reoroaro sirova utupaave. <sup>21</sup> Ari viapau taraipaaveira Aite-ia ro ira ragai arureva vore. Ra oisi iavirava keapaoro ragai vaisiaro-ia visii-ia vuri vovouro purapaive.

<sup>22</sup> ♦ “Vosa viapau oiraopavira urioraeri voeapa sipoisiposa, eva-a oa iava viapau vuriara vaieri voea-ia. Ari ita, urioraera voea oiraopavira sipoisipopoaror ragai vo kovoaro vituaro iava. Osa viapau vo sipoisipopoaror pieive. Eva-a oa voea vo vuriaro vituaro. Oa roroiovira toupaiveira. <sup>23</sup> Ro ira ragaiva keriparo, eera ita-a ira Aite tapova ora keriparoveira. <sup>24</sup> Ari ita, okovorou rutu oara oisoa viapau oearoi tuariri purapaive okovoroa puraavora voea rutu vuutaario-ia. Oiraopavira rutu vosa viapau vo kovoaro puraavori, ra oisi iavirava viapau vuriara vaipe voea-ia. Ari ita, vo osa vo vokio vara kekeivora uva ragaiva ora keripaa ora Aite oaa tapova. Eva-a ita voea vo vuriaro vituaro. <sup>25</sup> ♦ Uva voea vo pitupituroaro iavirava vo reo oiraopavira karekeepa oa rigatoiva vo voea vaaro-ia Reo Taisi. Oreoa vao oa oiso toupai, Ragaiva keri ragapaa.

<sup>26</sup> ♦ “Ro visii Tauvapato ira epao Aite tapo uvava rera aruavere, ra urioro visii iare. Eera Tugoropato Uraurato Oiraopa Rutu Kareke Piepato varao Pautoa iava. Ira Aite tapo toupareveira uvava urioroverere ragai iava oiraopavira sipoisiposa. <sup>27</sup> Visii tapo ragai iava oiraopavira sipoisipopatavere. Uvare tuariri visii ragai tapo oisoa toupata voari rovoa-ia ovusa kovoar rovoava. Oa iava vo voki-ia rekasisa voava uriotaerao oa-a vao-ia.

## 16

<sup>1</sup> ♦ “Visii taviavora ragai vo reoroaro iava, Teapi visii varaaro oirao pie vovouro oavisii kovepe opesioro. <sup>2</sup> ♦ Vo osa visii sigupaivere vova Reo Taisi Uvupa Kepa Sinagog voea vaaro. Osa raga ita visii piepaivere visii upopaoro vo vuutarori-ia oara uriopaperea. Ra oiso keapaave, Vearo kovo purapaivoi Pauto vaaro. <sup>3</sup> ♦ Viapau oiso Aite-ia taraipaaveira. Ora viapau oiso ragai-ia tapo taraipaave. Eisi osa iavirava vo vovouro purapaivere visii-ia. <sup>4</sup> Ari ita, visii oisoa tavipaa vara iava oara utupaua karekepaperea. Oa iava varare vorevira rugorugooopatavere, vo uvare vara iava visii tavipaaveira.

### Tugoropato Uraurato Vo Kovoaro

“Tuariri oisoa visii tapo toupaa. Osa vituaro iava eisi viapau oisoa visii tavipaa va iava vao. <sup>5</sup> Uva vaoviopavira avaparai ro iare ira ragai arurevoiva, vore urioraepa. Uva viapau oiso irai visii iava ragai akeparevoi oiso, Ovu iare avapaei? <sup>6</sup> Viapau. Ari ragai raga vo reo puraavoiva, visiire sopaura oavisii vavatapai siraopaoro. <sup>7</sup> ♦ Oiraopavira rutu oiso visii tavi iraopaavoi, Visii arova avaparai visii tauvasa. Oire vosa viapau avara, ra va iava viapau irai urioro visii tauvasa. Ari vosa avaparai, osa iava visii iare rera aruavere ra urioro eera visii Tauvapato visii soporepasa. <sup>8</sup> Uva urioroverere, ra oirara rutu voeao vo rasio iava tarai iraoavere vuri vovouro rutu vituaro-ia voea varaaro, ora vao torevoko vovou rutu vituaro, ora kort vituaro-ia oira rovirie ipa pitupitu Pauto vaaro, vo rara voea soporepareve. <sup>9</sup> Oire uva ora voea vo vuri vovouro rutu vituaro-ia taraipaavere. Oa vituaro oiso toupai, Viapau ragai oirao piepaiveira. <sup>10</sup> Oirara rutu vo rasio-ia oea vearovira ragai-ia taraipaavere oiso, O ita, ari torevokotoa rutu-a ro Jisas. Aue iava uvare avaparai vore Aite oaa ruvara-ia. Ra viapau vorerivira ragai kekepata. <sup>11</sup> ♦ Ari oira rovirie ipa pitupitu iava voea soporeparevere ro Tugoropato Uraurato. Aue iava uvare Pauto Seten vo goruaro rovirieioro va putereva, uvare rera raga Seten vo rasio vo pitupituro rutu.

<sup>12</sup> “Ari ita, riro reoro rutu epao oarava toupaa. Uva oiso ruipaparai ra visiipa tavitavira vara iava, osa viapau. Uvare viapau oiso uvuipatai ra vaoviopavira vo reoro outa. Teapi visii iava sopaura oavisii vavatapape rutu. <sup>13</sup> ♦ Ari vosa oiraopa reoa rutu vituaro urioro, rera ro Tugoropato Uraurato ira oiraopa reo rutu iava visii soporeparevere. Ra viapau oiso ora rera raga vo rugorugooroaro iava reoreoparo. Viapau. Ari vo reo-a oa uvureve Pauto ruvara iava oa sipoisipoparevere. Oire ra oisi visii tavitavipaoro varao iava oara

---

♦ 15:22: Jo 9:41; Ro 1:20   ♦ 15:25: Sam 35:19   ♦ 15:26: 1 Jo 2:1, 5:7   ♦ 16:1: Jo 15:18-27   ♦ 16:2: Ap 26:9; Ais 66:5   ♦ 16:3: 1 Jo 3:1   ♦ 16:7: Jo 7:39, 14:16, 26, 15:26   ♦ 16:11: Jo 12:31   ♦ 16:13: Jo 14:17, 26

karekepaperea utupaua visii soporepareve. <sup>14</sup> Ira ragai vo vovouaro-ia taraipaoro va iava visii soporeparevere. Osa-a eisi piepaoro ragai iava rei vaisi kareke pierevere rara. <sup>15</sup> ♦ Orekerovu rutu Aite varaaro oara-a evara ragai raga ita varaaro. Eisi osa iava oiso purarai, Ira ragai vo vovouaro ouoro va iava visii siposipopaoro visii soporeparevere ragai iava.

#### *Tavaka Vovou Ora Siraopa Vovou Roruvira Ora Porepere*

<sup>16</sup> “*Gare vuutavi raga ra viapau ragai keketa vorerivira. Oire uva ita utupa visivi aia ragai keketavere ita rara.*” <sup>17</sup> Uva oearovu disaipel voea raga ora reopaoro oiso purapaaepa, “*Aa vao rutu-a vo reo vao vituaro oa purarevoi vigeire? Oa-ia oiso puraroi, Gare vuutavi raga, ra viapau vorerivira ita ragai keketa. Uva ita gare vuutavi raga pere, ra utupauavi ita ragai keketa.*” <sup>18</sup> Oire uva oiso puraaepa, “*Gare vuutavi raga-a oa iava oisi taviroi. Oa apeisi ragavira toupai? Vigei viapau oiso taraipavie vo reo vituaro-ia eva oa purarevoi.*”

<sup>19</sup> ♦ Oire uva Jisas voea vo rugooaro ou ovoireva vo osa rera akesa auepaaepa. Oa iava oiso puraroepa, “*Asi visii vai pasi ora akeakepatai vo reo vituarore oa puraavoi. Oa-ia oiso purarai, Gare vuutavi raga toupai, ra viapau ita vorerivira ragai keketa. Uva ita, utupa visivi rara ragai ita keketavere.*” <sup>20</sup> ♦ Oiraopavira rutu visii tavipaavoi oiso, Utupaua gaupatavere siraao pievira rutu. Vo ovusa oirara rutu voeao vo rasio iava rorupavive. Ora tapo osa visii iava sopaura vavata iraope siraao iava. Oire uva vo siraao-a eva oa roruvira rutu ora porepere taru. <sup>21</sup> ♦ Vosa riakova kakae kavausa auepao, oire ra ora oira vo vuutaaro-ia taraio oiso, Karekeei ragai vo vuutaaro. Oa iava rirovira rutu siraopao. Oire ra va isivaaro iava kakaeto kavaueve. Ra viapau oiso evo upiare vorerivira rugoo oa puraeve. Viapau. Ari roru iraopaeve kakaeto raga-ia ro ira karekero. <sup>22</sup> Oiso ita osa vaoviopavira siraopatai. Ari utupavira vorevira visii kekeavere. Ra oisi iavirava sopaura oavisii visii iava roru iraove. Osa iava eisi viapau oiso irai uvuvirovere ra visii iava vo roru eva verareve. <sup>23</sup> Oire uva vo voki-a eva oa-ia viapau oiso ragai akepatavere oavu avu vaire. Oiraopavira rutu visii tavipaavoi, Aite oaa iare variripata ragai vaisiaro oirao piepaoro. Ra visiipa taru vara vaterevere. <sup>24</sup> ♦ Voari tuariri uva viapau oisoa variripata ragai vaisiaro oirao piepaoro orekerovu avu vai oupasa. Oire vo vokio uva variri iraopatavere, oisore ra oisi iavirava oaravu avu vai oupata. Osa-a eisi osa vituaro iava visii iava sopaura roru iraopavire rutu.

#### *Jisas Rasito Vo Vovouaro-ia Putereva*

<sup>25</sup> ♦ “*Ragai oiso vo reoro puraavoi visiire ruuvira. Uva utupaua viapau oiso vorerivira ita visiire oisi ruuvira reoravere. Viapau. Ari visiipa evoa aviavi pievira raga taviravere Aite iava.*” <sup>26</sup> Uva vo voki-a eva oa-ia ragai vaisiaro oirao piepaoro variripatavere. Uva viapau oiso visii tavipaavoi, Ragai raga Aite iare variriparavere, oisore ra visii tauvapareve. <sup>27</sup> ♦ Viapau. Ari Aite raga visii kavikopareveira. Uvare visii raga-a ita vao visiigoa ragaipa ruipataera. Oa iava ragai oirao pietavora vao iava osa Aite tapo toupaavoiva, urioraera vore. <sup>28</sup> ♦ Uvare tuariri rutu Aite tapo oisoa toupaa. Oa iava rera arova urioraepa vore rasitoa-ia. Uva vo vokio-ia vo rasio kavuoro Aite iare voreparai.”

<sup>29</sup> Oire uva igei disaipel rerare oiso puraiepa, “*Iu, vo vokio-ia aviavi pievira tavitaviu. Viapau oiso ra ruuvira raga reopau.*” <sup>30</sup> Uvare oiso taraiiei, Viapau oiso voearore tue rovopau oearoa vii akesa auepaaave. Viapau. Ari vii auero rutu-ia tarai iraopaei. Eva-a oa vituaro iava vii oirao piepaioveira rutu oiso, Viigoa vao Pautoa tapo tourivoiva, uriouepa vore.”

<sup>31</sup> Oa iava Jisas oiso igei akereva, “*E vo vokio-ia oiraotai rutu, raa?*” <sup>32</sup> Uvuta. Vuuta vao-ia tutuu pievoi vaore oiso ra karekepe. Iu. Kareke ovoiei vo vokio oa-ia visii tariopaivoi rara vorarore visii vo uruairoaro-ia roopavira. Uva ragai kavupatavoi ovusa ragai raga toupaa. Ari ita, uva viapau oiso ragai raga toupaavere. Viapau. Ari ragai tapo touparevere Aite rara. <sup>33</sup> ♦ Uva oiso ruipaparai rutu ra ragai tapo ora tavosipata. Osa iava sopaura oavisii uvuipai ra gavaurevira toupavive. Eisi osa iava vo reo visiire puraavoi. Oiraopavira uvare vo rasio-ia tou irara visiipa riroa rutu tavaka siraao vatepavirea. Osa iava uvuipatai ra

◊ 16:15: Jo 17:10    ◊ 16:19: Mk 9:32    ◊ 16:20: Lu 23:27; Jo 20:20    ◊ 16:21: 1 Te 5:3    ◊ 16:24: Jo 15:11  
 ◊ 16:25: Jo 10:6; Mt 13:34    ◊ 16:27: Jo 14:21, 23    ◊ 16:28: Jo 13:3    ◊ 16:33: Kl 1:20; Ro 8:27; Re 3:21

tuvuu vovouvira rutu goruvira toupata. Uvare ragai vo rasio vo vovouaro vo goruaro-ia pute iraoavoi."

## 17

*Jisas Ora Rerapa Variriroepa*

<sup>1</sup> Oisi-a oiso osa puraroepa Jisas. Oa iava vuvuiua taraaoro oiso puraroepa, "Aite. Ragai vo vuutaaro-a vao pura piroi. Osa iavirava uvuipau ra ragai vaisiaro kae pieri. Eisi osa iava ragai vii Oviitoaaro vii vaisiaro kae piepaaverea. <sup>2</sup> ♦ Uvare ragai vateriva reesia oiso ragai reesioro, Ragai-a oirara rutupa reipato. Osa iavirava uvuiparai ra oirarapa Opesi Asa Tootoo vatepaa voeao oea ragaipa vateriva. <sup>3</sup> Oa-a vao Tootoo Ovoi oa oupaivere vo rara vii-ia tarai rovopaave oiso, Viit-a Kataitoa raga Pauto, Oiraopatoa rutu. Ora vo osa ragai-ia tapo tarai rovopaave, Ragai Jisas Krais ragoa aruriva vore.

<sup>4</sup> "Vii vaaro keraria vo goruaro kareke pieavora vo rasio-ia. Okovo-a vao vateriva ragaipa va purasa oa opesi pieavoi. <sup>5</sup> ♦ Aite. Voari tuariri rutu uva rasito kareke asavira toureva, ovuuta-a eva oa-ia vii tapo toupaoro oisoa oisi rei vaisivira toupaa. Uva vo vokio-ia oiso ruipaparai ra vo vaisi raga ita eva reia vateri ragaipa vo vegei vo touaro-ia.

*Jisas Variriroepa Disaipel Tauvasa*

<sup>6</sup> "Voeapa vii vo ruipaaro kosi pieavora voeao oirara oea ragaipa vateriva vo rasio-ia vii voeapro. Ari ita, uva ragaipa voeae vate ovoiriva. Oa iava vii vo reoaro vearovira rutu sirova utupaaveira.

<sup>7</sup> Osa-a eisi osa iavirava oiso tarai aero, Orekerovu rutu varao oara vate ovoiriva ragaipa oara vii ruvara iava urioepa. <sup>8</sup> Ari ita, vo reoro rutu oara ragaipa vateriva oara rutu voeapa vateavora. Oa iava vara ou ovoiivora. Osa iava tarai ovoaera oiso, Oiraopavira, uvare tuariri rutu oisoa vii tapo toupaa. Oa iava voava urioraepa. Ora vao oirao pieivora rutu ita osa ragai arurivora vore.

<sup>9</sup> ♦ "Variriparai voeae tauvasa. Ari ita, viapau oiso oirara rutupa voeao vo rasio-ia variriparai. Viapau. Ari voeae raga tauvasa oea roporiva ragai iare, uvare vii voeapro-a. <sup>10</sup> Uva voeae rutu-a ragai voeapro evoea vii voeapro. Uva ita, voeae rutu-a vii voeapro evoea ita ragai voeapro. Oea ragai vaisiaro kae piepaiveira.

<sup>11</sup> ♦ "Vo vokio viapau oiso touvira toupaavoi vo rasio-ia. Ari voeae vo rasio-ia toupaivere ovusa vii iare uriora. Aite, Tugoropato. Voeae kavikori voeae tokipaoro ora vii vaisiaro vo goruaro iavirava, vo goru ora vateriva ragaipa. Osa iava uvuipaii ra katai vovou rutu-ia toupaveira. Oiso osa vegei katai vovou rutu-ia toupaveira. <sup>12</sup> Vo osa voeae tapo toupaoro voeae tokipaaveira vii vaisiaro vo goruaro iavirava. Vo vaisio oa goruaro vateriva ragaipa. Oa iava voeae-ia vearovira rutu uutuparaveira voeae tokipaoro. Osa iavirava viapau irai opesikoparo. Eera ira iava vii vo rigatoaro oiraopere. <sup>13</sup> Uva vii iare urioparai. Osa vituaro iava vo reo puraavoi vo rasio-ia. Oa iava ragai vaaro rorua uvuipai ra voeae iava sopaura-ia agasipe rutu.

<sup>14</sup> "Ari ita, vii vo reoaro vateava voeapa. Osa iava oirara voeao vo rasio iava voeava keripaaveira. Eake iava? Uvare ragai voeapro vii vo reoaro-ia tarai paoro viapau vo pitupitu purapaiveira oara vo toupaveira vo rasio-ia. Oiso ita osa ragai ita viapau vara purapaaveira. <sup>15</sup> ♦ Viapau oiso viire variriparai oiso ra voeae kae pieri vo rasi iava uvaire. Viapau. Ari oiso viire variriparai ra voeavi virivaripari. Ra oisi iava vurito Seten viapau voeae piro pieparevere. <sup>16</sup> Viapau vo pitupituro purapaiveira oara vo toupaveira vo rasio-ia. Oiso ita osa ragai ita viapau vara purapaaveira. <sup>17</sup> Ora viipa voeae roro pieoro voeae reesiri, oisore ra vii vo vovouaro-ia Oiraopaa Vovou goruvira pituive. Uvare vii vo reoaro-ia tarai paoro Oiraopaa Vovou rutu-ia tarai paaverea. <sup>18</sup> Tuariri ragai aruriva oa iava urioraera oirara rutu vuruvuru-ia tousa voeao vo rasio-ia. Eisi raga osa voeae disaipel arusa aueparai, oiso ra oirara rutu vuruvuru-ia toupasa avaave. <sup>19</sup> ♦ Uva ora ragai iava tootooa oaa reesipaavoi voeao tauvaoro. Oa iava vii vaaro-ia Oiraopaa Vovou tarai paoro ora reesiavere oiso, Viit-a oiraraaro-a igei.

*Jisas Variriroepa Voeao Tauvasa Oirao Pie Vovou Irara*

♦ 17:2: Dan 7:14; Hi 2:8   ♦ 17:5: Jo 1:1; Fl 2:6   ♦ 17:9: Lu 22:32; Jo 14:16   ♦ 17:11: Re 19:12; Jo 10:30

♦ 17:15: Mt 6:13   ♦ 17:19: Jo 15:13

<sup>20</sup> “Ari ita, viapau oiso voea raga tauvapasa variriparai. Viapau. Ari voeao tapopa variriparai oea voea vo siposipoaro uvupaise. Ra oisi iavirava ragai oirao piepaive rutu. <sup>21</sup> ♦ Uva oiso ruipaparai ra voea katai vovou raga-ia toupaive. Oiso rutu osa vii Aite ragai-ia toupariveira, ovusa ita ragai vii-ia toupaa. Osa raga ita voeapa ruipaparai oiso ra vegei tapo tavosivira toupaive. Osa iava uvuipai ra oirara rutu vo rasio iava vigei vo vovouaro katai vovou kekepaive, ra oisi oirao piepaive. Ragai arurivoiva, urioraera vore. <sup>22</sup> ♦ Uva vao keraria vo goruaro ragaipa oa vateriva eva ita oa voeapa vateavoi, oiso ra va iavirava katai vovou rutu-ia toupaive, oiso osa vegei toupaveaira. <sup>23</sup> Ari ita, ragai voea-ia toupaavoi, ovusa vii ragai-ia touparivoi. Eisi osa raga ita voeapa oiso ruipaparai ra katai vovou raga-ia toupaive. Ra oisi iavirava oirara voeao vo rasio-ia taraipaave oiso, Viil ragai arurivora vore. Ora tapo oiso osa voeapa siraopauveira oiso osa ragaipa siraopauveira.

<sup>24</sup> “Aite. Oiso ruipaparai ra oirara voeao oea ragaipa vateriva ragai tapo toupaiverea vo uva toupaaverea. Oa iava ragai vaaro keraria vo goruaro kekeiverea voa. Aue iava uvare tuariri vo uva rasito pura uviro asavira toureva ovuuta-a eva oa-ia oisoa ragaipa siraopau. Oa iava ragai vateriva va eva keraria vo goruaro. <sup>25</sup> ♦ Aite. Viil-a Torevokotoa Rutu. Uva oirara vo rasio iava viapau vii-ia taraipaaveira, vo ovusa ragai raga vii-ia taraiparai. Ora voeao disaipel oiso taraipaaveira, Ragai siperiva oa iava urioraepa vore. <sup>26</sup> ♦ Ari ita, vii vo ruipaaro iava siposipoavora voeapa. Uva topa pievira ita aia vii vo ruipaaro kosi piepaavoi voeapa vaore, ra kaviko vovou rutu sovopaive ora voea sopaa-ia. Oiso rutu osa vii vaaro kaviko vovou sovopaaveira ora ragai-ia. Ora oisore ra ragai tapo voeaa-ia toupaaverea voeava ora tavosipaoro.”

## 18

### *Judas Keripa Irara Vavaearo-ia Jisas Tovoreva (Matyu 26:47-56; Mak 14:43-50; Luk 22:47-53)*

<sup>1</sup> ♦ Vo variri purarevoiva, Jisas ora igei disaipel tapo avaroepa uuko ovi ivirooro Kidron. Oa iviropavira okovovu Oliv kovo oisoa toupaive. Oa iava vo kovo-ia ora kiusa avaroepa Jisas igei tapo. <sup>2</sup> ♦ Uva Judas tapo vo kovo-ia taraiparoepa ro Jisas kosi piepato. Uvare vokiara rutu-ia Jisas igei disaipel tapo vo kovo sovara-ia voa oisoa uvuruparo. <sup>3</sup> Uva voa-a vo uvare Judas viurupa irara tuvetuvereva ora oearovu polis irara reipa irara pris voeao voearei ora voeao ratarataa vovou irara Farisi. Oa iava voare urioaepa aue-ia pitupaoro vuravuara, ora aoara, ora auero rutu varao upo purapara. <sup>4</sup> Oire uva Jisas tarai ovoiroepa vara rutu-ia varao oara rera-ia karekesa auepaaepa. Oa iava Jisas voea iare tutuu piereva rutu voeare oiso purasa, “Iroure taraapatavoi?”

<sup>5</sup> Uva oiso puraaepa, “Ari Jisas, irare taraapaiovoi ro oisova Nasaret.”

Osa iava Jisas oiso puraroepa, “Easi ragai raga ita vao-ia.” Uva Judas toreparoepa voea ruvara-ia. <sup>6</sup> Uva Jisas voeare oiso puraroepa, “Easi ragai raga ita vao-ia.” Oa iava ora virupaoro vorepaaepa rasiuaaro kovepaoro.

<sup>7</sup> Uva vorerivira ita voea akereva oiso, “Iroure taraapatavoi?” Oa iava oiso puraaepa, “Ari Jisas ro oisova Nasaret-ia.”

<sup>8</sup> Uva Jisas voeare oiso puraroepa, “Voari visii taviavoi ita oiso, Ragai raga ita vao-ia. Vosa ragaire taraapatavoi, oire voeao eakapatavoi ra avaave.” <sup>9</sup> ♦ Uva eisi puraroepa vo reo oirao pieoro tuaririvi oa purareva. Oa-ia oiso puraroepa, “Voea oirara ragaipa oea vaterivora oea iava viapau oiso irai opesikorovere.”

<sup>10</sup> Oire uva va-a vao oa iava Saimon Pita toorio gororeva Rovopato Pristo kovopatoaaro iava uvareoua pakosa oisova oirapapa varata-ia uvava voua toereva. Ira vaisiaro-a ro-ia, Malkas. <sup>11</sup> ♦ Oa iava Jisas Pita oiso tavireva, “Toorio tovorri rera vaaro-ia pausa. E apeisi-a? O-ia kap viapau ukaioravere iria agasioi aue iava siraoa vo tavakaaro Aite iria vaterevora ragaipa?”

### *Jisas Sipoiva Anas Iare*

♦ 17:21: Jo 10:38   ♦ 17:22: Jo 14:20   ♦ 17:25: Jo 15:21, 16:3   ♦ 17:26: Jo 15:9   ♦ 18:1: 2 Sml 15:23  
♦ 18:2: Lu 21:37   ♦ 18:9: Jo 17:12   ♦ 18:11: Mt 20:22

<sup>12</sup> Oire uva va-a vao oa iava voea rutu viurupa irara, ora reito ofisato, ora polis irara rutu oea rutu Jisas rauiva rera tuukesa iroara-ia. <sup>13</sup> ♦ Uva rerava ava rovoaepa Anas iare Kaifas avuetoaaro, ro ira pris kovo-ia reiparoepa vo iva-ia eva. <sup>14</sup> ♦ Ira-a ro Kaifas voari Jiu-pa irara tavi rovoreva oiso, “Vearopai vosa kataitoa vai raga kopirovere oirara rutupa tootooaro vateoro.”

*Pita Ora Taearoepa Oiso Puraoro, Ragai Eera-ia Jisas Viapau Taraiparai  
(Matyu 26:69-70; Mak 14:66-68; Luk 22:55-57)*

<sup>15</sup> Ragai ora Saimon Pita vegoa Jisas sirova utuveiepa. Uva pristo vo kepaaro kasuraaro iare koataraepa Jisas sirova. <sup>16</sup> Ovusa Pita ratau toreparoepa. Oa iava ragai vao ragoa-ia oisoa reito pristo taraiparo, ragoa avaraepa riakova tavisa o iria oiso rataao tokipaeve. Oa iava Pita koata pieava atoarore ragai arova. <sup>17</sup> Uva o tavauruva iria oisoa rataao tokipaeve rerare Pita oiso puraoro, “Easi vii-a iravu disaipelto rera reraaro, raa?”

Oa iava Pita oiso puraroepa, “Viapau oiso ragai-a.” <sup>18</sup> ♦ Oire uva kovopa irara voearei ora polis irara oavu tuitui kasi kasiva, uvare rirovira rutu uteopaaepa. Uva voa torepaooro vo kasi-ia tuituipaaepa. Uva Pita voa voea tapo toreparoepa tuituipaoro.

*Rovopato Pristo Jisas Akereva  
(Matyu 26:59-66; Mak 14:55-64; Luk 22:66-71)*

<sup>19</sup> Uva Rovopato Pristo Jisas akereva disaipelre voeao rera voeao ora vaore osa oisoa oirara rutupa siposipopareve. <sup>20</sup> ♦ Oa iava Jisas rera vo reoaro pukooro oiso puraroepa, “Ari ita, poeravira rutu oirarapa oisoa siposipopaoro voea tarai piepaa vo Tugoropa Kepa-ia aue Tempel, ora varao oara iare oisoa ora gurupaave Reo Taisi uvupasa Jiu-pa irara. Uva viapau oiso vatauvira oreovu avu vai oisoa purapaa. <sup>21</sup> Uva eakere ragai akepari? Ari voea akeri evoea oea vo reoro uvuivora. Oa iava vo reoro-ia taraiaera varao oara purapaaveira.”

<sup>22</sup> Uva oisi-a eisi osa puraroiva, iravu polisto toreroepa Jisas tapaoro oiso puraoro, “Eakere Rovopatoare Pristo eisi reopaei, raa?”

<sup>23</sup> ♦ Uva Jisas rerare oiso puraroepa, “Vosa vuri reo vai puraa, oire uva uvuipau ra vo reo avu vuri reo kosi pieri. Ari vosa vearo reo raga puraa, uva eake-a vao oa rutupa ragai tapari?”

<sup>24</sup> Osa iava tuukea ragava toupareva Jisas, vo osa vava Anas rera siporeva Rovopatoa iare Pristo Kaifas.

*Pita Vorerivira Ita Oiso Puraroepa, Viapau Oiso Ragai Eera-ia Jisas Taraiparai  
(Matyu 26:71-75; Mak 14:69-72; Luk 22:58-62)*

<sup>25</sup> Uva Saimon Pita voari tuituipaoro toreparoepa. Osa voa rerare oiso purapaaepa, “Asi vii-a iravu vai disaipelto rera reraaro, raa?” Uva ora taearoepa oiso puraoro, “Viapau oiso ragai-a.”

<sup>26</sup> Uva iravu kovopato Rovopatoapa Pristo roari saratoaaro Pita ira iava uvareoua toereva, ira oiso puraroepa rerare, “Oiraopavira rutu, uvare ragai tapo ita vii kekeavora ovusa rera tapo touparivora kovoaa-ia.” <sup>27</sup> ♦ Uva Pita ora taearoepa ita oiso puraoro, “Viapau oiso ragai-a.” Vo osa kookai gau ovoireva.

*Jisas Sipoiva Pailat Iare  
(Matyu 27:1-2, 11-14; Mak 15:1-5; Luk 23:1-5)*

<sup>28</sup> ♦ Oire uva Kaifas ruvara iava rerava avaaepa ro reito Rom gavmanaro vo kepaaro iare vokipaua rutu. Uva viapau oiso voea rutu Jiu koataaaepa vo kepa-ia vao reito gavman vo kepaaro. Uvare oiso rugoopaaepa, Teapi vuivui oupe Reo Taisi gasioro, ra viapau Pasova Vurei aiope. <sup>29</sup> Oa iava ratau toupaiva. Uva Pailat voea iare urioroepa oiso voea akesa, “Eakepa ro iava gasitavoi?” <sup>30</sup> Oire uva rera vo akearo pukooro oiso puraaepa, “Vosa rera ro viapau vuriara vai purapareve, oire ra viapau oiso rerava urioio vii iare.”

♦ 18:13: Mt 26:57; Mk 14:53; Lu 22:54      ♦ 18:14: Jo 11:49-51      ♦ 18:18: Jo 21:9      ♦ 18:20: Mt 26:55; Jo 7:26  
♦ 18:23: Mt 5:39; Ap 23:2-5      ♦ 18:27: Jo 13:38      ♦ 18:28: Ap 11:3

<sup>31</sup> Osa iava Pailat voeare oiso puraroepa, “Visii raga rera outa, ra rera rovirieita kortua-ia visii vaaro sirova Reo Taisi.” Oa iava Jiu rerare oiso puraaepa, “Asi igeipa tugoropai rutu vaopa vo osa iravu kopii pieio.”

<sup>32</sup> ♦ Ari ita, tuariri Jisas ora rera iava tapiroepa ora rera vo kopiiaro reesioro. Uva oisi-a oiso osa iava rera vo reoaro oiraosa auepae.

<sup>33</sup> Oire uva Pailat vorevira koataroepa voarire gavman kepa-ia. Oa iava Jisas-re keeraroepa. Uva rera akeoro oiso puraroepa, “E vii-a Jiu reraaro king, raa?”

<sup>34</sup> Uva Jisas rerare oiso puraroepa, “Easi vii vai raga oisi eisi rugouoei oa iava evo reo purarivoi, raa? O irai vai pasi vii tavirevo ragai iava oisi eisi, eke?”

<sup>35</sup> Uva Pailat rerare oiso puraroepa, “Easi pasi Jiu-patoa vai-a ragai, raa? Ari sara irara oara raga ora reipa irara pris irara viiva urioai ragai iare. E eake vai purarivora?”

<sup>36</sup> Jisas oiso puraroepa, “Ari ita, ragai vo Saraaro viapau oiso vo rasio iava. Vosa oisi eisi, oire ra kovopa irara oaa upoa vai puraive. Ra viapau oiso irai uvuilo ragai tovosa Jiu-pa irara vavaearo-ia. Ari ita, uva vo vokio ragai vo Saraaro viapau oiso vo rasio iava.”

<sup>37</sup> ♦ Osa iava Pailat rerare oiso puraroepa, “O ari iravu-a vii king, raa?” Uva Jisas oiso puraroepa, “Vii raga ita-a viigoa ragaire oiso purauei oiso, king. Aako ragai kavaueva. Oa iava vo rasio iare urioraepa va ragare vao-ia. Uvare ragai vo kovoaro-a Oiraopa Reo rutu iava siposipopasa. Ari ita, oirara rutu voeao oea Oiraopa Reo rutu sirova utupaaveira oea-a evoea oea ragai gisipoaro uvupaiseira.” <sup>38</sup> Uva Pailat rera akereva oiso, “Eake rutu-a vao Oiraopa Reo, raa?”

*Pailat Jisas Tapasa Eva Parikou-ia Tapiroepa  
(Matyu 27:15-31; Mak 15:6-20; Luk 23:13-25)*

Oire eva eisi osa akerevoiva, vorevira kosiro viropa voea iare Jiu. Oa iava oiso voea tavireva, “Viapau oiso oavu avu vai viria vai kekeavoi rera-ia.” <sup>39</sup> Ari visii vo pitupituaro toupaei, oiso ra visiipa iravu iava vasea tuukepa kepa iava vo Pasova Aio vo vuutaaro-ia. Uva ruipapatai pasi oiso ra visiipa king iava ro Jiu reraaro vasea, raa?”

<sup>40</sup> ♦ Uva voea rutu raga pieoro oiso puraaepa, “Viapau. Ari Barabas iava vase iraori.” Eera Barabas riro oirara upoto ora orekerovu tapo kavirupato.

## 19

<sup>1</sup> ♦ Oire uva Pailat Jisas vorevira koata pierava vore uva viurupa irara rera ragipaiva. <sup>2</sup> Oa iava rerapa kukuvipa puraiva rokarokapa iro iava. Uva va tovoiva rera kukuearo-ia. Ora revasito kuvupato ira-ia rera kuvuiva rera reesioro oiso, Vi-a king. <sup>3</sup> Oire uva rera ruvara-ia pou viropaoro rerare oiso purapaaepa, “Vearo voki Jiu reraaro king.” Uva oisi purapaaoro rera taparakopaiva.

<sup>4</sup> Oa isivaaro iava Pailat voeare iare kosiro viropa vorerivira ita voeare oiso purasa, “Ragai kekepatavoi ragoa visiipa rera kosi pie ovoiavoi. Ra oisi iavirava taraita oiso, Ragai viapau viria vai kekeavoi rera-ia.” <sup>5</sup> Oire uva Jisas kosiro viropa. Uva va vao kukuvipa oa puraiva iroiro iava rokarokapa iro oa rera kukuearo-ia toupaiva. Ro tapo revasito kuvupato ira rera-ia toupareva. Uva Pailat voeare oiso puraroepa, “Rera kekepatavoi ro-ia.”

<sup>6</sup> ♦ Uva va-a vao oa iava voea reipa irara pris voearei ora polis irara rera kekeoro oiso puraaepa, “Rera tapa evao parikou-ia! Rera tapa evao parikou-ia!”

Oa iava Pailat voeare oiso puraroepa, “Ora visii raga rera outa rera tapasa evao parikou-ia. Ari ragai viapau oiso viria vai kekeavoi rera-ia.”

<sup>7</sup> ♦ Oire uva voea Jiu rera vo reoaro tuuoro oiso puraaepa, “Ari ita, igei vaaro Reo Taisi toupaivoi rerarepa, oiso ra kopiro rera ro-ia. Uvare oiso puraparoveira, Ragai-a Pauto Oviitoaaro.”

<sup>8</sup> Uva Pailat vo reo uvuoro uriri iraoparoepa. <sup>9</sup> Oa iava vorevira koataroepa gavman kepa-ia voa Jisas akesa oiso, “Ovuva karekeuepa?” Uva Jisas viapau oiso rera vo reoaro

♦ 18:32: Mt 20:19; Jo 12:32-33   ♦ 18:37: Jo 8:47; 1 Jo 3:19, 4:6   ♦ 18:40: Ap 3:14   ♦ 19:1: Mt 27:26-30

♦ 19:6: Ap 3:13   ♦ 19:7: Lev 24:16; Jo 5:18

aatopareva. <sup>10</sup> Oire uva va-a vao oa iava Pailat rerare oiso puraroepa, “Eakepa viapau ragai aatopari, raa? Auoro. Uvuiparai ra vorevira vii iava vasea. Ora tapo uvuiparai ra vii tapaa evao parikou-ia. Easi pasi viapau va vai-ia taraipauei, raa?”

<sup>11</sup> ♦ Uva Jisas rerare oiso puraroepa, “Vosa Pauto ro oisova viara-ia viapau viipa gorua vai vaterevori, oire ra viapau vii-ia gorua vaipe ragaipa reipasa. Osa-a eisi osa iava ro ira ragai tovorevoroa vii vavaearo-ia ira vo vuriaro eisi vii vo vuriaro-ia putepaivoi rutu.”

<sup>12</sup> Oire uva vo reo vao uvurevoiva, Pailat raiva taraaroepa, oiso ra oai iava Jisas iava vorevira vasereve. Ovusa aue Jiu-pa irara rirovira rerare oiso puraaepa, “Vosa rera iava vorevira vaserivere, oire ra viapau oiso vii-a igei reitoaaro rutu Sisa vatetoaaro. Ro ira ora rera ragare oiso puraparoveira, Ragai-a king, eera Sisa vo tavukiaro ousa aeupa.”

<sup>13</sup> ♦ Uva Pailat evo reo uvuoro Jisas kosi pierava. Oa iava oira rovirieipato vaaro-ia paupa pauroepa uvavu uva oisoa vaisipaive oiso, Aveke Uru. Ari aue-ia Hibru reo oiso oisoa va vaisipaive, Gabata. <sup>14</sup> Oire uva vo vokia-a vao orekerovu ravaapa voki aue iare Pasova Vurei. Uva ravireo vuuta rutu-a vao oa-ia tuguraaepa. Oa iava Pailat Jiu-re oiso puraroepa, “Rera kekepatavoi, eera Jiu reraaro king.”

<sup>15</sup> Uva rirovira rutu raga pieoro oiso puraaepa, “Rera siguri! Rera siguri! Rera tapasa evao parikou-ia!” Uva Pailat voeare oiso puraroepa, “E oiso ruipapatai ra visii reraaro king tapaa evao parikou-ia, raa?”

Oa iava reipa irara pris irara oiso puraaepa, “Viapau oiso igei irai epao ita kingtoa vai. Ari kataitoa raga, Sisa.” <sup>16</sup> Uva va-a vao oa iava Pailat Jisas iava vasereva voea vavaearo iare, oiso ra rera tapaive evao parikou-ia voeao viurupa irara reipa irara pris irara vo ruipaaro sirova utuoro.

### *Jisas Tapaiva Eva Parikou-ia*

(Matyu 27:32-44; Mak 15:21-32; Luk 23:26-43)

<sup>17</sup> Oire uva Jisas ouiva. Oa iava rera raga evao parikou kaepareva. Uva riro urui kavuoro rerava avaaepa uvavure uva oisoa vaisipaive oiso, Kukue Keru Pukui. Ari aue-ia Hibru reo oiso-ia, Golgota. <sup>18</sup> Uva-a evoa uva rera tapaiva evao parikou-ia. Oire evoa aitereivu tapo voa tapaiva aatokorovira oiso, iravu ovaratavu iava ari iravu ovaratavu iava. Uva vaiterei vuruvuruaro-ia Jisas tovoiva.

<sup>19</sup> Oire uva Pailat oreovu tapo rigatoreva. Oa iava va tovoreva evao parikou-ia vo rigato oa oiso purapai, JISAS KING OAIIVE JIU. <sup>20</sup> Uva Jisas kotoiva evao parikou-ia vo riro urui ruvara-ia, osa iava riro irara Jiu va vieipaiva voa. Uvare Pailat vo rigato purareva aue-ia Hibru reo, ora Rom reo, ora Grik reo. <sup>21</sup> Uva reipa irara pris Jiu voearo Pailat tavipaiva oiso purapaoro, “Viapau oiso ra oiso ragavira vo rigato purari, King Jiu reraaro. Viapau. Ari oiso ragavira uvuiapaei ra vo rigato purari, Ro oiso puraroepa, Ragai-a king, Jiu reraaro.”

<sup>22</sup> Oa iava Pailat voeare oiso puraroepa, “Vo reo oa rigatoa, eva-a oa rigato ovoi ita.”

<sup>23</sup> Uva voea viurupa irara Jisas tapa ovoiiva evao parikou-ia. Uva oisi rera pie ovoioro auero rutu varoara rera varaaro ou ovoiiva. Oire ora voeapa vo resurapavira vara rutu rookaiva, osa voea viurupa irara katakataivira ora voeapa ouaepa. Uva kuvuto tapo rera reraaro ouiva ira-ia viapau oisoa turua vai toupaive. <sup>24</sup> ♦ Osa-a eisi osa iava viurupa irara ora reopaaepa oiso purapaoro, “Viapau oiso uvuiapavie i ra ro karikaripe. Ira-ia uvuiapavie i ra rera-ia satupavio, oisore ra oiso piepaoro irai reesipe ro ira rera oureve.” Oire uva oisi-a eisi osa rera-ia piepaiva. Oa iava Tugoropa Vuku vo reoaro oisi iavirava oiraoepa rutu. Vao oiso-ia,

‘Ragai varaaro-ia varoara rooai vara ouoro.

Ora satupaaai ragai reraaro-ia kuvupato.’

Eisi osa pieiva viurupa irara vara-ia.

<sup>25</sup> ♦ Uva evao parikou vao Jisas vaaro ruvara-ia Jisas aakoaro toupaeva aue tapo taeva, ora Maria rera Klopas vatuavaaro, ora iriavu Maria Makdala iava. Vo resura evairo voavi toupaiva evao parikou ruvara-ia. <sup>26</sup> Uva Jisas aakova kekereva vegei rutu ora ragai Jon

♦ 19:11: Ro 13:1    ♦ 19:13: Mt 27:19    ♦ 19:24: Eks 28:32; Sam 22:18    ♦ 19:25: Mt 27:55-56; Mk 15:40-41; Lu 23:49

ragoa oisoa kavikopareve rutu, uvare voavi tutuu pie visivi torepaveiepa. Oa iava Jisas aakovare oiso puraroepa, "Riakova. Eera vii oviitoaaro." <sup>27</sup> Uva ragai tavireva oiso puraoro, "O-ia vii aakoaro." Oire vo vuuta raga-ia oira ouoro Maria oirava avaraepa ora ragai vo kepaaro iare voa oira tokipasa.

*Jisas Kopii Ovoiroepa*

(*Matyu 27:45-56; Mak 15:33-41; Luk 23:44-49*)

<sup>28</sup> ♦ Uva vao isivaaro iava Jisas oiso tarairoepa, Orekerovu rutu opesi ovoiei vo vokio. Osa iava Pauto vo rigatoaro ora rera iava oirao pieoro oiso puraroepa Jisas, "Uuko regarai." <sup>29</sup> Uva otouvu toupaiva botol tou oa agasiepa aue iava viniga ovi. Oa iava oavu pupupua ouiva va rupu piesa vo ovi-ia viniga ovi. Uva uuko piropa. Uva evao kairi-ia va tuukeiva. Oa iava rera gisipoaro-ia Jisas va tovoiva. <sup>30</sup> ♦ Uva Jisas va-ia viniga ukaio ovoioro oiso puraroepa, "Opesiei rutu vaoviopavira ragai vo kovoaro." Eisi osa pura ovoiroiva, rera iava kukue goe ovoio viropa. Osa ora rera iava urauratoaaro iava vasereva Pautoa iare vorevira.

*Viurupa Irara Ora Rera Iava Ovaratavu Togaiva*

<sup>31</sup> ♦ Uva vo vokia vao orekerovu ravaapa voki aue iare Tagausapa Vurei Pasova ora vao tapo Sabat voki riroa rutu. Oa vituaro iava Jiu-pa irara reasipaaepa oiso, Teapi vo kopiilo evao parikouro raga-ia toupaive vo voki-ia Sabat voki. Oa iava Pailat akeiva voea kokotoaro kepikepisa, oiso ra ikauvira kopiiave. Ra va iava vo kopiiro rere pieive. <sup>32</sup> Oire uva voea viurupa irara vaiterei kokotoaro kepikepisa avaaepa aiterea tapaiva Jisas tapo. <sup>33</sup> Uva Jisas-ia poua viropa rera kekesa ira kopii ovoiroepa. Oa iava viapau oiso rera kokotoaro kepikepiiva. <sup>34</sup> ♦ Ari iravu viurupato rera varataaro togareva aue-ia togava. Oa iava ikauvira revasiva paru ovoieva ora aue uuko ovi voava rera iava varaua-ia. <sup>35</sup> [Uva ragai Jon vao kekeava ragoa oisi va-ia tarairaiva, va iava oiso tavitaviparai oiraopavira rutu. Eisi osa iava uvuipatai ra va oirao pieta rutu.] <sup>36</sup> ♦ Ari ita, oa-a vao karekeiva oiso-ia Tugoropa Vuku vo reoaro oiraoei vo reo oa oiso purapapeira, 'Viapau oiso okerui kepiiverea rera iava.' <sup>37</sup> ♦ Ari oreovu-a vao oiso purapapeira voa Tugoropa Vuku-ia, 'Irava vurapaiverea ro ira togaivora.'

*Jisas Iava Varaua Tovoiva Aveke Rikui-ia*

(*Matyu 27:57-61; Mak 15:42-47; Luk 23:50-56*)

<sup>38</sup> Oa-a vao isivaaro iava Josep Arimatia urui iava rera avaroepa Pailat aresa Jisas kopiire, uvare rera-a iravu disaipelto Jisas reraaro. Ari Jiu ragapa uriripaoro ora rera vo oirao piearo vataupareva. Oire uva Pailat rerapa vasereva. Oa iava Josep avaroepa Jisas iava varaua rere piesa. <sup>39</sup> ♦ Uva Nikodimas ro ira rovovira rutu Jisas iare urioroepa vokiaro, ira tapo urioroepa oavuva mer vearo geesi ovi iisi ovi. Oa iava va vavataaro rutu aue-ia uvuiepa 34 kilo. <sup>40</sup> ♦ Uva vo kopii ousiva. Oa iava rera ruusiva varoa-ia oaravu tapo vearo geesiara. Oiso osa vara oisoa purapaise voea Jiu oirara tovapasa. <sup>41</sup> Oire uva voa-a vo uva Jisas tapaiva evao parikou-ia uva oisoa oavua kovoa toupaive. Oa sovara-ia oavu oira tovaso riku toupaiva. Ari ita, uva viapau oiso va-ia irai tova rovoiva. <sup>42</sup> Uva vo voki-a vao Jiu vaaro orekerovu ravaapa voki aue iare Pasova Vurei Oovapa. Uva vo rikui tutuu pie visivi raga toupaeva. Oa iava Jisas tovosiva rera tovaoro voa vo rikui-ia.

## 20

*Jisas Vorevira Toreroepa*

(*Matyu 28:1-8; Mak 16:1-8; Luk 24:1-12*)

<sup>1</sup> ♦ Oire uva rovo voki rutu-a vao wik iava uva Maria Makdala iava vokipaua rutu urioopa vo tova iare vo osa rupavira raga toupaiva. Iria aveke viapau kekeeva o iria-ia vo

---

♦ 19:28: Jo 13:1, 17:4; Sam 69:21   ♦ 19:30: Jo 17:4   ♦ 19:31: Diu 21:23   ♦ 19:34: 1 Jo 5:6, 8   ♦ 19:36: Eks 12:46; Nam 9:12; Sam 34:20   ♦ 19:37: Sek 12:10   ♦ 19:39: Jo 3:1, 7:50   ♦ 19:40: Jo 11:44; Mt 26:12; Jo 20:5, 7; Lu 24:12   ♦ 20:1: Mt 27:60, 66

tova riaaro-ia toupaeva iria peka pieiva. <sup>2</sup> Oa iava ikauvira raga vorevira voreopa ragai ora Saimon Pita tavisa, ragoa Jisas oisoa kavikopareve rutu. Uva Maria vegei tavipaeva oiso purapaoro, “Turaro vorevira tova iava voreivo. Uva viapau taraipaiei oiso, Ōvu-ia rera tovoivo.”

<sup>3</sup> Osa iava vegei ora Pita uruia iava ora vaseveiepa vo tova iare avaoro. <sup>4</sup> Uva ikauvira raga avaveiepa. Ari ita, uva ragai Pita-ia puteava ikauoro. Oa iava voa pou rovora viropa vo tova-ia. <sup>5</sup> ♦ Uva voa kokeesa takura viropa osa iava varoara raga kekeava. Ari ita, uva viapau oiso koataraepa rutu vo rikui-ia. <sup>6</sup> Uva Saimon Pita ragai sirova utuoro rikui rutu-ia koataroepa. Oa iava voa varoara kekereva. <sup>7</sup> Uva voa oavu kekereva varoa vao oa-ia rera kukuearo tavuruiva Jisas. Oire uva va eva varoa viapau oiso varari tapo toupaiva oara-ia rera rutu tavuruiva. Viapau. Ari evo viko uvavu raga toupaiva. <sup>8</sup> Uva ragai tapo ragoa ira rovoraepa voare rikui-ia ragoa tapo ita voare koataraepa. Oa iava va eva kekeava. Uva oisi-a eisi osa iava oiraoraepa rutu. <sup>9</sup> ♦ Uva evo vuuta-ia viapau oisoa roroiovira rutu taraipaio Pauto vo rigatoaro-ia vao oa oisoa oiso purapape, Jisas vorevira toreroverea tova tapi iava. <sup>10</sup> Oire uva vegei disaipeltoarei vorevira kareveiepa atoiare.

#### *Maria O Makdala Iava Iriava Aivaroreva Jisas*

(Mak 16:9-11)

<sup>11</sup> Maria rikui raga ruvara-ia torepaopa gaupaoro. Uva voa raga gaupaoro toupaeva rikui sovara-ia kokeepaoro. <sup>12</sup> ♦ Oa iava aitereivu enseltoarei kekeeva aiterea popotetoarei-ia kuvupasiepa kuvutoarei. Uva voa paupasiepa vo uva Jisas varaaro tovoiva, iravu oisova uva kukueparoepa, ari iravu oisova uva kokotoparoepa. <sup>13</sup> Aiterea oira Maria akesiva oiso puraoro, “Riakova. Eakepa gauparivoi?”

Uva oiso puraopa vaitereire, “Ari Turaro ragai reraaro ira voraro avu tovosa rera vorevira voreivo vova-ia. Uva viapau taraiparai ovu-ia reraei.” <sup>14</sup> Uva oisi-a eisi osa puraoiva, ora poreopa rera Jisas kekesa ovusa toreparoepa. Uva viapau oiso Maria Jisas eveipaeva.

<sup>15</sup> Uva Jisas oira akereva oiso puraoro, “Riakova. Iroupa gauparivoi? Ora iroure taraaparivoi?”

Uva Maria oiso keapaopa, Kovoa tokipato ro-ia. Oa iava oiso puraopa rerare, “Auoro. Vosa vii rera ouri, uva uvuipaei ra ragai taviri vore uva rera tovorivo. Ra voava rera kaeoro karera.”

<sup>16</sup> Uva Jisas oiso puraroepa oirare, “Maria.”

Oa iava Maria ora poreopa rerare oiso purasa Hibru reo-ia, “Rabona.” Oa porearo oiso toupai, Tisato.

<sup>17</sup> ♦ Uva oira tavioro oiso puraroepa, “Opeita ragai-ia pitupari. Ragoa ipa asavira toupaavoi Aite iare. Ari kare iraou, ra araoko irara oaa taviri oiso-ia, Iparai Aite iare ragai reraaro ora visii Aitearo. Ira iare avarai Pauto, ragai reraaro ora visii reraaro Pauto.”

<sup>18</sup> ♦ Oire uva Maria vova Makdala vorevira kareopa disaipel tavisa oiso puraoro, “Turaro kekeavoi.” Uva voea tavieva vo reo iava vao osa oira tavireva Jisas.

#### *Disaipel Jisas Kekeiva*

(Mak 16:14-18; Luk 24:36-49)

<sup>19</sup> Igei disaipel Jiu asavira uriripaoro toupaiova. Oa iava kepa-ia ora igei ururao tuupaiova. Uva ravireo voa igeire rokoreva rovopa voki-ia wik iava vo voki. Uva voa Jisas igei rutu vuruvuruario-ia toresa urioroepa oiso puraoro, “Opeita uriripata. Visii iava sopaura oavisii kavepe.” <sup>20</sup> Oire uva oisi eisi puraroiva, igeipa ora rera iava vavaearei karekepareva ora ovaratavu rera iava. Oa iava viupara kekepaoro igei iava sopaura oao roru iraoiva rutu. <sup>21</sup> Uva Jisas igei ita tavireva oiso puraoro, “Visii iava sopaura uvuipai ra kave iraope. Ari ita, Aite ragai arureva oa iava urioroepa vore. Osa ita visii arupaavoi ra avata.” <sup>22</sup> Uva eisi puraroiva, igei iare vavauroepa oiso igei tavioro, “Tugoropato Uraurato outavoi. <sup>23</sup> ♦ Vosa oearovivu iava vuri vovouro vai oaiive verapataverea, oire ra oisi

♦ 20:5: Jo 19:40   ♦ 20:9: Mt 22:29; Lu 24:26, 46   ♦ 20:12: Mt 28:2-3; Lu 24:4   ♦ 20:17: Mt 28:10   ♦ 20:18:

Lu 24:10, 13   ♦ 20:23: Mt 16:19, 18:18

iavirava vo vovouro vuriara voea iava opesi ovoipape. Ari vosa viapau oisi voea iava vuriara verapata, ra oisi iavirava voea-ia touvira toupaive.”

#### *Tomas Jisas Kekerevoiva, Oirao Piereva*

<sup>24</sup> Jisas ora karekeroepa disaipel irara iare vo vuutao iava vo vokia oa-ia iravu disaipelto igei iava katai tau erao (12) viapau oiso igei tapo toupareva ro-ia Tomas. Ira iava ovaisivu-a, Didimas tavarato. <sup>25</sup> Uva oisi-a eisi osa iava oearovu disaipel rera taviiva oiso, “Igei Turaro kekeiovoi.”

Uva Tomas oiso voeare puraroepa, “Vosa viapau nilpa vuurei kekea rera vavaearo-ia, ora vosa viapau sipayeo roko piea voa vo nilpa vuu-ia. Ora aue tapo vosa viapau vavaea oaa tapo roko piea vo uva rera togaivorao, oire ra viapau oiso oirao piepaa rutu.”

<sup>26</sup> Oire uva katai wik isivaaro iava igei disaipel kepaa sovara-ia toupaiova. Uva Tomas igei tapo toureva. Uva ora igei ururao rataoara rutu tupaiova. Oa iava voa Jisas igei vuutaaro-ia ora karekeoro oiso puraroepa, “Visii iava sopaura kavepe.” <sup>27</sup>  $\diamond$  Oire uva Tomas tavireva oiso, “Ora vii iava sipayeo tovori vo-ia. Ora ragai vavaearo kekeri, ra oisi iavirava viapau vakuvakuu. Ari ragai oirao pie iraori.”

<sup>28</sup> Oa iava Tomas rerare oiso puraroepa, “Vii-a ragai reraaro Turaro. Ora vii-a ragai reraaro Pauto.”

<sup>29</sup>  $\diamond$  Osa iava Jisas rerare oiso puraroepa, “Ragai kekerivoiva, ragai oirao pierivoi, raa? Osa-a eisi osa voeao oea viapau oiso ragai kekepaoro ragai oirao piepaaive, oea uvuipaai ra vii vo roruar-ia putepaoro roru iraopaaive rutu.”

#### *Vo Toupai Vao Vituaro Iava Oa Iava Jon Vo Vukuo Rigatoreva*

<sup>30</sup>  $\diamond$  Ari ita, Jisas ira oisoa oravotorovu purapareve igei disaipel osireiaro-ia. Uva viapau oiso vara rutu rigatoavoi vo vukuo-ia. <sup>31</sup>  $\diamond$  Ari vao oa rigatoavoi visiipa, oisore ra va oirao pieoro rutu Jisas oirao pie iraota oiso, Ro-ia Krais. Ora aue tapo oirao pie iraota oiso, Jisas-a Pauto Oviitoaaro. Ora vo osa oirao piepata, osa iava uvuipatai ra Opesi Asa Tootoo rutu ou iraota rera iavirava.

## 21

#### *Erao Vatara (7) Disaipel Jisas Kekeiva*

<sup>1-2</sup> Uva utupa visivi vorerivira ita Jisas ora karekeroepa igei iare disaipel vo toko rovu ruvara-ia, vao Taibirias. Uva karekeroepa oisi oiso-ia igei iare, Saimon Pita, ora Tomas ira iava ovaisivu-a vao Didimas tavarato. Ari Nataniel Kena iava oiso Galili taere. Ora vegei Sebedi oviitoareiaro, ora aitereivu disaipeltoarei igoa voa toupaiova. <sup>3</sup> Uva Saimon Pita igei tavipareva oiso, “Atarisa avaparai.” Oa iava oiso puraiepa, “Vigei rutu ita avapavie,” Oa iava uvuoa-ia avaiepa. Uva vo rupa-ia eva viapau oiso atari kare vai ouiova.

<sup>4</sup>  $\diamond$  Oire uva ravireo sikere asavira toureva ovusa Jisas rogaraua-ia toreparoepa. Uva igei viapau oiso rera-ia taraiapaepla vao oiso, Jisas-a ro-ia. <sup>5</sup>  $\diamond$  Uva Jisas igei akeoro oiso puraroepa, “Ovii irara oaa. E atari kare vai epao?” Oa iava rerare oiso puraiepa, “Viapau rutu.” <sup>6</sup>  $\diamond$  Oa iava Jisas igei tavireva, “Ovaratavu iava oiso uvuoa-ia oirapapa kuverava vikita. Osa iava uvuipatai ra riro kare vai outa aue atari.” Oire uva oisi-a eisi osa iava kuverava roko pieiova uvuoa iava oirapapa varata iava. Uva oira roko pieovoiva, riro kare rutu kuveraiova. Oa iava viapau oiso uvuipaepla oiso ra oira kae pieio oira ivuoro.

<sup>7</sup> Uva ragai Pita taviava oiso puraoro, “Eera Turaro!” Uva Saimon Pita ora rakurakupa varoa veraoro kovopareva. Eisi osa iava vo reo uvureva, Eera Turaro. Oa iava va-ia varoa vorevira ora rakurakuroepa. Uva vo rakurakuva uuko rovu-ia rokoreva. <sup>8</sup> Ovusa oearovu disaipel uvuoa-ia uriopaaepa kuverava ivupaoro atari kareva. Uva viapau oiso tauaivira toupaiva rogarauapa. Ari oiso uvuivira vo resura vatara tau (90) mita raga-ia.

<sup>9</sup> Uva reresa urioiepa. Oa iava voava verau viroiepa oavu tuitui kasi kekesa, ovusa atarito voa vo kasi-ia toupareva. Ora bret tapo oa voa toupaiva. <sup>10</sup> Uva Jisas igeire oiso puraroepa, “Evo kare iava atari kare oea outavoi okareiva.” <sup>11</sup> Osa iava Saimon Pita uvuoa-ia

$\diamond$  20:27: Lu 24:40     $\diamond$  20:29: 1 Pi 1:8     $\diamond$  20:30: Jo 21:25     $\diamond$  20:31: Jo 19:35; 1 Jo 5:13     $\diamond$  21:4: Jo 20:14

$\diamond$  21:5: Lu 24:41     $\diamond$  21:6: Lu 5:4, 6, 7

kaero viropa kuverava ivusa. Uva oira ivupaoro urioroepa rogaraua iare. Uva riropa kare raga iava agasiopa kuverava. Okarea oiso uvuipaaepa katai vovoto vo vavae tau vo peva (153). Ari ita, uva riro kare rutu-a. Uva viapau kuverava vo kareva tokopao viropa.

<sup>12</sup> Oire uva Jisas igeire keeraroepa oiso, “*Uriota aiosa.*” Osa iava viapau irai disaipeltoa vai uvuiparoepa ra rera akereve oiso puraoro, “*Irouto-a vii?*” Viapau. Ari taraipaiepa oiso, Turaro-a ro-ia. <sup>13</sup> Uva Jisas bret ourevoiva, igeipa va vatevatereva. Uva oisi raga ita igeipa atarito roo piereva ita.

<sup>14</sup> ♦ Vo uvare tova iava vorevira toreroepa rera Jisas. Oire uva va-a vao vo peva piepa vuuta oa-ia igei iare disaipel ora karekeroepa ita.

#### *Jisas Oiso Puraroepa, Ragai Vo Raguiaro Sipsip Ragui Aio Pieri.*

<sup>15</sup> ♦ Uva aio opesiiroiva, Jisas Saimon Pita-re oiso puraroepa, “*Saimon, Jon oviitoaaro. Easi vii vai voea rutu-ia voearo puteparivoi vai ragaipa ruipapaoro, eke?*” Oa iava Pita rerare oiso puraroepa, “Iu Turaro. Viikaviko iraopaavoi.” Oa iava Jisas rera tavireva oiso, “O ita, uva vii-ia vovou iraoparai oiso ra ragai vo raguiaro aio pieri sipsip ragui.”

<sup>16</sup> ♦ Uva vorerivira ita rerare oiso puraroepa, “*Saimon, Jon oviitoaaro. E ragaipa ruipa iraopaei?*” Oa iava Pita rerare oiso puraroepa, “Iu Turaro. Ragai-ia ita taraipauei ragoa vii kaviko iraopaavoi.” Oa iava Jisas oiso puraroepa, “*Oire ragai vo raguiaro sipsip ragui tokipari.*”

<sup>17</sup> ♦ Uva vo peva piepa vuuta-ia rerare oiso puraroepa, “*Saimon, Jon oviitoaaro. Esa pasi ragai vai kaviko iraoparivoi?*” Uva va-a eva oa iava Pita iava sopaua vavataepa rutu. Uvare rerare oisi eisi puraroepa vo peva piepa vuuta-ia. Osa iava Jisas-re oiso puraroepa, “Turaro. Orekerovu rutu-ia taraipau. Oiso osa taraipauei ragai-ia, vo osa oisi vii kaviko iraopaavoi.” Oa iava Jisas rerare oiso puraroepa, “*Ragai vo raguiaro sipsip ragui tokipari.*”

<sup>18</sup> “*Oiraopavira rutu oiso osa vii tavi iraopaavoi oiso. Voari tuariri vii raga oisoa ora asikovira toupari ora vii vo iroaro-ia takipaoro tuu iro. Oire uva oisoa vokapari vii raga asikovira rutu uruiara iare voraro uvare ava vovoupau. Ari ita, uva utupaua avukauverea. Oire ovuuta-a eva oa-ia vii vavaearo kae piererevira, oisore ra iravu raga vii takireve tuu iro-ia. Oire oisi iava vii tuvetuvepaoro uvavure avaparo voraro uvaproare ava arapa reasipau.*” <sup>19</sup> ♦ Jisas vo oiso puraroepa, Pita utupavira kopiirovore. Uva vo kopii-ia Pauto vaisiaro kae piererevira. Osa puraroepa Jisas vo Pita-pa kopiiia reesioro. Oa iava oiso Pita-re puraroepa, “*Ragai sirova utuu.*”

#### *Jisas Oreovu Purareva Ragai Iava Vao Jon*

<sup>20</sup> Oire uva Pita ora poreoro ragai vurapareva ragoa oisoa kaviko iraopareve Jisas. Ragoa vaiterei sirova uturaepa avapaoro. Ragai raga ita ragoa voari pauparaepa ovokia-ia aiopaiova uva Jisas kopukopuaro rutu-ia toupaava, uvava oiso puraraepa, “Turaro. Irouto-a ro ira vii kosi piererevere keripa irara vavaearo iare?” <sup>21</sup> Uva Pita ragai kekeoro Jisas oiso akereva, “Turaro. Ari apeisi ragavira ro vo kopiiaro?” <sup>22</sup> Oa iava Jisas rerare oiso puraroepa, “*Vosa ragai raga rerapa ruipara, oiso ra toupareve vore toupaoro uva voreravere, uva viapau oiso vii auearo-a. Ragai sirova utuu.*”

<sup>23</sup> ♦ Osa iava vo reo vao uvarovu rutu araoko irara iare disaipel viriva avaoro oiso, Ro disaipelto viapau oiso kopiirovore. Ari ita, osa Jisas viapau oiso oisi rera tavireva oiso, Ro viapau kopiirovore. Viapau. Ari eerare oiso puraroepa, “*Vosa oiso ruipapara ra toupareve vo vokiore tuepaoro oa-ia vorevira voreravere, uva viapau oiso vii auearo-a.*”

<sup>24</sup> ♦ Ira raga-a ita ragai Jon, ro-ia disaipelto. Ragoa orekerovu rutu iava oiraopavira sipoipopava. Oa iava vo reoro rutu rigato ovoiava vaore, oiso ra vigei rutu vao-iā tarai iraopavio oiso, O ari va vao oiraopa sipoipio rutu.

<sup>25</sup> ♦ Ari ita, oaravu rutu oisoa purapareve Jisas. Vosa voearo oea vara rutu evara rigatooro varare katakataivira ora kasivariave rutu, oire ra vo vukuro evara rigatoive rirovira. Ra vo rasio iava viapau otavukipe oisi vara rutupava evara.

---

◊ 21:14: Jo 20:19, 26   ◊ 21:15: Jo 13:37   ◊ 21:16: Mt 2:6; Ap 20:28; 1 Pi 5:2   ◊ 21:17: Jo 16:30   ◊ 21:19: 2 Pi 1:14   ◊ 21:23: Ap 1:15   ◊ 21:24: Jo 15:27, 19:35   ◊ 21:25: Jo 20:30

## APOSEL IRARA VO KOVOARO Irapa Reoro Vo Vukuo Iava

Oeavu vo vuku vaisiiva oiso, *Aposel Irara Vo Kovoaro*. Ari ita, oiraopavira uvuipai ra va vaisipe oiso, *Tugoropato Uraurato Vo Kovoaro*. Aue iava uvare rirovira tavitavipai rera vo kovoaro iava vo osa oirarapa rugorugooara ora taraiara rera varaaro oisoa vatepareve. Ora vo osa aposel vo kovoaro oisoa oirao piepareve tapo.

Uva rera ro Luk ira varei rutu vukuarei rigatoreva. Ira Vearo Siposipo Jisas iava rigato rovoreva (Ap 1:1). Oa iava aposel irara vo kovoaro iava rigatoreva vo vuku-ia vao. Ovukua rigatoreva 63 yia Jisas vo kavauaro isivaaro iava, vo osa Pol tapo toupareva tuukepa kepa-ia Sisaria-ia.

Ari ita, Luk rirovira Tugoropato Uraurato iava tavitaviroepa. Ora aue iava tapo rigatoreva oaravu lotuara rovoaro varao oara-ia Pauto voeaaro oisoa toupaise. Uva rovovira Pita vo kovoaro iava tavitaviroepa vo osa lotupa irara oisoa tauvapareve (Ap 1-12). Oire evo siposipo isivaaro iava Pol iava ita tavitaviroepa Luk (Ap 13-28).

1. Aposel irara vatatopopaaepa Jisas vo reoaro vatesa oirara rutupa, 1:1-26.
  - a. Jisas ovoiopavira aposel irara tavireva Tugoropato Uraurato iava ira vara pierevere voea tauvapasa, 1:1-11.
  - b. Judas iava vao vo uvare iravu ira rera vo tavukiaro oureva, 1:12-26.
2. Turaro voea tavireva oiso, Vosa Uraurato outavere, ra Jerusalem iava rovota ragai vo reoaro tavitavipaoro, 2:1-8:3.
3. Turaro voea tavireva oiso, Vore avata Judia taere iare ora Sameria-ia Vearo Siposipo iava tavitavipasa, 8:4-12:25.
4. Pol vaaro iava kovoar vo osa Jisas vo kovoaro purapaoro avaroepa voraro rutu uruiara-ia, 13:1-28:31.
  - a. Rovopa voka Pol vaaro Jisas vo reoaro kaepaoro, 13:1-14:28.
  - b. Riroa rutu paua puraiva vo Jerusalem-ia, 15:1-35.
  - c. Eraopa voka Pol vaaro Jisas vo reoarova, 15:36-18:22.
  - d. Vo pevapa voka Pol vaaro Jisas vo reoaro kaepaoro, 18:23-21:19.
  - e. Pol tuukepa keparo-ia toureva vo Jerusalem-ia, ora Sesaria-ia, ora Rom-ia, 21:20-28:31.

### *Jisas Reo Ovoi Purareva Auere Tugoropato Uraurato*

<sup>1</sup>◊ Vateto oaa, Tiofilas, viipa rigato rovoavora voviri vo siposiporo iava ora vo kovoro iava varao oara oisoa purapareve Jisas. <sup>2</sup>◊ Oara rovoreva osa vorevira iparoepa. Uva varao tapo reoreoara voeapa vaterева vo Tugoropato Uraurato vo goruaro iavirava, oiso ra vara purapaive, voeo aposel irara oea reeresireva Pauto vo kovoaro purapasa. Oire va isivaaro iava iparoepa vuvuiua iare <sup>3</sup>◊ aue-ia vo resura tau (40) vokiro rera kopiaro isivaaro iava. Oa iava voea iare aposel irara ora karekeroepa vorevira. Ora rera raga ora toootoaro karekereva voeapa oiso ra kekeive. Ora oiso tapo uvare vo kareke-ia eva voea tapo ora reoroepa aue iava Saraaro Pauto ipa asavira touoro. <sup>4</sup>◊ Ovokivu-ia voea tapo goruvira tavireva oiso, “Opeita vo Jerusalem-ia kavupata. Ari voa raga tuepatai auere ovoiei reoaro Pauto oa varapere vao oa iava visii taviavora tuaririvi.” <sup>5</sup>◊ Oire Jon oearovu baptaisreva ukhoa raga-ia. Ari tou visivi visii Tugoropato Uraurato vo baptaisaro-ia rera vaaro gorua outavere.”

<sup>6</sup>◊ Uva vo aivar-a vao oa-ia oiso rera akeiva, “Turaro, apeisi-a? E vo vokio-ia Isrel sara tote piepari vorevira oiso osa voari tuariri?” <sup>7</sup>◊ Uva voea tavireva oiso, “Viapau oiso visii vaaro-a ra vo vuutaro-ia ora vo ivaro-ia taraita. Ari aue oaro-a Aite ira varao tovoreva vo ora rera raga vaaro-ia ruipa.” <sup>8</sup>◊ Ari vao raga vo osa Tugoropato Uraurato uriorovere visii iare osa rera-ia gorua outa. Oa iava ragai iava oearovu rutu tavitavitere voraro oiso, Jerusalem-ia ora Judia ora Sameria, vo taerero rutu varao ora voraro rutu rasitoa rutu ivara-ia.”

◊ 1:1: Lu 1:1-4   ◊ 1:3: Mt 28:17; Lu 24:34, 36   ◊ 1:5: Ap 11:16   ◊ 1:8: Ap 2:1-4; Jo 15:27

*Jisas Iparoepa Vuvuiua Iare  
(Mak 16:19-20; Luk 24:50-53)*

<sup>9</sup> Uva vo reo-a vao oa isivaaro iava kaero viropa ipaoro vo osa rera siitueiva. Osa rukuta rera ruueva Jisas rera vatauoro. <sup>10</sup> ♦ Uva vuvuiua-ia siituepaaepa osa iparoepla, ovusa sita pievira voea vatuarlo-ia karekesiepa aitereivu kaapopatoarei-ia kuvupaoro. <sup>11</sup> ♦ Oire voeare oiso purasiepa, “Ai. Visii vao Galili-pa irara. Eakere vuvuiua ragava siituepatai? Ro-ia oirato Jisas ira ipa pierrevoi Pauto vuvuiua iare. Ira ita vararoverea vorevira oiso osa iparoi osa rera keketa.”

*Judas Vo Tavukiaro Oureva Iravu*

<sup>12</sup> Uva eva isivaaro iava kareaepa Jerusalem iare vova vo pukuio-ia oa vaisipaiseira oiso, Oliv Kovo Pukui, vo raivao-ia oa oisoa voare potekupape voava vo pukuia. <sup>13</sup> ♦ Uva kepa oaiive-ia poua viropa. Oire voava vo kepa-ia ipaaepa otugivu iare oa oisoa ipavirava toupaive, ivaraiapa tugi. Uva voea rutu vaisiaro-a voeo oea voa toupaiva oiso, Pita ora Jon, ora Jems, Andru, ora Filip vaio tapo ora Tomas, ora Batolomyu vaio tapo ora Matyu, ora Jems aue oviitoaaro Alfias, ora Saimon Selot, ora Judas aue oviitoaaro Jems. <sup>14</sup> ♦ Uva vaea vovou raga-ia voea rutu toupaiva variripaoro voeo oirara, ora riakora, ora Maria Jisas aakoaro, ora Jisas araoko irara oaro tapo.

<sup>15</sup> ♦ Vo voki-ia vao Pita voea iava toreroepa reoreosa. Uva voea rutu vieiaro uvuiaro-a voeao-ia oiso, Katai vovoto erao tau (120) oirao pie vovou irara. <sup>16</sup> ♦ Pita ira oiso puraroepa, “Visii araoko irara oaa, aue iava uvare vao Tugoropa Reo oiraoepa oreoa vatereva Tugoropato Uraurato aue-ia Devit gisipoaro. Uva vo vokia oirao piea rutu karekeepa aue-ia Judas, eera ira voea tuvetuvereva voeo oea Jisas ouiva aue iare kort.

<sup>17</sup> Eera iravu igei iava ira oisoa oiso kovopareve osa igei.

<sup>18</sup> “Eera ira monia oureva aue-ia Jisas vuria puraoro. Oa iava oeau rera vaaro-ia monia vo rasio voriiva oa-ia koveroepa takuvira. Oa iava ora kovuaro pokoi pierreva. Uva sare rera iava vuseva. <sup>19</sup> Oire uva Jerusalem-ia tou irara va-ia taraiiaepa. Oa iava va vaisiiva voea vo reoaro-ia oiso, Akeldama. Oa porearo oiso toupaiveira, Revasi Tova.

<sup>20</sup> ♦ “Oara rutu varao toupaiveira aue-ia Sam Vuku oiso, ‘Kepa oaro viapavira toupaiverea. Viapau oiso ra oirara vai iava irai voa toureve. Iravu rera vo kovoaro ourevereao vao oa oisoa pitupareve.’

<sup>21</sup> “Uva irai vo kovo ou iraorevere, vo kovo aue iava tavitavisa torearo Turaro Jisas. Oa iava voeao sirova uturovere oea oisoa rera sirova utupaae Jisas ora igei tapo. <sup>22</sup> Vo voki-ia vao-ia ovokia rutu-ia Jon voea baptaispareva, ovokiroa rutu-ia tapo uvuipa ra igei tapo toureve ora vo ovokia-ia Pauto Jisas ipa pierreva vorevira.”

<sup>23</sup> Oire uva voea vaitereo tore pieiva oiso aueroaro Josep ora ovaisireivu vareo-ia Basabas ora Jastas rera raga ita Mataias. <sup>24</sup> ♦ Uva oiso puraoro variriaepla, “Turaro. VII oearovu rutu vovouaro-ia taraipau. Oa iava ro igei iare kareke pieri ira igeipa reesirivora.

<sup>25</sup> Ira aposel kovoaro ourevere Judas vaaro oa arova vuria purarevora vore avaoro opesi tapi oaro aue-ia vuria oaro.” <sup>26</sup> Uva va iava voea vao puraiva paupaua rerare Pauto vo ruipaaro sirova. Oa iava vaisiarei uveuverereiva. Oire iravu rera vaisiaro kae pierreva torevokovira. Oa iava rera tore pieiva ro-ia Mataias. Uva ora voea iare vaeavira raga rera tovoiva, oiso osa voea voeao aposel irara katai tau katai (11).

*Tugoropato Uraurato Vararoepa*

<sup>1</sup> ♦ Uva vo osa Pentikos-pa Voki pou piropa. Uva oirao pie vovou irara ora guruaepa katai tapi raga-ia. <sup>2</sup> Uva urioepa guruko vuvuiua iava sita pievira. Oa oiso urioepa rutu osa riroto kiuvu. Uva vo kepao rutu agasi pieva okepa-ia ora voeava paupaaepa vo guruko vao oa varaepa vuvuiua iava. <sup>3</sup> Oire uva voea iare katakataivira karekeepa

---

⊗ 1:10: Jo 20:12   ⊗ 1:11: Mt 24:30; Mk 13:26; Jo 14:3   ⊗ 1:13: Lu 6:14-16   ⊗ 1:14: Ap 2:1, 46   ⊗ 1:15: Ap 6:3   ⊗ 1:16: Jo 13:18   ⊗ 1:20: Sam 69:25, 109:8   ⊗ 1:24: 1 Sm 16:7   ⊗ 2:1: Lev 23:15; Diu 16:9

oiso osa arevuoara etovira voea kukuearo-ia pausa. <sup>4</sup> ♦ Oa iava rera iava vuku iraoaepa Tugoropato Uraurato ouoro. Uva rera iavirava oearovu rutu pisa reoro rutu puraiva, ovusa voeapa gorua vaterева vo reoro purasa Tugoropato Uraurato.

<sup>5</sup> Uva va iava oearovu rutu urioaepa Jiu-pa irara riro vuurapa vaisi pura irara voeao oea oisoa Jerusalem-ia toupaive, voeao osararoa oisoa toupaive vo uvarovu rutu vo rasitoa rutu-ia. <sup>6</sup> Oire uva gurukoa uvupaoro ora gurupaaepa voea rutu. Vo osa vavagisipaaepa uvare ora reo oaiive raga uru piepaiva katakataivira, vo reoro pisipisa reoro oara purapaiva. <sup>7</sup> Oiraopavira. Uva voea rutu vavagisipaaepa. Oa iava oiso puraaepa rirovira rutu rugorugooro, “Uvuta. Easi voeao rutu Galili raga iava urioae. <sup>8</sup> Uva apeisi ragavira uvuipavieie ra ora vigei vo reoaro raga uvupe vo reo oreoa-ia kakaevira touera. <sup>9</sup> Uva vigei rutu oiso toupai vo-ia, vigei Patia, ora voeao Midia, ora voeao Ilam, ora voeao Mesopotemia, ora voeao Judia, ora voeao Kapadosia, ora voeao Pontas, ora voeao Esia, <sup>10</sup> ora Frisia, ora Pamfilia, ora Isip, ora voeao otaererovu iava oiso osa Libia-ia sovara-ia oea Sairini-ia ruvara-ia toupaiveira, ora oearovu voeao oea Jiu-pa irara vo pitupituroaro sirova utupaaveira. <sup>11</sup> Ora Krit-pa irara, ora Arebia-pa irara vigoa rutu oiso ragavira toupai. Vigoa rutu uvuipavieie ra evoea uvupe oea goru kovoaro iava Pauto vaaro tavitavipaai.” <sup>12</sup> Osa iava eisi vavagisivira rutu toupaiva oiso purapaoro, “Avoeao! Eake rutu-a vao?” <sup>13</sup> ♦ Oire uva oearovu oiso puraaepa vakuvakupaoro, “Easi evoea ae ragaa-ia airepa oviro wain ukaioaiva kokoropaaai.”

#### *Pita Vo Reoaro Aue-ia Pentikos Voki*

<sup>14</sup> Uva Pita aueva toreroepa katai tau katai (11) voeao rera iava oeava oiso puraroepa goruvira, “Visii rutu vao-ia Jerusalem-pa irara ora oearovu uvarovuva Jiu-pa irara visiigoa ragai uvuta. Uva ragai gisipoaro sirova utupatai rara.” <sup>15</sup> Uva oiso puraroepa oearovu vo reoaro pukooro, “Viapau oiso evoea kokoropaaai wain iava oiso osa purapatai voeare aue-ia toupaoro vo resura vatara vuuta (9 klok) vo vokipaua. Viapau igei vo pitupituro vao vokipakou-ia ukaiopasa aue-ia wain. <sup>16</sup> Ari vao iava tuariri profetato Joel taviroepa oiso puraoro,

<sup>17</sup> ♦ ‘Pauto oiso puraroepa auere ovoiopa vokiro, Ragai reraaro Uraurato ira-ia oirara rutu vuku pieaverea voeao oea rasitoa rutu-ia toupaiveira oiso-ia, Voeao-ia ovii irara oavisii ora ovii riako oavisii oea taru ragai vo reoroaro siposipoiverea vo ragai vo goruaro sovara-ia. Oa-ia tapo orekerovu karekeaverea visii ovii iraraaro viovokoa osireiaro-ia aue-ia areo uusi. Ari avuka irara oavisii urusiara oupaiverea.

<sup>18</sup> ♦ Ora voeao kovopa irara oaa ora kovopa riako oaa oea tapo vuku pieaverea aue-ia Urauratoa oaa. Oa iava ragai vo reoroaro kosi piepaiverea.

<sup>19</sup> Ragai osasararovu rutupa oaravu rutu ravotoara karekeaverea vova vuvuiua sovara-ia ora vo rasitoa-ia tapo. Uva oaravu rutu tapo puraaverea oisi vo reesiro ravaavira oiso-ia, oaravua revisiara, ari oaravu tuituiara, ari oaravu kupareara.

<sup>20</sup> Ari ro-ia ravireo ira rupavira taru porero virovere. Ari ro kekira ira revasivira ora porero. Oire vara rutu-a varao oara isivaaro iava taru Turaro vo vokiaro oiraopavira pou piroverea. Vo voki-a eva oa-ia pisavira touperea oa-ia rera vaaro gorua karekereverea ora kortua.

<sup>21</sup> ♦ Vo oiso, irouto-a ro ira Turaro arereverea oiso puraoro, Turaro ragaivi tauvari vii goruaro sovara-ia, eera-a ira oiso kae piereve rera orirusa.’

Eisi osa ro profetato Joel puraroepa tuariri.

<sup>22</sup> “Isrel-pa irara visii-a vao visiigoa vo reoro uvu iraopata. Jisas ro vova Nasaret ira visiipa karekerevora rutu Pauto aue-ia oiraopara. Oa iavapisaara oiraopara rutu purarevora Pauto goruaro-ia oiso-ia, varao oara purarevora oearovu porete piepaoro ora riro gorupa kovoro tapo puraparevora. Uva vara rutu-ia varao vearovira tarai iraopata.

<sup>23</sup> Eera Jisas ira tapatavora aue-ia evao parikou rera kopii pieoro oeavu raga vavaearo iava oea-ia viapau lotua vai. Uva va puratavora. Ari ita, viapau oiso visii vaaro-a vao-ia,

◊ 2:4: 1 Ko 12:10-11 ◊ 2:13: 1 Ko 14:23 ◊ 2:17: Joe 2:28-32 ◊ 2:18: Ap 21:4, 9-10 ◊ 2:21: Ro 10:13

ari Pauto vaaro-a vao oa puratavora, uvare visiipa rera iava vasereva. Uvare rera raga vo ravaaro-a oa oisoa voari rutu toupaive tuariri. Uva vo ravaa-a eva oa vo taraiaro sirova ututaera. <sup>24</sup> Oire uva viapau oiso kopiia rera tuukevora. Oa iava Pauto rera ro-ia kae pierevora. Osiitoka eva kavurevora, oa iava tootoovira toupare Jisas. <sup>25</sup>  $\diamond$  Oisi-a eisi osa iava Devit oiso puraroepa vo rera iava ro Jisas,

‘Ro-ia Turaro Pauto ira kekepaaverea vo ora ragai puaaro-ia vo irapaua. Uvare vo ragai oirapapa vavaearo-ia toupareverea Turaro ragai virivaripaoro. Ra viapau viria vai oua.

<sup>26</sup> Eva-a oa-ia sopaua oaa agasipapeira aue-ia rorua, ora uvare tapo ragai vuurapa vaisi purapaaveira rera-ia. Vosa kopiira, eagara. Tueparaverea vo ovoiopa voki vare tuepaoro.

<sup>27</sup> Eva oa iava viapau oiso varaua oaa urauraaro kavuriverea vore kopii irara voaaro voeao uraura irara. Ra viapau va iava vaserverea, ora oiso tapo ra viapau oiso ra Tugoropato oara varaaro eruro.

<sup>28</sup> VII ragaipa tootoopa raiva vaterivora ora ragai vuku piepariverea aue-ia rorua, uvare ragai tapo toupariverea vo vokiara rutu-ia.’

Eisi osa puraroepa Devit.

<sup>29</sup>  $\diamond$  “Visii-a araoko irara oaa, uvuiparai ra visiipa aviavi pievira tavira aue iava aaotoa oavi ro-ia Devit ira kopiiroepa. Oa iava rera tovaiva aue-ia kakiua rera vouaaro. Uva va vao vigei ruvara-ia toupai vo vokio. <sup>30</sup> Uva rera profetato va iava tarairoepa vao oiso osa rera vatereva Pauto vao reo ovoi. Vo reo-a ovoiei reo oreoa-ia oiso puraroepa, Ragai vii aao irara iava irai ouavereva irai turaro piesa oiso osa vii vao Turaro. Uva va-a vao-ia oiso ragavira tarai rovoroepa Devit oiso, Utupaua taru toupareverea ro-ia oirato Pauto reraaro Jisas Krais ro Ropoto vo rasitoa-ia. Ora kopiirovere, ora vorevira toreroverea tapo. <sup>31</sup> Oa-a vao oa-ia taraipaoro oiso puraroepa Devit auere Jisas Krais vaore torea oaro vorevira, Viapau oiso Pauto rera ro-ia urauraaro iava vasereverea vore uva kopii irara urauraaro toupaiveira. Ora oiso, Asi viapau varaua rerare eruperea.

<sup>32</sup> “Ro-ia oirato Jisas ira vorevira tore piereva Pauto, ira kekeiovora ora igei osireiaro iava tuu pievira. <sup>33</sup> Uva toupareveira vo oirapapa varata-ia uva rera tovoreva rera rei pieoro Pauto. Uva vao tapo-a uvare Tugoropato Uaurato oureva ro irare Reo Ovoi purareva Pauto rerapa. Oisi-a oiso osa iava varao rutu kareke pierevo oara rutu keketavo ora vara tapo uvutavo vo-ia. <sup>34</sup>  $\diamond$  Ira-a ro-ia Devit viapau oiso iparoepa vuvuiua iare. Ari ora rera raga oiso puraroepa,

‘Ro-ia Turaro Pauto ira oiso puraroepa rerare Turarota oaa, Vo pauu oirapapa vavae oaa-ia.

<sup>35</sup> Ovusa viipa urua puraa tasipasa voeao-ia keripa irara oara, vo rara voea-ia puteri.’

<sup>36</sup> “Oiraopavira rutu varao Isrel sararo vao-ia tarai iraopaavere Jisas iava ro ira rei piereva Pauto. Ro-ia ira evao parikou-ia tapatavora. Oa-a vao oa iava rera roporeva rera vaisioro oiso, Krais, rera Turaro pieoro.”

#### *Oirara Rutu Ora Voea Iava Sopaura Poreivoiva, Baptaisaepa*

<sup>37</sup> Uva vo reo isivaaro iava voea iava sopaura oaiive vavataepa rutu. Oa iava siraoaepa. Oire va iava oiso puraaepa auere Pita ora oearovu aposel irara, “Avoeao araoko irara oao. Eake vai-ia uvuipiae ra oai puraio?”

<sup>38</sup>  $\diamond$  Oa iava Pita voeare oiso puraroepa, “Ora visii iava vovouisiro oavisii poreta katakataivira visii rutu. Ra baptaisa outa ora reesioro. Ra rera vaisiaro-ia Jisas Krais toutes. Oiso ra visii iava vuriara oavisii verareve, oa iava vao Tugoropato Uaurato outavere rera vo goruarova toupaoro. <sup>39</sup>  $\diamond$  Vao-ia Reo Ovoi oa purareva Pauto visiire, ora aao irara oavisii, ora voearore tapo oearoa tauairo rutu tapo toupaiveira, ora oearovu rutu tapo oearoa roporoporeverea Pauto ora rera iare.”

<sup>40</sup> Uva oreorovu rutu-ia voea goruvira tavireva Pita oiso, “Ora oriruta visii vao-ia ora voearo vo vokio iavapa irara. Uva voearopa ora vatatopopatavere oearovu vuri vovou irara.” <sup>41</sup> Oire va iava voea voeao rera reoaro uvu iraoiva. Oa iava baptaisa ouiva. Voea rutu voeao-ia oea vieiaro-a vao vo peva tuku (3,000). Uva voea evoea oirao pie vovou

$\diamond$  2:25: Sam 16:8-11     $\diamond$  2:29: 1 Kin 2:10     $\diamond$  2:34: Sam 110:1     $\diamond$  2:38: Lu 24:47; Ap 3:19, 5:31     $\diamond$  2:39: Ais 57:19; Joe 2:32; Ap 10:45; Ef 2:13

irara tapo ora takutakuvuaepa. <sup>42</sup> Oa iava taraia ouiva aue sirova utupaoro aposel irara vo sipoiporoaro. Osa iava voea rutu toupaiva oavu-ia ora goruaepa aue komunion aio purasa ora aue tapo variria.

*Oirao Pie Vovou Irara Vo Tootooaro Iava*

<sup>43</sup> ♦ Voea rutu voea-ia tavetavepaiva, uvare oaravu rutu ravoto kovoro puraiva aposel irara vo Tugoropato Uraurato goruaro-ia. <sup>44</sup> Oirara rutu voeao oirao pie vovou irara oea oisoa vaea kaevira toupaive katai tapi, ora orekerovu rutu oaiive oara-ia ora roorookaaepa ora voea raga. <sup>45</sup> Vara rutu varao oara oisoa voea ruvara-ia toupaive oara-ia moni ouaeapa oearovu ruvara-ia. Oa iava oisoa voearopa vara varao moniaro roo piepaive voeaopa apota iraravi. <sup>46</sup> ♦ Uva oisoa vokiara rutu-ia aivaropaise Rovopa Kepa Tugoropa Kepa-ia Tempel vo katai vovou raga-ia, ora vo tapo kepara oaiive-ia tapo. Uva tapo oisoa aue-ia aioara oisi raga vaeavira aiopaise voea rutu. Ora aue-ia roru vovou-ia oisoa oearovupa orekerovu vate ragapaise. <sup>47</sup> ♦ Oa-a eva oa-ia oisoa Pautoa-ia vuurapa vaisi purapaise. Uva va-ia oearovu voea-ia oisoa tavetavepaive. Oa iava oisoa vokiara rutu-ia Turaro Pauto oearovu gurupareve oirao pie vovou irara voea iare.

3

*Vuri Kokototo Vearoroepa Ira Oisoa Toupareve Tempel Iava Rataoa Riaaro-ia*

<sup>1</sup> ♦ Ovokivu-ia Pita vaio ora Jon ipasiepa Tugoropa Kepa Tempel iare aue-ia vo peva vuuta (3 klok) variripa vuuta ovaiarov. <sup>2</sup> Oire iravu oirato ira kavaueva aakova vuri kokototo. Ira iava kopii epa kokotoarei. Oa iava oisoa rera kaepaise. Uva oisoa vokiara rutu-ia rera tovopaise vo Tempel rataoa riaaro-ia. Vo ratao oa oisoa vaisipaise oiso, Vearo Ratao Rutu. Uva oisoa voa toupaoro oearovu arepareve auere moni, ovusa koatapaave Tempel sovara iare. <sup>3</sup> Oire voava kaea-ia Pita vaio kekereva ora Jon ovusa koata rovopasiepa. Oa iava vaiterei arepareva auere oaravu avu vai rerapa, oiso ra oarai vatesi rerapa. <sup>4</sup> Uva tuupavira Pita rerava vurapareva. Uva Jon tapo toupaoro oiso puraroepa, “Vegei-ia vurari.” <sup>5</sup> Uva va iava vaiterei vurapareva keapaoro oiso, Ragai vatepasivoi orekevu avu vai. <sup>6</sup> ♦ Oa iava Pita rerare oiso puraroepa, “Viapau oiso monia vaiei ra viipa oai vateve. Ari ita, oavu raga vao-ia oa iava vii vatepaave Jisas Krais vo goruaro raga iava ro vova Nasaret. Uva vii tavipaa ra toreu, ra vokari.” <sup>7</sup> Oire Pita rerare oirapapa vavaearo-ia pituoro rera tore piereva. Uva vo vuuta raga-ia eva oa-ia rerare goruepa kokotoarei vova ario kerureiaro iava. <sup>8</sup> Uva voava tokatokareva voaviva voka ovoisa. Oire vaiterei tapo koataroepa vore Tugoropa Kepa vao Tempel sovaria tokatokapaoro ora Pautoa-ia vuurapa vaisi puraoro. <sup>9</sup> Osa iava eisi oirara rutu rera kekeiva osa eisi vokareva Pautoa-ia vuurapa vaisi puraoro. <sup>10</sup> ♦ Oa iava voava rerare oiso puraroepa, “Akoea, ari ro oisoa Tempel vuura rataoaro-ia toupareve moni arepaoro.” Ari ita, rirovira rugorugoo iraopaaepa vao iava oa rera-ia karekeepa uva oisi vokareva.

*Pita Vo Reoaro Rakorako Uru Iava Vao Solomon Vaaro*

<sup>11</sup> ♦ Vo osa Pita vaio-ia pitupareva ora Jon, ovusa oearovu ikaupaoro uriopaaepa vore rakorako uru vao Rovopa Kepa Tugoropa Kepa. Oa oisoa vaisipaise oiso, Solomon Vo Uruaro Rakorako Uru. Osa iava oiso rirovira rutu rugorugoopaaepa voea rutu. <sup>12</sup> Oa iava Pita voeare oiso puraroepa, “Ai! Eake iava vegeiva tuupavira vurapata visii Isrel-pa irara. E oiso rugorugoopatai ora vegei raga vo goruaro iava vao puravevo? Ora vao tapo vao iava torevoko vovou oiso ro oirato pievevoi?” <sup>13</sup> ♦ Viapau rutu. Oiraopavira, ari Pauto raga ro Pauto oaiive Ebrahim vase, ora Aisak, ora Jekop. Uva eera-a Pauto oaiive vigei aite iraraaro. Ari ita, rera raga-a eera Oviito Kovopato Jisas ira rei pierevora Pauto. Ira vate ragatavora rera rovirieisa kortua-ia. Rera-ia kuuvu pitupituro rutu puraoro rerare isivataera vo Pailat osireiaro-ia. Oire va iava Pailat Jisas kortuoro oiso puraroepa, Rerape. <sup>14</sup> Uva visii rutu vao-ia visiigoa rerare isivaoro ora poretaera rera karusa ro oira upopato. Oire rera kopii pietavora Torevoko Vovouto ora Tugoropato. <sup>15</sup> ♦ Ira upotavora Turaro

◊ 2:43: Ap 5:12 ◊ 2:46: Ap 5:42; 1 Ko 10:16 ◊ 2:47: Ro 14:18 ◊ 3:1: Ap 2:46; Sam 55:17 ◊ 3:6: Ap 4:10 ◊ 3:10: Jo 9:8 ◊ 3:11: Lu 22:8 ◊ 3:13: Ais 52:13 ◊ 3:15: Ap 5:31

ira Tootooa vatepareveira. Ro ira vorevira tore pierrevora Pauto voeao ruvara iava kopii irara. Uva rera-a eera ira kekelevora vegei. <sup>16</sup> Va-a vao oa iava Jisas oirao pievevoiva, vuri kokototo porete pielevora rera vaaro iavirava gorua, oporetea-a vao-ia oa keketavoi vo vokio vao oa karekei ro-ia ira-ia taraitai.

<sup>17</sup> “Araoko irara oaa, taraiparai vao-ia osa vao pura ragatavora vuria, uvare viapau taraipataera oiso rutu osa voeao reipa irara oavisii vo tuariri. <sup>18</sup> Ari ita, vara rutu varao oara karekereva Pauto aue-ia profet irara gisipoaro tuariri. Oire vo tavakaro urioera Krais iare Pauto Ropotoaaro. Uva vo reoro varao oara oirao pierrevora Pauto vo rera-ia.

<sup>19</sup> “Oire ora visii vo pitupituroaro tavariota, ra poreta viro. Oa iava vuriara oavisii uvuipai verareve. <sup>20</sup> Osa iava eisi uvuipa ra vorerivira airepa goru vatoreve, oiso osa ogoepato gorua oupareveira aioa-ia. Aue iava uvare vao raga-ia Turaro Pauto visii tapo toupare. Uva va iava Jisas visiipa saporevere, ro Krais ira roporeva Pauto visiipa. <sup>21</sup> Ari ita, rera ro tou rovoreverea vo vuvuiua-ia vo vuutare tuepaoro, vo osa orekerovu rutu torevoko rovoreverea vo rasitoa-ia. Oara iava rera voeaprofet irara tavireva tuariri voea vateoro. Osa iava profet irara vara iava tavitaviaepa.

<sup>22</sup> ♦ “Oire uva Moses tapo oiso puraroepa, ‘Pauto profetatoa vai roporeverea visii araoko iraraaro iava irai oiso osa ragai piererva. Ra irai reoaro uvupata.

<sup>23</sup> ♦ Oire vosa irouto rera reoaro viapau uvupareve, ira-a eera taru voea iava viro piervererea rera opesi piesa.’

<sup>24</sup> Oiraopavira ita, voeao-ia profet irara oiso osa ro-ia Samyuel rovopato, ora oearovu rutu voearo oearoa oiso rera sirova utupave vo reoro varao vatepaoro oara rutu iava tavitaviaepa vo vokiro rutu iava varao-ia.

<sup>25</sup> ♦ “Oire uva evara-a oara iava oaravu outavere varao oara iava tavitaviaepa profet irara voari tuariri. Visiigoa Pauto vo Reo Ovoiaro sovara-ia toupata oreoa iava vigei tuariripa iraraaro tavireva oiso, ‘Ebraham, vova vii ovii iraraaro oea iava taru viraakoa karekeperea vore oearovu rutu-ia vo rasitoa-ia.’

<sup>26</sup> Pauto Oviitoaaro roporeva rera sipo rovosa visii iare, oiso ra visii rutu viraakoreve auere, ra vuriara oavisii iava poreta viro.”

#### 4

##### *Pita Vaio Ora Jon Tovoiva Tuukepa Kepa-ia*

<sup>1</sup> ♦ Oire vo osa voea tapo oirara ora reopasiepa, ovusa poua viropa oearovu oirara oiso osa pris irara, ora Sadyusi-pa irara, ora ro rovopatoa rutu vova voeao iava oea oisoa Tugoropa Kepa Tempel tokipaive. <sup>2</sup> Uva va iava rirovira kasipupaaepa vo sipoiporo iava oara vatesiva oirarapa oiso osa vao-ia oa-ia oiso purasiepa, “Voea rutu taru oirara vorevira toreaverea Tootooa ouoro oiso osa pierrevora ro-ia Jisas.” <sup>3</sup> Oa iava vaiterei iava gasiiva vaiterei tuukesa uva vaitereire vokiepa voa. <sup>4</sup> ♦ Ari ita, riro irara rutu Pauto vo reoroaro oirao pieiva vo reo oa vatesiva. Eva-a oa iava voea rutu vieiaro aue-ia uvuiaepla, vo vavae tuku (5,000) voeao rutu uvuiaro voeao oirao pie vovou irara.

##### *Kaunsel Irara Osireiaro-ia Vaiterei Kortuiva*

<sup>5</sup> Uva katai voki putevoiva, voeao rutu ora guruaepa Jerusalem-ia. <sup>6</sup> Oiso-ia tokipa irara, ora oeavu oira vasi irara, ora oeavu voeao Reo Taisi iava sipoipopo irara, ora ro tapo Anas Rovopato Pristo, ora Kaifas, ora Jon, ora Aleksanda, ora voeao rutu voeao Rovopatoa rutu voeaprofet. <sup>7</sup> Uva ora voeao sovara-ia aposel irara tovoiva. Oa iava oiso voeao akepaiva, “Aa vo goru-a, ora aa vo karopo-a oa iava varao purapatavo visii oira akukuro?”

<sup>8</sup> ♦ Oire Pita Tugoropato Uraurato vo goruaro iavirava oiso puraroepa voeare, “Visii vao oirarapa uutupa irara reipa irara ora oira vasi irara oae Isrel-pa irara. <sup>9</sup> Vosa taraia oupata vegei-ia vava vegei rovirieipasa vao-ia vegei vaaro vearo kovo oa-ia ro porete pielevora vuri kokototo. Uva uvuipatai ra rera kekepaoro rugorugoo iraopata. <sup>10</sup> ♦ Ro

♦ 3:22: Diu 18:15   ♦ 3:23: Diu 18:19   ♦ 3:25: Jen 12:3, 28:14   ♦ 4:1: Lu 22:4; Mt 3:7   ♦ 4:4: Ap 2:41, 3:1

♦ 4:8: Ap 13:9   ♦ 4:10: Ap 3:6, 2:24

Jisas ira vo goruaro-a vao oa aviavi pie iraopaavoi visiipa vao-ia ora voeo Isrel-pa irara. Ari ita, rera raga ro-ia Jisas Krais ro vova Nasaret ira tapatavora aue-ia evao parikou, oa iava rera tore pierrevora Pauto aue iava kopiiaro. Ira vo goruaro-a vao oa oiso ro porete pievora vuri kokototo ira tapo toupatavoi vo vokio. <sup>11</sup> ♦ Ro-ia Jisas irare isivataera oiso osa vao vo reo-ia rera iava Jisas aveke tuuta oreoa toupai Tugoropa Vuku sovara-ia oiso, ‘O-ia aveke iriare isivaaera kepa paupa irara. Uva utupauavi oiso karekeoi kukuuvu tuuta oira o aveke.’

<sup>12</sup> ♦ Uva viapau irai vova rasitoa-ia uvuiparoi irai ita ousa vore Pauto ruvara-ia. Viapau rutu. Ari ro raga vaisiaro-a, ira vigei kae piereverea utupaua ro raga, Jisas Krais.”

<sup>13</sup> Oa-a eva oa iava vaiterei-ia tarai iraopaaepa voeo Jiu iava voea reipa irara, uvare viapau uriripasi goruvira rutu reopaoro. Uva oiso tapo oisoa taraipaave, Asi vaitereo viapau oiso skulsiepa, ora viapau vigei vo taraiaro ousivora. Oa iava rirovira rutu oiso rugorugoopaaepa, uvare vaiterei eveipaiva oiso, Easi vaitereo Jisas tapo oisoa toupasi.

<sup>14</sup> Ari ita, rera vurapaiva ita ro-ia oirato ira vorevira vearovorepa. Uva viapau oiso uvuipaaepa oiso ra oreovu avu vai puraive va iava eva rera-ia.

<sup>15</sup> Oire vaiterei kosi pieiva Kaunsel Kepa iava. Oa iava vaiterei-ia ora reopaaepa rirovira rutu rugorugoopaaepa vaore oa purasiva. <sup>16</sup> Uva oiso puraaepa vaitereire, “Avoeo, eake vai purapere vaitereire? Ari ita, oiraopa rutu ita vao oa purasivorao ravoto kovo rutu puraoro oirara rutu osireiaro-ia voeo Jerusalem-ia tou irara. Uva viapau uvuipavie i ra oiso puravio, Easi viapau oavu avu vaiei vao-ia.” <sup>17</sup> Oire vaitereire oiso puraaepa voea raga ora reopaoro, “Vearopai ra oisivu avu rutu ora vaiterei raga-ia vape. Ra viapau rutu avape oearovu siposiposa ro iava Jisas. Teapi oearovu iare ita avape ra va-ia taraiave. <sup>18</sup> Uva va isivaaro iava vorevira ita vaitereire keeraeaepa. Uva voava oiso vaiterei vearovira rutu vosipaiva oiso vaiterei tavipaoro, “Opeita vo vaisio iava ita Jisas-pa vaisi oearo ita siposiposivere.”

<sup>19</sup> ♦ Uva Pita vaio ora Jon oiso ragavira voea akepasiva voea vo reoroaro pukooro, “Eake vai vearovai vo Pauto osireiaro-ia, visii vo reoroaro sirova utusa, eke Pauto vo reoaro? Oire varei vearovira rookata, aa vao vearovai. <sup>20</sup> Viapau rutu uvuipaie i varao kavuio oara kekeiovora ora vara uvuiovora.” <sup>21</sup> Oire va iava vorerivira vaitereipa oreovu ita goru pie reo vateiva. Oa iava vaiterei iava vaseiva. Uvare viapau uvuipaaepa oiso ra raiva vai kekeve ra oai-ia vaiterei vuri pieive. Aue iava uvare vao ragare vorevira rugorugooaepa oearovure voearo oearoa tapo vova ratau Pauto-ia vuurapa vaisi purapaiva va-ia vao vaiterei vo kovoaro-ia, oa-ia ro porete piesivora vuri kokototo. <sup>22</sup> Rera-a ro irare vo resura tau (40) ivaro puteva. Uva uvuiparoi ra vorevira vokareve vo vokio-ia.

#### *Oirao Pie Vovou Irara Uriri Asavira Variripaaepa*

<sup>23</sup> Oire uva va iava ora vaiterei iavapa irara iare avasiepa voeapa siposiposa vo reoro rutu iava varao oara puraiva voeo rovopa irara rutu pris irara ora oira vasi irara. <sup>24</sup> ♦ Uva vo siposipo uvuoro katai guruko raga puraiva varirioro vaeavira rutu oiso, “Pauto riro gorutoa rutu-a vii Turaro. Vi raga varao purariva oiso-ia, vuvuiua, ora rasito, ora avakava, ora orekerovu rutu varao oara sovara-ia toupaiveira. <sup>25</sup> ♦ Uva vii raga vo reoro-ia Tugoropato Uraurato oara iava Devit gisipoaro-ia ro vii kovopatoaaro oara-ia oiso purauepa,

‘Eakere osararovu kasipuvira toupaiveira. Ora eakere oearovu vo kovoro-ia reesiara pura ragaiva akukuvira.

<sup>26</sup> ♦ Uva voeo-ia oira vasi irara oea oisoa rasitoa-ia toupaive ora ravaapaoro uutuvira. Ora oearovu tapo voeo tokipa irara oearoa rutu ora guruaepa uva voava rerare ro Turaro Pauto kasipuaepa ora auere tapo Krais rera reraaro ro Ropoto.’

<sup>27</sup> “Oiraopavira osa toupai vo-ia. Uva voea voeo ora guruaera auere vii Oviitoaarore kasipusa ro Jisas ira roporiva rera siposa Airereito Kovopato. Uva voea-a voeo-ia oea ora guruaepa oiso-ia, Herot-a ro-ia, Pontias Pailat-a ro, ora Isrel-pa irara, ora oearovu ratau tou irara. <sup>28</sup> Oisi ragavira otakutakuvua vao puraiva oiso osa vii vo goruaro ora vii

♦ 4:11: Sam 118:22; Ais 28:16    ♦ 4:12: 1 Ti 2:5-6    ♦ 4:19: Ap 5:28-29    ♦ 4:24: 2 Kin 19:15    ♦ 4:25: Sam 2:1-2    ♦ 4:26: Hi 1:9

vo ruipaaro reesireva, oisore ra oisi kareke iraope. <sup>29</sup> Turaro, igei tauvari voea vo reoaro uvuoro kasipu reo, oiso ra viapau uriripaio vo osa vii vo reoroaro goruvira puraio. <sup>30</sup> Ora vo osa vavaea oara tovor i vo oearovu porete piepaoro, auere ra ravaa reesiro ora karekepe ora ravoto kovoro tapo vao iavirava Jisas vaisiaro vii reraaro Airereito Kovopato.”

<sup>31</sup> ♦ Uva vo varirio isivaaro iava kepa vao rikerikeepa ravurikeoro. Uva voea rutu tapo agasiaepa Tugoropato Uraurato vo goruard ouoro. Eva-a oa iava uriri asavira oisoa Pauto vo reoaro vatepaive.

#### *Orekerovu Rutu Voea Varaaro-ia Oisoa Vaeavira Raga Pitupaive*

<sup>32</sup> ♦ Oire uva voeo oirao pie vovou irara oea aue raga-ia oisoa toupaive katai vovou ora katai tootoo. Uva viapau oiso ra irai voea iava oiso puraro, “Eva-a ragai vaaro.” Oapa viapau oisi oa-ia touiva kataia raga-ia vaea rugorugoo. <sup>33</sup> Uva aueva gorua voeo aposel irara Turaro Jisas torearo iava siposipoiva. Osa iava riroa-ia touiva gavaurea ora tauva vereopa vovou-ia. <sup>34</sup> ♦ Uva viapau irai voea iava apotavira oisoa toupareve, uvare kepaara ora rasiara oaiive-ia oisoa voria oupaave varao oara oisoa voea ruvara-ia toupaive. <sup>35</sup> Oire vo voriro evara oara oisoa oupaive oara oisoa tovopaive aposel irara ruvara-ia. Uva voava oisoa vara oupaoro voearovio roo piepaive apota irara.

<sup>36</sup> Ro Josep ira oisoa vaisipaise oiso, Banabas. Ovaisia porearo oiso ragavira oisoa toupaive, Vearopa Reoro Vateto. Eera Livai-pato Saipras iava rera. <sup>37</sup> ♦ Uva oisoa rera vaaro rasia toupaive, oa-ia voriroepa monia ousa aposel irarapa.

## 5

#### *Vo Ananaias Vaio Iava Toupai Ora Sapaira*

<sup>1</sup> Uva ita, iravu-a ro-ia rera vaisiaro, Ananaias ora vatuava o-ia, Sapaira aiterea tapo oavu oaes-i rasia vori ousiepa monia ouoro va-ia. <sup>2</sup> Ari ita, aiterea vaitereo monia ou ragasiva auero oaes-i rutu voriaro-ia. Uva okarutuvu-ia pitureva ora rerapa. Uva vatuava tapo taraiopa va-ia, osa okarutuvu raga ouoro vava avaroepa aposel irara vatesa va. <sup>3</sup> ♦ Oa iava Pita oiso puraroepa rerare, “Ananaias. Apeisi ragavira iava ora vii iava sopaua iava vaserivoi Seten-pa? Oa iava voua-ia piturevoi. Uva vo pitupitu-a vao kuuvua purarivo Tugoropato Uraurato keaoro ora viipa moni-ia karutuoro rasia voriaro. <sup>4</sup> Vo osa vori asavira rasia oisoa toupaive, uva voa-a eva uva oisoa vii raga vo rasia oisoa pitupari. Uva va isivaaro iava vo rasi voriivo viipa. Oa iava va voriaro tokirivo. Oire uva apeisi ragavira vovouisi oara pierivo? Rera tapo Pauto kearivo. Viapau oiso oirara raga kearivo vao-ia. Viapau rutu.” <sup>5</sup> Uva va iava Ananaias vo reo uvuoro kove ovoiroepa kopii ovoioro. Oa iava voea rutu rera iava uvuiva va iava eva osa piereva kopiiro ora uririaepla rutu. <sup>6</sup> ♦ Uva oearovu rera ruuoro rerava kosia viropa rera tovasa.

<sup>7</sup> Oire vo peva vuuta (3 tua) isivaaro iava urioopa vatuava oaro. Viapau oiso rera ia taraipaoro oiso, Ro kopiiroe, ra oa-ia koataopa. <sup>8</sup> Uva Pita oira akereva oiso, “E vo monia vao-ia rasia oaes-i voriaro?” Oa iava oiso puraopa, “Aure. Eisi ita osa torevokopai.”

<sup>9</sup> Osa iava Pita oirare oiso puraroepa, “Apeisi irao iava vei rutu vaea vovou purasivo Tugoropato Urauratoa-ia kokaraoro Pauto reraaro? Uvuipau ra voea kukuukuaru uvuri ovusa vii kaesa vorepaave vova uva vatuatoa oara tovapa tapi.” <sup>10</sup> Oa iava kove ovoiopa kopii ovoioro. Uva voava vokapaoro vo gerepa kekeiva. Oa iava oira kaeiva oira tovasa voari vatuato tova ruvara-ia. <sup>11</sup> ♦ Uva voea voeao lotupa irara ora oearovu oea rutu vaitereo iava uvuoro rirovira rutu uririaepla.

#### *Riroara Puraiva Ravaa Reesiro Ora Ravoto Kovoro*

<sup>12</sup> ♦ Oire voeao aposel irara osasararovu rutu ravoto kovoro puraiva oirara rutu vuutaaro-ia. Oa iava voea rutu vaea vovou puraiva. Uva ora guruaepa rakorako uru ia Solomon vaaro. <sup>13</sup> Oearovu voearo lotu asa irara oea viapau voea tapo ora guruaepa uvare uriripaapea. Ovusa oearovu oisoa voea iava aposel irarapa avivikepaave. <sup>14</sup> Ari ita,

⊗ 4:31: Ap 2:2, 4    ♦ 4:32: Ap 5:12    ♦ 4:34: Ap 2:45    ♦ 4:37: Ap 5:2    ♦ 5:3: Diu 23:21; Lu 22:3    ♦ 5:6: Jo 19:40    ♦ 5:11: Ap 19:17    ♦ 5:12: Ap 2:43, 3:11, 4:32

oearovu oearoa Turaro-ia oirao pie vovou rutu purapaiva, oearoa voea tapo ora guruaepa ora takuvuoro. <sup>15</sup> ♦ Oa iava voraro rutuva oearovu uriopaaepa oearovu kaepaoro, upiapa irara vore raiva. Uva voeapa urupaiva vo raiva puaaro aue-ia mat ora uru rakorakoroi tapo auere rugoopaoro, Vosa Pita voea-ia putepaoro vokaparevere, ra uveiota oaro kavupareve voea-ia rera verapaoro voea iare osa voea ruupareve uveiota oaro voea porete piepaoro. <sup>16</sup> Uva vo uruiro tapo uriopaaepa ouruiroa oisoa Jerusalem-ia ruvara-ia toupaive, ouruiroa oearovu upiapa irara sipopaiva ora oearovu oearoa-ia oisoa tugara kopiro toupaive. Oa iava vorevira voea porete pieiva.

#### *Vo Tavaka Iava Toupaivao Oa Karekeepa Aposel Irara-ia*

<sup>17</sup> ♦ Oara-a evara ravoto kovoro riiriireva kasipuoro Rovopato Pristo ora oearovu rera iava Sadyusi-pa irara. <sup>18</sup> Osa-a eisi osa iava aposel irara ouiva voea tovosa tuukepa kepa sovara-ia. <sup>19</sup> Uva vokiaro urioroepa Turaro purapurapatoaaro ensel rataoa karusa. Oa iava voea kosi piererva rataure. Uva oiso puraroepa, <sup>20</sup> ♦ “Avata. Uva Rovopa Kepa-ia Tempel toutavere, ra voa toupaoro voea rutu oirara siposipota vao iava tootooa, Airepa Tootoo oa vo toupaivoi Jisas vo raivaaro-ia.” <sup>21</sup> ♦ Eva-a oa uvuoro avaaepa Tempel iare vo reoro-ia rovosa vara vateoro.

Uva Rovopato Pristo urioroepa ora voeao rera iavapa irara tapo. Oa iava voeao Kaunsel irara guru pieiva voeare keeraoro voeao Isrel-pa irara oira vasi iraraaro. Uva va isivaaro iava oearovu aposel irara ousa avaaepa tuukepa kepa iava. <sup>22</sup> Oire uva polis irara avaaepa voare. Uva viapau voea kekeiva tuukepa kepa sovara-ia. Oa iava vura ragaoro voreaeapa oiso purasa, <sup>23</sup> “Igei tuukepa kepa-ia vura ragaio. Viapau oiso irai ariarava karuiovo. Ari ita, tupavira raga toupaivo tupu. Ora aue tapo uvare vo kepa-ia uutupa irara tapo toupaivo.”

<sup>24</sup> Uva va iava vo reoro uvuoro Rovopato Pristo ora iravu reito aue iava Tempel aiterea rutu oiso rugorugoo iraopasiepa, Eake irao-a vao-ia oa pou piroi vo-ia? <sup>25</sup> Oa iava iravu urioroepa voea rutu tavisa oiso, “Avoeao uvuta. Easi voeao epao Tempel-ia oea oirara siposipopaivoi.” <sup>26</sup> Oire reito avaroepa rera voeao tapo. Oa iava voea tapo aposel irara voreaeapa voea rutu. Uva viapau oiso orekevu avu vai puraiva voea-ia, uvare oiso ragavira rugorugopaaepa, Teapi vigei iare avekeara vai vikiive.

#### *Aposel Irara Viapau Oisoa Uriripaave Kaunsel Irarare Reoreopaoro*

<sup>27</sup> Uva voava voeava karea viropa voea tovosa Kaunsel irara sovara-ia. Oa iava ro-ia Rovopato Pristo oiso puraroepa, <sup>28</sup> ♦ “Igei visiipa goru vosi rutu pura ragaiovorao oiso, Opeita vo vaisio iava oearovupa siposipopatavere Jisas-pa vaisi. Uva apeisi iava visii raga vo uruio agasi pieta Jerusalem urui vo ora visii gisipoaro raga iava igeipa vao suria puraoro oiso, Igoa rera kopii pieiovora?”

<sup>29</sup> ♦ Uva Pita ora oeavu aposel irara vo reo pukoiva oiso puraoro, “Igei Pauto vo reoaro sirova utu iraopaioveira. Ari oirara vo reoroaro oara tupepapeira. <sup>30</sup> Vigei aite iraraaro Pautoa-aro ira Jisas tore pierrevora vorevira ro ira kopii pietavora evao parikou-ia. <sup>31</sup> Uva Pauto rera rei pierrevora ora rera oirapapa varata oaro-ia oiso rera pieoro, Turaro Kae Piepato, oisore ra Isrel-pa irara sopapro oaiive poreive. Oire ra va iava voea iava vuriara oaiive veraparevere. <sup>32</sup> ♦ Ora igei-ia vao iava tavitavipa irara ora ro tapo Tugoropato Uaurato ira voearopa vatepare Pauto oearoa rera vo reoaro sirova utupaaveira.”

#### *Gameliel Oiso Puraroepa, Kaunsel Irara Gavaure Visivi Aposel Irarare Reopata*

<sup>33</sup> Oire uva vo reoro voeao sopapro togava rutu. Oa iava voeare vovouisiro tore iraoepa. Uva oiso vovoupaaepa ra aposel irara upoive voea kopii pieoro. <sup>34</sup> Uva voava vo vokia vao-ia iravu toreroepa voea iava voeao Kaunsel irara ro-ia Farisi-pato rera vaisiaro, Gameliel. Eera Gameliel riro taraito Reo Taisi-ia. Irare oisoa oearovu rutu oiso purapaave, “Eera-a vearo vovoutoa rutu,” uvare reo keketoa. Oire uva toreroepa oiso purasa, “Eisivi raga ratauvi voeao aposel irara kosi pieta.” <sup>35</sup> Oa iava oiso puraroepa Kaunsel irarare, “Visii

♦ 5:15: Ap 19:12   ♦ 5:17: Ap 15:5   ♦ 5:20: Jo 6:63, 68   ♦ 5:21: Ap 4:5-6   ♦ 5:28: Ap 4:18; Mt 23:35, 27:25   ♦ 5:29: Ap 4:19   ♦ 5:32: Lu 24:48; Jo 15:26; Ro 8:16

vao Isrel-pa irara vatapopata. Teapi voeao vuri pie ragata.<sup>36</sup> Teapi oiso pieta osa iraru ro-ia rera vaisiaro, Tiudas ira oisoa ora rera vaisiaro raga rei piepareve. Oire riro irara rutu rera sirova utuaepa. Voea uvuiaro voeao-ia vo resura vovoto (400). Uva va iava oeavu rera upoiva. Osa-a eisi osa iava oisi raga ora rigaaepa voeao vo resura vovoto ora opesi pieoro.<sup>37</sup> Uva voea isivaaro iava iravu ro-ia rera vaisiaro, Judas ira karekeroepa aue-ia vo vokio sensispa voki ro-ia Galili-pato. Uva voava riro irara ivureva ora rera iare rera sirova utusa. Ari ita, eisi ita osa ragavira iava ora opesi pieroepa. Uva oisi raga voeao utuaepa rera voeaaro.<sup>38</sup> Ari ita, vo vokio-ia visii tavipaa oiso, Voeape, ora voea vo kovoaro tapo, ora raivara oaive. Oara tapo evara opesi ragapere, vosa voea raga varaaro oira turiro.<sup>39</sup> Ari vosa voea varaaro vova Pauto, ra viapau oiso uvuipatai ra voea-ia puteta. Uva oiraopavira pasi oiso, Easi visii vai raga Pauto upopatavere.”

#### *Aposel Irara Roruiva Ariia Oupasa Jisas Vaisiaro-ia*

<sup>40</sup> Osa-a eisi osa iava Gameliel vo reoaro sirova utuaepa. Oa iava voeare aposel irara keeraaepa. Uva voea ragiiva voeare goruvira oiso purapaoro, “Opeita Jisas vo kovoaro iava tavitavipatavere.” Uva va isivaaro iava voea eakaiva.<sup>41</sup> Oire Kaunsel-pa irara kavuiva roruoro, uvare Pauto voeapa reoa reesireva oiso puraoro, “Uvuitae ariia ouoro varao rutu vearopa kovoro kareketavoiva Jisas varaaro.”<sup>42</sup> Oa iava vokiara rutu-ia vo Rovopa Kepa-ia vao Tempel ora vo kepaara tapo vo siposipo oisoa vatepaive Jisas iava oiso, Pauto reraaro ro-ia Ropoto.

## 6

#### *Erao Vatara (7) Oirara Reesiiva Aposel Irara Tauvapasa*

<sup>1</sup> Ovokivu-ia utupaua uva disaipel vieiaro riroepa. Uva voea raga iava oearovu Jiu-pa irara Grik reo-ia oisoa reopaave voeaore oea oisoa Hibrus reo-ia reopaave oiso purapaoro, “Uva apeisi viapau vairopa raro riako igei iavapa riako uvvivira aioara vai vatepaiveira vokiara rutu-ia?”<sup>2</sup> Uva oiso puraaepa voeao katai tau erao (12) aposel voeaore keeraoro disaipel irara, “Viapau rutu uvuipaiei ra Pauto vo reoaro vatepa kovo kavuio okovorou raga tokioro.<sup>3</sup> Oire ora visii raga iava erao vatara vaire taraata torevoko sopa iraraa vai. Voeao oea vukupaaveira aue-ia Tugoropato Uraurato rera vaaro tauva ouoro, ora aue tapo vosa riro tarai iraraa vai. Oa iava uvuipaiei ra voea reesiio vo kovo tokipasa aio vatepa kovo.<sup>4</sup> Uvare igei vaaro oiso toupai, Igoa variripaiovere, ora vo reo vatepaiovere siposipapaoro.”

<sup>5</sup> Uva va iava oiso puraaepa, “O ita vearopai.” Oa iava Stiven reesiiva ro ira aue-ia Tugoropato Uraurato vukuroepa ro riro oirao pie vovouto. Ora voeao tapo reesiiva oiso-ia, Filip, ora Prokoras, ora Naikena, ora Taimon, ora Pamenes, ora Nikolas Antioch iava rera ouruia oisoa ratau toupaive tauai, ira Jiu vo pitupituaro sirova uturoepa.<sup>6</sup> Oire voea tovoiva aposel irara ruvara-ia. Uva variria isivaaro iava voea-ia vavaeara tovoiva voea-ia ovoiei reesi puraoro.

<sup>7</sup> Oire Pauto vo reoaro ora sikataepa. Uva disaipel vieiaro riroepa. Oa iava riro irara pris irara vo reo vao oirao pieiva.

#### *Vo Stiven Iava Toupaivare Rera Tuukeiva*

<sup>8</sup> Oire uva Stiven vukuroepa gavaurea-ia ora gorua uvare Pauto vaaro-a tauva. Ira varao ravaa reesiro purareva ora oira porete piepa kovo tapo.<sup>9</sup> Oire oeavu okepavu iava Jiu vaaro Reo Taisi Uvupa Kepa oea oiso vaisipaiiveira oiso, Friman oea urioaepa ora oearovu vo taerero iava oiso-ia, Sairini, Aleksandria, ora Silisia, ora Esia Provins evoea oea rutu kaureoaepa Stiven-va.<sup>10</sup> Uva viapau uvuipaaepa oiso ra tarai oaro goruaro gasiive vao oa vaterева Tugoropato Uraurato rerapa vao oa iava oisoa reoreoparo.<sup>11</sup> Oire oearovu oirara vatauvira vori ragaiva, oiso ra oiso vo kuuvu puraive, “Igei Stiven

---

<sup>◇ 5:38:</sup> Mt 15:13    <sup>◇ 5:39:</sup> Ap 7:51, 9:5, 11:17    <sup>◇ 5:40:</sup> Mt 10:17; Mk 13:9    <sup>◇ 5:41:</sup> 1 Pi 4:13, 16; Jo 15:21  
<sup>◇ 5:42:</sup> Ga 1:16    <sup>◇ 6:3:</sup> Jo 21:23; Ap 1:15    <sup>◇ 6:6:</sup> 1 Ti 4:14, 5:22; 2 Ti 1:6    <sup>◇ 6:7:</sup> Ap 12:24, 19:20    <sup>◇ 6:10:</sup>  
 Lu 21:15    <sup>◇ 6:11:</sup> Mt 26:59-60

uvuiovora osa Pauto vaio toviparevora ora Moses tapo vaiterei vara piepaoro.” <sup>12</sup> Oa iava voea oira vasi irara aveave pieiva ora voeo riro tarai irara Jiu-pa irara oea rera vateiva Kaunsel irarapa. <sup>13</sup> Uva oearovu kareke pieiva kuuvuoro oiso purapaoro, “Ari ita, ro Tugoropa Tapi toviparevo ora vao Reo Taisi tapo. <sup>14</sup> ♦ Uva rera uvuiovora osa oiso puraroera, Ro-ia Jisas Nasaret iava ira vao Tugoropa Kepa Tempel verarevere, ora vo pitupituo tapo tavariorevere oa vatereva Moses vigeipa.” <sup>15</sup> Uva voea rutu Kaunsel Kepa-ia uvurupaoro rerava tuupavira vurapaiva. Uva oisi ragavira Stiven iava puaua vurapaiva sisikorevira oiso osa ensel puaaro.

## 7

*Stiven Voea Vo Reoroaro Pukooro Voeapa Siposiporeva*

<sup>1</sup> Uva ro Rovopato Pristo oiso rera akereva, “E auero rutu varao torevokopai?”

<sup>2</sup> ♦ Uva Stiven oiso puraroepa, “Araoko irara oaa, ora aite irara oaa. Ro reitoa rutu Pauto ira sisikorevira karekeroepa Ebrahim iare vigei aaotoaaro, vo osa Mesopotemia-ia toureva. Uva vo tou isivaaro iava aue iare avaroepa Haran-ia. <sup>3</sup> ♦ Uva oiso puraroepa Pauto, Rasiara oara kavuoro avau ora sara irara oara vo rasio iare oa-ia vii kareke pieavere. <sup>4</sup> Oire va iava Kaldia taere kavuoro avaroepa Haran-ia toupasa, vo uvare aitetoaaro kopiroepa. Oa iava visii iare urioroepa vo taereo-ia oa-ia toupatavo, uvare Pauto rera urio pierava voare. <sup>5</sup> Viapau oiso rerapa rasia vai vatereva Pauto auere ra oavi-ia tasipareve. Viapau rutu. Ari ita, voari tuariri uva Reo Ovoi-ia rera tavireva Pauto oiso, Viipa taru vo rasio rutu vateaverea vii ora vii aao iraraa vaiaro. Eisi osa puraroepa vo osa Ebrahim viapau oviitoa vaiaro toureva. <sup>6</sup> Uva Pauto oiso puraroepa, Ro-ia ira aao iraraaro aapaapauvira toupaive tauai rutu akukuvira kovopaoro. Ora aue tapo viria ouiverea rara tauaipa irara aue-ia vo resura vovoto (400) ivaro. <sup>7</sup> Voeao oea oisoa kovopa irara oaiive-ia pitupaive ragai voearo, oea vo vuriaro voriaro vateaverea taru voeapa, ora voeao kovopa irara oea voava kosia viro ragaipa lotupasa vuurapa vaisi purapaoro vo-ia. <sup>8</sup> ♦ Oire uva va iava voeapa reo ovoi purareva Pauto. Oa iava vao puraiva rakari verapa pitupitu vo ora voea iava. Oire voava Ebrahim Aisak kavaureva. Oa iava vo peva vataro (8) vokiro putevoiva, rera kuroreva rera rakari veraoro. Oire va iava Aisak Jekop kavaureva. Uva rera ro Jekop katai tau erao (12) arao aitearo voeao vigei aite iraraaro.

<sup>9</sup> “Voeao katai tau katai (11) arao ora voea iava araokoto oaiive-ia voriaeapa Josep rera riiriipaoro voeao oea avapaaepa Isip iare. Ari ita, Pauto oisoa rera tapo toupareve.

<sup>10</sup> Rera viria iava orirureva rera virivarioro. Ora aue tapo osa riroa tarai vatereva rerapa. Uva veartoia rutu-a ira oiso ragavira karekeroepa aue Pero osireiaro-ia ro king oaiive Isip-pa irara. Ira tore pierava Pero, oiso ra rerapa eraoparo Isip-pa irara tokipaoro ora orekerou rutu Pero vo kepaaro sovara-ia touara tapo.

<sup>11</sup> “Oire uva ovokivu-ia ogopea vuuta urioepa vore Isip taere-ia ora vo tapo Kenan taere-ia. Riroa rutua tavaka oa pou piropa vo voki-ia eva. Oa iava vigei aite iraraaro aio kasikasiaepa rutu rera-ia eera ogoeto. <sup>12</sup> Oire Jekop aioara iava uvurevoiva Isip-ia, vigei aite irara oaro arureva voea ava pieoro voare Isip-ia. <sup>13</sup> ♦ Uva eraopa vore-ia ita Josep voeapa ora karekeroepa araoko irara oaro, ro ira oisoa Isip vata tokipareve. <sup>14</sup> Oa iava Josep aiteto oureva voare evoa Isip-ia. Uva voea rutu takuvuaro uvuiaro-a voeao-ia erao vataro tau vo vavae (75) rutu. <sup>15</sup> Oire voava vararoepa Isip iare Jekop voea tapo vigei aite iraraaro. Oa iava voa kopieapa. <sup>16</sup> Oire uva oisoa voa kopiipaave, oa iava vova oisoa voea kaepaive voea tovapasa Sekem-ia aveke rikui-ia oa vorireva Ebrahim Hemo ruvara-ia Sekem-pato.

<sup>17</sup> “Uva va iava Reo Ovoi vo vuutaaro tutuu pieva vao oare Ebrahim tavireva Pauto. Osa iava ora kavakavauaepa Isrel-pa irara Isip-ia. <sup>18</sup> Oire uva iravu Isip-pato king tore pieiva ira viapau oisoa Josep-ia taraiparo. <sup>19</sup> Vuri pitupitu-ia vigei aite iraraaro ratareva vatauvira oiso pieoro vo kakaerore sikeo kakaero, oisore ra aite irara vo kakaero kavu ragapaive. Oa iava vo kakaero oisoa kopiipaave. <sup>20</sup> Uva vo vokia-a vao oa-ia Moses

♦ 6:14: Mt 26:61, 15:1 ♦ 7:2: Jen 11:31 ♦ 7:3: Jen 12:1 ♦ 7:8: Jen 17:9-11 ♦ 7:13: Jen 45:1-4

kavauroepa vearo keketo rutu oirato vo Pauto osireiaro-ia. Uva voava vo peva putevoiva kekira, rera aio vatesiva aitetoarei, vo osa veguruvira toureva. <sup>21</sup> Oire uva oisi-a oiso osa Moses kavu ragaeviva aakova, Pero oviivaaro rera oueva rera aio vatesa oiso rutu osa oira ovii kakaearo, osa rera pieeva. <sup>22</sup> Uva voava Moses riro tarai oureva Isip-pa irara vo siposiporoaro-ia. Ora riroroepa tapo aue-ia reoara ora kovoara.

<sup>23</sup> “Oire voava vo resura tau (40) putevoiva ivara, oiso rugooroepa ra araoko irara oaro kekereve Isrel-pa irara. <sup>24</sup> Oire uva iravu-ia voea iava viria karekeepa. Oa iava Moses va kekereva rera-ia. Osa iava va tuureva Moses iravu-ia Isip-pato rera tapaoro. Oa iava kopiiroepa. <sup>25</sup> Uva va iava oiso purarepa Moses ora rera ragare, Easi pasi ro araoko oiso purarovere ragaire vo osa riroa iava tavaka voea virivaria Pauto vo goruaro iavirava, Vearotoa rutu Moses. Riro virivari purato. Ira ragai tauvarevo.

<sup>26</sup> “Uva utupa visivi aitereivu-ia pouro viropa ovusa ora upopasiepa. Osa iava vaiterei sikapaoro vaiterei goruvira tavireva oiso, Ae ora eakasi. Eakere ora upopasiei? Vei araorei raga ita vao. Vorevira ora agiagisi. <sup>27</sup> Uva ro ira iravuva ora upoparoepa ira Moses peooro rerare oiso puraroepa, Auoro, irouto vii rei pierevora, oa iava vegei sikapari? <sup>28</sup> E ragai upopaari oiso osa Isip-pato pierivorao aruvea, raa? <sup>29</sup> Oire uva va iava torireva Midian-ia tousa Moses. Oa iava voa oviitoarei kavaureva.

<sup>30</sup> ♦ “Oa iava vo resura tau (40) ivaro puteva rerare. Uva purapurapato ensel rera iare pouro viropa raaka tapi vo Sinai Pukui-ia. Uva eto kasi-ia enselto karekeroepa rera iare Moses. <sup>31</sup> Uva rera-a ro kekerevoiva Moses, voavire tutuu piereva rutu, oiso ra va eveireve. Uva Pauto vo reoaro rera iare urioepa viaevira. <sup>32</sup> Oa rerare oiso puraepa, Ragai-a Pauto vii aitearo ora Turaroaro Ebrahim, ora Aisak, ora Jekop. Uva Moses uririroepa. Uva viapau vorerivira voa vurareva. <sup>33</sup> Uva Turaro Pauto rerare oiso puraroepa, Tasitauo iava eva verari tasipa, uvare Tugoropa Tapi-a vo-ia uva toupaavoi uva tasipari va-ia. <sup>34</sup> Tavaka keke iraoavora oirara oaa-ia vo Isip. Oa iava voea gauaro uvuoro vararae voea orirusa voea virivarioro. Oire vatatopou ra vii sipo piea vorevira Isip iare.

<sup>35</sup> “Ro-ia Moses irava kaureosiepa oiso puraoro, Irouto vii rei pierevora oa iava vegei sikapari vegei taapaoro? Uva rera-a ro Moses sipo piereva Pauto turarosa, ora voea tapo voeao virivarisa vao-ia tauva enselto vaaro oava pouro viropa garepa vegovi-ia. <sup>36</sup> Uva varao tapo ravoto kovoro purareva Moses Isip-ia ora avakava-ia tapo aue Ret Si. Ira rera voeao oirara tuvetuveoro raaka tapi iare voeava kosiro viropa Isip iava. Oa iava vo resura tau ivaro voa voeare puteva, osa voa voea oisoa tokipareve. <sup>37</sup> Ira-a ro Moses ira Isrel-pa irara tavireva oiso, Rera ro Pauto oavisii ira visii iava oirara profetatao vai kareke pierevereia oiso irai osa ragai. Ira taru visiipta Pauto vo reoroaro vateparevereia. <sup>38</sup> Ira raga-a ro Moses ira Isrel-pa irara gurileva raaka tapi voa voea tapo toupasa. Uva voa ro purapurapato ensel Moses gisipoaro iava reoroepa voeare. Oa iava voea vatereva Pauto vo reoaro goru reo oa viapau opesia vai.

<sup>39</sup> “Ari ita, voea vigei aite iraraaro viapau oisoa Moses vo reoroaro sirova utupaave. Uvare oisoa oiso va purapaive, Rerape. Viapau uvuipavie i ra rera uvupape, uvare orekerovu rutu vigei varaaro toupaiveira Isip-ia. <sup>40</sup> Oa iava oiso puraaepa Eron-re, Tokarasiara vai purari ora vii vavaearo-ia. Ra oeai vigei tuvetuvepaive, uvare viapau taraipaiei Moses-ia oiso, Apeisi pierevora ira vore vigei tuvetuveveroreva raaka tapi Isip iava. Ira va-ia piroroera pasi, eke. Apeisia avu pierevora? <sup>41</sup> Uva vo vokiro-ia oavu bulmakau kakae puraiva vapa tauopasa. Uva oisi-a oiso osa iava rorupaiva rutu vo kovo-ia vao oa puraiva ora voea vavaearo iava. <sup>42</sup> ♦ Uva va iava Pauto voea arova isivaroepa voeapa vaseoro. Oa iava aaviikoarapa oisoa lotupaave varao oara vuvuiua-ia toupaiveira. Oiso rutu osa vo rigato oisoa toupaive profet irara vaaro vukua-ia vao oa-ia oiso puraroepa,

‘E ragai ragapa tauopataera vo-ia raaka tapi, ovusa vo resura tau (40) ivaro visiire putevora visii vao Isrel-pa irara?

<sup>43</sup> Viapau rutu. Asi visii vo kepa Moloko vo kepaaro lotupa kepa varo kepa kaepatavora aue tapo aaviiko rera ro oiraaro Refan pauto. Ora varao tapo oisoa kaepata oara puratavora varapa lotupassa tokarasiara. Oire uva visii topa piepaavoi rara vova eisire Babilon tauai rutu.'

<sup>44</sup> "Uva vo-ia raaka tapi uva Lotupa Kepa varo kepa touva, okepa-ia Pauto oisoa ora rera vo reoaro vatepareve. Vo kepa-ia vao oava oisoa toupaise vigei aite iraraaro. Uva vo kepa-ia vao Pauto siposiporeva Moses tavioro oiso, Vo kepa purari oiso osa okepavu kekeriva. <sup>45</sup> Voeao vigei aite iraraaro oea sirova oeavu ita utuaepa vo kepa ragava vao-ia varo kepa toupasa. Uva osararovu rutu oisoa putepaive rara voea upopaive vo kepa ragava toupaprovo vao-ia, vo vuutao-ia oa-ia oisoa Josua voeapa iraparo vo viurupasa. Oa iava voeao sara irara kosi piereva Pauto voeao veraoro vigei aite iraraarova. Uva oisi-a eisi osa oisoa toupaise vava vao varo kepa Lotupa Kepa vo osa Devit toupareve. <sup>46</sup> Uva rera ro Devit ira vo tou-ia vao toupaprovo vovoou oureva Pauto-ia. Oa iava Pauto arereva oiso ra vigei reraaro Jekop reraaropa Pauto tavukia vai purareve. <sup>47</sup> Oire eva-a oa iava Solomon rerapa kepa paureva.

<sup>48</sup> "Ari ita, Pauto ro oiraopatoa rutu viapau oiso vo kepao raga-ia toupareveira oa purapaiseira vavaea-ia. Oa iava oiso puraaepa profet irara,

<sup>49</sup> 'Ragai-a Pauto ragoa vo turaroparai vuvuiua-ia ora evoa rasitoa-ia. Ari evoa rasitoa-ia tasipaavoi voa paupaoro. Uva apeisi ragavira uvuipatai ra ragaipa kepaa vai pauta? Uva aa vo tavukio-ia vao oa uvuipai vao oa-ia toupavereea turaropaprovo?

<sup>50</sup> Varao-ia oiso-ia vuvuiua ora rasito oara rutu ragai raga puraava ora ragai vavaearo iava. Uva apeisi-a? Oiraopavira-a oiso osa purarai?"

<sup>51</sup> "Visii vao-ia visiigoa viapau oiso uvupataveira. Visiigoa oiso rutu toupataveira osa voeao ratau tou irara oea-ia viapau oiso oirao pie vovoouro vai toupaiseira vo sopaura oaiive sovara-ia. Uva visii-a vao visiigoa Tugoropato Urauratoare korukorupataveira vo pitupituro purapaoro osa vara oisoa purapaise visii aite iraraaro tuariri." <sup>52</sup> Uva va-a vao oa iava oiso voeao akereva Stiven, "Irouto-a profet irara iava rera ira kavuiva visii aao iraraaro? Viapau oiso iraiei ira kavuro viropa vaopa vuri vovoou oa puraiva rera-ia. Ora voeao voeao upoiva oea Torevoko Vovouto vo raivaaro aviavi pieiva. Ro Tugoropato ira urioroepa, ira outavora kuuvu pitupitu-ia rera kopii piesa. <sup>53</sup> Visii vao visiigoa Pauto vo reoaro outavora pisavira enselpa irara ruvara-ia. Uva viapau oiso vo reo sirova utupataera." Eisi osa rutu voeare puraroepa Stiven.

### Stiven Vurokoiva Aue-ia Aveke

<sup>54</sup> Vo reoro rutu voeao vovoouro togava. Oa iava rirovira voeao iava gisipoara keikei piropa rirovira kasipuoro rerare. <sup>55</sup> Ari ita, Stiven aue-ia Tugoropato Uraurato vukuroepa. Oa iava tuupavira vuvuiua taraareva. Uva voa Pauto vo sisikorearo kekereva ora Jisas tapo, ovusa Pauto oirapapa varataaro-ia toreparoepa. <sup>56</sup>  $\diamond$  Uva voava Stiven vao-ia oiso puraroepa, "Oiraopavira rutu vuvuiua kekeavoi oa karuvira toupavoi. Uva rera tapo kekeia Ropotoaro Oiraopato ira oirapapa varata-ia toreparoi Pauto vararo-ia."

<sup>57</sup> Oa iava kokiara tupaiva vo gaupaoro kasipupaoro rerare. Osa iava rerare vusi ovoiiva. <sup>58</sup>  $\diamond$  Oa iava oearovu voeao iava kuvupara oaiive ririvuoro vara guruiva ro ruvara-ia rera vaisiaro, Sol. Uva voeao evaea oea rovovira rera reroaro rovoiva aue-ia kort oea rera rovoiva rera vurukooro. <sup>59</sup>  $\diamond$  Oire vo osa rera vurokopaiva aue-ia aveke. Oa iava variriroepa oiso puraoro Jisas-re, "Turaro. Ragai urauraaro kae pieri." <sup>60</sup> Uva voava takuro viropa oiso goruvira rutu keerasa, "Turaro. Opeita vao vuria voeapa reesiri, oiso ra utupaua va tuuri voeapa." Oa-a vao oa isivaaro iava kopii ovoiroepa vovoouisi vaseoro.

Uva vo voki-a vao oa-ia vao riroa rutu tavaka karekeepa vo lotua-ia Jerusalem-ia. Oa iava voea rutu voava sikaa viropa ora rigaoro vorarore oiso, oearovu Judia iare, ari oearovu Sameria iare avaaepa, ovusa voea raga aposel irara voa kavua viropa Jerusalem-ia. <sup>2</sup> Uva voa rera tovaiva Stiven voea voeao riro oirao pie vovou irara. Uva voa tovaoro gau eraro-ia gaupaiva rerapa. <sup>3</sup> ♦ Ari ro Sol ira oisoa lotupa irara rutu vuri piepareve, ira kepaara rutu-ia koatapaoro oisoa oirara ora riakora oupareve voea tovopasa tuukepa kepa-ia.

#### *Vearo Siposipo Vao Oa Viriva Sameria-ia*

<sup>4</sup> Oire uva lotu purapa irara torioro avaaepa vorarore oiso-ia, Judia-ia ora Sameria-ia. Uva voa siposipooro oisoa vokapaive aue iava Vearo Siposipo voraro ruture. <sup>5</sup> Uva Filip vararoepa riro urui iare vao Sameria-ia voea tavitavisa Krais iava ro Ropoto. <sup>6</sup> Vo ovusa voea rutu vaea vovou raga-ia toupaoro rera siposipoaro sirova utupaaepa. Vo osa voeapa siposipopareva vearo reo vatepaoro voeapa. Ora oaravu tapo oara kekeiva rera-ia oira porete piepa kovoro. <sup>7</sup> Riro irara tugura oea kosi piererva ro-ia Filip, ovusa riro guruko purapaiva gaupaoro oirara iava kosi virooro. Oearovu rutu oearoa-ia oisoa rikerikepa kopiilo toupaive, ora voeao oea iava kokotoara oisoa kopiipape oearoa rutu vearo piererva. <sup>8</sup> Oa iava rirovira rutu roruiva vo uruia.

<sup>9</sup> ♦ Ovusa iravu ro-ia rera vaisiaro, Saimon ira keakea kovoro oisoa purapareve pisavira rutu oirara keakeapaoro voeao Sameria-ia tou irara. Uva oisoa ora rera raga ora rei vaisi pieparo vo uruia. <sup>10</sup> Uva voea rutu oisoa oira vasi irara rera sirova utupaave ora voearo oiraravi raga. Oa iava voeao oiso puraaepa, “Avoeao ro-ia gorutoa rutu Pauto reraaro Saimon.” <sup>11</sup> Uva voea rutu oisoa rera sirova utupaave, rara rirovira rutu voea keakeapareve. <sup>12</sup> Ari ita, vo osa Filip vo siposipoaro oirao pieiva vao Vearo Siposipo aue iava Pauto vo Saraaro ora Jisas vo vaisiaro goruaro, uva voea rutu oirara ora riakora baptaisa ouiva. <sup>13</sup> Uva va iava rera tapo Saimon oiraoroepa rarioro. Oa iava baptaisa oureva. Oire uva va isivaaro iava oisoa Filip tapo toupareve vokiara rutu-ia Saimon. Oa iava vo tou-ia varao-ia tarairoepa ravoto kovoro ora varao tapo ravaa reesiro. Uva rirovira rutu rugorugooroepa varare varao-ia ravoto kovoro.

<sup>14</sup> Oire vo osa aposel irara vao iava uvuiva vo uvare Sameria-pa irara Pauto vo reoaro ouiva. Oire va iava aitereivu sipoiva Pita vaio ora Jon Sameria iare. <sup>15</sup> Uva voa pousi viropa. Oa iava voeapa variri rovosiepa areoro Pauto ruvara-ia oiso, “Tugoropato Uraurato vara pierivere voeapa.” <sup>16</sup> ♦ Aue iava uvare viapau voea sopapro-ia toupareva Tugoropato Uraurato. Ari ita, Jisas vaisiaro sovara-ia baptaisa ou ragaiva. <sup>17</sup> Oire uva va iava vavaeara oaei tovosiva voea-ia. Oa iava voea iare Tugoropato Uraurato vararoepa.

<sup>18</sup> Uva ro-ia Saimon ira vaiterei siituereva aposeltoarei osa vavaeara oaei-ia Tugoropato Uraurato vara piepasiva voea iare. Oa iava oiso puraroepa vaitereire, <sup>19</sup> “Ari oiso ruipaparai ra ragai tapo vo goru vao-ia voria vei ruvara-ia, oiso ra va-ia oearoi iare ragai tapo rera Tugoropato Uraurato vara piepaa oearo-ia vavae oaa tovopas.”

<sup>20</sup> ♦ Oa iava Pita rerare oiso puraroepa, “Avoeao, apeisi ragavira rugorugoopau? E uvuipauei ra vatevatearo Pauto vorevira voriri? VII ora monia oara oa tapo opesiuvure taru kopiioro. <sup>21</sup> Auoro. Viapau oiso uvuipauei, uvare sopaua oara tauaivira toupaiveira Pauto-pa. <sup>22</sup> VII vao-ia ora poreu vuri vovou oara iava varirioro. Osa iava Pauto uvuipa ra vii vaaro vuri vovou verareve. <sup>23</sup> Oiraopavira rutu vii iava sopaua sisropaa oua vukuepa aue iava riroara rutu vuri vovouro vii vararo. Uva vii-ia ora goruepa vii vararo vuri vovouro vii-ia pituoro.”

<sup>24</sup> Oa iava Saimon oiso puraroepa vaitereire Pita vaio ora Jon, “Turaro iare variris iragaipa tauva areoro. Ra oisi iava viapau vao karekepe ragai-ia oiso osa purasiei ragaire.”

<sup>25</sup> Oire vo kovoro opesiaro isivaaro iava karesiepa Jerusalem iare, uvare voeapa aviavi pievira tavitavisiepa Pauto vo reoaro iava. Uva vo osa karesiepa oa iava vo raivao-ia ouruirovu-ia pousi viropa voeapa ita siposiposa vo uruiro-ia va raga iava Pauto vaaro Vearo Siposipo voa raga Sameria taere sovara-ia.

♦ 8:3: 1 Ko 15:9; Ga 1:13; Fl 3:6; 1 Ti 1:13    ♦ 8:9: Ap 13:6, 5:36    ♦ 8:16: Ap 19:2; Mt 28:19    ♦ 8:20: Mt 10:8;  
2 Kin 5:16

*Filip Vaio Iava Ora Ro Itiopia-pato*

<sup>26</sup> Oire uva Turaro reraaro ensel Filip-re oiso puraroepa, “Vatatopou, ra varau vo raivao-ia vova Jerusalem iava vore Gasa-ia vo raivao-ia oa raaka tapi-ia toupaiveira.” <sup>27</sup> ♦ Uva va iava vatatoporoepa varasa, ovusa vo voki-a eva vao-ia iravu Itiopia iava, rera Kwin Kandesu reraaro reito ira oisoa oira vo monia tokipareve, ira urioroepa Jerusalem iare voa lotu purasa. <sup>28</sup> Uva vo voki raga-ia kareroepa voava aue-ia karis rakorako. Uva va-ia paupaoro profet Aisaia vo rigatoaro vieipareva. <sup>29</sup> Uva va iava Tugoropato Uraurato oiso puraroepa Filip-re, “Tutuu pieri karis rakorako iare.” <sup>30</sup> Oire uva voa pouro viropa va iare ikauoro. Oa iava Filip rera uvureva vo osa profet Aisaia vo rigatoaro vieipareva. Osa iava oiso rera akereva, “E va-ia taraipau eva oa iava va vieipaari?”

<sup>31</sup> Oa iava oiso puraroepa, “Viapau. Uvare irai ragaipa va aviavi piepareveira?” Oa iava Filip-re oiso puraroepa, “Vore kaeu viro ragai tapo paua.”

<sup>32</sup> ♦ Oire vo vuutaro-a varao-ia oara oiso toupai vo vuku iava vao oa vieipareva, ‘Rera ava pieiva oiso osa sipsip kare oisoa kopii piepaive. Ra viapau vo kakae eva sipsip kakae oivepe vo osa oirato va oruaro siipareve. Eisi osa ro oirato ira viapau oreovu avu vai purareva osa rera-ia vuria puraiva vao.’

<sup>33</sup> Uva vo osa rera arii pieiva rera-ia vakuvakupaoro, uva viapau oiso irai voea iava oiso puraroepa, Rerape, uvare torevokoto-a eera. Uva iroutoa vai uvuiparoi ra varao vuri vovouro oaive vieireve voeao iava vo vokio iavapa irara. Evara vuri vovouro oara rera tootooaro ouiva rera kopii piesa vo rasio-ia.’

<sup>34</sup> Uva va iava ro-ia reito Itiopia-pato oiso puraroepa Filip-re, “Irouto-a ro ira iava sипосипаре ro-ia profetato. Ora rera raga iava-a, eke iravu raga?”

<sup>35</sup> Oire uva Filip Vearo Siposipo rovoreva rera soporesa aue iava Jisas vo rigato raga iava Aisaia vo rigatoaro. <sup>36-37</sup> ♦ Uva vaiterei avasiepa vo raivao-ia. Oa iava vo pouzi viropa vao-ia uuko rovu. Uva ro Itiopia-pato oiso akereva, “E oavu avu vaiei ragai-ia oa iava viapau uvuiparai ra baptaisa oua vao-ia uuko rovu?”

<sup>38</sup> Oire vo reo uvuoro karis rakorako ruu pierava va goto pieoro. Uva va isivaaro iava varasiepa aue iare uuko rovu vaiterei vaitereo Filip vaio ora Itiopia-pato. Oa iava voa Filip rera baptaisreva Itiopia-pato. <sup>39</sup> ♦ Uva voava kaesi viropa vorevira. Oa iava sita pievira Turaro Pauto Urauratoaaro Filip kaereva vorarore. Osa Itiopia-pato viapau rera-ia tarairoepa vo osa voraro rerava avaroepa. Uva avaparoepa rera raga Itiopia-pato raivaaro rorupaoro rutu. <sup>40</sup> Uva Filip Asdot-ia pouro viropa. Uva voa vokapaoro vo uruiro-ia sипосипаре. Ari va isivaaro iava avaroepa Sisaria iare.

9

*Pol Porereva Vo Damaskas Raiva*

<sup>1</sup> Ro-ia Sol touvira rutu oisoa gasipareve Turaro voeaaro disaipel irara upopaoro. Uva oisi-a eisi osa iava avaroepa Rovopatoa iare Pristo <sup>2</sup> rera aresa varaore rigatoara, oisore ra raiva oaro rerapa karu piro vore Jiu varaaro iare Reo Taisi Uvupa Keparo Sinagog, varaor oara oisoa toupaive Damaskas-ia. Oiso ra voa oearoi kekereve voearo oearoa Turaro vo raivaaro sirova utupaave Airepa Tootoo oupa raiva. Oire voea oureve voea tuukeoro kepa iare Jerusalem-ia. <sup>3</sup> ♦ Uva vo osa avaparoepa Sol raiva-ia vao Damaskas, uva tutuu pierava voa ovusa aviavia varaepa vuvuiua iava rera ruusa. <sup>4</sup> Oa iava koveroepa vo rasitao-ia vo reo uvuoro oreoa oiso puraepa rerare, “Sol, Sol, apeisi iava ragai vuri piepariveira vokiara rutu-ia?” <sup>5</sup> Oa iava oiso akereva, “Turaro, irouto-a vii?” Uva Turaro oiso puraroepa, “Ragai-a Jisas ragoa upopariveira vokiara rutu-ia. <sup>6</sup> Uva vii tavipaa oiso, Toreu ra avau vo uruio iare oa-ia iravu vii tavirevere ragai iava vaore oa-ia uvui iraopauvere oiso ra va purari.”

<sup>7</sup> Vo osa voeao oea rera tapo avapaaepa oea ruruvutu ragaaepa voka tuuke pieoro, uvare oiso auepaaepa, Apeisi vai ragavira reoreopave. Uvare viapau rera kekepaiva ro

♦ 8:27: Sam 68:31; Jo 12:20   ♦ 8:32: Ais 53:7-8   ♦ 8:36-37: Ap 10:47   ♦ 8:39: 1 Kin 18:12; 2 Kin 2:16

♦ 9:3: Ap 22:6, 26:12; 1 Ko 15:8

ira reoreoparoepa auere Sol. <sup>8</sup> Oire uva voava Sol toreroepa rasiua arova. Oa iava aauvira vurareva. Uva viapau oiso irai kekereva, uvare osireitoarei rerare aausiepa. Oa iava rera kapokaporopaoro rera tuvetuvepaoro poua viropa aue-ia Damaskas-ia. <sup>9</sup> Oa iava vo pevaaue voki peva voosivira raga toureva, ora aio asavira, ora ukaio asavira tapo.

<sup>10</sup> Oisi-a eisi osa iravu disaipelto toupareva Damaskas-ia rera vaisiaro Ananaias. Ira kuu piereva Turaro areo uusi-ia oiso puraoro, "Ananaias." Oa iava Ananaias oiso puraroepa, "Ragai-a vao-ia." <sup>11</sup> Uva Turaro rerare oiso puraroepa, "Toreu ra avau vao-ia raiva va vaisiaro, Torevoko Raiva. Uva evoa akerivere auere Sol ro vova Tasas, ira epao Judas vo kepaaro-ia uva variripa tauvare areparoi. <sup>12</sup> Ira areo uusi-ia vao kekerevorao, ovusa vii Ananaias rera osireiaro-ia vavae tovoparivorao rera vura piesa vorevira."

<sup>13</sup> Oa iava Ananaias rera vo reoaro pukooro oiso puraroepa, "Turaro, ro iava uvuavora riro irara rutu iava, vo osa oaravu kaureo vovouro puraparevora oearovu-ia vii voeaario-ia oirao pie vovou irara vo Jerusalem-ia. <sup>14</sup> Ira uvuipa ra igei rutu tapo tuukereve, igoa vii vaisiaro sovara-ia kovopaioveira. Uvare vo rigato kaepareveira raiva purapa rigato oa ourevora Rovopato Pristo ruvara-ia."

<sup>15</sup> ♦ Uva va iava Turaro rerare oiso puraroepa, "Avau, uvare ro reesiavora ora ragaipa ira ratau tou irara, ora oearovu Isrel-pa irara, ora king irara tapo, ora turaro irara oearoa rutu taru sipoisporevere ragai iava. <sup>16</sup> Ira kareke pieavere siitoka-ia, uvare ragai iava sipoisporevere."

<sup>17</sup> Oire uva avaroepa Ananaias vo kepao-ia koatasa oa-ia Pol toupareva. Oa iava oiso puraroepa ora rera vavaearo tovooro rera-ia, "Araokotoa oaa, Sol. Turaro Jisas ira vii iare karekeroerao vo raivaaro Damaskas ruvara-ia vo osa uriopauerao. Ira ragai sipoirevoi vore vii vorevira vura piesa vii porete pieoro, ora auere tapo ra vukuuvere aue-ia Tugoropato Uraurato." <sup>18</sup> Uva vo voki raga-a vao oa-ia verutara rera osireiaro iava kovekoveepa. Oa iava varare rorooro vearovira vurareva. Oa-a eva oa iava toreroepa. Osa iava rera baptaisiva. <sup>19</sup> Vo raverave eva isivaaro iava gorua oureva vorevira, uvare aioara aioreva.

### *Sol Sipoisporeva Damaskas-ia*

Oire voava Sol touvira raga toupareva Damaskas-ia disaipel irara ruvara-ia. <sup>20</sup> Uva vo vokia-a vao oa-ia sipoisipo rovoroepa Jiu vararo-ia Reo Taisi Uvupa Keparo Sinagog keparo oiso purapaoro, "Ro-ia Jisas Pauto Oviitoaro." <sup>21</sup> Uva oisi-a oiso osa iava rirovira rugorugooaepa, vo uvare va-ia eva rera uvuiva. Uva oiso puraaepa, "Avoeao! E rera-a ro-ia ira Jisas kovopa iraraaro upopareveira Jerusalem-ia? Uva viapau oisi piesa urioroi ita vore osa oisoa voea tuukepaoro voea sipopareve aue iare Rovopato Pristo?"

<sup>22</sup> Vo osa rugorugooa oaro goruaro riroepa rerare Sol. Oa iava voea Jiu-pa irara voeo Damaskas-ia tou irara oea vavagisi piereva, uvare Jisas oiraopavira poerareva voeapa oiso purapaoro, "Krais-a Ropoto ira reesireva Pauto oiso rutu, Rerapa Kovopato."

### *Sol Jiu-pa Irara Asavira Torireva Vokiaro*

<sup>23</sup> Ovokirovu isivaaro iava voea Jiu-pa irara ora guruaepa, oisore ra rerare raiva vaire taraaive rera kopii piesa Sol. <sup>24</sup> ♦ Vo ovusa voea vovouaro-ia tarai ovoiroepa rera Sol. Uva kasura rataoroaro-ia oisoa uutupaave vokiaro rutu-ia avi vokiro-ia ora vokiaro rera uposa. <sup>25</sup> Oa iava orupavu-ia vokiaro aue disaipel irara rirova-ia pekuri rera vara pieiva rera pute pieoro kasura kukuearo iava. Oa iava voava torireva.

### *Sol Jerusalem-ia Toureva*

<sup>26</sup> ♦ Oire vo osa Jerusalem-ia pouro viropa uva oiso aueparoepa, ra oearovu tapo disaipel irara ora takuvuro. Oa iava evoea rera roruorupaiva oiso purapaoro, "Easi ro vigei keakeapare. Viapau oiso iravu-a vigei iava disaipelto." <sup>27</sup> Oa iava aue Banabas rera oureva rerava avasa aposel irara iare. Oa iava oiso voea tavireva rera iava, "Ari ita, oiraopavira Turaro kekerevora. Uva Turaro rerava ora reoroera. Ora vo osa Damaskas-ia toupaoro voea goruvira sipoisporevora vo Jisas vaisiaro-ia." <sup>28</sup> Oire va isivaaro iava

♦ 9:15: Ap 13:2; Ef 3:7-8; Ga 2:7-8    ♦ 9:24: 2 Ko 11:32-33    ♦ 9:26: Ap 22:17; Ga 1:17-18

aye Sol voea tapo ora takuvuroepa voea tapo toupasa vokiara rutu-ia Jerusalem-ia. Uva voa uriri asavira siposipopareva ae iava Jisas Turaro vaisiaro. <sup>29</sup> ♦ Uva va iava voa ora reoparoepa oearovu tapo Jiu-pa irara voeao oearoa oisoa Grik-pa reo-ia reopaave. Vo ovusa voea rirovira rutu ruipapaaepa oiso ra raivaa vai rerare kekeive oa-ia rera kopii piesa. <sup>30</sup> Vo ovusa va-ia taraioro oeavu oirao pie vovou irara rera vara pieiva vore Sisaria. Oa iava voava rera sipoiva ae iare Tasas-ia.

<sup>31</sup> Uva voeao lotupa irara oisoa vearovira rutu gavaurevira toupaise vo Judia-ia, ora Galili-ia, ora Sameria-ia. Oire va iava Turaropa avivikepaoro lotupa kovo-ia goruaepa. Oa iava ora rigaaepa riropooro ae-ia tauvaaro vao Tugoropato Uraurato vaaro.

#### *Pita Inias Porete Piereda Vo Lida Urui-ia*

<sup>32</sup> Uva ovokivu-ia Pita vararoepa vokapaoro voeao kekesa oea oisoa Jisas oirao piepaise ae-ia Lida urui-ia. <sup>33</sup> Vo osa voa pouro viropa uva iravu kekereva rera vaisiaro, Inias. Irare puteva vo peva vatara ivaro (8) rutu osa kerauvira raga toupareve urua ivara-ia. <sup>34</sup> ♦ Oa iava Pita rerare oiso puraroepa, “Inias, Jisas Krais vii porete piepare vorevira, ra toreu. Ra urua oara torevokori.” Oa iava toreroepa Inias. <sup>35</sup> Vo osa voearo rutu vo uruiro iava voa toupaiwa oiso, Lida vata ora Saron vata oearoa rutu-a voeao oea va rera-ia ro-ia kekeoro ora voea iava sopaura oaive rutu poreiva. Oa iava rera sirova oisoa utupaave Turaro.

#### *Dokas Vorevira Tootoopa*

<sup>36</sup> Oire iriavu-a o riakova disaipelva Jopa vata iava oira. Iria vaisiaro, Tabita. Uva Grik vo reoaro-ia oiso, Dokas. Riro tauva purava rutu. Iria oisoa riropo kovoro vearovpara purapaeve orekerovu vate ragapaoro apota irarapa. <sup>37</sup> Uva ovokivu-ia upia oira ouva, oa iava kopiiopa. Oire va iava vo kopii sisuiva oira tovosa ivaraiapa tugi-ia kepa-ia. <sup>38</sup> Uva Pita-re aruaepa, uvare oisoa Lida urui-ia tutuu pievira toupaise Jopa-ia. Eva-a oa iava voare aitereivu aruiva Pita ou piesa. Oa iava oiso rera tavisiva, “Ikauvira raga vegei sirova uriou, ra vorevio.” <sup>39</sup> Uva Pita tapo voresiepa. Oa iava voa pouro viropa. Uva rera ipa pieiva vo tugi iare vao ivaraiapa tugi. Uva voa rera kareke piepaoro rарoe riako gaupaiva varoara-ia oara oisoa purapaeve Dokas, vo osa oisoa tootoovira toupaeve vairo tapo vo kovo purapoaro. <sup>40</sup> ♦ Oa iava Pita vairo rutu kosi piereda rataure. Uva kotupiuarei rekuoro variriroepa. Oire voava ora poreroepa vo kopiiire oiso purasa, “Dokas, toreu!” Oire va isivaaro iava eva osirei kae pieoro porete ovoiopa tokoruosa Pita vurapaoro. <sup>41</sup> Uva oira vavaearo-ia pituoro oira tote piereda. Oa iava voeai ruture lotupa irara keeraroepa ora vairo rарoe riako. Oa iava oira kareke piereda voeapa, uvare toopa vorevira. <sup>42</sup> Oire va-a vao oa-ia taraiaina voeao Jopa-ia tou irara iava, oearovu rirovira rutu Turaro oirao pieiva. <sup>43</sup> ♦ Uva Pita voa toureva Jopa-ia riro vokiro rutu-ia iravu tapo ira oisoa bulmakau rakariro gagopareve vara purapasa. Rera vaisiaro, Saimon.

## 10

#### *Pita Vaio Iava Ora Koniliias*

<sup>1</sup> Iravu rera vaisiaro, Koniliias ira oisoa toupareve Sisaria-ia katai vovoto (100) tuvetuvepato viurupa irara. Uva voeao ae iava Itali ratau tou tapi. <sup>2</sup> Ira oisoa Pautoapa avivikeparo rutu veartoia rutu lotupato ora ovii avao oaro. Riro vatevate vovouto oearovu rutupa apota irara. Ora oisoa tapo variriparo vokiara rutu-ia Pautoa-re. <sup>3</sup> ♦ Oire uva ovokivu-ia vo peva vuuta-ia (3 klok) ovaiarovi Pauto reraaro ensel kekereva, ovusa koataparoepa rera iare oiso purapao areo uusi sovara-ia, “Koniliias.”

<sup>4</sup> ♦ Oa iava tuupavira rerava vurapareva uriripaoro rerapa. Uva oiso puraroepa, “Eake-a, Turaro?” Uva oiso puraroepa enselto rerare, “Vii vararo variriara pou piropa Pautoa iare, ora vii vaaro tapo vatevatea vovou apota irarapa. Oarare rugorugooparoveira Pauto viire. <sup>5</sup> Uva oeai arupari Jopa iare eerare Saimon rera raga Pita, ra urioro vore. <sup>6</sup> ♦

---

◊ 9:29: Ap 6:1, 11:20; 2 Ko 11:26    ◊ 9:34: Ap 3:6, 16, 4:10    ◊ 9:40: Mt 9:25; Ap 7:60; Mk 5:41-42    ◊ 9:43: Ap 10:6    ◊ 10:3: Ap 9:10, 3:1, 5:19    ◊ 10:4: Ap 3:4; Re 8:4; Mt 26:13    ◊ 10:6: Ap 9:43

Ira epao tavetevira iravu ruvara-ia Saimon, ira bulmakau kare rakariaro gagopareveira. Ira vo kepaaro avakava ruvara-ia toupaiveira. Pita vii tavirevere rara oiso osa pierivere rara.”<sup>7</sup> Va isivaaro-ia purapurapato ensel rera arova voreroepa. Oa iava aitereivu oureva kovopatoarei ora iravu tapo upo purapato vearto lotupato. Uva rera oisoa Koniliias vearovira tauvapareve.<sup>8</sup> Oa iava enselto vo reoroaro iava voea tavitavireva voea aruoro Jopa iare.

#### *Pita Orekerovu Kekereva Areo Uusi-ia*

<sup>9</sup> Utupa voki-ia vo urui iare tutuu pieiva evoea oira peva, ovusa Pita ivaraiapa tugi-ia varirisa kaero viropa rirotoa-ia ravireo.<sup>10</sup> Uva voa rirovira ogoeroepa aio ruipapaoro. Vo osa oeavu aioara rerapa ravaapaiva, ovusa rurapareva.<sup>11</sup> Evo rura oa sovara-ia areo uusi oureva. Ovuipa-ia aue vuvuiua kekereva ovusa karu piropa. Uva vo karupaiia varapaepa aue varuere koko. Oiso osa oearovu varo kovero europaiveira. Eisi osa rutu vo koko kekereva osa varapaepa vore rasito.<sup>12</sup> Uva vo koko sovara-ia okarerovu sasararo touva oiso-ia, okarerovua vokapa karero, ari okarerovu riruvira ora voea ragaia vokapaiveira rasittoa-ia, ovusa okarerovu oea papapaiveira.<sup>13</sup> Oa iava vo reo oiso rera iare urioepa, “Auoro Pita. Toreu ra vo kareo upori. Ra vo kare aiori.”<sup>14</sup> Ovusa Pita oiso puraroepa, “Viapau rutu Turaro, oiso ra vo kareo iava irai aioa. Uvare vuivuievo karea okareropapeira vo-ia Jiu-pa irara vaaro sovara-ia Reo Taisi vo karepa kavupasa.”<sup>15</sup> Oa iava vo reo oiso ragavira ita urioepa Pita iare, “Vosa vo karero-ia okarea purareva Pauto vearovira rutu, uva vii viapau uvuipaei ra oiso purau vo karere, Vuri kare vao-ia Jiu-pa irara vaaro Reo Taisi varuere karepa kavupa.”<sup>16</sup> Uva vo peva-ia aue areo uusi peva vara kekepareva. Oa iava vo peva isivaaro iava vo koko rutu vorevira kae piropa vuvuiua iare.

<sup>17</sup> Oire vosa evara vorearo isivaaro iava Pita rirovira rutu oiso rugorugooparoepa, Apeisi rutu vao porearo toupaivoi? Vo ovusa evoa oira peva Saimon vo kepaarore akepaiva vo kepao-ia toupareva Pita. Oa iava poua viropa opevaar arureva Koniliias rerare Pita vo kepa rataoaro riaaro-ia.<sup>18</sup> Oa iava vo peva eva oiso puraaepa, “E Saimon-ei vo ira vaisiaro ro-ia, Pita?”<sup>19</sup> Oire va iava Tugoropato Uraurato oiso puraroepa rerare vo osa touvira rugorugooparoepa areo uusire, “Evo peva oea viire akepaivoi.”<sup>20</sup> Toreu, ra voea iare varau. Opeita vao-ia roruorupari. Viapau oiso ra vii tuukepaise, ra voea tapo avau. Ari ita, ragai raga viire vo peva aruavo.”

<sup>21</sup> Vao isivaaro iava Pita voea iare vararoepa oiso purasa, “Ragai-a vao ragoare taraapata. Eakere uriotai?”<sup>22</sup> Oa iava oiso puraaepa rera iava tavioro Koniliias, “Ro-ia irapato ira katai vovotopa (100) viurupa irarapa iraparoveira. Vearo vovoutoa rutua, uvare Pautoa-pa avivikiparoveira Oa iava Jiu-pa irara rera vaisipaiseira oiso, Vearo vovoutoa rutu. Uva Pauto reraaro ensel ira rera tavireva oiso, “Pita-re aruu, ra urioro. Ra rera uvuri.”<sup>23</sup> Uva va isivaaro iava Pita voea koata piererva kepa-ia. Oa iava rera tapo touiva voa tavetevira vokiaro. Uva utupa voki-ia voea tapo avaroepa ora oeavu oirao pie vovou irara Jisas-ia voava vo Jopa-ia.

#### *Pita Koniliias Vo Kepaaro Iare Avaroepa*

<sup>24</sup> Ovokivu-ia poua viropa vo Sisaria-ia, vo ovusa Koniliias voa voeare tueparo ora rera voavaoaro, ora vate irara oaro tapo.<sup>25</sup> Oire vosa Pita Koniliias vo kepaaro-ia koataroepa. Uva Koniliias rerapa avivikepaoro rerare takuro viropa kotupiurei rekuoro.<sup>26</sup> Oa iava Pita rera tore piererva oiso puraoro, “Ae! Eaketo-a ragai? Easi ragai-a oiratoa raga. Viapau oiso pautoa-a ragai.”<sup>27</sup> Oisi-a eisi osa ora reopaoro koatasiepa atoaro ruture oearovu oirara riro irara kekepaoro, ovusa ora gurupaaepa voa.

<sup>28</sup> Oa iava oiso puraroepa voeare, “Visii rutu vao-ia taraiapatai Jiu vo pitupituaro oa oiso toupaiveira. Viapau irai uvuiparoi Jiu-patoa vai ra osararovu raga iava iraiva uvururo tavetetua vai, uvare viapau oiso Jiu vaaro eva. Ari ita, Pauto ragai tavirevora areo uusia, oiso ra viapau uvuiparai ra vo pitupituo oirao piepaa igei vaaro Jiu, oa oisoa purapaive

<sup>7</sup> 10:10: Ap 22:17    <sup>8</sup> 10:11: Ap 7:56; Re 19:11    <sup>9</sup> 10:14: Lev 11:4, 20:25; Diu 14:3, 7    <sup>10</sup> 10:15: Ro 14:14; 1 Ko 10:25    <sup>11</sup> 10:26: Ap 24:14-15; Re 19:10

voeapa Reo Taisipa sopaipa irara, Visii-a vuri irara. <sup>29</sup> Oire vao oa sirova uriorai visii iare ikauvira, uvare ragaire arutaerao. Viapau oiso oavu avu vai-ia rugorugoopaoro uriorai visii iare. Oire uva eake vaipa ruipaoro ragaire arutaerao?”

<sup>30</sup> ♦ Oire va iava Koniliias oiso puraroepa, “Ari ita, vo resura aue voki putevoiva vo vuutaore vo peva vuuta (3 klok) ovaiaroví oa-ia variriparaera, osa sita pievira urioroera oirato ragai iare. Ira varaaro sisikorevira tourevora. <sup>31</sup> Uva ragaire oiso puraroera, “Koniliias, variria oara uvupareveira vii varaaro Pauto. Ora vao tapo vatevatea vovou apota irarapa vii vaaro oare tapo rugooparoi. <sup>32</sup> Uva oiso vovouparai ra Saimon Pita-re aruu Jopa-ia. Ira Saimon vo kepaaro-ia toupare tavetevira vo kepao oa avakava sirova toupaiveira, bulmakau rakariro gagopato vo kepaaro. Uva vosa rera Pita uriorovere, ra vii tavireve. <sup>33</sup> Uva vo voki raga-a eva oa-ia viire aruraerao. Ari ita, uva vearo vovoutoa rutu-a vii, osa iava ikauvira uriou ragai iare. Oire ra vigei rutu vo toupe Pauto osireiaroia. Ra igei taviri rara vo reoro iava oara igeipa vaterevora Turaro Pauto viipa.” Eisi osa puraroepa Koniliias.

#### *Pita Koniliias Vo Kepaaro Sovara-ia Reoreoroepa*

<sup>34</sup> ♦ Oa iava Pita siposipo rovoroepa voeapa oiso puraoro, “Oiraopavira rutu oiso ragavira taraiparai vokio-ia, Viapau oiso rovirieivira Pauto vo vovouaro toupaiveira vo osararovu rutupa. <sup>35</sup> Vosa eake sara iava irouto Pautoa-pa avivikeparo ora torevoko vovou purapareve, ira-a eera oiratoaaro Pauto. <sup>36</sup> ♦ Visii rutu vao-ia taraipatai vo reo-ia oa vaterева Pauto Isrel-pa irarapa. Oa-ia Jisas Krais iava gavaurea taviroepa vao sovara-ia Vearo Siposipo [oirara rutu reraaro Turaro]. <sup>37</sup> Vo reoro-ia oreoroa kosi piepaiveira Judia iava oara rovoepa vova Galili taere-ia aue isivaaro iava oiso osa siposiporeva Jon vo ora rera vaaro-ia baptaisa. <sup>38</sup> Ora oiso tapo osa vo siposipo aue iava Jisas ro vova Nasaret, uvare rera iare Tugoropato Uraurato vara pierava Pauto ora riroa gorua, vo osa Jon rera baptaisreva. Jisas ira virireva vokaoro vearopara rutu purapaoro ora oirara rutu porete piepaoro voearo oearoa-ia pituva Seten vo goruaro. Oara purareva Jisas, uvare oisoa Pauto rera tapo toupareve. <sup>39</sup> Vara rutu varao kekeiovora oara puraparevora vo Judia taere-ia ora Jerusalem-ia. Uva rera kopii pieoro rera tapaivora evao parikou-ia Jisas. <sup>40</sup> Rera raga ita ira tore pierrevora Pauto aue-ia vo pevapa voki. Oa iava rera karekerevora oirarapa. <sup>41</sup> ♦ Ari ita, viapau oiso oirara rutupa. Ari igei raga igoa rereesireva Pauto tuariri igoa rera iava tavitavipaioveira. Igoa rera tapo aiopaiovora ora ukaiopaiera rera torearo isivaaro-ia, vo osa kopii tapiva voreroera. <sup>42</sup> ♦ Ira oiso igei tavirevora goruvira rutu, Ava iraopatai oirara rutupa siposiposa oiso, Ro-ia kataitoa raga ira reesireva Pauto oirara rutupa. Ira voea rovirieipareverea voeao oea tootoovira toupai, ora voeao oea kopiliaepa tapo. <sup>43</sup> Oire voeao-ia profet irara oea rera iava tavitaviaepa tuariri oiso, Vosa iroutoa vai Jisas oirao piereve rera-ia rarioro, oa iava rera iava vuri vovouaro verareve Jisas ora rera vo goruaro-ia.”

#### *Ratau Tou Irara Tugoropato Uraurato Ouiva*

<sup>44</sup> ♦ Oire touvira evo reoro vatepareva Pita voeapa, osa Tugoropato Uraurato vararoepa voea iare oea rera vo siposipoaro uru piepaiva voa. <sup>45</sup> Uva voeao Jiu-pa irara oirao pie vovou irara oea tapo Pita urioroepa voare, oea rirovira rutu vao-ia tavetave iraopaiva, uvare ratau tou irarapa Tugoropato Uraurato vara pierava Pauto rera vatepaoro voeapa. <sup>46</sup> Ari ita, ro-ia Tugoropato Uraurato ira eveiiva voeao Jiu-pa irara, uvare pisa reo-ia Pautoa-ia vuurapa vaisi puraiva. Oire vao isivaaro iava Pita oiso puraroepa, <sup>47</sup> ♦ “Iroutoa vai uvuiparoi ra oiso puraro, Viapau uvuipaei ra uukoa vai-ia baptaisa vateri voeaopa oea Tugoropato Uraurato ouivoi oiso-ia osa igei igoa rera ouiovora?” <sup>48</sup> ♦ Osa iava Pita voea goruvira tavireva oiso, “Visii vao-ia baptaisa ou iraota ora reesioro, ra rera vaisiaro sovara-ia toutes Jisas Krais.” Uva vo reo isivaaro iava rera akeiva oiso, “E uvuipau ra igei tapo tou rovori ovokiro-ia ita?”

◊ 10:30: Ap 1:10; Mt 28:3; Mk 16:5; Lu 24:4 ◊ 10:34: Diu 10:17; Ro 2:11; Ef 6:9 ◊ 10:36: Ais 57:19; Ro 10:12

◊ 10:41: Jo 14:17, 22 ◊ 10:42: Ro 14:9; 2 Ko 5:10 ◊ 10:44: Ap 4:31, 8:15-16, 11:15, 15:8 ◊ 10:47: Ap 8:36

◊ 10:48: 1 Ko 1:17

## 11

*Pita Ora Rera Vo Kovoaro Iava Siposiporeva Vo Jerusalem Vao Oa Oisoa Purapareve*

<sup>1</sup> Oire uva aposel irara ora oearovu oirao pie vovou irara oea rutu vao iava uvuiva, Ratau tou irara Vearo Siposipo oaro Pauto ouivora va sirova utuoro. <sup>2</sup> Uva vo osa Pita kareroepa Jerusalem iare vorevira, uva oearovu Jiu iava voeao oea oisoa rakari verapa pitupitu iava siposipopaiwe oea Pita reroaropaoro rerava ora kaureopaaepa <sup>3</sup> ✩ oiso purapaoro, “Auoro, vii koatauerao osaravu raga-ia voeao ratau tou irara. Uva voeao tapo toupaoro aioparivora voeao oea viapau ora kuropaaveira ora rakari verapaoro.”

<sup>4</sup> Ari varao aviavi pie rovoreva Pita oiso osa vo siposipoa oiraopavira karekeepa. Oare oiso puraroepa, <sup>5</sup> ✩ “Ari ita, Jopa-ia toupaavora variripaoro, ovusa ragai iare urioera areo uusi-ia aio koko eorovira vuvuiua iava varaoro. Oa iava ragai iare pou pirora. <sup>6</sup> Uva tuupavira vava vurapaoro okarerovu rutu sasaaro kekepaavora oiso-ia okarerovua vavarai kare, ari okarerovua oea riruvira ora voeae-ia vokapaiveira rasitoa-ia, ari okarerovua kokio kare. <sup>7</sup> Oa iava vo reo uvuavora oa ragaire oiso puraera, Auoro, Pita. Toreu ra vo kareo upori. Ra vo kare aiori.” <sup>8</sup> Uva oiso puraraera, “Viapau rutu Turaro, oiso ra vo kareo iava irai aioa, uvare vuuviae vo kareo-ia okareapa tugoropapeira voi-ia Jiu-pa irara vaaro sovara-ia Reo Taisi vo karepa kavupa.” <sup>9</sup> Oa iava oreovu vorevira vuvuiua iava varaera ragai iare oiso puraoro, “Vosa vo karea purareva Pauto vearovira rutu, uva viapau uvuipaei ra oiso purau vo karere, Vuri kare vao-ia Jiu-pa irara vaaro Reo Taisi sirova varuere karepa kavupa.” <sup>10</sup> Uva vo peva-ia aue areo uusi peva vara kekepaavora. Oa iava vo peva isivaaro iava vo koko rutu vorevira kae pirora vuvuiua iare. <sup>11</sup> Vo voki raga-a vao oa-ia vo pevao oira peva poua viropa kepa iare vao oa-ia toupaavora. Oea urioaera Sisaria iava ragai ou piesa. <sup>12</sup> Oa iava Tugoropato Uraurato ragaire oiso puraroepa, Avau voeao tapo. Viapau oiso ra rugorugoopau rutu vaore. Ari ita, viapau oiso vii tuukepai va vao-ia. Uva voeao-ia katai vatara ora vo peva vao oea ragai sirova utuaera. Oa iava igei rutu avaiera Konilius vo kepaaro-ia koatasa. <sup>13</sup> Oire uva ro-ia oirato igei tavirevora vao iava osa enselto kekerevora ora rera vo kepaaro-ia. Uvare torevira toupaoro rera taviparevora oiso, Oeai aruri Jopa iare Saimon ou piesa rera raga Pita. <sup>14</sup> Ira visii aao rutu tavirevere Turaro iava visii siposipooro, ra vuri vovouro oavisii kavuta. Osa iava eisi visii virivarirevere visii oriruoro Pauto. <sup>15</sup> Oire vo osa ragai voeapa siposipo rovoraera, ovusa Tugoropato Uraurato vararoera voeae iare, oiso-ia osa va purareva vigei-ia voari rovoa-ia. <sup>16</sup> ✩ Uva vaore rugooraera oiso osa puraroepa Turaro oiso, Jon baptaisa vaterevora aue-ia uukoa raga. Ari tou visivi visii Tugoropato Uraurato vo goruaro-ia baptaisa outavare. <sup>17</sup> Vo osa Pauto Tugoropato Uraurato vaterevora voeapa, eisi ita osa vigei vate rovorevora voari tuariri, vigei vao vigoa Turaro Jisas Krais oirao piepapeira. Oire vosa Pauto oisi va purareve, uva irouto-a ragai ragoa uvuiparai ra Pautoa-re korura?”

<sup>18</sup> ✩ Uva vo reoro-a varao uvuoro viapau oiso oavu avu vai puraiva. Ari Pauto-ia vuurapa vaisi raga puraiva oiso puraoro, “Oiraopavira rutu ita Pauto vigei vatereva vo raivao ora osararovu rutu tapo. Oa iava vigei rutu uvuipavie i ra Airepa Tootoo oupe, vo rara ora vigei iava sopaura oavi rutu porepe.”

*Vo Toupai Voeao Iava Lotupa Irara Vo Antiok-ia*

<sup>19</sup> ✩ Oire voeao-ia oea Jerusalem iava sikaa viropa Stiven upoaro iava tauairo ruture avaaepa oiso aue-ia vo Finisia-ia, ari Saipras-ia, ari Antiok-ia vo taerero-a eva oara-ia toupaoro oisoa Jiu-pa irara raga siposipopao toupaive. <sup>20</sup> Ari oearovu oiso Saipras iava ari Sairini iava evoea disaipel irara iava, oea poua viropa aue-ia Antiok. Uva evoea-a oea Grik-pa irara tapo siposipoiva Vearo Siposipo iava Jisas Krais vaaro. <sup>21</sup> Oire uva Turaro voeae tauvareva gorua vateoro voeapa. Oa iava riro irara rutu sopaura oaiive poreiva Jisas Krais oirao pieoro.

<sup>22</sup> Vo siposipoa pou piropa voeae iare lotupa aivaro-ia, ovusa toupaiva Jerusalem-ia. Oa iava aue Banabas sipoiva Antiok iare. <sup>23</sup> ✩ Oire uva voa pouro viropa, oa iava

✩ 11:3: Ap 10:28; Ga 2:12 ✩ 11:5: Ap 10:9-32 ✩ 11:16: Mt 3:11; Jo 1:26, 33; Joe 2:28, 3:18 ✩ 11:18: Ro 10:12-13 ✩ 11:19: Ap 8:1, 4 ✩ 11:23: Ap 13:43

Pauto vo kovoaro kekereva voa, ovusa Pauto voea viraakopareva. Oa iava rirovira rutu rorupareva. Uva voeare oiso puraroepa, "Oirao pieara oavisii tovota Turaro-ia. Oa iava viapau oiso oavu avu vai visii vaaro sikavere oirao piea, rara goruvira raga oiso Turaro sirova utupata." <sup>24</sup> Eisi osa voeare puraroepa Banabas, uvare vearo vovoutoa rutu-a. Ira ita vukuroepa aue Tugoropato Uraurato ora oirao pie vovou. Oa iava eva riro irara rutu Turaro-ia oirao pie vaisi puraiva.

<sup>25</sup> Oire Banabas avaroepa Tasas iare Sol-re taraasa. <sup>26</sup>  $\diamond$  Uva voa rera kekerevoiva, rera tapo vorevira kareroepa Antiok iare. Oa iava voa tousiva katai iva sovara-ia. Oire uva vo tou-a vao oa-ia toupaoro riro irara rutu siposiposiva lotupa irara. Uva voeao oea oisoa oiso disaipel irara vaisipaive, Kristen irara, uvare oisoa Jisas Krais oirao piepaive.

<sup>27</sup> Uva ovokirovu-ia urioaepa oearovu profet irara Jerusalem iava ae iare Antiok. <sup>28</sup> Oa iava iravu voea iava toreroepa rera vaisiaro, Agabas. Uva Tugoropato Uraurato vo goruaro iavirava reoreoroepa voeare oiso purapaoro, "Rirotoai ogoeto ovuuta uriopere vorarore rasitoa rutu-ia." [Ari ita, oiraopavira rutu ro ogoeto ira urioroepa, vo ovusa ro reito Klodias vo tokiaro-ia touiva.] <sup>29</sup>  $\diamond$  Osa iava voea rutu disaipel oiso puraaepa, "Vearopai vosa vigei voeaopa oirao pie vovou irara tauvaa vai vatepe Judia Distrik-ia oiso osa uvuipavie katakataivira. <sup>30</sup> Oa iava va puraiva moniara vateoro voare vaitereo vaisiaro-ia Banabas vaio ora Sol. Oire evaiterei varava avasiepa oira vasi irarapa vara vatesa.

## 12

### Oeavu Jems Kopii Pieiva Ora Pita Tapo Tuukeiva

<sup>1</sup> Oire ro-ia ira vo vokio-ia oearovu lotupa irara iava oea vuri pie rovoreva rera vaisiaro, King Herot. <sup>2</sup>  $\diamond$  Oiso osa vao oa purareva ro-ia Jems kopii pieoro aue-ia bainet toorio, ro-ia Jon araokotoaaro. <sup>3</sup>  $\diamond$  Uva Jiu-pa irara roruiva rera-ia. Ororua-a vao kekerevoiva, Pita ita oureva rera tovosa kortua-ia. Uva vao oa purareva Jiu-pa irara vo vokiroaro sopaaero vuutaro-ia Tugoropa Vokiro. Ovokiroa vaisiaro-a varao oara oisoa vaisipaive, Yis Asa Bret Vo Vokiro. <sup>4</sup> Uva rera-ia pituoro rera koata pierava tuukepa kepa sovara-ia. Oa iava rera tokipasa uutupa irara resiresuravira tovoreva. Oiso ragavira rugorugooparoepa, Vearopai ira karekeavere vo Tagausapa Vurei Pasova isivaaro-ia oirara rutu osireiaro-ia rera rovirieisa. <sup>5</sup>  $\diamond$  Oire vo osa oisoa Pita tokipaive tuukepa kepa-ia, ovusa voeao lotupa irara rerapa Pauto oisoa arepaive aue-ia variriara oaive vokiara rutu-ia.

### Pita Kosi Pierava Tuukepa Kepa Iava Enselto

<sup>6</sup> Oa iava tutuu pieepa, oire va iava King Herot oiso vovouparoepa ra rera oureve vorevira. Uva vo rupa-a vao oa-ia voeao uutupa irara rera tapo toupaiva oiso-ia, Aitereivu rera tapo ora aue-ia tuuke iro ora tuukesiepa. Vo ovusa oeavu rataao-ia uutupaaepa. <sup>7</sup>  $\diamond$  Osa iava Turaro reraaro enselto sita pievira pouro viropa rera ruvara-ia Pita, ovusa aviavia varaepla voa raga ora kiusa tuukepa tugi-ia. Oire voaviva rera eraopareva rera vurevurepaoro. Uva oiso puraroepa rerare Pita, "Toreu ikauvira." Oa iava tuuke iro kove ovoiepa rera iava. <sup>8</sup> Uva purapurapato ensel rerare oiso puraroepa, "Kuvupatoa-ia ora kuvuu. Ora tasiparei tapo goruri." Oa iava vara tovotovoreva ora rera-ia. Uva vorerivira enselto rera ita tavireva oiso, "Ora rakurakupato oara-ia ora rakurakuu. Ra ragai sirova utuu." <sup>9</sup> Oa iava iraroepa enselto. Uva Pita rera sirova uturoepa. Uusivira raga Pita toupareva, vo osa rera eraopareva enselto. Osa iava oiso keaparoepa Pita, Urusiparai. Viapau oiso oiraopa vao-ia oiso-ia osa ragai piepare ro-ia enselto. <sup>10</sup> Oire vo osa rovopato uutupato ira-ia putesiva, oire va iava vokasiva ita iravu-ia putesa eraopato. Oa iava tutuu piesiva riro ratao iare vao urui iarepa ratao. Ovusa karu piropa akukuvira raga vaitereipa. Oa iava kosi virosiepa raiva iare. Uva vao isivaaro iava enselto Pita arova roroverikovira ava ovoiroepa.

---

$\diamond$  11:26: Ap 26:28    $\diamond$  11:29: Ro 15:26; 1 Ko 16:1    $\diamond$  12:2: Mt 4:21, 20:23    $\diamond$  12:3: Eks 12:15, 23:15    $\diamond$  12:5: Ef 6:18    $\diamond$  12:7: Ap 5:19, 16:26

<sup>11</sup> ♦ Uva Pita torevokovira rutu roroiovira rugorugooroepa oiso purasa, “Oiraopavira rutu oiso osa tarai iraorai vao-ia oa purarevo enselto ragai-ia. Ira arurevo Turaro ragaire ragai kosi piesa Herot vavaearo iava, ora varao tapo Jiu-pa irara oara purapasa aue ragapaaveira ragaire Herot tapo.”

<sup>12</sup> Oire va-a vao oa ragare rugorugooopaoro Maria vo kepaaro-ia pouro viropa, Jon aakoaro rera raga Mak. Vo ovusa voa vo kepa-ia riro irara ora gurupaaepa variripaoro.

<sup>13</sup> Uva voea iare pouro viropa rataoa iava totosa. Oire va uvuoro iriau kosi uviropa va iava vurasa. Oira vaisiaro, Roda. <sup>14</sup> ♦ Oa iava eva totoa rera reoaro eveieva. Vo osa viapau oiso karueva. Ari tupa raga-a toupaiva ratao-ia, ovusa rirovira rorupaoro va kavu ragaeva voea tavisa ikauoro vorevira oiso puraoro, “Avoeao, Pita eera evoa ratao riaario-ia.” <sup>15</sup> Uva viapau oiso oira vo taviaro oirao piepaiva. Oiso raga purapaaepa oirare, “O ita, easi kokoropava o iria vigei keakeapaevoi.” Oa iava vorerivira ita aia oiso voea tavieva, “Viapau rutu. Ari oiraopavira eera-a Pita.” Oa iava oiso puraaepa, “Viapau, easi rera urauraaro eera.”

<sup>16</sup> Osa Pita touvira totopareva rataoa-ia voa raga toupaoro ratau. Oa iava rataoa iava tupaprokuoro rera kekeiva. Uva rera-ia tavetave iraopavira rutu rorupaoro. <sup>17</sup> Osa iava voea tapetapereva Pita aue-ia vavaarei oiso voea tavisa, “Turaro ragai kosi pierevo tuukepa kepa iava. Uva visii tavipaa ra avata Jems tavisa ora araoko irara oaro tapo va iava vao oa purarevo ragai-ia Turaro.” Uva vao isivaaro iava voea kavureva vorarore avaoro.

<sup>18</sup> Oire uva evo kepa-ia tuukepa kepa voeao uutupa irara oiso aue iraoaepa tave-tapepaoro, Ae! Apeisi pierevo Pita vova? <sup>19</sup> Oa iava oearovu arureva Herot rerare taraasa. Uva viapau rutu oiso uvuipaaepa ra rera kekeive. Osa iava voeaore keeraroepa uutupa irara oea oisoa tuukepa kepa tokipaise voea akesa va iava. Uva va-a vao oa iava oearovu arureva oiso ra uutupa irara upoive, uvare voea ruvara iava kosiro viro Pita.

Vao isivaaro iava Herot ovokirovu-ia Judia Distrik-ia kavuoro vararoepa Sisaria iare.

#### *King Herot Vaaro Iava Kopiia*

<sup>20</sup> ♦ Oire uva King Herot rirovira kasipuroepa auere Taia vatarei ora Saidon vata. Oa iava ora guruaepa rera iare uriosa. Oire va iava Blastas ou rovoiva rera-ia vearo rugoo ou rovosa ora voeapa. Uva ro ira ou rovoiva ira oisoa King Herot vo kepaaro tokipareve. Oire vao vuavua vovou oare taraapaiva rera-ia Herot, uvare oiso ragavira taraipaaepa, Easi ro ruvara-ia aio voripavioveira.

<sup>21</sup> Uva vo vokia-a vao oa reesireva oa-ia varoa-ia ora rakurakuroepa vao turaro irara vo varoaro. Uva voa paupa-ia tapo pauroepa turaro irara voeapa riro kaekaevira siposiposa. <sup>22</sup> Uva voeao oirara rera uvuoro oiso purapaaepa rirovira keerapaoro, “Ro-ia pauto ira vigei vateparevoi vo siposiporo. Viapau oiso oiratoa raga-a ro-ia Herot, ari pautoa-a.” <sup>23</sup> ♦ Uva vo voki raga-a vao-ia oa-ia Turaro reraaro enselto rera upia piereva, uvare viapau vao pautoapa vaisi torevokoreva voeapa vorevira, oiso osa rera vaisiiva. Uva vo upia vao oa-ia aviko kare rera sarearo aioiva, vo ovusa urauratoaaro varaua arova rera kavureva. Oa iava kopiiroepa Herot.

<sup>24</sup> Vo osa Pauto vo reoaro kovaepa ora rigapaoro rirovira rutu.

<sup>25</sup> Uva Banabas vaio ora Sol Jerusalem iava karesiepa auero tapo Jon rera raga Mak. Uva voea vo kovoroaro ovoioro kareaepa vo peva rutu.

## 13

#### *Banabas Vaio Ora Sol Reesiiva Vaiterei Aruoro Kovosa*

<sup>1</sup> ♦ Olotuvu vao-ia Antioch-ia oa sovara-ia oisoa voeao profet irara ora tisa irara toupaive oiso voea Banabas, ari Simion ira oiso vaisipaise Naisa, ora auero Lusas aue iava rera Sairini, ora Maneyen ira oisoa iravu raga Herot Tetrak ruvara-ia toupareve tuariri, ora ro-ia Sol. <sup>2</sup> Oea-a Pautoa-ia vuurapa vaisi purapaiva ovokivu-ia aio asavira toupaoro auere lotu purapasa vearovira rutu. Oa iava Tugoropato Uraurato voeare

♦ 12:11: Lu 15:17; Dan 3:28, 6:22   ♦ 12:14: Lu 24:41   ♦ 12:20: Mt 11:21; 1 Kin 5:9, 11   ♦ 12:23: 1 Sml 25:38;

2 Sml 24:17   ♦ 13:1: Ap 11:22-26

oiso puraroepa, "Banabas vaio rovirieita ora Sol vaiterei roro pieoro. Aiterea vo kovo purapasivere oa reesiavora vaitereipa, oiso ra va purasi." <sup>3</sup>◊ Oa iava aio asavira raga toupaoro variripaaepa vaitereipa. Oire va iava voea vaiterei kukuearo-ia vavaeara oaiive tovoiva vo vaiterei reesioro Pauto vo kovoaro purasa tauai. Oa iava eva isivaaro iava vaiterei sipoiva vaiterei ava pieoro voava vo.

#### *Aposel Siposipoiva Saipras-ia*

<sup>4</sup> Oire voava Tugoropato Uraurato vaiterei sipoureka, oa iava varasiepa Selusia iare. Uva voava ae iare Saipras-ia avasiepa selpa uvuo-ia. <sup>5</sup> Uva voa pou virosieiva, voeo sipoisiposiva Salamis-pa irara vo Jiu-pa irara vo keparoaro-ia Reo Taisi Uvupa Keparo Pauto vo reoaro iava. Uva oisoa Jon vaiterei tapo toupareve vaiterei tauvapaoro.

<sup>6</sup> Oire voeo oeа voraro vo toko-ia vokaiva. Oa iava vo voka iava Pefosa-ia poua viropa. Uva voa iravu-ia poua viropa Jiu-pato ira oisoa kuuvu kovoro purapareve pisavira rutu. Riro keakea purato profetato ira vaisiaro-a, Ba-Jisas. <sup>7</sup> Ro-ia rovopato gavman ro kuuvu kovoro purapato vatetoaaro. Uva ro-ia rovopato gavman ira-ia oisoa vearo rugorugoo toupaive. Rera vaisiaro, Sesias Polas. Ira vaitereore Banabas vaio ora Sol keeraroepa, oisore ra Pauto vo sipoipoaro uvureve vaiterei ruvara-ia. <sup>8</sup> Ro-ia ira oisoa kuuvu kovoro purapareve, rera vaisiaro Elimas rera raga vaisiaro Ba-Jisas ira rore rovopato gavman korukoruroepa, vo osa vaitereipa ruiparoepa. Uva rera roreasiparoepa oiso, teapi Pauto vo reoaro vatesivere ra va uvureve. <sup>9</sup> Ari ita, ro-ia Sol rera raga vaisiaro, Pol ira vukuroepa rera-ia Tugoropato Uraurato ira rerava tuupavira vurapaoro oiso puraroepa rerare, <sup>10</sup>◊ "Auoro, vii-a vao Seten reraaro rutu viigoa vukupauveira tugara kare raga-ia, ora vii varaaro tapo vuri pitupituro. Vii vo pitupituroaro purapariveira. Viigoa torevoko pitupituva keri iraopauveira. Vokiara rutu-ia vo vovou purapariveira oirara rutu piro piepaoro vova Pauto vaaro-ia torevoko raiva. <sup>11</sup>◊ Vaoviopavira raga Turaro vavaearo vii-ia toupai. Oa iava vavoriipaei, ra viapau ravireo kekepari vo vokiro-ia varao." Oire vao isivaaro iava apapa koarapavira vurareva. Oa iava oira taraaparoepa oiso ra irai rera sikuropaoro vokapareve, uvare rupavira rutu vurareva. <sup>12</sup> Oa kekereva ro gavman rovopato, oa iava rera iava sopaua rutu oiraoepa rutu, vo osa varao-ia Turaro varaaro rutu tavetavereva.

#### *Pol Ora Banabas Aiterea Antiok-ia Vo Pisidia Taere Sovara-ia Toupasiva*

<sup>13</sup> Oire uva Pefos-ia kavuoro ae-ia selpa uvuo topaa viropa Pega urui iare ouruia oisoa toupaive Pamfilia taere sovara-ia. Uva evoa vaiterei arova kareroepa rera raga Jon Mak Jerusalem iare. <sup>14</sup> Oa iava Pega urui iava vokasiva ae-ia pou virosa Antiok vo uruio oa oisoa Pisidia taere sovara-ia toupaive. Uva okepavu-ia koatasiepa Sinagog Jiu vaaro voa paua. <sup>15</sup> Oire oearovu Pauto vaaro Reo Taisi viei rovoiva, ora vo reoro tapo profet irara vo rigatoroaro. Uva varao isivaaro iava voeo rovopa irara vova Sinagog vo rigato vateiva vaitereipa origatoa oiso puraepa, "Araokotoarei oao, vosa reoa vai vei-ia toupaive voeo oirara ora riakora soparo soporesa, oire oai kosi piesi vo uvuruo-ia."

<sup>16</sup> Oire uva Pol toreoro voea tapetapereva vavaarei-ia oiso puraoro voeare,

"Visii Isrel-pa irara ora visii oearovu visiigoa Pautoa-pa avivikepataveira. Visiigoa rutu vao uvuta. <sup>17</sup>◊ Ro Pauto oaiive Isrel-pa irara ira oearovu voeo iava vigei aao iraraaro viro pierava voea reesioro auere voea riro piesa vo ovusa tavetevira voa toupaiva. Oa iava voea iare goruaro karekereva voea kosi pieoro voava Isip-ia. <sup>18</sup> Oa iava ae sovara-ia vo resura tau ivaro (40) voea oisoa tauvapareve vo osa raaka tapi-ia toupaive. Oiso osa voearo oearoa veguru kakaero oaiive tokipaiseira. <sup>19</sup> Oire vosa erao vatara (7) sararo opesi pie rovorevoiva aue iava Kenan-ia, voea vatereva vo rasi Jiu-pa irara. Oa iava oiso pura piropa, Voea raga vo rasiaro. Uvare voeapa vo rasi roorookareva. Uva voa touiva ae-ia vo resura vovoto vo vavae tau ivaro (450). <sup>20</sup> Uva vao isivaaro iava Pauto voea vatereva reo rovirieipa irara aue jas voea tokipasa. Oa iava ro-ia Samyuel profetato voeapa vatereva Pauto.

◊ 13:3: Ap 6:6, 14:26 ◊ 13:10: Mt 13:38; Jo 8:44; Hos 14:9 ◊ 13:11: Eks 9:3 ◊ 13:17: Diu 7:6-8

<sup>21</sup> “Uva Samyuel isivaaro iava auere ita Pauto areiva king. Oire Sol vatereva Kis oviitoaaro vo saraao iava rera Bensamin vase vo saraaro. Uva oisoa va-ia toupaive vo ivaro sovara-ia vo resura tau iva (40). <sup>22</sup> Vao isivaaro iava Sol verareva vorevira ita Pauto aue tavarpiesa Devit, oisore ra voeapa turaroparo. Oa iava vo reoro vatereva voeapa aue iava Devit oiso puraoro, Ro-ia Jesi oviitoaaro, ira ragai vo ruipaaro rutu-ia toupare. Ira taru oiso vara puraparevere osa rera tavipaavoi. <sup>23</sup> ♦ Uva Devit aao iraraaro-ia Pauto ro Jisas karekereva Isrel-pa irara kae piesa voea oriruoro. Oa purareva vao ora rera vaaro reo ravaa oirao pieoro.

<sup>24</sup> “Oire uva Jon ira pierevea Jisas-pa. Oa iava oiso siposiporeva oirarapa, Visii poreta viro, ra vuri vovouro oavisii kavuta. Oa iava baptaisa outavere. <sup>25</sup> Uva Jon vo kovoro opesi pieoro oiso puraroepa, Apeisi rugorugoopatai ragai-ia? Irouto-a ragai? Viapau oiso ragai-a ro ira iare tuepataveira. Oire uvuta oiso-ia iravu ira uriorovere irapa ariiparai. Uva viapau uvuiparai ra rerapa akaipa kovo vai pura ragaa. Oiso osa vao tasipaaro oa-ia viapau uvuiparai ra va akaipavira vera ragaa vo rera iava.

<sup>26</sup> “Araoko irara oaa. Visii vao Ebraham aao iraraaro, ora visii vao ratau tou irara visiigoa rutu Pautoa-pa avivikepataveira, vigei rutupa Pauto vo reo vatereva virivari pie reo aue iava Jisas Krais vigei Kae Piepatoaaro. <sup>27</sup> Voeao-ia Jerusalem-ia tou irara ora voeo reipa irara oaiive oea rutu vo reo oirao pieivora profet irara vo reoaro vo Jisas kopii pieoro, uvare viapau oiso rera eveiivora oiso, Kae Pieto oaiive. Ira iava profet irara vo reo rigatoiva oa oisoa vieipaive Sabat vokiro rutu-ia. <sup>28</sup> Uva viapau oiso uvuiaera ra rera kortuive vuriara vai sirova, uvare oiso ragavira taraiadera rera-ia, Easi torevokotoa-a ro-ia. Ari ita, Pailat taviiva oiso ragavira, Eagara ita, ruipapaiei oiso ra rera kopii pieri igeipa. <sup>29</sup> Uva vo reoro rutu evara oirao pieoro oara rera iava rigatoiva rera rere pieivora vova evao parikou-ia rera tovasa aveke rikui-ia. <sup>30</sup> Ari ita, vo osa Pauto vorevira rera tore pierevora vova kopii. <sup>31</sup> Oa iava oearovu ovokirovu-ia rera kekeivora voearo oearoa tapo avaroepa Galili iava aue iare Jerusalem-ia. Voearo oearoa vo vokio-ia tavitavipaii rera iava.

<sup>32</sup> “Ora vegei tapo vara iava tavitavipaveiei vearo siposiporo oiso-ia, vara iava ovoie reoro oara oirao pierevora Pauto vigeipa rera-ia. Varao oara vatereva tuariri vo voeaopa vigei aite iraraaro. <sup>33</sup> ♦ Oiso osa vao-ia oa-ia Jisas tore pierevora vorevira kopii iava. Osiposipoa vao aue-ia Sam Vuku papara erao oiso oa-ia puraroepa Pauto, ‘Vii-a oviitoa oaa. Ragai vo vokio vii aitea.’

<sup>34</sup> ♦ Oa iava Pauto reo ovoi puraoro oiso va purareva, ira toreroverea Jisas kopii iava vorevira, ra viapau eruro. Eisi osa pura piropa vo rigato oiso osa vao-ia, ‘Ragai-a vao ragoa visii rutu oiraopavira vateaverea oiraopara ora tugoropara, varao oara iava reo ovoi puraava aepla Devit.’

<sup>35</sup> ♦ Ora vao tapo oa-ia oiso puraroepa Devit vo aue-ia opaparavu vo Sam Vuku sovara-ia.

‘Ro-ia Tugoropatoa oara ira iava varaua iava viapau uvuipau ra vaseri, oiso ra erupe.’

<sup>36</sup> Uva vo reoa vao-ia aue iava Jisas oa purareva, viapau oiso ora rera raga-ia vo reo-a. Aue iava uvare rera vo touaro-ia Devit Pauto vo vovouaro purareva rera voeaaro-ia oirara, oa iava kopiiroepa. Uva rera tovaiva vo rera aite iraraaro tovaaro ruvara-ia. Oa iava rera iava varaua erupe voa. <sup>37</sup> Ari ita, ro ira tore pierevora Pauto kopiiaro iava rera Jisas, ira iava viapau oiso varaua oaro eruera. <sup>38</sup> Araoko irara oaa, vao uvuta oa iava visiipa siposipapaavoi vuri verapa siposipo. Oa visiipa ora vatepere rera raga-ia ro-ia Jisas, <sup>39</sup> vo rara rera oirao pieta. Oa iava visii iava vuriara oavisii verarevere oara viapau uvuipai ra Moses vaaro Reo Taisi vara verapaive. <sup>40</sup> Vatatopopata, teapi vao visii-ia karekepe oiso osa profet irara vo reoaro-ia puraea voari oiso, Vao karekeperea vo oearovu-ia. Oiso osa vao-ia,

<sup>41</sup> ♦ ‘Visii riro vakuvaku irara vao keketa, ra vare rugorugoota visiigoa taru kopiitavere, uvare vo kovo purapaavoi. Uva viapau oiso va oirao piepata. Ari ita, vosa irai

visiipa evo kovo aviavi piepareve, ra viapau oiso irai vo reoaro oirao piepata va iava eva.’”

<sup>42</sup> Oa iava kosi virosiepa Pol vaio ora Banabas voava vo Sinagog. Uva voea rutu oiso puraaepa vaitereire, “Uriosivere aia vo toupao-ia utupa igeipa siposiposa vo reoro iava.”

<sup>43</sup> Oire uva voeao-ia Jiu-pa irara ora oearovu ratau tou irara oearoa oisoa Jiu-pa irara vo pitupituaro sirova utupaave, oea rutu vaiterei sirova utuaepa raivaaro. Oa iava voa vaitereo aposeltoarei voea taporo ora reopasiepa oiso voea tavipaoro, “Avoeao. Pauto vo Saraaro-ia sopaura oavisii tovopatavoi. Ra voa toupaoro goruvira rera sirova ututa.”

<sup>44</sup> Va-ia vao utupa Sabat voki vorevira voeao vo urui iava ora guruaepa Pauto vo reoaro uvusa. <sup>45</sup> Vo osa voeapa siposipopareva Pol, ovusa Jiu-pa irara urioaepa vo uvuru kekesa. Oa iava rirovira rutu vara riiriiva. Osa iava vara iava rerava rirovira ora kaureopaaepa rera reroaropaoro. <sup>46</sup> Uva goruvira rutu reopaoro voeare Pol vaio ora Banabas oiso purasiepa, “Ari ita, rovovira rutu visii vate irao rovovevora vo reoro Pauto vo reoroaro. Uva visii-ia tarai iraopaveiei visii kekepaoro, ovusa vo reoropareasipaoro vara peopata ora visii iava. Uva oisi-a oiso osa ora kosi piepatai, oa iava viapau oiso uvuipatai ra vao Tootoo Ovoi outa. Eva-a oa vituaro iava avapaveare ratau tou irarapa vo reo vatepasa.

<sup>47</sup> Aue vituaro iava uvare ro Turaro vegei tavirevora oiso, ‘Ragai visii sipopaa osararovu ratau tou irara aviavi piesa voeapa vao iava siposipooro. Oa iava uvuipaii ra ora voeа varaaro iava vuri vovouro ora poreave, vo rara vo reoro varao oirao piepaive voeа rutu vo rasitoa rutu-ia.’”

<sup>48</sup> Uva vao uvupaoro oearovu ratau tou irara iava rirovira rorupaiva. Oa iava Pauto vo reoaro rei pieiva oiso puraoro, “Vearovira rutu vatevatearo-ia Pauto.” Uva riro irara vo reo oirao pieiva voeao oea ropo rovoreva Pauto ora rerapa voari rovoa rutu-ia.

<sup>49</sup> Oa iava Pauto vo reoaro ora sikataepa voraro ruture vo taerero-ia varao. <sup>50</sup> Uva voeao Jiu-pa irara oira vasi irara kasipu pieiva ora riakora tapo vairo airoa oisoa goruvira rutu lotu purapaave vokiara rutu-ia. Oa-a vao oa puraiva Pol vaio ora Banabas kosi piesa vo taere iava. <sup>51</sup> Uva kokotoara oaesii iava vereo tovetovesiepa voare vo urui reesiro vao-ia, Reo uvu asa urui. Oa iava voeа kavuoro ava ovoisiepa vore Aikoniam-ia. <sup>52</sup> Uva voeao disaipel irara vukuaepa rutu aue-ia Tugoropato Uraurato ora aue-ia tapo rorua.

## 14

### *Vo Toupasiva Aikoniam-ia Kovopaoro*

<sup>1</sup> Oire uva ovokivu-ia ita voa vo Aikoniam-ia oavu-ia ita Sinagog paua koatasiepa. Voa ita goruvira rutu voeapa siposiposiva. Uva riro irara rutu vaiterei vo siposiporoaro oirao pieiva voeа rutu oiso, Jiu-pa irara ari Grik-pa irara tapo. <sup>2</sup> Ari ita, oearovu voeа iava Jiu-pa irara oirao pie asa irara oea oearovu kasipu pieiva osararovu iava, oisore ra vurivira rugorugooave vaitereire Pol vaio ora Banabas oearovure tapo oirao pie vovou irara. <sup>3</sup> ♦ Oire voa vo riro kaekaevira tousiva siposipopoaro uriri asavira Turaro iava, ro ira vaiterei vo reoroaro aue iava Pauto vo tauvaaro oirao piepareva gorua vatepaoro. Osa iava ravaa reesiro ora ravoto kovoro purasiva ora vavaea oaesii iava voeа rutu osireiaro-ia. <sup>4</sup> ♦ Oa iava voeao vo urui-ia tou irara oea viapau oiso vaeavira vovoupaepa, uvare oearovu oiso vovoupaepa osa Jiu-pa irara vo vovouaro. Ari oearovu oiso vovoupaepa osa aposel irara vo vovouaro.

<sup>5</sup> Oire Jiu-pa irara ora oearovu ratau tou irara ora voeа iavapa irara reipa irara oiso vovoupaepa ra aposeltoarei vurokoive aue-ia aveke. <sup>6</sup> ♦ Ari ita, vo osa va-ia tarai rovosiepa. Oa iava ouruireivu iare torisiva vo uruireo Listra-ia ora Debi-ia. Ouruirea oisoa Likonia taere sovara-ia toupaive, ora vo tapo otaererovu oara oisoa voavi ruvara-ia toupaive. <sup>7</sup> Uva voa Vearo Siposipoaro Jisas vatepasiva voeapa.

### *Vaiterei Vo Kovoaro Iava Oa Purasiva Listra-ia*

<sup>8</sup> ♦ Oire uva iravu ira oisoa vo urui-ia vao Listra urui tokoruovira raga toupareve, uvare rera iava kokotoa vuriepa osa raga rera kavaueva aakova. Oa iava oisoa viapau uvuiparo oiso ra vokapareve. <sup>9</sup> Uva Pol vo reoaro uvureva, oa iava Pol rera eveireva. Osa iava ora

♦ 14:3: Hi 2:4; Jo 4:48   ♦ 14:4: Ap 17:4-5   ♦ 14:6: Mt 10:23   ♦ 14:8: Ap 3:2

rerare oiso puraroepa, "Akoea, ro-ia oirato ira ragai vo reoaro oirao piepare aue iava Jisas. Ira poreterovere rara." Uva Pol rerava tuupavira vurareva oiso rutu puraoro akareva, <sup>10</sup> "Toreu torevokovira. Vii oiraaro-ia kokotuo." Oa iava tokaoro toreroepa voka ovoisa.

<sup>11</sup> ♦ Oire riro irara va eva kekeiva oa purareva rera-ia Pol. Rera kekeoro voea rutu rirovira oiveaepa oiso puraoro, "Ae, oiraopavira rutu vaitereo-ia pautoarei, aiterea oira varavira raga varasieie vore vigei iare." <sup>12</sup> Banabas vaisiiva oiso, Sus pautoa oaive, ora aue tapo Pol ira-ia vo vaisio tapo tovoiva, Hemis iravu ita pautoa oaive. Uva vao iava vo vaisio Pol-ia tovoiva Hemis-pa vaisi, rara voeapa reo vateparo. <sup>13</sup> Ro-ia pristo Sus reraaro ira vo kepaaro lotupa kepa oisoa uruia vatuarto-ia toupaive, ira urioroepa bulmakau kare tapo ora kokookoara voea rutu iare, oiso ra vara-ia korouua purareve voea tapo Pol vaiopa ora Banabas. Uvare vaitereipa oiso keapaaepa, pautoarei.

<sup>14</sup> Uva Pol vaio ora Banabas eisi va iava uvuoro ikauvira uriosiepa voea iare kuvupara karikaripaoro ora vaiterei iava. [Uvare rirovira rutu ariipasiepa vao-ia oa purapaiva vaitereipa.] Oa iava oiso purasiepa, <sup>15</sup> ♦ "Ae! Eake-a vao purapatavoi? Viapau oiso vegei-a pautoarei. Vegei oiratoarei oiso osa visii vao-ia. Vegoa urioveiera visii rutu vao tavisa Vearo Siposipo iava, oisore ra vo pitupituro iava kuuvu pitupituro poreta viro Tootoopato sirova utuoro Pauto. Ro ira vuvuiua purareva, ora rasito, ora avakava, ora auero rutu varao oara vara sovara-ia toupaiveira. <sup>16</sup> Ro-ia Pauto ira oisoa osararovu rutupa vasepareve voari tuariri. Oa iava ora voea raga vo pitupituroaro sirova oisoa utu ragapaave. <sup>17</sup> ♦ Ari ita, vo tuariri rutu rovoa-ia uva Pauto auero rutu purareva, oiso ra oirara rutu vara kekepaoro vara iava rera eveipaiive. Oiso veeropara rutu varao purareva oiso-ia, kokeva o auere kovepasa, ari kovoara varao auere kovapasa, ari evaora rutu varao auere kuepasa, ari oaravua varao auere opo purapasa, ora varao tapo auere vara aiopasa. Oire ra vara iava vukupaave ora aue-ia rorua ora gorua. Varao oara rutu viraakoreva Pauto vara ovoioro."

<sup>18</sup> Uva vo reoro-a varao oara-ia voea kasikasi pievira akeakesiva, oisore ra va eakaive vao uvare korouua purapaiva vaitereipa.

#### *Pol Vurokoiva Avekeara-ia*

<sup>19</sup> ♦ Uva vo vokia-a vao oa raga-ia oearovu Jiu-pa irara Antiok iava ora Aikoniamia urioaepla oearovu ivu ragapaoro. Oa iava voea sirova utupaaepa. Uva Pol vurokoiva avekeara-ia. Oa iava rera ivuoro rera kosi pieiva vo urui sovara iava oiso keaoro, Ira kopiroi. <sup>20</sup> Oa isivaaro iava vao voeao oirao pie vovou irara ora guruaepa rera kovokovooro. Oa iava poreteoro ora pueroepa vorevira vo urui iare voresa. Ovokivu-ia utupa voki vo urui kavuoro avasiepa vaiterei rutu Pol vaio ora Banabas aue iare Debi-ia.

#### *Pol Vorevira Kareroepa Vova Antiok-ia Vo Siria Taere-ia*

<sup>21</sup> Uva voa vo Debi-ia toupaoro voeapa Vearo Siposipo iava siposipapasiva. Oire riro irara rutu vaiterei vo siposiporoaro oirao pieiva rutu. Uva vara opesi piesivoiva, vorevira karesiepa Listra iare. Oa iava voava ita Aikoniam iare voresiepa. Oa iava voava ita Antiok-ia. <sup>22</sup> ♦ Uva voava vorevira karepaoro voeao oirao pie vovou irara sopaaro goru piepaoro karesiepa riro goruvira oiso puraoro, "Uvuipatai ra goruvira toutes oirao piepaoro. Uvare tutuu piepai ra koatavio Pauto vo Saraaro-ia. Ari ita, vo osa voka rovope vo raivao-ia oaiia riroara vavatara toupai." <sup>23</sup> ♦ Oire uva oearovu lotupa irara iava reeresisiva, oiso ra lotupa irarapa irapaoro veerovira voeapa tokipaiive. Uva aio kavuvira raga toupaoro Pautoa iare varirisiepa voeapa Turaro vo tokiaro sovara-ia voeа tovooro, ro ira-ia raripaaveira. Uva oisi-a eisi osa piepasiva voraro rutu vo uva lotu gururo rutu oisoa toupaive.

#### *Vo Vorevira Karesiepa Antiok Iare Vo Siria Taere*

<sup>24</sup> Oire uva Pisidia sovara-ia vokapaoro aue-ia Pamfilia-ia pousi viropa. <sup>25</sup> Oa iava voa vo Pega vearo reo iava tavitavisiepa voeapa siposipooro oirara. Uva va isivaaro iava varasiepa aue iare Atelia. <sup>26</sup> ♦ Uva voava kare ovoisiepa selpa uvuo-ia Antiok iare, vo

◊ 14:11: Ap 8:10, 28:6   ◊ 14:15: Jen 1:1; Sam 146:6   ◊ 14:17: Ro 1:20; Sam 65:10   ◊ 14:19: 2 Ko 11:25; 2 Ti 3:11   ◊ 14:22: Ap 11:23, 13:43; Jo 16:33   ◊ 14:23: Ta 1:5   ◊ 14:26: Ap 11:19, 13:1, 3

uruio-ia oa-ia oeavu aposel irara rovovira vaiterei tovo pie rovoiva Pauto vavaearo-ia kovosa. Oa iava opesioro voare karesiepa.

<sup>27</sup> ☩ Oire vo osa voa pou virosiepa, oa iava lotupa irara rutu gurusiva voeapa varao iava tavitavisa oara oisoa purapareve Pauto vaiterei tapo. Vao iava tapo uvare vo raivao karureva ratau tou irarapa, oisore ra taraiave Jisas vaisiaro-ia. Ra va iava rera oirao pieive rera-ia rarioro. <sup>28</sup> Oire uva voa vo Antioch-ia riro kaekaevira tousiva vo voea tapo voeao oirao pie vovou irara.

## 15

### *Lotuara Kaunsel Irara Ora Guruaepa Jerusalem-ia*

<sup>1</sup> ☩ Uva oeavu varaaepa Judia iava vore Antioch-ia voeao oea oiso voeaopa siposipopava oirao pie vovou irara oiso purapaoro, “Vosa visii viapau vo pitupitu sirova ututa Moses vaaro rakari verapa pitupitu, oa iava viapau uvuipatai ra vuriara oavisii iava virivarita utupaua.” <sup>2</sup> Oa iava Pol vaio ora Banabas voeare goruvira rutu oiso purasiepa, “Easi viapau oiso vao torevokopai.” Oa iava rirovira rutu ora takatoaepa kasipuvira ora reororo. Uva vao iava Pol vaio reesiiva ora oearovu vaiterei iare Jerusalem iare avasa vo reova vao-ia oa-ia ora reoaepa. Uva voare oearovu iare reipa irara ora aposel irara vava avaaepa, oiso ra va-ia ora reoave voea rutu.

<sup>3</sup> Oire uva va iava voea rutu voeao-ia lotupa irara vaiterei sipoiva Jerusalem iare. Vo uruireo Finisia ora Sameria vuuttaaro-ia pute rovooro voeao tavisiva oirao pie vovou irara oiso puraoro, “Vo raiva-ia Pauto ratau tou irara sopaaro porereva oiso-ia.” Oa iava rirovira rutu roruiva vo siposipo uvuoro oirao pie vovou irara. <sup>4</sup> Vo osa voa pousi viropa Jerusalem-ia, oa iava vaitereiva sekansa avaaepa reipa irara, ora aposel irara, ora voeao rutu lotupa irara. Oa iava voeapa siposiposiva varao iava oara oisoa purapareve Pauto vaiterei-ia. <sup>5</sup> Uva oearovu voearo oearoa oisoa Farisi vo siposiporoaro sirova oisoa utupaave, oea toreaepa riro oirao pie vovou irarare oiso purasa, “Avoeao, tepa ora rakari verapaavere Moses vo taisiaro sirova utupaoro Reo Taisi.”

<sup>6</sup> Uva va-a vao oa iava voeao reipa irara ora voeao aposel irara rutu ora guruaepa va-ia ora reosa. <sup>7</sup> Uva riro kaekaepa reoro rutu-a oara-ia ora reopaaepa vo aivaro-ia vao-ia oa puraiva. Oa iava Pita toreroepa oiso purasa, “Araoko irara oaa, tuariri Pauto ragai reesireva ratau tou irarapa Vearo Siposipo vatepasa, oisore ra oearovu rutu vo reo oirao piepaive. <sup>8</sup> Pautoa raga oirara rutu iava sopaura-ia taraiparoveira. Oa iava ora rera voearo vo rugorugoroaro oirao piepasa Tugoropato Uraurato rere pierevora voeaoopa ratau tou irara, oiso osa piereva vigeipa voari. <sup>9</sup> ☩ Oiraopavira rutu. Viapau oiso Pauto vo vovouaro vigei iava oearoi veriverisipaiveira. Viapau. Uvare vigei rutu areiivira rutu toupaiveira. Osa iava oearovu uvuipaai rera oirao piepaive. Oa iava Pauto uvuiparoi ra voea iava vuriara verapareve. <sup>10</sup> Uva apeisi vovoupatai, ra Pauto akeaketa va-ia vao, oisore ra va-ia rera torevokota, ra va sirova utuave? Opitupitua vao rakari verapa oiso rutu toupaiveira osa aveke. Ari ita, vosa oirato oira-ia kae vovouro, ra viapau uvuiro oira kaesa vo rara vavatapao. Eisi osa oisoa toupaive voari igei aao iraraaropa tuariri, ora vigeipa vao-ia vo vokio. Eisi osa iava viapau uvuipavioveira ra oisi va sirova utupavio.

<sup>11</sup> ☩ Ari ita, vao vigei vaaro oirao pie vovou oa oiso ragavira toupai, Akuku raga vatevatea oa vate ragareva Pauto. Ovatevatea raga iavirava Jisas Krais uvuiparoveira ra vuriara oavi verapareve vigei iava. Osa-a oiso osa pierevere rara voeaoopa ratau tou irara.”

<sup>12</sup> Vao isivaaro iava voea rutu voeao vo uvuru-ia vao ora reopaaepa. Oea rutu ora tape pieaepa Pol vaio ora Banabas raga reoaro uru piepaoro, vosa voeapa siposipopasiva varao iava ravaa reesiro ora ravoto kovoro tapo. Varao oara oisoa purapareve Pauto vaiterei-ia voeapa voeao sopipa irara ratau tou irara.

<sup>13</sup> Oire uva siposipoa oaesii opesi piesiva, oa iava Jems toreroepa oiso purasa, “Araoko irara oaa, ragai uvuta. <sup>14</sup> Ari ita, Pita visiipa siposiporevoi roroiovira oiso osa iraroepa Pauto oearovu tauvapaoro voea ou rovosa voeao iava ratau tou irara, oisore ra vearovira

✩ 14:27: Ap 15:4, 12; 1 Ko 16:9; 2 Ko 2:12; Kl 4:3    ✩ 15:1: Ga 2:12, 5:2    ✩ 15:9: Ap 10:28    ✩ 15:11: Ro 3:24; Ef 2:5-8

rera sirova utupaave oiso rutu osa rera voeaaro. <sup>15</sup> Ari ita, vao rigatoa oaive voea profet irara oa oisi toupai osa Pita puraparoi vao-ia. <sup>16</sup> Vo uvare profet irara oiso va rigatoiva, ‘Turaro oiso puraroepa, Vao isivaaro iava kareraverea, ra Devit vo kepaaro tore piea vorevira vao oa vurioro koveepa tuariri. Vo kepa vorevira vearo pieoro vo kepa tore pieaverea.

<sup>17</sup> Auere ra voea rutu voeao ragaire taraiive ragai sirova utusa, voearei rutu voeareo ora oearovu rutu ratau tou irara, evoearei oearea reesiava oiso, Ragai voeareiaro cirara.

<sup>18</sup> Eisi osa puraroepa Turaro ro ira vo taraio kareke piererva voari tuariri rutu.’

<sup>19</sup> “Oire vao-ia ragai iava rugorugooa oiso toupai, Viapau uvipavie ioso ra voeao ratau tou irara vavagisi piepe vao-ia vigei Jiu-pa irara vaaro riro vavata reo goru. Uvare evoea iava sopaura oaive porepa virora Pautoa iare rera sirova utupasa. <sup>20</sup> Ari varao raga oara iava voea vatepere ae vai pasia vai oiso, Opeita varao korouou aioro aiopata, oara vatepaiveira oearovu tokarasi irarapa vara-ia vuivui purapaoro. Opeita ora visiiva otopata, oara kavu iraota. Opeita vo karero varuere kare aiopata okarea kopii piepataveira voea kaapaoro, vo rara viapau oiso revasiva puteive vo kare iava. Opeita revasiara aiopata. <sup>21</sup> Uva varao raga iava voea vatepaei rara, uvare varao Tugoropa Reoro toupaiveira vao-ia Jiu vaaro-ia Reo Taisi. Oara vatepaiveira vieiara sovara-ia Sabat vokiro rutu-ia vo Jiu Reo Taisi Uvupa Keparo rutu-ia vova tuariri rutu.”

### Pasia Sipoiva Voeaopa Oirao Pie Vovou Irara Voeao Ratau Tou Irara

<sup>22</sup> Oire va iava voea aposel irara, ora reipa irara, ora voearo rutu tapo lotupa irara, oea vaea vovou kataia raga puraiva ora guruoro aitereivu reesioro ora voea iava ae iare Pol vaio ora Banabas, oiso ra voea rutu avaave Antiok iare. Uva vaiterei vaisiaro-a vaitereo Judas Basabas ora Sailas, aiterea-ia oisoa vearo vaisi purapaive oirao pie vovou irara.

<sup>23</sup> Uva vaiterei tapo vo pasio sipoiva oa-ia oiso purapaoro,

“Igei aposel irara ora riro irara tapo igoa visiiva oiso puraiei, Vearo voki rutu araoko irara oao, visiigoa evoa toupataveira Antiok-ia, ora Siria-ia, ora Silisia-ia. <sup>24</sup> Ari ita, visii iava uvuiovora vo uvare oearovu voearo igei iava avaaera oiso visii tavitavisa. Uva visii vavagisi piepaivora oiso purapaoro, Uvuipatai ra Jiu vaaro sirova ututa Reo Taisi vo pitupituo-ia rakari verapa pitupitu. Ari ita, taraiapatai oiso, Viapau rutu igei voea sipoiovora visii iare. <sup>25</sup> Oa iava ora guruierao evaiterei reesisa aeue-ia katai vovou. Uva turaro irara iava vaiterei uriosiei visii iare ae sirova igei vatetoareiaro Banabas vaio ora Pol. <sup>26</sup> Vaitereo-ia Pol vaio ora Banabas aiterea ora tootooarei oaesi piresivora vosa Turaro oaiopa kovopasivora ro Jisas Krais. <sup>27</sup> Uva vaitereo sipoiovoi visiipa Judas vaio ora Sailas, oiso ra ora vaiterei gisipoaro iava visii tavitavisa vearovira oiso osa evo rigato oa puraiovvoi visiipa. <sup>28</sup> Uvare igei ora Tugoropato Uraurato oiso aeuaiae, Viapau oiso vearovai ra vao riro vavata reo goru tovo ragapaio vo visii-ia. <sup>29</sup> Ari ita, varao raga oara sirova utu iraota oiso-ia, Opeita varao korouupa aioro aiopata oara vatepaiveira oearovu tokarasi irarapa vara-ia vuivui purapaoro. Opeita ora visiiva otopata, oara kavu iraota. Opeita vo karero varuere kare aiopata okarea kopii piepataveira voea kaapaoro, vo rara viapau oiso revasiva puteive vo kare iava. Opeita revasiara aiopata. Oire uva oiso-ia ra visii rutu vearovira ora visiiva tou iraopatavere, vorara varao sirova ututa. Oire evavi raga ra opesipe. Vearo voki rutu.”

<sup>30</sup> Uva tavitavipa resura oea sipoiva, oa iava voare avaaeapa evoa Antiok-ia. Oire va iava voa vo resura voea voeao oirao pie vovou irara guruiva voa vo rigato vatesa voeapa.

<sup>31</sup> Oa iava voea rutu vo rigato vieipaoro rirovira rutu rorupaiva, uvare voea iava sopaura oaive goru pieiva va-ia. <sup>32</sup> Uva Judas vaio ora Sailas profetatoarei aiterea riro kaekaevira voeapa siposiposiva voeao oirao pie vovou irara voea vo rugoroaro goru pieoro. <sup>33-34</sup> Ovokirovu isivaaro iava oeavu vaiterei sipo pieiva oiso puraoro, “Avasi gavaurea sovara-ia toupasa.” Uva vorevira voreeaepa aposel irara iare. <sup>35</sup> Oa iava Pol vaio ora Banabas tou rovosiva voa Antiok-ia vo voeapa siposipoporo aue iava Turaro vo reoroaro ora oearovu tapo riro irara.

<sup>◇</sup> 15:16: Amo 9:11-12; Jer 12:15    <sup>◇</sup> 15:21: Ap 13:15    <sup>◇</sup> 15:26: Ap 14:19; 1 Ko 15:30    <sup>◇</sup> 15:33-34: 1 Ko 16:11

*Pol Vaio Ora Banabas Ora Sikasiepa*

<sup>36</sup> Oire uva ovokirovu isivaaro iava Pol oiso puraroepa Banabas-re, “Vearopai vosa kareve ora vegei araoko irara oaro kekesa, voeao oea oiso toupaiveira voraro uruiaria vo uvaroa voea siposipo rovoveva ae iava Turaro vo reoroaro. Oa iava uvuipaveiei ra taraive voeao-ia oiso, Apesi ragavira toupai. Ra voea ita tauvave.” <sup>37</sup> ♦ Vo osa Banabas Jon-pa ruipaparoepa, rera raga Mak, oiso ra rera tapo avasi voare. <sup>38</sup> ♦ Oire va iava Pol rerare oiso rugorugooparoepa, Easi viapau uvuipaveiei ra rera tapo avave. Uvare ita vegei kavureva ae-ia Pamfilia-ia vo kovopareasipaoro. <sup>39</sup> Oa iava ora aveavesiepa. Uva viapau oiso katai vovou vai-ia toupasiva. Oa iava ora tavarisiepa oiso, Banabas avaroepa Saipras iare vaiterei ora Jon Mak selpa uvuo-ia. <sup>40</sup> Ovusa Pol Sailas tapo avaroepa. Vo ovusa voeao oirao pie vovou irara Pauto vo tokiaro sovara-ia vaiterei tovoiva. <sup>41</sup> ♦ Uva avasiepa vo Siria taererei ora Silisia-ia vuutaaro-ia lotupa kovo voraro goru piepaoro.

## 16

*Timoti Pol Vaio Tapo Avaroepa Ora Sailas*

<sup>1</sup> ♦ Oire voa pousi viropa vo Debi-ia ora vo Listra-ia. Uva voa iravu oisoa toupareve oirao pie vovouto rera vaisiaro, Timoti. Uva aakova Jiu-pava ora oirao pie vovouva tapo, vo ovusa aiteto-a Grik-pato. <sup>2</sup> Uva voeao oirao pie vovou irara oea oisoa Listra-ia toupaive ora Aikoniam-ia oea oisoa oiso purapaave rerare Timoti, “Vearotoa rutu ro-ia.” <sup>3</sup> ♦ Oire va iava Pol rera akereva oiso ra rera tapo kovopareve vo voka-ia vao. Ari ita, vo osa rovovira rera rakari vera rovoreva, uvare riro irara Jiu-pa irara oisoa voa toupaive. Uva oiso tapo taraiia ouiva uvare aiteto-a Grik-pato ira oisoa rera-ia koruparo vapa eva rakari vera. <sup>4</sup> Oa iava avaaepa voea uruiara ruturoaro iare vao reo goru vatepaoro voeapa voeao oirao pie vovou irara. Vo reoro-ia varao iava ae korouopa aioropa, ora otopa pitupituropa, ora varao tapo revasipara aio arapa evo reo oa puraiva aposel irara Jerusalem-ia. <sup>5</sup> ♦ Oire vokiara rutu-ia lotupa kovo goru pieiva, vo osa voeae rutu voeao vieiaro riroepa.

*Vo Pol Masedonia-pato Kekereva Areo Uusi-ia*

<sup>6</sup> Uva vorarore vokaiva Frisia-ia ora Galesia-ia, vo osa Tugoropato Uraurato voeare korukoruroepa Esia Provins-ia siposipo arapa Turaro vo reoaro iava. <sup>7</sup> ♦ Uva va iava poua viropa vo Misia-ia uvuiaro rekasiaro-ia akeakevira avapaoro, oiso ra poua viro Bitinia-ia. Vo ovusa Tugoropato Uraurato goruvira rutu voeare oiso puraroepa, “Avoeao, opeita voare puteta Bitinia-ia koatasa.” <sup>8</sup> Oa iava voka ragapaoro ae Misia-ia vuutaaro iava varaaepa Troas iare. <sup>9</sup> ♦ Oire evoa-a uva areo uusi oureva Pol vokiaro oa-ia iravu oirato kekereva Masedonia-pato, ovusa variripaoro torepaooro keeraparoepa oiso purapaoro, “Vore uriou Masedonia-ia igei tauvasa.” <sup>10</sup> Vo areo uusi isivaaro iava vatatopopaaepa Masedonia iare avasa. Uva ragai Luk voeae tapo avaraepa. Uva voavi raga oiso taraiiepa, Pauto igei sipopare rera vaaro vatesa Vearo Siposipo.

*Lidia Sopaua Poreeva*

<sup>11</sup> Oa iava Troas iava avaiepa selpa uvuo-ia torevokovira Samotres iare avaoro. Oire voava ita utupa voki-ia ae iare avaiepa Niapolis. <sup>12</sup> ♦ Uva voava Filipai iare vao rovopa urui vovio Masedonia-ia sovara-ia. Vo uruio oa oisoa tokipareve gavman ro vova Romania. Oa iava voa ovokirovu-ia toupaiova. <sup>13</sup> Uva Sabat voki-ia kosi viroiepa vore uuko ovi sirova oiso ragavira rugooro, Ari voa-a vo uva Jiu-pa irara variripa tapiaro toupaiveira. Uva voa uvuruoro airorovu riakora siposipoiova. <sup>14</sup> Oire uva iriavu riakova oira vaisiaro, Lidia vova Taiataira. Iria oisoa raove varoro raga sipopaeve vara-ia moni oupaoro, eira iria oisoa lotu purapao Pautoa iare. Oire Pol vo siposiporoaro uvueva. Uva Turaro oira sopapro karureva. Oa iava rera vo reoroaro sirova utuopa. <sup>15</sup> ♦ Oire uva va iava baptaisa

---

♦ 15:37: Ap 12:12   ♦ 15:38: Ap 13:13   ♦ 15:41: Ap 16:5   ♦ 16:1: Ap 14:6; Ro 16:21; 2 Ti 1:2   ♦ 16:3: Ga 2:3   ♦ 16:5: Ap 15:41   ♦ 16:7: Ro 8:9; Ga 4:6   ♦ 16:9: Ap 9:10, 18:5, 20:1, 3, 27:2   ♦ 16:12: Fl 1:1  
♦ 16:15: Ap 11:14; Lu 24:29

ueava ora voeao tapo oea oisoa oira vo kepaaro-ia toupaive. Oa iava igeire oiso puraopa igei akeoro, “E uvuipatai ra ragai tapo uvurusa uriota vo kepa oaa-ia, vo rara oiso ragai taraipata, Oirao pie vovouva o-ia.” Uva oisi raga oiso voreripavira igeire keerapaoro oiso purapaopa. Oa iava oira tapo avaiepa.

*Pol Vaio Ora Sillas Tuukeiva Vo Filipai-ia*

<sup>16</sup> ♦ Uva ovokivu-ia avaiepa varirisa. Uva voa iriavu igei tapo uvurusa urioopa kovopava. O-ia riakova riro reova varao-ia oara utupaua karekepape. Uva vo reoroa oisoa purapaeve aevo goruaro-ia tugara, osa oiso riroa monia oupaeve. Va oupaoro voeaopa vara vatepaeve oea oisoa oira tokipaive. <sup>17</sup> Uva oira igeire ora Pol oiso keerapaoro utupaopa, “Voeao Reitoa rutu Pauto kovopa iraraaro, oea oiso vigei tavipaiveira vao iava Pauto vaaro raiva oa-ia uvuiparoi ra vigei vorevira oupareve ora rera iare.” <sup>18</sup> Uva oisoa vokiara rutu-ia oisi raga piepaeve. Oire va iava Pol reasioro oirare ora poreroepa oiso purasa auere tugarato ro oira reraaro, “Jisas Krais vo goruaro iavirava vii tavipaa, ra oira arova kosi viro.” Uva va iava kosi ovoiro viropa oira iava vo voki raga-ia.

<sup>19</sup> Oa iava voeao oea oisoa oira tokipaive taraiaea oiso, Easi kovoaa oavi opesiei. Viapau oiso moni oupaviovere oira ruvara-ia ita. Oire uva voava kasipuoro vaiterei sitaiva Pol vaio ora Banabas vaiterei ivuoro. Uva voava vo urui sovara-ia vuruvuru-ia vaitereiava avaaepa oira vasi irara iare voeao tapo ora gurusa. <sup>20</sup> Uva oa-ia oiso puraaepa, “Voeao Jiu-pa irara oea vigei vo uruiaro vuri piepaeveira. <sup>21</sup> Voea vo pitupituroaro-ia siposipopasi pisavira rutu. Uva vigei vao-ia Rom-pa irara viapau uvuipavieie ra va-ia vearo vaisi purape.” <sup>22</sup> ♦ Uva va iava riro irara rutu ora uvuruaepa vaitereo Pol vaio ora Sillas uposa. Uva vo uvurua-ia ora voeao iava voeao turaro irara kuvupara oaiive karikaripaiva rirovira rutu kasipuoro vaitereire. Oa iava oiso puraaepa, “Vaiterei ragita.” <sup>23</sup> Oa iava vaiterei ragipaiva rirovira rutu. Uva vao isivaaro iava tuukepa kepa tokipato vateiva vaiterei oiso puraoro, “Vearovira rutu vaiterei tokiparivere.” <sup>24</sup> Oire va uvuoro vaiterei peoreva oisirire tuukepa kepa rutu sovara-ia. Uva evoa-a uva vaiterei iava tasiara kaporeva evao peroro-ia vaiterei tuukeoro.

<sup>25</sup> ♦ Uva voki vuuta-ia Pol vaio ora Sillas Pautoa-pa variripasiepa erapaoro rera-ia vuurapa vaisi purapaoro. Vo osa oearovu tuukepa irara vaiterei uru piepaiva. <sup>26</sup> Va purasivoiva, riroto ravurike karekeroepa. Uva tuukepa kepa vituaro rikerikeepa. Oa iava riro tuparo karu piropa akukuvira. Ora kapo tuukero tapo varao vova voeao rutu tuukepa irara kokotoaro iava rutu kovekoveepa oisi raga akukuvira. <sup>27</sup> Oire oa iava ro ira oisoa tuukepa kepa tokipareve eraoroepa rirota tuparo vo karuparoaro kekesa. Va iava ora rerare sigoa goro ragareva oiso ra ora uporo, uvare oiso keaparoepa, Voea vai rutu tuukepa irara toriivo. <sup>28</sup> Vo osa Pol rerare koruroepa oiso puraoro, “Ae, opeita eva purapari ora vii-ia. Easi igei rutu-a vao vo-ia.” <sup>29</sup> Va iava vuravu arereva, oa iava oira-ia avapaoro ikauvira koataroepa. Oire uva rirovira rikerikepaoro koveroepa vaiterei kokotoaro-ia Pol vaio ora Sillas. <sup>30</sup> Voava vaiterei tapo kosiro viropa oiso purapaoro, “Avoeao apeisi vai ragavira uvuiparai ra vuriara oaa iava ora porera?”

<sup>31</sup> ♦ Uva rerare oiso purasiepa, “Ro Turaro Jisas Krais oirao pieri. Oa iava vuriara oara iava uvuipau ra poreu viro, visii rutu vao-ia ora voeao vii vo kepaaro-ia tapo toupaiveira.” <sup>32</sup> Oire vao isivaaro iava voeao rutupa siposiposiva ora voeao oea oisoa rera vo kepaaro-ia toupaive va iava vao Turaro vo reoaro. <sup>33</sup> Vo vuuta raga-ia eva vo vokiaro ro ira oisoa tuukepa kepa tokipareve vaitereipa iava kapuara sisureva. Vao isivaaro iava baptaisa oureva ora voeao tapo oea tapo oiso toupareve. <sup>34</sup> Oire uva vaiterei koata pierereva rera vo kepaaro-ia vaiterei aio vatesa voa. Uva voa rirovira rutu rorupareva ora voeao oea tapo oisoa toupareve, uvare oirao piea ouiva.

<sup>35</sup> Oire vokipaua voeao reipa irara oea polis irara aruiva auere tuukepa kepa tokipato tavia, oiso ra vaiterei kosi pierere. <sup>36</sup> Oa iava ro tuukepa kepa tokipato vaitereire oiso puraroepa, “Avasi gavaurea sovara-ia toupasa.”

◊ 16:16: Diu 18:11; 1 Sml 28:3, 7   ◊ 16:22: 2 Ko 11:23, 25   ◊ 16:25: Ef 5:19   ◊ 16:31: Jo 3:16, 36, 6:47

<sup>37</sup> ♦ Ari oiso puraroepa Pol, "Akoea, viapau oiso torevokovira vegei kort rovoivorao. Oa iava vegei ragi ragaivorao oearovu rutu osireiaro-ia. Vegei toupaveairra vo Rom gavman sovara-ia. Uva apeisi-a? Evoea uvuipaai ra oisi raga ita vegei kosi pie ragaive ita vatauvira voava vo tuukepa kepa-ia, eke? Uva voea tavi iraopari, ra voea raga urioave vegei kosi piesa voava vo-ia."

<sup>38</sup> Oire uva va iava voeao polis irara reipa irara tavisa voreaeapa. Uva voea-a voeao oea rirovira rutu uririaeapa, uvare oiso ragavira taraiaea Pol vaio-ia ora Sailas, Eari Rom gavman vaitereiaro vaitereo. <sup>39</sup> Uva evoea urioaepa vaiterei kosi piesa. Oa iava vaitereire oiso puraaepa, "Vei-ia viria pura ragaio. Uva oiso vovoupaiei ra vo kavuoro ava iraosi uvai ragare." <sup>40</sup> Va isivaaro iava tuukepa kepa iava avasiepa Lidia vo kepaaro iare. Uva voa-a evoa uva oearovu riro oirao pie vovou irara kekesiva. Oa iava voea vovouaro goru piesiva voa. Vao isivaaro rutu iava voa rutu vo kavuoro avasiepa.

## 17

### *Tesalonaika Vata Pol Vaiore Ora Sailas Rirovira Kasipuaepa*

<sup>1</sup> ♦ Uva Pol vaio ora Sailas vo uruireo-ia vokapaoro avasiepa Amfipolis uruia ora Apolonia. Uva voava aue-ia pousi viropa Tesalonaika urui uva oisoa Jiu vo kepaaro Reo Taisi Uvupa Kepa Sinagog toupaise. <sup>2</sup> Uva ora rera vo pitupituaro raga sirova utuoro vo kepa-ia koataroepa. Uva voa vo peva-ia Sabat vokiro Tugoropa Rigato voeapa karukarureva Pol <sup>3</sup> ♦ vo reo aviavi piesa Jisas vo siitokaaro iava, ora vao iava tapo osa vorevira toreroepa kopii tapi iava. Oa iava Jisas oirao pierava voeapa oiso puraoro, "Ari ita, Pauto reraaro Ropoto rutu Jisas." <sup>4</sup> Uva oearovu rera vo reoaro oirao pieiva va uvuoro. Oa iava oiso vovouaepa ra vaiterei tapo ora takuvuave. Ora oearovu Grik iava riro irara oea oisoa Pautoa-pa lotu purapai, ora airorovu oira vasi riako.

<sup>5</sup> Ari ita, oearovu voea raga iava Jiu-pa irara oea viapau oiso vaiterei vo reoaro uvuiva va oirao piesa. Evoea-a oea oisoa vaiterei vo kovoaro riiriipaive. Uva voea riro pokapoka irara oea ouiva oearovu tapo ora takuvusa aue Jiu, oiso ra voea rutu Pol vaio tapo ora upoave. Oa iava voea rutu avaaepa Jeson vo kepaaro-ia Pol vaiore taraasa voa. Uvare oiso ruipapaaepa ra oirara rutu osireiaro-ia vaiterei karekeive. <sup>6</sup> Oire uva vaitereire vura ragaoro Jeson ouiva ora oearovu tapo voearo oirao pie vovou irara. Uva voea rutuva avaaepa voea ivuoro voeao iare oea oisoa vo urui-ia turaropaave. Oa iava voeare oiso puraaepa, "Avoeao vaitereo Pol vaio ora Sailas aiterea oirara rutu vavagisi piepasiveira uvarovu rutu. Uva oisi-a oiso osa piesa vore ita uriosie <sup>7</sup> ♦ aue iare Jeson taveteoro. Aiterea-a vaitereo Sisa vaaro reo goru pute iraopasiveira oiso purapaoro, Iravu epao king. Rera vaisiaro, Jisas." <sup>8</sup> Oa iava oirara rutu ora turaro irara oea oisoa vo uruio-ia toupaise oea vo reo vao uvuoro ora sitaaepa rirovira rutu rugorugooro. <sup>9</sup> Oa iava Jeson ruvaria moni ouaepa ora oearovu voeao riro oirao pie vovou irara oiso-ia, Vosa viapau viria vai purasivori, oire vo vori vao voeapa Jeson vase vore pieive. Oisi-a eisi osa vaiterei pieivoiva, vaiterei iava vaseiva. Oa iava avasiepa.

### *Pol Vaio Ora Sailas Kovosiva Beria-ia*

<sup>10</sup> Uva vo rupa raga-ia Pol vaio ora Sailas sipo pieiva voeao oirao pie vovou irara aue iare Beria. Uva voare avasiepa. Oa iava Jiu vo kepaaro-ia Sinagog koatasiepa voeapa siposipo rovosa voa. <sup>11</sup> ♦ Voeao oea oisoa vo Beria-ia toupaise oea viapau oiso oisoa toupaise osa voeao Tesalonaika-pa irara, oea vaaru vovouvira rutu oisoa toupaise auepa vo siposiporo uvu arapa. Ari voeao Beria vata vo rugorugooro karu viropa, ovusa voeapa siposipopasiva. Uva va-a vao oa vituaro-ia oisoa vearovira Tugoropa Rigato taraapaise voeao Beria vo osa Pol voeapa siposipopareve vaore, oiso ra rera vo siposiporoaro uvupaoro vearovira vara uvuipaive, vosa va rutu sirova torevokopape Pol vo siposiporoaro. <sup>12</sup> Oa iava riro irara rutu Jisas oirao pieiva oiso-ia, airorovu-a oira vasi riakoro Grik iava, ora oearovu rutu oirara. <sup>13</sup> Vo ovusa oearovu Jiu-pa irara voeao oisoa vo toupaise Tesalonaika-ia oea va iava uvuiva vao oa purapasiva Pol vaio oirara-ia voeao

♦ 16:37: Ap 22:25-27   ♦ 17:1: Ap 27:2   ♦ 17:3: Lu 24:26, 46   ♦ 17:7: Lu 23:2; Jo 19:12   ♦ 17:11: Ais 34:16; Lu 16:29; Jo 5:39

Beria-ia Pauto vo reoaro vatepaoro. Oa iava voare avaaepa voea piururuosa voea kasipu pieoro. <sup>14-15</sup> ♦ Oa iava oearovu oirao pie vovou irara Pol sipo pieiva uvavu avakava-ia. Uva voava Beria-ia Pol tapo avaaepa oearovu ae arova Timoti vaio ora Sailas Atens iare. Oire uva voa touoro vaitereire vorevira voea kokareva oiso, “Ragai iare ikauvira Timoti vaio ora Sailas arusa karepatai. Ra ragai tapo tousa utusi vo-ia.”

#### *Vo Toupai Pol Iava Vo Osa Atens-ia Toureva*

<sup>16</sup> ♦ Vosa vaiterei ateate piepaoro Atens-ia Pol rirovira rutu rugorugoo iraoparoepa voeaore oea oisoa sopaura oaive tovopaire aue-ia tokarasiara oaive, voea rutu voeao vo urui rutu sovara-ia tou irara. <sup>17</sup> Oa iava avaroepa oavu iare Sinagog Jiu vaaro voa oearovu tapo Jiu-pa irara ora reoreosa ora oearovu oearoa oisoa Pautoa-pa lotupaave. Uva vokiara rutu-ia tapo aivaropa tapi oisoa voea tapo ora reopasa avaparo. <sup>18</sup> ♦ Ari ita, oearovu voearo riro tarai irara oea tapo oisoa Pol tapo uvurupaave oiso-ia, Epikurian-pa irara voeao, ora Stoik-pa irara. Uva oisi voearei rutupa siposiporeva Jisas iava ora rera vo torearo iava tapo. Vo osa rera vo reoroaro pukopaoro oiso puraaepa rerare, “O ita. Koovooto eera ira riroara rutu reoara purapare.” Vo ovusa oearovu oiso puraaepa, “Eera vigei siposipopare oearovu raga iava pisa irara pau irara.” <sup>19</sup> Oa isivaaro iava vao rerava Pol avaaepa aivaroa iare aue kukuearo-ia Ariopagas Pukui. Voa uva oisoa oaravu rutu lotuara rovirieipasa ora gurupaave. Oa iava voa rerare oiso puraaepa, “Vearopai vosa igei taviri oraivai raga iava vao-ia osa ragavira vii vo reoroaro toupaiveira. <sup>20</sup> Uvare pisa reoro rutu purapariveira. Eva-a oa iava oiso ruipapaiei ra vara porearo iava vearovira rutu taraiio.” <sup>21</sup> Uva voearo Atens iava ora oearovu tapo aapaapau irara oea rutu oisoa reo uvu ruipapaave orekerovu iava varao airepara, oara iava tavitavipaave oearovu.

<sup>22</sup> Uva va iava Pol toreroepa voea rutu osireiaro-ia voa vo Ariopagas Pukui-ia oiso purasa voeare, “Visii vao-ia Atens-pa irara. Uvuiparai visii kekeia vo ovusa avivikepata rirovira rutu oearovupa pau irara. <sup>23</sup> Ari ita, vo osa oisoa vokapaa, uva riroara rutu eravaoara oisoa kekepaoro viripaa voraro rutu visii vo uruiaro sovara-ia. Uva oavu-ia vo rigato epao oa oiso oisoa toupaive oiso-ia, Vao-a vao eravaoa ropa pauto ira-ia viapau taraipavie. Uva rera-a ro pauto irapa oisoa lotupata vo rera-ia tarai asavira, ira iava oiso ruipaparai ra visii tavitavia.

<sup>24</sup> ♦ Ro-ia Pauto ira vo rasio rutu purareva ora orekerovu rutu varao oara rera sirova toupaiveira. Aue iava uvare rera reitoa rutu ora rovopatoa rutu vo vuvuiua-ia ora vo rasitoa-ia. Ari ita, viapau oiso vo toupareveira lotupa keparo-ia oara purapapeira vo ora vigei vavaearo-ia. <sup>25</sup> ♦ Ora oiso tapo vo osa oearovu viapau uvuipaai ra oaravu avu vai rerapa vatepaive vo osa rerapa kovopaeve. Eake iava? Uvare vara rutu-a vatepareveira oiso-ia, tootooa vao, ora vovoua, ora orekerovu rutu varao oaria vatevatea purapareveira oirara rutupa vo rasio rutu-ia. Uvare vaea kaevira raga toupapeira. <sup>26</sup> ♦ Ari ita, oirara rutu purareva kataito raga iava ro-ia rovopato. Ira raga iava voea rutu rigareva voraro ruture vo rasio rutu-ia. Uva rera raga Pauto vo vokio reesireva oa-ia karekeaverea, ora vo vokio oa-ia voea rutu opesiaverea, ora vo tapo uva toupaiverea taru. <sup>27</sup> Uva vara rutu-a varao ora rera ragare taraapasa oara purareva. Uva vai pasi uvuipaai ra rera vai kekepaive Pauto vo ora vara raga iava. Ari ita, oiraopavira rutu viapau oiso tauaivira vigeipa toupareveira Pauto. <sup>28</sup> Uvare Pauto raga iavirava tootoopavie, ora rera raga iavirava vokapai, ora auero rutu purapai rera raga iavirava. Oiso osa iravu visii iava riro taraito rigatoa purareva oiso, Vigei rutu-a Pauto ovii iraraaro. <sup>29</sup> O ita, oiraopavira vigei-a Pauto ovii iraraaro. Uva viapau rutu uvuipavie ra oiso rugorugoopavio oiso puraoro, Easi oirara raga Pauto puraiva oiso osa tokarasi aue-ia gol ora silva ora avekea vo oirara raga vo rugorugooaro sirova utupaoro. <sup>30</sup> Ari ita, Pauto ira oisoa oirara rutu vura ragapareve voari tuariri rutu vo ovusa vaaru u vovouvira toupaive voea vo pitupituroaropa voea rovirie arapa. Uva vo vokio goruvira rutu oirara ruture oiso puraparoi, Visii rutu vuriara oavisii iava poreta viro. <sup>31</sup> Eake iava? Uvare

---

❖ 17:14-15: Ap 15:3    ♦ 17:16: 2 Pi 2:8    ♦ 17:18: 1 Ko 4:10; Ap 4:2    ♦ 17:24: Ais 42:5    ♦ 17:25: Sam 50:10-12    ♦ 17:26: Mal 2:10; Diu 32:8

ovokivu reesireva vao oa-ia oirara rutu taru rovirieireverevo vo rasio rutu-ia kataitoa raga uvuiarovu Jisas. Eera ira-ia vo reesi oiraopavira purareva rera vorevira kopiia iava tore pieoro,” eisi osa puraroepa Pol.

<sup>32</sup> Ari ita, vo osa vo reo uvuoro rera torearo iava Jisas rirovira ora agesi pieaepa vo va-ia vakuvakupaoro. Ovusa oearovu voea raga iava oiso purapaaepa, “O ita, igei oiso ruipapaiei ra vii vo siposipoaro uvuio ita va iava eva.” <sup>33</sup> Oa iava voea arova ora vaseroepa Pol vorepaoro. <sup>34</sup> Vo osa oearovivu rera sirova ora tavosiaepla oiso-ia, Daionisas ro Kaunselto vova Ariopagas Kort, ora o-ia riakova Damaris, ora oearovu tapo.

## 18

### *Pol Vo Kovoaro Iava Korin-ia*

<sup>1</sup> Va isivaaro iava Pol avaroepa Korin iare vova Atens-ia. <sup>2</sup> Uva voa aivaroreva iravu tapo rera vaisiaro, Akwila ira kavauroepa Pontas urui-ia. Ira airevi raga urioroepa vatuava oaro tapo aue iava Itali-ia. Aue vituaro iava uvare iravu king ira reo goru-ia oiso puraroepa, Voea rutu Jiu-pa irara vo kavu iraoivere Rom-ia. Uva rera vaisiaro ro-ia, Klodias Sisa. <sup>3</sup> ♦ Oire uva Pol vaiterei tapo toupaoro kovoreva, uvare vaiterei vo kovoaro oiso rutu oisoa toupaive osa Pol vo kovoaro aue purapaoro varo keparo. <sup>4</sup> Uva oisoa vokiara rutu-ia vo Sabat vokiro-ia vo Jiu vaaro-ia Reo Taisi Uvupa Kepa Sinagog toupareve Pol vo voea varaaro rugorugooara akeakepaoro, oiso ra porea viro Jiu-pa irara ora oearovu voea raga iava Grik-pa irara.

<sup>5</sup> Oire vo osa Sailas vaio ora Timoti kare ovoisiepa aue iava Masedonia-ia, ovusa vaiterei isivaaro iava oisoa Pol voea siposipopareve vokiara rutu-ia rera iava Ropoto Jisas Pauto reraaro rera oirao piepaoro voeapa. <sup>6</sup> ♦ Vo ovusa aue Jiu-pa irara rirovira rutu kaureopaave rerava rera reroaropaoro. Uva vo kaureo uvuoro Pol voea ruvara-ia kuvupatoaaro iava poupou tovetoveroepa oiso puraoro voeare, “Eagara, visii vaaro eva vuri reo kaureoa. Ari ita, vosa visii vao-ia riroirovira raga toupata vapa vao, uva viapau ragai vo vuriaro-a. Visii raga vaaro. Ari ragai evapa viapau. Ragoa kosiparavi ratau tou irara iare.” <sup>7</sup> Uva Sinagog iava kosiro viropa Pol avasa iravu vo kepaaro iare. Rera vaisiaro ro-ia, Tisias Jastas ira ro Pautoa-pa oisoa lotuparo. Uva rera vo kepaaro aue vatuaro-ia oisoa toupaive Sinagog Jiu vaaro. <sup>8</sup> Uva iravu Krispas ira oisoa Sinagog-ia reiparo, ira oisoa Turaro Jisas oirao piepareve ora voeao oea tapo oisoa toupareve rera vo kepaaro-ia. Ora oearovu rutu tapo Korin iava oearoa rutu oirao pie vovou rutu ouiva Pol vo reoaro uvuoro. Oa iava voea rutu baptaisaepa.

<sup>9</sup> Uva orupavu-ia vokiaro aue Turaro areo uusi-ia oiso puraroepa Pol-re, “Opeita uriripaoro ora vii iava gisipo kapu piepari. Ari reo oara kosi piepari. <sup>10</sup> Uvare vii tapo toupaaveira. Uva viapau irai uvuiparoi ra vuria vai purareve vii-ia. Ari ita, riro irara rutu oirara oaa vo uruio sovara-ia karekeavere, Ragai voeao rutu.” <sup>11</sup> Oire uva voa Pol katai iva-ia toureva ora kuro iva tapo, vo osa Pauto vo reoaro iava voeae siposipopareva.

<sup>12</sup> Oire vo osa voa iravu ro-ia Galio ira airepavira rovoparoepa gavmanpaoro voa Grik-ia. Vo ovusa voea rutu Jiu oiso ruipapaaepa ra upoa purai aue-ia Pol. Oa iava rerava avaaepa aue iare kort oiso rera iava tavisa, <sup>13</sup> “Ro-ia ira vigei vaaro Reo Taisi putepareveira oraivarovu purapaoro Pautoa-pa lotupasa.” <sup>14</sup> ♦ Oire vo osa Pol voea vo reoroaro puko rovopareva, ovusa Galio ora poreroepa Jiu-pa irarare oiso purasa, “Vosa rera-ia taraipata oiso, Oearovu uporeva oirara, ora riro kaviruto, ora oaravu rutu tapo vuriara oisoa purapareve, eva-a oa iava uvuiparai ra visii Jiu uvua va-ia. <sup>15</sup> Ari vosa visii raga vaaro Reo Taisi, ora varao vaisiara, ora oreorovu rutu, uva visii raga uvuipatai ra vara torevoko ragata rera tapo. Oa iava viapau uvuiparai ra vara puraa.” <sup>16</sup> Osa iava voea kosi piereva voava vo kortupa tapi. <sup>17</sup> Uva vao oa isivaaro iava voeao Grik-pa irara aue Sostenis ouiva, ro ira oisoa Jiu vo kepaaro-ia Sinagog reiparo. Oa iava rera ragiiva vo kortupa kepa rataoaro riaaro-ia. Uva viapau va-ia eva oa puraiva rera-ia, Galio oavu avu vai purareva voea-ia.

♦ 18:3: Ap 20:34; 1 Ko 4:12

♦ 18:6: Ap 13:45, 51; 2 Sm 1:16; Esi 18:13

♦ 18:14: Ap 23:29

*Pol Antioh Iare Voreroepa Vo Siria Taere-ia*

<sup>18</sup> ♦ Uva-a voa vo Pol riro kaekae visivi toutou pierava. Oa iava voava ora vaseroepa voeao ruvara iava oirao pie vovou irara. Oa iava avaroepa selpa uvuo-ia aue iare Siria. Uva vaitereo-ia Akwila avukarei ora Prisila aiterea rera tapo avasiepa. Oire uva-a voa vo uvare avaroepa uva rera iava orui siiva rera vaaro reo ovoi reesioro, vao oa purareva voa Jiu-pa irara vo pitupituard. <sup>19</sup> Oire uva voava pouro viropa Efesas-ia. Uva voa vaitereo arova avaroepa Akwila avukarei ora Prisila rera raga Jiu vo kepaaro iare Sinagog voea rutupa voa siposiposa voea vo rugorugooaro tavariosa. <sup>20</sup> Uva rera ake ragapaiva oiso ra voea ruvara-ia tou rovoreve, ovusa voeare oiso puraroepa, “Easi viapau uvuiparai ra vo toua. <sup>21</sup> ♦ Uvare oiso vovouparai ra ikauvira raga avara Jerusalem iare.” Oire uva oiso voea tavireva, “Ari ita, vosa Pautoa raga uvuipa ragai vorevira kare piereve visii iare pasi.” Oa iava voava Efesas-ia ora vaseroepa va-ia selpa uvuoa.

<sup>22</sup> Uva voava avakava sirova o-ia pouro viropa vo Sisaria-ia. Oire voava taru avaroepa Jerusalem iare lotuara rutuva vearo vaisi purasa. Uva oisi-a eisi osa pierovoiva, Antiok iare vararoepa.

*Apolos Siposipopareva Vo Efesas-ia*

<sup>23</sup> Pol riro kaekae visivi toureva vo Antiok-ia. Uva va isivaaro iava avaroepa vokapaoro ouruirovu iare vo rasio-ia vo Galesia ora Frisia-ia. Uva oirao pie vovou irara sopaaro goru piepaoro vokapareva.

<sup>24</sup> ♦ Uva iravu Jiu-pato aue iava Aleksandria rera vaisiaro, Apolos. Riro vearo reo puratoa rutu, ora vao-ia tapo oisoa vearovira rutu rirovira taraiparo aue Tugoropa Vuku. Ira urioroepa Efesas iare. <sup>25</sup> ♦ Uva rera-a ro-ia ira oisoa taraiparo vo Turaro vaaro-ia raiva. Oa iava oisoa kasivarivira rutu torevokovira siposipopareve aue iava ro Turaro Jisas. Uva Jon vo baptaisaro raga-a oa-ia oisoa taraiparo. <sup>26</sup> Oa iava Jiu vo kepaaro-ia Sinagog siposipo rovoroepa goruvira. Uva Prisila vaio ora Akwila rera uvusivoiva, rera ousiva rera vearovira siposiposa rera tarai pieoro aue-ia Pauto vo raivaaro, uvare oaravivu vuri visivi rera vaaro-ia uvusiva. <sup>27</sup> Oire uva ro-ia Apolos ira oiso ruiapaparoepa ra avaro Grik iare. Oa iava oearovu oirao pie vovou irara rera tauvaiva oavu-ia rigatoad rerapa raiva karusa va-ia. Oire vosa pouro viropa voa Grik-ia, oa iava voa toupaoro voeao oearovu oirao pie vovou irara rutu rirovira tauvapaoro toupareva voa. Voeao oea Pauto vo kavikoaro sovara-ia Jisas oirao pieiva rutu. <sup>28</sup> Oa iava rera vaaro-ia goru reo rutu Jiu vo reoroaro putepareva vo oavu-ia ora reoa. Uva Pauto reraaro ro Ropoto oirao piereva rutu aue-ia Tugoropa Vuku.

## 19

*Pol Efesas-ia Toupareva*

<sup>1</sup> Uva vo osa Apolos Korin-ia toupareva, ovusa Pol oiso ragavira vokaoro vo pukuiro-ia urioroepa aue-ia pou virosa Efesas. Uva voa oearovu kekereva disaipel irara. <sup>2</sup> Uva voea akereva oiso, “E Tugoropato Uraurato outavorao vo oirao piea rovoaro isivaaro-ia?” Uva va iava oiso rerapa taeaaepa, “E uvare igei taraipaiei rera-ia ro Tugoropato Uraurato?” <sup>3</sup> Oire va iava voeare oiso puraroepa, “Ari eakere vao baptaisa-a oa outavorao?” Oa iava oiso puraaepa, “E aa vao-a? Ari vo baptaiso iava Jon oiso siposiporevora.”

<sup>4</sup> ♦ Uva Pol oiso puraroepa voeare, “O ita, Jon ita obaptaisa vaterevora visii reesioro visiigoa poreta virora vuriara oavisii iava Pautoa iare. Oire ita, tepa Jisas tapo oirao pieta ro ira iava oiso puraroera Jon, Ro ira ragai sirova uturovere utupaua. <sup>5</sup> Oa uvuoro baptaisaepa ora reesioro, ra rera vaisiaro-ia Jisas Krais toupaiva. <sup>6</sup> ♦ Osa iava Pol ora rera vavaearo tovoreva voea-ia. Oa iava voea iare Tugoropato Uraurato rerereva. Oa-a eva oa iava osasarovu rutu aue reoara puraiva Tugoropato Uraurato goruaro-ia, ora varao tapo reo ravaaro. <sup>7</sup> Uva voea uvuiaro rutu-a voeao katai tau erao (12).

❖ 18:18: Nam 6:18; Ap 21:24; Ro 16:1 ❖ 18:21: 1 Ko 4:19 ❖ 18:24: Ap 19:1; 1 Ko 1:12, 3:5-6, 4:6; Ta 3:13  
❖ 18:25: Ro 12:11; Ap 19:3-4 ❖ 19:4: Mt 3:11; Ap 13:24-25 ❖ 19:6: Ap 6:6, 8:17, 2:4, 10:46

<sup>8</sup> Oire uva oisoa Pol avaparo Jiu vaaro iare Reo Taisi Uvupa Kepa Sinagog voea sipoipopasa uriri asavira rutu vo peva sovara-ia kekira. Uva oisoa voea rugooaro akeakepareve, oisore ra oiso pieve osa rera vo rugorugooaro Pauto vaaro iare Sara. <sup>9</sup> ♦ Ari vo osa oearovu viapau oisoa rera reoaro uvupaive. Uva vao vituaro iava Turaro Krais vo raivaarova oisoa kaureopaave oira uvururo osireiaro-ia, uvare viapau oirao pie vovou vai oaive. Va iava voea tapo disaipel avaroepa oavu iare skulpa kepa aue vaaro Tiranas. Uva voa vokiara rutu-ia voea oisoa sipoipopareve. <sup>10</sup> Uva vo pitupitu-a vao oa purareva erao ivarei sovara-ia. Oa iava oirara rutu vo Esia Provins sovara-ia tou irara Turaro vo reoaro uvuiva, voea rutu voeao Jiu-pa irara ora Grik-pa irara.

#### *Siva Ovii Iraraaro Iava*

<sup>11</sup> Uva voa vo tou-ia Pauto Pol-pa gorua vaterева. Oa iava voa pisipisa kovoro ravoto kovoro rutu purareva. <sup>12</sup> Oire voa varao purareva osasararovu rutu iava varo tokotokoro voea vararo vara-ia gavipasa. Uva vara-a evara oara oisoa oupaoro avapaave vo voearo-ia upiapa irara vara tovopasa. Ra vara raga iava porete ovoipaave. Ora aue tapo tugara karero kosi piepaive vo vara raga-ia varao varo tokotokoro.

<sup>13</sup> ♦ Oire oearovu tariri irara Jiu oea vo kovoaro-a vao-ia pisa kovo tugara kosi piepa kovo oirara iava. Uva urioaepa vo kovo purasa akeakevira Jisas vaisiaro sovara-ia oiso puraoro, "Visii vao-ia tugara kosi viro iraota, uvare vao-a oa puraio Jisas vaisiaro sovara-ia, ro ira iava Pol sipoipopareveira." <sup>14</sup> Uva voea voeao-ia erao vatara aue Siva ro Rovopato Pristo Jiu reraaro. Ira ovii iraraaro oea vo kovo puraiva. <sup>15</sup> Oire uva ro oirato rera iava tugarato oiso voea tavireva, "O ita, ira eveipaa eera Jisas vaiterei ora Pol. Ari irou irara visii?" <sup>16</sup> Vao isivaaro iava voea rutu-ia ora vikiroepa rera ro ira-ia oisoa tugara toupaive. Oa iava voea upopaoro virireva. Uva va iava kasikasioro toriiva gapuvira raga rirovira rutu ora voea iava varaura oaive kapua pieoro. <sup>17</sup> ♦ Uva vo sipoipopo rera iava ikauvira rutu voraro rutu avaepa Efesas sovara-ia aue iare Jiu-pa irararei ora Grik. Uva riroa rutu uriria ouiva. Oa iava Turaro Jisas vaisiaro riro pieiva. <sup>18</sup> Oire uva oearovu voearo oirao pie vovou irara oea urioaepa voea iare voeapa kosi pievira tavitavisa, oisore ra vuriara oaive kavuive varao oara oisoa purapaive voviri tuariri. <sup>19</sup> Uva oearovu voea iava oearoa oisoa kuuvu kovoro purapaive, ora voea vararo kuuvu kovoro purapa vukuro ouiva vara kasisa voea rutu osireiaro-ia. Uva vara rutu voriaro uvuiaro-a oiso toupai, Riroara rutu silva moniro (K50,000).

<sup>20</sup> Uva oiso rutu goruvira Pauto vo reoaro touva voa. Uva viapau oavu avu vai uvuipaepa oiso ra va puteve vo osa goruvira rutu kovaepa.

#### *Vo Efesas Vata Kasipuaepa Pol-re*

<sup>21</sup> Uva varao isivaaro iava Pol goru rugorugoo oureva, oiso ra vorarore avaro Masedonia-ia ora Grik-ia. Oire vo osa vorarore avaro uvaroava, uvuiparoi ra Jerusalemia pouro viro. Va iava oiso puraroepa, "O ita. Tepa ra Rom-ia kekeavere." <sup>22</sup> Vaitereo aiterea oisoa rera tauvapasi ira piereva Timoti vaio ora Irastas Masedonia iare. Vo osa oiso aueparoepa ra tou pie rovoreve voa vo-ia Esia Provins-ia.

<sup>23</sup> Oire uva vo vokia-a vao oa-ia riroa upoa karekeepa vao-ia Turaro Krais vaaro raiva vo-ia Efesas-ia. <sup>24</sup> ♦ Iravu rera vaisiaro, Demitrias ira oisoa kovopa irara oaro tapo oaravu garepa keparovi lotupa keparo purapareve aue-ia silva. O vo keparoaro riakova pauva iria vaisiaro, Atemis. Ora oearovu tapo tokarasi irara oea tapo oisoa purapareve vara raga-ia silva. Oara rutu-ia oisoa riroa rutu voria oupareve ora oirara oaro tapo.

<sup>25</sup> Oire uva ovokivu-ia ora rera voeapro gurileva kovopa irara, ora oearovu tapo voearo oearoa areiivira raga oisoa oisi kovopaive tokarasi purapaoro. Oa iava voea ruture oiso puraroepa, "Avoeao, taraipatai vao-ia kovoa oa raga-ia monia oupapeira. <sup>26</sup> ♦ Visii uvuipatai ra vurata ora uvuta varao-ia oara purapare Pol oiso purapaoro, Voeao-ia pau irara tokarasi irara oea purapai ora voea vavaearo iava, viapau oiso oiraopa irara. Ira-a ro-ia Pol ira voeao rutu vovouaro soporerevora Efesas ora uvarovu rutu voraro Esia

◊ 19:9: 2 Ti 1:15; Ap 9:2 ◊ 19:13: Mt 12:27; Mk 9:38; Lu 9:49 ◊ 19:17: Ap 2:43, 5:5, 11 ◊ 19:24: Ap 16:16,

19 ◊ 19:26: Sam 115:4; Ais 44:10-20

Provins-ia. <sup>27</sup> Uva vao-ia oa iava pasi vao vigei vaaro kovoa oavi opesipere, ora varao tapo voriara oavi. Ari ita, uva viapau oiso vara raga varao-ia, ari pasi vao tapo-a osa vai pasi viapau oiso oearoi varaopa lotupa keparo Atemis varaaro avivikepaavere. Oa vai iava vo keparo varao tou ragapaivere pasi. Ora oira tapo o-ia Atemis vaisiaro rereevore iriapa oirara rutu lotu purapaaveira vo-ia Esia-ia ora voraro rutu vo rasio-ia.”

<sup>28</sup> Uva vo reoro uvuoro rirovira rutu raga pieiva kasipuoro. Oa iava voea rutu oiso puraaepa, “O-ia rirova rutu Atemis, vigei oiraaro vo-ia Efesas-ia.” <sup>29</sup> Oire va iava oearovu tapo rovoaepa vo ora guruoro. Uva ora voea-ia vavagisiaepa. Viapau oiso ragavira taraipaapea, Eake gurukoa vao, ora oiso apeisi ragavira piepaio. Osa iava voea rutu ikauvira urioaepa ora kiusa vo ora reopa uvuru sovara-ia, vo ovusa vaitereo ivupaiva Gaias vaio ora Aristakas vaitereo Masedonia Provins iava, aiterea tapo oisoa vokapareve Pol. <sup>30</sup> Oire Pol oiso ruipaparoepa ra rera tapo koataro vo uvuru-ia, ovusa disaipel irara rerare koruaepa. <sup>31</sup> Uva oearovu tapo gavmanpa irara vova Esia-ia oea rerare Pol korukoruoro rerapa rigatoaepa rera vate iraraaro oiso, “Opeita koatapauvere voea sovara-ia.”

<sup>32</sup> Orekerovu rutu voeare vo uvuru-ia vavagisiepa. Oa iava oiso vaivaisipaiva oearovu osivu ragavira reoreopaave, osa oearovu osivu ragavira purapaave ita. Uva viapau oiso ora voea-ia taraipaapea oiso, Apeisi ragavira oiso osa piepai. <sup>33</sup> Uva oearovu Jiu-pa irara voea iava oea ro Aleksanda kekeiva. Oa iava rera peopeopaiva ira pievira ora voeapa. Vo ovusa oiso vovou ragaroepa ra voea tapetapereve ora rera vavaearo-ia, oiso ra ora reoreoave. Ra voea eakaive Jiu-pa irara. <sup>34</sup> Vo osa vo uvuru rutu vao-ia rera eveipaoro oiso purapaaepa, “Akoea. Rera ita eera Jiu-pato.” Oire va iava voea rutu rerava rirovira raga pieiva aue-ia erao vuuta oiso puraoro, “O-ia rirova oavi rutu Atemis vo Efesas-ia. O-ia rirova oavi rutu Atemis vo Efesas-ia.”

<sup>35</sup> Oa iava iravu kuskus voea tapetape ovoireva oiso puraoro, “Visii rutu vao-ia Efesas-pa irara. Iroutoa vai viapau visii iava taraiparoveira vao-ia osa vigei rutu lotupa kepa tokipapeira Atemis vaaro, ora aue tapo aveke o tugoropava iria koveopa vuvuiua iava?”

<sup>36</sup> Vosa va-ia vao taraipata, oire ora tape pieta. Opeita oavu avu vai purapata. Eake iava? Uvare viapau oavu avu vai rutu uvuipai vao putesa. <sup>37</sup> ♦ Easi visii voeo ou pietavoi vore. Uva viapau oiso oaravu avu vai kaviruivoi vo o vo kepaaro-ia lotupa kepa. Ora viapau oiso oira vaisiaro vara pieivo. <sup>38</sup> Vosa Demitrias ora voeo tokarasi purapa irara oiso ruipaparo ra voeo oirara kortuive, oire uva torevoko raiva toupaivoi va purasa, vo osa reo rovirieipa irara va puraive, aue iava vo osa gavman vaaro reo goru sirova utuave. <sup>39</sup> Vosa oreoroi va sovara-ia touve, oire uva vearovai ra va torevokota Kaunselpa aivarso sovara-ia. <sup>40</sup> Ari ita, uvuipavie pasi ra va-ia vao suria vai oupe vo Rom gavmanaro-ia, uvare vigei rutu tokipareveira. Eake iava? Uvare viapau oiso uvuipavie ra va vao suria aviavi piepe voeapa.” <sup>41</sup> Oreo-a vao oa isivaaro iava voea rutu kosi piereva kuskus.

## 20

### *Pol Masedonia Provins Iare avaroepa Ora Grik-ia*

<sup>1</sup> ♦ Oire uva va vao isivaaro iava Pol keeraroepa voea ruture disaipel auere voea tapo sekansa. Oa iava voea vovouaro goru piereva vo voeapa vearo reoro vateoro. Uva vao iava avaroepa Pol Masedonia iare. <sup>2</sup> Oa iava voraro rutu vokareva vo taerero rutu-ia voearo oirao pie vovou irara vovouaro goru piepaoro. Uva vo voka-a eva oa-ia pouro viropa Grik-ia. <sup>3</sup> Oa iava voa tou rovoreva vo peva kekira sovara-ia. Uva vo tou-ia eva Siria iare avasa vatatopoparoepa aue-ia avasa selpa uvuo. Uva voare avasa auepaoro oiso uvureva, uvare rera uposa raiva purapaaepa Jiu. Oa iava viapau Siria iare avaroepa, ari vorevira voreroepa Masedonia iare. <sup>4</sup> Uva voeo-ia oirara oea rera tapo avaaepa vova Esia voea oiso, Sopata ro vova Beria ro-ia Piras oviitoaaro, ari Aristaka ora Sekandas aue iava vaiterei Tesalonaika, ari Gaias vova Debi, ora ro-ia Timoti, ora aitereivu vaitereo vova Esia Provins, Tikkas ora Trofimas. <sup>5</sup> Voea rutu iraaepa tuesa aue-ia Troas igeire. Vo ovusa ragai Luk vorevira Pol tapo touava. <sup>6</sup> ♦ Vo vokiro varao Tugoropa vokiro isivaaro

♦ 19:37: Ro 2:22 ♦ 20:1: Ap 11:26; 1 Ko 16:5; 1 Ti 1:3 ♦ 20:6: Ap 16:8

iava Yis Asa Bret Vokiro Filipai iava ora vaseiepa uvuoia-ia. Vosa vo vavae aue voki igeire puteva voa oa-ia aue-ia pou viroiepa Troas urui. Uva voa touiova katai wiki-ia.

### *Pol Ovoiopavira Rutu Avaroepa Troas Iare*

<sup>7</sup> ✩ Oire uva voa rovopa vokia vo wik iava ovokia-ia igei rutu ora guruipea kovukovu aio ora komunion aio purasa. Ari ita, riro kaekaevira rutu siposiporeva aue Pol katai tau erao (12) vuuta-ia putesa voa vo vokiaro. Uvare oiso vovouparoepa ra voa ragava va iava vao voki ovoiro uvavure ita. <sup>8</sup> Uva vo kepa-ia otugivu oisoa toupaive ivaraiapa tugi, oa sovara-ia vuravuara toupaiva voa vo uva ora guruipea Pol vo siposipoaro uru piesa. <sup>9</sup> Oire vo osa Pol voeapa riro kaekaevira rutu siposipopareva, ovusa iravu viovokoto, Yutikas kiuvupa ratao-ia pauparoepa rera uru piepaoro. Uva voa rurapareva. Osa iava koveroepa kukau virooro riro kaekaevira kovesa vo rasiuaaro vo tugi iava vao vo pevapa tugi ivaraiapa rutu. Oire voava rera kae pieiva vo kopii raga, uvare ora kopii pie ovoiroepa. <sup>10</sup> ✩ Uva Pol vararoepa rera-ia pituoro taku virosa. Oa iava voeare oiso puraroepa, “Teapi keapaoro uriri ragapata. Viapau oiso oavu avu vaiei rera-ia. Ira ro tootoovira toupare.” <sup>11</sup> Uva vao isivaaro iava vorevira iparoepa vore ivaraiapa tugi va vao kovukovu aio ravaasa. Oa iava voea rutu va aioiva. Oire uva voa riro kaekaevira rutu siposipopareva voeapa, ovusa rerare aviepa. Oa iava voea arova voki ovoiroepa ora vaseoro voea arova. <sup>12</sup> Uva kareaepa voava vorevira rera tapo ro-ia viovokoto, uvare vorevira tootooroepa. Oa iava rera-ia roru iraopaiva.

### *Pol Uvuoa-ia Avaroepa Vova Troas Eisire Mailitas*

<sup>13</sup> Uva igei iraiepa selpa uvuoia-ia Asos iare, vo osa Pol raivaaro vokavira uturoepa igei iare. <sup>14</sup> Oire voava igei iare karero viropa. Uva voava igei rutu taru uvuoia-ia avaiepa ita aue iare Mitilini. <sup>15</sup> Voava ita topa uviroiepa va-ia selpa uvuo aue iare Kaios ruvara-ia. Uva voava taru pou viroiepa utupa voki-ia Semos-ia. Oire voava ita ora vaseoro topa uviroiepa Mailitas iare. <sup>16</sup> ✩ Oire voa Pol oiso ruipaparoepa ra Efesas-ia pute ragaive, uvare reasiparoepa oiso ra voeare pute ragaive ovokirovu Esia-ia. Aue iava uvare Pentikos Vureipa Voki Jiu vaaro iare ora ikau pieparoepa Jerusalem-ia, oiso ra ikauvira voa poua viro.

### *Pol Oira Vasi Irarare Avauereva Efesas-ia*

<sup>17</sup> Uva Mailitas-ia toupaoro Pol reoa siporeva Efesas iare voeaore oea oisoa lotu kovoia irapaave, oiso ra rera iare urioave vo-ia selpa uvuoia-ia. Uva Efesas-ia tauai visivi toupaiveira. <sup>18</sup> Oire vo osa poua viropa rera iare, oa iava voeare oiso puraroepa,

“Visii rutu vearovira vao-ia taraipatai, oiso osa vova rovo voki rutu-ia Esia Provinsia vovouisi oaa rutu tovo rovoavora vo kovo sovara-ia. <sup>19</sup> Uva viapau oiso ora vaisi oaa rei pieavora. Ari oisoa gau ragapaa vo pitupituro-ia voea varaaro vuri pitupituro, rara vara-ia ragai sirao piepaive. Ari ita, taraipatai va-ia vao ragai vaaro tavaka vao-ia oiso osa oisoa ragavira keripaave voeao Jiu, oiso ra ragai upoive. <sup>20</sup> Uva vao-ia taraipatai oiso, Easi viapau oiso oreoroi karutuoro oarai vateavora voviri visiipa vo reo iava tauva reo. Ari ita, oiso-ia visiipa oiraopavira siposipopavaora vo aivaroara-ia ora vo kepaara oavisii-ia. <sup>21</sup> Vo reo raga vao-ia oa vateavora voeareopa Jiu ora Grik, oearea voeareo vosiavora oiso voearei tavioro, Vuriara oavisii iava poreta viro aue iare Pauto, ra Jisas Krais oirao pieta ro Turaro oavi. <sup>22</sup> Uva vo vokio-ia avaparai Jerusalem iare, uvare ro Tugoropato Uraurato ragai ivupare goruvira. Uva va iava oiso rugooparai, Eake vai ragai-ia karekepere voa evoa Jerusalem-ia? <sup>23</sup> Ari ita, vao raga-ia taraiparai vo osa virivira vokapaaveira voraro uruiara rutu-ia, uva Tugoropato Uraurato ragai tavipareveira varao raga iava tavakaara, ora vo osa ragai tuukepave tuukepa keparo-ia oara kekeavere vovio utupauavi.

<sup>24</sup> ✩ “Ari ita, vao ragai vo tootooaro oa-ia viapau oiso rugooparaveira vo osa kovopaaveira. Ari ita, vava toupaauere oiso ra va iava ragai vo kovoaro ora ragai vo

---

✩ 20:7: 1 Ko 16:2; Re 1:10    ✩ 20:10: 1 Kin 17:21; Mt 9:23-24    ✩ 20:16: Ap 18:19; 2 Ti 1:15    ✩ 20:24: Ap 21:13; 2 Ko 4:16; Ga 1:1

raivaaro opesi piea vareo oarea ragaipa vatereva Jisas Krais oirara rutupa siposipopasa Pauto vo tokiaro iava vearoa.

<sup>25</sup> “Ari ita, visii rutu tapo toupaavora vo Sara iava siposipopaoro Pauto vaaro. Uva vaviopavira raga vara rutu varao opesi ovoiei. Uva taraiparai oiso, Easi viapau oiso ragai puaaro keketavere rara vorerivira. <sup>26</sup> Oa iava visii rutu tavitavi iraopaa vo vokio-ia oiso-ia, Vosa ro ira visii iava oiso opesiro oirao pie asavira raga, uva viapau rutu oiso ragai vaaro-a. <sup>27</sup> Uvare viapau oiso visiipa oavu avu vai karutupaavora vo osa visiipa Pauto vo reoaro iava siposipopaavora. <sup>28</sup> ☩ Oire uva vatastopopatai. Ra vearovira ora tokita, ora voeao tapo Pauto voeaaro oea visii vo tokiaro sovara-ia Tugoropato Uraurato oea tovorevora. Ra oiso ora tokita osa oearovu sipsip karero tokipaiveira. Visii tavipaa ra voeao aio pie iraota vao-ia Pauto vo reoaro, voeao oea roporoporevoiva Pauto, voea vorireva Jisas revasiaro-ia vo evao parikou-ia. <sup>29</sup> Ari ita, uvare oiso ragavira taraiparai osa oearovu osararovu iava ora kiuavere visii sovara-ia voeao visii iava oearovu riro oirao pie vovou irara kavirusa. Oiso osa aakau kare uriopaaveira sipsip ragui aiopasa voea kavirupaoro. <sup>30</sup> Ora oiso tapo aeupa ora visii raga iava oearovu oearoa rirovira kuuvuavere. Ra visii iava oearovu keaive, Voearo oirao pie vovou irara ora voea sirova utupasa. <sup>31</sup> Oire oiso-ia, ra uutupaoro ora vatastopopata. Ra vaore rugoopata oa iava visiipa oisoa siposipopaa vokiara rutu-ia aue sovara-ia vo peva ivaro (3 yia). Oiso tapo osa rirovira oisoa gaupaoro visiipa siraopara.

<sup>32</sup> “Vo vokio-ia visii tovopaa Pauto vo tokiaro sovara-ia. Ra Pauto vo reoaro-ia sopaura oavisii aio pieta. Oreoa-a vao-ia goru reo rutu oreoa uvuipai visii sopaaro goru piepasa. Oa iava utupaua oiso visii viraakorevere, uvare visii rutu-a rera voeao oea roporoporeva ora rerapa. <sup>33</sup> Visii tavipaa oiso, Viapau oiso oearoi visii iava orekeroiaro riiriipaavora moniara vai, ora kotokotoara vai, ora vearovara vai kuvupara vai. <sup>34</sup> Uva visii raga vearovira rutu taraipatai ragai-ia, ragoa ora ragai vavaearo-ia orekerovu oisoa purapaa moni oupasa aio voripasa ora ragaipa, ora voeao tapo ragai iavapa irara. <sup>35</sup> ☩ Ragai-a ovoovoaa visiipa ragoa visii kareke pieavora vao-ia oiso, Apeisi ragavira uvuipatai ra voearovio apota irara tauva ragapata vaore rugoopaoro Jisas vo reoaro oa-ia oiso puraroepa, “Roru-a vao oa oupari oearovu vate ragapaoro, oa-ia putepaiveira vo rorua oa karekepapeira varao-ia oara ou ragapari.”

<sup>36</sup> Uva vo reoa-a vao oa opesi pierrevoiva, Pol takuro viropa voea tapo varirisa. <sup>37</sup> Oa iava voea rutu rirovira gauiva rera raupaoro ora rerava uugaappaoro. [Evarei voea vo sekanaro.] <sup>38</sup> Uvare vaore rirovira rugorugooaepa oreoa-ia oiso puraroepa voeare, “Viapau oiso visii kekeavere vorevira.” Eva-a oa iava voea vovouisiro oaiive vavataepa siraooro. Uva va vao isivaaro iava rera tapo avaaepa selpa uvuo iare.

## 21

### *Jerusalem Iare Avaroepa Pol*

<sup>1</sup> Vo osa voea arova lotu tokipa irara ora vaseiepa vo-ia Efesas avaoro uvuoia-ia, aue iare torevokovira pou virosa Kos-ia. Uva utupa voki-ia avaiepa Ros iare. Oire uva voava avaiepa Patara iare. <sup>2</sup> ☩ Uva evoa oavu kekeiovora selpa uvuo oa aue iare Finisia avasa auepaaepa. Uva va iare ora vaseiepa vo uvuo arova oa-ia urioiepa vore. <sup>3</sup> Oire voa uriopaoro koike varata iava Saipras toko vurapaoro puteiova torevokovira avaoro Taia iare vao oa Siria taere sovara-ia toupaiveira. Uva voa-a vo uva selpa uvuo arova ora vaseiepa vo osa va iava kovopa irara kotokotoara rere piepaiva rogara arore. <sup>4</sup> ☩ Uva voa toupaoro oeavuva aivaroiova disaipel. Oa iava voa touiova katai wik rutu sovara-ia. Uva Tugoropato Uraurato vo goruaro iavirava Pol taviiva oiso, “Viapau uvuipau ra Jerusalem iare avau.” <sup>5</sup> ☩ Oire uva vo vokiro isivaaro iava ora topaiepa ita uvavure ita avaoro. Oire vo osa voava igei rutu ora disaipel irara ovii avaoroaro igoa rutu ora vaseiepa vo urui iava avaoro. Uva voava avapaoro rogaraua-ia taku viroiepa varirisa. <sup>6</sup> Oa iava igei rutu ora igeiva sekaniepa ora tavarisa voava, vo ovusa voreaepla atoiare ovusa uvuoia-ia avaiepa.

✩ 20:28: 1 Ti 4:16; 1 Pi 5:2; 1 Ko 12:28      ✩ 20:35: Mt 10:8; Ro 15:1      ✩ 21:2: Ap 11:19      ✩ 21:4: Ap 20:23

✩ 21:5: Ap 20:36

*Sisaria-ia Profetato Agabas Pol Vatereva Reoa*

<sup>7</sup> Vo osa aue iava ita Taia-ia avaiepa vore Tolemes. Uva evoa oearovuva oirao pie vovou irara sekaniepa voa touoro katai voki-ia. <sup>8</sup>◊ Oa iava utupa voki-ia avaiepa ita Sisaria iare. Uva voa iravu vo kepaaro iare avaiepa rera vaisiaro ro-ia, Filip ro evanselisto. Voeao iava rera oea roporopo rovoiva tuariri Jerusalem-ia erao vatara oira vasi irara. <sup>9</sup>◊ Uva rera ovii riakoaro tavauru riako vo resura airoa vairo oiso rutu reopaave osa profet irara, varao reesipaoro ravotovira oara uvuipai ra karekepape vo utupaua.

<sup>10</sup>◊ Oire uva ovokirovu-ia voa toupaoiva ovusa iravu ro-ia vararoepa igei iare Judia Distrik iava rera vaisiaro, Agabas ro profetato. <sup>11</sup>◊ Oire vosa igei iare karero viropa, oa iava Pol vo iroaro takipa iro oureva ora rera iava vavaeara ora kokotoarei tuukesa oiso puraoro, “Vo iore Tugoropato Uraurato oiso taviroi, Ro vo iro-ia takiparoveira, ira tuukeivere Jiu vo-ia Jerusalem-ia. Osa iava osararovupa rera vateivora, rera vuri pieivere.”

<sup>12</sup>◊ Uva vo reoro uvuiovoiva, igei rutu ora voeao oea vo kepa-ia oisoa toupaive oiso Pol rirovira rutu vosi ragapaiova, “Viapau rutu uvuipauei ra Jerusalem iare avau.” <sup>13</sup>◊ Vo osa oiso puraroepa, “Eake-a vao oapa gaupata ragai vovouaro vavata pie ragapaoro? Ari ita, voare vatatopoparai Jerusalem-ia. Eagara vosa ragai tuukeive voa. Ora vao tapo oare vatatopovira toupaa, Eagara vosa kopiira aeua Turaro Jisas voa vo Jerusalem-ia.” <sup>14</sup>◊ Oire uva va iava oiso aueiepa, Easi viapau rutu uvuipaviei oiso ra rera vovouaro vorepe. Oa iava rera eakaiova oiso raga rerare purapaoro, “Ari ita, vao ragapa ruipapaiei vo osa Turaro raga-a rera vo ruipaaro purareve vii-ia.”

*Jerusalem-ia Pol Ora Rera Vo Kovoaro Iava Siposiporeva Reipa Irarapa*

<sup>15</sup>◊ Vao isivaaro iava auero oaio vatatopoiova ipa ovoisa voare Jerusalem-ia. <sup>16</sup>◊ Oire uva oeavu disaipel irara Sisaria iava igei tapo avaaepa Neson vo kepaaro iare okepa-ia toupaiovere. Ro-ia Neson ira Saipras iava urioroepa, ira oisoa rovovira rutu Pauto oirao piepareve. <sup>17</sup>◊ Oire vo osa pou viroiepa Jerusalem-ia, ovusa oearovu oirao pie vovou irara igei-ia rirovira rorupaiva.

<sup>18</sup>◊ Oa iava utupa voki-ia Pol igei tapo avaroepa Jems iare ora oearovu lotua-ia reipa irara. <sup>19</sup>◊ Uva pou virooro Pol voeava sekanroepa. Va isivaaro iava voeapa siposiporeva katakataivira varao iava oara purapareva Pauto voeaopa ratau tou irara vo rera vo kovoaro-ia Pol.

*Pol Reo Uvuroepa Reipa Irara Ruvara-ia Oa Iava Tempel Iare Avaroepa*

<sup>20</sup>◊ Vo osa vo siposipo vao uvuiva, oa iava Pauto-ia vuurapa vaisi puraiva. Uva va iava oiso Pol-re puraeaepa, “Ari ita, vo-ia Jiu-ia taraipaei, uva riro irara rutu oirao pie vovou irara toupai riro tukuro rutu (tausen). Vo osa tapo goruvira rutu vao raga sirova Moses vaaro Reo Taisi utupaaveira. <sup>21</sup>◊ Ari ita, oearovu voea iava Jiu-pa irara vii iava tauai rutu oisoa tavitavipaave voeao oirao pie vovou irara oiso, Ro Pol voeao Jiu siposipopareveira oearoa ratau tou irara vo taereroaro sovara-ia toupaiveira, oiso ra Moses vaaro Reo Taisi eakaive. Ora vao tapo oare koruparoveira oiso, Opeita ora visii voeao kakae vure rakari verapata. Ora opeita vao tapo sirova utupata Jiu vo pitupitudo. <sup>22</sup>◊ Oire uva apeisi ragavira, vo osa vii vo touaro iava uvuivere vo-ia voeao Jiu iava voeao oirao pie vovou irara? <sup>23</sup>◊ Uva oiso vearpai rutu vosa oisi pieri oiso osare vii tavipaivoi oiso, Vo resura epao oira vo-ia oea oavu reo ovoi puraivorsa oavu avu purasa Pautoa-pa. Uva va puraoro ora voeaa-ia reesia puraivere ora gagavurioro. <sup>24</sup>◊ Oresuai tapo avauvera rara Jiu-pa irara vaaro tugoropa sisu purasa. Oire uva vo pitupitudo vigei vaaro voririvere tugoropa sisu ora vao korouopara tapo, vo osa ora vii iava orui gagavurisa aeupau. Oa iava oearovu uvuipaai ra vii-ia taraiave oiso, Akoea, ari vara rutu-a varao oara iava kuuvupaaveira. Ari ita, oiraopavira rutu Pol Moses vaaro sirova Reo Taisi utuparoveira. <sup>25</sup>◊ Uva igei vo rigato sipoiovora voeapa oearovu oirao pie vovou irara ratau tou irara voeaa origatoa tavipapeira Moses vaaro iava Reo Taisi. Oa oiso purapapeira, Vearpai ra varao raga

◊ 21:8: Ef 4:11; 2 Ti 4:5   ◊ 21:10: Ap 11:28   ◊ 21:14: Mt 26:42; Lu 22:42   ◊ 21:17: Ap 15:4   ◊ 21:19: Ap 14:27, 1:17, 20:24   ◊ 21:20: Ap 22:3; Ro 10:2; Ga 1:14   ◊ 21:25: Ap 15:20, 29

sirova utupata oiso-ia, Opeita varao korouupa aioro aiopata oara vatepaiveira oearovu tokarasi irarapa vara-ia vuivui purapaoro. Opeita ora visiiva otopata oara kavu iraota. Opeita vo karero varuere kare aiopata okarea kopii piepataveira voea kaapaoro. Oa iava revasiva viapau puteiveira vo kare iava. Opeita revasiara aiopata.” <sup>26</sup> ♦ Oire uva utupa voki-ia vo resura tapo avaroepa Pol voeapa va vorisa tugoropa sisu. Oa iava voea rutu va puraiva ora rera. Eisi osa iava Jiu vo kepaaro-ia Rovopa Kepa Tempel koataroepa va iava vao reo ovoi reesiaro vearovira voea tavitavisa. Oire uva ora rera-ia tapo oavu purareva tugoropa sisu, oisore ra sisigaruevira rutu toupareve. Osa iava voea tavireva oiso, “Va vao tugoropa sisu oa opesipere vosa korouua puraio, vo rara erao vatarapa voki puteve.”

#### *Pol Rauiva Vo Tempel Sovara-ia Rera Iava Gasisa*

<sup>27</sup> ♦ Vo osa erao vatarapa voki tutuu pieva osa oeavu Esia Provins iava voea Jiu-pa irara Pol kekeiva Tugoropa Kepa Tempel sovara-ia. Oa iava voea oearovu rutu kasipu pieiva voea vavagisi piepaoro. Oa iava Pol sitaoro rera ivuiva <sup>28</sup> oiso keerapaoro, “Avoeo uriota! Uriota! Ro kekesa oirato ira uvarovu rutu avaparoveira oirara rutu vovouaro poreporepasa, oisore ra varao eakaive Jiu vo pitupituroaro. Ora varao rutu oara toupaiveira Moses vaaro-ia Reo Taisi, oisore ra vara tapo kavuive, ora vao tapo Tugoropa Kepa. Oire uva vo vokio ita koataparoi aue-ia Tempel voea tapo voeao ratau tou irara vo kepao-ia vuivupasa, osapa oiso tugoro iraopapeira.” <sup>29</sup> ♦ Oa iava oiso puraaepa, uvare vokipaua Pol kekeiva ovusa uruia sovara-ia toupareva iravu tapo ratau tou irara iava rera. Ira vaisiaro-a ro, Trofimas, Efesas iava rera. Ari ita, uva viapau oiso Tempel sovara-ia koatasiepa, ari rera roruoru ragapaiva.

<sup>30</sup> Oire uva vo urui rutu ora sitaoro vusiiva Pol rausa Tugoropa Kepa sovara-ia. Uva voava rera ivupaoro kosia viropa. Uva va isivaaro iava riro ratao tupaoro va goruiva rera asavira.

#### *Rovopato Viurupato Rom Gavman Tokipato Pol Oureva*

<sup>31</sup> Uva voea-a voea kasipu irara oea oisore auepaaepa ra Pol kopii pieive rera upooro. Osa-a oiso osa iava oavu rigatoa ava pieiva iravu fare rovopato voeao iava viurupa irara rera. Origatoa-ia oiso puraaepa, Voea rutu vo Jerusalem-ia oiso ruipapaaai ra Pol upoive, uvare kasipuvira rutu toupai rerare. <sup>32</sup> ♦ Oire iravu ro-ia ofisato ikaureva oearovu tapo reipa irara ora viurupa irara voare vo kasipu uvuru uva touva. Uva rera kekeoro ora oearovu viurupa irara Pol eakaiva rera kopii pie arapa. <sup>33</sup> Oa iava ro-ia ofisato Pol ruvara iare tutuureva rera-ia pitusa auere rera kort piesa. Uva oiso voeao viurupa irara tavireva ofisato, “Vearovira rutu rera Pol tuuketavere goruvira oirorei-ia sen irorei vai.” Vo uvuru voeao akereva oiso, “E irouto-a rera? Ira eake purapare?” <sup>34</sup> ♦ Oa iava oeavu oiso puraaepa, ovusa oeavu osirovu ragavira ita aia reopaaepa. Uva viapau oisi vituaro iava oiso reoa vai oupareva, uvare riroirovira raga ora reopaaepa. Uva ofisato viurupa irara tavireva oiso, “Avata rerava Pol vore visii vo kepaaro-ia.” <sup>35</sup> Oire vo osa kepa oaive-ia voea viurupa irara rerava karea viropa. Oa iava vo kepa taapaaro vituaro iava ipapaoro ora voea raga vtuaro-ia rera ipa pieiva, uvare oearovu rirovira rutu kasipupaaepa rerare Pol. <sup>36</sup> ♦ Uva voea rutu rerare raga piepaoro urioaeapa oiso purapaoro, “Rera upota! Rera upota!”

#### *Pol Jiu Tavireva Rera Vo Oirao Piearo Vituaro Iava*

<sup>37</sup> Oire tutuu pieiva ora voea vo kepaaro-ia viurupa irara rerava koatasa. Uva voava ofisatoare oiso puraroepa Pol, “E uvuparai ra vii tapo ora reo rovora?” Oa iava vo reo uvuoro vao Griek reo ro ofisato oiso puraroepa rerare, “O ari Griek reo-ia taraiapaei?” <sup>38</sup> ♦ Uva vii vo reoaro-ia taraira, viigoa viapau oiso gavman tapo ora upouepa voviri tuariri oearovu vo rugorugooaro vavagisi pieoro. Vo ovokia-ia vo resura tukuro (4,000) tuvetuvepavira raaka tapire.” <sup>39</sup> Oa iava Pol rera vo reoaro pukooro oiso puraroepa, “Iu

♦ 21:26: Nam 6:13; Ap 24:18      ♦ 21:27: Ap 24:18, 26:21      ♦ 21:29: Ap 20:4, 18:19      ♦ 21:32: Ap 23:27  
♦ 21:34: Ap 19:32      ♦ 21:36: Lu 23:18; Jo 19:15; Ap 22:22      ♦ 21:38: Ap 5:36; Mt 24:26

ita, ragai-a Jiu-pato vova Tasas-ia vo Silisia taere. Vo uruio oa-ia rei vaisi toupaiveira. Uva oiso ruipaparai ra voeao tapo oirara ora reora.” <sup>40</sup>◊ Oire va iava ro ofisa oiso rerare puraroepa, “Oire ita, oisi pieri voea tapo.” Oire voava Pol taapa kukuearo-ia torepaoro voea rutu tapetapereva aue-ia vavaearei. Uva ora siroi pieaepa. Oa iava voeava ora reoroepa Hibru-pa reo-ia rera Pol.

## 22

<sup>1</sup> Uva voeare oiso puraroepa, “Aite irara oaa ora araoko irara oaa. Ragai uvu iraota vao-ia osa visii tavitavipaa ora ragai iava.” <sup>2</sup> Oire vo osa Hibru-pa reo-ia reoreoroepa voeare, osa va-ia rera uvuoro rirovira rutu riteiva reo tokoro. <sup>3</sup> Uva oiso puraroepa voeare,

“Ragai-a Jiu-pato ragoa vo kavauraera Tasas-ia Silisia taere sovara-ia. Oa iava Jerusalem-ia voava skulsa avaraera. Oire uva voa toupareveira iravu Gameliel ragai reraaro tisato, ira ragai vearovira rutu siposiporevora Reo Taisi vao vigei aao iraraaro vaaro. Oa iava vearovira rutu Pauto sirova utuparaveira. Uva viapau oiso iraiei visii-ia ira uvuipa ra oiso piereve osa toupaa. <sup>4</sup>◊ Ari ita, riroa rutu tavaka oisoa kareke piepaa voeaore oirao pie vovou irara Krais vo raivaaro-ia, vo osa voeare taraapaavora voeae upopasa. Voea rutu oirara tapo ora riakora oearoa rutu oisoa oupaa tuukepa kepa iare. <sup>5</sup> Uva voea rutu-a voeao-ia reipa irara pris irara ora voeae Kaunsel irara oea rutu uvuipaai vo reo oirao pieive visiipa ragai vaaro, uvare voeae ruvara-ia pasiara ouavora vo Damaskas iarepa raiva karusa voeare voa tou irara oirao pie vovou irara. Oa iava vo raivao-ia avaraera oearovu voresa oirao pie vovou irara vore Jerusalem-ia, oisore ra voa voeae upoio.

### *Pol Voea Tavireva Ora Rera Vo Pore Uviroaro Iava*

<sup>6</sup>◊ “Ari ita, vo osa avaparaera vore Damaskas-ia ruvara-ia ravireopa vuutavi-ia, ovusa voa ragai iare varaera sisikore aviavi vuvuiua iava ragai aau piesa. <sup>7</sup> Oa iava rasiua arore kove ovoiraera. Uva voava vo reo uvuavora oa oiso puraera ragaire, *Sol, Sol. Apeisi iava ragai vuri piepariveira vokiara rutu-ia?* <sup>8</sup> Uva oiso akeavora, Turaro, irooto-a vii? Oa iava Turaro oiso puraroepa, *Ragai-a Jisas ragoa upopariveira vokiara rutu-ia.* <sup>9</sup>◊ Ari ita, voeao oea tapo vokapaavora oea vo aviavi kekeivora, osa viapau vo reo uvuivora. Oa uvuavora, ragai raga.

<sup>10</sup> “Oa iava oiso puraraera rerare Turaro, Uva eake vai purapaa? Oa iava oiso ragai tavirevora rera Turaro, *Toreu vova ra avau Damaskas iare. Uva evoa iravu vii tavirevere rara varao rutu iava oara vii iare uriopere utupaua.* <sup>11</sup> Ari ita, ragai aau pievora vo aviavi, oa iava ragai sikuropaviva Damaskas iare avapaoro.

<sup>12</sup>◊ “Uva voa iravu oisoa toupareve rera vaisiaro, Ananaias vearto lotu purapato, ira oisoa Moses vaaro sirova Reo Taisi vearovira utuparo. Ro irapa oisoa Jiu-pa irara rutu avivikepaave voa Damaskas-ia. <sup>13</sup> Ira ragai iare urioroepa. Uva ragai ruvara-ia tutuu pieoro oiso puraroepa, Araokotoa oaa, *Sol. Vorevira vurari.* Oa iava vorevira vuraavora vo rera keke ovoisa. <sup>14</sup> Oire va iava Ananaias ragaire oiso puraroera, Vegei aao iraraaro reraaro Pauto vii reesirevo, oisore ra rera vo vovouaro-ia taraiu. Ora vo rara Torevokoto kekeri rera reraaro Kovopato, ora vo osa rera vo reoaro uvuri vo reo oa kosi piro rera gisipoaro iava. <sup>15</sup> Vaore oiso ra vara rutu iava tavitaviu varao oara kekerivorao ora varao oara uvurivorao voeae rutupa oirara. Ra vara iava rera oirao pieri voeae rutupa. <sup>16</sup>◊ Oire uva eakere tuepau. Avau baptaisa ousa, ora rara tapo Jisas Krais areri ra vii vaaro vuri vovou verareve. Eisi osa puraroepa Ananaias ragaire.

### *Pauto Pol Siporeva Ratau Tou Sararore*

<sup>17</sup>◊ “Oire uva Jerusalem iare voreraera. Uva voa-a vo Jerusalem-ia uva variriparaera, ovusa areo uusi sovara-ia ragai iare urioroera Turaro, vo ovusa Tempel sovara-ia toupaavora. <sup>18</sup> Uva Turaro ragai tavirevora aue-ia areo uusi oiso, *Jerusalem iava avau ikauvira, uvare vo tou irara viapau oiso vii reoroaro uvupavire varao ragai iava.* <sup>19</sup> Oa iava oiso

◊ 21:40: Ap 12:17, 22:2, 26:14   ◊ 22:4: Ap 8:3, 26:9-11; Fl 3:6   ◊ 22:6: Ap 9:3   ◊ 22:9: Ap 9:7, 26:13

◊ 22:12: Ap 9:17, 10:22   ◊ 22:16: Ap 2:38; Hi 10:22; Ro 10:13   ◊ 22:17: Ap 9:26, 10:10

puraraera rerare, Turaro oearovu ragai-ia taraipaai vo osa avaparaera vorarore aivaropa tapiro voeare taraapasa oirao pie vovou irara, auere voea ragipasa ora voea tovopasa vo tuukepa kepa sovara-ia. <sup>20</sup> ♦ Ora vao-ia tapo taraipaai ragai-ia vo osa vo tou-ia toupaavora, ovusa Stiven vurokooro rera kopii pieivora aue-ia aveke ro vii kovopatoaaro. Oire uva vo vokia-a eva oa-ia ragai toupaavora. Oa iava voeare oiso puraraera, Iu veeropai, rera kopii pieta, vo osa voea vo ogoroaro tokipaavora aue kuvupa ogooro oara veraivora ora voea iava rera uposa. <sup>21</sup> ♦ Ari ita, Turaro ragaire oiso puraroera, *Jerusalem iava ora vaseu, uvare voava vii arupaa. Ra avau osararovu rutu voeao ratau tou irara tavitavisa tauai.*

### *Pol Utupato Ruvara-ia Toureva*

<sup>22</sup> Ovoiei, voava voea rutu ora siroi pieaepa Pol vo reoaro uru piepaoro. Ari vosa ratau tou irara iava voea tavireva, oa iava rerare rirovira rutu kasipuaepa. Oire va iava voea rutu raga pieoro oiso puraaepa, “Rera kopii pieta. Teapi vo raga tootooparo.” <sup>23</sup> ♦ Uva rerava oivepaoro rasiara kakavupaoro va-ia vikipaaepa viara-ia. Eva-a oa-ia kuvupara oaive tapo sitapaoro ora voea iava vara vikipaiva. Oara rutu-ia rerare kasipua kosi pieiva vao voea vo pitupituarto. <sup>24</sup> Oa iava ro ofisato rera koata piererva. Uva rera vateoro voeapa oiso voea tavireva, “Rera ragipata, ra oiraopa vai iava taviro vao oapa kasipupaa rerare Jiu.” <sup>25</sup> ♦ Uva vo osa rera ragisa rera tuuke rovoiva, ovusa iravu ofisato ira rera ruvara-ia toreparoepa irare oiso puraroepa Pol, “E torevokopai, vosa vii vao Rom gavmanaro iava oiratoa vai ragiri, ro ira viapau rera reoaro kosi piereve rovovira aue iare taava kort?” <sup>26</sup> Oire uva vo ake uvuoro ro ofisato roari rovopatoa ruture avaroepa oiso purasa, “Apeisi vai ro piepari oirato. Uvare Rom gavmanaro iava rera.” <sup>27</sup> Uva va iava urioroepa Pol akesa oiso, “E vii-a vao Rom gavman iava? Ragai taviri.” Uva Pol rerare oiso puraroepa, “Aure.” <sup>28</sup> Oa iava ofisato rerare oiso puraroepa, “Ari ita, ragai tapo-a vao-ia voava Rom-ia, ragoa riroa rutu moni vikiavora auere voa koatasa vo gavman sovara-ia.” Oire va iava Pol oiso rera tavireva, “O ita, ari ragai vo gavman sovara-ia kavauraepa.” <sup>29</sup> ♦ Oire ikauvira voeao oea rera ragisa auepaaepa rera kavu ovoioro avaaepa. Uva rera tapo ofisato rirovira rutu uririroepa, uvare oiso ragavira tarairoepa, Akoea, ari Rom gavman iava rera. Uvare rerare voea tavi ragareva oiso, Rera ragipata, ora rera tuukepata.

<sup>30</sup> Uva voava utupa voki-ia Pol tuuke iro vagoreva va karuoro. Oa iava voea pris irara gurureva ora Jiu iava voea lotupa irara Kaunsel irara. Oire uva va-a vao ouvurua-ia ora voea sovara-ia rera tovoreva auere rera-ia oiraopa reo rutu ousa, vao oa iava rerare kasipuaepa rera togapaoro aue-ia reo.

## 23

### *Pol Vo Tavitaviroepa Kaunsel Irara Voeao Jiu*

<sup>1</sup> Uva tuupavira Kaunsel irarava vurapaoro voeare oiso puraroepa Pol, “Araoko irara oaa, ragai torevokovira rutu oisoa toupaai voari rutu vo vokio iare rekasisa. Uva viapau oiso uririparai Pautoa-pa. Ari ita, vo vokio viaevira rutu toupai ragai vo vovouaro ora ragai vo rugorugooaro.” <sup>2</sup> ♦ Eisi osa iava Ananaias ro Rovopato Pristo voeare oiso puraroepa oea Pol ruvara-ia toupaiva, “Avoeao, rera gisipoaro tapatapata.” <sup>3</sup> ♦ Uva va iava Pol rerare oiso puraroepa, “O ita, Pauto viigoa tapataparevere. Vii vao viigoa iava kepa kaapovira kovovoaro toupaiveira vova ratau, osa atoarova rupapavira toupaive. Viigoa-a vao viigoa paupaei ragai kortusa aue-ia Reo Taisi-ia. Uva viigoa raga vao tokopari Reo Taisi, uvare voeao aruparivoi ragai tapatapasa.”

<sup>4</sup> Oire va iava voeao oea Pol ruvara-ia toupaiva oea oiso purapaaepa rerare, “Auoro. Uva apeisi kaureopaei rova Rovopato Pristo Pauto reraaro?”

❖ 22:20: Lu 11:48; Ap 8:1; Ro 1:32 ❖ 22:21: Ap 9:15 ❖ 22:23: Ap 7:58; 2 Sml 16:13 ❖ 22:25: Ap 16:37  
❖ 22:29: Ap 22:24-25 ❖ 23:2: Jo 18:22 ❖ 23:3: Mt 23:27; Lev 19:35

<sup>5</sup> ♦ Oa iava oiso voeare puraroepa, “Avoeao, easi viapau oiso taraiparai rera-ia eera Rovopato Pristo. Ari ita, vuria puraavoi rerava kaureooro, uvare Moses vaaro-ia Reo Taisi oiso purapapeira, Opeita rova ora kaureopau reito ira visii rutu tokipareveira.”

<sup>6</sup> Oire uva Pol voea vo vovouroaro kekereva. Oa iava oiso aueroepa, Viapau oiso katai vovou vai-ia toupaivoi. Aue iava uvare oearovu-a Sadyusi ari oearovu Farisi iava. Oire eva-a oa iava voeare Kaunsel irara oiso puraroepa, “Araoko irara oaa, ragai-a iravu Farisi iava, ora vao osa ragai-a Farisi-pato oviitoaro. Uva visii rutu-a vao ragai rovirieipatavoi kortua-ia, uvare oiso oirao piepaaveira, Kopii irara vorevira toreaverea tootooro. Eva-a oa vituaro iava oirara siposipopaaveira. Oa iava vapa ragai kortupatavoi.”

<sup>7</sup> Uva vao isivaaro iava voearei voeareo Farisi ora Sadyusi oearea ora kaureopaaepa kasipuvira, uvare voearei vo rugorugooaro ora sikaepa. <sup>8</sup> ♦ Oa vituaro iava ora reopaaepa kasipuvira, uvare Sadyusi irara oiso oisoa purapaave, “Viapau oiso vorevira toreia vai peira ora ensel irara vai peira, ora viapau oiso oirato urauratoa vaiaro peira. Vo ovusa voeao Farisi-pa irara vo pevao rutu oirao pieiva oiso-ia, toreia, ora enselto, ora uraurato. <sup>9</sup> Oire vo osa va iava rirovira ora kaureopaaepa. Uva voava voeao Reo Taisi iava tisa irara oea oisoa Farisi vo pitupituaro sirova utupaave, oea oiso purasa toreiaepa, “Viapau rutu oiso vuria vaiei oa kekeiovci ro-ia Pol. Easi pasi, oiraopavira vai-a oiso osa rera tavirevora uraurato vo raivaaro ora vo Jerusalem-ia.”

<sup>10</sup> Oa iava voearei kekeoro rirovira rutu Pol-pa siraoroepa ofisato. Uva oiso vovouroepa, Ora voeareire piopaoro rera opesi ovoi piepae. Oa iava rerare rera voeareo viurupa irara arureva rera ousa vo uvurure vuutaaro-ia. Uva oiso voea tavireva, “Rerava voretavere vore visii vo kepaaro.”

<sup>11</sup> ♦ Oire uva vo rupa-a vao oa ro Turaro Pol sirova touoro oiso puraroepa, “Opeita uriripau. Ari Jerusalem-pa irara ragai iava siposiporivora. Uva eisi raga ita oiso taru voeao Roma-tou irara siposiporivere ragai iava.”

#### *Reo Ovoi Puraiva Pol-re Oiso Ra Rera Upoive*

<sup>12</sup> Uva utupa voki vokipakouaro-ia Jiu-pa irara ora guruaepa, oiso ra rerare raiva puraive rera kopii piesa. Oire vo vokia-a vao oa-ia ora voeapa reo ovoi puraiva oiso, Easi viapau uvuipavieia ra toootovira toupareve, ovusa aioara vai aiopape ora ukaiopavio. Ari vo raga vearpai vosa rera kopii pie rovopere. <sup>13</sup> Voea rutu uvuiaro-a voeao oea vo resura tau (40) uvuiaro-ia puteva rutu, vo uvuru rutu vieiaro oea vo raiva vao purapaiva. <sup>14</sup> Oire uva voeao vo reo ovoiivoiva, urioaepa rovopa irara pris irara ora oira vasi irara tavisa oiso, “Igei vao igoa ora igeipa reo goru puraio oiso, Easi viapau oiso uvuipavieia ra aioara vai aiopape ora ukaiopavio vosa Pol viapau kopii pie rovopape. <sup>15</sup> ♦ Uva visii rutu-a vao ora oearovu Kaunsel irara visiigoa tavipaiovci, auere ra rovopatoapa ofisato vo reo ava pieta, oa iava uvuipa ra visii-pa Pol siporeve. Uva oiso ruipapaieia ra oiso rera keatavere, Igei vateri Pol, ra igeipa torevoko reo vai vatereve. Uva va-a vao oa-ia rerare utupaiovore ovusa urioro. Ra va iava rera upoio.”

<sup>16</sup> ♦ Uva Pol paparitoaaro vo reo uvureva. Oa iava urioroepa viurupa irara vo kepaaro-ia Pol tavisa. <sup>17</sup> Oire uva va iava Pol iravu kepten arureva oiso puraoro, “Vearopai ra ro tapo paparitoa oaa avau vore rovopatoa iare ofisato. Ra vasivasivira rutu rovopato ofisato tavireve.” <sup>18</sup> ♦ Vao isivaaro iava avasiepa rera iare rovopato ofisato. Oa iava voa rera ruvara-ia pou virooro oiso puraroepa rerare, “Ro tuukepato Pol ira ragai arure vii iare ro tapo viovokoto ira ruvara-ia reoa toupaivoi. Uva oiso ruipapaia ra vii tavireve va iava.”

<sup>19</sup> Oire uva Pol paparitoaaro ivuoro vavaea iava rerava avaroepa uvavivure toko pievira, oiso ra voa roroiovira rera tavireve. Osa iava oiso voa rera akereva, “Apeisi vai ragai tavisa uriouei?” <sup>20</sup> Uva ro viovokoto oiso puraroepa, “Auoro oiso-ia uvare voeao Jiu-pa irara ora reoae. Uva vii-ia va tovoivo oiso, Uriaoavere vii aresa auere Pol oiso ra rerava uriou rera siposa Kaunsel irara ruvara-ia vokipavira. Uva oiso vii keaivere, Rerapa

---

♦ 23:5: Eks 22:28 ♦ 23:8: Mt 22:23; Mk 12:18 ♦ 23:11: Ap 18:9, 19:21, 28:23 ♦ 23:15: Ap 22:30 ♦ 23:16: Ap 21:34 ♦ 23:18: Ef 3:1

ruipapaiaeia rera ruvara-ia torevoko reo vai ouio. <sup>21</sup> Uva viapau oiso ra voea uvuri, uvare vo resura tau-ia putevo voea rutu vieiaro voeao oea utuavere rerare rera uposa. Uva rera-ia ora reoro ora voeapa reo ovoi puraivorao oiso, Viapau oiso ra aiope ora ukaiovio vosa Pol upo asavira toupareve. Ari vo raga osa rera upo rovope rera kopii pieoro. Uva vao raga-ia vii vo reoaro pukoarore tuepaai.” <sup>22</sup> Oire uva va iava ro rovopato ofisato oiso rera goruvira tavireva oiso, “Viapau oiso ra irai ita taviri va iava vao oa iava ragai tavirivoi.” Oa iava rerare ro viovokoto koruroepa vorevira.

#### *Pol Sipoiva Reitoa Iare Gavman Filiks*

<sup>23</sup> Uva vao isivaaro iava ro rovopato ofisato vaitereiarore keeraroepa vaiterei tavisa oiso, “Erao vovoto vai (200) vatatopasi viurupa irara vai, ora erao vataru tau vai (70) voeao oea aue-ia hos kare avaavere, ora erao vovoto vai (200) voeao oea kaatutaru kaeivere avaoro Sisaria iare aue-ia vo resura vataru vuuta-ia (9 klok) vo kavuoro vokiaro. <sup>24</sup> Uva okarei tapo ousivere auepa Pol vo kareo okarea-ia avarovere. Oire uva virivarivira rutu rera tapo vatatopovira rutu avatavere aue iare Filiks roari reitoa rutu gavman.” <sup>25</sup> Oa iava ro rovopato ofisato rerapa rigatoroepa aue Filiks oiso,

<sup>26</sup> ♦ Ragai-a Klodias Lisias ragoa vo pasio rigatoa viipa reitoa rutu gavman Filiks. Vearo voki rutu. <sup>27</sup> Voeao-ia Jiu oea ro-ia pituivora oirato oiso ra rera kopii pieive. Ari ita, vo osa rera-ia taraia ou rovoavora oiso ragavira, uvare rera-a Rom gavman iava. Oa iava rerare viurupa irara oaa aruavora rera ousa. Oire voava rera oriuavora voea sovara-ia. <sup>28</sup> Oa iava rera tapo avaraera Kaunsel irara iare, oiso ra rera-ia vuria vai kekeia. <sup>29</sup> ♦ Uva rera-ia oiso tarairaera, Akoea ari Moses vaaro raga Reo Taisi oapa oisi rera piesa auepaa. Oire uva viapau oiso va iava uvuiraera rera tovosa tuukepa kepa-ia, ora oiso ra rera kopii pieia. <sup>30</sup> Ari ita, vo osa iravu ragai tavirevorao rera iava. Uvare rerare raiva goruvorao ora voea-ia, oiso ra rera uposa utuave raivaaro. Eva-a oa iava vii iare rera sipoavoi. Oire uva voea-a voeao oea taviavorao, ra ora voea vo reoarova urioave rara, vao oa puraivora oiso ra rera upoive va-ia.”

<sup>31</sup> Oire uva vo rupa raga-a vao oa-ia viurupa irara Pol tapo rovopato ofisato vo reoaro sirova utu ovoiaepta avaoro Antipatris iare. Oa iava vo rupa raga-ia voa pou viro ovoiaepta.

<sup>32</sup> Uva voeao oea oisoa hos kare-ia vokapaive oea Pol tapo topa viropa, osa voeao viurupa irara voeava tavariooro vorevira kareaepa vore ora voea vo kepaaro iare. <sup>33</sup> Oa iava voa Sisaria-ia poua viropa. Oire voava va vao pasia vateiva rera tapo Pol rerapa ro reitoa rutu gavman. <sup>34</sup> Oire vo osa vo pasi vao vieireva, oa iava Pol akereva oiso, “Aa vo distrik iava uriouei?” Uva Pol oiso puraroepa, “Ari Silisia-ia.” <sup>35</sup> ♦ Oa iava rera uvuoro oiso puraroepa, “Akoea! Uva vii uvuavere rara voeao poua viro, oea viire vo reo puraivora.” Uva ora rera voeao rera tavireva oiso, “Pol ururao tupata vo Herot gavman vo kepaaro-ia.”

## 24

#### *Pol Togapaiva Reoara Rutu-ia Aue Jiu-pa Irara*

<sup>1</sup> Oire uva ro-ia Ananaias ira vo vavae vokiro isivaaro iava urioroepa Sisaria iare oeavu tapo oira vasi irara, ora iravu tapo voeapa reo kaepato voeao oea oisoa Pol-re auepaave. Uva rera ro reo kaepato, Tetallas ira oiso urioroepa voeao tapo, ra Pol iava vo reo kosi pieive rovopatoapa reitoa rutu gavman. <sup>2</sup> Oire uva Tetallas-re keeraroepa oiso ra Pol iava reoa kosi piereve rera togaoro va-ia. Oa iava oiso puraroepa,

“Ari ita, vii-a reitoa Filiks viigoa vo tokiaro-ia vearoa varao kosi piropa oiso-ia, gavaurea vao ora gavaure tou igeipa vao Jiu-pa irara. Ari ita, riroara reo goruro vearovpara oara igeipa purarivora, oisore ra igei vo uruioaro-ia orekerovu rutu torevokope. <sup>3</sup> Oa iava igei rutu vii-ia rorupaioveira varao-ia oara rutu purapariveira igeipa vii Filiks.

<sup>4</sup> “Uva reasiparai vii pugu piearapa. Oa iava oiso vii arepaavoi, E uvuipauei ra ragai vo reoviaro uvuri, ovusa vii tavia va iava poteku visivi vao iava oa puraparevora rera ro Pol? <sup>5</sup> ♦ Ari ita, igei rerava siituepaoeira ovusa varao vuriara purapareveira. Ira varao rovopareveira oara-ia Jiu-pa irara reraarova gavman ora upopareveira vo rasitoa

♦ 23:26: Ap 24:3, 15:23    ♦ 23:29: Ap 18:15, 25:19, 26:31    ♦ 23:35: Ap 24:19, 25:16, 24:27    ♦ 24:5: Ap 16:20, 17:6, 21:28

rutu-ia. Ro ira oisoa voeapa reiparo oea oisoa Nasaret pitupitu purapaive. <sup>6</sup> ☩ Ora vao tapo osa igei vaaro Rovopa Lotupa Kepa Tempel vuivuirevora igei vaaro puteoro Reo Taisi tugoropa. Eva-a oapa rera ouivora. [Uva va-ia oiso ruipapaiera rera kortuoro rera rovirieio Reo Taisi-ia vao igei. <sup>7</sup> Osa rovopato ofisato Lisas igeiva paupaupao urioroera rera Pol ivu ovoisa igei ruvara-ia <sup>8</sup> oiso puraoro, Avoeo, rerava avata Filiks iare, ra rera rovirieireve vao-ia Rom vaaro raga reo goru.] Oire uva uvuipauei ra rera akeri varaore oara-ia ora reopaveiei oiraopara. Ra vii tavireve oisi raga oiso-ia osa vii tavipaa.”

<sup>9</sup> ☩ Oire uva voea rutu Jiu oiso puraaepa ora voeapa kae pieoro kataivira, “Oiraopavira rutu eisi osa puraparoi Tetalas.”

#### *Pol Filiks-pa Reoara Kosi Pierева*

<sup>10</sup> Vao isivaaro iava ro reito gavman Pol piiroo-ia tavireva. Uva va-ia oiso puraroepa Pol,

“Ari ita, vii-ia taraiparai Filiks viigoa oisoa Jiu rovirieiparive riro ivaro rutu sovara-ia, varao oara-ia rorupaoro vo reo vatepaavoi viipa ora ragai iava vo reo. <sup>11</sup> Uva uvuipau ra vaore voea akeri oiso osa katai tau erao (12) vokiro putevora varao oara-ia lotu puraparaiva, Jerusalem iare avaraera. <sup>12</sup> Uva viapau oiso Jiu ragai vurapaivora osa iraiva ora variri posiparaera ora reopaoro Jiu vaaro Rovopa Kepa Tempel sovara-ia. Ari ita, viapau oiso voeao iava oeai ragai kekeivora osa oeai kasipu pieavora uvai Reo Taisi Uvupa Kepaa vai sovara-ia, ora uvai vo urui sovara-ia. Viapau rutu. <sup>13</sup> Uva vo reoa vao-ia oa purapaivoi, viapau oiso ra va oirao pieive.

<sup>14</sup> ☩ “Ari ita, varao raga iava vii tavipaa ro iava Pauto ira ragapa lotu puraparaveira, ro igei aite iraraaro reraaro ro Pauto. Vo raivao raga sirova utupaoro rera vo raivaaro, vao-ia oa-ia vakuvakupaiseira Jiu oiso purapaoro, Kuuvu raiva. Ari ita, vao-ia Moses vaaro Reo Taisi ora varao profet irara vo rigatoroaro oara rutu oirao piepaaveira. <sup>15</sup> ☩ Ari ita, vao raga-ia rugooparaveira oiso osa oirara rutu kopiia iava vorevira toreaverea voeao-ia torevoko vovou irara ora voeao vuri vovouro pura irara. Uva va raga-a vao oa raga-ia rugooparai vao-ia voeao oiso-ia osa voeao-ia Jiu. <sup>16</sup> Ari ita, uva va-a vao oare akeakepaaveira rutu vo ora ragai vo goruaro rutu-ia, oiso ra roroio vovou rutu-ia toupaave Pautoa-pa ora voeao rutu oirara. Uvare viapau vuriara vai purapaaveira voeao-ia ora rera-ia Pauto.

<sup>17</sup> “Uva riroara ivara isivaaro iava vorevira kareraera Jerusalem iare Jiu-pa irarapa vatevateavira moniara vatesa, ora korououara tapo purasa Pautoa-pa. <sup>18</sup> Uva vo osa varao purapaavora, osa ragai iare urioaera. Uva voa tugoropa sisu puraavora. Oire va raga-a eva oa-ia ragai kekeivora. Ari ita, viapau riro iraraa vai ragai tapo toupaivora, oa-ia viapau oiso upoa vai. <sup>19</sup> Ari ita, oeavu Esia Provins iava Jiu-pa irara oea tapo voa toupaivora. Uva vosa evoea vo toupaive, oire uvuipaai ra voeao tapo viipa oirao pievira taviave vo osa ragaire kasipupaave. <sup>20</sup> Ari ita, vo osa voeao akeri oaire vuria vai oiso oai kekeivora ragai-ia vo Kaunsel uvuru sovara-ia. <sup>21</sup> ☩ Ari ita, vao raga osa purasa toreraera voeare oiso, Oiraopavira oiso osa visii vavaearo-ia toupaa kort purapa irara. Uvare ragai vao ragare rugooparai oiso osa oirara rutu taru vorevira toreaverea kopia oaike kavuoro.” Eisi osa puraroepa Pol rera tavioro.

<sup>22</sup> Oire va-a vao oa iava Filiks ro riro taraito aue-ia oirao piea vo pitupituar-ia, ira vo kort vao opesi piereva oiso voeao tavioro, “Vosa rovopato ofisa Lisas vo pouro virovere, oire visii rutu vo reoroaro rovirieia.” <sup>23</sup> Oire va iava tuukepa kepa-ia uutupato tavireva oiso, “Pol tapo avau rera koata piesa tuukepa kepa-ia rerare tore pie ragasa. Ari vosa sara irara rera iare uriopaave, ra opeita voeare korupauvere, vo osa orekerovu avu vaiva uriopaave rera vatepasa.”

#### *Filik Pol Tuukereva Vo Ivarei Uvuiaro-ia Tuukepa Kepa-ia*

<sup>24</sup> Oire uva ovokirovu isivaaro iava Filiks urioroepa valuava tapo Drusila Jiu-pava Pol-re arusa, oiso ra rera kosi piereve uutupato tuukepa kepa iava. Ra vaiterei tavireve vo

---

✡ 24:6: Ap 21:28 ✡ 24:9: 1 Te 2:16 ✡ 24:14: Ap 9:2, 3:13 ✡ 24:15: Ap 23:6; Dan 12:2; Jo 5:28-29 ✡ 24:21: Ap 23:6

raivao iava Jisas Krais oirao piepa raiva. <sup>25</sup> ☩ Oire va iava Pol vo avukarei tavitavireva aue iava torevoko vovou vo pitupituaro, auere ra torevokovira raga ora tokipaave vaopa, teapi vuriara vai purapaise. Uvare oirara rutu vo vokiaro pou piroverea vao oa-ia taru oirara rutu rovirievere Pauto. Oara-a varao oara rutu uvuoro rirovira uririroepa Filiks, uvare ora rera sopaa-ia vo reoro uvuipareva. Oa iava Pol arureva oiso, “Ovoiei. Avau. Uva ovokia ita oiso viire keeraravere, rara avu viipa ruipara ita.” <sup>26</sup> Ari oiso vovouparoepa, Easi pasi Pol vai ragaipa monia vai vaterevere va iava rerare karua tuukepa kepa iava. Oire oa iava rerare voreripavira keeraparoepa vo rera tapo ora reoreopasa.

<sup>27</sup> ☩ Oire uva erao ivarei puteva, oa iava iravu raga tavarireva Filiks vo tavukiaro iare. Rera vaisiaro ro-ia, Posas Festas. Uva Filiks avaoro Pol kavureva tuukepa kepa-ia vaore, oiso ra Jiu rera-ia rorupaise rutu.

## 25

### *Pol Sisa-pa Ruiparoepa Vaore Oiso Ra Rera Vo Kortuaro Uvureve*

<sup>1</sup> Oire uva Festas urioroepa Sisaria-ia tousa. Voava vo peva isivaaro iava aue voki peva Jerusalem iare avaroepa. <sup>2</sup> Uva voa Jerusalem-ia pouro viropa Festas. Oa iava voa voeao rovopa irara pris irara ora oearovu oira vasi irara voea iava Jiu, oea rutu oreorovu-ia ita rera iava Pol gasiiva rerapa ro-ia Festas. <sup>3</sup> Uva vorevoreripavira rera arepaiva rerare Pol, oiso ra Jerusalem iare rera siporeve. Uvare oavu raiva rerare ravaa rovoiva, oiso ra rera upoive vo osa urioparo raivaaro. <sup>4</sup> Uva voea vo reoaro pukoreva Festas oiso voea tavioro, “Avoeao, ira tuukepa kepa-ia toupare Sisaria-ia. Uva tutuu piepai ra rera iare vorera voa. <sup>5</sup> Uva oiso vearpai vosa oearoi visii iava riro iraraa vai ragai sirova utupaai, ra oeai tapo karera. Oa iava vigei rutu uvuipavieie ra rera-ia vuriara vai kekepe pasi.”

<sup>6</sup> Oire uva vo peva vatara vokiro o katai tau vokiro isivaaro iava Festas voreroepa Sisaria iare. Oa iava utupa voki-ia vo kort vao purareva. Uva va iava Pol-re aruroepa. Oa iava oeavu rera iare rera sipoiva. <sup>7</sup> Uva voa pouro viropa kortupa kepa sovara-ia rera Pol. Oa iava oeavu Jiu-pa irara Jerusalem iava oea Pol ruvara-ia toupaiva, oea rera iava Pol oreorovu rovoiva. Osa iava vo reoro iava vuriara oara-ia Pol togapaiva, oara-ia viapau oiso ra irai vara oirao piepareve. <sup>8</sup> ☩ Oire oa iava vearovira rutu Pol voea vo reoroaro pukoreva oiso puraoro, “Viapau rutu oiso vuria vai puraavora oiso osa purapaaie voeao. Viapau oiso oavu avu vai gasiavora Jiu vaaro iava Reo Taisi. Ora viapau tapo oiso Jiu vaaro-ia Rovopa Kepa Tempel. Ora Rom reraaro tapo King Sisa ira-ia tapo viapau oiso oai vuria vai puraavora.”

<sup>9</sup> Ari ita, Festas oiso ruiparoepa ra Jiu agoagotoreve rovirie-iakortua-ia. Oa iava Pol akereva oiso, “E avapau Jerusalem iare ra voa vii rovirieia?”

<sup>10</sup> Oa iava Pol rerare oiso puraroepa, “Vo kepao-ia oa-ia totepaoro toupaeva kortupa kepa Sisa vaaro. Uvare vo kepa raga vao-ia oa raga ragai vo kortuaro uvuipairoi. Ragai-ia taraipaei ragoa viapau oiso vuria vai puraavora Jiu-pa irara-ia. <sup>11</sup> ☩ O ita, vosa Reo Taisi tokoa, o vosa oarai puraa vuriara vai, oa-ia taru uvuipaaie ra ragai kopii pieive. Osa iava viapau uvuiparai ra voea asavira toria. Ari vosa voea vaaro vao kuuvua, oa-ia viapau rutu irai uvuiparai ra ragai vatereve voeapa voeao Jiu. Viitavipaa oiso, Avaravere Rom reraaro iare King Sisa ira raga uvuiparai ra ragai rovirieireve.” <sup>12</sup> Oa iava Festas ora reoroepa voeao riro tarai irara. Uva va iava oiso puraroepa Pol-re, “O ita, ragai tavipari oiso ra avau Sisa iare. Uva vii tavipaavoi oiso, Vearpai ita, ra rera iare avau Sisa.”

### *Festas Agripa Akereva Pol-re*

<sup>13</sup> Uva ovokirovu isivaaro iava aue King Agripa avukarei tаветесива ora o-ia vatuava Benaisi aue iare Festas. Oa iava rerava vearo vokisiva. <sup>14</sup> ☩ Oire uva riro vokiro rutu-ia voa toupaoro aue Festas King tapo ora reoroepa Pol iava vo reoro iava rera tавитавиаоро. Uva oiso puraroepa, “Ro-ia oirato ira vo tourevora ovusa Filiks avaroera rera arova. <sup>15</sup> Ro-ia

---

◊ 24:25: Ga 5:23; Ap 10:42   ◊ 24:27: Ap 25:1, 4, 9, 14   ◊ 25:8: Ap 6:13, 24:12, 28:17   ◊ 25:11: Ap 26:32, 28:19   ◊ 25:14: Ap 24:27

ira iava ragai taviivora rovopa irara pris irara ora voea tapo oira vasi irara eisi Jerusalem-ia vo osa voa toupaavura. Uva oiso ruiipapaaera ra ragai rera rovirieia. <sup>16</sup> Uva oiso voeare puraraera voea favioro, Viapau oiso Rom opitupituaro oiso toupai, ra oiratoa vai vate ragaive irai kopii piesa vo rara viapau rera roviriei rovoive, ora vo osa viapau kortua-ia voea vo reoaro pukopareve.

<sup>17</sup> “Uva va-a vao oa iava urioiva vore ovokivu-ia utupavira kort uvupa kepa sovara-ia paupaoro, voea uutupa irarare aruraera oiso ra rera sipoive. <sup>18</sup> Uva voa-a vo uva Jiu toreaera. Uva ragai oiso keaparaera, Riroa vai rutu viria vai oa iava rera iava tavipai. Osa viapau oisi oai iava oisi vo reo puraivora. <sup>19</sup> ♦ Vo osa vao raga lotua oa vo pitupituar-ia, oa iava ragai tavitaviivora ora Jisas iava tapo ro ira kopiicroepa. Uvare Pol rera iava oiso siposipareveira, Ira tootoovira toupare. <sup>20</sup> Uva va-a vao oa rutu-ia vavagisiparaera oiso, Uva apeisi ragavira va vituarore taraaavere. Oa iava Pol akeavora oiso, E avapaei eisire Jerusalem-ia, ra voa vii kortua vo reo-ia vao-ia? <sup>21</sup> Vo osa Pol oiso puraroera, Viapau. Ari King iare avaparai ro Rom-ia, oisore ra rera raga ragai vo reoaro rovirieireve. Oa iava uutupa irara rerare taviavora oiso, Vearovira rera tokipata vaore tueoro osa rera sipoavere rara utupa visivi ae iare Sisa.” <sup>22</sup> Oa iava Agripa oiso puraroepa Festas-re, “Oiso ruiipaparai ra Pol uvua.” Osa iava Festas oiso King Agripa tavireva, “Vearopai. Ira uvurivere vokipavira.”

<sup>23</sup> Oisi-a eisi osa iava utupa voki-ia Agripa vaio ora Benaisi oritoareiva uriosiepa ora gurupa kepa-ia koatasa. Uva oeavu tapo reipa irara viurupa irara iava voea oea tapo uriosiepa voare ora oira vasi irara. Oa iava Festas Pol-re aruroepa oiso ra urioro. <sup>24</sup> Uva Festas voea ruture oiso puraroepa, “Vii King Agripa ora visii rutu vao-ia ro oirato kekepata ira arepaiveira voeao Jiu oea vo toupaiveira Jerusalem-ia vorevoreripavira rera uposa. <sup>25</sup> ♦ Vo osa ragai raga oiso rugooparaveira, Viapau oiso viria vai purareva, ra oai iava rera upope. Uva rera sipopaa aeepa Sisa, uvare Pol rera iare ragai arerevora. <sup>26</sup> Ari ita, oiso ragavira va-ia vavagisiparai oiso aeepaoro, Aa vao-a viria oa iava Sisa-pa rigatoravere oa iava Pol sipoisa rera iare? Oa-a vao oa iava rera ou pieavoi vore visii rutu osireiaro iare. Oire uva oiso ruiipaparai ra vii King Agripa rera ita taraari vao avuore oa iava rigatoavere Sisa iare. <sup>27</sup> Uvare viapau oiso torevokopai ra tuukepato sipo ragaa Sisa iare, vosa viapau sipoipoa vai ou rovoa rerapa rera vo vuriaro iava.”

## 26

### Pol Agripa-pa Reoara Kosi Pierava

<sup>1</sup> Oire King Agripa oiso puraroepa Pol-re, “Vearopai ra ora vii iava tavitaviu.” Oa iava Pol ora vavaearo iraoro oiso puraroepa voeao Jiu vo reoaro pukooro, vao oa-ia rera iava gasiiva.

<sup>2</sup> “Vearovira rutu King Agripa vao-ia oiso osa uviparai ra ragai vo reoaro vatea vo reoro pukooro viipa. <sup>3</sup> Oiraopavira rutu oiso osa taraipau ei rutu Reo Taisi-ia vao Jiu vaaro ora igei vo pitupituroaro. Oa iava oiso vii akepaavoi, ra ragai uvuoro ragai vo reoaro aroviri.

<sup>4</sup> ♦ “Ari ita, vara rutu-ia taraipaa Jiu ragai vo touaro-ia vo osa viovokovira oisoa toupaa vo ragai voeao ruvara-ia oirara Tasas-ia. Uva voava avaraepa Jerusalem-ia tousa. <sup>5</sup> Ari ita, tuariri voa ragai-ia taraiaeapa. Vosa oisi ruiipapaaeri, ra voa vo reo kosi pieive. Uvare voa ragai-ia taraiaeapa osa Farisi vo vovouroaro sirova utupara, varao riro vavagisiparai rutu oara opitupiturovu rutu-ia varao lotupara putepaiveira rutu igei varaaro. <sup>6</sup> ♦ Oire uva ragai-a vao ragoa rovirieipata vo vokio ae vitiaro iava uvare vo reo raga-ia oirao piepaaveira vao Reo Ovoi oa vatereva Pauto voeao vigei aao iraraaro. <sup>7</sup> ♦ Oa raga-a vao Reo Ovoi oa oisoa oirao piepaive opesi asavira katai tau erao (12) sararo vigei aao iraraaro, vo osa Pautoa-pa lotupaaave vo vokiaro ora vo ravireo-ia. Ari ita, uva vo oirao piea vao-ia ragai vaaro oa-ia ragai rovirieipai voeao Jiu osa vii tavipaa King oaa. <sup>8</sup> Apeisi

♦ 25:19: Ap 18:15, 23:29 ♦ 25:25: Ap 23:9, 29, 26:31-32 ♦ 26:4: Ga 1:13-14 ♦ 26:6: Ro 15:8; Ta 2:13

♦ 26:7: Je 1:1; 1 Te 3:10

vaaro-ia vavagisipatai oiso rugoopaoro, Viapau Pauto uvuiparoi ra oirato tore piereve vorevira kopiia iava?

<sup>9</sup> “Ari ita, iravu-a ragai ragoa oisoa vurivira rugoopara, oa iava oisoa vuria purapaa Jisas vo siposipoaro-ia ro vova Nasaret. <sup>10</sup> ♦ Oa iava oisoa varao purapaa Jerusalem-ia riro irara rutu Pauto kovopa iraraaro tovopaoro tuukepa kepa sovara-ia. Uvare oisi vo goruva ragai tovoiva rovopa irara pris irara. Ari ita, vao tapo osa oisoa oearovu voea upopaise. Uvare ragai tapo oisoa voeare arupara oiso, Iu veeropai. Voea upota. <sup>11</sup> Uva ita, vokiara rutu-ia oisoa vuriara purapaa voea-ia voraro Jiu varaaro-ia Reo Taisi Uvupa Keparo Sinagog. Ari ita, oiso rutu oisoa rugoopara ra voea varaaro oirao pie vovouro tokopaa. Vao-ia osa rirovira rutu voeare oisoa kasipupara. Oa-ia tauairo rutu oisoa voeare taraapaoro avapara.

#### *Pol Voea Tavireva Ora Rera Vaaro Iava Oiso Osa Porero Viropa*

<sup>12</sup> ♦ “Ari ita, va vao vuri vovou purapasa avaparaepa vo raivao-ia vo Damaskas, uvare oavuva vasirako reesi oisoa vokapaa reo goru sirova, oarei ragai vateiva rovopa irara pris irara. <sup>13</sup> Uva uvupari King oiso-ia, Ovokivu-ia ravireo vuuta-ia oavu aviavia varaepa vuvuiua iava oavivavia ravireo vo aviaviaro-ia puteoro rutu varaepa ragai aau piesa voeao tapo oea tapo vokapaa. <sup>14</sup> Uva igei rutu kovekoveiepa. Oire voa Hibru-pa reo uvua oa-ia oiso puraepa ragaire, Sol, Sol. Apeisi iava ragai vuri piepariveira vokiara rutu-ia? Ragai vo ruipaaro tapo upopariveira. Oiso rutu piepariveira osa bulmakau orekerovu otuotupara totopaeveira ora oira kokotoaro-ia. Eisi osa rutu ragai toopariveira ora vii raga ora vuri piepaoro. <sup>15</sup> Oire uva va iava oiso akeava, Turaro, irouto-a vii? Oa iava oiso puraroepa, Ragai-a Jisas ragoa upopariveira vokiara rutu-ia. <sup>16</sup> ♦ Toreu. Uvare viire ora poerarai vii reesioro viigoa ragaipa kovoparivere. Uva vii tavipaa oiso, Oearovu rutu tavitavirivere varao iava oara kekerivoi ragai ruvara-ia vo vokio, ora varao iava tapo oara vii iare karekepapere utupaua. <sup>17</sup> ♦ Ari ita, vii virivaripaavere voeao asavira Jiu ora oearovu asavira osararovu iava ratau tou irara voearo oearoa iare vii sipopaavere. <sup>18</sup> ♦ Voeao oea vo rugooroaro karurivere voeapa vara aviavi pieoro. Eva oa iava rupa vovouro oaiive iava porea virovere aviavia iare. Ora Seten vo goruaro iava Pautoa iare porepaa virovere. Eisi osa ragavira ragai oirao piepaivora, uvuipai ra voea iava vuri vovou verapa piro. Oa iava uvuiparai ra voeae rutu takuvua ora voeao oea roporeva Pauto ora rerapa.”

#### *Pol Ora Rera Vo Kovoaro Iava Lotu Kovo King Agripa Tavireva Vao Oa Purareva*

<sup>19</sup> “Ari ita, King Agripa, viapau oiso ragai vo reova kaureoraepa oreoa ragai iare varaepa vova vuvuiua iava areo uusi sovara-ia. <sup>20</sup> Ari rovovira Damaskas-ia voea siposipoavora. Oire uva voava Jerusalem-ia ita. Uva aia voava ita voraro rutu vo taerero-ia vo Judia Distrik sovara-ia ora voraro tapo osararovu-ia, oearoa rutu oisoa tavitavipaave oiso, Tepa vuriara oavisii iava poreta viro vore Pauto. Ora vosa porepata viro, ra uvuipatai ra oisi iavirava veeropaa kovoro vai purapata visii vo oirao pieroaro kareke piepaoro. <sup>21</sup> ♦ Uva ragai ouivora voeao Jiu vo Rovopa Kepa Tempel sovara-ia ragai tovosa kortua-ia vo reoropaa oara iava voeapa siposipopaavora. Uva vara-a varao oara iava oiso aue ragaaera ra ragai kopii pieive. <sup>22</sup> Ari ita, oisoa Pauto ragai tauvapareve vokiara rutu-ia, oiso ra vo vokio-ia toupaa rera vo reoroaro vatepaoro oirara rutupa voeao oiso-ia, oira vasi irara ari oearovua apota irara. O ita, oiso puraparai vao-ia oiso osa puraaepa profet irara ora aue tapo Moses varaore oara uriopaperea voari rutu utupaua. <sup>23</sup> ♦ Oiso-ia, Jisas ro Ropoto Pauto reraaro ira riroa ourevere siitoka. Eera irapatoa rutu ira taru kopiia iava toreroverea voeapa raiva puraoro voeao-ia Jiu ora ratau tou irara. Vo osa va-ia vao voeareipa varei rutu aviavi pie rovoreverea, oire va iava rera oirao pie iraoive rutu vo torea taraioro. Osa iava voeae orirureverea.”

#### *Pol Agripa Tavireva Oiso Ra Oirao Piereve Rutu*

◊ 26:10: Ap 8:3; Ga 1:13; Ap 9:14, 21 ◊ 26:12: Ap 9:3, 22:6 ◊ 26:16: Esi 2:1; Dan 10:11; Ap 22:14-15 ◊ 26:17: Jer 1:8, 19 ◊ 26:18: Ais 35:5, 42:7; 1 Pi 2:9 ◊ 26:21: Ap 21:30-31 ◊ 26:23: Mt 26:24; 1 Ko 15:20; Kl 1:18; Re 1:5

<sup>24</sup> Oire vo osa Pol voea vo reoroaro pukoreva varao oara-ia rera toga ragapaiva, oa iava aue Festas rerare rirovira oiso puraroepa, “Auoro Pol. E kokoropau? Ari ita, riroa taraia oa ouriva. Oa raga-a eva vii kokoro piepaivoi.” <sup>25</sup> Uva Pol rerare oiso puraroepa, “Viapau rutu Festas. Viapau oiso vii keakeapaavoi. Oiraopavira rutu oiso osa vii tavitavipaa torevokoviria. <sup>26</sup> Ari ita, rera ro King Agripa ira vara rutu-ia varao taraiparoi. Rera tapo vara-ia roroiovira ora reoparai, uvare viapau oiso vara iava oai vatauvira puraavora. <sup>27</sup> Auoro King Agripa. E profet irara vo rigatoro oirao piepariveira? Ari ita, vii-ia taraiparai viigoa vo rigatoro oirao piepariveira.”

<sup>28</sup> Uva King Agripa oiso puraroepa Pol-re, “E uva apeisi-a oiso rugoopaei, ra evo reovi-ia ragai iava sopaua poreri? Ra va uvuoro Kristen tou puraa?”

<sup>29</sup> Uva Pol oiso puraroepa, “Ari ita, Pauto areavoi visii rutupa vo reovio-ia ora riro reo tapo, osa iava uvuipatai visii rutu kristenta oiso osa ragai-a vao vo vokio. Ari vao ragapareasiparai oiso, Teapi visii tuukepaise oiso osa ragai piepaiveira.”

<sup>30</sup> Oire uva vo reo isivaaro iava King, ora reito gavman, ora Benaisi, ora oearovu oea vo peva tapo toupaiva oea rutu toreaepa ora vasesa avaoro. <sup>31</sup> ♦ Uva vo osa kosia viropa, oa iava voa ora reopaaepa oiso puraoro vo ora voea ragare, “Avoeao, viapau oiso oavu avu vai viria vai purarevora ro-ia oirato irare oiso auepavierao ra rera upope ora rera koata piepape tuukepa kepa-ia.” <sup>32</sup> ♦ Oire va iava Agripa Festas-re oiso puraroepa, “Ari ita, uvuipauei oiso ra rera karuri vo vokio raga-ia. Ari ae raga ita uvare oiso puraroerao ra Sisa iare avaro. Ira rera rovirieirevere rara.”

## 27

### *Pol Tovoiva Selpa Uvuoa-ia Rom Iare Avasa*

<sup>1</sup> Oire uva varao isivaaro iava oavu reo goru puraiva, oiso ra Itali iare avaio aue-ia uvuoa. Vo osa Pol tovo rovoiva vo Sisa reraaro vo tokiaro-ia ofisato. Ro-ia rera vaisiaro, Julias ro Rom gavmanpa uitupato ira oiso katai vovotova (100) toupareve viurupa irara. Uva voa toupareva oearovu tapo tuukepa irara. <sup>2</sup> Oire oavu-ia vao selpa uvuo vova Adramitiam oa-ia kae uviroiepa. Uva vo uvu-ia avaiepa Esia-ia vatuar. Uva igei rutu vao igoa avaiepa ora ragai Luk ora iravu ro-ia Aristakas Tesalonaika-pato vova Masedonia Provins. <sup>3</sup> ♦ Oa iava utupa voki-ia Saidon-ia pou viroiepa. Oire uva voa-a evoa uva pou viroieiva, ae Julias vearo vovou purareva. Oa iava Pol iava vasereva, oiso ra avaro vate irara iare voea ruvara-ia oaravu avu vai ousa, oisore ra vara iava vearovira toupareve.

<sup>4</sup> Oa iava voava ita ora vaseiepa Saipras toko isivaaro-ia avasa, uvare kiuvuva aivaropaiva uvuoa. Oa iava vorevira vo toko ravisioro avaiepa. <sup>5</sup> ♦ Uva vo voka-a vao oa-ia Silisiarei vatuarovi puteiova ora Pamfilia-ia. Va iava Maira-ia pou viroiepa vao oa Lisia Distrik sovara-ia toupaiveira.

<sup>6</sup> Uva voa-a evoa uva toupaoro ro igei reraaro ofisato oavu tuereva uvuoa, ovusa Aleksandria iava uriopaepa vo aue-ia Isip. Oire voava uriopaepa Itali iare avasa. Uva va-ia igei rutu tovoreva. Oa iava igeiva avaepa. <sup>7</sup> Uva garutu visivi vasi pievira avapai epa vokapaoro, uvare kasikasi pie visivi rutu kovopaoro vokapai ova voare avapaoro Naidasia. Uva viapau uvuiiepa oiso ra voava topa viroio, uvare riroto kiuvu igei takireva. Oa iava vorevira varai epa oiso Krit toko rorovira Salmoni kipekipe vatuar-ia varasa. Oire eva-a oa iava vo toko reroaro avaiepa taru, uvare kasikasi pievira rutu vokaoro urioiepa. <sup>8</sup> Uva vo-ia kasikasi visivi rutu avapai epa vore avapaoro Vearo Paitu vao oa toupaiveira Lasia urui ruvara-ia.

<sup>9</sup> Oire uva voa-a evoa igeire riroara vokiara puteva osa vokapai ova vo vuuta vao oa-ia avakava vuriopa rutu rirovira. Uva va-a vao oa iava Pol voea goruvira tavireva ravaavira, uvare vo vuutao-ia taraiparoepa oa oiso karekepape ivara rutu-ia katakataivira. <sup>10</sup> ♦ Uva voea tavireva oiso, “O ita, oiraopavira vao-ia oa kekepaa oa ouvere rara, vo osa vova topa uvirovio. Ra riroa tavaka oupe oa vatevere rara vo vuutao vigeipa. Uva selpa uvuo rokovere ora kotokotoara rutu tapo ora vigei vai pasi.” <sup>11</sup> Uva Pol vo tavitaviaro uvu

♦ 26:31: Ap 23:29    ♦ 26:32: Ap 28:18, 25:11    ♦ 27:3: Ap 24:23, 28:16    ♦ 27:5: Ap 6:9, 13:13    ♦ 27:10: Ap 27:21-22

ragapaoro ofisato uvuo a voka piepato vo reoroaro raga oirao piepareva vaiterei rutu ora ro oira-ia reipato kepten. <sup>12</sup> Uva voeavio kovopa irara va-ia vao uvuo a oea oiso vovou ragapaaepa ra Finiks iare topaa viro. Uvare vao oa-ia toupaiva oare rugoopaoro oiso purapaaepa, “Avoeo viapau rutu uvuipavieie ra vo toupape, uvare vagoa vao-ia oa-ia uvuipasiei kiuvu vaio ora kokeva ra vigeiva uvuo a vuri piesi. Ari vosa aue iare ipavio Krit-ia vo uva Finiks basis toupaiveira uva kavovovira toupaiveira paitua utopavira, oa-ia uvuipavieie ra virivarivio.”

*Riroto Kiuvu Vuri Toru Kareke Pierewa Avakava-ia*

<sup>13</sup> Uva voava rovovira gare visivi rovoroepa vusipaoro kiuvu. Uva va iava oiso raga rugooa ouiva vo rera iava oa iava oiso puraaepa, “O ita, veiaropai ra voa raga virare raiva purape, ra voare avavio eisi Finiks-ia.” Oa iava anka kae pieiva avasa uvuo-ia vo Krit rogara vatuarto-ia. <sup>14</sup> ♦ Oire uva ikauvira purepavira vo toko iava vararoepa vo voa igeire riro varivarivira rutu. <sup>15</sup> Uva voava igeiva vo uvuo peoreva riro goruvira rutu, ovusa osa aeupaaepa ra rera sirova oira tovoio, ovusa viapau oiso uvuipaiepa ra rera gaeive. Oapa voea peo ragapaoro igeiva va topapareva va pupipaoro. <sup>16</sup> Oire vosa voava gaegaerepaoro otokovu reoaro igeiva puteva virivari visivi va-ia ururaopaoro. Oa iava igeiva gaegaerepaoro avapaepa. Uva vo toko vaisiaro-a vao-ia oa-ia igeiva va-ia putereva, Koda Toko. Uva vo toko-ia vao putepaoro dingiva takauiepa rutu oira kae pieoro, o iria ivupaoro vokapaeva selpa uvuo. <sup>17</sup> Uva vo osa pege roruorupaoro va rutu tuukeiva uvuo kovuaro oirovu-ia riro goru iro oiso, teapi kiuvu oira kaekae pieparevora, pegeo viro igeiva. Osa-a oiso osa iava uriripaaepa oiso, teapi vigeiva uvuo vera pierewe raaka-ia vao Aprika-ia ruvara-ia tou raaka. Oa iava va iava selara sigiiova oiso va puraoro ra igeiva gaegaerevira raga avape. <sup>18</sup> Uva va vao isivaaro iava rirovira rutu torueva avakava. Oa iava voeao kovopa irara voava auero-ia kotokotoara rovoaepa vara-ia vikipaoro. <sup>19</sup> Uva ovokivu-ia vo pevapa voki igei rutu kopirovu vikiiepa. <sup>20</sup> Uva riro vokiro rutu-a pupuru vokiro ovokiroa-ia viapau rutu oisoa ravireo kekepaio ora visurikoara, oara iava riroiroreva. Oa iava igei rutu oiso vovoupaiepa, Oiraopavira rutu igei rutu vao opesipaiei, uvare igeivi riroiro pierre purepato kiuvu.

<sup>21</sup> Uva riroara rutu vokiara igeire oisoa pute ragapaive aio asavira. Ovokiro-a evara isivaaro iava Pol toreroepa oiso purasa, “Ari ita, vosa ragai vo reoroarore uru piepasa ora tape piepataeri voviri vo osa Krit toko pute asavira toupaerao, oa iava viapau oiso vo tavakao vigei ouvori. Oa iava tapo varao kotokotoara viapau oiso riroirovira touvori vigei varaaro. <sup>22</sup> Uva visii tavipaa ra uririara eakata, uvare viapau oiso irai vigei iava kopirovere. Ari vao raga uvuo rokovere vigei arova. <sup>23</sup> ♦ Ari ita, vo vokiaro uva purapurapato ensel urioroerao ro reraaro Pauto ira ragai-ia pitupareveira, ora oiso tapo irapa kovopaaveira. <sup>24</sup> Uva ragai sirova toupaoro oiso puraroerao, Auoro Pol, teapi uriripau. Ari King Sisa osireiaro-ia tourivere rara. Uva visii rutu-a vao ora voeao oearovu uvuo-ia tou irara visiigoa rutu virivariavere. <sup>25</sup> Oire uva ora tape pieta. Teapi uriripata. Oa purarevere rara vigeipa oiso osa rera vo reoaro toupaiveira. Ari ita, oara rutu oirao piepaaveira ragai vao-ia. <sup>26</sup> Ari ita, vao uvuo a vigeiva vera pirovere oavu-ia raaka vo oavu-ia tokoa.”

<sup>27</sup> Uva vao iava katai tau vo resurapa (14) rupa vao oa-ia igeiva uvuo a peopareva kiuvu vo avakao-ia vao oa vaisiaro, Edria Si. Uva voa avapaoro vo uvuo-ia aue sovopaiva oa iava oiso puraaepa, Easi tutuu piei rasia vai iare, voeao oea oisoa vo uvuo-ia kovopaive.

<sup>28</sup> Oa iava voeao vo rovu avaka rovu rokoaro uvuiiva oavu-ia iroiro. Oire uva aue-ia erao tau vuta (20 param) vo rovu rokoaro uvuiipa, uvare va uvuiiva vo iro-ia. Oa iava aue-ia ita uvuiipa katai tau vo vavae vuta (15 param). <sup>29</sup> Uva voava oavu-ia uvuiia kekeiva vo avapaoro raaka-ia osa tutuuva uvuo. Oa iava uririoro oiso puraaepa, “Vigei upopai raaka-ia”. Uva vo resura vikiiva anka vo uvuo taki rovosa varirisa, oiso ra avi rovope tapo uvare rupavira vokapaiva. <sup>30</sup> Uva voa-a vo uva kovopa irara rirovira uriripaaepa. Oa iava oiso vovouaepa ra toriive vo uvuo arova. Uva iriavu dingi vo uvuo iava rere pieiva oiso

♦ 27:14: Mk 4:37 ♦ 27:23: Ap 23:11, 5:19; Ro 1:9

ra torioro avaave. Uva oiso voea kea ragapaiva, “Oaravu ankara tovoio oisova irapaua va vao uvuo takioro rutu.” <sup>31</sup> Vo osa Pol oiso puraroepa auere ofisato ora voeao viurupa irara, “Vosa kovopa irara viapau vo toupaive uvuoia-ia, ra viapau oiso virivarita.” <sup>32</sup> Oa iava iroiroro tokoiva ae iava dingi, ra koveo avaka rovu iare.

<sup>33</sup> Vo osa avia sikerepaiva osa Pol oiso riro goruvira rutu voea tavipareva, “Vearovira rutu aiopatavoi, uvare viapau oiso vo wikireo sovara-ia aiopatavorao oarea putevo. <sup>34</sup> Uva eisi osa visii tavipaavoi oiso ra aioara vai aiota, ra vorevira gorua outa rara. Ari ita, viapau rutu oiso irai visii iava vuria vai ourevere.” <sup>35</sup> Uva vo reo isivaaro iava Pol bret ouoro oiso puraroepa, “Vearovira rutu Pauto vao-ia.” Uva va puteoro voea rutu osireiaro-ia va aioreva. <sup>36</sup> Uva va-a vao oa kekeoro rera-ia vorevira vovouisiro voea iava kavevira toupaiva oiso vovouoro, O asi vearovira toupai. Oa iava voeа rutu aioara aioiva. <sup>37</sup> Uva voeа rutu uvuiaro-a voeao oea oisoa vo uvuo sovara-ia toupaive, erao vovoto erao vatara tau katai vatara rutu (276). <sup>38</sup> Uva aio opesiaiva, oaravu aioara witara vikiiva avakava iare, auere oiso ra selpa uvuo varaatape.

### *Selpa Uvuo Oa Taki Piropa Raaka-ia*

<sup>39</sup> ♦ Oire uva avieiva. Osa iava viapau oiso vao tokoa vatuarto eveipaiva. Oa iava oavu kekeiva paitua. Uva oiso puraaepa, “Easi uvuipai vai ra vao iare uvuo viru piepe rogararore tutuu pieoro.” <sup>40</sup> Oire uva va iava voare va viru piesa auero rutu vatatopopao ankava iroiro tokoiva. Oa iava avaka rovu iare koveroepa. Ora vo uvuo torevokopa perova tapo iroiro iava vagoiva, ora sel tapo iria ipa pieiva. Oa iava vo uvuo topapaiva, oisore ra rogaraua iare viruve. <sup>41</sup> ♦ Oire uva ora vaseiepa oiso ra rogaraua iare viruve. Osa raaka-ia irapauava paiva, ovusa rirova toruva vo uvuo vituarto pegeeva. <sup>42</sup> ♦ Oa iava ofisato arepaiva viurupa irara voeare tuukepa irara, oiso ra voeа kopii pieive vo raga aepe, teapi aataoro toriive vorarore vegoaro. <sup>43</sup> Uva oiso vovouparoepa ro-ia ofisato ra Pol raga virivarireve voeа arova. Oa iava voeа rutupa vaseoro oiso puraroepa, “Vosa uvuipata aatasa, oire vearopai avakava-ia ora vikioro voa aatapaoro verata viro rogara arore. Ari ita, vosa viapau uvuipata aatasa, oire vo peroro-ia pitupaoro verata viro.” <sup>44</sup> Uva voa oearovu voeа iava aatapaoro verapaa viropa, ovusa oearovu oaravu-ia plank peroro ora operorovivu-ia vo uvuo iava oara-ia verapaa viropa. Uva oisi raga-a eisi osa verau viroiepa igei rutu rogara arore virivarioro.

## 28

### *Pol Toureva Molta Toko-ia*

<sup>1</sup> Oire vo osa igei rutu vo toko-ia vao toupaoro vo toko vaisiaro-ia taraiiepa vao-ia, Molta Toko. <sup>2</sup> Uva voeao oea oisoa vo toko-ia toupaive oea igei-ia vearo vovou rutu puraiva igeipa eto kasioro. Uvare rirova-ia uteova uteoiepa, oa iava kasiraoiepa. <sup>3</sup> Uva voa-a vo uva Pol erako kouara kakavupareva va tovosa eto kasi-ia, osa oira kopii piepava rakoru rera vavaearo avusa vusieva. <sup>4</sup> ♦ Oa iava voeao vo toko-ia oea oisoa toupaive oira kekeoro oiso puraaepa ora voeare osa rera vavaearo avupaoro kotovira toupaeva, “Akoea oira upopatoa vai-a ro ira vo toko iare virivarivira urioroi. Uva vo vuria vao oa-ia torevokira ora rera-ia viroi. Uva kopiipa o iava rakoru iria rera avuevoi.” <sup>5</sup> Ari ita, vo osa Pol oira sisiputareva tuitui kasi iare. Oire uva viapau oiso upiaroepa vova uvava rera avueva. <sup>6</sup> Osa iava voeа rutu rerava tuepaoro oiso vovouparoepa, Easi tuvuuparoi ra kopiilo va iava ikauvira. Uva oisa-a eisi osa rugorugoopaoro rerava riro kaekaevira tue ragapaaepa oiso ra va iava kopiilo. Vo osa viapau vuria vai oureva vo va-ia vao oavua puraeva rera-ia. Uva va-a vao oa-ia soporeaepla. Oa iava oiso puraaepa, “Avoeao, easi paua-a ro.”

<sup>7</sup> Uva reitoa ro-ia vo toko iava, Pabliaas ira vo rasiaro ruvara-ia verau viroiepa, ira vearo vovoutoa rutu. Ira vo peva-ia voki igei oisoa aio vatepareve osa voa toupairova. <sup>8</sup> ♦ Uva vo vokiro-a varao oara-ia oisoa Pabliaas aitearo upiaparo urua raga ivara-ia. Oire uva oisoa

♦ 27:39: Ap 28:1 ♦ 27:41: 2 Ko 11:25 ♦ 27:42: Ap 12:19 ♦ 28:4: Lu 13:4 ♦ 28:8: Je 5:14-15; Mk 5:23

rera iava kukue tapo upiapao kasiraovira, ora kovuto ira tapo oisoa rera upopareve. Oa iava Pol rera iare koataroepa rerapa varirisa. Uva rera varaaro-ia vavaea oaro tovooro, rera vorevira porete piereva.<sup>9</sup> Uva va isivaaro iava oearovu rutu upiapa irara urioaepa rera iare. Oa iava voea rutu vorevira porete piereva.<sup>10</sup> Osa iava igeipa riroara vatevateara vateiva. Ora vo tapo osa voava topa uvirosa auepaaepa, osa igeipa oaravu ita vate ragaiva vatevateara auere raiva veearosa igeipa.

#### *Pol Rom-ia Pouro Viroepa Molta Iava Urioro*

<sup>11</sup> ♦ Uva-a vo uva vao uvuoas vuriaro isivaaro iava igeire vo peva kekira voa raga vo puteva. Oa iava oavu raga-ia Aleksandria iava vo uvuo selpa avaiepa. Vo uvuo vaisiaro-a vao-ia oiso-ia, Tavaratoarei Pauto Araorei. Uva vo uvuoas voa toupaoro koke taki ateate piepaeva, oa iava voava avaiepa.<sup>12</sup> Oire uva aue-ia pou viroepa Sairakyus vo peva-ia voki voa tousa.<sup>13</sup> Oa iava voava avaiepa aue iare ita Risiam. Uva ovokivu-ia veearoto kiuvu urioroepa. Oa iava rera-ia avaiepa aue iare Pyutiolai-ia.<sup>14</sup> Uva voa-a eva uva touoro oearovu kekeiova oirao pie vovou irara oea oiso igeire puraaepa, “E uvuipatai ra igei tapo tou rovota katai wik sovara-ia?” Osa iava vo wik eva putevoiva, Rom iare topa viroepa.<sup>15</sup> Uva voeao Rom-ia tou irara oirao pie vovou irara igei iava uvuoro varaaepa Aivaropa Tapire Apias voaaro. Uva ouruivu-ia va vaisiaro, Vo Peva Stua kovuaro oearovu veraoro puteiva ora voea iava vo ruture puteoro. Oa iava Pautoa-ia Pol vuurapa vaisi puraoro oiso puraroepa, “Vearovira rutu Pauto aue-ia voka.”

<sup>16</sup> ♦ Vo osa voa pou viroepa Rom-ia, oa iava ro ofisato Pol-re oiso puraroepa, “Vearopai ra kepa oara-ia torevokovira touri, vo osa irai uutupatoa vai vii tokipareve voa.”

#### *Pol Vearo Siposipo Kosi Pierava Rom-ia Toupaoro*

<sup>17</sup> Oire uva voki peva isivaaro iava oira vasi irara Jiu iava gurileva Pol. Oa iava voeare oiso puraroepa, “Araoko irara oaa, evoea evoa Jerusalem-ia Jiu-pa irara oea ragai ouivora kortua iare, oiso ra Rom reraaropa gavman ragai vateive. Ari ita, viapau oiso suria vai puraava voeao-ia vigei voeao oirara, ora varao-ia aao irara oavi vo pitupituroaro.

<sup>18</sup> ♦ Uva Rom reraaro gavman ragai rovirieirevora vo va-ia. Uva viapau oiso suria vai kekerevora ragai-ia. Oa iava oiso vovou ragaroera ra ragai karureve vorevira, uvare viapau oiso ragai-ia oavu avu vai touvora, oiso ra oai sirova ragai uporeve eisi osa rutu oisoa ruipapaave Jiu ragaire.<sup>19</sup> Uva oiso puraaera Jiu, Viapau oiso ro vo reoaro gavman torevokopai. Eva-a oa iava oiso puraraera, Vearopai ra Sisa iare avara, ra ragai vo reoaro rovirieireve. Ari ita, uva ragai viapau oiso voeao oirara oaa Jiu kortupaa.<sup>20</sup> ♦ Oa-a vao oa iava visii guruavoi oiso ra va-ia ora reovio. Ari ita, oiraopavira vo iro-ia ragai tuukepa iro oa vituaro toupaivoi vao-ia, Kataia-a raga oare rugoopaoro rariparai oiso osa voea ita voeao Jiu raripaaveira rera-ia ro-ia Ropoto Pauto reraaro Kae Pieto ira taru urioroverea.”

<sup>21</sup> Uva va-a vao oa iava rera vo reoaro pukooro oiso puraaepa, “Ari ita, viapau oiso reoa vai suria vai vii oaiaro uvuiovora. Ora aue rigatoa vai tapo vo vii iava vo voea iava voeao oea oisoa uriopaave Judia Distrik iava.<sup>22</sup> Ari ita, oiso ruipapaiei rutu ra vo reo uvuorio oirao piepariveira, uvare voraro rutuva voearo iava uvupaioveira vii voeaaero oirao pie vovou irara oea-ia vuri reoro purapalveira oearovu.”

<sup>23</sup> Oa iava ovokivu reesiiva oiso, “Vo vokio-ia ora guruviovore vorevira ita.” Uva vo voki-a vao oa-ia riro irara rutu Pol vo kepaaro iare urioaepa, ovokia vokipakouaro rutuia voeapa siposipapaoro rovoroepa vo putasa vokiarovi vo tugurasa vokiaro Pauto vo Saraaro iava siposipapaoro. Ari ita, vao-ia Moses vaaro Reo Taisi ora profet irara vo rigatoroaro origatoroa rutu iava voeaa tavitavipaoro voeapa vara aviavi piepareva aue iava Jisas.<sup>24</sup> Oa-a vao oa iava oearovu rera vo reoaro oirao pieiva, ovusa oearovu vo reo uvu ragaiva.<sup>25</sup> Uva oisi-a eisi osa iava viapau oiso katai vovou vai-ia ora reopaaepa. Vo osa Pol arova ora vaseaepa osa oavu goruvira reo vaterova voeapa oiso puraoro voeare, “Ari ita, ro-ia Tugoropato Uraurato ira oiraopavira rutu profet Aisaia gisipaoro iava oisoa reoreoparo visii aao iraraarore ora visii vao oiso purapaoro,

♦ 28:11: Ap 27:6   ♦ 28:16: Ap 24:23, 27:3   ♢ 28:18: Ap 26:31-32   ♢ 28:20: Ap 26:6-7, 29; Ef 3:1; 2 Ti 1:16

<sup>26</sup> ♦ ‘Avau ra voeao oirara taviri oiso, Visii vao-ia uvu ragatavere. Ari ita, oiraopavira vo reo gurukoaro uvupatavere, osa viapau oiso taraipatavere. Ora oiso tapo vare keke ragapatavere, ra ita viapau oiso vara-ia taraipata oiso osa toupai.

<sup>27</sup> Aue iava uvare tarai asavira toupata. Kokiara oavisii tupapata ora visii iava, ora osireiara oavisii tapo ururupa piepata. Uvare reasipatai oaravu keke arapa, ora oiso tapo uvare reasipatai oaravu uvu arapa. Oa-ia vao ragai arova porepata viroveira, aue iava uvare oisi ragavira rutu visii iava sopaura oavisii ragaipa reasipapeira oiso, teapi visii virivaria.’

Eisi osa puraroepa Pauto.’

<sup>28</sup> ♦ Uva Pol oiso puraroepa voeare ita, uvare tarairoepa voea vo vovouroaro-ia tarai asa vovouro, “Uvuta! Pauto vo raivaaro iava vao virivaripa ora poretepa raiva. Osa-a eisi osa iava vo reo vao avapaperea voeaopa ratau tou irara. Oa iava vo reo uvu iraoivere rara voea voeao sopaipa irara.” <sup>29</sup> [Uva vo reo isivaaro iava ora vase ovoiaepta ora reopaoro voea raga. Uva vo reo-ia ora voeava kaureopaoro avapaaepa.]

<sup>30</sup> Pol vo ivarei sovara-ia toureva Rom-ia. Oa iava voa ora rerapa kepa vorireva. Uva vo kepa rataoaro oisoa karupareve oearovu rutupa voearo oearoa oisoa rera rugoopaoro rera iare uriopaave. <sup>31</sup> Uva oisoa vokiara rutu-ia voa toupaoro Pauto vo Saraaro iava siposipopareve ora Turaro iava ro-ia Jisas Krais. Eera ira iavirava oisoa uriri asavira rutu siposipopareve, osa viapau oiso irai uvuiparo rerare korusa.

## ROM Irapa Reoro Vo Vukuo Iava

Pol vo pasio rigatoreva 57 o 58 yia Jisas vo kavauaro isivaaro iava, vo ovusa Korin urui-ia toupaoro oisoa lotupa irara tauvapareve. Riroara pasiara rigatoreva Pol oara toupaiveira Nupela Testamen sopaaro-ia. Ari vao-ia oa purareva voeaopa Rom vata oa oaravu rutu-ia putepai vao reia pasia.

Uva vo pasio sovara-ia ira voearei rutupa reoara purareva. Voeao Jiu-pa irara (Ro 2:17–4:25), ora voeao tapo Jentael-pa irara (Ro 1:13–15, 11:13) oearea takuvuvira oisoa lotupaave vo Rom urui-ia toupaoro. Uva voearei rutu tavireva oiso rigatooro, Kataitoa raga-a ro Krais ira uvuipa ra oirara karureve vuri vovou vo goruaro iava. Ra va iava uvuipai Airepa Tootoo oupasa rera oirao piepaoro. Ari ita, Moses vaaro tapo vao Reo Taisi oa viapau uvuipai, ora orekerovu rutu oara viapau uvuipai tootooa vatepasa. Ari kataitoa raga Krais vo osa rera oirao piepaive oirara rutu.

Oearovu Papara 8 oiso vaisipaiveira, Vearo Siposipo Rera Iava Tugoropato Uaurato.

1. Kovoa vituaro vao aposelto oa purareva ae Pol, 1:1–17.
2. Oirara rutu uvuipai ra vao kaviko vovouaro oupaive vao Pauto. Auepa, teapi eto kasi-ia avaaverea vao vuri tapi, 1:18–3:20.
3. Pauto Oviitoa-ia Airepa Raiva purarevora vao oa-ia uvuipa vigei oriru iraopasa, 3:21–4:25.
4. Jisas raga-ia uvuipavieie ra Airepa Tootoo oupape, 5:1–8:39.
5. Pol siraoroepa Jiu-pa irarapa voeao oea reesireva Pauto ora rerapa, 9:1–11:36.
6. Vo toupai oiso osa ragavira uvuipa Kristento ra toupareve Pauto vo ruipaaro sirova utupaoro, 12:1–15:13.
7. Vo Pol ovoiopa reoro purareva ora tapo vearo vokireva, 15:14–16:27.

### *Kovoa Vituaro Vao Aposelto Oa Purareva Aue Pol*

<sup>1</sup> ♦ Ragai raga-a, vao Pol Jisas Krais reraaro kovopato, ro ira ragai arurevora rera vo reoaro kaesa. Eera ira ragai roporeva rera vaaro kaepasa va iava oearovupa siposipopasa Vearo Siposipo.

<sup>2</sup> Vo siposipo-ia oa iava Pauto tuariri rutu reo goru purareva. Vao oa iava profet irara va vao reo goru rigatoiva Tugoropa Vuku sovara-ia voari tuariri rutu. <sup>3</sup> ♦ Vo siposipo-ia Vearo Siposipo oa rera iava ro-ia Jisas Krais toupae, vigei reraaro Turaro, Pauto Oviitoaaro. Ro ira oiravira rutu kavauroepa vo rasio-ia vo Devit vo saraaro sovararia. <sup>4</sup> Uva oiraopavira rutu-a, uvare tugoropa vaisitoa rutu-a ro-ia Pauto Oviitoaaro. Ira-ia toupaiveira riroa gorua. Aue vituaro iava uvare rera vo kopiaro iava ravotovira vorevira toreroepa. Oire uva va-a eva oa iava vigei rutu taraipavio oiso, Rera eera Pauto Oviitoaaro rutu. <sup>5</sup> ♦ Rera Jisas ira iava Pauto vigei-ia vearo vovou purapareveira. Osa iava Pauto ragaipa ruipapaoro rutu ragai-ia vo kovo tovoreva oiso ra rerapa kovopaa rutu oiso, aposel. Ra va iava oearovu rutupa tavitavipara osararovu rutu iava. Ra va uvupaoro ora voea iava sopaura oaiive vorevira porepaive rera iare, ro Pauto rera vaisiaro kae piepaoro. <sup>6</sup> Oire uva visii-a eva visiigoa evoa toupataveira Rom urui-ia osararovu rutu iava visii. Pauto visiigoare tapo keeraroepa oiso ra kareketa voeao tapo Jisas voeao.

<sup>7</sup> ♦ Uva oisi-a eisi osa iava vo rigato purapaavoi visiipa vao Rom-ia tou irara. Visiigoapa siraopaoro Pauto visiire keeraroepa, oiso ra oiso toutes rera voeaaro. Uva uvuipasi Pauto Aite oavi ora Turaro Jisas Krais ra visiipa tauva vatesi ora gavaure vovou tapo.

### *Pol Vearo Vaisi Purareva Rera Vaaro Sovara-ia Variria Pautoa Iare*

<sup>8</sup> Rovopavira rutu visii taviipaavoi vao iava osa oirara rutu voraro rutu toupaoro visii iava uvupaiveira oiso, Riro rari irara visii Jisas-ia. Oa vituaro iava oiso puraparai, Vearovira rutu Pauto. Aue iavirava uvare Jisas rutu vo kovoaro-a vao-ia. <sup>9</sup> ♦ Oire uva

♦ 1:1: 1 Ko 1:1; Ap 9:15   ♦ 1:3: Jo 1:14   ♦ 1:5: Ga 1:16; Ap 6:7   ♦ 1:7: 1 Ko 1:2-3   ♦ 1:9: Fl 1:8; Ap 24:14

vokiara rutu-ia kasivarivira rutu kovopaaveira ora ragai iava vovouisi rutu tovopaoro, oiso ra va iava Pauto vo kovoaro vearovira rutu puraa oearovu rutupa siposipapaoro rera Oviitoaaro iava. Ro-ia Pauto ira vearovira rutu ragai-ia taraiparoveira vosa oiso oiraopavira purapara, Visiipa siraopaoro vokiara rutu-ia visiire variriparai Pautoa iare.

<sup>10</sup> Ari ita, voviri tuaririvi uva oiso ruipa ragapara oiso ra visii kekeia. Oa iava Pauto iare variriparai oiso ra visii kekeia. Uva Pauto vo vovouaro raga sirova va vao variria purapaavoi vo vokio-ia, oiso ra visii kekeia rara.

<sup>11</sup> ♦ Uva oiso ruipa iraoparai ra visii kekesa uriora rara. Oiso ra visii siposipoa varao iava oara iava Tugoropato Uraurato ragai siposiporevora. Oire ra vara iava uvuoro visii varaaro oirao pie vovouro oavissi goru pieta rutu.

<sup>12</sup> Uva ora tautauvavio ora vigeipa tavitavioro varao iava vigei rutu varaaro oirao pie vovouro. Oire ra va iava vigei rutu iava vaeavira goruvira rutu torepe oirao pie vovouro oavi.

<sup>13</sup> Araoko irara oaa, vearovira rutu vare vao rugorugoo iraopatai, uvare vokiara rutu-ia oiso ruipa ragaparaveira ra visii kekeia, vo osa orekerovu rutu ragai vo ruipaaro korupape. Ari ita, visii tapo tou ruipa ragaparaveira, oiso ra visii siposipoa visii tarai pieoro vo siposipo iava vao-ia. Oire va iava visii iava oearovu iava sopaura oaive pore piro, oiso osa oearovupa siposipapaavora rera iava Jisas voeaaropa ratau tou sararo.

<sup>14</sup> ♦ Ari ita, Pauto ragai reesirevora rutu. Uva vo reesire rugoopaoro rutu rera vo kovoaro purapaaveira oearovivu rutu oirara tauvapaoro. Viapau oiso voeo raga tauvapasa reipa uruiro-ia. Viapau. Ari oearovu rutupa voearo oearoa vegoara sopapro-ia toupaiveira. Ari ita, viapau oiso voearo ragapa riro tarai irara. Viapau. Ari voeaviopa tapo ruruvutu irara.

<sup>15</sup> ♦ Va vao vituaro iava visii keke ruipa iraoparai visiigoa evoa Rom-ia toupataveira. Oiso ra voa visii siposipoa visii tarai pieoro va iava vao Vearo Siposipo.

#### Vearo Siposipo Vo Goruardo-a Vao

<sup>16</sup> ♦ Vao Jisas vo reoaro viapau oiso raveravea-a ra vava ariipara. Viapau. Ari ita, uvare Pauto vo goruardo rutu va-ia toupaivoi vao-ia Vearo Siposipo. Uva va-a eva oa iava oiso taraiparai vo osa oearovu vo reo iava uvuoro ora virivaripaaverea rutu voeo oea Jisas oirao piepaiveira rutu voeo iava Jiu-pa irara voari rovovira, uva voea isivaaro iava oearovu rutu voeo ratau tou irara.

<sup>17</sup> ♦ Vao Pauto vo reoaro oa roroiovira rutu vo raivao kareke piepaiveira Jisas vo raivaaro, oa-ia oearovu rutu uvuipaa ra va-ia ora agiagipaave Pautoa-va. Uvare vo raiva vituaro-a eva oirao piea, ora vo raiva ovoiaro-a vo raga oirao piea, va vao oa iava Pauto voea oirara oiso reesiparevere oiso, Voea voeo torevoko vovou irara. Ari ita, Tugoropa Vuku oiso purapapeira,

‘Ro torevoko rugooto ira uvuiparoi ra Pauto-ia rugorugooapaoro rera-ia rariparo orekerovu rutu oupaoro varao vearovara Pauto varaaro.’

#### Oirara Rutu Isivaaepa Pauto Vo Ruipaaro Sirova Utu Arapa

<sup>18</sup> ♦ Pauto toupare vo vuvuiua-ia. Uva voava roroiovira rutu kasipua karekepareveira voeaore vuri vovou irara ora voeo oea rerare isivapaaveira. Voeao oea oiraopa siposipore korukorupaaveira oearovu asavira oiso, teapi va-ia taraipaave. Uva voea-a evoea oea vuri pitupitu purapaiveira vare korukorupaoro.

<sup>19</sup> Ari ita, viapau oiso rera vo vovouaro vataureva Pauto. Uva voea tapo va-ia taraipaaveira oiso osa vigei, uvare oearovu rutupa va karekereva.

<sup>20</sup> ♦ Iu, Pauto tuariri rutu orekerovu rutu purareva vo vuuta-ia eva, oa iava vo voki-ia rekasisa urioerao ovokia vao-ia. Uva oirara vara varao kekepaiveira varao oara purareva ora rera vo goruardo-ia vao oa viapau opesia vai. Oire uva vara iavirava uvuipaa ra rera vo goruardo eveipaive ora rera vo vovouaro. Eva oa vituaro iava viapau raiva vai epao voeapa oiso ra vuri pitupituro oaive vataupaoro vara taeapaive.

<sup>21</sup> Ari ita, Pauto-ia oisoa taraipaave. Uva viapau oisoa rerapa avivikepaave rera vaisiaro kae piepaoro. Ora viapau oiso oisoa purapaave rerare, “Vearovira rutu Pauto” vo rera-ia vearo vaisi purapaoro. Oisi-a eisi osa raga purapaoro oisoa akukupapa rugorugooro raga oupaive. Uva vara-a evara oara-ia ora voea vo rugorugooroaro ruupa pieiva vara vavagisi pieoro rutu.

<sup>22</sup> ♦ Oa iava oisoa oiso purapaave, “Igei-a riro tarai irara

---

◊ 1:11: Ro 15:23   ◊ 1:14: 1 Ko 9:16; Ap 28:2   ◊ 1:15: Ro 12:18   ◊ 1:16: 2 Ti 1:8; 1 Ko 1:18   ◊ 1:17: Ro 3:21; Ga 3:11; Hi 10:38   ◊ 1:18: Ef 5:6; Kl 3:6   ◊ 1:20: Sam 19:1-6   ◊ 1:22: Jer 10:14

rutu.” Vo osa voeare rugorugooara vavagisivira rutu toupaive. <sup>23</sup> ♦ Ari ita, vo pitupituo kavuiva oa-ia oisoa Pautoa-ia vuurapa vaisi purapaive, ro ira viapau opesia vaiaro. Oa iava opitupiturovu oaine raga puraiva varaopa ora avivikepasa vara-ia vuurapa vaisi purapaoro tokarasiara. Oara oisoa purapaive ora voea vavaearo raga iava, oiso ra oiravira kekepa viro ora kokiovira, ora rakoruvira, ora vo karero okareroa vo rasio-ia vokapaiveira.

### *Vo Toupai Ovurirovu Rutu Iava*

<sup>24</sup> ♦ Uva oisi-a eisi osa ragavira vo pitupitu eva puraiva, oa iava Pauto voea iava vasereva oiso ra ora voea vo pitupituaru purapaive evara kokoropara. Oa iava ora voea vo rugorugooro raga sirova utuoro opitupiturovu rutu vuriara karekareke piepaiva. Uva ora voea-ia opitupiturovu rutu purapaiva oiso osa okarerovu kaakau karero, voeo okarea viapau oiso ora vo karepa ariipaave. <sup>25</sup> ♦ Ari ita, Pauto vaaro reo ovauoro oreorovu raga kuuvuara sirova utupaaepa ora voea raga varaaro. Oa iava oisoa varaore variripaave oara purareva Pauto voari tuariri. Oire uva varapa evara variripaoro rerare Pauto isivaaepa rutu, ro ira vara rutu evara purareva. Ro-ia Pauto ira-ia vuurapa vaisi purapai vigei vao vo vokio ora vo utupaua rutu.

<sup>26</sup> Uva vara-a varao vuri pitupituro oara iava Pauto voea iava vasereva, oiso ra ora voea raga ora voea vovouaro sirova utuave. Ra vara-ia ora arii pieave ora voea raga. Vao kavuoro vearoa ora oua, ora vairoro ragava otopaave riakora. <sup>27</sup> Vo ovusa oirara tapo oisi raga piepaoro ora voeava otopaave. Oire uva oisi-a eisi osa iava riroa viria vavataaro oisoa kaepaive ora voea raga. Uva va eva vuri pitupitu vo voriaro oa voeapa torevokopapeira oa oupaiveira.

<sup>28</sup> ♦ Uva oisoa Pautoa-re isivapaoro rera vo tavitaviarovu kaureopaave. Uva va-a vao oa iava voea iava vaserevoiva Pauto, voea iava sopaura oaine agasiepa rutu vuriara oaine iava vo pitupituro-ia oara oisoa purapaive vo vokiara rutu-ia. <sup>29</sup> Oiso vo vovouro varao vuri vovouro rutu oiso-ia, iiruko vovoua vao, ari otopa pitupitua vao, ari riiriipa vovoua vao, ari oira kopii pie ovoipa pitupitua vao, ari ora upopa pitupitua vao, ari kuuvu reoroa varao oara oisoa purapaoro oearovivu akaipa piepaive, ari reo topatopa piepa vovoua vao. <sup>30</sup> Ari oearovu togapa vovoua vao kuuvu reoro-ia, ari Pautoa-pa reasipaoro oisoa ora voea vaisiaro raga iava vagupaave, ari raiva taraapa vovoua vao oisore ra oraivai iava vuriara purapaive, ari aite irarava ora kaureopa vovoua vao. <sup>31</sup> Ora vuri pitupituro oaine purapaoro oisoa voea varaore ovaupaave reo ovoiro oaine. Ora viapau oiso oaravivu-ia roroipaave. Uva oearovupa siraopa pitupitu viapau sovopaive vo ora voea sopaaro-ia. Ari, vosa oisi ora sovooro voearovi tauvapaive osa viapau. Aue iava uvare viapau sirao vovourovi vai voea sopaaro-ia. <sup>32</sup> ♦ Pauto vo reoaro-a vao oa oiso purapapeira, Oiso torevokopai vosa iravu vuri vovou purapareve vokiara rutu-ia, oire ra rera kopii pieta rera upooro. Uva va-a eva rera vaaro voria. Oire uva vo reoa vao-ia oa-ia oisoa taraipaave rutu. Uva oiso purapaave vare, “Eagara, vo reope eva. Vao purape viria.” Oire uva vao-ia tapo viria purapaive oearovu siposipapaoro oiso, “Eagara, vuri vovou purapata. Viapau oiso oavu avu vaiei va-ia.”

## 2

### *Pauto Vo Rovirieiaro Torevokoa Rutu*

<sup>1</sup> ♦ Voeao-ia vuri irara oea iava tavitaviparai oiso, E voea rovirieipataveira oiso voeare purapaoro, “Vuri irara evoea”? Oire opeita ora visii raga ora keakeapata oisi eisi purapaoro. Vosa oearovu togapata, oire uva visii raga ita oisi vara vuriara purapataveira. Uva oisi-a eisi osa purapaoro uvuipatai ra ora visii raga ora togapata ita. <sup>2</sup> Oa-ia vao-ia taraipavie oiso, Pauto raga oa-ia vao voeapa siraoa vavataaro vatepareveira voea vo vovouaro vuriara rovirieipaoro. Uva va-a eva rera vo pitupituaru oa oisi eisi torevokopapeira rutu. <sup>3</sup> Uva visii-a vao-ia visiigoa oirara toga iraopataveira varao-ia voea vo vovouaro vuriara. Ari ita, uva visii raga ita visiigoa oisi vara vuriara purapataveira. Oire uva apeisi-a? Pauto vaaro-ia voria putetaverea va vatavataoro? <sup>4</sup> Ari ita, taraipatai

<sup>♦</sup> 1:23: Sam 106:20; Ap 17:29    <sup>♦</sup> 1:24: Ef 4:18-19; 1 Pi 4:3    <sup>♦</sup> 1:25: Ais 44:20    <sup>♦</sup> 1:28: Ef 4:19    <sup>♦</sup> 1:32: Ro 6:21; Ap 8:1    <sup>♦</sup> 2:1: Ro 1:20; 2 Sml 12:5-7

Pautoa-ia vearo vovouto, uvare viapau oiso vasevagepavira visiire kasipuparoveira oiso ra visii opesi pie ovoireve. Oire uva apeisi-a? Va-a eva vituaro iava rerapa reasipataveira, eke? E viapau taraipataveira rera-ia Pauto ira visiipa kave vovou rera vaaro vatepareveira visiipa siraopaoro, oisore ra vorevira rera iare sopaura oavisii porepata? <sup>5</sup> ✩ Oire uva vo voki-a vao oa-ia Pauto rera vaaro kasipua karekereverea voea varaaro vuriara rovirieipaoro torevokovira, uva evo voki-ja visii vaaro voria outaverea rera ruvara-ia pute pievira rutu. Eake iava? Uvare riitako vovou irara visii rera vo reoaro uvu arapa.

<sup>6</sup> Aue iava uvare uvuivira rutu Pauto voea vorireverea vuriara oaiveva uvuioro, oiso osa voea varaaro vuriara uvuipapeira. <sup>7</sup> Uva oisi-a eisi osa ragavira Pauto voea vatereverea Tootoo Ovoi voeao oea vo tootoore taraapaiveira, ora voeao oea rerare vearo vovou rutu purapaive kasivarivira rutu oiso ruipapaoro ra Pauto voea-ia rorupareve, voea vaisiaro kae piepaoro. <sup>8</sup> ✩ Osa voeao oea ora voea ragare rugorugoopaoro vearo vovou kavupaiveira, voea vo pitupituroaro raga sirova utupaoro vuriara, uva voea-a evoea oea-ia Pauto rera vaaro riroa kasipua tovoreverea voeare aveaveoro rutu. <sup>9</sup> Oire uva riroa tavaka ouiverea voea vo vuriroaro voriaro iava, ora riroa tapo vavata siraoa-ia oa ouiverea. Ovori epao toupai oa ou rovoiverea irapavira voeao Jiu. Ra voea isivaaro iava oearovu voeao iava ratau tou irara vo vori raga ouive ita. <sup>10</sup> Ari ita, uva oiraopavira uvare voriara epao, oara toupai vearo vovouro rutu vo voriroaro. Oara vatereverea Pauto voeaopa oea vearo pitupitu purapaive. Oiso osa vo voriro-ia, vigei-ia rorureverea vigei vaisiaro kae pieoro, ora gavaurea tapo vatereverea vigeipa. Oa-a vao oa ou rovoiverea irapavira voeao Jiu. Ra voea isivaaro iava oearovu voeao iava ratau tou irara vo voriro raga ouive ita. <sup>11</sup> Aue iava uvare torevokovira raga Pauto vaeavira rutu oearovu rutu rovirieireverea vo utupaua.

<sup>12</sup> Uva voea voeao-ia ratau tou irara oea-ia viapau oiso Moses vaaro Reo Taisi toupaiiveira. Oire vosa vuri vovou puraive, ra va-ia kopii ovoiave opesi ovoioro. Uva viapau oiso Pauto oisi voea piereverea vo uvare Moses vaaro sirova Reo Taisi utuoro voea rovirieireverea. Viapau. Ari, eva peira Reo Taisi Jiu-pa irara raga ruvara-ia. Ari vosa voea evoea vuriara purapaive, oa sirova voea rovirieireverea eva Reo Taisi. <sup>13</sup> ✩ Vosa voeao oirara oea Reo Taisi uvupaiveira, ra viapau va sirova utupaave vo Pauto osireiaro-ia, uva viapau oiso vearo irara voea evoea. Ari voea oea vearovira vaisipareveira Pauto, oea vearovira Reo Taisi uvupaoro va sirova utupaaveira. <sup>14</sup> Uva va vao-ia Reo Taisi oa viapau oiso voeao-ia ratau tou irara toupaiiveira. Ari vosa irai voea iava ora rera vo ruipaaro raga iava vearo vovouro purapareve varao oara iava tavipapeira Reo Taisi, oire uva vo vovouro-a varao oara oiso karekepere rera-ia, oara evara rera vaaro reo goru va sirova utupasa. <sup>15</sup> Uva voea raga ita oea vearo pitupitu purapaiveira, oa-a eva oa-ia vao kareke piepaiveira oiso rutu Reo Taisi vo reesiresiaro, oa toupaiiveira voea sopapro-ia oisi. Ora oiso ragavira tapo osa va vao kareke piepaiveira, uvare ora eveipaaveira voea varaaro iava vuriara. Ra va iava ora togapaave oiso puraoro, “Vuria puraavoi.” Oire vosa ovokivua ora eveiave ora voea raga oiso puraoro, “Vearoa puraavoi,” ra oisi ragavira eisi voea vaaro reo goru ora voea-ia karekeive. <sup>16</sup> Uva oisi-a eisi osa iava vo vokia eva oa-ia Pauto Jisas tavireverea oiso puraoro, “Oirara rovirieiparivoi,” ovoki-a eva oa-ia varao vatau rugorugooro oara vigei sopapro-ia vatauvira toupaiiveira roroiovira ora karekepere rutu viaevira. Uva vara-a evara oara rovirieireverea rara Jisas. Oiso osa oearovu taviavora vao iava Vearo Siposipo Jisas vaaro.

### Voeao Iava Jiu Ora Voea Vaaro Reo Taisi

<sup>17</sup> Visii vao-ia apeisi ragavira toupaiiveira? Oa iava visii raga ora vaisipataveira oiso, “Igei raga Jiu, riro tarai irara Reo Taisi-ia.” Oa-a eva oa-ia ora visii raga ora vaisiaro kae piepataveira oiso purapaoro, “Pauto ira igei raga roporeva. Ira igei raga-ia toupaiiveira.” <sup>18</sup> Uva visii rutu rera vaaro Reo Taisi vieipataveira. Osa iava vearovira taraipataveira vo, oiso ra rera vo ruipaaro sirova utupata. Oa iava uvuipatai ra oaravu rutu oisi iava vearovira rovirieipata oaravu reeresipaoro oiso, “Torevokoara varao-ia.” <sup>19</sup> Oire ora visii raga iava oiso purapataveira, “Uvuipaiei ra ro vaaru vovouto vovouaro karuio, ora uvuipaiei ita tapo ra avavia vateio voeaopa oea rupavira toupaiiveira. <sup>20</sup> Ora

✩ 2:5: Diu 32:34 ✩ 2:8: Ga 5:20; 2 Te 2:12 ✩ 2:13: Je 1:22-23

uvuipaiei tapo ra voeao auu reo pura irara torevokoio tapo. Ora tapo uvuipaiei voeao roroio pievira siposipopasa oea airepavira Pautoa-ia taraiave.” Ora oiso purapataveira, “Taraipaioveira vearovira rutu Reo Taisi-ia, oa iavirava varao-ia oiraopa reoro rutu vituaroa iava taraipaioveira rutu ora orekerovu rutu-ia taraipaiei.” <sup>21</sup> Avoeo! Visii vao-ia visiigoa oearovu rutu siposipopataveira. Uva apeisi-a? Ari eakepa visii raga ora siposipo asapataveira? Oearovu vosipataveira oiso purapaoro, “Opeita kavirupata.” Uva apeisi-a? E kavirupa irara visii? Iu. Oa purapataveira. <sup>22</sup> ♦ Oearovu vosipataveira oiso purapaoro, “Opeita otopata.” Ari eakepa visii raga oisi ora pie asapataveira. Visii riro kasipu irara voeaore oea varaore variripaaveira oara purapaiveira ora voea vavaearo iava. Vo osa visii raga orekerovu kavirupata vo keparo-ia oara-ia varao toupaiveira tokarasiara. <sup>23</sup> Uva ora visii raga tapo ora vaisi oavisii kae piepataveira oiso purapaoro, “Pauto vaaro Reo Taisi igei raga-ia toupaiveira.” Uva va vao-ia Reo Taisi oa vatavatapaoro Pauto vaisiaro akaipa piepataveira rutu. <sup>24</sup> ♦ Vao-ia Tugoropa Vuku oiso purapapeira, ‘Voeao-ia ratau tou irara oea visii varaaro vuri pitupituro kekepaoro Pauto vaisiaro tovipaiveira.’

### *Rakari Verapa Pitupitu Oa Viapau Uvuipai Oirara Orirupasa*

<sup>25</sup> ♦ Vosa Reo Taisi rutu sirova utu ruipapata, ra ora visii iava rakari verapata ora reesipaoro oiso, Visii Pauto voeaaro rutu. Eisi osa vearovai. Ari vosa oisi va purapaoro eisi Reo Taisi vatavatapata, ra vo reesi eva oiso rutu toupaive Kuuvua rutu. Oa akaipavira rutu toupai. <sup>26</sup> Oire uva apeisi ragavira toupai vo Pauto osireiaro-ia? Aue iava vosa iravu voeao iava ratau tou irara rakari vera asato vearovira Pauto vaaro sirova Reo Taisi utuparo. Oiraopavira ita, oiso Pauto ira eveiparevere oiso rutu osa iravu ro visii iava, visiigoa ora visii iava rakari verapataveira. <sup>27</sup> Oire uva voea voeao-ia ratau tou irara ora voea iava rakari vera asa irara, oea vearovira rutu Pauto vaaro Reo Taisi sirova utu iraopaaveira. Uva voea-a evoea oea vorevira visii togaiverea, uvare visii-a vao Jiu rakari verapa irara, visiigoa akukupapavira Reo Taisi-ia tarai ragapataveira, osa viapau oiso va sirova utupata. <sup>28</sup> ♦ Aue iava uvare iroutoa rutu-a Jiu-pato? Easi ro-a ira-ia rakari vera reesi toupai, raa? Viapau. Asi ro-a ira-ia oiraopa reesi rutu toupaive. Vo reesio-ia oiso-ia vosa Pauto vaaro Reo Taisi rera sopaaro rutu-ia oiraopavira rutu toupaive. <sup>29</sup> ♦ Oiraopavira rutu ro-ia oiraopato Jiu-pato ira-ia oiraopa reesi rutu toupaive rera sopaaro-ia. Vo reesio oa viapau oiso sigoa-ia oa purapaiveira vao Reo Taisi sirova utupaoro. Asi vao-a oa purapareveira Pauto reraaro Tugoropato Uraurato. Oa-a eva oa vituaro rutu iava ruipapaaveira rutu, oiso ra voea-ia rorupareve rutu Pauto, uvare viapau oiso rugorugoopaaveira ra ora voea raga vaisiaro-ia vuurapa vaisi purapaive oirara.

### 3

### *Pauto Rovovira Reoa Vate Rovoreva Voeapa Jiu Uva Voava Rerare Isivaaepa Ita*

<sup>1</sup> Oire uva apeisi ragavira oiso osa toupaivoi vao-ia? Vosa Jiu-pato vii, oire ra va iava iravira irapau oearovu rutupa oirara vo Pauto osirearo-ia, eke? E apeisi-a? Akukuvira raga ora voea iava voeao Jiu rakari vera ragapaaveira, eke oai toupaiveira va-ia vao? <sup>2</sup> ♦ Avoeo, oiraopavira rutu oa-ia vao toupaivoi vao-ia. Oa vituaro uvare va-ia vao oearovu rutu putepaiveira. Rovopa rutu vearoa oiso rutu toupaiveira, uvare Pauto ora rera vo reoaro vatereva voeao Jiu. Oa iava uvuipai ra va iava vearovira rutu taraipaave va-ia vao oa purareva voeapa. <sup>3</sup> Oire uva apeisi-a? Oearovu Jiu-pa irara vo reore vao-ia isivaaepa, uva apeisi-a? E Pauto vare vao rera vo reoaro ovauroverea? <sup>4</sup> ♦ Viapau rutu. Oreoa vao rera vaaro oirao piervereira ra oiraopavira karekeperea rutu. Vosa oirara rutu oiso toupaive osa riro kuuvu irara, uva rera raga ira pauakavira rutu toupareveira Oiraopatoa Rutu Pauto. Oiso osa vao-ia purapapeira Tugoropa Vuku, ‘Vosa reoreopau, ra vii vo reoaro oiraopape rutu, oire ra va iava taru oirara rutu vo reo uvupaise. Vosa oearovu vii keakeapaoro vii togapaise oaravu-ia kuuvuara oiso

♦ 2:22: Ap 19:37 ♦ 2:24: Ais 52:5 ♦ 2:25: Ga 5:3 ♦ 2:28: Mt 3:9; Jo 8:39 ♦ 2:29: Kl 2:11; 2 Ko 10:18;

1 Pi 3:4 ♦ 3:2: Diu 4:8; Sam 147:19 ♦ 3:4: Jo 3:33; Sam 116:11, 51:4

purapaoro, Vuritoa rutu vii, oire ra voea-ia puteri voea varaaro viaevira kuuuu reoro karekeoro.'

<sup>5</sup> Ari ita, oearovu vo rasio iava oiso purapaaveira, "Vosa vigei vo pitupituroaro varao vuriara oara-ia Pauto vaaro torevoko pitupitu viaevira rutu karekeperea, oire uva apeisi-a?" Vosa Pauto vara-ia vigei varaaro vuriara vigei vorireverea, uva apeisi-a? Ra rera Pauto vuria purareve va-ia oisi? <sup>6</sup> Viapau rutu! Viapau oiso vurito-a Pauto. Vosa oisi ragavira touparevori, ra apeisi ragavira oearovu varaaro vuri vovouro torevokovira rovirieipareve voeao oea vo rasio-ia toupaiveira? <sup>7</sup> Oire oearoi pasi ragaire oiso puraavere, "Viapau oiso torevokopai ra Pauto igei varaaro iava kuuuuara igei rovirieireve. Aue vituaro iava uvare vara iava evara Pautoa-ia taraipaaveira oearovu vearovira oiso, Oiraopatoa Rutu Pauto. Ira ora rera vo reoaro oirao piepareveira vara rovirieipaoro." <sup>8</sup> ☩ Oire vosa oiraopa reo vao-ia, ra va iava oearovu vai pasi oiso puraave, "Oire ra vuriara vai purape, ra va iava vearoa vai karekepe." Ari ita, oearovu oiso ragai tovipaiveira oiso purapaoro, "Vii Pol viigoa oisi oiso oearovu saposipariveira." Oiraopavira rutu oa-a vao oa-ia voea evoea riroa tavaka ouiverea rara vo Pauto ruvara-ia voea vo toviroaro voriaro sirova vuriara.

#### *Viapau Rutu Irai Vo Rasio-ia Torevokotoa Vai Toupareveira*

<sup>9</sup> ☩ Oire uva apeisi-a? Voeao Jiu-pa irara ratau tou irara-ia putepaiveira, uvare voea- a vearo irara, eke? Viapau rutu. Vo reo-ia oa aviavi pievira rutu pura rovoavo oiso-ia, Voea rutu voeao Jiu ora voeao tapo ratau tou irara oea rutu takuvuaro-ia goruvira rutu toupaiveira vuria vo varivariaro. <sup>10</sup> ☩ Oisi-a oiso osa rutu toupaiveira Tugoropa Vuku-ia vo reo-ia,

'Viapau rutu iraiei torevokotoa vai, uvare oirara rutu-a vuri irara.

<sup>11</sup> Ari ita, viapau oiso iraiei ira roroiovira rutu Pautoa-ia taraapareveira. Ora tapo viapau oiso irai epao ira Pautoa-re taraapareveira rerare rugorugoopaoro.

<sup>12</sup> Uvare oirara rutu-a oea Pautoa-re isivaaepa vuriara-ia pirooro. Viapau oiso vearoa vai purapaiveira. Oa iava viapau oiso irai epao voea iava ira vearoa vai purapareveira.

<sup>13</sup> ☩ Ari ita, voea vo reoroaro vuriara rutu eru geesi reoro, oiso rutu osa vao eruara vo geesipapeira tova urui-ia. Ari ita, voea gisipoaro iava kuuuu reoro kosipa piroveira vo oearovu keakeapasa. Oa iava voea vo reoroaro oearovu avupaiveira, oiso rutu osa tavuako.

<sup>14</sup> ☩ Oearovu tovipaiveira vurivira rutu vaavaavuuvira. Oa iava ikauvira rutu voea iava kasipua kosipa piroveira.

<sup>15</sup> ☩ Oire ra oearovu upopaiwe.

<sup>16</sup> Ora uvarovu rutu vokapaoro oearovu rutu varaaro tekipaiveira. Oire ra varapa rirovira siraopaave voeao oea varaaro-a.

<sup>17</sup> Viapau rutu oiso vao-ia taraipaaveira kave vovou vo pitupituaro.

<sup>18</sup> ☩ Ari ita, oiraopavira, viapau oiso Pautoa-re rugoopaoro rerapa ora avivikepaaeira.'

<sup>19</sup> Oire uva vigei oiso taraipavioveira Pauto voeaopa Jiu-pa irara Reo Taisi vatereva, oiso ra toupaive va sirova utupaooro. Oa iava viapau oiso irai voea iava uvuiparoi ra oiso puraparo, "Ragai-a torevokotoa rutu." Viapau rutu. Ari ita, oiraopavira voea rutu voeao uvarovu rutu tou irara oea va-ia vao Reo Taisi taraipaoro ora voea-ia taraipaaveira oiso, "Vigei rutu vao-ia vuri irara. Vigoa taru voria ouperea vo Pauto ruvara-ia, varao voriaro vigei varaaro vuri vovouro oavi." <sup>20</sup> Eake iava? Uvare viapau oiso iraiei ira torevokovira karekeroverea Reo Taisi sirova utuoro vo Pauto osireiaro-ia. Viapau. Ari voea oisi ragavira oiso oaravu-ia taraipavio va iava vao Reo Taisi, oire ra oisi ita ora vigei raga-ia taraipavio, ra oiso purapavio, "Oiraopavira rutu ita, vigei rutu vuri irara."

#### *Ro Ira Krais Oirao Piepareve Eera Ira Torevokovira Karekeroverea Pauto Osireiaro-ia.*

<sup>21</sup> Vosa eisi ragavira toupaive Reo Taisi, oire ra viapau oiso oisi ragavira va iava torevokovira karekepavio. Viapau rutu. Ari ita, uva oraivavuei vao oa roroiovira karekerevora Pauto oirara rutupa. Vao oa iava vo rigato epao vo Moses vo taisiaro Reo

⊗ 3:8: Ro 6:1   ⊗ 3:9: Ga 3:22   ⊗ 3:10: Sam 14:1-3   ⊗ 3:13: Sam 5:9, 140:3   ⊗ 3:14: Sam 10:7   ⊗ 3:15:

Ais 59:7-8   ⊗ 3:18: Sam 36:1

Taisi sovara-ia. Ora vo oearovu rutu profet irara vo rigatoroaro tapo sovara-ia, varao oara puraiva voari rutu tuariri. <sup>22</sup> Oiso osa vao-ia oa-ia vigei reesipareveira oiso purapaoro, “Torevoko irara voeao-ia” aue iava rara Jisas Krais oirao piepape. Oraiva eva oa oirara rutupa toupai. Oa-ia oisi eisi voea taru oiso pierevereia voeao oea Krais oirao piepaiveira rutu. Oa-a eva oa vituaro iava oirara rutu areiivira raga toupaiveira Pauto osireiaro-ia. <sup>23</sup> ♦ Oiraopavira rutu, oiso osa oirara rutu vuri vovou purapaiveira. <sup>24</sup> Oa iava oirara rutu tauaipaaveira Pauto vo Saraaro-ia koata arapa vore rera ruvara-ia. Ari Pauto vo siraoaro riroa rutu akukuvira oa vate ragapareveira vigeipa vo Jisas Krais vo kovoaro iavirava. Oire uva vo vatevatea vao-ia oa-ia vigei reesipareveira oiso, Torevoko irara voeao-ia, vorara va-ia vigei iava vuriara vera rovopareve. <sup>25</sup> ♦ Aue iava uvare Pauto Jisas vara piereva rera sipooro vigeipa kopioro korouua tavariosa. Oire uva va vituaro-a vao-ia vosa va oupasa Jisas oirao pie rovopape rutu, ra va iava Pautoa tapo ora agiagipavio. Uvare Pauto oirara rutu varaaro oisoa keke ragapareve vuri vovouro. Oa iava voeapa oisoa siraoparo rutu. Oire uva oisi-a oiso osa iava Pauto vo vovouaro torevokoa rutu viaevira karekeerao vo vokio. <sup>26</sup> Uva vo vokio viapau oiso oirara vo vovouroaro keke ragapareveira. Uva va-a eva oa vituaro iava oirara rutu oiso taraipaaveira, Ro-ia Pauto torevokotoa rutu. Ira voearore oiso puraparoveira, “Torevoko vovou irara voeao,” vo rara Jisas oirao pie rovopaise rutu.

<sup>27</sup> ♦ Oire uva eake vai rutu uvuipai ra oai purape, ra oai iava vo vaisi eva oupe oiso, Vii-a torevoko vovouto? Ra va iava vaguvira tavitavivio? Viapau rutu oiso oai epao. Uvare Reo Taisi rutu sirova utupavioveira, eke? Viapau rutu. Ari ae raga-ia oirao piea vao vigei vaaro. Oa raga-ia uvuipavieie ra vo vaisi eva oupe. <sup>28</sup> Oire uva oisi-a oiso osa iava uvuipavieie ra Pautoa tapo ora agiagipavio vearo vaisi ou rovooro, vo rara Jisas oirao pie rovopape rutu. Ari ita, viapau oiso uvuipapeira vosa Reo Taisi raga vo pitupituroaro sirova utupavio.

<sup>29</sup> Uva apeisi-a? E Pauto-a Jiu raga reraaro? E viapau oearovu rutu reraaro-a voeao ratau tou irara, raa? Ari oiraopavira rutu, ro-ia Pauto oirara rutu reraaro. <sup>30</sup> ♦ Pauto-a kataitoa raga rutu. Ira voearei rutu iava oearovu rutu reeresipareveira torevoko vovou irara ora rerapa vao raga iava oirao piea. Voearei rutu iava oiso, voeao iava Jiu-pa irara ora voeao ratau tou irara. <sup>31</sup> Oire uva apeisi ragavira? Reo Taisi veripape uvare vigei varaaro oirao pie vovouro va-ia Reo Taisi putepaivoi rutu? Viapau rutu. Ari ita, vo osa vao airepa raiva sirova utupaoro vao tapo Reo Taisi oirao piepape.

## 4

*Pauto Ebrahim Vaisireva Oiso, Torevokoto*

<sup>1</sup> Ro-ia Ebrahim Jiu-pa irara aaotoaaro, uvare rera-a voea vituaro rutu Jiu. Oire uva apeisi ragavira purapavieie rerare, uvare apeisi ragavira torevokovira karekero viropa?

<sup>2</sup> Uva apeisi-a? Torevokotoa rutu-a rera varao iava okovoroa rutu purareva, eke? Viapau. Vosa eisi vo kovoro purarevori, uvuipa ra ora vaisiaro rei piero. Oire ra va iava ora rera iava vara-ia evara ora rera iava riataroeri. Ari ita, uva viapau oiso uvuiparoepa ra oisi eisi piereve vo Pauto osireiaro-ia. <sup>3</sup> ♦ Uva Tugoropa Vuku oiso purapapeira, ‘Ebrahim Pauto oisoa oirao piepareve. Va-a vao oa iava Pauto rera vaisireva oiso, “Torevokoto.”

<sup>4</sup> Ari ita, oiso-ia vosa iravu iravupa oirato kovopareve, oire ra vo kovo-ia eva rera vaaro vori ouparo. Vo vorio-ia rera vaaro viapau oiso sirao voria vova rera reitoaaro rerapa. Viapau. Ari evo vori oisoa oupareve vao raga-ia rera vo kovoaro. <sup>5</sup> Oire uva rera-a eera ira oisoa vaisipareve Pauto oiso, Torevokoto, vo rara ora rera vo kovoroarore ovaupaoro Pauto raga oirao piepareve. Ari ita, Pauto raga oiso vigei vaisipareveira, Torevoko vovou irara, vigei vao vigoa vuriara purapapeira. <sup>6</sup> Ro-ia Devit ira tapo oiso reoreoreoepa va iava vao oiso-ia, Vosa voeao oirara oea Pauto oirao piepaive, oire ra voeaa varaaro oirao pie vovouro kekepaoro oiso voea vaisipareve, Torevoko vovou irara. Oa

♦ 3:23: Ga 3:22 ♦ 3:25: 1 Jo 2:2; Hi 9:14, 28; 1 Pi 1:19 ♦ 3:27: Ro 2:17, 23; 1 Ko 1:29-30 ♦ 3:30: Ga 3:8

♦ 4:3: Jen 15:6; Je 2:23

iava oisoa rorupaive rutu. Uva viapau oiso voea vo kovoroaro kekepaoro-a. Viapau. Ari, aue raga oirao piea vao voea vaaro. <sup>7</sup> ♦ Oiso vo rigato purareva Devit, ‘Voeao oirara oea rorupaive rutu, uvare voea iava vuriara rutu vera ovoireva vara ovau ovoioro rutu Pauto.

<sup>8</sup> ♦ Ora tapo rorupareve, ro ira varaaro vuriara kekepaoro Pauto viapau oiso vara vieipareveira vore tuepaoro utupa voki-ia.’

<sup>9</sup> Oire uva apeisi-a oiso osa puraroepa Devit? E voeao raga rorupaive oea ora voea iava oisoa rakari verapaave? Viapau. Eake iava? Uvare Ebrahim voari tuariri rutu Pauto oirao piereva rutu. Oire uva Pauto rera vaaro iava oirao piea eveioro oiso rera vaisireva Ebrahim, Torevokoto. Eisi osa visii tavitavipaavoi vo reo iava vo Tugoropa Vuku-ia.

<sup>10</sup> Oire uva apeisi-a? AA vo vuutao rutu iava vo voki-a vao oa-ia oisi Ebrahim vaisireva Pauto? Uva oisi rera vaisi rovorevoiva, ora rera iava utupavira rakari torevoko vovouepa, eke? Ari! Osa-a eisi. <sup>11</sup> ♦ Iu ita, oa-a eva isivaaro rutu iava rera iava rakari veraaepa reesia puraoro. Oiso ra va iava oiraopavira karekepe vo vaisio oa-ia Pauto rovovira oiso rera vaisireva Ebrahim, Torevokoto, vo osa ora rera iava rakari vera asavira toureva. Oire uva eisi osa ragavira piereva Ebrahim, Voeao ratau tou irara aitetoaaro. Voeao oea ora voea iava viapau rakari verapaaveira. Uva oisi-a oiso osa iava voea varaaro raga iava oirao pie vovouro voea vaisipareveira Pauto oiso, Torevoko vovou irara. <sup>12</sup> Oiso-ia tapo rera ro Ebrahim Jiu-pa irara aitetoaaro toupareveira, voeo oea oisoa rakari verapaave. Ora voeo tapo Jiu oea Pauto oirao piepaiveira. Uva oisi-a eisi osa pie rovoreva Ebrahim Pauto oirao pie rovooro, oa iava ora rera iava rakari veraroepa utupavira.

#### Reo Ovoi Vatereva Voeaopa Oirao Pie Vovou Irara

<sup>13</sup> ♦ Pauto Reo Ovoi purareva Ebrahim-pa ora voeao rera aao iraraaro utupa irara. Vao oa-ia oiso puraroepa, “Ragai visiipa vo rasio rutu vateavere rara, ora voeao vii aao iraraaro utupa irara.” Ro Ebrahim ira oisoa Reo Taisi rutu sirova utuparo. Oire uva viapau oiso va vituaro-a vao-ia oa iava Pauto rerapa Reo Ovoi purareva. Viapau. Ari oirao piea raga-a rera vaaro oa vituaro iava va vao vearo vaisi rutu oureva Pauto ruvara iava Ebrahim. <sup>14</sup> Oire uva apeisi-a voea iava voeao oea reo ovoi ouiverea? E voea raga va sirova utupaaveira va vao Reo Taisi, eke? Oire vosa oisi oiso toupaive, ra akukuvira raga oeavu Pautoa-ia oiraopa vaisi purapaise. Ra va iava viapau Pauto vaaro Reo Ovoi viapau akaipavira rutu toupaive, raa? Ari! <sup>15</sup> ♦ Uva viapau oisi eisi toupaiveira. Eake iava? Uvare va-ia vao taraiipavioveira Reo Taisi oa oiso purapapeira, “Voeao oea vuriara purapaise oarava uvuivira ita vara voriaro ouiverea.” Ari vosa viapau oisi eisi Reo Taisi vaieri, oire va iava viapau oiso ra irai ragaire oiso puraparo, “Vuriara puraparivoi. Oa iava vii vaaro voria ouriverea rara.”

<sup>16</sup> Oire uva va raga vao Reo Ovoi vituaro oirao piea. Oiraopavira rutu, uva viapau oiso va vituaro-a vao varao-ia vigei vo kovoroaro. Vosa va vituaro oisi oiso toupaive, uva viapau oiso akukua vatevatea vao-ia Reo Ovoi Pauto vaaro. Ari ita, oiraopavira oiso osa varao uvuipavieie ou rovopape vo Reo Ovoi iava vao Pauto vaaro rara Pauto oirao pie rovopape, oiso osa Ebrahim oisoa pie rovopareve voari tuariri, uvare Ebrahim-a vigei rutu aitearo. Vigoa Reo Taisi sirova utupavioveira, ora voeao oea Pauto oirao piepaiveira oiso rutu osa oisoa piepareve Ebrahim. <sup>17</sup> ♦ Aue iava uvare oiso purapapeira Tugoropa Vuku, ‘Ragai vii oiso pieava osararovu rutu aitearo vii.’ Oiraopavira rutu vigei vao-ia Ebrahim ovii iraraaro vo Pauto osireiaro-ia, ro Pauto ira oisoa oirao piepareve Ebrahim. Oa vao Reo Ovoi oirao pierevere vo utupaua Pauto. Aue vituaro iava uvare rera raga uvuiparoveira rutu voeao kopii irara vorevira tore piepasa vova tova uruiro-ia. Ora varao tapo oara-ia viapau uvuipaai oearovu oiso ra vara kekepaive, rera raga uvuipa oara karekepasa roroiovira. Rera ro vigei reraaro Pauto ira oisi oiso toupareveira.

<sup>18</sup> ♦ Rera ro Ebrahim ira avuka ragaroepa kakae kavau asavira raga. Uva oisoa touvira rutu tueparo Pautoa raga oirao piepaoro oiso purapao, “Rera raga ragai vaterevere rara kakaetao vai.” Uva va-a vao vituaro iava oisoa vao Reo Ovoi oirao piepareve rutu

✉ 4:7: Sam 32:1-2    ✉ 4:8: 2 Ko 5:19    ✉ 4:11: Jen 17:10; Lu 19:9    ✉ 4:13: Jen 17:4-6    ✉ 4:15: Ro 3:20, 7:8, 10, 11    ✉ 4:17: Jen 17:5; 1 Ko 1:28    ✉ 4:18: Jen 15:5

oa vatereva Pauto rerapa. Vao oa-ia oiso puraroepa, “Vii-a Ebraham, osararovu rutu aitearo.” <sup>19</sup> ♦ Oire uva vo vuuta-a vao oa-ia Ebraham katai vovoto ivaro (100) iare uvuisa tutuureva. Oa iava oiso puraroepa ora rerare, “Avoeao, avuka ragarai ragaivi. Uva kopiisa tutuuavoi. Vegei avukarei rutu ora vatuava oaa o-ia Sara. Iria viapau uvuipaoi oiso ra kakaetao vai kavaueve.” Uva oisi ragavira toupaoro goruvira oisoa va raga vao Reo Ovoi oirao piepareve, oiso ra va iava kakaetao vai kavaureve. <sup>20</sup> Oire uva va raga-ia vovoupaoro vao Reo Ovoi viapau oiso rera vaarore oirao piea oisoa ovauparo. Uvare va-a vao oirao piea oa rera vo rugorugooaro goru pieva rutu. Oa iava Pautoa-ia vuurapa vaisi purareva rutu. <sup>21</sup> Ari ita, goruvira rutu va vao Reo Ovoi oirao piereve rutu. Oiso ra Pauto rera vaaro rerapa va oiraopavira kareke piereve rutu, uvare viapau oisoa vakuvakuparo rera ia Pauto rera Ebraham. <sup>22</sup> Oire uva va-a eva oa vituaro iava Pauto rerare oiso puraroepa, “Torevoko vovoutoa rutu vii Ebraham.” Uvare oisoa rera vaaro kekepareve riro gorua oirao piea rera vaaro.

<sup>23</sup> Oire uva vo reo-a vao oa rigatoiva rera iava Ebraham oiso, ‘Pauto rera vaisireva oiso, Torevokoto vearto.’ Uva va vao oiso puraoro viapau oiso rera raga iava oiso vo rigato puraiva. <sup>24</sup> Ari ita, vo reo toupaiveira vigei rutu iava, vigoa vaisirevereia Pauto oiso, Torevoko vovou irara. Aue raga iava vo rara rera oirao pie rovopape rutu, ro-ia Pauto ira Jisas kopiia iava vorevira tore piereve. <sup>25</sup> Pauto rera eakareva viurupa irara vavaearo-ia, oiso ra kopiilo vigei varaaro vuriara voriaro ouoro. Uva va-a vao oa iava vorevira toreroepa, oiso ra va iava eva Pauto tapo ora agiagipavio oiso rutu toupaoro, Torevoko vovou irara rutu.

## 5

### *Pautoa Tapo Ora Agiagipavio Vo Rara Jisas Oirao Pie Rovopape*

<sup>1</sup> Oire vo osa Pautoa tapo ora agiagi rovopavio rera vaaro Reo Ovoi oirao pie rovopaporo, oa iava gavaurea-ia rera tapo toupapeira. Vo uvare Jisas Krais vigei Turaroaro va eva kasipua opesi pierevora. <sup>2</sup> ♦ Oa vao purarevorao Jisas vigeipa. Ari ita, uvui iraopavieia Jisas oirao piepaoro vereopa vovou oupape vo Pauto ruvara-ia. Uva evo vovou oupaoro tootoopavioveira vokiara rutu-ia. Oa-a vao oa iava roru iraopapeira vo vuutaore tuepaoro, oa-ia Pauto tapo toupaperea rera vo vovouaro rutu sirova utupaoro oiso rutu osa rera. <sup>3</sup> Ora varao tapo sirao vovouro vo tavakaroaro oara-ia tapo roru iraopape. Uvare varia-ia tarai iraopavioveira oiso, Oara vearpapeira vigeipa. Eake iava? Uvare varia-ia vo siraoaro kaepaoro uvuipavieia ra raverave asavira goru visivi rutu vokapape. <sup>4</sup> Oire vosa oisi eisi toupaperea osa Pauto vigeire vo reo purarevereia oiso puraoro, “Vearopai rutu uvare oisi eisi piepatavoi.” Oire vo osa vo reo-ia taraipaoro rutu, oa vigei varaaro oirao pie vovouro goru piepaiverea rutu rerare tuepaoro. <sup>5</sup> ♦ Oiraopavira rutu, uvare viapau oiso akukuvira oirao piepapeira rerare tuepaoro. Viapau. Uvare Pauto riroa siraoa vate ragarevora vigeipa ro-ia Tugoropato Uraurato ira-ia vigei iava sopaura agasi pierevora rutu. Ro-ia Tugoropato ira-ia Pauto vigeipa sirao vate purarevora.

<sup>6</sup> ♦ Vo vuuta-a eva oa-ia viapau oisoa vigei raga uvuipavio ora tauvapasa, vao oa-ia Pauto vo vokio reesireva oa-ia Krais arureva vigeipa kopiisa vigei vao vuri irara. <sup>7</sup> Oire vo osa irai oiso puraro, “Vosa oeai ragai roro pieive ragai reesioro oiso ra iravu vearto vo tavukiaro ouoro rerapa kopiira. Avoeao, uva siraovira rutu-a. Uvare reasiparai oisi pie arapa. Eari vai pasi, irai vai uvuiparoi ra oisi piereve. Irou vai ira-ia taraipai?” <sup>8</sup> Ari ita, Pauto riroa rutu siraoa purareva vigeipa ro-ia Krais, ira vigei vo tavukiaro rutu oureva kopiioro vigeipa vao-ia riro vuri vovouro pura irara. <sup>9</sup> Uva vigei-a vao vigoapa kopiiloepa rera Krais. Osa iava uvuipavieia ra Pauto tapo ora agiagipavio. Ora rera ro Krais ira vigei virivariparevereia Pauto vo kasipuaropa. Ra va iava utupaua viapau oiso vigei ouve ita va. <sup>10</sup> ♦ Voari tuariri rutu uva oisoa rera tapo ora keripavio. Oa isivaaro iava rera tapo ora agiagiviera uvare Oviito Jisas vigeipa kopiiloera. Uva oisi-a oiso osa toupaoro oiso rutu toupapeira, Pauto vate iraraaro vigei. Ra vao-ia tapo vearovira tarai iraopavio rutu oiso, Jisas vigei oriruparevereia vigei tootoo piepaoro ae iavirava rera vaaro tootooa. <sup>11</sup> Lu ita,

♦ 4:19: Jen 17:17; Hi 11:11   ♦ 5:2: Ef 2:18; 1 Ko 15:1; Hi 3:6   ♦ 5:5: Fl 1:20; Ef 1:13   ♦ 5:6: Ga 4:4; Ro 4:25

♦ 5:10: Kl 1:21-22; 2 Ko 5:18

uva viapau oiso orirua raga-a oa-ia rugorugoopavioveira. Ari vao tapo-a riroa rutu rorua oa oupapeira. Vo roruo oa sovopapeira ora vigei-ia, vo rara vokiara rutu-ia Pautoa tapo ora agiagipavio. Ro Jisas Krais vigei Turaroaro ira vearo vovou-ia vituparoveira rutu.

*Adam Ira Kopiia Rovoreva, Ari Krais Ira Oiraopa Tootoo Rovorevora Vigeipa*

<sup>12</sup> ♦ Oire uva vo rovoa-ia iravu oisoa toupareve ira kopiia rovoreva Adam. Oa-a vao vituaro vuri vovou vo voriaro karekeepa vao-ia kopiia. Uva oisi ragavira oirara rutu-ia poupa piroveira kopiia, uvare oirara rutu vuri vovou purapaiveira. <sup>13</sup> Uva vuri vovou purapaoro oisoa toupaive oirara rutu. Oire uva Moses vo vuuta-ia voeare kavauroepa. Oa iava riroroiva, vao Reo Taisi purareva voeapa. Ari ita, voari tuariri uva oisoa va-ia vao vuri vovou toupaive vo osa viapau Reo Taisi vaiva toupaive. Uva viapau oiso Pauto voea varaaro vuri vovouro oisoa vieipareve. <sup>14</sup> ♦ Oire uva vo vuuta vao Adam vaaro oa iava vo tuguraepa Moses vo vuutaaro-ia, oa-ia oirara oisoa kopii ragapaave. Uva viapau oiso oisoa piepaive oiso osa ro-ia Adam, ira Pautoa-va kaureoroepa rutu vuri vovou rovooro rutu. Va vao purareva rera Adam ovoovovira. Oa iava Jisas rera isivaaro-ia karekeroepa kavauoro oavu ita ovoovoa vituaro rovooro.

<sup>15</sup> Oire uva vaiterei-a vaitereo tasitoarei. Uva viapau oiso vaeavira rutu vaiterei-ia toupaiveira. Aue iava uvare Adam vaaro vuria viapau rutu oiso Pauto vo vatearo-a. Eake iava? Uvare riro irara rutu oisoa va-ia kopii ragapaave rutu. Ari ita, Pauto vaaro-a sirao vate, uvare riro irara rutu oirara vo sirao vao ou ragapaiveira rutu. Ari ro raga-ia Jisas ira vigeipa siraoparoveira. Ira vituparoi vao-ia oa iava Pauto vo sirao vate kareke pierevorao vigei-ia vo vokio. <sup>16</sup> Oire uva rera vo voriaro Adam oa oureva rera vaario-ia vuria vo voriaro, pisa vorivi rutu vaopa Pauto vaaro riroa siraoa. Aue vituaro uvare kataia rutu vuria riroa rera vaaro kekeoro rera rovirieireva. Oa iava rerare oiso puraroepa Pauto, “Vuritoa rutu vii Adam.” Ari ita, vigei rutu varaaro riroara vuriara. Ovusa vigeipa riroa rutu vate rovopareva siraoa. Oire va isivaaro iava oiso vigei vaisipareve, Vearo irara rutu. <sup>17</sup> ♦ Oiraopavira rutu Adam vaaro vuria oa iavirava kopiia vo goruaro varivariaro karekepapeira vo oirara rutu-ia. Rera raga iava ro-ia Adam. Ari ro-ia Jisas Krais ira vaaro pute pievira rutu toupaiveira. Uvare va purareva vigeipa oa-ia riroa rutu vatevatea siraoa oupapeira. Oa iava oiso vigei vaisipareveira, Torevoko vovou irara. Ra va iava vo toupapeira tootooa vo goruaro-ia, uvare rera raga Krais ira Oiraopa Tootoo rutu vatepareveira.

<sup>18</sup> Kataitoa raga vaaro iava vuria vo tavakaaro kosi piropa oirara rutu iare. Uva ita, kataitoa raga Jisas ira vuriara vo tavakaaro opesi pieoro tootooa vaterevora oirara rutupa. <sup>19</sup> Uva oisi-a oiso osa iava riro irara rutu vuri irara oisoa toupaive, uvare kataitoa raga Pautoa-va kaureoroepa Adam voari rovoa-ia vuria rovooro. Uva oisi ragavira ita vigei rutu riro irara uvuipavieie ra vearo vaisi oupape, uvare kataitoa raga ita Jisas Pauto vo ruipaaro sirova uturoepa.

<sup>20</sup>\* Va-a vao-ia Reo Taisi oa ora kareke rovoepa rutu voari tuariri, oiso ra va iava oirara rutu ora eveipaave ora voea raga. Ra va iava oiso purapaave ora voeare “Oiraopavira vuri irara rutu vigei.” Uva va-a vao oa vituaro iava vuri vovou ora rigaaepa oirara rutu iare. Oire uva oisi raga ita Pauto vaaro vereopa vovou oa pute pievira rutu ora rigaerao rutu. <sup>21</sup> Uva vuria vo goruaro oisoa oirara tokipaise voeapa reipaoro. Vao oa vituaro iava oisoa kopiipaave. Ari vao Pauto vaaro vereopa vovou oa-ia uvuipaii ra vearo tauva rutu oupaise torevoko vovou purapasa. Aue iava uvare Jisas Krais toupare vo vokio, ira Pauto vaaro vereopa vovouro roroioreva rutu. Vao vereopa vovou oa iava vigeipa siraoparoveira rutu vigeipa Tootoo Ovoi vatepaoro. Vao oa-ia vituparoveira rera Jisas Krais vigei Turaroaro.

♦ 5:12: Jen 2:17, 3:6, 19 ♦ 5:14: 1 Ko 15:22, 45 ♦ 5:17: 2 Ti 2:12; Re 22:5 \* 5:20: Ga 3:19; 1 Ti 1:14 uvare rerare tuepaoro rariapavioveira rera oirao piepaoro rutu. Oire uva eake-a vo reo vao porearo, raria? Oreoa porearo-a vao-ia oiso toupaiveira, Tuepata varaore oara visiipa touvira karekepere. Ari ita, vo osa ro ira iare oisi orekevu kareke, oire ra viapau oiso vovouparo rariaporo ita, “Oa ouavere tou visivi.” Viapau, eva ita oa rerapa kareke ovoierao.

*Vigei Rutu Kopiiviera Krais Tapo*

<sup>1</sup> Apeisi puravio vao iava? E uvuipavie i ra oaravu ita vuriara purape, ra va iava vorerivira Pauto vara ita verareve ora rera vo siraoaro riro pieoro? <sup>2</sup> Viapau rutu. Uvare oiso rutu toupapeira osa voeao kopii irara, oea viapau uvuipaaveira oiso ra vuriara vai purapaive. Uva apeisi-a? E uvuipavie i ra oisi eisi toupaoro vuri vovouro vai purape vokiara rutu-ia, eke viapau? <sup>3</sup> Uva va-ia tarai iraopata oa-a vao-ia baptaisa vituaro rutu oiso, vo osa baptaisa ouepa va-ia ora reesioro oiso, kataivira rutu toupaei vigei rutu Krais tapo ora tavosipaoro. Oire uva oisi raga ita-a eisi osa ora reesiviepa ita oiso, oisi raga kataivira rutu rera tapo kopiiro. <sup>4</sup> ♦ Oire uva va-a vao-ia baptaisa vituaro porearo oiso-ia, Vo osa Krais kopiiloera, oire uva vigei tapo rera tapo kopiiiviera. Oa iava vigei tapo ita tovaivora rera tapo. Oa iava vorevira rera tootoo pieoro rera tore pierrevora Pauto riroa iava gorua vao rera vaaro. Uva oisi ragavira-a eisi osa iava uvuipavie i ra airepa tootoo-ia vokapape.

<sup>5</sup> Oire uva va-a vao osa rera tapo kopiiiviera, uva vorevira toreroera. Oa iava vigei tapo ita ovoovovira toreviera rera tapo. Oa-a eva oa iava airepa tootoo oupapeira. <sup>6</sup> Oiso va-ia taraipavio osa rera evao parikou-ia tapaiva vigei varaa rera tapo vuri vovouro. Uva va vao vuria vo varivariaro oa vigei oiso tuukepaise, osa iava vigei iava toko ovoi piropa. <sup>7</sup> Vosa irai oiratoa vai kopiiro, ra viapau oiso touvira viria vo goruaro sovara-ia toupareve. Viapau. Ra aa vao iava? Ovarivaria eva toko ovoi piropa rera iava, ro ira kopiiro.

<sup>8</sup> Uva oisi ragavira vigei varaa rera tapo vuri vovouro rera tapo Krais touepa kopiiro evao parikou-ia. Eisi osa iava uvuipavie i ra oiraopavira rutu rera-ia raripavio, oiso ra rera tapo toupaoro tootoopaviovere vo vokio ora vo utupaua. <sup>9</sup> ♦ Taraipavio oiso-ia, Krais vorevira kopiiia iava toreroepa. Uva viapau uvuiparo ita ra vorevira kopiiro ita. Aue vituaro uvare viapau oiso kopiiia vo varivariaro sovara-ia touparevoi. <sup>10</sup> Oire vo osa Krais kopiiloepa, uva va-a eva oa-ia kopiiia vo varivariaro toko ovoireva va opesi pie ovoioro. Oa iava viapau uvuiparoi ra ita vorevira kopiiro. Uva vo tootooa-a eva oava touparevoi Pauto roru piepasa ora rera-ia. <sup>11</sup> ♦ Oisi-a eisi osa iava vearovira rutu ora visiire rugorugoopata oiso-ia, vigei kopii irara. Viapau oiso viria vo varivariaro-ia toupapeira. Ari ita, oiraopavira oiso toupapeira tootoo irara vigei, vo rara Krais Jisas tapo ora tavosipavio Pautoa-pa rorua kareke piepaoro ora vigei-ia.

<sup>12</sup> Oire vosa vuri vovou ita visii-ia rovosa ita auepape, oire ra vare koru ovoita. Ra oisi iava viapau oiso vo vovou sirova ututa. <sup>13</sup> ♦ Ora viapau rutu uvuipatai tapo ra ora visii varauraaro iava orekerovu avu vai iava vaseta, oiso ra vuri vovou eva sirova utupe. Ari uvuipatai ra ora visii iava varaura rutu vate ovoita Pautoa-pa ora visii iava sopaura rutu tapo. Oiso rutu ovoovooro oisi va purata osa ragavira kopiiia iava vorevira toretaera. Osa iava Pauto vo vovouaro sirova utupaoro vearoa purapataveira. <sup>14</sup> ♦ Oiraopavira rutua oiso osa vuri vovou vo varivariaro toko piropa. Uva viapau oiso uvuipai ra visiipa riropape. Eake iava? Uvare vao-ia Moses vo taisiaro Reo Taisi viapau visiipa reipapeira. Ari vao raga Pauto vaaro sirao vate, vao oa-ia tauvaa oupataveira.

*Vigei Oiso Toupapeira, Torevoko Vovoupa Kovopa Irara*

<sup>15</sup> Oire uva apeisi-a? E uvuipavie i ra vuri vovou purapape uvare vao Reo Taisi viapau vigeipa reipape, eke? Apeisi-a? Uvuipavie i ra viria purape, uvare sirao vatei vigei-ia vao Pauto vaaro? Asi viapau rutu oiso uvuipavie. <sup>16</sup> ♦ Visii taraipataveira vao-ia oiso-ia, Vosa kovopato vii, oire va iava vii reraaro vo reoroaro uvu iraopariveira, ro reito. Vosa oiso-ia rera-ia toupaeve vuri vovou, oire vii tavireve oiso osa va puraparivoi. Ra rera vaaro sirova utuoro oiso vo pitupitu purari viria. Eisi osa iava va voriaro ouriverea ita vorevira vao-ia kopiiia. Ari vosa ro-ia Pauto vii reitoaaro oisi vare oiso vii tavireve, “Vao purari,” oire uva va-a eva oa-ia vearoa ourivere va voriaro, rara va iava oiso vii vaisireve, Vearoto vii. <sup>17</sup> Uva uvuipavie i ra Pauto-ia vuurapa vaisi purape, uvare

❖ 6:4: Kl 2:12; Ga 6:15; Ef 4:22-24   ❖ 6:9: Re 1:18   ❖ 6:11: Ga 2:19   ❖ 6:13: Ro 7:5; Kl 3:5   ❖ 6:14: Ro 8:2; Ga 5:18   ❖ 6:16: Ro 11:2; Mt 6:24; Jo 8:34

voviri vuri vovouro sirova utupataera. Oa iava vo vokio ora tavaroei. Uvare visii iava rugorugooara agasierao rutu varao iava oiraopa siposiporo osiposiporoa outavora. <sup>18</sup> ♦ Ari ita, Pautoa raga ira visii iava vo tuuke karurevora vuri vovouro vo tuukearo. Uva vo vokio-ia rera raga toupare Pauto visii reraaro reito. Osa iava uvuipatai ra rera ragapa kovopata torevoko vovouro purapaoro. <sup>19</sup> Uva oisi ragavira reorai voeao-ia kovopa irara ae uvuioro. Auepa teapi oiso raga visiipa siposipopoar visii vavagisi piepaa. Ari ita, voviri tuariri ora visii iava vasetava. Oa iava vuriara rutu ora visii-ia purapatavora vearo pitupitu pura arapareasipaoro. Uva vo vokio-ia uvui iraopatai ra rugorugooara oavisii tavaroei. Oa iava ora visii iava ita vasepatavere oiso ra vearo pitupitu sirova utupata Pauto vo ruipaaro rutu purapaoro.

<sup>20</sup> Vo osa rovovira voari toupatavora, uva oiso rutu toupatavora, Vuri pitupitupa kovopa irara visii. Uva oisi toupaoro viapau oiso uvuipataera ra vaore vearo raiva rugoopata. <sup>21</sup> Ari ita, osararovu rutu vuriara pura rovotavora. Oire uva vara-a evara oara iava ariitai ita. Uva eake rutu-a vao oa outavora vara iava evara? Viapau rutu oiso oavu avu vaiei vara iavirava evara, uvare vuriara vo voriaro-a ae kopii raga. <sup>22</sup> ♦ Oa iava vuria vo varivariaro karu pirorao rutu. Oa iava vuria kavuoro oiso toupatavoi rutu, Visii Pautoa-pa kovopa irara. Uva ora visii iava vovouisiro oavisii rutu iava vearoa purapatavere, uvare Tootoo Ovoi rutu vituaro-a va vao-ia. <sup>23</sup> ♦ Oiraopavira rutu, oa-a vao rera vo voriaro ro oirato oa oureverea rera vaaro vuria vo voriaro vao-ia kopii ovoi. Ari Pauto vao riroa rutu sirao vate Tootoo Ovoi akukuvira vate ragapareveira. Oa vitupai ro vigei reraaro Turaro Jisas Krais.

## 7

*Ovoovo Reoa Vao Reo Taisi Aviavi Piepa Reo*

<sup>1</sup> Araoko irara oaa, vo reo-ia oa purapaavoi visiire oiso-ia, vao-ia Reo Taisi vearovira taraiptaveira Moses oa purareva. Oreoa-ia oiso ragavira taraiptaveira voeao vo reoaro oea epao oea tootoovira toupa. <sup>2</sup> ♦ Oiso ragavira oa-a vao goruvira toupaiveira reo goru o-ia riakova iria valuato tapo toupaevae, vo osa tootoovira toupasi vo avukarei rutu. Ari ita, vosa oira arova kopiilo, oire ra viapau oiso reo goru sirova utuo ita. <sup>3</sup> ♦ Uva vosa rerava valuato toupaoro iravu ragava toupaevae, oire ra va iava oira-ia ora reopao oearovu oirare oiso purapaave, “Avoeo, otopava-a o-ia.” Ari vosa valuato oira rareo kopiilo, ra va iava viapau oiso va eva reo goru gasieve vo osa iravu raga oueve.

<sup>4</sup> Oa-a vao oa oisi oiso toupaiveira visiipa vao-ia, araoko irara oaa. Aue iava uvare visii-a vao visiigoa kopiitaera Krais tapo ovoovovira oiso osa Krais vo evao parikou-ia kopiiloepa. Oa vituaro iava viapau oiso visiipa Reo Taisi reipapeira Moses vaaro. Visiigoa oiso rutu toupatavera osa voeao kopii irara, oea viapau Reo Taisi uvupavie. Uva vo vokio-ia oiso rutu toupatavoi, rera voeao ro-ia Krais airepato visii valuatoaaro. Ro Krais ira kopii rovoroiva, vorevira toreroepa. Uva rera tapo torepaooro vorevira kopiia iava uvuipavie ra vearo vovouro purapape vo rasio-ia vao sirova Pauto vo ruipaaro utupaoro.

<sup>5</sup> ♦ Vo osa voviri tou rovopaeora ora vigei vo ruipaaro raga-ia vuriara purapaoro, oa iava vao Moses vaaro Reo Taisi vara vuriara roroiovira kareke piepavira. Osa viapau vao Reo Taisi vigeire oisoa korupape vuri pitupituro purapa arapa. Oa iava oisoa vo pitupitu vuriara purapape vo rasio-ia vao sirova vuri vovou vo goruaro utupaoro vore kopii ovoipasa. <sup>6</sup> ♦ Oire uva vo vokio-ia viapau oiso Reo Taisi vigeipa reipaerao. Oa iava tuukea karu pirorao, vo uvare va arova kopiiviera. Uva vo vokio-ia kovopae viapau oiso vao-ia tuariripa Reo Taisi. Viapau. Ari vao-ia airepa raiva vao oa karekerevorao Tugoropato Uaurato vigeipa.

*Vuria Vo Pitupituaro Oa Vigei Vuri Pieva*

<sup>7</sup> ♦ Oire apeisi vovoupaviera vare vao Reo Taisi? E vuria-a? Viapau. Asi vearoa. Ari ita, oa-a eva Reo Taisi oa raga ragai taraivora vaopa vuria vo pitupituaro. Vao-ia osa oiso

♦ 6:18: Jo 8:32; Ro 8:2   ♦ 6:22: 1 Ko 7:22   ♦ 6:23: Ro 5:12; Ga 6:7-8   ♦ 7:2: 1 Ko 7:39   ♦ 7:3: Mt 5:32

♦ 7:5: Ro 6:13, 21; Ga 5:19; Je 1:15   ♦ 7:6: Ro 2:29; 2 Ko 3:6   ♦ 7:7: Eks 20:17; Diu 5:21; Ro 3:20

purapapeira Reo Taisi, "Opeita iravu varaaro riiriipari." Oire vosa viapau oiso purapaeri, oa iava viapau ragaire vo ruipa eva karekeeri iravu raga varaaro riiriisa. <sup>8</sup> Uva va vao vuria orekerovu riiriipasa oa raga ragai soporeva rutu. Oa iava oiso rugorugooraepa, ra opitupiturovu rutu puraa orekerovu riiriipasa oa iava tavitavipai Reo Taisi. Oa iava Reo Taisi raga oiso ragai pieva ra vuria puraa. Iu, vosa viapau Reo Taisi vaieri, oire ra viapau oiso vuria oisi opitupitui purapavori. <sup>9</sup> Ari ita, voari rutu tuariri uva oisoa toupaa Reo Taisipa sopaipavira rutu. Oa-a eva oa iava oisoa tootoovira rutu toupaa. Uva Reo Taisi-a vao oa-ia tarairaiva, ora ragai varaaro-ia vuriara atereraeo vo uvare riroerao rutu oa vituaro-ia oiso rutu touavora, Kopiito ragai. <sup>10</sup> ♦ Ari ita, Pautoa raga ira Moses-pa Reo Taisi vate rovoreva. Oiso ra va iava oirara rutu tootoovira touive Reo Taisi sirova utupaoro. Uva va iava vao Reo Taisi taraia ouava. Uva va-a raga eva oa ragaipa kopiia vateva. <sup>11</sup> Oa vaaro-a vao vuria-a oa ragai keakeava vavo reoaro iava vao Reo Taisi. Oa vituaro iava tuukera viropa rutu. Oire uva vuria vo voriaro ouavorao vao-ia kopiia. <sup>12</sup> ♦ Oiraopavira rutu, eva Reo Taisi Pauto vaaro rutu. Torevokoa rutu vearoa oa rigatoreva Moses.

<sup>13</sup> Oire uva apeisi-a? Vearo reoa va vao-ia oa ragaipa kopiia sipova, eke? Viapau rutu! Asi vao raga vuria vo pitupituaro oa sipova. Va raga iava vao vearo reo oa vao vuria vateva kopiia ragaipa. Auere oiso ra viaevira rutu vuria vo pitupituaro karekepe. Oire ra va-ia taraipaoro vao Reo Taisi vuri vovou vo pitupituaro eveipape oiso purapaoro, Vuri-a vao-ia vuri vovou vo pitupituaro.

#### *Vo Ruiparei Iava Vareo Oarea Oiratoa-ia Ora Itopapeira*

<sup>14</sup> Taraipavioveira vao-ia Reo Taisi urauraropa oa vaterева Tugoropato Uraurato vigei iava urauraropa vearoa rugooa vatepasa. <sup>15</sup> ♦ Uva va-a eva vituaro iava vavagisi iraoparaerao oiso auepaoro, Eakere oisoa oiso vo pitupituro ragai varaaro? Oisopa osa varao oara pura ruipa ragaparaveira, osa viapau oisi vara purapaa. Vo osa varao raga purapaa oara pura arapa reasipara, uva vara raga purapaa evara vo vokiara rutu-ia.

<sup>16</sup> Oire vosa oisi ragavira oiso va puraa oiso osa va pura arapa reasipara, oire ra va iava vao Reo Taisi eveia, ra va iava oiso auera, Vearoa vao-ia torevoko reo oa oiso purapai "Opeita varaao purapari." <sup>17</sup> Oire uva viapau oiso ragai raga-a vao ragoa varao purapaaveira oara pura arapa reasiparaveira. Viapau. Vao raga vuri vovou vo pitupituaro raga oa oisi oiso ragai piepaiveira, oa vo toupaiveira ragai sopaaro-ia. <sup>18</sup> Uva oiso ragavira rutu ora ragai-ia taraiparaveira, Viapau oiso ragai-ia vearoa vai epao, uvare rasito raga iava ragai. Oa iava raverave iraoparaveira. Ra viapau uvuiparai varao sirova utupasa torevoko vovouro, oara vo toupaiveira ragai sopaaro-ia. <sup>19</sup> Oiraopavira rutu viapau oiso varao purapaaveira vearopara oara pura ruipa ragaparaveira. Ari varao raga purapaa vuriara oara pura arapa reasipara. <sup>20</sup> Oire vosa varao raga purapaaveira evara vuriara varao oara pura arapa oiso reasipara, opitupitua vituaro rutu-a vao-ia vuria, oa vo ragai sopaaro-ia toupaiveira.

<sup>21</sup> Oire uva oiso ragavira rutu toupaaveira, vo osa vearoa purapasa auepara, ovusa vuria tutuu pieve ita ragai iare ragai vo ruipaaro piro piepaoro. <sup>22</sup> ♦ Ari ita, ragai vo ruipaaro vaopa ruipa iraopapeira Pauto vaaro Reo Taisi. Oiso ra ragai vaaro-ia rugooa tou iraopaise. <sup>23</sup> Vosa vouao varaua ora ragai iava eveipaa oiso vouao-ia oavuei reo goru oa vo rugoova ora upopapeira, oa sirova ruipa ragaparaveira. Oa-a eva vao-ia reo goru oa ragai iava varaua-ia toupaiveira, oa eva vuria vo vovouaro goru piepaoro rutu ragai tuukepaiveira. Oa iava oiso rutu vapa toupaaveira ragai, Vapa kovopato vuri vovou, vo rara va sirova utupara. <sup>24</sup> ♦ Avoeao, siraovira rutu uvare vuritoavi rutu-a ragai. Vouao-ia varaua ragai iava oua-ia iroutoa vai uvuiparoi ra voua tuuke piereve. Ra oisi iava viapau oiso ra ovoiei kopiia iare ragai topapaise varaua. <sup>25</sup> ♦ Uva ro raga ita Jisas Krais vigei reraaro Turaro, ira raga-a ira uvuiparoveira ragai tauvapasa. Oa iava rera iava Jisas Pauto-ia vearo vaisi purapaaveira. Uva oisi-a oiso ragavira toupaaveira oiso, Vova ora ragai iava sopaua-ia uvava Reo Taisipa ruipapaoro va sirova utuparaveira Pautoa-re rugorugoo iraopaeoro. Vo osa varaua vouao ragai iava oiso toupaive, Kovopato vuri vovou vo pitupituaropa.

❖ 7:10: Lev 18:5; Ro 10:5; Ga 3:12    ❖ 7:12: 1 Ti 1:8    ❖ 7:15: Ga 5:17    ❖ 7:22: Sam 1:2; 2 Ko 4:16    ❖ 7:24: Ro 6:6, 8:2    ❖ 7:25: 1 Ko 15:57

*Pauto Reraaro Tugoropato Uraurato Ira Vigeipa Tootooa Vatepareveira*

<sup>1</sup> ♦ Vosa kataivira rutu rera tapo Jisas Krais toupape, oire ra va iava viapau Pauto vigei togapareve reoara vai-ia. <sup>2</sup> Vo rara Oiraopa Tootoo rutu oupape rera tapo Jisas Krais, uvare Pauto reraaro-a Uraurato vo reo vao-ia purareva oiso puraoro, “Visii karukaruavoi vuriara arova varao oara visii tuukeva kopiia-ia. Oiso ra oiso rutu toupata, Ragai vo reoaro tapo reipai visiipa.” <sup>3</sup> ♦ Vigei vao-ia oirara viapau oiso uvuipavioveira ra Moses vaaro Reo Taisi sirova vearovira utupavio. Oa vituaro iava viapau oiso uvuipapeira va vao Reo Taisi vigei torevokopasa vigei virivaripaoro. Uvare Pautoa raga-a ira uvuiparoveira vigei rutu virivaripasa. Pauto ora rera Oviitoaaro kataitoa rutu siporeva vo rasio iare, oa iava oiravira kavauroepa. Uva kopiroepa vigei vaaro vuria vo voriaro ouoro. Uva va-a eva vuria oa vo pitupituroaro-ia puteoro rutu vigei karukarureva vova vuria-ia. Osa iava viapau oiso vigeipa reipapeira. <sup>4</sup> Vao-ia Moses vo reoaro oa eva torevokopai. Uva uvuipavie oiso ra varao purapape oarare tavitavipapeira vo reoa vao-ia Reo Taisi, vo rara Tugoropato Uraurato vo tavitaviaro sirova utupaoro vo rugorugooroarropa reasipavio ora vigei varaaro ragapa.

<sup>5</sup> Aue vituaro uvare voeao oearoa varao raga purapaiveira oara ragapa ruipapaave rutu, evoea-a oea varao ragare rugorugoopaaveira rutu oara voea ragapa karekepape. Vo osa voeao oea Tugoropato Uraurato vo tavitaviaro sirova utupaave, oea-a evoea varao ragare rugorugoopaaveira vara purapasa oara-ia rorupareveira Pauto. <sup>6</sup> Vosa varao raga-ia rugorugoopavio oara vigei ragapa karekepapeira vo rasio-ia, oire uva vara voriaroei ita vao-ia kopii ovoi. Ari vosa vaore rugorugoopavio Tugoropato Uraurato vo ruipaaro sirova utupasa, oa-a eva ovoiaroei vao-ia oiso-ia, Tootoo Ovoi ora gavaurea. <sup>7</sup> Vosa ro ira oiso vara purapareve ora rera raga varaaro reugoopaaro, uva rera-a eera ira oiso toupare, Pautoa-va keripato. Aue vituaro uvare viapau oiso Pauto vaaro Reo Taisi sirova utuparoveira. Oiraopavira rutu, uvare viapau oiso uvuiparoveira, oiso ra va vao Pauto vaaro Reo Taisi sirova vearovira utuparo <sup>8</sup> Iu ita, uvare voeaa-evoea oea ora voeaa raga vo ruiparoaro sirova utupaaveira vo rasio-ia, evoea oea viapau oiso uvuipaaveira ra Pauto roru piepaive ora voeaa-ia.

<sup>9</sup> ♦ Vo osa visii viapau oiso purapataveira ora visii raga vo ruiparoaro sirova utupaoro. Ari visii Tugoropato Uraurato vo ruipaaro sirova utupataveira, vo osa oisi oiraopape rutu oiso, Tugoropato Uraurato visii sopaaro-ia toupareveira. Oiraopavira rutu ro iava oirato ira-ia viapau oiso toupareve Tugoropato Uraurato ro Jisas reraaro, uva rera-a eera oirato viapau oiso Krais reraaro-a. <sup>10</sup> ♦ Visii iava varaura taru kopiipere, uvare vuria vo pitupituro-a va eva. Ari ita, visiire oiso puraroverea Pauto, “Torevoko vovou irara visii.” Eisi osa iava visiipa Oiraopa Tootoo vatervereia Tugoropato Uraurato, vo rara Krais visii sopaaro-ia toupareve. <sup>11</sup> Oire vosa rera iava Urauratoarope visii sopaura-ia, uva va iava Pauto visii tapo vorevira tootoo piervereia kopiia iava vo Tugoropato Uraurato iavirava, oiso rutu osa Jisas tootoo piervea.

*Uvui Iraopavie Ra Airerei Vovouvira Touape*

<sup>12</sup> Araoko irara oaa. Opeita Pauto vo ruipaaro vatavata iraopata ora visii vo ruiparoaro raga sirova utupaoro. <sup>13</sup> ♦ Vosa oisi oiso piepaoro ora visii vo ruiparoaro raga sirova utupata, ra kopii ovoitaverea taru. Ari vosa Tugoropato Uraurato vo goruaro-ia visii vo ruiparoaro kopii pieta, oire uva uvuipatai ra Tootoo Ovoi rutu oupataverea. <sup>14</sup> Ari voeao oea Tugoropato Uraurato vo tavitaviaro sirova vearovira utupaave, oea-a evoea Pauto ovii iraraaro. <sup>15</sup> ♦ Pauto visiipa Tugoropato vatervereia. Uva viapau oiso visii pierverora ra akukuvira rerapa kovopata rerapa uriri ragapaoro. Viapau. Uvare Tugoropato Uraurato vigei sopaura-ia toupareveira. Oa vituaro iava oiso toupapeira, Vigei-a Pauto ovii iraraaro. Ora vao vo osa tapo rera vo goruaro-ia oiso rerare purapavioveira, “Aite, aite.” <sup>16</sup> Uva ro-ia Tugoropato Uraurato ira vigei reraaro tapo uraurato ora takuvuparoveira. Ra va iava kataivira raga rera tapo oiso purapavioveira, “Vigei-a vao-ia Pauto ovii

---

❖ 8:1: Ro 5:16    ♦ 8:3: Ap 13:39; Hi 7:18    ♦ 8:9: 1 Ko 3:16; Ga 4:6    ♦ 8:10: Ga 2:20; Ef 3:17    ♦ 8:13: Ga 6:8; Kl 3:5    ♦ 8:15: 2 Ti 1:7; Hi 2:15

iraraaro.” <sup>17</sup> ♦ Oire uva oisi-a eisi osa toupapeira oiso, Vigei-a rera ovii iraraaro. Oa iava varao vearovara vatevateara ouperea, oara orirupareveira voeaopa rera voeaaro. Oiraopavira rutu viapau oiso varao raga-a vearovara, ari oaravu rutu tapo-a varao oara orirupareveira Krais-pa. Aue iava uvare varao tavakaara vo siraoro kaepapeira oiso osa Krais vo siraoro rutu kaereva. Eisi osa iava uvuipavie i ra varao tapo oupape oara peira vo Pauto ruvara-ia Krais varaaro.

### Vigeipa Vearoa Toupaiveira Keraria Vore Utupaua

<sup>18</sup> ♦ Vo siitokaro oara kaepapeira vo rasio-ia akukuara raga. Ari ita, vosa varei uvui ragapaoro varei akeake ragapapeira vao tapo rorua oa peira vore utupaua, oire uva viapau oiso uvuipavioveira osa ra oisi varei piepape. Eake iava? Uvare vigei roru pieparevereira rera vaaro-ia vaea vovou rutu oa peira rera ruvara-ia Pauto. Ororua eva riroa rutu, oa vo siitokaro vaaro-ia putepaiveira rutu. <sup>19</sup> Aue vituaro iava uvare vara rutu varao oara purareva Pauto voraro rutu, oara vo vokiore vagevagepaoro rutu toupaiveira oiso ra pou piro vo vokio, ovokia-ia Pauto rera ovii iraraaro kareke pierevereira orekerovu rutu osireiaro-ia. <sup>20-21</sup> ♦ Oire uva vara rutu-a varao oara purareva oara rutu erupapeira. Ari viapau oiso vara vaaro-a. Viapau. Uvare vo rovoa-ia vuria vo pitupituaro rovovira rutu kareke rovoepa. Oa-a vao oa vituaro iava vara rutu iava vasereva Pauto, oiso ra oisi ragavira piepaive opesi ovoipaoro. Uva touvira vara rutu evara toupaiveira vo vokiore tuepaoro oa-ia vara rutu eruara vo pitupituroaro opesi ovoiperea. Ovokia-ia vigei kareke pierevereira Pauto. Evo voki raga ita oa-ia vara rutu ora tavaroperea airepara karekeoro ita. Ari ita, vigei rutu tapo ita osa raga ita eisi pieperea, oa iava varao oara purareva Pauto oara vigei tapo roruverea.

<sup>22</sup> Vara rutu varao oara-ia taraipavioveira oara purapaoro rovoroepa voari tuariri. Oa iava vo vokio rekasiero vara, oara riroa tavaka vo siraoro kaepaiveira, oiso rorovira osa riakova o iria kakaetoava upiapaoro rera kavausa auepaoro gaupaeve. <sup>23</sup> Uva viapau varao raga oara purareva, oara oisi eisi piepaiveira. Viapau. Easi vigei tapo oirara. Vigoa vovouisiro iava koikoipapeira giigiiraupaoro. Vigoa-ia toupareveira ro Tugoropato Uraurato, ro-ia rovopatao rutu vatevatea vovouto Pauto, ira vatereva vigeipa. Oiraopavira rutu, uvare gaupaoro tuepavioveira vo vokiore oa-ia vigeire oiso puraroverea Pauto, “Ragai ovii iraraaro visii.” Oa eva vituaro iava airepavira ora tavariovioverea. <sup>24</sup> Pauto vigei ora rerapa vorevira vorerevereira, uvare rerare tuepaoro raripavioveira rera oirao piepaoro rutu. Oire uva eake-a vo reo vao porearo, raria? Orea porearo-a vao-ia oiso toupaiveira, Tuepata varaoe oara visiipa touvira karekeperea. Ari ita, vo osa ro ira iare oisi orekevu karekepe, oire ra viapau oiso vovouparo raripaoro ita, “Oa ouavere tou visivi.” Viapau, eva ita oa rerapa kareke ovoierao. <sup>25</sup> Ari vosa viapau va keke ovoireve, oire ra va iava toko asavira rutu tueparo.

<sup>26</sup> ♦ Oire uva oisi-a eisi osa vituaro iava Tugoropato Uraurato urioparoveira vigei tauvapasa vao raverave vovou irara. Ira vigei tauvapaoro Pautoa-re variriparoveira vigeipa, vo rara viapau taraipavio oiso, Apeisi ragavira uvuipavie i ra oiraopa variri purapape. Vo varirio oa purapareveira Pautoa iare oa-ia koikoipaoro, viapau oiso irai oiratoa vai taraiparoveira va-ia aviavipasa. Oiso osa piepareveira Tugoropato Uraurato. <sup>27</sup> Oiraopavira rutu Pautoa raga taraiparoi vigei iava sopaura-ia, ora vao-ia tapo taraiparoveira Tugoropato Uraurato vo koikoiaro vova vigei sopaaaro-ia. Uvare Pauto vo ruipaaro sirova utuparoveira rera ro Tugoropato Uraurato vigeipa variripaoro.

<sup>28</sup> Uva vara rutu-ia varao vearovira taraipavioveira oara vigei-ia karekepapeira, oara rutu ovoiaro-a vao-ia vearoa. Oa vituaro oiso toupaiveira, vosa Pautoa-pa siraopavio vigei vao vigoa reesireva ora rera vo ruipaaro-ia. Oire uva eagara, oara-a evara oara rutu porerevereira Pauto vigeipa vearoa puraoro. <sup>29</sup> Vigei rutu ropo rovorevoiva, vigei reesireva ora rerapa oiso ra oiso rutu toupape osa rera Oviitoaaro Jisas Krais. Oire ra Jisas oiso toupareve vigei avaiotoaaro, vigei vao rera arakoko iraraaro rutu. <sup>30</sup> ♦ Uva Pauto vigei reeresireva katakataivira vigoa roporopo rovopao. Uva vigeire keera rovoroiva,

◊ 8:17: Ga 4:7; 2 Ti 2:12; 1 Pi 4:13   ◊ 8:18: 2 Ko 4:17; Kl 3:4; 1 Pi 5:1   ◊ 8:20-21: Ap 3:21; Ro 6:21   ◊ 8:26: Mt 20:22; Ef 6:18   ◊ 8:30: Ef 1:5, 11; Ro 9:24

oiso puraroepa vigeire, "Torevoko vovou irara visii." Oa iava veatopara vatevatereva rera vaaro iava keraria.

### *Pauto Vaaro Siraoa Oa Viapau Uvuipai Ra Opesipe Vigei Iava*

<sup>31</sup> Vara rutu-ia tarai ovoiviepa evara. Uva aa vo reo rutu-a vao oa epao touvira oa purapere rara? Vosa Pauto vigei tapo ora takuvuro vigei virivarioro, uva uvuipaviea ra voeaore oea vigeiva ora keripaaveira oiso puravio, "Eagara, visiipe." <sup>32</sup> ♦ Viapau oiso iirukoto-a Pauto ora rera Oviitoaro raga-ia kavikovira vovoupaoro. Viapau. Ira akukuvira rutu vovou eakavira paarooreva ro-ia Jisas vigeipa. Oire uva oisi-a eisi osa ragavira rera piereva osa tapo orekerovu rutu iava paarorovere akukuvira vigeipa. <sup>33</sup> Iroutoa vai rutu-a ro ira uvuiparoi ra vigeire vao Pauto ovii iraraaro oiso puraro, "Vuri irara-a visii"? Oire viapau oiso irai epao. Eake iava? Uvare rera raga Pauto ira vigeire oiso puraroepa, "Vearo irara-a visii torevoko irara." <sup>34</sup> ♦ Ari ita, viapau rutu uvuipaae oeai oiso ra oisi vigeire purapaave oiso-ia. Aue vituaro iava oiso-ia uvare Krais Jisas kopii rovoroiva, vorevira rera ita tore piereva. Oa iava oirapapa varataaro-ia vao Pauto torepareoveira. Uva voa toupaoro Pauto arepareveira vo vigei tauvapasa.

<sup>35</sup> Oiraopavira rutu. Viapau oiso irai epao ira uvuiparoi ra vigei iava Krais vo siraoaro tokoreve. Ari ita, otavakarovu rutu karekepapeira vigei-ia oiso-ia, tavaka vovou-a vao, ari tou taraapa vovou-a vao, ari kasipupa vovou-a vao-ia vigeire uvare vigei-a Krais voeaaro, ari ogoe vuuta vao, ora apotapa vuuta vao, ari ora upopa vo vuutaaro-a vao, ora vao-ia kopiia. Oire uva aa vao-a vao vara iava evara oa uvuipai ra Krais vo siraoaro tokove vigei iava? Viapau rutu oiso oaei. <sup>36</sup> ♦ Oara iava oiso purapapeira Tugoropa Vuku, 'Vokiara rutu-ia igeipa tutuu piepapeira kopiia, uvare vii voeaaro-a igei. Igoa oiso rutu piepapeira osa sipsip kare, okarea upopasa aeupaaveira.'

<sup>37</sup> Oiraopavira uvare siraoa vo vavataaro kaepapeira. Uva viapau oiso oaei ra vigei-ia putepaive. Oa iava uvuipaviea ra va-ia roru iraopape va kaepaoro, uvare vo roru vituaro-a vao-ia, Jisas vo siraoaro vigeipa. <sup>38</sup> ♦ Oiraopavira rutu va-ia tarai iraoparai oiso-ia, Easi viapau oiso oaei oa uvuipai ra vao Jisas vo siraoaro tokove vova vigei-ia oiso-ia, kopiiarei ora tootooa oarea tapo viapau oiso uvuipai, ora purapurapa irara ensel, ora voeo oea orekerovu rutupa reipaaveira oea rutu vuvuiua-ia toupaiveira, ora varao oarai vo vokio-ia ora varao oara epao vore utupaua, <sup>39</sup> ora varao rutu orekerovu oara peira vuvuiua-ia, ora varao rutu orekerovu oara vo rasitoa-ia toupaiveira. Oara rutu evara viapau rutu oiso uvuipai. Viapau oiso oarai epao varao rutu iava evara oara purareva Pauto oara iava oarai uvuipai oiso ra vigei tokove vova Pauto vo siraoaro-ia, vo sirao-ia vigeipa oa-ia vituparoveira Krais Jisas vigeipa ro vigei Turaroaro.

## 9

### *Pol Siraoroepa Jiu-pa Irarapa Voeao Oea Reesireva Pauto Ora Rerapa*

<sup>1</sup> ♦ Ragai-a Krais reraaro uva viapau oiso kuuvuparai. Ro Tugoropato Uraurato ira ragai sopaproto tokipareveira. Uva voa toupaoro ragai tapo katai reo rutu puraparevoi. Oa iava oiso puraparai, Viapau oiso kuuvuparai oiso purapaoro. <sup>2</sup> Riroa rutu siraoa oa ragai-ia toupaiveira ragai iava vovouisi vavata pie iraopapro vokiara rutu-ia. <sup>3</sup> Uvare voeaviore sara irara oaa rugorugoo iraoparaveira Jiu. Voeao katai revasi rutu ragai tapo, oeavia isivaaepa Jisas-re. Uva va voriaro ouiverea ora voeapa rara. Oa iava oiso vovou iraoparai ra voea vo voriaro vao vuri vori oua voea vo tavukiaro ouoro. Eagara, vosa ragaire Krais oiso purarovere, "Vurito vii," voea arova oisi ragai vaisioro. Uvare rirovira rutu voeapa sirao iraoparai. <sup>4</sup> Aue iava uvare Pauto voeao raga Jiu-pa irara roro piereva ora rerapa voea oiso vaisioro, Ragai ovii iraraaro. Oa iava voea iava oearovupa kerariaro iava paaroorepa. Oa iava Pauto voea tapo reo ovoiro purareva vao tapo Reo Taisi oa rigatoreva Moses. Ora tapo vaore oiso ra oiraopavira Pauto-ia vuurapa vaisi purapave. Uva va isivaaepa iava Pauto voeapa reo ravaa purareva oiso, "Utupavira taru visii oriruaverea

---

❖ 8:32: Jo 3:16; Ro 5:8    ♦ 8:34: Kl 3:1; Hi 1:3, 7:25, 9:24    ♦ 8:36: Sam 44:22; 2 Ko 4:11    ♦ 8:38: Ef 1:21; 1 Pi 3:22    ♦ 9:1: 2 Ko 1:23, 11:10

rutu ora ragai ruvara-ia.” <sup>5</sup> ♦ Voeari turaro irara reipa irara Pauto voeaaro, voeo aao iraraaro oea-a voeo Jiu-pa irara vo vokio-ia. Oire uva Krais-a voea saratoaaro vo osa oisoa tootoovira toupareve vo rasio-ia. Uva Pauto ira turaroparoveira orekerovu rutupa. Ira-ia uvuipavieie ra vuurapa vaisi purapape opesi asavira rutu. Eva ovoiei oiraopa.

#### *Pauto Oirara Rutu Reesireva Ora Rerapa*

<sup>6</sup> ♦ Iu ita, reo ovoi purareva Pauto voeapa Jiu-pa irara. Uva viapau va sirova vara rutu ouiva oara-ia voeapa reo ovoi purareva. Uva apeisi-a? Oisi eisi vuripai? Viapau. Uvare oearovuei voea iava Jiu voeao oea viapau roporeva Pauto voea iava. <sup>7</sup> Oisi ragavira eisi osa voeaore Ebraham ovii iraraaro, viapau oiso voea ruture oiso puraroepa Pauto, “Visii rutu-a vao-ia ragai voeapro.” Viapau. Easi eera oiso puraroepa Ebraham ragare “Ro Aisak vii oviitoaaro kikooto, ira ovii iraraaro raga oiso karekeave vii iavapa irara. Vo osa voeao viapau, avaioto ovii iraraaro.” <sup>8</sup> Oreoa porearo vituaro oiso toupaivoi, Viapau oiso Ebraham ovii iraraaro rutu oiso toupaiveira, Pauto voeapro. Voeao oea varaua vo ruipaaro-ia puraa viropa. Ari voeao raga oea Ebraham-re aiteaepa vo osa voea-ia Pauto vo reoaro vao reo ovoi oirao piereva. <sup>9</sup> ♦ Uva oiso Reo Ovoi-ia Ebraham tavireva Pauto, vao oa-ia oiso puraroepa,

‘Vo osa vuuta-a vao torevokovira pou piro, oire ra vorevira vorera. Oa iava vii valuavaaro Sera kakaeto kavauevere.’

<sup>10</sup> ♦ Uva touvira reoreoparai va iava vao oiso osa Aisak riroroiva, valuava oureva Rebeka. Oa iava tavara kakaerei kavaueva. <sup>11-12</sup> ♦ Oire vosa kovua raga-ia kavau asavira tousiva vo vuria pura asavira ora vearoa, uva Pauto Rebeka tavireva vaiterei iava oiso, “Kikooto ro avaiotoapa reiparovere.” Uva oisi ragavira piereva Pauto vo rera vo vovouaro oirao piesa oiso. Oire uva vaiterei-ia touva vo reesirei vo rovoa-ia. Uvare viapau oiso vaiterei vo pitupituroaro-a, oara sirova oisi vaiterei reesireva. Ari rera raga Pauto vo ruipaaro-a, oa-ia oisi vaiterei piereva. <sup>13</sup> Iu, osa Tugoropa Vuku purapapeira oiso, ‘Pauto oiso puraroepa, Jekop-a ro, irapa ruipaparaveira ropa Isoreasipaoro rutu.’

<sup>14</sup> Oire uva apeisi ragavira? Pauto akerukavira oiso vo reo purareva, eke? E apeisi-a? Viapau torevokotoa rera Pauto, eke? <sup>15</sup> ♦ Ari ita, Pauto oiso puraroepa Moses-re, ‘Ragai oiso oirara piepaaveira ragai vo vovouaro sirova utupaoro. Oearovupa voea iava siraoparaveira.’

<sup>16</sup> Oire uva oisi-a eisi osa ragavira Pauto vo siraoaro oupapeira. Vao osiraoa vituaro oiso toupaiveira, Viapau oiso vigei vo kovoaro-a ora viapau oiso vigei vo ruipaaro-a oisi piepasa, ari rera raga vo vovouaro-a. Oa sirova oisi piepapeira. <sup>17</sup> ♦ Oire uva Fero-a ro-ia ira-ia ovoovoa toupaiveira vao oa-ia Pauto rerare oiso puraroepa, ‘Ragai vii turaro piepaavoi. Oa iava orekerovu kareke pieavere vii-ia. Oire ra vara kekepaoro ragai vo goruaro taraipaave. Ora aue tapo ragai vaisiaro viripaivere vo rasitoa rutu-ia.’ <sup>18</sup> Uva vo ovoovoa-ia uvuipavieie ra vearovira taraipavio oiso, Ora rera vo ruipaaro sirova utupaoro oearovu ragapa siraoparoveira oearovu riro kaureo piepaoro ritakovira rutu.

#### *Pauto Vaaro Java Siraoa Ora Rera Vaaro Kasipua*

<sup>19</sup> ♦ Oire uva Pauto oirara rutu oiso piepareveira ora rera vo vovouaro raga sirova utupaoro. Uva va-a vao oa iava irai vai pasi visii iava ragaire oiso purarovere, “Vosa eisi piepareve Pauto, oire uva iroutoa vai uvuiparoi ra Pauto vo vovouaro gasireve? Uva apeisi ragavira iava Pauto uvuipa ra iraire oiso puraro, Vurito-a vii”? <sup>20</sup> ♦ Ari iroutoa vai-a vii vova rasito, viigoa uvuipau ra eisi purau Pauto tovipaoro? Uva o-ia pitokava viapau oiso uvuipaoi ra toreoro oiso purao rore ira oira purareve, “Eakere oiso ragai pieparivoi?” <sup>21</sup> Oiraopavira rutu, ro-ia ira pitokarirei purasa aueparo oiso iriavu oira-ia vearovpara gurupareve, ari iriavu o iria-ia vuriara rogaraara vikipareve. Uva eisi piepaoro oisoa rera raga vo ruipaaro sirova utuparo.

<sup>22</sup> Oire uva apeisi ragavira Pauto toupareveira? Ira voeaore kasipua iraoparoveira oearoa vuri pitupituro purapaveira. Ra oiso vovouparo ra voea opesi piereve ora rera

♦ 9:5: Kl 1:16-19; Jo 1:1   ♦ 9:6: Nam 23:19   ♦ 9:9: Jen 18:10   ♦ 9:10: Jen 25:21   ♦ 9:11-12: Jen 25:23

♦ 9:15: Eks 33:19   ♦ 9:17: Eks 9:16   ♦ 9:19: Jop 23:13; Dan 4:35   ♦ 9:20: Ais 29:16

vo goruaro rutu karekeoro voea-ia. Osa viapau oisi voea piepareve vagevagevira. <sup>23</sup> Iu ita, oiso piepareveira voeaore oeapa siraoparoveira. Oiso ra voea-ia keraria vituaro rera vaaro karekereve. Uva voea-a vigei raga ita. Vigoa vatatopo piepareveira rera varaaro veiaropara oupsa vo rera vaaro-ia keraria. <sup>24</sup> Uvare vigei ruture keeraroepa ora rera iare. Iu, uvare oeavu-a vigei iava Jiu, ovusa oeavivu-a voeao voea raga iava ratau tou irara. <sup>25</sup> ♦ Oiso osa puraparoepa vo Pauto rigato oa purareva Hosea vo Tugoropa Vuku voeao iava ratau tou irara,

‘Voeao oea oiso viapau toupaive ragai voeaaro, oea vaisiaverea oiso, Evoea ragai voeaaro rutu. Ora voeao oea vo sara sovara-ia toupaiveira oeapa viapau siraopara, evoea-a oeare oiso puraraverea, Visiipa tapo sirao iraoparaveira. <sup>26</sup> ♦ Uva vo uva vo tavitavio uvuiva oiso, Viapau oiso ragai voeaaro-a visii, uva evoa raga ita oiso vo vaisio uvuiverea, Ragai ovii iraraaro visii, ragai Pauto Tootoo Ovoi.’

<sup>27</sup> ♦ Ora vo reo tapo oa vo Vukuo-ia Tugoropa toupaiveira origatoa purareva Aisaia Jiu-pa irara iava. Oa-ia oiso puraroepa,

‘Vosa voeao Jiu-pa irara rutu vieiaro takuvuaro rutu oiso toupaiveira osa rogaraara riroara rutu, oire uva voea iava kataipa irara raga roporoporevere ora rera iare.

<sup>28</sup> Vao vituaro iava uvare ikauvira ora goruvira rera ro Turaro Pauto voea varaa vuriara voriaro vatereverea voeapa.’

<sup>29</sup> ♦ Aue iava uvare oiso ragavira Pauto va purareverea osa Aisaia rovovira voari rutu va rigato rovoreva,

‘Ro reitoa rutu Turaro Pauto. Oire vosa viapau oiso Jiu-pa irara vigeipa siraoroeri ora voeao vigei ovii iraraaro, uva vigei rutu vigoa opesi pie ovoirevori, oiso osa voeao oea Sodom uruirei-ia oisoa toupaive ora Gomora urui.’

### *Voeao Isrel-pa Irara Jisas Vo Tavitaviaro Viapau Oirao Pieiva*

<sup>30</sup> ♦ Uva apeisi puravio va iava eva? Oiso-ia, voeao-ia ratau tou irara oea viapau oiso kasivarivira rutu oisoa kovopaive, oire ra va iava oiso toupaive, Torevoko vovou irara rutu vo Pauto osireiaro-ia. Ari ita, vo osa Pauto oisoa oirao pie iraopaise, eva-a oa raga iava Pauto voeare oiso puraroepa, “Torevoko vovou irara rutu visii.” <sup>31</sup> Vo osa voeao Jiu-pa irara Pauto oea rovovira ropo rovoreva ora rera iare, oea-a evoea oisoa taraa ragapaive rutu oaravure ae iava Reo Taisi. Oiso ra oisi oai iava oiso karekeave, Torevoko irara rutu vo Pauto osirearo-ia. Vo osa viapau oisi voeapa uvuipape rutu. <sup>32</sup> ♦ E apeisi-a oiso osa vaaro-ia viapau oisoa uvuipape voeapa Jiu? Aue iava uvare ora voea raga ora virivaripasa ora voea ragapa oiso vo kovo pura ragaiva. Osa viapau oiso oirao pie vovou vai puraiva rera-ia Pauto. Oire uva avekei iria toupaeveira o iria-ia koveaepa. Oa iava viapau oiso uvuiaepta oiso ra vo raivao sirova utuave virivaria oupa raiva. <sup>33</sup> ♦ Uva Tugoropa Vuku oiso tavipapeira o iava aveke ro Jisas,

‘Keketa, o-ia aveke iria tovoavoi vo-ia Saion taere sovara-ia ravaavira. Iria-ia koveavere ora opesi pie ovoioro. Ari vosa ro ira rera-ia raripaoro rera oirao piepareve rutu, eera-a ira-ia viapau uvuiparoi oiso ra rera iava vasereve.’ Mt 21:42; Ro 10:11

## 10

### *Voeao Isrel Vata Viapau Oiso Torevoko Pitupitu Sirova Utuaepa Vao Pauto Vaaro*

<sup>1</sup> Araoko irara oaa, rirovira rutu rugorugoo iraoparaveira voeaore Jiu-pa irara ragai iavapa irara. Uvare rirovira rutu oiso ruipa iraoparaveira ra Pauto voea oureve ora rera iare. Oa-a eva oa iava rirovira rutu Pautoa iare variriparaveira voeapa. <sup>2</sup> ♦ Uva vearo reo rutu purapaavoi voea iavirava, uvare kasivarivira rutu kovo iraopaise, oiso ra voeaa-ia Pauto rorureve. Ari ita, akukupapavira rutu kovo ragapaiveira, uvare viapau oiso soporepaa viroveira ora voea vo kovoroaro vituaro iava. <sup>3</sup> ♦ Viapau rutu oiso taraipaaveira vao iava vo osa Pauto oirara oiso vaisipareveira, Torevoko vovou irara. Ora ae tapo vo osa kovo ragapaiveira oisore ra vo vaisio ouive, Igei-a vao torevoko

◊ 9:25: Hos 2:23    ◊ 9:26: Hos 1:10    ◊ 9:27: Ais 10:22-23    ◊ 9:29: Ais 1:4, 13:19    ◊ 9:30: Ro 10:6; Ga 2:16    ◊ 9:32: 1 Pi 2:6, 8    ◊ 9:33: Ais 28:16    ◊ 10:2: Ap 21:20    ◊ 10:3: Ro 1:17; Fl 3:9

irara. Oa-a eva oa vituaro iava viapau oiso ora voea iava vasepaiveira oiso ra Pauto voea torevokoreve.<sup>4</sup> Uva taraipavio rutu oiso Jisas urioroera. Oa iava Reo Taisi vo goruaro opesiera. Oire uva vo vokio-ia oiso toupai, Vosa ro ira rera oirao piepareve rutu, eera-a ira torevoko vovoutoa rutu vo Pauto osireiaro-ia.

*Pauto Oiso Ruipaparoveira Ra Ora Rera Iare Oirara Rutu Vorereve Voeao Ouoro*

<sup>5</sup> Moses vo reo rigatoreva Reo Taisi iava oiso-ia,  
‘Irouto-a ro ira tore ruipaparo vo Pauto osireiaro-ia oiso rutu osa torevokoto, ira uvui  
iraopa oiso ra varao rutu sirova uturo oara epao Reo Taisi sovara-ia. Uva oisi eisi  
piepaoro Tootoo Ovoi oureve.’

<sup>6</sup> Ari oreovu raga vao oa toupaiveira va iava vao oirao piea Pautoa-ia oiso,  
‘Opeita ora viire oiso purau, Irouto ro ira vuvuiua iare iparoverea?’

[oire ra voava Krais vara piereve].<sup>7</sup> Ora  
‘Opeita oiso tapo ora viire purau, Irouto-a ro ira rasito sovara-ia rokorevere?’  
[oire ra voava Krais ipa piereve vorevira kopiia iava].<sup>8</sup> Uva eake rutu-a oare  
purapapeira Pauto vo reoaro vaore torevoko vovou? Oreoa vao oiso purapapeira,  
‘Vo reo-ia vao iava torevoko vovou viapau oiso tarataraapaa vare taraapasa. Oreoa-ia  
reoreopauveira ora vii gisipoaro iava. Ora vo reo oirao piepariveira vo ora vii  
vovouaro-ia.’

Oreoa vao oa iava voviri visii tavitavi rovoavora oiso puraoro, “Oiso toupatavere Krais  
oirao piepaoro.”<sup>9</sup> Vo rara oiso purapata ora visii gisipoaro iava, “Jisas ragai Turaroaro.”  
Vo rara tapo ora visii vovouaro-ia vao oirao piepata rutu oiso osa Pauto Jisas vorevira tote  
piereva kopiia iava. Oire eva-a oa iava uvuiparoi ra visii vorereve vorevira ora rerapa  
visii virivario. <sup>10</sup> Oa vituaro-a vao-ia oiso-ia, Vosa Pauto oirao piepape vo ora vigei  
vovouaro-ia, oire ra va iava vigei vaisireve oiso puraoro, Torevoko vovou irara visii. Ora  
vo rara oiso purapavio, “Jisas vigei Turaroaro.” Oire ra va iava ora rerapa vigei vorevira  
vorereve ita.

<sup>11</sup> Vo Tugoropa Vuku-ia oiso purapapeira,  
‘Ro ira rera oirao piepareve, oire uva rera-a eera ira iava viapau uvuiparoi ra rera iava  
vasereve.’

<sup>12</sup> Uva vo reo-a vao-ia oa oiraopapeira rutu voea rutupa oirara, voeao Jiu-pa irara,  
ora voeao ratau tou irara, uvare katai irara rutu-a vo Pauto osireiaro-ia. Ro Pauto  
vigei rutu reraaro Turaro. Oire vosa irouto-a ro ira Pauto iare variriparo, eera-a  
irapa uvuiparoi ra vearovpara paapareve Pauto rera tauvapasa vara-ia.<sup>13</sup> Uva oiso  
purapapeira Tugoropa Vuku,

‘Ro ira variriparo vore Turaro akepaoro auere tauva, eera-a ira vorerevere ora rerapa  
rera virivario.’

<sup>14</sup> Vosa viapau Pauto oirao pie rovopave, oire ra apeisi ragavira rera Pauto akeive  
tauvaare? Ora vosa rera iava vo siposipo viapau uvu rovopave, oire ra apeisi ragavira  
ita rera oirao pieve? Ora vosa viapau siposipopira irara vai toupave voeapa siposipopasa  
rera iava, oire ra apeisi ragavira uvuipaave ra rera iava vo siposipo uvuipaave?<sup>15</sup> Ora vosa  
viapau irai toupareve siposipopira irara vai arupasa, oire ra apeisi ragavira vo siposipo vao  
kosipa piro voraro rutu viripasa? Ari ita, Tugoropa Vuku oiso purapapeira,  
‘Vosa oeavu vigei iare poua viro Vearo Siposipo iava vigeipa siposiposa, osa-a oiso osa  
vearopapeira rutu.’

*Isrel-pa Irara Isivapaaveira Va Vao Vearo Siposipo Uvu Arapa*

<sup>16</sup> Uva oearovu isivapaaveira rutu va vao Vearo Siposipo uvu arapa. Oa iava vao-ia  
Aisaia oiso vo reo rigatoreva,  
‘Turaro, kataipa iraravi raga ragai vo reoaro uvupaveira vo reo oirao piepaoro. Vo osa  
oearovu reasipaave.’

<sup>17</sup> Oire taraipavioveira vao-ia Krais iava vo tavitavi oiso osa oearovu voari tuariri vigei  
tavi rovoiva. Oire uva vo tavitavia eva oa vituaro-a vao-ia, oa iava Pauto oirao piepapeira.

---

<sup>◇</sup> 10:4: Ga 3:24; Ro 7:1-4    <sup>◇</sup> 10:5: Nie 9:29; Esi 20:11, 13, 21    <sup>◇</sup> 10:7: Hi 13:20    <sup>◇</sup> 10:8: Diu 30:14    <sup>◇</sup> 10:11:  
Ais 28:16    <sup>◇</sup> 10:12: Ro 3:22    <sup>◇</sup> 10:13: Joe 2:32    <sup>◇</sup> 10:16: Ais 53:1

**18** ♦ Uva visii akepaavoi oiso, E Jiu viapau vo tavitavi iava vao uvuiva? Ari oiraopavira oa iava vao-ia uvuiva, uvare Pauto vo reoaro oiso purapapeira, ‘Ari ita, sipoipopo irara vo sipoipopo gurukoaro voraro rutu rasitoa-ia viriva. Oreoa vao-ia voraro rutu avaepa rasito rutu rekasiaro-ia.’

**19** ♦ Uva oiso tapo vorevira ita visii akepaavoi oiso, E apeisi-a? Aviavipai vo reo voeaopa Jiu, eke? Ari! Uvare Moses oiso vo rigato purareva va iava vao, ‘Viapau oiso ragai vo reoaro outava, eva oa iava voeaopa ratau tou irara tavitaviravere. Eva-a oa vituaro iava oiso ragavira aveavepataverea. Uva voea voeo-ia ratau tou irara sopaipa irara voeare kasipu iraopata, vo osa Vearo Siposipo uvu rovopaive.’

**20** ♦ Ora Aisaia tapo ira goruvira rutu uriri asavira vo reo vao rigatoreva va iava vao-ia, ‘Oirara ragai kekeiva voeao oea viapau ragaire oiso tarapaive. Ora ragai voeao-ia poura viropa voeao oea viapau oiso oearoi akepaive ragaire.’

**21** ♦ Ari ita, Pauto oiso puraroepa voeare Isrel-pa irara, ‘Vokiara rutu-ia voeao ouou ragapaaveira ora ragai iare, ovusa ragaire isivapaave kaureopaoro.’

## 11

### *Pauto Siraoparoepa Oearovivupa Isrel-pa Irara*

**1** Ragai vo akearo-a vao-ia oa oiso purapai, E Pauto voeaore isivaroepa rera voeaaro Jiu? Viapau rutu. Ragai-a vao Pol voea iava rera, uvare ragai aaotoaaro-a Abraham voea iava rera. Ora vao tapo ragai vo saraaro oa oiso vaisipaiseira, Bensamin. **2** ♦ Oea roporeva voari rovoa rutu-ia Pauto ora rerapa, voeao Jiu-pa irara. Oire uva vo vokio viapau oiso voeare ovauparoi. Oreoa vao oa-ia tarapataveira Tugoropa Vuku-ia toupaiveira vao iava osa Ilaija Pauto tavitavipaoro Isrel-pa irara togareva oiso puraoro,

**3** ‘Turaro, vii voeaaro sipoipopo irara upoiva voea kopii pieoro. Ora vii varaaro tapo eravaoara rigaiva. Uva ragai raga vao-ia ragoa touvira toupaavoi. Uva ragai tapo uposa ita auepaai.’

**4** ♦ Uva apeisi ragavira Pauto rera vo reoaro aatoreva? Oiso-ia, ‘Viapau oiso vii raga-a. Ari oeavu rutu tapo-a erao vatara tuku (7,000) evoea oea viapau ro-ia kuuvuto pauto vuurapa vaisi purapaiseira Bal. Oea-a evoea oea touvira toupaivoi ragai voeao.’

**5** Oire uva oisi ragavira-a eisi osa toupaivoi katakataipa irara vo vokio-ia voeao rera voeaaro. Voeao oearoa ropoporeva ora rerapa, uvare oiso voeapa vereopa vovou vatepareve. **6** ♦ Oiraopavira rutu oiso osa vao oira ropopopora pitupitu vituaro toupaiveira vereopa vovou raga-ia vao rera vaaro. Oa vituaro-a vao-ia oira ropopopora pitupitu viapau oiso toupaiveira varao iava veeropa kovoro oara purapaise. Vosa oisi eisi toupaivori, ra viapau oiso Pauto vaaro vereopa vovou oiraopape rutu.

**7** Oire uva oisi raga toupaiveira osa viapau vao kekeiva Jiu oare oiso taraa ragapaise vereopa vovou Pauto vaaro, ovusa voeao raga katakataipa irara, voeao iava oea roporeva Pauto, oea va keke ovoiiva. Ovusa oeavu voeao iava Jiu oea iava oiso rugorugooara tuukevira rutu vavagisivira toupaive. Oa iava rerare Pauto isivaaepa. **8** ♦ Oa-a vao oa iava oiso purapapeira Tugoropa Vuku,

‘Pauto voeao vo vovouaro vavagisivira piepaoro rovoroepa voari tuariri rovoa-ia. Oa iava vo rutu rekasiaero vo vokio-ia oisi raga piepaoro. Uva va-a eva oa iava viapau oiso uvuipaai ra oiraopara kekepaoro vara eveipaise, ora varao tapo oiraopape reoro oisi raga ita viapau eveipaevara uvuipaive.’

**9** ♦ Devit tapo oiso puraroepa vo rigato-ia oa purareva, ‘Ari ita, oiso aioara tapo veeropara purapaise oiso keapaoro, Varao iava igei-ia rorupareveira Pauto. Vo osa vara rutu-a evara akukuara raga. Oara-ia ora

---

♦ 10:18: Sam 19:4   ♦ 10:19: Diu 32:21   ♦ 10:20: Ais 65:1; Ro 9:30   ♦ 10:21: Ais 65:2   ♦ 11:2: Sam 94:19; 1 Kin 19:10   ♦ 11:4: 1 Kin 19:18   ♦ 11:6: Ro 4:4   ♦ 11:8: Ais 29:10; Diu 29:4   ♦ 11:9: Sam 69:22-23

voea vo vovouroaro raga-ia oisoa viripato purapaive rera-ia ora voeare kuverava purapasa. Oire uva oisi-a oiso osa vara purapaoro ora voea-ia rikui-ia koveaepa voa ora kopii pie ovoioro. <sup>10</sup> Vearopai vosa voea iava osireiara voririkeepa, oa iava viapau uvuipaaepa ra oaravu eveiive. Ora vearopai tapo vo uvare vosa pukoa viropa riro vavatapara kaepaoro tavaka vovouro.’

*Oearovu Oirara Oureva Ora Rerare Vorevira Pauto*

<sup>11</sup> ♦ Oire visii akepaavoi oiso-ia, E Jiu kove ovoiaepa koveoro, eke? Viapau rutu. Easi evoea vorevira toreaverea. Ari ita, uvare koveaepa voea vo pitupituroaro-ia varao vuriara, evara oara kekeoro Pauto voea arova voeo Jiu ora poreroepa voeo iare ratau tou irara, ora rera iare voeo ousa. Oire uva rera vo siraoaro voeaopa ratau tou irara, oa kekeoro voeo Jiu rerapa vorevira ruipapaaverea, oiso ra voeapa ita vorevira siraoro ita utupavira. <sup>12</sup> ♦ Uva oisi ragavira oiso pieivoiva Jiu, Pauto oearovu rutu vatereva rera vo reoaro voraro rutu vo rasio-ia. Ari ita, uvare voea vaaro Jiu oirao piea rera-ia oisoa potepaive, oa-ia oearovu rutu vo rasio iava uvuipaai ra rera goruvira rutu oirao piepaive. Uva oisi-a eisi osa iava oearovu vearoara ouiva, vo osa Jiu vuriara puraiva. Uva vara-a evara oara-ia pute pieara vearopara rutu ouiverea voearei rutu takuvuaro, vo rara Jiu vorevira ora poreave rera iare Pauto.

*Voeao Ratau Tou Irara Oea Jiu Vo Tavukiaro Ouiverea Rara*

<sup>13</sup> Visiire ratau tou irara reoreoparai, uvare ragai-a Krais-pa kovopato visiipa. Oire uva viapau oiso ariiparai vo kovova vao-ia reia rutu oa purapaavoi visiipa. <sup>14</sup> Oiraopavira rutu, reia rutu vao-ia kovo. Vosa oisi ragavira rugorugoopaaeri voeo Jiu, ra vaopa Pauto vo kovoaro ruipapaave vai pasi. Oa iava vorevira porea virori rera iare Pauto vo utupavira. <sup>15</sup> Vo osa Jiu-pa irara arova ora poreroepa voeo tapo ratau tou irara ora agiagisa. Ora vo osa voeo tapo Jiu-pa irara oisi raga ita vorevira ora poreave rera tapo vorevira ora agiagisa ita. Vosa oisi ragavira oiso pieive, oire ra oiso rutu roropape voeapa kopiia iava vorevira torei rera iare Pauto. <sup>16</sup> ♦ Oire vosa tuariri voeari Ebrahim vase oisoa toupaive Pauto voeaaro, oea iava voeo-ia vo vokio-ia, oea tapo ita oisi ragavira eisi toupaivoi. Uvare oiso-ia vosa vo eva vavurupaaro vearovira toupaive, oire ra va iava vo eva raoaro tapo oisi raga ita vearovira toupaive.

<sup>17</sup> ♦ Oire oevavu oliv ova oa varuparo uvavu toupaiveira. Oa iava oraorovu piaiva. Uva vo tokoruro iare oraorovu ouiva vo evao iava vegovego ova oavu oliv ova. Oiso ra vo raoro siguvaive vo tokoruro-ia. Ra voa poretepe. Oire uva visii-a vao-ia ratau tou irara visiigoa oiso toupata osa vo evao vegovego ova oliv ova. Visiigoa oiso rutu oureva Pauto osa vo evao vegovego ova vo evao iare, oa vo oisoa toupaive varuparo paupa ova. Oiso ra voa vorevira poreteta gorua ouoro tootoosa. Vo goru oa peira Jiu-pa irara tauvapasa. <sup>18</sup> Oire ra viapau oiso rutu rugorugoopata, Vearo irara rutu-a visii voea-ia putepaoro Jiu, oea oiso tokoa viropa osa vo evao. Viapau. Uvare visii oiso rutu toupatavoi, Raoara visii. Iu ita, viapau oiso raoara vavuruparapa tootooa vatepaiveira. Viapau. Asi vavurupara-a oara raoara vatepaiveira tootooa. Eva oa vituaro iava viapau uvuipatai ra ora rei vaisi pieti.

<sup>19</sup> Oire uva pasi oiso vaio purapatai, “Ari ita, Pauto oea piareva. Oa iava voea vo tavukiaro ouiovorao.” <sup>20</sup> ♦ Iu, oiraopa reo vao-ia. Uvare Pauto voea piareva, vo rara reasipaave Pauto oirao pie arapa. Oire vo osa vo tavuki-ia eva toupata, uvare rera oirao piepataveira, ra opeita vagupaoro ora visii iava riapatata. Viapau. Ari vo ovoovore rugoo iraopaoro uriri iraopatavere. <sup>21</sup> Aue vituaro uvare evoea Jiu oiso toupai osa vo evao sipusipuaro, oa varuparo toupaiveira. Oeva iava Pauto voea piareva voea tokoro. Uva apeisi-a vosa visii tapo vao-ia vo evao iava vegovego ova oisi eisi oai vuria vai purata osa evoea Jiu? Oire ra viapau oisi oai iava Pauto visii tapo tokoreve visii piaoro, eke?

<sup>22</sup> Keketa! Oiso osa ragavira Pauto vo pitupitureo purapareveira oiso, oearovupa siraoparoveira oearovupa kasipupaoro. Oire ra ora voea vo vovouroaro-ia vuri vovouro vorevira voea viro piepareve. Uva oisi ragavira-a eisi osa voeo Jiu ora voea-ia viroaera uvare voea tokorevora. Vo osa visii ragapa riroa rutu siraoa rera vaaro karekereva, vo

---

❖ 11:11: Ap 13:46; Ro 10:19 ❖ 11:12: Ro 11:25 ❖ 11:16: Lev 23:10 ❖ 11:17: Jer 11:17; Ap 2:39 ❖ 11:20: Ro 12:16; 2 Ko 1:24

uvare touvira rutu Krais oirao piepataveira. Ari vosa visii tapo viapau oisi piepata, oire ra oisi ita visii tapo tokoreve ora rera iava. <sup>23</sup> ♦ Voeao Jiu oea Pautoa-ia oirao piea kavu rovoiva. Osa iava voea tovorevereia Pauto vo ora voea vo tavukiaro-ia, vo rara rera vorevira oirao pieive ita. Uva Pauto uvuiparoveira rutu oisi piepasa eisi. <sup>24</sup> Visii ratau tou irara visiigoa oiso rutu toupataveira osa vo raoro vo evao iava, vegovego ova. Oire vosa visii oureva Pauto vova vegovego ova vo evao iare oa eva varuparo toupaiveira paupa ova, oire uva oisi-a eisi osa ragavira apopoipapeira rutu. Eake iava? Uvare viapau oisi eisi oevaroi piepaiveira. Ari ita, vosa Pauto voeao raga vorevira Jiu siguvareve vo eva-ia, oire ra voeapa avekatape rutu oisi oiso.

#### *Pauto Vo Siraoro Oirara Rutupa*

<sup>25</sup> ♦ Araoko irara oaa, oiso ruipaparai ra vao-ia taraita vatau reo. Ra va-ia taraioro viapau oiso ra ora visii vaisiaro rei piepata oiso purapaoro, Igei-a vao riro tarai irara. Oreoa vao-ia oiso toupai, Oearovu voea iava voeao-ia Jiu viapau oiso vokiara vai rutu-ia kaureopaaaveira Pauto vo vovouarova. Osa piepaoro vo rutu rekasisa poua viroverea, uva uvuiperea ratau tou irara vo vieiaro, voea raga oea Pauto oirao piepaiveira rutu. <sup>26</sup> ♦ Uva vo vuuta-a eva oa isivaaro iava Pauto voeae rutu oureverea Jiu-pa irara ora rerapa. Oa iava oiso purapapeira Tugoropa Vuku,

‘Iravu vova Saion uruia ira uriorovereia visii kae piepasa, vo rara voea iava oirara vuri vovouro vera ovoipareve voeao Jekop vo saraaro iava voea. <sup>27</sup> ♦ Osa va-a vao oa puraoro vao Reo Ovoi oiraopavira rutu kareke pieaverea. Vao oa puraava tuariri rutu voeae tapo Jiu-pa irara aao iraraaro.’

<sup>28</sup> Oire vo osa Jiu-pa irara Vearo Siposipore isivaaepa, oa iava oiso rutu karekeaaepa, Pautoa-va ora keripa irara. Uva va vituaro-a eva oa iava uvuipatai visii vao-ia ratau tou irara ra va iava Krais oirao piepata. Ari ita, vo osa voari rutu Jiu-pa irara ropo rovorevoiva ora rerapa, voea tapo reo ovoi purareva voeari tuariripa irara. Uva oeare rugorugoopaoro voeaopa siraoparoveira vo vokio iavapa irara Jiu. <sup>29</sup> ♦ Uvare viapau rutu rera vo rugorugooaro tavariopaaiveira. Ari ita, vosa katai vovou raga purareve, oire ra oearovu roporoporeve voeae iava voea viraakosa. Uva oisi-a eisi taru osa vo vovou purareverea rara.

<sup>30-31</sup> Ari ita, visii vao-ia ratau tou irara oisoa reasipata Pauto vo reoaro uvu arapa. Uva vo vokio Pauto visiipa siraoroerao, uvare vo tavukio-ia Jiu-pa irara vaaro toupatavoi, voea oea isivaaepa rerare. Oiraopavira vo vokio-ia viapau oiso riro irara vai Jiu-pa irara vai Pauto-ia oirao piepaivoi rutu. Ari voeae rutupa siraorovereia vo utupaua. Visiipa siraao iraoparoveira Pauto, eisi osa ragavira ita voeapa siraorovereia Jiu. <sup>32</sup> ♦ Oa vituaro vao-ia osa Pauto oirara rutu iava vasereva, oiso ra ora voeae vo ruipaaro raga-ia vuri pitupituro purapaaive. Ra va iava voeae rutupa siraoro akukuvira rutu vo utupaua.

#### *Uvuipaviei Pautoa-ia Vuurapa Vaisi Purapasa*

<sup>33</sup> ♦ Oiraopavira Pauto orekerovu rutu paaropareveira vigeipa varao iava rera varaaro. Ora rera vaaro rugorugooa riropapeira rutu, uvare orekerovu rutu-ia tarai iraoparoveira. Iroutoa vai rutu-a ro ira uvuiparoveira oiso ra roroiovira rutu Pauto vo ruipaaro-ia taraiparo? Ora iroutoa vai rutu-a ro ira roroiorovere rutu ora rera vo pitupituro taraiparoveira? <sup>34</sup> ♦ Vo Tugoropa Vuku oiso purapapeira,

‘Irouto-a ro ira Pauto vo rugorugooaro-ia taraiparoveira? Irouto-a ro ira Pautoa-pa rugoo vateparoveira rera vo taraiaro topa piepaoro rutu? <sup>35</sup> Irouto-a ro ira uvuipa ra oarai vateoro Pautoa-pa oiso puraro, Varao tuuoro ragaipa oarai vateri rara?’

<sup>36</sup> ♦ Vao vituaro iava uvare Pauto raga ro ira reoreoroiva, orekerovu rutu karekare-keepa. Varao rutu oara vo toupaiveira oara purareva rera raga. Oiso ra vara-ia rera iava vaisia kae piepape. Ra Pautoa-ia vuurapa vaisi purapape vokiara rutu-ia. Ovoiei.

---

❖ 11:23: 2 Ko 3:16 ❖ 11:25: 1 Ko 2:7-10; Ef 3:3-5 ❖ 11:26: Ais 59:20-21 ❖ 11:27: Ais 27:9 ❖ 11:29: Nam 23:19 ❖ 11:32: Ro 3:9; Ga 3:22-23 ❖ 11:33: Ef 3:8; Sam 92:5 ❖ 11:34: Ais 40:13-14; Jop 36:22 ❖ 11:36: 1 Ko 8:6; Hi 2:10; Ro 16:27; Hi 13:21

## 12

*Vo Toupa Vao Iava Vosa Ora Vigei Iava Varaura-ia Tauopavio Krais-pa Voura Vatepaoro Oiso Osa Tauoa*

<sup>1</sup> ♦ Araoko irara oaa, vao-ia taraipataveira riroa siraoa Pauto vaaro vigeipa. Oa-a vao oa iava goruvira rutu visii akepaavoi oiso ra ora visii iava varauro oavisii rutu vateta, ora sopaura oavisii rutu Pautoa-pa. Kasivarivira rutu rerapa kovopata vearo pitupituro purapaoro rera vo vovouaro raga sirova utupaoro. Ra va iava visii-ia rorupareve. Vo osa oisi eisi piepaoro rera-ia vuurapa vaisi purapata rutu oiraopavira. <sup>2</sup> ♦ Opeita varao raga-ia rugorugoopata vo rasio-ia touara oearovu vo pitupituroaro sirova utupaoro. Viapau. Ari Pautoa-re rugoopata, eera ira uvuiparoi ra visii vo rugoroaro tavariopareve. Ra va iava airepa rugoro oupata ita, oisore ra vara-ia taraipata oarapa ruipaparo Pauto. Oiso ra vara purapata. Vosa rera vo rugoroaro vearoa sirova utupata ora vao tapo vearo pitupitu, oire ra va iava visii-ia rorupareve rutu.

*Vo Pitupitu Oa Pura Iraopape Pauto Voeaaro Osireiaro-ia*

<sup>3</sup> Akukuvira rutu Pauto ragai vate ragarevora vao rera vaaro tauvaa, uvare ragai-a rerapa kovopato. Osa iava oiso visii tavipaavoi, Opeita oiso ora visiire rugorugoopata oiso purapata, "Igei-a vao reipa irara rutu." Viapau rutu. Ari uvuipatai ra avivikevira rutu ora visiire rugorugoo iraopata, rara vao eveipata ora visii-ia oirao pie vovou oa vaterevora Pauto visiipa. Vo osa visii vo vovouroaro-ia tarai rovoroiva rutu, uvuivira rutu visii vaterevora totoevira oirao pie vovouro. <sup>4</sup> ♦ Ari ita, kataiu varaua vigeia, osa vara rutu varao toupaiveira vigei varaaro-ia oara varaaro kovoara roorookavira toupaiveira. <sup>5</sup> Eisi osa rutu toupapeira vigei vao-ia oirara vigoa oisi roorookavira rutu toupapeira, vo osa Krais tapo kataivira rutu takuvuvira toupape. Oiso osa kataiu varaua vo roorookarova varao toupaiveira.

<sup>6</sup> ♦ Vo osa oisi eisi toupaepa roorookavira, oa iava viapau vaeavira oaravu vigeipa vatepareveira varao vatevateara vigei tauvapasa. Viapau. Ari katakataivira vigei vatepare. Oire ra vearovira kovopape vara iavirava rera-ia raripaoro. Oiso-ia osa ragavirare vigei reesireva vaore rera vo siposipoaro purapasa oearovupa. Oire vosa oisi vao purapaoro uvui iraopavie i ra rera-ia raripavio vearo kovo purapaoro vigei varaaro oirao pie vovouro sirova uvuivira. <sup>7</sup> Ora oiso tapo osa iava vigei reesireva oearovu tauvapasa, osa iava eisi uvui iraopavie i ra oisi vara purapape voeapa. Ari ita, vosa oisi vigei reesireva oiso ra oearovu tarai piepape tapo, uva uvui iraopavie i ra oisi piepape. <sup>8</sup> ♦ Ora oisore tapo ra oearovu vovouaro varaata piepape, oire uva uvui iraopavie i ra oearovu vovouaro varaata piepape rutu. Vosa oiso vigei tavireve, ra oearovupa vatepavio varao iava vigei varaaro moniara, uva oisi-a eisi osa ragavira uvui iraopavie i ra voearopa vara-ia paaropavio. Ora vao tapo osa vigei reesireva vaore, oiso ra oearovu tokipape, oire ra oisi kasivarivira rutu vo kovo oisi purapape. Ora ro tapo ira kasivarivira rutu apota irararovi tauvapareve, ira-a eera uvui iraoparoi ra oisi piepaoro rorupareve rutu.

*Oiraopa Pitupitu Purapape Oearovupa Siraopaoro*

<sup>9</sup> Opeita kuuvuvira oearovupa sirao ragapata. Ari uvui iraopatai ra ora visii iava vovouisiro rutu iava oearovivupa siraopata rutu. Ora vao-ia oiso-ia vuri pitupituro veri iraopaoro vearoa-ia pitu iraopata goruvira rutu. <sup>10</sup> Vigei rutu kataivira rutu tou iraopapeira Krais tapo, eisi osa vituaro iava uvuipavie i ra ora vigeipa siraopavio rutu, oiso rutu osa vigei vavuata. Oire vosa iravu visii iava rera vearoa vai purapareve, uva uvuipatai ra rera-ia egapata rorupaoro.

<sup>11</sup> Kasivarivira rutu kovo iraopata. Oisi piepaoro eisi opeita pokapoka ragapata. Vosa kovoaa purapata Turaropa, ra oisi va purapaoro goruvira rutu ora visii iava vovouisiro rutu tovo iraopata va-ia.

<sup>12</sup> ♦ Visii vao-ia visiigoa Krais-ia rari iraopaoro toupata, osa iava eisi uvui iraopatai ra roruvira rutu toupata. Ora goruvira rutu varao tapo-ia tavakaara toupata. Ra variripata vokiara rutu-ia Pautoa-pa.

❖ 12:1: 2 Ko 10:1-2; Ro 6:13, 16, 19 ❖ 12:2: 1 Pi 1:14; 1 Jo 2:15; Ef 4:23 ❖ 12:4: 1 Ko 12:12-14; Ef 4:4, 16

❖ 12:6: 1 Ko 7:7, 12:4, 10 ❖ 12:8: Mt 6:1-3; 1 Ti 5:17 ❖ 12:12: Hi 10:32, 36

<sup>13</sup> ♦ Vosa araoko irara oavisii orekerovupa potepaive, oa iava uvuipatai ra ora visii varaaro iava paaropata voeapa vatepaoro. Ora oiso tapo ra voearopa tavetepa irara ora visii vo keparoaro karupata, ra voa voea tou piepata vearovira.

<sup>14</sup> ♦ Ari ita, uvui iraopatai oiso ra Pauto arepata, ra va iava voeao viraakopareve oea visii togapaise oreorovu-ia. Oiraopavira rutu oiso uvuipatai ra voeapa vearovara arepata. Viapau oisore-a ra voea vuri piepareve Pauto.

<sup>15</sup> Voea tapo roru iraopata oea roruvira toupaive. Ora voeao tapo gaupata oea gauvira toupaive. <sup>16</sup> Ra vaeavira rutu kovopata ora visii-ia rorupaoro. Opeita oiso ragavira ora visiire rugorugoopata, Oearovu visii iava vara pievira toupaiveira. Viapau. Avivikevira rutu ora visiipa toupaoro kataivira rutu kovopata voearovio tapo akaipa keke irara. Opeita oiso ora visiire purapata, “Igei-a riro tarai irara rutu.”

<sup>17</sup> ♦ Oire vosa iravu visii iava vuria vai purareve visii-ia, ra viapau oiso rerava ora tuutuukopata. Ora oiso tapo-ia, vosa vearo rugorugooro raga purapata, oa iava viapau uvuiparo irai ra visii vo rugorugooroar vaisireve oiso, Vuriara evara. <sup>18</sup> Opeita potepata vearo rugorugoo purapa arapa. Ari gavaure vovou purapata oearovu tapo toupaoro.

<sup>19</sup> ♦ Araoko irara oaa, opeita oeavu vuriara purapaise osa vara aatopasa oiso auepata rugoopaoro, Ragai auearo va aatosa. Viapau. Oape Pauto vaaro oa taru aatorevere. Oa-a vao-ia vituaro iava oiso purapapeira Tugoropa Vuku, ‘Ragai raga auearo oara vuriara voriaro vateaverea oirara rutupa. Ragai raga Turaro oara tuuaverea taru.’

<sup>20</sup> Oiraopavira rutu, oiso osa purapapeira Tugoropa Vuku vigeire oiso, ‘Vosa irouto oirato ogoeparo viiva ora keripato, oire ra rerapa aioa vateri. Ora vosa uuko regapaparo, ra rera vateri uukoa. Ari ita, vosa oisi pierivora rerapa, ora sovoro rara rerare kasiraope rugooa oiso osa tuituia ariioro rera varaarore vuria rugooro.’

<sup>21</sup> Ora opeita vuri vovou vo pitupituaropa vasepata, oiso ra visii-ia puteve rutu ora rigaoro. Viapau rutu. Oa-ia vao vuri vovou uvui iraopatai ra va-ia pute iraopata rutu vao vearo vovou raga purapaoro.

## 13

### *Uvui Iraopavie Ra Gavman Reroaro Toupape*

<sup>1</sup> ♦ Vigei rutu vao-ia uvuipavie ra gavman varaaro reo goruro sirova vearovira utu iraopavio. Vosa viapau Pauto gavman vai tovorevori vo-ia, oire ra viapau oiso toupareve irai. Ari ita, Pauto voeaopa gorua vatepareveira, oiso ra gavman vo kovoaro purapaise vigeipa. <sup>2</sup> Vosa iroutoa vai ora kaureoparo gavman tapo, ira vaova tapo ora kaureoparovere oa tovoreva Pauto. Oa-a eva vituaro rera raga ora rerare tavaerovere vo rovirieipa voki-ia. <sup>3</sup> Uvare oirara vearovara purapaiseira, uva viapau oiso uriripaaveira gavmanpa. Oea raga ita-a evoea oea vuria purapaiseira. Oire vosa ruipapata oiso ra gavman tapo toupata rutu uriri asavira, uva uvuipatai ra vearo pitupituro rutu purapata. Opitupituro-a evara oara-ia uvuiparo ra vara iava visii vaisiaraaro kae piepareve. <sup>4</sup> Voeao oea gavmanpa kovopaive oea oiso rutu toupaiseira, Pauto kovopa iraraaro. Oa iava vearovara karekepapeira rutu visii rutupa. Ari vosa vuriara purapata, oire ra vara iava rera asavira uriri iraopata. Aue iava uvare torevokovira rutu visii vorirevere varao-ia visii varaaro vuriara. Uva oisi eisi pieoro Pauto vo kasipuaro oirao pierere, voeao-ia oea vuriara purapaiseira. <sup>5</sup> ♦ Osa iava uvui iraopatai ra gavman vo reoroaro sirova vearovira rutu utu iraopata. Ari ita, viapau oiso vao raga-ia, vo osa Pauto vo kasipuarore rugoopaoro vearovira gavman varaaro sirova utupata. Easi vao rutu tapo-a, vo osa ora visii vo rugooroar eveipaoro vara-ia taraipata oiso, Vearo vovou-a vao-ia.

<sup>6</sup> Oiso osa vao tapo vearpai osa takis vatepataveira gavmanpa. Eake iava? Uvare gavmanpa kovopaoro Pauto vo kovoaro purapaiseira voeao oea goruvira gavman vo kovoaro purapai. <sup>7</sup> ♦ Oire ra takis vate iraopata voearopa oearoa visii arepaive oiso, oai

◊ 12:13: Ro 15:25; Hi 13:2   ◊ 12:14: Mt 5:44; Lu 6:28   ◊ 12:17: Pro 20:22; 2 Ko 8:21   ◊ 12:19: Lev 19:18

◊ 13:1: Ta 3:1; 1 Pi 2:13; Jo 19:11; Dan 2:21   ◊ 13:5: Ekl 8:2; 1 Pi 2:19   ◊ 13:7: Mt 22:21; Mk 12:17

gavmanpa, ari oai kaunselpa. Osa ragavira eisi oiso opeita iravu ragapa vateoro iravu vo arearo uvu ragata. Viapau rutu. Asi uvuipatai ra voea rutupa ora avivike iraopata voea vo areroaro uvupaoro.

#### *Apeisi Ragavira Uvuipavie Ra Reo Goru Sirova Utuvio*

<sup>8</sup> ✩ Vosa irou irara vigeipa eake kovo vateive, oire ra ikauvira vo kovo opesi piepe va puraoro. Ari Pauto okovoru raga rutu vaterevora vigeipa vao oearovupa siraopasa. Okovo-a vao viapau rutu uvuipai oiso ra va opesi piepe. Ari ita, uvare oiso toupai vo osa irouto ro ira oisi vo kovo purapareve vearovira rutu, eera-a ira Moses vaaro Reo Taisi sirova vearovira utuparoveira. <sup>9</sup> ✩ Uvare Moses vo rigato purareva oiso-ia, ‘Opeita ora visiiva otopata, ora opeita oira upopata, ora opeita kavirupata, ora opeita riiriipata,’ ora varao tapo oara katakataivira toupaive. Oreoroa rutu varao takuvuaro oiso purapapeira, “Iravivupa siraopau oiso rutu osa ora viipa siraopauveira.” <sup>10</sup> ✩ Vosa iravivupa siraopata, oire ra viapau oiso suria vai purata rera-ia. Vo osa oisi eisi piepaoro Reo Taisiro rutu rorookaro-ia sirova vearovira utupata. Aue iava rara vo reoro rutu varao takuvuaro-ia vearovira rutu utupata oearovupa siraopaoro.

#### *Uvui Iraopavie Ra Torevokovira Vokape*

<sup>11</sup> ✩ Osa vearovapeira vosa oisi va purapape vao-ia. Uvare taraiapavioveira oiso Ovoiopa Voki-a vao oa tutuu piepaivoi. Oire ra opeita tapurisivira toupata uusi rorovira. Viapau. Ari kaiporivira rutu toupata, vo rara rera oirao pie rovoera oiso rugorugoovio, Utupavira rutu voreroverea igei ousa. Osa oiraopavira rutu-a vo vokio-ia vorepa voki rera vaaro oai-a kareroverea, oapa tutuu pievoi rutu. <sup>12</sup> ✩ Rupapa tutuu piei, oa iava aviua sikereresa tutuuvoi. Osa iava uvui iraopavie ra varao kavupe oara purapapeira vo rupa-ia. Vo osa oisi oarai purapape, oire ra va iava oirao pie vovou-ia pitupaoro ora vigei raga ora virivaripavio Pautoa raga-ia raripaoro vo osa aviavia-ia vokapape. <sup>13</sup> Vigei vao-ia vigoa aviavia-ia toupapeira. Osa iava uvui iraopavie ra torevoko vovouro purapape oiso purapaoro, Opeita vureipata spakpaoro, ora opeita riako vuravurapata, ora oira otopa pitupitu purapasa. Opeita arii asavira vuri pitupituro purapata. Opeita raivaro taraapata oearovure oisore ra voea upopata voraro voea riiriipaoro. <sup>14</sup> ✩ Ari ita, Turaro raga Jisas Krais ira-ia uvuipatai ra rera arepata rera vo goruarore va-ia ora virivaripasa vuri vovouro asavira. Oire uva vo goru-a eva oa raga-ia uvuipatai ra kokarapa vovou putepata ora visii iava vo osa visii ou ragapaise vo vovou.

## 14

#### *Opeita Araoko Irara Oavisii Vo Pitupituaro Rovirieipata*

<sup>1</sup> ✩ Iravu oirato ira airevi raga Krais oirao pieparevorao, ira oisoa viapau taraiparo aue-ia oirao piea. Vosa ruipaparo visii tapo tousa, ra vearovira rera pau pieta. Ra opeita rera taraiaro-ia vakuvakupata ora piopiopaoro vo tarairo rera vaaro aue-ia oirao piea. <sup>2</sup> ✩ Oeavu oirara oea goruvira rutu oirao piepaiveira vore Pauto, oa iava oaravu rutu aiopaveira oaiorovu rutu. Ari oeavu oea varu arapa kavupaveira aue raga aioparo osasararovu rutu aioara voeao oea viapau goruvira Pauto oirao piepaiveira. <sup>3</sup> Ro ira orekerovu aiopareve, ira viapau uvuiparoi oiso ra eera akaipa piepareve ira viapau oiso evo pitupitu sirova utuparoveira vara aiopaoro evara. Oire uva rera ro ira varu arapa kavupareveira, ira viapau uvuiparoi ita ra eera akaipa piepareve, ira osasararovu rutu aioara aiopareve. Eake iava? Uvare Pauto vaiterei rutu-ia vaeavira vearo vaisi rutu purare. <sup>4</sup> ✩ E roviriei vovou irara rutu-a visii? Oa iava uvuipatai ra iravu voeaaro kovopa irara rovirieipata? Viapau. Ari, voea raga reraaro turaro voea vo pitupituroaro rovirieirevere voeare oiso puraoro, “Vao vearovai,” ari “Vao vuripai.” Uva oiraopavira rutu-a va-ia vao oa vearovape voeapa oa rutu reipere voeapa, uvare voea tauvaparevere Turaro va-ia.

✩ 13:8: Ga 5:14; Kl 3:14   ✩ 13:9: Eks 20:13-14   ✩ 13:10: Mt 22:39-40   ✩ 13:11: 1 Ko 7:29   ✩ 13:12: 1 Jo 2:8; 1 Te 5:8   ✩ 13:14: Ga 3:27; Ef 4:24   ✩ 14:1: 1 Ko 8:9, 9:22   ✩ 14:2: 1 Ti 4:4; Ta 1:15   ✩ 14:4: Je 4:12

<sup>5</sup> Oavu-a vao-ia ovoovoa iravu iava oirato, ira ovokivu reesipareveira oiso purapaoro, “Rei voki rutu-a vao-ia, ovokiapa viapau oiso ovokirovu reipapeira.” Vo osa iravu oiso rugorugoopaoro oiso puraparo, “Viapau oiso ovoki reipai. Ari vo vokiro rutu varao kataivira raga toupai.” Oire ra oisi raga roopavira rugorugoopaoro ora vaiterei vovouaro-ia oiso puraparo, “Tepa vo reoro goru piepasi. Auepa teapi vaiterei iava vo rugooro tariri ragapape.” <sup>6</sup> Oearovu ovokirovu rei piepaiveira, oiso ra va iava Pauto vaisiaro kae piepaive vo vokiro-ia rerapa avivikepaoro. Vo osa oearovu osasararovu rutu aiopaiseira aioara, varao oara vaterova Pauto voeapa. Evara-a oara-ia rera-ia vuurapa vaisi purapaiveira rera vaisiaro kae piepaoro. Vo ovusa oearovu voeao oea aioara rutu iava oaravupa kavupaiseira, uvare oiso rugoopaaveira, Pauto vo vovouaro sirova utupaiei. Ari ita, uva voeao tapo-a oea Pauto vaisiaro-ia vuurapa vaisi purapaiveira vara-ia aioara rerapa avivikepaoro ita.

<sup>7</sup> Viapau oiso irai vigei iava ira epao ro ira tootoopaoro ora rera raga-ia rugorugoparoveira. Ora vosa irai vigei iava kopiilo, ra viapau uvuiparoi ra Pauto vo Saraaro iava kosiro viro. <sup>8</sup> Ari ita, vao vituaro-ia osa tootoopaoro toupapeira rera ragapa ro vigei reraaro Turaro. Ora oiso tapo osa kopiipaoro rera raga sirova utupavioveira. Uvare vosa toootopavio Turaro ragapa, ora kopiipavio rera sirova utupaoro, uva oiso toupapeira, Vigei vao rera voeao Turaro. <sup>9</sup> Oiraopavira rutu oiso osa Krais kopiicroepa, ora vorevira toreroepa tootoooro. Oiso ra voearei rutupa turaroro oiso, Voeao oea toootovira toupaive, ari voeao oea kopiiaeve.

<sup>10</sup> ♫ Visii vao-ia eake-a vao oapa araoko irara oavisii toga ragapataveira oaravu ia reoara? Ora eakere voeapa voeao araoko irara oavisii reasipataveira voea akaipa piepaoro? Uvare vigei rutu Pauto ruvara-ia torevioree. Ra voa rera raga vigei rovirieireve varao iava vigei vo vovouaro. <sup>11</sup> ♫ Uva va-a eva oa-ia taraipavio oiso, Oiraopa rutu, uvare vao Tugoropa Vuku oa-ia oiso puraroepa Turaro, ‘Ragai-a toootopato. Oa iava uvuiparai rutu oiraopavira visii tavipasa oiso, Oirara rutu vo rasio-ia ragaipa avivikeaverea rekupaoro ragai iare. Ora oiso tapo osa voeao rutu ragaire oiso puraaverea, Oiraopatoa rutu Pauto.’

<sup>12</sup> ♫ Oa vituaro-a vao-ia vo pitupituro-ia vigei varaaro oara kosi piepere ora vigei iava Pauto tavitavipaoro.

### *Opeita Araoko Irara Oavisiire Orekerovu Purapata Ra Vara-ia Voea Kove Piepata*

<sup>13</sup> ♫ Opeita oreorovu purapata touvira oearovu visii iava togapaoro. Ari visii vo pitupituroaro tavariopaoro vatatopo iraopata oiso, teapi orekerovu purapata vuri vovouro sirova araoko irara oavisii piro piepaoro. <sup>14</sup> Ro Turaro ira ragai vo rugorugooaro goru pierevora oiraopavira rutu, oiso ra vearovira rutu tarai iraopara oiso, Viapau oiso oaoieie viria vai. Viapau rutu. Ari vosa irouto ro-ia ira oiso puraro, “Oa eva vuripai rutu,” osa oisi rerapa vuripape rutu. Rera-a eera oiso rutu toupare osa voeao oearoa oaravupa aioara kavupaiseira. <sup>15</sup> ♫ Ari ita, vosa vo aioro aiopata oarare oisoa oiso purapaave, “Vuriara,” oire ra vo vukuro kekepaoro araokoto oavisii riroa vavata oupare visii vo pitupituro-ia. Vo osa oisi piepata, ra viapau oiso rerare rugorugoopaoro siraopata ro araokoto oavisii. Opeita iravu piro pieta oisi vara aiopao vo ora visii vo ruipaaro raga sirova utuoro. Uvare Krais kopiicroepa rera tapo eera. <sup>16</sup> Vosa oiso taraipata vao-ia, Vearo pitupitu purapeira. Oire vatatopopata, teapi oeai visii vo pitupituro kekepaoro oiso va vaisiive “Vuri pitupitu vao-ia.” <sup>17</sup> Vao iava Pauto vo Saraaro vituaro. Viapau oiso varao iava-a oara aiopapeira ora varao oara-ia ukaiopavioveira. Viapau. Asi akukuara raga evara. Ari varao-ia reipara rutu oiso-ia, torevoko pitupitu-a vao-ia, ora vao gavaure tou oearovu tapo, ora oiso-ia ra rorupata vao iava osa Tugoropato Uraurato vigei tauvapareveira. <sup>18</sup> Oire uva irouto ira vara evara purapareveira oiso-ia rerare ro Krais rugorugoopaoro, ira-ia eera rorupareveira Pauto, ora oiso tapo vo osa oearovu rera-ia vearo vaisi purapaiseva raga iava rera vearo pitupitu.

---

◊ 14:10: 2 Ko 5:10   ◊ 14:11: Ais 45:23; Fl 2:10-11   ◊ 14:12: Mt 12:36   ◊ 14:13: Mt 7:1; 1 Ko 8:13   ◊ 14:15: Ef 5:2; 1 Ko 8:11

<sup>19</sup> ✩ Oire uva oisi-a eisi osa ragavira uvui iraopavie i ra vearo vovou purapaoro akeakepape oearovuva gavaure vovou purapaoro. Oa-ia uvuipavie i oearovu varaaro oirao pie vovouro goru piepape rutu. <sup>20</sup> Pauto ruipaparoveira rutu vigeipa oiso ra ora rera vo kovoaro purapareve vo vigei sopaaro-ia. Uva viapau uvuipavie i oiso ra rera vo kovoaro tekipape varao ragare rugorugoopaoro akukupapa aioro. Iu, osa eisi vearpai oiso ra osasararovu rutu aiopape aioara, uva vuripai vosa oisi piepaoro oearovu vovouaro piro piepape voea kasipu piepaoro vara-ia varao aioara. <sup>21</sup> Vosa oisi toupaivori, ra vearpape rara viapau oiso varuara vai aiopata, ora aue wainara vai-ia ukaiopata, ora orekerovu vai rutu purapata, varao oara-ia araoko irara oavisii vai kove piepata. <sup>22</sup> ✩ Ora varao rugorugooara ora visii varaaro, oara-ia uvuipatai ra ora visiipa vara roroio piepata rutu vo rara Pautoa raga tapo ora reopata varare varao aioara rugooopaoro ora orekerovu rutu. Auere ra rorupareve, ro ira ora rera raga viapau ora togapaoro ora rera ragare rugooparo varao-ia, oara-ia taraiparo oiso, Vao torevokopai vo Pauto osireiaro-ia. <sup>23</sup> Ari vosa ora rera raga vo vovouaro-ia viapau vearovira tarai rovoro, ra oiso rugooparo “Torevokopai eke viapau,” oiso ra vara aiopareve. Oire vosa vara sirova utuparo, oire ra rerare vuripape, vo rara viapau oiso va oirao piepareve oiso purapaoro, “Torevokopai rutu vo aio.” Oiraopavira rutu oisi eisi oiso-ia vosa visii vao orekerovu purapata, ra vara iava viapau Pauto oirao piepata, oire eva-a oa vituaro iava visiire vuripai rutu.

## 15

### *Uvui Iraopavie i ra Krais Vo Pitupituarore Rugorugoopavio Oearovu Ruture Rugoopaoro*

<sup>1</sup> ✩ Vigei vao vigoa goruvira rutu Krais oirao piepapeira, vigoa uvui iraopavioveira oearovivu tauvapasa, oea varaaro oirao pie vovouro raveravepapeira. Ora vigei raga-ia vovoupa pitupituro tapo kavu rovopape ra oearovivu kapokaporopape voea tauva rovopapaoro aue-ia siraoa vo vavataaro. <sup>2</sup> Ari ita, vigei rutu uvuipavie i ra katakataivira araoko irara oavi tauvapape voea vo vovouaro varaata piepaoro. Auere ra voea varaaro oirao pie vovouro goruvira rutu torepape. <sup>3</sup> ✩ Uvare viapau oiso Krais ora rera raga-ia rugorugooroepa. Oa-a vao oa iava oiso purapapeira Tugoropa Vuku, ‘Vosa oearovu visii tovipaive visiipa riroa sirao vavata vatepaoro, ragai tapo ita ovavata eva kaeavora visii vaaro.’

<sup>4</sup> Vo reoro rutu-a varao oara Tugoropa Vuku-ia toupaiveira, oara vigei ruture tapo reoreopapeira, oiso ra vearovira rutu vo reo iava taraia oupape. Oa iava uvuipai vigei vo vovouaro varaata piepasa. Ra va iava goruvira rera-ia pitupape raripaoro. <sup>5</sup> ✩ Oiso-ia Pauto-a raga ira uvui iraoparoveira vigei vo vovouaro varaata piepasa ora vigei varaaro rari vovouro goru piepasa. Eera-a ira raga vo goruo vatepareveira vigeipa oiso ra Krais vaaro ovoovoa eveipaoro rera vo vovouaro purapape. Uva eisi osa piepaoro uvuipavie i ra gavaurevira rutu toupape oearovivu tapo katai rugoo raga-ia. <sup>6</sup> Uva uvuipavie i ra oisi ragavira eisi toupaoro katai vaisi purapape oearovivu tapo Pauto-ia vuurapa vaisi purapaoro, ro Pauto, Jisas Krais ro vigei Turaroaro Aitearo.

### *Vearo Siposipo Vao Voeaopa Ratau Tou Irara*

<sup>7</sup> Katai vovou rutu purapata oearovu tapo voearo oearoa visii tapo paupasa uripaaveira. Oiso osa Krais visii piereva ora rera-ia visii tovooro. Oire ra va iava oearovu visii vo pitupituroaro kekepaoro Pauto-ia vuurapa vaisi purapaiive. <sup>8</sup> ✩ Uva visii tavipaavoi oiso, Krais vararoepa vo rasio iare, oisore ra Jiu-pa irara tauvapareve. Vo osa oisi piepaoro vao Reo Ovoi Pauto vaaro oirao piepape. Vo reo-ia oa purareva voearipa vigei aao iraraaro voari rutu tuariri oiso ra voea tauvareve. <sup>9</sup> ✩ Oisore tapo ra ratau tou irara vuurapa vaisi purapaiive Pauto-ia ora rera vaaro riroa siraoa voeapa. Oa iava oiso purapapeira Tugoropa Vuku,

‘Ragai-a vao ragoa ratau tou irara tapo torepaooro vuurapa vaisi purapaaverea vii-ia Pauto. Uva igei rutu eraiovvereia vii vaisiaro kae piepaoro.’

<sup>10</sup> ✩ Oire uva oreovu tapo va iava vao Tugoropa Vuku oiso purapapeira,

---

✩ 14:19: Sam 34:14 ✩ 14:22: 1 Jo 3:21 ✩ 15:1: Ro 14:1; Ga 6:1-2 ✩ 15:3: Sam 69:9; 2 Ko 8:9 ✩ 15:5: Ro 12:16; 1 Ko 1:10 ✩ 15:8: Mt 15:24; Ap 3:25-26 ✩ 15:9: Sam 18:49 ✩ 15:10: Diu 32:43

‘Visii ratau tou irara rorupata evoea tapo Jiu, oea roporeva Pauto ora rerapa.’

<sup>11</sup> ♦ Ora vo reo tapo oa rigatoiva vo vuku sovara-ia vao-ia oa oiso purapapeira,  
‘Ratau tou irara vuurapa vaisi purapata Turaro-ia. Iu, rirovira rutu vuurapa vaisi  
purapata Turaro-ia, visii vao-ia osararovu rutu iava.’

<sup>12</sup> ♦ Ora vao-ia Aisaia oreoa rigatoreva, oa oiso purapapeira,  
‘Ro aaoto Jesi ira oiso toupare osa ikopi, ira iava iravu oiso kovaroverea oiso osa  
airepa sipukao. Ra voa toupaoro ratau tou irarapa turaroparo. Uva rera ragai  
ia raripaaverea vokiara rutu-ia.’

<sup>13</sup> ♦ Oire uva variriparaveira Pautoa iare visiipa, ro ira oiso toupareveira, Visii vararo  
oirao pie vovouro vituaro. Ira uvuiparoveira visii vatepasa gavaure vovou ora roru. Oiso  
ra vara iava visii vaaro rirope rutu vao oirao piea, vo osa Tugoropato Uraurato vo goruaro  
visii sopaaro-ia kovopaise.

#### *Pol Arii Asavira Vo Rigato Purareva*

<sup>14</sup> Araoko irara oaa, oiso rugorugooparai visiire, Visii vo pitupituroaro-a vearoara  
rutu, ora visii vo rugorugooroaro roroioara. Oara-ia uvuipatai ra oearovu vearovira  
tarai piepata ora visii iavapa irara. <sup>15</sup> Ari ragai vo rigato vao-ia oa puraavoi visiipa arii  
asavira, uvare oiso ruipaparai ra visii rugoo piea visii pore pieoro. Oa vituaro-a vao-ia  
oa iava Pauto ragai reesirevora vo kovo vao purapasa. <sup>16</sup> ♦ Oiraopavira Pauto ira ragai  
oiso pierrevora oiso-ia, Krais Jisas-pa kovopato ragai voeaopa ratau tou irara. Uvare ragai  
vo kovoaro oiso rutu toupai, Voeapa siposipopasa vao iava Vearo Siposipo Pauto vaaro.  
Auere ra va uvuivora, uvuiae ra Pauto ora rerapa voea vorevira oureve voea-ia roruoro,  
voeo oea pasiko piepareveira Tugoropato Uraurato ora rerapa Pauto.

<sup>17</sup> ♦ Vo osa Krais tapo ora tavospaoro oiso purara vare vao ragai vo kovoaro,  
“Vearopai rutu” vo kovo oa purapaaveira Pautoa-pa. <sup>18</sup> Oiraopavira viapau oiso ragai  
raga vo kovoaro-a. Ari vo kovo purarevora Krais vao-ia ragai-ia, oiso ra va kekepaoro,  
ora va uvupaoro ragai vo reoaro ora voea iava sopaura oaiive porepaive Pauto iare  
voeo ratau tou irara. <sup>19</sup> ♦ Iu ita, osa oiso ragai pierrevora, oiso ra ravaa reesiara vai  
purapaa, ora ovovoara vai. Ora oiso tapo osa ragavira Tugoropato Uraurato ragaipa  
gorua vaterevora. Uva oiso ragavira piepaoro viripaavora voraro rutu Vearo Siposipo  
oiraopavira rutu kosi piepaoro Krais iava. Uva Jerusalem iava rovoraepa oiso rutu  
rekasisa Ilirikam oisi vo kovo purapaoro. <sup>20</sup> ♦ Aue iava uvare oiso ruipaparaveira ra  
uvaroi ouruiroi-ia oearoi tarai piepaa va iava vao Vearo Siposipo Krais iava, voraro uvaroa  
viapau irai voea tarai pie rovoive rera iava ro Krais. Uva oisoreasiparai ra oeai okovoiaro  
topa piea. <sup>21</sup> ♦ Vao-ia oa iava oiso purapapeira Tugoropata Vuku,  
‘Vo uva viapau Jisas Krais vo siposipoaro viapau uvupaive, uva-a evoa va uvuiverea  
taru. Vo uva viapau va ou rovoive, uva-a evoa uva voea iava rugorugooara taru  
roroioopere.’

#### *Rom Iare Tavetea Ruipa Ragaparoepa Pol*

<sup>22</sup> Eisi osa ragavira ragai vo ruipaaro toupaiveira. Oa iava voraro rutu viripaaveira.  
Uva vara-a varao oara-ia ora pugu pieparaveira. Oa iava viapau uvuiparai oiso ra visii  
iare tavetea evoa. <sup>23-24</sup> Uva vo vokio ragai vo kovoaro opesierao voraro uvarovu. Uva  
ragai vo ruipaaro-a vao oa ouavora voari tuariri oa sirova utusa vatatopoparai, oiso ra  
evoare tavetea visii iare. Ari ita, Spen-ia ruture avaravere, vo rara visii tapo tou rovoa  
evoa Rom-ia. Oire uva visii rutu iare taveteavora, vigei rutu rorupere. Ra va isivaaro iava  
ragai tauvaoro pasi ragai vai topa pieta vosa avara.

<sup>25</sup> ♦ Vaviopavira ava rovoparai rara Jerusalem iare voeaopa vatevateara vate rovosa  
oirao pie vovou irara. Varao oara guruiva vatevateavira oearovu voeapa. <sup>26</sup> ♦ Uvare  
lotupa irara oea ratauvira toupaiveira Masedonia Provins ora Grik taere, oea ora voea  
vo ruipaaro raga sirova utuoro monia guruiva voeaopa apota irara Pauto voeaaro iava,  
oea Jerusalem-ia toupaiveira. <sup>27</sup> Uva roruiva, vo uvare voeapa oisi pieiva eisi. Ari viapau

◊ 15:11: Sam 117:1    ◊ 15:12: Ais 11:10    ◊ 15:13: Ro 14:17    ◊ 15:16: Ap 9:15    ◊ 15:17: Fl 3:3; Hi 2:17

◊ 15:19: Ap 19:11    ◊ 15:20: 2 Ko 10:15-16    ◊ 15:21: Ais 52:15    ◊ 15:25: Ap 19:21    ◊ 15:26: 2 Ko 8:1, 9:2

uvuipaai ra apota iraravire ovaupaave, uvare voeao ratau tou irara Vearo Siposipo ou rovoiva Jiu ruvara-ia. Oire uva oisi ragavira ora tuutuupaoro uvuipaai ra vearovara vatepaive vorerivira voeaopa Jiu.

<sup>28</sup> Uva va guruivvorao oa iava va topa piepaavoi voeapa rara voeao oea Jerusalem-ia toupaiveira. Uva va isivaaro iava voa kavuoro Spen iare avaravere visii iare tavete rovopasa tou visivi. <sup>29</sup> Taraiparai oiso osa urioparai visii iare vara rutuva vearovara, oara toupaiveira vo Krais vo viraakoaro sovara-ia. Oara visiipa vatesa urioparai.

<sup>30</sup>  $\diamond$  Araoko irara oaa, katai vovou raga-ia toupataveira Turaro Jisas Krais tapo, ora tapo vo uvare Tugoropato Uraurato vigei tauvapareveira vo oearovupa siraopasa. Oa vituaroa vao-ia oa iava visii are iraopaavoi oiso ra vigei rutu goruvira variripavio Pautoa iare. Ra va iava ragai tauvapareve. <sup>31</sup> Variripata oiso ra viapau ragai vuri pieive voeao Judia-ia tou irara oirao pie vovou asa irara. Oa iava voea asavira ragai virivarirevere rara Pauto. Ora vaore tapo variripata voeaopa oea Jerusalem-ia toupaiveira oirao pie vovou irara. Oiso ra va iava vearovira rutu vao tauvaa ragai vaaro ouive. <sup>32</sup> Oire uva va vao isivaaro iava Pauto vo ruipaaro sirova utuoro urioravere visii iare rorupaoro rara. Uva visii tapo touoro reareaa oua vearovira rutu.

<sup>33</sup>  $\diamond$  Pauto vigei rutupa gavaure vovou vatereve. Uva variriparai auere ra visii tapo toupareve. Ovoiei.

## 16

### Pol Vearo Voki Purareva Ora Rera Vate Iraraaropa

<sup>1-2</sup>  $\diamond$  Iriavuei oira vaisiaro, Fibi oirao pie vovouva. Iria vo uruio-ia toupaeveira Senkria urui lotupa kovo-ia pitupaoro. Iria oisoa riro irara rutu tauvapaeve ora ragai tapo. Vearo vovouva rutu. Uva va-a eva oa-ia oirapa vearo vovou purata ita visii vao Pauto voeaaro rutu, vo rara urioo visii kekesa ita, uvare Turaro oiraaro-a oira eira.

<sup>3</sup>  $\diamond$  Ragai-a vearo voki purata vaitereopa Akwila avukarei ora Prisila. Aiterea ragai tapo tavosivira kovopasiveira Krais Jisas vo kovoaro puraoro. <sup>4</sup> Aiterea ora vaiterei iava tootooa oaei piresivora ragai tauvaoro. Osa iava vearo vaisi purapaavoi vaiterei-ia. Ari viapau oiso ragai raga-a, ari voeao rutu tapo ratau tou irara oea lotu purapaiveira.

<sup>5</sup> Ragai-ia vearo voki purata voeao rutu iare oea lotupaaveira vo avukarei evaiterei vo kepaaro-ia.

Ora oiso purata vearo voki ro iare Epinitas ragai vatetoaro rutu. Eera rovopato-a rutu voeao iava vo-ia Esia Provins. Ira Krais oirao pie rovoreva rutu.

<sup>6</sup> Ora ragai-ia vearo voki purata o iare Maria. Iria vearo kovo rutu purapaeveira kasivarivira visii rutupa.

<sup>7</sup> Ora vearo voki purata vaitereo iare Andronikas vaio ora Junias. Uvare igei peva-a vao Jiu iava igoa vase tuukepa kepa-ia touiova. Aiterea-ia vaitereo taraipaaveira aposel irara, uvare rovovira rutu Krais oirao pie rovosiva. Oire uva vaiterei isivaaro iava ragai ita.

<sup>8</sup> Ragai vo reoaro topa pieta vearo voki ro iare Amplietas. Irapa siraoparaveira rutu, uvare Turaro reraaro-a rera.

<sup>9</sup> Ora vaitereo iare tapo vearo voki purata aiterea iava ro-ia Eban ira Krais-pa kovopareveira oiso osa vigei. Ora ro Stekis ragai vatetoaro rutu.

<sup>10</sup> Ora ragai vo reoaro topa pieta vearo voki ro iare Apelis, uvare rera-ia oearovu taraipaaveira, vo uvare rera vaaro oirao pie vovo oa goruvira rutu Krais-ia toupaiveira.

Ora vearo voki purata vo aao iare, Aristobyulas aao.

<sup>11</sup>  $\diamond$  Ora ragai vo reoaro topa pieta vearo voki ro iare Herodion, uvare saratoaaro-a Jiu iava rera. Ora voeao tapo iare oirao pie vovou irara vova Nasisas aao iava voea.

<sup>12</sup> Ora vearo voki purata vaireo iare Traifina vaio ora Traifosa, airea Turaro vo kovoaro purapaereveira.

Ora o tapo iare Pesis iria riro kovo rutu puraeva Turaropa, ragai vatevaaro.

<sup>13</sup> Ora vearo voki purata ro iare Rufas. Uvare vearo vovoutoa rutu-a ro ira roporeva Jisas ora rera iare. Ora o tapo iare aakova iria oiso rutu oisoa toupaeve ragai aakoaro.

$\diamond$  15:30: Ga 5:22     $\diamond$  15:33: Ro 16:20; 2 Ko 13:11; Fl 4:9     $\diamond$  16:1-2: Ap 18:18     $\diamond$  16:3: Ap 18:2; 2 Ti 4:19

$\diamond$  16:11: 1 Ko 1:11

<sup>14</sup> Ora ragai vo reoaro topa pieta vearo voki voeao iare Asinkritas vase ora Fligon, Hemis, Patrobas, Hemas, ora oearovu oirao pie vovou irara, oea voeao tapo toupaiveira.

<sup>15</sup> Ora vearo voki purata vaitereo iare Filologas vaio ora Julia. Ora vo vavuatarevo iare tapo Nerias vavuatarei. Ora voeao iare tapo Olimpas vase, ora voeao tapo Pauto voeao oea tapo toupaiveira.

<sup>16</sup> ♦ Ora visiiva sekanta visii varaaro sirao vovouro karekeoro. Ora voeao rutu lotupa irara Krais voeao oea oiso purapaai visii ruture, “Vearo voki rutu.”

#### *Pol Ovoiopa Reoro Vatereva Voeapa Voea Goru Piesa*

<sup>17</sup> ♦ Araoko irara oaa, visii vosi iraopaaivoi voeao asavira. Oiso ra voeapa ora vatatopo pie iraopata, teapi visii sikasikapaivere. Ra va iava oearovu visii iava oirao pie vovouroaro piro piepaive. Uva oiso visii tavipaavoi ra tauaivi rutu voeapa toupata, oea Vearo Siposipore kaureopaaveira vao-ia oa ou rovotavora. <sup>18</sup> ♦ Voeao raga ita oea oearovu vo vovouroaro piro piepaiveira, oea viapau oiso Krais vo kovoaro purapaiveira ro vigei reraaro Turaro. Oire uva va purapaoro ora voeao raga vo ruiparoaro sirova utupaaveira. Ra vo reo purapaive oa vearovira rutu gurukopai, vo osa viapau oiraopa reo-a va eva. Oire uva oisi-a eisi osa purapaoro voeao keakeapaiveira oea viapau oiso oiraopa reorria taraipaave rutu. <sup>19</sup> ♦ Oearovu rutu visii-ia taraipaaveira visiigoa Krais vo sипосипоаро ou ovoitava. Oa iava roru iraopaaivoi rutu. Uva oiso ruipa iraoparai ra vearovirā rutu roroio iraopata varao-ia vearovira pitupituro taraipaoro. Oire ra vuri pitupituro vatawata iraopata varapa reasipaoro. <sup>20</sup> ♦ Pauto-a raga vigei vaaro gavaure tou vituaro. Ira raga Seten-ia putasa aueparoveira, oiso ra rera tovopareve vo visii kokotoaro reroaro. Ovoiei.

Jisas Krais raga visii vatereve rirovira rutu vova rera vaaro-ia tauva, vo osa visii varaaro-ia rugorugooara toupareve.

#### *Oearovu Vearo Voki Puraaepa Voeaore Rom-ia Tou Irara*

<sup>21</sup> ♦ Timoti ira visiire vearo voki puraparevoi. Ira ragai tapo vokapaoro kovopareveira. Ora voeao tapo Lusias vase, ora Jeson, ora Sosipata Jiu iava vo uvava raga.

<sup>22</sup> Oire ora ragai-a vao Tetias ragoa tapo visii iare vearo voki purapaavoi, uvare kataitoa raga Turaro oavi vigei reraaro. Ragoa Pol vo reoreoaro rigatoavoi visiipa vo pasio sovaria.

<sup>23</sup> Oire uva ragai-a vao-ia Pol ragoa vo toupaavoi Gaias vo kepaaro-ia. Uva rera tapo visii iare vearo voki puraparevoi. Ira vo kepaaro-ia ora gurupaaveira lotupa irara voa lotupasa. Ora vaitereo Erastas vaio ro ira gavman vo moniaro tokipareveira vo uruio-ia, ora ro Kwotas vigei araokotoaro. Aiterea rutu tapo visii iare vearo voki purapasivoi.

<sup>24</sup> [Pautoa iare variriparai visiipa, oiso ra rirovira visii tauvareve Turaro Jisas Krais aue-ia vereopa vovou. Ovoiei.]

#### *Pol Vuurapa Vaisi Purareva Pauto-ia*

<sup>25-26</sup> Vigei rutu vuurapa vaisi purape vo Pauto vaisiaro kae piepaoro. Ro ira uvui iraoparoveira visii goru pie iraosa, oiso ra Krais-ia raripata. Oiso osa purapapeira vo Vearo Siposipo-ia ora vo ragai vo reoaro-ia tapo vao oa vateavora visiipa. Vao Vearo Siposipo oa vao iava tavitavipapeira oa rovoa rutu-ia vatauepa. Oire uva vo vokio-ia Pauto va roroiovira karekeparevorao. Vo uvare va iava profet irara rigatoara pura rovoiva voari tuariri, ora vo uvare tapo Pauto voeao sипосипоаро irara rutu arureva vorarore osararovu rutu iare va iava vao-ia sипосипоа. Oa-a vao-ia oa vituaro iava uvuipavie ra goruvira rutu Krais oirao pie iraopape. Ora va tapo vosa Pauto vo vovouroaro rutu-ia vearovira utupaoro. <sup>27</sup> Vigei reraaro Pauto kataitoa raga. Ari viapau oiso irai epao, ira rera vo taraiaro-ia putepareveira vao-ia reia rutu. Ari ita, uvare Jisas Krais raga va-a vao vituaro oa iava Pauto-ia vuurapa vaisi pura iraopapeira, vo rara rera vaisiaro kae piepape opesi asavira rutu. Ovoiei.

Eisivi raga, ra opesipe ragai vo reoaro.

Ragai-a vao, Pol.

---

◊ 16:16: 1 Ko 16:20; 1 Te 5:26   ◊ 16:17: 1 Ti 1:3, 6:3; 2 Jo 10   ◊ 16:18: Fl 3:19; Kl 2:4   ◊ 16:19: Ro 1:8; Mt 10:16   ◊ 16:20: Jen 3:15   ◊ 16:21: Ap 16:1, 13:1, 17:5, 20:4

## 1 KORIN Irapa Reoro Vo Vukuo Iava

Pol vo pasio rigatoreva 56 o 57 yia Jisas vo kavauaro isivaaro iava. Ira va siporeva voeaopa lotupa irara oea Korin urui-ia oisoa toupaive. Uva vo urui Korin urui riro urui rutu, ouruia-ia osasararovu rutu vuri pitupituro oisoa toupaive. Oa iava vo pitupituro iava vuriara oisoa Pol akepaive. Eisi osa iava vara iava aviavi pievira rigatoreva voeao oirao pie vovou irara tauvapasa, oiso ra viapau vuria purapaive evo urui-ia toupaoro.

Oire uva goruvira Pol voea tavitavireva varao iava tokarasiara, ora kuuvu irara tisa irara, ora otopa pitupituro iava, ora aioara varao oara tugoropai aio arapa, oiso ra viapau vuriara vai purapaive vara-ia evara. Uva varao tapo torevoko pitupituro oara iava rigatoreva oiso-ia, ora oupa pitupitu (1 Ko 7:1-40), ora komunion (1 Ko 11:20-34), oearovivupa siraopa vovou (1 Ko 13), ora lotu purapasa Tugoropato Uaurato varaaro vatevateara kovo piepaoro torevokovira (1 Ko 12:1-14:40).

Evo reo isivaaro iava oreorovu purareva vao iava osa oirara vorevira toreaverea kopii tapi iava vo utupaua (1 Ko 15:1-58).

1. Vo pasio iava aviavi pie reoro, ora vearo vaisi purareva Pol, 1:1-19.
2. Lotupa irara ora roopa pieaepa oeavu irapa irara vaisioro oiso-ia, Pol, ora Apolos, ora Pita, 1:10-4:21.
3. Otopa pitupitu oiso vaisireva Pol, Vuri pitupitu rutu. Ora oiso, teapi araokotoara iava gasiri kortua-ia vao oa purapaiveira voeao oirao pie asa irara, 5:1-7:40.
4. Kristen irara vo pitupituroaro iava vo osa oearovu tapo toupaiveira voeao oirao pie asa irara, 8:1-11:1.
5. Lotupa pitupitu iava oa-ia uvuipaa oirara ra Pauto roru piepaive, 11:2-14:40.
6. Torearo iava Jisas eisi raga osa toreaverea oirao pie vovou irara vo Jisas, 15:1-58.
7. Siraao vate puraiva voeaopa Kristen irara vo Judia Distrik-ia, 16:1-4.
8. Pol vo ovoiopa reoro purareva ora tapo vearo vokireva, 16:5-24.

<sup>1</sup> ♦ Ragai-a vao Pol Jisas Krais reraaro aposelto. Ragoa roporeva rera vo kovoaro kaesa Pauto ora rera raga vo ruipaaro sirova utuoro. Oa iava vegei vao vo pasio rigatopavevoi ora ro-ia Sostenis vigei araokotoaaro. <sup>2</sup> ♦ Uva vo pasio vao-ia visiipa lotupa irara visiigoa Korin urui-ia toupataveira. Visii vao visiigoa roporeva Pauto ora rera iare, oiso ra oiso rutu toupata, Rera voeaaro rutu torevoko vovou irara. Visiigoa Krais Jisas tapo ora tavositaepa ora voearo rutu tapo uvarovuva, oearoa ro Turaro vigei rutu Turaroaro Jisas Krais vaisipaiveira variriara purapaoro. <sup>3</sup> ♦ Uva Pauto Aite arepaavoi vaiterei ora Turaro Jisas Krais, oisore ra visii vatesi tauva ora gavaure vovou.

### *Pol Vearo Vaisi Purareva Pautoa-ia*

<sup>4</sup> Vokiara rutu-ia vearo vaisi purapaaveira Pautoa-ia visii-ia rugorugoopaoro, uvare vereopa vovou rutu purapareveira visii tauvapaoro Krais Jisas vo goruaro iavirava. <sup>5</sup> ♦ Ari ita, vo osa Krais tapo ora tavosivira toupatavoiva, visii-ia vearopara rutu karekeepa oiso osa varao, vearpa rugorugooro ora varao tapo oiraopa reoro rutu kareke piepasa. <sup>6</sup> Uva oisi-a eisi osa iava visii vo touaro oisi eisi oirao piepaiveira rutu vo reo vao-ia Krais iava oa vateavora visiipa. <sup>7</sup> ♦ Oa iava viapau oiso oaravu avu vaipa viraakoara vai apotavira toupataveira, vo osa tuevira toupata reore vigei reraaro Turaro Jisas Krais, vao iava osa vorevira voreroverea vo rasio iare. <sup>8</sup> Oiraopavira rutu ira visii vo vovouroaro goru pieparevere taru vo ruture rekasisa Ovoiopa Voki-ia vaore, vo osa vo voki-ia eva Jisas Krais vo vokiaro Pauto visii kekeoro visiire oiso puraroverea, “Roroio vovou irara raga visii. Visiigoa-ia viapau vuriara vai.” <sup>9</sup> ♦ Ari ita, viapau oiso Pauto tavarioa vai epao Oa iava uvuipavie rutu ra Pautoa-ia rari iraopavio rera oirao piepaoro. Ro ira visiire keeraroepa, oisore ra ora tavosita rutu Oviitoava Jisas Krais vigei reraaro Turaro.

### *Lotupa Irara Ora Roopa Pieaepa*

---

♦ 1:1: Ro 1:1; 2 Ko 1:1    ♦ 1:2: Ap 18:1    ♦ 1:5: 2 Ko 9:11, 8:7    ♦ 1:7: Fl 3:20; Ta 2:13    ♦ 1:9: Ais 49:7; 1 Jo 1:3

<sup>10</sup> ♦ Goruvira rutu oiso visii tavipaavoi Jisas Krais vaisiaro goruaroo-ia ro vigei reraaro Turaro oiso, Araoko irara oaa, katai vovou rutu purata vo osa ora reoreopata. Oa iava viapau uvuipatai ra ora roopa piepata. Eisi osa va lava vao visii tavipaavoi oisore ra tavosi visivi rutu toupata katai rugorugoo raga purapaoro, ora katai kovo raga purapaoro.

<sup>11</sup> Aue iava uvare oreorovu uvuavora voea ruvara iava Klowi voeaaro. Oea oiso aviavi pievira ragai taviivora, uvare rirovira rutu kaureo iraopataveira visii vao araoko irara oaa. <sup>12</sup> Uva vo reo eva topa piepaavoi oiso reopaoro visii vaaro vuria. Vao iava osa totoevira roopavira oiso purapataveira, “Ragai Pol vo siposipoaro sirova utuparai.” Ovusa oearovu visii iava oiso purapaave, “Uva eakepa? Ari ragai Apolos vo siposipoaro sirova utuparai.” Ovusa oearovu oiso purapaave visii raga iava, “Ari ragai Pita vo siposipoaro sirova utuparai.” Vo osa oearovu goruvira oiso purapaave, “Ari ragai Krais vo siposipoaro sirova utuparai.” <sup>13</sup> Oire uva oisi-a eisi osa piepaoro visii raga Krais roopa piepataveira, oisore ra oearovu rutu roopavira rera-ia pitupaive. Uva visii akepaavoi oiso, E apeisi-a? Pol kotoiva evao parikou-ia oiso ra visiipa kopiiro? Uva apeisi-a? Baptaisa outavora rera vaisiaro-ia Pol, eke? <sup>14</sup> Oire uva Pauto-ia vearo vaisi purapaavoi vao iava, uvare viapau oiso visii iava iraipa baptaisa vai vateavora. Ari vaitereo ragapa-ia Krispas vaio ora Gaias. <sup>15</sup> Eva-a oa vituaro iava viapau irai uvuiparoi ra oiso puraparo ragaire, “Pol igeipa baptaisa vatereva, oisore ra rera vo siposipoaro raga sirova utupaio.” <sup>16</sup> Aika! Ora rugoo pierai iravure oirato Stefanus ora rera voeaaro. Ari ita, osa vai-a ovauparai vai pasi vo oearoi vai tapore voearo oearoa vaipa baptaisa vateava, eke viapau pasi. <sup>17</sup> ♦ Viapau oiso Krais ragai arureva baptaisa vatesa. Viapau. Easi eera ragai arureva Vearo Siposipo iava siposiposa. Oa-a vao oa iava viapau vo tarai iava vo rasio-ia oisoa siposipopaa. Viapau. Vaopa teapi Krais vo kopiiro vo evao parikou-ia akukuvira raga tou ragapaise.

#### Krais-a Pauto Vaaro Gorua Ora Taraia

<sup>18</sup> ♦ Ari ita, vo siposipo Krais vaaro iava kopiiia vo evao parikou-ia, oa voeo-ia oiso rutu toupaiveira keevaita reo raga, oea oiso vore avapaave Opesi Ovoipa Urui iare. Vo osa vo siposipo-a eva, Pauto vo goruaroo iava vigeipa vao vigoa oriruvira rutu toupapeira vo rera vaaro sovara-ia gorua. <sup>19</sup> Vo Tugoropa Vuku-ia oa oiso purapapeira, ‘Ragai vao taraia opesi pieaverea voeo iava riro tarai irara. Ora voea iava oiso roroio rugooro vavagisi pieaverea taru voeo oea orugorugooru rutu oupaiveira vo rasio raga iava.’

<sup>20</sup> ♦ Oire apeisi ragavira voea-ia evoea riro tarai irara eisi toupai? Ari apeisi voeaopa oea taraiare taraapaiveira? Ora voeo oea oearovu rutu-ia putepaive oreorovu-ia reoreopaaoro? Oiraopavira rutu uvare Pauto vo taraiaro-a gorua rutu oa karekereva. Oa iava vo tarai vo rasio iava akukupapaepa. <sup>21</sup> Uva oisi-a eisi osa ragavira iava viapau uvuipavieie ra Pauto-ia roroiovira tarai pavio ora vigei vo rugooaro raga iava. Eake iava? Uvare oisire vigei oisi pierava ora rera vo rugooaro sirova. Ari ita, Pauto voeo oupareveira ora rera iare oea rera oirao piepaive igei vo siposiporoaro uvupaoro. Vo siposiporo oarare oiso purapaaveira oearovu, “Keevaita reoro raga.” <sup>22</sup> Voeao Jiu oea oiso ruipapaaveira ra ravotoara kekepaivora, oirao piepaive. Ora oearovu voeo iava Grik oea tapo oiso ruipapaaveira ra riro tarairo vai rutu ou rovopaivora, oirao piepaive rutu.

<sup>23</sup> ♦ Vo osa vigei-a vao vigoa vo siposipo raga iava ora tavitavipavioveira Krais vaaro iava kopiiia vo evao parikou-ia. Osiposipoa vao Jiu vo vovouaro vuri pie iraopaiveira, oa iava vo siposipopaa reasipaiveira. Ora voeo Grik oea vare oiso purapaaveira, “Keevaita reo raga.” <sup>24</sup> Ari ita, oiraopavira rutu vo siposipo vituaro-a rera ro Krais. Ira Pauto vo goruaroo rutu karekepareveira. Ora oiso tapo vo uvare oiso toupareveira, Eva riroa rutu tarai Pauto vaaro. Oiraopavira rutu uvare vo reo-a eva oa rutu vituaro-a rera ro-ia Krais voeo oearovu oiso puraroepa, “Ragai voeaaro,” voea ousa vorevira ora rera iare, voeo raga iava ita voeo Jiu ora oeavu Grik ratau tou irara. <sup>25</sup> Ari ita, Pauto vo siposipo oare oearovu oiso purapaaveira, “Keevaita reo raga.” Uva va-a vao oa oearovu rutu oirara vo tarairoaro-ia putepaiveira vo rasio iava voeo. Ora oiso osa oiso

♦ 1:10: 2 Ko 13:11; Ro 12:16    ♦ 1:17: Jo 4:2; Ap 10:48    ♦ 1:18: Ap 17:18; 1 Ko 15:2; Ro 1:16    ♦ 1:20: Ais 33:18    ♦ 1:23: Ga 5:11

purapaaveira, "Raverave reo Pauto vo reoaro." Uva va-a eva goru reo Pauto vo reoaro oa oirara vo reoroaro-ia uvuipapeira ra vara-ia putepaive vo reoro vo rasio iava.

<sup>26</sup> Araoko irara oaa, visii vo touroarore ora rugorugoo pie iraopata, vo osa Pauto oisoa vo keeraaro uvu asavira toupata. Eake iava? Uvare viapau riro tarai irara-a visii voari tuariri. Ora viapau oiso gorupa reoro pura irara visii. Ora viapau oiso turarovira oisoa toupata oirara osireiaro-ia. <sup>27</sup> ♦ Ari Pauto visii ora rerapa roporeva visii ouoro rera vo ruipaaro sirova utuoro vaore, oiso ra riro tarai irara-ia pute iraota. Ora oiso ra voea-ia tapo pute iraota riro gorupa irara, oea visii raga ita vaisipaiveira, "Akukupapa irara." Eake iava? Ari vaore oiso ra ora voea raga ora arii piepaave. <sup>28</sup> Ari ita, vara-a evara oara oiso vaisipaiveira akukupapara, Pauto oara roporeva vaore, oiso ra vara iavirava oaravu opesi pie ovoireve varao oara rei piepaiveira ora voea vo rugorugooro raga iava varao vo rasio iava. <sup>29</sup> Eva-a oa vituaro oiso toupai, Viapau irai uvuiparoi ra irai raga vo Pauto osireiaro-ia ora vaisiaro rei piepareve oiso purapaoro, "Ragai vo taraiaro raga vao oa uvuipai." <sup>30</sup> Viapau oiso uvuiparoi. Uvare Pautoa raga-a kataito ira visii rutu Krais Jisas tapo tavosireva. Ora vo uvare rera raga-a Pauto ira Krais oiso piereva ra rera iavirava vigei vo tarairoaro uvuipre rutu. Osa iava eisi uvuiparoi ra vigeire oiso puraparo, "Visii torevoko vovou irara." Oa iava uvuipavieei ra oiso rutu toupape, Vigei-a Pauto voeaaro rutu. Oa iava ora rera iare vigei oureverea rara. <sup>31</sup> ♦ Oire uva oisi-a eisi osa toupaiveira oiraopavira rutu oa iava Tugoropa Vuku oiso purapapeira,  
 'Vosa irai oiso ruipaparo ra ora irai raga ora vaisiaro rei piepareve, ra viapau oisi uvuipape Ari vosa Turaro Krais raga vaisiaro rei piepareve, oa raga-a eva oapa oisi torevokopai rutu eisi.'

## 2

*Pol Evaop Parikou Iava Siposiporeva*

<sup>1</sup> Araoko irara oaa, vo osa rovovira rutu visii tarai pie rovoava Pauto vo reoaro-ia, uva viapau oiso voa vavagisi reoro vai-ia taraivira rutu visii tarai pieava. <sup>2</sup> ♦ Viapau. Ari ragai vo vovouaro raga iava-a vao oiso ra ovovourovu rutu veepoa. Oisore ra Jisas Krais iava poeravira tavitavira, ora rera vo kopiiaro vituaro iava tapo vo evao parikou-ia. <sup>3</sup> Vo osa raveraveraepa visii tapo toupaoro uriripaoro, <sup>4</sup> oa iava viapau oiso vearovira rutu visii siposipoava tarai pievira rutu. Viapau. Ari Pauto reraaro raga Tugoropato Uraurato ira goruvira ragai vo reoaro goru piereva rutu va oirao pievira rutu karekeoro vao iavirava rera vo varivariaro. <sup>5</sup> ♦ Uva va-a eva visii vo vovouaro oiraopa vovou rutu vituaro, uvare viapau oiso oirara ruvara iava vo tarai iava-a voea vo rasio iava. Viapau. Ari Pauto ruvara iava vo varivari iava-a vao.

*Tugoropato Uraurato Pauto Reraaro Vigei Vatepareveira Taraia*

<sup>6</sup> Oiraopavira rutu oiso osa oisoa riroa vatepaa taraia voeaopa oirao pie vovou irara, oea oisoa uvuipaave ra riroa rutu oupaive taraia. Uva viapau oiso vo rasio iava vo taraia. Ora tapo viapau oiso voeao ruvara iava turaro irara oea reipaaveira vo rasio-ia. Otaraiava opesiaverea ora gorua. <sup>7</sup> Viapau Easi Pauto vo taraiaro-a vao oa oisoa kosi piepaa. Vo taraio oa oisoa vatauvira toupaive oirara vo rugorooro asavira. Vo taraio oa reesireva Pauto voari tuariri rovoa-ia, vo osa viapau orekerovu avu vai touva vaore oiso ra va iavirava rorupape rera tapo toupaoro vorerivira. <sup>8</sup> Ari ita, viapau rutu oiso iraiei turarotoa vai ira vo tarai-ia eva tarai rovoroepa. Vosa oisi va-ia tarai'aeri, oire ra va iava viapau oiso Turaro tapaive vo evao parikou-ia, ro ira-a keraria vituaro. <sup>9</sup> ♦ Ari ita, Tugoropa Vuku oiso purapapeira,

'Vao oa viapau irai kekepareve, ora vao oa viapau irai uvupareve, ora vao oare viapau irai rugorugooparo, uva va-a eva oa oiraopavira rutu karekeperea. Pauto oa ravaareva voeaopa oea rerapa siraopaave.'

<sup>10</sup> ♦ Oiraopavira rutu va iava vao oa oisoa vatauvira rutu toupaive Pauto oa poeravira karekereva rera reraaro iavirava Tugoropato Uraurato. Uvare Tugoropato Uraurato ira

---

♦ 1:27: Je 2:5 ♦ 1:31: Jer 9:23-24; 2 Ko 10:17 ♦ 2:2: Ga 6:14; 1 Ko 1:23 ♦ 2:5: 2 Ko 4:7, 6:7 ♦ 2:9: Ais 64:4, 65:17 ♦ 2:10: Mt 16:17; Ef 3:3, 5

Pauto vo taraiaro-ia taraiparoveira, vao oa kae pievira rutu toupaiveira ora roko pievira rutu toupaiveira. Oa-a eva oa iava rera raga uvuiparoi ra vigeipa vo tarai topa piepareve. Vo taraia oa sirova utuoro ora rera iare raiva purareva vigeipa.

<sup>11</sup> ♦ Ari ita, oirato reraaro uraurato ira orekerovu rutu-ia taraiparoveira varao oara oirato sopaaro-ia toupaiveira. Oiso osa Pauto reraaro Tugoropato Uraurato ira orekerovu rutu-ia taraiparoveira varao Pauto vo taraiaro iava vara. <sup>12</sup> Vo vovouo vo rasio iava oa-ia viapau uvuipavieie ra va-ia pitupape taraia oupasa. Viapau. Ari Tugoropatoo raga Uraurato ro Pauto ruvara iava ira ouepa. Eake iava? Uvare Pautoa raga rera arureva vigeipa varao iava vigei aviavi piepasa Pauto vo tauvaroaro vigeipa, vigoa Pautoa-pa siraopavioveira. <sup>13</sup> Uva oisi-a eisi osa ragavira iava igei viapau oearovupa siposipopaioveira vo reoro iava oara oupaioveira voeao ruvara iava riro tarai irara vo rasio iava. Viapau. Ari oiso ragavira iava-a, uvare Tugoropato Uraurato igeipa reoreoara vatepareveira varao oara iava uvuipaiei ra aviavi pievira oiraopara rutu iava siposipopai, varao Pauto varaa oreaopa oea uvuipaai ra vara oupaise, vo osa Tugoropato Uraurato voea sopaura-ia toupareve voa voea tauvapaoro.

<sup>14</sup> ♦ Ari ro ira viapau sopaaro-ia Tugoropato Uraurato toupareve, ira-a eera viapau oiso uvuiparoi ra vo tauva oureve vao Tugoropato Uraurato vaaro. Vao iava rara viapau rera iava rugorugooara viapau aviavipape va iavirava. Oa vituaro iava oiso piepaveira voeao-ia akukupapa irara. Eake iava? Uvare viapau oiso va kerisipaveira vao Tugoropato Uraurato vo kovoaro. <sup>15</sup> Ari ita, vo osa ro ira iava sopaua-ia toupareve Tugoropato Uraurato, ira uvuiparoi ra vearovira rutu orekerovu-ia taraipaoro vara kerikerisipareve oiso, "Vearo-a vao-ia, ari vuri-a vao-ia." Ari rera-a eera ira-ia viapau irai uvuiparoi rera vo vovouaro rovirieireve. Eake iava? Vo rara eera ira-ia viapau Pauto vovouaro toupaise, viapau uvuipa ra rera rovirieipareve ro ira-ia Tugoropato Uraurato toupareveira. <sup>16</sup> Eva-a oa vituaro iava Tugoropata Vuku oiso purapapeira, 'Iroutoa vaiei ira aviavipa vao-ia Turaro vo taraiaro? Ora oiso iroutoa vaiei ro ira uvuiparoi ra Turaro tarai piereve?' Vigei raga ita vao-ia vigoa vo rugorugooroaro-ia Krais vo rugooaro toupaiseira. Evo rugoo iavirava uvuipavieie ra orekerovu rutu kerikerisipape vara vearovira rovirieipaoro.

## 3

*Lotupa Irara-a Pautoa-pa Kovopa Irara*

<sup>1</sup> ♦ Oiraopavira rutu araoko irara oaa. Vo osa voari tuariri visii tapo oisoa toupaa, uva oisoa viapau visii tapo ora reopara oiso osa oearovu tapo ora reoparaveira voeao oea-ia Tugoropato Uraurato toupareveira. Ari ita, oisoa visii tapo ora reopara veu visivi raga oiso rutu osa vo kakaero veu kakaero. Uvare eisi toupaoro Krais sirova utupaoro viapau rutu oisoa uvuipata vearovira roroio pievira taraipasa vo reo-ia vao Pauto iava. <sup>2</sup> ♦ Uva oisoa visii vatepaa gorotua aioa, vao oa-ia viapau sopea vai, uvare viapau oiso rirovira rirotaepa, oiso ra va iava varao goru aioro aiopata. Uva oiraopavira rutu-a uvare touvira rutu visii epao veu visivi raga. Oa iava viapau uvuipatai ra goru aio vai aiota. <sup>3</sup> Eake iava? Uvare oisoa touvira rutu vo vovouaro purapata vo rasio iava vara. Vao-ia osa oearovu varaa orekerovu riiriipataveira. Ora vo vovouaro purapataveira kaureo vovouaro. Oara-a evara oara-ia vo vovouaro varao kareke piepataveira vo rasio iava. Oiraopavira rutu uvare oira turiro raga vo vovouaro-a varao oara pura vasipataveira. <sup>4</sup> Vosa irai visii iava oiso puraparo, "Pol sirova utuparai." Osa irai oiso puraro, "Ari Apolos sirova utuparai." Oire uva apeisi-a? E vo rasio iava viapau vo pitupitu-a eva, eke? Iu.

<sup>5</sup> Aue iava uvare irouto-a rera ro-ia Apolos? Ora irouto-a ro Pol? E apeisi-a? Turarotoarei-a vegei? Viapau. Easi kovopatoarei raga vegei Pautoa-pa, vegoa rutu oisoa tauvaa vatepave visii vo vovouaro oirao piea tore piepaoro. Ari ita, vigei rutu katakataivira vo kovo purapai oa vatepareveira vigeipa Turaro oisore ra va purape. <sup>6</sup> Oiso-ia, takura pauraepa rasia-ia, vo osa Apolos oisoa vo kovo aruopareve vo kovo vioupaoro. Ovusa Pauto raga-a ira vara evara kovaaro kae piereva rutu. <sup>7</sup> Ari ro ira takura pauroepa, ora ro ira oisoa vo kovo aruopareve, uva evaiterei rutu akukuvira kovo ragasiva, vo osa Pauto raga kataito ira vara riro pieoro rutu vo kovo aruopareva, oa iava

♦ 2:11: Pro 20:27; Jer 17:9    ♦ 2:14: 1 Ko 1:18; Je 3:15    ♦ 3:1: 1 Ko 2:15; Ro 7:14; Hi 5:13    ♦ 3:2: Hi 5:12-13;  
1 Pi 2:2

vearovira kovaepa. <sup>8</sup>◊ Uva iroutoa vaiei ora vaiterei raga iava irai ro ira oisoa ora vaiterei raga iava irai-ia putepareve. Viapau. Asi vaeavira rutu Pauto vaiterei vorirevere oiso, Ro ira oisoa takura pauparo, ari ro ira oisoa vo kovo vioupareve. <sup>9</sup>◊ Eake iava? Uvare igei oisoa tavosi visivi rutu kovopao Pautoa-pa. Uva eake-a vao oa vituaro iava igei roo piesa auepatai? Ari ita, visii-a vao visiigoa oiso toupata osa rasia vao oa-ia aio kovo purapa piroveira vao Pauto vo rasiaro.

#### *Ro Kovopato Lotupa Irara Tokipareveira Kasivarivira Oiso Osa Kepa Paupato Kovopareve*

Uva oavu-a vao-ia ovoovoa uvare visii oiso toupataveira, visii-a Pauto vo kepaaro. <sup>10</sup> Pauto oisoa ragai tauvapareve vo osa kovopaa kasivarivira rutu, oiso osa ro kepa paupato ira kasivarivira kovopareve kepa paupaoro. Oire uva torevokovira rutu tuutara tovo rovoava. Oa iava ro kepa paupato vara ivara-ia vo kepao purareva. Uva visii tapo ita oisi otuutarovu ivara-ia kepa paupataveira. Osa iava eisi uvuipatai ra ora vatatopopata vaopa, teapi vurivira vo kepa pauta. <sup>11</sup>◊ Oa-a vao vituaro oiso toupaiveira uvare Pauto-a ro ira Jisas Krais reesireva oiso, Eera ira kukuuvu tuuta. Otuuta vo rikuaro iare viapau uvuipai otuutavu raga ra tavarive. <sup>12</sup> Uva oisi-a oiso osa iava oearovu goru tuutaro-ia kepa paupaaveira oiso-ia, sikoi tuuta-a vao-ia, ari atogo tuuta-a vao-ia, ari torea tuuta-a vao-ia. Vo osa oeavu rivutepa tuutaro-ia kepa paupaaveira oiso osa varao-ia, kusiivio-a vao, ari revisioki tuuta-a vao-ia, ari kovuruko tuuta-a vao-ia. <sup>13</sup>◊ Oiraopavira rutu voea rutu vo kovoroaro taru viaevira karekeperea vo vokio-ia ovokia iava vo vuuta-ia vorevira karekeroverea Krais. Uvare vo vokia-a eva oa-ia eto kasiva pouro virovere. Vo kasio eto kasi oa vo kepao vo goruaro oiraopavira rutu viaevira karekeverea. <sup>14</sup>◊ Vosa ro ira oisi oiso vo kepao paureve vo tuutaro-ia varao goru tuutaro, oire uva vo kepa-a eva oa viapau oiso rovaperea. Oire ra va-ia riroa rutu voria oureve rera ro ira vo kepaaro-a. <sup>15</sup>◊ Ari vosa vo kepao oa rutu rovaperea opesi ovoioro, oire ra rera ro ira vo kepa paureve, ira iava vara rutu tapo kovoara opesi ovoiperea. Vo osa rera oiso toupareve osa ro ira vorevira kae pieiva rera sitaoro tuitui kasi iava, vo osa rova rovoparoepa. Eva-a oa vituaro iava uvui iraopatai ra vearo kovo rutu purapata vo Pauto vo ruipaaro-ia vearo kovo purapasa.

#### *Visii Rutu Vao Oirara Visiigoa Oiso Toupataveira Osa Tugoropa Kepaaro Pauto*

<sup>16</sup>◊ E viapau vai pasi taraipataveira ora visii-ia vearovira, uvare oiso toupata, Tugoropa Kepa Tempel Pauto vaaro? Vao oa-ia vokiara rutu-ia Tugoropato Uraurato toupareveira? <sup>17</sup> Uva oisi-a oiso osa ragavira ro oirato ira Pauto vo kepaaro Tugoropa Kepa vuri piepareve, ira raga ita opesi pie ovoirevere Pauto. Eake iava? Uvare Pauto vo kepaaro rutu-a Tugoropa Kepa. Uva visii raga ita eva oiso toupata osa kepa.

#### *Viapau Rutu Uvuipavie Ra Oiratoa Vai Vaisiaro Kae Piepape*

<sup>18</sup>◊ Opeita ora visii raga ora keakea ragapata oiso-ia, vosa irai visii iavapatoa vai ora iraire oiso rugorugooparo oeai siituepaoro, Akoea, riro taraito-a ragai. Oire uva uvui iraoparoi ra rorukovira toupareve vo oirara rutu osireiaro-ia. Osa-a eisi osa iava uvuiparoi ra oiraopavira rutu oiso toupareve, Taraitoa rutu vo Pauto-ia. <sup>19</sup>◊ Vao vituaro iava oiso-ia vo osa ro ira reesipaise oirara oiso, Riro taraitoa rutu ro-ia, uva rera raga ita vaaruu vovouto vo Pauto vo reesiaro-ia. Ari ita, Tugoropa Vuku oiso purapapeira oisi voea iava eisi,  
‘Voeao riro tarai irara Pauto oea eisi piepareveira oiso ra ora voea vo taraiaro raga-ia utupaoro vo tarai vo rasio iava oa-ia ora piro piepaaveira.’

<sup>20</sup>◊ Ari oreovu tapo-a vao voa vo Tugoropa Vuku-ia oa oiso purapapeira, ‘Ro Turaro ira riro taraito vo rugooaro-ia taraiparoveira rutu, vo tarai rera-ia eveipaoro rutu. Oa iava oiso puraparoveira, Akukua raga viapa.’

<sup>21</sup> Osa iava viapau irai visii iava uvuiparoveira oiso ra oiratoa vai raga vaisiaro kae piepareve oiso purapaoro, “Ira-a ro-ia vearo tarai toupaiveira.” Vao iava uvare orekerovu

---

◊ 3:8: Sam 62:12   ◊ 3:11: Ais 28:6; Ef 2:20   ◊ 3:13: 1 Ko 4:5; 2 Te 1:7-10   ◊ 3:14: 1 Ko 4:5, 9:17   ◊ 3:15: Jop 23:10   ◊ 3:16: 1 Ko 6:19; 2 Ko 6:16   ◊ 3:18: Ais 5:21; 1 Ko 8:2   ◊ 3:19: Jop 5:13; 1 Ko 1:20   ◊ 3:20: Sam 94:11

rutu oara oisi toupaiveira visii varaaro <sup>22</sup> oiso-ia, Pol-a ro-ia, ari Apolos-a ro, ari Pita ro-ia, uva igei rutu-a vao visii voeaaro. Igoa oiso toupaioveira, Visii tauvapa irara. Ora orekerovu rutu varao vo rasio iava, ora aue tootooa, ora kopiia, ora vo vuutaro oara varao vo vokio-ia, ora vo vuutarori rutu voari utupaua. Oara rutu evara visii tauvapara. <sup>23</sup> ♦ Ari ita, oara rutu toupai, Visii tauvapara. Osa ragavira ita visii toupatavoi oiso, Krais voeaaro visii. Ovusa Krais oiso toupare, Pauto Oviitoaaro.

## 4

*Turaro Raga Taraiparoveira Rera Voeaaro Kovopa Irara Rovirieipaoro*

<sup>1</sup> ♦ Uva visii vao uvui iraopatai ra igeire oiso rugoo iraopata, Igei-a Krais kovopa iraraaro. Uvare igei vo kovoaro-a vao oa oiso toupaivoi, Pauto vo reoaro tokipa irara va kosi piepaoro vao vataua. <sup>2</sup> Ari ita, oiso ragavira taraipatai tapo, ro ira reesireve rera reraaro turaroto vaore, oiso ra rera varaaro orekerovu tokipareve. Ra va iava goruvira rutu orekerovu rutu vearovira toki iraopareve varao rera reraaro turaroto varaaro. <sup>3-4</sup> ♦ Uva oisi-a eisi osa ragavira vigei Turaroaro ragai vo kovoaro rovirieirevere taru. Viapau oiso visii-ia rugorugoparai rutu oiso osa ragai vo kovoaro rovirieipataveira. Uvare oiso taraiparai visii-ia, Viapau uvuipatai ra oisi orovirieii purata visii vao ora irai. Ora ragai ita ragoa viapau uvuiparai ra ora ragai ragare oiso purapara, “Viapau viria vaiei vo ragai-ia.” Vao vituaro iava uvare Turaro vo rovirieiaro-a oa purarevere. <sup>5</sup> ♦ Uva oisi ragavira ita viapau uvuipatai ra oearovu kovopa irara vo kovoroaro vagevagepavira rovirieipata. Uvare oiraopa rovirieie rutu epao touvira, oa karekeperea vo osa Turaro vorevira voreroverea. Oire uva vo vuuta-a eva oa-ia vo vovouro rutu vatauara poeravira karekerevere, oara oearovupa vataupaiveira sopaura oaive sovara-ia. Oa iava vara iavirava voea vo voriaro vaterevere Pauto, vo rara vearo kovo purapaive. Oa iava voea vaisiaro rei piervere. Ari vosa akaipa kovo, oire ra viapau oiso voea rei vaisi piereve.

*Voeao Korin Vata Oea Ora Vaisiaro Kae Pie Iraopaiva*

<sup>6</sup> Araoko irara oaa, vo reo purapaa ora vegei iava ora Apolos visii vo rugorugooroaro aviavi pieoro. Uva vo ovoovoro-a varao-ia oara puraavoi vaore, oiso ra vara iava vo reo rutu vituaro-ia taraita oa oiso purapai, “Visii uvui iraopatai ra vearo reo rutu sirova utupata.” Ari ita, uva viapau irai visii iava uvuiparoi ra iravu vaisiaro rei piepaoro iravu vaisiaro akaipa piepareve. <sup>7</sup> Uva iroutoa vai rutu-a ro ira eisi visii pierava, oiso ra oearovu rutu vo tarairoaro-ia pute iraopata? E ora visii raga, eke? Viapau. Asi Pautoa raga ira visiipa orekerovu rutu vatereva. Uva apeisi-a? E uvuipatai ra visii raga vaisiaro oavisii rei piepata varao-ia vatevateara? Viapau rutu.

<sup>8</sup> ♦ Oiraopavira rutu vo vokio-ia orekerovu rutu toupaivoi visii vo ruiparoaro uvui pievira rutu uvui piepaoro, uvare riroara rutu orekerovu rutuva toupataveira. Vo osa igei, viapau oisi. Uva oiso vovouparai ra oiraopavira rutu oisi turarovira toupata, ra ragai tapo oisi visii tapo toupaa turarovira. <sup>9</sup> Oa iava oiso rugoparai, Pauto osa oiso igei aposel irara pierava oiso ra oearovu sirova utupao igei vao-ia akukupapa irara. Oiso rutu osa voearo oearovu oirara oearoa-ia upo reesiro toupaiveira, oisore ra va-ia ora voea-ia ariia ouive oirara rutu osireiaro-ia ora purapurapa irara ensel. <sup>10</sup> ♦ Oiraopavira rutu uvare oiso rutu toupaioveira, Kokoropa irara vo Krais vo kovoaro purapaoro, vo osa visii vai-a riro tarai irara rutu, eke? Ari igeivi-a raverave vovou irara rutu, ari visii-a riro goru irara rutu, raa? Vo uvare oearovu igei oiso vaisipaoro igei tovipaiveira, Akukupapa irara visii raga vaisiaro kae piepaoro. <sup>11</sup> Uva vaviopavira raga ogoepaiei, ora viapau uukoa vaiei igeipa ukaiosa. Ora varao tapo varoara igei varaaro karikaripara, ovusa oearovu igei ragipaiveira. Virivira raga uvarovu rutu vokapaioveira. <sup>12</sup> ♦ Ari ita, igeivi kasivarivira rutu kovopaioveira ora igei vo vavaeroaro iava orekerovu voripasa ora igeipa. Vo ovusa oearovu igeivi takupaive, ovusa voeare vearo vovoupaioveira. Ari ita, vosa oeai igei vuri pie ruipaave ra viapau oiso ra igei vo kovoaro kavuoro va arova

◊ 3:23: 1 Ko 15:23; 2 Ko 10:7    ◊ 4:1: 2 Ko 6:4; 1 Ko 9:17    ◊ 4:3-4: Ro 2:13    ◊ 4:5: Ro 2:1, 29    ◊ 4:8: Re 3:17-18    ◊ 4:10: 1 Ko 1:18; Ap 17:18    ◊ 4:12: Ap 18:3; 1 Pi 3:9

raveraveio. <sup>13</sup> Igei tovipaiveira ovusa voea vo reoroaro pukopaio voeava kave visivi raga reoreopaoro. Oiraopavira rutu uvare igeivi oiso rutu toupaioveira osa kaie kouro, oiso rutu osa kaie tagatagaaro, varao oara viki ragapaiveira akukuvira.

#### *Voeao Korin-pa Irara Uvui Iraopaa Ra Pol Vo Pitupituarto Vioe Iraopaise*

<sup>14</sup> Oire uva vo reo-a vao-ia oa rigatoavoi visiipa uva viapau oiso visii arii piesa-a. Viapau. Ari visii taraisa-a, uvare oiso toupatavoi, Visii-a ita ragai voeaaro kakae vure.

<sup>15</sup> ♫ Riro irara rutu epao oea visii tarai pieive Krais vo taraiaro iava. Ari viapau oiso riro irara vai rutu epao visii aite irara vaiaro. Viapau. Ari ragai raga kataito. Vao iava uvare oisoa visii sipoipopaa Vearo Siposipo iava vaore, oiso ra va iava Krais oirao piepata rutu.

<sup>16</sup> ♫ Uva goruvira rutu visii tavi iraopavoi, oiso ra ragai vo pitupituarto vioe iraopata.

<sup>17</sup> Oa vituarto iava Timoti arupaavoi rara visii iare. Eera ita iravu ragai oviitoaaro Krais vo kovoaro-ia. Ira viapau oiso raveraveparoveira ragai tauvapaoro. Ira visii tauvaparevere rara. Ra va iava ragai vo pitupituroarore rugoopata, opitupituroa purapaaveira Airepa Tootoo-ia toupaoro vao oa ragaipa vatepareveira Krais. Vo pitupituro rutu oara iava lotupa irara rutu sipoipopaa vokapaaveira voraro rutu.

<sup>18</sup> Ari ita, oearovu ora visii raga iava voea vaisiaro rei piepaiveira keapaoro oiso, Viapau vorevira Pol igei iare uriorovere. <sup>19</sup> Ari vosa Turaro oiso puraro, "Vearopai," oa iava uvuiparai ra rera vo ruipaaro sirova uriora visii iare tou visivi rara. Ra voa visii tapo toupaoro voeo siituepaa oea vaisiaro rei piepaiveira. Ra va iava ora ragaipa oiraopavira rutu taraira vo kovo-ia eva oisi oiso, E vearoa-a, eke kiuvua raga vao voea vo kovoaro iava. <sup>20</sup> ♫ Aue iava uvare Pauto vo Saraaro viapau oiso reo turi vai raga karekepaiveira. Viapau. Ari rera vo Saraaro riroa rutu gorua kareke piepaiveira. <sup>21</sup> Oire uva aa vao vaio-a oapa ruipapatai, ragi rao vaiva pasi urioravere visii torevokosa? Eke vereopa vovouva urioravere visiipa siraoro? Oire ora torevokota. Osa iava vearo vovou ragava urioravere visii iare.

## 5

#### *Vao Iava Ora Oupa Vo Pitupituarto Vuri Piepaive Vo Korin-ia*

<sup>1</sup> ♫ Tavitaviara visii iava ragai iare kare pirorao. Vao iava osa oearovu visii iava otopa pitupituarto purapaiveira. Uva vara-a evara vuri pitupituarto rutu oara opitupiturovutu-ia putepaiveira vo vuriro oara purapaiveira voeo oirao pie vovou asa irara. Oiraopavira rutu uvare va-a eva vuri pitupituarto rutu, osa ro iravu oirato visii iava ira aitetu valuavaaro oureva. <sup>2</sup> ♫ Oire vosa rera vaaro-ia vuri vovou taraiapata, ra apeisi ragavira iava ora visii raga ora vaisiaro kae piepata, raa? Vearopai vosa viria vo tavakaarova toupaoro rera verata ora visii iava rera eera kooupato. <sup>3</sup> Uva ragai vo rugorugooaro raga-ia rera rovirieia vora eera oirato ira vuri vovou rutu purapareveira vo rovirieio-ia vigei reraaro Turaro vaisiaro sovara-ia Jisas Krais. Ari ita, visiipa tauaivira rutu toupaavoi vo osa ragai iava sopaua visii-ia toupaivoi. <sup>4</sup> Osa-a eisi osa ragavira iava vigei rutu uvuipavieie katali vovou rutu sirova ora takuvupavio. Oa iava uvuipavieie ra rera ro ira-ia vuri vovou toupaive ra ro verape vo goruo iavirava vigei reraaro Turaro Jisas Krais vaaro. <sup>5</sup> ♫ Ra oisi pieoro rera tovope Seten vavaearo-ia. Oire voa rera iava varaua vo ruipaaro opesipe. Oiso ra va iava ora rera vaaro viria eveireve soporeoro. Osa iava pasi uvuiparoi Turaro ra rera iava uraurato oureve rera orirusa vo vuuta vo vokiaro-ia Turaro vaaro.

#### *Korin Lotu Uvuipaa Ra Iravu Veraive Vurito*

<sup>6</sup> ♫ Viapau oiso torevokopai, ra ora visii raga vaisiaro kae piepaoro vagupata. Vao ovoovo reo oiso purapai, "Gareavi raga yis uvuipai ra plaua rutu kae pieve va rutu." <sup>7</sup> ♫ Oire uva va-a eva vagu vovou oa oisi eisi toupai oiso osa yis. Oa-ia eva yis uvui iraopatai ra verata. Ra va iava oiso rutu toutes osa airepa plaua vearoa vao oa-ia viapau yisa vai toupai. Ari visii-ia taraiaparai oiso-ia, Vearo vovou irara-a visii. Oire uva vo ovoovo vao-ia purapaavoi va iava vao yis, uvare Tagausapa Vurei Pasovaei oa vatatopoei. Uvare Krais-a ro ira oiso tourevoi osa oavu sipsip kakae ro ira-ia koruoua pura piropa, oiso ra

◊ 4:15: 1 Ko 1:30; Fm 10   ◊ 4:16: Fl 3:17; 1 Te 1:6; 2 Te 3:9   ◊ 4:20: 1 Te 1:5   ◊ 5:1: Lev 18:8; Diu 22:30

◊ 5:2: 1 Ko 4:18; 2 Ko 7:7   ◊ 5:5: 1 Ti 1:20   ◊ 5:6: Je 4:16; Ga 5:9   ◊ 5:7: 1 Pi 1:19

Krais iavirava uvuipaviei ra oiso toupape, Roroio vovou irara vigei.<sup>8</sup> Osa iava uvuipaviei ra Pasova purape rorupaoro rutu. Ari viapau oiso vao-ia bret vo vurei purape oa-ia tuariripava toupaeve yis o iria vao reesipaevoi kaureo vovou ora vao vagu vovou. Viapau. Uva vao-ia uvuipaviei ra va purape bretea oa-ia viapau yisa vai toupaeve. Obrete-a eva oa oiso toupai, Sisigarueua rutu sopaua ora oiraopa.

<sup>9</sup> Voari tuaririvi uva visiipa oavu pasia rigatoava vao oa-ia oiso ragai visii taviava, “Opeita voearo tapo ora takuvupata oearoa vuri vovouro purapaiveira varao otopa pitupituro.”<sup>10</sup> Uva vo rigatoa-a eva ragai vaaro viapau oiso evoea otopa irara vaisiava va-ia voearo oea viapau oirao piepaive. Uvare voea raga ita opitupiturovu rutu vuriara purapaiveira oiso vara, otopa-a vao-ia, ari iiruko vovou-a vao-ia, ora kavirupa vovou, ora vuurapa vovou-a vao-ia kuuvu irarapa pau irara oa purapaiveira. Vosa voeari visii taviavori oiso, “Voea vatavatapata,” ra ovure oisi avapata voea vatavatapaoro? Uvai ragare vo rasio iava?<sup>11</sup> ♦ Viapau. Ari ragai vo pasia vituaro rutu oiso toupaivoi, Opeita ro tapo ora takuvupata ira visii tavipareve ora rera iava oiso, “Ragai-a visii araokotoaaro vo Jisas vaisiaro sovara-ia.” Vo osa touvira otopa pitupitu purapareveira ora vao iirukopa. Ora vao osa kuuvuvira vuurapa vaisi purapareveira kuuvu irarapa pau irara. Ora oiso tapo osa oearovu tovipareveira. Ora spakparoveira kokoropaoro. Ora orekerovu ratarataapa vovouro purapareveira. Uva ita, opeita rera tapo paupaoro aiopata.<sup>12-13</sup> ♦ Oiraopavira viapau oiso ragai vaaro-a vo voearo rovirieipasa oea lotupa irarapa ratauvira toupaive oirao pie asa irara. Viapau. Ari auearo-a raga Pauto ira voea rovirieirevere. Uva visii oiso akepaavoi, “E visii auearo-a lotupa irara vo pitupituroaro rovirieipasa? Iu. Uvare Tugoropa Vuku-ia oiso purapai, ‘Ro ira-ia vuri vovou toupaive, uva uvui iraopatai ra rera verata ora visii iava.’”

## 6

*Lotupatoa Rutu Ira Viapau Uvuiparoi Ra Rera Araokotoaaro Iava Gasireve*

<sup>1</sup> ♦ Ari ovurivu-a vao-ia oa visii-ia toupaiveira, uvare ora visii iava oearovivu iava gasipataveira vore gavman. Oa iava voearo ruvara-ia voea tovopataveira oea viapau Jisas oirao piepaiveira. Uva viapau oiso torevokopai eisi. Uvare eakere vo vuriro voea varaaro viapau opesi piepataveira vara-ia ora reopaoro, uvare visii raga ita Pauto voearo.<sup>2</sup> ♦ E viapau taraiapataveira uvare voearo Pauto voearo oea vo rasio rutupa reipaaverea rutu vo orekerovu rutu rovirieipaoro? Uva visii raga ita Pauto voearo visiigoa eisi pietaverea vo rasio-ia voari utupaua. Oire uva apeisi-a? E viapau uvuipatai vo vokio-ia ra gareparavi rovirieipata vo ora visii vo taereroaro raga-ia, raa?<sup>3</sup> Tarai iraopataveira vao iava osa enselpa irara vo vovouroaro rovirieipaperea rara vo voeapa reipaoro? Oire uva uvuipaviei ra oisi oiraopavira rutu vuri vovouro rovirieipape varao voearo varaaro vo rasio-ia vo vokio.<sup>4</sup> Vosa oavu vuria visii-ia pou piro, uva apeisi-a? E uvuipatai ra voearo oirao pie vovou asa irara tavita, ra visii tauvaive opitupiturovu rovirieipasa, raa?<sup>5</sup> Ae, viapau! Easi eisi vuripai. Uvui iraopatai iravure taraata ora visii raga iava riro taraito eera, ira uvuiparoi ra visii varaaro rovirieireve vuri vovouro, oiso osa vao oa katai araorei rutu tokove vaitereo oirao pie vovoutoarei.<sup>6</sup> ♦ Oiraopavira rutu vao-ia vuria oiso-ia, vo osa iravu riro oirao pie vovouto iravu iava gasireve oirao pie vovouto, ra va iava ro vaiterei vo vuriaro rovirieireve oirao pie asa vovouto.

<sup>7</sup> Ari ita, visii-a eva visiigoa eisi piepataveira ora visii iava oearovivu iava gasipaoro. Uva oisi-a eisi osa piepaoro visii raga ora kove piepataveira. Eake iava? Vosa ro iravu oirao pie vovouto ira ora rera vaaro vuria rovoreve visii vuri pieoro, oa-a eva oa-ia uvuipatai ra rera eakata rerare oiso puraoro, “Oire rerape.” Osa eisi torevokopai.<sup>8</sup> Uvare visii raga ita visiigoa oearovivu sirao pie ragapataveira voea varaaro ou ragapaoro. Iu, uvare ora visii voearo-a araoko irara oavisii oea eisi piepataveira.

<sup>9</sup> ♦ Oiraopavira vao-ia oiso taraiapataveira, Voeao oea vuri vovouro purapaiveira oea viapau oiso koataverea Pauto vo Saraaro iare. Ra viapau oiso ora keakeapata uvare

♦ 5:11: 2 Te 3:6 ♦ 5:12-13: Diu 13:5, 21:21 ♦ 6:1: Mt 18:17 ♦ 6:2: Dan 7:22; Mt 19:28 ♦ 6:6: 2 Ko

6:14 ♦ 6:9: Re 22:5

taraipatai oiso, Viapau oiso voeao koataaverea oea otopa vovouro purapaiveira, ora voeao oea tauopaaveira voeaopa kuuvu irara pau irara, ora voearo oearovuva oirara otopaave ora riakora airoroo oriakorovuva otopaave,<sup>10</sup> ora voeao kavirupa irara, ora voeao iiruko vovou irara, ora voeao vokiara rutu-ia spakpaaveira kokoropaoro, ora voeao oea oearovivu tovipaiveira. Oiraopavira rutu viapau irai voea iava koataroverea Pauto vo Saraaro iare.<sup>11</sup> Uva oearovu epao oea visii iava oisi vo pitupituro purapaivora voari rovovira. Vara-a evara isivaaro iava visii rutu iava sopaura oavisii sisigarueera rutu. Oa-a vao oa iava visii reesireva oiso, Visii ita Pauto voeaaro. Oa iava torevoko vovouvira rutu toupatavoi vo Pauto osireiaro-ia ro raga vaisiaro iavirava Turaro Jisas Krais, ora tapo vo kovo iavirava Tugoropato Uraurato vo kovoaro Pauto reraaro.

### *Uvuipavie Ra Pauto Vaisiaro Kae Piepape Vova Varaua Oavi-ia*

<sup>12</sup> ♦ Oearovu visii iava oirao pie vovou irara oiso purapaaveira, “Uvuiparai ra opitupiturovutu purapaa.” O ita osa eisi oiraopai. Uva viapau oiso opitupiturovutu visii tauvapaiveira. Ari ita, ragai tapo uvuiparai ra oiso purapara, “Uvuiparai ra opitupiturovutu purapaa.” Ari viapau uvuiparai ra ora ragai iava vasea. Uvare apeisi ragavira uvuiparai vovio utupaua ra oiso vo pitupituro eakasa?<sup>13</sup> ♦ Oearovu epao visii iava oea oiso puraaveira, “Aioa toupaivoi vaore kovuto vuku piesa. Ora kovuto toupare aio oupasa.” Oiraopavira rutu. Ari ita, Pauto evara rutu aioara ora kovuara opesi piervereera. Vao ovoovo reo vearovira vigei soporepaivoi oiso purapaoro, Oiratoa iava varaua vaore viapau oiso toupai, ra varaua vo ruipaaro-ia vao-ia otopa pitupitu vukupape. Opitupitu vaaro viapau oiso ra akukuvira opesipe oiso osa aioa. Viapau. Ari varaua-a Turaro vo kovoaro purapaua. Vo osa rera-a Turaro ira vigei iava tootooara oavi vuku piepareveira vigei tauvapaoro.<sup>14</sup> ♦ Pauto ira Turaro iava varaua kopii tapi iava vorevira tore pierereva. Oiso osa ragavira vigei tore piervereera voari utupaua vo goru raga iavirava eva rera vaaro.

<sup>15</sup> Ora visii iava varaura-ia taraipatai ouraroa oiso rutu toupaiveira, Jisas iava vavaeara, ora kokotoara, ora orekerovu rutu. Oire uva oisi-a eisi osa taraipaoro, E ragai uvuiparai ra Krais varauaaro iava ovarui oua pasi, ra va oiso piea ovaru vao otopa? Easi viapau rutu eisi torevokopai.<sup>16</sup> ♦ Esa pasi viapau taraipataveira oiso, Vosa iravu oirato iriavuva otopava ora tavosiro o-ia iria vuri pitupitu purapaaveira, ra oisi iava kataiuva varaua purasi ora vaiterei-ia? Ari ita, Tugoropa Vuku oiso purapai roroiovira rutu, ‘Oirato ora riakova aiterea uvuipasi ra kataiuva varaua purasi ora vaiterei-ia.’<sup>17</sup> Ari ro ira Turaro-ia ora tavosiro rutu ro Turaro ira roroiovira toupareveira. Oire ra katai vovou purareve rera tapo oisi eisi toupaoro.

<sup>18</sup> Vao otopa pitupitu veripata vaopa, vosa irai oai vuri pitupitu vai purareve oearoia, oa-ia eva viapau ora rera iava varaua vuri pierereva. Ari vosa ro ira otopa pitupitu purareve, ira-a eera ira ora rera iava varauaaro vuri piererevoi rutu.<sup>19</sup> ♦ E viapau vao-ia taraipataveira pasi oiso-ia, Visii iava varaura-a Tugoropa Kepa Tempel, Pauto vo kepaaro, vo uva toupareveira Tugoropato Uraurato ro ira vatereva Pauto visiipa. Oa-a eva vituaro iava visii-a Pauto voeaaro. Viapau oiso irai voeaaro-a visii. Ari ita, viapau oiso visii voeaaro-a visii, ra akukupapavira ora visii vo ruiparoaro sirova utu ragapata.<sup>20</sup> Uvare Pautoa raga ira visii vorireva ora rera iare vo Oviito Krais revasiaro iavirava. Oa iava uvui iraopatai ra ora visii iava vearovira rutu varauraro oavisii rutu tokipata torevoko vovou raga purapaoro. Osa iava uvuipaaai ra oearovu Pauto vaisiaro kae piepaise rara visii vo pitupituroaro siituepaoro.

### *Ora Oupa Pitupitu Iava*

<sup>1</sup> Vaviopavira visii vo akeroaro pukopaa varao oara sipotavora ragaipa pasia-ia. Oiso-ia rovopa vao-ia. Viapau oiso oavu avu vai vo osa viapau oirato riakova oureve.<sup>2</sup> Ari vao raga uvare rirovira rutu otopa pitupitu toupaiveira visii vo uruiaro-ia. Eva-a oa vituaro uvuipa ra oirato ora rerapa torevokovira riakovaaro oureve. Ora riakova tapo uvuipaoi

---

◊ 6:12: 1 Ko 10:23    ◊ 6:13: Mt 15:17; Ef 5:23    ◊ 6:14: Ro 6:5, 8, 8:11    ◊ 6:16: Jen 2:4; Mt 19:5    ◊ 6:19: Jo 2:21; Ro 14:7-8

ra ora oirapa torevokovira oiratoaaro rutu oueve reo goru sirova utupaoro. <sup>3</sup> ♦ Oire vii valuato viapau uvuipaei ra ora vii iava varaua oara vairupari vo valuava oarapa. Ora vii riakova viapau oiso uvuipaei ra ora vii iava varaua oara vairupari rerapa, vo osa valuato oara vii iava vouava uusi ruipaparo. <sup>4</sup> Viapau oiso ra valuava reipao ora oira iava varaua tokipaoro. Viapau. Ari uvui iraopaoi ra valuatoaaro vo ruipaaro sirova utupao. Osa raga ita toupai, viapau oiso ra uvuiparoi valuato ra ora rei pieparo. Viapau. Ari rera ita uvui iraoparoi ra valuavaaro vo ruipaaro sirova utuparo. <sup>5</sup> ♦ Opeita ora vairupasi ora veipa. Ari ita, vearpai vo osa gare vuutavi ou rovopasi variripasa katai rugoo ragaia. Uva vo vuuta-a eva oa isivaaro iava uvuipasiei ra ora veiva uusisi. Teapi Seten kokarapato vei-ia kokararo vuri pitupitu purasa, ra va-ia kovesi, uvare viapau uvuipatai ra goruvira va-ia vao otopa vovou ora airerei iraopata, pasi. <sup>6</sup> Vo reo-a eva ragai vaaro oa-ia visiire airereivira reoparai. Viapau oiso reo goru vai purapaavoi visiire. <sup>7</sup> Uvare ragai vo vovouaro oiso toupaivoi, vo osa oirara rutu oisi raga oiso toupaive osa ragai. Ari ita, oiso taraiparai, Pauto katakataivira oirara rutu vaterева vatevateara vaore, oiso ra oiso piepaive iravu ora rera vo pitupituaro purapareve, ovusa iravu osivu raga ora rera vo pitupituaro purapareve rera raga vo vatevatearo iava.

<sup>8</sup> Oire oreovu-a vao-ia visiipa voeao oirara, ora voeao rарoe irara ora vairo rарoe riako, visiigoa viapau valua irara vai ora viapau valua riakoro vai oavisii. Vearo iraopai vosa oisi raga toupata osa ragai riako ou asavira. <sup>9</sup> ♦ Ari vosa viapau uvuipata oiso ra visii vo ruiparoaro rukupata, oa-a eva vituaro iava uvuipatai ra ora oupata. Oire vo osa ora oupavira toupaoro viapau oiso visii vuri piepaive orugoorovu avu vai vara varaura oraiaro.

<sup>10</sup> ♦ Uva vaviopavira voeao ora oupa irara taraipaavoi. Oa iava goruvira rutu oiso puraparai. Ari viapau oiso ragai vaaro-a reo goru. Ari Turaro raga oa-ia oiso puraparai, "O riakova viapau uvuipaoi ra oira valuatoaaro kavueve. <sup>11</sup> Ari vosa rera kavu ragaevе valuato, ra va iava vorevira ita uvui iraopaoi ra rera agiagieve, eke apeisi toueve, oira raga tou ragapaeve. Uvare viapau uvuipaoi ita ra vorevira irai oueve. Osa tapo ita oiratoapa toupai. Ira tapo ita viapau uvuiparoi ra ora oupa pitupitu putereve valuava vaiaro kavuoro.

<sup>12</sup> Oire oreovu-a vao-ia oearovupa visii iava. Viapau oiso Turaro vo reoaro-a. Ari ragai raga vo reoaro-a oa oiso purapai, Vosa irai oiratoa vai riro oirao pie vovouto riakova vai oureve, o iria viapau Jisas oirao piepaive, oire uva oisi eisi viapau oirao piepaoro uvuipaoi ra touvira toupaeve rera ruvara-ia oira vo ruipaaro sirova utupaoro. Oa-a eva vituaro iava viapau rutu uvuiparoi valuato oiso ra oira kavureve. <sup>13</sup> Osa o riakova riro oirao pie vovouva irai oirato oueve, ro ira viapau Jisas oirao piepareve. Ra oiso puraro, "Vearopai osa raga toupavearea." Osa iava viapau rutu uvuipaoi oiso ra rera kavueve.

<sup>14</sup> Eake iava? Uvare valuato viapau oirao piea vai. Oire ra Pauto riakova raga vo vovouaro oirao piea sisiropaoro vaiterei vaaro ora oua reesipareve oiso, Vearoa torevokoa. Ari vosa riakova ita oisi oira oirao pie vovou asava, oire ra Pautoa raga ita oirato vo vovouaro oirao piea sisiropaoro vaiterei vaaro ora oua reesipareve oiso purapaoro, "Vearoa torevokoa." Vosa viapau Pauto oisi eisi puraroeri, oire ra va iava viapau oiso vearovira torevokovira ovii kakaero vai purapasi. Ari vo osa oisi raga eisi, vaiterei iava torevokovira ovii irara karekepaave vo Pauto osirearo-ia. <sup>15</sup> Ari vosa rera ro ira viapau Jisas oirao piepareve ora rera valuavaaro kavu ruipaparo o ira Jisas oirao piepaive, uva oisi vearpai, ra oisi rerape. Oire uva oisi-a eisi osa sirovava viapau reo goru vaiei vao oa iava viapau uvuipaoi ra valuato vo vovouaro sirova utupao. Vao vituaro iava uvare Pauto ora rera voeao tavireva oiso, "Kave vovou raga purapata orekerovu rutu-ia." <sup>16</sup> ♦ Aue iava uvare vosa kave vovou raga purapari vii riakova riro oirao pieva, oa iava pasi uvuipaei ra vii reraaro valuato tauvari. Oire eva-a vai oa iava uvuiparoi ra ora rera iava sopauaaro porereve Jisas oirao piesa. Ora vii tapo oirato oirao pie vovouto viigoa tapo uvuipaei ra oisi raga ita kave vovou purapari valuava oara tauvapaoro. Oa iava uvuipaoi ra oira iava sopauaaro pore piro, ra Jisas oirao pieeve.

*Uvui Iraopavie Ra Vo Vovou-ia Toupape Pauto Oa Rovo Pierava Vigeipa*

<sup>17</sup> ♦ Oire uva oavu-a vao oa-ia uvui iraopatai visii rutu ra oiso rutu toupata vo vuutao-ia osa vo vuutari oa-ia oisoa toupata oa-ia Pauto visii reesireva rera vo kovoaro purapasa. Ari ita, Turaro ira visiipa vatevateara vatereva, oisore ra vara kovo piepata. Uva va-a vao osa toupatavoi vo kovo eva purapaoro. Vo reo-a eva oa vatepaaveira voraro rutu lotupa irara voea siposipopaoro. <sup>18</sup> Vosa irouto-a ro ira ora rera iava rakari vera rovoro Jiu vo pitupituaro sirova utuoro, ira-a eera porero viroi Pauto vo ruipaaro purasa. Oire ra teapi oiso vovoupara vo reesi tavarioreve. Ora vo osa irouto-a ro ira viapau vo reesiva toupaoro porero viro Pauto vo ruipaaro sirova utusa. Oa-a eva isivaaro iava viapau uvuiparoi ra ora rera-ia oreesii purareve lotupa irara roru pie ragapasa. <sup>19</sup> Eake iava? Uvare va eva rakari verapa pitupitu viapau oiso reipapeira. Viapau. Ari vao raga oa rei iraopai, Pauto vo ruipaaro sirova utupa. <sup>20</sup> Visii rutu uvui iraopatai ra oiso rutu toupata osa oisoa toupata vo uva ora visii iava sopaura oavisii poreoro Pauto vo ruipaaro sirova ututaera. <sup>21</sup> Oiso-ia, E reitoa vaipa oisoa kovopata akukuvira vori ou asavira vo vokio-ia oa ora visii iava sopaura oavisii poretava Pauto iare? Oire uva veeropai oiso ra oisi raga eisi toupata. Ari ita, vosa oraivavu avu vai toupaive, ra oai iava uvuipatai ra torevokovira reito oavisii arova monipa kovo vai outa. Oire ra oai purata. <sup>22</sup> ♦ Vosa eera ruvara-ia visii reraaro reito kovo ragapata moni ou asavira, uva uvuipatai ra iravu ruvara-ia Turaro Jisas Krais vori outa, vo rara ora visii iava sopaura oavisii pore rovota. Ari ro ira ora rerapa kovopareve moni oupaoro, oire ra Krais-re oiso puraro, "Ragai reraaro-a Turaro." <sup>23</sup> ♦ Oiraopavira rutu vo uvare Pauto vigei vorireva rera Oviitoaro-ia ora rera iare vigei ouoro. Osa iava viapau uvuipatai ra ora visii iava ora vasepata oearovupa oirara, oiso ra visii vo vovouroaro ora rei piepaave. Viapau. Uvare Krais raga ira vigeipa reiparoveira. <sup>24</sup> Araoko irara oaa, visii rutu uvui iraopatai ra katakataivira Pauto tapo ora tavosipaoro oiso rutu toupata osa oisoa toupata vo uva ora visii iava sopaura oavisii poreoro Pauto vo ruipaaro sirova ututaera.

#### Voeao Iava Oirara Ora Raroe Riako Oea Viapau Ora Oupaave

<sup>25</sup> Oire vo reo-a vao-ia visii vo akeroaro pukopasa voearo iava oearoa viapau riako oupaave. Viapau oiso oreoi iava ragai vo reo purapaavoi vo Turaro oreoiaro. Ari ora ragai raga vo rugooaro iava vo osa Turaro ragai soporepare ragai tauvapaoro. Osa-a eisi osa iava uvuipatai ra ragai vo reoaro sirova utupata.

<sup>26</sup> Taraiparai vao-ia riroa tavaka vigei rutupa oirao pie vovou irara oa rovoi. Uva vo tavakaore rugoopaoro oiso puraparai, Vearopai vosa irouto oirato oisi raga toupareve, ra oisi raga veeropape rerapa. <sup>27</sup> Ari ro ira riakova oureve, ira viapau uvuiparoi ra oiso rugooro ra oira kavureve. Ora vosa ro viovokoto, ira viapau uvuiparoi ra riakova vaire taraapareve vaore, oiso ra iriai oureve. <sup>28</sup> Ari ita, vosa rera ro viovokoto riako ouro, oire ra viapau oiso viria vai purapareve. Viapau. Ari ita, ora o tavauruva iria iravu oirato oueve, oa iava viapau oiso viria vai purapaeve. Uva ragai vo rugooaro-a vao-ia oa-ia oiso puraparai, Vearopai rutu voeapa vosa viapau ora oupaave. Eake iava? Uvare oiso rugoopaarai, Vosa oisi raga eisi toupaivora, uvuipaii ra otavakarovivu vatavatapaive varapa ora airereipaoro. Vaopa teapi vo tavakarovi evara takutakuvupaise vao iare riro tavaka oa epao vo vokio-ia vigei rutu vaaro.

<sup>29</sup> ♦ Ragai vo reoaro vituaro-a vao-ia oiso-ia. Araoko irara oaa, vuuta vao potekupai vigeipa vo rasio-ia. Eva-a oa sirova voeao oea ora oupaaveira uvui iraopaaai ra oiso rutu toupaive osa riako ou asa irara Pautoa-pa kovopaoro. <sup>30</sup> Ora voeao oea gaupaaiveira, oea vo vokio oiso rutu tou iraopaivere osa voeao oea viapau tavaka vovouro vai oupaive ora siraoara vai Pautoa-pa kovopaoro. Ora voeao tapo oea agesipaaveira, oea uvui iraopaaai ra oiso toupaive vo vokio-ia osa voeao oea viapau rorupaaive Pautoa-pa kovopaoro. Ora voeao oea sara kovoro purapaaveira, oea uvui iraopaaai ra oiso rugoopaave Pautoa-pa kovopaoro, Viapau oiso ora vigei ragapa moni oupavioveira. <sup>31</sup> ♦ Ora voeao oea varao-ia kovopaiveira vo rasio iava vara oea uvui iraopaaai ra oiso rutu toupaive, Evoea oea viapau oiso goruvira rutu varao-ia pitupaaiveira vo rasio iava vara. Vao vituaro iava uvare tutuu piepai vo rasiopa oiso ra ora tavariooro pisavira rutu ora karekepe.

❖ 7:17: Ro 12:3; 1 Ko 4:17    ❖ 7:22: Jo 8:32, 36; Fm 16; Ef 6:6    ❖ 7:23: 1 Ko 6:20    ❖ 7:29: Ro 13:11-12

❖ 7:31: 1 Ko 9:18; 1 Jo 2:17

<sup>32</sup> ♦ Vaopareasiparai oiso, Teapi orugooroi visii pugu piepaive. Uvare oiso ruipaparai ra oiso rutu toupata osa ro ira viapau riakova vai oureve. Ira katai rugoo raga sirova utuparoi. Oire rera-a eera ira uvuiparoi ra Turaro vo kovoaro purapareve. Eake iava? Uvare rirovira rutu oiso ruipaparoi ra Turaro roru piepareve rutu ora rera-ia. <sup>33</sup> Ari ro ira riako ouro, ira kovoparevere moni oupaoro valuava roru piepasa. Oire uva vo kovoro-a evara oara-ia ora pugu pieparoi. <sup>34</sup> ♦ Uva oisi-a eisi osa piepaoro vo rugooreiva touparevere oiso, Turaro-ia orugoovu, ari valuava-ia orugoovu. Ari vosa tavauruva raga, oire ra rera raga Turaro vo kovoaro purapaeve. Eake iava? Uvare oira-a eira iria Turaro vo reesiaropa ruipapaoi vao oa oiso toupai, Rera oiraaro rutu. Ari o oira oupava iria kepa tokirore rugorugopaoeira ora ovii vure tapo ora orekerovu. Uvare oiso ruipapaoeira ra valuato roru piepaeve.

<sup>35</sup> Oreoa vao-ia oa purapaavoi visii varaa oirao pie vovouro tauvapaoro. Viapau oiso visiire korukoruparai vearo pitupituro-ia. Viapau. Ari ragai vaopa ruipaparai torevoko pitupitu rutu, oiso ra va purapata ora tovopaoro vo Turaropa kovopasa. Oa-ia viapau oiso oavu avu vai uvuipai ra visiire korupape rera vo kovoaro purapa arapa.

<sup>36</sup> Oire vaviopavira vo reo vatepaavoi voeaore oea ora ousapa reesi rova toupavoi vore utupaua. Oire vosa vaiterei evaiterei oiso vo reesiva ora ousapa toupavoi oiso vovousi katai vovou raga sirova utuoro, Vearopai ra viapau ora ouve. Oire ra va iava oirato oiso ora rugoo piero, Ae asi viapau oiso vearo vovou-a vao-ia oa purapaavoi ragai raga oira vo ruipaaro korupaoro. Oire vosa evo rugoo sirova uturoera vorevira, viapau oiso vuria vaipe vaiterei-ia vo rara ora ousi. <sup>37</sup> Ari vosa irai ora irai raga oruipaiaro sirova utuoro oiso puraro, "Viapau uvuiparai ra riakoa vai oua." Oire vosa uvuiparo rutu oiso ra ora rera iava varaua vo ruipaaro rutu-ia putereve vo ruipao oa riako ou ruipapape, oire eva-a oa iava viapau uvuiparoi ra iriai tavauruva vai oureve. Uva oisi-a eisi osa ragavira vearpai rerapa. <sup>38</sup> Vo reoro rutu isivaaro iava oiso puraparai, Vosa ro oirato ira o tavauruva oureve iria-ia rera vaarova ora ousapa reesi toupaeve, oire ra va-ia viapau vuria vaipe vaiterei-ia. Ari ro ira viapau oiso riako vaiaro oupareve, ira oiraopavira rutu vearo vovou purapareveira.

<sup>39</sup> ♦ Ari vosa o riakova iria ora oira reraaro queve, oire ra rera tapo toupaeve vokiara rutu-ia. Viapau uvuipaoi ra rera kavueve vo osa toootovira raga toupareve. Ari vosa kopii rovoro, uva-a eva uva uvuipaoi ra ora oira vo ruipaaro sirova utuoro iravu raga queve ita. Ari vao raga oiso-ia osa iava viapau uvuipaoi ra iravu queve ro ira viapau Jisas oirao piepareveira. <sup>40</sup> Ari vosa oira ou asavira toupaeve, oa iava uvuipaoi ra oiraopavira rutu roruvira raga toupaeve. Eisi osa ora ragai raga vo rugoaro toupai. Uvare oiso taraiparai, Pauto reraaro Tugoropato Uraurato osa tapo vo vovouaro toupaveira.

## 8

*Varuere Kare Oisoa Tauopave Tokarasi Irarapa*

<sup>1</sup> Visii vo akearo pukopaa vao iava aioara oara-ia korouupaaveira tokarasi irarapa voea-ia vuurapa vaisi purapaoro. Vao iava uvare oiso purapataveira, "Igei orekerovu rutu-ia taraiapaei." Ari ita, visii vo reoroaro oiraopai. Ari vao raga vo osa ro ira ora rera-ia rugooparo oiso, Riro taraito-a ragai. Eera-a ira ora vaisiaro rei pie ragapareveira. Ari vosa vereopa vovou rutu purapareve, oire ra ora rera vaaro vearo pitupitu goru piepareveira rutu. <sup>2</sup> ♦ Ari ro oirato ira oiso puraparo, "Iu osa taraiparai oiso, Ragai-ia taraiapaei." Ira raga ita-a eera apotapa taraiapa. <sup>3</sup> ♦ Vo osa ro ira Pautoapa siraos iraoparo, ira raga ita-a eera ira-ia taraiaproveira Pauto. Oa iava rerare oiso puraparoveira, "Ragai reraaro-a ro-ia oirato."

<sup>4</sup> Oire vigei vao-ia taraiapavioveira rutu ro iava tokarasi, Ira ovoovovira vaopa oiso toupareveira, oa viapau toupave rera iavirava. Ora tapo vo osa oiso taraiapavioveira, Kataitoa raga toupareveira Pauto. Viapau iraiei ita. Oire uva apeisi-a? Uvuipavieirao voeapa korouupa varuro aiopape, eke? Uva viapau. <sup>5</sup> Ari ita, riro irara toupavoi voeao oea vaisipaveira oiso, Pau irara ora turaro irara voeao vova vo rasio-ia ora

♦ 7:32: 1 Ti 5:5   ♦ 7:34: Lu 10:40   ♦ 7:39: Ro 7:2; 2 Ko 6:14   ♦ 8:2: 1 Ko 3:18, 13:8-9, 12   ♦ 8:3: Ga 4:9; Ro 8:29

oiso vuvuiua-ia. <sup>6</sup> ♦ Uva oiso vearpai, Viapau uvuipavie i ra voea-ia rugorugooara oavi tovopape, uvare vigei reraaro-a ro Oiraopatoa rutu Pauto Aite kataitoa raga. Ira orekerovu rutu purareva. Ora vigei tapo purareva ora rerapa, oisore ra rera vaisiaro rei piepape tootoovira toupaoro. Ora tapo ro kataitoa raga Turaro vigei reraaro Jisas Krais. Ro ira iavirava Pauto orekerovu rutu purareva. Ora vo osa rera vo goruaro iavirava tootoopavioveira. Ira vigei rutu oiso piereva ra oiso toupape, Vigei-a rera voeaaro rutu.

<sup>7</sup> Oire uva apeisi-a vo aioro-ia varao oara vatepaiveira voeapa evoea tokarasi irara? Ari ita, voari rovovira rutu uva oearovu visii iava oisoa aio vatepaave voeaopa tokarasi irara. Uva voea vo rugorugooroaro touvira karu uviro asavira toupaiveira. Oa iava touvira viapau roroipaaveira Pauto-ia taraipaoro vo vokio. Vao vituaro iava vosa korouupa aio vorevira aioive, uva va-a eva oa-ia oiso rugoopaaveira, Ora voea iava sopaura vuivui piepaiveira. Eake iava? Uvare viapau oiso goruvira rutu ora voea vo rugorugooroaro goru pie rovopaveira. <sup>8</sup> ♦ Oiraopavira rutu viapau oiso uvuipavie i ra aio kavupaviera rutu, torevokovira oiso toupape vo Pauto osireiaro-ia. Uva viapau oiso oavu avu vaiei vosa viapau vo aioro evara aiopape. Ora viapau oavu avu vai vo rara vara aiopape. <sup>9</sup> Ari ora airerei iraopata vaopa, vosa eisi rugoopaoro ora visii vo ruiparoaro raga sirova utupata. Teapi visii vo vovouaro sirova utuoro oearoi koveave suria-ia, voeao oea-ia raverave vovou oirao piea toupaivoi.

<sup>10</sup> Vosa visii tapo irai toupare ro ira viapau vearovira ora rera vo rugoaro rovirie- pareve, oire ra visii uvupa osa oiso purapata, "Vigei rutu-ia toupaivoi taraia." Oire va-a eva oa sirovava visii siituepareve ovusa aiopaoro paupata tokarasipa kepa-ia. Oire uva apeisi-a va-ia vao? Vosa rera tapo oisi aiota, ra va isivaaro iava oiso rugooro vai pasi, Easi suria vai-a vao oa puraavoi. <sup>11</sup> Uva oisi-a eisi osa piepaoro visii raga ita uvuipatai ra iravivu araokoto oavisii kove pieta ro irapa Krais kopiicroepa. Uvare visii vo taraiaro- a oa-ia rera vavagisi pietavoi. <sup>12</sup> Visii raga ita vuri vovou purapataveira Krais-ia, vo osa ora visii araoko iraraaro kove pieta voeao oea viapau vearovira taraipaave vao purapaoro torevoko vovou rutu. <sup>13</sup> ♦ Uva ragai raga vo rugoaro-a vao-ia, Vosa tokarasi vaaro aioa varua aiopaoro ora ragai araokotoaaro kove piea suria iare. Uva oisi-a eisi osa iava uvui iraoparai ra varuarapa kavu ovoia vaopa oiso, teapi araokotoa oaa suria vai purareve.

## 9

*Pol Oisoa Rorupareve Vo Rara Viapau Moni Ouparo Vao-ia Rera Vaaro Aposel Kovo*

<sup>1</sup> Viapau oiso iraiei ira uvuiparoi ra ragaipa reiro, uvare ragai-a aposelto Pautoa ragapa kovopato. Vo osa Jisas vo reoaro vigei reraaro Turaro kaepaaveira, ro ira kekeavora ora ragai vaitereiaro iava osireitoarei. Uva apeisi-a? E viapau visii-a ragai vo kovoaro vo kuearo vao aposel kovo? <sup>2</sup> Ari ita, vosa oearoi viapau ragai eveipave oiso purapaoro, "Easi viapau aposelto rera ro." Uva apeisi-a visii? Iu, uvui iraopatai ra ragai-ia taraipata, Aposelto ragai. Eake iava? Uvare visii vaaro-ia oirao piea Turaro tapo ora tavosipatai. Okuea-a eva ragai vo kovoaro iava vao aposel kovo.

<sup>3</sup> Vosa oearovu ragai reroaropaveira ragai togapaoro oreorovu-ia, uva voea vo reoroaro pukopaaveira oiso purapaoro, <sup>4</sup> ♦ E viapau ragaipa oiso torevokopai ra aioara vai oupaa, ora uukoara vai vo oirao pie vovou irara ruvara-ia, uvare ragai vo kovoaro-a vao lotua-ia? <sup>5</sup> E viapau ragaipa oiso torevokopai ra oiso piea osa oearovu aposel irara, ora voearo Turaro araoko iraraaro, ora ro Pita oea vatua riako tapo vokapaoro avaaepa vairo oirao pie vovou riako? Uva apeisi-a? E viapau uvuiparai ra oisi piea vao-ia ragai vo vokaaro? <sup>6</sup> Uva apeisi-a? E vegei raga ora Banabas uvui iraopaveie i ra kovopave aio voripasa varao vegeipa ora orekerovu, vo osa viapau oearovu oisi oisoa piepave? <sup>7</sup> E upo purapato aio voripasa kovopareveira ora orekerovu vo osa viuru kovo-ia toupareve? E iraiei ira aio kovo vai puraparevoi, ra viapau oai iava opoa vai aioreve? Uva apeisi-a? Iraiei oiratoa vai ira sipsip kare vai tokipaoro oeai iava roro pigiparoveira, ra viapau

♦ 8:6: Mal 2:10; Ro 11:36   ♦ 8:8: Ro 14:17   ♦ 8:13: Ro 14:21   ♦ 9:4: 1 Te 2:6; 2 Te 3:8-9

oviroi-ia ukaioro vo vo kare iava, raa? Iu. Vara rutu varao oovoovo reoro oara oiraopai. Ari igei tapo uvuipaiei ra tauva oupaio vo lotupa irara ruvara-ia Pauto vo kovoaro purapaoro.

<sup>8</sup> Oovoovo reo-a eva oa puraavoi varaore rugoopaoro vo rasio iava. Ari vosa Reo Taisire ora rugoo piera, oire ra vava vaeavira rutu vo reo vao puraa vao iava aposel kovo-ia vori oupa. <sup>9</sup> ♦ Uva vigei uvuipavieei ra Moses vaaro Reo Taisi vieipe oa oiso purapapeira, ‘Vo kareo bulmakau kare oea wit-ia tasiasipaoro uvuipaai ra vearo takuraro kareke piepaive. Okarea tapo ita uvuipaai ra vo takuraro aiopaoro vokapaive kovopaoro.’ Uva apeisi-a? E Reo Taisi vaiei va iava eva vo uvare Pauto vearo vovouparoveira vo karere, vo rara vara aiopave, eke? <sup>10</sup> Viapau. Ari vigeire va-a eva Reo Taisi oa oiso purapapeira. Oiraopavira rutu ro oirato ira aio kovo aruo rovoreve, oire ra iravu ro oirato vo kovo opoaro tatereve, aiterea rutu uvuipasiei ra vaeavira kovopasi oiso rugoopaoro, Oiraopavira rutu uvare aiopaveare rara vovio utupauavi vegei vo kovaaro iava. <sup>11</sup> Ari ita, takuraara vikiavora rasitoa-ia ro visii iava sopaura. Otaraia vao takuraara oa vova Tugoropato Uraurato uriopapeira. Uva apeisi-a? E viapau uvuiparai ra ora ragai vo kovoaro iava kueara vai oua vo kueo iava oa visii-ia toupaiveira, raa? <sup>12</sup> E torevokopapeira voearopa oearovu oearoa visii ruvara-ia orekerovu oupaiveira ora voea vo pauroaro vearopasa? Uva apeisi ragai? Ragoa uvuiparai ra pute pievira rutu oisi piea eisi.

Ari ita, viapau oiso ora ragaire rugorugooparaveira ragoa oiso toupaaveira. Eagara vosa riroa tavaka oupaa, ra viapau oiso visii ruvara-ia oiso arepara oiso, Ragai tauvapata. Uvare oiso rugooparai, Teapi oisi oai iava oearovivure korukorupara vao uvupa arapa Vearo Siposipo Krais iava va. <sup>13</sup> ♦ Visii voeao-ia vearovira rutu taraipataveira oea Tugoropa Kepa-ia aue Tempel kovopaiveira. Uva voa raga aio oupaaveira ora voeapa. Ora voeao tapo oea koruoupa aioro purapaveira vo Tempel-ia. Oire ra voava okurorovu aiopave ora voea raga ita varao oara kavupa piroveira. <sup>14</sup> Uva oisi ragavira Turaro vo reoaro tapo riro goru reo rutu oiso purapapeira, ‘Voeao oea lotupa irarapa siposipopaveira vao iava Vearo Siposipo, uva voea raga ita lotupa irara ruvara-ia orekerovu rutu oupaiveira ora voea vo pauroaro rekopasa.’

<sup>15</sup> Uva viapau oiso oisi voeao lotupa irara oisoa piepaa vo reo sirova utupasa eva riro goru reo rutu, oisore ra oisi ragai tauvapave. Uva viapau oiso oisore vislipa vo pasio rigatopavoi ra oisi ragai tauvata. Viapau. Eagara. Vosa kopiravere oisi oreoi pura arapa vaore rugoopaoro oiso puraparai, Teapi irai ita oiso ragai vo tavitaviroaro vo ora ragai iava akukupapa piepareve. <sup>16</sup> Ari ita, viapau oiso ora rei vaisi pieparai oiso reopaoro va iava vao ragai vo vovouaro oa purapaveira Vearo Siposipo iava siposipopao. Viapau rutu. Eake iava? Uvare Turaro ragai arureva vo vovou purasa vao-ia. Oiraopavira rutu. Siraovira rutu vosa viapau rera vo reoaro sirova uturaeri Vearo Siposipo iava siposipopao. <sup>17</sup> Vosa ora ragai raga vo ruipaaro sirova uturaeri vo kovo purasa, osa-eisi osa iava visii arepaavori oiso ra ragaipa voriara vai vatepata. Osa viapau oisi eisi. Viapau rutu. Ari ragai vo kovo purapaveira uvare Pauto ragaire oiso puraroepa, “Uvuipaei rutu. Oa iava viipa vo kovo vatepaavoi, oisore ra Vearo Siposipo iava siposipopari.” <sup>18</sup> ♦ Oire uva akuku visivi raga toupaaveira vo ora ragai raga vo touaroria. Uva aa vo voria rutu-a vao oa uvuipapeira ragaipa? Vao raga vo osa rorupaaveira rutu Vearo Siposipo iava siposipopao. Vao oa-ia viapau voria vaiei. Uvare viapau visii arepaavoi oisore ra ragai vateta voria vai va-ia vao ragai vo kovoaro.

### *Pol Oisoa Oiso Toupareve, Kovopato Oirara Rutupa*

<sup>19</sup> ♦ Viapau oiso reitoa vaiei ro irapa kovopaaveira. Viapau. Ari ora ragai vo vovouaro raga sirova utuparaveira vaore, ra oiso toupaa, Ragai oirara rutupa kovopato. Vaore oiso ra ragai vo kovoaro iavirava riro irara vai iava sopaura vai pore pirovereia Jisas oirao piesa. <sup>20</sup> Vosa oisoa reo vatevatepara vo Jiu-pa, uva voea tapo toupaoro oisoa voea vo pitupituroaro sirova utupara vaore, oiso ra ora voea iava sopaura oaiive porepaive. Ari ita, oiraopavira eisi osa iava viapau oiso Moses vaaro Reo Taisi ragaipa reipape. Ari voea raga vo reoaro sirova oisoa utupaoro va sirova utupara vare vao rugoopaoro, oiso ra voea

◊ 9:9: Diu 25:4; 1 Ti 5:18    ♦ 9:13: Lev 6:16; Diu 18:1    ♦ 9:18: 2 Ko 11:7, 12:13    ♦ 9:19: Ga 5:13; Mt 18:15

iava sopaura oaiive porepa piro Jisas oirao piepasa. <sup>21</sup>◊ Oire uva oisi-a ita eisi osa ragavira voeao tapo ratau tou irara oisoa toupaau uva tapo ita oisoa oisi voea vo pitupituroaro sirova utupara, oea oisoa viapau Moses vaaro-ia taraiipaave Reo Taisi. Vaore rugoopaoro oiso ra ora ragai raga vo pitupituroo iavirava ora voea iava sopaura oaiive porepaive. Ari oisi eisi piepaoro viapau oisoa Pauto vaarore Reo Taisi viapau oisoa ovaupara, vo osa touvira Krais raga vo reoaro sirova oisoa utupara. <sup>22</sup>◊ Vosa voea tapo raverave rari irara toupaaveira, uva ora ragai vo vovouaro oisivio rutu piepaaveira osa voea vo vovouroaro. Eake iava? Uvare oiso rugooparaveira, Oearovi vai voea iava uvuipaaai ra Jisas vo reoaro uvuive va-ia gorua ouoro. Oire uva irou irara irao-a oea tapo uvuiparai touoro ora ragai vo vovouroaro oiso piea osa voea. Ra va iava ragai vo pitupituroo kekepaoro ragai vo reoaro uvupaive oiraopavira rutu ora voea iava sopaura-ia Jisas oirao piepasa.

<sup>23</sup> Eisi osa iava ragai vo pitupituroaro evara purapaaveira, uvare ragai vo ruipaaro-a oiso ra Vearo Siposipo kosi piepaa. Ra va iava rorupaa oirara kekepaoro voeao oea ora voea iava sopaura oaiive vorevira porepaive va uvupaoro.

#### *Uvui Iraopavie Ra Goruvira Ikaupaoro Vo Pou pavio Uva Ovoiopa Reesi Toupaiveira*

<sup>24</sup>◊ Voeao-ia tarai iraopata oea ora paupaupaoro ikaupaiveira. Oire uva riro irara rutu-a oea ikaupaiveira, ra kataitoavi raga voea rutu-ia putereve, eera-a ira oisoa voria oureve. Uva visii tapo ita oisi uvuipatai ra oisi ora varovaropata ikaupaoro vo Krais vo raivaaro-ia. Ra opeita raveravepata ikaupaoro vo voriro oavisii ou arapa Pauto ruvara-ia. <sup>25</sup>◊ Uva oisi-a eisi osa ro ira paupau ikauro purapareve ira uvuipa ra rearea asavira ikaupareve varaua oara tarai piepaoro oiso rugoopaoro, Rorupaavere rara oearovu rutu-ia putea. Ororua-a eva rera arova opesipere. Ari vosa vigei oisi piepape, oire ra va iava vigei vaaro rorua ororua vatepareira vigeipa Pauto oa viapau oiso opesipe rutu.

<sup>26</sup>◊ Uva oisi-a eisi osa vituaro iava torevokovira rutu ikaupaaveira reesia-ia tugurapasa. Iu, uvare oiso rutu toupaau osa ro ira vavaearei vuvukopareveira iravu tosa. Oa-ia viapau oiso riroirovira vavaearei vikivikipaaveira. <sup>27</sup>◊ Viapau. Ari ora ragai iava varaua goru piepaaveira voua tarai piepaoro. Osa iava uvuiparai ra ora ragai iava varaua vo ruipaaro vara piepaa vaopa oiso, teapi oearovu ragaire oiso purapaave, “Rerape. Ira viapau uvuiparoi.” Vo osa oisi eisi puraave ragaire, uvare raveravevira opesi ragarai.

## 10

#### *Vo Toupaai Kokarapa Iava, Teapi Va-ia Kovevio*

<sup>1</sup>◊ Oavu-a vao-ia oa toupaai vo vigei soporepasa voeao iava oea viapau voria oaiive ouiva vo Pauto ruvara-ia. Araoko irara oaa, visii rugoo piepaavoi voearire Jiu aao iraraaro oea Moses sirova utuaepa kuvala tapi, vo uva viapau aue uukoara vai ora aue aioara vai. Uva voa-a vo uva oisoa Pauto voea virivarivira rutu voea tuvetuvepareve rukuta-ia. Oa iava Ret Si iviroiva uvare raakaopa. <sup>2</sup>◊ Uva oisi-a eisi osa pieoro ovoovovira Tugoropa Sisu Baptais ouiva Moses ruvara-ia vo avakava-ia Ret Si ora rukuta. Oa-ia oiso ora reesiaepla, Voea evoea Moses tapo ora tavosiaepla. <sup>3</sup>◊ Uva voa-a vo uva vaeavira voea rutu katalai aio rutu oisoa aiopaiive, vao oa voeapa oisoa karekepape vo Krais vo goruaro raga-ia.

<sup>4</sup>◊ Ora voea rutu oisoa kataia rutu-ia uukoa ukaiopaave vaeavira, vao oa voeapa oisoa karekepape vo Krais vo goruaro raga-ia. Ari ita, vo ovi-a eva uuko ovi oa avekeva iava kosi piropa oa-ia oisoa ukaiopaave. Uva ragai ovoovovira aveke vaisipaavoi, uvare rera raga-a eera Krais ira oisi toupareveira oiso osa aveke. Rera raga-a ira oisoa voea tauvapareve, ovusa viapau oiso rera vo tauvaaro oisoa eveipaiive. <sup>5</sup>◊ Ari Pauto viapau oisoa rorupareve rutu voea iava oearovu-ia riro irara rutu. Oa-a eva vituaro iava oisoa voea raga kopiipaave uvarovu voraro kuvala tapiro vo voeapa vovouaro ouaive ou arapa vo Pauto ruvara-ia.

<sup>6</sup>◊ Osiposipoa vao oiso ovoovovira vigeipa toupaiveira vaopa, teapi vigei tapo oisi orekerovu vuriara sirova avapavio. <sup>7</sup>◊ Ora oiso tapo, teapi vigei vao tokarasi irara-ia vuurapa vaisi purapape oiso osa oearovu voea iava oisoa piepaise. Oa iava Tugoropa Vuku voea iava oiso purapapeira, ‘Pauaepa aiosa ora ukaiopasa. Oire uva va isivaaro iava

◊ 9:21: Ro 2:12, 14    ◊ 9:24: 2 Ti 4:7; Hi 12:1    ◊ 9:27: Ro 8:13; Kl 3:5    ◊ 10:1: Eks 13:21, 14:22, 29    ◊ 10:4:

Eks 17:6; Nam 20:11    ◊ 10:7: Eks 32:4, 6

toreaepa pupipasa.' Vo aio-ia oa puraiva tokarasi irara-ia vuurapa vaisi purapaoro. <sup>8</sup> ♦ Ora vaopa tapo oiso, teapi otopa pitupitu purapape oiso osa oearovu voea iava evoea. Evo vuriro voea varaaro oara vituaro iava riro tukuro rutu kopiepa katai voki raga-ia oiso osa vo tukuo-ia 23,000 ae oira. <sup>9</sup> Vigei vao viapau rutu uvuipavie i ra Turarore aveave reoro vai purapape oiso purapaoro, "Ae apeisi viapau vearovira vigei tokipareveira Pauto," oiso osa oearovu voea iava oea oisoa oiso purapaave. Uva oisi-a eisi osa pieivoiva, rakoru kare voea upoiva, uvare vo kare siporeva Pauto. <sup>10</sup> Ora viapau rutu uvuipavie i ra rera-ia Turaro vakuvakupavio oreorovu purapaoro vuriara rera-ia, oiso osa oearovu voea iava oea oisoa rera-ia vakuvakupaave. Ari ita, eisi osa piepaivoiva, opesiaeapa, uvare Oira Upopato Enselto voea rutu uporeva.

<sup>11</sup> Oovoovoroa rutu-a evara oara toupaiveira vigeipa, uvare oearovu vara rigatoiva, oiso ra voa toupaive vigei vosipasa rutu varapa. Vaopa teapi vuriara purapape varai oiso osa voea voari. Uvare vigei-a vao toupai vo vuutao iava vo voki-ia oare tutuu piepai Ovoiopa Voki. <sup>12</sup> Oiso ragavira iava, teapi oiso keapaoro oiso rugoopata, Goruvira torepatai. Teapi oisi iava koveta. <sup>13</sup> ♦ Evo pitupituro oara karekepapeira vigei-ia kokarapasa. Uva viapau oiso vigei raga-ia, ari oearovu tapo-ia voeao voraro rutu. Oa iava Pauto visiire viapau isivaparovere. Osa iava kokarapa vovou viapau uvuipai ra visii-ia putepaive. Viapau. Ari visii tauvaparevere vokiara rutu-ia. Uvare rera raga ira reo ovoi rera vaaro oirao piepareveira. Oa iavirava visiipa gorua vatepareveira uvuivira rutu visii tauvapaoro vaopa oiso, teapi raveravepata. Ora oiso osa uvuiparoi ra oraivai purareve visii virivarisa vao oa iava uvuipatai ra kokara-ia vatavatapata.

#### *Viapau Rutu Uvuipavie i Ra Pauto Oirao Piepaoro Vurito Uraurato Tapo-ia Raripavio*

<sup>14</sup> Oisi-a eisi osa iava vate irara oaa, visii vatatopo piepaavoi oiso ra tauai visivi rutu toupata vo pitupituro asavira tokarasiara-ia vuurapa vaisi purapa. <sup>15</sup> Vearovira rutu rugoo iraopata. Osa iava uvuiparai ra visii-ia taripaoro visiire oiso purara, Ragai vo reoroaro rovirieipata oiso, E vearovira avu rutu visii tavipaavoi oiso? <sup>16</sup> ♦ Vo osa kovukovu aio purapapeira vao komunion, uva kap-ia pitupapeira. Oa iava oirava Turaro arepape, oisore ra oirava Pauto vigei rutu viraakoreve. Oa iava uvuipavie i ra rera-ia Pauto vearo vaisi purapape. Uva apeisi-a? E oiraopavira eisi piepaoro Krais tapo ora tavosipavioveira, rara vare ovoovovira Krais revisiaro-ia ukaiopavio, o revisiva iria parueva vo vigeipa. Iu. Ora vao bret-ia oa kakuakupapeira va aiopasa. Uva apeisi-a? E Krais tapo ora tavosipavioveira ovoovovira Krais iava varaua aiopaoro eisi? Iu! <sup>17</sup> Oiraopavira rutu vigei-a riro irara rutu oirara, ari kataiua-ia varaua karekepavioveira vao-ia lotua, vo rara kataia raga aiopape bret-ia. Eake iava? Uvare ora tavosipavioveira kataivira rutu kataia bret-ia aiopaoro eera raga ita Krais.

<sup>18</sup> ♦ Voearire rugoopata voeao Jiu oea oisoa korouupa aioro iava aiopaise. Vo aioro oara oisoa vatepaive Pautoa-pa. Osa eisi pieiva oa-ia vigei soporeiva. Oa iava uvuipavie i ra oiso rugoopavio, Akoea ora tavosiaeapa rutu Pautoa tapo. <sup>19</sup> Oire uva apeisi-a oiso osa puraparai voeaore ratau tou irara oea tokarasi irara vo pitupituro sirova utupaaveira? E akukuvira raga toupaiveira tokarasi irara, ora varao aioara oara-ia oisoa voeapa korouupaave, eke? <sup>20</sup> ♦ Iu. Akukupapara raga-a evara oara-ia viapau gorua vai. Ragai vo reoaro vituaro-a vao-ia oiso-ia, Evo aioro oara oisoa tovopaive eravaoara-ia tokarasi irarapa vara-ia korouupaoro, viapau oiso Pautoa-paa. Osa-a eisi osa iava oiso ruipaparai ra viapau oiso voare avapata vo uva tokarasi irarapa korouua purapaiveira. <sup>21</sup> Viapau rutu uvuipatai katai vovou purapaoro ra vairei-ia ukaiopata kaprirei oiso, O iria vatepapeira Turaro vaaro-ia komunion, ari o iria vatepaveira tugara kare-ia vuurapa vaisi purapaoro. Uva viapau oiso uvuipatai vo aiorei iava aiopata oiso, vo aio Turaro vaaro komunion, ari vo aio tugara kare-ia vuurapa vaisi purapaoro. Oaiore-a evarei ora vareipa pisavira rutu toupaiveira. <sup>22</sup> ♦ Easi pasi visii vai oiso vovoupataveira ra Turarore vuri vovou piepata tokarasi irara-ia visii vo rugorugooaro tovopaoro, ra va iava visiire

❖ 10:8: Nam 25:1-9 ❖ 10:13: 2 Pi 2:9 ❖ 10:16: Mt 26:26; Ap 2:42 ❖ 10:18: Lev 7:6 ❖ 10:20: Diu 32:17;  
Sam 106:37 ❖ 10:22: Ais 45:9

kasipuparo, eke? E vigei vo goruaro Turaro vo goruaro-ia putepaiveira, raa? Asi viapau rutu.

### *Vokiara Rutu-ia Uvui Iraopavie Pauto-ia Vuurapa Vaisi Purapasa*

<sup>23</sup> ♦ Ari ita, oearovu vigei iava oiso purapaaveira, “Uvuipavie ra opitupiturovu purapape, ora vigei vo ruiparoaro sirova utupaoro.” Oiraopai eisi. Ari viapau oiso opitupiturovu rutu vearovapeira. Uvuipavie ra opitupiturovu purapape. Uva vao raga uvare viapau oiso opitupiturovu vo vovouroaro vigei tauvapaveira. <sup>24</sup> ♦ Opeita iravu vigei iava tapo ora rera raga ora tokiparo oearovivure rugoo asavira. Viapau. Ari eera uvui iraoparoi rutu ra oearovure rugoopaoro voea tauvapareve tapo vearo pitupituro raga purapaoro.

<sup>25</sup> Viapau oiso oavu avu vaiei vo oaravu rutu-ia varuara, varao oara voripataveira uua-ia vara aiopasa. Ari vao raga vo uvare viapau korouopa pitupiture rugoopaoro vara viapau ake rovopataveira oiso, “Ovu iava vao-ia?” <sup>26</sup> Vao iava uvare Tugoropa Vuku oiso purapapeira, ‘Rasito ora orekeroru rutu varao rera-ia toupaveira Turaro varaaro.’ Oa vituaro iava uvuipavie ra oaravu rutu varuara aiopape.

<sup>27</sup> Vosa ro ira-ia viapau oirao pie vovou vai toupave viire kaokaoro aiosa rera tapo, ra va iava ora vii vo rugooaro sirova utuoro avau. Oire vosa viipa aio koko purareve. Vearovai va aio ragari. Opeita rera akepari oaravu-ia akeara rirovira oisi varare rugorugoopaoro. <sup>28</sup> Ari vao raga vosa irai vii tavi rovoreve oiso, “Korouopa aioa vao-ia aepea tokarasi.” Oire ra va iava viapau oiso aiori vaopa oiso, teapi rera vo rugooaro piro pieri varao iava oirao pie vovou vo pitupituroaro. Ora vao tapo vosa oiso ora sovota, Vuria-a vao, ra opeita va aiopata. <sup>29</sup> Oire uva viapau oiso visii vo rugorugooraore oiso purarai, ari oearovua vo rugoroaro-a.

Vo osa oisi vo reo iava oearovu oiso vaio puraave, “Eakere ora ragai vo rugooarore korurai vao oa-ia oearovu vuri pieavoi pasi vo aio-ia ora orekerovu avu vai rutu? <sup>30</sup> Vosa Pauto-ia vearo vaisi puraa vo aio iavirava, uva apeisi irai uvuiparoi ra vo aio iavirava ragai togareve?”

<sup>31</sup> ♦ Eisi osa iava oiso visii tavipaavoi, Vo osa eake aio aiopata, ora eake uuko-ia ukaiopata oara rutu-ia uvui iraopatai ra vara rutu aiopata ora vara rutu-ia ukaiopata, oisore ra visii siituepaoro oearovu visii-ia uvuipaii ra Pauto vaisiaro kae pieive. <sup>32</sup> Torevokovira rutu tootoopatai. Oa iava viapau uvuipaii ra vuria vai karekepe voeao-ia Jiu, ora voeao tapo ratau tou irara, ora oirao pie vovou irara voeao Pauto voeao. <sup>33</sup> ♦ Oiso vearovai rutu vosa ragai vo pitupituro vioepata. Oiso osa akeakevira raga ragai vo touaro purapaaveira oearovu roru piepaoro. Ari ita, viapau oiso ora ragai ragare rugooperaveira vaore, oiso ra vearoa vai oua. Viapau. Ari vaore oiso ra oearovu rutu vearoa ouive. Oa-a evo vituaro iava oearovu uvuipaii ra ora voea iava sopaura oaiive poreive Jisas oirao pieoro.

## 11

<sup>1</sup> ♦ Osa vituaro iava eisi visii tavipaavoi, oisore ragai vo pitupituro vioeta, oiso rutu osa Krais vo pitupituro vioepaaveira.

### *Kukue Tavurupa Pitupitu Vao Lotua-ia*

<sup>2</sup> ♦ Visii-ia vearo vaisi puraavoi, uvare ragai roru piepataveira ragaire rugoopaoro ragai vo siposipoaro sirova utupaoro vao oa vateavora visiipa. <sup>3</sup> Uva ragai vo ruipaaro oiso toupai, ra roroiovira rutu vo reore rugoopata oreoa oiso purapai, Krais-a toki ruvarautoa rutu ira oearovu rutu-ia oirara putepareveira. Oiso rutu osa valuato valuava-ia putepareveira oirapa reipaoro. Oiso osa raga ita Pauto Krais-pa reiparoveira. <sup>4</sup> Osa iava ro ira variriparo, eke Pauto vo reoaro iava siposipopareve kosi pievira oirara rutu osireiaro-ia, vosa ora rera iava kukue ruupareve, oa-a eva oa-ia rera raga uvuiparoi ra ora akukupapa pieparo. <sup>5</sup> Osa raga ita o riakova iria oisi variripao, ora Pauto vo reoaro iava siposipopaeve tapo kosi pievira vo oirara rutu osireiaro-ia. Oire vosa viapau ora oira

❖ 10:23: 1 Ko 6:12; Ro 14:19 ❖ 10:24: Ro 15:1-2; Fl 2:4, 21 ❖ 10:31: Kl 3:17; 1 Pi 4:11 ❖ 10:33: 1 Ko 9:22, 13:5 ❖ 11:1: 1 Ko 4:16 ❖ 11:2: 1 Ko 4:17; 2 Te 2:15

iava kukueva ruupaeve, oa-a eva oa-ia ora oira vatuatoaaro vaisiaro akaipa piepaevi. Oire vosa viapau kukuvaipa tovoeve tavuruvira, ra oiso rutu toupaeve osa o iria ora oira iava orui gagavurievo riroa ariia ouoro. <sup>6</sup> Ari ita, vosa viapau ora oira iava kukueva tavurupaeve vo varoa-ia, oire uva veearopai pasi vosa ora oira iava orui gagavuri rovoeve. Uvare taraipatai oiso, Vosa riakova ora oira iava orui gagavurievo, ra va-ia ora arii pieo oira raga. Uva oisi-a eisi osa iava oiso veearopai rutu oirapa vosa ora oira iava kukue tavurupaeve vo lotupa kepa-ia. <sup>7</sup> ♦ Oire uva viapau oiratopa torevokopai oisi oiso vosa ora rera-ia kukuvaipa tovoreve Pautoa iare lotupaoro. Eake iava? Uvare rera vaaro vuraa oiso rutu toupai osa Pauto vo vuraaro. Osa eisi osa iava uvuipaai oearovu Pauto vaisiaro-ia vuurapa vaisi purapaive. Ari riakova vo vuraaro-a vao, oa iava oearovu oirara oearovu-ia oirara raga uvuipaai ra rei vaisi purapaive.

<sup>8</sup> Vao vituaro iava uvare viapau oiso oirato purareva riakova iava. Viapau. Ari oirato pura rovoreva rovovira rutu. Oa iava utupavira riakova ita purareva. <sup>9</sup> ♦ Uvare viapau oiso oirato purareva riakova iare, ari riakova purareva oiratoa iare. <sup>10</sup> Eva-a oa vituaro iava uvui iraopaoi ra riakova ora oira iava orui tavurupaeve kukue-ia Pautoa iare lotupaoro. Oa iava uvuipaai oearovu oiso taraipaave oira-ia, Vatuato oirapa reiparoi. Ora ra va iava enselpa irara oiso puraave oira kekepaoro, “Vearopai rutu.” <sup>11</sup> Ari oiraopavira rutu vo Turaro vaisiaro sovara-ia toupaoro vigei raga oirara viapau uvuipavieie ra riako asavira toupape. Oisi raga ita riakora viapau oiso uvuipaai ra oira asavira toupaise ita. <sup>12</sup> Oa-a vituaro-a vao-ia vo uvare Pauto riakova purareva oiratoa iava voari rovoa-ia. Osa raga ita oirara kavaupaiveira riakora, oea rutu-a voeao oea purareva Pauto ro ira-a orekerovu rutu vituaro.

<sup>13</sup> Ora visii vo rugorugooroaro roviriei iraopata oiso-ia, E torevokopai riakovapa o iria variripao oirara rutu osireiaro-ia Pautoa-pa ora oruaro tavuru asavira eke?

<sup>14</sup> Vaore rugoopata vo voki iavapa pitupitu oa vigei soporepaiveira o iava geegeeru orui riro kaekaeva. Vo rara oirato oirava geegeeru ariiparo. <sup>15</sup> Ari vosa riakova oirava orui geegeeru toupaeve, oa iava oisoa oearovu oirara oira kekeoro oira-ia vearo vaisi purapaive rorupaoro. Uvare iriapa Pauto vo oru vao geegeerua vatereva vaore, oiso ra vo oru-ia kukue tavurupaeve. <sup>16</sup> ♦ Ari vosa irai ragava kaureo ruipaparo va-ia eva, uva uvuiparai ra rera tavia oiso, Viapau oiso igei aposel irara igoa oiso oai-ia taraipaieie vo rasio iava oa oiso torevokopai vigei rutupa, ora oearoipa Pauto oirara vaiaro lotupa irara vai voearo uvarovu rutu toupaivoi.

### Turaro Vo Aioaro Iava Vao Oa Oisoa Vuri Piepaive Korin-pa Irara

<sup>17</sup> Visii vatepaavoi oreorovu va-ia vao iava osa viapau oiso visii-ia rorupaa oisi iava eisi. Eake iava? Uvare lotua-ia visii rutu ora gurupataveira. Oire voa vo pitupituro purapataveira oara viapau oiso torevokopapeira evara. <sup>18</sup> Uva rovo reo rutu-a vao-ia. Oa iava oearovu ragai taviivora, uvare roopavira toupaoro ora kaureopataveira vo ora visii vo pauroaro-ia. Oa iava oiso rugooparai, O asi oiraopavira vai-a pasi. <sup>19</sup> ♦ Ari ita, veearopai vosa osivi ragavira rugorugoopata, uvare oiso osa ragavira iava uvuipatai ra oearovu ora visiipa eveita voeao oea-ia vearo rugoo ora oiraopa vovou toupaiveira.

<sup>20</sup> Oire vo osa ora gurupata Turaro vo aioaro purapasa vao ovapa aio, oaios eva akaipa piepataveira. <sup>21</sup> Uvare vasevagepavira katakataivira aio rovopataveira oearovivure tue asavira. Osa iava eisi oearovivu ogoevira raga touvira toupaive, vo osa oeavu raga vuku rovoave kokoropaoro spakpaoro. <sup>22</sup> ♦ E viapau kepaara vaiei visii okeparoiaro, oara-ia uvuipatai ra rovovira aio rovopata ora ukaio rovopata, raa? E visii vo vovouaro-a eva eisi, oa iava Pauto voeaaro reroaropaoro voeava kaureopataveira voeao lotupa irara? Oire oisi-a eisi osa iava oearovivu voeao iava arii piepataveira voeao oea aio arapa ogoevira toupaive. Uva apeisi puraparai? Ragai roru piepataveira va-ia oisi eisi eke? Viapau rutu!

### Turaro Jisas Ira Komunion Vatereva Voeaopa Disaipel Rera Voeaaro

❖ 11:7: Jen 1:26 ❖ 11:9: Jen 2:18 ❖ 11:16: 1 Ko 7:17 ❖ 11:19: Mt 18:7; 1 Ti 4:1 ❖ 11:22: Je 2:6

<sup>23</sup> ♦ Uvare Turaro vo taraiaro-a vao oa rovovira rutu visii vateavora vao oa ouava rera raga ruvara-ia Turaro. Otaraia oiso purapapeira, Vo vokiaro Judas vigei reraaro Turaro Jisas kosi piereva vore viurupa irara vavaearo, vo rupao-ia oa-ia Jisas bret-ia pitureva.

<sup>24</sup> Oa iava va kakuakureva va-ia vearo vaisi puraoro Pautoa-ia. Uva oiso puraroepa, “Va vao-ia bret ragai iava varaua, oa-a vouao visii rutupa, oisore ra va aiota ragaire rugoopasa.”

<sup>25</sup> Oire uva oisi raga ita evo aio isivaaro iava kap-ia pitureva oiso purapaoro, “O-ia kap iria agasivira toupae aue-ia wain ovi. Iria oiso toupae ovoovova vaopa Airepa Reo Ovoi Pauto vaaro, oreoa oirao piepaeverea ragai iava o-ia revasiva. Vosa aa vo vokio-ia oira-ia ukaiota, ra oisi va puraoro ragaire rugoopata.” <sup>26</sup> ♦ Osa iava uvuipatai ra Turaro vo kopiiaro vigeipa oirao piepata rutu vo vokiro rutu-ia, varao oara-ia va vao bret-ia aiopata, ora oira-ia o kap ukaiopata vo rutu tugurasa vo vuutao-ia oa iava vo voki-ia vorevira voreroverea Turaro.

#### *Ro Ira Komunion Vuri Piereva, Ira Vo Vuriaro Voriaro Touparai Rera Ragapa*

<sup>27</sup> Eisi osa iava vosa ro ira vurivira vao aioreve Turaro vaaro bret ora ukaioro o iava kap, ira raga ita-a ira vuria purarevoi vareo rutu-ia oiso, Turaro iava varaua ora revasiva.

<sup>28</sup> Visii rutu katakataivira ora visii iava sopaura oavisii-ia uvui iraopatai ra voura sisiro rovota. Oa iava uvuipatai ra ora visii varaaro-ia rugooara oavisii torevokovira Pautoa iare rugorugoopata. Ra va iava taru va aiota bret ora ukaiota kap-ia. <sup>29</sup> Uvare vosa akukuvira raga va vao bret aioreve ora oira-ia o kap ukaioro vo rara viapau oiso vearovira ora rera sopapro-ia tarai rovoro oiso rugoopora, Apeisi ragavira rutu vao vituaro porearo touparai oiso, Vao-ia Turaro iava varaua oiraopaua rutu. Oire uva va-a eva oa iava voua aiorevoi ora ukaioroi oira-ia o kap, oarea-ia ora rera raga-ia vuria purarevoi vo Pauto osireiaro-ia. Ra va-ia ora rerapa voria oureve siraoa-ia tavaka. <sup>30</sup> Eva raga ita-a oa vituaro iava oearovu riro irara visii iava upiapaaveira ora raveravepaaveira. Ora oearovu visii iava oisoa kopiipaave. <sup>31</sup> Vosa visii rutu ora visii iava sopaura oavisii sisiro rovopata rutu, oa iava Pauto viapau oisi visii piepareve eisi. <sup>32</sup> ♦ Ari ita, Turaro vigei varaaro vuri vovouro rovirieipareveira, oa iava vigeipa tavaka vateparevoi vigei torevokopaoro vo vokio-ia, vaopa oiso, teapi opesi ovoivioverea voeao tapo oea viapau oirao pie vovou vaiva toupaivoi.

<sup>33</sup> Araoko irara oaa, vosa Turaro vo aioaro aiosa ora gurupata, ra opeita vagevagepavira va aiopata. Ari oearovivure tue rovota voeao oea tapo koatapaa va aiosa. <sup>34</sup> Ora vosa irai visii iava ogoero, uva oiso vearopai ra rovovira ora rera vo kepaaro-ia aio rovoreve. Oa iava Pauto viapau uvuipa ra visii ruture oiso puraro, “Vurivira eisi piepatavoi visii,” vo rara oisi eisi ora gurupata vare vao Turaro vo aioaro.

Oaravuei touvira varao oarapa ruipaparai oiso ra visiipa vara torevokoa. Osa pieavere rara vo osa visii tapo tousa urioravere rara.

## 12

#### *Vo Touparai Ovatevatearovu Rutu Iava Tugoropato Uraurato Varaaro*

<sup>1</sup> Araoko irara oaa, visii vo akeroaro pukopaavoi varao iava vatevateara Tugoropato Uraurato varaaro. Uvare oiso ruipaparai ra vearovira rutu roroiovira vara-ia taraipata.

<sup>2</sup> Uva taraipatai oiso ragavira osa toutava voari tuariri, vo uva viapau oisoa oirao pie vovou vaiva toupata, vo vuutao-ia oa-ia oisoa tokarasi irara raga rei piepata, voeao oea vo vovouroaro sirova utupaoro visii raga ora piro pietaepa. <sup>3</sup> ♦ Oiraopavira rutu varia varao vearovira taraipata oiso-ia, Ro ira tuvetuvepareve Pauto reraaro Uraurato, ira viapau uvuiparoi rutu ra tovi reoro vai purareve oiso puraoro, “Rerape eera Jisas, ira-ia vuria toupaivoi.” Ora oiso tapo osa iava viapau irai uvuiparoi ra oiso puraparo, “Rera-a ro-ia Jisas ragai reraaro Turaro,” vo ovusa viapau rera vo ruipaaro Tugoropato Uraurato sirova utuparo.

<sup>4</sup> ♦ Ovatevatearovu rutu toupaivoi oara vatepareveira kataitoa raga Tugoropato Uraurato. <sup>5</sup> Ora oaravu rutu tapo kovoara toupaivoi vara purapasa. Oara-ia uvuipaviei ra vara purapape kataitoa ragapa Turaro. <sup>6</sup> Ari ita, oirara rutu viapau oiso uvuipaii ra

◊ 11:23: 1 Ko 15:3; Mt 26:26-28; Mk 14:22-24; Lu 22:17-20 ◊ 11:26: Jo 14:3 ◊ 11:32: Sam 94:12; Hi 12:7-10; 1 Ko 1:20 ◊ 12:3: 1 Jo 4:2-3; Ro 9:3 ◊ 12:4: Ro 12:4-7

vaeavira okovorovu rutu purapaive Pautoa-pa. Ari kataitoa raga Pauto ira oirara rutu oiso piepareveira ra rera ragapa kovopaive voea vo rugooroaro-ia uvvivira. <sup>7</sup> ♦ Oiso osa katakataivira Tugoropato Uraurato vo kovoaro eveipaiveira ora voea iava sopaura-ia oaravu-ia vatevateara varao oearovu rutu oirara tauvapasa <sup>8</sup> oiso-ia, ro Tugoropato Uraurato iravupa reoa vatereve, oisore ra va iava oirara vo rugooroaro soporepareve. Vo osa rera raga ita Tugoropato Uraurato iravupa rugooa vatereve vaore, ra oearovu oirara tarai piereve vao iava oa vatauvira toupaiveira. <sup>9</sup> ♦ Uva rera raga ro Tugoropato Uraurato ira riro gorua oirao piea iravupa oirato vatereve, oiso ra va iava oearovivu vearovira tauvapareve. Ora iravupa aia ita gorua vatereve oisore ra va iavirava oearovu oirara ruvarupareve voea porete piepaoro. <sup>10</sup> ♦ Ari iravupa gorua vatereve ravoto kovoro purapasa. Ari iravu oiso piereve, ra Pauto vo taraiaro oiraopavira rutu kosi piepareve goruvira. Ari iravu oiso piereve ra oearovu rutu oirara vo taraiaro rovirieipareve oiso purapaoro, "Vova vo kovo-ia Tugoropato Uraurato, ari ourauravu raga iava kuuvua vao-ia." Ari ita, ovusa iravupa pisa visivi rutu reoa vatereve, ra va iavirava reoreoparo. Ari iravupa taraia vatereve, ra vo tarai iava eva pisa reo rutu porereve. Oa iava uvuipaai oearovu vo reo porearo rutu-ia taraipaave. <sup>11</sup> ♦ Ari ita, evara rutu orekerovu rutu oara toupaivoi vatevateara, vo osa kataitoa ragaei Tugoropato Uraurato ira oirara rutupa katakataivira oisi vara piepareveira ora rera raga vo ruipaaro sirova utupaoro.

#### *Vigei-a Ovarurovu Vova Krais Iava Kataiuu Varaua*

<sup>12</sup> Oire Krais-a ro ira oiso toupare, Kataiuu varaua oua-ia ovarurovu epao. Ari ita, uva osasarovu rutu-a vo ovusa kataiuu raga iava varaua vara-a. <sup>13</sup> ♦ Oiso ragavira Jiu-a voeao-ia, ari ratau tou irara-a voeao-ia, ora voeao oea kovo ragapaiveira akukuvira vori ou asavira. Ari voeao oea monipa kovoro purapaiveira ora voeapa, vigei rutu-a vao vigoa ora reesiviepa oiso, Vigei-a kataiuu iava varaua. Oa-a vao oa iava Tugoropat Reesi ouepa vigei rutu vo Krais-va ora tavosioro vao iavirava Tugoropato Uraurato goruaro. Iu, Pauto vigei vaeavira rutu oiso piereva, oiso ra vigei rutu ukaiopavio ovoovovira rera iava Tugoropato Uraurato, ra rera tovopape vo vigei varaa-ia tootooara oavi.

<sup>14</sup> Vouao varaua viapau oiso kataiuu rutu-a. Viapau. Ari ovarurovu rutu voua iava toupai. Osa rutu toupareveira Krais ira varaa-ia ovararovu rutu toupaiveira. <sup>15</sup> Vosa tasi tauo oiso purape, "Viapau oiso vavaea-a ragai. Oa iava viapau oiso toupaavoi, Ragai-a ovaruvu voava." Uva oisi-a eisi osa viapau torevokopai, uvare tasi tauo-a oa oiso toupaivoi, Oavu voua iava varaua. <sup>16</sup> Ora vosa kokito oiso puraro, "Viapau oiso ragai-a osireito. Eisi osa iava viapau oiso ragai-a varaua iava." Eva oa viapau torevokopai, uvare rera-a kokito voua iava varaua. <sup>17</sup> Vosa voua rutu varaua oiso raga toupaive, Voua kokitoa raga, uva apeisi-a? E uvuiparoi ra geesipareve, raa? <sup>18</sup> Viapau. Uvare Pautoa raga ora rera vo vovouaro sirova utuoro ovarurovu rutu tovoreva varaua-ia. <sup>19</sup> Vosa katai varuvi raga toupaive, uva apeisi-a? Oiraopavira rutu uvare viapau oiso uvuipai oisi eisi toupaive varaua. <sup>20</sup> Oiraopavira rutu viapau oiso oisi-a eisi, uvare ovarurovu rutu iava voua-a kataiuu raga varaua.

<sup>21</sup> Uva viapau osireito uvuiparoi ra oiso puraro vavaeare, "Viipe. Ra ragai ragape. Uvare ragai raga uvuiparai." Ora kukueva viapau oiso uvuipaoi ra tasi tauore oiso purao, "Viipe. Ragai uvuiparai. Uvare viapau uvuipaei ra ragai tauvari." <sup>22</sup> Ari ita, oisi eisi viapau torevokopai. Oa-ia eva viapau uvuipavie i ra vearovira toupape, vo rara viapau ovarurovu viapau toupaive vigei-ia, vo varuro oara raveravevira vai toupaiveira. <sup>23</sup> Ora vo varuro oarare oiso rugorugoopaaveira, Akukuara raga evara, ovarurovi-a evara oara-ia uvui iraopavie i ra kasivarivira rutu varavi tokipape. Ora vo varuro oarare oiso rugoopavioveira, Viapau oiso vearovira kekepa piroi, ovarurovi-a evara oara-ia vearovira rutu vara ruupape varoara-ia. <sup>24</sup> Vo varo oa-ia viapau uvuipavie i ra vara ruupape ovaruroa vearovira rutu kekepa piro. Uva vo varuro rutu takuvureva Pauto kataiuu rutu varaua puraoro, oiso ra oirara vo varuroviore vearovira rutu rugoopaave oara akaipa

◊ 12:7: Ef 4:7   ◊ 12:9: Mt 17:19-20   ◊ 12:10: Ga 3:5; 1 Jo 4:1   ◊ 12:11: 2 Ko 10:13   ◊ 12:13: Ef 2:18; Ga 3:28; Kl 3:11; Jo 7:37-39

visivi toupaive. <sup>25</sup> Oire uva oisi-a eisi osa vituaro iava ovarurovu viapau oiso roopavira toupaiveira. Viapau. Ari evo varuro rutu vaeavira rutu ora tauvapapeira ora vo varuro raga ora tokipaoro. <sup>26</sup> Vosa ovaruvu viria tavaka ouve, ra ovarurovu vo tavaka sovove ora vara-ia. Oa iava vara rutu vo sirao kaeve. Ari vosa ovaruvu vaisiaro kae pieive, oa iava ovarurovu roruve va tapo.

<sup>27</sup> ♦ Oire visii rutu ora takuvutaepa rutu. Oa iava oiso toupata visii-a kataiuia rutu oiso osa Krais. Ari ita, visii rutu katakataipavira toupataveira oiso osa ovarurovu voua raga iava varaua rera vouaaro. <sup>28</sup> Osa iava Pauto ovarurovu rutu tovotovoreva torevokovira ora vara vo tavukiroaro-ia oiso ragavira, Rovopa irara-a voeao aposel irara. Uva eraopaii voeao-ia profet irara. Uva vo pevapaa voeao-ia tarai vatepa irara. Uva voeao isivaaro iava voeao-ia oea ravoto kovoro purapaveira. Uva evoea isivaaro-ia voeao tapopa vo goru vatereva oirara ruvarupa irara ora voeao oearovu tauvapa irara, ora voeao oearovu rutupa irapa irara, ora voeao oea pisa reoro rutu-ia reoreopaaveira. <sup>29</sup> Oire uva viapau oiso voeao rutu areiivira rutu toupaiveira oiso, Voea rutu-a profet irara, ari voeao rutu-a tarai vatepa irara. Viapau. Viapau oiso voeao rutu gorua oupaveira Tugoropato ruvara-ia Uraurato vao ravoto kovoro purapa, ora <sup>30</sup> oirara ruvarupa, ora vao pisa reoreoro-ia reoreopa, ora vao pisa reoro aviavi piepa. <sup>31</sup> ♦ Osa iava eisi uvui iraopatai ra ora visii iava sopaura rutu tovota varao-ia vatevateara oara evara-ia uvuipai ra putepave rutu.

Ari ita, oavuei aia oa epao touvira aue riroa rutu sirao vovou. Vosa viapau vava toupata, ra viapau uvuipatai ra evo vatevatero kovo piepata vo oearovivu tauvapasa.

## 13

### *Vo Toupai Oearovivupa Siraopa Vovou*

<sup>1</sup> Uva va vao-ia rovoa rutu aue siraopa vovou oa oiso toupai, Uvuiparai ra oearovu rutu vo reoroaro-ia reoreopara, ora vo reo enselpa irara vaaro pisa reo rutu. Ari vosa viapau siraopa vovou purapaa oisi eisi reopaoro, ra ragai vo reoaro oiso raga guruko ragapaveira osa toiva o iria akukuvira guruko ragapaevoi, uvare oira toga ragapai. <sup>2</sup> ♦ Ora vosa goruvira rutu Pauto vo rugooaro kosi piea va iava siposipopoar. Ora vosa orekerovu rutu-ia taraipara varao oara viaevira toupaive ora varao oara vatauvira toupaiveira. Ora vosa riroa rutupe oirao pie vovou ragai-ia oa iavirava uvuiparai ra pukuia virua uvavure. Ari vosa viapau siraopa vovou purapaa eisi evara purapaoro, oire ra oiso raga toupaa, Akukupapatoa raga ragai. <sup>3</sup> ♦ Ari ita, vosa ora ragai varaaero rutu orekerovu vatepaa oearovivupa apota irara. Ora vosa ora ragai raga iava varaua iava vasea oearovupa, oire ra ragaire kasipupaoro ragai iava voua kasiive vaopa, uvare Pauto vo kovoaro-a oa purapaveira. Oara rutu-a evara oara-ia viapau vitua vai toupai, vo rara viapau siraopa vovou vai pura rovopaa.

<sup>4</sup> ♦ Oire uva va-a vao-ia siraopa vovou oa oiso rutu toupai osa kave vovou ora vereopa vovou. Uva ro ira siraopa vovou purapareve, ira viapau uvuiparoi ra orekerovu riiriipaoro iravure vuri rugorugoo purapareve, oiso ra rera varaaero rutu ou ragareve. Ora vo osa viapau ora rera raga-ia vovouparo. Ora viapau oiso ra ora rera raga vaisiaro rei piepareve. <sup>5</sup> ♦ Ora vo osa ro ira-ia siraopa vovou toupaiveira, ira viapau uvuiparoi ra oearovivu arii piepareve. Ora ira viapau uvuiparoi ra iiruko vovou purapareve. Ora viapau uvuipa ra vagevagepavira kasipuparo. Ora vo osa viapau oiso ra varaaore vuriara rugorugoo paro oara purapaveira oearovu rera-ia. <sup>6</sup> Oire uva rera ro ira-ia siraopa vovou toupaive ira viapau uvuiparoi ra rorupareve vuri rugorugoo-ia. Ari uvuiparoi ra varao-ia varaaore rugoro rutu orekerovu varaaore rorupareve, varao oiraopa rutu varaaore ora varaaore rutu. <sup>7</sup> ♦ Ari ro ira siraopa vovou-ia toupareveira, ira viapau uvuipa ra va eakareve vo osa riroa tavaka pou piro rera-ia. Ora vao tapo vosa oavu-ia oirao piepareve, ra viapau uvuipa ra va iava ora rera vo rugooaro tavarioreve ita aia. Ora vao tapo vo osa rorupaaoro toupareve varaaore tuepaoro, vo osa Pauto vo utupavira rera vaterevereia, ra viapau uvuipa ra vo roru eaka piereve. Ora uvuipa ra kave vovou purapareve voeaore oea viapau rera vo rugooaro sirova utupave.

♦ 12:27: Ef 1:23    ♦ 12:31: 1 Ko 14:1, 39-40    ♦ 13:2: Ap 13:1-2    ♦ 13:3: Mt 6:2    ♦ 13:4: Pro 10:12; 1 Pi

4:8    ♦ 13:5: 1 Ko 10:24    ♦ 13:7: Ro 15:1

<sup>8</sup> Va-a vao siraopa vovou oa pauakavira rutu toupaiveira. Oirara uvuipaaveira vearovira Pauto vo reoaro kosi piepasa. Ari ita, uva katai voki raga iare va-a. Ora vao osa oirara vatevateara oupaiveira, oire ra vara iava reoreopaave pisavira reopaoro, oreoroa rutu-a evara oara opesi ovoipapeira. Oiraopavira rutu uvare riroa rutuei taraia vo Pauto vo ruipaaro iava. Uva ita, osa vo tarai tapo opesiperea. <sup>9</sup> Oara rutu vituaro-a vao-ia, uvare vigei varaaro-a vatevateara oara viapau rutupavira toupaiveira varao oara-ia taraia oupapeira, ora oara iava Pauto vo reoaro kosi piepapeira. <sup>10</sup> Viapau. Ari oavu epao rutupa rutu. Vosa va eva rutupa pou piro, ra va iava orekerovu rutu evara kurokuroara opesi ovoipe.

<sup>11</sup> Oire vo osa kakae visivi oisoa toupaa, uva voa-a evoa uva oisoa veu visivi rutu reopara. Ora tapo oiso rutu voa oisoa rugorugoopara osa oeavu kakae vure rugorugoopaveira. Oire uva vo vokio-ia ragaiei oira vasito. Eisi osa vituaro iava kakae vure vo vovouroaro kavuava. <sup>12</sup> Varao oara kekepai vigei vo vokio. Uva viapau oiso roroiovira vara kekepai, uvare turopavira oiso vara vurapai osa sisiroara-ia orekerovu turopavira kekepapeira aauvira. Ari vovio utupaua vara evara viaeperea vigeipa, ra va iava roroiovira vara kekepe. Vo vokio-ia Pauto varaaro-ia taraiparai, vo osa ragaipa vavagisipai. Ari evara rutu taru eveiaverea vovio utupaua vara-ia roroiovira tarai ovoioro, oiso rutu osa Pauto ragai-ia tarai ovoiparoveira. <sup>13</sup> ♦ Iu, osa ragavira-a eisi osa touperea voari utupaua. Ari vo vokio-ia oiso rutu toupai vo peva vao oa reipai rutu oiso-ia, oirao pie vovou-a vao-ia, ari rari vovou-a vao-ia, ari siraopa vovou-a vao-ia. Oa-a vao-ia siraopa vovou rovopa rutu vo vo peva iava.

## 14

### *Vo Toupai Rovopa Iava Vatevatea Tugoropato Uraurato Vaaro*

<sup>1</sup> Ora visii iava sopaura rutu tovota siraopa vovou rutu purapasa. Uva viapau uvuipatai ra oiso ovatevatearovure ovaupata. Uvare vo vatevatea vao-ia Pauto vo reoaro kosi piepa, oa-a eva tapo visiipa reipapeira. <sup>2</sup> ♦ Aue vituaro iava uvare ro oirato ira pisa vaivaisi-ia reoreoparo, ira viapau oiso oirarapa reoreoparoi. Viapau. Ari eera Pautoa ragapa reoreoparoi. Eake iava? Uvare oirara vo rugorugooroaro vavagisipai rera vo reoaro uvupaoro, vo osa vatauvira rutu oiraopa rugoo kosi pieparevoi Tugoropato Uraurato vo goruaro iavirava. <sup>3</sup> Ari ro ira roroiovira rutu Pauto vo reoaro kosi piepareve, ira raga ita oirara tauvaparevoi voea vovouroaro tapo goru piepaoro. Ora voea vateparevoi kave vovou. <sup>4</sup> Ari ro ira pisa vaivaisi-ia reoparo, ira raga ita ora rera raga ora tauvaparoi. Ari ro ira Pauto vo reoaro vearovira rutu kosi piepareve, ira-a ita eera ira lotupa irara rutu tauvaparevoi taraia vatepaoro Pauto iava. <sup>5</sup> ♦ Uva ragai vo ruipaaro-a vao-ia, oiso ra visii rutu pisavira rutu reopata. Ari rirovira rutu oiso ruipa iraoparai ra vo vatevateaova toupata, oa iava vava uvuipatai ra vearovira Pauto vo reoaro kosi piepata. Oa-a vao oa iava ro ira roroiovira rutu Pauto vo reoaro vatepareve, ira-a eera ira oiraopavira oirara rutu tauvapareveira. Ari ro ira oreovu raga-ia pisa vaivaisiro-ia reoreoparo, ira viapau oiso piepareveira osa eera. Ari vao raga oiso-ia, vosa iravu rera vo reoroaro porepareve, oa iava lotupa irara rutu uvuipaai ra tauva rutu oupaise.

<sup>6</sup> ♦ Oire araoko irara oaa, e uvuiparai ra visii iare taveteoro visii tauvaa vo rara pisa visivi reoreora? Viapau. Ari vao raga vosa uriora ra roroiovira Pauto vo reoaro vatea vao oa vatereva ragaipa, ora tarai reo vao rera ruvara iava va-a, ora siposipoara varao oara-ia visii tarai piesa urioravere.

### *Visii Uvui Iraopatai Ra Pauto Vo Reoaro Kosi Piepata Vo Oirara Vo Reoaro-ia*

<sup>7</sup> Oiraopavira rutu vosa viapau vearovira pureo tavara vuvurepata ora aue gitara tatupata, ra va iava ogurukorovu rutu puraave. Ra apeisi ragavira roroiovira vara gurukoaro gauaro eveipata, raa? <sup>8</sup> Ora vosa ro ira utave vuvurepareve, oire ra vosa viapau roroiovira gurukopaeve, ra apeisi ragavira oira gurukoaro eveioro oearovu oiso puraave, “Upoa purasa vatatopopavie?” <sup>9</sup> ♦ Uva oisi ragavira vosa oisi eisi pisavira visii

◊ 13:13: 1 Ko 16:14 ◊ 14:2: Ap 10:46; 1 Ko 12:10, 28, 30 ◊ 14:5: Nam 11:29 ◊ 14:6: Ro 6:17 ◊ 14:9: 1 Ko 9:26

vo reoroaro vatepata, ra apeisi ragavira oearovu visii vo reoroaro uvupaoro vara vituaroria roroiovira taraipaave? Ari ita, visii vo reoroaro oara ora ropi ragapapeira, oiso rutu osa kiuvu gurukoara kaepaoro avaparoveira. <sup>10</sup> Riroara rutu reo kakuro oara vo rasio-ia toupaiveira. Oara rutu vituarlo poreporearo toupaiveira. <sup>11</sup> Ari vosa viapau eveivira irai oreoiaro uvua vao oreovu raga, oire uva eera-a ira ragaipa aapaapaauvira toupareveira, vo osa ragai ita oisi raga rerapa aapaapaauvira ita oisi toua. Ra ita viapau uvuipaveiei ora vegei-ia taraipasa. <sup>12</sup> Taraiparai oiso, Visii-a vao visiigoa ruipa iraopataveira oiso ra vara rutuva varao vatevateara toupata, varao Tugoropato Uraurato oara vatepareveira visiipa. Uva osa iava eisi uvui iraopatai ra visii ita pute pie visivi rutu vatevateara kovo piepata, varao oara lotupa irara tauvapaiveira rutu voea vo vovouroaro oirao pie vovou goru piepaoro rutu.

<sup>13</sup> Oiso osa ro oirato ira pisa vaivaisi-ia reopaoro uvui iraoparoi ra Pauto arepareve variripaoro, ira raga ita uvuiparoi ra rera vo vaivaisiaro roroiovira rutu porepareve oearovupa. <sup>14</sup> Oiso osa ora ragai-ia taraiparaveira, uvare ovokirovu-ia pisavira rutu vaivaisipaoro variriparaveira, vo rara Tugoropato Uraurato vo vaivaisiro tovopareve vo ragai sopaaro-ia. Uva ora ragai reraaro raga iava uraurato oisi oiraopavira rutu vaivaisipaoro variriparaveira. Ovusa viapau vo vaivaisiro-ia taraiparaveira. <sup>15</sup> ♦ Ra va iava eva eake vai pura iraoa? Ari vao oiso osa yearopai vo osa ora ragai iava urauratoa oaa rutu iava variripara, osa yearopai tapo vo osa ora ragai vo rugorugooaro rutu iava aviavi pievira variripara. Oiso osa tapo ragaipa yearopai vo osa erapara ora ragai reraaro rutu iava uraurato, ra ita oisi raga aviavi pievira rutu erapara vova ragai vo rugorugooario. <sup>16</sup> Uvare vosa irai visii iava yearo vaisi purareve Pautoa-ia vo ora irai iava uraurato vairo rutu-ia oisi eisi pisavira vaivaisipaoro. Ra apeisi ragavira iravu rera vo reoaro sirova utuoro oiso puraro, “Yearovira rutu Pauto”? Osa eisi viapau uvuiparoi. Eake iava? Uvare viapau oiso rera vo reoaro yearovira aviavi pievira uvurevo. <sup>17</sup> Ari ita, vosa visii tapo ita pisavira rutu vaivaisipaoro oisi yearovira rutu variriara purapata Pautoa-ia vuurapa vaisi purapaoro, osa eisi yearopai ita. Uva ue raga, apeisi ragavira uvuiparoi irai ra visii ruvara-ia tauva oureve vo osa visii vo variriroaro uvupareve eera sopaipato. <sup>18</sup> Yearo vaisi purapaaveira Pautoa-ia vo vaivaisi iavirava vao-ia pisa. Uvare rirovira rutu va-ia reoreopaoro variriparaveira oearovu vo vaisiroaro-ia pute pievira pisaara. <sup>19</sup> Ari vo uva lotu puraparaveira oearo rutupa, uva vo raivarei toupaivoi, oiso-ia osa vao-ia, rovopa reoreo vatepa, oiso osa ragavira uvuiparaveira garepa reoro-ia aviavi pievira reoreopaoro. Uva eraopa vao-ia, oa-ia oisi raga ita reoreoa vatepa vaopa, vo osa riro vavagisi reo rutu-ia riropara vaivaisipaoro reoreo vatepara. Ra viapau oiso irai uvuiparo aviavi pievira vara uvupaoro vara oupareve. Uva apeisi-a? Ari oiso-ia osa vao yearopai rovoa, osa ragavira ragai vo vovouroaro-ia uvuiparai ra aviavi pievira oearovivu tarai piepaa.

<sup>20</sup> ♦ Araoko irara oaa, opeita oiso ragavira varoore pisa vaivaisiro veuvira rugorugopata. Ari ita, oiraopavira rutu uvare veu kakae viapau viria vaiei. Ra visii tapo ita uvuipatai ra oisi eisi piepata. Ari uvui iraopatai ra oiso yearovira rugoopata osa oira vasi irara vo rugoroaro toupaiveira vo vaivaisiro iava. <sup>21</sup> ♦ Vo Tugoropa Vuku-ia oiso purapai,

‘Vo oearovu-ia voearo oreorovu raga iava voea, ora vo oearovu gisipoaro-ia voeoao osararovu iava ragai vo reoaro vateavere voeaopa ragai voearo. Ari eagara vosa viapau ragai gisipoaro sirova utupaave vo voea-ia va uvupaoro.’

Eisi osa puraroepa Turaro vo osa Jiu vo kaureo vovouroaro kareke pierava. <sup>22</sup> Oire uva vo vatevatea-a vao-ia pisa vaivaisi oa iava uvuipai oirao pie asa irara ra Pauto vo goruaro eveipaise vao oa kaureo vovou kareke piepaiveira. Ari va vao-ia vatevatea oearovupa oisore ra va iava goruvira rutu Pauto vo reoaro kosi piepaive, oa toupaiveira vaopa oiso ra va iava voeoao riro oirao pie vovou irara Pauto vo goruaro eveipaise vao oa Pauto vo tauvaaro kareke piepaiveira.

<sup>23</sup> Oire vosa oirao pie vovou irara ora guruave lotusa, ra va isivaaro-ia rovoave pisipisavira vaivaisioro. Uva apeisi vosa oeavu voea iare koataave voearo iava oirao pie vovou asa irara, voeoao oea vo vaivaisiroa ruruvutuvira toupaive. Uvare oiso puraave vai pasi, “Easi voeoao kokoropaoro oiso reoreopaa.” <sup>24</sup> Ari vosa voeoao lotupa irara

♦ 14:15: Ef 5:19; Kl 3:16   ♦ 14:20: Ef 4:14; Sam 13:12   ♦ 14:21: Ais 28:11-12

ora guruave Pauto vo reoaro iava siposiposa, oa-a eva oa iava voeao oirao pie vovou asa irara uvuipaii ra ora voea iava sopaura oaive sovooro oiso puraave, "Oiraopavira rutu uvare vuritoavi-a ragai." Aue iava uvare vo reo eva uvuivoi vo voea iava sopaura togavoi voea vo vovouroaro vuriara kareke pieoro. <sup>25</sup> ♦ Ora vo osa vo reo eva voea vo rugorugooroaro roroiove varao oara vatauvira toupaiveira. Oa vituaro iava uvuipaii ra voea rutu ora takuvuave Pautoa-ia vuurapa vaisi purasa oiso purapaoro, "Oiraopavira rutu, uvare Pautoa epao visii-ia."

*Okovorovu Rutu Varao Lotua Varaaro Uvui Iraopai Ra Torevokovira Rutu Karekepape*

<sup>26</sup> ♦ Oire uva apeisi-a oiso osa ragai vo reoaro opesiaroei? Ari oiso, vo osa visii rutu ora gurupata vuurapa vaisi purapasa, uva oiso vearpai vosa iravu erava kae pie rovoreve. Ari iravu tarai reo iava siposiporeve. Ari iravu vo reo kosi pierere oreoa vaterева Pauto rera ragapa. Ari iravu siposiporeve pisa reo vo vaivaisiaro iava, vo ovusa iravu vo reo porepareve. Ari ita, viapau rutu uvuipatai oavu avu vai purasa, vo rara viapau visii rutu lotupa irara tauvapaise va eva. <sup>27</sup> Vosa oearoi visii iava oiso vovoupaave ra va-ia vao pisa reo vo vaivaisiaro reoreoave, uva uvuipaii ra oiso reoreoave vaiterei raga, eke vo peva tupetupereovira, vo osa oeavu katakataivira voea vo reoreoroaro porepareve. <sup>28</sup> Ari vosa viapau irai toupareve voea vo reoreoroaro porepasa, osa iava uvui iraoparoi ro ira pisavira vaivaisipaoro siposipareve ora tape piero vaopa, vosa eisi reoreopaoro ora rera raga vo reo uvupareve ora Pauto tapo. <sup>29</sup> Ari ita, oiso vearpai vosa aiterei o vo peva oiso vovouave ra Pauto vo reoaro kosi pierive vao oreoa voea ragapa oisoa vatepareve. Uva oisi-a eisi osa iava oearovu uvuipaii ra vo peva eva vo reoreoroaro roviriee, oiso ra vo reo vituaro-ia taraiave. <sup>30</sup> Ari vosa irai oeavu tapo pauparo, ra Pauto rerapa oreovu vatereve, oire ra va iava uvuipaii oearovu ra iravu siposipopato tapetaive oiso puraoro, "Ora tape pieu." Ra va iava rera eera eraopato Pauto vo reoaro iava kosi pierere voeapa. <sup>31</sup> Visii rutu uvuipatai ra Pauto vo reoroaro kosi piepata oearovupa rera vaaro iavirava vatevatea. Uva aue raga vosa tupetupereovira oisi siposipopata, osa ragavira iava visii rutu uvuipatai ra ora visii vo reoroaro iavirava taraiā oupata. Ra vara iava visii iava sopaura goru piepata tapo. <sup>32</sup> ♦ Ari ro oirato ira vatereve Pauto ora rera vo tavitaviaro, ira uvui iraoparoi ra ora rera iava uraurato rei piepareve rutu vo osa evo reo kosi piepareve. Teapi reoreo ragaparo akukuvira. <sup>33</sup> Eake iava? Uvare Pauto viapau oiso vo vatevatearo vigeipa oiso vatepareveira, ra vara-ia ora vavagisi piepavio lotu purapaoro. Viapau. Ari oiso ruipaparoveira ra torevokovira kave vovouvira rera vo ruipaaro sirova.

Vo osa vo uvaroa ora gurupata visii oirao pie vovou irara lotupasa, <sup>34</sup> ♦ uva voa-a evoa uva riakora raga rutu uvuipaii ra ora tape piepaave vo oiso rutu osa rutu airovu lotupa riako ora tape piepaaveira vo uvarovu rutu. Vaopa uvare viapau oiso vairopa torevokopai, oiso ra akukuvira reoreo ragapaave, uvare Jiu vaaro Reo Taisi oiso purapapeira, 'Riakora uvuipaii ra ora vairo raga vo tavukiroaro-ia toupaive. Uvare viapau uvuipaii ra oirara vo tavukiroaro iare putepaive.' <sup>35</sup> Vosa oiso ruipapaave ra vara-ia taraiapaave varao oara karekepe vo visii vo uvuruaroo-ia, oarare uvuipaii ra vatua irara oaive akepaive vo ora vo vurero vo keparoaro-ia. Vaopa vosa iriai riakova vai lotua-ia reoreopao ora oira vo ruipaaro ragai-ia, ra oisi iava vigei rutu ariia oupape. <sup>36</sup> Uva apeisi-a? Ragaiva ora kaureopatai? Oire ragai tavita oiso, apeisi-a? E visii raga-a visiigoa iare pou piropa Pauto vo reoaro? E rera vo reoaro visii vo lotuaro sovara iava rovoepa?

<sup>37</sup> Ari vosa irai visii iava oiso ora irai-ia rugooparo, Ragai-a vao Pauto reraaro kovopato, ora ragoapa Tugoropato Uraurato vatevatea vaterrevorao, uva uvuiparoi ra irai ragai vo rigatoaro eveireve oiso purasa, "Pol vo rigato purarevora vao iava uvare Turaro goruvira rutu rera arureva oisi va purasa." <sup>38</sup> Uva ro irouto oirato ira viapau ragai vo reoaro eveireve oiso, Turaro rutu iava vo reo-a vao, uva va iava ira viapau torevokovira ora vaisipa oiso puraoro, "Ragai-a vao Pauto reraaro kovopato."

<sup>39</sup> Oire araoko irara oaa, oiso ora visii vo vovouroaro piepata. Oa iava uvui iraopatai ra Pauto vo reoroaro kosi piepata vara iava siposipopata. Ari vao raga oapa vuripai

◊ 14:25: Lu 17:16   ◊ 14:26: 1 Ko 12:7-10   ◊ 14:32: 1 Jo 4:1   ◊ 14:34: 1 Pi 3:1; Jen 3:16

oiso, Opeita oearovivure korukorupata voeao oea pisa reoro-ia vaivaisipaive, uvare Tugoropato Uraurato vo goruaro-a va eva. <sup>40</sup> ♦ Uvui iraopatai ra vara rutu orekerovu torevokovira rutu purapata. Opeita visii raga ora vavagisi piepata vara-ia varao vo lotua sovara-ia.

## 15

### *Krais Kopiiroepa Oa Iava Vorevira Toreroepa*

<sup>1</sup> Araoko irara oaa, oiso vovouparai ra visii rugoo piea vaore Vearo Siposipo oa iava vokiara rutu-ia visiipa oisoa siposipopaa. Vao oa outavoiva, goruvira rutu torepataera oirao pie vovouro oavisii-ia. <sup>2</sup> Vo siposipo-ia oa iava ragai oisoa visii siposipopaa, oiso ra va-ia goruvira rutu pituta. Oa iava Pauto uvuiparoi ra visii vorevira oureve ora rera iare. Uvare va-a vao-ia vo osa oeai rovovira rutu va oirao pie ragapaivora, vorevira va ita eakaive. Osa-a eisi osa iava Pauto viapau uvuiparoi ra oisi ora rera iare vorevira oeai visii iava oureve.

<sup>3</sup> ♦ Vo reo-a vao rovoa rutu oa ou rovoava, oa iava visiipa vo reo ita aia topa pieavora. Vo reo oa oiso purapapeira, Krais kopiiroepa vigei vo vovouaro vuriara voriaro ouoro. Oiso rutu osa Tugoropa Vuku rera iava tavitavi rovoepa vigeipa. <sup>4</sup> ♦ Vao oa isivaaro iava rera tovaiva. Oa iava vorevira Pauto rera tore piereva vo pevapa voki-ia. Oiso rutu ita osa Tugoropa Vuku vo siposipoaro oisoa tavitavipape. <sup>5</sup> Uva vorevira rovovira rutu Pita iare ora karekeroepa. Oa isivaaro iava voea rutu iare aposel irara urioroepa. <sup>6</sup> Oa iava ita vo vavae vovoto rutu iare (500) oirara vo vuutavi raga-ia eva ora karekeroepa, voeao oea oisoa rera sirova utupaave. Oea iava oearovuei riro irara tootoovira toupaivoi, vo ovusa ita oeavu epao voea iava oea kopiliaepa. <sup>7</sup> Oa-a eva isivaaro iava Jems ita rera kekereva ro ira lotupa irarapa reiparoveira. Oire voava voea rutu ita aposel irara rera kekeiva.

<sup>8-9</sup> ♦ Uva ragai tapo iare ora karekeroepa ragai vao ovoipatoa rutu. Ari ita, ovoovovira ragai ovoiovira rutu kavaauraepa. Uva voa-a evoa uva oisoa pisavira rutu rerapa toupaa, vao-ia osa Pauto voearo oirara oisoa vuri piepaa voviri rovopa visivi. Osa iava viapau oiso uvuiparai ra torevokovira ora ragaire oiso purara, “Vearoto-a ragai aposelto.” <sup>10</sup> ♦ Uvare Pautoa raga vo siraoaro-a vao oa iavirava oiso toupaavoi vo vokio-ia. Vao-ia siraopa vovou oa ragaipa vatereva. Oa vaaro-a vao siraopa vovou oa viapau oiso ora ropivira oiso ragai pie ragava. Viapau. Ari eva ouoro va iava kasivarivira oisoa kovopaa Pautoa-pa oearovu rutu aposel irara vo kovoroaro-ia putepaoro. Oiraopavira rutu uvare viapau oiso ragai vaaro-a va vao-ia. Ari Pautoa raga vo tauvaaro-a oa eisi ragai pieva. <sup>11</sup> Uva oisi-a eisi osa ragavira, eagara va iava oearovu-ia aposel irara oisoa va uvupata, eke ragai vai ruvara-ia pasi va uvutava. Uvare oiraopavira rutu-a, uvare igei rutu Vearo Siposipo iava vaeavira siposipopaioveira vao kataia Jisas iava va-a. Oa iava va oirao pietava.

### *Vigei Vaaro Iava Torea Vorevira*

<sup>12</sup> ♦ Ari ita, igei vo siposipoaro-a vao-ia oa oiso purapapeira, Pauto Krais vorevira tore piereva kopilia iava. Uva apeisi-a, oiso osa iava oearovu visii iava oiso purapaaveira, “Voeao oea kopiiptaaveira, oea viapau uvuipai ra vorevira kopii tapirova torepaa?”?

<sup>13</sup> Viapau vearovira reoreopaa oisi puraoro, uvare vosa vo reo eva oiraopape, ra vo reo kuuvupape Krais iava oiso, Vorevira toreroepa. <sup>14</sup> ♦ Ari ita, vosa Krais viapau vorevira toreroeri kopilia iava, ra viapau oisi oai iava osiposipoi igei-ia toupaive. Oa iava viapau uvuipai oai oisi toupaivora, igei-ia viapau oai oirao piepata. <sup>15</sup> Ora tapo vosa oisi eisi oai toupaivori, ra oai iava oearovu visii iava oiso purapaave, “Kuuvu reoro rutu purapaiveira Pautoa iava.” Eake iava? Uvare oiso siposipopaioveira, Rera raga ita ira Krais vorevira tore piereva kopii tapi iava. Ari vosa visii vo reoroaro oiraopape oisi eisi oiso, viapau oiso kopii irara vorevira viapau toreaverea. Vo osa ita oisi ragavira ita Pauto viapau Krais tore pierevori. <sup>16</sup> Vosa viapau vorevira kopii irara toreave, ra osa oisi viapau Krais

---

❖ 14:40: 1 Ko 14:33    ❖ 15:3: 1 Ko 11:23; Ais 53:5-12    ❖ 15:4: Sam 16:8-10    ❖ 15:8-9: Ap 9:3-8; 1 Ko 9:1  
❖ 15:10: Ef 3:7-8    ❖ 15:12: Ap 17:32; 2 Ti 2:18    ❖ 15:14: 1 Te 4:14

vorevira toreroeri. <sup>17</sup> ♦ Ora vosa Krais viapau toreroeri vorevira, ra akukuvira rutu oisi iava ora keakea ragapata visii raga rera oirao pie ragapaoro. Oire uva va-a eva oa iava visii raga ora opesi pie ragapataeri, uvare visii vo vovouaro-a vuriara. <sup>18</sup> Vosa oiraopavira rutu oisi eisi reopata, osa iava voeari oearovu voeao oea oisoa Jisas oirao piepaive oearoa oisoa kopiipaave, oea tapo ita uvuipaai ra oisi ragavira iava opesi ragaave vuria oupaoro. <sup>19</sup> Vosa vigei vao Krais-ia raripavieri varao ragare vearovpara rugopaoro oara-ia uvuipavioveira ra vara oupape vo rasio-ia tootoovira toupaoro. Oa isivaaro iava viapau uvuipavieri ra oarai oupasa kopiipavio. Viapau, ari opesi ovoipavieri. Vosa oisi eisi oiraopaeri vigeipa, ra siraovira rutu oisi iava vigeivipa. Vo osa vo sirao eva vigei vaaro oearovu vo siraoroaro-ia uvuipaeri putepaive rutu.

<sup>20</sup> Ari ita, oiraopavira rutu Krais vorevira tore piererva Pauto kopii tapi iava. Uva oisi-a eisi osa vo oovoovo puraoro iraroepa ipaoro voeapa voeao oea vorevira toreaverea kopii tapiva. <sup>21</sup> Osa ragavira kopiia vo pitupituro rovoepa kataitoa raga iava, ro ira viria purareva rovovira rutu Adam. Osa kopiia iava torepa pitupitu-a vao oa rovoreva kataitoa raga ro ira vearoa purareva Krais. <sup>22</sup> Uva oirara rutu kopiipaaveira, uvare rera sirovava voeae rera aao iraraaro ro ira vuria pura rovoreva Adam. Eisi osa ita katai raiva raga sirova oirara rutu toreaverea rara tootooro voeao oea Krais-va ora tavosi rovopaaveira. <sup>23</sup> Vigei rutu katakataivira toreviovere a vorevira tootooro vo vigei vo vuutaaro-ia. Uva vigei reraaro ro-ia Krais ira vigeipa ira rovoroera, ra rera sirova utuviovere, vo rara vorevira voreroverea vigei oupasa.

<sup>24</sup> Oire uva evo vuuta isivaaro iava vo vuutao pou piroverea oa-ia rasito opesi rovere taru. Vo uva Krais gavman irara rutu opesi piereverea, ora reipa irara, ora turaro irara, voeao oea vo rasitoa-ia toupaiveira ora voeao oea uvarovu rutu toupaiveira. Oa-a eva isivaaro iava taru orekerovu rutu-ia putereverea rara varao oara reipapeira vigeipa. Oire uva oisi eisi va puraoro rera vaaro Turaro gorua vatoreverea ropa reitoa rutu Pauto Aite.

<sup>25</sup> ♦ Eva ita oa vituaro iava vo goruei vao-ia Krais-ia, oava vo tuguraroverea uva Pauto ora rerava keripa irara opesi piereverea voea tovooro vo Krais kokotoaro reroaro. <sup>26</sup> Uva ovoioa rutu-a vao kopiia vo pitupituro Pauto oa tapo opesi pie ovoireverea. <sup>27</sup> ♦ Aue iava uvare Tugoropa Vuku oiso purapapeira, ‘Pauto orekerovu rutu tovoreva Krais kokotoaro reroaro, rera raga toki ruvarautoa rutu.’ Uva taraipavie vo reo eva porearo-ia oa viapau oiso oiso purapapeira, “Pauto ora rera raga ora tovoroepa Krais kokotoaro reroaro.”

<sup>28</sup> Viapau. Uvare Krais raga ira orekerovu rutupa reiparoverea. Oire vo vuuta-a eva oa-ia rera raga ora tovoroverea Pauto vo Saraaro-ia. Osa iava Pautoa raga rei iraoparoverea rutu orekerovu rutupa ora rera tapopa Oviito.

<sup>29</sup> Ari oavu-a vao-ia osa oearovu baptaisa oupaiveira voeare rugopaoro voeao rovo kopii irara, oire ra oisi iava Tugoropa Reesi oupaive. Oire uva apeisi-a? Vosa viapau vorevira tootooave, uva eake-a vao oare voeaore rovo kopii irara rugopaoro baptaisa purapaiseira? <sup>30</sup> Ora apeisi-a tapo igei-ia, vo osa vokiara rutu-ia ora igei iava vasepiaevoeira, oiso ra oearovu vai igei vuri piepaive pasi, vo osa vo kovo purapao vao-ia. <sup>31</sup> ♦ Araoko irara oaa, oiraopavira rutu uvare vokiara rutu-ia kopiia ragai iare tutuu piepaiveira rutu, vo osa Pauto vo kovoaro purapaa. Oreoa eva oirao piepaavoi rutu, uvare roru iraopaa veira visii-ia. Vao iava osa Krais Jisas tapo ora tavosipataveira. <sup>32</sup> Ari vosa riro avuavu kare tapo oisoa ora upopara vuria ouoro vo uruio-ia Efesas-ia. [Oa-a vao iava ovoovovira oiso reoreoparai riro kasipu vovou irara reesipaoro.] Uva aa vao-a vao vearo-a ragai vaaro oa ouavvere vo upo iavirava eva ragai vaaro? Asi viapau oaciei. Ari ita, vosa kopii irara viapau oiso vorevira toreaverea, oire ra oisi iava eagara, “Uvuipavie ra aio ragapape ora ukaio ragapavio, vao iava osa vokipavira kopii ragaviovere.” Oreoa vao oearovu purapaiseira.

<sup>33</sup> Opeita visii ragai ora keakea ragapata vao iava, osa oearovu visii tapo toupaoro ovovourovu vuriara purapaiseira. Uvare uvuipaai ra visii tapo vuri piepaive. <sup>34</sup> Poreta viro vearo rugoo puraoro vorevira. Vuri vovouro oavisii pura arapa eakata. Oa-a vao

♦ 15:17: Ro 4:25

♦ 15:25: Sam 110:1

♦ 15:27: Sam 8:6; Mt 28:18

♦ 15:31: Ro 8:36; 2 Ko 4:10

oa iava oiso visiire purarai visii arii pieoro. Uvare oeavuei visii iava voeao oea touvira Pautoa-ia tarai asavira toupaivoi.

*Varaura Vorevira Toreperea Osivu Ragavira Karekepaoro*

<sup>35</sup> Iravu oirato oiso vaio akerevere, “Apeisi ragavira oirara vorevira kopiara iava tootoopaoro torepaaverea? Ora apeisi ragavira varaura kekepa pirovereera rara?” <sup>36</sup> Ari ita, ro vaaruu vovouto ira oiso evo ake purarevere. Uvare viapau taraipatai vaisio-ia takura isi, eke? Vosa vaisi pauta, uva va-a eva oa iava voa uvuipai ra vaisi iava varaua eru rovope, va isivaaro iava kovape. <sup>37</sup> Oiraopavira rutu vaisi-a vaisio aisia pauta takura isi raga-a oiso osa aue kukara takura, ora oaravu rutu takuraro. Uva viapau oiso vara iava takeruara oisoa pau rovopata. <sup>38</sup> Ari Pautoa raga-a ira vara govukoaropa varaura vatepareveira, vo rara rera raga oisi rugoo rovoro. Ora vo vara rutu takuraara katakataiaro tapopa varaura vatepareveira oiso, oavu raga ita vao, ari oavu raga ita vao.

<sup>39</sup> Oire ovararovu rutu viapau oiso vaea kaevira toupaiveira. Viapau. Ari ovaravu raga-a vao oirato, ari varuere kare ovaravu raga, ovusa kokio kare ovaravu raga, ari atari kare ovaravu raga. <sup>40</sup> Oiso osa varao oara kekepapeira vuvuiua-ia, ora varao rasitoa-ia oara kekepapeira. Uva vearo kekeara rutu-a varao oara vuvuiua-ia toupaiveira, ora varao tapo ita rasitoa-ia oara toupaiveira oisi, vearo kekeka. Uva vao raga ita uvare osivu raga visivi kekepa piroveira. <sup>41</sup> Ari ita, ravireo vo kekearo wearoparoveira ora kekira tapo ita. Ira tapo vearo visivi kekeparo viroveira, vo osa eera vo kekearo pisa visivi ita kekepa piro. Ora aaviikoara rutu vo kekearo katakataivira kekepa piroveira pisa visivi vearovira ita.

<sup>42</sup> ♦ Oire uva oisi ragavira eisi osa kopii irara piesa vorevira toreaverea tootoosa. Vosa varaura tovapapeira, oire voa erupapeira. Uva evoa-a uva ita vorevira torepere, ra va iava viapau opesia vai voua varaua oaiaro. <sup>43</sup> Vosa varaura tovapapeira, uva raveravevira toupaive vurivira keke uviropaoro. Ari vosa vorevira torepe, ra evoa kaitutuvira rutu goruvira kekepa piro vearovira rutu. <sup>44</sup> Vosa varaura tovapapeira, uva oira vara-ia toupaive. Ari vosa vorevira torepe, ra uraura vara purave. Oiraopavira rutu ita, uvare vo vokio-ia oira vara-a vao oa-ia toupapeira. Oa iava uvuipavie i ra oiso ragavira ora vigei-ia taraipavio, Utupaua uraura vara-ia taru toupaperea. <sup>45</sup> ♦ Vao iava uvare Tugoropa Vuku-ia oiso purapapeira, ‘Rovopatoa rutu Adam pura rovoreva Pauto oiso ra oiravira toupareve.’ Uva oiraopavira rutu-a uvare iravu-a ro Adam ovoioto ira-a ita ro raga Krais reraaro Uraurato ira tootooa vatepareveira. <sup>46</sup> Uraurato vo tootooaro viapau oiso irapapeira. Viapau. Ari vo rasio vo tootooaro irapapeira. Oa iava uraurato vo tootooaro utupapeira. <sup>47</sup> Pauto rovopatoa rutu Adam rasito poupouaro iava pura rovoreva. Ari ro ovoiopato Adam vuvuiua iava vararoepa. <sup>48</sup> Ari ita, oirara voeao vo rasio iava oea oiso rutu toupaiveira osa ro ira rasito poupouaro iava pura rovoreva Pauto. Ari voeao oea vo uruiaroei vuvuiua-ia, oea oiso toupaiveira osa ro ira vuvuiua iava vararoepa. <sup>49</sup> Uva vigei vo kekearo oiso roropaiiveira osa rovopato vo kekearo, ro ira vo rasio poupouaro-ia pura rovoreva Pauto. Osa-a eisi osa ragavira vo utupaua vigei vo kekearo oiso roroverea osa ro Krais vo kekearo, ira vuvuiua iava vararoepa.

<sup>50</sup> ♦ Araoko irara oaa, ragai vo reoaro vituaro-a vao-ia oiso, Vouao varaua oua-ia sopeara toupaiveira ora aue revasiva. Ovara-a eva viapau uvuipai ra Pauto vo Saraaro iare koatape. Eake iava? Uvare voua varaua uvuipai erupape. Oa vituaro viapau uvuipapeira oiso ra vao tapo ora tavosipape oa viapau uvuipai ra opesipape.

<sup>51-52</sup> ♦ Ragai vo reoaro uvuta. Uvare vatau reo-a vao visiipa oa kosi piepaavoi. Viapau vigei rutu kopiiviovere. Ari ora tavario ragavioverea vagevage visivi raga, oiso osa kataivira ripopareveira osireito. Vo vuutao-ia oa-ia gurukoevere ovoiova utave, vo osa Jisas vo vuutaaro reesioro vo vuutao oa-ia voreroverea. Ogurukoa eva isivaaro iava kopii irara vorevira toreaverea vo vararova oara viapau uvuipai ra opesipe. Vo ovusa vigei ora tavario ragavio kopii asa irara. <sup>53</sup> Uvare vo varao oa erupapeira oa uvui iraopai ra ora tavariopape vo varao iare oa viapau uvuipai ra opesipe. Uva oisi-a oiso osa vo varao oa kopiipapeira, oa uvui iraopai ra ora tavariope vo varao iare oa viapau opesia vai.

♦ 15:42: Dan 12:3; Mt 13:43    ♦ 15:45: Jen 2:7; Ro 5:14, 8:2    ♦ 15:50: Mt 16:17    ♦ 15:51-52: 1 Te 4:15-17

<sup>54</sup> Oire uva va-a eva vituaro iava uvuipavie i ra Tugoropa Vuku vo reoaro eveipape. Ra oiso purapavio, Ari oiraopa reo rutu, vao oa oiso purapapeira Jisas iava, ‘Kopiia vo goruaro oa opesi ovoiepa rutu. Vo osa orekerovu rutu-ia putereva.’

<sup>55</sup> ‘Ovu vii vo goruaroei kopiia, vao oa iavirava uvuipauei igei vuri piepari? Ora ovu-ia kopiia vii vo goruaroei, vao oa iavirava uvuipauei ra orekerovu rutu-ia putepari?’

<sup>56</sup> Oiraopavira rutu uvare kopiia vo goruaro vituaro-a vao-ia vuri vovou. Oa vituaro iava uvuipai ra vigei vuri piepaive. Uva uvuipavie i ra vuri vovou eveipape rutu, vo rara Moses vaaro-ia Reo Taisi taraipavio. Uva vuri vovou-ia taraipaoro va voriaro oupapeira vao-ia kopiia. <sup>57</sup> Ari roru iraopaavoi Pautoa-ia vuurapa vaisi purapaoro. Eake iava? Uvare rera raga vigei vatepareveira tauva ro vigei reraaro Turaro Jisas Krais vo goruaro iavirava. Eva-a oa iava uvuipavie i ra vuri vovou vo pitupituard-ia putepape ora kopiia.

<sup>58</sup> ♦ Oisi-a eisi osa iavirava visii araoko irara oaa, goruvira rutu toupata raripaoro. Opeita raveravevira vovoupata. Ari goruvira rutu kovo iraopata Turaropa. Uvare Jisas vo torearo-ia rugoopaoro taraipatai oiso, Viapau oiso akukuvira kovo ragapatavoi rerapa Turaro. Viapau. Ari visii vo voriaro epao vearoa voria oa outaverea rara.

## 16

### Sirao Vate Oirara Rutu Tauvapa Pauto Voeaaro

<sup>1</sup> ♦ Oire oreovu vao-ia oa visiipa vatepaavoi vao iava moni vate. Uvare oiso ruipaparai ra oiso piepata osa Galesia-pa irara taviava. Oa iava oisoa moni oupaave Pauto voeaaro tauvapasa. <sup>2</sup> ♦ Oiso voea taviava, Toupa vokiro rutu-ia visii rutu moniara oavisii orirupata ora visii vo kovoroaro uvuipaoro. Oire vosa oisi eisi piepata, oa iava viapau oavu avu vai vo ovusa visii ruvara-ia moni oupasa uriopara visii iare tavetepaoro. <sup>3</sup> ♦ Vo osa poura viro ra voeao arua oea reesitava moni kaepasa. Oire uva voea riara iare oaravu pasiara rigatoavere rara voeae iava varao oara kaeivere vaore, oiso ra voeao Jerusalem urui sovara-ia tou irara taraiave voea-ia oiso puraoro, “Oiraopavira rutu voea Korin iava urioai vigeipa sirao vate moniro vatesa.” <sup>4</sup> Ari vosa oiso rugoopata, Asi rera raga Pol uvuiparoi ra avaparo, uva evoea uvuipaai ra ragai taveoive.

### Oiso Ruipaparoepa Pol Ra Vokareve Korin-pa Irara Kekesa

<sup>5</sup> ♦ Visii iare karera virovere vo rara Masedonia Provins-ia pute rovoa, uvare voa Masedonia Provins-ia pou viro ruipa rovoparai. <sup>6</sup> Uva viapau taraiparai oiso visii tapo touavere, eke viapau. Oiso rugoo ragaparai, Iu vai pasi vo vaio tugurasa uva kokepa vuuta opesipere. Oire vo vuuta vai isivaaro iava uvuipatai vai ra ragai tauvata ragai sipo pieoro ouruirovu iare voraro uvaroare avaparo. <sup>7</sup> Uva reasiparai poteku visivi visii tapo tou arapa. Uvare ragai vo ruipaaro-a vao oa-ia oiso ruipaparai ra riro kaekae visivi visii tapo toua, vo rara Turaro oiso puraro, “Vearopai eisi viipa.” <sup>8</sup> Ari ita, tou rovoavere rara Efesas urui-ia vo vokio-ia rekasioro ovokia vaisipaiveira oiso, Pentikos-pa voki. <sup>9</sup> Uvare riro kovo rutuei ragai vaaro vo urui-ia vao-ia. Uvare rataoa karu pirorao ragaipa, oiso ra Turaro vo kovoaro puraa. Ari visii tavipaavoi oiso, Riro irara rutu epao vo kovore korukorupa irara.

<sup>10</sup> ♦ Oire vosa Timoti visii tapo tousa urioro, oa iava uvuipatai ra rera vearovira pau pieta. Oa iava viapau rera-ia uvuipaai orugorugoovu avu vai toupavie visiire. Eake iava? Uvare rera-a Turaropa kovopato ira oiso toupare osa ragai. <sup>11</sup> ♦ Viapau rutu oiso vearopai vosa irai visii iava rerare oiso puraro, “Akaipatoa raga ro-ia akukuto.” Viapau. Ari visii rutu uvuipatai ra rera tauvapata rera sipo piepaoro. Oa iava uvuiparoi ra vearo voka rutu purapareve rorupaoro. Uvare ragai rerare tueparavere ora oearovu tapo araoko irara oavi oea rera tapo urioipaavere.

<sup>12</sup> ♦ Oire ra ro iava Apolos vigei araokotoaaro visii tavipaavoi. Uvare vorevoreripavira rera tavitavi ragapaavora, oiso ra visii iare tavetereve oearovu tapo araoko irara, ovusa

♦ 15:58: 2 Pi 3:14; 1 Ko 16:10 ♦ 16:1: Ap 24:17, 9:13, 16:6 ♦ 16:2: Ap 20:7; 2 Ko 9:4-5 ♦ 16:3: 2 Ko 8:18-19

♦ 16:5: Ap 19:21 ♦ 16:10: Ap 16:1, 19:22 ♦ 16:11: 1 Ti 4:12 ♦ 16:12: Ap 18:24; 1 Ko 1:12, 3:5-6

touvira orugoorovu rera-ia toupaivoi. Oa iava viapau oiso ikauvira avapasa rugooparoi. Ari vovio vaio-a pasi utupaua, vo rara rerapa raiva karu piro.

*Ovoiopa Reoro Vatereva Pol*

<sup>13</sup> Visii vearovira rutu ora airerei iraopata. Goruvira rutu toupata visii varaaro-ia oirao pie vovouro. Opeita uriripata. Ari tuvuu vovouvira rutu toupata. <sup>14</sup> Vo osa varao okovoroa rutu purapata, oara-ia uvuipatai ra sirao vovou rutu sirovava vara purapata.

<sup>15</sup> Taraipataveira vo aao-ia Stefanas aao. Oaaoa rovovira rutu ora vo aao iava sopaura oaive pore rovoiva, voeao iava vo aao oea Grik taere-ia oisoa toupaive. Uva va-a vao oa iava ora vo aao iava sopaura oaive rutu tovoiva vo kovo puraoro Pauto oiraraaro tokipa koyo. Araoko irara oaa, oiso visii tavipaavoi, <sup>16</sup> Voeao vo vovouroaro sirova ututa oea eisi piepaiveira osa evo aao vovouaro. Ari vosa oearovu voea sirovavi toupaive voea tapo kovopaoro, oa iava uvuipatai ra oiso voea rutu vo vovouroaro sirova ututa.

<sup>17</sup> Roru iraopaavoi vao iava uvare Stefanas vase voeao oea ragai iare urioaerao voeao ora Fotyunetas ora Akaikas, oea ragai rugoo piepaiveira visiire, uvare tauai rutu ragaipa toupataveira. <sup>18</sup> Otoua-a vao oa-ia ragai tapo toupaoro ragai roru pieivorao, oiso rutu osa oisoa visii tapo toupaoro visii roru piepaive. Ari ita, uvuipatai ra oirara-ia vearo vaisi rutu purapata evoea oea oiso rutu toupaiveira osa voeari Stefanas vase.

<sup>19</sup> Voea rutu voeao lotupa irara oea Esia Provins-ia toupaiveira oea rutu visii iare vearo voki purapaivoi. Ora vaiterei tapo Akwila avukarei ora Prisila aiterea vearo voki visii iare purasivoi. Ora voeao oea vaiterei vo kepaaro-ia ora gurupaaveira lotu purapasa. Uva vearo voki vaisipaoro visiipa, oiso purapai vo Turaro vaisiaro sovara-ia. <sup>20</sup> Vigei rutu araoko iraraaro voea vo uruio-ia oea vearo voki purapaivoi visiipa.

Oire uva va-a vao oa iava visii tavipaavoi ra ora visiipa siraopaoro sekanta.

<sup>21</sup> Va vao-ia ragai vo reoviaro oa rigatoavoi ora ragai raga vavaearo-ia oiso-ia, “Vearo voki ragaiva Pol.”

<sup>22</sup> Oire vosa irouto visii iava viapau Turaropa siraoparo, irape. Ira voari utupaua taru opesi ovoirovereia. Turaro Jisas uriou igei iare ikauvira rutu.

<sup>23</sup> Oire uva oiso ruipa iraoparai ra visii tauvaa outa vigei reraaro Turaro Jisas ruvara-ia vo ovusa visiipa siraoparo. <sup>24</sup> Ragai-a vao sirao vovou rutu puraavoi visii tapo ora tavosioro Krais Jisas vaisiaro-ia.

Eisi osa vo pasio opesi piepaa.

Ragai-a vao, Pol.

## 2 KORIN

### Irapa Reoro Vo Vukuo Iava

Pol vao eraopa pasi rigatoreva vo ivao isivaaro iava oa-ia rovopa pasi rigatoreva Masedonia Provins-ia toupaoro. Uva voea Korin urui-ia tou irara rovopa pasi vieiivoiva, vuri pitupituro kavuiva. Oa iava Taitas vo reo kaereva Pol iare rera tavisa voea vo pitupituroaro iava varao vearopara. Eva-a oa iava vao-ia eraopa pasi rera vaaro rorua karekereva voeapa.

Ari viapau voea rutu lotupa irara rera Pol vo reoaro sirova utuaepa. Viapau. Aue iava uvare touvira vuri pitupituro purapaiva. Uvare Pol vo vaisiaro aposel vaisi akaipa piepaiva oiso purapaoro, Viapau oiraopato-a ro Pol, oa iava viapau uvuipaiei rera vo reoaro uvupasa. Oire uva va-a eva oa iava ora rera iava goruvira voea tavitavireva, uvare Pauto rera reesireva oisore ra aposel kovo purapareve (2 Ko 10:1-13:10).

1. Ora rera iava aviavi pie reoro, ora vearo vaisi purareva Pol, 1:1-11.
2. Pol ora rera vaisiaro aposel vaisi oirao piererva voeaopa vakuvaku vovou irara, 1:12-7:16.
3. Oirao pie vovou irara uvuipaai araoko irara oaiive tauvapaive vo Jisas vaisiaro-ia, 8:1-9:15.
4. Goruvira Pol ora rera vaaro iava aposel kovo taviroepa. Teapi kuuvu irara vo siposiporoaro sirova utupaave Korin vata, 10:1-13:10.
5. Ovoiopa reoroaro varao Pol varaaora ora oreorovu varao goru reoro rutu, 13:11-14.

<sup>1</sup>  $\diamond$  Pauto ragai Pol roporeva oiso ra oiso toupaa, Krais Jisas reraaro ragai aposelto. Oa iava vegei-a vao ora ro-ia vigei arakotoaro, Timoti vegoa vo rigato puravevoi visiipa Pauto voearo rutu visiigoa evoa Korin urui-ia lotu purapataveira. Ora voearopa tapo oearovu oearoa evo taere iava vo uruiro-ia toupaiveira Grik taere Pauto voearo.

<sup>2</sup> Uva ragai vo ruipaaro-a vao-ia oa-ia oiso vovouparai ra Pauto vigei Aitearo ora ro vigei reraaro Turaro Jisas Krais visiipa vereopa vovou rutu purasi visii tauvapaoro ora gavaure vovou.

#### *Pol Pautoa-ia Vearo Vaisi Purareva Vao-ia Osa Oisoa Rera Tauvapareve*

<sup>3</sup> Uvuipavieie ra Pauto-ia vearo vaisi rutu purapape rera-ia rorupaoro vigei reraaro Turaro Jisas Krais Aitearo. Ro Aite ira riroa rutu kaviko vovou purapareveira. Ro-ia Pauto ira ruvara iava otauvarovu rutu oupapeira. <sup>4</sup>  $\diamond$  Vosa tavakaa vai vegei-ia pou piro, ra oai-ia oisoa vegei tauvapareve. Osa iava uvuipaveieie ita ra oisi oearovu tauvapave, vo osa voearo-ia ita vo tavaka poupa piro. Eake iava? Uvare vegei ita uvuipaveieie ra vo tauvaa ita topa piepave oearovupa, oiso osa vegei pie rovopareveira Pauto. <sup>5</sup> Oiraopavira oiso rutu ita osa Krais-pa vo siitoka eva siraao oisoa vatepave oearovu. Uva vo raiva raga ita eva kataia oa sirova ita uvuipaveieie ra riroa siitoka vo siraaro oupave. Oire uva oisi-a eisi osa iava uvuipaveieie ra riroa rutu tauva oupave Pauto ruvara iava, vo rara Krais tapo ora tavosipave rutu. <sup>6</sup>  $\diamond$  Ari ita, oearovu vegei vuri piepaveira. Uva va-a eva oa iava Pauto vegei tauvapareveira. Uva vearovai oisi ita. Uvare vosa vegei oisi piepave eisi, oa iava uvuipaveieie ra oisi iava goruvira toupave visii vo vovouaro varaata piepasa. Ra va iava oisi vegei vo vovouaro siituepaoro va sirova ora visii iava oirao pie vovouro oavisii rutu goru piepata. Ra va iava oiso purapata “Vigei ita uvuipavieie ra oiso rutu goruvira torepavio osa vaitereo Pol vaio,” vo rara vo siitoka vo siraaro visii-ia poupa piro. <sup>7</sup> Eva-a oa vituaro iava uvuipaveieie ra oiso taraiapave visii-ia, Oiraopavira goruvira rutu torepaa, uvare tavaka vo vavataaro sopoaveira oiso osa vegei. Oa iava va vao riroa tauva oupaivoi, oiso osa vegei ita vo tauva oupaveaira vokiara rutu-ia.

<sup>8</sup>  $\diamond$  Araoko irara oave, oiso ruipapaveieie ra otavakarovu iava taraiapata varao oara vegei-ia poupa pirorao vo Esia Provins-ia. Ari ita, riroa rutu vavata vegei-ia pou pirorao va vao tavaka vo vavataaro. Oa iava raveravevira oisoa toupave voa oiso rugoopaoro, Vegeivi

$\diamond$  1:1: 1 Ti 1:1     $\diamond$  1:4: 2 Ko 7:6-7, 13     $\diamond$  1:6: 2 Ko 4:15     $\diamond$  1:8: Ap 19:23

kopiipaveiei. <sup>9</sup> ✩ Oiraopavira rutu, uvare oiso rutu rugoopaveiera, Vegoa ita reesiivora, oisire ra vegei upoive. Uva vo rugoo-a eva vegei-ia pou ovoi pirora, oa iava viapau oiso rugoopaveiera ra ora vegei ovovouiaro sirova goruvira toreve. Viapau. Ari kataitoa raga Pauto vegei Virivaripato, ira raga ita uvuiparoi ra vegei virivaripareve. Ro ira oirara tore piepareveira vorevira kopii tapirova. <sup>10</sup> Ari ita, oisi ragavira oisoa vegei virivari piepareve voeao asavira oea oisoa vegei-ia upo ruipa ragapaave. Uva vo vokio ita oisi raga vegei virivaripareveira. Oire uva oisi-a eisi osa uvuipaveiei ita rera-ia raripave vovio utupaua, vo rara ita vegei iare tutuu piepaive ita va kopiia vorerivira. <sup>11</sup> ✩ Uva uvuiparoi ra vegei ita tauvapareve, vo rara visii vegeipa variripata vegei tauvapaoro. Ra va iava Pauto visii vo variriroaro riroara uvupaoro vegei-ia vearoa purapareve. Eisi osa ragavira iava riro irara uvuipaai ra vo tauva eveipaoro rera vaisiaro kae piepaive va iava vearo vaisi purapaoro.

#### *Pol Viapau Oiso Korin-pa Irara Keareva*

<sup>12</sup> ✩ Oire uva vegei vaaro-a vao-ia riroa rutu rorua, ororua rutu vituaro-a vao sovopaavoi vo ora ragai iava sopaua-ia. Eake iava? Uvare oiso taraiparai Pauto vegei-ia vearoa rutu purapareveira vo vegei iava sopauarei goru piepaoro. Oa iava vegei visii tapo toupaoro ora oearovu tapo voraro oisi va torevoko rugorugooro rutu Pauto vo rugorugooroaro ora katai vovou oisoa purapave ita. Oiraopavira viapau oiso vo rasio vo taraiaro sirova utupaoro-a, ari Pauto vo tauvaaro iavirava raga vegei oisoa vereopa vovouro purapave evara. <sup>13</sup> Vosa opasirovu rigatopaavora visiipa, oara-ia evara roroio reoro raga rigatoavora visiipa. <sup>14</sup> Uva oiso vovouparai rutu ra utupauavi vo reo-ia vao ora vegei iava vearovira taraitavere rutu, oreoa-ia vo vokio gare visivi vavagisipatai. Vaore vosa vo utupaua ovokia-ia Turaro vorevira voreroverea, uva vegei vaisiaro-ia vearoa puratavere. Ovusa ita vegei oisi raga vo vokia ita visii vaisiaro-ia vearoa purave rorupaoro.

<sup>15</sup> Ari ita, visii oirao piepaavora oiso, Vegei vai egaegapata. Oa-a vao oa iava oiso vovou ragaraepa ra visii iare tavetea vo vuutarei-ia, oiso ra oisi pieoro voreripavira visii tauvaa.

<sup>16</sup> Eva vituaro iava oiso vovou ragaraepa ra visii iare tavetea evoa. Ra evoava Masedonia Provins iare ava rovora. Oire ra voava ita vorevira vorera visii iare. Ra va isivaaro iava taru evoava ragai tauvata ragai sipo pieoro Judia Distrik iare. <sup>17</sup> Uva oisi-a eisi osa visii tavi rovoava osa eisi ragai vovouaro oiraopavira rutu toupava. Viapau oiso visii keaava oiso osa iravu vo rasio raga iava rera. Viapau. Uvare viapau uvuiparai oiso ra oeai tavi ragaa oiso, “Urioparai visii iare,” vo ovusa ragai oruipaiaro viapau oisi eisi toupaive.

<sup>18</sup> Pauto oiraopavira rutu reoparoveira. Oa iava rera vo pitupituaro sirova oisi oiraopavira rutu reoparaveira oiso-ia, Ragai viapau uvuiparai ra oiso rugooparo, Viapau avaparai, vo ovusa ragai iava gisipo oiso purapao, “Oiraopavira urioparai.” <sup>19</sup> ✩ Oiraopavira rutu igei vase vao-ia Sailas ora Timoti visii tarai pieova Jisas iava, vo siposipo-ia oa oiso purapai, Jisas Krais Pauto Oviitoaaro ira viapau oiso rugooparo, Ragai viapau vao purapaavoi, vo ovusa rera gisipo oiso purapape, “Oa purapaavoi vao-ia.” Viapau. Ari oisoa va pura ovoipareve vao oare oisoa taviparo va purapasa. <sup>20</sup> ✩ Oa vituaro-a vao-ia oiso-ia uvare Pauto ovoi reoro purapaoro oiso puraparoveira “Ragai oa purapaa.” Oa iava Krais Pauto vo reoaro sirova utupaoro oisi va purapareveira vo reo oirao piepaoro rutu. Eisi osa ragavira Pauto oiraopavira rutu taviparoveira. Uva va sirova utupaoro Krais tapo ora tavosipavio oiso purapaoro, “Oiraopavira rutu,” vo Pauto vaisiaro kae piepaoro. <sup>21</sup> Vo uvare Pautoa raga-a ira vigei rutu ora vegei Krais-va tavosireva vigei vo vovouroaro oirao pieara goru pieoro rutu. Uvare Pautoa raga-a ira vegei roporeva vo kovoaa vao purapasa.

<sup>22</sup> ✩ Ari ita, vigei rutu-ia vo reesio tovoreva oa oiso purapapeira, “Vigei-a Pauto voeaaro.” Uva vara rutu oirao piesa Tugoropato Uraurato tovoreva vo vigei sopaaro-ia. Ra va iava rera iavirava oiso taraipavio, Oiraopavira rutu osa eisi oaravuei oara epao tuevira vigeipa varao iava rera varaaro.

#### *Viapau Pol Ikauvira Voea Iare Avaroepa*

---

✩ 1:9: Jer 17:5, 7   ✩ 1:11: Ro 15:30; Fl 1:19   ✩ 1:12: 2 Ko 2:17; 1 Ko 2:4, 13   ✩ 1:19: Mt 16:16; 1 Te 1:1; Hi 13:8   ✩ 1:20: Ro 15:8-9   ✩ 1:22: Ef 1:13-14

<sup>23</sup> ♦ Oire vo osa oiso rugoo ragaparaepa oiso ra uriora evoare Korin-ia, osa viapau ita urioraepa. Vo uvare oiso rugooraepa, Teapi visii iava sopaura vavata piea. Pauto ragai iava sopaua-ia taraiparoi, vo ovusa oiso oiraopavira visii tavipaavoi. <sup>24</sup> ♦ Viapau oiso riro goru reo vai rutu vatepavevoi visiipa, oisore ra oai raga sirova utupata, vo osa ora visii varaaro-ia oirao pie vovouro rugoopata. Viapau. Ari visii vo vovouroaro uvuivira rutu toupaiveira varao oirao pie vovouro. Uva visii-ia kovopavevoi visii vatepaoro tauvaa. Oa iava uvuipatai ra roruvira rutu vearovira toupata.

## 2

<sup>1</sup> Uva ora ragai raga vo rugorugooaro-a vao oa-ia oiso rugooraepa, Viapau uvuiparai ra vorevira visii iare avara. Teapi visii vatea vavata vovou. <sup>2</sup> Vaopa vosa oisi eisi visii piea, uva irou vai-a vao uvuipai ra ragai roru pieve? Ari visii ita viapau uvuipatai ra ragai roru piepata, vo osa visiipa vavata vovou vate rovoa. <sup>3</sup> ♦ Eisi osa vituaro iava-a vari rovopa pasia oa rigato rovoavora visiipa oisi raga ita eisi. Uvare reasiparaera oiso, Teapi visii ruvara iava riro vavata oua, vo osa visii-ia poura viro. Eake iava? Uvare visii raga ita visiigoa vokiara rutu-ia uvuipatai ra ragai roru piepata ragai vo reoroaro sirova utuoro. Va-ia oisi eisi taraiparai, Vosa ragai rorupaa, oire visii tapo ita rorupata. <sup>4</sup> ♦ Uva rirovira rutu gaupaoro siraopaoro va eva rovopa pasi rigatoavora visiipa. Viapau oiso visiipa vavata vovou vatepasa vo rigato puraavora. Ari ragai vaaro riroa rutu siraopa vovou kareke pieoro-a visiipa.

*Uvuipaa Ra Iravu Iava Vuria Veraive Ro Ira Vuria Purareva*

<sup>5</sup> Oire uva vuria purapaoro eera oirato ira visii tapo touparevora. Ira ragaipa vavata vateparevoi ovusa oearovupa visii iava vavata rutu vateparevoi. Uva oisi eisi purarai oiso, "Visii iava oearovupa" vaopa oiso, teapi torevokovira rutu riro goruvira oisi ragavira rera togapaa va-ia. <sup>6</sup> Ari ita, visiipa vo reo rigatoavora ro iava ira vuri vovou rovoreva riro vavata vateoro. Oa iava ragai vo reoroaro sirova utupaoro rerare oiso purataera, "Vuria purarivoi," rera vo vuriaro vo voriaro vateoro rerapa. Uva oisi-a eisi osa uvuipai rutu rerapa. <sup>7</sup> ♦ Oire visii taviavoi oiso, ra viapau ita vorerivira rera vo vuriarore rugoopata. Viapau. Ari uvuipatai ra rera vaaro oirao pie vovou vorevira goru pieta vaore rugoopata, Teapi oisi va iava rera iava sopaua-ia riro vavata vovou sovooro ora piro pieparo. <sup>8</sup> Uva oiso goruvira rutu visii tavipaavoi, Rerapa visii vo vovouroaro siraopa vovouro rirovira rutu kareketa. Ra va iava oiso tarairo, O ari oiraopavira rutu ragaipa siraoai. <sup>9</sup> Uva vari rovo rigato pura rovoavora vare rugoopata oiso, E pasi ragai vo reoroaro rutu sirova utupaavere, eke viapau? <sup>10</sup> Uva oisi-a eisi osa ragai vo reoroaro sirova utupaoro rera eera vo vovouaro vuria veratavoi, vo osa oisi eisi piepatavora. Ra ragai tapo ita rera vaaro vuria veraa vo Krais vaisiaro sovara-ia. Ari vosa iravu iava oavu vuria veraa, ra viapau ita vorevira vare rugoora. Osa-a eisi osa piepaaveira vo Krais vaisiaro sovara-ia visii iava sopaura rutu goru piepaoro. <sup>11</sup> ♦ Vaopa, teapi Seten vigei-ia putepareve rutu. Uvare taraiipavie rera-ia ira vigei ateate piepaoro toupareveira vaore, oiso ra ovokirovu-ia vigei kove piepareve rera vo reoroaro-ia kuuvuara.

*Pol Riro Tavaka Rutu Kekereva Troas Urui-ia*

<sup>12</sup> ♦ Vosa Troas urui-ia poura viropa Vearo Siposipo iava Krais vaaro siposiposa, uva evoa touoro oiso tarairaepa, Akoea, Turaro ragai vo kovoaropa rataoa karurevoi vao-ia.

<sup>13</sup> ♦ Uva evoa touoro taraa ragaava rore vigei araokotoaaro Taitas. Oa-a eva vituaro iava rirovira rutu rugorugoo iraoparaepa rerare oiso purapaoro, "Apeisi pierovo?" Uva va-a eva vituaro iava voea evoea avaueava. Oa iava voava topara viropa Masedonia Provins iare.

*Aposel Irara Pauto Vo Goruaro Iavirava Oisoa Upoa-ia Putepaive Rutu*

<sup>14</sup> ♦ Ragai roru iraopata Turaro-ia toupaavoi. Uvare Krais tapo ora tavosipaveiei, ra vegei tapo vokapareveira Pauto uvarovu rutu Seten-ia putepaoro. Ari ita, voraro rutu viripareveira Pauto vegei iava sopauarei tauvapaoro, vo ovusa vegei vo taraiaro vao

♦ 1:23: Ga 1:20; 1 Ko 4:21   ♦ 1:24: 1 Pi 5:3; Ro 11:20   ♦ 2:3: 2 Ko 12:21, 7:16, 8:22   ♦ 2:4: 2 Ko 7:8-9, 12

♦ 2:7: Ga 6:1; Ef 4:32   ♦ 2:11: Mt 4:10; Lu 22:31; 2 Ko 4:4; 1 Pi 5:8   ♦ 2:12: Ap 16:8; 1 Ko 16:9   ♦ 2:13: 2 Ko

7:5-6   ♦ 2:14: Ro 6:17; Ef 5:2; Fl 4:18

Krais iava kosi piepave uvarovu rutu. Ra va iava vo reo vao rera iava oa uvupaoro va sovopaive gavaurevira ora voea-ia, oiso rutu osa vearo geesiva o korovo (wel). <sup>15</sup> ♦ Aue iava uvare vegei oiso rutu toupaveaira osa o vearo geesiva korovo, vao oa-ia korouua tauoa purapareveira Krais Pautoa-pa. Uva vo geesi-a eva oa gaegaerepaoro uvarovu rutu avapapeira voeaore oea oupareveira Pauto ora rera iare vorevira, ora voearo oearoa opesi ovoipaaveira. <sup>16</sup> Ari ita, vosa va vao vearo geesi voea ruvara-ia pou piro, oire ra va iava vo geesi eveiive, ra oiso puraave, “Asi Pautoa iava vo geesio-ia. Oa iava taru opesi ovoiioverea.” Osa voeao oea Pauto ora rera iare vorevira ouparevere vo geesi eveioro va geesive. Ra va iava oiso puraave, “Pauto vo geesiaro vao-ia tauvapa. Oa iava taru Tootoo Ovoi oupe.” Oiraopavira rutu vo osa vegei raga-a viapau oiso uvuipaveiei ra oisi voea tauvapave. Viapau. Ari Pauto vo goruaro raga-a oa iavirava voea tauvapaveaira. <sup>17</sup> ♦ Riro irara rutu oirara Pauto vo reoaro vatepaiveira oiso rutu osa akukupapara raga kotokotoara. Oire ra vara-ia moni oupaave vara voripaoro. Ari vegei viapau oiso osa voea. Eake iava? Uvare Pauto vegei vao arureva. Eva-a oa vituaro iava oiraopa reo rutu iava siposipopave, vo rara Krais tapo ora tavosipave. Uva Pauto vegeiva vurapareveira, vo ovusa oiraopavira rutu vo reo kosi piepave oa oupave rera ruvara-ia.

## 3

*Kovopa Irara Vaaro Airepa Reo Ovoi*

<sup>1</sup> Vosa oisi eisi purapave, uva viapau oiso ora vegei vaisiaro raga kae piepaoro-a. Viapau oiso aapaapautoarei-a vegei visiipa, oa iava uvuipaveiei ra visiipa oaravu pasiara kaepave, vo pasiro oara-ia rigatopaive oearovu oiso puraoro, “Vearotoarei-a vaitereo aiterea vo reoaro uvuta vearovira. Ra aiterei vearovira pau pieta.” Viapau oiso oisi eisi opasiei. Ari vegei-ia taraipataveira. Ari ita, uvarovu rutu vokapaveaira. Uva voraro viapau oiso ora vegei iava opasiiva vokapaveaira vo pasio oa rigatotavora. Ari ita, uva vegei vearovira oisi raga pau piepaiveira. <sup>2</sup> Eake iava? Uvare visii raga ita vegei vaaro pasia eva vegei vo kovoaro oirao piepaoro. Vo uvare visii vo touaro-a vearoa, otoua vegei vo kovoaro oiso karekepaiveira pasia. Oa-ia uvuipaai oearovu rutu ra va vieioro taraiave. <sup>3</sup> Oirara rutu visii eveipaiveira oiso, Visii vao pasia vao vova Krais oa viapau oiso ing vai-ia rigatoreva aveke pero vai-ia. Viapau. Ari visii sopapro-ia vo pasio rigatoreva ro iavirava Tugoropato Uaurato Pauto reraaro ira vigei iava sopaura-ia toupareveira. Oire vo pasi-a vao oa rigatorevoiva, va saporeva oearovu iare Pauto vo kovoaro iavirava oa purapavevora visii tapo toupaoro.

<sup>4</sup> Osa eisi purapaveiei uvare va-ia vao taraipaveiei oiso osa Pauto vegei tauvapareveira vokiara rutu-ia vo vegei vo kovoaro-ia, vo ovusa Krais tapo ora tavosipave. <sup>5</sup> ♦ Viapau oiso oavu avu vai epao vegei-ia, oiso ra oai iava oiso purave, “Iu. Uvuipaveiei rutu vo kovo purapave.” Viapau rutu. Ari Pautoa raga-a ira oiso vegei piepareveira vo kovo purapasa.

<sup>6</sup> ♦ Uva Pautoa raga-a ira vegei goru piepareveira vegei sipopasa rera vaaro iava Airepa vao Reo Ovoi tavitavipasa. Vo uvare rera-a Pauto ira reoreopaoro Tuariripa vao Reo Ovoi-ia va rigatoreva aveke pero-ia. Oa iava oearovu oirara vo reo sirova utu ragaaepa. Osa iava vo reo-ia voea raga ora piro pieaepa uva oisoa kopii ovoipaave evo reo sirova. Ari vao-ia Airepa Reo Ovoi oa viapau oiso toupaivoi osa eva Tuariripa. Eake iava? Uvare Airepa Reo Ovoi-ia vao oiso purapapeira, “Ro Pauto reraaro Tugoropato Uaurato ira Tootoo Ovoi vatepareveira.”

<sup>7</sup> ♦ Ari ita, Pauto tuariri rutu Reo Taisi aveke pero-ia rigatoreva. Vao oa iava Moses vo pero kareke pieрева voeaopa oirara, vo ovusa Pauto vaaro keraria aviaviaro goruvira rera-ia roropaiva. Uva voavi ragava va eva keraria vo aviaviaro opesipaoro varapaepa oisivi. Ari ita, tou visivi roropaiva goruvira. Ra va iava vao Jiu-pa irara osireiaro aau piepaiva, oa-ia viapau vearovira Moses puaaro kekeiva. Oire va vao isivaaro iava va eva Reo Taisi sirova akukuvira utu ragaoro kopii ouiva. Ari oiraopavira rutu oiso osa va vao-ia Reo Taisi rovoepa, vo ovusa Pauto vaaro rirova keraria va-ia rorova ora Moses-ia tapo.

◇ 2:15: Ef 5:2; 2 Ko 4:3 ◇ 2:17: 2 Ko 4:2, 1:12, 12:19 ◇ 3:5: 2 Ko 2:16; 1 Ko 15:10 ◇ 3:6: Ga 3:10; Jo 6:63

◇ 3:7: Eks 34:29-35

<sup>8</sup> Oire uva apeisi-a va-ia vao Airepa Reo Ovoi oa Tootoo Ovoi vatepaiseira? Oiraopavira rutu uvare va vao Airepa Reo Ovoi vaaro keraria pute pievira rutu roropaivere vo osa vo Reo iava tavitavipave rera iava ro Tugoropato Uraurato ira Tootoo Ovoi vatepareveira.

<sup>9</sup> Uva voea rutu va-ia vao Reo Taisi taraiaeapa oiso, Vearoa vao-ia reoa. Oa-a vao oa iava oearovu voea iava kopiiaea. Uva oisi raga ita oiso osa oearovu vao-ia Airepa Reo Ovoi vao Krais vaaro taraipaoro oiso purapaa, "Vearoa reo rutu vao-ia. Oreoa-ia aviaavia toupaiveira oirara iava sopaura aviavi piepasa, oisore ra Pauto uvuiparoveira ra oiso puraparo, Visii-a torevoko vovou irara. Osa iava taru Tootoo Ovoi outaverea." <sup>10</sup> Uva voea voeari tuariripa irara oea vao-ia Reo Taisi taraioro oiso puraaeapa, "Vearoa rutu-a vao-ia oa reipai rutu vigeipa." Ari vo vokio vigei taraipavie, uvare viapau oisi eisi vo vokio-ia toupai. Eake iava? Uvare Airepa vao Reo Ovoi-a oa Tuariripa Reo-ia pute iraopaivoi rutu pauakavira toupaoro, vo osa orekerovu rutu kareke piepaiseira vearovpara. <sup>11</sup> Ari ita, Tuariripa Reo oa oisoa aviaavia vatepaise opesipaoro. Ari vao-ia Airepa Reo Ovoi vo aviaaviaro oa viapau rutu opesia vai epao. Evo reo oa vearo iraopai tuariripa-ia Reo Taisi putepaoro rutu vearoa sisikore aviavi vatepaoro.

<sup>12</sup> ♦ Oa-ia oisi taraipaoro vegei tuuvu vovou rutu purapaveaira. <sup>13</sup> Uvare vegei viapau oiso toupavevoi osa roari Moses ira ora rera iava puaua tavarureva vaopa oiso, teapi Jiu-pa irara keraria aviaaviaro kekeive, vo osa rera puaaro iava opesipaoro varape. <sup>14</sup> Ari ita, voea iava rugorugooara oisoa vavagisipape. Uva vo vokio-ia oisi raga touvira vo tavarurova toupavoi voea vo rugooaro ruupaoro vaore, oiso ra tuariripa Reo Taisi vieipaise, ra va iava viapau voeapa aviavipape. Ari vosa iroutoa vai ro ira Krais tapo ora tavosiro, eva-a oa iava uvuiparoi ra ora rera iava ruupa varoa verareve ora rera vo rugorooro ariarava, oisore ra roroiovira taraiparo. <sup>15</sup> Ovokirovu-ia vo vuutao-ia Jiu-pa irara va vao Reo Taisi vieipaise Moses vaaro, vo ovusa viapau oiso aviaavivira rugoopaave. Uvare ruupa varoa oa-ia ora voea vo rugorugoro tavarupaiseira. <sup>16</sup> ♦ Ari uvuipai vera uvirosa va eva varoa vo osa voea iava iravu oirato rera iava sopaura porereve Turaro oirao piepasa. <sup>17</sup> Oire uva irouto-a Turaro ira vaisipai evo reo? Ro raga ita Tugoropato Uraurato. Oire taraipavie vao-ia vosa Tugoropato Uraurato oiratoa iava sopaura-ia toupareve, ra viapau oiso touvira rera iava rugorugooara vavagisipape. <sup>18</sup> ♦ Uva vigei tapo viapau oiso touvira ora vigei iava puaura ruupai oiso osa piereva Moses. Viapau. Ari oirara uvuipaa ra vigei-ia vurapaoro Turaro vo vovouroaro eveipaise. Vao-ia rera raga-ia ro Turaro reraaro Tugoropato Uraurato, ira vokiara rutu-ia vigei tavaripaoro kovopareveira, oiso ra vigei vo vovouroaro riropape avapaoro oiso rutu toupasa osa Krais vo touaro.

#### 4

##### *Aposel Irara Oiso Toupaiveira Osa Pitokava O Verakova*

<sup>1</sup> Pauto vereopa vovou rutu puraoro vegeipa vo kovo vatereva. Eisi osa vituaro iava vegei iava viapau sopauarei raveravepapeira. <sup>2</sup> Uva oisi eisi pievevoiva, vo vovouru eakaveva oara oisoa purapave rupa vovou-ia varao oara-ia oisoa ariia oupave. Uva eisi osa pievevoiva, viapau oiso kuuvupaveaira. Ora vosa vo reo-ia vao Pauto vo reoaro siposipopaveaira, uva viapau oiso va tavaripaoveaira. Ari aviavi pievira rutu va iava siposipopaveaira vaore, oiso ra uvui iraopata va-ia taraipasa oiso, Oiraopa-a rutu. Ari ita, Pauto vegei-ia taraiparoveira oiso, Vegei oiraopa reo rutu kosi piepave. Oiso rutu ita osa oearovu oirara ita vegei-ia taraipaaveira oisi, <sup>3</sup> ♦ vo osa aviavi pievira Pauto vo reoaro kosi piepaveaira voeapa. Ari oearovu viapau roroiovira va ouiva. Uva aue oaive-ia vosa voea raga ora opesi pie ovoiave eisi va iava. <sup>4</sup> Uva eisi osa piepaiseira vo rara Seten voeao oirao pie vovou asa irara vo rugorooro ruupareve vara rupa piepaoro, ro raga ita Rovopatoa Rutu Tugarato vo rasio iava. Oire ra oisi iava viapau aviaavia vai kekepaise, vo aviavio oa Vearo Siposipo iava rugorugooarare roropaiseira vara aviavi piepasa. Vo siposipo-a vao oa rera iava Krais toupaiveira. Ro ira kerariava toupareveira oiso rutu osa Pauto. <sup>5</sup> ♦ Uva viapau oiso ora vegei raga iava siposipopaveaira. Viapau. Ari vegei Krais Jisas iava siposipopaveaira oiso, Rera-a Turaro. Ari vegei-ia kovopatoarei visiipa vo Krais

♦ 3:12: Ef 6:19   ♦ 3:16: Ro 11:23   ♦ 3:18: 1 Ko 13:12; 2 Ko 4:4, 6   ♦ 4:3: 2 Ko 2:12, 3:14; 1 Ko 1:18   ♦ 4:5: 1 Ko 1:13, 23

vaisiaro-ia. Eisi osa vo reo iava tavipaveaira. <sup>6</sup> ♦ Aue iava uvare Pauto oiso puraroepa, “Aviavia rorori vova rupa tapi.” Ira raga ita Pauto ira aviavia roro piepareveira vigei iava sopaura-ia vigei iava rupa vovouro verapaoro. Oisore ra vo aviaivi lavirava varao-ia roroiovira taraipavio Pauto vo vovouroaro, oarare oisi eisi roropaiseira Jisas Krais vo vovouaro iavirava.

<sup>7</sup> Pautoa raga-a ira vegei iava sopauarei oisi piereva, oiso ra oisi aviavivira toupaive. Ari ita, oiso vegei piepareveira osa pitokava o iria uvuipaoi ra pegepege ovoio viro opesi ovoioro. Uva va-a eva oa uvuipai Pauto vo goruaro kareke piepasa, uvare rera vaaro raga-a gorua oava toupavevoi. <sup>8</sup> ♦ Oiraopavira rutu tavakaara vegei-ia pou ragapa piroveira vaore, osa ra vegei tupapaive, vo osa viapau. Ari ita, ovokirovu-ia vegei vo rugooroaro vavagisi ragapapeira, ovusa viapau uvuipai ra vo kovo kavuve. <sup>9</sup> Riro irara rutu vegeiva ora keripa irara toupai, ovusa vate irara oave viapau vegei eakapai. Ovokirovu-ia vegei iava varauarei upia piepaiseira, uva viapau oiso vegei opesi pie ovoipaiseira vegei upopaoro. <sup>10</sup> Vokiara rutu-ia vegei oiso piepaiseira osa Jisas pieiva rera-ia vuria puraoro. Uva oisi-a eisi osa va vuria oupaveaira vao oa-ia goruvira rutu torepaveaira. Oisore ra Jisas vo tootooaro vo goruaro roroiovira karekepape vo varaura oave-ia ouareia raveraveira toupaiseira. <sup>11</sup> Vokiara rutu-ia vegei iare kopiia tutuu piepaiseira, uvare Jisas-pa kovopaveaira, oiso ra oearovu rera vo goruaro eveipaiseira vao oa purapareveira vegei iava varaura oave-ia, vo ovusa kopiisa tutuupaiseira. <sup>12</sup> Uva oisi-a eisi osa vituaro iava visii tapo uvuipatai ra Tootooa oupata. Vo uvare kopii-a vao vegei iare tutuu piepaiseira, vo ovusa Pauto vo reoaro kosi piepave visii tauvapasa.

<sup>13</sup> ♦ Ari ita, vegei oiso rutu toupavevoi osa ro iravu ira rigatoa purareva Tugoropa Vuku-ia oiso-ia, ‘Ragai oirao pie vovou rutu pura rovoava. Uva va-a eva sirovava oiso reoreoparai kosi pievira.’ Oiraopavira rutu oiso osa vegei Pauto vo reoaro iava siposipaveaira, vo rara rera oirao piepave. <sup>14</sup> Uvare taraipaveiei oiso, Eera Pauto Turaro Jisas vorevira tore piereva rera tootoo pieoro. Oa-ia oisi taraipaveiei, Osa ita vegei vorevira tore pierevira vegei vore piesa visii tapo ora rera iare, vo rara vigei rutu Krais Jisas tapo ora tavospavio. <sup>15</sup> Vo tavakaro rutu varao oara oupaveaira vao iava Vearo Siposipo siposipapaoro visiipa. Oa iava varare oiso puraparaveira, “Vearopai.” Eake iava? Uvare vegei-ia vurapaoro tauvaa oupataveira, vo rara goruvira torepave. Ora oearovu tapo riro irara vo tauva ouive, vo rara Pauto vaaro siraoa voea-ia karekepe. Oire ra va iava riro irara rutu oiraopavira Pauto vaisiaro kae piepaiseira rera-ia vuurapa vaisi purapaoro.

#### Vao Iava Tavaka Oa Riroa Keraria Kareke Pieverea

<sup>16</sup> Eisi osa vituaro iava vegei iava sopauarei viapau oiso raveravepapeira rera oirao piepaooro. Vo ovusa vegei iava varauarei opesipaoro avapai oisivi raga. Vo osa vokiara rutu-ia vegei iava sopauarei gorua oupaiseira. <sup>17</sup> ♦ Evara-a vuriara oara vegei-ia purapaiseira gareparavi raga. Uva opesi ovoipapeira, vo ovusa goruvira rutu tore iraopave. Uva oisi-a eisi osa vituaro iava riroa rutu voria oupavearea voari utupaua varao iava vearopara oaraei vuvuiua-ia vegeipa opesi asavira. <sup>18</sup> ♦ ♦ Eake iava? Uvare ora vegei iava sopauarei rutu tovo iraopaveaira varao-ia Pauto varaaro, oara-ia oirara viapau uvuipaaveira oiso ra vara kekepaiseira. Viapau varao-a oirara oara kekepaiseira vo rasio-ia. Uvare varao raga oara-ia oirara uvuipaai vara kekepasa, oara eva rutu opesi ovoiperea. Vo ovusa varao oara-ia viapau uvuipaaveira oirara oiso ra vara kekepaiseira, oara touvira rutu toupaiverea opesi asavira. Oara rutu-a eva oarare rugorugoopaveaira.

#### Aposel Irara Vo Oirao Pieroaro Voea Iava Sopaura Oaive Oisoa Goru Piepaiseira

<sup>1</sup> ♦ Vo osa vo rasio-ia toupaveaira, uva vegei iava varaura oiso rutu toupaiseira, kepa. Uva oiso taraipave, Okepa-a vao opesi ovoipapeira erupaoro. Oa isivaaro iava okepavu epao vegeipa, vo kepao oa purareva Pauto vo vuvuiua-ia vegeipa. Okepa-a

♦ 4:6: Jen 1:3   ♦ 4:8: 2 Ko 7:5, 6:12   ♦ 4:13: Sam 116:10   ♦ 4:17: Ro 8:18   ♦ 4:18: Ro 8:24; Hi 11:1-3

♦ 4:18: Ro 8:24; Hi 11:1   ♦ 5:1: 2 Pi 1:13-14

viapau irai oiratoa vai oa paureva. Okepa viapau opesia vaiei vegei arova. <sup>2</sup> Uva oiso purapaveie, “Ae, siraovira.” Ari ita, ruiipa iraopaveie oiso ra airepauarei vai-ia varauarei vai touve vo kepa-ia vao oa epao vuvuiua sovara-ia vegeipa. <sup>3</sup> Ari ita, airepauarei vaipa varauarei ruipa iraopaveie vaopa, teapi kopiiveiera, viapau varauarei vai pere vegeipa vo utupa tootoo-ia. <sup>4</sup> ♦ Vo osa touvira vo varaareo-ia toupaveaira vo rasio-ia, uva upiara sovopaoro koikopapeira ora siitokaara. Uva viapau oiso purapaveie, Viapau ruipapaveie vegei vouareiaropa varauarei. Viapau. Ari vegei oiso pura iraopaveie, Ruipapaveie rutu ra vegei vouareiaro varauarei kavuve, vouareo ouarea-ia kopiiveare. Ra va iava tuariripauarei tavariove airepauarei-ia toupasa, vouarei ouarea viapau opesia vaiei. <sup>5</sup> Pauto rera raga vegeipa raiva purareva vaore, oiso ra ora vegei iava varauarei oave tavariope airepa vararei ousa. Uva vegei vatereva Tugoropato Uaurato vore sopauarei oave iare varao rutu oirao piepasa rera iavirava oara rutu purareva Pauto vegeipa.

<sup>6</sup> Eva-a oa vituaro iava vegei goruvira rutu toupaveaira tuuvu vovou rutu-ia. Vo uvare taraipaveaira oiso osa tootoopaveaira vova ora vegei iava varauarei-ia vo osa tauaivira toupaveaira Turaro vo uruiaropa. <sup>7</sup> ♦ Vo osa touvira viapau Turaro kekepave, uva rera vo touaro oirao piepaoro toupaveaira, vao oa sirova ora vegei vo touaro purapaveaira. Uva varao oara kekepaveaira, viapau vara kekepaoro raripaveaira vegei vo oirao pie vovouroaro purapaoro. <sup>8</sup> Oire uva tuuvu vovouvira rutu toupaveaira. Oa-a vao oa iava vegei vo ruipaaro oiso toupaiveira, ra ora vegei iava varauarei kavuve rera tapo Turaro toupasa vo rera vo uruiaro-ia. <sup>9</sup> Ari rovopa rutu-a vao-ia ruiipa vegei vaaro Pauto roru piepasa vo rasio-ia toupaoro vo ora vegei iava varauarei-ia ora vo vuvuiua-ia. <sup>10</sup> ♦ Oiraopavira vigei rutu vovio utupaua rera ruvara-ia torevioreea Krais, vo ovusa vigei vo vovouroaro rovirieipareve. Uva evoa vigei rutu totoevira voria oavi ouperea rera ruvara-ia, ora vigei vo kovoroaro voriaro vo kovoro oara purapapeira vo rasio-ia toupaoro. Ari ita, oearovu rorua oupaiverea vearo kovoro oaiive voriaro-ia, osa voeao vuri kovo purapa irara, viapau.

#### Vao Iava Voeao Tauvapasa Oea Katai Vovou Rutu Purapaise Pautoa Tapo

<sup>11</sup> ♦ Oire va-a eva vuri kovo voriaro oa-ia taraipaoro uriri iraopaveaira. Ouriria vao vituaro iava vegei goruvira oirara rutu tavitavi iraopaveair, oisore ra ora porepaave Turaro iare. Uva oisi-a eisi osa iava Pauto vegei vo vovoureiaro-ia taraiparoveira rutu. Uva visii tapo ita tavipavevoi, oisore ra visii tapo vegei vo vovoureiaro-ia taraipata vo kovo iava vao oa purapaveaira. <sup>12</sup> Viapau oiso voreri tavi vaiei oa-ia uvuipaveiei ra visii ita tative oisi oiso-ia, “Vegei oiso piepavevoi vearovira, eke eisi osa piepavevoi vearovira.” Viapau. Ari visii tavitavipavevoi ora vegei vo vovoureiaro iava. Oa iava uvuipatai ra voeao vo reoroaro pukopaoro voea tavipata vegei iava, vo osa rorupata vegei-ia. <sup>13</sup> Vosa kokoropa rugoorei vai-ia kovopave, uvuipavei vo kovo purapave Pauto vaisiaro kae piepasa. Ari vosa torevokovira kovopave, oa-ia uvuipaveiei visii tauvapasa. <sup>14</sup> ♦ Ari Krais raga vaaro riroa siraoa oa vegei oiso piepaiseira, oa iava viapau uvuipaveiei ora vegei vo ruipaaro raga sirova utupasa. Viapau. Ari rera raga vo rugooaro-a oa sirova utupaveaira. Uvare vegei ita oisi rera-ia oiso taraipaveaira, uvare rera raga-a kataito, ira kopiicroepa oirara rutu vo vovouroaro voriaro ouoro. Ari ita, rera raga iavirava oirara rutu toupaiveira vo Pauto osireiaro-ia oiso rutu osa kopii irara. <sup>15</sup> Uva kopiicroepa oirara rutupa, oisore ra viapau uvuipaveie ra ora vigei raga vo ruiparoaro sirova utupavio vigoa Tootoo Ovoi ouera. Viapau. Ari rera raga vo ruipaaro-a, ro ira kopiia iava vorevira toreroepa vigei rutupa Airepa Tootoo vateoro.

<sup>16</sup> Osa-a eisi osa vituaro iava vegei viapau uvuipaveiei ra vo rasio vo pitupituroaro sirovava touvira rutu oirara vo vovouroaro rovirieipave. Viapau. Ari oiraopavira rutu-a vosa Krais keke rovovevori voviri rovovira, oire uva voa-a evoa uva vo rugoo sirovava eva vo rasio iava va rera vo kovoaro rovirieivevori. Uva viapau uvuipaveiei ra oisi eisi pieve vo vokio. <sup>17</sup> ♦ Oa vituaro iava vosa ro oirato ira Krais tapo ora tavosiparo, oire ra va iava oiso karekero, Airepatoa rutu. Vo uvare rera vo vovouroaro tuariripa vovouro kavu ovoirevo vao-ia tousa airepa vovou.

♦ 5:4: 1 Ko 15:53-54   ♦ 5:7: 1 Ko 13:12   ♦ 5:10: Ro 14:10; Ef 6:8   ♦ 5:11: Hi 10:31; Ju 23   ♦ 5:14: Ap 18:5; Ro 5:15   ♦ 5:17: Ro 16:7; Ga 5:6

<sup>18</sup> Pautoa raga ira oisi vigei airepavira kareke piepareveira vigei vo vovouaro tavariopaoro. Ari ita, vigei-a vao vigoa rovovira rerava oisoa ora keri rovopavio. Oa iava Oviito Krais siporeva. Ira iavirava Pauto vigei oisi pierava, Ora rera raga vate iraraaro vigei. Oa isivaaro iava vegei vatereva vo kovo, oisore ra oearovivu agiagipave rera iare.

<sup>19</sup> Ari ita, vegei vo siposipoaro-a vao-ia oiso toupai, Pauto oirara oisoa agiagipareve ora rera iare. Vao iava uvare Krais vo kovoaro-a, ira kopiiroepa oirara rutupa. Uva Pauto viapau oiso vuri vovouro rigatoreva oirara varaaro vara vievieipasa, oiso ra voa varare rugoopaoro oirara togapareve vara-ia. Viapau. Ari vo siposipo-a oa vegeipa vatereva, oisore ra oirara rutu tavitavipave rera iava oiso, Ro oirara rutu agiagipareveira voea kavikopaoro ora rera iare vorevira.

<sup>20</sup> ♦ Uva oisi-a eisi osa toupaveaira Krais vo reoaro kaepaoro vaore, oiso ra vegei gisipoaro-ia Pauto visii tavitavipareve. Uva va-a vao oa iava Krais vo vovouaro kareke piepavevoi goruvira rutu visii taviaoro oiso, "Ora visii iava vaseta Pautoa-pa. Oa iava uvuiparoi ora rera iare visii agiagipareve visii kavikopaoro. Oa iava uvuipatai ra oiso rutu toupata, Oiraopa irara rutu rera voeaaro. <sup>21</sup> ♦ Ari ita, Krais ira-ia oisoa viapau vuri vovouro vai toupaive. Uva Pauto oisi rera pierava, oiso ra vigei varaaro vuri vovouro kaereve varao vova vigei iava ora rera iare. Oa iava uvuipavie i ra Krais tapo tavosivira rutu toupape. Ra va iava Pauto vigei kekepareve oiso, Sisigarue vovou irara rutu. Oiso rutu osa rera Pauto vo vovouaro sisigarue-a rutu.

## 6

*Pol Riroa Rutu Tavaka Kaereva Vo Kovo-ia*

<sup>1</sup> Vo osa Pautoa tapo kovopaoro visii goruvira rutu oiso tavidavevoi, Opeita Pauto vaaro tauvaa vo vereopa vovou-ia va ou ragapaoro oa ropi ragapata vava tou ragapaoro.

<sup>2</sup> ♦ Aue iava uvare Pauto oiso puraroepa vo Tugoropa Vuku-ia,  
'Vosa torevokovira rutu karekeepa evo vuuta, oisore ra va-ia visii uvua, oire uva va-ia visii uvuava. Uva vo vuuta eva torevokovira rutu karekeepa, oisore ra va-ia visii kae piea. Oire uva va-a eva oa-ia visii kae pieava.'

Oire uvuta! Evo vuuta-ia visii uvurevere. Uva vo vuuta-a vao-ia vo vokio-ia, oa-ia oiso vovoupa ra visii kae pierave ora rera iare.

<sup>3</sup> Oire uva vegei viapau oiso oavu avu vai purapavevoi oirara kove piepasa. Vao oa iava oearovu uvuipaii ra oiso purapaave vegeire, "Vuri kovo eva oa purapasivoi." <sup>4</sup> Viapau. Ari vegei orekeroru rutu oiso purapavevoi vegei vo kovoaro vearovira kareke piepasa vo kovo-ia oa purapavevoi Pautoa-pa. Vosa tuuvu vovou rutu purapave vuriara oupaoro oearovu ruvara-ia ora ositokarovu rutu oara rutu vegei goru piepai, oisore ra goruvira rutu torepave oisi iavirava. <sup>5</sup> Iu. Oearovu vegei oisoa ragipaive. Ora oisoa vegei tovo ragapaive tuukepa kepa-ia akukuvira raga. Ovusa oearovu vegei kovokovopaive vegeiva kuarapaoro. Vo ovusa kasivarivira rutu kovopave uusi asavira ora ogoevira vo ovokirovua. <sup>6</sup> Vosa vara evara vegei iare oisoa poupa piro, uva ora goru piepave rutu. Viapau viria vai puravevora. Ari oisoa roroio rugorugoo raga rutu purapave. Ora oisoa kave vovou purapave ora vereopa vovou vaore, oiso ra oearovu va iava taraiipaave oiso, Akoea, veartoarei-a Pauto kovopatoareiaro. Ari ita, vegei oisoa oiso ragavira piepave rera vo goruaro iavirava Tugoropato Uaurato kaviko vovou rutu purapaoro. <sup>7</sup> Oiraopa reo raga oisoa vatepave, ora vearo pitupituro purapave vo rera vo goruaro raga-ia. Ra oiso ragavira va-ia vao torevoko vovou pitupave osa ro ira kakutoa raga-ia ora virivaripaoro upoa purapareve rera-ia. <sup>8</sup> Uva oearovu oisoa vegeire oiso rugoopaave, Vearo kovo purapasivoi, vo osa oearovu, viapau. Ari oearovu oisoa vegei takupaive, vo ovusa oearovu vegei vaisiaro kae piepave. Vo ovusa oearovu vegei vaisipaoro oiso purapaave, "Riro kuuvutoarei." Vo ovusa oiraopa reo rutu iava tavidavipave. <sup>9</sup> Ari oearovu vegeire oisoa oiso purapaave, "Aapaapautoarei ratau toutoarei." Vo ovusa oearovu rutu vegei vo kovoaro-ia vearovira taraiipaoro vegei eveipave. Uva vegeipa tutuu piepai oiso ra kopiive. Vo ovusa vegei-a vao touvira rutu totoovira toupavevoi. Ari ita, oirara vegei

♦ 5:20: 2 Ko 3:6   ♦ 5:21: 1 Pi 2:22; 1 Jo 3:5; Ga 3:13   ♦ 6:2: Ais 49:8

ragipaveira vurukoara-ia. Oa-a vao oa-ia viapau vegei upo ovoipaveira ra kopiipave.

<sup>10</sup> ♦ Ari ita, oearovu vegei iava sopauarei vavata piepaveira, vo ovusa touvira rutu rorupave. Ora oiso toupaveaira, Vegei-a apotatoarei. Ari oiso toupaooro oearovu riro irara oiso purapaveaira ra orekerovu rutu-ia pitupave vearopara Pauto varaaro, vo rara Pauto vo reoaro vatepave voeapa. Ari oavu-a vao-ia vao iava osa oearovu vegeire oiso rugoopaaaveira, Viapau oiso oaravu avu vai peira vaitereipa. Vo ovusa orekerovu rutu vegei varaaro toupaveira.

<sup>11</sup> ♦ Vate irara oaa visii, visiigoa Korin-ia toupavaveira. Visiigoapa sirao iraopaveiei oa-ia viapau oiso oreovu avu vai vataupavevoi visiipa. <sup>12</sup> Uva-a evoa uva viapau ora vegei iava sopaura oave vairupaveaira visiipa. Viapau. Ari visii raga-a taru, visiigoa ora visii iava sopaura vairupavaveira vegeipa. Oa iava vigei rutu viapau katai vovou-ia toupapeira.

<sup>13</sup> ♦ Oire uva va-a vao oa iava ragai vo reo vatepaavoi oiso rutu osa aiteto ovii iraraaro tapo ora reoreoparoveira. Ora visii iava sopaura oavisii karuta vegeipa siraosa, oiso osa vegei ita oisoa vokiara rutu-ia visiipa siraopave visii kavikopaoro rutu.

### Vigei Raga-a Pauto Vo Kepaaro

<sup>14</sup> ♦ Oire vosa visii Krais voeaaro visiigoa orekerovu vearoara pura ruipapata, ra viapau oiso ra voearo tapo ora tavosipaoro oirao pie vovou asa irara oisi vara purapata. Uvare apeisi ragavira uvuipatai ra vuria tapo tavosipaoro vearo vovou raga purapata? Ora apeisi ragavira uvuipatai ra voearo tapo ora tavosipata oea rupa vovouva toupavaveira, visii vao visiigoa aviavi vovouva toupavaveira? Vosa eisi ragavira piepata, ra viapau oiso vearovira kovopata voea tapo ora tavosipaoro rutu. <sup>15</sup> E Krais vaio ora Seten uvuipasi ra katai vovou purasi? Asi viapau rutu. E ro oirao pie vovouto oirao pie asato vo vovouvarova tapo vaeavira toupavaveira? Easi eisi viapau rutu. <sup>16</sup> ♦ Vigei-a Pauto vo kepaaro Tugoropa Kepa, ro Pauto Tootoo Ovoi. Uva apeisi-a? Uvuipatai ra orekerovu avu vai oupata vo tugara kare vo kepaaro vo orekeroi tovopasa Pauto vo kepaaro-ia Tugoropa? Viapau. Aue iava uvare Pauto oiso puraroepa vigeire,

'Ragai pauparaverea vo uva toupavaveira ragai voeaaro oirara. Uva-a voa uva voea vuutaaro-ia toupavavera. Ra voa oiso toupaa, Ragai-a voea reraaro Pauto. Vo osa voea oiso toupave, Ragai voeaaro oirara.'

<sup>17-18</sup> ♦ ♦ Ora oiso tapo osa puraroepa Turaro,  
'Uvuipatai ra voea ruvara iava ora goropaoro avapata. Opeita varao-ia pitupata oara vuivuipavira toupavaveira. Vosa eisi pieta, oa iava uvuiparai ra visii ora ragai iare oua. Ra va iava oiso toupaa, Ragai-a visii aitearo. Ovusa visii ita oiso toupata, Ragai ovii iraraaro visii, ora ragai  
ovii riakoaro visii. Eisi osa purarai, ragai vao-ia Gorutoa rutu Turaro.'

### 7

<sup>1</sup> ♦ Vate irara oaa. Reo ovoiro evara toupavoi vigeipa. Osa ragavira-a eisi osa uvui iraopavieie ra orekerovu rutu varao kavupape oara-ia ora vigei iava varaura ora sopaura vuivui piepapeira. Oa iava uvui iraopavieie ra ora airerei piepavio rutu Pautoa-pa avivikepaoro.

### Korin-pa Irara Ora Voea Iava Sopaura Oaive Poreivoiva, Pol Rorureva Rutu

<sup>2</sup> ♦ Ari ita, vegei viapau oiso vuria vai puraveva visii iava irai-ia. Viapau oiso irai keaveva visii iava irai piro pieoro. Viapau oiso irai keaoro orekerovu avu vai oisoa ou ragapave irai ruvara-ia. Osa vituaro eisi uvuipatai ra vegeipa siraopa vovou rutu vatepata. <sup>3</sup> Uva viapau oiso eisi puraparai visii togapaoro. Viapau. Uvare oiso puraparai vorevoreripavira visii tavipaoro, Rirovira rutu ora vegei iava sopauarei rutu-ia visii kaviko iraopavaveira visiipa siraopaoro. Oa vituaro-a vao oa iava vegei iava sopauarei visii tapo ora tavosipapeira, vo ovusa tootoovira toupave, eke vo osa tapo kopiive.

<sup>4</sup> Viapau oiso orugorugooi epao ita oa purapavoi oiso reopaoro visiire. Uvare visii vo

❖ 6:10: Ro 8:32; 1 Ko 3:21 ❖ 6:11: Esi 33:22; Ais 60:5 ❖ 6:13: 1 Ko 4:14 ❖ 6:14: Diu 7:2-3; 1 Ko 5:9-10

❖ 6:16: 1 Ko 3:16; Jer 31:1; Esi 37:27 ❖ 6:17-18: Ais 52:11 ❖ 6:17-18: Hos 1:10; Ais 43:6 ❖ 7:1: 2 Ko 6:17-18

❖ 7:2: 2 Ko 6:12-13

vovouroaro-ia roru iraopaoro taraiparai oiso, Torevoko vovou rutu purapatavere. Ari ita, otavakarovu rutu oisoa vegei-ia poupa piro. Uva-a evoa uva oiso visii iava uvuvevora, Vearo pitupitu purapatavoi. Eva-a oa vituaro rutu iava varaata vovouvira toupaveaira visii-ia roru iraopaoro.

<sup>5</sup> ♦ Ari ita, oiso ragavira-ia Masedonia Provins-ia pou viroveiepa. Uva viapau oiso voa reareaveiepa, uvare otavakarovu rutu vegei iare voa pou piropa, vo osa oearovu vegeiva ora kaureopaaepa. Oa-a vao oa iava vegei iava sopauarei rirovira vavataepa rugorugoo iraopaoro. <sup>6</sup> Uva rera-a Pauto ira uvuiparoi vo vavatato verapareve oirara sopaaro iava. Osa-a oiso osa vegei-ia piererva vo osa Taitas saporeva vegei iare. <sup>7</sup> Uva viapau oiso rera keke ragapave. Viapau. Ira-ia rorupavevoi rutu, uvare rera vo siposipoaro uvuvevo vao visii iava, vo uvare vearovira rutu rera tauvatavora rera iava sopaua rutu goru piepaoro. Oiraopavira rutu ragai tavirevorao visii iava, vo uvare ragaipa oisoa ruipapata oiso ra ragai keketa. Ora vo osa oisoa ragaipa rirovira siraopata. Ora vao iava tapo osa ragai vo reoroaro sirova oisoa goruvira rutu utupata. Oire uva va-a eva tapo-ia rirovira rutu roru iraopaavoi.

<sup>8</sup> Ari ita, ragai vaaro-ia rovoa pasia taraiparai oiso, Voea vaipa pasi riro vavataa vai vateavora vao sipooro. Ari viapau oiso siraoparai vo vokio-ia vo pasi iava eva. Uva taraiparai oiso osa visii sirao pieavora gare visivi raga. Ari viapau oiso ragai iava sopaua oaa vavatapai visiire rugoopaoro. <sup>9</sup> Viapau. Ari ragai roru iraopaavoi. Uva viapau oiso vo sirao vavataaro iava-a eva visii vaaro. Viapau. Ari vao iava uvare visii vo vavatatoaro-a evara oara vituaro iava ora visii vo pitupituroaro tavariotavora ragai vo reoaro uvuoro. Uvare Pauto kasikasi pievira vo vavatato kovo pierervora visii iava sopaura-ia. Uva oisi-a eisi osa vituaro-ia ragai viapau oiso visii vuri pieavora. <sup>10</sup> ♦ Eake iava? Uvare vo vavatato evara oara iava uvuipa Pauto oirara vorevira sopaaro porepareve. Ra va iava Pauto voea orirureve. Osa iava eisi vigei rutu uvuipaviee rutu ra rorus. Ari vosa vo tavakaro vo rasio iava oupaive oirao pie asa irara, oa iava uvuipaai ra kopii ovoipaave rara, vo rara viapau oiso ora oeai iava sopaura vai oaiive vorevira poreive va iavirava. <sup>11</sup> ♦ Vearovira rugorugoo iraopata vo tavakare vao-ia, uvare Pauto oisi va-ia vo kovo purareva visii-ia. Uvare va iavirava oisoa oisi rutu goruvira rugorugoo iraopata. Ora oiso tapo osa va iavirava ikauvira rutu vo reo pukotava, oa-ia visii vo vovouroaro torevoko vovouro karekeepa vaore, oiso ra viapau oisi orugorugooro purapaive oearoi visii iava. Ari ita, uvare oisi-a eisi osa iava vuri vovou veritavora vapa uriripaoro vapa pura arapa ita. Iu, uvare ragaipa siraopaooro goruvira rutu ragai vo reoaro sirova torevokovira rutu utu iraotaepa rera eera torevokooro ira vuri pitupitu purareva. Oa iava va eakareva. Oire uva oisi-a eisi osa iava ragai vorerivira keke ruipapatai vaore, ra visii vovouaro kekeoro va-ia oisi taraira eisi oiso, Oiraopavira rutu viapau oiso vuria vaiei visii-ia, vo uvare oisi eisi rera pietava eera.

<sup>12</sup> Oire vo rigato eva oa puraavora uva viapau oiso rugorugooraera, Uvare vuri pitupitu purareva, ora o tapo iria rera vovouaro-ia vuria oueva. Viapau. Ari visiire rugorugooopaoro evo pasi rigatoavora visiipa. Oisore ra va kekeoro vo reo sirova utuoro ora visii-ia va iava taraita vo Pauto osireitoaro-ia. Ra oiso purata, “Oiraopavira rutu oiso osa Pol-pa siraopavioveira ora voeao oea rera tauvapaiiveira.” <sup>13</sup> Oa-a eva vituaro iava vegei iava sopauarei varaata piepataveira.

Iu. Roru iraopavevoi visii vovouroaro-ia ora ro-ia tapo Taitas. Uvare vegei roru pierervora rutu va-ia, osa visii iava vegei tavitavirevora, vo osa visii rutu rera vo vovouroaro goru piepatava rera vo tavakaroaro verapao. <sup>14</sup> Ari ita, voviri tuariri Taitas tavi rovoava oiso, “Evoea Korin-pa irara oea ragai vo reoaro uvuivere rara.” Oire uva va-a eva osa ragai vo reoaro eva oirao pietavora rerapa visii vo vovouroaro iava. Uvare vokiara rutu-ia vegei visiire oiraopavira reopaveaira. Oiso osa vo reo oa vateava Taitas-pa visii iava, uva oisi oiraopavira rutu karekeera. <sup>15</sup> Oire uva visiire rugorugooopaoro rera vaaro siraopa vovou kavikoa riopai. Eake iava? Uvare ikauvira rutu ora visiipa rera rei vaisi pietava, vo uvare rera vo reoaro uvutava. Ora vao-ia tapo osa ora visii raga oisoa ora uriri piepata oiso rugoopaoro, E vearovira avu rera vo vovouaro sirova utuviovore?

<sup>16</sup> ♦ Uva roru iraopaavoi, uvare vao-ia tarai ovoirai oiso, Goruvira rutu eisi vo vovou purapataveira eva vearoa.

## 8

*Oirao Pie Vovou Irara Uvuipaai Araoko Irara Oaive Tauvapaive*

<sup>1</sup> Araoko irara oaa, oiso ruipa iraoparai visiipa ra oiso ragavira taraipata voeao-ia lotupa gururo oea voraro toupaiveira Masedonia Provins sovara-ia. Vao iava osa Pauto oisoa rirovira rutu voeapa vereopa vovou rutu purapareve. <sup>2</sup> ♦ Vosa riro tavakaro rutu voea-ia pou piro, uva evara-a oara-ia toupaoro uvuipaai touvira ra roruvira rutu toupaive. Uva vo rorua eva vituaro-a vao-ia, orekerovivu-ia voea varaaro oara-ia oisoa sirao vate purapaive. Oiraopavira uvare apota iraravi rutu-a. Ari oisi toupaoro apotavira riroa rutu sirao vate puraivora. <sup>3</sup> Uva oiraopavira visii tavipaavoi oiso, Voea varaviaro rutu orekerovu vateivora Krais voeao apota irara tauvapasa. Ari ita, pute pievira oaravu ita voea varaaro vateivora. Osa piepaivora eisi ora voea vo ruipaaro raga sirova.

<sup>4</sup> Uva goruvira ragai tavipaivora, “Igei ruipa iraopaiei rutu oiso ra sirao vate purapaio va takuvupaoro oearovu vo vateroaro tapo. Oa iava uvuipaiei ra va-ia Pauto voeao tauvapaio.” <sup>5</sup> Uva oisoa oiso keapaave, Gareavi raga monia sirao vate oa vatei, osa viapau. Riroa rutu oa vatepaivora. Ari ita, oisi-a eisi osa ragavira ora voea rutu iava sopaura rutu oisoa Turaropa vatepaive. Eisi osa ragavira Pauto vo vovouaro sirova utuoro ora voea rutu iava ita sopaura vateiva vegei tauvapaoro.

<sup>6</sup> Oa-a eva oa iava oiso Taitas-re puraveiera, “Ari ita, voviri tuaririvi Korin-pa irara tavarivora, oiso ra sirao vate purapaive. Ari vosa viapau ikaupavira va guruguruive, uva eva raga-ia uvuipauei ra voea tauvarivora, va ikauvira opesi pieive va guruoro.” Eisi osa rera tativevora. <sup>7</sup> ♦ Oiraopavira rutu ita oiso osa ovokirovu-ia okovorovu purapata, ra vearovira rutu vara purapata riro goruvira. Uva oisi-a eisi osa ragavira visii-ia taraiparai oiso, Osa ita goruvira rutu Jisas vo reoaro-ia pitupataveira. Ora va kosi piepataveira vearovira rutu. Ora vearovira rutu vearo tarai-ia taraipataveira. Ora vegeipa sirao iraopataveira. Ari ita, ikauvira rutu ragai vo reoaro uvu ovoitava ragai tauvasa. Oire uva vearovira rutu pute pievira vara evara purapataveira. Uva visii arepaavoi ra vao tapo sirao vate vearovira rutu ita purapata.

<sup>8</sup> Ari ita, ragai viapau oiso reo goru vai purapaavoi vaore, oiso ra va sirova utupata. Viapau. Ari visii tavipaavoi voeao iava oea oiso ruipapaaai ra oearovivu tauvapaive. Uva visii akepaavoi oiso, “E uvuipatai ra oisi pieta eisi?” Ra va iava visii vaaro siraopa vovou kareke pieta viaevira rutu. <sup>9</sup> ♦ Uvare taraipatai vigei reraaro Turaro Jisas Krais vo vovouaro-ia vao vereopa vovou. Ira oisoa riroara rutu-ia orekerovu pitupareve ora rera varaaro. Ari ita, oa iava vara-ia ora apota pieroepa rera raga visii rutu tauvaoro. Uva oisi ora apota pieroiva, eisi visii pierava, oiso ra riroara rutu-ia orekerovu pitupata rera varaaro vearovpara.

<sup>10</sup> Oire uva oiso rugorugooparai vao iava, Vearopai vosa vo kovo opesi pieta ora visii varaaro moniara guruoro sirao vate puraoro, vo kovo rovotavora vo ivari-ia oa putevora. Ari ita, uva voari oearovivu tauvasa vovou rovotaera. <sup>11</sup> Uva oisi-a eisi osa iava uvuipatai ra ikauvira ora visii vo kovoaro opesi pie ovoita visii vo ruipaaro oirao piepaoro. Ra oisi vo moniro guru ovoipaoro voeavio apota irara tauvapata voea vatepaoro vara. Vosa riroara moniara sirao vatero touve, oara-ia ita uvuipatai ra vara vateta. Ari vosa garearavi, oire oisi raga ita vara vateta ita voeapa. <sup>12</sup> Vosa yearo vovou rutu purata vo vate purasa eva siraoa, oire ra va-ia Pauto roru pieta. Vosa riropara rutu, ora garepara visii varaaro ora pitupata, uva viapau oiso Pauto vara vieipare. Uvare va-a eva visii raga vo vovouaro vituaro oa-ia oisi rera eisi roru piepataveira.

<sup>13-14</sup> Viapau oiso visii tavipaavoi ra visii raga kasivarivira kovopata, ovusa oearovu touragapaive pokapokapaoro. Viapau. Ari vo vuutao-ia riroara rutu orekerovu toupaivoi visii ruvara-ia. Evara-a oara iava uvuipatai ra voeaviopa apota irara vatepaoro voea tauvapata. Oisore ita ra vo utupaua riroara vai-ia ita pituivere. Oire ra visii tauvavive ita oarai vatepaoro vo osa ita apotavira toupata. Osa iava uvuipatai ra vaeavira rutu ora tuutuukopata ita. <sup>15</sup> ♦ Tugoropa Vuku oiso purapapeira,

‘Ro ira riroara rutu ora rera varaaro gurupareve, oara-a evara viapau oiso varao-ia putepaiveira oarapa ruipaparoveira. Ora oiso osa ro ira gareparavi ora rerapa gurupareve, oara-a evara viapau oiso putepaiveira varao-ia oarapa ruipaparoveira. Oara rutu evara rerapa uvuipai ro ira ora rera iare riroara rutu gurupareve, ora ro ira ora rerapa gareparavi gurupareve.’

Uva oisi rutu toupaivoi vo visiipa vo osa orekerovu gurupata sirao vate purapasa oearovivupa.

#### *Oearovu Kovopa Irara Poua Virovere Korin-ia*

<sup>16</sup> Vegei Pautoa-ia vearo vaisi purapavevoi rorupaoro rutu, uvare Taitas eisi piereve oiso ra visiipa siraoparo, oiso osa vegei oisoa visiipa siraopave. Oa iava rirovira rutu oisi vovou iraoparoi oiso ra visii tauvapareve. <sup>17</sup> Ari ita, ora rera vo vovouaro rutu sirova utuoro uriorovere rara visii tauvapasa. Vosa oisi eisi piereve, oire ra oisi iavirava vegei vo reoaro sirova uturo vao oa-ia rera sipopavevoi visii iare. <sup>18</sup> Uva vaiterei rutu sipopavevoi visii iare ora ro iravu araokoto oavi. Ro ira-ia vearo vaisi rutu purapaveira lotupa gururo vo uruiara rutu-ia. Eake iava? Uvare vearo kovo rutu purapareveira Vearo Siposipo kosi piepaoro. <sup>19</sup> Ora vao tapo-ia oiso-ia uvare voea raga lotupa irara rera reesioro rera ropoiva vaore, oiso ra vegei taveopareve. Ra igei rutu vo kovo purapaio Turaro vaisiaro rei piepaoro, vo osa sirao vatero kaepaoro avapaio voearopa apota irara. Oire va iava oisi ora igei iava voea tauvapa vovouro kareke piepaio voeapa.

<sup>20</sup> Oire uva oisi-a eisi osa piepaoro ora vatatopopoia rutu vaopa, teapi oearoi igeire vuri rugorugoo vai kosi pieive va iava vao vo osa va vao sirao vate riroa vatepaio oearoipa.

<sup>21</sup>  $\diamond$  Igei katai vovou ragava toupaioveira, oiso ra va iava torevoko vovou raga purapaio Turaro osireiaro-ia ora vo oirara rutu osireiaro-ia.

<sup>22</sup> Oire uva iravu raga ro vigei araokotoaaro ira voea tapo arupavevoi visii iare. Ari ita, ovokirovu rutu-ia rera vo kovoaro sisropaveaira. Oa-a vao oa iava oiso taraiipaveaira rera-ia, uvare rirovira rutu oiso ruipaparoveira ra visii tauvareve. Uva visii-ia vearovira raripaoro oiso vovouparoveira rutu ra visii tauvapareve. <sup>23</sup>  $\diamond$  Ora ro Taitas ira ragai tapo kovopareveira visii tauvapaoro. Ora oearovu araoko irara oavi, voea oea roporopoiva lotupa irara vo reo eva voea vaaro kaesa visii iare. Ra voea iavirava Krais vaisiaro kae pieta. <sup>24</sup>  $\diamond$  Uva oiso visii tavipaavoi, ra voeavipa vereopa vovou rutu purapata voea tauvapaoro. Ra oisi iavirava lotupa gururo rutu va-ia taraiipaave vao oiso osa oiraopavira rutu visii vaaro iava vearo pitupitu rutu siposipopaveaira visii-ia vearo vaisi purapaoro.

## 9

#### *Vatevatea Iava Vao Pauto Vaaro Oirara Tauvapasa*

<sup>1</sup> Va iava vao visii tavitavi ragapaavoi vo pasio rigatooro, uvare visii-ia taraiparaveira oiso osa apota irara tauva ruipa iraopataveira Pauto voeaaro evoea oea Judia Distrik sovara-ia toupaiveira. Ari ita, osa eisi piepataveira ora visii raga vo ruiparoaro sirova utupaoro. <sup>2</sup> Uva visii vo vovouaro-ia tarai rovoraiva, eisi voeaopa oisoa vearovira siposipaa oea Masedonia Provins-ia toupaiveira. Uva oiso puraparaera, “Voeao vigei araoko iraraaro oea Grik-ia toupaoro, ora voea vo vovouaro puraivorao vao sirao vate vatepa vo ivari-ia oa putevorao. Oire uva visii iava uvuoro voeo Grik-ia tou irara voea vo vovouaro puraivorao voeo apotapa irara tauvasa.” <sup>3</sup> Oa vituaro-a eva oa iava voeo araoko irara oavi visii iare sipopaavoi. Oire ra oisi iava vo reo eva visii iava oiraopavira rutu karekepe, vo osa visii ruvara iava oarai sirao vatero vai oupaive. Vosa viapau oisi ovatevateroi ravaata, ra oisi iava viapau ragai vo reoaro oiraopavira karekepe. <sup>4</sup> Oire vosa oearoi Masedonia iava ragai tapo urioavere, vo osa viapau moni vatatoporo vaiva toupata vare eva sirao vate, uva oisi-a eisi osa iava uvuiparai ra riroa rutu ariia oua visii iava. Oiraopavira oiso osa visii tapo uvuipatai ra vo arii outa, vo rara rirovira rutu vo vatevatearo egaega ragapaoro reoreopata, vo osa viapau vara vatepata. <sup>5</sup> Oire uva va-a eva vituaro iava vigei araoko iraraaro ira pie rovoavoi visii iare sirao vate ravaasa vo vateo oa iava ragai tavi rovotavora. Uva oisi-a eisi osa iava vo vatevatea rutu eva ravaavira visii ruvara-ia toupaivere, vo ovusa visii ruvara-ia pou virosa uriora. Ra va iava oiso tarairira,

$\diamond$  8:21: Ro 12:17, 14:18     $\diamond$  8:23: Fl 2:25     $\diamond$  8:24: 2 Ko 7:14, 9:2

Ora visii raga vo vovouroaro sirova ututai vo vatevateao vateoro, vo osa viapau ragai vo reoaro iava.

<sup>6</sup> ♦ Vaore ovoovoaa rugoo iraopata ro iava oirato ira gareara takuraara paureva. Oa iava vara kuearo gare visivi oureverea. Ari ita, ro ira riro takuraro paureva, oa iava vara kuearo ita rirovira oureverea ora rerapa. <sup>7</sup> Oire visii rutu katakataivira ora visii vo vovouroaro sirova sirao vatero vate iraota. Ra opeita reo goru ragare rugorugoo iraopata rutu, ra va-ia sirao vate vatepata. Ora vosa oisi vara purapata, ra opeita ora visii ragare siraopaoro rugorugoopata oiso-ia, Ora ragai varaviaro opesi pieavoī. Viapau. Eake iava? Uvare Pauto taru rerapa vereopa vovou rutu puraparevere, ro ira sirao vate purapareve rorupaoro rutu oearovupa. <sup>8</sup> ♦ Oiraopavira rutu oiso osa Pauto uvuiparoi visiipa orekerovu vatepassa visii vo vovouroaro-ia pute pievira rutu. Eisi osa iava rirovira rutu orekerovu touvere visiipa ora oearovivu tauvapasa tapo. Oa iava viapau uvuipatai ra orekerovu avu vaipa apotapata varao oarapa ruipapata. <sup>9</sup> ♦ Tugoropa Vuku-ia oiso purapapeira,

‘Ro ira rirovira rutu apota irara vatevatepareve, ira-a eera ira-ia vereopa vovou opesi asavira rutu toupaiverea.’

<sup>10</sup> Ari ita, vo ovoovo-ia tapo oiso oiraopavira purapai, Vosa oirato takuraara pau-pareveira, Pautoa raga ita-a ira vo takuraro purareva. Oire vosa ro ira otakuraroru ita paureve, uva rera raga ita Pauto ira vo takuraro kova piepareveira. Oire ra va iava oirato vara aiopareve. Osa ragavira Pauto uvuiparoi ra oisi eisi visii pierrevora, oisi vo vatero varao vatepata. Osa iava uvuipatai ra vo vatero tuuaro pute pievira rutu oupata rera ruvara-ia. <sup>11</sup> Oire vosa Pauto visiipa rirovira rutu orekerovu vate rovopareve, uva visii ita uvuipatai ra vara iava rirovira oaravu vatepata. Osa-a eisi osa iava riro irara rutu oirara uvuipaai ra Pauto vaisiaro kae piepaive, vo rara visii vo vatevaternoaro ou rovopaike ora voeapa varao oara kaeoro uvuipaiei avaio voeapa. <sup>12</sup> Uvare vo vatevatea eva oa puratavoi oa-ia varei kovoarei toupaivoi oiso, Oavu-a vao apota irara tauvapasa voeao oea orekerovupa apotavira toupaivoi. Ari oavu-a vao-ia oiso ragavira uvare vo vatevatea-a eva oa iavirava riro irara uvuipaai ra Pauto-ia vuurapa vaisi purapaike rera-ia rorupaoro. <sup>13</sup> Vosa igei vo moniro evara ouoro avaiovere rara voea vatesa, oire ra vara kekeoro varao visii vo vaternoaro siraoara taraiave visii-ia oiso puraoro, “Oiraopavira rutu uvare voeao Korin-pa irara goruvira rutu Krais vo reoaro-ia pitupaiveira vao Vearo Siposipo. Oa iava oearovupa siposipopaikeira va iava tavitavipaoro.” Oire ra va iava Pauto-ia vuurapa vaisi puraive visii iavirava. Ora visii vaaro-ia vereopa vovou vearo vaisi puraive vao oa purapata voea tauvapaoro ora oearovu. <sup>14</sup> Osa iava uvuipaai ra visiipa rirovira variripaave visii kaviko iraopaoro. Eake iava? Uvare uvuipaai ra taraiave oiso, Pauto oiraopavira rutu visii tauvapaoro vearovara rutu kareke piepareveira visii-ia. <sup>15</sup> ♦ Ari ita, vigei rutu uvuipavieie ra vearo vaisi purapape rera-ia va iavirava vao riroa rutu tauva sirao vate rovopäa rutu. Vo vateo-ia rera raga-ia ro-ia Krais, ira siporeva Pauto vigei virivarioro vigei kae piesa.

## 10

### Pol Takau Reoro Pukoreva Varao Oara Oisoa Purapaike Aposel Irara Takaupaoro

<sup>1</sup> Ragai-a vao-ia Pol ragoa oiso visii tavipaavoi ra goruvira rutu vo reore rugoo iraopata. Uvare oiso purapataveira, “Pol igeipa tauaivira toupaoro igeipa uriri asavira riro gorupa reoro vatepareveira. Ari vosa igei tapo touparevori, ra va iava kave visivi reoreoparo igeire.” <sup>2</sup> Oire uva oiso ragavira visii tavipaavoi vo vovou sirova Krais oa oisoa purapareve kave vovou. E ragaipa ruipapatai ra visii iare uriora uriri asavira visii tapo toupaoro reoreosa evoa visii rutu puaaro-ia, eke? Opeita eisi ragai piepata, oiso ra oisi piea visii-ia. Uvare oiraopavira rutu taraiparai oiso osa uvuiparai ra uriri asavira rutu oisi eisi piea voeao iare oea vegeire oiso purapaveira, “E vaiterei rasitoa raga vo rugorugooroaro sirova utupasiveira.” <sup>3</sup> Ari ita, vegei rasitoa-ia toupaveaira. Uva viapau oiso rasito vo pitupituarore rugorugoopaveira oiso ra va-ia gorua oupave Seten-va ora upopasa. <sup>4</sup> ♦ Varao upo purapara oara-ia upo purapaveira, uva viapau oiso

◊ 9:6: Ga 6:7, 9   ◊ 9:8: Ef 3:20; Fl 4:19   ◊ 9:9: Sam 112:9   ◊ 9:15: 2 Ko 2:14; Ro 5:15-16   ◊ 10:4: 1 Ti 1:18; 2 Ti 2:3; Ap 7:22

vova rasitoa-ia vara-a. Viapau. Ari evara vova Pauto ruvara-ia uriopapeira riro goruara rutu. Oara uvuipapeira rutu vao riro gorua viria opesi pie ovoipasa, ora vao rera vaaro riro goru kovo. Osa ita eisi osa vegei varao opesi piepaveaira, oara purapaiveira oirara varao kuuvu reoro Pautoa tapo kaureopaoro. <sup>5</sup> ♦ Varao oiso vosa oearovu Pauto toga ragapaive oreorovu-ia rera takaupaoro, vo rara oisi vo reo iava viapau oearovu rera oirao piepave. Oire uva vo reoro verapaveaira varao oara iavirava oearovu ora vaisi oaive raga kae piepaveira, oiso ra oirara vo rugorugooro tavariopavevora, oirara uvuipaai ra Krais ragare rugoopaave rera raga sirova utupaoro. <sup>6</sup> Osa pieveare eisi ra va iava oisi eisi toupatra Krais ragare rugoopaoro. Osa iava uvuipaveiei ra uriri asa vovou rutu iava oearovu visii iava vo rugoroaro torevokove, voearo oearoa touvira rutu ora voea ragare rugorugoo iraopaaveira Pauto vo reoroaro uvupa arapa.

<sup>7</sup> Osireiara oavisii vura pieta. E Apeisi-a? Viapau vegei sopaaro eveipata, eke? Uvare vegei tapo ita sopaura oave porerevora Krais iare oiso rutu osa visii. Oire vosa irai oiso ora iraire puraparo, "Ragai-a Krais reraaro," uva uvui iraoparoi ra vorevira rera raga ita ora sopaarore rugorugoopaoro ora rugorugoo piero. Oisi iava oiso tarairo, Ragai ita Krais reraaro. Eisi raga ita osa vegei tapo ita toupave, Krais vaitereiaro. <sup>8</sup> Eagara vosa ragai raga rirovira rutu reoara puraavora ora ragai iava oiso, Ragai reiparai visiipa. Uva viapau oiso vo reo-ia vao ariia vai ouavoi. Vo uvare Turaro raga ira oisi ragai pierevora visii varaaro oirao pie vovouro tore piesa. Viapau oiso ragai vo kovoaro-a visii vo vovouroaro oirao pie vovouro tekipasa. <sup>9</sup> Ra opeita oiso rugoopata, Ragai vo pasiro rigatoavoi visii uriri piesa. Viapau oiso ragai eisi visii pieavoi. <sup>10</sup> Oearovu vai pasi visii iava oiso purapaai, "Pol riro goru reoro purarevoi igei torevokosa vo pasiro-ia. Ari vosa igei tapo touparevori vo-ia, ra raveravevira raga reoreo ragaparo akukuvira." <sup>11</sup> Ragai evoeapa oiso ruipa iraoparai, ra vao-ia oiso taraiave rutu osa ragavira visiipa tauavira rutu toupaoro vo reo rigatoavoi vo pasiro-ia. Uva vo reorei vaeavira rutu toupaivoi ora vo reo oa taru puraavere vo osa visii iare poura viro evoa.

<sup>12</sup> Viapau oiso reoreopaveiei osa voeao oea ora voea vo kovoaro raga rovirieipaoro oiso purapaai, "Oearovu vuri kovoro purapaiveira, ovusa igei vearo kovo ita purapaio." Vo ovusa voea raga ita oiso purapaaveira, "Viapau oearoi uvuipaai ra oiso vearopa kovoro vai purapaive osa igei." Uva vegei viapau oisi uvuipaveiei ra eisi purapave. Uvare kokoropa reoro raga varao oara-ia eisi purapaaveira. <sup>13</sup> Ari Pautoa raga-a ira vegei oisi tavireva vo kovo vao-ia purasa. Oa vituaro iava rera vo reoaro raga sirova utupaveaira vo osa visiipa kovopaveaira. Uva viapau uvuipaveiei ra oiso purave ora vegei ragare, "Okovovu raga-a vao-ia oa purapavevoi vearovira." Viapau. Ari vo kovo raga vao-ia oa iava tavitavipaveaira, Pautoa raga oa vegeipa vaterева va purapasa vo visii tauvapaoro ora oearovu. <sup>14</sup> Vosa oisoa toupatra voari tuariri Vearo Siposipo uvu asavira, uva visii iare urioveiepa va iava tavitavisa vao Vearo Siposipo. Oa iava uvuipaveiei ra ora vegei vo kovoaro iava torevokovira tavitavipaoro rorupave rutu, uvare vo kovo-a eva Pauto oa vatereva vegeipa, oisore ra va purave visiipa. <sup>15</sup> Uva viapau oiso oearovu vo kovoaro egaegapaoro oiso purapave, "Vegei vo kovoaro raga vao-ia osa va purapaveaira." Viapau. Ari varao raga iava tavitavipaveaira oiraopavira okovoa purapaveaira. Ari ita, vegei oiso ruipapaveiei ra visii vo vovouroaro oirao pie vovouro kovapape rutu. Oisore ra visii tauvapaoro vegei vo kovoaro riropape rutu vao oirara tauvapasa. <sup>16</sup> Uva ita, uvuipaveiei ra otaererovu iare ita avave Vearo Siposipo iava tavitavisa visii vo taerearo-ia puteoro. Uva uvuipaveiei voeaopa siposipove oea viapau Vearo Siposipo iava uvupaveira. Osa iava viapau uvuipaveiei ra oearovu raga vo kovoaro egaegapaoro rorupave. Viapau. Ari vo kovo raga vegei. Eake iava? Uvare vegei raga-a vegoa Krais iava rovopavira rutu voea evoea tavitaviveare rara.

<sup>17</sup> ♦ Uva oiraopavira rutu-a, uvare Tugoropa Vuku oiso purapapeira, 'Ro ira oiso vovouparo ra iravu raga vaisiaro kae piepareve, ira-a eera uvuiparoi ra Turaro raga kataito vaisiaro kae piepareve.'

<sup>18</sup> ♦ Eake iava? Vosa ro oirato ira ora rera raga iava vaisia kae piepareve oiso purapaoro, "Ragai vearo kovo rutu-a vao purapaaveira," oreoa eva akuku reo raga. Ari

◊ 10:5: 1 Ko 1:19; Ais 2:11-12 ◊ 10:17: Jer 9:24 ◊ 10:18: Ro 2:29

vosa Turaro Pauto rerare oiso puraro, “Eera vearo kovo rutu purapareveira,” oire ra va iava vo reo eva oisi oiraopavira rutu toupaive.

## 11

### *Pol Poeravira Rutu Kuuvu Irara Iava Aposel Irara Tavitaviroepa*

<sup>1</sup> Oiso ruipaparai ra ragai vo reoaro uvuta, uvare oearovu ragaire oiso purapaaveira, “Rerape eera. Ira ora rera vaisiaro raga kae piepareveira ora rera vo kovoaro iava eera Pol,” osa viapau ragai oisi eisi. Uva ita, uvuipatai ra ragai vo reoaro uvu iraopata. <sup>2</sup>◊ Eake iava? Uvare ragai visiire rirovira rutu rugorugoo iraoparaveira, oiso raga ita osa Pauto visiire rirovira rutu rugorugooparoveira oiso, Teapi oeai visii ivuive rera arova. Oa-a vao oa iava oiso rugooparai visii-ia, uvare oiso rutu toupatavoi ovoovoa, oiso osa o iriavu tavauruva iria reesireva aiteto iravupa viovokoto, oiso ra oira oureve. Uva oisoa vaiterei vo vokiarore ora ousapa voki tuepaoro aiteto vearovira rutu oisoa oira tokipareve vaopa oiso, teapi irai raga oira-ia vuria vai pura rovoreve. Oire uva oisi-a eisi osa rágai-a ita visii rutu aitearo ragoa visii reesipaaveira, oiso ra Krais tapo kataivira rutu ora tavosipata. Oa vituaro iava eisi vokiara rutu-ia kasivarivira visii tokipaaveira. <sup>3</sup>◊ Eake iava? Uvare vapa vao uriri iraoparaveira oiso, teapi oearoi raga visii vo rugorugooroaro tekipaive vara vuri piepaoro. Ra oisi iava vo vovou kavuta vare ovauoro oa purapataveira Krais tapo ora tavosipaoro. Teapi oiso pieta osa o-ia Iv iria piro piererva ro rakoruto Seten vara raga-ia evara kuuvu reoro. <sup>4</sup> Ari ita, rorupataveira oearovu vo siposiporoaro uvupaoro, oara osivu ragavira purapaiveira. Uvare iravu vai raga iava Krais vo siposipo eva. Viapau oiso rera raga ro Krais ira iava visii siposipopaveaira. Uva oisi ragavira-a eisi osa iava vo reoro evara oaravu raga tovopataveira ora visii iava sopaura-ia. Oa iava ora visii sopapro iare iravu raga uraurato oupataveira. Oiraopavira rutu uvare voea evoea vo siposipoaro viapau oiso toupaiveira osa vo siposipo vegei vaaro. Ora eera uraurato iravu raga. Viapau oiso ro-a Tugoropatoa rutu Uraurato ro ira-ia taraipaveaira.

<sup>5</sup> Uva oeare evoea oiso purapataveira, “Vearo irara rutu voeao-ia aposel irara.” Ari ita, ora ragai vo kovoaro-ia taraiparaveira oiso, Viapau oiso evoea vo kovoaro ragai vo kovoaro-ia putepaiveira. Viapau. <sup>6</sup> Uva ita, viapau oiso uvuiparai ra vearo reo vai puraa, oiso osa vo reoro oara purapaiveira. Ari ragai vao raga-ia oiraopa reo rutu-ia vearovira rutu taraiparai, oiso osa va iava oisoa siposipopaa visiipa roroiovira rutu va kosi piepaoro. Ora oiso tapo osa oisoa torevokovira rutu ragai vo pitupituaro viaevira rutu visii osireiaro-ia purapaa, oiso ra vara-ia taraipata oiso, Vo reoro-a eva Pauto vo reoaro rutu oiraopara.

<sup>7</sup> Oiraopavira rutu va iava osa oisoa Vearo Siposipo iava visiipa siposipopaa. Uva vo kovo eva oa-ia viapau oisoa moniara vai oupaa visii ruvara iava. Viapau. Ari ragai akukuvira rutu eisi oisoa piepaa ora ragai vaisiaro raga vara piepaoro, oisore ra visii vaisiaro kae piea. Uva apeisi-a? Vuria vai oa oisoa purapaa eisi piepaoro, raa? <sup>8</sup> Ari ita, vosa oisoa visii tapo toupaa, uva oearovu lotupa irara uvarovuva ragai oisoa tauvapaive moniara vatepaoro varao oara-ia oisoa visiipa kovopaa. Uva eisi osa piepaoro oisoa moni oupaa oearovu raga ruvara-ia vo visii tauvapasa vara-ia. Uva apeisi-a? Oisi eisi vuripai, raa? <sup>9</sup> Oire vo osa visii tapo toupaoro moni apotaparaera auere ora ragaipa oaravu avu vai voripasa. Uva viapau visii areavora moniara vaire. Viapau. Ari voeao raga araoko irara oavi oea oisoa Masedonia Provins iava uriopaave ragai tauvapasa. Viapau visii ruvara-ia moni areparaera. Uva viapau oiso ra visii arepaa oaraire ita moniara vai vo utupavira. <sup>10</sup> Taraipatai oiso osa oiraopavira rutu oiso puraparai, Krais tapo ora tavosiparaveira. Uva oisi ragavira ita oiso osa oiraopavira rutu oiso puraparai, Viapau rutu irai uvuiparoi ra ragai vo siposipoarore korukoruro, osiposipoa purapaavoi vao iava osa visiipa akukuvira rutu oisoa kovo ragapaa moni ou asavira. Viapau. Ari ragai vo reoaro voraro rutu avaperea Grik-ia. <sup>11</sup> Eake iava oiso puraparai visiire? E viapau pasi visii vaipa siraoparaveira, raa? Ari ita, Pauto raga taraiparoveira ragai vaaro-ia riroa rutu siraoa visiipa oiraopavira rutu oa ragai-ia toupaiveira.

◊ 11:2: Hos 2:19; Ef 5:26-27    ◊ 11:3: Jen 3:4; Jo 8:44

<sup>12</sup> ♦ Oire uva akukuvira raga touvira moni ou asavira visiipa kovopaavere. Uvare evoea oearovu oea vaisipataveira oiso, Aposel irara oea moni oupaoro kovopaiveira. Uva oisi-a eisi osa iava viapau uvuipaai ra ora voea vo kovoaro-ia rorupaoro vovio utupauavi va iava tavitavipaave, oiso osa ragai ora ragai vo kovoaro-ia rorupaoro uvuiparai ra tavitavipara.

<sup>13</sup> ♦ Oearoa viapau oiso aposel irara-a. Viapau rutu. Ari kuuvu irara raga evoea. Oea ora voea vo kovoaro keakeavira raga purapaiveira va tavariopaoro vaore, oiso ra utupauavi oiraopavira rutu voea vo kovoaro oiso karekepe Krais voeaaro vo kovoaro aposel kovo. Vo osa viapau rutu. <sup>14</sup> Ari ita, viapau oiso va kekepaoro ora sitaraerao. Uvare Seten tapo ira uvuiparoi ora rera raga ora tavarioparo. Ra va iava eisi karekeparo oiso, Purapurapato enselto ro ira oiraopa reo rutu iava tavitaviparoi. Vo osa viapau rutu. <sup>15</sup> ♦ Oire oisi-a oiso osa vo oovoovo sirova utupaoro ora rera Seten voeaaro kovopa irara vo vovouroaro tapo tavariopaiveira, uvare ora voeare eisi rugoopaaveira, oiso ra oearovu visii iava voea vaisipaise oiso, Vearo irara rutu aposel irara. Vo ovusa Pauto vearovira rutu voea-ia vurapareveira vore tuepaoro utupaua, uva voea vo voriaro vatereverea evara kuuvu kovoro voeapa vorioro.

#### *Pol Riroara Rutu Tavakaara Oisoa Oupareve Aposel Kovo-ia*

<sup>16</sup> Oire ragai ita oiso vorerivira visii tavipaavoi voeao iava oea ragaire oiso purapaaveira, "Rerape eera. Ira ora rera raga ora rera iava vaisia kae piepareveira." Opeita visii tapo ita ragaire oisi purapatai eisi. Ari vosa oisi eisi purapata, oire eagara, uvuipatai ra touvira ragai vo reoroaro uvuta <sup>17</sup> vo osa oiso puraparai, "Vearovira vao purapaa," ora "Ragai oa puraavere vearovira rutu." Uva Turaro viapau vo reo eva ragaipa vaterevoi. Ari ragai raga vo rugorugooaro iava oiso vo reo purapaavoi akukuvira raga. <sup>18</sup> Ari ita, riro irara ora voea raga ora vaisiaro kae piepaaveira, uvare vo rasio vo rugoogoaro sirova utupaaveira oisi eisi piepaoro. Oire uva eagara ita. Ragai tapo ita oisi piepaavoi. <sup>19</sup> Visii raga ita ora vaisipatai oisio, Igei-a riro tarai irara rutu. Osa iava roruvira rutu vo reo uvupataveira oa-ia oearovu oiso purapaaveira, "Igei uvuipaiei ra oiso vearovira vara puraio, eke eisi ragavira." <sup>20</sup> Oiraopavira rutu visii roruvira rutu evo reoro uvupata varao oara-ia oisi eisi visii tavipaive, "Oire oisi eisi piepata ikauvira!" Ora tapo oiso osa rorupata voea vo rugoroaro raga sirova utupaoro, vo rara visii vo rugorugooroaro paipai piepaive visii vararo ou ragapaoro vatauvira raga. Ora vosa visii oiso piepaive akaipa irara raga. Ora vosa visii puaaro taparakopai. <sup>21</sup> E vuria vai pasi puraavora, uvare viapau oiso eisi visiipa oai puraavora tapo, raa?

Oire vo osa oisi eisi purapaave oiso, "Igei vearoa vao-ia purapaiovoi," osa raga ita ragai tapo uvuiparai ra oisi reora visiire eisi. Ari ita, uvuiparai ra eisi kokoropavira reora visiire osa voeao oea vuriara purapaiveira oisi eisi reoreopaoro. <sup>22</sup> ♦ Ora apeisi-a? Ora voeare oiso purapaaveira, Igei-a Hibru-pa irara? Osa raga ita ragai tapo uvuiparai ra oiso purara, Ragai-a iravu Hibru-pato. Ora apeisi-a? Jiu-a voea evoea? Iu ita, uva ragai tapo ita iravu Jiu-pato. Ora apeisi-a? Ebrahim aao iraraaro-a, osatoa tapo ita ragai, ragoa oisi toupaa. <sup>23</sup> ♦ Vosa oiso purapaave, "Igei-a Krais kovopa iraraaro." Uva ita, ragai tapo vearovira Krais vo kovoaro goruvira rutu purapaaveira voea vo kovoroaro-ia putepaoro rutu. Uva ora ragai-ia taraiparai uvare oisi rutu eisi ora ragai raga ora vaisiaro kae piepaavoi oiso rorovira rutu osa kokoropato. Oire uva va-a vao osa oisoa kasivarivira Krais-pa kovopaa, oa iava oisoa vo ovuutarovu-ia ragai tovopaive tuukepa kepa-ia. Ora rirovira rutu oisoa ragai ragipaive. Ora vo osa oisoa ovokirovu-ia ragaiipa oisoa tutuu pie ragapape oiso ra kopiira. Oire uva oisi-a eisi osa oisoa piepaavora, ragai vo siitokaroaro voea vo siitokaroaro-ia pute iraopaise rutu evoea aposel irara riro kuuvu irara. <sup>24</sup> Oire vo vavae vokiro-ia oara sovara-ia oisoa ragai ragipaive aue-ia kopirovu iro voea vo pitupituroaro sirova utupaoro Jiu. Osa oisoa piepaive oearovu oirara ragipaoro vo peva tau vo resura vatara vuutaro rutu-ia (39) ragipaoro. <sup>25</sup> ♦ Ora voeae tapo Rom vata oea ita ragai ragiiva opevavu-ia ita voki. Uva ovokivu-ia ragai vurokoiva aue-ia aveke. Ora vo peva selpa

♦ 11:12: 1 Ko 9:12   ♦ 11:13: Ga 1:7; 2 Pi 2:1; Fl 3:2   ♦ 11:15: Fl 3:19   ♦ 11:22: Ap 6:1   ♦ 11:23: 2 Ko 6:5

♦ 11:25: Ap 16:22, 14:19

uvuo peva oara ragaiva viriepa vo peva vuuta rutu-ia vo rirova-ia purepava. Oa iava voa avakava igei oisoa vuri piepaeve. Vo uva katai voki rutu-ia ravireopa voki gaegaerevira touava ora oavu-ia rupa voki voa raga avakava ivara-ia gaegaerepaoro. <sup>26</sup> Oire vo osa oisoa voraro rutu vokapaoro viripaa, uva vo tavakaro ragai iare oisoa karekepape oiso rutu osa varao pirutuara, ora voeao kavirupa irara. Ora vosa voeareo Jiu-pa irara ora voeao ratau tou irara oiso ruipa ragapaave ra ragai vuri pieive rutu. Ari ita, vosa reipa uruiro tapo-ia toupaoro oisoa vo tavakaro oupaa ora voraro tapo vegoaro. Ora voraro avakava selpa uvuoara-ia vokapaoro. Ora vao-ia tapo oisoa tavakaara oupaa rara ragai keakeapaive oiso purapaoro, “Igei-a vii vate iraraaro.” Vo osa viapau. <sup>27</sup> ♦ Uva voa-a vo uva oisoa kasiraovira rutu kovopaa. Vao-ia osa riro ruparo rutu-ia viapau oisoa uusipara, ora viapau aiopaa, ora viapau ukaiopara. Ari ita, riro vokiro rutu-ia oisoa aio apotapara rutu, ora ae varo, ora ae kepa vaore uusipara.

<sup>28</sup> Ora oiso osa oavu-a vao-ia, uvare vokiara rutu-ia oisoa riro vavata rutu siraoa oisoa kaepaa lotupa gururo ruture voeapa siraopaoro rutu <sup>29</sup> oiso-ia, Vosa oearovu oisoa raveravepaave, vo oa iava oisoa ragai tapo ita oisi ora ragai-ia oraverave sovopaa. Ora vosa oearovu oirara oearovu vuri vovouro-ia kove piepaive, oire ragai tapo ita otavakaroa evara vo siraoaro oisoa sovopaa vo ora ragai-ia oiso rutu osa eto kasi.

<sup>30</sup> ♦ Vosa ora egaegapaoro vo reoro puraa ora ragai iava, oa iava uvuiparai ra varao raga iava visii tavitavipaa, oara iava ragaire oiso puratavere vai pasi, “Viapau oiso riro gorutoa vii Pol.” <sup>31</sup> Uva Pautoa raga Turaro Jisas reraaro Aite ira vo vaisiaro kae piepaiveira rutu oirara, ira taraiparoveira vo osa ragai viapau oiso visii keakeapaa. <sup>32</sup> ♦ Ari ita, vo osa Damaskas urui-ia touava, ovusa ro Reito Aretas reraaro kovopato oisoa voa turaroparo, ira ora rera voeaaro uutupa irara arureva, oisore ra ragai ouive vo rei urui rataoaro riaaro-ia, oiso ra ragai tovoive tuukepa kepa-ia. <sup>33</sup> Ovusa voava voea asavira toriava, uvare oearovu ragai vara pieiva rirova-ia kuverava kiuvupa ratao-ia ragai pute pieoro vo kasura iava. Oa iava viapau uvuiaepa oiso ra ragai ouive voea uutupa irara.

## 12

### Urusiara-ia Riro Reoro Rutu Iava Pol Kareke Piepareva Pauto

<sup>1</sup> Vo reo iava ragai oiso ragavira reoreoparai osa oearovu piepaiveira ora voea iava vaisiara oaiive raga kae piepaoro. Ari eagara osa piepaa ita. Vo uvare ragai oiso ruipaparai ra visii tavia varao iava areo ursiro oara-ia vo reoro vatepareveira Pauto ragaipa ravotovira <sup>2</sup> ♦ oiso-ia, Ourusivu-a vao-ia oa puraavoiva, katai tau vo resura ivaro va isivaaro iava putevorao vo touo-ia oa-ia oiso toupaavora, Ragai vao Krais reraaro. Va-a eva oa iavirava ragai kae pieрева oiso ruture vuvuiua ivara-ia rutu. Ari ita, varauava touava vo urusi-ia eva. Uva viapau taraiparai rutu oiso, Apeisi ragavira-a oiso osa kaera viropa varaua rutuva, eke uraura vai raga. Uvare viapau taraiparai. Uva Pautoa raga ira taraiparoi.

<sup>3</sup> Oire vorerivira ita oiso puraparai, Taraiparai oiso osa oiraopavira rutu iparaepa vuvuiua iare. Uva viapau oiso aviaviparai rutu oiso osa ragavira avu iparaepa. Uva Pautoa raga ira taraiparoi. <sup>4</sup> Uvare rera raga-a ira ragai kae pieрева vuvuiua iare, vo uva rera vo reoaro riro gorua rutu uvuava. Uva ragai-a vao oiso puraparai, “Riro goru reo rutu-a oa iava viapau uvuipaii oirara ra va iava tavitavia.” <sup>5</sup> Uva roru iraopaavoi vara-ia varao oara kekeava vo tou-ia eva. Oa iava visii tavitavipaavoi vara iava. Oire uva viapau oiso ragai vo kovoaro iava vao vearo kovo visii tavitavipaavoi. Viapau. Ari varao raga-a oara-ia uvuipatai ra taraita, Ragai-a Pol raverave vovouto.

<sup>6</sup> ♦ Vosa ragai raga ora vaisiaro kae pie ruipapara, oa iava viapau kokoropavira reoreoparavere. Eake iava? Uvare oiraopa reo rutu-a vao-ia oa kosi pie iraopaavoi ora ragai iava. Uva viapau ita oisi piepaa ora ragai iava vaisia ita kae piepaoro vaopa, teapi oearoi ragai vaisiaro raga kae piepaoro vo reoro ragare ragai varaaro rugorugoopaave.

---

◊ 11:27: 1 Te 2:9    ◊ 11:30: 1 Ko 2:3    ◊ 11:32: Ap 9:24-25    ◊ 12:2: Ro 16:7; Ef 4:10; 2 Ko 11:11    ◊ 12:6: 2 Ko 10:8, 11:16

Ari ita, uvuipatai ra ragai vo kovoaro kekepata ora ragai vo reoaro uvupata. Ra va iava torevokovira rutu ragaire rugorugoopata ragai vaisiaro oisi piepasa.

*Pauto Oavu Upia Rerapa Pol Vatereva*

<sup>7</sup> Oiraopavira rutu oiso osa riroara rutu pisara vearopara kekeava, vo osa vuvuiua iare taveteava. Uva oisi vai iava pasi uvuiparai ra ragai vaisiaro rei piea evara rutu iava tavitavipaoro. Vo osa viapau oisiei. Uvare Pauto ragaipa oavu upia vatereva vaopa, teapi ora ragai raga vaisiaro kae piepaa vagupaoro, ra oisi va-ia vuria vai puraa. Vo upiao-ia oa oiso toupai, Seten-pa kovopato ro ira ragai iava varaua upia piepareveira vapa oiso, teapi oisi iava vagupara. <sup>8</sup> Uva vo peva rutu-ia aue vuuta variriparaepa Turaro akepaoro vare vao. Oiso puraraepa, “Turaro, vo upiao verari ragai iava.” <sup>9</sup> ♦ Oa iava ragai vo variriaro pukoreva vao-ia oiso puraoro, “Viapau. Ari uvuipaei ra upiavira raga toupari, uvare virivarivira toupari ragai vavaearo-ia. Ari ita, ragai vo goruaro kareke piepariveira rutu, uvare goruvira rutu kovopariveira raveravevira raga toupaoro.” Osa-a eisi osa ragai tavireva Turaro. Oa iavirava rorupaa tavitavipaoro ora ragai vo raveraveroaro iava. Eake iava? Uvare vara-a evara ragai rugoo piepaiveira rutu. Ra vara iava Krais vo goruarore rugoopara ora ragaipa vaore, ra kasivarivira ragai tokipareve vereopa vovou purapaoro ragaipa. <sup>10</sup> ♦ Oire ra va iava kave vovouvira rutu toupaa. Eagara ita vosa riroara tavakaara iava vuriara ragai-ia karekepape oiso osa varao, vo osa ragai iava varaua raveravepape, ora vo osa ragai-ia takau vaisiro purapaive, ora vo osa apotapara, ora vo osa ragai uposa aeupaave, ora vo osa orekerovu vuriara karekepe ragai-ia. Oara rutu iava uvuiparai ita ra rorua oupaa vara-ia, vo osa Krais-pa kovopaoro toupaa. Ororua vao vituaro oiso toupai, vo uvare raveravevira toupaoro vao-ia taraiparaveira Krais vo goruaro, uvare ragai goru piepaiveira rutu.

*Pol Oiso Ruipaparoepa Ra Korin-pa Irara Varaaro Oirao Pie Vovouro Goru Piereve Rutu*

<sup>11</sup> Oire uva oisi-a eisi osa purapaoro ragai oiso reoreoparai osa voeao oea ora voea iava vaisiara oaiive kae piepaiveira. Uva viapau oisi eisi piepaavoi ora ragai vo ruipaaro raga sirova utupaoro. Ari visii raga-a visiigoa ragai oisi piepatavoi, oa iava oiso eisi puraparai. Eake iava? Uvare visii raga ita visiigoapa torevokopai, Visiigoa uvuipatai ra ragai vaisiaro kae piepata. Ari ita, akaipatoa raga-a ragai, ovusa ita oiso toupao oearovu vo kovoroaro viapau ragai vo kovoaro-ia putepaivoi, voeao oearoa vaisipataveira oiso, “Vearo irara rutu voeao aposel irara.” <sup>12</sup> ♦ Vo osa ragai visii tapo oisoa toupaa, uva oisoa ragai vo kovoaro kekepata, ovusa riro goruvira rutu kovopaa raverave asavira. Ora oaravu rutu ravoto kovoro purapaa visiipa, ora okovorovu pisa kovoro. Oara rutu iava taraitaepa, O ari oiraopatoa rutu-a aposelto Pauto reraaro rutu. <sup>13</sup> Uva eakere ragaire oiso purapataveira, “Viapau oiso vearo vovou vai igei-ia purariva oiso osa vara purariva oloturovupa uvarovu?” Uva visii vo reoaro oiso vai toupaivoi vao iava, osa ragai viapau pasi visii ruvara-ia viapau oisoa moniara vai oupaa vaore orekerovu avu vai voripasa ora ragaipa, raa? Uva apeisi-a? Vuripai oisi eisi, raa?

<sup>14</sup> Oire uva vatatopoparai oisore ra visii iare ita vorerivira uriora. Uvare oiso ruipaparai ra visii iare vo pevapa voka puraa ita visii kekesa. Uvare ragai vo vovouaro visii-ia toupaiiveira, oiso ra visii tapo toupao vararo oirao pie vovouro goru piea. Viapau oiso visii ruvara-ia moni ousa-a ora ragaipa. Viapau eisi ragavira vovoupaoro oiso moni areparavere visii ruvara-ia. Ari ita, aite irara moniara oaiive orirupaiiveira ovii irara oaiive tauvapasa. Vo ovusa ovii irara kakae vure viapau voeao aite irara oaiive tauvapaise oara-ia moniara vai. <sup>15</sup> Uva oisi-a eisi osa iava uvuiparai ra visii tauvapaoro rorupaa rutu orekerovu rutu ragai vararo ora sopaua oaa rutu tapo visiipa vatepaoro. Vosa eisi piepaa, ra ragai vaaro-ia siraopa vovou oisi iava eisi taraipata rutu. Uva apeisi-a? Eakere ragaivipa tapo gare visivi raga siraopataveira, raa?

<sup>16</sup> Taraipatai vo osa viapau oiso ragai visii ruvara-ia moni ousa urioraera. Ari oearovu raga visii iava eisi ragaire purapaaveira oiso, “Pol igei keakeapasa urioparoera, vo osa orekerovu vatauvira puraparevora.” <sup>17</sup> Oire uva apeisi-a? Ragai tavita! Aa vao-a oa

♦ 12:9: Fl 4:13; 2 Ko 11:30   ♦ 12:10: Ro 5:3; 2 Ko 6:4   ♦ 12:12: Ro 15:18-19

puraavora, raa? E ragai iraiaro kovopatoa vai aruavora visii vuri piesa, oa iava eisi purapataveira ragaire, raa? <sup>18</sup> Uva goruvira rutu Taitas taviava voari tuariri. Oa iava rera sipoava visii iare. Ora iravu araokoto oavi tapo aruava rera taveosa. Oire uva apeisi-a? Ragai tavita! E Taitas vai visii keakeareva visii vuri pieoro, raa? E viapau vegei rutu ora Taitas katai vovou raga purapaoro visii-ia oisoa kovopave, ora vo pitupituo oa iavirava visii oisoa tauvapave, raa?

<sup>19</sup> Vosa vo pasio vieipatavoi oa puraavoi, ra viapau oiso vare vao rugoota oiso, Vo pasio rigatorevorao oiso ra vearo rugoo rutu purape rerare. Ari vegei evo reo puravevoi Krais vo vovouaro raga sirova utuoro. Vate irara oave, visii tauvapasa orekerovu rutu purapaveaira. Pauto ragai-ia taraiparoveira, ovusa oiraopa reoro rutu iava tavipara.

<sup>20</sup> <sup>✧</sup> Visii tavipaavoi vao iava uvare visiire rirovira rugorugoo iraoparai oiso, Teapi visii iare urioraera, touvira rutu vuri vovouro purapata. Uvare pasi tou visivi vai ora visiire kaureopataveira, ora tapo ora visii kasipu vovouro rutu purapataveira, ora vara riirii vovou. Ora kuuvu reo raga purapata oearovivu iava. Ora oiso osa vai tapo tou visivi oearovivu takaupataveira. Ora vo osa orugoorovu raga vatepata lotupa irara roo piesa. Ora vo osa visii raga vo vovouroaro iava vagupata, ora vo osa ora iiruko vovou purapataveira. Teapi vorerivira oisi raga ita eisi visii keke. Oire ra va iava visiire ita kasipura vorerivira. Oapareasipataveira ragaipa oiso, Teapi visiire vorerivira eisi piea. <sup>21</sup> <sup>✧</sup> Ora oiso tapo osa rugorugooparai vaopa, Teapi vorerivira visii keke vo osa touvira vuri pitupitu purapata, ra Pauto ragai arii piereve vao iava, uvare visii varaaro-a vuriara oavisii. Vosa oisi eisi piepata, ra uvui iraoparai ra visiipa siraopaoro gaua. Uvare voeao oea tuariri rutu vuri vovouro puraiva, uva viapau oisoa vara iava ora voeia iava vo vovousiro oaiive porepaive vara veripaoro varao vuri pitupituro rutu otopa pitupituro.

## 13

*Korin-pa Irara Uvuipaai Ra Vearovira Rutu Ora Voea Vo Oirao Pieroaro-ia Utut Iraopaave*

<sup>1</sup> <sup>✧</sup> Ragai visii iare vo vokarei puraava. Uva vo vokarei isivaaro iava vo pevapa voka puraavere rara. Tugoropa Vuku-ia vo reo oiso purapai,  
‘Vosa vaiterei eke vo peva oirara iravu kekeive ro ira viria purareve, oa iava uvuipaai  
ra torevokovira rutu rera togapaive va-ia rera vaaro viria viaevira rutu kareke  
piepaoro.’

<sup>2</sup> Oire uva oisi-a oiso osa vo reo purapaavoi visiire visiigoa vuriara rutu oisoa purapata tuariri ora oearovu tapo. Uvare va-a vao osa visii tapo touava eraopa voka-ia, uva evoa oiso visii taviava oiso. Oire uva vorerivira ita visii tavipaavoi oiso visiipa tauaivira rutu toupaoro, “Oiraopavira rutu vo vokari-ia utupa voka visii tapo toupaavere.” Uva voa-a evoa uva viapau oiso irai visii iava kavuavere, vo osa visii rutu torevokopaooro visiire kasipura, visii vao visiigoa touvira rutu vuri pitupituro pura iraopataveira. <sup>3</sup> Uva oiso purapataveira ragaire, “E Krais vo reo vatereva oa vatepareveira igeipa Pol? Eke ora rera vai raga vo rugooaro iava vo reo vai?” Oire vosa visii iare urioravere rara, uva uriri asavira rutu reoreoravere visiire. Ra va iava ragai-ia oisi taraita oiso-ia, Akoea, Krais vo reoaro kosi piepato-a rera ro-ia. Aue iava uvare Krais visii iava sopaura-ia kovopareveira raverave asavira, vo osa rera vo goruaro kareke piepareveira eisi piepaoro.

<sup>4</sup> <sup>✧</sup> Oiraopavira rutu uvare oearovu Krais upoiva vo evao parikou-ia vo uva raverave ovoioro kopii ovoiroepa. Uva varaua oaa raveravepapeira oiso osa Jisas varaaro piereva vo evao parikou-ia. Oa iava rera tapo ora tavosipaoro Pauto vo goruaro oupaaveira. Ari Pauto riroa rutu gorua kareke piereva. Oa iava va-ia Krais vorevira tore piereva kopilia iava. Oa-a vao oa iava oisi ragai Krais tapo ora tavosipaoro kave vovou rutu purapaaveira. Oisore ra vo osa visii iare urioveare rara visii torevokosa, uva rera tapo torepaooro Pauto vo goruaro kareke pieveare rutu visii-ia.

<sup>5</sup> <sup>✧</sup> Ora visii vo vovouroaro rutu sisiro iraota vara rovirieipaoro, ra oiso ora akepata, “E torevoko vovouvira rutu toupai oirao piepa pitupitu sirova rutu utupaoro? Eke viapau?”

<sup>✧</sup> 12:20: 2 Ko 2:1-4    <sup>✧</sup> 12:21: 2 Ko 2:1, 4, 13:2; Ga 5:19    <sup>✧</sup> 13:1: Diu 19:15; Mt 18:16    <sup>✧</sup> 13:4: Fl 2:7-8; Ro 6:4, 8    <sup>✧</sup> 13:5: Jo 6:6; 1 Ko 11:28, 9:27

E viapau oiso taraipatai, Jisas Krais visii iava sopaura-ia toupareveira? Uva oisi-a eisi osa oiraopai. Ari vosa oearovu visii iava viapau Krais-va tavosivira toupaive, ra opesi ovoiave. <sup>6</sup> Ora vosa vegei iava sopauarei sisiro rovopata, ra va iava taraita oiso, Oiraopavira rutu Krais tapo tavosivira toupasiveira Pol vaio. <sup>7</sup> Vegei variripaveiei Pauto arepaoro visii tauvapasa, ra viapau vuri vovouro vai purapata. Eake iava? E vao iava osa ora vegei raga ora vaisiaro kae piepave visiire? Viapau. Ari vaore vegei visiipa oiso ruipapaveie, ra vao purapata oa oiso torevokopai. Vosa oearovu vegeire oiso rugoopaave, Vaiterei vo kovoaro viria, oire uvuipai voeape. Uvare vegei visii ragare rugorugoo iraopaveaira. <sup>8</sup> Vo uvare vegei viapau uvuipaveie, ra vao Oiraopa Reo tavariove. Viapau rutu. Ari vegei vo kovo purapaveaira vao Oiraopa Reo vearovira rutu voa kareke piepasa. <sup>9</sup> Ari ita, uvuipaveie, ra rorupave vo osa viapau ora vegei vo kovoaro iava vao aposel kovo goruvira tavitavipave. Vorara visii-ia taraipave oiso, Goruvira rutu Jisas raga-ia oirao piepataveira. Osa iava eisi Pauto arepaveaira visii varaaro oirao pie vovouro uvuivira rutu kareke piepasa, vo rara torevoko vovou raga purapata. <sup>10</sup> ♦ Vo osa tauai toupaoro visiipa vao rigatoavoi, oisore ra vosa aa vo reo avuo vao ragai vaaro sirova utupata ora visii raga ora torevokopao, oa iava viapau oiso uvuiparai ra uriora visii torevokosa Turaro vo goruaro iavirava. Uvare rera vo goruaro toupaiveira oirara varaaro oirao pie vovouro goru piepasa. Viapau oisore ra oirara varaaro oirao pie vovouro vuri piesa.

#### *Ovoiopa Reo Vatereva Pol*

<sup>11</sup> ♦ Araoko irara oaa, va vao-ia ovoiopa reo ragai vaaro. Vearovira rutu toupata. Ora visii rutu iava sopaura oavisii rutu tovopaoro torevoko pitupituro raga purapata ragai vo reoaro sirova. Opeita ora kaureopata ora upopasa. Ari uvuipatai ra kave vovou raga purapata oearovivu tapo ora visii iava voea. Uva uvuiparai Pauto ra visii tapo toupareve ro ira visii vatepareveira siraopa vovou rutu ora gavaure vovou.

<sup>12</sup> Ora visii iava vavaeara oavisii vatepata sekanpaoro arakoko irara oavisii tapo voeao Krais voeapro. <sup>13</sup> Voea rutu voeao Pauto voeapro vo toupaoro oiso purapaa visiire, “Vearo voki rutu visii-ia.”

<sup>14</sup> Oire uva ragai-a vao variriparai Turaro iare Jisas Krais, oisore ra visii tauvapareve, vo osa Pauto visiipa siraopa vovou rutu tapo vatepareve. Ora vaore tapo ra taraipata oiso osa Tugoropato Uaurato toupareveira visii iava sopaura sovara-ia, vo osa katai vovou raga-ia toupata rera-ia tapo.

Eisivi raga osa vo pasio purapaavoi, ra opesipe.

Ragai-a vao, Pol.

## GALESIA

### Irapa Reoro Vo Vukuo Iava

Pol vo pasio rigatoreva Antiok urui-ia toupaoro aue-ia 49 yia Jisas vaaro isivaaro iava kavaua. Vo pasio rigatoreva voeao iare Kristen irara vo Galesia Provins-ia voea tavioro oiso, Viapau uvuipatai ra rugorugoo ragapata vao-ia Jiu vaaro Reo Taisi rakari verapasa. Uva oiso puraroepa eisi uvare oeavu Jiu iava oea urioaepa Galesia-pa irara siposipopasa ora voea vaaro iava Reo Taisi. Ari goruvira voeao oirao pie vovou irara tavireva Pol, uvare Krais voea karureva Reo Taisi vo goruaro ariarava (Ga 2:15, 16, 21). Uva viapau uvuipaii oirara ra Reo Taisi raga sirova utupaoro torevoko vaisi ouive Pauto ruvara-ia.

1. Ora rera iava aviavi pie reoro Pol varaaro ora oreorovu vo pasio vituaro iava, 1:1-10.
2. Pol Pauto ruvara-ia gorua ou iraoreva aposel kovo purapasa, 1:11-2:21.
3. Vearo Siposipoaro-ia Pauto vereopa vovou toupai oirara rutu tauvapasa, vo osa viapau tauvaa vai oupaive Jiu vaaro Reo Taisi sirova utupaoro, 3:1-4:31.
4. Kristen irara airerei vovouvira toupaoro viapau uvuipaii ra ora voea raga vo ruipaaro sirova utupaave, 5:1-6:10.
5. Ovoiopa reoreoro-ia Pol reoroepa, 6:11-18.

<sup>1-2</sup> ♦ Vo rigatoa vao-ia oa purapaavoi voeao rutupa riro oirao pie vovou irara lotuara rutu sovara-ia oea toupaiveira Galesia taere sovara-ia. Uva ragai-a Pol ragoa vo rigato puraavoi voea tapo oea ragai tapo toupaivoi oearovu oirao pie vovou irara. Ari ita, iravu ragai roporeva, oiso ra oiso toupaa, Ragai-a aposelto oirara siposipopato. Ari viapau vova vo rasio iava ira ragai roporeva. Ora ae tapo viapau Pauto irai oiratoa vai tavireva ragai roposa. Viapau. Ari rera raga-a Jisas Krais ora rera aitetoaaro Pauto, ro ira Jisas vorevira porete piereva kopii tapiva.

<sup>3</sup> Oire uva oiso visiipa ruipaparai ra Pauto vigei rutu Aitearo ora Jisas Krais vigei reraaro Turaro, vaitereo aiterea visii tauvapasiveira gavaurea vatepaoro. <sup>4</sup> ♦ Ari ita, Jisas vigei reraaro Pauto Aite vo ruipaaro sirova utuoro ora rera iava vasereva ora rera-ia tauooro vuriara oavi-ia. Oa iava kopiicroepa vuriara rutu vo goruaro-ia tasioro. Eisi osa pierevoiva, uvuipavie vo raivao-ia oa purareva Jisas vuriara vatavatapape vo rasio-ia toupaoro. <sup>5</sup> Eva oa iava uvuipavie ra Pauto-ia vuurapa vaisi purapape vo vokio ora vo vokiara rutu-ia. Ovoiei.

#### *Kataia Raga Vearo Siposipo Toupa*

<sup>6</sup> Visii tavitavipaavoi oiso, uvare rirovira rutu tavetave iraopaavoi vao iava osa ikauvira Pauto kavupatavoi ro ira-ia vearovira rutu tarai rovopataveira. Ari ita, Krais visiipa siraoparoveira. Osiraoa iavirava Pauto visii ourevora. Osa iava Tootoo Ovoi vaterева visiipa. Ari visii vo siposipo Vearo Siposipo kavupatavoi vo siposipo vao kuuvu siposipo oirao pieoro oiso keapaoro, Vearo Siposipo-a vao. <sup>7</sup> Oiraopavira rutu uvare katai siposipo raga vao oiraopa siposipo, osiposipo tavariopaoro oearovu raga visii keakea ragapaiveira visiipa tavaka vate ragapaoro. <sup>8</sup> ♦ Uva va vao-ia Vearo Siposipo voviri tuariri oa vate rovoavora visiipa eva oiraopa siposipo rutu. Oire vosa irouto vova vo rasio iava, ora vosa irai vova vuvuiua iava enseltoa vai, ora vosa ragai raga oisi va Vearo Siposipo tavarioreve osiposipovu raga vateoro, uva eera-a ira vai-a tovorevere Pauto vo vuri tapi uva opesi ovoirovere. <sup>9</sup> ♦ Oisi raga ita oiso-ia osa vorerivira visii tavipaavoi oiso, Vosa oisi irouto va vao Vearo Siposipo tavarioreve vao oa-ia rovovira tarai rovota, ira-a eera irapa Pauto riroa tavaka vateparevereoa oa viapau opesia vaiaro.

<sup>10</sup> ♦ Apeisi-a? Eakere oiso visiire puraparai? E visii vai agoagoto ragapaavoi visii roru pie ragapaoro? Viapau. Easi ragai vo reo oiso purapaavoi, auere ra Pauto ragai-ia rorupareve. Ari ita, vosa oirara raga roru piepasa vo rugorugoova toupaa, ra viapau oiso uvuiparai oiso toupasa, Ragai-a Krais-pa kovopato.

---

◊ 1:1-2: 2 Ko 1:1   ◊ 1:4: Ro 4:25; Ga 2:20   ◊ 1:8: 2 Ko 2:14-17, 11:13-15   ◊ 1:9: Ro 1:15-17; 1 Ko 16:22  
 ♦ 1:10: 1 Te 2:4-6

*Pol Iava Vo Siposipo Ro Ira Vavaearo Oiso Karekeroepa, Pautoa-pa Kovopato*

<sup>11</sup> ♦ Araoko irara oaa, oiso visii tavipaavoi, Viapau rutu oiso oirara iava vo siposipo oiraopa oa vate rovoavora visiipa. <sup>12</sup> Oiraopavira rutu. Viapau oiso irai oiratoa vai ragaipa oiso vo tavitavio purarevora ragai siposipooro. Viapau. Ari rera raga ro-ia Jisas Krais ira ragaipa oiraopa siposipo rutu karekereva poeravira rutu.

<sup>13</sup> ♦ Ari ita, ragai-ia oisoa taraipata vo osa Jiu-pa irara vo pitupituroaro sirova oisoa utu rovopara voviri tuariri. Ovuuta-ia eva voraro rutu oisoa voearore taraapaa lotupa irara Pauto voeaaro, oiso ra voeapa vuri vovou vatepaa. Oa iava oisoa akeakepaa vo lotupa kovo opesi piesa. Uva taraipatai oiso, Viapau Vearo Siposipo ouava voeao ruvara-ia oea uposa oisoa rugorugoo ragapara. <sup>14</sup> Aue iava uvare oisoa kasivarivira rutu Reo Taisi sirova utupara, vao oa oisoa Jiu-pa irara vo pitupituroaro sovara-ia toupaive. Oiraopavira rutu oiso osa oearovu rutu-ia puteava ae-ia ragai vo vovouaro, voeao oea karekeaeapa vo vuutao-ia oa-ia ragai karekeraepa.

<sup>15</sup> ♦ Ari Pauto vo rera vaaro-ia vereopa vovou ragaire keeraroepa ragai tauvaoro, oiso ra rerapa kovopaa. Vao vituaro iava osa ragai reesireva ora rerapa vo osa touvira aako raga kovuaro-ia toupaava. <sup>16</sup> ♦ Uva Pauto ora rera vo ruipaaro sirova utuoro Oviito oaro kareke pieрева ragaire, oisore ra va iava avara visiipa ratau tou irara siposiposa rera iava Jisas. Uva vo vuuta-a eva oa-ia viapau oiso oearoi ruvara-ia vo taraio ouavora vo oearoi tapo ora reoreopaoro. <sup>17</sup> Viapau oiso Jerusalem iare ava rovoraepa aposel irara ruvara-ia orugorugooi ou rovosa voeao oea reesi rovoreva Pauto. Viapau. Ari raaka tapia-ia vo uvare ava rovoraepa Arebia. Evoava uvava karera viropa vorerivira taru riro urui iare vao vo Damaskas.

<sup>18</sup> Oire uva utupavira rutu vo peva ivaro isivaaro iava Jerusalem iare Pita kekesa avaraepa. Uva katai tau vo vavae (15) vokiro-ia voa touava rera ruvara-ia oaravu tarai reoro oupaoro. <sup>19</sup> Uva vo vuuta-a eva oa-ia viapau oiso irai aposelto kekeava. Ari ro raga-ia Jems vigei Turarotoaro araokotoaro. <sup>20</sup> Uva vo rigato-a vao-ia oa purapaavoi oiraopa vovou rutuva vo Pauto osireiaro-ia. Viapau oiso kuuvu reo-a vao-ia.

<sup>21</sup> Oire uva Jerusalem iava Siria taere iare avaraepa ora vo tapo Silisia-ia. <sup>22</sup> Uva vo vuuta-a eva oa-ia ragai kekeivori, voeao lotupa irara oea evoa toupaiveira Judia-ia. <sup>23</sup> Ari reoara raga iava oisoa ragai-ia taraipaave varao oara iava oisoa oearovu voeа tavitavipave oiso, “Easi eera igeiva ora keriparoera voviri tuariri. Uva vo vokio-ia igeipa siposiparevoi, oiso ra Krais oirao piepaio. Ro Pol ira tuariri oisoa Krais vo siposiporoaro tekipareve rutu.” <sup>24</sup> ♦ Oa iava ragai vaaro airepa vovou kekepaoro vuurapa vaisi purapaivora Pauto-ia.

## 2

*Pol Jerusalem Urui Iare Avaroepa Aposel Irara Kekesa*

<sup>1</sup> ♦ Oire uva va vao osa katai tau vo resura (14) ivaro putevoiva, vara isivaaro iava avaraepa Banabas tapo. Oire Taitas ou pieava oiso ra vegei tapo avaro Jerusalem iare.

<sup>2</sup> Eova uvare avaraepa, Pauto ragai tавirevoiva voare. Oire uva va vao osa lotuapa irapa irara tapo ora reoreo rovoraepa voa vo igei raga. Uva evoea isivaaro iava oearovu tapo aia oirao pie vovou irara touava voeа tapo ora reopaoro. Uva irapa irara tavitaviava vao iava Vearo Siposipo osiposipoa puraava voeаopa ratau tou irara. Auepa teapi oiso keapaave irapa irara, Osiposipovu raga iava voeapa siposiparevo Pol voeаopa ratau tou irara. Ra va iava viapau oiso ragai tapo katai vovou purapaive voeao irapa irara. Ora teapi vo kovo okovoа purapaa vo vuutao-ia ora vo kovo oa pura rovoavora irapavira akukuvira rutu ava ragape. <sup>3</sup> ♦ Oire uva va vao osa vo tavitavi vao ragai vaaro uvuoro oiso puraaera, “O ita, osa yearopai eisi.” Uva oisi-a eisi osa purapaoro viapau oiso goruvira ragai tавipaivora, oiso ra ragai vatetoaro iava Taitas rakari verara, voeao iava ratau tou irara rera, ra oisi rera pieoro rera reesia. <sup>4</sup> Oiraopavira eisi vo osa oearovu riro kuuvu irara vo vuuta-ia

---

❖ 1:11: 2 Ti 3:16-17 ❖ 1:13: Mt 16:17-19 ❖ 1:15: Ais 49:1-6; Jer 1:4-6 ❖ 1:16: 1 Ti 1:12-16 ❖ 1:24: Ap 11:18 ❖ 2:1: Ap 15:1-5 ❖ 2:3: Ap 15:6-20

eva oearovu urioaepa igei sovara-ia pausa, oiso ra igei vo pitupituroaro-ia taraiave vara rovirieipaoro. Uvare Krais Jisas vo siposipoaro iavirava viaevira rutu toupaio vaopa Reo Taisi. Oire uva oiso purapaaepa, “Oiraopavira, igei tapo ita vao-ia riro oirao pie vovou irara.” Uva voea raga vo ruipaaro-a, oa-ia oiso vovoupaaepa ra vigei-ia voea vaaro riro vavata reo goru tovo ragapaive vao Jiu vaaro iava Reo Taisi.<sup>5</sup> Ari viapau voea vo ruipaaro sirova uturaepa oisi Taitas pieoro oiso-ia. Vosa oisi va puraavori, ra kerukavira poupa piro visii-ia vo siposipo vao Vearo Siposipo oa uvutavora ragai ruvara-ia.

<sup>6</sup> Ari ita, evoea reipa irara oea viapau oiso ragaipa orugorugooi airepa vai vateivora. Iu, oearovu evoea vaisipaiiveira oiso, Reipa irara, vo osa vigei rutu areiivira rutu toupapeira vo Pauto osireiaro-ia. <sup>7</sup> Uva viapau oiso orugorugooroi rutu vateiva ragaipa, uvare taraiaepla rutu ragai-ia vo osa Pauto ragaipa vo kovo vatereva, oiso ra oirara rutupa voeao ratau tou irara vai iava Vearo Siposipo siposipoa. Oiso rutu osa aue ita Pita irapa Pauto oisi vo kovo ita vatereva, oiso ra voeapa voeao Jiu-pa irara siposipopareve va iava vao Vearo Siposipo. <sup>8</sup> Aue vituaro iava uvare Pita roporevoiva Pauto, ora rera vo goruaro karoporeva rerapa, oiso ra va iava vearo kovo rutu purareve voeaopa Jiu-pa irara. Ari ita, uva oisi-a oiso-ia osa ragai tapo ita roporeva. Oa iava oisi raga ita ragaipa ora rera vo goruaro karoporeva, oiso ra vo goru iava riro goru kovo rutu puraa voeai-ia ratau tou irara. <sup>9</sup>◊ Oire uva va vao osa Pauto vo goruaro eveipaoro ragai-ia oiso purapaaepa “O veeropai ita.” Oa iava vegeiva ora Banabas sekanaepa irapa irara Jems vase ora Pita ora Jon. Uva katai rugoo rutu sirova utuiepa igei rutu oiso ora reoro, Jems peva Jiu-pa irarapa Jisas vo reoaro iava siposipoivre, vo osa vegei voeao ratau tou irara siposipove. <sup>10</sup>◊ Ora vao tapore oiso ra moniara vai oupaave vatevateara vai voeao tauvapasa oarai-ia apota irara. Oa iava voea taviavora oiso, Kasivarivira rutu oa purapaaveira vao oiso.

#### *Pol Ira Pita Torevokoreva Vo Antiok-ia*

<sup>11</sup>◊ Oire vo osa Pita Antiok urui iare urioroepa vo uva toupaavora. Oa iava rera taviavora oiso, Vuria purarivoi. <sup>12</sup> Ovuria-a vao oa oiso ragavira toupaivoi, Vo osa voari rovovira rutu oisoa Pita koataparo voea tapo ratau tou irara aiopasa. Oa iava Jems oeavu oirao pie vovou irara arureva voare vo-ia Antiok-ia. Uva voea evoea kekerevoiva Pita, viapau oiso vorerivira ita ratau tou irara tapo aioreva. Auepa uvare oiso ragavira uririparoepa, Teapi rerare oiso puraave, “Jiu vaaro Reo Taisi gasipareveira Pita oiso piepaoro.” <sup>13</sup> Eisi ita osa oeavu tapo Jiu-pa irara oisoa piepaive, voeao oea oisoa Jisas oirao piepaive rutu vo rera raga Pita vo vovouaro sirova utupaoro vo vovourei rutu vatakoiva. Uva va vao osa piepaoro Banabas tapo ora piro pieroepa. <sup>14</sup> Opitupitua-a eva oa kekeavorao. Oa iava oiso rugooraerao, Viapau oiso katai vovou vai puraivoi Vearo Siposipo sirova utusa. Oire uva va-a vao oa vituaro iava Pita taviavora voea vuutaario-ia oiso, Pita vii-a Jiu-pato. Viigoa Jiu vaaro Reo Taisire ovauuepa tuariri rutu. Oire uva apeisi-a? Uvare vo vuutao-ia voea ratau tou irara taviparivoi, oiso ra eva Jiu vo pitupituroaro sirova utupaoro oisi piepaive.

#### *Ro Ira Jisas Oirao Piepareve Ira Uvuipa Ra Torevokovira Karekero*

<sup>15</sup> Ari ita, vegei-a vao vegoa voa kavauveiepa vegei Jiu-patoarei. Viapau oiso vegei-a voeao iava ratau tou irara oea vuri pitupituro sirova utupaaveira vuriara purapaoro. <sup>16</sup>◊ Vearovira rutu oiso taraipaveie, Vosa Jiu raga vaaro Reo Taisi sirova utupave, ra viapau oiso va iava vegei vaisireve Pauto oiso, “Torevoko vovoutoarei-a vei.” Viapau. Ari vao raga iava vo osa Jisas Krais-ia rari iraopave. Eva-a oa iava uvuiparoi ra vegei vaisireve oisi eisi. Ari ita, vegei-a ita vao-ia vegoa eisi piepaveaira vo Krais Jisas-ia raripaoro, oisore ra vegei-ia va kekepaoro oirao pie vovou Pauto vegei vaisireve, “Torevokotoarei.” Viapau oiso Reo Taisi oirao piepaveaira rutu. Eake iava? Uvare oiso ragavira taraipaveaira, Viapau oiso irai vaisirevere Pauto oiso, “Torevokoto-a vii,” vo osa evo taisi raga vo reoaro sirova utuparo. <sup>17</sup>◊ Oire uva apeisi-a? Vosa vegei ora vii Krais oirao piepaoro oiso rugoopave Pauto vegei vaisirevere oiso, “Torevokotoarei-a vei.” Osa iava utupavira rara oisi ora eveiveare oiso, Akoea, ratau toutoarei-a vegei viritoarei. Oire uva apeisi-a? E ora vegei iava oiso tavipaveie, Krais oirao piepaoro ora piro pieveiera? Asi viapau rutu.

◊ 2:9: Ap 13:1-5 ◊ 2:10: Ap 11:29-30, 24:17 ◊ 2:11: Ap 11:10 ◊ 2:16: Ef 2:8-9 ◊ 2:17: Ro 3:19-23

Siraovira rutu vosa irai oisi oiso-ia puraro rera iavirava ro-ia Krais. <sup>18</sup> Ari ita, uvare oiso toupaivoi, Vosa irai eru kepa vai rigareve, ra vo kepa iava tuutara-ia airepa kepa paureve. Oire ra viapau oiso oisi veeropape. Ari ita, uva oiso ragavira-a, vosa rovovira rutu Jiu-pa irara vaarore Reo Taisi ovau rovora, oire ra vorevira ita va sirova utupaoro oiso purapara ragai raga ora keakeapaoro, Pauto ragai oureverea ora rera iare. Osa viapau rutu. <sup>19</sup> Vosa eva Reo Taisi kavu ovoia vare ovauoro vao oa viapau uvuipape ragaipa tootooa vatepasa. Oire uva oisi-a eisi osa ragavira iava kopiiraepa Reo Taisi arova. Oa vituaro iava uvuiparai ra vorevira tootoovira toupaoro Pautoa ragare rugorugoopaoro toupaa. <sup>20</sup> Iu. Eake iava? Uvare Krais evao parikou-ia kotoro viropa. Uva rera tapo kopiiraepa. Oire uva voa-a evoa vo rugorugooro rutu kopii epa oara iava oisoa ora ragai ragare rugorugoopara. Uva vo vokio Krais vo rugorugooaro toupaiveira ragai-ia. Oa ragai tootoo piepae ragaipa veeropae rugorugooro vatepao. Osa iava tootoo iraoparaveira rutu. Evo tootoo oa vituaro oiso toupae, Pauto Oviitoaaro rutu-ia rari iraoparaveira. Ro ira iava vasereva ragaipa ragai kavikooro, oiso ra rera kopii pieive. Eva-a oa iava Oiraopa Tootoo oupaaveira rutu. <sup>21</sup> ♫ Viapau oiso Pauto vaaro veripaaveira vatevatea vovou Reo Taisi raga-ia raripaoro, oiso ra Tootoo Ovoi oua vo va-ia. Viapau. Eake iava? Vosa irai Reo Taisi raga vo reoaro sirova utuparo, ra va iava Pauto rerare oiso puraro, “Torevokoto-a vii.” Vosa oisi oiraopape vo reo eva, oire ra oiso taraipavio, O ari akukuvira rutu kopii ragaroepa Krais. Ari ita, osa viapau rutu oiso eisi torevokopapeira.

## 3

*Reo Taisi Vo Pitupituaro Sirova Utupa Vovou Ora Oirao Piea Sirova Utupa Vovou*

<sup>1</sup> Visii vao-ia vaaruu vovou irara vova Galesia! E viapau ora eveipataveira, uvare visii piro pierevorao iravu? Visii roroio pievira taviava ro iava Jisas Krais ira evao parikou-ia kopiiraepa. Uva vo vokio-ia oearovu raga vo reoroaro sirova utu ragapataveira oiraopa reo rutu kavupaoro. Irouto-a ro ira oisi eisi visii pierevorao? <sup>2</sup> Oire uva katai ake raga vao-ia oa-ia oiso visii akepaavoi. E Pauto visii vaterevora Tugoropato Uraurato vo osa Reo Taisi sirova vao Jiu vaaro utupataera? Asi viapau rutu. Oire ra oiso ragavira ita visii akea. E Pauto visii vaterevora Tugoropato Uraurato vo osa Jisas Krais oirao piepatavora vo rera raga-ia raripaoro? Iu, eisi. <sup>3</sup> ♫ Oire uva eake-a vao oare visii vao-ia eisi rutu piepataveira oiso osa voeao kokoropa irara? Ari ita, rovovira rutu voari Pauto reraaro Tugoropato Uraurato sirova utu rovotaepa. Oa iava rera ita kavutavora ora visii raga vo goruaro-ia raripaoro. Oire uva apeisi-a? Eisi vai piepaoro ora keakea ragapataveira oiso rugoopaoro, Uvuipatai vai pasi ra torevokovira kareketa oisi iava eisi? <sup>4</sup> E vara ruture varao ovautaera oara rutu visiipa vatepareva Tugoropato Uraurato vo osa oisoa Pauto-pa kovopata? Uva apeisi-a? Oiraopavira rutu-a oisi eisi pasi? <sup>5</sup> Uva oiso visii akepaavoi, E apeisi-a Pauto visiipa Tugoropato Uraurato vatepareveira, ora varao tapo oira porete piepa goruro, ora varao tapo ravoto pitupituro purapa goruro, vo rara Reo Taisi raga vo vovouaro sirova utupata? Easi viapau rutu! Teapi ora piro piepata Reo Taisi raga-ia rugoopaoro. Eake iava? Uvare evara vituaro oiso toupae, Vo osa Jisas Krais oirao piepata rutu rera vo siposipoaro sirova utupaoro vao oa iava uvutavora.

<sup>6</sup> ♫ Ari ita, oiso purapapeira ro iava Ebraham vao-ia Tugoropata Vuku, ‘Pauto vaaro Reo Ovoi oirao piereve rutu. Eva oa iava oiso Ebraham vaisireva Pauto, Torevoko vovoutoa rutu.’ <sup>7</sup> Oire uva oiso ragavira va-ia tarai iraopata, Vosa irouto ro ira Pauto oirao pie iraopareve vo ora rera vaaro-ia raria, ira-a eera Ebraham saratoaaro. <sup>8</sup> Oire vo tuariri rutu rovoa-ia Pauto voeao-ia ratau tou irara tarairoepa oiso, Akoea, voeao Vearo Siposipo oirao piepaiverea, ra va iava ora ragaipa voeao oua vorevira. Uva oisi-a eisi osa tarairoiva, Ebraham tavireva Pauto aue iava Tugoropata Reo oiso puraoro, ‘Vii-a vao rutu vituaro, oa iava oirara rutu taru viraakoaverea.’ <sup>9</sup> ♫ Uva Ebraham vo reo eva Reo Ovoi oirao piereve rutu. Oa iava Pauto oiso rera vaisireva Ebraham, Torevokotoa rutu. Oire vosa eisi oearoi tapo rera Pauto vaaro Reo Ovoi oirao piepaive, ra va iava voeao ita oisi vaisireve oiso, Torevoko vovou irara rutu.

◇ 2:21: Ro 10:9-13 ◇ 3:3: Ro 10:17 ◇ 3:6: Jen 15:1-6 ◇ 3:9: Jen 12:1-3

<sup>10</sup> ♦ Ari oearovu Reo Taisi raga oirao piepaiveira oiso purapaoro, “Vao raga uvuipai ra vigeipa vearoara karekeve.” Uva voea-a evoea oea vuria vo voriaro rutu ouive vo Pauto ruvara-ia, uvare Tugoropa Vuku-ia oiso purapapeira,  
‘Vosa irouto ro ira Reo Taisi-ia taraiparo, oire ra va-ia  
taraiparo viapau oreorovu rutu sirova utuparo varao oara va sovara-ia toupaiveira, ira-a  
eera taru vuria vo voriaro rutu oureve Pauto ruvara-ia.’

<sup>11</sup> Oiraopavira rutu, oiso osa viapau oiso iraiei ro ira uvuiparoi ra Reo Taisi sirova utupaoro torevokovira rutu karekeroverea vo Pauto osireiaro-ia. Viapau rutu. Eva oa iava oiso purapapeira vo Tugoropa Vuku-ia,  
‘Ro ira Pauto oirao piepareve rutu oire ra va iava Pauto rera vaisireve oiso, VII-a torevokoto, ira-a eera irapa taru Tootoo Ovoi vatepareverea Pauto.’

<sup>12</sup> Eake iava? Uvare Reo Taisi-a oavu raga rutu pisa. Uvare oirao pie asavira rutu orekerovu rutu purapapeira oearovu oirara vo Reo Taisi sirova utu ragapaoro. Uva Tugoropa Vuku-ia oiso purapapeira,  
‘Vosa irouto Reo Taisi rutu sirova utupaoro varao purapareve oara Reo Taisi sovara-ia toupaiveira, eera-a ira uvuiparoi ra Tootoo Ovoi rutu oureve.’

<sup>13</sup> ♦ Ari vigei rutu-a vao-ia vigoa oisoa potepape rutu vo Reo Taisi sirova utupaoro. Eva-a oa vituaro iava vigeipa vuria vo voriaro rutu vaterrevori Pauto. Oire uva eakere?  
Uvare Krais urioroepa vigei varaaro rutu ouoro vuriara. Uva varava kotoro viropa evao parikou-ia, uvare vo Tugoropa Vuku-ia oiraopavira oiso purapapeira,  
‘Ro oirato ira kotoive evaova-ia, oiso ra voa rera vo voriaro vuri vori oureve vo Pauto ruvara-ia, vo osa Pauto rera vaisireve oiso, Vurito-a vii.’

<sup>14</sup> Oire vo Pauto Ebrahim-pa Reo Ovoi purareva vao oa-ia rerare oiso puraroepa, “Ragai vearovara vateaverea rara voeao rutupa ratau tou irara.” Uva vigei vaaro vuri vori ou ovoioro Krais Jisas va eva Reo Ovoi oirao piererva vigeipa. Eva-a oa vituaro iava uvuipavie i ra oisi iava ratau tou irara tapo vigei rutu Tugoropato Uraurato oupape, vo rara goruvira rutu oirao pie rovopape rutu vo Pautoa-ia raripaoro.

### Vo Toupai Reo Taisi Iava Ora Reo Ovoi

<sup>15</sup> Araoko irara oaa, visiipa oovoovo reo vatepaavoi. Vosa aiterei reo ovoi vai purasi vo reoara vai rutu opesi pieoro, ra viapau oiso iravu uvuipo aue aveke tauvu verasa vao oa-ia oisoa ovoiei vaisi purapasi. Oiso tapo osa viapau irai uvuparoi ra airepa reo vai takuvuoro tuariripa reo vai verareve vao iava reo ovoi. <sup>16</sup> ♦ Oire Pauto Ebrahim vaiopa ora rera aaotoaaro Reo Ovoi vatereva vo reo-ia oa viapau oiso vatereva oiso puraoro, “Vo reo vatepaavoi visii aao rutupa,” Viapau. Ari ro ragare Krais oiso puraroepa, “Vao oa purapaaivoi vei aaoparei ragapa.” <sup>17</sup> ♦ Uva oiso puraparai, Viapau oiso oiae oai uvuipai ra vo reo tavariove oa purareva Pauto ovoievira. Oire uva va-a vao Reo Ovoi isivaaro iava varao vo resura vovoto vo peva tau (430) ivaro puteva. Oa iava Reo Taisi vatereva Pauto. Uva viapau oiso vao-ia Reo Ovoi putepaiveira Reo Taisi. Viapau. Ari touvira rutu Reo Ovoi toupaiveira vao Pauto vaaro. <sup>18</sup> Ari ita, vosa irai eisi Reo Taisi sirova utuparo, ra va iava vearoa oureve, oire uva va-a eva oa iava Reo Ovoi akukuvira rutu tou ragapaiveira. Ro-ia Ebrahim ira Reo Ovoi oirao piererva rutu. Oa vituaro iava Pauto rerare oiso puraroepa, “Ebrahim-a torevoko vovoutoa rutu.” Oa iava vearovira rutu oiso taraipavio, Viapau oiso Pauto vaaro-ia Reo Ovoi putepaiveira rutu eva Reo Taisi.

<sup>19</sup> ♦ Oire uva aa vao rutu-a va vao Reo Taisi vo kovoaro? Vao-ia oa vo kovoaro vao Reo Taisi oiso toupaiveira. Uvare voeao tuariripa irara viapau oiso ora voea-ia va eveiiva oiso puraoro, “Akoea, vuri pitupituro rutu-a varao oara purapapeira.” Ari vo osa va-ia Reo Taisi taraiaiva, oiso puraaepa, “O, ari vuriara rutu-a varao oara purapapeira Pauto osireiaro-ia.” Uva oisi raga-a eisi osa oisoa toupaive Reo Taisi vore tuepaoro uva Pauto Oviitoaaro pouro virovere rera raga ita Ebrahim aaotoaaro. Oire uva vo vuuta-a eva oaa opesi ovoiepa Reo Taisi. Uva va-a vao Reo Taisi oa iava Pauto enselpa irara tavireva. Oa iava evoea ita topa pievira aue Moses taviiva ita. Uva eera ita topa pievira oirara ita

tavitavireva. <sup>20</sup> Ari torevokovira rutu Pauto Reo Ovoi vatereva. Eva-a oa vituaro iava vao-ia Reo Taisi putepaiveira rutu, uvare Reo Taisi riroara rutu iava pura piropa gisipoara.

#### *Reo Taisi Vo Kovoaro Iava*

<sup>21</sup> Oire uva apeisi-a? Ora upopapeira varei vareo Reo Taisi ora Reo Ovoi? Asi viapau rutu. Ari ita, vosa irai va sirova Reo Taisi utupaoro va iava tootooa oupareve, uva va-a eva oa iava uvuiparoi vai ra torevoko vaisi oupareve vo Pauto ruvara-ia. Asi viapau oiso uvuipai ra torevoko vaisi vai oureve Reo Taisi iavirava, <sup>22</sup> ♦ uvare Tugoropa Vuku oiso purapapeira, ‘Oirara rutu vuri rugorugooro oaise sirova utupaaveira. Osa iava suria oirara rutu tuukepaiveira vo rasio-ia.’ Oa-a eva oa iava oirara rutu uvuipaai ra oiso taraipaave, Voeao oea Jisas Krais oirao piepaive ora voeao vo vovouroaro iava oirao pie vovouro raga, oeapa Oiraopa Tootoo rutu vaterevereia Pauto vo Reo Ovoiaro sirova utuoro vao oa vatereva Ebrahim-pa.

<sup>23</sup> Voari tuariri rutu vo osa Krais-ia oirao pie vovou vo pitupituarou pou viro asavira oisoa toupaive, ovuuta-a eva oa-ia Reo Taisi oisoa vigeire riro vavata iraopape. Uva oisoa vigei tuukepaive rutu. Oa iava oirao pie vovou vo pitupituarou karekeera. Uva va-a eva vituaro iava Jisas ora karekeroera vo rasio iare. <sup>24</sup> ♦ Oire uva Reo Taisi vo kovoaro-a vao, oirara tokipasa voea torevokopaoro. Oa iava vo rekasiera vo vuutao-ia oa-ia Krais pouro virora. Uva vo vuutao-ia Krais vigeipa tasi puraparevoi vitupaoro. Oa iava uvuipavie i ra oirao pie vovou rutu purapape torevokovira rutu toupaoro vo Pauto osireiaro-ia. <sup>25</sup> Ari ita, ovuuta-a eva oa vo vokio-ia toupaivoi eva oa-ia Krais-ia raripavie. Uva va-a eva vituaro iava viapau oiso Reo Taisi vigeipa reipapeira.

<sup>26</sup> Oire uva vo vokio-ia visii varaaro oirao pie vovouro visii oiso rutu piepaivoi, Visii-a Pauto ovii iraraaro vo rara Krais Jisas-ia raripata rutu. <sup>27</sup> ♦ Uvare baptaisa outavora, oiso ra kataivira rutu toupata Krais tapo oiso, Visii-a Pauto ovii iraraaro rutu oiso rutu osa ro-ia Krais eera Pauto Oviitoaaro. <sup>28</sup> Ari ita, oiraopavira uvare visii rutu areiivira rutu toupataveira. Viapau oiso roopavira toupata oiso, Jiu-pato-a vii, ari ratau tou irara iava vii, ari kovopato-a vii moni oupato, ari vii-a akuku kovotoa raga. Ora oiso riakova viapau oiso oiratoa-ia putepaevoi, ora viapau oirato riakova-ia puteparevoi. Viapau rutu. Ari kataivira rutu toupataveira vo Krais Jisas-ia. <sup>29</sup> ♦ Iu, vo osa visiipe rutu Krais voearo, ra oiso rutu tota, Visii-a Ebrahim aao iraraaro visiigoa rera sirova utupataveira. Ra va iava vao outa vearoa Pauto ruvara-ia oa iava voari tuariri Reo Ovoi purareva Ebrahim tavioro.

#### 4

<sup>1</sup> Oire uva topa pievira vo reo vatepaavoi ita oiso-ia, vosa iravu oirato kopiiro auero rutu arova varao rera varaaro, ra oviito vara-ia ita pitureve vo rara riroparo. Oire ra viapau oiso ikauvira vara oisoa oupareve vo rara kakaevira toupareve. Viapau. Ari oisoa kovopavira tou rovopareve oiso osa kovopato vo vuutaore tuepaoro oa-ia oisoa vara rutu oupareve varao aiteto varaaro. <sup>2</sup> Oire vo osa kakaevira toupareve, uva oisoa oearou sirova utuparo voeao oearoa oisoa rera tokipaive ora rera varaaro vo vuutaore tuepaoro oa reesireva aiteto. <sup>3</sup> Oire uva vigei ita oisoa toupape oiso osa evoea kakae vure, uvare tuariripa pitupituro oisoa vigeire reipape rutu varao oara-ia oisoa avatapa irara toupaive uraura irara. <sup>4</sup> ♦ Uva va-a eva isivaaro iava vo vokio pou pirorao vigeipa ovokia reesireva Pauto, oiso ra vo vokio rera Oviitoaaro kataitoa rutu siporeve. Oa iava vo vokio rera siporevorao. Uva tavauruva rera kavauevorao. Oa iava riroporo touparevora Jiu vaaro Reo Taisi sirova utupapro. <sup>5</sup> ♦ Ari ita, oirara oisoa Reo Taisi reroarovi tou rovopave. Oa iava Jisas urioroera vo taisi vavataaro verasa vuri voriro oavi opesi pieoro, oisore ra vigei rutu oiso toupape, Pauto ovii iraraaro rutu.

<sup>6</sup> ♦ Oiraopavira rutu uvare visii rutu-a Pauto ovii iraraaro. Eake iava? Uvare eva oirao piesa Pauto rera Oviitoaaro Urauraaro siporevora vigei sopaaro iare, oisore ra voa toupaoro oiso puraparo vigei iavirava, “Aite. Igei rutu Aitearo.” <sup>7</sup> Oire uva va-a eva oa vituaro iava viapau oiso akukuvira kovo ragapaoro toupataveira oiso osa voeao oea

✉ 3:22: Ro 3:23   ✉ 3:24: Ro 10:4; 1 Ko 4:15; Ga 2:16   ✉ 3:27: Ro 6:1-10   ✉ 3:29: 1 Ko 3:23   ✉ 4:4: Jen 3:15; Ais 7:14   ✉ 4:5: Ef 1:7; Jo 1:12; Ef 1:5   ✉ 4:6: Ro 8:14-17

akukuvira raga kovopaiseira aite irara varaarore tuepaoro. Viapau. Ari visii-a Pautoa rutu ovii iraraaro. Eva-a oa iava varao rutu vateparevere visiipa oara tuevira toupaiseira visii rutupa vao-ia ovii irara.

*Pol Rirovira Rutu Galesia Vatare Rugorugooroepa*

<sup>8</sup> Voari rovovira rutu uva Pautoa-ia tarai asavira rutu oisoa tou rovopata. Evo vuuta-ia oiso rutu toupata, Kovopa irara voeaopa vuri tuglararo oea visii oisoa tuukepaive, voeo oea viapau oiso oiraopavira rutu toupaiseira oiso osa Pauto. <sup>9</sup> Oire ra vo vokio-ia Pautoa-ia taraipata, vo rara rera-ia oirao pie vovou purapata. Ari ita, oiraopavira uvare Pautoa ita visii-ia tarai iraoparo rovopavira. Oire uva apeisi-a? Rerare ovaupaoro vorepatai varao iare tuariripa pitupituro varao oara viapau uvuipai oirara tauvapasa, eke? E ruipapatai ita ra tuariripa pitupitupa kovo ragapata ita vori ou asavira, raa? <sup>10</sup> ♦ Uva vo pitupituro purapaoro ovokirovu oovapa vokiro reesipataveira ora visiipa, ora oaravu kekiraara, ora oivarovu tapo, oisore ra vo vuutaro-ia aioara vureiara purapata. Oire ra voa vara-ia variripata oiso keapaoro, Oara-ia Pauto roru piepaoiveira. <sup>11</sup> Ari ita, visiire rugorugoo iraoparaveira, uvare riro kovo rutu puraava visii siposipopaoro. Uva apeisi-a? Akuku kovo raga-a oa puraava visii-ia, eke?

<sup>12</sup> Araoko irara oaa, goruvira rutu visiire oiso puraparai, Ragai tapo katai vovou rutu purapata vao iavirava Reo Taisi vare rugorugooa, uvare ragai tapo va kavuava, ra visii tapo va kavu iraopata. Ari ita, viapau oai viria vai puratavora ragai-ia. <sup>13</sup> ♦ Ari tuariri oisoa ragai tauvapata vo osa upiaparaera. Oupia-a eva oa-ia toupaoro riro kaekaevira toupaavora visii ruvara-ia. Ovuuta-a vao oa-ia visiipa Vearo Siposipo vatepaavora. E vare rugorugopatai? <sup>14</sup> ♦ Vo osa oisoa upiapaoro visii pugu piepaa, uva viapau oiso ragai oisoa kavupata ragai tovipaoro. Viapau. Oiraopavira rutu, eisi osa voeo enselpa irara vai pasi oisi piepatavori, oiso osa ragai oisoa tokipata. Ora ro tapo Jisas Krais ira vai-a tapo uvuipatai ra rera oiso tokipata osa ragai oisoa tokipata. <sup>15</sup> Oire uva oisi-a eisi osa ragavira oisoa ragai tauvapata voari tuariri. Oire uva apeisi-a? Visii vaaro ragai-ia roru vovou touvira toupaivoi visii-ia oiso osa voari tuariri, eke? Ari ita, taraiparai, Vosa eisi purataeri voari tuariri, "Ora vigei varaaro gorogorope osireiara." Oa iava purata, "Ie, Pol, osireiara varao oara tateiovvoi ora igei iava viipa tauva vatepaoro pute pievira rutu." Oire uva oisi-a eisi osa purataeri, vo uvare ragaipa oisoa sirao iraopata rutu rirovira. <sup>16</sup> Ra apeisi vo vokio-ia? Vo uvare visiipa oiraopa reo rutu vate rovoavora. Uva apeisi-a? Vo vokio-ia ragai-a visiiva keripato, eke?

<sup>17</sup> Oire oiso-ia vo osa visiipa kuuvu reoro raga vatepaiseira rakari verapa pitupitu iava vo visii aroviaku ragapaoro, uva riroa rutu rugorugooa purapaiseira visii-ia. Eake iava? Uvare oiso rutu vovoupaaveira ra visii ivupaiseira igei arova, oiso ra kasivarivira rutu voea sirova utupata. <sup>18</sup> Oire vearpai vo osa oearovu kasivarivira avu rugorugooaavere visiire visii tauvapasa oiso osa ragai visii tauvapavaavora visii tapo toupaoro. Ari vao raga oiso vo osa torevokoa vai karekepere vo tauva iava eva. Ari ita, viapau oiso torevoko rugoo vai-ia visii tauvapavaivera voea evoea. Aue iava uvare ora voea vo pitupituaro raga sirova utupasa visii tavitavipaiseira vao rakari verapa pitupitu. <sup>19</sup> ♦ Ari ita, oiso rutu toupataveira, Ragai ovii iraraaro rutu. Oire vosa riakova kakaeto kavausa auepao, ra riroa rutu upia queve. Uva vo upia eva oira iava oisoa opesipape vo osa kakaeto karekero. Uva oisi-a eisi osa ragavira visiiva riroa upia oupaaveira vo osa riropata. Ari ita, vosa ovoieivira rutu visii vararao oirao pie vovouro toupaiseira vo osa vara iava Jisas-ia raripata, eva-a oa iava uvuiparai ra ragai iava opesipe evara upiara. <sup>20</sup> Ragai rirovira rutu oiso ruipa irao ragaparai ra visii tapo toupaa vo vuuta-ia vao-ia. Uvare oiso rutu ruipa iraoparai ra ragai vo rugorugooaro visii vararao rugorugooara keke iraove. Oa iava ragai vaaro riro vavata reoreo uvuipai ra tavariope. Ra va iava kavevira reoreora visii tapo. Uvare vo toupaoro ragai vo rugorugooaro paipai iraopavoi. Eva-a oa iava viapau uvuiparai oiso ra visii tauvaa.

*Reo Ruu Vaireo Iava Hega Vaio Ora Sera*

♦ 4:10: Kl 2:14-17   ♦ 4:13: 1 Ko 2:3   ♦ 4:14: Mt 10:40; Lu 10:16   ♦ 4:19: 1 Ko 3:1-4, 4:15

<sup>21</sup> ♦ Oire ragai tavita vearovira rutu ora visii iava visiigoa oiso ruipapataveira ra Reo Taisi reroaro touputa. Uva eake-a vao oa rutupa viapau vearovira Reo Taisi vo reoaro uvupataveira? <sup>22</sup> Oire vo taisi oiso tavipapeira, Ebraham vaiterei oviitoarei kavaureva. Uva oiso-ia iriavu-a kovopava iria oviitoaro-a iravu. Ari iriavu-a valuava oaro rutu iria oviitoaro-a iravu. <sup>23</sup> Oire uva avaioto kavaueva o kovopava oiso osa airorovu rutu okakaerovu kavaupaiseira. Ovusa ro-ia kikooto ira pisa visivi rutu karekeroepa. Eake iava? Uvare rera-a eera ira iava Pauto Reo Ovoi purareva Ebraham-pa. <sup>24-25</sup> ♦ Oire vo siposipo ovoovovira rutu toupaiveira vaitereo iava oviitoarei, uvare valre o riakorirei airea oiso rutu toupaereveira varei Reo Ovoirei. Ari ita, o-ia kovopava Hega iria ovii iraraaro oiso karekeapea, Evoea kovopa irara. Uva oiso rutu toupaeveira osa vao Reo Taisi oa Moses-pa vatereva Pauto vo Sinai Pukui-ia. Ari ita, voeao oea oisoa Arebia-ia toupaive oea vo pukui oisoa vaisipaive, Hega Pukui. Uva eira Hega iria ovoovovira oiso rutu toupaeveira osa vao Jerusalem urui. Eake iava? Uvare oira-a kovopava oiso osa voeao Jerusalem urui-ia tou irara oea oisoa Reo Taisi reroarovi kovopaiseira. <sup>26</sup> Oire uva oira-a o-ia vigei aakoaro rutu Ebraham valuavaaro rutu eira iria oiso toupaeveira, Ouruivu airepa rutu vao Jerusalem oa vo vuvuiua-ia toupaiveira, eira-a Sera iria ovii iraraaro viapau oiso Reo Taisi reroarovi kovopaiseira. <sup>27</sup> ♦ Iria iava Tugoropa Vuku oiso purapapeira,

‘Rorupari vii vao riakova viigoa kakae kavaus asavira toupari upia ou asavira. Utupavira riro kakaero rutu taru kavaurivere o-ia puteoro kovopava o-ia iriapa kakae puraro valuato.’

<sup>28</sup> ♦ Oire uva visii rutu-a vao ragai araoko iraraaro Pauto ovii iraraaro, visiigoa rera oirao piepaoro rutu oiso rutu toupataveira osa vaitereo Ebraham avukarei, aiterea Pauto vo reoaro oirao piesiva rutu. Oa iava Aisak kavausiva. <sup>29</sup> Ari ita, o-ia Hega iria ro kavaueva iravu kakaeto oiso raga ita osa airorovu rutu riakora kakae vure kavaupaiseira. Uva eera-a ira ropa tavaka vatereva ira Pauto reraaro Uraurato vo goruaro-ia kavauroepa. Uva oisi rutu-a oiso-ia osa piepaiveira vo vokio-ia Reo Taisi reroarovi kovopava ovoeaoa tavaka vatepaoro oeapa Pauto Tugoropato Uraurato vatepareveira. <sup>30</sup> ♦ Ari ita, ro-ia Ebraham ira iava oiso tavipapeira vo Tugoropa Vuku sovara iava, uvare Pauto oiso rera tavireva ra kovopava ora rera iava verareve voavaorei rutu ora oviito. Eake iava? Uvare ro kovopava oviitoaro viapau oiso uvuiparoi ra orekerovu rutu varao Ebraham varaaro oureve vo rara Ebraham kopiro. Uvare ro ragapa rutu oisoa uvuipape rera valuavaaro rutu oviitoaro. Vosa kopiro aiteto, ra orekerovu rutu oureve taru rera raga. <sup>31</sup> Araoko irara oaa, viapau oiso toupape osa voeao okakaeroa kavaueva o-ia kovopava. Viapau rutu. Ari vigei-a vao oiso rutu toupape, Vigei-a Ebraham valuavaaro rutu ovii iraraaro. Oire uva evō reo oa oiso ovoovovira rutu toupaiveira vigeipa.

## 5

### *Vii Viigoa Karurevora Tuukea Iava Viigoa Uvuipauei Ra Eakavira Rutu Toupari*

<sup>1</sup> ♦ Viapau rutu oiso kovopavira toupataveira oiso osa voeao oea Reo Taisi reroarovi kovopaiseira, uvare visii karurevora Krais Reo Taisi vo tuukearo iava. Uva visii tavipaavoi oiso, ra oiso ragavira rutu touputa. Ra oisi toupaoro viapau oiso ra ora visii vo pitupituroaro iare vorevira porepata oiso osa evoea kovopa irara.

<sup>2</sup> Oire uva ragai-a Pol ragoa vo reoaro vao-ia uvu iraotal! Vosa vao Reo Taisi sirova utupaoro ora visii iava rakari verapata oiso rugoopaoro, Vao raga rutu iava Pauto uvuiparoi ra igei ora rera iare vorevira oupareve. Uva oisi-a eisi osa iava Krais viapau uvuiparoi ra visii orirupareve vo ora rera iare visii virivaripaoro. <sup>3</sup> ♦ Oiso vorerivira ita visii tavipaavoi, Vosa irai visii iava oiso rugoopaoro, Vosa ora ragai iava rakari verara, ra va iava Pauto ragai-ia vearo vovou purareve. Oire vosa oisi oiso-ia rugoopaoro, ra viapau rutu uvuiparoi ra oreorovivu ruture ovauparo vao Reo Taisi rutu sovara-ia. <sup>4</sup> Uva

♦ 4:21: Ro 3:19-20 ♦ 4:24-25: Jen 17:15-27 ♦ 4:27: Ais 54:1 ♦ 4:28: Ro 9:6-9 ♦ 4:30: Jen 21:9-11

♦ 5:1: Fl 4:1 ♦ 5:3: Diu 27:26; Ga 3:10

visii oiso purapataveira, "Reo Taisi sirova utupaoro Oiraopa Tootoo rutu oupaioveira." Ari oisi-a eisi osa purapataveira, uva viapau rutu oiso uvuipatai ra Oiraopa Tootoo oupatu vo Krais ruvara-ia. Uvare eisi purapaoro Pauto vo siraoaro kavupataveira.<sup>5</sup> Ari igei tauvapareveira Tugoropato Uraurato igoa Krais-ia rariapaoro Pauto vo reoarore tuepaioveira, vo osa rera raga igeire oiso puraro, "Vearo irara rutu visii."<sup>6</sup> Ari ita, oiso-ia vosa ro ira Krais Jisas-va tavosivira toupareve, ra viapau oiso rerapa rakari verapa pitupitu reipape rutu. Ora vao vosa vo pitupitu kavureve, ra viapau oiso eva tapo rerapa reipape. Viapau. Ari vao raga rutu-ia oirao pie vovou. Eva-a oa vituaro rutu iava oirato vo vovouaro tore piepaiveira, ra sirao vovou rutu purapareve vo vokiara rutu-ia.

<sup>7</sup> Voari tuariri uva vearovira rutu Krais vo reoaro uvu rovotavora, oa iava oisoa va sirova utupata. Oire uva iroutoa rutu-a ro ira visii piro pierevora oiraopa reo sirova utu arapa? Uva apeisi rutu-a oiso osa visiire puraroera, oa iava oisi rera uvuoro eisi pietavora?<sup>8</sup> Ari ita, viapau rutu oiso Pauto visii piro pierevora. Viapau. Uvare rera-a eera ira keeraparoveira varao arova tuariripa vo vovouro visii varaaro oara oisoa visii tuukepaise rutu.<sup>9</sup> Uva oearovu oiso ovoovovira purapaaveira, "Gareavi yis uvuipai ra riroa rutu plaua kae pieve rutu va riro pieoro."<sup>10</sup> Oire uva oisi-a eisi osa voearo vo reoroaro visii piro piepaiveira. Ari Pauto ovovouroa-ia evara voea varaaro vurapareveira oara voriaro voeapa vatererevere. Uva oiso ragavira tarai iraoparai ro iava Turaro Krais ira raga uvuiparoi visii tauvapasa rutu. Oa iava uvuipatai ra evara piro pie reoro eakapata. Eisi osa iava uvuipatai ra ragai vo reoroaro sirova utupata ita.

<sup>11</sup> Uva oearovu oiso purapaaveira, "Rera Pol oiso voea siposipopareveira, oisore ra ora voea iava rakari verapaave. Ra va iava oiso karekepaae, Jiu rutu." Uva vosa oisi eisi visii siposipopaaori, ra eakepa Jiu-pa irara ragaire kasipupai? Ari vao raga Jisas iava vo reo ro ira evao parikou-ia kopiiroepa, oreoa vatepaaaveira. Oa vituaro iava oisi eisi kasipupaaai ragai vuri piepasa.<sup>12</sup> Uva oiso ruipa iraoparai evoea iava oea visii piro piepaiveira oiso purapaoro, ra ora visii iava rakari verapata. Uva oiso voeapa vearopapeira vosa visii arova uvuipaaai ra ora verapaave uvaroi ragare.

<sup>13</sup> Araoko irara oaa, oiso visii tavipaavoi, Pauto visiire keeraroepa, oiso ra tuariripa pitupituro rutu kavuta varao vavagisiara rutu. Ra avekatavira toupaoro opeita ora visiire oiso purapata, "Uvuipavie ra varaua vo ruipaaro sirova toupape." Viapau. Ari eisi toupaoro uvuipatai ra oearovupa siraopaoro voea tauvapata.<sup>14</sup> Aue iava uvare vara rutu evara oara Reo Taisi sovara-ia toupaiveira oara rutu takuvuaro iava oiso purapapeira, "Oearovivupa sira iraopata oiso osa ora visii ragapa siraopataveira."<sup>15</sup> Ari ita, vosa eisi piepata oiso osa kaakau kare vo kareo oea ora upopaaaveira, ra eake vai va sirovava karekepe? Ora vatatopo iraopata. Uvare eisi piepaoro uvuipatai ra ora opesi pieta.

#### *Tugoropato Uraurato Vo Pitupituaro Iava Ora Oirara Vo Pitupituaro Vo Toupaoro Rasitoa-ia*

<sup>16</sup> Ragai vo reoaro-a vao-ia oiso. Vo osa Tugoropato Uraurato ora rera vo reoaro vaterereve visiipa, oire eva-a oa-ia uvuipatai ra va sirova utu iraopata. Ari ita, vosa visii raga vo ruiparoaro oiso purapapeira, Eagara vuria purari, uva vo ruiparo-a evara oara iava uvuipatai ra pore iraota viro Tugoropato Uraurato vo reoaro raga sirova utupasa.

<sup>17</sup> Uvare Tugoropato Uraurato vo rugorugooro osivu ragavira rutu toupaiveira, vo rara vigei vo rugorugooroaro pisavira toupaive. Oire vo rugorugoorei eisi ragavira toupaoro ora upopapeira. Ora tapo vo rugorugoorei oiso vigei piepaiveira, ra oavu kavuoro oavu raga sirova utupavio vao oa pura arapa reasipavio.<sup>18</sup> Ari ita, vosa Tugoropato Uraurato vo reoaro rutu sirova utu iraopata, ra va iava viapau oiso Reo Taisi visii tuukepaise.

<sup>19</sup> Vosa ora vigei raga vo rugorugooro raga sirova utupavio, ra va iava vo vovouro rutu viaevira karekepape varao oiso-ia, otopa pitupitu, ora vuri rugorugooro tapo varao oara purapaaiveira, ora opitupiturovu purapaaiveira arii asavira.<sup>20</sup> Vo osa oearovu tokarasiara vaisiaro kae pie ragapaise va iare tugara vo goruroaro ou ragapaoro. Ari

---

<sup>5:5:</sup> Ro 5:1-11    <sup>5:9:</sup> Mt 13:33-35; 1 Ko 5:1-8    <sup>5:14:</sup> Ro 13:8-10    <sup>5:15:</sup> Je 3:13-18    <sup>5:17:</sup> Ro 7:15-25    <sup>5:19:</sup> Ef 5:3; Kl 3:5    <sup>5:20:</sup> Re 21:8

oearovu kavokavo kovoro raga purapaiveira. Ari oearovu viurupa vovouro purapaiveira. Vo osa oearovu ora upopaveira. Ari oearovu riirii vovouro purapaiveira, osa oearovu kasipu vovourova toupaiveira, ora oearovu tapo ora voea raga-ia vovoupaaveira ora vaisi oaiive kae piepaoro. Vo osa oearovu oiso purapaave, “Igei vovouaro torevokopai. Ari visii vaaro koikepavira toupai.”<sup>21</sup> Vo osa oearovu vararo aupariara riiriipaiveira. Ari oearovu riro gorupara-ia ukaiopaaave kokoropaoro. Osa oearovu vurei aioro purapaive. Oire ra vo aioro-ia ora voeava vuri vovouro purapaive. Oire uva oiso ita vorerivira visii tavipaavoi osa rovovira visii tavi rovoavora oiso, Vosa ro ira vuri vovouro rutu purapareve oiso osa vara evara, ira-a eera viapau rutu oiso uvuiparoi ra koataro Pauto vo Saraaro iare. Ra va iava viapau oiso toupareve, Rera-a Pauto oiratoaaro.

<sup>22</sup> ♦ Ari vosa Tugoropato Uraurato vo rugorugooroaro sirova utupavio varao oara kareke piepareve vigei sopaaoro-ia. Uva evara oara iava uvuipai ra oiso karekepape, sira o vovou-a vao-ia, ari rorupa vovou-a vao-ia, ari kave vovou-a vao-ia. Oire ra eisi sirova viapau oiso vagevagepavira kasipupavio, vo osa oearovu tauvapasa auepavio, ora varao vearo rugorugooro, ora vao tuuvu vovou rutu oa purapape.<sup>23</sup> Ora vao tapo veripape oiso-ia, opeita oearovivu-ia putepape, ora opeita ora vigei iava vasepape vuri vovouro purapasa. Oire vosa oisi eisi piepari, viapau oiso irai uvuiparoi ra vii togareve reoa vai-ia, vii vao viigoa Tugoropato Uraurato vo vovouaro sirova utupau. Viapau. Aue iava uvare viapau oiso Reo Taisi vo pitupituaro puteparivoi eisi vara sirova utupaoro.<sup>24</sup> ♦ Oire opitupituroa rutu varao eakaiva voeao Krais voeapro varao vuri rugorugooro.

<sup>25</sup> ♦ Ari ita, vosa tootoopavioveira vo Tugoropato Uraurato vo goruaro sovara-ia, eva-a oa iava uvuipavie i ra ora vigei iava vase iraopape rera iare. Oa iava uvuiparoi ra vigeipa vasepareve ora rera vo rugorugooroaro iare.<sup>26</sup> Ra vara evara sirova utupaoro viapau oiso vagu vovoua vai purapape, ora viapau oiso oearovure kasipu rugoro tore piepape, ora viapau oiso ra oearovu vararo riiriipape.

## 6

### *Vigei Uvuipaviei Ra Araoko Irara Oavi Tauvapape Voea Vo Siraaro Kaepaoro*

<sup>1</sup> ♦ Araoko irara oaa, vosa irouto visii iava oirao pie vovouto vuri vovou-ia kovero, oire ra irai visii iava ro ira goruvira rutu Tugoropato Uraurato vo vovouaro sirova rutu utuparo, eera-a ira uvuiparoi ra reravi vorevira tore piereve rera tauvaoro kave vovou raga-ia. Oire ra vearovira ita vorevira vokareve. Uva vo osa rera tauva rovorefura, vearovira rutu ita rera ora vatatoporovere vaopa, teapi rera ita va vao vuria raga-ia kovero ita.<sup>2</sup> Visii rutu oearovivu rutu visii iavapa irara tauvapaoro toupata vovou kapokaporopaoro vuri vovou vo vavataarova. Oire vosa oisi eisi piepata, ra va iava Krais vo reoaro sirova oisi rutu eisi utupata vao rera vaaro reo goru.<sup>3</sup> Ari vosa irai visii iava oiso puraparo, “Viapau rutu uvuiparai ra eisi oovoovoi sirova utura. Uvare riro vaisitoa rutu-a ragai.” Oire uva rera-a eera ira eisi puraparo ora keakea ragaparoi.<sup>4</sup> Vosa iravu siituepaoro oiso purapau, “Viigoa-ia putepaavoi uvare vuria puraparivoi,” oire uva viapau oiso torevokovira eisi reopaei. Viapau. Ari vearovira rutu ora vii raga ora viiva siituepau ora vii vo vovouaro rovirie rovopaoro rutu. Oire vosa vii iava sopaua oiso purape, “Vearopai,” ra va iava oiso ragavira taraiu, O, ari torevoko vovou-a vao-ia oa purapaaivoi,<sup>5</sup> uvare oirara rutu uvui iraopaa ra katakataivira kovoara oaiive vavataaro kae piepaise.

<sup>6</sup> ♦ Oire vosa irai Jisas vo reoaro iava visiipa siposiporeve, oa iava visii ita uvuipatai ra orekerovu-ia vearopara rera tauva ragapata rera vatepaoro.

<sup>7</sup> ♦ Opeita ora visii raga ora keakea ragapata oiso keapaoro, Uvuipaviei ra Pauto keapasa vatauvira orekerovu pura ragapape. Oa vituaro vao-ia oiso toupaiveira, Vosa eake vao pauri vo kovoaa-ia vii vaaro, ra oisi raga kuepe.<sup>8</sup> Oire vo osa irai orekeroi vuriara vai paupareve, ra vara iava oupaoro rera vo vovouaro vuri vovouro aio piepareve. Eva-a osa raga piepaoro ora opesi pie ovoirovere. Ari vo osa ro ira vearopara paupareve Tugoropato Uraurato vo reoaro sirova utupaoro, uva rera-a eera ira vearoa oureverea.

♦ 5:22: Ef 5:9; Kl 3:12-15   ♦ 5:24: Ro 6:6   ♦ 5:25: Ro 8:4   ♦ 6:1: Je 1:13-16   ♦ 6:6: 1 Ko 9:7-18   ♦ 6:7:

1 Ko 6:9-11

Aue iava vo rara Tugoropato Uraurato ruvara-ia Tootoo Ovoi rutu oureve. <sup>9</sup> ♦ Vo rara reasi asavira varao vearovpara purapape. Ari vosa keruriavira rutu topa pievira orekerovu rutu vearovpara purapata, oire eva-a oa iava taru vearovpa kuero oupatavere vova Pauto ruvara-ia. <sup>10</sup> ♦ Va-a eva vituaro rutu iava uvuipavie ra oearovivu rutuva vearovpa vovouro purapape vo osa vuutaa vaipe oisi eisi piepasa. Oiso osa voeao oeavia Krais oirao piepaveira vigei araoko iraraaro, oeapa ita uvuipavie ra oisi vearovpara rutu purapape pute pievira rutu.

*Pol Kristen Irara-ia Rorureva Voea Goru Pieoro*

<sup>11</sup> Oire ragai-a vao ragoa raga visiipa vo rigato puraavoi. Uva vo kirokioro kekepatavoi riropara ragai varaaro. <sup>12</sup> Uva voeao oea oisi visii siposipopaeira goruvira rutu visiire oiso purapaoro, “Uvui iraopatai ra ora visii iava rakari verapata.” Uva eisi ragavira piepaveira vuri vovou vo vavataaro asavira oiso, teapi voea oupaive. Aue iava uvare oiso taraipaaveira oraivavu epao vao-ia osa Jisas kopiioepa evao parikou-ia vigei vorevira ouoro. Uva vo raiva eva oa iava siposipopao pasi vuri vovou vai oupaive Jiu ruvara-ia pasi. <sup>13</sup> Ari ita, osa voeao-ia oea oisoa ora voea iava rakari verapaave, viapau oiso Reo Taisi rutu rutuaro sirova utupaoro-a. Viapau. Uva oiso ruipapaaveira rutu ra voea vo reoaro sirova utupaoro ora visii iava rakari verapata. Ra va iava oiso purapaave ora voea iava, “Easi evoea vigei vo pitupituaro raga sirova utupaaveira.” Oa iava oearovu voea vo pitupituaro raga rei piepaveira rutu. <sup>14</sup> ♦ Ari ragai viapau oiso oisi ragavira eisi oearoipa siposipopaa. Viapau. Ari evao parikou raga rei piepaveira rutu vao oa-ia kopiioepa vigei reraaro Turaro Jisas Krais ragai ouoro. Uva oisi-a eisi osa vituaro iava viapau oiso orekevu avu vai ragai vo vovouaro uvai ragare ivupaveira varao vo rasio iava akukupapara raga. Evara rutu kopiiepa ragai iava evao parikou-ia. <sup>15</sup> ♦ Ari ita, vo osa ora visii iava rakari verapataveira oa-a viapau eva uvuipai ra visii virivarive. O vosa vo pitupitu eva kavuta, oa tapo ita viapau uvuipai oiso ra visii virivarive. Ari vao raga-ia vo rara Tugoropato Uraurato vigeipa airepa rugorugooro vatereve. <sup>16</sup> Vosa oisi raga eisi vo reo sirova utupaave oearoi, oire ra va iava voeare oiso purara, Osa vearovai eisi. Eake iava? Uvare ruipaparaveira rutu voea rutupa oiso ra vearo tou puraive, ora aue tapo ra sirao vovou purareve Pauto voea-ia ora oearovu tapo Pauto voeaaro.

<sup>17</sup> ♦ Oire ovoiopa reo-a vao-ia ragai vaaro oiso oa visiipa vateavoi vo vokio-ia. Ovokia vao isivaaro iava viapau rutu oiso irai uvui iraoparoi ra utupaua ragai vo reoarova ora kaureoro. Uvare ragai-a Jisas-pa kovopato. Ari ita, viupara varao oara ragai varaaro-ia toupaivoi ragai vo reoaro oirao piepasa.

<sup>18</sup> Araoko irara oaa, oiso rutu ruipa iraoparai ra vigei reraaro Turaro Jisas Krais visii rutu viraako iraoreve visii tauvapaoro.

Evavi raga, ra opesipe.

Ragai-a vao, Pol.

## EFESAS

### Irapa Reoro Vo Vukuo Iava

Vo pasio rigatoreva Pol tuukepa kepa-ia toupaoro eisi Rom aue-ia 61-63 yia Jisas vaaro isivaaro iava kavaua. Pol aue iava rigatoreva ra katai vovouvira rutu toupaive Jisas vaisiaro-ia voeao lotupa irara. Ari ita, oirao pie vovou irara oiso rutu toupaiveira, Jisas iava varaua (Ef 1:23, 4:25, 5:23, 30), ro ira oiso toupare osa kukue (Ef 4:15-16). Ora vao sios voea ita lotupa irara oea oiso rutu toupaiveira Krais oiraaro valuava (Ef 5:22-32) vo osa rera-a valuato. Evo reoro rutu rigatoreva Pol lotupa irara goru piesa, voeao oea oisoa Efesas urui-ia toupaive.

1. Ira pievira aviavi pie reoro rigatoreva Pol, 1:1-2.
2. Krais-a ro ira vo raiva vituaro rutu oa-ia uvuipaa oirara ra vorevira voreave Pautoa iare rera tapo ora agiagipaoro ita, 1:3-3:21.
3. Opitupiturovu iava torevoko pitupituro oara purapaiveira voeao oea aviavia-ia toupaiveira Pauto vaaro, 4:1-6:20.
4. Pol vearo voki purareva oearovuva oirara, 6:21-24.

<sup>1</sup> Ragai-a Pol ragoa vo pasio rigatoavoi visii rutupa Pauto voeao visiigoa evoa Efesas-ia toupataveira. Visiigoa Krais Jisas vo reoaro uvu rovotava. Uva vo vokio-ia touvira rutu toupatavoi Krais Jisas-va ora tavosipaoro oisi raga vo reo sirova utupaoro. Ari ita, Pauto ragai roporeva ora rera vo ruipaaro-ia, oisore ra aposel kovo-ia pitupaoro Jisas Krais kareke piepaa. <sup>2</sup> Oire uva ragai vo ruipaaro oiso rutu toupaivoi visiipa, Pauto ro vigei Aitearo ora ro vigei reraaro Turaro Jisas Krais evaiterei aiterea vokiara rutu-ia tauvaa ora gavaurea vatepasiveira visiipa.

#### *Pauto Vigei Vatepareveira Viraakoa Vao-ia Ro-ia Jisas Krais*

<sup>3</sup> Uva vearopai ra rera-ia Pauto vuurapa vaisi purapape ro Aitetoaaro Jisas Krais vigei Turaroaro. Uvare vigei rutu viraakorevora orekerovu rutu veeropara vateoro varao rera vo Saraaro iava, auere oiso ra uraura tootooro oavi tauvapareve, uvare kataivira rutu vigei Jisas Krais tapo toupapeira. <sup>4</sup> Voari rutu tuariri vo osa Pauto rasito pura asavira toureva, uva vo vuuta-a eva oa rutu-ia Pauto vigei ropo rovoreva rutu, oisore ra oiso toupape, Vigei rera voeao rutu. Oa-a vao vituaro rutu riaaro iava, rera ro-ia Krais. Uva oisi-a eisi osa iava uvuipavieie ra torevoko vovou rutu purapape vao oa-ia viapau viria vai vo rera osireiaro-ia Pauto. <sup>5</sup>  $\diamond$  Ari ita, Pauto vigei kavikoreva rutu, uvare vigeire rugorugooroepa rutu voari rovoa-ia ro iava Jisas Krais, ira iavirava vigei ourevere taru vorevira ora rera iare oiso vigei vaisioro, Ragai ovii iraraaro. Eisi osa pierere, uvare rera rutu vo ruipaaro-a Pauto. <sup>6</sup> Rera-ia vuurapa vaisi pura iraopata ro-ia Pauto vaore rugorugooopaoro rutu, akukua vatevatea vovou ora vao rera vo tauvaaro vereopa vovou-ia vigei-ia. Eake iava? Uvare rera Oviitoaro-a ira oisoa kavikopareve rutu. Ira iavirava akukuvira rutu evara oupapeira.

<sup>7</sup> Ro-ia Jisas ira evao parikou-ia kopiiroepa. Oa iava voa rera iava revasiva parueva vigei iava vuri vovouro veraoro rutu. Oiraopavira rutu Pauto vo siraoaro riroa rutu vao oa iavirava vigei karurevora viria vo tuukearo iava. <sup>8</sup> Vo sirao-ia oa pute pievira rutu vigeipa vaterevora. Eake iava? Uvare orekerovu rutu-ia tarai rovoroepa rutu. <sup>9</sup>  $\diamond$  Iu. Uvare Pauto ora rera raga vo ruipaaro sirova utuoro vao vatau reo poeravira karekereva. Vo reo oa voari rutu tou rovova ro iava Krais Pauto vo rugoaro iava. <sup>10</sup> Oreoa-ia Pauto ovokiu reesireva vao oa-ia Krais iava orekerovu rutupa kukue purareverea varao oara rutu gurureverea vo vuvuia-ia ora vo rasitoa-ia ora rera iare. Uva eisi osa pieoro oiso ora rera vo ruipaaro sirova uturo.

<sup>11</sup> Pauto ora rera vo ruipaaro-ia vigei roporeva vo Krais vaisiaro sovara-ia, oiso ra oiso toupape, Rera voeao vigei. Uvare ora rera vo ruipaaro raga-ia oaravu rutu purapareveira. <sup>12</sup> Oiraopavira rutu, vigei vao-ia vigoa Krais-ia oisoa rari rovopavio. Ra

oearovu vigei varaaro oirao pie vovouro kekepaoro uvuipaai ra vuurapa vaisi purapaive Pautoa-ia.

<sup>13</sup> ♦ Oire uva oisi ragavira eisi osa toupaivoi visii rutu-ia. Eake iava? Uvare voari rovoa-ia oiraopa reo uvu rovotavora vao Vearo Siposipo osiposipoa iava uvuiparoi Pauto ra vigei oureve vorevira ora rera iare. Oa iava Krais-ia raritaera. Uva Pauto ora rerapa visii reesirevora visii vateoro Tugoropato Uraurato ro ira iava rovoa-ia Reo Ovoi purareva.

<sup>14</sup> ♦ Ro-ia Tugoropato Uraurato rovopatoa rutu varaopa oara oupaperea vo utupaua. Oiraopavira rutu rera-a eera ira iava uvuipavie i ra ora vigei-ia rera sovopaoro va iava oiso purapavio, O, oiraopa reo rutu vao Pauto vaaro oa tavitavipapeira varao rutu iava oara vatereverea Pauto vigei ouoro ora rera iare. Uva vearovira rutu Pauto, uvare rei vaisitoa rutu-a vii.

#### *Pol Variriroepa Pautoa Iare Oiso Ra Efesas-pa Irarapa Taraia Vatereve*

<sup>15-16</sup> Vo voki-a vao oa-ia visii iava uvu rovooro variripaoro rovoraera Pautoa iare visii iavirava rera-ia vearo vaisi puraoro. Ari ita, evo voki-ia visii-ia tarai rovoraepa rovovira rutu, vo osa Jisas Krais oirao piepatavora ro vigei Turaroaro. Oa iava eva oisoa oearovupa siraopata voearo Pauto voearo. <sup>17</sup> Oisi-a eisi osa rugoopao Pauto akepaaveira ro Jisas Krais Turaro Aitearo ro ira kerariava toupareveira, ira arepaaveira visiipa, oiso ra visiipa Tugoropato Uraurato vatepareve. Auere ra va iava vearovira rutu Pautoa-ia taraipata. <sup>18</sup> ♦ Ira arepaaveira oiso ra visii varaaro rugorugooara karureve aviavia ariarava rera vaaro. Eva-a oa iava uvuipatai ra vovio utupaua roroiovira rutu varao keketa oara karekerevere varao oarare tuepataveira. Aue vituaro iava uvare visii ourevora ora rera iare. Oiraopavira rutu oiso osa va vao Reo Ovoi oa purareva Pauto, oiso ra rera voearo rutu viraako iraoreve rutu vo utupa voki-ia. Uva va-a eva riroa rutu viraakoa oa eveitavere rara. <sup>19</sup> Ari ita, vo vokio tapo rera vo goruaro riro varivarivira rutu kovopaveira vigei tauvapaoro vao vigoa rera oirao piepapeira. Eisi osa iava uvuipatai ra varao-ia riropara rera varaaro taraipata aviavi pievira rutu. <sup>20</sup> Uva vo gorua-a eva oa vaova areiipaiveira ogorua iava Krais vorevira tore piereva kopiia iava rera pau piesa vo ora rera vaaro-ia oirapapa varata vo Pauto vo uruiaro-ia vo vuvuua-ia. <sup>21</sup> ♦ Oa iava voa toupaoro oearovu rutu-ia reipa irara putepareveira oiso-ia, gavmanpa reipa irara-a voeo, ari turaro irara-a voeo, ora voeo tapo pau tugara irara ora enselpa irara oea reipaai vo vokio ora vo utupaua. Ari ita, oea rutu-ia evoea pute iraopareveira rera raga ro-ia Krais. <sup>22</sup> ♦ Oiraopavira rutu Pauto orekerovu rutu tovoreva vo Krais tasiaro reroaro, oiso ra varapa kukue purapareve vigeipa lotupa irara vigoa rera iava varauava ovoovovira toupapeira. <sup>23</sup> Uva voua-a varaua lotuua oua-ia ovoivira rutu toupareveira. Ira voraro rutu orekerovu rutu ovoi pie iraopareveira.

## 2

#### *Pauto Vigei Oiso Rutu Piereva, Kopii Irara Vigei, Oisore Ra Avaavaovira Krais Tapo Tootoopavio*

<sup>1</sup> Ari ita, voari tuariri rutu uva oisoa oiso rutu toupata osa kopii irara. Eake iava? Uvare oisoa kaureopaoro rirovira rutu vuri vovouro purapata. <sup>2</sup> Uva vo vuuta-a eva oa-ia toupaoro oisoa vo rasio vo pitupituroaro ragapa ruipapata. Oa iava Seten vo pitupituroaro raga oisoa purapata, ro ira tugara kare rutupa turaroparoveira. Ira kovopareveira vo voeo sopaaro-ia oea Pautoa-va ora kaureopaaveira. <sup>3</sup> ♦ Oiraopavira rutu ita oiso osa vigei tapo piepapeira vo ora vigei raga vo ruiparoaro sirova utupaoro. Ari ita, varao-ia vuri vovouro oara puraepa voari tuariri oara varaura vo ruiparoaro-ia karekeepa ora vo tapo vigei vo rugorugooroaro-ia. Uva oisi-a eisi osa pieepa, oa iava tutuu pie ragava Pautoa-pa, oiso ra vigei varaaro vuriara voriaro vatereve vigeipa oiso osa oearovu oirara oisoa piepareve.

<sup>4</sup> ♦ Vo osa rirovira rutu siraopaoro vigeipa rera vaaro riroa sirao rutu vatereva vigeipa. <sup>5</sup> Oire uva-a va eva oa vituaro iava avaavaovira vigei rutu tootoo piereva Krais tapo, vigoa

---

❖ 1:13: Jo 16:7-11; Kl 1:5; Ef 4:30 ❖ 1:14: 2 Ko 1:22 ❖ 1:18: Ap 26:18; Ef 6:10 ❖ 1:21: Fl 2:9-10 ❖ 1:22: Ef 4:15 ❖ 2:3: Ga 5:16-17; Ro 2:14 ❖ 2:4: Ro 10:12; Sam 103:1-14

oisoa oiso rutu toupape, Kopii irara aue-ia vuri vovou. Oiraopavira rutu uvare Pautoa-re riroepa rutu vao vereopa vovou. Oa iava vorevira ora rera iare vigei oureva vigeipa siraoro. <sup>6</sup> ♦ Uva vigei vorevira tore pieparevora, uvare vigei tavosireva Krais tapo. Uva oisi-a eisi osa ragavira ovoovovira toupaoro Krais Jisas tapo vuvuiua-ia turarovira toupapeira. <sup>7</sup> Oire vigei oiso piererva. Oa vituaro iava oearovu vo utupa vuutaro-ia uvuipaai ra vigeiva vurapaoro Pauto vo vatearo vao sirao vate eveipaive vo vigei-ia vo osa Krais Jisas-va ora tavosipavio. Vo sirao-ia oa oaravu rutu-ia pute iraopaiveira. <sup>8</sup> Oa-ia Pauto akukuvira rutu vigei vorevira ourevera ora rera iare vo vigei varaaro sirova oirao pie vovouro. Oire uva apeisi-a? E vigei raga vo kovoaro riaaro iava oiso toupapeira? Viapau rutu. Ari vao raga-a akuku vate Pauto vaaro. <sup>9</sup> ♦ Uva viapau rutu uvuipavioveira ora vigei raga-ia vuurapa vaisi purapape. Eake iava? Uvare viapau oiso vigei vo kovoaro-a. <sup>10</sup> Iu, uvare Pauto raga kataito vigei pura rovorevoiva, vigeipa Airepa Tootoo vatereva ro-ia Jisas Krais. Oiraopavira rutu uvare vao rutupa oisoa ruipaparo, vo osa vearovira rutu toupape oearovivu tauvapaoro, uvare tuariri vo vovou reesi rovoreva vigeipa oearovivupa siraopasa.

#### *Krais Vo Sararei Takuvureva Oa Iava Kataia Purava*

<sup>11</sup> Oire ra opeita vaore ovaupata osa Jiu-pa irara voeao rakari verapa irara oisoa visii vaisipaise oiso, Vuivuipa irara visii oea-ia viapau reesia vai toupaveira. Iu. Uva ora visiire rugoopata, Vigei-a Jentael-pa irara vigoa ratau kavaueipa. <sup>12</sup> Ora oiso tapo rugoopata, Vo vuuta-a eva oa-ia Krais-pa oisoa toko pievira toupaio, uvare igei rutu-a vao-ia tauaipa irara raga aapaapau irara voeao Pauto voeao Jiu. Ari ita, voeapa evoea Jiu Reo Ovoi purareva osa sopapavira oisoa toupata vaopa Reo Ovoi. Oa iava viapau uvuipataera ra oaravu avu vai oupata Pauto ruvara-ia. Otoua-a eva visii vaaro oa-ia oisoa Pautoa-pa rorukovira rutu oisoa toupata. Eva-a oa iava oisoa viapau oaravu avu vaire tuepata varao vova Pauto. <sup>13</sup> ♦ Ari ita, voari tuariri tauaivira rutu oisoa toupata, ovusa vo vokio-ia Krais Jisas-va ora tavosipaoro uvui iraopatai ra Pauto iare tutuu piepata. Oa vituaro iava uvuipatai ra oiso pieta, uvare vigeipa kopiiroepa Krais ora rera iava revasiva petoro. <sup>14</sup> ♦ Rera raga-a ira Jiu-pa irararei ora ratau tou irara takuvureva. Oa iava ora agiagiae, uvare rera vo kopiiaro-ia vigei ariarava kovokovo tokoreva. Oa-a vao oa-ia ora vigeiva keripa pitupitu opesi pie ovoireva. <sup>15-16</sup> Uva evao parikou-ia kopiiro Jiu varaaro reo goruro opesi piererva varao oara-ia oisoa oiso visii vaisipaise, Aapaapau irara. Uva oiso osa pieoro voearei iava airepa sara roro piererva ora rera-ia voeao tavosioro. Eisi osa iava gavaure vovou-ia kataivira toupapeira, uvare Pauto tapo ora agiagipavioveira. Iu, uva oiso osa kataivira toueiva, vigei vaaro keripa vovou opesiepa vao-ia evao parikou. <sup>17</sup> Oiraopavira Krais pouro viropa Vearo Siposipo iava siposipopo aue iava gavaurea aviavi pievira. Uva va-a vao osa va purareva visiipa ratau tou irara visiigoa oisoa Pauto-pa tauaivira rutu toupata. Ora igei tapopa vao-ia Jiu-pa irara igoa oisoa rera-ia taripaoro rera ruvara-ia toupaio. <sup>18</sup> ♦ Iu, Jisas Krais vo kovoaro-a vao vituaro rutu oiso-ia, oa-ia uvuipavie vigei Jiu-pa irara ora visii ratau tou irara ra aite Pauto osireiaro iare koatavio, vo ovusa Tugoropato Uaurato vigei rutu tauvapareve.

<sup>19</sup> Visii vao-ia ratau tou irara, viapau oiso vorerivira ratau tou irara-a visii. Ora viapau oiso aapaapau irara-a visii. Viapau rutu. Eake iava? Uvare visii-a ora igei Pauto voeao katai irara rutu. Aue iava uvare vigei rutu-a Pauto ovii iraraaro. <sup>20</sup> ♦ Oire voeao-ia profet irara ora voeao aposel irara oearea rutu-a tuutara. Oa iava voeao riara-ia torepaveira oiso toupaoro. Ari ita, Krais Jisas-a eera rovopatoa rutu Tuutato. Oiso osa vo tuutao oa tovo rovopaveira aveke tuuta vo osa kepa-ia pau vovouave. <sup>21</sup> Oire eera kukuuvu tuuta Jisas ira-ia vigei rutu uvuipavioveira ra rera raga-ia ora takuvupavio, ra riropape kovapaoro vo osa vearo pitupituro purapape. Oa iava uvuipavie ra oiso rutu toupape osa rera vo kepaaro Tugoropa Kepa vao oa-ia viapau vuria vaiei. <sup>22</sup> Uva visii tapo visiigoa uvuipatai ra rera raga-ia tavosivira toupata oearovivu tapo voeao oirao pie vovou irara. Éva-a oa vituaro rutu iava Pauto vo kepa paureve rera vo kepaaro. Visii rutu-ia vo kepaao oa sovara-ia toupareveira urauravira Tugoropato.

---

♦ 2:6: Ef 1:20   ♦ 2:9: Ro 3:20, 28; 2 Ti 1:9   ♦ 2:13: Hi 10:19-25   ♦ 2:14: Kl 3:15; 1 Ko 12:13   ♦ 2:18: Ef 3:12; 1 Ko 12:13   ♦ 2:20: 1 Ko 3:9-11; 1 Pi 2:6-8

## 3

*Pol Vo Kovoaro Voeaopa Siposipopasa Ratau Tou Irara*

<sup>1</sup> ♦ Ragai-a Pol Jisas Krais kovopatoaaro ragoa vo toupaavoi tuukepa kepa-ia, uvare visii iava tapo siposipopaa veira oiso, Vigei rutu-a katai irara rutu. <sup>2</sup> Vao vai-ia pasi taraipataveira oiso osa Pauto ragai tauvaoro ragai vaterева vo kovo-ia, oisore ra visii tauvaa. Iu, vao-ia taraipatai ora oavu-ia tapo vao. <sup>3</sup> Vo osa Pauto ora rera vo vovouaro karekerevea ragaipa, oiso ra va-ia taraira. [Ari ita, gare visivi va iava siposipoavora visiipa oavu-ia rigatoa ragai vaaro]. <sup>4</sup> Evo rigato oa vieipaoro uvuipatai ra va iava ragai-ia taraipaoro oiso purapata, “Akoea, Pol roroiovira rutu taraiparoveira varao-ia oara Krais iava vatauvira toupaiveira.” <sup>5</sup> Ari ita, voari tuariri uva oisoa Pauto vo vovouaro vatauvira rutu tou rovopaise. Oa iava rera voeaaro viapau oisoa va-ia taraipaave. Uva vo vokio Pauto ora rera vo reoreoaro aue-ia Tugoropato Uraurato karekerevorao ora rera voeareiaropa voeao aposel irara ora voeao profet irara, oearea roroio sopavira rutu oisoa toupaive. <sup>6</sup> ♦ Vo reo-a oreoa oisoa vataupape oa oiso oisoa purapape, “Voeao ratau tou irara oea orekerovu rutu ouiverea Pauto ruvara-ia oiso osa voeao Jiu-pa irara. Vao oa vituaro-a vao-ia Vearo Siposipo, oa iava vigei rutu oiso toupai, Katai irara. Uvare oiraopa rutu-a vao Reo Ovoi oa purareva Pauto Krais Jisas iava vigei rutupa.

<sup>7</sup> Ari ita, Pauto vo kovo vaterева ragaipa, oiso ra oearovu rutupa siposipopaa Vearo Siposipo iava. Oa iava ragai tauvapareveira rera raga vo goruaro-ia, oisore ra torevokovira rutu rera vo kovoaro purapaa. <sup>8</sup> ♦ Oiraopavira rutu uvare oirara rutu voeao Pauto voeao oea ragai-ia putepaiveira. Eake iava? Uvare akaipatoavi rutu-a ragai. Ari ragai raga roporevorao Pauto, oiso ra Vearo Siposipo kaea voeaopa ratau tou irara. Osiposipoa varao iava Krais varaaro vearovara oara viapau uvuipatai oiso ra vara vieipata, uvare viapau oiso vara iava rekasia vaiei. <sup>9</sup> Ora vao tapo osa oisore ragai reesireva, ra voeapa Pauto vo vovouaro aviavi piepaa va kosi piepaoro roroiovira rutu. Auere ra va iava oirara rutu vearovira taraipaave oisi vo vovou kovoaro iava, ora rera-ia tapo Pauto. Vao iava osa orekerovu rutu pura rovoreva voari rovoa-ia, uva vao tapo vatau vovou pura rovoreva. <sup>10</sup> ♦ Uva oisi-a eisi osa pie rovoreva voari tuariri. Oa iava voeao reipa irara ensel ora oearovu oea vuvuiua-ia toupaiveira tokipaoro rera vo taraiaro eveipaveira, vo osa rera varaaro otarairovutu kareke piepaveira voeao lotupa irara ora takuvupaoro kataivira. <sup>11</sup> Oa-a vao-ia oa purareva ro-ia Jisas Krais vigei reraaro Turaro vo rasio iare rera sipooro. Uva va purareva Pauto ora rera raga vo vovouaro sirova utuoro, ovovouva oisoa toupareve vo osa vo rasio pura asavira touva. <sup>12</sup> ♦ Ari ita, uva uvuipavieie ra ora vigei-ia Jisas tavosipaoro rera oirao piepape. Eva-a oa iava uvuipavieie rutu ra tuuvu vovouvira rutu Pauto iare tutuu piepape rera osireiaro iare. <sup>13</sup> Va-a eva vituaro iava ragai oiso visii tavipaavoi, Viapau uvuipatai ra ragai vaaro tavaka kekepaoro visii varaaro oirao pie vovouro raverave piepata. Ari ita, vuria oupaavoi visii tauvapaoro. Eva-a oa vituaro iava uvuipatai ra varaata vovouvira rutu toupata.

*Vo Toupai Krais Vo Siraoaro Java*

<sup>14</sup> Oire uva Pauto vo ruipaaro taraipaoro variria purapaavoi taku viropaoro Aite oaa iare. <sup>15</sup> Ira ruvara-ia oiraopa vaisi rutu oupapeira vigei ora voeao oea vuvuiua-ia toupaiveira. <sup>16</sup> ♦ Ira-a ro-ia Pauto ira arepaavoi, oisore ra visiipa tupetupereovira rutu Tugoropato Uraurato vatereve vao iava keraria oa viapau opesia vai, oisore ra rera iavirava visii varaaro oirao pie vovouro goru pie iraoreve. <sup>17</sup> Ora vaore tapo variripara oiso ra Krais visii sopaaro-ia tootooparo, vo rara rera oirao piepata rutu. Uva toupaoro evoa rera vo siraoaro uvuipai ra karekepe. Oa vituaro iava eva uvuipatai ra goruvira toreta oiso osa evaoara, oara rasitoa-ia ikoara roko piepaoro goruvira rutu riropavira torepapeira. <sup>18</sup> ♦ Ora oiso variripara ra visii rutu-a vao ora voeao Pauto voeao visiigoa rutu uvuipatai ra Krais vo vovouaro sirao vovou roroiovira eveipata rutu. Ovovouva oiso rutu toupaiveira oiso, vo parakaaro-a vao, ari va kaekaearo-a vao, ari va torearo-a vao,

♦ 3:1: Kl 1:24-29    ♦ 3:6: Ro 9:24-33    ♦ 3:8: 1 Ti 1:12-15    ♦ 3:10: 1 Pi 1:12; 1 Ko 2:7    ♦ 3:12: Hi 4:16  
♦ 3:16: Fl 4:19    ♦ 3:18: Ef 1:18; Jop 11:8-9

ora va rokoaro-a vao. <sup>19</sup>◊ Uva eisi osa ragavira uvuipaoro uvuipatai ra vo sirao uvuiaro-ia taraita. Ari oiraopavira rutu uvare viapau oiso irai uvuiparoi ra rera vo siraoaro rekasiaro rutu-ia taraiparo. Uva eisi toupaoro Pauto visii sopaaro-ia uvuipa ra visii vuku piepareve rutu ora rera raga-ia.

<sup>20</sup> Oire uva Pauto ora rera vo goruaro vituaro karekepareveira vigei sopaaro-ia. Eva oa vigei vo areroaro-ia ora vigei vo rugorugooroaro-ia pute pievira okovorovu rutu purapaiveira. <sup>21</sup>◊ Uva va-a vao oa iava vuurapa vaisi purapapeira Pautoa-pa. Uvare evara oirao piepareveira rera vo goruroaro ora rera vo siraoaro vo lotua sovara-ia ora vo Krais Jisas tapo-ia. Ari ita, vokiara rutu-ia rera vaisiaro kae piepapeira rutu opesi asavira. Eisi ovoiei.

## 4

*Vigei-a Vao Kristen Irara Krais Iava Varaua*

<sup>1</sup>◊ Ragai vo-ia tuukepa kepa-ia toupaavoi, uvare Turaro kovopatoaaro-a ragai. Ragoa oiso goruvira visii tavipaavoi, Pauto visii keerarevoiva, visii-ia uvuia purarevorao, oisore ra vearovira tootoopaoro vo uvui-ia rekasisata. <sup>2</sup>◊ Uva oisi-a eisi osa toupaoro uvuipatai ra gavaurevira rutu toupata vo ora visii raga iava vaisiara vara piepaoro. Ra opeita kasipu vovoou purapata. Ari uvui iraopatai ra visii iava sirao vovou rutu kosi piepata oearovivu tauvapaoro. <sup>3</sup> Vo vovoou rutu pura iraopata oa purapareveira Tugoropato Uraurato visii-ia, oiso ra kataivira rutu tou iraopata. Oire ra oisi vo vovoou sovopaoro ora visii-ia gavaurevira rutu tou iraopata. <sup>4</sup> Kataivira rutu tou iraopata oiso osa kataiua varaua. Ora vao tapo uvare kataito-a Uraurato vigei reraaro. Ora oiso osa vaeavira rutu visii ruture keeraroepa Pauto, oisore ra oisi raga ita vaeavira raga orekerovu ruture tuepata varao oupasa rera vaaro iava keraria. <sup>5</sup>◊ Uvare kataitoa raga vigei reraaro Turaro. Ra rera-ia kataia raga oirao pie vovoou purapape. Ora vao tapo kataia rutu baptaisa oa-ia uvuipavie i ra ora reesipavio va oupaoro. <sup>6</sup> Ari ita, uvare kataitoa rutu-a Pauto ira oiso toupareveira, Oirara rutu Aitearo. Rera raga reiparoveira vigei rutupa. Ira rera vo goruaro vigeipa katakataivira vatepareveira, oisore ra rera vo kovoaro purapape. Ora oiso tapo osa katakataivira vigei iava sopaura-ia toupareveira.

<sup>7</sup> Vigei rutu vao-ia vigoa voari tuariri pisavira rutu vatevatea oeapa Krais ruvara-ia, vo osa vigei rutupa katakataivira vara vaterева ora rera vo ruipaaro sirova. <sup>8</sup>◊ Vo Tugoropata Vuku-ia oiso purapapeira,

‘Vo osa tuukepa irara tapo iparoepa viara-ia ruture, oa iava vatevateara voeapa vatareva oirara.’

<sup>9</sup> Oire uva aa vao-a vao vo reo vituaro vao-ia vo osa iparoepa voea tapo? Vao-ia oa vituaro vo osa rasito sovara-ia roko rovoreva. <sup>10</sup>◊ Uva voava toreoro vuvuiua-ia puteoro iparoepa rutu. Oire uva vo rekasiro ora rera vo tavukiroaro rutu uvui piecreva vara agasi pieoro rutu ora rera-ia. <sup>11</sup>◊ Ari ita, uvare rera raga ira vara rutu vatevateara vaterева oirara rutupa oiso-ia, oearovu-a voeao oea roporeva aposel kovo purapasa. Ari voeao profet irara oea roporeva, oisore ra rera vo reoaro vatevateive oirara rutupa. Ari voeao oea roporeva Vearo Siposipo iava siposiposa va uvarovu ruture sikasikaoro, oea vaisipaiveira oiso, evanselis. Ari voeao oea roporeva, oisore ra rera vo reoaro iava oirara rutu tarai piepaive voea tauvapaoro, oea vaisipaiveira oiso, pasta irara voeao raga ita tisa irara. <sup>12</sup>◊ Oire uva eakere vo vatevatearo vatepareveira voeao oirara? Oa vituaro-a vao-ia oiso toupareveira, ra va iava oisi rutu uvuipaoro goruvira rera vo kovoaro purapave lotupa irara. Ra va iava vigei goruvira rutu torepe, uvare vigei-a vao Krais iava varaua lotuua. <sup>13</sup> Eisi osa iava uvuipavie vigei rutu, ra katai rugoo raga-ia vao oirao piepa pitupitu ora takuvupavio Pauto Oviitoaarore rugooapaoro Krais. Eisi osa iava uvuipavie ra oiso rutu pura uvirovio kakae vure rirooro vo rekasisa Krais vo uvuiaro-ia. Ra va iava rera iavirava uvuivira rutu toupape Krais. <sup>14</sup>◊ Oire ra voava veu kakaero vo rugooaro kavupe rirooro. Eake iava? Uvare vo kakaero evara vo rugooaro viripaiveira

◊ 3:19: Kl 2:10; Ef 1:23   ◊ 4:1: 1 Te 2:12   ◊ 4:5: 1 Ko 12:12-13, 15:1-8   ◊ 4:8: Sam 68:17-19   ◊ 4:11: 1 Ko 12:8-28; Ro 12:3-8

ora tavaripaoro oiso rutu osa kiuvu ira voraro rutu avaparoveira, ora oiso osa toru kouro. Ari ita, uvare vuri irara voeao piro piepaiveira kuuvu reoro vatepaoro voeapa oea veuvira rugorugoopaaveira, oisore ra voeao vo vovouaro sirova utupaave. <sup>15-16</sup> Ari vigei oearovupa siraopaoro oiraopa reoro rutu-ia uvui iraopavie ra voeao vatepape. Eisi osa iava uvuipavie ra rirovio vo rekasisa Krais vo uvuiaro rutu-ia okovorovu rutu purapaoro. Uva vigei-a Krais iava varaua. Oa iava rera-a vigei kukuearo. Ra va iava vigei vao pisa irara ora takuvupavio rutu. Ra va iava rera vo goruaro oupape vao vova Krais vo tootooaro goruaro-ia. Oire ra va oupaoro rera tapo tavosivira rutu riropavio, vo rara torevokovira rutu rera vaaro purapape. Uva oisi-a eisi osa iava voua varaua uvuipai ra riropape vao-ia lotuua. Eake iava? Uvare lotuua varaua vituaro rutu vao-ia siraopa vovou.

### *Airepa Tootoo Toupaiveira Krais Raga-ia*

<sup>17</sup> Oire uva Turaro Krais vaisiaro-ia goruvira rutu oiso visii tavipaavoi, Opeita ora tou pie ragapata oiso rutu rorovira osa voeao ratau tou irara oea-ia viapau rari vovoua vai toupaive. Uva voeao vo rugorugooroaro agasipapeira rutu aue-ia kokoropa vovouro raga. <sup>18</sup> Uvare voeao vo rugorugooroaro-a oara rupavira rutu toupaiveira. Viapau oiso voeao iava rugorugooara karupa piroveira, oisore ra Pauto vo tootooaro oupave. Uvare oiraopavira rutu riitako vovou irara rutu-a voeao-ia vaaruu vovou irara. <sup>19</sup> ♦ Ari ita, viapau rutu oiso ora voeao vaaro ariia sovopaveira, vo osa ora voeao vo vovouaro vuriara purapave. Aue iava uvare ora voeao iava vaseiva, oiso ra ora voeao vo pitupituro raga sirova utupaave orekerovu rutu vuriara purapaoro arii asavira, varao oara-ia ora voeao iava varaura agasi piepaiveira touvira rutu.

<sup>20</sup> Opeita evo pitupituro vuriara purapata, uvare viapau oiso vo tarai-a eva oa outavora vo Krais ruvara-ia oiso ra vara purapata. <sup>21</sup> Uvare vo osa Krais-ia taraia ou rovotavora, uva viapau oiso vuri pitupituro purapasa vo tarai eva outavora. <sup>22</sup> Oire tuariripa vovouro kavu iraota, rara varao vuri vovouro ora visii iava verata oara iava visii iava varaura oavisii agasipapeira. Varao oara visii keakeapaiveira, oisore ra vuri pitupituro purapata ora visii vo vovouaro raga sirova utupaoro. <sup>23</sup> Vosa eisi pieoro visii vo rugorugooroaro tavarota, ra va iava visii iava sopaura airepavira rutu karekepe ora tavarioro. <sup>24</sup> ♦ Vao-ia Airepa Tootoo sisigaruea rutu, oa-ia viapau vuria vaiei. Oa ora visii-ia tovo iraota oiso rutu osa airepa varoa sisigaruea. Pauto otootooa purareva oiso osa rera vo tootooaro.

<sup>25</sup> ♦ Opeita touvira raga kuuvu reoro purapata. Ari oiraopavira rutu araoko irara oavisiiva ora reoreopata. Uvare vigei rutu takuvuvira toupapeira oiso rutu, Vigei-a kataiu varaua Krais iava. <sup>26</sup> Oire vosa kasipupata, ra viapau vava vuria purapata. Ikauvira raga oiso vo vovou opesi pie ovoita. Teapi vo kasipure vokipe, vo osa touvira kasipupata. <sup>27</sup> ♦ Oa vituaro oiso toupai vao-ia, Vosa oisi touvira kasipupata, ra va-ia ora visii iava sopaura iava vasepata, ra Seten visii sopapro-ia koatapro vuri pitupituro karekepasa. <sup>28</sup> Oire vosa irai oiratoa vai orekerovu avu vai kavirupareve, ira-a eera uvui iraoparoi ra vo pitupitu eva kavu iraoreve. Oa iava uvuiparoi ra torevokovira ora rera vaaro-ia kovoa pitureve. Oa iava uvuiparoi ra rera vaaro voria oureve. Ra va iava oearovivu tauvapareve voearo apota irararovi. <sup>29</sup> ♦ Opeita vuri reoro kosi piepata ora visii gisipoaro iava. Ari uvuipatai ra vo reoro raga vearo reoro purapata. Oara iava oearovivu uvuipaii ra tauva oupave visii ruvara-ia voeao raverave vovou irara. <sup>30</sup> Ora opeita Pauto reraaro Tugoropato Uaurato vavata piepata orekerovu-ia vuriara oavisi. Eake iava? Uvare vo reesia-a eva oa oirao piepareveira, oa iava Pauto visii eveireverevo voari Ovoiopa Voki rutu-ia. Vo vokio oa-ia ora rera iare Pauto visii oureverevo. <sup>31</sup> Evara rutu vuriara oara ora visii iava vera iraota oiso-ia, kasipua vao-ia, ari aveavea vao-ia, ari oearovu togapa vao-ia kasipu reoro-ia. Ora aue tapo ora vovouaro raga iare kasipupaoro, ari ikaupa vavae viki. <sup>32</sup> Evara ovovouroa tavaripaoro vearovapata rutu pura iraopata oiso-ia, oearovivu tauvapata voearopa siraopaoro, ora voearo iava vuriara verapata oiso osa Pauto visii iava vuriara oavisi verarevora Krais-ia, uvare Krais voearo-a visii oirara.

♦ 4:19: Ro 1:24-32    ♦ 4:24: 2 Ko 5:17    ♦ 4:25: Sek 8:16-17    ♦ 4:27: Je 4:7    ♦ 4:29: Mt 12:34-35

*Vigei Uvui Iraopavieie Ra Voka Iraopape Aviavia-ia*

<sup>1</sup> ✦ Visii rutu-a Pauto ovii iraraviaro. Eva-a oa iava uvuipatai ra rera vo pitupituaro vioepaoro oisi pieta, oiso rutu osa ovii kakaero aite irara vo pitupituroaro vioepaoro vara sirova utupaaveira. <sup>2</sup> Ovoivira rutu sirao vukurova toupata vo oearovivupa siraopaoro. Vo osa oisi eisi piepaoro Krais vaaro sirova ovoovovira oiso utupata. Uvare vigeipa siraooro ora rera iava vassereva. Oa-ia ora rera-ia tauoa purareva. Oa iava Pauto vo tauo vearovira utuuvaaro geesireva va-ia rorupaoro rutu.

<sup>3</sup> Ra opeita ora visiiva otopa pitupituro purapata, ora varao vuri rugooro, ora opeita oearovu varaaro riiriipata vara oupasa ora visiipa. Viapau rutu uvuipatai ra oisi eisi piepata. Ora aue tapo opeita oaravu-ia vuri reoro ora reopata vara purapasa. <sup>4</sup> Ora tapo oiso-ia, opeita ora visiire vuri reoro purapata varao vuivuipa reoro, oreoroa-ia oearovu kovata piepataveira. Viapau. Ari uvuipatai ra Pauto vaarore rugoopaoro rutu rera-ia vuurapa vaisi pura iraopata. <sup>5</sup> Oire vearovira varao-ia tarai iraopata oiso-ia, Ro ira otoparo, ora ro ira vuri rugooro purapareve, ora ro ira oearovu varaaro riiriipareve, eera-a ira viapau uvuiparoi ra Krais vaio ora Pauto vo Saraaro iare koataro rera vo voriaro ousa. [Oa vao riiriipa pitupitu porearo oa-ia Pauto tovopareveira utupaua, rara varao raga vo touara vo rasio-ia ira piepareve. Oiso rutu osa ro ira tokarasiara raga oirao piepareveira Pauto tovopaoro rutu utupaua.]

<sup>6</sup> ✦ Ora opeita iravupa ora visii iava vasepata, oiso ra visii keareve visii tavipaoro, "Viapau oavu avu vai. Ari uvuipatai vo pitupituro purapasa." Oire teapi rera vo reoaro uvuta, uvare oiraopavira rutu evo pitupituro sirova Pauto vo kasipuaro karekeperea voeao oea rerava ora kaureopaaveira rutu. <sup>7</sup> ✦ Eva oa vituaro iava visii tavipaa, Opeita voea tapo evoea ora tavosipata. <sup>8</sup> Eake iava? Uvare tuaririvi rupa vovou-ia toupatavora. Uva vo vokio-ia visii rutu-a vao Turaro vaaro-ia aviavia toupatavoi. Eva-a oa vituaro iava uvui iraopatai ra oiso rutu tou iraopata osa voeao oirara oea aviavia sovara-ia toupaiveira. <sup>9</sup> Vo aviavio oa vearo vovou ora torevoko vovouro rutu kareke piepaiveira. Uva vo vovouro-a evara oara-ia uvuipatai ra vara pura iraota. <sup>10</sup> Vo rara orekerovu rutu akeake iraopaoro vara purapata, ra va iava oaravu ora visii-ia sovopata vara eveipaoro oiso, O, ari Turaro roruparevoi rutu va-ia oa puraei. <sup>11</sup> Opeita varao orekerovu purapata oara purapaiveira oearovu oara kuearo vurivira karekepapeira. Evara-a oara purapaiveira vo rupa vovou-ia. Ari visii uvuipatai ra evara vuriara oaiive viaevira kareke pie iraopata vore aviavia-ia. <sup>12</sup> Vo vovouro vuriara oara ariaa kareke piepaiveira, vo rara vara-ia ora reopata varao oara vatauvira purapaiveira. <sup>13</sup> Vosa vara evara vatau vovouro kosi pie rovopape vore aviavia-ia, ra va iava utupavira oiraopavira rutu vara vituaro karekepape. Aue iava uvare varao oara vatauvira toupaiveira oara viaevira karekepere vo osa aviavia vara-ia rorove. <sup>14</sup> ✦ Eva-a oa vituaro iava oiso purapai, 'Eraou vii viigoa uusipau. Ora vorevira toreu vii kopito. Osa iava Krais vo aviaviaro uvuipai ra vii-ia rorove.'

<sup>15</sup> Ora vatatopo iraopata. Goruvira rutu voka iraota. Teapi koveta. Ra visii vo vokaroaro oiso rutu pie iraota osa voeao vararo riro tarai irara. Ra opeita oiso piepata osa voeao vaaruu vovou irara. <sup>16</sup> ✦ Teapi visii vo vuutaroaro ropi ragapata. Ari vokiara rutu-ia vearo kovoro raga purapata, uvare vuriara toupaivoi vo vokiro-ia. <sup>17</sup> Ra opeita oiso raga toupata osa voeao vaaruu vovou irara. Viapau. Ari vo osa Pauto vo vovouroaropa ruipapaoro oisi vo vovou sirova ututa.

<sup>18</sup> ✦ Ora opeita goruara-ia uukoara ukaiopata ora kokoro piepaoro. Viapau. Vosa eisi raga piepaoro uvuipatai ra visii raga ora opesi pieta vai pasi. Ari uvuipatai ra Tugoropato Uaurato iare ora visii iava vaseta. Ra va iava rera iava ovoivira rutu toutes. <sup>19</sup> Vo rara ro iavirava Turaro ora visii raga ora reoreopata, vo ora visii raga ora varaata piepaoro vo reo sirovava oa toupai vo Sam ora vo erava-ia uva toupai Tugoropa reoro. Oire vo osa oiso eisi piepaoro ora visii sopaaaro-ia Turaro vaisiaro kae pie iraopata. <sup>20</sup> Ra vokiara rutu-ia vearo

✧ 5:1: Lu 6:36    ✧ 5:6: Jer 29:8; Ro 1:18    ✧ 5:7: 1 Ti 5:22    ✧ 5:14: Ais 60:1; Jo 5:25    ✧ 5:16: Kl 4:2-6  
✧ 5:18: Pro 23:29-35

vaisi pura iraopata orekerovu rutu iavirava rera-ia ro Pauto vigei Aitearo, ro vaisiaro-ia Turaro vigei reraaro Jisas Krais.

*Ora Oupa Pitupitu Iava Vao Oirara Ora Riakora*

<sup>21</sup> Oire visii vao oiso ora piepata, ra oearovivu reroaro toupata. Oisi-a iava eisi uvuipatai ra Krais vaisiaropa avivikevira toupata.

<sup>22</sup> Riakora visiigoa vatua irara oavisii reroarovi toupata voea vo reoroaro uvupaoro. Osa ragavira eisi piepaoro uvuipatai ra Turaro Jisas reroarovi ora tovopata. <sup>23</sup> ♦ Oiso ragavira osa ro ira vatuavaaro tokipareve, eisi osa ragavira Krais oirara rutu tokipareveira, voeao lotupa irara oea oiso toupaiveira, Rera iava vavaeara, ora rera iava kokotoara, ora varaua, uvare voea rutupa oiso toupareveira, Voea Kae Piepatoaaro. <sup>24</sup> ♦ Eva vituaro iava va vao lotua Krais vo reoaro sirova utupapeira. Oire uva visii riakora uvuipatai ra vatua irara oavisii vo reoroaro sirova vearovira rutu utupata ita.

<sup>25</sup> ♦ Ra visii vatua irara riakora oavisiipa vearovira rutu sirao iraopata oiso osa Krais lotupa irarapa sirao iraoparoveira. Uvare voeapa siraoro ora rera iava vasereva, oisore ra kopiro voeapa. <sup>26</sup> Osa eisi piereva Krais Pauto iare oirara rookaoro. Uva oisi rutua oiso-ia osa oovoovo purareva lotupa irara sisuoro aue-ia baptais ora vao Pauto vo reoaro Tugoropa Reo. <sup>27</sup> Uva va vituaro-a vao oiso osa uvuiparoi Jisas ra ora rerapa lotupa irara vatepareve, vo rara vuurapavira rutu toupaive. Viapau vuivuiara vai voea-ia, ora viapau regorea vai voea-ia. Ari uvuipaa ra roroioviraga toupaive, uvare vara asavira oiso voea sisigarue piepareve voea sisupaoro. <sup>28</sup> Eisi osa ragavira visii vatua irara riakora oavisiipa siraopaoro vearovira rutu vairoro tokipata. Oisi rutu osa ora visii iava varaurapa siraopaoro voura vearovira tokipataveira. Uvare oiso toupai, Ro ira vatuavaaropa siraoparoveira, ira ita-a eera ora rera varaarropa siraoparoveira. <sup>29</sup> Viapau oiso iraiei ira ora irai iava varaua vaire kasipuparoveira. Viapau. Ari voua aio piepareveira vearovira voua tokipaoro. Eisi rutu osa Krais ora rera iava varaua tokipareveira vouao-ia vao-ia lotuua. <sup>30</sup> Ari ita, vigei-a vao lotupa irara vigoa oiso rutu toupapeira, Rera iava vavaeara, ora kokotoara, ora orekerovu rutu varao voua-ia vouao varaua rera vouaaro. <sup>31</sup> ♦ Uva oiso purapapeira Tugoropa Vuku, ‘Ro oirato ira aitetoarei kavuoro avaro, ra voava iriavu riakova oureve, oire ra oisi iava eisi vo rara ora ousi oiso rutu karekesi, Kataiu varaua.’

<sup>32</sup> Uva vo reoa-a vao-ia reia rutu, oa vituaro viaevira kareke piereva Krais. Uva ragaipa oiso va porearo vituaro toupaivoi, Lotupa irara rutu toupai Krais-ia kataiu raga purapao varaua rera-ia. <sup>33</sup> Ari vao porearo vituaro visii rutupa oiso toupaivoi-ia, ra ora visii vo riakoroaropa siraopata, oiso rutu osa visii vatua irara ora visiipa siraopataveira. Eva-a oa iava vairo vatua riakoro oavisii uvuipaa ra visiipa avivikevira toupaive.

## 6

*Vo Reo Aite Irara Vo Reoaro Ora Ovii Irara*

p <sup>1</sup> ♦ Oire kakae vure visii vao uvui iraopatai ra aite irara oavisii vo reoroaro uvupata, uvare Turaro visii tovoreva voea reroarovi. Osa eisi vearovapeira. <sup>2</sup> Oire avivike iraopata aitearapa ora aakoara. Eva-a rovopa rutu Reo Taisi iava, oa toupaiveira aue tapo Reo Ovoi.

<sup>3</sup> Vao Reo Ovoi oa oiso purapapeira, “Vosa eisi ragavira piepata ora visii aite iraraaropa, oire ra va iava vearovira rutu visii iava tootooara riro kaekaeviratoupaive vo rasio-ia.”

<sup>4</sup> ♦ Oire vei aitetoarei ora aakova viapau uvuipasie ra ovii irara oaesii kasipu piepasi, ra va iava oisi piepaive. Viapau. Ari oiso-a vo osa voea tokipaoro voeapa vearo raiva purapasi va-ia vearovira rutu voea siposipopaoro Turaro vo siposipoaro sirova utupaoro.

*Kovopa Irara Iava Vo Reo Ora Voea Tokipa Irara*

p <sup>5</sup> ♦ Visii vao-ia akuku kovo irara visiigoa vori asavira kovo ragapataveira, visiigoa ora visii vo kovoaro purapata voeaopa avivikepaoro oea visii tokipalveira. Oire vosa oisi eisi kovopata, ra viapau oiso orugoorovu purapata voeare. Ari uvuipatai ra voeapa

♦ 5:23: 1 Ko 11:3; Kl 1:18   ♦ 5:24: Kl 3:18   ♦ 5:25: Kl 3:19   ♦ 5:31: Jen 2:23-24; Mt 19:5; 1 Ko 6:16   ♦ 6:1:  
Eks 20:12   ♦ 6:4: Pro 22:6; Jen 18:19   ♦ 6:5: Kl 3:22; Fl 2:12

kovo ragapata oiso rutu osa Krais-pa kovo ragapataveira. <sup>6</sup> Oire ra opeita kasiraovira rutu kovopata vo vuutao raga-ia oa-ia visiiva vurapaive voeao oea visii tokipaiveira vaore rugoopaoro, ra visiire oiso purapaave, "Akoea, vearo kovoto ro-ia." Viapau. Ari visii uvuipatai ra vo vuutara rutu iava vo vokiro-ia visii vo varivariroaro tovopata vo vara-ia kovopaoro Pauto vo ruipaaro sirova. Uva eisi osa ragavira uvuipatai ra eisi varivaripata vo Krais-pa kovopaoro. <sup>7</sup> ♦ Oire ra oisi ora visii vo kovoaro purapata rerare rugorugooopaoro Turaro Krais. Oa iava uvuipatai ra rorupata. Eisi osa viapau uvuipatai oiso ra oirara ragare rugorugooopata voeao oea visii tokipaiveira. <sup>8</sup> Eva-a oa vituaro porearo rutu oiso toupai, Vo osa evara uvuiaro voriaro rutu veareopara vaterevereia visiipa Turaro Krais varao oara purapata. Eagara, vosa aa ro avuo ro ira akukuvira kovopareve, ira-ia viapau vaisia vai toupaive, ora ro ira-ia vaisia toupaive tapo, oea rutu vaeavira uvuiaro oisi pierevereia.

p <sup>9</sup> ♦ Ora visii vao-ia tokipa irara visiigoa vearo vovou iraopata voeaore visii voeaaro kovopa irara. Opeita voeare reoreopaoro voea uriri piepata. Ari vaore rugoo iraopata, uvare visii tokipato toupareveira vo vuvuua, ira reroaro toupataveira visii rutu tokipa irara ora voeao kovopa irara areiivira raga.

#### *Oirao Pie Vovou Irara Vaaro Uutupa*

p <sup>10</sup> Oire ovoiopa reo-a vao-ia oa oiso visiipa vatepaavoi, oiso ra goruvira rutu torepata Turaro Krais vo goruaro-ia. Uva oiso ruipaparai ra rera ruvara-ia vo goru outa rera tapo ora tavosioro rutu. <sup>11</sup> Ra varao-ia ora kuvupata oara visiipa vatepareveira Pauto, oiso ra vara-ia Seten asavira vara-ia ora utopata vao asavira kuuvupa pitupituro rera vararo. <sup>12</sup> ♦ Uvare viapau oiso oirara raga tapo ora upopavioveira voeao oea-ia varaua toupaiveira. Viapau. Ari voeao tapo-a uraura irara tugara oea tapo ora upopavioveira, voearo reipa irara ora turaro irara oea urauravira toupaiveira. Voeao oea vuri vovouro purapaiseira rupa vovou-ia toupaoro. Voeao oea vo viara-ia ora vo rasitoa-ia tokipaaveira. <sup>13</sup> Uva oisi-a eisi osa toupaiveira, uva uvuipatai ra Pauto vararo ora utopara outa vara-ia ora utosa. Oire vosa vo vokio oa-ia vo vuri eva karekepere, oa vokia-ia goruvira rutu virivaripaoro torepatavare. Viapau oiso ra ora visii iava sopaura iava vasepata. Uva oisi-a raga eisi osa piepaoro uvuipatai ra goruvira torepata vo tugurasa uva taru vo tatu eva opesipe.

p <sup>14</sup> ♦ Oire toreta ora virivaripaoro oiso-ia, Tuu iroro-ia takita vo ora visii kovuaro-ia, eva-a oiraopa reo rutu oa oiso rutu toupai, takipa iro. Ora vo pekerio oa-ia pitupata ora visii iava varataara oavisii utopasa. Opekeria oa oiso toupaivoi osa vao torevoko vovou oa-ia viapau vuria vaiei. <sup>15</sup> Oire ra ora visii-ia tasipara oavisii tapo tovota varao oara oiso toupai, eva-a ikaupa voka oa-ia vokapaoro uvuipatai ra Vearo Siposipo kosi piepata uvarovu rutu, vao oa gavaure vovou iava tavipai. <sup>16</sup> Vokiara rutu-ia vo pekerio kaepata viurua iare oa oiso toupai, oirao piepa vovou rutu. Oa-ia uvuipatai ra o asavira rauruva iria viriaro-ia tuituia toupaiveira ora utopata, vo kaeo oa-ia ritaparoveira Seten.

<sup>17</sup> ♦ Ora vao tapo kukuyaipa oa ora visii kukuearo-ia tovota va-ia kukuvalo, oa oiso toupaivoi osa Pauto vigei oureva ora rera iare vigei orirusa rutu. Ora vao-ia Pauto vo reoaro oriruvira pitupata, vo reo oa vatepareveira visiipa Tugoropato Uaurato. Oreoa oiso toupai osa toorio. <sup>18</sup> ♦ Oire uva oisi rutu piepaoro uvui iraopatai ra variripata vo vokiara rutu-ia, ovusa Tugoropato Uaurato vo tauvaaro-ia variriara purapata. Eva-a oa vituaro iava tuevira toupata variripasa. Ora vao tapo oiso osa Pauto voeaaropa oirara variripata voea tauvapaoro vo vokiara rutu-ia. <sup>19</sup> Ora ragaipa tapo variripataverea ra va iava Pauto ragaipa oreororu vatepareve vo osa oirarapa siposipopasa vatatopopaa. Ora vaore tapo ragai goru piepasa variripatavere ra uriri asavira Vearo Siposipo kosi piepaa vo reo poerapaoro voearopa oearovu ratau tou irara. <sup>20</sup> Ari ita, oiraopavira uvare reo kaepato-a ragai vao-ia Vearo Siposipo kosi piepaoro. Ari vo vokio-ia ragai epao vo-ia tuukepa kepa-ia. Ragaipa variripata Pautoa iare ra uriri asavira rutu Vearo Siposipo kosi piepaa, uvare ragai vo kovoaro rutu-a.

◊ 6:7: Kl 3:23    ◊ 6:9: Ap 10:34-35; Jo 13:13; Kl 3:25    ◊ 6:12: 1 Ko 9:25; Ro 8:38    ◊ 6:14: Ais 11:5, 59:17  
 ◊ 6:17: Ro 1:15-17    ◊ 6:18: 1 Te 5:17

*Pol Vearo Voki Purareva Oearovuva Oirara*

p <sup>21</sup>◊ Eera Tikikas vigei araokotoaaro, irapa kavikopavioveira. Vokiara rutu-ia igei tauvapareveira Turaro vo kovoaro purapaoro. Ira visii siposipoparevere ragai iava, auere ra vearovira taraipata ragai vo touaro iava ora varao iava oara purapaaveira vo toupaoro.

<sup>22</sup> Ira-a ro-ia ira visiipa sipopaavoi, oiso ra visiipa siposipopaoro visii vo vovouroaro varaata piepareve igei iava siposipopaoro.

p <sup>23</sup>◊ Oire ragai vo ruipaaro-a vao-ia oa-ia oiso ruipaparai ra Pauto ro vigei Aitearo ora Jisas Krais ro vigei Turaroaro, aiterea evaiterei gavaure vovou vatepasivoi, ora vao siraor vovou, ora vao oirao pie vovou rutu voeao rutupa igei araoko iraraaro oearoa Jisas-ia raripaaveira. <sup>24</sup> Oire Pauto visii rutu viraakoparevoi, visiigoa ropa Turaro oavi Jisas Krais siraor iraopaoro rerapa ruipa iraopataveira. Vo ruipao iava oa-ia viapau opesia vaiei.

p Eisivi raga ra opesipe.

p Ragai-a vao, Pol.

## FILIPAI

### Irapa Reoro Vo Vukuo Iava

Pol vo pasio rigatoreva tuukepa kepa-ia toupaoro eisi Rom aue-ia 61-63 yia Jisas vo kavauaro isivaaro iava. Pol vo vearo vaisi vore piereva vao-ia vatea oa sipoiva Filipai vata, osa vo toupareva tuukepa kepa-ia. Ora aue iava tapo voea tavireva oiso osa toupareva vo tuukepa kepa-ia. Ora aue iava tapo goruvira voea tavireva voea vovouaro goru pieoro, ra viapau uvuipaa ra voea gisipoaro uvupaive kuuvu irara tisa irara voeao oea aue iava siposipopaiveira rakari verapa pitupitu (Fl 3:2-3, 18-19).

1. Vearo vaisi purareva Pol Pautoa-ia voea-ia rugoopaoro Filipai vata, 1:1-11.
2. Pol ora rera varaaro iava taviroepa tavakara, varao oara iavirava vo raiva karu piropa oa-ia Vearo Siposipo avaepa voraro rutu, 1:12-26.
3. Reesiara iava varao oara iava uvuipaa oearovu ra Kristento eveiive, 1:27-2:18.
4. Timoti vaio ora Epafrodaitas arusa aueroepa Pol lotupa irara vo vovouroaro varaata piesa, 2:19-30.
5. Vatatopo pie reoro voeao iava keripa irara Jiu, ora aue iava variri purapa pitupitu, 3:1-4:9.
6. Pol vearo vaisi purareva Filipai vatava aueva vatevatea, 4:10-20.
7. Ovoipa reoro vatereva Pol, 4:21-23.

<sup>1</sup> ♦ Ragai-a vao Pol ora ro Timoti vegoa vo rigato puravevoi visiipa, vegei-a vao Krais kovopatoareiaro. Oa iava visii rutu vo rigato vieipatavere, visii eva lotua-ia irapa irara, ora visii rutu vao visiigoa lotua-ia ora tauvapataveira, ora visii oirao pie vovou irara evoa Filipai urui-ia. <sup>2</sup> Oire Pauto visii rutu viraakoreve vereopa vovou-ia. Ari ita, ragai visiipa Pauto arepaavoi ro vigei Aitearo, vaiterei ora Turaro Jisas Krais, oisore ra visiipa gavaure vovou vatesi.

#### *Pol Vo Variriaro Voeare Oea Rera Vo Reoaro Vieipaiive*

<sup>3</sup> Oire vosa visii ruture rugooparai, oa iava vearo vaisi purapaavoi Pautoa-ia visii iavirava. <sup>4</sup> Ora vo vuutaro-ia tapo oara-ia variriparaveira rorupaoro visii-ia. <sup>5</sup> ♦ Aue iava uvare vo vuutarore rugooparaveira oara-ia ragai tauvapatavora Pauto vo kovoaro purapaoro, vo osa visii ruvara-ia toupaavora Vearo Siposipo iava visiipa siposipopaoro. Oiraopavira uvare voari rutuva rovoa-ia ragai tauvapaoro rovotaepa. Oa iava vo vokio-ia tugurataerao oisi raga ragai tauvapaoro. <sup>6</sup> Pauto raga-a ira oisi visii piereva, oa iava oisi ragai tauvapataveira. Oiso osa raga ita Pauto vo kovo rovoreva visii-ia vo rutu tugurasa uva Krais Jisas vorevira vorerovere vo rasio iare. Eisi osa ragavira va-ia vearovira taraiparai ragai. <sup>7</sup> Rirovira rutu oisoa ragai tauvapata, oa iava oisoa ragai vo kovoaro purapaa. Vo kovo oa vatereva Pauto ragaipa vo tuukepa kepa-ia, oiso ra voa va puraa ora vo ratau vo oearovu tavitavipaoro Krais iava, vo osa voa Vearo Siposipo vituaro rutu oisoa kosi piepaa vo voeao vo reoroaro veripaoro asapapa reo pura irara, voeao riro kuuvu reoro raga pura irara. Uva va eva visii vaaro tauvaa oare rugoopaoro vearovira rutu visiire rugorugoo iraoparaveira. Eisi osa torevokopai. <sup>8</sup> Ari ita, Pauto ragai vo reoaro-ia oiraopavira rutu taraiparo vo osa oiso purapara, Visiipa rirovira rutu sirao iraoparaveira Krais Jisas vo siraoaro sirova.

<sup>9</sup> Uva ragai vaaro variria oa purapaavoi visiipa, oiso ra visii vo vovouroaro sirao vovouro rirope rutu, ora visii vo tarairoaro tapo, ora varao torevoko rugorugoo rutu.

<sup>10</sup> ♦ Eisi osa iava uvuipatai ra vearovira rutu rugorugoo rovopata. Ra va iava rugorugooara rutu roviriei rovopaoro orugoorovu vearovira purapata vara-ia kovopaoro. Eva-a oa iava viapau oiso irai uvuiparoi ra oreovu avu vai-ia visii togareve. Eisi osa iava uvuipatai ra vearovira raga toutes vo vokio-ia tugurasa oa-ia Krais vorevira vorerovere.

<sup>11</sup> Uva oisi-a eisi osa piepaoro uvuipatai ra torevoko vovouro raga purapaoro oisi raga

♦ 1:1: Ap 16:11-35    ♦ 1:5: Ap 2:42, 16:12-40    ♦ 1:10: 2 Ti 4:8

kareketa, vo vovouro oara visii iava vearovira riro pierevere Jisas Krais. Ovovouroa-a evara oara kekepaoro oearovu uvuipaai ra Pautoa-ia vuurapa vaisi purapaive rera vaisiaro kae piepaoro.

*Ragai-a Vao Ragoa Krais Sirova Toupa*

<sup>12</sup> Uva visii tavipaavoi araoko irara oaa, Varao rutu orekerovu oara oisoa purapaive oearovu vo ragaire, uva evara oara-ia raiva puraiva, oiso ra va iava Vearo Siposipo avape uvarovu ruture. <sup>13</sup> ♦ Oisi-a oiso-ia osa tuukepa kepa-ia ragai tovoiva, oa iava voa tuukepa irara tokipa irara polis irara oisoa voa ragai-ia taraipaave oiso, Krais kovopatoaaro-a ro-ia, oa vituaro iava tuukepa kepa-ia toupareveira. <sup>14</sup> Ari oavu-a vao-ia vo osa oisi tuukepavira toupaavora. Uva voa oearovu voeao oirao pie vovou irara oisoa ragai-ia taraipaoro voea vo vovouroaro oirao pie vovouro oisoa goru piepaive rutu Jisas-re rugoopaoro. Eisi osa iava uvuipaai ra oisi uriri asavira rutu Pauto vo reoaro kosi piepaive.

<sup>15</sup> Ari ita, oearovu rera iava Krais oisoa sипосипоиве, vo osa rirovira ragaiva ora kaureopaave ragai riiriipaoro. Vo osa oearovu rera iava Krais sипосипопаиве vearo vovou rutu purapaoro. <sup>16</sup> Oire uva voeao-evoea oea oisoa eisi piepaive ragaipa sираопаоро, uvare oiso ragavira oisoa taraipaave, Pauto vo kovo vатерева ragaipa, oiso ra rera vaaro Vearo Siposipo goruvira tore piea, ovusa oeavu va reroaro ragapaive, <sup>17</sup> voeao oea viapau oiso katai vovou-ia Krais vaisiaro iava oisoa sипосипопаиве. Viapau. Ari oiso-a ra ora voeao raga vaisiaro kae piepaive, uvare oiso tapo oisoa rugorugooape, Vosa Vearo Siposipo iava sипосипоапе, ra va iava Pol vuria rutu oupareve vo tuukepa kepa-ia. Eisi osa vearovai. <sup>18</sup> Uva voeare oiso puraparai, Eagara. Voeape. Eake iava? Uvare rorupaavoi. Uvare oisi voearei iava Krais vaisiaro kosiro viropa voeareo oearea vo rugoorei purapaiveira oiso, Voeao oea vuri rugooro purapaiveira, ari voeao oea oiraopa rugoo sirova utupaaveira.

<sup>19</sup> Iu, eisi osa varei-ia vareo taraiparai oiso, Visii varaaro variriara oara purapataveira ragaipa. Ora ro tapo Jisas Krais Uauratoaaro vo tauvaaro ragai-ia, oarea vo tauvaaro iava vorevira vearovira toupaavere rara ita. <sup>20</sup> ♦ Ragai vo ruipaaro rutu oiso rutu toupai osa va vao oa oirao piepaavoi rutu. Osa iava eisi viapau uvuiparai ra raveravepaoro vao kavua ragai vo kovoaro. Vo uvare oiso ruipaparai ra vokiara rutu-ia oisi raga oiso touvira rutu toupaa va-ia vao goru vovou. Oa iava uvuiparai ra ora ragai rutu iava Krais vaisiaro kae piepaa. Ari ita, osa-a eisi oiso vosa apeisi avu, vosa kopiira, eke apeisi-a vosa tootoora. <sup>21</sup> ♦ Uvare eake rutu-a va vao-ia tootooa? Oa vituaro iava ora ragai ragare oiso puraparai, Ro-ia Krais, ragai vaaro rutu tootooa vituaro, vo rara rerapa kovopaa. Ora vosa kopiira, ra va iava vearo tou rutu ouavere. <sup>22</sup> Vosa touvira toupaaverea, oa iava uvuiparai ra rerapa kovopaa tou visivi rutu vo rasio-ia. Oire uva apeisi-a, aa vao-a vao oa ragaipa vearovai, tootooa eke kopiia? Uva oisi-a eisi osa iava varei-ia avavaiapaoro rirovira vavagisiparai ora ragai raga. <sup>23</sup> ♦ Uvare oiso ruipaparai rutu ra vo rasio kavura Krais tapo tousa totoooro oiso osa rera. Uvare va-a eva oa oaravu rutu-ia putepaiveira. <sup>24</sup> Ari ragai vo kovoaro reipai rutu visiipa. Oa iava uvuiparai ra touvira tootoopara vo rasio-ia. <sup>25</sup> Eva-a oare rirovira rutu rugorugoo iraoparaveira. Uva va-ia taraiparai oiso, O, ari oiso iava uvuiparai ra goruvira rutu toupaa vo rasio-ia visii tauvapaoro, auere ra visii varaaro oirao pie vovouro rirope. Ora oiso ra rorupata Jisas raga oirao piepaoro. <sup>26</sup> Va-a eva vituaro iava ragai tapo rorupatavere utupaua, uvare ragai utorevoiva, visiire vorevira voreraera. Osa iava vigei rutu Krais Jisas vaisiaro kae piepapere.

*Pol Filipai Vata Tavireva Oiso Ra Rera Tapo Tavosivira Toupaive Vo Upoa-ia*

<sup>27</sup> Oire uva va-a vao-ia oa visiipa reipai rutu, oiso-ia ra ro oirato vo vovouaro sirova ututa ira goruvira rutu Krais vaisiaro oirao piepareveira. Eisi osa iava uvui iraopatai ra apeisi avu pieta, vosa visii tapo toupaa. Eke apeisi avu-a, vosa viapau eisi. Eagara vosa apeisi avu toupatavera visii iava ragaipa taviave oearoi, oiso oisi raga goruvira rutu toupaiveira touvira katai vovou raga purapaoro. Uva eisi osa ragavira piepaoro vuri pitupituro upopatavere katai vovou raga sirova utupaoro vao Vearo Siposipo goruvira

rutu tore piepaoro. <sup>28</sup>◊ Opeita voearo asavira uriripata oea visiiva ora keripaaveira. Viapau. Ari goruvira rutu torepatavere. Oa iava visii eveipaiive, ra visiire oiso purapaave, "O oiraopavira rutu, uvare uvuipaii ra vigei-ia putepaive." Aue vituaro iava uvare Pauto visii kavikopaoro visii virivarirevere, osa voea-a evoea oea opesi ovoiaverea. <sup>29</sup>◊ Ari ita, Pauto visii roporeva, oiso ra Krais-pa kovopata vo raivarei-ia oiso-ia, Oraivavu vao-ia rera oirao piepaoro. Ari oraivavu-a vao-ia siraoa riroa tavaka oupaoro vo oearovu-ia, vo rara rera sirova goruvira rutu utupata. <sup>30</sup>◊ Oire uva vigei rutu-a vao ora ragai vigoa rutu va eva vuri pitupitu-ia uvuipavie i ra va upopape tavaka kaepaoro. Eisi osa vava oisoa ora upopara voviri tuariri, oiso osa ragaiva oisoa vurapata. Uva vo upo raga-a vao oa touvira purapaavoi vo vokiro-ia vao oa iava uvupatavoi.

## 2

*Ora Vigei Iava Sopaura Oavi Gare Piepaoro Uvuipavie Ra Ora Vigei Iava Sopaura Vatepape Oearovivupa Araoko Irara Oavi*

<sup>1</sup>◊ Oire uva oiso puraparai, E visii iava sopaura uvuipai ra gorua ouve vo Krais-ia? Uva apeisi-a? E rera vo siraoaro sovopataveira oa visii iava sopaura varaata piepaiveira? Ora apeisi-a? E katai rugoo rutu purapataveira Tugoropato tapo Uraurato? Ora apeisi-a? E oeavivupa siraopataveira voearo tokipaoro? <sup>2</sup>◊ Oire uva visii vo reoaropa ruichaparai ra oiso purape, Iu. Oara rutu-a evara oara-ia uvuipatai rutu ra ragai roru pie iraopata rutu oiso katai rugoo raga purapaoro vo oearovivu rutupa siraopaoro vao katai vovou raga purapaoro. <sup>3</sup>◊ Opeita orekerovu ora visii raga-pa purapata, ra vara-ia rei vaisi piepata. Ora opeita vara iava vaguvira reopata ora visii iava. Viapau. Ari visii uvui iraopatai ra ora gare piepata oisivi vo rara oiso rugoopata, Viapau oiso vigei oearoi-ia putepapeira vo orekeroi purapaoro. <sup>4</sup>◊ Ora ra opeita ora visii raga-ia rugorugoopata rutu varao-ia visii varaaro. Viapau. Ari oearovivure rugorugoo iraopata voea tauvapasa.

<sup>5</sup>◊ Oire uva vo rugooro visii vo rugooroaro ora visii iava ora varao vo oearovure vo rugooro oara rutu uvuipai ra oiso toupaive osa Krais vo rugooro vo ora rerare ora oearovure tapo. <sup>6</sup>◊ Uvare Krais ira oiso rutu toupareveira osa Pauto. Ari viapau oiso ora rera raga-ia rugooroepa oiso puraoro, "Ragai rirovira rutu oiso pieavere osa Aite vo uva toupareveira." Viapau. <sup>7</sup>◊ Ari rera raga vo ruipaaro-a oa-ia gorua sovara iava ora keraria ora rera iava vasereva oiso rutu ora pieoro, Kovopatoa raga oearovupa. Ari ita, oiso rutu karekeroepa oirato vo rasio iava rera. <sup>8</sup>◊ Uva rera raga oisoo ora gare pieparo. Oa iava oisi raga piepaoro vo raivao gaepaoro vokareva uvava vo tuguraroepa evao parikouia uva rera kopii pieiva. <sup>9</sup>◊ Oa iava Pauto vorevira rera tore pierava rera kae pievira tovosa uvarovu rutu ariaraaro. Oa iava oisi piepaoro vao rei vaisi tovoreva rera-ia Krais oearovu rutu vaisiaro-ia puteoro. <sup>10-11</sup>◊ Uva vo vaisi eva rei vaisi ovaisiapa avivikepaoro va kae piepaivereva va-ia vuurapa vaisi purapaoro oearovu rutu voearo vo viara-ia, ora voearo rutu vo rasito ivara-ia, ora voearo rutu vo rasito reroaro tou irara. Oearoa rutu-a oea taru vuurapa vaisi purapaivereva Pauto-ia Aiteto oiso puraoro, "Oiraopavira rutu uvare rera ro Jisas Krais vigei reraaro rutu Turaro."

*Uvuipatai Ra Oiso Rutu Toupata, Visii Aviavia Rasitoa Rutupa*

<sup>12</sup>◊ Araoko irara oaa, visii tavipaavoi oiso, Vo osa tuariri visii ruvara-ia tou rovopaavora, uva oisoo vearovira rutu ragai vo reoroaro sirova utupata. Uva oisi raga uvuipatai ra ragai vo reoaro uvupata vo osa visiipa tauaivira toupaavoi. Oa iava uvuipatai ra ora visii raga kasivarivira rutu kovo iraopata siituevira ropepaoro. Ra va-ia vo kovo opesi pie ovoita rara okovoa iava Pauto visii-ia rorurevere rutu. <sup>13</sup>◊ Uvare Pauto visii tauvapareveira, oisore ra rera vo ruipaaro sirova utu ruipapata. Osa iava uvuipatai ra rera vo ruipaaro sirova utupaoro rera roru piepata.

<sup>14</sup>◊ Oire ra oaravu rutu kovoara purapata kaureo asavira. Ora opeita tapo oearovu tapo kasipu reoro purapata. <sup>15</sup>◊ Vosa eisi rutu piepata, ra sisigaruevira rutu toupata. Oa

◊ 1:28: 2 Te 1:3-12; Ro 8:17 ◊ 1:29: Mt 5:12; Ap 14:22 ◊ 2:1: Ju 20:23 ◊ 2:3: Je 3:14 ◊ 2:5: Ro 15:1-3  
 ◊ 2:6: Jo 1:1 ◊ 2:7: Sam 8:1-9 ◊ 2:10-11: Ais 45:22-23 ◊ 2:14: 1 Ko 10:10; Mt 5:15-16 ◊ 2:15: Ef 5:1

iava oisi rutu karekepata, Visii rutu vao-ia Pauto ovii iraraaro rutu oea torevoko vovou rutuva toupaiveira. Iu, osa-a eisi osa toupaoro uvuipatai ra roroiovira rutu toupaoro voeao tapo vuri irara toupata oea eisi ora piro piepaaveira voea raga. Ra voeapa Vearo Siposipo iava siposipopata, oiso rutu toupaoro osa aaviikoara roropaiveira aviavipaoro.

<sup>16</sup> ♦ Oire vosa tootoopa reo vatepata voeapa, oa iava uvuiparai ra visii-ia roruaverea vo vokio-ia oa-ia vorerovere Krais. Eake iava? Uvare oiso vovouraverea, Viapau oiso akukuvira kovo ragaavora visii tauvapaoro.

<sup>17</sup> ♦ Uva oiso vovouparai, Oearoi vai ragai upoive ragai revasi pieoro, uvare visii tauvapaaveira. Uva viapau oiso taraiparai vao-ia oa ragai-ia karekeperea. Eagara, uvuiparai ra visii tapo touvira rorupaa. <sup>18</sup> Oire uva oisi-a eisi osa raga toupata roruvira ragai roru piepaoro vo vovou raga-ia vao-ia varaata vovou.

#### *Vo Toupai Timoti Vo Reo*

<sup>19</sup> Vosa Turaro Jisas vo ruipaaro-a, oa iava oiso vovouparai ra visii iare Timoti arua. Ra va iava vorevira visii iava ragaipa tavitavisa vorero rara. Ra oisi iava visii-ia roru iraopaa. <sup>20</sup> Ro raga ira katai rugoo rutu purapareveira igei tapo toupaoro vo visii-ia rugorugoopaoro rutu. <sup>21</sup> Vo osa oearovu ora voea raga varaarore rugorugoopaave vare vao Jisas Krais vo kovoaro ovaupaoro. <sup>22</sup> ♦ Ari ita, taraipataveira rera-ia ro Timoti, oiso ragavira osa rera vo kovoaro kekepatavorao vo osa kovoparevora. Oiraopavira uvare oiso rutu toupareveira, Rera ro-ia Timoti ragai oviitoaro rutu, uvare tavosivira rutu kovopaveaira Krais vo kovoaro iava siposipopaa. <sup>23</sup> Uva visii iare rera aruavere rara tou visivi, vo rara varao iava taraia ou rovoa oara puraivere ragai-ia, vo osa vo toupaa tuukepa kepa-ia. <sup>24</sup> ♦ Turaro raga-ia rariparai, oa iava uvuiparai ra urioravere tou visivi visii tauvasa.

#### *Epaafrodaitas Iava Vo Reo*

<sup>25</sup> Oire va-a vao osa rirovira rutu ora rugorugoo pieraera. Oa iava ro vigei araokotoaaro Epafrodaitas arupaavoi visii iare, ira arutava ragai iare. Oa iava ragai tauvapasa urioroepa. Uva rera iava oiso visii tavipaavoi, Ira vearovira rutu kovorevora vuri pitupiturova ora upopaoro rutu. <sup>26</sup> Uva ruipa iraoparoi oiso ra vorevira visii kekesa vorero. Ari ita, viapau oiso vearovira touparevoi, uvare visii ruvara iava oreorovu uvurevora ora rera iava oreoa oiso purapaera, “Vurivira rutu upiaparoi.” Osa viapau oiso upia vai epao rera-ia. <sup>27</sup> Ari oiraopavira, rirovira rutu upiaparoera, oa iava kopii ragaroera. Uva Pautoa raga rerapa siraoro rutu rera vearovira tokirevora. Oa iava ita ragai tapopa siraoroera Pauto oiso auepaoro, Teapi rerapa Epafrodaitas siraopaoro ragai iava sopaua vavatape rutu. Oire uva varaatavira raga oisoa toupaa. <sup>28</sup> Iu. Osa oiso ruipa iraoparai rutu oiso ra visii iare rera arua. Ra va iava rera kekeoro rera-ia rirovira rutu roruta. Eisi osa iava uvuipai ra ragai vo vavataaro opesipe. <sup>29</sup> ♦ Ra va iava rera tapo sekanta vo rera-ia rorupaoro, vo rara pouro viro visii iare rera ro-ia visii araokotoaaro Krais vaisiaro sovara-ia. Uva uvui iraopatai ra oearovu tapo avivikepata voeao oea oiso rutu toupaiveira osa rera ro-ia Epafrodaitas. <sup>30</sup> Uvare ora pireroepa rutu topogovira, oiso ra Krais vo kovoaro purareve. Oa iava vo kovo purapaoro tutuu pie ragaepa oiso ra kopiilo. Oire uva oisi-a eisi osa piepaoro oisoa ragai tauvapareve vo visii iavirava kovopaoro, uvare ragaipa tauaivira rutu toupataveira.

### 3

#### *Ro Iava Oirato Ira Krais Oirao Piepareve Rutu, Eera Torevokoto*

<sup>1</sup> Oire oiso vo rigato opesi piepaoro oiso visii tavipaavoi, Rorupata rutu aue-ia Turaro, vo rara rerare rugoopata rutu rera vaisiaro raga-ia toupaoro. Uva aia ita oiso vorerivira visii tavipaavoi oiso osa voari tuariri visii taviava vara iava varao oara reipapeira rutu visiipa.

<sup>2</sup> ♦ Vearovira rutu ora vatatopo iraopata voeao oirara oea oiso toupaiveira, Kaakau kare oea vuriara purapaiveira. Uvare oiso purapaaveira, “Ora rooroopata ora visii

❖ 2:16: 2 Ko 1:14; 1 Te 2:19 ❖ 2:17: 2 Ti 4:6-8 ❖ 2:22: 1 Ko 4:17; 1 Ti 1:2 ❖ 2:24: Fl 1:25 ❖ 2:29: 1 Ko 16:18; 1 Ti 5:17 ❖ 3:2: Ais 56:9-12

iava rakari verapaoro ora reesipaoro.” <sup>3</sup> Ari ita, vo reesiei vo vigei-ia oiraopa. Oa vituaro rutu porearo oiso toupaiveira, Vo uvare Tugoropato Uraurato Pauto reraaro vigei tauvapareveira orugoorovu vatepaoro auere lotu purapasa. Ora vo osa Jisas Krais vaisiaro kae piepapeira vo rara rera-ia toupape. Ora oiso tapo uvare viapau oiso ora vigei raga-ia rugoopavioveira varao raga-ia raripaoro oara purapapeira vigei raga vo ruiparoaro sirova utupaoro. <sup>4</sup> ♦ Oire uva irai vaiei pasi ira vai-a uvuiparoi ra oisi oiso-ia puraro, “Ragai kovoara rutu gogotoavora vara rutu opesi pieoro. Oa iava uvuiparai ra Pauto vo Saraaro iare koatara.” Oire vosa iraieri ra eisi puraro osa eera, oire uva ragai raga-a vao-ia ragoa-a eera oearovu rutu-ia putepaa. <sup>5</sup> Vao vituaro uvare Jiu-ia kavauraepa, oa iava ragai-a Bensamin vo saraaro iava. Uva kataiva rutuva revasiva toupaavoi voeao tapo oiraopa Hibru vova Jiu. Uva vo uva kavauraiva, erao vatara (7) vokiro isivaaro iava ragai iava rakari veraaepa. Oire uva voava riro raiva, Farisi vaisi-ia toupaava vao Jiu vaaro Reo Taisi sirova utupaoro goruvira rutu. <sup>6</sup> ♦ Oa iava oisoa toupaoro Jiu-pa irara vo pitupituroaropa ruipa iraopara, oiso ra va iava voearo vuri piepaa oea oisoa Jisas vo kovoaro purapaive. Oiraopavira rutu uvare reo uvutoa rutu-a ragai torevokovira. Oa-ia oisoa Reo Taisi-ia kasivarivira rutu utupara. Uva viapau oiso oavi va iava vao Reo Taisi oisoa kavupaa oaire ovaupaoro. <sup>7</sup> Oire evara rutu vieiavoi oara iava uvuiparai ra ora ragai raga vaisiaro kae piepaa vara iava. Uva varare vovou eakavira oiso puraparai, Varape evara akukuara raga. Aue vituaro iava uvare vo vokio Jisas Krais raga oirao piepaavoi rutu. <sup>8</sup> Ari ita, oara rutu-a evara oarare oiso puraparai vovou eakavira, Oara rutupe evara akukupapara raga. Uvare kataia raga-a vao oa raga-ia taraiparai oa orekerovu rutu-ia vara evara putepaiveira, vao-ia ro-ia Jisas Krais ragai reraaro Turaro. Eake iava? Uvare orekerovu rutu oiso toupaivoi osa kaieara. Oara rutu viki ovoipaavoi rera raga-ia Krais goruvira rutu pituoro. <sup>9</sup> Uva varao torevoko vovouro sirova utuparaera vo Reo Taisi rutu purapaoro oiraopavira. Uva vara rutu evara akukupapara raga oara-ia viapau oiso oavu avu vaiei. Uva vo vokio-ia rera vaisiaro-ia toupaoro uvuiparai ra torevoko vovou rutu pura iraopaa vo Krais vo goruard raga-ia, vao oa vituaro oiso toupaivoi, ra Krais oirao pie iraopaa. Uvare Pautoa raga torevoko vovouro rutu karekereva. Oa iava oiso vara eveipareveira ragai vaaro oirao piea kekepaoro. <sup>10</sup> ♦ Uva orekerovu rutu kavuoro katai vovou raga rutu sirova utuparai ro-ia Krais taraipasa. Ora vao goruvira rutu toupasa vo rera vo goruard-ia, ogorua iava vorevira toreroepa rera vaaro iava kopiia. Ora tapo ra rera vo siitokaaro kaea vao oa vateiva rerapa oearovu. Ora tapo osa oiso ruipaparai ra oiso piepaa osa Krais osa varaua vo ruipaaro oisoa kopi piepareve. <sup>11</sup> ♦ Oire uva va-a eva osa iava Pauto-ia rariparai oiso, Ragai tapo vorevira tore pierevereia Airepa Tootoo ousa.

#### *Pol Ikaureva Vo Rekasisa Ovoiopa-ia Reesia*

<sup>12</sup> ♦ Viapau oiso oearoi tavitavipaaveira vao iava oiso, Ragaiei vo-ia ovoiopa-ia reesia vo uva viapau viria vai toupaiveira, uvare vearo vovou raga purapaaveira. Asi viapau. Eake iava? Uvare touvira rutu akeake rovopaaveira rutu oisi rutu eisi tousa. Eisi osa iava oiso rutu uvuiparai ra oiso toua osa Krais vo ruipaaro toupaiveira ragaipa. Uvare Krais Jisas raiva purareva oraiva iava uvuiparai ra voa vo poura viro ovoiopa-ia reesia. <sup>13</sup> ♦ Oiraopavira rutu araoko irara oaa, viapau oiso rugooparai, Ragaiei evoa karera viropa. Viapau. Ari goruvira rutu oiso vovouparai ra orekerovu rutu kavuoro evoare topara viro. <sup>14</sup> Uva oisi-a eisi osa ikaupaavoi torevokovira oiso vovoupaoro ra voa poura viro vo ovoiopa reesi-ia. Oa iava uvuiparai ra voa toua oiso rutu osa Krais vo ruipaaro toupai ragaipa, oiso ra voa Airepa Tootoo ousa. Ari ita, vo touo oa iare Pauto ragaire keeraroepa va vao Krais Jisas vo kovoaro iavirava.

<sup>15</sup> Oire uva uvuipatai ra torevokovira rutu rugoo iraopata oiso rutu osa riropa irara. Oa iava uvuipatai ra oiso rutu rugoopata vare vao osa ragai. Ari vosa oearovu visii iava osivu raga rugorugoopaave, uva vo rugoo eva oa oisi visiipa kareke piereve Pauto. <sup>16</sup> Ari vao raga-ia oiraopa tarai pie reo rutu goruvira toupata oa visii iare pou piropa voari tuariri.

♦ 3:4: 2 Ko 11:16-33 ♦ 3:6: Ap 8:1-4 ♦ 3:10: Ef 1:9-23 ♦ 3:11: 1 Ko 15:51-57 ♦ 3:12: 1 Ti 6:12; 1 Ko 13:10 ♦ 3:13: Lu 9:62

<sup>17</sup> Araoko irara oaa, oiso ruipa iraoparai visiipa ra oiso rutu pie iraopata osa ragai. Uvare va-a eva ovoovoa oa puraiovora visii tapo toupaoro, oisore ra oisi va sirova utupata. Oa iava uvuipatai ra voeao reesipata oea va sirova oiso utupaave. Oa iava visii uvuipatai ita ra oisi vioevira utupata. <sup>18</sup> Ari ita, viapau oiso katai reo vai va iava vao visiipa vateava voari tuariri. Easi riro reoro rutu-a. Uva vorerivira oiso osa ita visiipa vo reo vao vatepaavoi gaupaoro. Uvare riro irara rutu oiso vovoupaai rutu ra oiso toupaive osa voeao keripa irara, oearoa Krais vo reoarova ora upopaaveira rutu. Vo reo oa evao parikou iava tavitavipapeira. <sup>19</sup> ☩ Oiraopavira uvare voea-a evoea oea opesiaverea vo eto kasi-ia, uvare oiso piepaiveira ora voea vo rugorugooroaro raga sirova utupaoro. Uvare ora voea vo ruiparoaro raga-a oara rei piepaiveira rutu oiso rutu osa varao tokarasiara voea varaaro, oara vaisiaro rei piepaoro vara sirova utupaaveira. Uva vara rutu-a eva varuaria oara-ia uvuipaaai ra ariaa vai ouive ora voea raga-ia, uvare viapau arii vovouro vai voea-ia. Aue iava uvare vara raga purapaoro vagupaaveira varao raga-ia rugorugoopaoro oara vo rasio-ia toupaiveira. <sup>20</sup> Oire uva vigei-a vao Pauto voeaaro rutu oirara vigoa vo uruiaro rutu vuvuiua-ia toupaiveira. Uva tuepavioveira touvira rutu oiso rugorugoopaoro, Esa pasi touvira vai uriorovere Kae Piepato vigei reraaro vova vuvuiua-ia ro-ia Turaro Jisas Krais. <sup>21</sup> ☩ Ari ita, vigei iava varauraro oavi raveravepapeira ovararoa tavariorevere rara Krais. Ra va iava oiso raga karekepe osa rera iava varaua oua vo toupaiveira sisikorepaoro. Eisi osa piereverea vo rera vo goruaro-ia, vao oa-ia uvuiparoi ra ora rera reroaro orekeroru rutu tovoreve varapa reipaoro.

## 4

*Uva Uvuipaaai Ra Katai Vovou Purapaise, Ra Va Iava Vereo Vovou Rutu Oupaise Voeao Rutu*

<sup>1</sup> ☩ Oire uva araoko irara oaa, ragai visii-ia roru iraopaaiveira vo osa visiire rugoopara, uvare kasivarivira rutu Krais vo pitupituaro rutu sirova utupataveira. Oa-a eva oa-ia ragai iava sopaua varaata iraopapeira. Ari ita, uvare oiso ruipa iraoparai ra oisi raga eisi piepata Krais sirova goruvira rutu torepaoro.

<sup>2</sup> Oire vei-a vao-ia riakorirei Yuodia vaio ora Sintiki veigoa ragai vo reoaro vao-ia uvu iraoere oa veipa vatepaavoi, oiso ra ora vei vo vovouaro varao kaureo vovouro eaka iraoere. Uvare Turaro-a ira vei tauvarevere vo osa oisi pieere. <sup>3</sup> Oire uva vii tapo ragai vatetooaro rutu uvuipaaei ra evairei tauvari. Uvare oisoa ragai tauvapaise voea rutu ora Klemen vase vo Vearo Siposipo kosi piepaoro. Oea vaivaisiaro vo toupai Pauto vo vukuar-ia vao Tootoopa oa toupaiveira.

<sup>4</sup> Oire ra rorupata Turaro vo vovouaro rutu sirova utupaoro. Uva vorerivira ita visii tavipaavoi oiso, Roru iraopata!

<sup>5</sup> Opeita gete rugorugooro purapata oearovivure. Ari uvuipatai ra voeavi tauvapata, uvare Turaro vo vokiaropa tutuu piepai vao oa-ia taru vorevira vorerovere. <sup>6</sup> ☩ Opeita rirovira rugorugoopata varaore oara-ia uvuiparoi Pauto visii tauvareve, vo rara rerare goruvira rutu variri rovopata. Vosa oisi eisi piepaoro rerare, uvuipatai ra vearo vaisi rutu pura rovopata rera-ia vao iavirava tauvaa rera varaaro visii-ia. <sup>7</sup> Oire vosa oisi-a eisi piepata, oa iava uvuipatai ra gavaure vovou rutu outa vao oa visiipa vatereve Pauto. Vao oa viapau uvuipaaai kareke piepaiveira ora voea vo taraiaro-ia. Viapau. Ari Pautoa raga ira uvuiparoveira ra visii soparoaro vuavua piepareve. Ora varao visii vo rugorugoaro tapo, vo rara Krais raga-ia rari iraopata.

<sup>8</sup> ☩ Oire oiso vo reo opesi pieoro visii tavipaavoi araoko irara oaa. Visii vo rugorugooro agasi pieta rutu varao raga-ia oiso-ia, oara veiaropara kareke piepaiveira ora aue sisigarueara, ora varao oiso oara avivike vovou kareke piepaiveira, ora varao torevokoara. Oara rutu-a oara iava uvuipatai ra Pauto-ia vuurapa vaisi purapata. <sup>9</sup> Ari ita, visii tapo oisoa ora reopara eva oa-ia visiipa ovoovoa puraava. Oovoovoa sirova utuoro uvuipatai ra vara eva varuaria sirova utupata. Osa iava uvuipa Pauto ra visii tapo toupareve visiipa gavaure vovou rutu vatepaoro.

*Pol Vearo Vaisi Purareva Filipai Vatava Aueva Vatevatea*

---

✩ 3:19; 2 Ko 11:15; Ro 16:18   ✩ 3:21; 1 Ko 15:43-53   ✩ 4:1; Dan 12:3; 2 Ti 4:6-8   ✩ 4:6; 1 Te 5:17-18   ✩ 4:8; 1 Ko 13:4-8; 1 Pi 2:12; 1 Te 5:22

<sup>10</sup> Oire uva rorupaavoi rutu Turaro vo pitupituaro iavirava, uvare voari tuariri viapau oisoa uvipata ra visii varaaro kaviko vovouro kareke pieta ragaipa. Ari vo vokio-ia oisi uvipatai rutu. Uva va-a eva oa-ia rirovira rutu visii-ia roru iraopaavoi, uvare vorerivira aia ragai tauva iraopatavo. <sup>11-12</sup> ♦♦ Viapau oiso puraparai ora ragaire, Oaravu avu vaipa apotaparai. Viapau. Ragai taraia ouavora oiso, Vosa orekerovu rutu ragai-ia karekepape, eagara, ragai iava sopaua vearpapeira evapa. Evara rutupa ragoa uviparai ra oiso toupa osa ro oirato apotato. Ora uviparai ra riroara rutu-ia pitua. Ragai taraiparai vo pitupituo-ia riropa aio pitupitu ora vao ogoepa pitupitu. Ora vo pitupituo-ia taraiparai riro orekerovu rutu-ia pitupasa, ora vao orekerovu rutupa apotapasa. Ora vo vuutara rutu-ia ora vo uvarovu rutu. Oire uva vara rutu-a varao oara-ia vearo tarai ouavora oara rutu ragaipa vearpai. <sup>13</sup> ♦ Ari ita, uviparai ra eisi ragavira toua. Eake iava? Uvare vare oiso torepasa Krais rera vo goruaro vatepareveira ragaipa ora vigei rutupa.

<sup>14</sup> Uva vearpai rutu vo uvare oisoa vearovira ragai tauvapata vo osa vuria oupaa. <sup>15</sup> Oire visii Filipai-pa irara vao-ia taraipataveira osa Vearo Siposipo iava sипосипо ровореапа ве Маседония Provins-ia pute rovopaoro, vo uva visii raga vaaro katai lotu toupaiveira vao oa iava oisoa visii rutu ragai tauvapata ragaipa moni vatepaoro, ora vigei rutu oisoa ora tutukopavio oaravu-ia ora vatepaoro. <sup>16</sup> Ora vo osa Tesalonaika-ia oisoa toupa uva viapau oiso katai vuuta raga-a vao oa-ia ragaipa tauvaa oisoa sipopata. Ari vorevoreripavira-a. <sup>17</sup> Uva oiso visii tavipaavoi, Viapau oiso orekevu avu vai rutu ou ruipaparai visii ruvara-ia. Viapau. Ari vao keke ruipaparai voari utupauavi vo uva visii vo tauvaroaro evara voriaro taru outaverea vearpala. <sup>18</sup> Ari ita, uvuivira rutu oisoa ragaipa orekerovu rutu vatepata. Ovuuta vao-ia oa-ia uvuivira orekerovuva toupaavoi vova visii ruvara-ia varao oara sipotavora ragaipa, oarava urioroepa Epafroditas. Evara-a oara oiso rutu toupaiveira, Vearo riipua tauoa oa riipuaro vupapaoro Pauto rorupareveira rutu visii-ia. <sup>19</sup> ♦ Ari ita, uva rera raga-a Pauto ira visiipa oisi uvuivira oaravu vaterere vara iava rera varaaro oara vo toupaiveira rera voaro. Oara-a evara vituaro purareva vao-ia Krais vo kovoaro vigeipa. <sup>20</sup> Uva eisi osa iava vokiara rutu-ia vuurapa vaisi purapapeira rera-ia eera Pauto vigei Aitearo opesi asavira. Ovoiei.

#### *Ovoiopa Reoro Vatereva Pol*

<sup>21</sup> Vearo voki rutu vaisipaavoi oirara rutuva voeao oea Krais Jisas vaisiaro sovara-ia toupaiveira. Voeao-ia vigei rutu araoko iraraaro oea ragai tapo toupaoro visiipa vo reo sipopaivoi oisi raga ita eisi oiso purapaoro, "Vearo voki rutu visii-ia." <sup>22</sup> Ari ita, voeao rutu voeao-ia Pauto voeao oea vo toupaiveira oea rutu eisi purapaa oiso, "Vearo voki." Ora voeao tapo oirao pie vovou irara oea reito Sisa vo kepaaro-ia kovopaiveira oea tapo oisi raga ita eisi visiire purapaa oiso, "Vearo voki visii-ia."

<sup>23</sup> Ro vigei reraaro Turaro Jisas Krais ira uvipa ra visii rutu viraakooro visiipa vereopa vovou vaterere visii tauvapaoro. Eva-a oare oiso visiipa variriparai rerare.

Eisivi raga, ra opesipe.

Ragai-a vao, Pol.

## KOLOSI Irapa Reoro Vo Vukuo Iava

Pol vo pasio rigatoreva eisi toupaoro tuukepa kepa-ia Rom aue-ia 61-63 yia Jisas vo kavauaro isivaaro iava. Uva vo Pol Kolosi vatapa rigatoreva voea tavoro, uvare Vearo Siposipo vatakoiva varao tapo Jiu vo pitupituroaro, ora varao oirao pie asa vovou irara vo pitupituroaro. Oiso voea tavireva uvare oearovu raga lotupa irara oisoa vuurapa vaisi purapaise enselpa irarapa. Ora oiso oisoa siposipopaike, Krais-a oiratoa raga, uvare viapau Pautoa iava rera. Oa iava Pol goruvira voea tavireva Krais iava oiso, Pauto ruvara iava ira ro urioroepa oiravira toupasa vo rasio-ia (Kl 2:9-10).

1. Aviavi pie reoro Pol varaaro, ora vearo vaisi Pautoa-ia, 1:1-14.
2. Krais iava ora rera vo kovoaro, ro ira uvuiparoi rutu oirara oisi piesa ra torevoko vaisi ouive vo Pauto ruvara-ia, 1:15-3:4.
3. Oirara uvuipaai ra Tootoo Ovoi ouive Krais-ia vo rara rasito vo pitupituroaro kopii pie rovoive vara kavu ovoioro, 3:5-4:6.
4. Pol vearo voki rutu purareva voea rutuva Kolosi vata, 4:7-18.

<sup>1-2</sup> Vo pasio rigatoavoi ragai Pol visiipa araoko irara oave, visiigoa Kolosi urui-ia toupataveira Pauto voeaaro. Visiigoa goruvira rutu toupataveira Krais-ia raripaoro rutu. Ragoa roporeva Pauto, oisore ra oiso toupaa, Ragai-a Krais Jisas reraaro aposelto. Uva vegei rutu-a vao-ia vo rigato puravevoi ora Timoti vigei araokotoaro visiipa. Uva variriparai Pautoa iare vigei Aitearo, oisore ra visii vatereve tauvaa ora gavaure vovou.

### *Pol Vearo Vaisi Purareva Pautoa-ia Rera Vaaro-ia Variria*

<sup>3</sup> Vo osa variripaveiee visiipa tauvare akepaoro uva vokiara rutu-ia vearo vaisi purapaveaira Pauto-ia ro Turaro Jisas Krais Aitearo. <sup>4</sup> Uvare visii iava uvupaveaira visiigoa Krais Jisas oirao piepataveira rutu. Ora vao tapo iava osa Pauto voearo siraopataveira rutu. <sup>5</sup> Ari ita, oisi-a eisi osa piepataveira uvare vaore oiraopa Vearo Siposipo rugoopataveira oa iava voari tuariri visii taviiova oiso, Pauto orekerovu rutu vearopara tovoreva vuvuiua-ia visiipa oara taru oupataverea utupaua. <sup>6</sup>  $\diamond$  Va vao Vearo Siposipo oa riropaoro uvarovu ruture va kuearova ora sikasikapaveira voraro ruture vo rasio-ia, oiso rutu osa voari rovoa-ia ita visii vuruvuruar-ia ora sikasikaepa, vo vokio rutu isivaaro iava oa-ia Pauto vo siraoaro-ia roroiovira taraia ou rovotava. Vo sirao akuku vatevatea rera vaaro oa vate ragapareveira Pauto. <sup>7</sup>  $\diamond$  Uva vo taraia-a vao oa vatereva visiipa ro-ia Epafras, ro ira oisoa vegei tapo kovopareve goruvira rutu, uvare iravu-a rera Krais reraaro. Ira oisoa kaviko iraopave. <sup>8</sup>  $\diamond$  Ira vegei tavireva visii iava oiso, Pauto reraaro Tugoropato Uraurato visiipi oearovupa siraopa vovou vatereva.

### *Pol Variriroepa Pautoa Iare, Oiso Ra Kolosi Vata Goru Piereve*

<sup>9</sup> Uva eisi osa iava visii iava uvuoro vo vokia eva variria rovoveva visiipa. Oa iava oisi raga piepaoro vo vokio tuguraveiee. Ari ita, variripaveaira Pauto iare oiso ra rera vo vovouaro viaevira rutu karekepe visii-ia. Ra va iava vearovira taraipata vo osa Tugoropato Uraurato visiipa vara aviavi piepareve. <sup>10</sup>  $\diamond$  Ra oisi va-ia roroiovira taraipaoro vearovira Turaro vo pitupituro ora rera vo vovouaro sirova utupata. Ra va-ia rera roru piepata rutu ora visii-ia. Ora vosa oearovu-ia vearo kovo purapata. Uva va-a eva oa-ia kuea kareke piepata, ra oiso pieve, Visii-ia Pautoa iava vo tarai oa kovapai. <sup>11</sup>  $\diamond$  Uva variripaoro Pauto arepaveaira oiso ra visii goru piepareve. Ra va iava Pauto vo kerariaro vo goruaro oupata vo goruo oa toupaiveira visii goru piepasa. Oa iava viapau uvuipatai ra Pautoa-pa tauaita, vo rara otavakavu visii-ia pou piro. <sup>12</sup> Viapau. Ari touvira rutu vigei Aitearo-ia Pauto vuurapa vaisi pura iraopata rorupaoro rutu, uvare Pauto oisire visii oisi uvuireva rutu, oiso ra vara outa oara Pauto ruvara-ia toupaiveira vore utupa vokia tuepaoro, oara ravaavira toupaiveira voeaopa oea aviavi vovou rutu-ia vao rera

$\diamond$  1:6: Mt 24:14     $\diamond$  1:7: 1 Ko 4:1-2     $\diamond$  1:8: Ro 15:30     $\diamond$  1:10: 1 Te 2:12; Ef 4:1     $\diamond$  1:11: Ef 3:16, 4:2

vaaro vokapaiveira. <sup>13</sup> Ari ita, rupa iava Pauto vigei vorevira oureva vigei orirusa rera vo Saraaro sovara-ia ro Oviito ira kaviko iraopareveira. <sup>14</sup> ♦ Ro Jisas ira vigei karureva vorevira vova vuri pitupitu vo tuukearo vigei iava vuri vovouro verapaoro.

#### *Vo Toupa Krais Vo Pitupituaro Iava Ora Rera Vaaro Kovo*

<sup>15</sup> ♦ Viapau oiso irai Pauto kekepareveira. Ari ro raga Krais, ira raga oisi rutu oiso toupareveira osa Pauto. Oa iava rera vurapaoro uvuipavieie ra va iava Pauto kekepape rera-ia. Ari ita, Pauto orekerovu rutu pura rovoreva. Uva Krais raga orekerovu rutupa rovopatoa rutu, uvare vara rutu-ia putepareveira rera ro avaioto Pauto Oviitoaaro. <sup>16</sup> Uvare rera iavirava Pauto pute pievira orekerovu rutu purareva oiso-ia, oaravu-a varao oara vuvuiua-ia toupaiveira, ari varao oara vo rasitoa-ia toupaiveira, ora evara oara iava oaravu kekepapeira, ovusa vara iava oaravu viapau kekepape, varao oara vatauvira toupaiveira. Oire uva va vao osa oeavu tapo pura rovoreva reipa irara voeao uraura irara enselpa irara oea reipaaveira voeaopa oea vuvuiua-ia toupaiveira. Vara rutu evara purapareva Pauto Oviitoaaro iavirava, oiso ra rerapa varape Oviito. <sup>17</sup> ♦ Ari ita, voari rovoa-ia viapau orekerovu avu vai touva ovuuta-a eva oa-ia Krais raga kataito toureva. Uva rera raga iare orekerovu rutu ora vara vo tavukiroaro iare purareva voraro. Uva touvira vara evara toupaiveira rera vo goruaro-ia. <sup>18</sup> Oire uva Krais-a lotua iava kukue, ovusa lotu-a varaua. Uvare vigei raga vigoa tokipareveira vigeipa oiraopa rutu Tootoo Ovoi vatepaoro. Rera-a Krais avaiota rutu ira kopiia iava vorevira tore pierava Aiteto. Eva-a oa vituaro iava rera-a rovopatoa rutu ira orekerovu rutu-ia putepareveira, uvare vigeipa iraoro toreroepa vorevira. <sup>19</sup> ♦ Ari ita, Pauto vo ruipaaro-a oa-ia oisi pierava rera Oviito Krais oiso rutu osa Pauto. <sup>20</sup> ♦ Uva rera raga vo ruipaaro-a vao sirova utuoro rera Oviito roporeva, oisore uva rera iavirava orekerovu rutu varao pauaka touara vorevira oureverea ora rera iare. Oa iava Pauto ora agiagipa pitupitu purareva, vo osa kopiiroepa Oviito evao parikou-ia ora rera iava revasiva petoro vigeipa. Va-a vao oa vituaro iava orekerovu rutu taru oureverea ora rera iare varao oara vuvuiua-ia toupaiveira ora vo rasitoa-ia.

<sup>21</sup> Ari ita, voari tuariri uva oisoa vuriarare rugoopata, oa iava varao vuri vovouro oisoa purapata. Oara-ia Pautoa-pa oisoa tauaivira toupata rerava keripaoro. <sup>22</sup> Uva vo vokio-ia oiso toupatavoi, Rera vate iraraaro visii. Uvare oisi-a eisi osa visii pierava, vo osa Oviito siporeva oiso ra kopiiro oiso rutu osa oirato akukutoavi. Oire uva va-a vao oa purareva, oiso ra rera vo vuraaro iare koatataverea roroiovira raga torevoko vovouvira rutu toupasa rera ruvara-ia, vo osa viapau vuriara vai visii-ia. <sup>23</sup> Oiraopavira rutu osa eisi ragavira va purareverea, vo rara Vearo Siposipo oirao piepaoro rutu va vituaro-ia goruvira rutu pitupata. Teapi oearovu gisipoaro uvupaoro oirao pie vovouro oavisii iava vasepata. Vo vovouro oara ou rovotava rutu voari vo uva Vearo Siposipo oirao pie rovota va uvupaoro. Ari ita, eva raga ita Vearo Siposipo oa iava ragai raga ita vao-ia Pol oiso siposipapaaveira, uvare oiso rutu toupaaveira, Ragai-a kovopato vo reo vao sikasikapaoro uvarovu ruture vo rasio-ia.

#### *Pol Ira Kolosi-pa Irara Tauvareva*

<sup>24</sup> Roru iraopaavoi uvare visii tauvapaoro riroa siitoka oupaaveira. Ositoka vao oa-ia Krais vo siitokaaro uvui piepaavoi oiso osa pierava lotupa irara rutu tauvaoro. Uvare vigei raga ita-a vao-ia lotua iava varaura. Oa iava uvuipai ra vo siitokarei rutu ora tavosioro lotua tauvave rutu ora Krais. <sup>25</sup> Uvare ragai tovoreva Pauto visii tauvasa. Oa iava ragai vatereva vo kovo-ia, oiso ra va iava visii tavitavipaa vo reoro rutu iava varao rera vo reoroaro. Oa iava uvuipai ra vearoa rutu karekeperea visii-ia lotupa irara rera voeapro. <sup>26</sup> ♦ Ari ita, voari tuariri uva Pauto vo reoaro Krais vo kovoaro iava oreoa oisoa vatauvira rutu toupaive. Viapau oisoa irai voa vo reo-ia roroipoparo. Uva vo vokio-ia rera vaaro Vearo Siposipo kosi pieravorao, oisore ra va-ia taraiave voeao rera voeapro. <sup>27</sup> Eake iava? Uvare Pauto oiso ruiparoepa ra rera vo reoaro vatau reo voeao iare rera

---

❖ 1:14: Hi 9:16-28    ❖ 1:15: 2 Ko 4:4; Re 3:14    ❖ 1:17: Hi 2:9-10    ❖ 1:19: Jo 1:16    ❖ 1:20: 2 Ko 5:18-21  
❖ 1:26: Ef 3:3-4

voeaaro karekepe ora poeraoro vao riro goru reo rutu. Oa peira oirara rutu vaaro. Oa vao porearo oiso toupaiveira, Krais-a eera ira tootoovira rutu touparevoi visii iava sopauraia. Ira-a vao vituaro, oa iava rera vo kerariaro iava vearovpara outaverea rara, evara oarare tuepavioveira raripaoro. <sup>28</sup> Uva eisi osa iava vegei oearovu rutu oirara tavitavipaveaira Krais vaisiaro iava. Oa iava oirara rutu vatatopo piepaveaira voea siposipopaoro riroaia taraia vaore, ra viapau vavagisipaave. Ra va iava rera-ia taraipaave, oa iava rera vo vuraaro iare koataaverea. Viapau oiso ragavira taraipaoro-a osa voeao veu kakaero. Ari oiso rutu-a osa voeao riropa irara vo Krais tapo kataivira toupasa. <sup>29</sup> Uva va purapasa riroa rutu kasivaria kovoa purapaaveira. Oa iava Krais vaaro riroa gorua vatepareveira va purapasa, vo goruo oa-ia ragai iava sopaua goru piepareveira rutu.

## 2

*Oirara Rutu Uvuipaa Ra Goruvira Rutu Oirao Piepaive Kuuvu Reorore Isivapaoro*

<sup>1</sup> Oire uva oiso ruipaparai ra vao-ia vearovira rutu tarai iraopata, osa ragavira kovoava visiipa kasivarivira rutu, ora voeaopa tapo Leodisia tou irara, ora oeavupa tapo voeao oea viapau oiso ragai iava oisoa puaua kekepaive. <sup>2</sup> Uva oiso osa ragavira kovopaoro rirovira rutu voeare rugorugoo iraoparai, auere ra voea iava sopaura oaive goruvira rutu torepe. Ra va iava ora voea iava voearopa siraopa vovou tapo purapaive katai vovou ragaia, vo rara vearovira rutu roroiovira Pautoa-ia taraipaave. Oa iava uvuipaa ra vakuvaku rugoorore isivapaave. Osa iava uvuipaa ra Pauto vo reoaro-ia vatau reo taraipaave vo reo oa Krais raga iava toupaiveira. <sup>3</sup> Va vituaro iava uvare rera raga Krais ira ruvara-ia taraiara rutu toupaiveira. Ira raga uvuiparoi ra oiraopa rugooro rutu kosi piepareve vara vatepaoro.

<sup>4</sup> Eisi osa iava oiso visii tavipaavoi, Opeita iravupa ora visii iava vasepata ro ira uvuiparoi ra kuuvu rugooro iare visii piro pierere. Viapau rutu oiso ra rera vo reoaro uvupata. <sup>5</sup> Ari ita, ragai visiipa tauaivira toupaavoi. Uva oisi-a oiso osa toupaoro visiire touvira rugooparai. Vo uvare torevokovira rutu visii vo touaro-ia toupaoro, oisi torevokovira Krais oirao piepataveira goruvira rutu. Opitupitu-a eva visii vaaro oa-ia rirovira rutu visii-ia rorupaaveira vokiara rutu-ia.

*Vigei Rutu Uvuipavie Ra Krais Tapo Ora Tavosipavio, Oa Iava Uvuipavie Ra Oiraopa Tootoo Oupe*

<sup>6</sup> Ari ita, visii rutu oiso purataepa, “Krais-a vigei rutu Turaroaro.” Uva va-a eva osa rerava oisi pietavoiva, uvui iraopatai ra ora tavosivira rutu rera tapo toupata. <sup>7</sup> Eisi rutu toupaoro uvuipatai ra oiso toupata ikoto. Ro ikoto ira oisiri rutu rokopareveira rasitoa-ia avekeara-ia pitupasa. Oire uva oisi-a eisi osa eera ikoto osa ragavira ita visii Krais-ia pitupataveira, eera ira oiso toupareveira osa rasito ora aveke. Osa iava uvuipatai ra kovapata riropaoro rera-ia gorua oupaoro. Oa iava uvuipatai ra igei vo siposiporoaro sirova utupaoro visii vo vovouaro oirao pie vovouro goruvira rutu karekepe. Osa iava uvuipatai ra oisi toupaoro vuurapa vaisi purapata Pautoa-ia vo vokiara rutu-ia.

<sup>8</sup> Oire ora vatastopo iraopata vaopa, teapi irai visii-ia kokararo visii ivuoro kuuvu reo vai uvusa vuria vai. Vo reoro oara ora voea raga vo rugorugooro iava karekepaiveira, oara ouiva vova avu iraraaro voeao vo rasio-ia. Viapau oiso vo vara ouiva Krais ruvara-ia.

<sup>9</sup> Oa-a vao porearo oiso toupai, uvare Krais iavirava Pauto vo vovouaro vituaro karekepareveira viaevira rutu oiravira toupaoro. <sup>10</sup> Ra va iava rerava ora tavosipaoro Krais ovoievira rutu Oiraopa Tootoo rutu oupata. Uvare rera raga-a ira reipa irara rutupa reiparoveira. Rera raga-a ira turaro irara rutupa turaroparoveira. <sup>11</sup> Uva va-a vao osa rera tapo ora tavositaiva, ora visii iava rakari verataepa. Ari ita, viapau oiso rera vo reesiaro rakariua-ia toupaiveira oa verapaiseira oirara. Viapau. Asi voa sopaura oavisii rutu sovara-ia. Uvare rera raga Krais ira vuri vovou vo goruaro tokoreva vao oa oisoa sovara-ia toupata. Oa iava viaevira rutu toupatavorao varaua raga vaaro vuria

<sup>◇ 1:28:</sup> Kl 3:16; 1 Ko 2:6-7    <sup>◇ 1:29:</sup> 1 Ko 15:10; Ef 1:19    <sup>◇ 2:2:</sup> Fl 3:8    <sup>◇ 2:3:</sup> Ais 45:3; Ro 11:33    <sup>◇ 2:5:</sup> 1 Te 2:17; 1 Pi 5:7-9    <sup>◇ 2:6:</sup> 1 Te 4:1    <sup>◇ 2:8:</sup> 1 Ko 8:9; Ga 4:3, 8-11

kavuoro. <sup>12</sup> Ari ita, oirara visii-ia baptaisa puraiva vao oa iava oiso rutu toupatavoi visii ita, Krais tapo kopiitaepa. Oa iava rera tapo tova-ia rokotava. Oa iava vorevira rera tapo ita toretaepa. Vao iava osa Pauto vo goruaro rutu oisoa oirao pie iraopata, vo goruo oa iava Krais vorevira tore piereva rikui iava. <sup>13</sup> Ari ita, kopiivira rutu oisoa toupata voari tuariri, uvare vuri vovou oisoa purapata. Uvare ratau tou irara visii, vo rara viapau Reo Taisi-ia taraipata vao Pauto vaaro. Uva vo vokio-ia Krais raga-ia visii tore piereva. Oa-a eva vituaro iava Airepa Tootoo rutu vaterevora Pauto vigeipa vuriara veraoro vigei sopaaro iava. <sup>14</sup> ♦ Ora vao tapo osa rera raga Pauto varaaro reo goruro oara oisoa gasipata, varao-ia oara oisoa oiso purapape, “Opeita vao purapata.” Eva-a oa vituaro iava oreorovu toupai Reo Taisi-ia oa oiso purapai, “Vuri pitupituro rutu purapataveira visii.” Uva Pauto evo reoro rutu verareva vo osa Krais kopiroepa evao parikou-ia. Uvare Krais-a ro ira vigei vaaro oureva varao vuriara oavi vo voriaro ouoro. <sup>15</sup> Uva va-a vao osa Krais evao parikou-ia kopioro Seten vo goruaro-ia putereva ora voeao pau tugara irara. Osa iava viapau oiso oai rera-ia putepaiveira. Viapau. Ari evoea rutu tovoreva ora rera kokotoaro reroaro. Oa-ia voeao Seten vase arii piereva rutu vo oirara rutu osireiaro-ia.

<sup>16</sup> ♦ Uva oisi-a eisi osa iava viapau uvuipatai ra ro reoaro uvupata ira visii togapareve varao iava visii varaaio aiaora, ora uukoara, ora vo vokiro ovokiroa reesipataveira ora visiipa oiso, tugoropa voki-a vao, ora vo aio airepatoa iava kekira, ora vao Sabat voki. <sup>17</sup> Evara reo goruro oara vurapaoro Pauto vo kovoaro oisoa kekepaive urauravira okovo touvira purapareve. Oire eva isivaaro iava Krais urioroepa ro Oiraopatoa rutu, ro ira-ia Pauto vo kovoaro oiraopavira rutu roroio pierevora. <sup>18</sup> Oire opeita oearovu vo reoroaro uru piepata, vo osa visiire oiso purapaave, “Vuri irara-a visii, uvare viapau oiso enselpa irara-ia vuurapa vaisi purapataveira osa ora visii iava varauraaro tekipata.” Uvare visii keaoro oiso puraaverea, “Igei-a vao igoa riro tarai rutu ouiova urusiara-ia. Uva eakepa visii tapo viapau oiso pie asapataveira?” Uva oisi-a eisi osa piepaoro ora voeao raga ora riro piepaaveira vo oirara raga vo rugorugooroaro-ia. <sup>19</sup> ♦ Ari ita, oa-a eva oa vituaro iava Krais-ia pitu arapa ora voeao iava vasepaiveira. Rera raga ita-a ira orekerovu rutu kukuearo. Osa toupaoro vigei-ia orekerovu rutu aioara vatepareveira varauapa vouao lotuua. Ira raga-a ira vigei rutu takutakuvupareveira, oisore ra kataiuua raga-ia varaua toupape vigei rutu vao-ia lotuua. Oa iava uvuipavie ra riropavio, vo rara vigeipa Pauto gorua vatepareve.

### Krais Tapo Kopii Ovoitaepa

<sup>20</sup> ♦ Ari ita, kopiitaepa Krais tapo. Oa iava varao kavutava oara-ia visiire oiso oisoa purapaave, “Varao sirova utupata, ra vara iava oriruvira rutu toupata.” Uva eake rutu-a vao vo rasio iava oare uvuipatai ra touvira rutu vara sirova utupata varao oiso-ia, <sup>21</sup> Opeita vara-ia pitupata, ora opeita vara-ia togovipata, ora opeita vara ravapata vara sovopaoro. <sup>22</sup> Oara-a evara vo ragava rasitoa-ia. Va vituaro iava vosa aioara togovipata, oire ra voava vara opesi pie ovoipata vara aiopaoro, uvare akukupapara raga evara vo rasio iava. <sup>23</sup> ♦ Uva voeao oea oisoa evo pitupitu purapaive oea oiso rutu kekepaa viroveira, riro tarai irara ora oea lotu purapaaveira tapo. Uva oiso purapaaveira, “Enselpa irarapa taku viropata voeao vaisiaro kae piepaoro. Ora uvui iraopatai ra ora vaisiaro gare piepata. Ora varaura vo ruipaaro reipata vo osa visii iava varaura oavisii upopata.” Ari ita, akukupapara raga evara reo goruro. Oara viapau uvuipai ra voeao iava varaura tokipaive. Eake iava? Uvare touvira varaura vo ruiparoaro reipapeira rutu voeao vo rugorugooroaro piro piepaoro.

### 3

### Pauto Ovoievira Krais Tapo Vigei Tore Pie Ovoireva

<sup>1</sup> ♦ Oire vo osa Pauto visii tore pie ovoireva Krais tapo, oa iava visii rutupa Airepa Tootoo rutu vate ovoireva. Uva oisi-a eisi osa iavirava uvuipatai varao vearovira rutu rugoopata oara peira vuvuiua-ia tuevira. Vovio uva toupareveira Krais reia-ia paupa vao

♦ 2:14: Ef 2:14-18 ♦ 2:16: Ro 14:1-3 ♦ 2:19: Ef 1:22, 4:16 ♦ 2:20: Ro 6:3, 5; Ga 4:3, 9 ♦ 2:23: Ro 13:14

♦ 3:1: Ro 6:1-10; Sam 11:1

Pauto voaviaro oirapapa varata iava. <sup>2</sup> ♦ Oa iava viapau rutu uvuipatai ra varaore vo rasitoa-ia rugoopata. Viapau. Ari varao ragare rugoo iraopata oara epao vuvuiua-ia. <sup>3</sup> Aue iava rara oiso rutu toupata osa voeao kopii irara oea rasito vo touaro kavupaiveira Airepa Tootoo rutu oupasa Krais tapo ora tavosipaoro. Osa eisi uvuipatai toupatavora, Pauto visii orirupareve vokiara rutu-ia. <sup>4</sup> ♦ Oiraopavira rutu uvare visii vaaro-a Oiraopa Tootoo rutu vituaro rera ro-ia Krais. Uvare vorevira vorerovere, ra oisi vo tootoo outa ue tapo rera vo kerariaro vo aviavaro.

### *Vao Iava Airepa Tootoo Ora Tuariri Tootoo*

<sup>5</sup> ♦ Varao-ia vo rasio iava oara kopii piepata oara-a varao-ia oiso-ia, kaakau kare vo pitupituro-a vao oa uvuipatai kavu iraopata, ora otopa rugooro, ora opeita iravure riiriipare oirato vatauvira rera oupasa ora riakova oira oupasa, ora vao tapo opeita iiruko vovou purapata, ora opeita oearovu varaaro riiriipata, ora oiso tapo ra viapau oaravu vuri pitupituro purapata ora visii raga-ia vovoupaoro orekerovu-ia vearovara varao vo rasio-ia touara. Opitupituroa-a evara porearo oara-ia Pauto tovopataveira utupaua rara varao raga vo touara vo rasio-ia ira piepataveira, oiso rutu osa ro ira tokarasiara raga oirao piepareveira Pauto tovopaoro rutu utupaua. <sup>6</sup> Vosa vo pitupituro evara purapaiwe oirara oara voriaro voeapa tuuvira vaterevere Pauto voeare kasipuoro. <sup>7</sup> Ari ita, tuariri rutu opitupituroa evara oisoa purapata, vo osa vo vuuta-ia eva vara visiipa riropape vo rasio-ia.

<sup>8</sup> Ari vo vokio uvuipatai ra vara ruture isivapata oiso, kasipu vovoua vao-ia, ora aveave vovoua vao-ia, ora vuri rugorugoo, ora takau reoa vao-ia oearovu togapaoro reoararia, ora tapo ora asapapa reoro eakapata, ora arii asa reo puraro eakapata tapo. <sup>9</sup> Ora opeita oearovu keakeapata, uvare tuariri evo pitupituro sirova oisoa utupata oa isivaaro iava varare isivataepa vara kavuoro. <sup>10</sup> ♦ Uva vara iava ora tavariooro airepa vovouro sirova utupataveira ro airepato varaaro ira airepavira ita purareva Pauto. Eisi ita osa ragavira visii tauvapareveira Pauto oiso ruipapaoro ra topatopa pievira torevoko vovou rutu purapata. Oa vituaro iava uvuipatai ra torevoko vovou sirova rutu utupaoro va iare tutuu piepata vao Pauto vo vovouaro vioepaoro. <sup>11</sup> ♦ Ari ita, uvare vigei rutu-a vao-ia vigoa airepa pieravorao Pauto. Oa vituaro iava viapau oiso pisipisavira toupai. Viapau. Vigei-a katai irara raga Krais vaisiaro sovara-ia oiso-ia, ratau tou irara voeao, ora Jiu-a voeao, ora voeao oea oisoa ora voea iava rakari verapaave ora reesipaoro, ora voeao oea vo pitupitu eva kavuiva, ora voeao tauai rutu oea toupaiveira, ora voeao oea vegoaroro toupaiveira, ora voeao oea riro vaisivira toupaiveira, ora voeao akaipa keke irara. Eake iava? Uvare Krais-a kataitoa raga vigei rutu vituaro. Oa iava vigei rutu vaeavira roosikevira rutu toupai.

### *Vigei Uvui Iraopavie Ra Oearovupa Siraopa Pitupitu Pura Iraopape*

<sup>12</sup> ♦ Pauto visii kaviko iraopareveira oare visii roporeva oiso ra oiso rutu toupata, Rera voeapro. Oa-a eva iava uvui iraopatai ra oearovivupa siraopata. Ra oearovure ita rugorugooopaoro voea tauvapata. Ra oisi voeao piepaoro ora visii iava vaisiara oavisii vara piepata voeao reroarovire. Opeita vagevagepavira kasipupata, ari uvuipatai ra voeao ateate pie rovopata. Oa iava uvuipaaai ra visiire vorevira ita kave vovou puraive. <sup>13</sup> Ari ita, vosa iravu-ia siraao vo vavataaro touve, oa iava visii rutu uvuipatai ra reravi vo vavataaro kapokaporota rera tauvaoro. Ora vosa irouto ro-ia visii-ia vuria vai pura rovoreva, ira iava uvuipatai ra rerapa siraota va veraoro rera iava. Oiraopavira rutu vosa iravu iava oisi vuria verata, oiso rutu ita-a osa visii iava Krais vuriara vera rovoreva visii rutu kavikooro. <sup>14</sup> Ari ita, uvare riroa rutu-a va vao-ia kaviko vovou. Ovovou-a vao-ia kaviko vovou orekerovu rutu vearopa pitupituro vituaro rutu, oara uvuipai ra vaeavira rutu ovoeivira toupaive. <sup>15</sup> ♦ Vosa eake avu visii-ia karekepe, oa sirova Krais uvuiparoi ra visiipa vare kave vovou vatereve, vo rara goruvira torevoko vovou-ia vare kerisi iraopata. Uva Pauto visii oureva vaore oiso ra kave vovou purapata. Ovovou-a eva oa-ia uvuipatai ra kataia rutu-ia varaua toupata vao-ia lotuua vearo vaisi purapaoro Pauto-ia vokiara

---

❖ 3:2: 1 Jo 2:15-17   ❖ 3:4: 1 Te 4:13-18; Jo 14:6   ❖ 3:5: Ro 6:13; Ef 5:3,5   ❖ 3:10: Ro 12:2; Ef 4:23   ❖ 3:11: Ga 3:26-29   ❖ 3:12: Ga 5:22-23; Fl 2:3; 2 Ko 6:6   ❖ 3:15: Fl 4:7

rutu-ia. <sup>16</sup> Vo reore rugorugoo iraopata oa toupai ro iava Krais, oisore ra vo reo rutu sovopaoro utu iraopata. Oa iava uvuipatai ra vearo rugoo raga-ia oearovu tarai piepaoro voearopa oisi vara kareke piepata varao torevoko vovouro. Oire vo osa oisi piepaoro uvuipatai ra vearo vaisi purapata Pautoa-ia Tugoropava-ia erapaoro, ora o erava iria-ia vuurapa purata rera-ia. Ora o iria-ia Pauto vo reoaro vieita. <sup>17</sup> ♦ Ari vosa eakero avu purapata ora vo osa eake reoro avu tapo purapata, oara rutu-ia uvuipatai ra vo raga vara purapata Turaro Jisas vaisiaro sovara-ia. Oa iava rera tapo ora tavosipata visii rutu, vo osa Pautoa-ia vigei Aitearo vuurapa vaisi purapata.

#### *Oirato Vo Vovouaro Iava Vo Osa Oearovu Tapo Vearovira Toupareve*

<sup>18</sup> ♦ Visii riakora uvuipatai ra vatuua irara oavisii vo reoroaro uvu iraopata rutu. Vosa oisi eisi piepata, oa iava uvuipatai ra Turaro vo vovouaro rutu sirova utupata. <sup>19</sup> Ra visii tapo oirara uvuipatai ra riakora oavisii kaviko iraopata rutu vairoropa siraopaoro. Opeita vo riako torevokopata kasipu reoro-ia.

<sup>20</sup> ♦ Ora visii kakae vure visiigoa aite irara oavisii vo reoroaro uvu iraopata, vo osa vara sirova utupata. Vosa oisi piepata, oa iava uvuiparoi Pauto ra visii-ia rorupareve rutu. <sup>21</sup> Ora visii aite irara opeita kasipu reoro rutu-ia ovii irara oavisii torevokopata. Teapi riro vavatapara vatepata voeapa kakae vure oara-ia pasi viapau uvuipaai oiso ra vara kaepaive.

#### *Pol Vo Reoreo Purareva Voeaopa Kovopa Irara Ora Tokipa Irara*

<sup>22</sup> ♦ Ora visii kovopa irara visiigoa uvuipatai ra voearo vo reoroaro uvu iraopata oearoa visiipa reipaaveira. Ra opeita kasivarivira rutu kovopata vo vuutao raga-ia oa-ia visiiva vurapaive voeao oea visii tokipaiveira, vaore rugoopaoro ra visiire oiso purapaave, "Akoea, ari vearo kovoto ro-ia." Ari ro raga-a ira-ia rugoopaoro uvuipatai ra oearovupa vearo kovo rutu purapata Turaro Krais. <sup>23</sup> Iu, vosa aa vo kovo avuo vao oa kasivarivira purapaoro rera ragare rugoopata Jisas, ra oiso purapata, "Oiraopavira rutu, ira-a ro ragaipa reiparoi ira ragaipa vo kovo vatereve." Uva osa eisi vovoupaoro uvuipatai ra oearovupa kovopata voearo oearoa visiipa reipaaveira. <sup>24</sup> ♦ Oa vituaro oiso toupaivoi, Visii-a Krais-pa kovopa irara. Ari ita, uvare taraipatai visii vaaro voria toupaivoi tuevira oa vaterevereia rara visiipa. <sup>25</sup> ♦ Pauto oearovu rutuva vurapareveira roosikevira rutu voeа rovirieipaoro. Oa tapo eva vituaro iava oiso toupaiveira, Vosa irai visii iava curia vai purareve, ira tapo ita ora rera vo voriaro oureverea va sirova eva.

## 4

<sup>1</sup> ♦ Visii tapo reipa irara visiigoa ora visii voearopa kovopa irara torevoko pitupitu vearoa purapata vaeavira rutu. Eake iava? Uvare oiso taraipatai, Visii reraaro epao reito ira vuvuiua-ia toupareveira.

#### *Goruvira Variripa Pitupitu Ora Torevokovira Vokapasa Tapo*

<sup>2</sup> ♦ Uva visii uvui iraopatai ra goruvira variria vo pitupituaro rutu-ia pitu iraopata. Teapi rurapaoro variripata. Ari uvuipatai ra roroiovira rutu rugoopaoro Pautoa-ia vearo vaisi purapata vokiara rutu-ia. <sup>3</sup> Uva oisi-a eisi osa piepaoro igei tapopa variripata vaore, ra igeipa raiva karupareve oa-ia uvuipaiei ra siposipopaoro Vearo Siposipo iava vokaio. Ari ita, voari tuariri viapau oiso vo siposipo-ia vao taraiaepta oirara. Uva vo vokio karu piroi rutu va vao Vearo Siposipo Jisas Krais iava, uvare va karuavoi. Oa-a vao vituaro iava ragaiaevo-ia tuukepa kepa-ia. <sup>4</sup> Oire variria Pauto vo tauvaarore purapata, oa iava uvuiparai ra roroiovira rutu ragai vo siposipoaro vatepaa oirarapa. Aue iava uvare Pauto ragai roporeva oisi eisi va purapasa.

<sup>5</sup> ♦ Oire vosa oearovu tapo toupata voeao oirao pie vovou asa irara, uva uvuipatai ra voeapa ora vata topo piepaoro rutu oaravu vearovu pitupituro purapata voeapa. Opeita visii vo vuutaroaro ropi ragapata vo osa viapau voeа tauvapata. <sup>6</sup> ♦ Oire vosa oearovupa

---

♦ 3:17: 1 Ko 10:31-33; Ef 5:20    ♦ 3:18: Ef 5:22-23    ♦ 3:20: Ef 6:1-4    ♦ 3:22: 1 Te 5:18; Ef 6:5-8    ♦ 3:24: Ef 6:2-8; 1 Ko 7:22    ♦ 3:25: Ef 6:8-9; Ap 10:34    ♦ 4:1: Lev 25:43, 53; Ef 6:9    ♦ 4:2: Ro 12:12; Fl 2:7    ♦ 4:5: Ef 5:15-16    ♦ 4:6: Ef 4:29; Mk 9:50; 1 Pi 3:15

reo vatevate vovoupata, ra vearo rugoo rutu iava voeapa reoreota. Ra tapo vearovira rutu taraipaoro voea vo akeroaro aatopata torevoko reo-ia.

*Pol Tikikas Vaio Ora Onisimas Arureva*

<sup>7</sup> ☩ Oire uva oavu-a vao-ia oa iava visii tavipaavoi ro iava vigei araokotoaviaro Tikikas. Ira oisoa kasivarivira rutu ragai tauvapaoro kovopareve Turaro vo kovoaro purapaoro. Ira visii siposiporevere rara ragai iava. <sup>8</sup> Oa iava visii iare rera arupaavoi vaore, ra igei vo touaro iava uvuoro visii iava vovouisiro varaatape. <sup>9</sup> ☩ Uva vaiterei rutu-a vaitereo visii iare uriopasiei rara ora ro Onisimas iravu ita vigei araokotoaviaro. Ira tapo ita oisi kasivarivira rutu oisoa kovopareve reasi assavira. Eera-a visii raga iava rera ira tapo oisi raga ita igei vo touaro iava visii tavitaviparevere rara.

*Pol Vearo Voki Rutu Purareva Voea Rutuva Voeao Kolosi Vata*

<sup>10</sup> ☩ Aristakas ira ragai tapo toupare vo-ia tuukepa kepa-ia vaiterei ora Mak, Banabas raovutoaaro, aiterea tapo visii-ia vearo voki purapasivoi. Ro Mak ira iava voari tuaririvi visii taviaava, oiso ra rerava sekanpata rera vearovira rutu tokipaoro. <sup>11</sup> Uva iravu ro Jisas ira raga vaisiaro-a ro Jastas ira tapo visii-ia vearo voki puraparevoi. Uva vo peva raga-a vao-ia Jiu iava voea oea ragai tapo oisoa kovopaive Pauto vo Saraaro kova piepaoro. Oearoa oisoa rirovira rutu ragai tauvapaive riroa vavata kaepaoro.

<sup>12</sup> ☩ Ari iravu-a ro visii iava rera Epafras ira tapo visiiva vearo voki puraparevoi. Ira tapo oisoa Krais Jisas vo kovoaro purapaoro oisoa vokiara rutu-ia variriara purapareve visiipa kasivarivira rutu, auere ra vearovira katai vovou rutu-ia torepata goruvira oira vasivira. Ra oisi vo vovou iava katai rugoo raga-ia Pauto vo ruipaaro rutu sirova utu ruipasa aeupata. <sup>13</sup> Ari ita, ragai oisoa rera teeriopaa rutu vo osa oisi kovopareve. Oa iava ragai rera iava visii tavipaavoi oiraopavira rutu vao iava osa visiipa kovoreva voari tuariri, ovusa rera teeriopaavora rutu. Uva viapau oiso visii ragapa kovoreva. Ari voeareo tapopa kovoreva Leodisia-rei ora Hirapolis vata. <sup>14</sup> ☩ Ora ro Luk ira oisoa igei ruvarupareve ira oisoa kavikopaio rutu, vaiterei ora Dimas aiterea tapo visiiva vearo voki purapasivoi.

<sup>15</sup> ☩ Ragai vaaro vearo reo topa piepata voeaopa araoko irara oavi oea Leodisia-ia toupaiveira, ora o Nimp, ora voeao oea oira vo kepaaro-ia lotu purapasa uriopaaveira.

<sup>16</sup> Oire vo pasia vao-ia oa viei rovopatavoi, ra va iava va topa pievira vateta ita voeaopa oirara lotupa irara oea Leodisia-ia toupaiveira. Oa iava voea tapo ita uvuipaai ra va vieiive. Oa iava uvuipatai ra tuuvira aia ita visii voea vo pasiaro vieita rara ita. <sup>17</sup> Oire Akipas tavipatavoi oiso, “Vo kovo opesi pieri oa vaterева vigei reraaro Turaro viipa.”

<sup>18</sup> Ari ita, ora ragai raga vavaearo iava vo rigato puraavoi oiso-ia, Vearo Voki ragaiva Pol. Ragaire rugoopata ragoa vo toupaavoi tuukepa kepa-ia touvira. Pauto visii viraakoreve ora ragai.

Eisivi raga osa ragai vo reoaro opesi piepaavoi.

Ragai-a vao, Pol.

## 1 TESALONAIKA Irapa Reoro Vo Vukuo Iava

Pol vo pasio rigatoreva tavete tapi touoro vo Korin urui-ia 50 yia Jisas vo kavauaro isivaaro iava. Taraiparoepa voeao-ia Jiu-pa irara oea vuria rutu oisoa purapaise lotupa irara-ia oirao pie vovou irara. Eva-a oa iava vo rigato purapareva voea varaaro oirao pie vovouro goru piepasa. Uva uei iava tapo rigatoreva Krais vo vorearo iava vore vo rasio oirao pie vovou irara ou piesa vuvuiua iare (1 Te 4:13–5:11).

1. Pol vearo vaisi purareva Pautoa-ia voeapa Tesalonaika vata, 1:1–10.
2. Pol vo kovoaro iava vao oa purareva Tesalonaika-ia, 2:1–3:13.
3. Oirao pie vovou irara uvui iraopaa ra airerei vovouvira toupaive, 4:1–12.
4. Turaro oirao pie vovou irara rutu ousa vorevira voreroverea, 4:13–5:11.
5. Ovoiopa reoro Pol varaaro, 5:12–28.

<sup>1</sup> Ragai-a vao-ia Pol ragoa vo pasio rigatoavoi vaitereo tapo toupaoro Sillas vao ora Timoti. Origatoa oa puraavoi visii rutupa lotupa irara visiigoa evoa Tesalonaika-ia toupataveira, visii eva Pauto Aite voearo ora Turaro Jisas Krais. Uva variripaiei visiipa oisore ra visiipa tauva vatesi ora gavaurea.

### *Voeao Tesalonaika-pa Irara Oisoa Oirao Piepaive Rutu Torevokovira Rutu Toupaoro*

<sup>2–3</sup> Igoa peva vao igoa vokiara rutu-ia Pautoa-ia vearo vaisi purapaioveira visii iavirava. Uva visii vaisipaioveira variriara-ia, vo rara visii vo pitupituarore rugoopao, vo osa visii varaaro-ia oirao pie vovouro oavisii goruvira kovopataveira, ora vo osa oearovupa siraopaooro voea tauvapataveira. Ora vao-ia tapo visii vaaro rari vovou rutu, vo osa vigei reraarore Turaro Jisas Krais tuepaoro eisi goruvira raripataveira vo Pauto Aite oavi osireiaro-ia. <sup>4</sup> Oiraopavira rutu araoko irara oaio visii kavikopareveira rutu Pauto. Uva visii-ia oisi taraipaiei oiso, Visii eva visiigoa roporeva Pauto ora rerapa, oisore ra oiso rutu toupata rera voearo.

<sup>5</sup> ♦ Vao iava uvare Vearo Siposipo iava siposipoava visiipa. Ari ita, viapau oiso reo turituri raga oa siposipoavora visiipa. Viapau. Ari gorua rutu tapo-a Tugoropato Uraurato iavirava. Uvare ragai vo reoaro-a vao oa oirao pierava rutu vigei rutupa ora visii. Iu, uvare igei vo pitupituroaro-ia oisoa taraipata vo osa toupaiovora evoa visii tauvapaoro.

<sup>6</sup> Uva igei vo rugorugooroaro sirova utuoro orekerovu oisoa purapata Turaro vo rugorugooroarova torevokovira. Uva Pauto vo reoaro-ia pitutavoiva, oearovu visii vuri piepaivora. Ari ita, oisoa rorupata rutu vo reoro-ia varao oara vira pierava Tugoropato Uraurato visiipa rorua tapo. <sup>7</sup> Uva oisi-a eisi osa ragavira va-ia ora visii-ia ovoovoa puratava voeaopa oirao pie vovou irara, oisore ra oisi va kekepaoro goruvira oirao pie vovou purapaise va sirova utupaoro, voeareo oearea Masedonia Provinssarei-ia toupaiveira ora Grik. <sup>8</sup> Aue vituaro iava uvare Turaro vo siposipoaro-a oa oiso rutu ora sikataepa osa toiva gurukoaro oa ora sikataepa voraro ruture. Ari ita, avaepa voare vo Masedonia-ia ora evoa Grik-ia. Oa iava voava uvarovu ruture puteva, oiso ra oearovu voraro va iava uvuoro visii varaaro oirao pie vovouro-ia taraipaave rutu. Oa vituaro iava viapau oiso uvuipaiei ra oearoipa ita siposipoio. <sup>9</sup> ♦ Eovea oea oisoa visii iava igei siposipopae, vo osa visii tapo oisoa toupaio. Aue iava uvare vearovira rutu oisoa igei tokipata. Ora varao iava tapo osa ora visii vo kovoroaro varao tokarasipa kovoro tavariotava oiraopatoa rutu iare Pauto ro irapa kovopataveira. <sup>10</sup> ♦ Ora uei tapo osa rera oviitoaarore tuepataveira ro ira vuvuiua iava vararoverea. Eera ro Oviito Jisas ira vorevira tore pierava kopii tapi iava. Ro raga ita ira vigei virivaripareveira osa iava viapau Pauto vo kasipuaro vigei-ia pou piroverea. Oa-a eva voeao vuri vovou irara-ia pou piroverea.

♦ 1:5: 2 Te 2:14; Kl 2:2    ♦ 1:9: 1 Ko 12:2; Ga 4:8    ♦ 1:10: 2 Pi 3:12; Ap 2:24; Ro 5:9

## 2

*Pol Vo Kovoaro Iava Vao Oa Purareva Tesalonaika-ia*

<sup>1</sup> Oire va vao-ia araoko irara oaio, oa-ia tarai iraopata oiso-ia, Viapau oiso akukuvira raga visii iare tavete ragaiova. Viapau. Uvare igei vo kovoaro kueera visii-ia. <sup>2</sup>◊ Uva vao-ia tapo oiso ragavira taraipata rutu osa Filipai-ia oisoa toupaio, uva oisoa oearovu igei vuri piepaive rutu igei tovipaoro. Uva va-a eva oa iava Tesalonaika iare topa uviroiepa. Uva evoa ita oearovu oisoa igeire ita kaureopaave. Ari ita, Pautoa raga ira oisoa igei vo vovouroaro goru piepareve rutu, oiso ra visiipa Vearo Siposipo iava tavitavipaio. <sup>3</sup>◊ Uva torevokovira rutu va iava visiipa siposipoiova, ra va-ia viapau visii iava irai piro pieio. Viapau rutu. Ora aue tapo viapau ora igei raga-ia rugoopaoro vo siposipo puraiova. <sup>4</sup> Ari reoreopaioveira vao sirova utupaoro Pauto vo ruipaaro, uvare oisire igei oisi uvuireva. Oa iava oiso puraroepa igeire, “Uvuipatai ra Vearo Siposipo kaeta va iava siposiposa.” Uva viapau oiso vaore oisoa Vearo Siposipo kosi piepaio, oiso ra oirara igei-ia rorupaive. Viapau. Vaore-a oiso ra Pauto igeire oiso puraroverea, “Vearovira rutu,” vo rara oisi igei vo vovouroaro eveireve. <sup>5</sup>◊ Oire uva oisi ragavira taraipataveira osa oisoa visii tapo toupaio. Uva vo tou-ia viapau oisoa visii agoagoto ragapaoro toupaio. Ora oiso tapo igei-ia taraipata, Viapau oiso orekerovu riiriipa vovou vai oisoa vataupaio. Viapau rutu. Pauto vearovira rutu ragai vo reoaro-ia taraiparoi osa oiso puraparai oiraopavira. <sup>6</sup> Ari ita, viapau oisore vo kovo puraiova ra igei vaisiaro raga rei piepata visii ora oearovu. Viapau rutu. Oiraopavira, uvare igei-a Krais-pa kovopa iraraaro voeao igoa arureva igei sipooro. Eisi osa iava uvuipaiei ra oiso visii tavipaio, Igei vaisiaro rei piepata. Ari ita, osa viapau oisiei eisi. <sup>7</sup> Ari vao raga kave vovou rutu oa raga oisoa purapaio visii tapo toupaoro. Oiso rutu osa aakova oisoa kakaeto piepaeve vo osa vo kakae tokipaeve. <sup>8</sup>◊ Oa iava visii kavikopaoro oisoa rorupaio Pauto vo reoaro iava visiipa siposipopaoro. Ora vao tapo osa oisoa oiso rutu vovoupaio ra ora igei iava sopaura oaio rutu vatepaio visiipa, uvare oisoa visii kaviko iraopao rutu.

<sup>9</sup>◊ Oire uva apeisi-a araoko irara oaio? E igei vo kovoarore rugoopataveira vao-ia osa kovoiova visii-ia? Ari ita, uva goruvira rutu oisoa moni oupasa kovopaio vo ravireoura-ia ora vokiaroro tapo. Osa iava viapau oisoa igeipa orekerovu avu vai voripata, vo osa visii tapo oisoa toupaoro visiipa siposipopaio va iava vao Vearo Siposipo Pauto vaaro.

<sup>10</sup> Ari ita, igei vo pitupituroaro oisoa eveipata visii rutu ora Pauto vo osa oisoa rerapa goruvira kovopaio, ora vuri rugorugooro pura asavira. Osa iava viapau irai uvuiparoi ra oreoi purapareve igei vaisipaoro vo osa visii tapo toupaio visii vao visiigoa Krais oirao piepataveira. <sup>11</sup> Oire oisi-a eisi osa ragavira va-ia tarai iraopata oiso-ia osa katakataivira rutu oisoa visii kavikopaio oiso rutu osa aite irara roopavira kakae vurero oaive kavikopaiveira. <sup>12</sup>◊ Uva oisoa visii iava sopaura goru piepaio. Ora tapo visii sopapro oisoa varaata piepaio. Ora oisoa topatopa piepavira visii tavitavipaio, oisore ra vo touo purapata oa-ia uvuiparoi Pauto visii-ia rorupareve. Vao vituaro iava uvare visii roporeva oiso, Visiigoa koatataverea vore rera vo Saraaro-ia vao oa-ia rera vo kerariaro-ia rera tapo toupataverea.

*Voea Rutu Goruvira Oirao Pie Vovou Purapaoro Sirao Vo Vavataaro Oisoa Kaepaive*

<sup>13</sup> Oire uva oavu tapo-a vao-ia oiso osa visii iavirava Pauto-ia vuurapa vaisi purapaloveira vo vokiara rutu-ia. Aue iava uvare visiipa Pauto vo reoaro kaeiova. Oa iava va uvuoro ora visii sopaura oavisii-ia vo reo oriru ovoitava rutu. Uva oisoa viapau oiso rugorugoopata, Oiratoa raga vo reoaro vao-ia. Osa viapau. Ari oiso rugoo ovoitaepa, Pautoa rutu vo reoaro vao-ia, oreoa visii sopapro-ia kovopaiveira visii eva oirao pie vovou irara. <sup>14</sup>◊ Araoko irara oaio, uva visii viria outavora oearovu-ia ora visii raga iava voearo vova ora visii raga vo taereroaro-ia. Uva visii lotupa irara oiso rutu toupatavoi osa voeao oea Judia Distrik-ia oisoa toupaive Jisas vaisiarova. Uva va-a eva oa-ia viria ouiva rera vaisiaro iavirava voeao-ia Jiu. <sup>15</sup>◊ Uvare voea ita evoea Jiu oea Jisas upoiva rera kopii pieoro ora oeavu profet irara. Ari ita, igei tapo oisoa vuri piepaive rutu vo

◊ 2:2: Ap 17:1-4   ◊ 2:5: 2 Ko 2:14-17   ◊ 2:9: Ap 20:34; 2 Te 3:8   ◊ 2:12: Ef 4:1; 1 Pi 5:10   ◊ 2:14: Ap 17:5; 2 Te 1:4   ◊ 2:15: Mt 23:34-36

osa oisoa igei sigupaive. Oiraopavira rutu, uvare ora voeare Pauto kasipu piepaiveira rutu. Ora aue tapo osa oearovure oisi eisi oisoa kasipupaave. <sup>16</sup>◊ Igeire oisoa korukoru ragapaave oiso, Teapi ratau tou irarapa sipoipopoai vo reo iava vao Pauto vo reoaro. Oiso rugoopaoro, Teapi vo reo sirova utupaaera, oiso rutu pieive Pauto voeaaro. Oa vao vituaro iava kap agasiopa rutu varao iava vuri vovouro voea varaaro. Uva va vao osa agasioiva, oira vurapaoro rirovira rutu kasipu iraoparoveira Pauto, oisore ra oirapa voea opesi pie ovoirevereia.

*Pol Oiso Ruipaparoepa Rutu Ra Vorerivira Ita Voea Kekereve*

<sup>17</sup>◊ Araoko irara oaio, voviri visii arova avaiepa. Uva varaura raga ita, ovusa rugorugooara touvira rutu igei iava visiire rugoopapeira. Uva va vao osa visiire rugoopaoro raiva taraa ragaparaveira oiso ruipapaoro ra vorevira visii puaaro ita kekeia. <sup>18</sup> Rirovira rutu ruipa irao ragapaioveira oiso ra vorevira visii iare kareio visii kekesa. Vo osa viapau. Uva ragai vorevira karesa akeake raga iraopaaiveira, vo ovusa Seten raga vorevira ragaire korukoruparo. <sup>19</sup>◊ Ari ita, utupaua vigei reraaro Turaro Jisas vorevira voreroverea. Ra va iava rera puaaro-ia vigei rutu torevio vo vuuta-ia eva. Ra eake vai ouio igei? Ora eake vai iava vearo vovouio? Ora eake vai-ia rorua vai ouio? Ora aa vao oa-ia ora igei iava vaisiara rei pieiovorea? Ari visii iavirava raga. <sup>20</sup>◊ Uvare oiso rutu toupataverea, Igei vaaro keraria ora igei vaaro rorua.

3

*Pol Timoti Arureva Voea Iava Sopaura Goru Piesa*

<sup>1-3</sup>◊ Viapau rutu uvuipaiei oiso ra visii iare urioio evoa, uvare viapau raivaa vai igeipa. Uva va-a vao oa iava rirovira rutu rugorugooparaero vo toupaoro Atens urui-ia, oiso ra visii iare Timoti arua, ra visii iare urioro vo osa ragaipe vo raga. Ro Timoti vigei araokotoaaro ira Pauto vo kovoaro purapareveira vegei tapo Vearo Siposipo sipoipopoao oearovupa Krais vaaro iava. Uva visii iare rera sipoavoi visii vo vovouroaro oirao pie vovouro goru piepasa rutu. Teapi oearovu visii varaaor oirao pie vovouro iava visii kosi piepaive visiire kasipupaoro, ra va iava vo vovouro oavisii kavupata. Uva taraipatai va-ia vao osa Pauto voeapa vasepareveira, auere ra vigei-ia vuriara purapaiive voeao vuri irara. <sup>4</sup> Ari ita, vo osa oisoa visii tapo tou rovopoai uva voa visii taviiova oiso, Utupa visivi vuria oupere rara voeao ruvara-ia vuri irara. Oire uva taraipatai uvare oisi rutu eisi karekeepa. <sup>5</sup>◊ Uva visii-ia rirovira rugorugooapo Timoti aruava visii iare, uvare viapau rutu uvuipaiei ra visii varaaor-ia taraipaio oirao pie vovouro oavisii vo raga toupaoro. Uva rirovira rutu oiso rugorugooparaveira, Seten vai pasi visii-ia kokaraparoveira, oiso ra oirao pie vovouro oavisii kavupata. Oire ra oisi iava igei vo kovoaro akukupapavira rutu visii-ia tou ragapaiive.

*Pol Rorupareva Timoti Vo sipoipopo-ia*

<sup>6</sup> Oire uva va vao osa Timoti visii ruvara iava vorevira kareroeroa visii iava ragai tavitavisa. Uva vearo reo visii iava kaeoro kareroeroa goru oirao pie rutu iava visii vaaro vo Krais vaisiaro sovara-ia. Ora vao tapo iava osa oearovupa siraopataveira. Ora vao tapo iava osa visii iava ragaipa tavitavisa kareroeroa, uvare vearo vovou rutu purapataveira igei-ia. Eva oa vituaro iava igeipa oiso ruipapataveira rutu ra igei keketa. Osa igei tapo ita oisi ruipapaio oiso ra visii kekeio. <sup>7-8</sup>◊ Uva oisi-ia eisi osa iava igei iava vovouisiro varaatavira toupaiveira, vo osa vuri vovou vo siraoaro sovara-ia toupaio oearovu vovouroaro. Iu araoko irara oaio, visii varaaor iava oirao pie vovouro uvupaoro tootoopaei rutu, vo osa tavosivira rutu Turaro tapo toupataveira. <sup>9</sup>◊ Eva-a oa iava uvuipaiei ra vearo vaisi Pauto-ia purapai visii iavirava. Ari ita, rorupaiovoi rutu vo Pauto osireiaro-ia, uvare visii vaaro-ia taraipaiei vearoa rutu toua. Oa iava Pauto-ia vuurapa vaisi purapaiovoi rutu visii iavirava. <sup>10</sup> Vo ravireopa vokiro-ia ora vo vokiaroro uvaroa Pauto arepaioveira rutu oiso ruipapaoro ra visii iava puaara kekepaio. Ari ita,

◊ 2:16: Mt 23:32-33 ◊ 2:17: 1 Ko 5:3; 1 Te 3:10 ◊ 2:19: 2 Ti 4:6-8; 1 Te 3:13 ◊ 2:20: 2 Ko 1:14 ◊ 3:1-3: Ap 17:15 ◊ 3:5: 1 Ko 10:12-13 ◊ 3:7-8: Ef 6:11-17 ◊ 3:9: 1 Te 1:2

vosa visii varaaro oirao pie vovouro potepaive, oa iava uvuipaiei igei visiipa vara riro piepaio ita.

### *Pol Variriroepa Pauto Iare*

<sup>11</sup> Igei-a vao oiso ruipapaiei ra vigei Aitearo Pauto vaiterei ora vigei reraaro Turaro Jisas igeipa raiva vai purasi. Ra oai iava evoare torevokovira urioio visii iare. <sup>12</sup> ♦ Ora oiso tapo osa rirovira rutu oiso ruipapaiei ra visii varaaro siraopa vovouro riro piepareve rutu Turaro oavi. Oire ra vo vovouro iava oearovivupa siraopata ora visii iava voearo ora oearovu rutu. Eisi osa iava uvuipai ra vaeavira rutu touve igei vo vovouarova siraopa vovou. <sup>13</sup> ♦ Uva oisi-a eisi osa uvuipai ra toupaivora, sopaura oavisii uvuipa ra va iava visii iava vo vovouro goru piepareve rutu Turaro. Oa iava uvuipatai ra torevokovira raga rera osireiaro-ia kareketaverea Pauto Aite vo vokio-ia oa-ia vorevira kareroverea oirara rutu tapo rera voeaaro vigei reraaro Turaro Jisas.

## 4

### *Vo Toupai Toua Iava Vao Oa Iava Uvuipa Pauto Vigei-ia Rorupareve*

<sup>1</sup> Oire oavu-a vao araoko irara oaio tavipaiovoi. Igei ruvara-ia vo tarao outavora vao iava vearo tou oa-ia Pauto roru pietavora. Uva va-a vao oa iava goru pievira ita Turaro Jisas vaisiaro-ia visii oiso tavitavipaiovai, Uvuipatai ra eva-ia pute pievira oaravu rutu ita purapata vearopa pitupituro.

<sup>2</sup> Ari ita, oreoa-ia vao tarai reo taraiapatai oa visiipa vateiovora ro vaisiaro-ia vigei reraaro Turaro Jisas. <sup>3</sup> ♦ Uvare Pauto oisi eisi ruipaparoveira oiso ra oisi vara purapata oiso-ia, vo osa sopaura oavisii visii iava torevokovira raga toupaive, vo rara viapau otopa pitupiturore rugoopata vara purapasa. <sup>4</sup> ♦ Ari visii uvuipatai ra katakataipavira ora oupa pitupitu raga purapata. Oa iava uvuipatai torevokovira raga riakora oavisii oupata, oa-ia viapau vuria vai. <sup>5</sup> ♦ Vosa oisi piepaoro eisi, viapau oiso vo vovouo otopa purapata. Oa oiso toupaiveira voeao vaaro oea viapau Pauto-ia taraipaave. <sup>6</sup> Ora viapau oiso irai uvuiparoi ra vuria vai purareve ora irai araokotoa vaiaro-ia irai keakeapaoro, oiso ra rera putereve rera-ia. Oa-a vao oa iava voari tuariri visii taviiova. Vo uva varare evara ravaavira visii vosiiova oiso visii tavioro, Turaro voeao vorirevereo oea oiso vara vuriara purapaiiveira. <sup>7</sup> ♦ Uvare viapau oiso Pauto vare eva otopa pitupitu vigei roporeva. Viapau. Ari vaore-a oiso ra vearovira rutu roroiovira toupape. <sup>8</sup> Uva oiso toupai vo osa ro ira vo reore vao-ia isivaparo. Uvare eake-a? Viapau oiso oirara ragare oisi isivaparoveira eisi. Ari Pautoa-re ro ira visiipa Tugoropato Uaurato vatepareveira.

<sup>9</sup> Ari ita, oiso taraipatai viapau oiso uvuiparai ra vorerivira visii ita roroio piea vaore, ra ora visii araoko iraraaropa siraopata. Uva rera visii tarai pie ragaparevora Pauto, oiso ra oearovivupa ora visii iava voea kavikopata. <sup>10</sup> Ari ita, oiso osa oearovivupa piepataveira ita vigei araoko iraraaro voearo riro oirao pie vovou irara, oearoa voraro toupaiveira Masedonia Provins-ia. Uva oiso goruvira rutu visii tavipaavoi, Uvuipatai ra evo vovouia pute pievira rutu oisi piepata eisi. <sup>11</sup> Oire uva ora eaka pie iraopata. Opeita voraro vokapata oearovu vo rugorugooroaro torevoko ragapasa ora visii vo ruiparoaro raga-ia. Ari uvuipatai ra moni oupata ora visii vo kovoroaro-ia varao oara purapataveira ora visii vavaearo iava. Oiso osa voari rovoa-ia tuaririvi visii tavi rovoiovora. <sup>12</sup> Oa iava uvuipai oearovu oirao pie vovou asa irara oisi iavirava visii kekepaoro visiipa avivikepaave. Ora ae tapo ra viapau potepata aeua vearopara varao oara arepataveira oearovu ruvara-ia.

### *Turaro Vigei Rutu Ousa Vorevira Voreroverea*

<sup>13</sup> ♦ Araoko irara oaio, igei oiso ruipapaiei ra voeao-ia tarai iraopata rutu kopii irara vaopa, teapi rirovira rutu visii iava sopaura siraopape rutu voeapa oiso rutu osa voearo oearoa viapau Pauto oirao piepaoro gaupaiiveira. <sup>14</sup> ♦ Oiraopavira rutu oiso osa vigei va vao oirao piepapeira oiso-ia, Jisas kopiiroepa, oa iava vorevira va iava ora poreteroepa toreoro. Oa-a eva vituaro iava oiso ragavira rera oirao piepaioveira. Osa ragavira iava

◊ 3:12: 1 Te 4:1, 10    ◊ 3:13: 1 Ko 1:8; 1 Te 2:19, 4:17    ◊ 4:3: 1 Ko 6:18; Kl 3:5    ◊ 4:4: 1 Ko 7:2; 1 Pi 3:7

◊ 4:5: 1 Ko 6:14-20    ◊ 4:7: Hi 12:14; Lev 11:44    ◊ 4:13: Jo 11:11-27    ◊ 4:14: 1 Ko 15:13, 23

Pauto voea rutu voeao kare pierevereoa oea kopiipaaveira Jisas oirao piepaoro. Oea rera tapo kareaverea Jisas.

<sup>15</sup> ♦ Oire uva oiso ruipapaiei ra visiipa vao iava taviio oa iava Jisas tapiroepa rera vo siposipoaro-ia vo vokio iava oa-ia vorevira voreroverea vigei rutu ousa. Uva vigei vao vigoa tootoopavie iapau oiso voeapa iraviovereoa oea kopiipaaveira. <sup>16</sup> ♦ Viapau. Asi Turaro raga-a ira vuvuiua iava oiso keerapaoro vararo. Ora rovopatoa rutu reito enselto ira kaku pie rovorevereoa vo osa Turaro vaaro utave guruko pura piro. Ogurukoa isivaaro iava voeao oea Krais oirao piepaoro kopiipaaveira tore rovoaverea. <sup>17</sup> ♦ Uva evoea isivaaro iava vigei rutu vao vigoa tootoovira toupau vo vokio-ia voeava aivaroperea rukuta sovara-ia. Ra va iava vigei rutu Turaro iare pou virovio vo vuvuiua rutu ivaria. Uva voa-a evoa Turaro tapo toupaperea vokiara rutu-ia. <sup>18</sup> Oreoa vao-ia oa iava uvuipatai ra oearovivu tavatavipata. Ra va uvupaoro ora voeao iava vovouisiro oaiive varaata piepaive.

## 5

*Ora Vatatopo Iraopata Vo Vuutaopa Oa-ia Turaro Vorevira Voreroverea*

<sup>1</sup> Araoko irara oaa, viapau oavu reoa rigatopaavoi visiipa, oiso ra va-ia visii siposipopaa evo vuutaro iava oara-ia orekerovu karekeperea vo utupaua rutu. Ari ita, viapau ruruvutu rugorugoo irara-a visii. <sup>2</sup> ♦ Viapau. Ari taraiapataveira oiso, Vo voki-a vao oa vatauvira pou pirovereoa oiso rutu osa kavirupato vo pitupituar. Uva viapau irai evo vokia-ia taraiparo ovokia-ia voreroverea Turaro. <sup>3</sup> ♦ Ovuuta-a eva oa-ia oearovu oiso purapaaverea, “Viapau oiso oavu avu vaiei. Ari orekerovu rutu torevokovira raga toupaivoi.” Vo osa vo vuuta-a eva oa-ia riroa rutu siraao vo tavakaaro karekeperea voeua rutu-ia. Oiso rutu osa riakova oisoa upia oupaeve vo osa kakaeto kavausa auepao. Viapau rutu oiso uvuiaverea vo tavaka eva vatavatas, uvare Pauto vo Saraaro iava opesi ovoiai.

<sup>4</sup> ♦ Ari ita, araoko irara oaa, viapau oiso visii vo rugorugooroaro visii iava rupavira toupaiveira, ra oisi iava visii sita pieoro vo voki eva pou piro oiso rutu osa kavirupato.

<sup>5</sup> Ari visii rutu aviavi rugoovira toupatavoi. Uva vigei rutu-a vao oirara vo vokio iava ravireopa voki. Viapau oiso rupa voki iava vigei-a. <sup>6</sup> Teapi uusipata oiso osa oearovu. Viapau. Ari vigei uvuipavie ra ora airereipavio varao tokipaoro rutu ora vigei iava varauraro oavi vo ruiparoaro. <sup>7</sup> Oiraopavira rutu, uvare rupa vokia oa-ia uusipaaveira oirara osa oearovu vo rupa-ia spakpaaveira kokoropaoro. <sup>8</sup> ♦ Ari vigei-a aviavi voki iava voeao oirara. Oa vituaro iava uvuipavie ra roroio rugorugoo rutu-ia toupape vao oearovupa siraopa rugoo ora oirao piepa rugoo. Oa iava uvuipavie ra ora utopatoa-ia oirao piepato kuvuvio kuvupato vuriara asavira. Ora oa iava uvuipavie ra ora vigei iava kukeara kukuvaipe vo pitupituo-ia oa-ia Pautoa-re tuepaviovereia vo vokiore, oa-ia vigei rutu ourevereoa vorevira ora rerapa. <sup>9</sup> Viapau oiso Pauto vaore oiso vigei roporeva, ra vigeire kasipuro vigeipa upia vateoro. Viapau. Asi vigei reraaro Turaro Jisas Krais kopiicroepa. Oa iava vigei vararo vuri vovouro voriaro oureva rera raga. <sup>10</sup> ♦ Eva-a oa vituaro iava uvuipavie ra rera tapo tootoovio vo utupaua. Eagara vosa apeisi tootoovira toupape, eke kopiivira toupape ovusa urioro vorevira vigeire. <sup>11</sup> Uva oisi-a eisi osa ragavira uvuipatai ra oearovivu ora visii iava sopaprovaraata piepata voeao tauvapaoro oiso osa ora visii raga ora piepataveira.

*Vo Reoreo Iava Oa-ia Vo Pasio Opesi Pierева*

<sup>12</sup> ♦ Oire uva visii goruvira akepaavoi, oisore ra voeao-ia rei vaisi purapata oea visiipa reipaaveira. Uvare Turaro voeao roporevora, auere ra visii tauvapaive visiipa tarai reoro vatepaoro. <sup>13</sup> Uva uvuipatai ra voeavipa reipa irara avivikevira rutu toupata voeapa siraopaoro. Aue iava uvare voeao-a evoea oea Turaro vaisiaro sovara-ia kovopaoro toupaivoi. Oire ra ora visii ragava tape vovou rutu purapata.

❖ 4:15: Ap 1:10-11 ❖ 4:16: Mt 24:31 ❖ 4:17: 1 Ko 15:52 ❖ 5:2: 1 Ko 1:8; 2 Pi 3:10 ❖ 5:3: Hos 13:13  
❖ 5:4: Ro 11:14; 1 Jo 2:8 ❖ 5:8: Ais 59:16-21 ❖ 5:10: 2 Ko 5:15 ❖ 5:12: 1 Ti 5:17; Hi 13:17

<sup>14</sup> ♦ Araoko irara oaio, goruvira rutu visii tavipaiovoi, oiso ra voearovio pokapoka vovou irara vosipata rutu. Ora voearovio tapo vovouaro goru piepata oea uririavi pura-paiveira. Ora oiso ra voearovio tapo tauvapata oearoa viapau oiso goruvira torepaveira. Ra oisi eisi piepaoro kave vovou rutu purapata vo oearovu rutuva.

<sup>15</sup> ♦ Vosa irai visii iava irai vuri piereve, viapau oiso uvuipatai ra rera varirivira ita vuri pieta. Viapau rutu. Ari goruvira rutu vaore rugoo iraopata, ra ora visiiva vearo vovou raga purapata oearovu rutu tapo oirara.

<sup>16</sup> Vokiara rutu-ia roruvira raga toupata. <sup>17</sup> Vokiara rutu variripata reasi asavira. <sup>18</sup> Vosa eake karekepe visii-ia, uva uvuipatai ra va-ia vearo vaisi purapata Pautoa-ia. Vao vituaro iava osa Pauto oisi ruipaparoveira eisi vo osa Krais Jisas vaisiaro-ia oisi piepata.

<sup>19</sup> Ra opeita Tugoropato Uraurato vo goruaro sisipata oiso osa eto kasiro sisipataveira vo kasiro roko piepaoro. <sup>20</sup> Ra opeita voea vo reoroaro uvu arapa reasipata oea oiso toupaiveira, Pauto gisipoaro. <sup>21</sup> Orekerovu rutu vearovira rovirieipata vara iava vearovpara raga roporopopaoro vara-ia pitupasa. <sup>22</sup> Ra oisi piepaoro eisi vearovira varao rutupa vatavata iraopata vuri pitupituro.

<sup>23</sup> Oiraopavira ita, uvare Pauto-a ro-ia gavaure vovou vituaro rutu. Ira uvuipa ra visii airereipareve, oiso ra roroio vovouro raga-ia toupatavere. Oa iava urauraara oavisii ora vovouisiro oavisii ora varauraro oavisii oara rutu uvuipai ra vuri asavira rutu toupaive vo vokiore tuepaoro oa-ia vigei Turaroaro Jisas Krais vorevira voreroverea. <sup>24</sup> ♦ Uva Pauto visiire keeraroepa, ra oisi piereve visii-ia eisi osa iava uvuipa, ra viapau visii kavureve.

<sup>25</sup> Araoko irara oaa, variri iraopata igeivipa.

<sup>26</sup> Ora sekanpata oearovivu tapo vo Jisas vaisiaro sovara-ia evoea vigei araoko iraraaro.

<sup>27</sup> Oire uva ragai-a vao goruvira rutu oiso visii tavipaavoi Turaro Jisas vaisiaro sovara-ia, oa iava uvui iraopatai ra vo pasio vieita voea rutupa oirao pie vovou irara evoea araoko irara oayi.

<sup>28</sup> Igei variripaei, oiso ra Turaro Jisas Krais visiipa vereopa vovou vaterewe.

Eisivi raga osa vo rigato purapaaavoi visiipa.

Ragai-a vao, Pol.

## 2 TESALONAIKA

### Irapa Reoro Vo Vukuo Iava

Gare vuutavi raga puteva vo osa Pol rovopa pasi purareva voeaopa Tesalonaika vata. Uva evo vuuta isivaaro iava oavu eraopa pasi rigatoreva voea ragapa. Aue iava uvare vavagisipaaepa Jisas vo vorearo iava vao oa iava rigatoreva rovovira. Uva viapau rera vo reoroaro uvuiva vo osa voea tapo toupareva. Ora viapau rera vo reoroaro oirao pieiva varao iava oara iava rigato rovoreva rovopa pasi-ia oara toupaiva. Eva-a oa vituaro iava eraopa pasi rigatoreva vorerivira voea soporepasa aviavi pievira Krais vo vorearo iava. Uvare oearovu voea iava lotupa irara oiso purapaaepa, Ari Krais vorevira vore ovoiroera tuaririvi. Osa viapau oiraopaepa eisi.

1. Aviavi pie reoro Pol varaaro, 1:1-2.
2. Pol rera vaaro rorua kareke piererva Pautoa-ia voea iavirava Tesalonaika vata, 1:3-12.
3. Aviavi pie reoro vao iava Turaro vo vokiaro oa-ia voreroverea oirao pie vovou irara ou plesia, 2:1-17.
4. Goruvira voea tavireva Pol oisore ra variriara puraive, ora ra raverave asavira kovoa puraive Pauto vaaro, 3:1-15.
5. Ovoiopa reoro Pol varaaro, 3:16-18.

<sup>1</sup> Igei-a vao-ia oiso-ia ragai Pol ora Silas ora Timoti igoa vo rigato puraiovci visiipa lotupa irara evoa Tesalonaika urui-ia. Visiigoa oiso toupata, Pauto vigei Aitearo voeaaro visii ora Jisas Krais vigei reraaro Turaro.

<sup>2</sup> Uva oiso ruipapaiei ra Pauto Aite vao ora Jisas Krais Turaro vareo vatesi visiipa oiso-ia, tauvaa vao-ia ora gavaure vovou.

#### *Pol Vearo Vaisi Rutu Purareva Pautoa-ia*

<sup>3</sup>  $\diamond$  Igei uvuipaiei ra Pautoa-ia vearo vaisi rutu puraio visiire rugoopaoro araoko irara oaio. Osa-a eisi osa purapaoro torevokopai. Vao vituaro iava uvare visii varaaro oirao pie vovouro riro varivarivira rutu torepai. Ora varao iavirava sirao vovouro oara visii iava riro varivaripai oearovupa siraopaoro ora visii iava voearo. <sup>4</sup>  $\diamond$  Oa-a vao vituaro iava igei vo reoroaro-ia oearovivu oloturovu iava voea tauvapaivoi voearo-ia tavitavipaoro visii iava visii vaisiaro rei piepaoro. Ora vao iava tapo vo osa oearovu visii vuri piepaiveira, vo osa touvira goruvira rutu toupata oirao pie vovou purapaoro raverave asavira rutu.

#### *Pauto Vigei Rovirieipareveira Torevoko Pitupitu Sirova*

<sup>5</sup> Oire uva oisi-a eisi osa toupai visii vo pitupituaro vituaro vao oa iava vo reo Pauto vo reoaro oirao piepaiveira vao oa-ia oirara torevokovira rutu roviroveira. Eake iava? Uvare goruvira rutu oirao pie vovou rutu purapataveira oearovu-ia ora visii-ia vuria oupaoro. Ovovoua-a eva oa kekerevereia Pauto visii-ia. Oa iava uvuivira oiso kareketaverea visiigoa vao visiigoa rera vo Saraaro-ia koatataverea. <sup>6</sup>  $\diamond$  Iu, uvare torevoko vovou raga Pauto oa purapareveira voearopa siraoa vavataaro vatepaoro oearoa visii vuri piepaiveira. <sup>7</sup> Uva vo vavata vao oa tuuke piereverea visii iava ora igei. Ari ita, oisi-a oiso osa va purarevereia vo osa Turaro Jisas vuvuiua iava vorevira vararo voeao tapo reipa irara purapurapa irara voeao ensel. <sup>8</sup>  $\diamond$  Eisi raga ita osa urioroverea voea vo voriaro vuri vori vatesa voeaopa oea viapau oiso Pautoa-ia taraipaaveira. Ora voeaopa oea viapau vearovira rera vo siposipoaro sirova utupaaveira vao Vearo Siposipo rera iava Turaro Jisas. <sup>9</sup> Oiraopavira rutu, osa ragavira-a oiso osa voea vo voriroaro varao oupaoro vo toupaiverea kuvala tapi rutu vuri tapi. Uva-a vo uva viapau voea ruvara-ia touparevereia Turaro. Viapau rutu. Uva viapau oiso oavi garea vai vearoa vai rera vo kovoaro iava, o rera vo goruardo iava toupaiverea oiso ra oai kekepaive voa. Uva-a evoa vuri tapi uva touvira rutu toupaiverea ora voeapa siraopaoro opesi asavira rutu. <sup>10</sup> Oire uva oisi-a eisi osa voea piereverea vo voki-ia vao oa-ia urioroverea rara vorevira.

$\diamond$  1:3: 1 Te 1:2, 3:12     $\diamond$  1:4: 2 Ko 7:14     $\diamond$  1:6: Kl 3:25; Re 6:10     $\diamond$  1:8: Hi 12:29; Ga 4:8; Ro 2:8

Ovokia-a vao oa-ia voeao oirao pie vovou irara rutu rera-ia vuurapa vaisi puraiverea rera-ia egapaoro rutu. Uva-a vo uva visii tapo voea tapo toutaverea, uvare vo Siposipo Vearoa oirao pietavora oa visiipa vateiovora.

*Variria Purareva Pol*

<sup>11</sup> ♦ Oa vituaro iava visiipa goruvira rutu variripaioveira vo vokiara rutu-ia Pauto akepaoro, oisore ra visii tauvapareve auere ra vo touo yearovira rutu purata otoua iare visii reesireva. Uva oiso ruipapaiei ra rera vo goruaro-ia visii vo ruipaaro uvui piereve visiipa visiigoa yearo vovou purapasa ruipa iraopataveira. Ora aue tapopa variripaioveira, oiso ra visii vo kovoroaro ovoi piereve, vo kovoro oara purapataveira vao vituaro iavirava oirao pie vovouro oavisii. <sup>12</sup> ♦ Oisi-a oiso osa uvipatai oisi piepaoro rera vaisiaro kae pieta rutu Turaro Jisas. Ra aia ita tuuvira ita visii vaisiaro varirivira kae piereve ita rera. Oa rutu vituaro-a vao-ia akuku raga vatevatea vereopa vovou vaiterei vaaro Pauto vaio ora Turaro Jisas Krais.

2

*Ro Iava Ira Pautoa-va Ora Kaureoparoveira*

<sup>1-2</sup> Oire uva visii tavitavipaavoi rera iava ro-ia Turaro Jisas Krais, ira vorevira voreroverea taru vo rasio iare vo vokio-ia oa-ia vigei rutu ora guruvioverea rera tapo tousa. Uva ragai oiso goruvira rutu visii tavipaavoi, ra viapau oiso vo vokia eva oearou vo reoroaro uvuta, voeao oea oiso purapaaveira, “Turaro vo vokiaro-a vao-ia oa pou piroi.” Teapi oisi vo tavi uvuoro visii raga ora visii iava rugorugooara vavagisi pieta. Vo uvare oeai vai oirara vai pasi urusia vai-ia eisi evo reo ouiva, eke oeai vai Pauto vo reoaro iava siposipopa irara vai vo reo eva kosi pieiva, eke oearoi vai pasi igei iava oisi puraaepa oiso, “Pol vai pasi va iava tapiroepa rera vo rigatoaro-ia.” <sup>3</sup> ♦ Oire ra viapau oiso voea vo reoroaro evara kuuvuara oirao piepata. Vao vituaro iava uvare viapau vo voki-ia vao Turaro ovokia-ia voreroverea vo rara viapau vo vokireo kareke rovope oiso-ia, vo vokio voeao vaaro oea Pautoa-va ora kaureopasa ora guruaverea. Ari vo vokio oa-ia ro Vuritoa Rutu viaevira ora karekeroverea, ira vuri pitupituro rutu vituaro karekepareveira. Eera raga ita Vurito, ira eto kasi iare avaroverea. <sup>4</sup> ♦ Rera raga ita ro Vuritoa Rutu ira orekerovu rutuva ora upo rovoparoverea varao oara rutu-ia oirara rutu vuurapa vaisiro purapaiveira. Ora varao oara reesipaiveira oirarare oiso purapaoro, “Vova vao-ia Pauto.” Oire uva rera-a eera ira ora rera raga ora rei pieroverea rutu varao rutu-ia puteoro. Ora oiso tapo osa Pauto vo kepaaro-ia Tugoropa Kepa Tempel koataroverea tapo. Uva voa pauoro oiso puraroverea ora rerare, “Ragai-a oiraopatoa rutu pauto.”

<sup>5</sup> E ragai vo reoarore rugoopatai vao iava oiso, eke? Vo reoro oara oisoa vatepaa visiipa vo osa visii tapo oisoa toupaa. <sup>6</sup> Ari ita, ro Vurito ira viapau oisi oai purapareveira. Eake iava? Uvare oavuei touvira oa rerare korupapeira. Uva va vai-ia taraipataveira ita pasi. Oiso-ia vosa vo koru eva opesi rovope, oire ra utupavira va isivaaro iava taru pouro viroverea. <sup>7</sup> Oiraopavira rutu, uvare vo gorua vao-ia vuri vovou vo goruaro vituaro oa oirara oiso piepaiveira oa iava reo goruro gasipaiveira. Uvare vatauvira rutu sopaura sovara-ia kovopaiveira vo goru vao-ia. Ari ita, uva utupavira rutu ora poera iraoperea riro varivarivira rutu kovooro, vo rara evo koru vera rovoreverea iravu raga ita oa vare korukorupapeira. <sup>8</sup> ♦ Oire uva va-a eva oa isivaaro iava rara rera ro ira vuri vovouro rutu-ia vituparoveira ira karekeroverea rara. Oa-a vao taru oa iava Turaro Jisas sisikorepaoro urioroverea. Uva vo sisikorea eva ora vo vuvuroa evara oara raga Turaro varaaro rera Vuritoa Rutu Oirato taru kopii pie ovoiive rera opesi pieoro. <sup>9</sup> Rera raga ita ro-ia Vurito ira taru urioroverea vo Seten vo goruaro-ia orekerovu rutu purasa ravotovira. Uva vara rutu-a varao oara keakeavira raga toupaivere a rera vo reesiroaro ora rera vo kovoroaro, vo osa viapau oiraoa vai vara-ia. <sup>10</sup> Oire uva vara-a varao riroara rutu kuuvu kovoro rera varaaro oara-ia oirara piro pie ovoireverea. Ra va iava opesi ovoiave. Eake iava? Uvare oiraopa ruture isivapaaverea vao oa iava viapau oiso Pauto voea oureverea ora

rera iare. <sup>11</sup> Uva va vituaro iava Pauto voea vavagisi piereverea rutu. Ra va iava kuuvu kovoro oirao piepaive rutu. <sup>12</sup> Oire uva oiraopa kovore isivapaoro rorupaiverea varao raga vuri vovouro purapaoro. Oa-a vao oa vituaro iava Pauto voea rovirieipaoro voeare oiso puraroverea, “Visii vao-ia vuri irara rutu.”

#### *Pauto Visii Reesireva Ora Rera Iare Visii Ousa*

<sup>13</sup> ✩ Vokiara rutu-ia uvui iraopaioveira ra vearo vaisi purapaio Pautoa-ia visiire rugorugooapaoro. Araoko irara oao, visii kavikopareveira Turaro, uvare rovoa rutu-ia visii reesi rovoreva vaore ora rera iare vorevira visii ousa. Oa iava Tugoropato Uauratoa-ia oiso visii piereva ra ora airereipaoro oiso rutu toupata, Pauto voeaaro rutu. Ora oisore tapo ra goruvira rutu rera vaaro oiraopa kovo rutu oirao piepata. <sup>14</sup> ✩ Uva va sovara-ia Pauto visiire keeraroera Vearo Siposipo vao oa iava visiipa siposipoiovora. Iu. Uvare Pauto visiire keeraroepa, oiso ra rera tapo ora tavosi ovoipaoro rera tapo ita keraria oupatavereea rera vaaro ro Turaro Jisas Krais vigei reraaro. <sup>15</sup> ✩ Araoko irara oaa, goruvira rutu torepata varao-ia pitupaoro oiraopara rutu. Oara-ia visii tarai pieiovora vo osa vara iava visii siposipopaiovora, ora vo osa vara iava visiipa rigatoara sipopaavora.

<sup>16-17</sup> ✩ Uva eisi osa iava oiso ruipaparai ra vigei reraaro Turaro Jisas Krais ora ro vigei Aitearo Pauto visii vakuvakuvira rutu tore piepasi, auere ra veearopa vovouro goruara rutu purapata ora veearopa reoro. Oiraopavira uvare Pauto vigei vo vovouroaro varaata piepareveira ora rera vaaro iavirava vereopa vovouaro. Ora vigeipa siraoparoveira vokiara rutu-ia vigei varaaro rari vukuro vituaro purapaoro.

### 3

#### *Visii Rutu Variripata Ra Pauto Igei Tauvapareve*

<sup>1</sup> Araoko irara oao, visii akepaavoi oiso ra variripata igeipa. Ra va iava ikaupavira rutu Turaro vo reoaro uvarovu ruture sikasikapaio. Osa iava vo reo-ia oearovu uvuipaii ra Pautoa-ia vuurapa vaisi puraive oiso osa visii pie rovotava voari rovovira. <sup>2</sup> Ora vaore tapo variripata Pautoa-re ra igei utopareve voeo asavira vuri irara. Teapi igei vuri piepaive. Oiraopavira oearovu epao oea viapau oiso igei vo siposiporoaro oirao piepaiveira.

<sup>3</sup> ✩ Ari ita, viapau tavarao vai peira rera-ia ro Turaro. Ira touvira visii varaaro oirao pie vovouro goru piepareveira visii virivaripaoro ro asavira Vuritoa Rutu. <sup>4</sup> Uva ro-ia Turaro ira igei vo rugorugooroaro tore piepareveira visii iava tavipaoro, uvare vearovira rutu igei vo siposiporoaro sirova utupataveira. Ora tapo osa evo vovou isivaaro iava topa pievira ita utupauavi oisi piepatavereea.

<sup>5</sup> ✩ Ari ita, Turaro raga uvuiparoi ra visii sopapro ivupareve vore Pauto vo siraoaro. Ra voa toupaoro goruvira rutu toupata oiso osa Krais.

#### *Oirara Rutu Uvuipaai Ra Kovo Iraopaiive*

<sup>6</sup> ✩ Araoko irara oao, goruvira rutu oiso visii tavi iraopaaivo vo vaisio sovara-ia ro-ia Turaro Jisas Krais voeo vatavatapasa, oea pokapoka pitupituro purapaiveira igei vo reoroaro sirova utupa arapa. <sup>7</sup> Oire vara-ia varao vearo pitupituro tarai iraopata, ra vara sirova goruvira utu iraopata pokapoka asavira oara oisoa purapaio. Uvare viapau oisoa pokapoka vovouro vai oisoa purapaio vo visii tapo toupaoro. <sup>8</sup> Igei viapau oiso akuku tauva vai ou ragaiova visii ruvara iava. Viapau. Ari evara aioara oara oisoa voripaio visii ruvara-ia. Ari ita, kasivarivira rutu oisoa kovopaio vo aviaviaro ora vo vokiaro moni oupaoro aepea oiso, teapi visii vo moniaro aio ragapaio. <sup>9</sup> Uva eisi osa oisoa piepaio visiipa oovoovoara purapaoro visii osireiaro-ia. Ari oiraopavira oiso uvui irao ragapaioveira oiso ra oisi visii tavipaio, ra igeivi akukuvira tauva ragapata, uvare Pauto kovopa iraraaro-a igei. Vo osa viapau uvuipaiei ra eisi oisi visii tavipaio. <sup>10</sup> Vo osa visii tapo oisoa toupaio uva oiso oisoa visii tavipaio, “Vosa irai viapau moni kovo vai purapareve, ra va iava viapau oiso aiopareve.”

✩ 2:13: Ef 1:4; 1 Pi 1:2   ✩ 2:14: 1 Pi 5:10   ✩ 2:15: 1 Ko 16:13, 11:2   ✩ 2:16-17: 1 Te 3:2, 11; Jo 3:16   ✩ 3:3: 1 Ko 1:9; 1 Te 5:24; 2 Pi 2:9   ✩ 3:5: 1 Kro 29:18   ✩ 3:6: 1 Ko 15:1-13

<sup>11</sup> Uva oiso purapaiei visiire uvare vo reo uvuiovorao oiso-ia, “Oearovu visii iava pokapokapaaveira voraro vokapaoro oearovu vo rugorugooroaro torevoko ragapasa ora voea vo ruiparoaro raga-ia.” <sup>12</sup>◊ Uva voeare ravaavira goruvira rutu oiso purapaiei vo vaisio sovara-ia Turaro Jisas Krais, auere ra ora voea vo kovoaro vearovira rutu purapaive ora tape pie ragapaoro. Osa piepaoro uvuipaai ra moni oupaave ora voea vo pauaro voripasa.

<sup>13</sup> Oire visii-a vao opeita reasi iraopata varao vearopara purapa arapa. <sup>14</sup> Vosa irouto visii iava viapau igei vo reoaro sirova utuparo vo pasio-ia, ira-ia uvuipatai ra rera reesita. Ira uvuipatai vatavatata, ra va-ia ora rera-ia ariia oureve. <sup>15</sup> Uva opeita oiso rera piepata, Visiiva keripato. Viapau. Ari vorevira uvuipatai ra rera vosita. Aue iava uvare rera-a eera visii araokotoaaro.

*Ovoiopa Reo Vao-ia*

<sup>16</sup>◊ Ro vigei reraaro Turaro ira raga-a gavaure vovou rutu vituaro. Uva oiso ruipaparai rutu ra gavaure vovou rutu vituaro iava visii vatepareve vo vokiara rutu-ia oraivarovu rutu-ia. Osa iava uvuiparoi Turaro ra visii tapo toupareve.

<sup>17</sup> Ari ita, ora ragai raga vavaearo iava vo rigato puraavoi oiso-ia, Vearo Voki ragaiva Pol. Vo pitupitua vao oa sirova uturai vao opesi pieoro osa pasiara rutu opesi pieavoi. Eisi ragavira ragai vo kiroaro keketa.

<sup>18</sup> Ra visiipa Turaro Jisas Krais eva vereopa vovou vatereve visii tauvapaoro, ra visii tapo touve.

Evavi raga osa vo pasio purapaavoi.

Ragai-a vao, Pol.

---

◊ 3:12: 1 Te 4:1, 11; Ef 4:28    ◊ 3:16: Ro 15:33; Rut 2:4

## 1 TIMOTI

### Irapa Reoro Vo Vukuo Iava

Ovokirovu-ia Pol vaio ora Timoti oisoa kovopasi, oa iava Pol Timoti arureva Efesas urui iare, oiso ra voa toupaoro lotupa irara tauvapareve irapaoro voeapa (1 Ti 1:3).

Goruvira Timoti tavireva rera vosipaoro voeao asavira kuuvu irara tisa irara. Teapi oirao pie vovou irara vavagisi piepaive ora voea varaaro-ia kuuvu reoro. Ora auere tapo Timoti tavireva oiso ra riro oirao pie vovou irara vai reesireve lotupa kovo-ia pitupasa. Rirovira tavitavipai vo pasio ave iava lotupa kovo, ora ave iava voeao lotupa kovo-ia irapa irara.

1. Aviavi pie reoro-ia Pol reoroepa, 1:1-2.
2. Lotupa kovo iava rigatoroepa Pol oiso-ia, variri purapa pitupitu, ora irapa irara reesisa, ora kuuvu irara vo sипосипороаро ватаватапаса vara uvu arapa, lotupa riako vo pitupituroaro, ora lotu purapa pitupituro iava vara, 1:3-3:16.
3. Oreorovu vaterева Pol Timoti-pa rera vo vovouaro goru piepasa vo osa lotupa kovo-ia iraparo, 4:1-6:21.

<sup>1-2</sup> Ragai-a Pol ragoa vo pasio rigatoavoi viipa Timoti viigoa goruvira rutu Krais oirao piepariveira. Oa iava oiso toupariveira, Ragai oviitoaaro rutu. Ragoa roporeva Pauto Krais Jisas-pa kovopasa. Rera raga Pauto ro ira vigei vorevira oureva vigei virivariiora ora rera iare, oiso ra Krais-re Jisas tuevira toupape. Uva variriparai Pautoa iare Aite ora Krais Jisas vigei reraaro Turaro, oiso ra viipa tauvaa ora siraopa vovou vatesi ora gavaure vovou.

#### *Uvui Iraopavie Ra Oreorovu Rutu Kuuvu Reoro Veripape*

<sup>3</sup> Vo osa ragai Masedonia Provins iare avaparaera, uva evoa oiso goruvira rutu vii taviava, ra evoa raga toupari Efesas-ia. Uva vorerivira ita oisi vii tavipaavoi, oiso ra voa raga evoa toupari. Eake iava? Uvare oearovu oearovu iava kuuvuara sипосипопаивои. Osa eisi vituaro iava uvuipaei rutu ra voeare korupau vo reoropa evara. <sup>4</sup> <sup>◊</sup> Oiso voea evoea riro kuuvu irara tavipari, “Opeita vo sипосипоро purapata vo rasio raga iava vara. Ora opeita aao irara oavisii vaivaisiaro vievieipata. Uvare vo reoro evara oara vituaro iava kaureo vovou karekepapeira lotupa irara iava. Viapau oiso ra vo sипосипоро purapata vo rasio raga iava. Viapau. Uva vo reoro evara viapau oiso uvuipai visii vo rugooroaro-ia kovopasa Pauto vo taraiaro soporepaoro visiipa. Viapau.” <sup>5</sup> <sup>◊</sup> Ari ita, vao goru reo rutu voeapa vatepari, ra voea iava vovouisiro oaіve torepe ora voeapa siraо vovou rutu puraoro. Uvare va vao-ia siraо vovou oa voeao-ia toupaiveira oea torevoko vovouro rutu purapaiseira, ora oa voeao-ia tapo toupaiveira oea viapau oiso ora voea iava sopaura oaive sovopaoro oiso purapaaveira, “O ari touvira rutu vuri vovouro-a varao oara purapapeira.” Ora oa-a vao oa voeao-ia tapo toupaiveira oea oiraopavira rutu oirao pie vovouro purapaiseira. <sup>6</sup> Oearovu ora voea vo vovouroaro iava ora piro piepaaveira varao oirao pie vovouro kavupaoro. Osa iava voea iava rugorugooara riroirovira raga avapapeira akukupapa reoro raga-ia ora reopaoro. <sup>7</sup> <sup>◊</sup> Uva oiso ruiipa ragapaaveira ra oiso rutu toupaiveira osa voeao oea Pauto vaaro iava reo goru sипосипопаивеira. Oa-a eva oa iava voea vo rugooroaro paipai ragapaiveira vo reoro-ia roroiovira taraipa arapa, oara iava sипосипопаивеira osa viapau oiso vara-ia taraipaave.

<sup>8</sup> Vigei taraipavioveira vao-ia, Reo goru vearo-a, vo osa torevokovira rutu vo taisi iava sипосипопаиве. <sup>9</sup> Uva eisi osa iava uvui iraopaviei ra vearovira rutu taraipavio oaravu-ia reo goruro. Uvare viapau oiso voeaopa vao reo goruro, oearoa torevoko vovouro purapaiseira. Viapau. Ari voeaopa oea vara gasipaiveira, ora voeao oea vuri pitupituro rutu purapaiseira, ora voeao oea viapau Pauto oirao piepaiveira, ora voeao oea viapau oiso lotuapa ruipapaave, ora voeao oea viapau Tugoropato Uaurato vo vovouaropa ruipapaaveira, ora voeao oea aite irara oaive ora aako riako upopaiveira ora oearovu

<sup>◊</sup> 1:1-2: Ap 16:1; 2 Ti 1:2    <sup>◊</sup> 1:4: Ta 1:14; 1 Ti 6:4    <sup>◊</sup> 1:5: Ro 13:8-14    <sup>◊</sup> 1:7: Je 3:1; 1 Ti 6:4

rutu oirara upopaiiveira. <sup>10</sup> ♦ Ora voeao tapo otopa irara, ora voeao oea ora oupa pitupituro vuri piepaiveira, ora voeao oea oearovu oirara kavirupaiveira voea-ia monia oupasa, ora voeao oea kuuvu reoro raga purapaiveira vo rara viapau vearopa reoro rutu purapaive orekerovu oirao piepasa rutu. Ora voeao tapopa reo goruro toupaiveira oea vuri pitupituro sirova utupaaveira, vo rarareasipaave oiraopa siposiporo rutu sirova utupa arapa, <sup>11</sup> varao oara Vearo Siposipo rutu-ia toupaiveira, vo siposipo oa Pauto ragaipa vatereva oisore ra va kosi piepaa. Ari ita, rera raga vo siposipo eva kosi piereva Pauto ro ira vaaro-a keraria oa aviaviava toupaiveira. Ira raga-ia oiraopa roru rutu toupaiveira.

#### *Pol Ira Pautoa-ia Vearo Vaisi Purareva Uvare Rerapa Siraoparoepa*

<sup>12</sup> ♦ Vearo vaisi purapaavoi Krais Jisas-ia vigei reraaro Turaro. Ira ragai vatepareveira vo goruo vo kovo purapasa. Uva va-a vao oa iava vearo vaisi purapaavoi rera-ia, uvare ragai-ia raripaoro Krais vo kovo tovoreva ragai-ia oiso ra rerapa kovopaa. <sup>13</sup> ♦ Ari ita, oiraopavira rutu voari tuariri vuri reoro rutu oisoa purapaa rera-ia Krais. Oa iava oisoa keripa vovouro rutu purapaa oirao pie vovou irara rutuva rera voeapro. Ora oiso osa tapo oisoa rera vaisiaro tovipaa. Uva Pauto ragaipa siraoroepa vo rara viapau rera oirao piepaa vaaru vovouvira rutu toupaoro vuri vovouro rutu purapaoro rera-ia. <sup>14</sup> Uva oisia eisi osa iavirava ragai-ia kaviko vovou rutu purareva. Uva va iavirava ragai vo vovouaro tore piereva rutu oirao pie vovou ora vao siraopa vovou vateoro. Ovovourea vigei-ia toupaiveira vo rara Krais tapo ora tavosipavio rutu.

<sup>15</sup> ♦ Uvare vo reo-a vao-ia oiraopa reo rutu oreoa-ia uvuipaa pitupaoro va oirao piepaive. Oreoa vao-ia oa oiso purapai, "Krais Jisas vararoepa vo rasio iare, oiso ra raiva purareve voeaopa vuri irara. Ra va iava vorevira voea kae piereve." Ari ita, ragai-a vuritoavi rutu. Oiraopavira ragoa oearovu rutu-ia vuri irara oisoa putepaa vuriara rutu purapaoro. <sup>16</sup> ♦ Uva va-a eva oa iava oisi eisi Pauto ragai-ia vo siraao oiso karekereva. Osirao-a vao oa iavirava oisoa Krais Jisas ragai ate piepareva vaore tuepaoro ra ora ragai iava sopaua oaa vorevira porea rera iare. Uvare oiso rutu oisoa toupaa, Rovopatoa rutu ragai vurito. Ra oearovupa voeao utupa irara oiso rutu ovoovovira toupaaveira. Uvare ragai porereva ora rerapa ragaipa siraao iraopao rutu. <sup>17</sup> ♦ Ro Pauto Kataitao raga ira viapau opesia vaiei, ira viapau uvuipaa ra rera kekepe ro ira orekerovu rutupa reiparoveira. Oa iava uvuipavieie ra rera vaisiaro kae piepaoro rera-ia vuurapa vaisi purapape vokiara rutu-ia. Ovoiei.

#### *Uvui Iraoparoepa Timoti Ra Kuuvu Siposiporo Pura Irara Torevokoreve*

<sup>18</sup> ♦ Timoti oviitoa oaa, vii vatepaavoi vo reo-ia riro goru reo rutu, oiso ra evoea riro kuuvu siposiporo pura irara torevokopari. Osa-a eisi osa purapaoro vo reo sirova utuparai profetato oa purarevorao vii iava voviri tuaririvi. Evo reoro-ia goruara rutu pitu iraopari oara oiso rutu toupaiveira osa upo purapara. Oara-ia uvuipaei ra vearovira rutu upoa purapari viria vo goruaro tokooro. <sup>19</sup> ♦ Osa iava eisi uvuipaei ra goruvira rutu oirao pie vovou rutu purapari sisigarue vovou rutu iava. Ari ita, oearovu viapau oisoa oisi eisi piepaive, vo rara va eva sisigarue vovou rutu veripaive. Osa iava eisi oisoa ora voeao vo vovouroaro oirao pieara vuri pie ovoipaive. <sup>20</sup> ♦ Oiso osa aitereivu-a vaitereo evoea iava Haimenias ora Aleksanda. Aiterea tovoava Seten vavaearo iare, oisore ra voa taraia ousi siraoa vo tavakaaro-ia. Ra oisi iavirava Jisas vaisiaro takau arapa eakasi.

## 2

#### *Oiso Osa Ragavira Uvuipavieie Ra Variripavio*

<sup>1</sup> Oire uva vao-ia rovopa reo rutu vii tavi rovopaoavoi ragai vaaro viipa vao variria vo pitupituaro iava oiso-ia, ra vokiara rutu-ia variripau voeaopa oea voraro rutu toupaiveira ora vigei tapopa. Uvuipaei ra Pauto akepari vaore, oiso ra voeao tauvapareve, vo osa vearo vaisi purapari Pautoa-ia vo tauva-ia vao oare variripau. <sup>2</sup> ♦ Uvuipavieie ra reipa

❖ 1:10: Eks 21:16 ❖ 1:12: 1 Ko 15:10-11 ❖ 1:13: Ap 9:4-5 ❖ 1:15: Ro 1:15-18 ❖ 1:16: Ef 2:7 ❖ 1:17: Kl 1:15; Ro 11:36 ❖ 1:18: 1 Ti 4:14; 2 Ti 2:2-3 ❖ 1:19: 1 Ti 6:12 ❖ 1:20: 2 Ti 2:17, 4:14 ❖ 2:2: Esr 6:10; Ro 13:1

irarapa variripavio ora voeao turaro irara oea vigeipa reipaaveira. Oa iava uvuipaaai ra va-ia tauvaa oupaoro vearovira rutu vigei tokipaive. Osa iava uvuipavieei ra gavaurea-ia toupape ora vao kave vovou-ia, vo rara eisi vearo vovou rutu purapape Pautoa-pa avivikepaoro rutu, uvare vigeipa reiparoveira. <sup>3</sup>◊ Osa piepaoro eisi uvuipavieei ra Pauto roru piepape ro vigei Kae Piepatoaaro. <sup>4</sup> Ari ita, ira ora rera vo ruipaaro sirova vao-ia oiso oirara vorevira ora rera iare oupareveira. Ora oiso ra oisi iavirava rera-ia taraipaave vao iava rera vo reoaro oiraopa rutu. <sup>5-6</sup> Uvare oiso rutu-a rera raga ro-ia Kataito Pauto, ora ro-ia Kataito Krais Jisas Vuruvuru-ipato. Ro ira Pautoa-va vorevira oirara rutu agiagi pieрева va iavirava rera vo vovouaro. Vao-ia osa ora rera iava vasereva, oisore ra rera upoivora, vigei varaaro vuriara voriaro oureve evao parikou-ia. Ovuuta-a eva oa purareva oa torevokopai. Pauto oa purareva oisore ra va iava rera vo vovouaro oirao piereve oirara rutu vorevira virivarioro. <sup>7</sup> Oa-a eva vituaro iava Pauto ragai siporeva oisore ra aposel kovo puraa, ora vo osa ratau tou irara tarai piea. Vo rara oisi eisi piepaoro vo siposipo kosi piepaa oirao pie vovou iava. Viapau oiso kuuvuparai. Viapau. Ari oiraopa rutu-a vao-ia ragai vo kovoaro iava.

<sup>8</sup>◊ Uva oiso ruipaparai ra oirara rutu voeao voraro rutu variripaave, voeao oea Pauto vaaro oiraopa vovou sirova utupaaveira va purapaoro. Oea uvuipaaai ra ora voeа iava vavaeara oaiive kae piepaoro variripaave, vo rara viapau kaureo vovouro vaiva toupaine ora kasipu vovouro vai.

### *Reoara Vairopa Riakora*

<sup>9</sup>◊ Oiso ruipaparai tapo vao iava oiso-ia ra evairo ora vairo-ia vearo visivi kuvuara tovopaine vaopa, teapi ooritorovu rutu ora vairo-ia oruaro-ia tovopaine. Ora tapo vaopa, teapi rirovira rutu varao-ia aasipaave bisiara oara-ia riropa moniro rutu vikipaiveira vara-ia ora orito ragapasa. Ora teapi orito ragapasa riropa moniro viki ragapaiveira vara-ia varao varoara. <sup>10</sup> Viapau. Ari vao-a oiso-ia vosa vearo vovouro rutu purapaive vairo evairo, ra oisi iavirava oearovu vairo kekepaoro oiso purapaave, "Oiraopavira rutu lotupa riako taru vo riako." <sup>11</sup>◊ Vosa lotupa riako vuurapa vaisi purapaive vo lotua-ia, ra uvui iraopaaai kuuvaki visivi rutu toupaine oearovivupa avivikepaoro. <sup>12</sup> Ragai vo rugorugooaro oiso toupaivoi, Riakora viapau uvuipaaai ra oirara taraipaive voeapa reipaoro. Viapau. Ari evairo uvuipaaai ra kuuvaki visivi toupaine avivikepaoro. <sup>13</sup>◊ Eake iava? Uvare Pauto Adam pura rovoreva. Uva va isivaaro iava utupavira Iv purareva. <sup>14</sup>◊ Oisi-a oiso osa ragavira rakoru viapau oiso Adam keakeaeva rera kove pieoro. Viapau. Ari riakova-a iria vo reo eva sirova utuopa koveoro, vo uvare oira-a riakova iria Pauto vaaro reo goru gasieva vao oa vaterева Pauto vaitereipa tapo. <sup>15</sup> Uva Pauto vorevira iriai kae pievererea vo osa oiraopa vovou rutu pura rovoeve rera-ia. Vo rara torevokovira rutu kakae kavaupao, ora vo rara oearovu tauvapaine voearopa siraopa vovou purapaoro. Ora aue tapo vo osa ora airereipao vuri rugooro asavira, ra vearo rugoo raga-ia toupaeve. Osa iava eisi oiraopavira rutu Pauto oira vorevira oureverea rara ora rera iare.

### 3

### *Voeao Vo Reoaro Lotupa Uvurupa Tokipa Irara*

<sup>1</sup>◊ Vo reo-a vao oreoa-ia oiraopavira rutu oiso reoparai. Vosa irouto oiso vovouparo ra lotupa irara tuvetuvepareve, osa ita eisi vearovai. Uvare oisi eisi oiraopai vearo kovo. <sup>2</sup> Ari ro ira lotupa irara sovara-ia reiparo, ira uvuiparoi vosa viapau rera-ia vuri vovou vai toupaine. Ora vosa kataiva ragava vatuava toupareve. Ira uvuiparoi ra ora airereiparo varao tokipaoro rutu ora rera iava varaua vo ruiparoaro. Vo rara vereopa vovou rutu torevoko purapareve oearovupa ora rera vo kepaaro-ia voearo koata piepaoro. Osa ita vearovai vo osa uvuiparoi ra vearovira rutu oearovivu tarai piepareve. <sup>3</sup> Vo rara viapau spakparo, ora kasipu vovouro purapareve oearovivu upopasa. Ira uvui iraoparoi ra kave vovou rutu purapareve ora kuuvaki tou. Vo rara viapau oiso riro rugorugooro vai

◊ 2:3: Ro 12:2; 1 Ti 4:10; Ap 16:31   ◊ 2:8: Sam 134:2   ◊ 2:9: 1 Pi 3:3   ◊ 2:11: Jen 3:16   ◊ 2:13: Jen 1:27;  
1 Ko 11:8   ◊ 2:14: Jen 3:6; 2 Ko 11:3   ◊ 3:1: Ap 11:30, 20:28-30

rutu oupareve, oiso ra oisi iava rirovira rutu moni ouparo. <sup>4</sup> ♦ Oa iava uvui iraoparoi ra vearovira rutu ovii irara oaro toki iraopareve voea torevokopaoro. Ra va iava rera vo reoroaro uvupaivora, oisi raga piepaive osa rera. <sup>5</sup> Vaopa vosa viapau oiso ovii irara piepareve oiso ra rerapa avivikepaave, uva apeisi ragavira-a oiso osa uvuiparoi ra vearovira rutu lotupa irara tokipareve, raa? Uvare voea tapo ita-a evoea Pauto ovii iraraaro. <sup>6</sup> Ro ira airevi raga ora rera iava sopaua oaro porereve Turaro iare, ira viapau uvuiparoi ra oirarapa reiparo. Eake iava? Auepa teapi ikauvira rutu ora rera vaisiaro rei piereve ora rera vo kovoarore rugoopaoro. Ira-a eera-ia Pauto uvuiparoi ra rera verareve rera vo vovouaro sirovava eva tavoko vovou oiso osa Seten piereva. <sup>7</sup> ♦ Oire uva viapau uvuiparoi ra lotupa kovo-ia pitupareve vo rara voea tapo lotu asa irara rera vaisiaro-ia viapau vearo vaisi purapaive. Ra oisi iava viapau oiso rerapa avivikepaave. Osa iava eisi uvuiparoi ra kovero vo rara oisi iavirava Seten vo kokaraaro rera iare kare piro.

#### *Vo Toupai Vo Reo Voeaore Oea Lotupa Irarapa Irappaaveira*

<sup>8</sup> ♦ Voeao oea tauvapaaveira lotua vo kovoar-ia oirarapa irapaoro, vo osa vearo vaisivira toupaoro evo kovo purapaive. Vo rara viapau rutu oiso uvuipaai ra voea keakea ragapaive voeapa reo vatepaoro vo rugorugooreiva. Ora vo rara viapau spakpaave, ora iirukopaave, ora voea raga-ia rugorugoopaoro. <sup>9</sup> ♦ Vo osa goruvira rutu oiraopa reo rutu-ia pitupaise vao oa-a oirao piea vo vovouaro rutu vituaro. Uvare viapau uvuipaai ra vuri rugorugoova toupaive. Ari vao ragava roroio vovou. <sup>10</sup> Uvuipau ra voea evoea kovopa irara vo pitupituroaro siitue rovopari rutu. Oire vosa vearovira rutu kovopaive, oa iava uvuipaai ra oisi kovopaive vearovira. Ra voea reesipari oiso, Tauvapa irara-a voeao-ia. <sup>11</sup> ♦ Ora evairo tauvapa riako airoa tapo uvui iraopaii ra oisi vearo vovouro rutu purapaive. Aue iava rara viapau rirovira reo rovopaae oearovivu toga ragapaoro oreorovu-ia kuuvuara. Ora vo rara viapau rirovira rutu ukaiopaave goruara-ia. Ora uvui iraopaii ra goruvira rutu kovopaive. <sup>12</sup> Vosa irouto ro ira tauvaparo lotua-ia, ira uvui iraoparoi ra kataiva rutuva vatuava toupareve. Ora ovii irara oaro tapo ora aao irara vearovira rutu tokipareve tapo. <sup>13</sup> Voeao tauvapa irara oea vearo kovo purapaive vo lotua, oea vearo vaisi ouiverea taru oearovu ruvara iava vovio utupaua. Osa vituaro iava tuuvu vovouvira rutu oearovu vearovira rutu tavitaviiverea va iava vao Krais Jisas-ia raripa vovou.

#### *Pauto Vo Reoarao Rutu Vituaro Iava*

<sup>14</sup> Oiraopavira rutu uvare ragai oiso ruipaparai ra vii kekeia rara. Va vao oare rugoopaoro vo rigato puraavoi viipa. <sup>15</sup> Ari vosa oavu avu vai ragaire korupere, ra oisi iava viapau ikauvira vii iare uriora, uva uvuipauei ra ragai vo rugooaro ouoro vearovira vo pasio vieiri. Uvare oiso ruipaparai rutu ra taraiu vo pitupitu-ia vao-ia oa purapapeira lotua-ia, vao lotua Pauto vaaro ro Pauaka Tootootoa rutu. Ro Pauto kukuuvu tuuta rutu ora vitui rutu vaopa oiraopa reo rutu vituaro. <sup>16</sup> ♦ Iu, uvare apopoivira rutu toupai Pauto vo vovouaro, vo osa va-ia taraisa ruipapavio.

Ari oiraopavira va kareke piesa oiravira karekeroepa.

Oa iava Tugoropato Uraurato rera vo vovouaro torevokoa rutu oirao pievira karekereva.

Ora vo osa purapurapa irara voeao ensel rera kekeiva.

Ora vo osa oearovu rera iava siposipoiva voraro rutu vo rasio-ia.

Oa vituaro iava riro irara rera oirao pieiva.

Oa iava Pauto vorevira rera ipa pierava vuvuiua iare.

#### *Riro Kuuvu Irara Iava Vo Reo*

<sup>1</sup> ♦ Ari ita, roroiovira rutu Tugoropato Uraurato oiso taviparoveira, Utupaua oearovu oirao pie vovouro oaive kavupaiverea. Vo osa ora voea iava sopaura oaive porepaive kuuvu urauraro sirova utupasa voeao Seten voeapro. Vo osa tugara vo siposiporoaro

❖ 3:4: Ta 1:6    ❖ 3:7: 1 Te 4:9-12; 1 Ko 5:12; 2 Ti 2:26    ❖ 3:8: Ap 6:1-8    ❖ 3:9: 1 Ti 1:19    ❖ 3:11: 2 Ti 3:3;  
Ta 2:3    ❖ 3:16: Ais 7:14, 9:6-7; Jo 1:1-14; Ap 1:10-11    ❖ 4:1: Mt 24:4-8; 1 Jo 2:18-29

uvupaive vara purapasa voeapa kovopaoro. <sup>2</sup> Voeao iava riro kuuvu irara osiposiporaa kosipa piroveira voea oea viapau vuri vovouro sovopaiseira ora voea iava sopaura-ia. Vao iava uvare voea iava sopaura rutu tupapa piroveira. <sup>3</sup> ♦ Oea oiso voea tarai piepaiveira oiso purapaoro, “Viapau oiso vearovai ora oua. Ora oaravu tapopa aioara oara voeapa tugoropapeira. Oa iava viapau uvuipai oearovu vara aiopasa.” Ari ita, oiraopavira rutu varao-ia aioara rutu Pauto oara rutu pura rovoreva vaore, oiso ra oirara vara oupaise aiopasa rera-ia vuurapa vaisi pura rovopaoro. Oire va iava vara taru aiopaise voeao oea Pauto oirao piepaive oiraopavira rutu rera vo vovouaro-ia tarai rovopaoro. <sup>4</sup> ♦ Orekerovu rutu Pauto vearovira rutu karekereva. Oa iava viapau irai uvuiparoi ra vara iava oaoi veripareve varao. Viapau. Ari uvuiparoi ra vara rutu oupao Pautoa-ia vuurapa vaisi purapareve vara iavirava. <sup>5</sup> Eake iava? Uvare Pauto vara rutu karureva, oisore ra vigei vara rutu oupape. Ra va iava rerare variripavio rera vo reoaro-ia vaivaisipaoro variria-ia.

*Vo Timoti Iava Toupai Uva Uvui Iraoparoi Ra Vearovira Rutu Oiso Toupareve, Vearoto Krais-pa Kovopato*

<sup>6</sup> Ari ita, vosa eisi lotupa irara tarai piepari evo reoreo-ia rugorugoopaoro, oa iava uvuipaei ra oiso rutu toupari, Vearotoa rutu vii Krais Jisas-pa kovopato. Uvare oirao piea rutu iava vo reo-ia ora torevoko vovou rutu purapa, oarea rutu uvuipai ra vii-ia torevoko vovou riro piepaive va kova piepaoro. <sup>7</sup> ♦ Uva viapau oiso uvuipaei ra evo reoro uvupari kuuvuara, oara viapau oiso Pautoa iava saposipopaeira. Viapau rutu. Ari uvuipaei ra varapa ora airerei iraopau. Oa iava vii iava sopaua uvuipai ra gorupape rutu Pautoa raga vo pitupituar iavirava. <sup>8</sup> Ari ita, vigei ora vigei iava varaura tokipaoro rorupapeira oisi eisi piepaoro. Uva va-a eva oa-ia riroa rutu rorua oupapeira, vo rara vearovira rutu ora vigei iava sopaura airereipape. Eake iava? Uvare eisi iava Oiraopa Tootoo rutu oupere rara vo vokio ora voari utupaua. <sup>9</sup> Oreoa-a eva oa oiraopa reo rutu. Oa-ia uvuipai oirara rutu goruvira rutu pitupaoro va oirao piepaive. <sup>10</sup> ♦ Oa-a eva vituaro iava kasivarivira rutu kovopapeira. Uvare Pautoa-ia raripapeira ro ira pauakavira rutu tootooparoveira. Ira raga ita ro kataito ira taru oirara kae pierevere. Oiraopavira rutu ita, uvare rera raga ira vigei virivaripareveira vigoa rera oirao piepapeira.

<sup>11</sup> Goruvira rutu tarai piea purapari varao-ia. <sup>12</sup> Opeita ariipau ora vii raga vo rara oearovu oiso purapaave viire, “Easi viovokotoa raga eera.” Viapau rutu. Uvare vii raga uvuipaei ra voeaopa riro oirao pie vovou irara ovoovoa purapari vearovira reoro rutu purapaoro, ora vearovira vovou, ora vereopa vovou. Ora vo osa tapo riro goruvira rutu rari vovou rutu purapari ora sisigarue rugorugooro rutu roroioara. <sup>13</sup> Ragaire tuepaoro rirovira rutu saposipoara Tugoropa Vuku iava vieipari lotupa irarapa saposipopao, ora voea tarai piepari. <sup>14</sup> ♦ Ora oiso ra opeita vo vatevatea eva ropi ragapari Tugoropato Uaurato oa viipa vatereva. Oa-a eva oa-ia vii iava ravaa reo puraiva. Oa iava reipa irara rutu vii ariaraaro ora voea iava vavaeara tovoiva vii viraakooro. <sup>15</sup> Uva vatatopovira rutu vo pitupituro evara puraparivere vaore, osa oearovu vii siituepaoro oiso purapaavere, “O ita, vearovira. Uvare rera vaaro oirao pie vovou kovapai.” <sup>16</sup> ♦ Ra airereivira rutu ora tokipauverve vearovira rutu oearovu tarai piepaoro. Ra opeita raveravepauverve vearovira kovoro purapaoro, uvare vara-a evara oara iavirava uvuipau ra virivaripau, ora voeao oea vii vo reoaro uvupaiseira.

## 5

*Vearo Vovou Vao Oirara Rutu Torevokopa*

<sup>1</sup> ♦ Opeita kasipuvira iravivu avukato vo vovouaro torevokori. Viapau. Ari uvuipau ra vearovira rugoopaoro oiso-ia rera kave visivi torevokori oiso osa aiteara rutu piepariveira. Ora viovoko irara tapo oisi eisi piepari oiso osa arakoo irara oara rutu piepariveira. <sup>2</sup> Ora avuka riakovi tapo oisi eisi piepari vairo torevokopaoro airoa ita oiso toupai, Vii aako riakoaro. Ora tavauru riako tapo oisi eisi torevokopari airoa ita oiso toupai, Vii taataa riakoaro evairo, vo rara vearo rugorugooro raga purapari vairo-ia.

---

♦ 4:3: 1 Ko 7:28; Hi 13:4; Jen 1:29    ♦ 4:4: Ro 14:14    ♦ 4:7: 2 Ti 2:16; Hi 5:14    ♦ 4:10: 1 Ko 4:11; 1 Ti 2:4; Ap 16:31    ♦ 4:14: 2 Ti 1:6; 1 Ti 1:18    ♦ 4:16: Ap 20:18; Jos 1:1-9    ♦ 5:1: Lev 19:32

*Raroe Riako Iava Vo Reo Vairo Airoa Arova Vatua Irara Kopiipaaveira*

<sup>3</sup> Vearo vovou rutu purapari vairovipa vairo airoa oiraopavira rutu raroevira raga toupaiveira. Vao iava rara viapau rutu oearoi vairo tokipaive. <sup>4</sup> Ari ita, vosa ovii kakaero vai toupaive ora avu kakaero vai, okakaeroa ita evoea uvuipaaai ra vearovira rutu vereopa vovouva oira tokipaive. Oa-ia uvuipaaai ra vo tokiro tuiive otokiroa oisoa pura rovopaise vairo evairo voea-ia. Eake iava? Uvare vo pitupitu-a eva oa-ia uvuipaaai ra Pauto roru piepaive. <sup>5</sup> ♦ O raroeva riakova iria viapau tauvapareve irai, iria-a eira kataivira raga toupaoro Pauto oirao piepaeveira rutu, vo rara vokiara rutu-ia Pauto akepaeve variripaoro, oiso ra oira tauvapareve. <sup>6</sup> ♦ Ari ita, vosa iriai raroeva vai ora iriai raga vo ruipaaoro sirova utuo viria vai puraoro, ra va iava oiso rutu toupaeve, Kopiiva rutu oira eira va iava eva oira vaaro viria. <sup>7</sup> Voea rutupa uvui iraopaei ra goru reo rutu vatepari. Osa iava uvuipaaai vuriara oaiive eakapaive. Oa iava oearovu viapau uvuipaaai ra reoara vai-ia voea togapaive. <sup>8</sup> ♦ Oire vosa irai viapau oiso vearovira rutu ora irai sara irara vairo tokipareve ora aao irara vairo, ira ita-a eera ira oirao piepa pitupiture isivaparoveira. Vao oa iava rera vaaro viria voeao vo viriroaro-ia putepaiveira rutu oirao pie vovou asa irara.

*Vo Toupai Raroe Riako Iava Airoa Lotupa Kovo Purapaise*

<sup>9-10</sup> ♦ Vosa oisi raga raroevira toupaeve vo rara kaitoa raga valuato oira reraaro, oire oisi touevora, oearovu oiso oirare purapaave, "Iria o vereopa vovouro rutu vearovara purapaeveira." Ora vosa vearovira rutu kakae vure airereivira riro piepaevora, ora oearovivu aapaapaupa iraravi rutu koata pie ragapaeveira ora oira vo kepaaro iare. Ora vosa oearovu Pauto voearo kokotoaro sisupaise. Ora vosa voearovio tauvapaeve oearoa tavaka vo siraoaro vavataaro kaepaiveira, ora okovorovu rutu vearovara purapaeve. Vosa oirare katai vatara tau (60) ivaro rutu puteve, osa iava uvuipaaei ra oira vaisiaro rigatori airorovu vaisiaro iare raroe riakoro. Osa iava lotupa irara uvuipaaai ra vairo rutu tokipaive.

<sup>11</sup> Ari ita, viapau oiso ra vairo vaisiaro tapo rigatopari airoroa viapau oiso avukapaave. Uvare evairo uvuipaaai ra ora vairo vo ruiparoaro sirova utupaave vorevira oira oupaoro. Osa iava pasi uvuipaaai vai ra vorevira Krais-re isivapaaave. <sup>12</sup> Osa eisi piepaoro vao reo goru gasipaiseira oa oisoa pura rovopaise oiso purapaoro, "Krais vairoaro vigei." <sup>13</sup> ♦ Vairo raroe riako airoa viapau avukapaave, airoa uvuipaaai vai pasi ra opitupiturovu oaiive purapaise vo vuutarovio pute pie ragapaoro viripaive okeparovu iare. Ora opitupiturovu vai tapo oara vai-ia uvuipaaai ra vara purapaise, vo osa vo vovouro sirova utu ragapaave siposipoara purapaoro kiuvu reoro raga iava. Varao iava vara oupaoro oara viapau torevokopapeira oiso ra vara iava reoreopaaave. <sup>14</sup> ♦ Osa-a eisi osa ragavira ragai vairore raroe riako rugooparai airoa viapau avukapaaveira. Airoapa vearovai vosa vorevira oira oupaave. Ra va iava kakae kavaupaoro vo kakaero vearovira tokipaive ora vairo sara irara tapo. Vosa oisi eisi piepaive, ra oisi iava vigeiva keripa irara viapau oiso vigei-ia vao oirao pie vovou irara ora reopaaave vuri reoro vai-ia. <sup>15</sup> Oiraopavira rutu, uvare airovu evairo iava raroe riakoro Krais-re isivapaaoro Seten sirova utupaaveira. <sup>16</sup> Oire vosa irouva o riro oirao pieva rutu iria uvuipaoi ra vairo oira sara riakoaro raroe riako tokipaive. Osa iava viapau uvuipaoi ra lotupa irara arepaive oisore ra vairo tokipaive. Viapau. Eake iava? Uvare lotupa irara vairoro tokipaiveira raroe riakoro airoroa viapau oearoi vairo tokipasa.

*Vo Reoreo Lotuapa Reipa Irarare*

<sup>17</sup> ♦ Voeao oea lotua-ia reipaaveira oeavi-ia uvui iraopatai ra vearovira voeapa tauvaa vateta. Ari ita, evoea oea siposipopaiseira visiipa ora visii tarai piepaiveira, osa iava uvuipatai ra voeavipa vearo vovou rutu purapata pute pievira rutu. <sup>18</sup> ♦ Eake iava? Uvare Tugoropa Vuku-ia oiso purapapeira,

♦ 5:5: 1 Ko 7:32; Lu 2:37    ♦ 5:6: Je 5:5    ♦ 5:8: Mt 15:1-9; Ga 6:10; Ta 1:16    ♦ 5:9-10: Ap 9:36-43, 16:15

♦ 5:13: 2 Te 3:11; Ta 1:11    ♦ 5:14: 1 Ko 7:9; Ta 2:5    ♦ 5:17: 1 Ko 9:6-14    ♦ 5:18: Diu 25:4

‘Vo kareo bulmakau kare oea wit-ia tasiasipaoro uvuipaai ra vearo takuraro aiopaoro vokapaive kovopaoro. Uvare voriavi ovoiaro-a vo karepa.’

Ora vo reo tapo oa-ia oiso purapai,  
‘Torevokopai kovopatoapa vori ousa evo kovo-ia rera vaaro.’

<sup>19</sup> ♦ Ari ita, vosa irai kataitoavi vai oreoi-ia lotua-ia reipato toga ragapareve, ra opeita rera vo reoaro uvupari, vaopa vo osa viapau aiterei opevai rera sirova toupaive rera vo reoaro oirao piepaoro va vavata piepaive. <sup>20</sup> ♦ Voearo oearoa lotua-ia reipaoro suria puraive, oa iava uvuipauei ra voea torevokori oirara rutu osireiaro-ia. Osa iava uvuipaai ra voea kekeoro uririave. Ra viapau irai voea iava lotupa irara suria vai purapareve.

<sup>21</sup> Ragai-a vao oiso vo reo-ia vii tavipaavoi Pauto osireiaro-ia ora voeao rera voearo oiso-ia, Krais Jisas-a ro ora purapurapa irara ensel. Uva oiso goruvira rutu vii tavipaavoi ra vo reo sirova utuu rutu ragai vaaro oa purapaavoi, oiso ra voea rutu areiivira rutu torevokori vearovira. <sup>22</sup> ♦ Ra opeita vagevagevira ora vii iava vavaea tovopari oearovu-ia voearo reesipaoro, oearoa oiso vovoupaave ra Turaro vo kovoaro purapaive. Ora opeita voearo tapo ora tavosipau oearoa vuri vovouro purapaiveira. Viapau. Ari uvui iraopaei ra ora vii iava sopaua airereipari rutu vapa vao oiso, teapi suria vai purari.

<sup>23</sup> Opeita uukoara raga-ia ukaiopau upiapaoro. Ari uvuipauei ra gare visivi raga wain ovi iava ukaiou ora vii iava kovuto ruvarupaoro. Aue iava uvare kovuto viire upiaporoveira.

<sup>24</sup> Taraipaei oearovu poeravira rutu suriara purapaiveira, ovovouroa-ia evara viapau uvuipai ra vataupape. Osa raga piepaoro vo rutu rekasisperea Ovoiopa Voki-ia uva taru ora voea varaaro voriaro ouiverea suriara. Vo osa voearo oearovu vatauvira oaravu suriara purapaiveira. Osa iava viapau ikaupavira voea varaaro-ia suriara taraipavioveira.

<sup>25</sup> Uva oisi raga ita oiso osa vearopa kovoro viaevira karekepapeira. Ora vo kovoro garepa kovorovi oisivi vearo pieara ita oara tapo viapau oiso uvuipai ra vataupape.

## 6

### *Akuku Kovo Irara Iava Vo Reo*

<sup>1</sup> ♦ Voeao oirao pie vovou irara oea vori ou asavira kovo ragapaiseveira oea uvuipaai ra vearo vovou rutu pura iraopaiseveira oearoa voeapa reipaaveira oisopa, teapi oearoi vuri reoro vai purapaiveira Pauto vaisiaro-ia ora vigei vo taraiaro.

<sup>2</sup> ♦ Oearovu voeao oirao pie vovou irara oearoa akukuvira kovo ragapaiseveira voearopa oearovu riro oirao pie vovou irara rutu, uva voea evoea viapau uvuipaai ra oiso rugoopaave, Rera ro araokotoa oaa raga ita. Uva viapau uvuiparai ra rera uvupaa. Ari ita, viapau rutu torevokopai oisi eisi rugoopaoro. Ari eisi ragavira uvuipaai ra kovo iraopaiseveira pute pievira voeapa araoko irara oaiive. Uvare voea ita oea oirao pie vovou irara tauvapaiseveira.

### *Riroara Rutu Orekerovu Oupa Pitupitu Iava*

Oire vii Timoti, vo reoro iava siposipo iraopari oearovu tarai pieoro vara-ia. <sup>3</sup> ♦ Ari vosa irai osivu ragavira siposiporeve voea tarai pieoro, ro ira viapau vo reo vigei reraaro Turaro Jisas Krais vaaro viapau oirao piepareve rutu. Ro ira orugoovu raga oureve vao oa-ia uvuipavieie ra Pauto roru piepape, osa viapau oiraopa rugooa, <sup>4</sup> ira-a eera ira ora rera raga vaisiaro kae piepareveira oiso purapaoro, “Riro taraito-a rutu ragai.” Ira-ia viapau tarai vaiei eera. Ira oiso ruipa ragaproveira ra oearovu kaureoparo vo reoro rutu vituarore taraa ragapaeira. Opitupitua-a eva suria oa-ia riiriipa vovou ora upo purapa vovou oarea karekepapeira. Oupoa-ia oearovu ora tovipaaveira ora vaisi ragapaeira oiso, “Visii vao suriara purapa irara.” <sup>5</sup> Uva oisi-a eisi osa iava ora kaureoparo ora kasipupaaveira voea raga voeao oea vo rugorugooro vavagisivira toupaiveira, uvare oiraopa reo ruture oisoa isivapaave. Oa iava oiso rugoopaaveira, Easi uvuipavieie ra lotupa vovou purapape. Oa iava uvuipavieie ra riroara vai rutu orekeroi vearopara vai oupape ora vigeipa.

<sup>6</sup> ♦ Oiraopavira rutu, vosa irouto ro ira Pauto vo reoaro rutu sirova utuparo, ira

♦ 5:19: Mt 18:15-20   ♦ 5:20: Ga 2:11-14   ♦ 5:22: Ap 6:6; 2 Ti 1:6; Ef 5:11   ♦ 6:1: Ta 2:9; 1 Pi 2:18   ♦ 6:2: Ga 3:28; Fm 16; 1 Ti 4:11   ♦ 6:3: 1 Ko 8:1-3   ♦ 6:6: Fl 4:10-19

uvuiparoi ra rorupareve rutu varao-ia oara oupare Pauto ruvara-ia. Vo rara ora rera iava sopaua-ia tarai rovoro oiso, Oaravia ita varao uvuipai Pauto oara ragaipa vatepareveira. <sup>7</sup>◊ Vosa kavaupavioveira, uva orekerovu avu vaiva-a, raa? Viapau. Vosa ita kopipavioveira, uva orekerovu avu vai kaepaoro avapavioveira, raa? Viapau. <sup>8</sup> Ari ita, vosa vo rasio-ia toupapeira, uva varavio raga vigeiva uvuipapeira aioara ora varoara. <sup>9</sup> Ari voeo oea rirovira rutu orekerovu guru ruipapaaveira ora voeapa, oea-a evoea ikauvira rutu kovepaiveira kokarapa vovou. Oeare oisoa Seten kuverava tovopareve voea kuverapasa. Ra va iava rera vo vovouaro raga sirova utupaave vao viria. Uva va-a eva oa oirara iava sopaura vuri piepaiveira. Ra va iava kove ovoipaave opesipasa. <sup>10</sup>◊ AA vo vovouo-a va eva vuri vovou vituaro? Vao raga ita aia oa oirara vuri piepaiveira, moni ou ruipa. Ari ita, oearovu vorevira oirao pie vovou iava porepaa viroveira moni oupa pitipitu raga sirova utupaoro. Uva va-a eva oa-ia uvuipaai ra otavakarovu rutu oupaive ora voea iava sopaura-ia.

#### *Uvui Iraopaei Ra Goruvira Rutu Tootoo Ovoi Rutu-ia Pitu Iraopari*

<sup>11</sup> Uva vii-a Pauto reraaro. Oa iava uvuipauei ra evo pitupituro vatavata iraopari vara pura arapa. Uva uvuipauei ra Pauto vo rugooaro-ia pitupaoro kasivarivira rutu varao pura iraopari torevoko rugoo rutu iava, ora oirao pie vovou, ora siraopa vovou, ora kave vovou, ora tapo vo osa goruvira rutu torepau Pauto vo vovouaro sirova utupaoro. <sup>12</sup>◊ Goruvira rutu paupaua purari, ra orekerovu-ia vuriara pute iraori. Uvare va-a eva vii vo oirao piearo oa iavirava uvuipauei ra ora vii vo voriaro ouri vao pute pie moni oa oiso rutu toupai, Tootoo Ovoi. Eake iava? Uvare Pauto vii roporevora, oisore ra va vao Tootoo Ovoi ouri. Vao oa iava oiraopavira rutu tavitaviuepa va iava eva vii vaaro raria. Oa-ia oearovu riro irara va-ia taraipaaepa. <sup>13</sup>◊ Oire uva oiso riro goruvira rutu viire puraparai vaitereo Pauto vaio osireiaro-ia ora ro Jisas Krais, uvare rera raga Pauto orekerovu rutu tootooara vituaro. Ora Jisas uvare Pontias Pailat osireiaro-ia aviavi pievira Pautoa iava tavitaviroepa. <sup>14</sup> Uva oiso va iava vao vii tavitavipaavoi vaiterei osireoaro-ia oiso, Goruvira rutu Pauto vo vovouaro sirova utupau ora airereipaoro. Teapi vuri vaisi puraive oearovu vii-ia. Ra oisi raga toupari vo vokio-ia rekasispasa ovokia-ia vigei reraaro Turaro Jisas Krais voreroverea. <sup>15</sup>◊ Pautoa raga-a ira torevokovira ora rera vo vovouaro sirova vo voki eva karekerevere. Uvare Kataitoa raga Reitoa rutu ira oearovu rutupa reiparoi king irara voeo voraro rutu. Ora oearovu rutupa turaro irara reiparoi voearo voraro rutu. <sup>16</sup>◊ Ira viapau opesia vai, uvare tootoovira toupareveira rera vaaro-ia keraria ovusa roropave. Oa aviaviaro eva uvuipai ra ro aau pieve ira voavire tutuu piereve. Ari ita, viapau oiso irai rera kekereve. Osa raga ita viapau irai rera kekerevere. Rei vaisitoa rutu. Ira vo goruaro-ia viapau uvuipai oavu avu vai puteve. Osa raga toupareveira. Ovoie.

#### *Vo Reoa Vao Voeaore Oea Riroara Rutu Orekerovuva Toupaiveira*

<sup>17</sup>◊ Uvuipauei rutu ra voearo oearoa riroaro rutuva orekerovu toupaiveira tavitaviri vaopa, teapi ora voea vaisiaro raga rei piepaive vara iavirava evara vova rasitoa-ia. Osa iava viapau uvuipaai ra vara raga-ia raripaave oara opesiperea. Ari uvui iraopaei ra Pautoa-ia rari iraopaaoro rera oirao piepaive rutu, ro ira vigeipa riroara rutu vatepareveira. Osa iava uvuipaviei ra vara-ia rorupape. <sup>18</sup>◊ Oiso voea taviri, “Vearo kovo purapata. Opeita iirukopata. Ari uvuipatai ra paaropa vovou rutu vatevatea vereopa vovou purapata.” <sup>19</sup> Osa piepaoro eisi uvuipaai ra vearoa voria gurupaive vao ovoria ouiverea rara voviri utupaua. Vo uva oiso Tootoo Ovoi ouive vao Oiraopa Tootoo rutu.

#### *Uvuipauei Ra Ora Vii Vo Kovoaro-ia Siitue Pievira Rutu Utupau*

<sup>20</sup>◊ Timoti, vearovira rutu vo kovoro oriru iraopari Pauto viipa oara vatereva. Vaopa uvare oearovu rirovira rutu reoreo ragapaaveira orekerovu iava, ovusa viapau rugorugoopaave Pautoa-re. Ari oearovu oreorovu rutu riroara pura ragapaaveira akukuvira raga varao raga iava vo rasio-ia. Oa iava oisi vo reorore oiso purapaaveira,

---

◊ 6:7: Jop 1:21; Sam 49:16-20    ◊ 6:10: 1 Ti 3:3; Je 5:19    ◊ 6:12: 1 Ko 9:25-26    ◊ 6:13: Jo 18:37    ◊ 6:15: Re 17:14, 19:16    ◊ 6:16: 1 Ti 1:17; Jo 1:18; Ef 3:21    ◊ 6:17: Ekl 5:18-20; Sam 62:10; Lu 12:20-21    ◊ 6:18: 1 Ti 5:10; Ro 12:8, 13    ◊ 6:20: 2 Ti 1:14, 2:16

“Riroa taraia toupaivoi oreoa-ia vao-ia.” Vo osa viapau. Uva oisi-a eisi osa iava viapau oiso uvuipaei ra voea tapo ora tavosipau evoea oea eisi piepaiveira. <sup>21</sup>Eake iava? Uvare oearovu ora vaisi oaive raga oisoa rei piepaive oiso purapaoro, “Riro tarai irara igei.” Oa-a eva oa-ia oisoa Pauto oirao piepa vovoore ovaupaave.

Ragai-a vao visii rutupa variriparai Pautoa iare ra visii-ia vereopa vovou rutu purareve visii tauvapaoro.

Eisivi raga osa vo pasio puraavoi viipa.

Ragai-a vao, Pol.

## 2 TIMOTI

### Irapa Reoro Vo Vukuo Iava

Vorerivira Pol toupareva tuukepa kepa-ia eisi Rom 66 o 67 yia Krais vo kavauaro isivaaro iava. Uva voa toupaoro vo pasio eraopa pasi rigatoreva taraipaoro oiso, Tutuu pievoi vo vuutao ra kopiira (2 Ti 4:6). Uva Timoti vovouaro goru piesa vo pasio rigatoreva Pol. Rera tavireva oiso ra viapau uririparo vo tavakapa vuutaaro-ia, vosa vuri vovou purapaive oearovu rerare (2 Ti 1:8, 2:3-7). Uva oiso puraroepa Timoti-re, Goruvira Vearo Siposipo kosi pieri oirara siposipapaoro tuuvu vovouvira rutu toupaoro (2 Ti 4:1-5).

1. Irapa reoro aviavi pie reoroaro Pol varaaro, 1:1-2.
2. Timoti vovovouaro tore piesa goru reo vaterева Pol, oiso ra touvira rutu tuuvu vovouvira toupareve Timoti kovopaoro lotua-ia, 1:3-2:13.
3. Pol rera tavireva oiso ra airereivira toupareve, ora vatatopoparo voeaopa kuuvu siposiporo purapa irara oea poua viroverea ovoiopa vokiro-ia, 2:14-4:8.
4. Ovoiopa reoro varao, ora vearo voki purareva Pol oearovuva, 4:9-22.

<sup>1-2</sup> ♦ Ragai-a vao Pol ragoa vo rigato puraavoi viipa Timoti. Uva vii oiso toupari, VII-a ragai oviitoaaro. Ragoa roporeva Pauto ora rera raga vo ruipaaro sirova utupaoro, oa iava oiso toupaaveira, Ragai-a Krais Jisas reraaro aposelto. Oa iava vo kovo eva purapaaveira va iava vao Tootoo Ovoi tavitavipaoro. Uva va-a eva oa iava Pauto reo ovoi purareva vare vao tootooa, oiso ra va oupape vo rara Krais-va ora tavosipavio rutu. Uva ragai-a vao Pautoa-pa Aite variriparai ora Krais Jisas vigei reraaro Turaro, ra visii vatesi tauvaa, ora sirao vovou rutu, ora gavaure vovou.

#### *Viapau Uvuipavie Ra Ariipavio Vearo Siposipapa*

<sup>3</sup> ♦ Aao irara oaa oisoa Pauto vo rugorugooroaro sirova rutu utupaave. Osa raga ita oiso osa ragai katai raga roroio rugoo sirova utuparaveira Pautoa-pa kovopaoro. Oa-a eva oa-ia vearo vaisi rutu purapaaveira rerapa. Ora tapo osa viipa Pautoa-ia vearo vaisi purapaaveira vo osa viipa variripara vo vokiaro ora vo avi vokiro-ia. <sup>4</sup> Uva gau ovire rugooperaveira vao oa purariva ragaire rugooro. Osa iava oiso ruipaparai rutu ra vii kekeita. Oa iava uvuiparai ra rorua rutu vii tapo toupaoro. <sup>5</sup> Ari ita, ragai rugooperaveira vii vaarore oirao pie vovou rutu oa oisoa purapari kasivarivira rutu. Uvare oisi raga ita-a eisi oisoa pie rovopaeare taataiara avaorei aue Lois ora aue aakoara Yunis, airea oisoa rovopaeare visivi Pautoa-ia oirao piepaere rutu. Uva taraiparai osa vii tapo ita oisi rera oirao piepariveira. <sup>6</sup> Eva oa iava vii rugoo piepaavoi vo kovo iavirava oa vatererevora Pauto viipa, vo osa vii reesiavora vii-ia vavae tovooro. Ra oiso rutu vo kovo riro pieri osa ro oirato ira eto kasi vuvurepare vao oa rokosa auepai. Ra vorevira vuvuve. <sup>7</sup> ♦ Ari ita, Pauto viapau oiso vigei piepareveira ra orekerovupa uriripavio. Viapau. Ari eera vigei vatepareveira Tugoropato Uaurato vigei iava sopaura goru piepasa, ora sirao vovou kareke piepasa, ora vigei tauvapasa, oisore ra airereivira rutu toupape varaura vo ruiparoaropa reipaoro rutu.

<sup>8</sup> Oire uva opeita ariipau oearovu tavitavipaoro Turaro iava. Ora ragai tapopa oisi viapau uvuipaei ra ariipau osa tuukepa kepa sovara-ia toupaavoi rera vo kovoaro iavirava. Uva uvuipaei ra goruvira rutu tore iraopau vo osa vii-ia poupa piro otavakarovu va iavirava vao Vearo Siposipo. Ari ita, Pauto raga vii tauvaparevere, ra goruvira rutu torepaevvoiva? Viapau. Ari vao raga iava-a, Rera vo vovouaro raga, ora rera vaaro vereopa vovou rutu vegei-ia. Vao oa oisoa purapareve vegei sopaa-ia Krais Jisas iavirava voari tuariri rutu, vo osa vo rasio pura uviro asavira touva. <sup>10</sup> Ari

♦ 1:1-2: Ef 3:6    ♦ 1:3: Hi 13:18-23; Ro 1:8-9    ♦ 1:7: Ro 8:15; Jo 14:27; 1 Jo 4:17-21

vo vokio rera vo vovouaro-ia taraipaveiei vao vereopa vovou oa purapareveira vegeia. Eake iava? Uvare viaevira rutu va karekereva vo osa Krais Jisas siporeva, oisore ra oiso toureve, Eera vegei Kae Pietoaro. Ira oiraopavira kopii vo varivariaro tokoreva Tootoo Ovoi kareke pieoro. Otootooa eva vituaro oiso toupaivoi vao-ia Vearo Siposipo Krais iavirava va-a.

<sup>11</sup> Oa-a vao oare Pauto ragai roporeva oearovupa va iava eva Vearo Siposipo tavitavi rovopasa. Oare ragai reesireva oiso, Aposelto ora tarai vatepato. <sup>12</sup> ♦ Eisi osa iava vo tavakao oupaaveira. Uva viapau oiso ariiparaveira vo osa oisi toupaa eisi. Eake iava? Uvare tarai ovoiraera ro-ia ira oirao piepaaveira oiso, Oiraopavira rutu ira uvuiparoi ra ragai virivaripareve vao-ia ragai vo kovoaro. Oa vatereva ragaipa vaore, oiso ra va purapaa rerapa voari rera vo Vokiaro-ia rekasisa utupaua.

<sup>13</sup> Oreoa vao tarai reo uvuriva ragai gisipoaro-ia. Oreoa-ia eisi ovoovovira vii taviava, oiso ra oisi va sirova utupau goruvira rutu vo reoro-ia pitupaoro vara purapari. Ra viapau evo oirao pie vovou kavupari, ora eva siraopa vovou oa oiso toupaiveira vegei-ia osa Krais-va tavosivira toupaveaira. <sup>14</sup> ♦ Vearovira vo kovo tokipari vao oa vatereva viipa Pauto. Oa iava uvuipau ra oiraopavira Vearo Siposipo iava tavitavipau ro vo goruaro iavirava Tugoropato Uaurato, ira vegei sopapro tootoo piepaoro vegei-ia toupareveira.

<sup>15</sup> Voeao-ia taraipauveira oea Esia Provins-ia toupaiveira oea rutu ragaire isivaoro porea viropa vaitereo tapo Fiselas ora Hemosenis. <sup>16</sup> Uva Turaro arepaavoi oiso ra vereopa vovou purareve Onesiforas aaopa, uvare ovokirovu rutu-ia ragai iava sopaua oisoa varaata piepareve ragai roru piepaoro. Vo uvare viapau oisoa ragaipa ariiparo vo osa oisoa tuukepa kepa-ia toupaa. <sup>17</sup> Viapau. Ari vosa Rom urui-ia pouro viropa, rovoroepa voava ragaire taraapaoro. Oa iava ragai ruvara-ia pouro viropa. <sup>18</sup> Ira ita taraipauveira eera Onesiforas, ira ragai oisoa tauvapareve vearovira rutu Efesas-ia ragai tapo toupaoro. Oa-a eva oa iava Turaro arepaavoi ra oisi iava rerapa sirao vovou rutu purarevere vo vokiri-ia utupaua Turaro vo vokiaro.

## 2

### *Uvuipauei Oiso Toupari, Vearoto Viurupato Krais Jisas Reraaro*

<sup>1</sup> Timoti, ragai oviitoaaro rutu-a vii. Vigoa goru vovou rutu pura iraori rara vereopa vovou ouri Krais Jisas ruvara iava. Ovovoua eva oa-ia tauvaa oupaveaira vo rara rerava ora tavosipave rutu. <sup>2</sup> Vo reo oa uvuriva ragai ruvara-ia vo osa va iava riro irara rutu oisoa siposipopaa, uva vii ita uvuipauei ra oearovupa ita topa pievira vo reo vateri voearopa oearoa vo kovoroaro-ia vearovira taraipauveira. Oa iava vaea ita uvuipaai ra oisi raga ita vearovira oearovu ita siposipopai vo reoro-ia.

<sup>3</sup> Ora vatatopo iraopau, uvare oearovu tapo otavakarovu ouparivere, uvare oisi eisi toupari oiso, Krais Jisas reraaro viurupato ro ira goruvira rutu toreparoveira. <sup>4</sup> ♦ Uvare viurupato oiso vovouparoveira ra rera reraaro reito roru piepareve ora rera-ia. Osa ragavira iava eisi viapau oiso voearova ora tavosiparovere oearoa ora vaea ragapa moni oupa kovoro purapaikeira. Viapau. Uvare rera-a ira viuru kovo raga purapareveira.

<sup>5</sup> ♦ Oiso osa ro ira ikaupareve paupaua purapao. Ira viapau uvuiparoi ra oearovu ia putepareve rutu, vo rara viapau torevokovira reoreoa sirova uturo vao paupaua vaaro. Oa iava oiso rera piepaive, Ovoikuto. <sup>6</sup> Ora ro ira kasivarivira rutu aio kovo tokipareve, uva uvuiparoi ra vo kovo iava avaio kuero ou rovoreve ora rerapa torevokovira. <sup>7</sup> ♦ Vo ovoovorore rugoopauei oara purapavoi viipa, oiso ra katai rugoo raga rutu sirova utupau. Oara viipa Turaro roroio pieparevere vo rugorugooro vii soporepaoro, ra oisi iava vara vituaro-ia vearovira rutu taraipau.

<sup>8</sup> Rugou Jisas Krais-re Devit aaotoaaro, ro ira Pauto vorevira tore pierava kopii tapi iava. Ira iava oisoa siposipopaa Vearo Siposipo rutu purapao eisi. <sup>9</sup> Vo osa oisoa Vearo Siposipo iava siposipopaa, uva va-a eva oapa oearovu oisoa ragai tuukepave sen iroro-ia, oiso rorovira rutu osa voearo vuri irara oearoa reo goruro gasipaveira. Uva viapau rutu oisoa uvuipaave oiso ra Pauto vo reoarore korupaave va tuukepao sen iroro-ia. <sup>10</sup> Eva

◊ 1:12: Ta 3:8; 1 Ti 6:20   ◊ 1:14: Ro 8:9, 11   ◊ 2:4: 2 Pi 2:20   ◊ 2:5: 1 Ko 9:25   ◊ 2:7: Pro 3:5-10

vituarto iava viapau raveraveparaveira vo osa otavakarovu rutu ragai-ia poupa piroveira. Ari oisi eisi piepaoro voeaore rugooperaveira Pauto oea ropopareveira ora rerapa. Uvare oiso ruipaparaveira ra voea tauvapaa. Oa iava Pauto voea virivaripareve, vo rara Jisas Krais oirao piepaive. Ra va iava vao rera vaaro keraria tapo oupaive oa viapau opesia vai.

- <sup>11</sup> Vo reo-a voa-ia oiraopa rutu,  
“Vosa oiraopavira rutu kopiiviepa rera tapo, oa iava rera tapo toupapeira tootoopaoro.  
<sup>12</sup> ✩ Vosa goru vovou rutu-ia siraoa vo tavakaaro kaepape, oa iava uvuipavie i ra rera tapo reipavio.  
Vosa rerare isivavio, osa ita uvuiroverea rera vigeire isivaoro.  
<sup>13</sup> ✩ Vosa viapau oiraopavira rutu rera vo vovouaro purapape, uva rera raga ora rera vo vovouaro purareve. Eake iava? Uvare viapau oiso uvuiparoi ra ora rera vo vovouaro tavarioreve vao vokiara rutu-ia ovovoua oirao piepareveira vigeipa.”

#### *Oiraopatoa Rutu Iava Kovopato Ro Ira-ia Pauto Vo Reesiaro Toupaiveira*

<sup>14</sup> ✩ Voea rugoo pieri voea vatatopo pieoro evoea oea tokipariveira Pauto osireiaro-ia. Ra oiso purau voearo, Opeita ora kaureo ragapata oreorovu rovirieipaoro vara-ia ora reo ragapaooro. Viapau rutu vearoa vai uvuipai ra eisi oreoi iava karekepape. Viapau. Ari vao raga-ia uvare voearo vo rugorugoroaro vuri piepaiveira oearoa voea vo reoroaro uru piepaiveira.

<sup>15</sup> ✩ Ora vii iava vovouisi rutu tovori ora vii vo kovoaro-ia. Oa-ia uvuipaei ra Pauto roru piepari va-ia. Osa iava viapau uvuipaei ra ariia vai oupari vii vo kovoaro-ia, vo rara torevokovira rutu Pauto vaaro-ia oiraopa reo oearovu tarai piepari. <sup>16</sup> Viapau rutu uvuipaei ra voearo tapo ora tavosipau oearoa riroara rutu akuku reoro raga pura ragapaiseira, vo osa viapau Pautoa-re rugoopaave. Vo reoro oreoroa-ia oirara rutu kove piepaiveira, oa iava Pauto vo reoarore isivapaaveira vare ovaupaoro. <sup>17</sup> Oreoroa varao akuku reoro oara iava siposipopaeira oara oiso rutu toupaiveira, Riroa kapua oa sopeara aiopaeira. Oea iava vaitereo-ia tisatoarei aiterea oiso vaisipaeira, Haimenias vaio ora Failitas. <sup>18</sup> ✩ Aiterea evaiterei oiraopa reo rutu arova pirosiera. Uva va-a vao oaria oearovu vo vovouroaro piro piepasiveira oisi siposipopao oiso, Vigei tore ovoiviepa kopii tapi iava.

<sup>19</sup> ✩ Vo osa vo reoa vao oiraopa reo rutu Pauto oa purareva oa oiso rutu toupaiveira kukuuvu tuuta. Oa viapau uvuipai ra irai va gugugireve va verapasa, vao oa iava evo reo oiso purapapeira, “Oea-ia Turaro taraiparoveira voeo rera voearo.” Ora oreovu vao oa oiso purapapeira, “Ro ira oiso puraparo, Turaro-a ragai reraaro, ira uvui iraoparoi ra ora rera iava vovouisiaro porereve vuri vovou rera vaaro kavuoro.”

<sup>20</sup> Okepavu-ia riroa oisoa osasararovu rutu dis toupaive oiso-ia, oaravu aue iava gol, ari oaravu aue iava silva, ari oaravu aue iava evaoara, ari oaravu aue iava verako rasi. Evara rutu oara iava oaravu rutu pisa visivi toupaiveira oara-ia ovureirovu aiopaeira. Ovusa oaravu raga toupaive varao akukupapara oara-ia vokiara rutu-ia aio ragapaiseira. <sup>21</sup> Osa ragavira ita oirato tapo uvuipa ra pisa visivi toureve oiso osa kovopa Pauto vaaro, vo rara vuri pitupitu rera vaaro kavu rovoreve, vo pitupituo oa oiso rutu toupaiveira osa akukupapava raga. Oa iava uvuiparoi ra Pauto rera roporeve rera reesioro oiso rutu, Rerapa kovopato. Osa iava Pauto uvuiparoi ra vearo kovo rutu purareve rera iavirava vo osa oiso toupareve, Ira-a eera vo kovo purasa vatatopovira touparevoi.

<sup>22</sup> Vii vovouaro airereioro rutu va tokipari vaopa, teapi va vao vuri vovou purari vo vovouroapa ruipapaaveira voeo viovoko irara. Ovovoura asavira uvuipaei ra vatavatapau. Goruvira rutu kovopari torevoko vovou rutu purapao oirao pie vovou tapo, ora siraoa, ora gavaure vovou. Vo osa oisi eisi piepaoro uvuipaei ra voearo tapo ora tavosipau oea sisigarue sopavira rutu toupaiveira. Oire ra oisi va iava Turaro arepaive voea tauvapasa. <sup>23</sup> Uva viapau oiso uvuipaei ra voea tapo ora tavosipau oea akuku reoro raga purapaiseira ora kaureo ragapaooro, vo osa viapau taraipaave rutu. Oea-ia

---

✩ 2:12: 1 Pi 4:13; Mt 10:33   ✩ 2:13: Ro 3:3; Nam 23:19   ✩ 2:14: 1 Ti 5:21, 6:4   ✩ 2:15: Je 1:12   ✩ 2:18: 1 Ko 15:12-18   ✩ 2:19: Ais 28:16-17; Jo 10:14

taraipauveira evoea oea oisi eisi piepaoro ora kaureoara kareke piepaiveira vokiara rutuia. <sup>24</sup> ♦ Ari ita, Turaropa kovopato viapau uvui iraoparoi ra kaureoparo. Ira uvuiparoi ra veearopa rugooro rutu purapareve oirara rutupa. Vosa vearovira rutu voea tarai piepareve, ra viapau voeaore vagevagepavira aveaveparo oea viapau vagevagepavira rera vo reoaro oupaoro va-ia viapau roroioipaave. <sup>25</sup> Ira uvuiparoi rutu ra kave vovou rutuva voea torevokopareve voeao oea rera vo gisipoarova kaureopaave. Oa vai iava uvuipaai ra ora voea iava sopaura oaive porepaive, vo osa Pauto voea tauvapareve vo osa oisi vai eisi piepaive. Osa iava voea evoea uvuipaai ra oiraopa reo rutu oirao pieive. <sup>26</sup> Eisi osa uvuipaai ra vorevira vearo rugorugooro ouive o iava kuverava torioro Seten iria tovopareveira voea oupasa. Ro vurito ira rovovira voea ou rovopareveira, oisore ra rera vo vovouaro sirova utupaave.

## 3

*Ovoiopa Vuuta Iava Oa-ia Taru Ovovourovu Rutu Vuriara Karekeperea*

<sup>1</sup> ♦ Vearovira rutu vao-ia tarai vo osa ovoiopa vuutaro iava vo vokiro-ia karekeperea tavaka vo siraoaro. <sup>2</sup> ♦ Oirara riroara rutu vuri pitupituro purapaiverea oiso vara, iirukopa vovou-a vao-ia, ari orekerovu rutu gurupa vovou-a vao-ia, ari vagu vovou-a vao-ia, ari ora vaisi oaive raga kae piepa vovou-a vao-ia, ari oearovivu tovipaiverea. Ora vo osa aite irara oaiveva kaureopaave, vo osa viapau voea vo vovouaro sirova utupaave. Vo rara viapau oiso rugoopave ra vearo vaisi purapaive voea-ia orekerovu oupaoro voea ruvara-ia. Vo osa Pauto vo vovouaro re isivapaave. <sup>3</sup> Vo osa viapau vereopa vovou purapaive. Oa-a eva oa iava viapau oiso oearovivupa siraopa vovouro viapau purapaiverea. Osa-a eisi osa iava vuri takuaro rutu purapaiverea oearovu reopaoro. Ora rirovira rutu ora upo ruipa iraopaave kasipu iraopaoro reasi iraopaoro vereopa vovou vo pitupituro purapa arapa. <sup>4</sup> Ora oiso osa ora voea vate iraraaro taeapaiverea voeare isivapaoro vorevira, vo rara vagevagepavira vuri rugorugooro raga sirova utupaave. Ora oiso osa ora voea raga vaisiaro kae piepaiverea oearovivu vaisiaro akaipa piepaoro. Ora oiso osa ora voea raga vo vovouaro sirova utupaaverea Pautoa-re isivapaoro. <sup>5</sup> Ora oiso osa lotu purapaaverea varaatavira raga oiso osa orekerovu rogetara gaegaerepapeira uuko rovuro ivara-ia. Vo rara vao oiraopa goru rutu taeapaive oa oiraopavira rutu vavatapaoro rokopaiveira sovara-ia ruture. Uva viapau uvuipauei oiso ra voea iare tutuu piepari.

<sup>6</sup> Ari oearovu voea iava vatauvira okeparovu-ia koatapaaveira airorovu oupasa riakora, oiso ra vairoro vo rugorugooro piro piepaive vairoro airoa viapau goruvira rutu rugorugoopaave. Airoa riro vavata rutu kaepaiveira vairo varaaro vo vavataaro vuriara. Uvare vairo vo rugorugooro viripaiveira orekerovure vuriara rugoopaoro, oiso ra vara purapaive. <sup>7</sup> Evairo riakora airoa taraa ragapaiveira vaore, oiso ra oiraopa vovou rutu vo pitupituroaro-ia taraiave, osa viapau. <sup>8</sup> ♦ Ari voeao-ia oirara oea vuri rugooro purapaiveira oiraopa pitupitu ruture isivapaoro. Oea ita evoea oea kove ovoiaepla lotupa pitupituro pura arapa. Oiso rutu osa vaitereo-ia Janis vaio ora Jambris aiterea vaitereo-ia oisi Moses-re isivasiepa rera vo reoaro sirova utu arapa. <sup>9</sup> Osa iava viapau uvuipaai ra riro kovo vai puraive. Eake iava? Uvare oearovu oirara voea vo vovouaro kekepaoro oiso purapaaveira, “O ari keakea kovoro varao voea varaaro oara purapaiveira kokoropavira raga.” Oiso rutu osa vaitereo voari tuariri Janis vaio ora Jambris oisoa eveipaiive.

*Uvui Iraopauei Rutu Ra Pauto Vo Reoaro-ia Goruvira Rutu Pitupari*

<sup>10</sup> Ari ita, oisoa ragai vo vovouaro sirova vearovira rutu utupau varao iava oara oisoa purapaa tarai reoro vatepaoro, ora vo pitupituro oara oisoa purapaa, ora ragai vo touaro vituaro iava tapo. Oara rutu-ia oisoa evara vearovira rutu ragai siituepari, vo osa vara purapaa oirao pie vovou rutuva. Ora vo osa oisoa orekerovu ruture ora tuvuu piepara siraoa vo vavataaro kaepaoro. Ari ita, ragai vo siraoaro-ia oisoa taraipau vao oa oisoa purapaa oearovupa. Ora oiso osa viapau oisoa raveravevira kovopaa. <sup>11</sup> ♦ Ari ita, ragai

◊ 2:24: 1 Ti 3:3; Ta 1:7   ◊ 3:1: 1 Jo 4:1-3; Ju 17-18   ◊ 3:2: Ro 1:24-32   ◊ 3:8: Eks 7:11-12   ◊ 3:11: Ap 13:44-52, 14:19-20

vo tavakaroaro-ia oisoa taraipau varao oara oisoa ragai-ia poupa piro. Oara oisoa ragaipa vokiara rutu-ia upiara vatepaive. Ora varao rutu-ia taraipauveira oara oisoa ragai-ia karekepape vo osa Antiok-ia toupaa, ora Aikoniam-ia, ora Listra-ia. Oara rutu evara oisoa ragaipa rirovira rutu tavaka vovou vatepaive. Ari ita, uva Turaro raga oisoa ragai virivaripareve vara rutupa evara. <sup>12</sup> ☩ Oiraopavira rutu oiso osa irou irara avu voeao oea Pauto vo vovouaro sirova utu ruipapaave Krais Jisas tapo ora tavosipaoro rutu, oea ita-a oea oisi vo tavakaro vo siraoaro oupaivere taru. <sup>13</sup> Ari vuri irara voeao riro kuuvu irara oea oirara vo rugorugooro piro piepaiveira vuri vovou vo pitupituaro voeapa topatopa piepaoro rutu. Osa iava vorevoreripavira oearovu keakeapaiveira. Osa piepaoro eisi ora voea raga ora piro piepaaveira rutu.

<sup>14</sup> Ari ita, uva vii Timoti uvui iraopaei ra goruvira rutu torepaoro oiraopa reo rutu sirova utupau. Vao oa-ia oearovu vii tarai pieivoiva, va oirao piepariveira goruvira rutu. Uva voea-ia taraipauveira voeao oea oisoa vii tarai piepaive. <sup>15</sup> ☩ Vo osa kakae visivi touriva uva oisoa evoa vii tarai piepaive. Ovuuta-a eva oa-ia taraiuepa Tugoropa Vuku iava vo siposipo-ia vao oreoa vaaro iava taraia ouriva. Vo taraio oa vituaro-a vao-ia vo raivao oraiva-ia Pauto uvuiparoi ra oirara rutu vorevira oupareve ora rera iare, vo rara Krais Jisas oirao piepaive rutu. <sup>16</sup> ☩ Oiraopavira Pauto reraaro-a Tugoropato Uraurato ira reoara kareke rovoreva varao oara Tugoropa Vuku-ia toupaiveira. Vo reo oa-ia uvuipavie ra oiraopa vovou rutu iava siposipopape. Ora oiso osa vo reo iavirava uvuipavie ra ora vigei fava sopaura-ia vuri vovoouro eveipape. Ora oiso osa vo reo iavirava uvuipavie ra torevoko pitupituro-ia taraipavio ora vigei raga oiso rutu osa vigei tavipaveira. <sup>17</sup> Eisi osa vo reo vao Tugoropa toupaiveira oiso osa kovo purapa, ro vaaro ira Pautoa-pa kovopareve. Osa iava uvuiparoi ra uvuivira rutu okovorovu rutu purapareve varao vearopa kovoro rutu.

## 4

*Uvui Iraopau Ra Oiraopavira Rutu Pauto Vo Reoaro Kosi Piepari*

<sup>1</sup> ☩ Krais Jisas oirara vo vovouroaro rovirieirevere rara, voeao oea oiso tootoovira toupaive ora voeao oea kopiipaaveira. Oire uva vii tavipaavoi Pauto osireiaro-ia vaiterei ora Krais Jisas oiso, Krais taru oirara rutu osireiaro-ia ora karekeroverea turarovira oirara rutupa reipaoro. <sup>2</sup> Uva oisi-a oiso osa goruvira rutu vii tavipaavoi oiso ra goruvira rutu evo reoro iava tavitaviu, vo osa oearoi vii uvu ruipapaave va-ia. Oire vosa vapareasipaave, oire eagara. Oisi raga uvuipaei ra va iava voea tavitavi ragari. Osa iava uvuipaei ra va-ia voea vo vovouroaro vuriara poeravira karekeri, vo osa oearovu voea iava torevokori, ora vo osa oearovu varapro oirao pie vovouro voea iava goru pieri voea rutupa siposipooro kave vovou rutuva. <sup>3</sup> ☩ Vo vuutari utupa oa pou piroverea ovuuta-a eva oa-ia viapau oiraopa reo rutu uvuiverea oirara, uvare ora vœea raga vo vovouroaro sirova utupaaverea. Vo uvare riro irara rutu voea tuvetuvepa irara guruguruiverea voea aivaro pieoro ora voea iare oea kokiaro kokosipaveira rutu vo reoro uvu iraopasa oreoropa ruipapaaveira. <sup>4</sup> Osa eisi piepaoro oiraopa reo ruture isivapaaveira, oiso vovoupaoro ra vao raga tuariripa reo vo siposipoaro sirova utupaave rasito vaaro. <sup>5</sup> ☩ Uva uvuipaei ra roroiovira rutu rugorugoopaoro ora airereipau rutu. Teapi raveravepauer, tavaka vovou vo siraoaro kaeri. Uva vo kovo-ia uvuipaei ra va purapari oearovivu siposipopao Vearo Siposipo iava. Osa tapo uvuipaei ra okovorovu rutu tapo purapari varao oara vaterevora viipa Pauto. Oa iava uvuipaei ra oiso toupari, Rera kovopatoaaro vii.

*Ragai Vo Kovoaro Opesisa Tutuuvoi*

<sup>6</sup> ☩ Ari ita, taraipauveira voeari-ia rovopa irara oea oisoa tauopaave Pautoa-pa. Osa ita eisi ragai-a vao oisi tauovira toupaavoi. Aue iava uvare ragai vo vuutaaro tutuu pievoi oiso ra vo rasio kavua Pautoa iare avaoro, oiso rutu vo tuukeo karuoro vo rasio-ia osa pisikui o iria vagoovi. <sup>7</sup> ☩ Ragai vao-ia paupaua ikauava, oa iava reesia-ia poura

⊗ 3:12: Sam 34:19; Mt 16:24; 1 Te 3:3      ⊗ 3:15: Sam 119:97-104      ⊗ 3:16: 2 Pi 1:19-21      ⊗ 4:1: Re 20:11-15

⊗ 4:3: Ais 30:9-12; Jer 5:30-31      ⊗ 4:5: Ap 21:8      ⊗ 4:6: 1 Ti 6:12      ⊗ 4:7: Fl 3:10-14

virorao. Uvare ragai vo kovoaro viapau oisoa oavu avu vaipa apotapape vao iava rara oiraopa vovou rutu purapaa. <sup>8</sup>◊ Osa pieava eisi oa iava ragai vaaro peira pute piea voria. Ovoria eva ouaverea vo rara oiso ragai vaisireve, Torevokotoa rutu vii, voari Ovoiopa Voki-ia. Uva Turaro vo reesiaro-a ro ira ora rera raga torevokovira oirara vo vovouroaro rovirieiparevere. Uva viapau oiso ragai raga vo reesiaro-a. Ari oearovu rutu tapo vaaro-a voeao oea rerare tuevira toupaiveira rerapa kaviko vovou rutu purapaoro.

#### *Ovoiopa Reoro Vatereva Pol*

<sup>9</sup> Akeake iraopari ragai iare ikauvira uriosa. <sup>10</sup> Ari ita, Dimas ragai kavureva vo rasio raga vo pitupituaro sirova utupasa. Oa vituaro-a vao oa iava Tesalonaika iare avaroera, vo osa Kresens Galesia iare avaroera. Ari Taitas Dalmesia iare avaroera. <sup>11</sup> Uva Luk raga-a ro ira touvira ragai tapo touparevoi. Uva Mak tapo uriopaei, ra vei rutu ragai iare uriosi. Eake iava? Uvare uvuiparoi ra ragai tauvareve vo kovo puraoro. <sup>12</sup> Ari aue Tikikas aruavaura Efesas iare.

<sup>13</sup> Vosa uriopauvere, ra ragai reraarova kuvupato uriou ira kavuava Traos-ia aue ruvara-ia Kapas, ora vukuara tapo. Viapau oiso uvuipaei ra vo vukuro evara kavuri oara oisoa purapaive aue iava bulmakau rakariro.

<sup>14</sup>◊ Ari ropa ora vatatopopauvere Aleksanda ira orekerovu rutu purapareveira aue-ia bras. Ira oisoa ragai vuri piepareve rutu. Ovuria eva voriaro Turaro rerapa vaterevere voari utupaua. <sup>15</sup> Irapa ora vatatopo iraopaei. Eake iava? Uvare rirovira rutu kasipupaoro oiso ruipaparoveira ra vigei vo siposipoaro tekipareve va opesi ovoipasa.

<sup>16</sup>◊ Ari ita, rovo vuuta rutu-a vao-ia oa-ia rovoa rutu-ia kortua-ia toreraepa. Uva viapau oiso irai voa ragai tapo toureve voea vo reoroaro reo rovirieipa irara pukopasa ragai tauvapaoro. Uva Pautoa iare variriparai ra viapau oiso voeare kasipupaoro voeapa reesia vai purareve, vao-ia vuria oa puraiva ragai eakaoro. <sup>17</sup> Ari ita, Turaro viapau oisoa ragai eakapareve. Viapau. Uvare rera raga ira oisoa ragaipa gorua vatepareve. Oa iava oisoa vo reoro rutu iava siposipopaa Pautoa iava. Eisi osa iava voea rutu voearo ratau tou irara oisoa ragai vo reoroaro uvupaise. Uva oisi-a eisi osa piepaavoiva, Turaro oisoa ragai virivaripareve voea asavira keripa irara, oea oisoa oiso vovou ragapaave ra ragai opesi pieive. Evoea oea oiso rutu toupaiveira osa aakau kare voeao riro kasipu vovou irara. <sup>18</sup>◊ Ari ita, Turaro utupaua ragai virivariparevere evoea ruvara iava oearoa oisoa oiso vovou ragapaave ra ragai vuri pieive. Oa vituaro iava ragai orirurevere ora rera vo Saraaro-ia eisi vuvuiua-ia. Oa-a eva oa iava vokiara rutu-ia rera vaisiaro kae piepaaveira rera vaaro keraria eveipaoro oa-ia viapau opesia vai. Ovoiei.

<sup>19</sup> Uva ragai-a vao vearo voki rutu purapaavoi Prisila vaiopa, ora Akwila, ora Onesiforas aao rutu. <sup>20</sup> Oire uva Erastas ira epao touvira Korin-ia. Ora Trofimas ira kavuava Mailitas-ia, uvare upiaproepa voa. <sup>21</sup> Akeakeri rutu ra ikauvira uriou. Teapi kokepa vuuta vao vuria pou piro. Yubyulas vase vearo voki purapaivoi ora ro Pyudens, ora ro Lainas, ora ro Klodia ora voea rutu araoko irara oaiive voeao vo.

<sup>22</sup> Turaro iare variriparaveira oiso ra rera tapo vii reraaro tapo uraurato tavosivira toureve. Ra oisi iava Pauto tauva visii rutupa vatereve evoa.

Evavi raga osa viipa vo pasio purapaavoi.

Ragai-a vao, Pol.

## TAITAS

### Irapa Reoro Vo Vukuo Iava

Pol toupareva Masedonia Provins-ia uva voa toupaoro vo pasio rigatoreva Taitas-pa. Oiso ra Krit Toko iare Taitas arureve Pol oiso ra voeao lotupa irara tokipasa avaro. Vo pasio oa oiso toupaiveira osa vao rovopa pasi oa rigatoreva Pol rera vatetoaaro iare Timoti. Aue iava uvare Taitas tavireva oisore ra lotupa irarapa iraparo (Ta 1:5), torevokovira siposipapaoro vao iava Vearo Siposipo (Ta 2:1), ora voea vo rugorugooaro soporepasa voeao oea viapau vearovira Pauto vo reoaro sirova utupaave (Ta 2:15, 3:8).

1. Aviavi pie reoro Pol varaa, 1:1-4.
2. Voeao iava lotupa kovo-ia irapa irara, 1:5-16.
3. Lotupa irara tavireva Pol varao iava oara-ia uvuipaai ra Pauto roru piepaive rera vo ruipaaro sirova utupaoro, 2:1-3:11.
4. Ovoiopa reoro Pol vo reoroaro, 3:12-15.

<sup>1-4</sup> ♦ Ragai-a vao Pol ragoa vo rigato puraavoi viipa Taitas, uvare oiso rutu toupariveira, Ragai oviitoaaro rutu vii, vo rara vegei rutu Turaro oirao piepave rutu. Ari ita, variriparaveira Pautoa iare Aite ora Jisas Krais vegei Kae Piepatoaaro, auere ra vii tauvapasi aue-ia gavaure vovou ora vereopa vovou rutu. Ragai-a vao-ia Pautoapa kovopato, uvare Jisas Krais oiso puraroepa ragai aruoro, “Avau oearovu rutupa siposiposa.” Iu, uvare Pauto ragai roporeva, oiso ra voeao tauvaa oea roporeva Pauto vaore, oiso ra voeao vovouaro oirao pie vovou goruvira rutu voeao iava torepe. Oa iava uvuipaai ra vao-ia Pauto vo pitupituaro oiraopa rutu taraiave, vo rara va iava voeao siposipoa. Oire ra oisi iava va-ia taraioro vearovira rutu tuevira raga toupaive auere Tootoo Ovoi, uvare voeapa vo tootoo vatererevere Pauto voeao rera voeaa. Tuariri rutu vo uva vo rasio pura viro asavira touva uva Reo Ovoi purareva va iavirava, oiso ra vo tootoo vaterereve. Oiraopavira, uvare viapau oiso kuuvupato-a Pauto. Ira vo vuutao-ia oearovu arurevora va iava vao Vearo Siposipo kosi pievira siposipopasa. Eera Pauto vegei Kae Pietoaaro ira ragai tapo ita roporeva oisi ita osiposipo fava siposipopasa.

#### *Taitas Vo Kovoaro Iava Vo Osa Krit Toko-ia Toureva*

<sup>5</sup> ♦ Vii Taitas tavipaavoi oiso-ia, Vii kavuavora evoa Krit Toko-ia, oiso ra voa vo kovoro torevokori okovoroa pura uviro asavira toupaivora evoa Krit-pa irara sovara-ia. Oire ra voa oearoi tapo reeresiri voeao oearoa uvuipaai ra lotupa irara tokipaise voraro uruiara-ia voeapa iraporo. <sup>6</sup> Eisi osa iava uvuipauei ra vaore rugouo osa vii tavi rovoavoi rovovira oiso, Voeao lotupa irarapa oea irapaaveira viapau oiso uvuipaai ra vuriara vai purapaive. Ora oiso-ia viapau irai uvuiparoi ra aireiva vatuarirei vai toupareve. Viapau. Ari kataiva raga. Ora vo osa rera ovii iraraaro, oire ra oiraopavira rutu torevokovira toupaive. Viapau rutu oiso uvuipaai ra ora voeao vo ruiparoaro sirova utupaoro vuri vovouaro purapaive. Ra oisi iava voeao iava siposipoara uvarovu rutu vuriara avapape. <sup>7</sup> Aue vituaro iava uvare rera-a eera oirarapa irapato ira Pauto vo kovoaro tokipareveira. Eisi osa iava uvuiparoi ra torevokovira raga toupareve. Opeita ro ropori ira oearovu tapo rirovira ora kaureoparo. Ora opeita ro tapo ropori ikaupa kasiputo, ora ro ira spakpaoro kokoroparo, ora ro ira oearovu upopaoro voeao upia piepareve, ora ro ira ora rera raga-ia vovouparo vo orekerovu rutu ou ragapaoro. <sup>8</sup> Ari uvuipauei ra rera ropori ira oearovure sopipa irara oiso puraro, “Uriota vore ragai vo kepaaro-ia vearovira paua touoro.” Ora ro tapo ira vearo rugoro raga sirova rutu toupareve. Eera ira uvuiparoi ra ora rera vo vovouaro raga rovirieipareve, ra va iava torevoko vovouaro raga purapareve ora airereipaoro rutu. Iu, eera torevoko vovoutoa rutu. <sup>9</sup> Ari ita, vosa oiraopa reoro rutu ia pitupareve varao oara oupareveira vo Vearo Siposipo iava, uva va-a eva oa iava ita rera uvuiparoi ra oearovivupa topa pievira siposipopareve kosi pievira va iava vao oiraopa reo rutu. Ora ira uvuiparoi ra viaevira vo reoro karekereve vuriara oreoroa vatepaiveira oearovu oirara piro piepasa.

♦ 1:1-4: Nam 23:19; Ro 16:25; 2 Ti 1:10

♦ 1:5: Ap 20:28-30; 1 Ti 3:1-7

<sup>10</sup> ✩ Aue iava uvare riro irara rutu epao oea ora upopaaveira vaova Vearo Siposipo, vo osa oearovu keakea ragapaive kokoropa reoro raga-ia. Ari ita, voea tapo Jiu oea vao iava ora voea iava rakari verapa pitupitu sипосипаивеира. <sup>11</sup> ✩ Uva voea tavi iraori ra ora eakaave uvupavira, uvare oira aaoro rutu piro piepaiveira rutu vuri reoreoro raga-ia. Uvare oiso piepaiveira ra vo aaoro ruvara-ia мони oupaave vo aaoro sипосипаоро. <sup>12</sup> ✩ Oiraopavira rutu osa vii tavipaavoi iravu iava Krit-pa irara iava rera. Ira oiso puraroepa voeaoe oea oisoa vo Toko-ia vao Krit toupaive, “Voeao-ia Krit-pa irara oea kuuvu reoro raga purapaaveira. Oea oiso rutu toupaiveira osa kaakau kare. Oea kovo arapareasipaoro ora voea raga-ia rugoopaaveira riroara rutu aio ragapaoro.” <sup>13</sup> ✩ Ari ita, uva oiraopa reo rutu-a vao-ia. Eisi osa vituaro iava uvuipaei ra goruvira rutu voeare korupau vo voea torevoko piepaoro. Oa iava voeao vo vovouaro oirao pie vovouro uvuipai ra goruvira voeao iava torepape. <sup>14</sup> ✩ Uva oisi-a eisi osa toupaoro uvuipai ra vo reoropareasipaave tuariripa sипосипоро iava varao akukuara, oara vo ragava uriopapeira Jiu, ora voeao oearoa reo goruro pura ragapaiveira oara-ia oiraopa reore isiva ragapaaveira.

<sup>15</sup> ✩ Oire vosa viapau irai vo rugorugooroaro-ia vuria vai toupaive, uva va eva vituaro iava oiso toupai, Vosa apeisi eake uvureve, ora apeisi eake kekereve oara-a evara oara-ia viapau oiso vuria vai toupaivoi. Ari ita, vosa vuria vai toupaive vo rera varaaro-ia rugorugooro, oire uva vara-a evara oara vituaro-ia oaravu rutu vuriara toupaiveira varao oara uvupareve ora vara kekepareve. Aue iava uvare rera vo rugorugooroaro piroepa rutu. Oa iava oisi iava orekerovu rutu rera iava vuivuiepa ro ira Jisas Krais viapau oirao piepareve. <sup>16</sup> ✩ Ari ita, oiso purapaaveira, “Igei Pautoa-ia tarai paioveira.” Uva vigei uvuipavie oiso ra voeao vo pitupituroaro eveipaoro vearovira rutu voeao-ia tarai pavio oiso, Asi vuri rugorugoo irara rutu-a voeao oea kuuvu reoro raga rutu purapaaveira. Eake iava? Uvare kasipu vovouro raga-a oara purapaiveira vo oearovuva ora aveavepaoro. Oa-iua Pauto vo reoaro gasipaiveira. Oa iava viapau oiso uvuipai ra vearopara vai purapaive.

## 2

*Vo Toupai Avuka Irara Iava Vo Reo*

<sup>1</sup> ✩ Oire uva uvuipaei ra torevokovira rutu voeao tarai piepari aue-ia oiraopa reo rutu vao oa-a vigei vaaro oirao piea rutu vituaro. <sup>2</sup> ✩ Avuka irara tavipari oiso, Opeita spakpata ukaiopaoro, ora opeita varao purapata osa kokoropa irara vara purapaiveira. Viapau. Ari uvuipai ra vearovira rutu tarai paive vearo pitupituro-ia. <sup>4-5</sup> ✩ Ra va iava vo aaoro vearovira ora tokipaave ora vo aaoropa siraopaoro. Ra viapau vuri rugorugooro karekepape vo riako-ia. Uva uvuipai valuapa riako ra vearovira rutu valua irara oaive vo reoroaro uvupave reasi asavira. Evaирo airoa uvuipai ra ora vairo vo vovouaro raga rovirieipaive, ra va iava torevoko vovouro raga purapaive ora airereipaoro rutu. Uva oisi-a eisi osa vearopai vo osa eisi ragavira vo pitupituro evara purapaive. Oa iava viapau oiso irai uvuiparoi ra vuri reo vai purapareve vao-ia Pauto vaaro tarai reo.

*Vo Toupai Viovoko Irara Iava Vo Reo*

<sup>6</sup> ✩ Oire uva oisi ragavira ita uvuipaei ra voeao viovokoa tarai piepari. Ra va iava ora voeao vo rugorugooro rite pie rovopave auepa, teapi evo rugooro raga voeao vovouaro piropiro piepaive rutu vo rara voeao-ia putepaive. <sup>7</sup> ✩ Oire uva vii tapo Taitas oiso toupai, Viigoa uvuipaei ra voeapa ovoovoa rutu purapari vo osa vearovira raga kovo purapari. Opeita voeare keevaita reoro raga purapari. Viapau. Ari uvuipau ra voeapa vavata

✩ 1:10: Je 1:26-27; 1 Ti 1:6    ✩ 1:15: Lu 11:39-41; Ro 14:23    ✩ 2:1: Ta 1:9    ✩ 2:2: 1 Ko 13:4-8    ✩ 2:4-5: 1 Ko 14:34; Ef 5:22; 1 Ti 6:1    ✩ 2:7: 1 Ti 4:12

pievira reopau vo osa voea siposipopari. <sup>8</sup>◊ Iu, uvuipau ra vo reo rutu vateri oa vituaro-ia riroa gorua rutu toupai. Oa iava viiva keripa irara viapau uvuipaai ra oiso puraave, "Kevaita reo raga-a eva akukupapa reo suria." Oa iava uvuipaai ra ariiave.

#### *Vo Toupai Kovopa Irara Iava Vo reo*

<sup>9</sup>◊ Oire uva kovopa irara uvuipaai ra voeao vo reoroaro tapo uvupaive oea voea tokipaiseira. Ra va iava vearovira rutu voea-ia rorupaive voea tokipaoro. Ora ra opeita kaureopaave voeare. <sup>10</sup>◊ Uva viapau uvuipaai ra reipa irara oaiive varaaro orekerou kavirupaive. Ra va iava oearovu voea-ia va kekepaoro oiso purapaave, "O oiraopavira rutu, uvare Pauto ro Kae Pieto vaaro tarai reo kasiraovira rutu torepai."

#### *Uvui Iraopavie Ra Sisigarue Vovouvira Toupage*

<sup>11</sup>◊ Ari ita, Pauto rera vo vovouaro vao vereopa vovou viaevira rutu karekere piepareveira vo oearovu rutu kae piepaoro. Oa iava vorevira ora rera iare voea oupareveira. <sup>12</sup> Eva vereopa vovouaro oa vigei tarai piepai, ra va iava rera vo ruipaaro purapape vo rasio-ia. Eisi osa vituaro iava uvuipavie ra vuri vovouro oavi kavupape ora vigei iava, oiso ra vearovira rutu ora airereipavio vuri pitupituropa vo rasio iava. <sup>13</sup>◊ Uva oiso ragavira touoro vo vokiore tuepavio pisa voki rutu. Ovokia-ia vao Pauto vaaro kerari aviavi oa karekepere rara, vo osa va-ia aue Jisas Krais vigei Kae Pietoaaro vorevira vorero. Oa-a eva oare rugoopaoro goruvira raripavioveira. <sup>14</sup> Uvare ora rera iava vasereva oiso ra kopiro. Eisi osa iava uvuiparoi ra vigei kae piepareve vorevira varao iava vigei vo vovouaro vuriara. Ora vao tapo oiso ra torevoko vovou raga-ia toupage, uvare ora rera iare vigei vaisireva. Oire uva va-a eva oa iava uvuipavie ra ruipapavio vearo vovouro purapasa vo rera vaisiaro-ia.

<sup>15</sup>◊ Oire uva vo reo-a vao oa iava uvuipauei ra oearovu vo vovouaro varaata piepari voea goru piepaoro. Asi vii-a reito vaisito viigoa uvuipauei oiso ra oearovivu vo vovouaro vuriara poerapari voea vorevira torevokopaoro. Teapi viipa keapaave oiso, Vii-a oira akuku raga-a.

### 3

#### *Uvuipau Ra Goruvira Toupari Torevoko Pitupitu Raga Purapaoro*

<sup>1</sup>◊ Oire voeao oirara oea tokipariveira oea-ia uvuipauei ra voea soporeri. Auepa teapi gavman-va ora kaureopaave ora voeao oirara oea reipaaveira visii rutupa. Oa iava uvuipaai ra vearovira rutu voea vo reoroaro uvupaive, ra vearo kovo rutu purapaive. <sup>2</sup> Voea taviri oiso, Opeita oearovu togapata vuri reo-ia. Viapau. Ari visii uvui iraopatai ra kave vovou rutu purapata oearovu rutupa. Ora vao tapo osa ravaavira raga toupara oearovivu tauvapasa gavaure vovou raga-ia.

<sup>3</sup> Vao vituaro iava uvare voari tuariri oisoa toupage vuriara raga purapaoro rupasopavira raga toupaoro. Ora varao osa oisoa ora vigeiva kaureopavio. Ora oiso osa tapo viapau vearo vovou sirova oisoa utupavio vo osa reo goru gasipape. Oa iava vuri pitupitvigei tuukeva, oiso ra ora vigei raga vo rugooroaro-ia vuriara sirova utupavio. Eva-a oa iava oisoa oearovu varaa riroipape. Uva oisoa oearovure rirovira kasipupavio, osa vorevira igeire ita rirovira rutu kasipupaave.

<sup>4</sup> Ari ita, vo osa Pauto vo vuutaaro karekeerao oa-a eva oa-ia ora rera vareiaro sira vovourei karekerevorao ora tauvaa vigeipa. <sup>5</sup>◊ Oa iava vorevira vigei ora rera iare ourevorao ro-ia Pauto vigei Kae Pietoaaro. Oiraopavira, viapau oiso vearo kovo vai purapape, ra oai iava Pauto vigei-ia vearo vovou vai purapareve. Viapau rutu. Ari ita, vao raga-a kaviko vovou riroa rutu rera vaaro vigei-ia. Oa-a eva oa iava Airepa Tootoo rutu ouerao, uvare vigei sisigarue pierevorao. Osa vigei pieoro ro Tugoropato Uraurato oisi vigei pierevorao, Airepa irara vigei. <sup>6-7</sup> Iu, Pauto vigeipa rirovira rutu Tugoropato Uraurato vaterevorao, vo uvare Jisas Krais vigei Kae Piepatoaaro vigeipa raiva purarevora vao vorevira ora porete piepa raiva. Uva Pauto vigei vaisipare oiso

◊ 2:8: Fl 4:8-9; 1 Ti 6:3    ◊ 2:9: Ef 6:5    ◊ 2:10: Mt 5:16    ◊ 2:11: Ef 2:8-10    ◊ 2:13: 1 Te 4:13-18; 2 Pi 1:1  
 ◊ 2:15: 1 Ti 4:12-16    ◊ 3:1: Ro 13:1-7    ◊ 3:5: Ef 2:4-9; Ro 3:20

rutu, Torevoko irara. Eva-a oa vituaro iava uvuipavie i ra oisi iava ora agiagipavio rutu Pautoa tapo. Oire uva oisi-a eisi osa iava uvuipavie i ra Tootoo Ovoi ouperea vao oare tuevira toupaoro goruvira rutu raripavioveira.

<sup>8</sup> ♦ Uva vo reo-a vao-ia oa puraavoi oa-ia oiraopavira rutu vii tavipaavoi, oisore ra voeapa vo reo vasirakovira rutu topa piepari rutu, ra va iava pisa visivi rutu toupaive voeapa voeao oea Pauto oirao piepaive rutu. Ra va iava vearo kovoro purapaive evara oara vearopai. Oara iavirava uvuipaa i ra vearo tou rutu ouive.

<sup>9</sup> Uva visii rutu viapau uvuipatai ra akukupapa reo raga-ia ora upopata. Ora opeita aao irara oavisii raga-ia vuurapa vaisi purapata vo voea vaivaisipaoro. Ora opeita ora visii ragava kaureopata. Ora opeita oearovu kasipu piepata Moses vaaro-ia Reo Taisi voeare reoreopaoro. Uva vo reoro-a evara kiuvu reoro raga, oreoroa rutu iava viapau uvuipai vearoa vai karekepe.

<sup>10</sup> ♦ Oire vosa irai orugoorei iava pisavira sipoiporeve vo lotupa uvuru sovara-ia, ra vo rugoorei sirova roopavira avaave, ra vii goruvira rera taviri oiso, Viapau uvuipaei ra vorevira oisi osiposiporoi purapari ita! Oire vosa viapau vii vo reoaro uvureve, ra viapau oiso vorerivira ita rera tapo touri. <sup>11</sup> Vo uvare rera-ia taraipaei oiso, Vuri vovou rutu rera-ia toupaivoi. Ovovouroa ora rera-ia eveipaoro oiso puraparoveira, “Eagara, ragoa oisivio toupaavere.”

#### *Ovoiopa Reoro Vatereva Pol*

<sup>12</sup> Ari ita, ragaipa tutuu piepaei ra vii iare Atemas sipoa eke aue Tikikas. Oire vosa irai vaiterei iava vii iare pouro virovere, ra va iava ikauvira ragai iare uriou vo-ia Nikopolisia. Uvare oiso ruipaparai ra evoa touve vo uteopa vuuta-ia. <sup>13</sup> ♦ Viigoa uvuipaei ra Sinas tauvari riro taraito reo goruro-ia, aiterea vatatopopasiei ora Apolos vokasa. Uva vii tavipaavoi oiso ra oearovu taviri, ra orekerovu avu vai vaitereipa vatevateive oarava uvuipasiei avasa.

<sup>14</sup> Voeao oirao pie vovou irara oea tokipaveaira, oeare oiso vii tavipaavoi ra voea vearovira rutu tarai pieri. Ra va iava vearo pitupitu rutu purapaive. Oa iava uvuipaa i ra tauva vovou rutu purapaive voeaopa oea Jisas vo kovoaro purapaiveira. Ra vearo tou rutu purapaive ora voea vo rugooroaro kavuoro oara-ia ora voea raga-ia vovoupaaveira.

<sup>15</sup> ♦ Ari ita, voeao rutu oea oisoa ragai tapo toupaive oea voeao viiva vearo voki rutu purapaivoi. Oa iava uvuipaei ra vo vaisio topa pieri, vearo voki voeao oea Jisas oirao piepaiveira.

Pauto visiigoa rutupa rirovira vereopa vovou vaterere ora igei tapo.

Ragai-a vao, Pol.

## FAILIMON

### Irapa Reoro Vo Vukuo Iava

Pol vo pasio rigatoreva tuukepa kepa-ia toupaoro eisi Rom urui-ia 61 o 63 yia Krais vo kavauaro isivaaro iava. Vo rigato purareva rera iare rera vatetoaaro ro Failimon ira Pol vo reoaro uvuoro porero viropa oa iava va sirova uturoepa Krais oirao piepaoro. Uva iravu kovopato Onisimas Failimon reraaro, ira torireva Failimon arova vore Rom uva voa oisoa Pol tapo toupareve, oa iava oisoa Krais oirao piepareve, uvare rera vovouaro porereva. Oisi-a eisi osa iava Failimon akereva Pol oiso, E uvuipaei ra rera Onisimas vorevira ou pieri, uvare vii araokotoaaro rera-a ro vo Krais vaisiaro-ia. Ra rera ou pieoro rerapa siraou vao-ia rera vo vuriaro vao oa purareva.

1. Aviavi pie reoro rigatoreva Pol, 1-3.
2. Ora rera vaaro sirao vovou Failimon-pa, 4-7.
3. Failimon arereva Pol oiso ra vorevira Onisimas ou piereve, 8-22.
4. Ovoiopa reoro-ia vearo vokireva Pol, 23-25.

<sup>1-2</sup> ♦ Ragai-a vao Pol ragoa tuukepa kepa-ia toupaavoi, uvare Krais-pa kovopato-a ragai. Uva vegei-a vao ora ro Timoti vii araokotoareiaro ora ragai, vegoa vo rigato puravevoi viipa Failimon. Uvare viipa siraopaveaira vo osa Krais-pa kovopariveira. Oire uva voearo rutu tapopa vo rigato-a vao-ia, oearoa vii vo kepaaro-ia ora gurupaaveira lotu purapasa. Ora o tapo vigei taataavaaro Apia iriapa tapo vo rigato puravevoi, ora ro tapopa Akipas ira vegei tapo vuri vovourova ora upoparoveira. <sup>3</sup> Uva variriparai Pautoa iare vigei aitearo ora Jisas Krais vigei Turaroaro oiso ra gavaure vovou purasi visii-ia tauvaa vateoro visiipa.

#### *Oirao Pie Vovouaro Failimon Ora Siraopa Vovou Aue-ia Turaro*

<sup>4</sup> ♦ Ari ita, vosa variria purapaoro vii vaisipaavoi Failimon. Ora vosa viire rugoopaoro vearo vaisi vuurapa vaisi purapaavoi ragai reraaro-ia Pauto. <sup>5</sup> Vo uvare vii iava uvupaaveira vo oearovu ruvara-ia. Uvare vii-a eva viigoa oearovu rutupa siraopauveira voeao vii voeao, vo rara goruvira rutu oirao pie vovou purapari Turaro-ia Jisas. <sup>6</sup> ♦ Uva oiso variripaoro viire rugooparai oiso, Vearopai rutu vo osa ora vii vaaro oirao pie vovou kareke pieri oearovu rutupa oirara. Oire ra va iava vii-ia vo vovou eveioro oiraopavira rutu varao oirao pieive vara-ia taraioro vearopara, oara vigeipa Krais Jisas-ia toupaiveira, vo osa rera tapo ora tavosipavio. <sup>7</sup> ♦ Oiso osa va eva, araoko, vii vaaro sirao vovou voearopa Pauto voearoaro. Oa iava rorupaavoi rutu, uvare va-a eva oa ragai vovouaro varaata pievoi rutu. Ari ita, igei rutu varaata pierivora igei vao Pauto voeaaro.

#### *Pol Failimon Tavireva, Viipa Ruipaparai Rutu Ra Onisimas Ou Pieri Ora VII Iare Oiso Rutu Osa Araokoto Oara*

<sup>8</sup> Oire uva vearo vovou-a vii vaaro oa-ia taraipaoro uvuiparai ra oiso vii tavia goruvira, Ragai vo reoaro uvu iraori, uvare vegei araorei-a vo Krais vaisiaro-ia. <sup>9</sup> Ari ita, viipa siraoparaveira rutu. Eva-a oa vituaro iava gavaure visivi vii arepaavoi. Ragai-a vao avukatoavi Pol, ragoa tuukepa kepa-ia toupaavoi Krais-pa kovopato. <sup>10</sup> Oire uva oisi-a oiso osa ragavira rerapa ro-ia Onisimas vii arepaavoi, oiso ra rera tauvari ira viipa kovo rovoreva. Oa iava torireva vii arova. Uvare rera-a ira oiso rutu toupareveira, ragai oviitoaaro. Vao vituaro iava uvare tuukepa kepa-ia toupaoro Krais iava rera taviava. Oa iava ragai vo reoaro uvuoro Krais oirao piereva. Osa iava Airepa Tootoo rutu oureva. <sup>11</sup> Ari ita, voari tuariri viapau vearo kovo vai purapareva viipa. Ari vo vokio-ia uvuiparoi rutu ra vearo kovo rutu purapareve vegei rutupa ora vii.

<sup>12</sup> Oire uva rera arupaavoi vorevira vii iare. Uva rera-ia ora ragai iava vovouisi rutu tapo sipopaaivoi vii iare siraovira. <sup>13</sup> Ari ita, rerapa ruipa ragaparai rutu oiso ra vovio raga ragai ruvara-ia toupareve, vo uva tuukepa kepa-ia toupaavoi. Aue iava uvare oearovupa

♦ 1:1-2: Ef 3:1; Fl 2:25; Kl 4:17    ♦ 1:4: Kl 1:3-7; Ro 1:8-9    ♦ 1:6: Je 2:14-20; Fl 1:9    ♦ 1:7: 2 Ko 7:13

siposipapaaveira Vearo Siposipo iava. Oire ra oisi ragai ruvara-ia touoro ragai tauvareve vii vo tavukiaro ouoro. <sup>14</sup> Ari viapau uvuiparai ra goruvira rera-ia pitupaa vo raga ragai ruvara-ia, vosa viapau vearo vaisi pura rovori rera-ia. Ari ita, reasiparai oiso ra vii tavia oiso, “Ragai tauvari.” Viapau. Ari vii raga vo rugooaro vegei-ia. Oa-ia uvuipauei ra vegei tauvari vii vo ruipaaro sirova.

<sup>15</sup> Ari ita, ragai oiso rugorugooparai, Pautoa vai vo ruipaaro sirova torireva vii arova. Oire uva voa-a evoa uvava voreoro taru vii ruvara-ia riro kaekaevira rutu touparevere. Iu, uva oiraopavira rutu-a eisi. <sup>16</sup> Vo vokio vao oa-ia viapau oiso Onisimas touparevoi osa voari tuariri akukuvira oisoa kovo ragapareve. Viapau. Uvare vo vokio-ia oiso rutu touparevoi, Rera-a ro-ia vegei araokotoaaro vo Krais vaisiaro-ia. Eva-a oa-ia kovopa irarapa pute pievira touparevoi. Eisi osa iava uvuipaveiei ra rirovira rutu rerapa siraopave. Oire vosa oiso rugorugoopau rore Onisimas, Ragaipa kovopato ro-ia ora ragai araokotoaaro vo Turaro vaisiaro-ia, uva eisi osa rugoopaoro uvuipauei ra rirovira rutu rerapa siraopau vo sirao-ia pute pievira osa rerapa siraoparaveira.

<sup>17</sup> Ari ita, vosa oiso ragaire rugoopau, Vatetoa oaa rutu-a ro-ia Pol, uva uvuipauei ra rerare tapo oisi rugouu, vorevira ora vii iare rera voreoro ro-ia Onisimas. <sup>18</sup> E vuria vai peira rera-ia vii-ia ora vo vii orekerovu avu vaiaro-ia? Vosa oisi oarai pape, oire uva uvuiparai ra viipa oarai kare piea. <sup>19</sup> Oire uva va vao oa kekepari oreoa rigatopaavoi ora ragai Pol vavaearo raga iava. Oa-ia oiso puraparai, Iu, oiraopavira rutu viipa oara kare pieavere. Uva uvuiparai ra oiso vii tavia, Easi riroa rutu epao oa ou ragariva ragai ruvara-ia, uvare vii siposipo ragapaavora Vearo Siposipo iava. Oa iava Jisas oirao pieoro Airepa Tootoo ourivora. <sup>20</sup> Oire araokotoa oaa, vii Failimon arepaavoi oiso ra oisi eisi va purari. Uvare tavosivira rutu touparevoi vo Krais vaisiaro-ia. Uva va-a vao oa-ia uvuipauei ra oisi iava ragai vovouaro varaata pieri rutu, vo osa vii tauvareve Turaro oisi eisi piepasa.

<sup>21</sup> Ari ita, vii-ia taraipaoro oiso viipa vo pasio rigatoavoi. Oiso osa ragavira uvuipauei ra oisi va purari. Uvare oiso ragavira vii-ia taraiparai, evara-ia pute pievira rutu taru orekerovu rutu oisi purarivere rara ragaipa. <sup>22</sup> Oire uva oisi-a eisi osa ragaipa oai tugia vai ravaavira vatatopori. Ari ita, Pauto oirao piepaavoi rutu, oiso ra visii rutu varaaro variriara vearovira rutu uvupareve. Oa iava ragaipa raiva purarevere vao oa-ia vorevira voreravere visii tapo toupasa.

### *Ovoiopa Reoro Vatereva Pol*

<sup>23</sup> Oire uva oreovu-a vao-ia vo osa Epafras vearo voki purarevoi viiva. Ira oisoa ragai tapo toupareve vo tuukepa kepa-ia, uvare rera tapo Krais-pa kovopato. <sup>24</sup> Ora voeo tapo Mak vase, ora Aristakas, ora Dimas, ora Luk oea rutu tapo viiva vearo voki purapaivoi, voeo oea oisoa ragai tapo kovopaise.

<sup>25</sup> Oire uva ragai-a vao variriparai Turaro iare Jisas Krais, oisore ra visiipa tauva vatereve visii viraakooro rutu. Ovoiei.

Ragai-a vao, Pol.

<sup>◇</sup> 1:16: Mt 23:8; 1 Ti 6:2    <sup>◇</sup> 1:18: Lu 10:30-37    <sup>◇</sup> 1:24: Ap 12:12; Kl 4:10

## HIBRU

### Irapa Reoro Vo Vukuo Iava

Vo pasio rigatoreva iravu voeaopa oirao pie vovou irara Jiu-pa irara iava voea. Ari viapau taraipavie oiso, Iroutoa rutu vo rigato purareva.

Uva Krais iava Kristenpa irara tavitavireva oiso purapaoro, Ro Krais ira oearovu rutu ia pute iraopareveira reipaoro voeao iava, oiso osa voeao profet irara, ora voeao enselpa irara, ora ro Moses, ora Josua, ora pris irara Eron vo saraaro iava voea. Ora oiso tapo puraroepa vo pasio-ia, Vao Airepa Reo Ovoi oa tuariripa-ia pute iraopaveira tauva vatepaoro oirarapa. Ora vao korouua oa purareva ora rera-ia Krais ora ae tapo varao oirao pie reoro oara rutu Jiu varaaro-ia putepaveira varao oara oisoa purapaive vo tuariri rutu.

Oire uva Papara 11 sovara-ia goru reoro rutu toupaiveira oreoroa epao voeao iava tuariripa irara oea varaaro oirao pie vovouro oisoa kareke piepaive Pautoa raga-ia rari iraopaevoi rutu, 1:1-3.

2. Krais voea-ia enselpa irara puteparevoi rutu, 1:4-2:18.

3. Krais vaiterei-ia Moses vaio ora Josua puteparevoi rutu, 3:1-4:13.

4. Krais voea-ia pris irara Eron vo saraaro iava pute iraoparevoi rutu, 4:14-7:28.

5. Tuariripa korouuaroa-ia puteparevoi Krais, uvare ora rera iava revasiva-ia ovoiopa korouua purareva Airepa Reo Ovoi oirao piepaoro, 8:1-10:18.

6. Oirao pie vovou-a vao oa-ia uvui iraopavie ra Pauto roru piepape oiso osa tuariripa irara oisoa rera roru piepave, 10:19-12:29.

7. Goru reo vatereva Kristen irara vo vovouroaro tore piepasa, oiso ra tuuvu vovouvira toupave, 13:1-25.

#### *Pauto Oviitoaaro Vigeipa Reo Vatepare*

<sup>1</sup> Pauto tuariri rutu ora rera vo reoaro oisoa vatevatepareve voeaopa vigei aao iraraaro. Ora vo osa tapo vo oraivarovu rutu-ia oisoa profet irara-ia piepareve ra rera vo reoaro kareke pieive va kosi pieoro. <sup>2</sup> ♦ Ari vo vokiroa varao-ia ovoiopa vokiro oara-ia Pauto ora rera vo reoaro kosi pierevora rera Oviitoaaro-ia. Ro-ia ira iavirava Pauto orekerovu rutu pura rovoreva voari rovoa rutu-ia. Ora oiso tapore eera ira-ia orekerovu rutu touvereia vo ovoiopa voki-ia, ra oiso rutu pieve evara, Rera raga varaaro. <sup>3</sup> ♦ Eera Jisas ira iava roropaveira aviavia vova Pauto vo kerariaro-ia. Ro ira kekepaoro oiso taraipaaepa, O ari Pauto oiso toupareveira osa ro, uvare Pauto-va areiipareveira rutu Jisas. Rera vo reoaro vo goruaro oa-ia orekerovu rutu voka piepareveira oiso vuvuiua-ia ora vo rasitoa-ia, oisore ra orekerovu rutu oisi raga toupave vo vokiara rutu-ia. Oire uva raiva pura rovoreva oirara rutupa vo vuriara rutu verapasa vo ora rera revasiaro-ia. Oa iava vo vokio oirapapa varata-ia pauparoi vuvuiua-ia Pauto ruvara-ia, ro-ia Reitoa rutu ira oearovu rutu-ia king irara putepareveira.

#### *Pauto Oviitoaaro Ira Enselpa Irara Rutu-ia Putepare*

<sup>4</sup> Eva-a oa iava rera raga enselpa irara-ia putepareveira rutu. Oiso osa raga ita rera vaisiaro voea vaisiaro-ia putepareveira vo vaisio-ia oa vatereva Aiteto Pauto rerapa. <sup>5</sup> ♦ Uva va vituaro iava oiso toupae, uvare viapau oiso irai voea iava enselpa irara oisi tavireva oiso,

‘Vii-a ragai Oviitoaaro. Vo vokio-ia ragai-a vii aitetooaro.’

Ora oiso tapo osa viapau oiso irai voea iava enselpa irara tavireva oiso, ‘Ragai-a rera aitearo. Ira taru touparevereia ragai Oviitoaaro.’

<sup>6</sup> ♦ Oire vosa Pauto ora rera Oviitoaaro rutu Avaioto vara piesa aueparoepa, uva oiso puraroepa,

♦ 1:2: Ga 4:4; Hi 2:3; Sam 2:8    ♦ 1:3: Jo 1:14; Kl 1:17    ♦ 1:5: Sam 2:7    ♦ 1:6: Diu 32:43

'Voea rutu Pauto voeaaro purapurapa irara ensel irara taku viro iraoave rera Oviitoaario-ia vuurapa vaisi puraoro.'

<sup>7</sup> ◇ Oire uva voeao enselpa irara oea iava Pauto oiso puraroepa,

'Purapurapa irara ensel irara puraava, oiso ra oiso toupaive osa kiuvu. Ora tapo ragai voeaaro kovopa irara oiso puraava, ra oiso toupaive osa vuvua.'

<sup>8</sup> ◇ Oire uva vo reo raga purareva rera Oviitoaaro iava oiso,

'Turaro. Vi vaaro paupa viapau oiso opesiperea. Oa touvira rutu toupaiverea ovusa vaa ia paupau oearovu rutu tokipaoro. Voeao rutupa reipauverea, oea torevokovira rovirieipariverea.

<sup>9</sup> ◇ Viigoa vovou iraopau torevokoa purapasa vao vuria verapaoro. Eva-a oa vituaro iava Pauto, vii reraaro Pauto vii roporevora. Oa iava oearovu rutu-ia putepari, vo osa viipa avivikepaaveira vii-ia vuurapa vaisi purapaoro. Va-a vao oa vituaro iava roru vovou rutu vaterevora viipa.'

<sup>10</sup> ◇ Oire uva oiso tapo puraroepa Pauto,

'Vii-a Turaro viigoa vo rasio karekeriva va purapaoro rovoa-ia. Oa iava ora vii iava vavaea raga-ia vuvuiua ita aia purariva.

<sup>11</sup> Ari ita, oiraopavira rutu. Vara rutu opesiperea, vo osa vii raga touvira rutu toupari. Oara rutu evara rutapaperea avukapaoro. Oiso rutu osa varoara varao oarapa tutuu piepapeira oiso ra karikari piro.

<sup>12</sup> Oisi-a eisi osa piepaivora uvuipau ra vara vikopari vara vikipasa. Uva vara rutu oisi purariva oara ora tavariopapeira oiso osa varoara ora tavariopapeira, vo osa vii viapau oisi otavarioiei. Ora viapau rutu oiso avukapauverea.'

<sup>13</sup> ◇ Ari ita, Pauto viapau irai enseltoa vai tavireva oiso purapaoro,

'Vo pauu ragai vaaro iava oirapapa varata. Uva tuepauverea vo vokio-ia oa-ia voeao viiva keripa irara tovoaverea vo vii reroaro, oiso rutu osa orekerovu varao oara ivara-ia tasipaiveira kokotoara.'

<sup>14</sup> Oire uva eake rutu-a voeao enselpa irara? Uvare voea rutu kovopaineira urauravira Pautoa-pa. Oa iava Pauto voea sipopareveira voearo tauvapasa oearoa ora vatatopopaaeira rerare tuevira. Vo osa voeapa ruipaparo, oiso ra ora rera iare voea oupareve.

## 2

### *Pauto Vo Ruipaaro Oisi Toupaiveira Ra Vorevira Ora Rerapa Vigei Oupareve*

<sup>1</sup> Oire uva vo reo-a vao oreoa vate rovoivora vigeipa oiraopa reo rutu, oa iava vo reo uvu iraopapeira. Vo reo-ia pitupapeira goruvira rutu. Teapi vo reo arova ora aapaapau pie oiso osa opitaisi vo avaka rovu ivara-ia gaegaerepai. <sup>2</sup> ◇ Uva vo siposipoa-a vao oa purapaineira enselpa irara oa eveipaiveira oirara rutu oiso, Va-a vao-ia oiraopa siposipo rutu aue Reo Taisi Jiu vaaro. Uva viapau oiso vearovira vo reo sirova utu rovopaaepa. Oa iava vuria vo voriaro uvuivira ouivora. <sup>3</sup> ◇ Oire uva apeisi-a? Vosa vo siposipo eva uvu ragapape vo pitupitu iava Pauto vaaro oearovu oupa vore ora rera iare, uva apeisi ragavira oiso osa iava uvuipavieie ra vuri vovou vo voriaro vatavatape? Viapau rutu uvuipavieie ra vuria vo voriaro vatavatape, uvare Turaro Vearo Siposipo kosi pie rovoreva. Oa iava oearovu va uvuivoiva, Pauto voea oureva ora rera iare. Va-a eva oa rutu vituaro iava vo siposipo oiraopavira rutu oiso karekeerao vigeipa. <sup>4</sup> ◇ Uva Pauto vigei rutupa evo reo oirao piereva oaravu rutu ravotoara puraoro vigeipa ora rera vo goruaro riro goru rutu kareke pieoro. Oa iava oaravu tapo vatereva voeaopa oirao pie vovou irara, varao vatevateara Tugoropato Uaurato varaaro. Uva vara-a evara oara vatereva voeapa ora rera vo ruipaaro raga-ia, Pauto.

### *Jisas Raga Uvuiparoi Rutu Vorevira Vigei Oupasa*

◇ 1:7: Sam 104:4    ◇ 1:8: Sam 45:6-7    ◇ 1:9: Ais 61:1-3    ◇ 1:10: Sam 102:25    ◇ 1:13: Sam 110:1

◇ 2:2: Hi 1:1    ◇ 2:3: Hi 10:29, 1:1; Lu 1:2    ◇ 2:4: Jo 4:48; 1 Ko 12:4; Ef 1:5

<sup>5</sup> Oire uva airepa vovouva urioroepa Krais. Oa iava viapau oiso Pauto enselpa irara reesireva oisore ra varao-ia airepa rugooro tokipaave, varao oara iava tavitaviparai. <sup>6</sup> ♦ Viapau. Ari, iravu oirato oiso puraroepa Tugoropa Vuku sovara-ia oiso, ‘Pauto. Eake irara vai-a oirara ra voeare rugorugoo rovou? Iu. Eake rutu-a oirara ra voeapa siraopau rutu?

<sup>7</sup> Ari ita, poteku vuutavi raga oa-ia voeapa oisi pierivora, oiso ra enselpa irara reroarovi toupaive. Uva evoea oirara oea-ia keraria tovorivora, oiso ra vara rutu voea vaisiaro kae piepaise. Uvare orekerovu rutu voea reroaro toupaiveira varao oara rutu tokipaiveira.’

<sup>8</sup> Oiraopavira rutu oiso osa evo reo purapai oiso, Orekerovu rutu oirara reroarovi toupaivoi varao oarapa reipaaveira. Ari touvira rutu oirara siitueperea vo rara oisi pieive orekerovupa reioro. <sup>9</sup> ♦ Ari ita, viapau oirara oisi kekepapeira, ari Jisas raga. Poteku vuutavi raga oa-ia tourevora vo enselpa irara reroarovi oiravira. Oa iava Pauto oirara rutupa siraoro Jisas siporevora, oiso ra voea rutupa kopiiro. Okopiia isivaaro iava rera kae pierevora ora rera iare. Uva rerapa rei vaisi rutu vaterevora rera tovooro rera vo kerariaro sovara-ia.

<sup>10</sup> Uvare Pauto-a ira orekerovu rutu karekereva ora rerapa. Ora orekerovu rutu rovo rovoreva. Eva-a oa vituaro iava oisi torevokovira rutu Jisas oisi piereva. Ari ita, Jisas eera ira iava oirara rutu uvuipaai ra oisi toupaive, ra va iava Pauto ora rera iare vorevira voea oupareve. Uva va-a vao oa vituaro purareva Jisas siitoka ouoro. Uvare rera raga kataitoa rutu ira uvvivira rutu karekeroepa oirara rutu tuvetuvepasa vaore, oiso ra Pauto voaaro koatapaave. <sup>11</sup> ♦ Uva Jisas vuriara rutu vera iraopareveira oirara iava. Oa iava voea rutu Jisas vase areiivira rutu toupaiveira, uvare torevoko irara-a vigei. Oa iava kataitoa rutu-a Aiteto Pauto vigei rutu Aitearo. Oa-a eva oa sirova viapau oiso Jisas ariia vai oupareveira, vo rara oirao pie vovou irara rutu vaisipareve oiso, “Ragai araoko iraraaro.” <sup>12</sup> ♦ Ira vo reoaro oiso pūraepa,

‘Pauto. Ragai vii iava araoko irara oaa tavipaoro vii vaisaro-ia vuurapa vaisi purapaaverea vo oirara rutu osireiaro-ia voea oea ora gurupaave.’

<sup>13</sup> ♦ Ora vo reo-ia tapo rera vo reoaro oa-ia oiso puraroepa,  
‘Ragai vii-ia Pauto rari vovou purapaaveira.’

Ora vo reo tapo oa oiso purapai,  
‘Ragai-a vao ragoa voeavio tapo kakae vure toupaavoi, oea vaterevora Pauto ragaipa.’

### Jisas Ira Oiravira Karekeroepa Vigei Tauvasa

<sup>14</sup> ♦ Oire uva voeao oea oiso vaisireva kakae vure evoea-a oirara rutu. Uvare Jisas oisi rutu kavauroepa oiso osa voeao oirara oeava areiipare. Ira eisi ragavira piereva aue-ia evao parikou-ia kopiiro, oiso ra Seten vo goruaro-ia tasireve vao oirara kopii piepa goru. <sup>15</sup> ♦ Uva Jisas Seten-ia pute ovoireva rera vo goruaro tokooro. Oa iava voea vo rugorugoroaro karukarureva voeao oea vokiara rutu-ia oisoa kopiiapa uriripaave. Uva vo uriri tapo eva opesi pie ovoireva. <sup>16</sup> Oiraopavira rutu vao-ia taraipavio oiso, Viapau oiso enselpa irara tauvapareveira. Viapau. Aue iava uvare voe-a voeao oea tauvapareveira oea toupai Ebraham aao iraraaro. <sup>17</sup> ♦ Oa vituaro iava oiso rutu karekeroepa osa oirara rutu araokotoaro, oisore ra oiravira rutu touoro goruvira rutu Pauto vo kovoaro purapareve. Vo kovo-ia okovoa oisoa purapareve Rovopato Pristo, oiraopa kovotoa rutu Pautoa-pa tauoara purapaoro vigei iavirava siraovira. Oa iava Pauto oirara iava vuri vovouro rutu verareva. <sup>18</sup> ♦ Oire uva oisi ragavira eisi osa toupaoro uvuiparoveira rutu voeao tauvapao oea-ia kokaraparoveira Seten. Eake iava? Uvare Jisas tapo-ia kokara ragaroepa rera Seten. Oa iava va-ia vo sirao oureva eera, vo osa voa Jisas rera-ia Seten vorevira putereva rutu.

---

♦ 2:6: Sam 8:4-6    ♦ 2:9: Fl 2:7-9; Ap 2:33; Jo 3:16    ♦ 2:11: Hi 10:10    ♦ 2:12: Sam 22:22    ♦ 2:13: Ais 8:17-18; Jo 10:29    ♦ 2:14: Mt 16:17; Jo 1:14    ♦ 2:15: Ro 8:15; 2 Ti 1:7    ♦ 2:17: Fl 2:7; 1 Jo 2:2, 4:10    ♦ 2:18: Hi 4:15

## 3

*Vao Turaro Vaisi Jisas Vaaro Oa Vao-ia Turaro Vaisi Moses Vaaro Puteva*

<sup>1</sup> Araoko irara oaa, visii vaisireva Pauto, “Ragaipa.” Uvare viapau vuri vovou vaiei visii-ia. Oire rugoo iraopata rore Jisas. Eera ira siporevora Pauto vo rasio iare rera vo reoaro kaepasa. Oa iava oiso rera karekerevora rera Rovopatoa rutu Pristo. Uva rera-a eera ira vaisipai oiso, “Vigei reraaro.” <sup>2</sup> Uva viapau oiso Pautoa-va kaureoroepa ro ira roporeva rutu vo kovo purapasa. Oiso osa pierava ae Moses ira viapau oiso potereva vo oirara rutupa kovopaoro Pauto voeaaro ora Pautoa tapopa. <sup>3</sup> ♦ Oire auea vao-ia ovoovoa ro iava oirato ira kepa paureve rei vaisi kepa. Ra rera vaisiaro reiparo vo kepa-ia. Oiso osa aue Jisas ira vaisiaro Moses vaisiaro-ia puteva vo Pauto rugorugooaro-ia. <sup>4</sup> Ari ita, viapau oiso okepai akukuvira kareke ragapapeira. Viapau. Ari oirara raga oea vo keparo rutu evara paupaiveira. Oiso osa Pauto ro ira orekeroru rutu purareva. <sup>5</sup> ♦ Oire uva Moses-a eera Pauto kovopatoaaro. Uva viapau oisoa potepareve voeaopa kovopaoro oea Pauto vo kepaaro-ia toupaiveira. Viapau. Asi eva-ia rera vo kovoaro ovoovoa purareva vao oa iava ora tavitaviave vo utupaua. <sup>6</sup> ♦ Ari ita, uva Krais-a Pauto Oviitoaaro rutu ira tapo viapau oiso potepareveira vigei tokipaoro vigoa oiso toupapeira, Pauto vo kepaaro. Uva vigei vao vigoa oiso rutu toupai, Pauto vo kepaaro, vo rara Krais-ia oirao piepaoro goruvira pitupape vo Pauto vo Saraarore tuepaoro.

*Voeao Oea Pauto GisipoaroVa Kaureopaa Oea Viapau Uvuipaa Ra Reareaa Vai Ouive*

<sup>7</sup> ♦ Oire uva eisi toupaoro Tugoropato Uraurato ravaavira vigei vatatopo piepareveira oiso purapaoro,  
‘Vo osa vo vokio reoara uvu iraopata varao vova Pauto gisipoaro-ia,  
<sup>8</sup> ra opeita oiso vo vovouro purapata osa voviri tuariri kaureopataepa rutu Pautoa-va. Vo osa voraro toutava raaka tapiro evoava oisoa Moses vo reoroaro akeakepata varo reroaropaoro.  
<sup>9</sup> ♦ Ari ita, uvaroa evoraro uva touiva voeari visii aao iraraaro. Uva oisoa voraro toupaoro oaravu rutu vuriara purapaive. Oa iava tutuu pie ragaepa ragaipa oiso ra voea opesi piea. Osa viapau. Ari vo resura tau ivaro-ia (40) touiva osa voea oisoa tokipaa touvira. Iu ita. Evoa oisoa ragai vo tokiaro evei ragapaoro vuri vovouro rutu pura ragapaive.  
<sup>10</sup> Oa vituaro iava voeare kasipuraepa oiso puraoro, Voea rutu voeao-ia riro kaureo irara. Uvare viapau oiso ragai vo reoaro sirova utupaaveira oisi vara purapasa.  
<sup>11</sup> ♦ Uva voeare kasipuraepa. Oa iava reo ovoi puraava oiso puraoro, Viapau rutu oiso oeai koataavere ragai tapo touoro rearea!

*Viapau Rutu Uvuipavio Ra Kaureopavio Pauto-re Oiso Osa Voeao Isrel*

<sup>12</sup> ♦ Araoko irara oaa, ora vatatopo iraopata. Teapi irai visii iava oiso okaureoi purapareve evo vovouro rutu purapaoro vuriara. Ra vara-ia ora piro piero Pauto arova. Ro Pauto ira touvira visii tokipareveira. <sup>13</sup> ♦ Ari oearovivu tauvapata ora visii iava vokiara rutu-ia, vo osa touvira evo vokiro toupaive vore utupaua. Teapi irai visii iava ora keakea ragaparo oiso purapaoro, “Viapau oiso vuri vovou uvuipai ra ragai vuri pieive.” Oire uva va-a eva oa viapau oiso uvuipai ra vii arovi pieve Pauto vo pitupituaro sirova utusa. <sup>14</sup> Eake iava? Uvare vigei rutu Krais tapo takuvuvira rutu toupai rera vaaro oupaoro tauvaa, vo rara vao-ia rari vuku goruvira rutu pitupape vao oa-ia rovovio rovovira rutu. Teapi vaore ovaupavio Ovoiopa Vokire tuea.

<sup>15</sup> Iravu vo rigato purareva oa oiso purapapeira,  
‘Vosa vo vokio reoara uvupata varao vova Pauto gisipoaro iava, ra opeita vo vovouro purapata osa voviri tuariri kaureopataepa rutu Pautoa-va.’

<sup>16</sup> Uva irou irara rutu-a voeao oea Pauto gisipoaro oisoa uvu ragapaoro rerava kaureopaaave? Evoea raga ita oea tuvetuvereva Moses vo vokio-ia oa-ia Isip-ia kavuoro

♦ 3:3: 2 Ko 3:7-11   ♦ 3:5: Nam 12:7; Eks 14:31; Diu 18:18-19   ♦ 3:6: 1 Ko 3:16; Ro 5:2   ♦ 3:7: Hi 9:8; Sam 95:7   ♦ 3:9: Ap 7:36   ♦ 3:11: Hi 4:3, 5   ♦ 3:12: Hi 12:25   ♦ 3:13: Hi 10:24-25; Ef 4:22

avaaepa. <sup>17</sup> Ora irou irara rutu-a voeao oeare kasipuroepa Pauto aue-ia vo resura tau (40) ivaro? Ari voea raga ita evoea oea vuri vovouro purapaiva. Oa iava kopiiaepla evoraro raaka tapiro. <sup>18</sup> ✩ Uva irou irara-a voeao oeapa vao ovoiopa reo purareva Pauto oiso voea vosioro ravaavira, “Viapau rutu oiso oea koataaverea ragai tapo touoro reareasa!” Oreoa vao-ia oa purareva voeare voeao oea oisoa rerava ora kaureopaave rutu. <sup>19</sup> ✩ Oire uva va-a eva oa-ia taraipavio rutu, uvare va iavirava viapau oiso uvuiaepla rera voarore reareapa tapi koataave, uvare viapau rera-ia raripaoro oisoa toupaive.

## 4

*Rearea Toupai Pauto Voeaaropa Oirara*

<sup>1</sup> Touvira Pauto vo reoaro vigeipa toupaivoi vore koatapasa reareapa tapi. Ra ora vatatopo iraopata vaopa uririaporo, teapi irai vigei iava potereve vo Pauto osirearo-ia, ra viapau uvuilo voare koatasa vo reareapa tapi. <sup>2</sup> Iu, oa iava vo siposipo uvuerao oiso ra Pautoa tapo toupape oiso osa voeari tuariripa irara. Ari ita, oea vo siposipo oisoa uvu ragapaive. Osa iava vo reo oupaoro viapau oisoa vo reo oirao piepaive.

<sup>3</sup> ✩ Ari vigei vo reo vao-ia oirao piepaera. Eva-a oa vituaro iava koata ovoiviera voare vo Pauto voaaro reareapa tapi toupasa. Oa iava ita oiso puraroepa, ‘Uva voeare kasipuraepa. Oa iava ovoiopa reo puraava oiso puraoro, Viapau rutu oiso uvuipai ra oea koataaverea ragai tapo touoro reareasa!’

Uva oisi-a eisi osa puraroepa. Ari oiraopavira rera vo kovoaro opesi pierewa rutu voari rovoa-ia. Oa iava voeare oisoa tueparo. <sup>4</sup> ✩ Oa vituaro oiso toupaiveira vo-ia Tugoropa Vuku-ia, uvare oiso puraroepa ae iava vao-ia erao vatarapa (7) voki, ‘Vao-ia erao vatarapa voki rearearoepa Pauto orekerovu rutu isivaaro iava vara purarevoiva.’

<sup>5</sup> Oire uva vo reoa raga-a vao oa ita toupaivoi vo Tugoropa Vuku sovara-ia, ‘Viapau rutu oiso koataaverea vo ragai iare reareasa.’

<sup>6</sup> Ari ita, voeao oea vearo siposipo uvu rovoiva oea viapau oiso koataaepa Pautoa iare vo reareapa tapi reareasa. Uvare viapau oiso oirao pie vovou vai oisoa purapaive. Ari oearovu epao touvira, oea uvuipai koatasa rera iare Pauto vo reareapa tapi. <sup>7</sup> ✩ Eake iava? Uvare Pauto ovokivu reesireva oiso vaisioro, Vo vokio. Oreoa vao isivaaro iava Devit vo reo rigatorevora vao-ia Pauto vo reoaro vo vokio iavapa reo oiso, ‘Vosa vo vokio reoara uvu iraopata varao vova Pauto gisipoaro-ia, ra opeita vo vovouro purapata osa tuariri kaureopataepa rutu Pautoa-va.’

<sup>8</sup> ✩ Uva oirara vo vuutao-ia touiva oa-ia Josua voea tokireva. Oire vosa vo vuuta-ia eva koataaeri vore Pauto voaro reareapa tapi, ra viapau oiso Devit oisi oa-ia taraioro oiso vo rigato purareve, ‘Ovokivu toupai touvira oearovupa.’ <sup>9</sup> Ari ita, oiraopavira rutu, uvare touvira vuuta epao vao oa-ia koataaverea vo Pauto ruvara iare reareasa. Oa oiso toupae osa vo vokio erao vatarapa voki oa-ia rearearoepa orekerovu rutu puraoro. <sup>10</sup> Aue iava uvare ro ira koatato voare vo Pauto voaaro reareapa tapi, uva oiso rutu toupare, Ira ita eera oisi orekerovu rutu opesi pierewora, oa iava rearearoai oiso osa Pauto rearearoepa. <sup>11</sup> Oisi-a eisi osa visii tavipaavo oiso, Orekerovu vearovira rutu purapape, ra va iava koatavioverea vore Pauto rera tapo reareapasa voa. Auepa teapi irai vigei iava oiso pierewe osa voeao tuariripa irara oea oisoa kaureopaave. Ra va iava viapau oiso uvuipa ra Pauto tapo toupasa koatato.

<sup>12</sup> ✩ Oiraopavira rutu oiso osa Pauto vo reoaro tootoopai ora kovopaivoi. Riro avuavua oa oaravu rutu sigoara avuavuaro-ia putepaiveira rutu. Uva eisi osa uvuipai oirara ra va avuavuaro sovopaise vo ora voeao sopaaro-ia, ora vo tapo ora voeao varaaro-ia rugorugooara. Oa rokopaiveira vo keruara rutu sovara-ia. Oire voava vearovira rutu purapape, ra va iava koatavioverea vore Pauto rera tapo reareapasa voa. Auepa teapi irai vigei iava oiso pierewe osa voeao tuariripa irara oea oisoa kaureopaave. Ra va iava viapau oiso uvuipa ra Pauto tapo toupasa koatato.

✩ 3:18: Nam 14:23; Hi 4:6 ✩ 3:19: Jo 3:36 ✩ 4:3: Sam 95:11 ✩ 4:4: Jen 2:2; Eks 20:11 ✩ 4:7: Sam 95:7-8 ✩ 4:8: Jos 22:4 ✩ 4:12: Jer 23:29; Ef 6:17 ✩ 4:13: Sam 33:13-15

vai vataupape. Viapau. Ari orekerovu rutu-ia taraiparoveira Pauto vara kekepaoro. Ari ita, orekerovu rutu viaevira toupaiveira. Ra va iava vara-ia taraiparo Pauto. Va-a eva oa iava uvui iraopavie i ra ora vigei vo vovouroaro karekepape. Ra va iava vara-ia taraipaoro Pauto vara rovirieipareve.

### *Jisas-a Rovopato Pristo Vigeipa*

<sup>14</sup> ✩ Eva-a oa iava goruvira rutu toupata Jisas raga-ia raripaoro. Ira raga uvuiparoi vigei tauvapareve, uvare rera raga-a Pauto Oviitoaro. Eera ira koata rovoroepa Pautoa tapo tousa, uva voa toupaoro Rovopato Pristo vo kovoaro purapareveira vigei tauvapaoro. <sup>15</sup> ✩ Uva Jisas viapau oiso toupareveira osa irai pristoa vai, ro ira viapau vigei varaaro vuriara vavataaro sovopareve. Ari ita, vigei reraaro-a Rovopatoa rutu Pristo Jisas ira tou rovoreva vo rasitoa-ia oiso osa vigei vao-ia. Oa iava oaravu rutu vuri pitupituro rera-ia kokara ragapaepa, oiso ra vuria vai purareve. Osa viapau oiso oai purareva vuria vai. <sup>16</sup> ✩ Oisi-a eisi osa vituaro iava uvuipavie i ra koatatio Pauto voaaro iare reia paupa tutuu pieoro uriri asavira rutu. Ra voa vigei kekeoro vigeipa vereopa vovou vatereve, vigeipa siraooro vo vuutao-ia, oa-ia riroa rutu tavaka karekeperea.

## 5

### *Ro-ia Jisas Rovopatoa Rutu Pristo Vigei Orirupato*

<sup>1</sup> Oire ro oirato ira rovopa pris irara vo kovoaro-ia pitupareveira, oirara raga iava rera-a. Uva rera vo kovoaro rutu-a vao-ia Pautoa-pa kovopaoro oirara rutu tauvapasa oiso-ia, tauoara purapareveira auere ra Pauto oirara iava vuriara verapareve, ora Pautoa-pa vatevateara vate ragapareve voea iavirava. <sup>2</sup> Uva uvuiparoveira rutu voeaopa siraopaoro voea tauvapasa oea ruruvutu rugoo-ia ora piro piepaaveira, uvare viapau goru vovouro vai voea-ia toupaiveira. Uva oisi raga pristo vo vovouroaro toupaiveira osa sovopaoro ora rera-ia voea tauvapareveira. <sup>3</sup> Uva oiso toupaoro uvui iraoparoi tauoara purapareve oirara tauvapaoro, oiso ra Pauto voea iava vuriara oaive verapareve ora rera iava tapo pris.

<sup>4</sup> ✩ Viapau rutu irai uvuiparoi ra ora iraipa avivikevira toupasa ora ropoparo oiso purapaoro, "Ragai-a Rovopato Pris." Viapau. Ari Pautoa raga ira rera vaisipareveira oisi. Eva-a oa iava Rovopatoa rutu vo kovoaro purapareveira Pristo. Oa-a eva oa vituaro iava Eron Rovopato vo kovoaro Pris kovo oureva voari tuariri.

<sup>5</sup> ✩ Oire uva eisi osa ita toupaoro Krais viapau ora roporoepa rera raga. Viapau. Ari Pautoa raga ira rera roporeva rerapa avivikea vateoro. Oa iava Pauto oiso puraroepa, 'Vii-a ragai Oviitoaro. Oa iava vo vokio-ia ragai viipa oiso toupaa, Ragai vii Aitearo.'

<sup>6</sup> ✩ Uva oreovu toupai vo Tugoropa Vuku sovara-ia oa oiso purapai, 'Vii pris vo kovoaro purapariverea vokiara rutu-ia vao oa viapau opesipape rova Melkisedek areiipaoro rutu.'

<sup>7</sup> Oire vo osa Jisas oisoa toupareve vo rasio-ia uva voava oisoa variriparo Pautoa iare. Uva oisoa gaupaoro areparo rera vo vavataaro sovopaoro. Uvare oisoa oiso taraiparo Jisas, Pauto uvuiparoi ra ragai utoreve, ra va iava viapau kopiira rutu. Uva va-a eva oa iava Pauto rera uvureva. Eake iava? Uvare taraipavira rutu Pautoa-pa avivikepaoro oisi vo variri oisoa purapareve Jisas. <sup>8</sup> ✩ Oire Jisas-a Pauto Oviitoaro rutu. Ari tavaka vovou vo vavataaro kaereva. Oa rera tarai pieva rutu, oiso ra va iava Pauto gisipoaro sirova rutu uturo. <sup>9</sup> Uva eisi osa piepaoro Jisas vo rekasio-ia rutu rekasiroepa oa purareva Pauto rerapa. Eva-a oa vituaro purareva toupaoro, oiso ra va iava Pauto vigei oupareve vorevira ora rera iare, vo rara goruvira rutu Jisas gisipoaro sirova utupavio. <sup>10</sup> Uva rerare ro Jisas oiso puraroepa Pauto, "Rovopatoa rutu vii Pristo vo Melkisedek vo saraaro sovara iava."

### *Opeita Kovepata Oirao Pie Vovou Arova*

<sup>11</sup> Visiipa riro gorupa reoro oara vatesa aue ragaparai osa vavagisipatai. Uva viapau vearovira rutu vara uvupataveira, ra vara sirova utupata. <sup>12</sup> ✩ Riro kaekaevira

✩ 4:14: Hi 13:1, 7:26, 10:23   ✩ 4:15: Hi 2:18; 2 Ko 5:21; 1 Pi 2:22   ✩ 4:16: Ef 2:18   ✩ 5:4: 2 Kro 26:18; Eks 28:1

✩ 5:5: Jo 8:54; Sam 2:7; Hi 1:1, 5   ✩ 5:6: Sam 110:4; Hi 7:17   ✩ 5:8: Hi 3:6; Fl 2:8   ✩ 5:12: Ap 7:38; 1 Ko 3:2

toupatavora visii vao oirao pie vovou irara. Osa iava uvuipataeri oiso ra oearovu sipoipopata va iava, osa viapau oiso uvuipataveira. Ari oearovu raga ruvara-ia vo tarai ou iraopataveira vo sipoipoto iava vao oa ou rovotava voari tuariri. Oiraopavira rutu, uvare vorevira oiso rutu toupatavaveira osa voeao veu kakaero oea viapau uvuipaai ra sopeara vai aiopaive. Viapau. Ari ae raga tapi rovuro. <sup>13</sup> ♦ Oire vosa iravu kakaeto tapi rovu raga tapipareve, ra va iava oearovu rera siituepaoro oiso purapaave, “Okakaeto-a ro-ia ira-ia viapau vearo rugoo vai toupai. Ira viapau taraiparo torevoko vovou vai-ia.” <sup>14</sup> ♦ Ari ita, riropa irara raga sope varuro aiopaiveira. Uvare voea varaaro rugorugooara oaive roroiovira toupaiveira. Oa iava taraivira orekerovu rutu rovirieipai oiso, Vearo-a vao-ia, ari vuri-a vao-ia.

## 6

*Goruvira Rutu Kovopape Oirao Piea-ia Pitupaoro*

<sup>1-2</sup> ♦ Oisi-a eisi osa iava uvui iraopavie ra topa pievira otarairovu ita oupape. Oiraopavira ita. Eake iava? Uvare rovovira Krais vo taraiaro ou rovoepa. Oa iava uvuipavie ra otarairovu ita topa pievira oupape. Uvare rovopa rutu-a vao-ia ro-ia Krais ira-a vigei vaaro vituaro rutu oirao pie vovou. Uva apeisi-a? E vorerivira ita visii taviavere va vituaro puraoro ita? Viapau. Teapi visii tavi ragaa ita akukuvira oiso puraoro, “Opeita ora vatatopo pie ragapata akukupa kovoro raga pura ragapaoro.” Viapau. Ora teapi visii sipoipoto ragaa baptaisa vituaro iava ita, ora vao vavae tovo vo viraakoa purapaoro. Ora voearo iava oearoa kopii rovopaaveira ra voava vorevira voea ita tore piepape. Ora vo vuutao iava oa-ia Pauto oirara rutu rovirieireverea voeapa vuri vovou vo voriaro vateoro. <sup>3</sup> Vo sipoiporo-a evara oara iava uvuipavie ra topa pievira ita avavio otarairovu iare ita, vo rara Pauto oiso puraparo, “Osa vearopai eisi osa piepata.”

<sup>4</sup> ♦ Oearovu epao oea Pautoa-ia taraipaaveira aviavi pievira rutu. Ari vosa koveave oisi rera-ia taraipaoro ra vo tarai kavuoro kove ovoiave. Ra apeisi ragavira vorevira ita voreave oiso vo tarai iare rera iava vao-ia torevoko vovou toupasa? Oiraopavira rutu, uvare Tugoropatoa-ia Uraurato tarai rovoaepa rutu ro vova vuvuiua-ia rera sovopaoro ora voea sopaaoro-ia. <sup>5</sup> Uva oiso tapo taraipaerao, Pauto vo reoaro-a vao oa tapo-a vearopai rutu. Ora vao riroa rutu gorua oa eveiivora va sovopaoro ora voea sopaaoro-ia vao oa kovovere rara vo vuutao-ia Pauto vaaro. <sup>6</sup> Uva evara rutu arova koveaepa. Ari ita, oiraopavira rutu viapau oiso uvuipaai ra vorerivira ora voearo oiso puraave, Ragai iava vuria oaa verari Pauto. Eake iava? Uvare vara ruture ovauoro evara oiso piepaveira oiso osa ro Pauto Oviitoaaro tapaivora evao parikou-ia. Oa iava riroa ariia oureva oearovu rutu osireiaro-ia.

<sup>7</sup> ♦ Ari ita, vosa rasia vearovira toupaive, oisi toupaoro oaravu rutu aioara kova piepaveira vara-ia oirara rutu aio piepasa. Ra ovokirovu-ia Pauto vo rasipa vearoa purapareve kokeva kove piepaoro vo rasi vearo piepasa. <sup>8</sup> Ari vosa vuri kou rokarokapa kou voa kovape, ra va-a eva oa iava vuri rasia. Oa iava Pauto uvuiparoi ra vo rasi opesi pie ovoireve vai pasi va kasioro.

<sup>9</sup> Visii-a ragai vate iraraaro, visii tavipaavoi riro vavatavira rutu eisi. Ari visii-a vearovira rutu taraipaioveira visiigoa vao oiso toupatavaveira goruvira rutu oirao pie vovou purapaoro oa-ia igei vo reoaro uvupataveira. Oa vituaro iava eva vearoa rutu kuea oa kareke piepataveira. <sup>10</sup> ♦ Uva oiso taraipavioveira, Pauto orekerovu rutu torevokovira rovirieipareveira. Teapi keapata oiso, Visii vo kovoroarore ovauroverea ora visii vo siraoroar varao rerapa. Uvare rerare rugoopaoro rera voeao oisoa tauvapata. Ari ita, eisi osa touvira voea tauvapataveira. <sup>11</sup> Oire uva rirovira rutu vaopa oiso ruipapaiei rutu oiso ra visii rutu katakataivira oearovivu rutu kavikopata voeapa siraopaoro. Eva oa iava taru vearopara outaverea varao oarare visii rutu rugoopaoro oisi piepataveira eisi ragavira raripaoro. <sup>12</sup> Opeita pokapokapata. Uvare igei oiso ruipapaiei rutu visiipa

❖ 5:13: 1 Ko 3:1 ❖ 5:14: Ais 7:15 ❖ 6:1-2: Fl 3:12-14 ❖ 6:4: Hi 10:26, 32; Ef 2:8; Ga 3:2, 5 ❖ 6:7: Sam 65:10 ❖ 6:10: Mt 10:42, 25:40

ra oiso rutu toupata osa voeao riro oirao pie vovou irara aate vovou irara rutu. Auere ra oisi eisi toupaoro vearovpara oupaive varao oarare ovoiopa reo purareva Pauto.

### *Uvuipavie Vo Pauto Vaaro Ovoiopa Reo Oirao Piepasa*

<sup>13</sup> ♫ Pauto Reo Ovoi rutu purareva ropa Ebraham. Oa iava va-ia reo goru purareva, oiso ra va iava Reo Ovoi rera vaaro oirao piepape. Osa viapau oiso iraiei ira toureva vo vuuta-ia oiso ra irai vaisiaro Pauto vaisiaro-ia putereve. Oisore ra ira vaisipaoro Reo Ovoi rera vaaro oirao piepareve Pauto. Eva-a oa vituaro iava rera raga Pauto ora vaisiroepa ora rera vaaro Reo Ovoi pura ovoioro. <sup>14</sup> Oire Pauto oiso puraroepa rore Ebraham, ‘Ragai-a vao ragoa vii tapo Ebraham vao Reo Ovoi purapaavoi, oiso ra riro irara rutu oirara taru viire aiteave voeao ovii iraraaro vii aao iraraaro.’

<sup>15</sup> Oa isivaaro iava oisoa Ebraham toupareve reo ravaa ateate piepaoro vao oa oirao piereva Aisak kavauoro.

<sup>16</sup> ♫ Oire vosa irai oiratoa vai reo ovoi vai purareve, eera-a ira oisoa ro vaisipareve ira rera vaisiaro-ia oisoa putepareve rera vo reoaro oirao piepaoro. Osa iava oreorovu rutu ora eaka piepapeira. <sup>17</sup> ♫ Oire uva Pauto oiso ruipaparoepa rutu, ra voea iava vakuvaku rugooro verareve. Ra va iava goruvira rutu rera-ia raripaave varaore rugorugoopaoro oara ouiverea rara rera ruvara-ia vearovpara. Uva va-a vao-ia oa vituaro iava ora rera raga ora vaisiroepa rera vaaro Reo Ovoi oirao pieoro rutu. <sup>18</sup> Uva vo reorei-a vareo-ia oiso-ia, Reo Ovoi-a vao-ia, ari oirao piepa reo-a vao-ia. Uva viapau rutu oiso uvuipai rakeakeavira ora tavariopape vo reorei. Viapau rutu. Aue iava uvare Pauto viapau rutu oiso uvuiparoi ra vo reorei iava oreo-ia kuuvu reoa vai purareve. Uva oisi-a eisi osa taraipaoro rera-ia ro vigei reraaro uvuipavie i ra ora vigei iava sopaura goru piepape. Osa iava uvuipavie i ra vo vovou-ia goru vovou pitupaoro Pauto vaaroire viraakoa tuepavio, vigei vao vigoa rera iare ikauepa, oiso ra vigei utoreve. <sup>19-20</sup> ♫ Uva oisi toupaoro uvuipavie i ra ora vigei iava sopaura tupapaoro goruvira rutu toupape. Ra voava viapau oiso ora virupape. Viapau. Ari vigei uvuipavie i ra oriruvira rutu toupape. Ra va iava Pauto vigei sopapro sisiropoaro Tugoropa Tavuki Rutu-ia toupareve vo uva koataroepa Jisas vigei tauvaoro. Uva va-a eva oa vituaro iava Jisas oiso rutu toupareveira opesi asavira eera vigei reraaro Rovopato Pristo Pauto vo tauvaaro oupato vigeipa. Ari ita, eera Jisas Rovopatoa rutu Pristo aue Melkisedek saratoaaro.

## 7

### *Ro-ia Melkisedek Iravu Rovopato Pristo*

<sup>1</sup> ♫ Oire rera ro-ia Melkisedek reitoa rutu turaro voea reraaro Selem vata. Ira oiso toupaoro pris kovo tapo purareva ro iavirava Reitoa Rutu Pauto Rovopatoa Rutu. Ari ita, vo tuariri rutu Ebraham oearovu turaro irara uporeva voea kopii piepaoro. Uva oupopu iava karepaoro rera tapo ro-ia Melkisedek aivaroreva raivaaro vo uva Ebraham viraakoreva rera Melkisedek. <sup>2</sup>Oa iava Ebraham Melkisedek vatereva varao oara gogireva evoea upopaoro. Oire vosa rera ruvara-ia Ebraham katai tau (10) rutu aue golara toupaiva, oa iava vara iava oavu gororeva kataia rerapa ro Melkisedek turaro va vatesa. Uva oisi raga ita aue vievieioro sipsip tau (10) iriavu voea iava gororeva ita rerapa oira vatesa. Oire uva oisi raga oiso osa orekerovu rutu iava piepaoro va purareva rerapa. [Oire rovopa vao porearo rutu oiso toupaiveira rera iava ro-ia Melkisedek ro-ia king ira torevokovira rutu toupareveira. Ira-ia viapau oisoa viria vai toupaive. Eisi osa toupai rera vo vaisiaro porearo. Ari eraopa vao porearo oiso toupaiveira vo rera raga vaisiaro-ia, Ro-ia reitoa rutu king ira gavaure vovouva toupareveira voeao reraaro Selem vata.] <sup>3</sup>Ira-a ro viapau aitetao vai ora viapau aakovaa vai. Ora viapau aao iraraa vai rera oeaiaro. Ora oiso tapo osa viapau oisoa taraipaave, Aa vo vokio-ia puraro viropa. Ora aa vo vokio-ia vorevira kopiicroepa. Uva eisi osa vo tou puraoro Pauto Oviitoaaro vo touaro ovoovooro toureva. Uvare Rovopatoa rutu Pristo vo kovoaro-a oa-ia oisoa pitupareve vokiara rutu-ia.

✡ 6:13: Jen 22:16-17    ✡ 6:16: Ga 3:15; Eks 22:11    ✡ 6:17: Sam 110:4    ✡ 6:19-20: Lev 16:2; Hi 9:7    ✡ 7:1: Jen 14:18-20

<sup>4</sup> ✩ E apeisi-a? Oearovu rutu-ia oirara oisoa putepareve ro-ia Melkisedek? Ari, oiraopavira rutu. Ira-ia taraipavie rutu oiso-ia, Ro-ia Melkisedek irapa vatevateara rutu vatereva ae Ebraham oira vasitoa rutu vo tauro iava oara gogireva oearovu turaro irara upopaoro. <sup>5</sup> ✩ Oire ro-ia Melkisedek viapau oiso Livai vase vo saraaro iava rera-a, evoea oea oisoa pris vo kovoaro-ia tuariri rutu pitupaive. Uva auea vao-ia Reo Taisi oa-ia oisoa oiso toupaive evoea vo kovoaro iava. Vosa katakataivira tauara toupaive, oire ra voava katakataivira oaravu oupaive kataipara voea ruvara iava voeao Isrel-pa irara. Ari ita, evoea ruvara-ia oisoa vara oisi ououpaive oea tapo oisoa ora araokopaave rutu. Aue iava uvare kataitoa rutu-a voea rutu aaotoaaro ro-ia Ebraham. <sup>6</sup> ✩ Viapau oiso Livai vase iava rera-a Melkisedek. Ro reito ira oisi katakataivira vara oureva eera ruvara-ia Ebraham rera viraakooro. Ro Ebraham irapa Reo Ovoi vatereva Pauto. <sup>7</sup> ✩ Oire vigei taraipavio ro-ia ira oiraopavira rutu oisoa voeaopa viraakoara vearovpara vatepareve. Eva-a oa vituaro iava oisoa oearovu vaisiaro-ia putepareve rutu reipaoro. <sup>8</sup> ✩ Voeao Livai vase oisoa katakataivira orekerovu oupaive tautauara rutu iava. Uva oisoa kopiipaave oiso raga osa oirara. Ari ro-ia Melkisedek ira iava oiso vo reo toupaiveira, oisoa toootovira rutu toupareve. Viapau oiso kopiiroepa. <sup>9</sup> Uva uvuipavie ra oiso purapavio, Iu, Ebraham ira katakataivira orekerovu rutu vatereva tautauara rutu iava. Osa oisi raga ita piereva Livai katakataivira rera varaaro iava tautauara vatevateoro. Ari ita, voea-a evoea Livai vase oea oisoa oisi katakataivira oisoa oupaave. Eake iava? Uvare voea ita oisoa vo kovo eva pris kovo purapavie. <sup>10</sup> Oire uva apeisi-a? Vo uvare Livai kavau asavira rutu toureva vo osa oisoa Ebraham voari rutu tou rovopareve tuariri. Uva oiraopavira oiso-ia uvare eisi vo tou-ia eera Livai rera aaotoaaro sopapro-ia touvira toupareva ae Ebraham, vo osa rera raga Ebraham rovovira rutu Melkisedek-va aivaroreva raivaaro.

#### *Vo Airepato Pristo Tuariripa Pristo Tavariorereva*

<sup>11</sup> Vo tuariri Livai vase oisoa pris kovo-ia pitupaive. Uva va-a eva voea vaaro pris kovo oa vearovira oirara kareke piepaivori. Ra va iava vearovira rutu karekepaave. Oa-a eva vituaro iava Reo Taisi vatereva Jiu-pa irarapa Pauto. Uva eakere iravu pristo utupaua uvuipa ra karekero ro ira Melkisedek-va areiipareve, osa aueva Eron Rovopato Pristo viapau areiipareve? <sup>12-14</sup> ✩ Oire vosa Pauto iravu roporeve pisato pristo voeao rovopa irara pris tavariosa rera-ia, uva va sirova eisi uvui iraopaa ra vao tapo Reo Taisi tavario iraoive. Oire ro-ia taraipavioveira oiso-ia, Viapau oiso Krais-a Livai vase vo saraaro iava voeao pris irara. Viapau. Ari Juda vo saraaro iava rera-a. Ari ita, viapau irai voea iava Juda-pa irara pristoa vai, uvare vo sarapa viapau oiso Moses pris kovo vatereva.

#### *Jisas Oiso Toupareveira Osa Ro Melkisedek Ira Oisoa Toupareve*

<sup>15</sup> Oire ra evo reo iava vearovira rutu oiso aviavipavio osa rore rugoopavio ira pisavira rutu karekeroepa Melkisedek-va areiisa. <sup>16</sup> Oiraopavira rutu ira prisvira rutu karekeroepa pisavira. Uvare viapau oiso Reo Taisi sirova uturoepa. Ora aue tapo viapau oiso voea iava-a eera oea oisoa kopiipaave. Viapau. Ari vao-a oa vituaro iava evo kovo-ia pitupareveira, uvare vao Tootoo Ovoi rera vaaro rerapa gorua vatepaveira. <sup>17</sup> ✩ Oa iava Pauto vo reoaro-ia oiso purapapeira,

‘Vii vo kovoaro vao pris kovo opesi asa rutu. Oa puraparivere oiso osa ro Melkisedek oa oisoa purapareve.’

<sup>18-19</sup> Oire uva oisi-a eisi osa pieoro vao tuariripa Reo Taisi ora tavarioepa. Uvare oisi va sirova utupapro oirara rutu oisoa viapau Pautoa iare tutuu piepaive. Oa iava oisoa akukuvira rutu tou ragapave Reo Taisi. Uva va-a vao oa iava Pauto oraivavu raga purareva vao-ia airepa raiva. Oa iava uvuipavie ra Pautoa iare tutuu piepape rutu.

<sup>20</sup> Oire uva Pauto oiraopa reo purareva oiso puraoro, Eera pristo ira ovoivira touparevere opesi asavira. Uva viapau rutu oiso uvuiparoi ra evo reo tavarioreve. Ari ita, viapau oiso iraire oiso oreoi purareva vo pris kovo tovotovopaoro oiso osa vo reo vao

---

✩ 7:4: Jen 14:20   ✩ 7:5: Nam 18:21, 26   ✩ 7:6: Jen 14:19; Ro 4:13   ✩ 7:8: Hi 5:6, 6:20   ✩ 7:12-14: Ais 11:1; Mt 1:3; Lu 3:33; Ro 1:3; Re 5:5   ✩ 7:17: Sam 110:4; Hi 5:6

purareva Pauto. <sup>21</sup> Viapau. Asi Pautoa raga oiso Jisas-ia vo vaisio tovoreva oiso, Pristo vo osa vao oirao pie reo purareva oiso,

‘Turaro oirao pie reo purarevora. Orugooa vao-ia rera vaaro oa-ia viapau uvuiparoi ra osi ragavira va tavarioreve vo reo-ia oa oiso purapai, Vii vao-ia viigoa vokiara rutu-ia prisvira toupariverea opesi asavira rutu.’

<sup>22</sup> ♦ Eva-a oa iava uvui pavieie ra vearovira rutu oiso taraipavio, Ro-ia Jisas ira Airepa Reo Ovoi oirao piereva rutu vo reoa vao oa iavirava Pauto vo siraoaro karekeepa oirara rutupa. Vo reo oa vearovira rutu toupaiveira vao-ia tuariripa Reo Ovoi putepaoro rutu, oreoa vatereva Pauto Moses-pa.

<sup>23</sup> Uva oavu-a vao-ia oiso-ia. Riro irara rutu voari tuariri pris kovo oisoa purapaise. Eake iava? Uvare kopiipaoro oisoa oearovupa vo kovo kavupaise. <sup>24</sup> Ari ro-ia Jisas ira ovoeivira rutu tootoovira raga toupareveira. Oa iava rera raga vo kovo-ia vao-ia pris kovo pituparevere vokiara rutu-ia. <sup>25</sup> ♦ Uva va-a eva oa vituaro iava uvuiparoi ra vo vokio ora vo vokirori-ia oearovu oupareve Pautoa iare, vo rara Jisas oirao piepaoro rutu rera iare uriopaave. Aue sirova uvare Jisas ovoeivira rutu tootooparoveira Pauto arepaoro voea oupasa.

### *Rovopato Pristo Ira Uvui Iraoparoveira Oiso Ra Vigei Tauvapareve*

<sup>26</sup> ♦ Oiraopavira rutu. Aue-ia Jisas Rovopatoa rutu Pristo ira uvui iraoparoveira rutu vigei tauvapasa. Ro ira-ia toupaiveira vao torevoko vovou rutu, uvare roroio vovouvira rutu oisoa toupareve. Ora ae tapo viapau rera-ia oisoa vuria vai toupaive, ora oisoa airereivira toupareve vuri vovou irara vo rugooroaropa. Oa iava eva Pauto rera kae piereva rutu vuvuiua-ia pute pievira rutu. <sup>27</sup> ♦ Viapau oiso toupareveira osa oearovu voeao rovopa pris irara. Uvare viapau oiso korououara vai purapareveira vo vokiara rutu-ia, oiso ra Pauto rera vararo vuriara verapareve ora oearovu iava tapo oirara. Viapau, ari katai vuuta rutu-a vao oa iare ora rera iava vasereva rutu aue iare evao parikou. Oa iava voa ora rera-ia katai korouou rutu purareva. <sup>28</sup> Oire uya Reo Taisi-a vao sirova utuoro ora voeae raga-ia pris vaisi oisoa tovopaise, voeae oea-ia oisoa viapau goru vovou vai toupaive torevoko pitupitu purapasa. Ari ita, Reo Taisi vo vuutaaro isivaaro iava Pauto ora rera vaaro Reo Ovoi oirao piereva. Osa iava Oviito oiso vaisireva ro-ia, Rovopatoa rutu Pristo. Ira uvui iraopa ra vigei tauvapareve vokiara rutu-ia.

## 8

### *Jisas Vigei Reraaro Rutu Rovopato Vo Vuvuiua-ia*

<sup>1</sup> Evo reo aviaavi pie reo vituaro-a vao-ia oare eisi puraepa oiso, Krais-a Rovopatoa rutu Pristo vigei reraaro. Ira oirapapa varata-ia paupa-ia Pauto vaaro pauparoveira vuvuiua-ia. <sup>2</sup> Uva pris irara vo kovoaro purapareveira evoa toupaoro oiraopa Tugoropa Tapi. Oa oiso rutu toupaiveira osa vao Tugoropa Kepa lotupa kepa. Uva viapau oiso irai vo kepa eva Lotupa Kepa paureva. Viapau. Ari Pauto raga.

<sup>3</sup> Voea-a evoea rovopa pris irara oea oisoa evo kovo purapaise varao vatepasa orekerovu vatevateara ora korouou aue-ia varuere kare. Uva oisi-a eisi osa tapo Jisas uvui iraoroepa okoruouvu vateoro Pautoa-pa. <sup>4</sup> Vosa touvira vo rasio-ia tou rovopareva, uva viapau oiso uvuiparoepa oiso ra voa pris kovo-ia pitupareve. Eake iava? Uvare viapau oiso Livai vase iava rera-a. Voea oea iava Reo Taisi oiso tavipapeira. Voeao raga oea oisoa pris kovo-ia pitupaise vao tauo vatepa kovo. <sup>5</sup> ♦ Ari voeae vo kovoaro oa-ia oisoa ovoovovira vo toupaive, vo osa oiraopa kovo vo toupaive vuvuiua-ia. Uva oiso rutu ovoovovira toupaiveira osa Moses vatatoporoepa, oiso ra varo kepa paureve vao oa sovara-ia lotupa kovo purasa aueparoepa. Osa iava Pauto rera tavireva oiso, “Oiso ragavira varao rutu purarivere vo kepa pauoro osa vo ovoovo oa-ia vii keke pieavora vo Sinai pukui-ia.” <sup>6</sup> ♦ Oiraopavira rutu Krais-ei vo vuvuiua-ia vo vuutao-ia oa vao. Ira vo kovoaro pris kovo voeao vo kovoroaro-ia vo rasitao-ia putepaiveira pris irara. Oa vituaro iava vao-ia Airepa Reo Ovoi. Evo reo oa purareva Pauto, oiso ra rera tapo oirara ora

◊ 7:22: Hi 8:6, 9:15, 12:24    ◊ 7:25: Ro 8:34; Hi 9:24    ◊ 7:26: Hi 4:15, 8:1    ◊ 7:27: Hi 5:1, 3; Ef 5:2    ◊ 8:5: Kl 2:17; Hi 9:23; Eks 25:40    ◊ 8:6: 1 Ti 2:5; Hi 7:22

agiagiave. Oiraopavira rutu uvare vao Airepa Reo Ovoi vao-ia tuariripa putepaiveira rutu, uvare va-a vao oa taru orekerovu rutu vearovpara karekeverea rara.

*Airepa Reo Ovoi Oa Tuariripa-ia Putepaiveira*

<sup>7</sup> Ari ita, vo osa tuariripa rutu vao-ia Reo Ovoi vearovira tou rovova, uva eakere ita utupavira va isivaaro-ia airepa purareva ita? Ari ita, uvare vao tuariripa oisoa potepaive oa-ia viapau oisoa Pauto sirova utupaave. <sup>8</sup> ♦ Oire uva eisi osa pievoiva, Pauto ora rera voeao togareva vo reo-ia oa oiso purapai,

‘Turaro oiso puraparoi, Ovokirovu epao oara uriopapere. Oara-ia oavu Reo Ovoi puraaverea voea tapo Isrel-pa irara ora voea tapo vova Juda.

<sup>9</sup> ♦ Uva va vao-ia Airepa Reo Ovoi oa pisavira rutu toupaiveira. Oa viapau oiso vaova areiipaivere oa puraava Isip iava voea tuvetuveoro voea-ia pitupaoro. Uva reasi iraopaaepa vao Reo Ovoi sirova utu arapa ragai vaaro. Osa iava voea iava vaseava, oiso ra ora voea raga vo taraiaro sirova utuave.

<sup>10</sup> ♦ Oire uva Turaro tapo ita vo reo-ia vao oisi ita puraroepa oiso, Va vao-ia Reo Ovoi oa puraaverea voeao tapo Isrel-pa irara oa oiso purapai, Varao-ia ragai varaaero reo goruro oara tovoavere rara voea vo rugorugooroaro-ia, oiso ra voa vara-ia taraiave. Ora vara rigatoavere vo voea sopaaaro-ia, oiso ra voa vara eveipaisevara sirova utupasa. Ragai oiso toupaaverea, Ragai vao voea reraaro Pauto. Ora voea oiso toupaiverea, Ragai voeaaro oirara.

<sup>11</sup> ♦ Viapau oiso irai epao voea iava ira voea siposipoparevere voeao oea rera tapo toupaiveira oiso voeare purapaoro, Turaro oavisii-ia vearovira rutu tarai iraopata. Ora tapo viapau oiso ra oearovivu rutu tapo oisi voea iava oearoi tavitavipaisevara iava Turaro voearo oearoa voea vo taerearo-ia toupaiveira. Eake iava? Uvare voea rutu ragai-ia taraipaavere. Oiso-ia voeavio tapo oea kakae visivi toupaiveira, ora voeao oea rei vaisi-ia toupaiveira.

<sup>12</sup> Ari ita, siraoravere voea kekeoro vo osa vuri pitupitu puraive. Oire ra voea iava vara vera ovoipaoro viapau oiso varare rugorugoopara ita vorerivira.’

<sup>13</sup> Uva va-a vao Airepa Reo Ovoi oa iava reoreoroepa Pauto. Uva vo reoreoa vao oa-ia reoreopaoro vaore tuariripa Reo Ovoi oiso puraroepa, “Rutapa raga eva. Tuariripa.” Oire orekerovu-ia taraipavio oiso, Vosa eake tou ragapaive vao oa-ia viapau kovoai vai, oire ra oisi raga ora opesi pie ragape va.

## 9

*Ro Rovopato Pristo Ira Tuariri Rutu Oisoa Varuere Kare Revasiaro-ia Tauoparo*

<sup>1</sup> ♦ Oire va vao-ia tuariripa Reo Ovoi oa sovara-ia oisoa reo goruro toupaive. Vo reoro oara sirova Jiu oisoa Pauto-ia vuurapa vaisi purapai. Oara varao sirova tapo kepa pauiva Pauto iavirava. <sup>2</sup> ♦ Oisi-ia oiso osa vituaro iava rakari kepa pauiva vao oa-ia oisoa vo tugirei toupaive oiso, rataupa tugia vao oa oisoa vaisipaise oiso Tugoropa Tavuki. Oa-ia varao rutu tugoropara tovoiva oiso vara, vuravua o, ora tebol ro-ia, ora brete-a vao-ia oa-ia oisoa tauopaave Pauto-ia. <sup>3</sup> ♦ Ari vo tugio vao-ia atoaropa tugi otugia-a vao-ia varoa isivaaro-ia oisoa toupaive. Vouao oua tovoiva vuruvuru-ia kovovovira. Oire uva vo tugia vao oa oisoa oiso vaisipaise, Tugoropa Tavuki Rutu.

<sup>4</sup> ♦ Vo tugio oa oisoa atoaro rutu toupaive, oa sovara-ia oisoa varao rutu toupaive oiso-ia, gol alta vao-ia oa oisoa ivara-ia orekerovu kasipaise vara-ia vearoa riipu geesi purapaoro. Ora aue bokis o iria oisoa vaisipaise oiso, Aak. O iria sovara-ia oisoa vukua toupaive vao oa-ia Reo Ovoi rigatoiva. O bokis iria tavuruoro aue gol oa puraiva. O iria sovara-ia oisoa oavu gol tou toupaive. Vo touo oa sovara-ia oisoa aioa toupaive vao oa vatereva Pauto. Oa oisoa vaisipaise oiso, Mana. Ora ro tooroto Eron reraaro ira-ia airepa sipukao kova oisoa toupaive. Ora vareo aveke perorei oarea-ia Reo Taisi rigatoreva Pauto. <sup>5</sup> Oire uva oira-a bokis iria ivara-ia aitereivu uvarutoarei oisoa toupasi toa

---

❖ 8:8: Jer 31:31-34    ❖ 8:9: Eks 19:5-6    ❖ 8:10: Hi 10:16; 2 Ko 3:3; Sek 8:8    ❖ 8:11: Ais 54:13    ❖ 9:1: Eks 25:8    ❖ 9:2: Eks 25:8-9, 23-39    ❖ 9:3: Eks 26:31-33    ❖ 9:4: Eks 30:1-5, 25:10-16

pievira. Vaitereo aiterea ovoovovira oisoa kekepasi viro oiso, Tugoropatoarei vuvuia iava vaiterei. Aiterea oiso putae parakarova oorovira toupasi vo uva oisoa vaiterei vuutaaro-ia varuere kare revasiaro petopareve Rovopato Pristo, oiso ra oira-ia Pauto oirara iava vuriara verapareve. Oire uva viapau oiso vuutaa vaiei vaviopavira oiso ra oai-ia vara iava varao visii aviavi piea.

<sup>6</sup> Uva oisi-a eisi osa oisoa toupaive voa vo vara vo tavukiaro-ia. Uva voea rutu pris irara oisoa koatapaave vokiara rutu-ia va iare rataupa tugi va iava vao vo tugi rakari kepa voa voea vo kovoaro purapasa. <sup>7</sup> Ari ro raga Rovopatoa Rutu iravu Pristo ira oisoa koataparo vao iare rovopa tugi rutu atoaropa. Uva va eva Tugoropa Tavuki Rutu oa iare oisoa koataparo kataipa vokiro raga-ia vo vokiro katakataivira ivara iava vo vokiro. Ovokiroa-ia oisoa revasi rovurova koataparo vara-ia korouua purapasa Pautoa-pa, ora rera iavirava, ora voea tapo oirara voeao oea rutu oisoa vuriara purapaive ruruvutuvira vo osa viapau vara-ia taraiipaave. <sup>8</sup> ♦ Oire uva vo vokio-ia rera ro Tugoropato Uraurato vara iava evara vigei siposipopareveira aviavi pievira. Uvare va vao-ia Rovopa Kepa rutu voea Jiu vaaro okepa iava vo tugio rataupa voeaopa Jiu-pa irara oisoa reipape rutu. Uva vo vuuta-a eva ovuuta-ia oisoa voea asavira atoaropa tugi tupapa piro rutu vaopa oiso, teapi voare koatapaave voearo oira akukuro. <sup>9</sup> Oire vo kepa vao Rovopa Kepa rutu oa ovoovovira toupaiveira vao oa-ia uvuipaai pris irara ra vatevateara vatepaive ora tauo vatero tapo purapaive voa. Ari ita, oiraopavira evara iava viapau oiso uvuipaai ra Pautoa iare tutuu piepaive, uvare oaravupa aia potepaiveira rutu. <sup>10</sup> Uvare vo kovoaa vao-ia Pautoa-ia vuurapa vaisi purapa kovo oa oisoa purapaive varao raga-ia aio tauoro ora ukaiopa tauoro, ora osasararovu rutu oiso osa varao sisupa pitupituro. Oire vo reo goruro-a evara oara raga oisoa sirova utupaave vo rasio iava vara. Oa iava oisi eisi oirarapa reipapeira vo vuutao-ia rekasisa oa-ia orekerovu rutu torevokopareveira Pauto vo osa vara rutu tavariopareve.

#### *Ro Krais Ira Ora Rera Raga Revasiaro-ia Tauoroera*

<sup>11</sup> ♦ Ari ita, evara isivaaro iava Krais pouro virora vao-ia airepa vuuta vo vokio. Uva oiso tourevora Rovopato Pristo, ira airepa kovo purapare. Oa iava avaroepa vo kepa vao Rovopa Kepa sovara-ia koatasa, okepa tuariripa kepa-ia vao rakari kepa putepaiveira rutu. Vao vituaro iava uvare viapau oiratoa vai vo kepa paureva vo rasio iava orekerovu avu vai-ia. <sup>12</sup> Oire vosa Krais va-ia rataupa tugi puteoro rutu atoaropa tugi iare vao Tugoropa Tavuki Rutu koata ovoiroepa, uva viapau oiso revasi rovu vaiva voare koataroepa aue iava meme ora bulmakau kakae vai oa-ia tauoa vai purasa. Viapau. Ari ora rera raga oiraarova revasiva katai vuuta raga-ia koata ovoiroepa vo raivao purasa, oa-ia uvuiparoi Pauto ra va iava vigei vorevira oureve ora rera iare. Vo raivao oa-ia viapau opesia vaiei. <sup>13</sup> ♦ Vao-ia revasi rovuro aue iava meme ora bulmakau ora oavu bulmakau kakae iava gavuta oara rutu rororeva pristo vo oirara rutu ariaraaro. Eake iava? Uvare vuivuipavira rutu toupaoro pris irara oisoa voea piepaive, oisore ra oiso voea vaisipalve, Evoea sisigarue irara rutu oea Reo Taisi sirova utupaoro. <sup>14</sup> ♦ Iu. Oiraopavira rutu ita osa oisi eisi vara puraiva. Uva apeisi-a o-ia Krais iava revasiva? Ari ita, riroa rutu vao-ia oa pute pievira rutu pura piropa rera iava revasiva-ia. Oa-a vao oa-ia riroa rutu kovoaa ora puraepa. Vao vituaro iava uvare ora rera raga iava oira-ia revasiva korouua purareva, rera iavirava Tugoropato-ia Uraurato, ro ira viapau opesia vaiei. Oa iava uvuivira rutu Pautoa-pa vo korouou vao purareva. Ari ita, rera oiraaro revasiva iria vigei iava sopaura sisigarue pieeva rutu, oiso ra viapau oiso akukuvira Pautoa-pa kovopape. Viapau. Ari vaore-a ra oiso rutu toupape, Oiraopa kovo irara rutu Pautoa-pa, ro ira tootooparoveira vokiara rutu-ia.

#### *Jisas Revasiaro-ia Airepa Reo Ovoi Goru Pierrevora Rutu*

<sup>15</sup> ♦ Oa vituaro-a vao oiraopa oa Krais-ia pura piropa Airepa Reo Ovoi, oiso ra voeao oea vaisipareveira Pauto oiso, Ora rera voeaaro evoea oea viraakoara ouiverea, varao oara viapau opesia vai. Oara iavirava Reo Ovoi purareva. Eake-a va vituaro? Ari vao

♦ 9:8: Hi 10:19-20; Jo 14:6    ♦ 9:11: Hi 2:17, 10:1, 8:2    ♦ 9:13: Nam 19:9, 17-18    ♦ 9:14: 1 Jo 1:7; 1 Pi 3:18;

Ta 2:14    ♦ 9:15: 1 Ti 2:5; Hi 3:1

uvare kopiiroepa Krais. Ora vao uvare rera vo kopiiaro iavirava oirara roroioaepa voea vo vovouroaro iava vuriara, oara oisoa purapaive vo osa oisoa tuariripa Reo Ovoi rei piepaive.

<sup>16</sup> Vo osa oavu reoa toupaive aepea ovii irara aiteto vaaro vao oreoa-ia oisoa voea tavipareve aiteto, oiso ra orekeroru rutu ouive varao rera varaaro vo rara kopiiro. Uva viapau oiso irai vo reo oisoa oirao piepareve vo orekeroi vateoro, vo rara viapau oiso aitetoa oaive kopiiro rutu oiraopavira. <sup>17</sup> Uvare viapau oiso vo reo-ia kovoai vai toupaivoi vo osa touvira tootooparo aiteto. Ari vo raga vo osa kopii rovoro rutu. <sup>18</sup> Oa vituaro-a vao-ia oiso toupai vao-ia rovopa Reo Ovoi. Vosa viapau revasiva vai toupaive va oirao piesa rutu, ra viapau oiso kovoai vai va-ia. <sup>19</sup> ♦ Ari ita, voari rovovira rutu uva Moses oirara rutu tavitavireva varao rutu iava oara oisoa Reo Taisi sirovavi toupaive. Oa iava revasiva karareva bulmakau kakae iava uukoa tapo. Uva vo uvare rutu-ia vao oa-ia oirara sisureva ora vo vuku vao oa-ia oisoa toupaive Reo Taisi. Uva va purasa evaoa kairi oureva vo evao oa vaisipaiveira oiso, Hisop. Oa iava va kukuearo-ia sipsip oru tuukereva. Ra vavia revasi uvare kae piepaoro voea iare oirara va sisiputapareva, vo osa vo oru oisoa roko piepareve revasi rovu-ia. <sup>20</sup> ♦ Uva oiso puraroepa,

‘O-ia revasiva iria Reo Ovoi oirao pieeva. Oa iava visii goruvira rutu tavireva Pauto, oisi ra va sirova utu iraota.’

<sup>21</sup> Oire uva oisi ragavira-a eisi ita osa Moses oisoa revasiva sisiputapareve rakari kepa sisupaoro, ora varao tugoropara rutu oara-ia oisoa lotua purapaive vo kepa sovara-ia.

<sup>22</sup> ♦ Oiraopavira vosa Reo Taisi sirova rutu goruvira utupaae, oa iava uvuipaae evara iava oaravivu riroara sisigaruevira toupaive o iavirava revasiva. Ora tapo varao vuri vovouro, vo rara eira revasiva peto rovoreve oira-ia tauoa puraoro vuri vovouro verapasa.

#### *Krais Ora Rera Raga-ia Tauoa Purareva Vuri Vovouro Oavi Verasa*

<sup>23</sup> Uva oisi-a eisi osa torevokopapeira osa varao vo rasio-ia touaro oisoa sisigarue piepaive varao ovoovovira oara vuvuiua-ia toupaiveira. Ari oiraopara rutu vuvuiua-ia toupaiveira. Oara viapau oiso uvuipai ra vara sisigarue piepaive, vo rara viapau otauorou pute pievira rutu purapaive vearovpara rutu. <sup>24</sup> ♦ Osa iava Krais viapau vore koataroepa Tugoropa Tapi oirara raga oa puraiva ovoovovira vaore oiraopa vuvuiua-ia toua. Viapau. Ari vuvuiua rutu iare kaero viropa vo uva toupareveira Pauto ruvara-ia tauvaa oupaoro vigeipa.

<sup>25</sup> Uva rera ro Jiu reraaro Rovopatoa rutu Pristo ira oisoa koataparo vore Tugoropa Tavuki Rutu-ia aueva varuere kare iava revasiva katakataivira vokiara-ia vo ivara rutu-ia. Ari Krais viapau oiso vorevorerivira koataroepa okoruoui ita purasa ora rera-ia.

<sup>26</sup> Vosa rerapa torevokopaeira ra oisi eisi piereve, oire ra va iava vorevoreripavira siitoka vo siraaro oureve voariva rovooro uva vo rasio rovoepa. Ari ita, uva viapau oisi eisi torevokopapeira. Uvare katai vuuta rutu-ia vao-ia oa-ia vo rasio iare urio ovoiroepa, vo uva vo vuutao tutuu pieva oiso ra opesipe. Eva-a oa sirovava ora rera iava vasereva korouua puraoro. Oa iavirava vuri vovou vo varivariaro opesi ovoiepa. <sup>27</sup> ♦ Ari ita, oirara rutu katai kopii raga rutu purapaive. Osa iava taru Pauto voea vo vovouroaro rovirieireverea rara. <sup>28</sup> ♦ Uva oisi-a eisi osa va puraoro Krais ita katai kopii raga purareva ora rera-ia tauoa puraoro, oiso ra oirara rutu iava vuriara vera uvirope. Ari ita, vorevira vorerovere rara. Ra viapau oiso vorerivira vuri vovouro vai verasa-a. Viapau. Ari voea kae pie ragasa-a voea oriruoro, voea raga oea rerare tuevira toupaiveira.

## 10

#### *Tuariripa Tauo Viapau Oiso Uvuipape Vuriara Verapasa*

<sup>1</sup> Varao Reo Taisi iava Jiu vaaro oara oiraopavira varao oiraopara oisoa ovoovopave vara uraurapaoro oara utupauavi uriope. Oiraopavira rutu otauoroa evara oisoa vorevoreripavira rutu purapaive ivara rutu-ia. Oire uva apeisi-a? Vosa vara varao oisi vorevoreripavira purapaiveira, oara uvuipai ra voeo iava vuriara verapaive, oea tutuu pie ragapaiveira Pauto iare, eke? Viapau. Viapau oiso eva Reo Taisi uvuipapeira

♦ 9:19: Eks 24:6-8; Lev 14:4, 6-7    ♦ 9:20: Eks 24:8; Mt 26:28    ♦ 9:22: Lev 17:11; Ef 1:7    ♦ 9:24: Hi 6:20; 1 Jo

2:1    ♦ 9:27: Jen 3:19; 2 Ko 5:10    ♦ 9:28: Ro 6:10; 1 Pi 2:24; Ta 2:13

rutu. <sup>2</sup> Ari ita, vosa Reo Taisi uvuipaeri rutu, ra va sirova utupaoro tauoara purapaoro oirara iava sopaura sisigaruevira raga toupaivori. Oire ra va iava viapau voreripavira ora sovopaoro oiso purapaave, "Ragaivi-a vao-ia vuri vovouto." Ra va iava koruouara pura arapa eakaave, vo rara sisigaruevira rutu toupaive. <sup>3</sup> Ari oiraopavira evo koruouro voea oisoa rugorugoo piepaive rutu evarare vuri vovouro, vo rara ivara rutu-ia voea iava sopaura-ia toupaive vuriara. <sup>4</sup> ♦ Oa vituaro vao oiso toupaivoi, O-ia bulmakau vairei ora meme airea revisiaro-ia Pauto viapau uvuiparoi ra vuriara verareve oirara iava.

<sup>5</sup> ♦ Oire vosa varasa vore rasitoa-ia Jisas aueparoepa, oa iava Pautoa-re oiso puraroepa, 'Ari ita, varaopa tauoara viapau ruipapauveira ora vatevateara. Oa iava ragaipa ouavu varaua ravaariva.'

<sup>6</sup> Vo kareo okarea rutupavira kasipaiveira oirara eravaoara ivara-ia, okarea-ia viapau oiso vii roru piepaiveira. Ora tapo vo koruouropareasipauveira vuriara verapa koruouro.

<sup>7</sup> ♦ Eva-a oa iavirava oiso puraraepa viire Pauto, Toupaavoi ragai vii vo ruipaaro sirova utusa. Eisi osa va iava ragai iava vo reoro toupaiveira vo vukuo-ia oa-ia Reo Taisi toupaiveira.'

<sup>8</sup> ♦ Oire uva rovovira Krais oiso puraroepa, 'Varaopareasipauveira,' ora 'Varao oara-ia viapau vii roru piepaiveira oiso osa varao koruouara ora varao vatevateara vatepa, ora vo karero varuere karero oea kasipaiveira vo eravaoara ivara-ia, ora varao oaravu koruouara vuri vovouro verapasa.' Ari ita, oisi eisi osa puraroepa varao rutu iava oara oisoa purapaive torevokovira Reo Taisi sirova utupaoro. <sup>9</sup> Eva-a oa iava oiso puraroepa Krais, 'Ragai toupaavoi Pauto vii vo ruipaaro sirova utusa.' Oire uva vo reoa vao oa iava Pauto tuariripa koruouro veeporeva, oiso ra rera vo koruouaro vara vo tavukiaro ouve vao oa purareva Krais ora rera-ia. <sup>10</sup> ♦ Eake iava? Uvare rera Jisas Krais ira Pauto vo ruipaaro sirova utu ovoiroepa oisi va pura ovoioro. Vao oa vituaro iava vigei iava sopaura rutu sisigarue ovoiepa vo koruouo-ia oa purareva ora rera-ia katai vuuta-ia.

#### *Jisas Ora Rera-ia Tauoroera Vuriara Verasa*

<sup>11</sup> Voeao pris irara Jiu iava oea oisoa katakataivira ora voea vo kovoaro purapaoro torepaae katakataipavira vokiara rutu-ia. Oa-a vao oa-ia oisoa voreripavira vo koruouro purapaive. Ari vo koruouro-a evara oara viapau oisoa uvuipape oiso ra vara-ia voea iava vuriara verapareve Pauto. <sup>12</sup> ♦ Ari ro Krais katai korouou raga pura ovoireva vuri vovouro vera ovoioro. Eva katai korouou oa uvuiepa vokiara rutu iare. Oa isivaaro iava pau ovoiroepa Pauto vo varata iava oirapapa. <sup>13</sup> Evoa uva tuepaoro toupareveira vo vuutaore oa-ia rerava keripa irara tovoreverea Pauto vo rera kokotoaro reroaro oiso osa orekevu rerapa tasipa. <sup>14</sup> Oire uva katai korouou raga pura ovoireva. Oa-ia voea rutu uvui pie ovoireva. Oa iava uvuipaii ra Pautoa iare tutuu piepaive voeao sisigarue vovou irara.

<sup>15</sup> ♦ Ari ita, uva ro tapo Tugoropato Uraurato oisi vo reo eva oirao piepareveira rutu oiso osa pura rovoroepa rutu Tugoropata Vuku sovara-ia,

<sup>16</sup> ♦ 'Vao-ia Reo Ovoi ragai oa puraaverea oirara rutu tapo vo utupaua. Vo uva ragai varaaro reo goruro tovoaverea voea rutu iava sopaura-ia. Ora vara rigatoaverea voea vo rugorugooroaro-ia, eisi osa puraroepa Turaro.'

<sup>17</sup> ♦ Oire evo reo isivaaro iava ita rera raga Uraurato oiso puraroepa, 'Ragai varaore ita vuri vovouro viapau oiso rugooraverea vorerivira ora varao vuri pitupituro.'

<sup>18</sup> Uva oiraopavira rutu vara varao vuri vovouro vera ovoireva oirara iava. Uva apeisia? E uvuipai ra okoruoui ita vorerivira ora purape, oiso ra oai iava vuriara vorerivira ita vera piro? Viapau rutu.

#### *Uvuipaviei Ra Oirao Piepe Rutu, Ra Va Iava Pautoa Iare Tutuu Piepape*

<sup>19</sup> Araoko irara oaa, uva oisi-a eisi osa iava viapau oiso oai epao oa uvuipai ra vigeire korukorupape vore koatapa arapa Tugoropata Tavuki Rutu-ia. Viapau. Ari uvuipaviei vao iavirava Jisas vaaro kopiia. <sup>20</sup> Oa-a vao oa-ia airepa raiva karureva tootooa vatepa vigeipa. Oraiva-a vao oa iava uvuipaviei ra varo kovovo-ia putepape koatapaoro. Vao varoa oa

♦ 10:4: Mai 6:6-7 ♦ 10:5: Sam 40:6-8; 1 Pi 2:24 ♦ 10:7: Jer 36:2 ♦ 10:8: Mk 12:33 ♦ 10:10: Jo 17:19; Hi 7:27 ♦ 10:12: Hi 1:3 ♦ 10:15: Hi 3:7 ♦ 10:16: Jer 31:33-34 ♦ 10:17: Hi 8:12

oisoa ovoovovira toupaive oiso osa rera iava varaua. <sup>21</sup> Iu. Rovopato Pristo toupare vigei rutu reraaro ira Pauto ovii iraraaro oirara tokipareveira. <sup>22</sup> ♦ Uva uvui iraopavie rutu ra Pautoa iare tutuu piepe rutu oiraopa vovou rutuva oiso ora vigei-ia taraipaoro, O ita, torevokovira toupaavoi oiso, Ragai-a Pauto reraaro. Vao vituaro iava uvare vigei iava sopaura sisu piropa. Oa iava vo rugooro vigei iava opesiepa ora eveipa rugooro oiso, Vuri irara-a vigei. Ora vao iava tapo osa vigei iava varaura sisigarueepa vearoa-ia uukoa. <sup>23</sup> ♦ Oisi-a eisi osa iava uvuipavie ra goruvira rutu oirao pie vovou purapape vao oa iava oearovu tavitavipape va oirao piepaoro. Eake iava? Uvare uvuipavie ra Pauto-ia raripavio auere, ra ora rera vaaro Reo Ovoi oirao piepareve. <sup>24</sup> Oa iava uvuipavie ra oearovivu vo siitokaroaro sovo iraopape. Ora oearovivu vo vigei iava tauvapape oiso ra ora vigei voea vovouroaro oisi iava sirao vovouro kosi piepape oearovivu-ia vereopa vovou rutu purapaoro. <sup>25</sup> ♦ Ari vao raga osa vigei viapau uvuipavie ra vao kavupape ora gurupa pitupitu lotupasa oiso osa oearovu piepaiveira. Viapau. Easi vigei uvuipavie ra oearovu vo vovouroaro tore piepape. Vao iava uvare Turaro vo vokiaro, vorevira vorepa voki tutuu piepaivoi rutu.

#### *Opeita Isivapavio Pauto Oviitoaarore*

<sup>26</sup> ♦ Vosa vigei vo siposipo-ia oiraopa tarai ovoi rovovio rutu, oire ra va isivaaro iava vuri vovou ita purasa ruipavio ita. Uva apeisi-a? E oai epao voreri tauo vai oa uvuipai vigei iava vuriara ita vorerivira verave? Easi viapau rutu! <sup>27</sup> ♦ Uva vo uririo raga oava uvuipavie toupape varao iavirava vuriara oavi vigei varaaro. Oiso varapa-ia osa varao-ia oiso, Rovirieia vao-ia ora riro goru kasia vao-ia oa voeao aiopaiverea oea Pautoa-re isivapaaveira. <sup>28</sup> ♦ Vosa irai oiratoa vai oisoa Moses vaaro Reo Taisi gasipareve, ra irai tovopai kopiia-ia. Viapau iraipa siraoave, vo osa vaiterei ora vo peva oea oisoa oiso purapaave iraire, “Oiraopavira rutu uvare vuria vao oa purarivo.” Oa iava oisoa voea vo reoaro oirao piepaive. <sup>29</sup> Oire uva eake vori rutu ouparevere ro ira Pauto Oviitoaarore isivaparo? Eera ira oiso puraparo, “Revasiva akuku raga-a,” iria rera sisigarue pieeva rutu Pauto vaaro sirovava Reo Ovoi. Ora apeisi-a ropa oirato ira Tugoropato Uraurato tovipareve, ro Uraurato ira Pauto vo siraoaro kareke piepareveira rerapa oirato? Oire uva apeisi-a rerapa eera? Siraovira rutu! Uvare rera varaaro iava vuri vovouro vo voriaro ouparevere vao-ia pute pievira rutu oa toupai vo Reo Taisi-ia. <sup>30</sup> ♦ Uvare rera-a eera ira-ia taraipavioveira ira oiso puraroepa, ‘Ragai auearo vao vuri vovou vo voriaro vatepasa. Oa tuuavere rutu rerapa.’ Ora oreovu ita vao oa purareva oiso, ‘Turaro ora rera voeao varaaro vuri vovouro rovirieirevere rara.’ <sup>31</sup> Ari ita, siraovira rutu voeavipa voeao oea vo vovouro vuriara purapaoro Pauto vavaearo-ia kovepaaverea vara voriaro oupasa rera ruvara-ia pauaka tootooa rutu Pauto.

#### *Goruvira Rutu Torepau Oirao Pie Vovou Oara-ia*

<sup>32</sup> Vore rugorugoo iraopata visii vo touaro vao oa oisoa purapata tuariri. Ovuuta-a eva oa-ia Pauto vaaro aviavia visii sopapro soporeva ora rera iava. Oa isivaaro iava riroaravi rutu tavaka vovouro outava oearovu-ia. Osa viapau oisoa visii kove piepaive. <sup>33</sup> Ari ita, vurivira rutu visii api pievira karekeiva oirara oearovu osireiaro-ia. Oa iava visiivi oisoa agesipaike visii tovipaoro. Ora ovokirovu-ia oeavu tapo ora tavosipasa oisoa ruipapata voeao oea oisi vo tavakaaro oisoa oupaive. <sup>34</sup> Ora voeao tapo vo vavataroaro sovopata ora visii-ia oea oisoa tuukepa keparo-ia tuukepaa. Oa iava voeapa oisoa siraopata. Ora oiso osa oearovu tapo oisoa uriopaave visii varaaro-ia orekerovu pitupasa. Uva viapau oisoa evarare rugorugooapaoro siraopata. Viapau. Ari visii oisoa roru iraopata rutu, uvare oisoa taraipata oiso, Oaravu epao visii varaaro oara visiipa tuevira toupai, oara varao-ia putepaiveira rutu vo rasio iava vara.

<sup>35</sup> ♦ Opeita oearovupa uriripaoro ora visii iava goru vovouro oavisii rutu akukupavira viki ragapata. Uvare vo vovouro raga uvuipai ra visiipa vearo vori sipove. <sup>36</sup> ♦ Ari

---

◊ 10:22: Hi 4:16; Ef 3:12; Esi 36:25    ◊ 10:23: Hi 4:14; 1 Ko 1:9    ◊ 10:25: Ap 2:42; Hi 3:13; Fl 4:5    ◊ 10:26: Nam 15:30; 2 Pi 2:20    ◊ 10:27: Ais 26:11    ◊ 10:28: Diu 17:2-6    ◊ 10:30: Diu 32:35-36; Ro 12:19    ◊ 10:35: Hi 2:2    ◊ 10:36: Lu 21:19; Kl 3:24

ita, vosa kave vovou rutu sirova utu rovopata, oa vituaro iava uvuipatai rutu ra oiraopa vovou rutu Pauto vaaro sirova utupata. Oa iavirava uvuipatai ra veiaropara outa, varao oara iava Reo Ovoi purareva Pauto. <sup>37</sup>◊ Aue iava uvare Tugoropa Vuku oiso purapai, ‘Tou visivi taru voreroverea. Viapau oiso ateate pie ragapaoro voa toupare. <sup>38</sup>◊ Uva ragai voeaaro-a oirara oea-ia torevoko vovou toupaiveira oea taru tootoopaave oirao pie vovou rutu purapaoro. Ari vosa irouto ro ira voea iava ragai arova porero viroverea, ira-a eera viapau oiso ragai roru pierereva ora rera-ia.’

<sup>39</sup>◊ Oire uva viapau oiso vigei-a vao voea iava voeao oea oisoa pore uviropaave rera arova opesi ovoipaoro vo vuri tapi-ia. Viapau. Ari vigei-a vao vigoa oirao pie vovou rutu purapaoro oriruvira rutu touapeira.

## 11

### *Vo Toupai Oirao Pie Vovou Vo Pitupituaro Vituaro*

<sup>1</sup>◊ Oire uva eakea rutu-a vao oirao pie vovou? Oa vao-ia oiso toupaiveira, Varao oara-ia oiso tarai ovoipavioveira oara varao oiraopavira karekepaperea vo utupaua, oarare tuevira toupaoro oirao piepapeira. Ora tapo vosa oiso ragavira ora sovpavio, O ari oiraopara-a, oara viapau kekepapeira. <sup>2</sup> Uva vo vovou-a eva oa purapaoro voeari tuariripa irara oisoa Pauto roru piepaise ora voea-ia. <sup>3</sup>◊ Oirao pie vovou rutu purapaoro tarai ovoipavio oiso, O ari Pauto orekerovu rutu purareva varao oara kekepaei ora rera vo Reoaro iavirava. Uva viapau oiso orekerovu avu vai iava vara purareva. Viapau.

### *Vo Toupai Ebel Vase Iava Ora Inok ora Noa*

<sup>4</sup>◊ Oire uva oirao piepaoro Ebel koruouua purareva Pautoa-pa, vo koruouuo oa Ken vo koruouaro-ia puteva. Ooirao piea iavirava Pauto rerare oiso puraroepa, “Torevokotoa rutu vii.” Aue vituaro iava uvare va-a vao vatevatea koruou oa-ia Pauto roru pierereva ora rera-ia Ebel. Uva vo vovouua vao rera vaaro Ebel ira kopiroepa, oa vigei siposipopaivoi vo vokio-ia touvira.

<sup>5</sup>◊ Oire ro vo oirao piearo-a vao-ia Inok oa iavirava viapau oiso kopiroepa. Ira tootoovira raga kae pierereva Pauto. Oa iava oirara oisoa rerare taraa ragapaive, uvare Pauto ora rera iare rera oureve. Ari ita, Tugoropa Vuku oiso purapai, ‘Kae pie asavira oisoa vo rasio-ia toupareve Pauto roru piepaoro ora rera-ia rutu.’ <sup>6</sup>◊ Ari ita, viapau irai oiratoa vai uvuiparoi ra oisi Pauto roru piepareve, vo rara viapau oirao pie vovou vai pura rovopareve. Uva va-a vao vituaro oiso toupaiveira, Ro ira ruipaparo oiso ra Pautoa iare tutuu piepareve, ira-a eera uvuiparoi ra Pauto vo touaro oirao pie rovopareve rutu. Ora aue tapo oirao piepareve oiso, Pautoa iare tutuu pierereva, ra voa vearo vori oureve rera ruvara-ia.

<sup>7</sup>◊ Oire iravu-a ro-ia Noa ira ora rera vo oirao piearo iava Pauto vo reoaro vo vovou reo uvureva uriripaoro. Oreoa-ia rera vosioro tavitavireva varoore oara kekereverea utupaua. Oreoa vao sirova utuoro aak uvuo purareva Noa. Oa iava voa ovii avao orirureva rutu vo tuukou vo vuutaaro-ia. Uva oisi-a eisi osa piererevoiva, Noa oirara rutu karekereva vo rasio-ia vuri irara. Oa iava Pauto rera raga roro pierereva oiso, Vearto. Eake iava? Uvare oirao pie vovou rutu-a vao oa oisoa purapareve.

### *Ebrahim Iava Vo Reoro*

<sup>8</sup>◊ Vo oisoa Ebrahim oirao pie vovou purapareve. Oa purapaoro Pauto uvureva ovusa rerare keeraroepa. Oa iava rera vo reoaro sirova utuoro ora vaseroepa, oiso ra rera vo taerearo kavuoro avaro vore avaoro uvare Reo Ovoi purareva Pauto rerapa. Ari ita, rera vo taerearo rutu kavuoro gaururoepa. Oire voava avapaoro viapau oiso tarai paroepa oiso, Ovu iare avaparai. <sup>9</sup>◊ Uva va-a vao osa rera vo vovouaro oirao pie vovou sirova oisoa toupareve vo taereo-ia oa iare rerapa Reo Ovoi purareva Pauto. Uva voa oiso rutu oisoa toupareve osa ro ira vegoparo rakari keparo raga-ia. Ora vo araoreo tapo oviitoarei Aisak

---

◊ 10:37: Hab 2:3-4; Lu 18:8    ◊ 10:38: Ro 1:17; Ga 3:11    ◊ 10:39: 2 Pi 2:20    ◊ 11:1: Ro 8:24; 2 Ko 4:18  
 ◊ 11:3: Jen 1:1; Jo 1:3; Hi 6:5    ◊ 11:4: Jen 4:4, 10; 1 Jo 3:12    ◊ 11:5: Jen 5:21-24    ◊ 11:6: Hi 7:19    ◊ 11:7:  
 Jen 6:13-22    ◊ 11:8: Jen 12:1-4    ◊ 11:9: Jen 12:8

vaio ora Jekop aiterea tapo oisoa vo keparo-ia evara rakari keparo toupasi, aitereapa Pauto Reo Ovoi vatereva.

<sup>10</sup> Vao vituaro iava Ebrahim vokiara rutu-ia rera vo oirao piearo-ia oisoa tuevira raga toupareve, oiso ra vo uruio kekereve ouruia paureva Pauto ora rera vo ruipaaro-ia. Oa pauakavira rutu toupaiveera.

<sup>11</sup> ♦ Uva va-a vao oirao pie vovou oa vituaro Ebrahim uvuiparoi ra oiso toupareve, Aite. Ari ita, eagara vosa avukaroepa rutu, ora vao tapo osa valuava Sera oisoa kakae kavau asavira toupaeve. Vo osa touvira rutu Pauto-ia oisoa rariparo, oisore ra oiraopavira rutu karekepe rerapa Reo Ovoi Pauto vaaro. <sup>12</sup> Oiraopavira rutu ita, uvare kopiisa tutuu pierava, vo osa rera raga aao iraraaro-a voeao riro irara rutu oea karekeae. Oea vieiaro oiso rutu pura viropa osa aaviikoara vieiaro, ora oiso osa rogara vao oa avakava sirova toupaiveira viei asavira.

<sup>13</sup> Oire uva oisi raga touvira rutu oirao piepaoro oisoa kopiipaave varao ou asavira oara iava Pauto Reo Ovoi purareva. Uva oiso ora voea-ia taraiaea, Akoea, igeivi vao sopaipa irara. Vigoa tavete visivi raga toupapeira vo rasio-ia, oa iava vara eveipaioveira varao vearovara oara tauai rutu vo utupaua vigeipa toupaiveira Pauto ruvara-ia va iava vearo vaisi purapaoro vara-ia evara. <sup>14</sup> Ari ita, oearovu oirara evo reo purapaiveira. Uva vigei uvuipavie ra oisi ragavira taraipavio voea-ia oiso, O ari touvira ora voea voaaro ruture taraapaivoi. <sup>15</sup> Uva viapau vorerivira voare rugooava voea vo taerearo-ia vao oa iava gauruava oiso ra voare vorevira kareave. Oiraopavira rutu oiso uvuipaai ra vore kareave, vo rara oisi ruipapaave vore karesa. <sup>16</sup> Ari oisoa oiso ruipapaave ra uvavure avaave, vo uva vearovira rutu toupaive. Otaerei-ia vao oa oiso rutu toupaive osa vuvuiua. Oa-a eva oa vituaro iava oisoa Pauto viapau ariiparo voea uvupaoro, vo rara rera vaisi oiso purapaoro, “Igei reraaro Pauto.” Eake iava? Uvare oiraopavira rutu riro urui voeapa ravaareva va pauoro.

<sup>17</sup> Va vao oirao pie vovou oa oisoa purapareve Ebrahim oa iavirava oiso vovouroepa ra oviitoa-ia koruoua purareve Aisak, vo uvare Pauto rera-ia kokararoepa. Ari ita, oiraopavira uvare Ebrahim-pa Reo Ovoi pura rovoreva Pauto, oiso ra riro irara rutu oirara aao keeraave rerare Ebrahim. Uva va-a vao oa-ia tarai rovoroiva, vatastopoa purareva, oiso ra oviitoa-ia kataito koruoua purareve. <sup>18</sup> Uva rovovira rutu Pauto rerare oiso puraroepa,

‘Rera-a eera Aisak ira iavirava riro irara rutu viire aiteaverea.’

<sup>19</sup> Va-a vao osa Ebrahim tarai ovoiroepa oiso osa ragavira uvuiparoi ra Pauto Aisak tore pierave vorevira kopiia iava. Ari ita, oiso osa ovoovovira kopiia tapiva vorevira toreroepa Aisak rera ruvara-ia Ebrahim toupasa.

#### *Vo Toupai Aisak Vase Iava Ora Jekop Ora Josep*

<sup>20</sup> Oire uva Aisak oirao pie vovou sirovava reo ovoi purareva auere viraakoa, oiso ra vo araorei-ia karekepe Jekop vaio ora Iso. <sup>21</sup> ♦ Oa isivaaro-ia Jekop Josep ovii iraraaro katakataivira viraakoreva ora rera vaaro oirao pie vovou vituaro iavirava, vo osa rerapa tutuu piepa oiso ra kopiilo. Ari ita, takuvira oisoa toupaoro tooroto riara-ia Pauto-ia oisoa vuurapa vaisi purapareve. <sup>22</sup> ♦ Ora ro tapo Josep ora rera vo oirao piearo vituaro iava vo reo purareva vo vuutao iava oa-ia Isip-ia kavuivre Jiu-pa irara. Oreoa isivaaro iava oreovua vao oa iava voea tavireva ora rera iava oiso, “Vosa ragai iava varaua kopiipe ra voua tovota oiso.” Uvare rera vaaro kopiia tutuu pieva.

#### *Moses Iava Vo Reoreoro-ia*

<sup>23</sup> ♦ Va-a vao oirao pie vovou oa oisoa purapasi vaitereo Moses aitetoareiaro. Oa sirovava rera kavausivoiva, vo kakae oisoa vataupasiva vo peva rutu sovara-ia kekira peva. Vo rara rera-ia vearovira rutu taraipasi oiso, Vearo keketoa rutu ro-ia. Oa vituaro iava ro king vo reoaro gasisiva tuuvu vovouvira rutu vo reo oa purareva kakae vurerore.

<sup>24</sup> ♦ Oa iava riroroiva Moses, vaopa oisoa reasiparo oiso teapi oiso rera vaisi oiso purareva kakae vurerore. Pero ro reito oviivaaro oviitoaaro. <sup>25</sup> Ari ita, oisoa oisi vo vaisi veripaoro oiso vovouroepa rutu

♦ 11:11: Jen 17:19, 18:11-14, 21:2    ♦ 11:21: Jen 48:5    ♦ 11:22: Jen 50:24-25; Eks 13:19    ♦ 11:23: Eks 2:2,  
1:16    ♦ 11:24: Eks 2:10

ra Pauto voeaaro tapo oirara ora tavosiro rutu, vo osa riroa rutu tavaka oisoa oupaive. Oa iava oisoa vaopa reasiparo, teapi vuri vovou vai purareve gare vuutavi raga-ia.<sup>26</sup> Uvare varao rutu-ia taraiparoepa oara-ia osa tavaka vo siraoroaro oisoa oupareve oiso rutu osa vo tavaka oureva ro ira roporeva Pauto. Varao oara oiso oaravu rutu-ia pute iraopaive rutu varao vearovpara rera varaaro oara oisoa Isip-ia toupaive. Eake iava? Uvare oisoa tuevira vaore vearo vori toupareve vao oa oureverea vovio utupauavi rera vo tavakaroaro iavirava.

<sup>27</sup> ♦ Oire uva oirao pie vovou vituaro sirovava Isip-ia kavureva. Oa raga iavirava viapau oiso kingto vaaropa kasipu vovou uririparoepa Moses. Viapau. Ari oisoa topaparo viro rutu avapaoro. Eake iava? Uvare rera-a eera ira oiso rutu toupareva, Ira eera Pauto kekereva ora rera-ia, ro ira viapau uvuiparoi irai ra rera kekereva.<sup>28</sup> ♦ Uva oirao pie vovou purarevoiva, va sirovava oirara rutu tavireva, oiso ra Tagausapa Vurei Pasova puraive. Vo vuutao-ia oa-ia voea rutu tavitavireva, oiso ra revasiva-ia rataoara rutu riaaro kipuive. Vo kipuro oara kekepaoro uvuiparoi ra vo keparo reesipaoro Jiu-pa irara ovii kakaeroaro voeao avaiopa kakaero tagaupaoro okakaerovu raga avaiopa kakaero kopii pierere enselto. Uvare rera vaaro-a voea upopasa.

#### *Riro Irara Rutu Jiu-pa Irara Goruvira Rutu Oirao Pieiva*

<sup>29</sup> ♦ Oisi-a oiso osa vo vovouro iava varao oirao pie vovouro Jiu-pa irara Ret Si avakava iviroiva ovusa voeapa raakaopa. Oa iava Isip-pa irara voea tariopaoro iviropaoro utupaaepa, ovusa voea ururao ora aivaro pieopa. Oa iava voa kopii ovoiaeapa.

<sup>30</sup> ♦ Ora tapo oiso osa vo oirao pieroa varao oara iava kasuraara varao Jeriko-ia kururu piropa, vo osa Jiu-pa irara vo urui taripaoro riro goruvira rutu viri rovopaiva erao vatara (7) vokiro rutu-ia.<sup>31</sup> ♦ Ora o tapo riakova Rehap riro otopava iria ruvara iava voeao rutu kopiiaea oea oisoa Pautoa-re isivapaave, ovusa oira viapau kopiiopa. Eake iava? Uvare voeao oea vo rasi vagogo rovosa urioaepa vao oa-ia oisoa toupaeve. Oa iava voa oira raga voea tokieva oira vo kepaaro-ia oira vaaro iavirava oirao pie vovou.

<sup>32</sup> Oire uva visii akepaavoi, E uvuiparai oeai iava ita visii tavitavia, eke? Oiraopavira, viapau oiso vuutaa vaiei ragaipa ra Gidion vase iava visii siposipoa ora Barak, ora Samson, ora Jepta, ora Devit, ora Samyuel, ora voea rutu voeao profet irara oea oisoa Pauto vo reoaro kosi piepaive.<sup>33</sup> ♦ Oiraopavira rutu oiso osa oisoa oirao pie vovouro purapaoro riro irara rutu upopaise uvarovu rutu voea-ia putepaoro. Ari ita, torevoko pitupitu rutu sirova oisoa utupaave, oa iava vao ouiva oeare voeapa Pauto Reo Ovoi purareva. Voeao oea laion kare iava gisipo kapu pieiva. Oa iava viapau oiso voea aioiva.<sup>34</sup> Ora voeao oea riro kasi rutu tuituia roko pieiva. Ora oiso osa virivarivira rutu toripaiva voea asavira oea toorioara-ia voea upopasa ae ragapaaepa. Uva va-a vao osa raveraveaepa. Uva vorerivira ita ora voea iava varaura-ia gorua ouiva. Osa iava tuuvu vovouvira rutu upoara puraiva oearovu tapo uvarovu rutuva voea voea-ia putepaoro rutu.<sup>35</sup> ♦ Ora oearovu tapo voea iava oea oisoa kopii rovopaaera, vorevira torepaaave. Eake iava? Uvare airorovu voea iava vairoro airoa oisi oiso oirao piepaiva oiso puraoro, "Oiraopavira uvuipaii ra vorevira toreave vigei voeaaaro." Ora oiso tapo osa oearovu vuri irara oea voeare oiso puraaepa, "Uvuipatai ra vova kosita viro vosa visii varaaaro oirao pie vovouro kavu rovota." Uva viapau kosia viropa, uvare oiso ruipapaaepa ra voea varaaaro oirao pie vovouro kareke piepaive. Oa iava oisoa voea vuri piepaive rutu voea upopaaoro. Vo rara oiso ruipapaaave ra eisi voea piepaivora, vorevira torepaaave vearo tootoo rutu oupasa.

<sup>36</sup> Uva oearovu oisoa voea tovipaive tapo voea ragipaoro viripa iroro-ia. Ovusa oearovu oisoa voea tuukepaise iroara-ia tuukepa keparo-ia voea tovopasa.<sup>37</sup> Ari oearovu oisoa voea vurokopaive ae-ia aveke, ovusa oearovu raga ita voea iava varaura koripaive. Ora vo osa oearovu oisoa upopaise ae-ia toorioara. Ora tapo oisoa taririvira toupaive apotavira rutu toupaoro sipsip rakariro-ia kuvupaoro ora meme rakariro, ovusa oearovu voeao oisoa vuri piepaive rutu.<sup>38</sup> Oiraopavira rutu oiso osa voeao rasio-ia tou irara oisoa viapau voea eveipaive ra va iava oiso purapaave, "O asi vearo vovou irara vai-a voeao-ia."

---

♦ 11:27: Eks 12:50-51   ♦ 11:28: Eks 12:21   ♦ 11:29: Eks 14:21-31   ♦ 11:30: Jos 6:12-21   ♦ 11:31: Jos 2:1-21, 6:21-25   ♦ 11:33: 2 Sml 7:11; Dan 6:22   ♦ 11:35: 1 Kin 17:22

Voea raga ita voeao-ia oea oisoa viripaive voraro raaka tapiro, ora voraro pukuara-ia, ora tarieara-ia, ora rikuara tapo.

<sup>39</sup> Uva oiraopavira rutu-a oiso osa vo siposiporo toupaiveira voeao iava oea oisoa Pauto roru piepaive rutu. Eake iava? Uvare eisi oisoa piepaive voea vo vovouroaro oirao pie vovoouro rutu purapaoro. Uva viapau varao vearovpara ouiva oara iava voeapa Reo Ovoi purareva Pauto. <sup>40</sup> Uvare Pauto orugoovu raga-a vao oa purareva vigeipa. Oiso rugooro ra vao-ia airepa rugoo voea tapo tuariripa irara vigei rutu takuvuoro vigei uvui pie ovoireverea voari ruture utupaua.

## 12

### *Vigei Uvuipaviei Ra Jisas-ia Vurapaoro Rera Oirao Piepape*

<sup>1</sup>  $\diamond$  Ari ita, vo vokio-ia vearovira rutu taraipaviera voeao iava tuariripa irara, uvare oisi eisi oisoa piepaive voea vo pitupituroaro evara oirao pie pitupituro oiraopavira kareke piepaoro. Uva vigei tapo ita uvui iraopaviei ra oisi eisi piepape. Oa iava uvuipaviei ra varao vuri pitupituro kavupape vo pitupituro oara vigei-ia goruvira rutu pitupaiveira, ora varao rutu tapo oara vigeire korukorupapeira torevoko pitupitu purapa arapa. Uva uvuipaviei ra vara rutu evara kavuera, vo paupauo purape reasi asavira oaravu-ia pute iraopasa vuriara. <sup>2</sup>  $\diamond$  Uva oisi eisi piepaoro uvuipaviei ra goruvira rutu Jisas-ia vurapape. Vao iava uvare rera raga vigei vararo oirao pie vovoouro vituaro vo rutuva rovopaoro rovoa-ia vo rekasisa opesipa tapi. Oiraopavira rutu ita, uvare viapau oiso torireva vao asavira evao parikou vo siitokaaro. Viapau. Ari ora rera iava vasereva voare, oiso ra voa kopioro ariia oureve evao parikou-ia. Uvare vao ragare rugorugooroepa riroa rorua oa rerapa oisoa tuevira toupaive. Ari ita, uvare vo vokio rera epao reia-ia pauparoi paupa vo oirapapa varata-ia vao Pauto vaaro.

### *Pauto Vigeipa Siraopa Vatereva Vigei Torevokopasa*

<sup>3</sup>  $\diamond$  Rerare ro Jisas rugorugoo iraopata. Opeita rera vaaro reiroa goru vovou ovaupata. Vao oava toupaoro kasipu vovou oureve vuri irara ruvara-ia. Uva oisi-a eisi osa visii tapo ita viapau uvuipatai ra visii vo vovoouro goru vovouro viki ragapata visii vo oirao pieroaro kavupaoro. <sup>4</sup> Vao iava uvare vo paupau-a eva purapaoro vuri vovouva ora upopatai oa-ia revasiva visii iava touvira parupaevere pasi. <sup>5</sup>  $\diamond$  E vo reorore vai ovautaepa oara Pauto vatereva visiipa vao rera ovii iraraaro, oisore ra ora visii iava vovouisi oavisii goru pie iraopata? Uvare oiso puraroepa, ‘Oviitoa oaa, vaore rugorugoo iraopau vo osa Turaro Pauto viipa vavata vatepareve, oiso ra va kaeri. Ora tapo oiso-ia ra opeita raveravepau vo osa viipa goru reoro rutu vatepareve varao vii torevokopasa.

<sup>6</sup>  $\diamond$  Uvare ro ira kaviko iraopareveira Pauto, ira raga ita-a eera irapa uvuiparoi Pauto ra rera vatepareve vavata oiso ra va kaepareve. Ora voeao tapo oea oiso vaisipareveira, Rera ovii iraraaro, oeapa voea vo vuriaro vo voriaro vatepareveira voea torevokopaooro.’

<sup>7</sup> Oire uva uvui iraopatai ra goruvira rutu vovou iraota vo osa vo vavata eva oupata. Vo uvare taraipatai oiso, Aite ruvara iava va vao-ia. Ari ita, visii vo vavataaro vao karekepaiveira rutu visiipa, oire ra va iava oiso purapata, “Oiraopavira rutu Pauto osa oiso igei piepareveira oiso, Rera ovii iraraaro.” Uva ragai tavita oiso, E irai aitetoa vai viapau iraipa oviiitoa vai goru reo vai viapau vatereva vaore irai torevokopasa oai-ia, eke? <sup>8</sup>  $\diamond$  Vosa viapau Pauto vaaro vavata kaepata oiso osa oearovu rera ovii iraraaro vo vavata kaepaiveira, oa iava uvuipatai ra ora visii-ia taraipata oiso, O ita, viapau oiso vigei-a Pauto ovii iraraaro rutu. Ari iravu raga ovii iraraaro-a vigei. <sup>9</sup> Ari ita, voeao aite irara oavi vo rasio-ia vigei torevokopaeveira varao vuri pitupituro asavira. Oa-a eva oa iava voeapa avivikepavioveira. Uva va-a eva osa vituaro iava uvuipaviei ra pute pie visivi rutu ora vigei iava vasipape rera iare. Oa iava uvuipaviei ra Tootoo Ovoi oupape rera

$\diamond$  12:1: 1 Ko 9:24; Hi 10:36     $\diamond$  12:2: Fl 2:8-9; Hi 1:3, 13; 1 Pi 3:22     $\diamond$  12:3: Mt 10:24; Ga 6:9     $\diamond$  12:5: Pro 3:11-12     $\diamond$  12:6: Sam 94:12; Je 1:12     $\diamond$  12:8: 1 Pi 5:9

ruvara-ia Aite Pauto ro vova vuvuiua. <sup>10</sup> Uva aite irara oavi vigei oisoa torevokopaive potekupa vuutarovi raga-ia voea vo rugorugooroaro sirova utupasa. Ari Pauto vigeire rugorugoparoveira rutu oiso vigei torevokopaoro. Oa iava uvuipavieie ra torevoko vovou rutu purapape ora airereipaoro, oiso rutu osa rera vo vovouaro vuri asa vovou rutu. <sup>11</sup> ♦ Vosa goru reo rutu oupaive vao voea torevokopa reo vuri pitupituro iavirava, oa iava uvuipaii ra ora voeapa siraopaave oiso purapaoro, "Siraovira rutu vigeivipa vao-ia, vigoa viapau oiso vo reo-ia vao-ia rorupapeira." Viapau. Ari oiraopavira uvare oearovu voea iava vao goru reo uvuivoiva, oa iava torevoko vovou ouiva. Uva vo utupaua voea vo voriaro ouiva vao gavaure vovou.

#### *Reo Ravaa Iava Vao Oisore Ra Goruvira Toreta*

<sup>12</sup> ♦ Oisi-a eisi osa ragavira uvui iraopatai toupapro ora visii iava vavaeara goruvira rutu kae pieta varao oara raveravepaoro europapeira. Ora oiso ra goruvira rutu kotupiara itotuo piepaoro tore iraota. <sup>13</sup> ♦ Ra oisi iava topa pievira voka iraoro avata vao-ia torevoko raiva. Visii vao yearo kokoto irara voea tapo vokapata voea goru piepaoro voeao vuri kokoto irara. Teapi raiva tasi arova piropaave.

<sup>14</sup> ♦ Ora visii iava vovouisiro oavisii rutu tovo iraota. Oa iava uvuipatai ra gavaure vovou rutuva oearovu tapo toupata oirara. Ora visii iava vovouisiro oavisii rutu tovo iraopata, ra ora airereipaoro viapau rutu vuri pitupituro vai sirova utupatavere. Eake iava? Uvare viapau oiso irai oiratoa vai Turaro Pauto kekerevereia vo rara viapau eisi piepareve. <sup>15</sup> Ora vaopa tapo ora vatatopo iraopata. Teapi irai visii iava vaore isivaparo Pauto vaaro kavikopa vovou oa purapareveira visiipa. Ora vao tapopa ora vatatopo iraopata. Teapi oiso rutu toupata osa okuerovu varao itakopa kuero. Aue vituar, teapi oirara rutu vuri piepata visii vo pitupituroaro raga-ia. Oiso rutu osa itako ovi gare ovivi raga oa aioara rutu vuri pievo vara sovara-ia avaoro. <sup>16</sup> ♦ Ra vaopa tapo ora vatatopo iraopata. Teapi irai visii iava otopa vovou vai purareve. Ora tapo teapi irai Pautoa-re isivapao oiso piepareve osa ro Iso. Ira katai vuutavi raga-ia gareavi raga aioa ouoro araokoto ruvara-ia kikooto ira reo ovoi purareva kokotoa aropia oiso puraoro, Ragai varaaero rutu ouriverea rara varao aite ruvara iava. <sup>17</sup> ♦ Ari ita, rera-ia taraipataveira, uvare va isivaaro iava oiso ruipa ragaroepa ra aiteto ruvara-ia viraakoa oureve. Vo osa viapau uvuiloepa. Eake iava? Uvare viapau oiso uvuiparoepa ra evo vovou tavarioreve oa-ia tuutuua pura rovoreva kikootoapa. Uva gau ragapaoro rirovira rutu akeake ragapareva. Vo osa viapau.

#### *Vigei Pou Viroviei Vo Vearo Pukui-ia Vao Vo Saion*

<sup>18</sup> ♦ Viapau oiso pou virotaepa vo pukuio-ia Sinai, oiso osa voeari Jiu voari tuariri. Vo pukuio oa oisoa uvuipaave ra va kekeive ora voea osireiaro iava. Opukuio eva oa-ia oisoa riro kasi rutu eto kasi karekepape ovokirovu-ia, vo osa Pauto reo vateparo. Ora vao tapo osa voa oisoa ruupa rutu karekepape ora purepato kiuvu. <sup>19</sup> Opukuia raga ita-a eva oa-ia utave guruko karekeepa ora reoreoa. Ari ita, oreoreoa eva uvuiva, oa iava vare oisoa riro goruvira rutu arepaave oirara, oiso ra opesipe vo reoreo voea arova. <sup>20</sup> ♦ Eake iava? Uvare Pauto vo reoreoaro uvupaoro rirovira rutu uriri iraopaaepa. Oreoa-ia voeari Pauto oiso puraroepa,

'Vosa irai oiratoa vai, eke irai varueretoa vai vo pukuio-ia tasiasireve, ira-a eera ira-ia uvuipaai rera vurokoive rera kopii pieoro.'

<sup>21</sup> ♦ Iu. Oiraopavira rutu uvare vo pukuia-a eva oava vurapaoro oisoa rirovira rutu uriripaave. Osa iava Moses ora rerare oiso puraroepa, 'Ragai-a vao ragoa rirovira rutu rikerikeparai uriri iraopaaoro.'

<sup>22</sup> ♦ Oire uva visii ita vao-ia viapau oiso vo pukuia eva pouta viropa. Viapau. Ari opukuivu raga vao oa-ia pouta viropa oa vaisipaiveira oiso, Saion. Vo uva Pauto vo uruiaro toupaiveira ro Tootoopatoa Rutu. Vo uruio-ia ouruia epao toupaivoi oiso osa

---

◊ 12:11: 1 Pi 1:6; Je 3:17-18 ◊ 12:12: Ais 35:3 ◊ 12:13: Pro 4:26; Ga 6:1 ◊ 12:14: Mt 5:8 ◊ 12:16: Jen 25:33 ◊ 12:17: Jen 27:30-40 ◊ 12:18: Eks 19:12-22; Diu 4:11 ◊ 12:20: Eks 19:12-13 ◊ 12:21: Eks 19:16  
◊ 12:22: Fl 3:20

raga toupaiveera voari rutu utupaua vo vuvuiua-ia. Vao oa vaisipaiseira, Jerusalem. Oa sovara-ia riro tukuro (tausen tausen) rutu enselpa irara rorupaoro toupaiveira. Voea raga ita oea vo uvuruo iare pouta virora. <sup>23</sup>◊ Oa-ia toupaiveira voeao Pauto ovii iraraaro avaio irara. Voea ita oea vaisiroaro rigatoreva vukua-ia vao oa epao vuvuiua-ia. Ari ita, kareta virora rera iare ro Pauto ira oirara rutu vo vovouroaro rovirieipareveira. Ora voeao iare tapo uraura irara torevoko vovou irara voeao Pauto oea uvivira ovoi piereva rutu. <sup>24</sup>◊ Oiraopavira rutu ita, vo uvare kareta virora Jisas iare. Ro ira-ia oiraoepa oa pura piropa Airepa Reo Ovoi. Oire ra oisi iavirava ora rera iava revasiva petoreve va eva Reo Ovoi goru pieoro. Eira revasiva iria vo kovoaro Ebel revasiaro-ia putepaeveira rutu. Uvare Krais revasivaaro-a iria veiaropara rutu kareke piepaeveira.

### *Vigei Uvui Iraopavie Ra Ora Vatatopo Iraopavio Vearovira*

<sup>25</sup>◊ Ora vatatopo iraopata vaopa oiso, Opeita siposipopato vo reoroaro veripata, oiso osa voeao oea viapau oiso oisi rera vo reoroaro uvupaise, eera ira tugoropa siposiporo oisoa vatepareve vo rasio-ia vo tuariri rutu. Uva voe-a evoea oea viapau oiso voea vo voriaro vuria vatawataiva. Oire uva apeisi-a vigeipa vao? E uvupavie ra oisi va vuria vo voriaro vatawatapape, vo rara oisi rera vo reoroaro veripape ro ira vo reoro kosi piepareve vuvuiua iavapara? <sup>26</sup>◊ Oiraopavira rutu ira-a ro ira vo gurukoaro voari tuariri rutu vo rasio rikerike pieeva. Oa iava Reo Ovoi purareva oiso puraoro, ‘Ragai taru vorerivira vo rasio ita rikerike piea. Uva viapau oiso vo rasio raga-a, ari vuvuiua rutu tapo-a.’

<sup>27</sup>◊ Oire uva vo reoa vao-ia oa oiso purapai, Vorerivira, oa porearo oiso roroiovira rutu toupai oiso-ia, Vara rutu orekerovu Pauto oara purareva voari rutu rovoa-ia, oara rutu opesiperea rikerikeoro. Ari varao oara viapau oiso rikerikeperea, oara raga-a evara oara perea.

<sup>28</sup>◊ Oire uva rorupata, uvare vao oupapeira Pauto vo Saraaro oa viapau opesia vai vo osa rikerikepe. Osa iava vigei uvupavie ra Pauto vaisiaro-ia vuurapa vaisi purapaoro rerapa avivike iraopavio rera vaisiaro kae piepaoro rutu. <sup>29</sup>◊ Uvare Pauto riro kasiva eto kasi toupareveira. Oa uvupai ra orekerovu rutu rova pieve vara rutu opesi pie ovoioro.

## 13

### *Uvupavie Ra Ora Vigei Araoko Iraraaropa Sirao Vovou Vatepape*

<sup>1</sup>◊ Vokiara rutu-ia uvui iraopatai ra oearovivupa siraopata, voeao araoko irara oavi oea Krais vaisiaro-ia toupaiveira. <sup>2</sup>◊ Opeita vaore ovau iraopata oiso osa uvupatai ra oearovivure aapaapaupa irara keerapata vorarore visii vo keparoaro-ia voea koata piepasa. Ari ita, oearovu oisoa oisi eisi oearovu piepaise voari. Uva viapau oisoa voea eveipaoro voea koata piepaise ora voea vo keparoaro iare, vo osa voeavi uvuiaroa ita enselpa irara oea oisoa koata piepaise.

<sup>3</sup>◊ Ora voeaviore tapo rugorugoopata oearoa tuukepa keparo-ia toupaiveira vo Jisas iavirava. Ra ora visii-ia voea sovopaoro oiso taraipata, Visii uvuiaro eva visiigoa ita tuukepa kepa-ia toupatavoi. Ora ra voeaviore tapo rugorugoo iraopata oearovia tavaka vo vavataaro kaepaiveira. Vo vavataaro uvupatai ra ora visii-ia va sovopata oiso rutu ita, ovavata-a eva voea vaaro oa visii-ia ita toupaivoi.

<sup>4</sup>◊ Opeita vo pitupituore ora oupa pitupitu oiso rugorugoopata, Akukupapa raga. Viapau rutu. Ari ro oirato ora o riakova oavukarea raga uvupasiei ra ora vaiterei raga rutu toupasi. Vao vituaro iava vosa viapau oisi eisi toupasi, oa-a eva oapa Pauto vaiterei ora oearovu rutu rovirieirevere vapa vao ora voeava otopa vovou, vo osa vo pitupitu vo voriaro vuri vori vatereve voeapa.

<sup>5</sup>◊ Ora opeita vo vovouova toupata tapo moniara riiriipa vovou. Ari uvupatai ra varavio-ia roru iraopata oara-ia pitupataveira oiso purapaoro, “Ari uvupai varao.” Eake iava? Uvare Pauto vao-ia oiso puraroepa,

◊ 12:23: Lu 10:20; Fl 3:12    ◊ 12:26: Eks 19:18; Hag 2:6    ◊ 12:28: Dan 2:44; Hi 13:15    ◊ 12:29: Diu 4:24

◊ 13:1: Ro 12:10; 1 Te 4:9    ◊ 13:2: 1 Pi 4:9    ◊ 13:3: Mt 25:36; Kl 4:18    ◊ 13:4: 1 Ko 6:9    ◊ 13:5: Fl 4:11; Diu 31:6, 8; Jos 1:5

‘Viapau oiso visii kavuaverea. Ora viapau oiso visiire ovauraverea.’

<sup>6</sup> Oreoare vao rugorugoopaoro uvui iraopavie i ra goru vovouvira rutu oiso purapavio, ‘Ragai reraaro tauvapato Turaro Pauto. Osa iava viapau uvuiparai ra orekerovu avu vaipa uriripara. Oiraopavira rutu. Eake vai-a vao oa-ia uvuiparoi irai ra oai purareve ragai vuri piesa? Viapau oiso oaiei.’

#### *Vigei Uvuipavie Ra Oiso Rutu Utupavio Osa Voeao Turaro Irara Tuariripa Irara*

<sup>7</sup> ♦ Ora voeaore rugorugoo iraopata tuariripa irara oea oisoa visii tuvetuvepaive Pauto vo reoaro iava siposipopaoro. Ora voea vo pitupituroarore tapo rugoopata oiso oso ragavira oisoa toupaive tootoopaoro ora kopiipaoro. Uva vo pitupiturei-a evarei oarea-ia visii ita uvuipatai ra oisi voea vioepata voea vo vovouroaro oirao pieara sirova utupaoro.

<sup>8</sup> ♦ Jisas Krais viapau oiso tavarioa vaiei. Ira vo vokio touparevoi oisi raga ita oso tuariri oisoa toupareve. Osa raga ita eisi oso voari utupaua touparevere taru. <sup>9</sup> ♦ Opeita osiposiporovu raga pisaara uvupata vaopa, teapi visii ivuive vao arova torevoko raiva Pauto vaaro. Vosa vigei iava sopaura sirao vovou vo goruaro ouve Pauto ruvara-ia, oso veearopai. Oa iava vigei iava sopaura viapau uvuipai ra osasararovu rutu aue reo goruro vo goruaro ouve varoare aiopara. Oara vo pitupituro viapau oirara oisoa tauvapaive vo oso va-ia vokapaise.

#### *Vo Toupaivao Java Korououa Oa-ia Rorupare Pauto*

<sup>10</sup> ♦ Ovoovova eravao vigei oiraaro toupaivoi oira-ia korououa toupae. Vo korouou oia vaa viapau rutu uvuipaa Ji-pa irara pris ra oai puraive va-ia. Uvare viapau voea vaaro-a. Ari vigeipa oirao pie vovou irara. <sup>11</sup> ♦ Ari ita, ro Rovopatoa rutu Pristo Jiu iava ira oisoa Tugoropa Tavuki Rutu iare oisoa koataparo varuere kare iava revasi rovurova varai korouupasa vuriara verapaoro. Vo karero okarea oisoa kasipaive vo uva sel urui-ia toupaive vatuarto. <sup>12</sup> ♦ Uva oisi-a eisi oso vituarto iava Jisas ita kopiirape oisi ratau vo riro urui iava rataao riaaro vatuarto-ia. Oa iava voa rera iava revasiva parueva oirara rutu sisigarue pieoro vuri vovouro iava. <sup>13</sup> ♦ Uva vigei tapo ita uvuipavie i ra oisi uruia vatuarto iare kosi viropavio varao kavuoro Jiu varaaro, oiso ra rera sirova utupavio. Ra va iava ora vigei-ia rera vaaro ariaa sovopape va vao siitoka vavataaro kaepaoro. <sup>14</sup> Oiraopavira ita, viapau oiso pauaka urui-a vao oa oiso vaisipapeira, Vigei vo uruiaro va vo rasio-ia. Viapau. Ari touvira rutu tuevira toupaoro vo uruire taraapapeira vao oa rutu-ia toupaperea voari utupaua. <sup>15</sup> Eisi oso iava uvuipavie i ra Pauto-ia vuurapa vaisi purapape Jisas vaisiaro iavirava. Vo vaisio vuurapa vaisi oa oiso toupae, Vigei vaaro korououa vova vigei iava gisipoara-ia. Uvare rera vaisiaro rei piepapeira oisi va iava tavitavipaoro. <sup>16</sup> Ora opeita tapo vo vovoureore tapo ovaupata veearoa purapa, ora aue vao tauvaa oearovu tauvapasa. Eake iava? Uvare evo vovourei oarea-ia uvuipatai ra Pauto roru piepata ora visii-ia.

<sup>17</sup> ♦ Voeao oea visiipa irapaaveira vo reoroviaro tapo uvu iraopata, ora voea vo vovouroaro tapo sirova utupata. Uvare vuutara visii iava sopaura oavisii tokipaiveira vaopa, teapi oearovu visii piro piepaive. Oa iava voea evoea tokipa irara Pauto tavitavipaaveira ora voea vo kovoaro iava. Vosa voea vo reoroaro oisi purapata, oa iava uvuipaa ra visii-ia kovopaise roruvira. Ari vosa oisipa eisi viapape, oire ra siraoa vo vavataaro kaepaive oisi eisi kovopaoro. Ra oisi vo vavata iava viapau oiso ra tauvaa vai outavere.

#### *Vo Toupaivao Tauvaa Oupa Java Variria*

<sup>18</sup> Visii vo variriroaro topa piepata, ra Pauto igei tauvapareve. Oa iava ora igei-ia tarai ovoipaioveira oiso, Igei iava sopaura sisigaruepapeira vo Pauto osirearo-ia. Uvare igei vo ruipaaro rutu-a va vao-ia torevoko vovou purapaoro vokiara rutu-ia. <sup>19</sup> Uva vorerivira ita visii arepaavoi goruvira rutu oiso ra variripata. Oa iava Pauto visii iare ragai vore piereve rara.

---

❖ 13:7: Hi 6:12 ❖ 13:8: Hi 1:12 ❖ 13:9: Ef 4:14; Kl 2:7, 16 ❖ 13:10: 1 Ko 9:13, 10:18 ❖ 13:11: Eks 29:14; Lev 16:27 ❖ 13:12: Jo 19:17 ❖ 13:13: Hi 11:26 ❖ 13:17: Ais 62:6; Ap 20:28

<sup>20</sup> ✩ Pauto vigei Turaroaro Jisas kopiia iava vorevira tore piererva rera ro vigei Tokipatoa Rutu Vearoto. Ira sipsip ragui tokipareveira, oraguia-a vao vigei raga ita. Ari ita, rera vaaro iava kopiia vao Reo Ovoi Pauto vaaro, oa oiraoepa vo reo oreoa-ia viapau opesia vaiei. <sup>21</sup> ✩ Uva Pauto arepaaveira ro gavaurepa vovouto, oisore ra veearopara vatepareve visiipa, vaore, oiso ra oisi vara iava rera vo ruipaaro sirova utu iraopata. Ora vaore tapo, oisore ra oisi vigei pieparevora, uvuipavieie ra rera roru piepape vao iavirava Jisas Krais vo goruaro. Oire uva uvuipavieie ra Krais vaisiaro kae piepape vokiara rutu-ia. Ovoiei.

*Ovoiopa Reo-a Vao-ia*

<sup>22</sup> Goru visivi rutu visii araoko irara oaa tavipaavoi auere ra ragai vo reoaro uvu iraota. Oreoa purapaavoi visii iava sopaura oavisii goru piepaoro. Oa oisivio rutu toupai gareavi pasia. <sup>23</sup> ✩ Uva oiso ruipaparai ra visii tavia ro iava Timoti vigei araokotoaaro. Ira kosi pieivorao vova tuukepa kepa iava. Oire vosa ikauvira raga kareroera ragai iare, oa iava uvuipaveieie ra vegei rutu uriove visii kekesa.

<sup>24</sup> Igei vo reoaro topa piepaoro vearo voki purata voeaova visii voeaaro turaro irara ora oearovuva Pauto voeaaro. Voearo visii araoko iraraaro vo taereo iava Itali oea tapo visii-ia ita vearo voki purapaivoi.

<sup>25</sup> ✩ Uva visiipa Pauto arepaavoi, oisore ra visiipa vereopa vovou rutu purareve visii tauvapasa.

Eisivi raga ra opesipe.

## JEMS

### Irapa Reoro Vo Vukuo Iava

Oeavu tarai irara oiso rugorugoopaaveira, Ro Jems ira raga ita Jisas araokotoaaro (Mt 13:55; Mk 6:3). Uva ora vaisiparoepa oiso, Krais-pa kovopato (Je 1:1), ora tisato (Je 3:1). Vo pasio rigatoreva voeaopa oea vaisireva oiso, Katai tau erao (12) sara oea sikasikavira toupaiveira voraro rutu. Uva taraipavio voea-ia Kristen irara oea tapo sikasikavira oisoa toupaive vo vuuta-ia eva. Aue iava uvare oearovu vuri vovou irara vuri pitupituro oisoa purapaise voea vo touaro vuri piepaoro.

Jems varao-ia reoreoparoi vao iava osa ragavira uvuipa Kristento ra toupareve oiso-ia, teapi kasipu vovouva riro kaekaevira toupareve (Je 1:19-21), ora uvui iraopa ra vearovira ora rera iava arevuoto tokipareve (Je 3:1-12), teapi oearovu raga vo pitupituroaro rovirie i ragapareve, (Je 4:11-12), ora teapi goruvira varao-ia pitupareve varao vo rasio iava (Je 5:1-3). Ari uvui iraoparoi ra Pauto ruvara-ia tutuu pievira toupareve (Je 4:7-8), ora uvui iraopa ra rera vaaro rari vuku oirao pievere varao iavirava kovoara oara purapareve Pautoa-pa ora oearovivupa oirara tapo tauvapaoro.

1. Ora rera iava aviavi pie reoro vatereva Jems, 1:1.
2. Oiraopa lotu vo pitupituro iava oa kareke piepareve ro ira Pauto vo reoaro uvupaoro va sirova utuparo, 1:2-27.
3. Oirato vaaro oirao pie vovou oa oirao piepareve kovopaoro, ora arevuoto tokipaoro, ora vo osa viapau oearovu tovipayre, 2:1-3:12.
4. Oiraopa tarai iava vo reoro, ora vao iava variria upiapa irara tauvapasa, 3:13-5:18.
5. Ovoiopa reoro varao-ia vo iravivu tauvapasa vuriara iava, oiso ra porero viro, 5:19-20.

<sup>1</sup> Ragai-a vao Jems ragoa-a Pautoa-pa kovopato ora Turaro Jisas Krais. Ragoa vo pasio rigatoavoi visiipa Isrel-pa irara katai tau erao (12) saraaro visiigoa Isrel-ia oisoa tou rovopata. Oa iava voava sikasikataepa orasirovu raga-ia toupasa. Uva ragai visiiva vearo vokiavoi.

#### *Kokarapa Iava Vao Oa Uvuipai Ra Vigei Goru Piepaive*

<sup>2</sup> Araoko irara oaa, vosa oaravu rutu kokaraara visii-ia karekepape, oa iava uvuipatai ra oiso rugoopata, Rorupasapara varao-ia. <sup>3</sup> Uvare taraipatai varao-ia oara karekepape visii vararo oirao pie vovouro-ia kokarapasa, oara uvuipai ra visii-ia poupa piro, ra vara iava keevoisivira torepata varao kaepaoro tavaka vovouro, vo rara kokaraara-ia putepata.

<sup>4</sup> Vokiara rutu-ia goruvira rutu tore iraopata tavaka vo siraoaro kae iraoparoi. Oa iava vo pitupitu eva uvuipai ra vearovira rutu kareke iraope visii-ia. Osa iava uvuipatai ra vearovira rutu toutes. Ra oisi iava viapau oiso opitupituipa apotata oai ou arapa Pauto ruvara-ia. Viapau. Ari eisi iava visii uvuipatai ra uvui iraota rara.

#### *Ro Ira Vearo Rugorugoopa Ruipaparo Ra Vare Variriro*

<sup>5</sup> Vosa irai visii vuruvuru-ia ro iava vearo rugorugoo vaipa apotaparo, oire Pautoa iare variriro, oiso ra rerapa rugorugoo vatero. Ra va iava Pauto rera vatereve. Ari ita, ro Pauto ira vearo rugoro rutu vatepareveira oirara rutupa. Uva viapau voearore kasipuparoveira oearoa vearo rugooropa apotapaave vo osa varare arepaave. <sup>6</sup> Ari vosa rera eera oirao pie rovo iraopareve ra va iava Pautoa iare variriro, viapau uvuiparoi ra gare visivi rera vaaro oirao pie vovou kavureve oiso rugooparoi, Esa pasi, Pauto ragaipa vao vaterevere, eke viapau. Eake iava? Uvare rera-ia vo rugorugooei toupaivoi. Uvare oiso touparevoi osa avakava iria torupaoro ora vurevurepaoveira. <sup>7-8</sup> Osa voearo eisi viapau uvuipaii ra oiso rugoopaaeve, Turaro irapa oavu avu vai vaterevere. Viapau rutu. Eake iava? Uvare rera vo rugooparoi avavaiapai ora sikasikapaoro. Oa iava vo vovouro

<sup>◇</sup> 1:2: Ro 5:1-6; Mt 5:12; Hi 10:34    <sup>◇</sup> 1:3: Ro 5:3    <sup>◇</sup> 1:4: Kl 4:12; 1 Te 5:23    <sup>◇</sup> 1:5: Pro 2:1-9; 1 Jo 5:14

<sup>◇</sup> 1:6: Mk 11:24    <sup>◇</sup> 1:7-8: Pro 3:5-6; Je 4:8

evara rera varaaro rera oiso piepai, oa iava viapau uvuiparoi ra katai raiva vai raga sirova utuparo.

#### *Apotatoa Iava Ora Ro Riro Kotokoto Guruto*

<sup>9</sup> Vosa aa ro avuo araokotoa oavi apotato ro oirao pie vovouto, ira uvuiparoi ra rorupareve, uvare Pauto rera kae pieparevere ora rera osireiaro iare. <sup>10</sup>◊ Ora vosa aa ro avuo ro araokotoa oavi ira riroara rutu kotokotoarava toupareve, ira tapo ita uvuiparoi ra Pautoa-ia rorupareve vo rara rera apota piereve. Eake iava? Uvare oisi voea riro kotokoto guru irara akukuvira rutu kopii ragaaverea rara, oiso rutu osa isiso kokookoro oara kopiipapeira. <sup>11</sup>◊ Taraipavio vosa ravireo kaeparo viroveira, oire ra kasiraoparo rutu. Oa-ia isiso kouro erakopapeira rutu. Ra vo kou kokookoaro kovepe. Oire ra voava oritoara vuripe. Eisi raga ita osa ro riro kotokoto guruto ira rataa pievira kopii ovoirovere vo osa touvira kovopareve orekerovu gurupaoro ora rerapa.

#### *Vo Toupai Varao Iava Orekerovu Oara Oiratoa-ia Kokarape*

<sup>12</sup> Ari ro oirato ira goruvira rutu tore iraoparo tavaka vo siraoaro kaepaoro vokiara rutu-ia, ira uvuiparoi ra rorupareve, vo rara varava ora keevoisiparo. Irapa Pauto Tootoo Ovoi vaterevere oiso rutu osa rera vo voriaro, vao Pauto ovoria iava reo ovoi purareva vo vori vatesa oirarapa voeo oea ora voea iava sopaura oaiive vatepaive rerapa. <sup>13</sup>◊ Vosa orekevu iravu sita pieve rera rata pieoro, oire voava rera ivuve ra vuria purareve. Uva viapau uvuiparoi ra oiso puraro, “Pauto ragai ivurevoi vao vuria purasa.” Viapau. Uvare vuria viapau uvuipai ra Pauto ivuve. Ora Pauto viapau oiso oirato ivupareveira vuri vovouro purapasa. <sup>14</sup> Ari ita, vigei iava katakataivira sopaura toupaiveira oura ora sitapapeira ra vigei ivupaise. Va raga vao vuri ruipa vigei vaaro oa raga vigei aroviakupaiseira vigei-ia kokarapaoro. Oa iava vigei ivupaiseira vuri vovouro purapasa. <sup>15</sup>◊ Uva vo pitupitu-a vao oa-ia sopaura ora sitapapeira. Oire voava vuri vovou kova pieve, ra oisi raga ora rigapaoro kae piro va ragava vuri vovou. Vo vovou vao vuria kakaearo. Ra voava utupavira rirovira rutu karekepe. Oa-ia oisoa kopiia purapave oiratoapa.

<sup>16</sup> Araoko irara oaa rutu. Teapi vao kokarapa pitupitu eaka ragapata oa visii keakeapaiseira. <sup>17</sup>◊ Vo pitupituro rutu varao vearovara vate ragapa pitupituro ora varao vatevateara vigei tauvapara, oara rutu vuvuiua iava uriopapeira vova Pauto ruvara-ia ro ira aviaviara rutu purareva, varao oara roropaoro vuvuiua-ia toupaiveira. Ari ita, ovuutarovu-ia viapau vaeavira roropaiveira vo rara rukuta vara utopaeve. Ari Pauto viapau oisi eisi toupareveira, ae iava uvare viapau oavu avu vai epao oa uvuipai Pauto vaaro vearo vovou utopasa. <sup>18</sup>◊ Viapau. Ari eera ora rera raga vo ruipaoro sirova utuparoveira. Oa-ia vigei Aitearo puraparo viroveira vao iava vo rara rera vaaro Oiraopa Reo rutu oirao piepape. Uvare rera-a ro ira vigei karekereva ae sirova Oiraopa Reo rutu rera vaaro vaore, ra oiso toupape, Avaio kakaero orekerovu rutupa ira pievira varao oara purareva Pauto.

#### *Uvuipatai Ra Reo Uvu Iraopata Vara Sirova Utu Iraopaoro*

<sup>19</sup>◊ Araoko irara oaa rutu, va-ia tarai iraota ra visii rutu vatatopopata ikauvira reo uvusa. Ari ita, ra viapau oiso vagevagepavira reo purapata. Ora viapau oiso ra ikaupavira kasipupata. <sup>20</sup> Eake iava? Uvare kasipu vovou-a oirato vaaro oa viapau oiso torevoko vovou vai kareke piepaiseira Pauto oaiaro. <sup>21</sup> Osa-a eisi osa iava vao vuivuipa vovou ora vao vuri pitupitu rirovira rutu karekapeira. Evara ovovouroa veri rovopata. Ra tapo ora visii vo rugorugooaro eaka pie rovota, ra vo reo outa oa tovoreva Pauto vo visii sopapro-ia. Evo reo oa iavirava uvuipatai ra vorevira voreta oriruvira rutu toupasa vo Pauto ruvara-ia.

<sup>22</sup>◊ Ari ita, vo osa oisi vo reo sirova utu iraota oisi va purasa. Viapau uvuipatai ra va uvu ragapata. Viapau. Vosa va uvu ragapata, uva oisi-a eisi osa iava uvuipatai ra visii

---

◊ 1:10: 1 Ko 7:31; 1 Pi 1:24   ◊ 1:11: Ais 40:6-8; Sam 102:4, 11   ◊ 1:13: 1 Ko 10:11-13   ◊ 1:15: Sam 7:11-17;  
Ro 6:21   ◊ 1:17: Jo 3:27; Mal 3:6   ◊ 1:18: Jo 1:13; Ef 1:12; Re 14:4   ◊ 1:19: Pro 5:1, 2, 10:19, 16:32   ◊ 1:22:  
Mt 7:21-29; 1 Jo 3:7

raga ora keakea ragapata. <sup>23</sup> Vosa irai Pauto vo reoaro uvupareve vo osa viapau va sirova utuparo, ira-a eera oiso rutu toupare, ira ora rera iava puaua raga vuraparevoi sisiro-ia. <sup>24</sup> Vo osa ora rera iava puaua vura rovoreve, ra voava ikauvira avaro vo puare ovausa. Ra oiso aueparo, Apeisi ragavira puavira toupaaveira? <sup>25</sup> Ari ita, Pauto vaaro reo goru oiraopa oa vigei ariarava vuri vovou vo tuukearo karupaiveira. Oa torevokopai rutu vosa irai vearovira rutu va vituaro vao reo goru kekereve, ra va iava va sirova uturo. Uva vosa viapau vo reo uvu ragapareve ra ikauvira akukuvira raga vo reore ovauparo, oire uva rera-a eera ira uvuiparoi rorupareve Pauto vaaro-ia viraakoa.

<sup>26</sup> ♫ Ari vosa irai oiratoa vai oiso rugooparo, Ragai-a vearo to lotupato ragoa Pautoa-pa lotu iraoparaveira rutu, vo osa viapau oiso ora rera iava arevuoto vearovira tokipareve, oire uva rera-a eera ira kuuvuparoveira vo ora rera raga sopaaro-ia. Eva-a oa iava rera vaaro oirao piea ora lotua oiso rutu toupaiveira, Oavu avu raga. <sup>27</sup> ♫ Ari lotupato vo vovouaro-a sisigaruea rutu vo Pauto Aite osireitoaaro-ia vo rara vearo vovou purapareve oiso-ia, vo osa virakoi kakaero ora rare riako tauvapareve voea vo vavataaro kaepaoro.

## 2

*Uvuipavie Ra Oirara Rutupa Vaea Kaevira Raga Siraopavio*

<sup>1</sup> ♫ Araoko irara oaa, vigei reraaro Turaro Jisas Krais oirao pie iraopata ro ira kerariava toupareveira. Oa vituaro iava eva viapau uvuipatai ra ro raga vearovata ira rei vaisiva toupareve roviore isivapaoro akaipatoavi. <sup>2-3</sup> Easi pasi irai veartoia vai-ia kuvutoa vai oisoa ora kuvuparo ora riro voripara-ia ora oritooro. Ra va iava koatato visii okepaaro-ia lotupa kepaa vai. Ovusa apotatoa vai pasi oisoa vuritao-ia kuvupato kuvuparo, oire ra rera tapo ita koatato voare vo visii vo kepaaro-ia lotupa kepa. Uva pasi oisoa ro vaio raga vearovata ira veartoia-ia kuvupato oisoa ora kuvuparo. Oa vai iava oiso oisoa rera tavipata, “Vao-ia paupa pauu.” Uva pasi oiso ro apotato oisoa tavipata, “Vao-ia vii torepau,” eke “Vo pauu rakorako uru-ia vovio ragai kokotoaro ruvara-ia.” <sup>4</sup> Vosa oiso vo vovouro purapata, oire uva vo vovouro evara oara-ia araoko irara oavisii rovirieipataveira vo ora visii raga vo rugorugooroaro iava. Viapau vaea kaevira torevokovira voea rovirieipataveira. Ari oiso rutu piepataveira osa voeao oirara rovirieipa irara ora voea vo rugorooro raga vuriara sirova.

<sup>5</sup> ♫ Araoko irara oaa, visii uvu iraota! Voeao oea oiso apotavira toupaiveira oirara rutu osireiaro-ia voea vo rasio-ia, oea evoea reesireva Pauto oiso puraoro, “Ragai ovii iraraaro. Visii tauvapaavere oiso ra goruvira oirao pie vovouro oavisii purapata ragai-ia. Ora vao tapo osa vo koatataverea ragai vo Saraaro-ia toupasa.” Vo uvare voari tuariri Pauto reo ovoi purareva voeaore oisi eisi piesa voeaopa oea rerapa siraopaaave. <sup>6</sup> Ari visii voeavi voeao apota irara arii piepataveira. Taraipatai ita voeao-ia riro moni irara oea visii vara piepaiveira rutu visiipa tavaka vo siraoaro vatepaoro. Oea raga ita evoea oea visii iava gasipaiveira kortuara iare tavaara. <sup>7</sup> Uva Pauto vearo vaisi tovoreva visii-ia vao-ia vo vaisio-ia oiso, Krais voeao. Oa-a eva oa iava vo vaisiva visii tovipaiveira voea evoea riro moni irara.

<sup>8</sup> ♫ Oire uva torevokopai rutu visiipa vosa rovopa rutu reo goru sirova ututa vao oa Tugoropa Vuku-ia toupaiveira oiso purapaoro, ‘Vosa ora viipa siraopauveira, osa raga ita eisi osa uvuipaei ra roviopa siraopau ira vii ruvara-iavi toupareve.’ <sup>9</sup> Ari vosa oearovu raga vearovpaoro oearovivure isivapata, uva va-a eva oa-ia vuria purapataveira. Oa iava vao Pauto vaaro reo goru visii sopaaro togapaivoi. Osa iava va sovo iraopatavoi rutu, Visii vao-ia riro reo goruro-ia gasi irara. <sup>10</sup> ♫ Vosa irai vearovira rutu Reo Taisi rutu sirova utupaoro oavivu-ia reo goru gasireve, oa-a eva oa-ia Reo Taisi rutu-ia gasipareveira.

<sup>11</sup> ♫ Vigei taraipavioveira oiso, Pauto oiso puraroepa, ‘Opeita vii vaaro ora oua puteri.’ Uva rera raga ita oiso tapo puraroepa, ‘Opeita oirato upooro rera kopii pieri.’ Oire vosa viapau ora oua puteri ra ita oirato upooro rera kopii pieri, oa ita-a eva oa-ia Reo Taisi-ia gasirivoi. <sup>12</sup> Vare vao-ia rugoo iraopata, uvare Pauto visii rovirieirevereia vao

❖ 1:26: Sam 34:13 ❖ 1:27: 1 Jo 2:15-17 ❖ 2:1: Ap 10:34-35; Ro 10:9-13 ❖ 2:5: 1 Ko 1:26-31 ❖ 2:8: Lev 19:18 ❖ 2:10: Ga 3:10-12 ❖ 2:11: Eks 20:13-14; Diu 5:17-18

reo goru sirova utuoro, oreoa vao oiso toupaiveira vigei tauvapasa, oiso ra vearovira toupape. <sup>13</sup> Vosa oiraopavira rutu irai viapau iravipa siraoparo oiratoa vai, irai ita-a eera vo vovouaro rovirieireverea Pauto. Eisi osa iava viapau gare visivi rerapa siraoroverea Pauto. Ari vosa ro ira iravivupa siraoparo, ira ita-a eera Pauto irapa siraoroverea.

*Oirao Piea Vao Oa Viapau Vearo Kovo Vaiva Toupaive Oa Kopii Ovoipereia*

<sup>14</sup> ♦ Araoko irara oaa. Vosa irai oiratoa vai oiso puraro, “Ragai Krais oirao piepaavoi,” vo osa viapau vearo kovo purapareve rutu, oire va iava rera vaaro oirao piea akukupapa raga purave. E pasi eisi vo oirao pie vai iava Pauto uvuiparoi ra rera vai vorereve ora rera iare? Easi viapau. <sup>15</sup> Easi pasi oearoi araoko irara oavi ora taataa riako oavi oea vai-ia vuriara vaiva varoara toupaivoi. Ora auepa tapo viapau voeapa aioara vai. <sup>16</sup> Easi pasi irai epao visii vuutaaro iava ira vai-a uvuiparoi ra oiso voea tavireve, “Pauto visii tauvareve ra avata varoara vai-ia tuusa. Oire ra va iava aiooro kovuara oavisii vuku pieta.” Ari ita, vo osa oisi eisi pura ragaparo osa viapau oiso voeapa oarai varoara vai vatepare ora aioara vai voea iava varaura tauvapaoro. Ra apeisi ragavira vo reo eva voea tauvave? <sup>17</sup> Oire uva aue oirao piea oisi raga ita eisi toupaivoi. Vosa oisi tou ragapaive, ra viapau vearo kovo vai karekepaise. Ra oisi raga ita akukupapavira toupaive vao oirao piea oa kopiepa.

<sup>18</sup> ♦ Uva iravu oiso puraparoveira, “Iravu uvuiparoi ra oirao pie vovou rutu purapareve, vo ovusa iravu vearo kovo purapareve.” Oa iava ragai oiso puraparai rerare, “Oire ragai kareke pieri vii vo oirao piearo iava vao oa viapau vearoa vaiva tapo karekepapeira.” Uva vearo kovo-a vao purapaavoi vaore, oiso ra vii kareke piea ragai vo oirao piearo iava. <sup>19</sup> E oiso oirao piepariveira, Kataitoa raga Pauto touparevoi? Uva oisi vearovai. Uva ita, vuri irara tapo uraura irara tugara oisi eisi oirao piepaiveira rirovira rutu rikerikepaoro uriria iava. <sup>20</sup> Vii-a kokoropatoa rutu! Ari ita, vosa oisi oirao pie ragapari vo osa viapau vearo kovo vai tapo purapari, oire ra va iava vii vaaro oirao pie vovou akukupapavira ita oisi toupaive. Easi pasi va vai vao vituaro iava tarai ruipapauaei, raa?

<sup>21</sup> ♦ Voari tuariri rutu uva vigei aaotoaaro Ebraham oviito Aisak tovoreva eravao-ia, oiso ra rera vatereve Pautoa-pa oiso osa tauoa vo Pauto vo ruipaaro sirova utupaoro. Oire uva vo vokia-a eva oa-ia Pauto rera vo vovouaro kekereva. Oa iava oiso rera vaisireva, Torevokoto oirato. <sup>22</sup> Taraipatai eera vaaro-ia oirao pie vovou ora vearo pitupitu tapo oarea oisoa kovopaise. Oa iava rera vaaro oirao pie vovou oisoa uvui piepaive rutu Pauto osireiaro-ia oisi iava. <sup>23</sup> ♦ Voari tuariri rutu Tugoropa Vuku-ia oiso puraroepa Moses, ‘Ebraham oisoa Pauto oirao piepareve.’ Oa vituaro iava oiso puraroepa Pauto, ‘Torevoko vovou rutu vii vaaro Ebraham.’ Eva-a oa iava Ebraham oisoa oiso rutu toupareve, Pauto vatetooaro. <sup>24</sup> Oire uva vo vokio va-ia taraitai auepa vao akukupapa oirao pie raga, viapau oiso va iava uvuiparoi ra iraire oiso puraro, “Torevokoto vii.” Viapau. Ari rore rugooparoi ira vearo kovo rutu purapareveira aue-ia oirao piea. Oa-a eva oa iava oiso rera vaisirevere, “Torevokotoa rutu vii oirato.”

<sup>25</sup> Oiso raga ita osa o otopava Rehap iria voeao tokieva Josua oea arureva. Uva voa-a evoa uvava oraivavu raga-ia voea vorevira kare pieeva voea virivarioro keripa irara asavira. Oa iava Pauto oirare Rehap oiso puraroepa, “Torevokova.”

<sup>26</sup> Vigei taraipavio oiso, Varaua-ia viapau urauratoa vai oua kopii ovoiepa rutu. Osa raga ita oiso, vosa ro ira oirao pie ragapareve vo osa viapau vearo kovo vai tapo karekepareve, oire uva oisi-a eisi osa iava rera vo oirao piearo-a eva oisi eisi toupai oiso, Kopiepa.

3

*Uvui Iraopavie Ra Ora Vigei Iava Arevuoara Vearovira Rutu Tokipape*

<sup>1</sup> Araoko irara oaa. Teapi riro irara vai visii iava ora tisa vaisi piepaave. Taraipavie oiso uvare utupaua Pauto goruvira rutu kovoreverea vigei tisa irara rovirieipaoro, vo osa garevira kovoreverea oearovu oirao pie vovou irara rovirieipaoro. <sup>2</sup> Vigei rutu rirovira ora piro piepavioveira vuriara purapaoro. Ari ro ira uvuiparo ra ora rera iava gisipo

◊ 2:14: Ef 2:8-10; Mt 7:26 ◊ 2:18: Je 3:13 ◊ 2:21: Jen 22:1-14 ◊ 2:23: Jen 15:6; Ro 4:3; Ais 41:8

eaka piepareve vuri reoro pura arapa, ira ita-a eera uvuiparoi ra ora rera iava varaua rutu vearovira airereipareve vuri pitupituro purapa arapa. <sup>3</sup> ♦ Vigei hos gisipoaro tuukepapeira aue-ia ain, auere ra vigei raga vo ruipaaro sirova utuparo vokapaoro. Oa iava rera iava varaua porepapeira vo oraivavu iare. <sup>4</sup> Ora auere tapo selpa uvuo rugoopata oavu eva riroa rutu. Vosa riroto kiuvu va peopareve ovusa avapape avakava-ia, oire uva va iava stia gareavi rutu. Ari ita, vosa kepten uvavure ava vovouparo, ra va iava vo uvuo porepaoro avaro. <sup>5</sup> Eisi raga ita osa arevuoto garetoavi raga varaua iava. Ari ira uvuiparoi ra oaravu rutu karekepareve reoreopaoro.

E taraipataveira aue-ia tuituia oa uvuipai ra riro kasi rutu poko pieve vegoa-ia? Oire ra va iava evaoara rutu rovape. <sup>6</sup> ♦ Arevuota tapo osa toupare oiso osa tuituia, ira varaua rutu vuruvuruar-ia toupareveira. Uva voava ovovourovu rutu vuriara kosikosi piepareveira. Oa iava vara-ia evara orekerovu rutu varaua rutu vuivui piepareveira. Uva eisi osa varaua vo ruipaaro kosi piepareveira oiso rutu osa riro kasirao kasi rutu eto kasi. Opesi tapi rutu vituaro okasia vao kasipaiseira eto kasi. <sup>7</sup> Oirara okarerovu rutu varuere kare oupaiseira vavarai kare oiso, kokio kare, ora rakoru kare, ora oaravu rutu avakava sovara-ia touara. Oa iava vo karepa reipaaveira voea raguipaoro. Osa raga ita eisi uvuipai oirara oisi eisi piepaisevoe vokio. <sup>8</sup> ♦ Ari ita, uva viapau irai oiratoa vai uvuiparoi ra arevuotoapa reiparo, oiso ra oisi rera reroarovi toupareve. Viapau rutu. Uvare vokiara rutu-ia arevuoto to reparoveira vuri reoro rutu purapasa. Ro ira-ia vuri raviraviro toupaiseira kavokavo oirara kopii piepasa. <sup>9</sup> Ro-ia arevuoto ira iava Turaroria vuurapa vaisi purapapeira ora Pauto vigei Aitearo. Ira raga ita ro arevuoto ira iava oearovivu vurivira takapapeira oirara voeao oea purareva Pauto oisi raga ita oiso osa rera. <sup>10</sup> Vao Pauto vaisiaro kae piepa reo ora vao takau reo oreorea rutu kataiva raga iava gisipo kosipa piroveira. Araoko irara oaa. Teapi vigei tapo oisi eisi opitupituroi purapape oiso. <sup>11</sup> Viapau uvuipai ra oai tuputupue riku vai vearoa vai uukoa vai kareke piepaise ora avakava tapo ita. <sup>12</sup> ♦ Araoko irara oaa. E pasi fik ova uvuipai ra oliv kue vai kareke pieeve, raa? Ora pasi wain ova vai uvuipai ra fik kue vai kareke pieive? Eisi raga ita osa avakava viapau uvuipaoi ra vearoa vai uukoa vai kareke piepaeve.

### *Vao Vearo Tarai Oa Pauto Iava Uriopapeira*

<sup>13</sup> ♦ Easi pasi iraiei visii iava ira-ia vearo rugorugoo vaiei ora taraiia vai, raa? Vosa irai oisito oiso, oire ra ora rera vo touaro oirao pievira rutu kareke piepareve rera vaario-ia vearo kovo. Oire ra oisi iava va-ia vearo rugorugoo oaro oearovupa oirara kareke piepareve. <sup>14</sup> Easi visii vai pasi oearovivure vuri vovoupataveira oiso vo vovouro-ia, ora visii raga vaisiaro kae piepa vovou, ora oearovivu tovipa vovou, ari iirukopa vovoua vao-ia. Oire vosa oiso vo vovouro purapata, ra opeita ora visii vo tarairoaro-ia rorupaoro oiraopa reoro rutu reroaropata kuuvu reoro raga purapaoro vara-ia. <sup>15</sup> ♦ Otaraia eva viapau oiso vuvuiua iava varaepla. Viapau. Ari rasito raga iava va-a, varaua raga vo ruipaaro. Oa iava Seten-a vara rutu aitearo. <sup>16</sup> Oire vosa oearoi oearoira oirara vai vuri vovoupaave, ora vosa ora voea raga oiso vo pitupituroaro purapaise vare vao ora voea raga-ia vaisiaro kae piepasa, osa voearo eisi viapau oiso vearovira paupaaveira. Vo uvare ovovourovu rutu vuriara purapaiseira. <sup>17</sup> ♦ Ari oirara uvuipai ra otarairovu raga oupaise varao oara vova uriopapeira Pauto. Varao oara iava uvuipai ra oiso vo vovouro purapaise, rovopa vao-ia vo rara roroio vovou rutu sirova utupaave. Ari eraopa vao-ia vo rara oearovivu tapo gavaurevira toupaise vo rara voeavi kavepaise rutu. Ora vo rara oearovu vo reoroaro tapo uvupaise vara arovipaoro. Ora vo rara oearovu kavikopaise vearo kovo purapaoro. Oire uva oisi-a eisi osa iava uvuipai ra vearo kovo raga vaeavira rutu katai rugoo-ia purapaise oirara rutu-ia. Osa iava viapau uvuipai ra oiso toupaise, Kuuvu oirao pie vovou irara. <sup>18</sup> Ari ita, vosa kave vovou raga-ia toupape, oa-a eva uvuipai oiso toupae, Aio kokookoro pauparivoi. Oire ra va-ia vao kave vovou torevoko vovou rutu karekepe oiso, Vearoa rutu kuea.

---

♦ 3:3: Sam 32:9-11   ♦ 3:6: Pro 12:17-18   ♦ 3:8: Sam 140:1-3; Mt 15:10-20   ♦ 3:12: Mt 7:16   ♦ 3:13: Ga 6:4; Je 2:18   ♦ 3:15: Je 1:17; 1 Ti 4:1   ♦ 3:17: 1 Ko 2:6; Ro 12:9; 1 Pi 1:22

## 4

*Ro Oirato Ira Rasito Vo Vovouaropa Ruipaparo Ira Ita-a Eera Ira Pautoa-va Ora Keriparoveira*

<sup>1</sup> ✩ Eake rutu-a oreorovu ora kaureopa reoro vituaro, ora oreorovu kasipuara varao oara visii vuutaaro-ia toupaiveira, raa? Vo uvare riiriipa vovouro visii-ia toupaiveira. Oa iava visii iava sopaura-ia ora upopapeira, oiso ra ovovourou varaua raga vo ruipaparo sirova utupape. <sup>2</sup> Orekerovu rutupa ruipapataveira, ra viapau oiso vara oupata. Uva va-a eva oa iava oira upo vovoupataveira. Visii vao-ia riro orekerovu riirii irara, oa iava viapau oiso vara oupataveira. Osa iava kasipu iraopaoro upoara kosi piepataveira. Vao iava uvare viapau oiso Pautoa iare variripataveira vo orekerovu oupasa. Uva va-a eva oa iava viapau oarai oupataveira. <sup>3</sup> Variripataveira orekerovu oupasa. Uva viapau oiso vara oupataveira. Eake iava? Uvare viapau torevoko rugooro-a visii vararo oara iava Pautoa iare variripataveira. Ora vo osa ora visii vo ruipaparo raga-ia rugorugoopaoro orekerovure arepataveira variripaoro Pautoa iare. <sup>4</sup> ✩ Visii vao visiigoa oiso rutu toupataveira osa voeao oea ora oua vuri piepaiveira. Vosa ro ira vo rasio vo vovouaropa ruipaparo, eera-a ira Pautoa-va ora keriparoveira. Easi pasi viapau vao-ia taraipataveira, raa? Oire vosa irouto vo rasiova ora vate vovouparo, eera-a ira karekerovere, Pautoa-va keripato. <sup>5</sup> ✩ Tugoropa Vuku oiso purapapeira, ‘Ro-ia Uaurato Pauto ira tovoreva vigei sopaaro-ia ira vigei kasivarivira rutu tokipareveira vaopa oiso, teapi Pautoa-re ovauvio.’ Esa pasi vo reo vaiore oiso rugoopatai, Akuku reo raga-a, raa?

<sup>6</sup> ✩ Ari Pauto riroa rutu siraoa vate iraopareveira vigeipa. Oa iava Tugoropa Vuku oiso purapapeira,  
‘Pauto voea riro kaureo irara uvu ragapareveira, voeao ragapa rirovira rutu sirao iraopaoro oea ora voea iava vaisiaro oaiive gare piepaiveira.’

<sup>7</sup> ✩ Avoeao! Ora visii iava vasepata Pautoa-pa vo osa ora visii iava sopaura vatepata rerapa. Ra Seten-pa tapo ora vairu iraopata, ra oisi iava visii arova toripareve. <sup>8</sup> Oa iava Pautoa iare tutuu piepata rutu. Osa iava uvuiparoi ra visii iare tutuu piepareve. Visii vuri vovou irara visiigoa iava sopaura oavisii sisigaruepe oiso rutu osa ro ira ora rera iava vavaea sisureve. Oire ra va iava rera iava sisigaruepa vo vavae. Visii vao visiigoa-ia vo rugorugooreiva toupataveira. Visiigoa ora visii iava vo rugorugoo eva vuria ora visii sopaaro iava vera iraota. <sup>9</sup> Visiigoa ora visiipa sirao iraota ora tapo gau iraota rirovira rutu. Agesi vovou tavariooro vorevira gau iraota. Ora uvui iraopatai ra rorupa vovouro oavisii tavariota, ra sirao vovou raga-ia toupata. <sup>10</sup> Ora visii raga oisivi ora gare piepata vo Turaro osireiaro-ia. Vosa oisi piepata oiso, oa iava Turaro uvuiparoi visii vaisiaro kae pierereverea.

*Vigei Viapau Uvuipavieie Ra Araokotoa Oavi Togapape Reoara-ia*

<sup>11</sup> ✩ Araoko irara oaa, viapau uvuipatai ra ora visii araoko iraraaro takauropa. Ro ira iravu araokoto takoapareve eke rera araokotoaaro togapareve oreorovu-ia, ira-a eera Pauto vaaro reo goru takoaparevoi ita vo osa va tekiparevoi reoara-ia. Oire vosa reo goru togapari, uva viapau oiso vii-a reo goru sirova utupato. Viapau. Ari vii oiso toupari, Reo goru rovirieipato. <sup>12</sup> ✩ Kataitoa raga Pauto toupare ira reo goru kareke piepareveira. Uva rera raga reo rovirieipavira toupareveira. Uvare rera raga Kataito ira uvuiparoi oirara rutu vorevira vorepareve, ora voea tapo oirara opesi piepareve. Uva oisi-a oiso osa iava, irouto-a vii viigoa iravivu togapari oreovu-ia ro ira vii ruvara-iavi tutuu pievira toupareve, raa?

*Viapau Uvuipavieie Ra Pautoa-re Kaureopavio*

<sup>13-14</sup> ✩ ✩ Visii oearovu visiigoa oiso purapataveira, “Vo vokio eke vokipavira uva avaviovere riro urui iare sara kovoro vai purasa katai iva rutu uvuiaro-ia. Oa iava uvuipavieie riroara vai moniara vai oupe.” Uva oiso visii tavipaavoi, Viapau oiso taraipataveira oiso, Eake karekeperere evoa vokipavira. Visii iava tootooara apeisi ragavira toupaiveira? Visii eva visiigoa oiso rutu toupataveira osa kupareto. Ro ira

---

✩ 4:1: Ro 7:15-25    ✩ 4:4: 1 Jo 2:15-17    ✩ 4:5: Jen 6:5; Nam 11:29    ✩ 4:6: Sam 138:6    ✩ 4:7: Mt 4:1-11  
 ✩ 4:11: Mt 7:1-5; 1 Pi 2:1    ✩ 4:12: Mt 10:28; Ro 14:4    ✩ 4:13-14: Pro 27:1    ✩ 4:13-14: Lu 12:16-21; Jop 7:7;  
 Sam 102:3

karekeparoveira, oire voava gare visivi toureve, ra va iava opesi ovoiro. <sup>15</sup> Ari torevokopai vosa oiso purata, “Vosa Turaro oisi ruiparo, osa iava uvuipavie i ra tootoovira toupape, ora vo kovo purapape, eke viapau okovou raga.” <sup>16</sup> Ari ita, visii raga riro gisipo iraopataveira rutu ora visii raga iava vaisiara oavisii kae piepaoro. Ovovouroa rutu-a varao-ia kaureo vovouro vuriari. <sup>17</sup> ♦ Vearovira rutu rugoo iraopata. Ro ira vearo vovou purasa taraiparo ra viapau vo vovou purareve, ira ita-a eera ira vuri vovou purarevoi.

## 5

*Ro Ira Riroara Rutu-ia Orekerovu Pitupare*

<sup>1</sup> ♦ Ragai-a vao vaviopavira visii rutu tavipaavoi oiso-ia, Visii riroara rutuva orekerovu rutu toupataveira. Visiigoa vo tavakaore rugorugoo iraopata oa karekesa auepai visii-ia. Oa iava uvui iraopatai ra gau iraopata oivepaoro rutu. <sup>2</sup> Kotokotoara ora oritoara varao visii varaaro oara rutu eruera, ora varoara tapo varao visii varaaro atarike kare oara rutu aio ovoivora. <sup>3</sup> ♦ Varao golara ora silvaara visii varaaro oara rutu vuri ovoiera. Ovuria eva oa visiipa vuri vovou puravere, ra oisi iava viaevira visii vo vuri vovouroaro karekepere. Uva visii vo ruiparoaro auepa moni oara raga visii kasipaivere oiso rutu osa eto kasi. Visii vao visiigoa riroara rutu orekerovu oisoa gurupata kotokotoara ora moni vo vuutao-ia ovoiopa voki iarepa. <sup>4</sup> Vearovira rutu uvu iraota voeao iava kovopa irara oea aio kovo aioaro eriva varuparo vo visii vo kovoaro-ia. Oire uva voeavi keatava vorevira voeae vo voriaro-ia pituoro ita. Vo vorio oa ora visii iare vorevira rukutava. Oa-a vao oare voeavi oisoa rirovira rutu visii are ragapaive. Uva vo area vao voea vaaro oa Pauto kokiaro-ia pou piropa ro ira oirara rutupa ora purapurapa irara ensel turaroparoveira. <sup>5</sup> ♦ Vokiara rutu-ia vo rasio-ia toupataveira vearopara rutu oupaoro. Oa iava vara-ia rorupaoro toupataveira. Ari ita, rirovira rutu aio iraopataveira, oa iava taoropataveira. Oire uva visii uposapa vokia-a eva oa pou piroi oa-ia visii koriivere oiso osa okarerovu koripaive. <sup>6</sup> Visiigoa torevokotoa eva gasitava rera uposa. Oa iava visii eaka ragareva. Viapau oiso visii tapo vorevira ora uporoepa.

*Uvuipavie i Ra Sopaura Oavi Goru Piepaoro Siraoa Karekepape Rerare Turaro Tuepaoro*

<sup>7</sup> ♦ Uva oisi-a oiso-ia araoko irara oaa visii vao oirao pie vovou irara osa ora visii iava sopaura oavisii goru piepaoro sirao vovouro rutu kaepata rerare Turaro tuepaoro, ovusa vorevira urioro. Ari ita, tarai iraopataveira ro-ia ira vaaro-a kovo, ira vearoparare aioara tueparoveira, auere ra aio purape. Uva ora rera iava oisoa sopaura goru piepareve auere tapo kokeva ora ravireo tuepaoro, oisore ra varei rutu uvuvirka kovovora, va iava taru aio ouro. <sup>8</sup> Oire uva visii tapo uvuipatai ra oisi ora visii iava sopaura oavisii goru piepata tavaka oupaoro. Uvare vao Turaro vo vuutaaro tutuuvoi rutu oa-ia vorerovere. Uva va-a eva oa iava sopaura oavisii uvuipai ra tuvuuvirka rutu toupaive raripaoro.

<sup>9</sup> ♦ Araoko irara oaa. Opeita oearovure araoko irara oavisire kasipupata, ora voeare tapo isivavira reopata. Teapi rovirieipato visiire va voriaro vorekuorevere vurivira ita. Uvu iraopatavoi. Rovirieipato rataoa riaaro-ia to reparoveira Pauto Ovoiopa Vokire tuevira toupaoro. <sup>10</sup> ♦ Araoko irara oaa, uvuipatai ra voeao profet irara rugoo iraopata oea tuariri Turaro vaisiario iava tavitavi rovoaepa. Keripa irara oeavia-ia vuria puraiva. Ari ita, uva oisoa ora voea iava sopaura rutu goru pie iraopaise vo tavaka eva vo siraoaro kaepaoro. Uva visii uvuipatai ita ra voea vo pitupituroaro sirova ovoovovira oisi rutu utu iraopata. <sup>11</sup> ♦ Uvuta! Vigei oiso purapavioveira, Ora voea iava vovouisiro oaiive rutu goru pieiva tavaka vo siraoaro kaesa. Oa-ia uvuipai ra rorupaive. Ari ita, Jop vo siposipoaro uvutava oa toupaiveira Tugoropa Vuku-ia. Vo uvare ora rera iava sopaura rutu goru pieira otavakarovu rutu vo siraoroaro kaesa. Uva va-a eva isivaaro iava Turaro vearo vovou rutu karekereva rera-ia. Oa-ia tapo vao-ia taraipavioveira. Iu, osa taraipavie ita, Turaro vigeipa rirovira rutu siraoparoveira vo rara vokiara rutu-ia vigei kavikopareve.

❖ 4:17: Lu 12:47; Jo 9:41 ❖ 5:1: Lu 16:19-31 ❖ 5:3: 1 Ti 6:6-11 ❖ 5:5: Amo 6:1; Jer 12:3, 25:34 ❖ 5:7:  
1 Ko 7:29-31; Diu 11:14 ❖ 5:9: Je 4:11-12 ❖ 5:10: Mt 5:12 ❖ 5:11: Jop 1:21-22, 42:10; Nam 14:18

*Viapau Uvuipaviei Ra Oiraopa Reo Rutu Purapape Viara Iare*

<sup>12</sup> ♦ Ari ita, araoko irara oaa, rovopa rutu-a vao-ia oa-ia uvuipatai ra va purapata. Oa oiso toupai, Opeita vuvuiua vaisipata, eke eake rasito, eke orekerovu vo osa oiraopa reo ovoi rutu purapata viara iare. Ari vosa oiso purapata, “Iu” vo oreovu-ia vearo reo, oire oiso purata “Iu” raga. Eisi osa uvuie. Ari vosa oiso purata, “Viapau,” oire “Viapau ita” osa ovoiei eisi. Teapi oisi iava eisi Pauto visiipa vuria vo voriaro vore pierevere.

*Ro Torevokoto Vo Variriaro Oa-ia Gorua Touparoi*

<sup>13</sup> ♦ E irai vai visii iava araokoto oavisii tavaka vo siraoaro vai kaeparevoi, eke? Oire uva uvui iraoparoi ra Pautoa iare variriro. Easi pasi irai vai araokoto oavisii iava sopaua vai rorupaivoi. Oire uva uvuiparoi ra erava vai-ia eraro Pauto vaisiaro kae pieoro. <sup>14</sup> ♦ Irai pasi visii iava araokoto oavisii ira upiaprooi vai pasi, raa? Uva uvuiparoi ra lotupa irarapa reipa irarare tuvetuvepa irara keeraro. Ra va iava rera iava varaua-ia korovo ovi tovoive Turaro vaisiaro-ia variria puraoro. <sup>15</sup> Vosa Pauto oirao pie rovopaoro rerare variriave, oire ra Pauto rera upiapato vorevira porete piereve. Oa iava vorevira ora vearoro ita. Ora vosa vuri vovouara vai pura rovorefura, oara-ia uvuiparoi Turaro ra vara rutu verareve.

<sup>16</sup> ♦ Uva oisi-a eisi osa iava uvuipatai ra ora visii iava vuriara oavisii kosi pie iraopata oearovupa araoko irara oavisii. Oa iava uvuipatai ra Pauto iare variri iraopata, ra voea araoko irara oavisii tauvapareve. Oa iava Pauto uvuiparoi ra visii vorevira porete piepareve. Vo varirio torevokoto oirato vaaro oa-ia gorua toupaiveira. Oa uvui iraopai ra oiratoapa tauva ouve Pauto ruvara-ia. <sup>17</sup> Ilaija oiso raga-a rera osa vigei. Ira Pauto iare goruvira rutu variriroepa auere kokeva, oiso ra viapau koveo. Oa iava kokeva viapau koveopa vo rasitoa-ia vo peva rutu uvuiaro-ia ae iva peva ora katai vatara ae kekira. <sup>18</sup> ♦ Uva vorevira variriroiva, vuvuiua kokeva ita vara pieeva. Oa iava aioara vorevira poreteepa vo rasitoa-ia.

*Ro Ira Raiva Kavureve Ira Uvuipai Ra Rera Vorevira Vorepe*

<sup>19</sup> ♦ Araoko irara oaa, vosa irai visii iava Oiraopa Reo rutu vo pitupituaro kavureve, oa iava irai vorevira rera vorereve. <sup>20</sup> ♦ Oire ra rera-ia eera oiso ragavira taraipatai, Vosa vuri vovoutoa vai tauvarevora, vuri raiva kavuoro vorevira vorero Pautoa iare, oire ra oisi iavirava rera-a eera rera iava sopaua oureve, osa iava viapau uvuipai ra opesi ovoipe opesipa tapi. Uva vo pitupitu-a eva oa iavirava Pauto uvuiparoi ra rera iava riroara rutu vuriara verapareve.

Evavi raga osa vo pasio purapaavoi.  
Ragai-a vao, Jems.

---

♦ 5:12: Mt 5:34-37   ♦ 5:13: Sam 50:15   ♦ 5:14: Mk 6:13   ♦ 5:16: Mt 3:6; 1 Pi 2:24; Jo 9:31   ♦ 5:18: 1 Kin 18:1, 42, 45   ♦ 5:19: Mt 18:15   ♦ 5:20: Pro 11:30-31; Ro 11:14; 1 Pi 4:8

## 1 PITA

### Irapa Reoro Vo Vukuo Iava

Pita vo pasio rigatoreva 62 o 64 yia Jisas vo kavauaro isivaaro iava. Uva voeaopa rigatoreva oea voraro oisoa toupaive Rom gavman vo tokiaro sovara-ia. Oire oa iava Pita vo vaisio-ia Rom urui vaisireva ovoovovira oiso, Babilon urui.

Uva reoreoroepa Pita vo pasio-ia vao iava uvare oisoa voea upopaise voea vuri piepaoro vo teki-ia. Uva oiso puraroepa, Vearopai vosa visii vuri piepaive visii-ia vuri vavataaro tovopaoro. Vearopai ra vara kaepata.

Oreorovu tapo purareva riro goru reoro oreoroa toupai Papara 3. Uva tarai irara viapau taraipaai evo reoro vituaro-ia (1 Pi 3:18-21).

Pita vo touoro Rom-ia vao rigatoreva vo osa oisoa Rom reraaro rovopato Niro voea vuri piepareve. Uva tutuupaiva oiso ra Pita kopiro. Oa iava vao rigatoreva vo osa Niro rera uposa aueparoepa.

1. Aviavi pie reoro vo pasio iava, 1:1-2.
2. Oirao pie vovou irara uvui iraopaaai ra airerei vovouvira toupaive vearopa viraakoro oupaoro Pauto ruvara-ia, 1:3-2:10.
3. Oirao pie vovouto vo pitupituroaro oara-ia uvui iraopa ra Pauto roru piepareve, 2:11-4:11.
4. Pauto rera orirureve ro ira tuuvu vovouvira toupare vuri pitupituro purapa arapa, 4:12-5:11.
5. Ovoviopa reoro varao, 5:12-14.

<sup>1</sup> ◊ Ragai-a vao Pita Jisas Krais reraaro aposelto. Ragoa vo pasio rigatoavoi visii rutupa visiigoa roporeva Pauto ora rera iare. Visiigoa voraro rutu sikasikavira toupataveira vo distrikro-ia voraro oiso-ia, Pontas-ia vo, ora Galesia-ia vo, ari Kapadosia-ia, ora Esia-ia, ora Bitinia-ia. Uvaroare gaurutaepa visii voaaro rutu kavuoro. <sup>2</sup> ◊ Pauto Aite visiigoa roporeva ora rera vo vovouaro sirova utuoro, oiso ra oisi eisi toute oiso, Rera voeaaro rutu ro iavirava Tugoropato Uraurato. Osa iava uvuipatai ra Jisas Krais vo reoaro uvupaoro va purapata. Eisi osa iava Jisas Krais iava revasiva uvuipaoi ra visii iava sopaura sisigarue preeve rutu. Uva ragai-a vao variriparai Pautoa iare, oisore ra visii rirovira rutu vatereve vereopa vovou ora gavaure vovou visii tauvapaoro.

#### *Vearo Rutu Tootooa Oa Vigeire Tuepapeira Vuvuiua-ia*

<sup>3</sup> ◊ Vigei rutu vuurapa vaisi purape Pautoa-ia ro vigei reraaro Turaro Jisas Krais Aitearo. Osa iava rirovira rutu vigeipa siraoro Airepa Tootoo vatereva. Otootooa eva vituaro vo goruo oa-ia Jisas Krais vorevira tore pierava kopii tapi iava. Osa iava ita eisi uvuipavieie ra vigei tapo oisi tootoopaoro rutu tuevira raripavio vore utupaua. <sup>4</sup> ◊ Vo uva vearopara ouperea taru Pauto ruvara-ia varao viraakoara oara orirupareveira Pauto voeapa oea rera vo reoaro-ia pitupaive. Oara-a evara vuvuiua sovara-ia viapau uvuipai ra erupape, ora vuripape, ora voa opesipape. <sup>5</sup> Uva toupaiveira visiipa ovusa Pauto visiiva vurapaoro visii virivaripareveira, vo osa rera vo goruaro-ia raripataveira. Osa iava utupaua Ovoiopa Vuuta-ia viaevira rutu visii oureverea ora rera iare.

<sup>6</sup> ◊ Oare eva rugoo iraopaoro roru iraopata. Uvare taraiptatai vai pasi oiso, Rovovira vai pasi oiso oaravu tavakaara ou rovota. Osa-a eisi osa siraoa vo vavataaro kae rovotaverea.

<sup>7</sup> Ari ita, otavakaroa evara oiso toupaiveira, Visii vararo rari vovouro akeakepara vaore, oiso ra oiraopavira rutu karekepape. Uva gol-ia taraiptateveira oa opesipapeira. Uva vosa va kasipaive tuitui kasi-ia, ra oisi iava rogetara uvuipai ra va iava opesipape vao gol. Ra gol viratoaro raga roroioaro toupaive. Osa-a eisi osa ragavira visii vararo oirao pie vovouro goruvira toupaiveira. Vo uvare evo tavakaro visii vo vovouroaro oirao pie vovouro goru pie rovoverea. Ovovourao evara oirao pie vovouro vo voriaro gol vo voriaro-ia pute iraopaiveira rutu. Uvare vo vokia eva Jisas Krais ora karekeroverea visii vaisiaro kae piesa visii vo vovouroaro oirao pie vovouro kekeoro. Ora visii vatereverea

◊ 1:1: Ap 2:5, 9    ◊ 1:2: Hi 9:11-22    ◊ 1:3: 1 Ko 15:20    ◊ 1:4: Kl 3:24    ◊ 1:6: Ro 5:2; Jo 16:1-11; Je 1:2

keraria ora rei vaisi. <sup>8</sup>◊ Oiraopavira, uvare rerapa siraopataveira ro ira viapau oiso kekepata. Uva viapau rera kekepaoro rera oirao piepatavoi vo vokio. Osa iava uvuipatai ra roru iraopata va-ia vao riroa rutu rorua. Uva viapau uvuipatai ra ora visii sopapro iava va kosi piepaoro va iava roroiovira tavitavipata, uvare riroa rutu-a. <sup>9</sup>◊ Ororua vituaro oiso toupaiveira, uvare Pauto visii iava sopaura virivaripareveira rutu, vo rara visii varaaro oirao pie vovouro Jisas Krais-ia eveipareve.

<sup>10</sup>◊ Oiraopavira rutu, uvare va-a eva oa vituarore oisoa kasivarivira taraapaive profet irara. Oa-a eva isivaaro iava va iava reo ravaa puraiva oiso puraoro, “Vo vatevateao Pauto oa visiipa vaterevere.” <sup>11</sup>◊ Osa eisi taraapaoro rirovira rutu oisoa akeakepaive oiso purapaoro, “Aa vo vuuta rutu-a vao oa-ia uvuipai ra karekepe?” Ora, “Uva apeisi ragavira va purarevere Pauto?” Uva oisi-a eisi osa rirovira rutu oisoa piepaive. Uva vo vuutaore utupa rugorugoopaaepa, ovusa Krais reraaro Uaurato voea sopapro-ia toupareva. Uva va iava voea tavitavireva oiso, “Ovuuta-a eva utupa oa-ia Krais riro tavakaro ourevere. Oire ra va isivaaro iava Pauto rera vatereve keraria vorevira rera kae pieoro.” <sup>12</sup>◊ Uva Pauto profet irara tavioro oiso puraroepa, “Viapau oiso ora visii tauvasa vao-ia reo ravaa ora vatepatai. Viapau. Ari voeaopa va-a utupaua.” Uva ita visii raga-a ita voea evoea. Uva oiraopavira rutu ita oiso profet irara vo reoroaro uvupataveira voeao ruvara-ia oea Vearo Siposipo iava tavitavipaoro vara iava siposipopaveira, vo rara vo reoro evara kosi piepaive Tugoropato Uaurato vo goruaro iavirava, ro ira Pauto saporeva vuvuiua iava. Ari ita, vo tarai-ia oa oupataveira oiraopa reo rutu vaaro otaraiapa purapurapa irara voeao ensel rirovira rutu ruipa ragapaaveira.

#### *Pauto Vigeire Keeraparoveira Oisore Ra Ora Airereipavio Vuria Pura Arapa*

<sup>13</sup>◊ Osa-a eisi osa uvui iraopatai ra ora visii vo rugorugooroaro ravaapaoro tuevira toupata. Viapau uvuipatai ra vovouisiro oavisii iava uusipata. Viapau. Ari kaiporivira rutu varare evara rugorugoo iraopata Pauto oara visiipa vaterevere vo osa Jisas Krais ora karekero. <sup>14</sup>◊ Goruvira rutu Pauto vo reoaro sirova utupata. Opeita ora visii iava vasepata opitupiturovupa, oisore ra visii ivupave. Vo pitupituro oara oisoa pura rovopata voari tuariri vo osa rupa vovou-ia oisoa toupata. <sup>15</sup>◊ Viapau. Ari Pauto vo vovouaro vao tugoropavae iraopata oa sisigaruevira toupaiveira. Oa iava uvui iraopatai ra oisi airereivira rutu toupata. Opeita okovorovu vuriara purapata. <sup>16</sup>◊ Ari ita, Tugoropava Vuku oiso purapapeira,  
‘Ora airerei iraopata vo rara viapau vuriara vai purapata, uvare ragai-a sisigaruetoa rutu.’

#### *Riroa Voria Oa Vatereva Pauto Vigei Vorevira Ousa Ora Rera Iare*

<sup>17</sup>◊ Vo osa Pautoa iare variripaoro oiso rera vaisipata, Igei Aitearo. Osa eisi piepaoro uvuipatai ra visii vo touaro-ia vo rasio-ia vao tavete tou rerapa avivikevira rutu toupata. Eake iava? Uvare rera raga ira vaeavira rutu oirara rovirieirevere voea vo pitupituroaro sirova katakataivira. <sup>18</sup>◊ Ari ita, vo vori-ia eva taraiptavaveira oa iavirava visii oureva Pauto ora rera iare. Uva visiipa vo vori vatereva, oisore ra va iavirava tuariripa pitupituro oavisii akukupapara kavuta varao oara oisoa oupatava visii aao iraraaro ruvara-ia. Ovoria-a eva oa viapau uvuipai ra opesipe oiso osa vareo golarei oarea opesiperea ora silva. <sup>19</sup>◊ Viapau. Uvare vao vituaro iava reipai rutu vo vori eva oa purareva vigei ousa. Oiso osa vao-ia osa ragavira Krais viapau vurivira toureva. Ira sisigaruevira rutu touoro ora rera-ia tauoa purareva oiso rutu osa sipsip kakaero oisoa piepaive Jiu-pa irara voari tuariri. Oa-ia visii rutupa ovoovoa purareva, oisore ra va iavirava vuri pitupituro tuariripara kavuta. <sup>20</sup>◊ Pauto rera roporeva ovusa vo rasio kareke asavira touva voari tuariri rutu. Uva va-a eva isivaaro iava Pauto rera karekereva vao iava ovoiopa vuuta vaore, oiso ra visii tauvareve. <sup>21</sup>◊ Ra Krais vo kovoaro-ia taraiptaoro Pauto oirao piepata ro ira rera vorevira tore piereva kopiia iava rera vateoro keraria. Oa-a eva oa iava uvuipatai ra goruvira rutu oirao pie vovou purapata rera raga-ia rari iraopapro ro-ia Pauto.

#### *Uvui Iraopavio Ra Araoko Irarapa Siraopavio*

---

◊ 1:8: Jo 20:24-31; 1 Jo 4:20   ◊ 1:11: Ais 53:1-12   ◊ 1:13: Ef 6:14; 1 Te 5:6   ◊ 1:14: Ro 12:1-2   ◊ 1:16: Lev 11:44   ◊ 1:17: Diu 10:17; Hi 12:28   ◊ 1:19: Eks 12:5; Hi 10:19-25   ◊ 1:20: Ef 1:4; Hi 9:26

<sup>22</sup> ♦ Oisi-a eisi osa oiraopa reo rutu sirova utupataiva, visii iava sopaura sisigaruevira toupaiveira. Oa iava uvuipatai ra oiraopavira rutu sirao iraopata oearovivupa ora visii iava voea oirao pie vovou irara. Uva oisi piepatavora, uvui iraopatai ra vearovira rutu sopaura oavisii rutu iava oearovivu tauvapata voeao ora visii iava voea. <sup>23</sup> Uvare Airepa Tootoo outavorao vao oa pauakavira toupaiveira. Otootooa vituaro-a Pauto vo reoaro ro Aite ira tootoovira toupareveira. Ira viapau opesia vaiaro. Oa iava uvuipatai ra oiso rutu toupata, Visii-a ita Pauto ovii iraraaro rutu, visiigoa viapau opesia vai. <sup>24</sup> ♦ Tugoropa Vuku iava vo siposipo oiso purapapeira,  
 ‘Ari ita, voeao raga oirara oea oiso rutu toupaiveira osa isiso kou. Ora varao oritoara oarapa ruipapaaveira oara oiso rutu toupaiveira osa isiso kouro kokookoaro. Ari ita, isiso kouro vokiara rutu-ia kopiipapeira. Ra vo kouro kokookoaro tapo erakopaoro opesipape kopii ovoipaoro.

<sup>25</sup> ♦ Ari Turaro vo reoaro-ia viapau opesia vai.’

Evo reo raga ita oa visii-ia karekeepa vo uva oisoa Vearo Siposipo uvupata oearovu ruvara-ia.

## 2

### *Jisas Oiso Toupare Osa Aveke O Iria-ia Tootooa Toupai*

<sup>1</sup> Oire uva uvui iraopatai ra vuri vovouro oavisii kavuta. Opeita kuuvu reoro raga purapata ora opitupiturovu kuuvuara. Opeita oearovu varaaro riiriipata orekerovu. Opeita oearovivu takaupata vuri reoro-ia. <sup>2</sup> ♦ Uvui iraopatai ra vaopa vearo aio ogoepata Pauto vo reoaro, ra va iava vearoa taraiota Pauto ruvara-ia. Oa iava uvuipai ra visii varaaro oirao pie vovouro oavisii goruvira torepe tauva oupaoro vo Pauto ruvara-ia. Oiso rutu osa kakae vure vokiara rutu-ia roroo ruipapaaveira aako riakoro-ia goruvira riropaoro. <sup>3</sup> ♦ Aue iava uvare Tugoropa Vuku-ia oiso purapapeira, ‘Vereopa vovou oisoa sovopata vao Turaro oa purapareva visii-ia.’

<sup>4</sup> ♦ Turaro iare uriopata ro-ia kataitoa raga. Ira oiso rutu toupareveira osa aveke o iria-ia tootooa toupaiveira. Ari ita, oearovu iria o aveke verioro oiso vovouaepa ra oira viki ragaise oiso rutu osa aveke turi raga. Vo osa Pauto oira eira roporeva, oiso ra rera vo kovoaro puraeve. <sup>5</sup> Osa ita eisi osa visii toupataveira oiso osa avekeara oara-ia tootooa toupaiveira. Ari ita, Pauto uvuiparoi ra visii-ia tugoropa kepa paureve vo rara ora visii iava vasepata rerapa. Vo osa vo kepa opesirevora, uvuipatai ra voa pris kovoro purapata tauoro purapaoro vo kepa sovara-ia. Varao oara-ia uvuipatai ra Pauto roru piepata vo rara vara purapata Jisas Krais vo tauvaaro-ia.

<sup>6</sup> ♦ Uvare Tugoropa Vuku-ia oiso purapapeira Krais iava,  
 ‘O roopoava aveke iria-ia riroa voria toupaiveira. Uva oira tovoava. Oa iava oiso toupaeveira osa kukuuvu tuuta vo Kepao vaaro oa pauava Saion taere-ia vo Jerusalem urui voeao oiso, Irouto ro ira Krais oirao pierere ro rera raga ita aveke, ira viapau uvuiparoi ra ariia vai oureve vo rara oisi pierere eisi.’

<sup>7</sup> Uva rera iavirava riro tauva rutu visiipa toupaivoi visiigoa rera oirao piepata rutu. Ari vosaa voeao oea viapau rera oirao piepaise, Tugoropa Vuku-ia oiso purapapeira oeare evoea,  
 ‘Oire aveke kepa paupa irara iria oisoa veripaive. Uva oira raga ita eira iria vo utupaua oiso rutu karekeoverea, rovopa tuuta rutu kukuuvu tuuta va iava Kepa.’

<sup>8</sup> ♦ Ora oreoreovu ita Tugoropa Vuku iava oiso purapapeira,  
 ‘Iriavu aveke iria iava tuiaporo oirara posipaiseira kovepasa.’

Voeao oea Pauto vo reoarova kaureopaave osa toupai vo reo ovoovovira. Eira aveke iria ovoovovira toupaeveira oiso osa Pauto vo reoaro. Uvare oirara vo reo iava posipaiseira kovepaoro vo rara vapareasipaave. Uvare Pauto vare oiraopavira oisi puraroepa.

### *Vigei Oiso Toupapeira Pauto Voeaaro Oirara*

♦ 1:22: Jo 13:34   ♦ 1:24: Ais 40:6-8   ♦ 1:25: Jo 1:1   ♦ 2:2: Mk 10:15; 1 Ko 3:2   ♦ 2:3: Sam 34:8-10  
 ♦ 2:4: Sam 118:19-29   ♦ 2:6: Ais 28:16   ♦ 2:8: Ais 8:14; Ro 9:22

<sup>9</sup> ♦ Ari Pauto visii reesireva oa iava oiso toupataveira, Visii-a rera voeaaro. Visigoa oiso toupataveira, Pris irara rera voeaaro ro King visiigoa sisigaruevira rutu toupataveira. Oa-a eva vituaro iava oiso toupataveira, Visii Pauto voeaaro torevokoaro rutu. Oa iava uvuipatai ra ovovourovu rutu iava siposipopata varao vearovpara rutu oara oisoa purapareve visiipa. Osa raga ita oiso osa visiire keeraroepa ora rera iare. Oa iava rupa vovou kavutava, ovusa visii oureva vore aviavia-ia rera vaaro vearo aviavi rutu. <sup>10</sup> ♦ Ari ita, tuariri oisoa oiso rutu toupata, Oira turiro raga. Uva vo vokio oiso toupatavoi, Pauto voeaaro rutu visii. Ari ita, voari tuariri viapau oisoa siraoa vai oupata Pauto ruvara-ia. Ari vo vokio-ia vo sirao outavoi rera ruvara iava.

#### *Vigei Uvui Iraopavie Ra Oiso Touape, Pautoa-pa Kovopa Irara*

<sup>11</sup> ♦ Vate irara oaa, visii oiso rutu toupataveira vo rasio-ia osa sopaipa irara oea tavetevira toupaiveira. Eva vituaro iava visii taviaavoi oiso ra visii vo vovouroaro poreta vo vovouro iava vo rasio varaaro, oara visii iava sopaura vuri piepaiveira. Evo vovouro vuriara oara vearo vovourova ora upopapeira vo visii iava sopaura-ia. <sup>12</sup> Torevoko vovou raga purapata oirao pie vovou asa irara vuutaaro-ia toupaoro. Eagara vosa vurivira visii vaisipaike kuuvuvira, vo osa voeava torevoko vovou raga purapata. Osa iava eisi uvuipaaai ra visii siituepaoro oisi iava tarai oupaive. Oa vai iava uvuipaaai vai ra utupauavi Pauto vaisiaro kae pieive vo vokiri-ia oa-ia vorevira voreroverea Turaro.

<sup>13</sup> ♦ Gavman irara vo reoroaro rutu sirova utu iraopata reo goru, vo uvare Turaro Pauto vo ruipaaro-a visiipa. Ora Praim Minista vo reoroaro tapo uvupata vara purapasa. <sup>14</sup> Ora turaro irara tapo vo reoroaro uvu iraopata. Voeao oearopa vo kovo vaterevora rovopato Gavman, oiso ra vuri irara vo voriaro vateive. Ora vearo irara vaisiaro kae pieive. <sup>15</sup> Uva eake-a vao oare uvui iraopatai ra voea vo reoro reipa irara sirova utu iraopata? Aue iava uvare Pauto vo ruipaaro visiipa oisi oiso toupaiveira vaore, oiso ra va-ia torevoko vovou rutu purapata. Osa iava eisi roruko irara viapau uvuipaaai ra visii togapaive oreoroi-ia, evoearo oearoa oearovivu takupaiveira vuri reoro-ia. <sup>16</sup> ♦ Ari ita, uvuipatai ra oiso rutu toupata osa vearo oearoa viapau tokipareve irai voea vo kovoroaro-ia voea siituepaoro vo rasio-ia. Uva oiso rutu toupata osa vearo kovopa irara oea tokipareveira Pauto ora rera osireiaro-ia. Uva oisi-a eisi osa iava viapau akeakevira raga vuri vovou purapata vatauvira. <sup>17</sup> ♦ Oearovu rutu-ia vearo rugorugooro purapaoro voea vaisiaro rei piepata. Ora oirao pie vovou iraravi oearoviapa tapo sirao iraopata vearo visii iavapa irara. Pautoa-pa avivikepata. Ora visii reraaro reito gavman vo reoroaro uvu iraopata.

#### *Uvui Iraopavie Ra Krais Vaaro Ovoovo Sirova Utu Iraopavio Siitoka Oupaoro*

<sup>18</sup> Visii kovopa irara arovi iraopata vearo oearoa visiipa reipaoro visii tokipaiveira kave vovou rutu purapaoro visiipa. Voea vo reoroaro uvuta. Eagara vosa visiire kasipuvira reopaave oearovu raga reipa irara, oearoa tapo vo reoroaro-ia uvuipatai ra vara uvu iraopata. <sup>19</sup> ♦ Osa-a eisi osa iava uvuipatai ora visii vo voriaro outaverea vo Pauto ruvara-ia, vo rara viapau vearovira visii vo kovoroaro eveipaike. Eake iava? Uvare Pauto vo vovouaro-ia tarai rovopato eva kasipua oupataveira vearo ruvara-ia oea visii vurivira tokipaiveira. Vo ovusa viapau oiso vuri pitupituro vai purapataveira. <sup>20</sup> ♦ Ari ita, vosa vuria purata, ra va-ia tavaka outa vo osa viapau kasipupata, osa iava eisi Pauto uvuiparoi ra visiipa vearo vori vaterere. <sup>21</sup> ♦ Eva-a Pauto vo ruipaaro visiipa. Aue iava uvare Krais vo ovoovo purareva visiipa riroa rutu upia ouoro evao parikou-ia visii tauvaoro. Osa eisi vo ovoovo eva vioepata. <sup>22</sup> Oiraopavira rutu uvare eera Krais viapau oisoa vuriara vai purapareve. Ora viapau kuuvu reoro vai oisoa purapareve rera oiraaro iava gisipo irai keakeapasa. <sup>23</sup> Ari vosa irai rera takupareve, uva viapau Krais uvuiparoi ra oisi eisi irai otakaiaro pukooro irai tovireve. Ora vosa tavaka vai oureve irai ruvara-ia, ra viapau oiso iraire oiso

---

❖ 2:9: Diu 10:15; Ap 26:18    ❖ 2:10: Hos 1:9-10    ❖ 2:11: Hi 11:8-10    ❖ 2:13: Ro 13:1-10    ❖ 2:16: Ga 5:1;  
1 Ko 7:22    ❖ 2:17: Ro 12:10; Hi 13:1    ❖ 2:19: Ro 13:5    ❖ 2:20: 1 Pi 3:17    ❖ 2:21: Ais 53:1-9

puraro, "Vii vuri pieavere rara." Viapau. Ari Pautoa raga-ia oisoa rariparo oiso, Ira raga rerapa va voriaro eva viria vatereve. Uvare Pauto ora rera raga torevokovira rutu oirara rutu rovirieirevereia voea vo voriroaro voeapa vateoro. <sup>24</sup> ♦ Ari ita, Krais kopiicroepa evao parikou-ia vo uva ora rera iava varaua-ia vigei vo viriroaro vo voriaro oureva. Uva vigeipa kopiicroepa, uvare oiso ruipaparoveira ra vuri pitupituro kavupape. Oa iava eva uvuipavieia tootoovira toupape torevoko vovou raga purapaoro. Oiraopavira uvare vara-a evara rera vo viuparoaro oara iavirava uvuipavieia poretevira rutu tootoovira toupape. <sup>25</sup> Voari rovovira rutu uva oisoa virivira raga toupata oiso osa sipsip ragui viri ragapaisevira. Oa isivaaro iava poreta virora visii Tokipatoaaro sirova utusa ro-ia Pauto. Ro ira uvuiparoi ra visii iava sopaura oavisii utopareve vuri vovouro asavira.

## 3

*Vo Toupai Ora Oupa Irarare Vo Reoreo*

<sup>1</sup> Visii oirapa riako visiigoa arovi iraopata vatua irara oavisiiipa voea vo reoroaro sirova utupasa. Ari ita, vosa oearovu voea iava viapau Pauto vo reoaro oirao piepaive, oea uvuipaii ra visii vo vovouroaro vearoara kekepaoro ora voea iava vovouisiro oaive porepaoro Pauto oirao pieive, vao iava rara viapau va iava oisi eisi voea tavitavipata. <sup>2</sup> Uva ita, uvuipaii ra visii vo vovouroaro sisigarue vovouro eveive vo osa voeapa avivikepata. Oire ra va iava oiso puraave, "O ari oiraopatoa rutu-a Pauto." <sup>3</sup> ♦ Visii riakora viapau uvuipatai ra varaura raga ratauva oritopata vo pitupituo sirova utupaoro oruara oritopa gol oritoro tovopaooro, ora ooritorovu rutu vearo kekeara varoara, ora aasiara oara-ia riro moni viki ragapataveira. <sup>4</sup> Viapau. Asi veeropai vosa sopaura oavisii iava oritopata vao-ia oritoa oa viapau uvuipaii ra opesipe. Eva ita kave vovou vo osa ora visii vo pitupituroaro raga sirova vearo vovouro purapataveira. Ooritoa-a eva reia rutu rovopa vo Pauto osireiaro-ia. <sup>5</sup> Airovu vairo airoa oisoa tuariri rutu riro goruvira rutu Pauto sirova oiso utupaave rera oirao piepaoro, evairo airoava ovoovovira vairo oiso vearovira vo oritoro purapaisevira ora vairo sopapro-ia vo osa vatua irara oaive vo reoroaro uvuiparoi vara purapaisevira. <sup>6</sup> ♦ Iriavu-a o-ia vairo iava Sera, iria vatuato ro Ebrahim vo reoaro uvuoro oiso rera vaisieva, "Ragai reraaro reito." Uva vo vokio-ia visii riako oiso toupatavoi, Oira ovii riakoaro visii, vo rara oira vo vovouaro rutu sirova vearovira utupata, ora vosa viapau uriripata orekerovu avu vaipa.

<sup>7</sup> ♦ Visii vatua irara visiigoa oiso taviaavoi, Ora visii vatua riakoroarova toupaoro oiso rutu rugoopata vairore, Oiraopavira rutu, uvare viapau oiso goruvira rutu toupaisevira oiso osa oirara. Ra oisi eisi rugorugoo iraopaooro vearovira vairo tokipata rutu. Eake iava? Uvare Pauto vaeavira vei avukarei rutu tootoo piepareveira vao-ia rera vo vatevatearo. Ari ita, uvui iraopatai ra vokiara rutu-ia vearo vovou rutu pura iraopata vatua riakoro oavisii-ia. Teapi vuriara vai purapata vairo-ia, ra oisi iavirava eisi Pauto viapau visii uvupareve vo osa rera iare variripata.

*Uvuipavieia Ra Katai Vovou Rutu-ia Toupape*

<sup>8</sup> Oire uva oaravu varao oara iava oiso visii taviaavoi, Katai vovou rutu purapata ora visii rutuva vaeavira oearovivupa siraopaooro, oiso rutu osa ora visii araoko irararo rutupa siraopataveira. Vereopa vovou rutu purapata oearovivupa ora visii iava. Ra opeita oiso vovoupata ra oearovupa reipata. <sup>9</sup> ♦ Vosa oearoi visii vuri piepaive, opeita voea vo pitupituroaro tuupata. Ora vosa oearoi visii takauaive, ra opeita voea vo takauaaro pukopata ita voeare vorevira. Viapau. Ari uvuipatai ra vereopa vovou raga purapaooro voeapa voea vo pitupituroaro pukopata voeapa siraopaooro rutu. Eake iava? Uvare Pauto visii reesireva oearovupa vereopa vovou vatepasa voea tauvapaoro. Ra oisi iavirava uvuipatai ra vorerivira vereopa vovou oupata vo Pauto ruvara-ia.

<sup>10</sup> ♦ Aue iava uvare Tugoropa Vuku oiso purapapeira va iava vao oiso, 'Ro oirato ira oiso ruipaparo ra rera vo touaro vearovira karekepape. Ora ro ira oiso ruipaparo ra vearo vuutaro rutu-ia toupareve. Ira uvui iraoparoi ra ora rera iava

◇ 2:24: Hi 1:1-4; Ro 6:2 ◇ 3:3: 1 Ti 2:9; Ais 3:18-23 ◇ 3:6: Jen 18:9-15 ◇ 3:7: Ef 5:25; 1 Te 4:4 ◇ 3:9: Mt 5:43-48; Ro 12:17 ◇ 3:10: Sam 34:12-16; Je 1:26

gisipo tupa rovopareve vuri reoro pura arapa. Ora ira uvui iraoparoi ra kuuvu reoro kosi pie arapa eaka rovoro.

- <sup>11</sup> Ira-a eera uvui iraopa ra vuri vovouro arova ora pore rovoro torevoko vovou raga purasa. Ira uvuipa ra akeakevira kave vovoure taraapareve. Oa iava uvuiparoi ra kasivarivira vo vovou sirova gavaurevira oearovu tapo toupareve.
- <sup>12</sup> Eake iava? Uvare Turaro oiso voearo sittuepareveira voearo oearoa torevoko vovou purapaiveira. Ra oisi iava voea vo variriroaro uvupareve. Ari ita, voearo kasipupaoro voearo isivaparoveira oearoa vuri vovouro purapaiveira.'

### *Tavaka Ouoro Uvui Iraopavio Ra Va Iava Rorupape*

<sup>13</sup> ♦ Vosa vearo vovou raga purapasa ruipa iraopata, uva iroutoa vai uvuiparoi ra oisi eisi oai iava visii vuri piereve? Eake iava? Uvare viapau oeai oiso eisi piepaiveira voearo vearo irara vuri piepaoro. <sup>14</sup> Ari vosa tavaka outa vearo vovou raga purapaoro, eagara. Oa-ia uvui iraopatai ra oisi va iavirava roru iraopata. Opeita uriripata voearo evoea. Ora opeita rirovira rutu oisi voearo eisi rugorugoo iraopata oearoa visii vuri piepaiveira. <sup>15</sup> Ari Krais vaisiaro kae piepata ora visii vo rugorugooroaro-ia. Ora vo osa oiraopavira rutu rerare oiso purapata, "Ragaipa turaro iraoparoi rutu." Ora vaopa tapo vatatopo iraopata vo osa oearoi oiso purapaave visiire, "Igeipa visii vo oirao pieroaro aviavi piepata. Uva eake rutu-a vao oare tuepataveira?" Ari ita, vosa ora visii vo rugorugooroaro ravaa rovopata, osa iavirava uvuipatai ra voea vo reoroaro pukopata aviavi pievira. <sup>16</sup> ♦ Uva oisi-a eisi osa voea vo reoroaro pukopaaoro uvui iraopatai ra kave vovou rutu purapata voeapa. Opeita voearovi akaipa piepata. Ora opeita orekerovu vuriara purapata ora visii-ia, ra varā sovopaoro ora visii iava sopaura-ia oiso purapata, "Ae, vuria puraavoi." Oapa eva vatatopaaoro airereivira rutu torevoko vovou raga purapata voeapa. Oa iava uvuipaai ra oisi vo vovouro eveipaoro ariipaave ora voea raga, voearo oearoa vuri takauro-ia visii vaisiaro takupaiveira oiso purapaoro, "Vuri kovo raga eva akukua," vo osa vearo kovo raga Krais vaaro purapataveira. <sup>17</sup> ♦ Oiraopavira rutu, uvare vearovai rutu vo rara tavaka oupata vearo kovo purapaoro vo osa Pauto vo ruipaaro oisi eisi toupaive visiipa. Ari vosa vuriara purapaoro tavaka oupata, oire uva visii raga uearo-a.

### *Krais Kopiiloera Vigei Varaaro Vuriara Veraoro*

<sup>18</sup> ♦ Oa eva vituaro-a vao oiso, Rera raga ita Krais ira kopiiroepa visii tauvaoro. Ira oiso eisi kopii ovoiroepa vigei varaaro-ia vuriara vo voriaro ouoro ovoieivira rutu. Ari ita, uvare rera raga-a veartoia rutu ira kopiiroepa oirara tauvasa vuri irara. Osa-a eisi osa iavirava vigei vore piereva Pauto iare. Oiraopavira rutu oiso osa rera iava varaua kopii ovoiepa, ovusa rera iava uraurato tootoovira raga toureva. <sup>19</sup> ♦ Osa eisi urauravira toupaoro avaroepa voearo uraura irara siposipasa oearoa tuukea-ia toupaiveira. <sup>20</sup> ♦ Voea urauraaro oea rerare Pauto isivaaepa kaureopaoro voari tuariri rutu vo vuutao-ia oa-ia Noa ateate piepareva Pauto, ovusa aak uvu purapareva. Uva oisi-a oiso osa iava kataipa irara raga virivarireva rera Pauto vo peva vataro raga, vo osa pirutu paitu raga ivara-ia toupaiva va-ia uvuoa aak. <sup>21</sup> ♦ Oire uva voari tuariri eva paitu rovu uuko rovu Noa aao kaeva voea tovosa vo oriru tapi. Uva oisi raga ita uukoa-ia Tugoropa Sisu oupape oa vigei kaepaiveira vigei tovopasa vo uva oriruvira toupapeira. Aue iavirava rera vo goruaro vao oa Jisas Krais tore pieva vova kopii tapi. Osisua-a eva oa viapau oiso toupai ra va-ia vuivui verapape ora vigei iava varaura oavi iava. Viapau. Ari vigei uvuipavieir a oisi eisi va purapaoro ora vigei vo ruiparoaro reesipape, vo rara oiso ruipapavio ra vigei iava sopaura oavi sisigaruevira rutu toupaive Pauto osireiaro-ia vo rara evo gorua ita oupape rera vaaro. <sup>22</sup> ♦ Rera raga Krais ira iparoepa vuvuiua iare vo uva Pauto ruvara-ia oirapapa varata-ia toupareveira. Uva voa-a evoa uva toupaoro voea rutupa enselpa irara reiparoveira ora voearo reipaaveira vuvuiua-ia.

---

◊ 3:13: Pro 16:7   ◊ 3:16: Hi 13:18; 1 Pi 2:12, 15   ◊ 3:17: Mt 5:10-12; 1 Pi 2:15, 20   ◊ 3:18: 1 Pi 2:21; 2 Ko 13:4   ◊ 3:19: 1 Pi 4:6   ◊ 3:20: Jen 6:1-13   ◊ 3:21: Ta 3:5; Hi 9:14; 1 Pi 1:3   ◊ 3:22: Ap 1:10-11

## 4

*Uvuiipaviei Ra Tavaka Vo Upiaaro Oupe Toua Oavi Tavariorooro*

<sup>1</sup> ♦ Oire uva vo osa oearovu Krais iava varaua vuri pieiva rerapa riroa upia vateoro, taraipatai vai pasi osa vai-a eisi oearoi visii vuri piepaivere. Uva vare eva rugorugoopaoro oisi eisi uvuiipatai ra ora visii iava sopaura oavisii goru piepata rutu vaore, cosa viria outa oearovu ruvara-ia. Uvare ro ira upia oureva ora rera iava varaua-ia vo rara oearovu rera vuri pieive, ira-a eera ira vuri vovou tokorevere oisi eisi pieoro. <sup>2</sup> ♦ Uva eisi piepaoro uvuiipatai ra vo rutu tugurata vo vokio-ia oa-ia kopiitavere. Uva vo vuutaro evara oara-ia viapau uvuiipatai ra ora visii vo vovouroaro sirova utupata vuri vovouro purapaoro. Viapau. Ari uvui iraopatai ra Pautoa iare ora visii iava vase iraopata rera raga vo vovouroaro sirova utupasa. <sup>3</sup> Ari ita, rovovira rutu oiso oisoa piepata osa voeao oea rupa vovouvira toupaiveira, opitupitua eva uvuipai ra opesipe. Osa-a eisi osa toupaoro oisoa rirovira rutu vuri vovouro purapata varao opitupiturovu rutu otopa pitupituro purapaoro. Ora vo osa oisoa spakpasa ruipa iraopata oiso vovoupaoro ra vara iava kokoropaoro opitupiturovu rutu vuriara purapata. Ora oiso osa tokarasi irara-ia oisoa vuurapa vaisi purapata, varao oarare kasipuparoveira Pauto. <sup>4</sup> Uva vo vokio opeita voea tapo ora tavosipata oearoa ora voea iava varaura oaiive vo ruiparoaro sirova utupaaveira oisi eisi vo vovouro vuriara purapaoro. Oa vituaro iava visii vo pitupituroaro-ia tavetave iraopaveira. Oa iava visii tovipaiveira vuri reoro raga-ia visii takaupaoro. <sup>5</sup> ♦ Oea-a evoea voari utupaua Pauto osireiaro-ia toreaverea rerapa tavitavisa vo pitupituro iava evara voea varaaro. Oire ra evo vuuta raga-ia voea vo vovouroaro rovirieirevere rera ro Pauto ira tuevira toupareveira voea rovirieisa kortua-ia, voearo oearoa tootoovira toupaivere ora voearo oearoa kopiipaaveira. <sup>6</sup> ♦ Oa eva vituaro iava voeao oisoa Vearo Siposipo iava siposipopave voearopa oearoa tuariri rutu oisoa kopiipaave. Osa iava evoea rovirieireva osa vigei vao rovirieirevere vigoa tootoovira toupai vo vokio-ia. Uva cosa yearovira rutu Vearo Siposipo oisoa uvupaivori voeao oea kopiiaepa tuariri, ra oisi iavirava voea vo urauraroaro tootoo ovoivira rutu toupaive oiso osa rera Pauto toupareveira.

*Vearoto Kovopato Ira Pauto Vo Siraaro Roo Piepareveira Oearovivupa*

<sup>7</sup> ♦ Tutuuvoi vuuta vao oa-ia orekerovu rutu opesipere. Oa-ia uvui iraopatai ra ora vatatopo iraopata ora kaipori piepaoro variripasa. <sup>8</sup> ♦ Ari rovopa rutu-a vao-ia vo osa oearovivupa siraopaoro voea-ia kaviko vovou rutu purapata. Eake iava? Uvare oearovivupa siraopaoro uvuiipaviei ra vuriarare ovaupavio evara oara vigei vuri piepaiveira. <sup>9</sup> Vosa oearovivu visii iava visii iare karepaa viro, osa iava uvuiipatai ora visii vo keparoaro iare voearovi koata piepata. Uva viapau uvuiipatai ra voearovire orugorugoorovu purapata oisi iavirava. <sup>10</sup> ♦ Pauto ora rera varaaro vatevateara vatepareveira visii rutupa katakataivira vaore, oiso ra yearovira rutu vara tokipaoro vara kovo piepata. Oa iava uvuiipatai ra vara-ia oearovivu araoko irara oavisii varia tauvapata. <sup>11</sup> ♦ Oiso osa vo vatevatearo-a varao-ia ropa ira Pauto vo reoaro iava siposipopareve. Osa siposipopaooro uvui iraoparoi ra torevokovira rutu Pauto rera iava reoreoparo. Ari vo vatevateao-a vao-ia ropa ira oearovu rutu tauvapareve. Ira uvui iraoparoi ra oisi eisi vo vatevatea eva kovo piepaoro oirara tauvapareve vo goru iavirava eva oa oupareveira Pauto ruvara-ia. Oire uva oisi-a eisi osa okovorovu rutu purapataveira evara oara rutu iavirava Pauto vaisiaro kae pieverea oearovu Jisas Krais vaisiaro iavirava. Vao iava uvare Pauto vareiaro-a vareo keraria ora gorua oarea viapau opesia vai. Ovoiei.

*Tavaka Kaepa Vo Vovouaro Krais Tapo*

<sup>12</sup> ♦ Vate irara oaa, vokiara rutu-ia tavakaara oupataveira. Uva viapau uvuiipatai ra vara-ia tavetave iraopata oiso rugoopaoro, Ae pisaara rutu varao oara vigei-ia karekepapeira. <sup>13</sup> Viapau. Ari roru iraopata vara-ia. Uvare vo tavakaro-a evara oara vaeapaveira vo tavakaova Krais oa oureva vo osa rera-ia viria puraiva. Vosa oisi

♦ 4:1: 1 Pi 3:18; Ga 5:24 ♦ 4:2: Ga 2:20; Ro 6:11 ♦ 4:5: Ap 10:42; 2 Ti 4:1 ♦ 4:6: 1 Pi 3:19 ♦ 4:7: Je 5:7-10; Ro 13:11 ♦ 4:8: 1 Ko 13:7 ♦ 4:10: Ro 12:6-8 ♦ 4:11: Ef 6:10, 5:20; 1 Ti 6:16 ♦ 4:12: 2 Ti 2:11-13

eisi piepatavora, uvuipatai ra oiraopa roru rutu outa vo osa Krais ora karekeroverea kerariava viaevira rera vaaro. <sup>14</sup> Visii rutu oisi eisi toutes Krais vaisiaro-ia. Ra oisi visii-ia taraipaoro visii takaupaive. Osa iava uvuipatai ra rorupata. Uvare vo viria eva oupaoro uvuipatai ra ora visii-ia taraipata oiso, Oiraopavira rutu, Pauto reraaro Uraurato vigei sopapro-ia toupareveira. Ro Tugoropato Uraurato ira-ia riroa rutu keraria ae gorua touveira. <sup>15</sup> Teapi oearovu kopii piepata. Ora teapi orekerovu avu vai kavirupata. Ora reo goruro opeita putepata. Ora opeita voraro vokapata oearovu vo rugorugooroaro torevoko ragapasa ora visii vo ruiparoaro raga-ia. Vosa oisi eisi piepata, osa ita torevokopai visiipa ra oisi iavirava tavaka oupata. <sup>16</sup> Ari vosa tavaka oupata vo ovusa oearovu visii vaisipaive oiso, Kristento, oire oisi iavirava viapau oiso ariipata. Viapau. Ari uvuipatai ra Pautoa-ia vuurapa vaisi purapata. Eake iava? Uvare eisi visii vaisipaoro Krais vaisiaro tovopaivoi visii-ia.

<sup>17</sup> Oire vo vuuta-a vao-ia oa pou piroi oa-ia Pauto rovoroi rovirieia purapaoro. Oa-ia ora rera voearo rovovira rovirie irovoparevoi rutu. Oire vosa vigei oirao pie vovou irara rovo rovopavio, ra apeisi voearo oirao pie vovou asa irara oea viapau Pauto vo reoaro oirao piepaiveira vo reo sirova utupasa? Uva siraovira rutu-a voeavipa! <sup>18</sup> Aue iava uvare Tugoropa Vuku oiso purapapeira voeare,

'Viapau oiso avekatapai rerapa ro vearo vovouto, ra ora rera iava sopaua porereve, oiso ra oisi iava Pauto rera orirureve ora rerapa. Uva apeisi-a? Uva aa vao-a opesia evoea vaaro oearoa vuri vovouro purapaiveira, voearo oea Pauto vo reoaro uvu arapa viapau oiso ruipapaaveira.'

<sup>19</sup> Osa ragavira-a eisi osa Pauto ora rera vo ruipaaro sirova rera voearo iava vasepareveira, oisore ra oisi iavirava tavakaara oupaise. Osa iava uvuipaa rutu ra torevoko vovou rutu purapaoro ora voea tootooaro rutu tovopaike Pauto vavaearo-ia. Uvare Pauto vigei rutu purareva ora ragai. Osa iavirava uvuiparoi rutu ra vigei iava sopaura tokipaoro voura orirupareve rutu.

## 5

### *Visii Kovopa Irara Uvui Iraopatai Ra Pauto Vo Raguiaro Sipsip Raguiro Toki Iraopata*

<sup>1</sup> Goruvira rutu voeare visii tuvetuvepa irara lotupa irara reoparai. Uvare ragai tapo ita iravu tuvetuvepato. Vo uvare ora ragai osireiaro iava Krais kekeava vo osa tavaka vo siraoaro oureva oearovu ruvara-ia. Osa iava eisi ragai tapo va vao keraria ouaverea vo rara vigei iare viaevira rutu pou piro. <sup>2</sup> Uva goruvira rutu visii tavipaavoi oiso, Oiso rutu toupata osa sipsip tokipa irara oirara rutu Pauto voearo tauvapaoro. Oisi eisi vo kovo purapaoro rorupata, uvare Pauto vo ruipaaro-a oisi visiipa. Opeita reasipata oisi pie arapa. Ora opeita oisi eisi vo kovo purapaoro voria ragare rugoopata. Viapau. Ari visii uvuipatai ra evo kovo purapata vo rara visii iava sopaura vo ruiparoaro oisi toupaise oisi vara purapaoro. <sup>3</sup> Opeita oiso vovoupata ra voearoviopa reipata oearoa tokipataveira. Viapau. Uvare uvuipatai ra ora visii-ia ovoovoa purapata. Osa iava visii vo touroaro vurapaoro vara sirova vearovira rutu utupaavere. <sup>4</sup> Vosa oisi eisi piepatavora, voari utupaua Rovopatoa rutu Sipsip Tokipato ora karekeroverea ro raga ita Krais. Uva vo vuuta-a eva oa-ia ora visii vo voriaro outaverea vao oa sisikorevira roroverea kerariava, vao oa viapau opesia vai.

### *Ora Vigei Vo Rugooroaro Rere Pie Rovopape Ra Torevokovira Rugorugoopavio*

<sup>5</sup> Osa ragavira eisi osa visii viovoko irara uvui iraopatai ra oira vasi irarapa avivikepata voearo vo reoroaro uvupaoro. Ra ora visii raga ora vara piepataera, oisi toupaooro oearovivu tauvapata. Uvare Tugoropa Vuku oiso purapapeira, 'Pauto voearo vairuparoveira oearoa ora voearo ragare oiso purapaaveira, Veartoia rutu-a ragai. Vo osa voearo oearoa ora vara piepaave, oea-a evoea oeapa vereopa vovou rutu vatepareveira.'

---

<sup>◇ 4:14:</sup> Mt 5:10-12    <sup>◇ 4:17:</sup> 2 Kro 7:14    <sup>◇ 4:18:</sup> Pro 11:31; Ro 10:9-17    <sup>◇ 5:1:</sup> Ro 8:14-25    <sup>◇ 5:2:</sup> Jo 21:15-17; 1 Ko 9:17    <sup>◇ 5:4:</sup> Hi 13:20; 2 Ti 4:8    <sup>◇ 5:5:</sup> Je 4:6; Ais 57:15; Pro 6:16-19

<sup>6</sup> ♦ Uva oisi-a eisi osa ragavira uvuipatai ra Pauto vavaearo reroaro vao riro gorua takuvira toupata. Auere ra vo vavae iava eva oa-ia utupaua oiso visii kae piervereera rara vo vokio-ia oa rera raga reesireva. <sup>7</sup> Opeita tavaka vo siraoroaro kaepata ora visii raga. Viapau. Vara tovopata vo Pauto vavaearo-ia. Eake iava? Uvare rera raga-a ira visii kavikopareveira visii tauvapaoro.

<sup>8</sup> Ora vatatopo iraopata kaiporivira rutu uutupaoro rerare ro Seten visiiva keripatoa rutu. Ira voraro rutu viripareveira oiso rutu osa aakauto ro ira okarerovu ruture taraapaoro viripareveira voea aiopasa. <sup>9</sup> Goruvira rutu tore iraopata oirao piepaoro, ra rerare korupaoro isivapata. Uvare taraiapatai araoko irara oavisii-ia oirao pie vovou irara voeao oea uvarovu rutu voraro toupaiveira. Oea oisi eisi vo tavakaro oupaiveira osa vo tavakaroa varao oupataveira visii. <sup>10</sup> Ari ita, Pauto visii reesireva ro ira vereopa vovou rutu purapareveira oearovu rutupa vaore, oiso ra vo reesiva Krais tapo ora tavosipaoro rerava reipata, vo uvare rera-a Krais ira orekerovu rutupa reiparoverea pauakavira rutu. Osa-a eisi osa iava uvuipatai ra Pauto vaarore vereopa vovou rugoopata, vao oa-ia visii tauvaparevere, vo osa gare vuutavi raga-ia otavakarovu vo siraoroaro oupata oearovu ruvara-ia. Oara isivaaro iava evara Pauto visii vorevira vearo piervere vo osa visii iava sopaura goru piereve oiso rutu tore pieoro osa kukuuvu tuuta. <sup>11</sup> Ira-a ro riro gorutoa rutu Turaro. Ira vo goruaro viapau opesia vaiei. Ovoiei.

#### *Vo Toupai Ovoiopa Reo*

<sup>12</sup> ♦ Ragai-a vao ragoa vavio poteku pasi puraavoi visiipa osa Sailas va rigatoparevoi ragai tauvapaoro. Rerare rugooparai oiso, Ira ita vigei araokotoaaro. Ira goruvira rutu Pauto vo reoaro-ia pitupaoro vearovira kovopareveira. Uva vo pasi-a vao oa-ia oiso ruiipaparai ra goruvira rutu visii iava sopaura varaata pieoro voura goru piea rutu. Ora oiso osa oiso ruiipaparai ra ora ragai vo reoaro oirao piea rutu visiipa oiso ragavira. Pauto visiipa vereopa vovou rutu oisoa purapareve. Ovovoua eva oiraopai rutu. Osa iava uvui iraopatai ra va iavirava goruvira rutu forepata.

<sup>13</sup> ♦ Ari ita, Pauto visii reeresireva ora rerapa ora voeao lotupa irara oea vo Babilon urui-ia toupaiveira uvava visiipa vearo voki purapaavoi. Uva Mak tapo ragai oviitoaaro vearo voki puraparevoi. <sup>14</sup> Oire uva visii rutu sekanta oearovu tapo sirao vovou puraoro.

Uva visiipa Pauto arepaavoi ra gavaure vovou vatereve visiipa visiigoa Krais tapo ora tavosipataveira.

Eisivi raga osa vo pasio purapaavoi.

Ragai-a vao, Pita.

## 2 PITA

### Irapa Reoro Vo Vukuo Iava

Viapau taraipavie aa vo iva-ia vo pasio rigatoreva Pita, ora irou irara rutupa. Ari taraipavio oiso, Kristen irara varaaro oirao pie vovouro tore piesa vo rigato purareva. Voea tavireva oiso ra vorerivira Vearo Siposipo-ia rugorugoopaave vao oiraopä reo rutu (2 Pi 1:12, 3:1-2), ora rera iava Turaro Pauto ira vo reoroaro oiraopara puraparevere taru vo utupaua voeaopa vearo vovou irara ora voeaopa tapo vuri vovou irara (2 Pi 3:10-13), ora aue iava tapo rigatoreva kuuvu irara tisa irara oiso ra voeapa vatatopopaave voea vo siposipoaro uvu arapa, ora Krais vo vorearo iava voea Kristen irara tavireva. Teapi urioparo osa viapau vatatopopaave rerare Turaro (2 Pi 3:8-13).

1. Aviavi pie reoro vo pasio iava, 1:1-2.
2. Oiraopä taraia vao vova vituaro iava, 1:3-21.
3. Kuuvu irara iava oea ora voea vo voriaro vuri vori oa ouiverea rara, 2:1-22.
4. Voea tavireva oiso ra tuevira toupaive Krais vo vokiarore vao vorepa voki, 3:1-18.

<sup>1</sup> ♦ Ragai-a vao Saimon Pita Jisas Krais-pa kovopato. Ragoa roporeva Pauto, oiso ra rera vo kovoaro aposel kovo kaepaa. Ragoa vo pasio visiipa rigatoavoi. Visiigoa oirao pie vovou rutu purapaoro roru iraopataveira, oiso rutu osa igei vao rorupaioveira. Ari ita, vigei rutu katai vovou raga oirao pie vovou rutu pura iraopape vaitereo vo vovouaro iavirava torevokoa Pauto vaio ora Jisas Krais vigei Kae Pietoaro.

<sup>2</sup> Visii vaaro taraia aue-ia vereopa vovou ora gavaurea oa uvuipai kaepa piro riropaoro, vo osa topa pievira rutu Pautoa-ia ora Jisas vigei Turaroaro-ia vearo tarai oupata rutu.

#### *Pauto Vigei Reesireva Ora Rerapa*

<sup>3</sup> ♦ Ari ita, Pauto ora rera vaaro iavirava riroa gorua vigei vatereva orekerovu rutu vigei vo touaro uvui piesa, oiso ra uvuipavie ra torevoko vovou rutu sirova utupavio vao Pauto vaaro. Aue iava uvare rera-ia taraipavie ro ira vigei reesireva rera tapo ora tavospasa vao keraria oupaoro ora vearo vovouro. <sup>4</sup> ♦ Osa ita-a eisi osa vara varao riropa vatevatearo oupapeira vearovpara rutu varao oarare reo ovoi purareva vigeipa. Ovatevatearo-a evara vearovpara oupaoro tauva oupapeira ora vigei raga vo opesiaro-ia rugorugoopaoro, ra va vatavatape. Vao oa vigei-ia poupa pirovere vosa vuri vovouro purapape vo rasio raga iava vara. Ari vosa vatevateara kovo piepape rera varaaro, oa iava uvuipavie taru ra torevoko vovou rutu purapape rera tapo vo rugorugooaro sirova.

<sup>5</sup> Uva va-a eva oa vituaro iava uvuipata ra oirao pie vovou rutu purapaoro vearo pitipitu tapo pura iraopata. Osa iava eisi visii vo vovouaro vearovpara-ia uvuipatai ra vara tapo vao takuvu iraopata vearo tarai rutu oupa vovou. <sup>6</sup> Vo osa vo vovou eva vearo tarai rutu oupa tapo takuvupatavora, oisi iavirava uvui iraopatai ra ora airereipaoro ora visii iava varaura vo ruiparoaro tokipata. Osa iavirava uvui iraopatai ra evo vovou tapo takuvupata vaova raverave asa vovou. Ora vo vovou tapo oisi iavirava takuvupata Pauto vo vovouaro sirova utupa. <sup>7</sup> Osa iava evo vovou uvuipai ra siraopa vovouva ora takuvupe vao oa purapataveira ora visii araoko iraraaropa, ora vo vovou oearovu kavikopa vovou.

<sup>8</sup> Oire uva uvui iraopatai ra evo vovou rutuva vearovpara oisi eisi toupata pute pievira rutu vokiaro rutu-ia. Eake iava? Uvare oearovu-ia oisi eisi vo vovouro purapataveira, osa iava uvuipatai ra visii vo tarairoaro oirao pievira rutu kareke iraopata ro iava vigei reraaro Turaro Jisas Krais. Osa-a eisi osa iava uvuipatai ra tauvavuvira otarairovu oupata rera iava ita. <sup>9</sup> ♦ Ari ro ira viapau oisi vo vovou vearovpara purapareve, ira oiso rutu toupareveira, Voosito. Oa-a eva oiso toupae, Ira ikaupavira rutu Krais vo kovoarore ovauparoveira vo kovo oa iavirava rera varaaro vuriara riga piropa varao tuariri oara oisoa pura rovopareve. <sup>10</sup> Araoko irara oaa, oisi eisi kasivarivira rutu vearo vovou purapata. Osa iava vara iavirava uvuipatai ra ora visii-ia vearovira rutu taraipata oiso, O ari oiraopavira rutu Pauto vigei reesireva. Oa iava ita ora rerapa vigei roporeva. Osa iava

uvuipatai ra oisi eisi piepatavora, viapau Pautoa-re isivapatavere kove ovoipaoro. <sup>11</sup> Osa torevokopai rutu eisi visiipa koatasa Jisas Krais vo Saraaro sovara-ia, ro vigei reraaro Turaro ora vigei Kae Pietoaaro tapo, ira vo Saraaro viapau opesia vai.

<sup>12</sup> Osa-a eisi osa vituaro iava vorevoreripavira rutu visii rugoo pie iraopaavere evara iava vearopa vovouro sirova. Ari ita, vara-ia taraitai vo osa Pauto vo reoaro oiraopa visii sopaaro-ia goruvira toupaiveira. <sup>13</sup> Oiso rugooparai osa torevokopai ragaipa eisi osa visii piepaavere vao iava vo rara tootoovira toupaā vo rasio-ia. Oire ra oisi iavirava visii vo rugorugooroaro tore piepaa vara-ia evara vorevoreripavira vearo vovou purapasa. <sup>14</sup> ♫ Uva oiso taraiparai ora ragai-ia, Utupaua ora ragai iava varaua kavuaverea, osa ragai tavireva vigei Turaroaro Jisas Krais aviavi pievira. <sup>15</sup> Osa-a eisi osare akeakepaavoi rutu oai-ia, oiso ra oisi oai iava varare evara vearo vovouro rugoopataverea ragai vo kopiaro isivaaro iava.

### Igei Krais Vaaro Keraria Kekeiova

<sup>16</sup> Uva oisi-a eisi osa visii tavitavipaio vigei reraaro iava Turaro Jisas Krais ira vorevira voreroverea rera vaarova riroa gorua. Uva viapau rutu vo siposiporo iava oisoa osiposiporoi kosi piepaio varao iava oara oirara raga oisoa purapaive voari tuariri rutu. Viapau. Uvare ora igei varaaro iava osireiara oisoa rera siituepaio ovusa ora rera vo goruaro rutu kareke piepareve riroa. <sup>17-18</sup> ♫ Uva evo vuuta raga-ia rera tapo touiova vo pukuio-ia oa tugoropapeira oearovu rutupa, oa-ia Pauto Aite rera vaterева keraria rera vaisiaro rei pieoro. Uva oiso puraroepa, “Rera ro-ia Oviitoa oaa rutu. Ira-ia rirovira rutu roru iraopaavoi rera kaviko iraopaoro.” Uva oisi-a eisi osa puraroepa rera vaaro-ia reoreoa vao oa varaepla vuvuiua iava riroara keraria aviavaro-ia. Ari ita, igei tapo vo reo eva gurukoaro uvuiova vo osa vuvuiua iava varapaepa.

<sup>19</sup> Uva evo reo iavirava tarai ovoiiepa oiso, Oreoa-a ita eva profet irara vaaro oreoa oiraopai rutu. Oa iava visiipa vearopai, ra goruvira rutu vo reo-ia pitu iraopata. Eake iava? Uvare oiso rutu toupaivoi osa vuravu roroaro oa roropai aviavi piepaoro vore rupa tapi vo tugurasa uva ravireo kaero virovere ora aviva aaviiko o-ia iria oiso rutu toupaeveira osa Jisas ira visii sopaaro iare aviavia vatepareveira. <sup>20</sup> ♫ Oire uva vare rugoo iraopata rovopa rutu oiso-ia, Vosa kataitoa raga-a, viapau uvuiparoi ra rera raga oearovupa oreorovu rutu aviavi piepareve varao profet irara vo reoroaro oara Tugoropa Vuku-ia toupaiveira. <sup>21</sup> ♫ Viapau. Uvare profet irara viapau oiso ora voea raga vo rugooaro iava oiso vo reo karekeiva. Viapau. Ari Tugoropatoa raga Uraurato ira voea soporeva roroio pievira vo reore rugoosa oreoa vaterева Pauto voeapa, oisore ra oisi iavirava torevokovira rutu vo reo kosi piepaive.

## 2

### Vuri Vovou Voeao Vaaro Profet Irara Riro Kuuvu Irara

<sup>1</sup> Ari voari rutu tuariri uva riro kuuvu irara oisoa profet irara karekepaave tuariripa irara vuutaaro-ia. Uva oisi raga oiso osa katai raiva-ia oearovu riro kuuvu irara otarairovu vatepa irara karekepaavere vo vokio visii iare vatauvira. Varao iava visii tarai piepasa oara uvuipai ra visii kove piepaive vo siposiporo-ia kuuvuara. Oara iava Turaro vo kovoarore oiso puraavere, “Kuuvu kovo vao,” ro Turaro ira raiva purarevora voeapa Pauto ruvara iare. Uva oisi eisi piepaoro ikauvira rutu vara-ia ora opesi pie ovoipaavere. <sup>2</sup> Ari ita, oearovu siposipopaivere, ra va iava oearovu riro irara voea vo pitupituroaro vuriara rutu otopa pitupituro sirova utupaave. Osa-a eisi osa iava oearovu voeava vurapaoro evoea voare oiraopa lotu vo pitupituro vuri takauvo rutu purapaivere va reroaropaoro. <sup>3</sup> Ari ita, uva moni ou ruipa-ia riro kuuvu irara visiipa oiso ora voea raga vo siposiporoaro vatepaivere voore, oiso ra vara-ia oisi iavirava vori oupaave ora voeapa. Ari tuariri rutu voea vo voriaro reesireva. Oa iava voea ateate piepaoro voeare tuevira toupareveira Pauto uusi asavira rutu. Oa-a eva oa iava voea rovirleipaoro vo voea tovoparevere uva siitokavira toupaiverea voea vararo-ia vuriara.

❖ 1:14: 2 Ti 4:6-8; Jo 21:18-23    ❖ 1:17-18: Mt 3:13-17, 17:1-13    ❖ 1:20: 2 Ti 3:16-17; Ro 12:6    ❖ 1:21: 1 Pi 1:11; Ap 1:16

<sup>4</sup> Ari ita, Pauto viapau oiso voea vura ragapareveira evoea profet irara kuuvu irara. Uvare turariripa irara-ia taraipavio oea ita viapau vura ragareva. Oiraopavira rutu, uvare Pauto viapau oiso voeao enselpa irara vura ragareva oea vuri vovou puraiva. Viapau. Oea evoea tovoreva vo eto kasi-ia opesi tapi rutu. Vo rupa tapi uva vo tuukero toupaiveira sen iroro-ia vo rutu tugurasa uva taru Pauto voea rovirieirevere. <sup>5</sup> ♦ Eisi osa Pauto viapau oiso voeari vura ragareva tuariripa irara. Viapau. Ari pirutu rovu paitua purareva voea opesi piesa voeao oea viapau oisoa Pauto oirao piepaive. Uva Noa aao raga orirureva vo peva vatara (8) rutu evoea oirara, eera Noa ira torevoko vovou rutu sirovava oisoa siposipareve. <sup>6</sup> ♦ Oire uva ouruireivu-a vareo Pauto oareare oiso puraroepa, “Vuri uruirei rutu vareo Sodom uruirei ora vao Gomora urui.” Osa iava vo uruirei opesi pie ovoireva varei kasioro riro kasi rutu-ia eto kasi. Osa-a eisi osa evara piepaoro ovoovoa purareva oearovu rutu-ia. Osa ita uvuipaii ra voeao vaaro-ia opesia taraipaave oea viapau Pauto oirao piepaive. <sup>7</sup> ♦ Oire Lot raga ro vearo vovouto virivarireva evo uruirei rutu kasioro. Ari ita, rera iava sopauaaro rirovira rutu vavataepa vuri irarapa rirovira rutu siraooro. Vao vituaro iava uvare voeae vo pitupituroaro raga-a ita vuriara oara-ia oisoa otopa pitupituro purapaive Reo Taisi gasipaoro. <sup>8</sup> Eera Lot vearto ira oisoa voeae vo vuutaaro-ia vokiara rutu-ia toupareve vo osa rova asavira vo uruirei evarei oisoa toupaive. Uva oisoa voeae siituepareve ora voeae uvupareve tapo. Uva va eva vituaro iava rera vo vovouaro vearo vovou rerare riro vavataepa rutu sirao iraopaoro voeae vaaro iavirava riroa rutu vuria. <sup>9</sup> Vosa kokarapa vovou karekepe voeao-ia oea Pauto sirova utupaaveira, uva oisi-a eisi osa iava Turaro oiso taraiparoveira. Ra va iava voeae vorereve vova kokarapa vovou voeae virivaripaoro. Ora oiso taraiparoveira Turaro voeae vo pitupituroaro-ia vuri irara, oisore ra voeae vo voriroaro pute pievira rutu oupaiverea, voeao-a oearoa rirovira rutu vuri vovouro purapaoro ora voeae vo ruiparoaro sirova utupaaveira Pauto vaisiaro rei vaisi rutu takau ragapaoro. Voeao-ia riro kuuvu irara oirara tuvetuvepa irara oea oearovivu vaisiaro vara piepaiveira vo rara kaureovira rutu ora voeae raga vo rugooroaro iava voeapa siposipopave. Oa-a eva vituaro iava enselpa irara-ia tapo viapau rei vaisi vai purapaiveira voeao oea vuvuiua-ia reipaaveira. Viapau. Ari uriri asavira rutu voeae takau ragapaiveira voeavi akaipa piepaoro. <sup>10</sup> ♦ Oiraopavira rutu, uvare oearovu voeao iava enselpa irara oea vo goruaro riro kuuvu irara vo goruaro-ia pute iraopaiveira, uvare riroa rutu. Osa eisi piepaoro reipa irara enselpa irara viapau oiso takaupaiveira vuri reoro vai-ia vo Turaro osireiaro-ia.

<sup>11</sup> ♦ Evoea riro kuuvu irara oea oiso rutu toupaiveira osa vavarai kare, uvare voeae raga vo rugooroaro sirova utupaaveira varao voeae iava varaura vo ruiparoaro. Evo kare vavarai kare oirara okareroa upopaiveira vo kare aiopaoro voeae opesi pie ovoipasa. Osa eisi piepaoro vo reoro-ia vuri reoro takau purapaaveira oreoroa vituaro-ia viapau taraipaave. Oa iava oearovu voeae voeao riro kuuvu irara upopaoro voeae opesi pie ovoipaveira oiso rutu osa vo karero vavarai karero opesi piepaiveira. <sup>12</sup> Oea-a evoea varaar vuriara voriaro-a vao-ia riroa tavaka, oa oiso toupai osa va vatepaiveira oearovivupa. Vao-ia osa oiraopavira rutu roruvira vuri vovouro purapaiveira oirara rutu osireiaro-ia ravireo vuutaaro-ia varao-ia vuri vovouro voeae iava varaura vo ruiparoaro raga. Oara-ia visiipa ariia vatepaiveira. Oara oiso rutu toupaiveira osa vuvui o iria sisigaruea-ia varoa toupae. Vao vituaro uvare visii rutu tapo aiopaoro ora voeae raga vo rugooroaro vuriara sirova utupaaveira visii keakeapaoro. <sup>13</sup> Vao-ia osa vuravurapaoro otopa riakorore taraapaoro viripaiveira. Osa eisi piepaoro viapau voeae iava osireiaro reareapapeira vuri pitupiturore vuravurapaoro. Uvare voeae tuvetuvepaiveira voeao oearoa-ia viapau riro goru oirao piero vai toupaiveira. Vao-ia osa voeae kuverapaiveira voeae kove piepaoro, oa iava vuri pitupituro purapaiveira. Osa eisi piepaoro ora voeae raga iava sopaura tarai piepaiveira oearovu varaaro riiriipasa. Oiraopavira rutu, uvare voeae vaaro vuria voriaro epao Pauto oa vatererevea voeapa taru. <sup>14</sup> ♦ Ari ita, oea-a evoea torevoko raiva iava piroaepa. Uva eisi pieivoiva, opesikoaepa rutu. Oisi-a eisi osa

◊ 2:5: Jen 6:8-13   ◊ 2:6: Jen 19:24   ◊ 2:7: Jen 19:16   ◊ 2:11: Ju 9-10   ◊ 2:15: Nam 22:5-31

piepaoro vo raivao sirova utupaaveira oa-ia Belam ro Bio oviitoaaro avaroepa. Ira-a ro ira vo moniro ragare rugoroepa oa uvuiparoi oupareve vuri vovou purapaoro. <sup>16</sup> Uva va-a vao oa iava iriavu donki rera vo vuriaro roroio pievira rutu karekeeva rera Belam tavitavioro. Eira donki iriavu reo asa kare iava oira okareroa viapau reoreopaave. Ari eira iriavu vo kare iava iria rerare koruoupa oiravira rutu reoreooro, vo ovusa vuria pura rovosa aueparoepa kokoropa rugorugoo raga sirova.

<sup>17</sup> Voeao riro kuuvu irara, oirara tuvetuvepa irara oea oiso rutu toupaiveira osa tuputupue riku vao oa-ia viapau uukoa vai kaepa piro. Ora oiso tapo toupaiveira osa tuputupue riku vao oa-ia viapau uukoa vai kaepa piro. Ora oiso tapo toupaiveira osa rukuta o iria peopareveira kiuvu. Oa iava viri ragapaeveira. Ra va iava kokeva viapau kovepao rasito kave piepaoro rera tauvapasa. Ari ita, oeapa evoea Pauto ouruivu reesireva tauai rutu vo rupa tapi rutu uva voea tovoparevere. <sup>18</sup> Voeao-ia oirara riro reo pura irara kokropavira oea vuri rugorugooro raga-ia reopaaveira. Oa-ia oaravu rutu vuri vovouro otopara purapaiveira varao oara iare oirara ivupaiveira vaore, oiso ra voea sirova utupaave voearo oea airepavira rupa vovouro kavu ragapaiveira. <sup>19</sup> Voea-a voeao vuri irara oea oiso voea tavipaiveira, “Viapau oiso oavu avu vaiei, ra visii vo ruiparoarore korupape.” Eisi osa purapaaveira. Oa iava ora voea vo vovouroaro vuriara oara-ia voea raga tuukepaiveira rutu. Uva oisi-a eisi osa vara-ia evara ora opesi pie ovoipaaveira. Ari ita, varao vuriara oara oirato tuukepaive, vo rara rera-ia putepaive rutu vo vovouro evara. <sup>20</sup> Oiraopavira rutu, vo osa vuri vovouro oaiive vo rasio iava oara isivaaro iava oisoa Jisas Krais-ia tarai rovopaave ro Turaro vigei Kae Piepatoaaro. Eva-a oa-ia oisoa ora voea vararo vuri vovouro asavira toripaive, varao ovovouroa uvuipai ra voea iava sopaura oaiive vuri piepaive. Oire ra ita va isivaaro iava vorerivira ita aia vo vovouro evara vuriara voea tuukeve ita voea-ia puteoro rutu. Uva siraovira rutu-a oisi voeavipa eisi. Ari ita, voari vuriara oaiive rovoaro-ia ovuria-ia putevere vo virio voea vo opesiaro.

<sup>21</sup> ♦ Osa ita eisi vearpai voeapa oiso vo osa viapau torevoko vovou vo pitupituar-ia viapau tarai rovopaaeri. Eake iava? Uvare oisoa-ia Pauto vaaro-ia Reo Taisi rovovira tarai rovoae, oreoa ouiva rera ruvara-ia. Oire uva vare ita vorevira isivaae. Uva va-a eva vituaro iava ora voea vo vuriaro voriaro oupaiverea riroa rutu pute pievira rutu. <sup>22</sup> ♦ Oa-a vao vuri pitupitu oa vo ovoovo oirao piepaiveira rutu. Oa oiso purapapeira, ‘Kaakau vorevira vo aio aiopaeveira oa oe rovopaeveira.’ Ora vo reo oa oiso purapapeira, Koie oisoa sisu rovopaora uuko ovi-ia, vorevira ita sikupasa tuuvua-ia vorepao. Oisi raga ita osa voeao oirara oea vorevira vorepaave ora voea raga vo pitupituroaro vuriara purapasa ita.

### 3

#### *Oiraopavira Rutu Turaro Voreroverea Taru*

<sup>1</sup> Vate irara oaa, vo pasio-ia eraopa pasi oa rigatoavoi visiipa. Vao iava osa vo pasirei rutu-ia vareo-ia vo reo puraavo visii vo rugorugooro tore piesa airerei rugorugooro vo osa vearo vovou ruture visii rugoo piepaavoi. <sup>2</sup> Uva oiso ruipaparai ra vo reore rugoopata profet irara oa vateiva visiipa Pauto voeao. Ora vao riro goru reo rutu Turaro vaaro vigei Kae Piepato oreoa vatereva visii voeao aposel irara gisipoaro-ia. Oreare tapo eva rugoo iraopata.

<sup>3-4</sup> ♦ Vearovira tarai iraopata vao-ia, uvare voari ovoiopa vuutaro iava vo vokiro-ia uva oearovu karekeaverea voeao oea ora voea raga vo vovouroaro sirova vuriara utupaaverea. Oa iava visii tovipaoro agesi pievira oiso purapaaverea, “Oiso puraroepa Jisas, Vorevira voreraverea vuvuiua iava. Uva apeisi-a? Uva ovu rutu-a vo uva touparevoi vo rasio-ia? Uvare viapau oiso oavu avu vai vo rasio iava ora tavariopaoro voari rutuva rovooro tuariripa vuuta-ia urioepa, uva kopliaepa vigei avu iraraaro vo vokio-ia rekasisa ovokia vao-ia. Oiraopavira rutu, uvare orekerovu rutu areiivira toupai voari rutuva rovopaoro uva rasito rovoroepa.” <sup>5</sup> ♦ Uva eisi purapaoro oiso ruipapaaveira ra vaore ovauave Pauto vaaro vo osa reoreoroepa voari tuariri. Vao osa iavirava vuvuiuarei

♦ 2:21: 2 Pi 3:2   ♦ 2:22: Pro 26:11   ♦ 3:3-4: 2 Jo 1:7-11   ♦ 3:5: Jen 1:6-13

ora rasia karekeepa, vo rasio-a oa purareva uuko ovi iava, oa iava vo rasiro avakava vuuvuutaaro-ia toupaiveira oiso. <sup>6</sup>◊ Ari ita, voari tuariri vo rasi vao opesi piererva uuko ovi raga-ia vo uva pirutu rovu-ia paitua purareva voari tuariri. <sup>7</sup>◊ Ari vo vokio vuvuiuarei ora rasito Pauto virivaripareveira rera vo reoaro iavirava. Uva ita, ovokivu epao vo utupavira ovoki-ia rasia opesi piereverea aue-ia eto kasi vo rasi kasioro. Iu. Varei evarei virivaripareveira vo vokio rutu iare oa-ia oearovu rovirieireverea rara voea opesi pie ovoioro, voeao oea viapau Pauto vo vovouaro sirova utupaave.

<sup>8</sup>◊ Vate irara oaa, viapau uvuipatai ra ovaupata vaore tarai reo oa oiso purapapeira, "Turaro katai voki ovoovopareveira aue-ia, katai tuku (1,000) ivaro. Oiso osa katai tuku (1,000) ivaro ovoovopareveira oiso, katai voki raga. Varei vo vuutareiaro rutu areiivira vaeapaoro." <sup>9</sup>◊ Osa-a eisi osa Turaro viapau oiso garutuvira varao oirao piepareveira oarare vigeipa reo ovoi purareva. Ari ita, oearovu rerare oiso purapaaveira, "Riro garututo eera," osa viapau. Vo osa visii ateate piepareveira. Eake iava? Uvare vaopa reasiparoi ra irai oirara rutu iava opesikoro. Ari oiso rutu ruipaparoveira ra oirara rutu voea vo vovouroaro iava vuriara vorevira porea viro. Eisi osa vituaro iava ateate piepareveira.

#### *Rasito Ora Vuvuiua Opesi Ovoiperea Rara*

<sup>10</sup>◊ Oiraopavira rutu ita, uvare Turaro vo vokiaro-a oa kaviruvira karekeperea oiso osa kavirupato karekeparoveira. Ovoki-a eva oa-ia vuvuiua opesi ovoiperea vo osa riroa rutu gurukoa pura piro. Oa-a vao oa-ia aaviikoara ora orekerovu rutu vuvuiua-ia touara rova ovoiperea opesi ovoioro. Osa raga ita vo rasio tapo pieverea ora orekerovu rutu vara oara voa toupaiveira. <sup>11</sup>◊ Oire vosa vara rutu evara oisi eisi pieve, uva apeisi-a oiso osa uvuipatai ra toupata vo vokiro-ia? Uvui iraopatai ra torevoko vovou rutu airereia purapata ora visii iava vearovira sopaura rutu tovopaoro Pauto vo ruipaaro rutu sirova utupasa. <sup>12</sup>◊ Oisi eisi piepata vo vokire tuepaoro Pauto vo vokiaro, vo osa Pauto vo kovoaro tapo vearovira rutu pura iraopata. Oa iava uvuipai vo voki eva vagevagevira rutu tutuu pievira karekepe. Uva vo voki-a eva oa-ia vuvuiua rutu rovaoro opesiperea, ovusa riro kasi rutu tuituia karekepe, vao oa vara rutu orekerovu kasiverea, osa vara rutu kasiraopavira paruvorea. <sup>13</sup>◊ Ari vare voari tuepavioveira Pauto oare vigeipa reo ovoi purareva oiso-ia,

'Airepaua perea vuvuiua ora airepato rasito vo uva torevoko vovouro raga purapaiverea vokiara rutu-ia.'

#### *Uvui Iraopavio Ra Tuevira Touavio*

<sup>14</sup>◊ Osa-a eisi osa visii vate irara oaa tuevira toupata aireparare kasivarivira rutu sisigaruevira raga toupaoro Pauto osireiaro-ia, vo rara viapau vuriara vai purapata. Osa iava uvuiparo Pauto visii tapo ora agiagipaoro vokiara rutu-ia toupareve. <sup>15</sup>◊ Ari ita, taraipataveira oiso osa Turaro visii ateate piepareveira. Uva vo raiva-a eva rera vaaro visiire oa iavirava uvuipatai ra vorevira rera iare ora visii iava sopaura porepata. Oiso osa visiipa vo rigato purareva oisi iavirava ro vigei araokotoaaro rutu Pol. Vo uvare Pauto rera vatereva taraia va iava. <sup>16</sup>◊ Uvare tavitaviroepa vo raiva iava oisi eisi ora rera vo pasiroaro rutu-ia. Ari ita, oreorovuei vo pasiro sovara-ia evara oreoroa viapau roroiovira tavitavipai. Oreoroa oearovu tarai asa irara ruruvutu vovouvira raga pisavira aviavi pie ragapaiveira. Osa rutu ita-a eisi oreorovu vuri piepaiveira oearovu voea iava vo Tugoropa Vuku sovara-ia. Vo osa oearovivu piro piepaoro ora vuri pie ovoipaveira voea raga.

<sup>17</sup>◊ Vate irara oaa, eva-ia ravaa reo taraitaera. Uva oisi-a eisi osa iava uvuipatai ra ora vatatopo iraopata vaopa, teapi voea evoea vuri irara visii ivupaivere ora voea vo vovouroaro raga sirova utupasa. Ari ita, oea-a evoea oea vokiara rutu-ia reo goru putepaiveira. Vosa voea vo pitupituroaro vioepaoro oiso vara purapata, oa-ia uvuipatai ra ora vavagisi piepata ora piro piepaoro. <sup>18</sup>◊ Ari uvui iraopatai ra vereopa vovou raga vearo pitupitu rutu-ia purapata, ra oisi iava kovapape. Osa iava visii vo tarairoaro uvuipai

---

◊ 3:6: Jen 7:11-24    ◊ 3:8: Sam 90:4    ◊ 3:9: Ais 30:18; 1 Pi 3:20    ◊ 3:10: Mt 24:42-51; 1 Te 5:2; Re 21:1  
 ◊ 3:11: Re 20:11-15    ◊ 3:13: Ais 65:17-25    ◊ 3:14: 2 Pi 1:10; 1 Ko 15:58; Fl 2:15    ◊ 3:17: 1 Ko 10:12  
 ◊ 3:18: Ef 2:8-9

ra riropape rutu ro iava Jisas Krais vigei reraaro Turaro ora vigei Kae Pietoaaro. Ira vaisiaro kae piepaoro uvuipaviei ra rera-ia vuurapa vaisi purapape vo vokio ora vokiara rutu-ia opesi asavira. Ovoiei.

Eisivi raga osa vo pasio purapaavoi.  
Ragai-a vao, Pita.

## 1 JON

### Irapa Reoro Vo Vukuo Iava

Vo pasio rigatoreva Efesas urui-ia toupaoro ae 90 yia Jisas vaaro isivaaro iava kavaua. Uva voea rutupa oirao pie vovou irara vo rigato purareva. Ira varao iava siposipoara rigatoreva oara viapau vaeavira toupaiveira oiso-ia, aviavia vao ora rupa (1 Jo 1:6-7, 2:8-11), rasito varaaropa ruipapaoro ora Pauto varaaropa ruipapaoro (1 Jo 2:15-17), Pauto voeaaro ovii irara ora Seten voeaaro ovii irara (1 Jo 3:4-10), siraopa vovou ora kasipupa vovou (1 Jo 3:11-18, 4:7-12, 16-21), Pauto reraaro Uraurato ora Krais-va keripato reraaro uraurato (1 Jo 4:1-3).

Goruvira rutu oirao pie vovou irara tavireva oiso ra viapau uvuipai ra kuuvu irara tisa irara vo siposiporoaro uvupaise. Voeao oea kuuvuvira siposiporo raga purapaiseira oiso, Viapau uvuipa Krais ra varaua-ia kavauro, uvare vo varaua oua-ia toupapeira oa agasipapeira ae-ia vuri pitupituro. Uva vo siposiporopon Jon goruvira oirao pie vovou irara tavireva, oiso ra viapau vara oirao piepaive voeao oirao pie vovou irara (1 Jo 4:1-3).

1. Aviavi pie reoro vo pasio iava uvare oiraopa reo rutu oreoroa iava rigatoreva, 1:1-4.
2. Aviavia-ia vokapaoro uvuipa Kristento ra ora rera vo vovouaro-ia oirao pie vovou taraiparo, 1:5-2:29.
3. Pauto vo vovouaro-ia kaviko vovou toupaoro uvuipa Kristento ra ora rera vo vovouaro-ia oirao pie vovou taraiparo, 3:1-4:21.
4. Uvuipa Kristento orekerovu vuriara-ia putepasa vo osa goruvira Krais-ia rari iraoparo, 5:1-12.
5. Pauto Oviitoaaro-ia taraipavio ira uvuipa vigei orirupasa vuri vovouro purapa arapa, 5:13-21.

#### *Tootooa Vatepa Reoaro Iava Ro-ia Jisas Krais*

<sup>1</sup>◊ Vao-ia oa oiso ragavira touva voari tuariri rutu rovoa-ia vo uva vo rasio pura asavira touva. Oa iava igei va uvuiovora, ora va kekeiovora vo ora igei osireiaro iava. Ora va vuravuraiovora, ora va-ia tapo pitupituovora ora igei vavaearo iava vao-ia Tootooa Vatepa Reo. <sup>2</sup> Oire uva va-a vao Tootooa oa poeravira ora karekeepa, oa iava igei va kekeiovora. Uva oiraopavira va iava siposipopaiovora visiipa va iava vao-ia Tootoo Ovoi rutu. Oa-a vao oa tuariri rutu Aite tapo touva, oa iava poeravira ora karekeera uva va kekeiovora igei. <sup>3</sup> Uva igei va kekeiovora ora va uvuiovora. Oa-a eva oa iava visii siposipopaiovoi, oisore ra va iava vigei rutu uvuipavie i ra katai vovou raga purape Aite tapo ora rera Oviitoaaro Jisas Krais. <sup>4</sup>◊ Uva vo reoa vao-ia oa rigatopaiovoi, oisore ra va-ia vigei rutu vukupavio rutu vao-ia rorua.

#### *Uvuipavie Ra Aviavia-ia Vokape*

<sup>5</sup>◊ Vo reo-a vao-ia oa uvuiovora oreoa igeipa vaterevora ro Pauto Oviitoaaro. Oa iava visiipa siposipopaiovoi oiso-ia, Pauto-a aviavia ira-ia viapau rutu rupaa vai toupaiveira. <sup>6</sup> Vosa vigei oiso puravio, “Ragai katai vovou rutu purapavei rera tapo,” vo osa rupa vovou vo pitupituar-ia vokapape, oire ra oisi iava vo reo oiso pura piro, Kuuvu reo. Ra viapau oiraopa reo vo pitupituar-ia vokapape. <sup>7</sup> Ari vosa rera vo aviavaro-ia vokapape vo aviavio oa-ia toupareveira Pauto, eva oa iava vigei rutu katai vovou purapave oearovu rutu tapo araoko irara oavi, voeao oirao pie vovou irara. Oire ra va iava revasiva o Jisas iava Pauto Oviitoaaro vigei iava vuriara oavi verapaeve. Ra va iava sisigaruepavio.

<sup>8</sup>◊ Vosa oiso puravio, “Ragai viapau vuria vaiei,” oire uva vigei raga ora vigei iava sopapro oavi keakeapai. Ra oisi iava viapau oiso Pauto vaaro oiraopa reo vigei sopapro-ia toupaive. <sup>9</sup> Ari vosa vigei vuri vovouro oavi kosi piepe vara iava Pautoa-pa tavitavioro, eisi osare reo ovoi purareva oiso ra oisi iava oiraopavira oisi piereve vigei-ia. Osa iava

---

◊ 1:1: Jo 1:1, 14; 2 Pi 1:16; Jo 20:27   ◊ 1:4: 1 Jo 2:1; Jo 3:29, 15:9-14   ◊ 1:5: Jo 9:1-7, 39-41   ◊ 1:8: Jop 15:14; Pro 20:9; Je 3:2

uvuiparoi ra vigei iava vuriara oavi verapareve vigei-ia rera vaaro torevoko vovou rutu purapaoro. Eisi osa iava uvuipavie i ra sisigaruevira rutu toupape. <sup>10</sup>◊ Vosa oiso puravio, “Viapau oiso ragai vuria vai oiraopavira puraavorao,” uva vo reo-a eva oa-ia Pauto oiso pie ragapai, Kuuvuto, uvare oiso puraroepa, “Oirara rutu vuri vovou purapaiseira.” Ra oisi iava viapau oiso rera vo reoaro oiraopa reo vigei soparao-ia toupaise.

## 2

*Krais-a Vigei Tauvapato*

<sup>1</sup>◊ Vo rigato puraavoi visiipa kakae vure oaa, auere ra viapau vuri vovou purapata. Oire vosa irai vuria vai purapareve, uva toupare Jisas Krais vigei tauvapatoaaro eera torevoko vovoutoa rutu, ira Aite arepareveira vigei iavirava. <sup>2</sup> Aue vituaro iava uvare Krais raga-a ira raiva purareva vigei vo vuri vovouro oavi vo voriaro opesi pieoro vaore, oiso ra vuriara rutu vera ovoireve vigei iava. Ari ita, uva viapau oiso vigei raga varaaro-a vuriara. Ari oearovu rutu vo vovouaro-a vuri vovouro voearo voraro rutu.

<sup>3</sup> Vosa oiraopavira rutu Pauto vo reoaro goru reo rutu sirova vearovira rutu utupavio, oire ra va iava oiso taraipavio, O ari, oiraopavira rutu Pautoa-ia taraipavie. <sup>4</sup> Ari vosa irai oiratoa vai oiso puraro, “Ira-ia Pauto taraiparai,” vo osa viapau vearovira rutu Pauto vaaro goru reo sirova viapau utuparo, oire uva rera-a eera riro kuuvuto. Ra viapau oiraopa reo sirova utuparo va-ia taraipasa. <sup>5</sup> Ari ro ira Pauto vo reoaro uvupaoro va purapareve, eera-a ira vuku iraoparoveira rerapa siraopaoro. Oire uva apeisi ragavira uvuipavie i ra vao-ia taraipavio oiso, Ora tavosivie i rutu Pautoa tapo, eke? <sup>6</sup>◊ Eisi osa-a oiso-ia vosa irai oiso puraro, “Ragai Pautoa tapo tavosivira toupaavoi,” uva rera-a eera torevoko pitupitu puraparevoi oiso rutu osa Jisas Krais oisoa va purapaoro toupareve vo rasio-ia.

*Ro Oirato Ira Araokotoapa Ora Rera Iava Sopaua Rutu Vatepareve, Eera Ira Aviavia-ia Toupare*

<sup>7</sup>◊ Vate irara oaa, riro goru reo rutu vao-ia oa rigatoavoi visiipa. Uva viapau oiso airepa reoa. Viapau. Ari tuariripa reo rutu-a vao-ia vo reo oa oisoa visii-ia toupaive vo osa oirao pie vovouro oavisii rovoera. Oreoa raga vao-ia oreoa vo siposipoaro-a vao oa uvutava voari tuariri rutu. <sup>8</sup>◊ Uva vo reo raga-a vao-ia goru reo oare oiso puraparai, Airepa reo. Eake iava? Uvare tutuu pievoi auere ra rupa vuuta opesipe. Uvare oiraopa aviavi rutu voare kaviko vovou vo pitupituro roroparevoi aviavipaoro. Vao vituaro osa ragavira oirara uvuipaii ra goru reo eveipave oiso puraoro, “Akoea, oiraopa reo rutu-a vao,” vo ae iavirava Krais vo touaro ora visii vo touaro tapo.

<sup>9</sup> Ari ita, vosa irai ita oiso puraro, “Ragai aviavia-ia vokapaavoi,” vo osa kasipuparo ora rera araokotoaarore, ira-a eera ira touvira rutu rupa-ia toupareveira vo rutu vo vuutao rutu-ia rekasisa vo vokio. <sup>10</sup> Ari ro ira araokotoapa siraoparo, ira-a eera ira aviavia-ia vokapareveira. Eisi osa iava viapau oiso vuria vai rera-ia toupaiveira vao oa iava viapau uvuiparoi ra irai vovouaro piro pievere. <sup>11</sup>◊ Ari ro ira araokotoare kasipuparo, ira-a eera touvira rutu rupa-ia touparevoi. Orupaa-a eva oa sovara-ia viri ragapareveira torevoko rugoo arova. Eake iava? Uvare rera osireiaro voosi pieva vuri rugoo.

<sup>12</sup> Kakae vure oaa, vo rigato puraavoi visiipa, uvare vuri vovouro oavisii rutu vera ovoireva Krais visii iava rera vo raivaaro iavirava. <sup>13</sup> Aite irara, vo rigato puraavoi visiipa, uvare rera-ia taraipatai ro ira oiso toupareveira voari rutu rovoa-ia ora vo vokio. Uva visii tapopa viovoko irara vo rigato puraavoi. Vao vituaro iava uvare ro-ia putetavorao rutu tugara kare reitoaaro ro-ia Seten rera vo varivariaro tokoro.

<sup>14</sup>◊ Oire ragai-a vao vo rigato puraavoi visiipa kakae vure oaa, uvare taraipatai ro-ia vigei Aitearo. Uva vo rigato puraavoi visiipa aite irara, uvare taraipatai rera-ia ro ira voari rutu oisoa toupareve rovoa rutu-ia ora vo vokio. Ora visii vao viovoko irara visiigoapa tapo vo rigato vao-ia puraavoi, uvare goru vovouvira rutu toupataveira, vo

◊ 1:10: 1 Jo 5:10; Ro 3:21-25   ◊ 2:1: Ro 8:31-39; Jo 14:15-26; Hi 7:25   ◊ 2:6: Jo 15:10-14; 1 Pi 2:21   ◊ 2:7: 1 Jo 3:2, 11   ◊ 2:8: Ef 5:8; 1 Te 5:5; Jo 1:9   ◊ 2:11: Jo 12:35   ◊ 2:14: 1 Jo 1:1; Ef 6:10; Jo 5:38

osa Pauto vo reoaro kovopaiiveira visii iava sopaura sovara-ia. Ora vao tapo iava osa rera-ia ro Seten-ia putetavora rutu rera vo varivariaro tokoro.

#### *Viapau Uvui Iraopavieie Ra Ora Vigei Iava Sopaura Oavi Vatepape Rasito Vo Pitupituaropa*

<sup>15</sup> ♦ Opeita varao riiriipata oara rasitoa-ia toupaiveira, ora varao oara rasitoa iava ora karekepapeira. Vosa oisi eisi piepata vara ragare rugorugopaoro rasitoa iava vara, uva viapau uvuipai ra visii-ia toupaive vao Aite tapo ora tavosipa vovou. <sup>16</sup> Eake iava? Uvare varao oara vova rasitoa-ia ora karekepapeira oiso-ia osa varao oarapa ruipa iraopaveira oirara vuri vovouro rutu purapaoro. Ora oiso osa vara kekepaoro vara riiriipaveira. Ora oiso osa vara iavirava oirara ora voea-ia rei vaisi purapaveira. Ari ita, viapau oiso varao iava oisi oai kareke piepareveira Aite. Ari rasitoa raga aueroaro-a evara. <sup>17</sup> ♦ Oire uva rera ro-ia rasito ora vara rutu varao oara riiriipaveira ovatakoroa rutu opesiperea. Ari ro ira Pauto vo vovouaro sirova vearovira rutu utuparo, eera-a ira Opesi Asa Tootoo rutuva touparevereia.

#### *Keripa Irara Krais-va Karea Viroi*

<sup>18</sup> ♦ Kakae vure oaa, vigei-a vao ovoiopa vuuta-ia toupai. Oire uva vo vuuta eveipai rutu vao-ia. Eake iava? Uvare riro irara rutu-a Krais-va ora keripa irara oea karekarekepaa viroi. Ari ita, tuariri voea iava uvu rovotava oiso, “Ro Krais-va ora keripato ira tapo epao vo vuuta-ia eva uriosa aue-ia ovoiopa vuuta. <sup>19</sup> Oire uva voea-a evoea keripa irara oea viapau oiso vigei tapo ora tavosiaepta. Eisi osa vituaro iava vigei kavuiva. Vosa oiraopavira rutu vigei tapo ora tavosipaave, osa iava uvuipaaai ra touvira rutu vigei tapo toupaive. Ari vigei arova avaaepa. Oa iava uvuipavieie ra vearovira rutu taraipavio oiso, Asi viapau oiso voeo vigei tapo ora tavosiaepta.

<sup>20</sup> ♦ Ari ro raga Tugoropato Uraurato ira visii-ia toupareveira, Krais ira vara pierava visiipa, eera ira iava oiraopa reo rutu-ia vearovira taraipataveira. <sup>21</sup> Oire uva vo rigato puraavoi visiipa, aue iava uvare oiraopa reo rutu-ia taraipataveira. Ari ita, viapau vao-ia oiraopa reo rutu tarai asavira toupataveira. Ora vao-ia tapo oiso taraipataveira, Viapau oiso vao kuuvu reo vova oiraopa reo rutu-ia karekepapeira.

<sup>22</sup> ♦ Oire uva iroutoa rutu-a rera ro riro kuuvuto? Ari ro raga ira oiso puraparoveira, “Viapau oiso Jisas-a ro Krais ro ira arureva Pauto vo rasio iare. Uva rera raga-a eera Krais-va keripato. Ira vo aaorei rutu ora Aiteto ora Oviito akaipa piepareveira vo aaoreire isivapaoro. <sup>23</sup> Uvare ro oirato ira oiso Oviitoare isivaparo, eera ira Aitetoare tapo isivaparo. Ari vosa irouto ro ira Oviito vaisipaoro oearovupa tavitaviparo oiso, “Jisas-a Pauto Oviitoaro,” eera ira-ia toupareveira Aite.

#### *Tugoropato Uraurato Ira Vigei Tarai Piepareveira Oiraopa Reo Rutu-ia*

<sup>24</sup> Ora vatatopo iraopata, ra vo siposipo oriru iraopata oa uvutava voari rovoa-ia. Ra goruvira rutu vo siposipo-ia pitupata. Ra va-ia toupaoro uvuipatai ra Oviito tapo ora tavosivira rutu toupatata ora Pauto Aite. <sup>25</sup> ♦ Krais reo ovoi rutu vatereva, oisore ra va iavirava Tootoo Ovoi rutu oupape rera ruvara-ia.

<sup>26</sup> Ari ita, vo rigato puraavoi visiipa voeo iava oea oiso ruipapaaveira rutu ra visii-ia kokarapaave voea vo reoroaro-ia kuuvuara. <sup>27</sup> ♦ Uva viapau oiso torevokopapeira voearopa oearovu, oiso ra visii tarai piepave vo reo iava oiraopa reo o vo reo iava kuuvu reo. Eake iava? Uvare Tugoropato Uraurato visii-ia toupareveira ro ira vara pierava Krais visiipa. Rera-a Tugoropato Uraurato ira visii tarai piepareveira orekerovu rutu iava, uvare rera vo siposipoaro-a oiraopa rutu. Viapau oiso keakeapavira oirara tarai piepareveira. Oa iava uvui iraopatai ra rera vaaro oiraopa reo rutu sirova utupata vo osa Krais tapo tavosivira toupatata.

<sup>28</sup> Ari ita, kakae vure oaa Krais tapo tou iraopata vo vokio iare oa-ia oiso vorevira karekeroverea ita. Uva eisi tuuvu vovouvira toupaoro viapau oiso ra ora vataupavio rerapa ariipaoro vo vokio-ia oa-ia vorevira ora karekeroverea vigei iare. <sup>29</sup> ♦ Oire uva oiso ragavira taraipata, Krais torevoko vovouvira rutu toupareveira oa-ia viapau viria

❖ 2:15: Ro 12:1-2; Mt 6:24; Je 4:4    ❖ 2:17: 1 Ko 7:31    ❖ 2:18: 1 Pi 4:7-8; 1 Jo 4:1, 3    ❖ 2:20: 1 Ko 2:9-16; 2 Ko 1:21    ❖ 2:22: Re 21:8    ❖ 2:25: Jo 3:16-21, 17:3    ❖ 2:27: Jo 16:7-13    ❖ 2:29: 1 Jo 3:7, 9, 4:7

vai. Oisi eisi ragavira rera-ia taraipaoro uvuipatai ra vao-ia tapo vearovira taraipata ro iava oirato ira torevoko vovou purapareve, ira raga ita-a eera Pauto oviitoaaro.

## 3

*Oiso Toupapeira, Vigei Pauto Ovii Iraraaro*

<sup>1</sup> ♦ Oiraopavira rutu Aiteto-a ira vigei kaviko iraopareveira rutu. Uva pute pie siraorutu-a rera vaaro oa-ia vigeipa toupareveira. Oa-a vao vituaro iava vo vaisio vigeia toupaiveira oiso, Vigei-a Pauto ovii iraraaro. Uva ita, oiraopavira rutu uvare oisi ragavira toupapeira. Eva-a oa vituaro iava voea voeo vo rasio-ia viapau oiso vigeia taraipaaveira vo osa oisi eisi toupape. Uvare viapau oiso Pautoa-ia taraipaaveira.

<sup>2</sup> ♦ Kakae vure oaa, oiraopavira rutu osa oiso toupapeira, Vigei vao-ia Pauto ovii iraraaro. Uva tou visivi roroio pievira rutu ora vigei vo touaro-ia taraipaviovere, otoua pura piroverea vovio Pauto vo uruiaro-ia utupa visivi. Ari vo vokio oiso taraipavie, Oiraopavira Krais vore vorevira karekeroverea vigei iare. Oa iava rera kekeperea oiso osa oiraopavira rutu toupareverea. Vo osa rera-ia oiso taraioro oisi rutu karekevoverea osa rera. <sup>3</sup> Eva-a oa iava voea oea Krais-ia raripaoro toupaiveira tuevira vo vuutaore oa-ia vaeavira toupavereea oiso osa rera, vo rara ora voea iava sopaura oaive tokipaise oiso ra roroiovira toupaive. Osa iava viapau vuria vai voea-ia, oiso rutu osa Krais ro ira-ia viapau vuria vai.

<sup>4</sup> Ari ro oirato ira vuri vovou purapareve, eera-a ira Pauto vaaro reo goru gasipareveira. Eva vituaro-a vao-ia uvare va eva vuri vovou oa sirova reo goru gasipaveira. <sup>5</sup> Oire uva taraipata oiso, Krais oiravira karekeroera vo rasitoa-ia, oisore ra raiva purareve oirara rutu vararo vuri vovouro verapa raiva. Ora aue tapo taraipata oiso, Viapau rutu vuri vovou oisoa purapareve Krais vo osa oisoa vo rasitoa-ia toupareve. <sup>6</sup> Oire uva voea oea oiso Krais-va ora tavosipaaveira, oea viapau oiso vorevoreripavira vuri vovouro purapaveira. Ari ro ira vuri vovou purapareve vorevoreripavira, eera-a ira viapau oiso Krais vo touaro vituaro eveirevora. Ora viapau oiso Krais-ia tarairoera.

<sup>7</sup> ♦ Kakae vure oaa, viapau rutu oiso ra iravupa ora visii iava vasepata, ro ira uvuiparoi oiso ra visii keakeapareve. Vao vituaro iava oiso-ia vo osa ro ira torevoko vovou rutu purapareve, ira-a eera ira-ia torevoko vovou rutu toupaiveira oiso rutu osa Krais vo vovouaro. <sup>8</sup> Ari ro ira vorevoreripavira vuri vovouro purapareve, ira-a eera Seten reraaro. Uvare Seten vo pitupituro sirova utuparoveira. Evo vovou vuria rutu Seten oa oisoa purapareve voari rutu rovoa iava, vo osa vo rasio pura asavira touva. Oire uva Pauto Oviitoaaro karekeroepa va vao Seten vo kovoaro opesi piesa. <sup>9</sup> Ari ro oirato Pauto reraaro ira viapau oiso vorevoreripavira vuri vovouro vai purapareve. Eake iava? Uvare Pauto-a Tootooa rutu vituaro. Ovituaro-a vao rera vaaro oa rera sopapro-ia oirato toupaiveira. Ari ita, Pauto-a eera oirato aitetoaaro. Oa iava viapau uvuiparoi oirato ra vorevoreripavira vuri vovouro vai purapareve. <sup>10</sup> Oire ra oiso ragavira taraipavio, Pauto ovii iraraaro pisa visivi rutu toupaiveira voeaopa Seten ovii iraraaro. Vao vituaro iava vosa ro ira viapau torevoko pitupitu purapareve, ora viapau oiso ora rera sopapro vatepare araokotoapa siraopaoro, ira-a eera ira oiso toupare, Viapau oiso rera-a Pauto oviitoaaro.

*Oiraopa Vovou Rutu Sopaua Rutu Vatepasa Araokotoa Oaviipa*

<sup>11</sup> Vo tavitavia-a vao-ia oa iava uvutava voari rovoa-ia oa oiso purapai, Vigei uvui iraopavie, ra oearovivupa siraopavio ora vigei iava voea. <sup>12</sup> ♦ Uva viapau rutu oiso uvuipavie, ra oiso piepape osa ro-ia Adam oviitoaaro Ken Seten reraaro. Ira araokoto uporeva rera kopii pieoro. Oire uva eake-a vao oare araokoto upooro rera kopii pierava? Oa-a vao vituaro oiso toupaivoi-ia, uvare rera oisoa vuri pitupituro purapareve, ovusa eera araokoto torevoko pitupituro oisoa purapareve.

<sup>13</sup> ♦ Araoko irara oaa, opeita oearovu vo vovouaro-ia tavetave iraopata voearo vo rasio-ia vo rara visiire kasipu iraopaave. <sup>14</sup> Ari vigei-a vao vigoa ora vigei araoko iraraaropa siraio iraopavioveira. Eva-a oa iava uvuipavie, ra taraipavio oiso, Va vao

❖ 3:1: Ef 2:1-7; Jo 1:12 ❖ 3:2: 1 Ko 13:9-13; Ro 8:15; 2 Ko 4:17 ❖ 3:7: 1 Jo 2:1, 26, 29; Hi 6:1-9 ❖ 3:12: Jen 4:1-15 ❖ 3:13: Jo 15:18-27

kopiipa vovou oa iava iviropaviera vore tootoopa vovou-ia. Uva ro oirato ira viapau siraopa vovou purapareve, eera-a ira touvira touparevoi kopii vovou raga-ia. <sup>15</sup> ♦ Ro ira touvira kasipu vovou purapareve ora rera araokotoaaro, ira ita oiso touparevoi osa riro oira upoto. Oa iava rera-ia taraipatai oiso, Viapau oiso ro-ia Tootoo Ovoi vai toupaiveira. <sup>16</sup> ♦ Oire uva apeisi ragavira uvuipavie ra vearovira rutu va-ia vao sirao vovou taraipavio? Ari oiso-ia, Krais ora rera iava vasereva oearovupa, oiso ra rera kopii pieive vigei iavirava. Oa iava uvui iraopavie ra ora vigei iava tootooara oavi rutu vatepape oearovivu araoko irara oavi tauvapaoro. <sup>17</sup> ♦ Vosa irouto ro ira riroara rutu ia orekerovu rutu pitupareve, ra varava reasiparo iravivu araokotoaaro tauvapa arapa, vosa eisi piepareve, ra eake iava oiso puraparo, “Ragai Pautoa-pa siraoparai rutu ora ragai sopaaro rutu iava”? Viapau oiso uvuiparoi rutu ra oisi piereve. <sup>18</sup> Kakae vure oaa, vigei viapau rutu uvuipavie ra sirao reo purapape vo ragava gisipoara iava. Viapau. Ari vosa sirao vovou rutu purapape, oa iava uvuipaai oearovu va eveipasa, vo rara sirao vovou rutuva kovopaoro oearovivu tauvapape.

*Ro Riro Rarito Viapau Uvuipa Ra Uririparo Pautoa-pa*

<sup>19</sup> ♦ Uva oisi eisi oearovupa siraopaoro uvuipavie ra oiso taraipavio ora vigei-ia, Oiraopa vovou purapai va vao Pauto vo vovouaro rutu. Osa iava uvuipavie ra Pauto osireiaro-ia rasivauru vovouvira rutu toupape. <sup>20</sup> ♦ Vao rutu vituaro iava vosa ora vigei iava sopaura oavi rutu-ia sovopape oiso, O ari vuri pitupitu purapai. Oire uva uvuipavie ra oiso ragavira taraipavio, Pauto vo taraiaro vigei vo vovouroaro-ia putepaiveira rutu. Uvare orekerovu rutu-ia taraiparoveira rera Pauto. Eva oa-ia uvuipavie ra Pauto osireiaro-ia uriri asavira toupape. <sup>21</sup> ♦ Oire vate irara oaa, vosa ora vigei iava sopaura oavi sovopaoro oiso purapavio, Asi vigei viapau oiso viria vai purai, eisi osa iava uvuipavie ra Pauto osireiaro-ia uriri asavira rutu toupe. <sup>22</sup> ♦ Uva varao oupapeira rera ruvara-ia oarare rera arepapeira. Eake iava? Uvare rera vaaro goru reo uvupapeira oisi va purapasa. Uva va-a eva oa-ia rera roru piepapeira ora vigei-ia. <sup>23</sup> Uva va-a vao oare vigei tavitavipareveira rera vo reoaro-ia gorua oiso-ia, Rera vaisiaro oirao piepape rutu rera Oviitoaaro Jisas Krais. Ra oeavivupa va iava siraopavio voeao vigei iava voea oiso osa Pauto goruvira rutu vigei tavireva. <sup>24</sup> ♦ Oire ro ira Pauto vo reoaro sirova utuparo va purapaoro, Pauto-va ora tavosiroi, vo osa Pauto rerava ita ora tavosiroi vo rera sopaaro-ia. Uva apeisi ragavira uvuipavie ra Pauto-ia taraipavio vo osa toupareve vo vigei iava sopaura-ia? Ari ro raga iavirava ita ro-ia Tugoropato Uraurato Pauto ira vatereva vigeipa.

4

*Pauto Reraaro Uraurato Ora Vurito Iravu Uraurato*

<sup>1</sup> ♦ Avoeo vate irara oaa, opeita oeavu oirara vo reoroaro oirao pie ragapata voeao oea oiso purapaaveira, “Ragai-ia Tugoropato Uraurato touparevoi.” Viapau. Ari uvuipatai ra voea kerisi iraopata rerare ro uraurato vo osa voea rovirieipata oiso, Ro Pauto reraaro, ari vo urauraaro vo rasio iava. Aue vituaro iava uvare riro irara rutu profet irara voeao reo topa piepa irara oea vokapaiveira voraro rutu. Oea kuuvuvira Pauto vo kovoaro purapaiveira. <sup>2</sup> ♦ Uva uvuipatai ra vearovira Pauto reraaro evei iraopata, uvare Pauto reraaro Uraurato ro-ia toupareveira ira oirara oiso tavitavipareveira, “Jisas Krais oiravira urioroepa vo rasio iare.” <sup>3</sup> Ari ro ira oiso puraparoveira, “Viapau oiso Jisas Krais-a Pauto Oviitoaaro,” eera-a ira-ia viapau toupareveira Pauto reraaro Uraurato. Viapau. Ari iravu raga-a uraurato ira Krais-va ora keriparoveira. Ari ita, rera iava uvu rovotava ira iava oiso puraaepa, “Urioroverea.” Uva rera epao ira touparevoi vo rasio-ia.

<sup>4</sup> ♦ Oire uva visii-a vao ovii irara oaa Pauto voeao visiigoa voeao-ia kuuvu irara profeta irara putetavora, voeao oea visii varaaro oirao pie vovouro oavissi piro pie ragapaivora, osa viapau uvuipaaera. Eake iava? Uvare Tugoropato Uraurato vo varivariaro visii sopaaro-ia toupareveira, ro ira vurito vo varivariaro-ia putepareveira

◊ 3:15: Mt 5:21-26 ◊ 3:16: Ro 16:1-4 ◊ 3:17: Je 1:22-27 ◊ 3:19: 1 Jo 2:21 ◊ 3:20: 1 Ko 4:4 ◊ 3:21: 1 Jo 5:14 ◊ 3:22: Mt 7:7, 21:22; 1 Jo 2:3 ◊ 3:24: Ro 8:9 ◊ 4:1: 2 Ko 11:13-15 ◊ 4:2: Ro 10:8-13 ◊ 4:4: Ro 8:31-39; 1 Jo 5:4

rutu. Ro vurito ira voeaopa reiparoveira vo rasio-ia. <sup>5</sup> Voea kuuvu irara profet irara oea vo reoro kosi piepaiveira varao iava orekerovu rasito aueroaro. Oa iava oearovu voearo vo rasio iava oearoa voea vo reoroaro uvupaoro oisi vara purapaiseira, uvare voeao tapo ita profet irara vo rasio-ia tou irara. <sup>6</sup> ♦ Ari vigei-a Pauto voeaaro. Uva ro ira Pauto-ia taraiparoveira, ira ita vigei vo reoroaro uvupareveira. Ari ro ira viapau Pauto-ia taraiparo, eera-a ira vigei vo reoroaropa reasiparoveira. Eva-a oa iava uvuipavie rutu ra urauratoarei vearovira rovirieipape oisi va iava vaiterei eveipaoro oiso, Iravu-a ro oiraopa rutu vituaro. Ari ro-a ro ira oirara piro piepareveira voea keakeapaoro.

#### *Pauto-a Vereopa Vovou Rutu Vituaro*

<sup>7</sup> Vate irara oaa, uvui iraopavie ra ora vigei iava oearovivupa siraopavio, uvare vereopa vovou rutu vituaro-a vao-ia ro-ia Pauto. Uva aa ro-a ro-ia oearovu kavikopareveira? Eera oirato Pauto reraaro ira Pauto-ia taraiparoveira rutu. <sup>8</sup> Ari ro ira viapau kaviko vovou purapareve, eera ira viapau oiso Pauto-ia taraiparoi. Eake iava? Uvare Pauto-a kaviko vovou rutu vituaro. <sup>9</sup> ♦ Uva Pauto ora rera vaaro kaviko vovou karekereva, vo uvare ora rera Oviitoaaro Kataito arureva vo rasio iare. Oa iava uvuipavie ra oiraopa tootoo rutu Tootoo Ovoi oupape vao iava Oviito vo kovoaro. <sup>10</sup> Oire uva eake rutu-a vao kaviko vovou rutu vituaro? E oiso toupaivoi pasi ra Pauto-pa sirao rovopavio, eke? Viapau. Easi vao-ia uvare Pauto vigeipa sirao rovoroepa rutu. Oa iava Oviito arureva vo rasio iare raiva purasa, oraiva-ia vigei vo vuri vovou oavi vo voriaro opesi piereva.

<sup>11</sup> Vate irara oaa, vosa Pauto oiraopavira rutu eisi vigeipa siraoroepa, uva vigei ita uvui iraopavie ra oisi oearovivupa sirao iraopavio. <sup>12</sup> ♦ Ari ita, viapau oiso iraiei ro ira Pauto kekereva. Ari vosa oiraopavira rutu ora vigei iava oearovivupa siraopavio, eisi osa iava uvuiparoi Pauto ra vo toupareve vigei iava sopaura-ia. Eva-a oa iava uvuipai ra rera vo kavikoaro kovopaive riropaooro vo vigei iava sopaura-ia.

<sup>13</sup> Uva uvuipavie ra oiso taraipavio, O ari, Pauto tapo tavosivira toupapeira. Ora aue-ia tapo osa vigei tavosivira toupareveira, uvare vigeipa Tugoropato Uaurato vaterева.

<sup>14</sup> Ora oiso tapo osa va vao kekeerao ora vigei vararo iava osireiara. Oa iava uvuipavie ra oearovivu oiraopavira tavitavipape oiso-ia, Aiteto Oviito arureva, auere ra oiso rasitoia tou irara vorevira oureve ora rerapa voea vararo tootooara oaive orirusa. <sup>15</sup> Ari ro ira oirara tavitavipareveira oiso, “Jisas-a Pauto Oviitoaaro,” eera-a ira sopastro-ia Pauto toupareveira, ovusa rera ita Pauto-va tavosivira toupareveira. <sup>16</sup> Uva vigei tapo ita vo vovou-ia taraipavioveira oa purareva Pauto vigeipa. Ora rera vaaro kaviko vovou oa oirao piepapeira tapo.

Iu, Pauto-a kaviko vovou vituaro. Vosa irouto ro ira vo vovou vituaro sovara-ia toupareveira vo vovou purapao, eera-a ira Pauto tapo tavosivira toupareveira, ovusa ita Pauto rerava ora tavosiparo. <sup>17</sup> Oire uva eake-a vao oare vo kaviko vovou eva kovopaoro riropapeira sopaura oavi-ia? Auere ra va iava tuuvu vovouvira rutu toupape vo vokio-ia oa-ia Pauto oirara rutu rovirieireverea. Rara vearovira rutu ora vigei-ia taraipavio oiso, Akoea, ari vigei vo touaro vo rasio-ia oiso rutu toupao osa Krais vo touaro toupaiveira. <sup>18</sup> Vosa kaviko vovou toupaive vo vigei iava sopaura-ia, oa iava viapau uvuipai ra uriri vovou otavukiaro toupaive vo ora vigei iava sopaura-ia. Viapau. Aue vituaro iava uvare kaviko vovou rutu-a vao oa uririara rutu kosi piepaiveira. Oire vosa uriri vovou vai toupaive vo irai iava sopaura vai-ia, ra va iava taraipaave oiso, Asi ro vuria vo voriarore rugorugoopaaroi. Oire va-a eva uriri vovou oa vituaro iava kaviko vovou viapau uvuipai oiso ra rirope rutu rera-ia.

<sup>19</sup> ♦ Siraopavio. Eake iava? Uvare Pauto vigeipa sirao rovoroepa. <sup>20</sup> Oire vosa irai oiratoa vai oiso puraro, “Ragai Pauto-pa siraoparai,” vo osa araokotoaarore kasipua rera-ia toupaive, oire uva rera-a eera riro kuuvutoa rutu. Oa vituaro iava oiso toupao, Vosa viapau araokotoaaropa sirao rovoparo, ro ira uvuiparoi rera kekepareve, oire uva apeisi ragavira oiso osa iava uvuipa ra Pauto-pa siraoparo, ro ira viapau uvuiparoi ra Pauto kekepareve? <sup>21</sup> Riro goru reo rutu vaterева Pauto vigeipa oiso-ia, “Ro ira Pauto-pa siraoparo, eera-a ira uvui iraoparoi ora rera araokotoaaropa tapo sirao iraoparo.”

♦ 4:6: 1 Ko 2:9-16; Jo 8:47; 1 Ti 4:1    ♦ 4:9: Jo 3:16; 1 Jo 5:11; Ais 9:6-7    ♦ 4:12: Jo 1:18; 1 Ti 6:16    ♦ 4:19: 2 Ko 5:14-17

*Riro Oirao Pie Vovouto Ira Rasito Vo Pitupituaro-ia Putepareveira*

<sup>1</sup> ♦ Vosa irouto oiso oirao piepareve, Pauto Jisas roporevoiva, rera-ia vo vaisio tovoreva, Krais vigei tuvetuvepatoaaro, ira ita-a eera oirato Pauto oviitoaaro. Uva ro ira Aitepa siraoparo, ira ita ovii irarapa tapo siraoparoveira. <sup>2</sup> ♦ Eisi osa iava uvuipavie i ra taraipavio oiso, Vigei-a vao Pauto ovii iraraaropa siraopavioveira, uvare Pauto Aite irapa siraopavioveira. Ora rera vo reoaro tapo sirova utupavioveira vao goru reo rutu. <sup>3</sup> ♦ Vosa vo reo riro goru reo sirova utupavio vo reo orirupaoro vo vigei varaaro-ia sopaura oavi-ia, ra oiso toupape, Vigoa ita Pautoa-pa siraopavioveira. Ora vao rera vaaro riro goru reo rutu vao oa viapau oiso vavagisipapeira vigeipa vo osa va purapape. <sup>4</sup> ♦ Aue iava uvare voeao oea oiso toupaiveira Pauto voeaaro rera vo reoaro purapaoro, oea uvuipaaveira rutu oiso ra rasito vo pitupituaro vo goruaro-ia putepaive. Uva vo goruo-ia putepa vituaro oiso toupai, Eva vigei vaaro oirao pie vovou rutu. <sup>5</sup> Ari ita, irouto-a ro ira uvuiparoi vo goru ia vao rasito vaaro putepareve? Ari ro raga ira oiso puraparoveira oirao piepaoro, "Jisas-a Pauto Oviitoaaro."

*Pauto Roroiovira Taviroepa Oviitoa Iava*

<sup>6</sup> ♦ Jisas Krais ira raga vo rasio iare urioroepa. Oa iava baptaisa oureva uuko ovi ia. Ora oiso osa ora rera iava revasiva vatereva evao parikou-ia kopiioro. Ari ita, uva viapau oiso vao ragava urioroepa baptaisa vo pitupituaro aue-ia uukoa. Viapau. Ari varei rutu-a oiso-ia, uukoa vao-ia ari revasiva o. Oarea rutu oirao piepareveira Tugoropato Uraurato, uvare rera raga oiraopatoa rutu. <sup>7</sup> ♦ Oire uva vo peva rutu-a varao-ia oara oiraopavira rutu tavitavipapeira Krais iava oiso-ia, <sup>8</sup> ♦ Tugoropato Uraurato-a ro-ia, ari uuko-a vao-ia, ari revasiva-a o-ia. Opevaa rutu kataivira rera iava oiraopa reo rutu kosi piepaiveira. <sup>9</sup> ♦ Oire uvuipavie ra vo reoro oirao piepape oara oiraopavira purapaineira oearovu oirara orekerovu iava. Oiso osa Pauto va vao oirao pie reo purapareveira Oviitoa iava. Oreoa-a eva oiraopa reo oa oirara vo reoroaro-ia oiraopa reoro putepaiveira rutu. <sup>10</sup> Uva ro ira Pauto Oviitoaaro oirao piepareveira, eera-a ira soparo-ia Pauto vo reoaro oiraopa reo rutu toupaiveira. Ari ro ira viapau Pauto vo reoaro oirao piepareve, eera-a ita ira Pauto oiso piepare, Riro kuuvuto. Eake iava? Uvare viapau oiso vao oiraopa reo oirao piepareveira rutu vo reo oa purareva Pauto ora rera Oviitoaaro iava tavitavipaoro. <sup>11</sup> Oreoa vao oiso purapai, "Pauto vigei vatereva Tootoo Ovoi vo tootoo ia oa-ia vituparoveira rera raga Oviito." <sup>12</sup> ♦ Ari ita, ro ira Oviitoava ora tavosivira rutu toupareve, eera ita ira-ia Oiraopa Tootoo rutu toupaiveira. Ari vosa irouto-a ro ira viapau Oviitoava ora tavosivira toupareve, uva rera-ia viapau oiso Oiraopa Tootoo toupaivoi.

*Vigei Uvuipavie Ra Taraipavio Oiso, Vigei Tootoo Ovoiva Toupai*

<sup>13</sup> ♦ Vo rigato puraavoi visiipa oisore ra vearovira rutu taraipata oiso, Tootoo Ovoiva toupatavoi visii vao-ia visiigoa vo Pauto Oviitoaaro vaisiaro oirao piepataveira. <sup>14</sup> ♦ Oire uva uvuipavie ra tuuvu vovouvira toupape vo Pauto osireiaro-ia, uvare taraipavie oiso, Vigei varaaro variriara uvupareveira, vo osa rera arepapeira rera raga vo ruipaaro sirova utupaoro. <sup>15</sup> Ari ita, vigei vo reoroaro uvupareveira, vo osa variripavioveira rera akepaoro. Oa-ia oiraopavira rutu taraipavio. Oire uva va-a eva oa vituaro iava uvuipavie ra oiso ragavira taraipavio, Varao epao oara vateparevere vigei vo ruipaaro uvui ovoipaoro.

<sup>16</sup> ♦ Oire vosa irai ro ira araokotoaarova siitueparo, ovusa vuria vai purapareve ro oirao pie vovouto, ovuriava eva viapau oiso opesiorevere Tootoo Ovoi ou asavira, uva uvuiparoi ra Pauto arereve rerapa araokoto. Oa iava uvuiparoi ra tootooa vatereva araokotoaaropa rera vo rugooaro torevokopaoro. Uva voeaore reoreoparai oea oiso varao vuriara purapaine oarava viapau oiso opesiaverea Tootoo Ovoi ou asavira. Ari oavuei touvira vuria, ovuria vo vovouaro sirova utupaoro uvuipai oirao pie vovou irara ra vo vovou iava opesiavere Tootoo Ovoi ou asavira. Uva viapau oiso visii tavitavipaavoi

---

♦ 5:1: 1 Ko 15:1-11; Jo 1:12   ♦ 5:2: 1 Jo 2:5   ♦ 5:4: Hi 11:1-6; Jo 16:33   ♦ 5:6: Mt 3:13-17; Jo 19:34   ♦ 5:8: Jo 19:31-37; Mt 18:16   ♦ 5:9: Jo 8:17-18; Mt 3:16-17   ♦ 5:12: Jo 3:36   ♦ 5:13: Jo 20:30-31   ♦ 5:14: 1 Jo 3:21-22; Mt 7:7   ♦ 5:16: Je 5:15; Hi 6:4-6; 1 Ko 11:23-32

oiso ra rerapa Pauto aketa eera ira eisi vo vuri eva purarevora. Viapau. <sup>17</sup> Oaravu rutu vuri pitupituro oara purapaoro vuri vovou purapapeira. Ari oaravuei varao oara viapau oiso visii oiso piepaiveira ra vara iava opesipata Tootoo Ovoi ou asavira.

<sup>18</sup> Vigei taraipavie rera-ia oirato Pauto reraaro ira viapau vorevoreripavira vuriara purapareveira, uvare Pauto Oviitoaaro Jisas rera utopareveira. Eva-a oa vituaro iava viapau uvuiparoi Vuritoa rutu Seten oiso ra rera vuri piereve eera oirato.

<sup>19</sup> Oire uva uvuipavie rera-ia taraipavio oiso, Vigei-a vao-ia Pauto voeaaro, vo ovusa riro irara rutu voeao oearovu oea toupai vo rasio-ia, oeapa reiparoveira ro-ia Seten.

<sup>20</sup> Uva Pauto Oviitoaaro-ia taraipavio oiso-ia, Ira urioroepa vigei vo rugorugooroaro aviavi piesa, oisore ra va iava aviavi pievira rutu taraipavio Oiraopatoa-ia Pauto. Uvare vigei varaaro tootooara toupaiveira rera raga-ia Oiraopatoa rutu Pauto ro raga ita Oviito Jisas Krais. Eera raga Oiraopatoa rutu Pauto ira raga ita Tootoo Ovoi rutu vituaro.

<sup>21</sup> Kakae vure oaa, ora vatatopo iraopata voeaopa riro kuuvu irara pau irara ora varao kuuvu siposiporo. Oara evara uvuipai ra Pauto vo tavukiaro ouve vo visii iava sopaura oavisii-ia.

Eisivi raga osa vo pasio purapaavoi visiipa. Ra opesipe.

## 2 JON

### Irapa Reoro Vo Vukuo Iava

Ro ira vo pasio rigatoreva ira ita opa riakova reesireva ora voeao oira voeaaro ovii irara oiso ra vo reoro vieiive. Ari tarai irara oiso rugorugoopaaveira, Ira ovoovovira oeavu lotupa irara reesireva oira vaisipaoro o riakova. Uva goruvira vo pasio-ia rigatoreva oiso ra oirao pie vovou irara siraopa vovou pura iraopaise oearovivupva siraopaoro, vo osa Pauto vo reoaro vearovira uvupaiive (2 Jo 5-6). Uva ita, voea tavireva oiso, Teapi oeavu kuvuu irara vo siposiporoaro uvupata, voeao oea oiso purapaaveira, Krais viapau oiravira urioroepa vo rasitoa-ia toupasa.

1. Aviavi pie reoro vo pasio iava, 1-3.
2. Rovopa reo goru vao oa oiso purapai, Iravivupa sirao iraopau, 4-6.
3. Vatatopo pie reo voeao iava riro kuuvu irara tisa irara, 7-11.
4. Ovoiopa reoro varao, 12-13.

<sup>1</sup> Ragai-a vao-ia reito ragoa vo rigato puraavoi viipa oira vasiva rutu riakova vearovu rutu. Viigoa roporeva Pauto ora vo vureo tapo kakae vure vii voeao. Visii rutu eva visiigoa kaviko iraopaveira. Uva viapau oiso ragai raga-a, ari oearovu tapo-a voeao oearoa Oiraopa Reo-ia tarai iraopaveira rutu. <sup>2</sup> ♦ Oreo-a vao Oiraopa Reo oa vigei sopaaoro-ia toupaivoi ora toupaiveira vokiara rutu-ia. <sup>3</sup> Oire uva Pauto arepaavoi ro Aite ora Jisas Krais Aiteto Oviitoaaro, auere ra tauva vatesi vigeipa, ora sirao vovou, ora gavaure vovou viigoa oiraopa vovou-ia taraipvavoeira, ora vao-ia kaviko vovou.

#### *Uvui Iraopavie Ra Kaviko Vovou Rutu Purape*

<sup>4</sup> ♦ Roru iraopavoi rutu oearovu vii ovii iraraaro iava kekepaoro voeao oea oiraopa reo rutu sirova utupaaveira, oiso rutu osa evo reo iava vigeipa goru reo vatereva Aite. <sup>5</sup> ♦ Oire uva vearovu riakova vii tavipaavoi oiso, Vigei tapo ita uvui iraopavie ra oearovivu ita kaviko iraopape ora vigei iava voea. Uva viapau oiso airepa reo-a vao-ia oa rigatoavoi viipa. Viapau. Ari ae ragai iava-a uvare riro goru reo rutu-a vao oa uvuepa voari rovoa-ia vo uva oirao pie vovouro rovoepa. <sup>6</sup> ♦ Oire va vao-ia ora kavikopa vovou oa iava reoreoparai oa oiso ragavira toupaiveira, Uvui iraopavie ra Pauto vo ruipaaro sirova utupavio. Oiso osa vao riro goru reo oa uvutava voari rovoa-ia oa oiso purapapeira, Uvui iraopatai ra oiso toupata kaviko vovou rutu purapaoro.

#### *Uvui Iraopavie Ra Goruvira Rutu Krais Vo Reoaro-ia Pitupape*

<sup>7</sup> ♦ ♦ Ari ita, riro irara rutu oirara oea sikasikaaepa uvarovu ruture vo rasio-ia, voeao oea oirara keakeapaiveira oiso purapaoro, "Jisas Krais viapau oiso oiravira urioroepa." Uvare voea-a riro kuuvu irara voeao oea Krais-va ora keripaaveira. Oea oiso rutu toupaiveira osa ro Vurito Krais-va Keripato. <sup>8</sup> ♦ Ora vatatopo iraopata auepa, teapi viapau voria vai oavisii outa vao oare kovopataveira Pauto vo kovoaro purapaoro. Ari vosa ora utopata, oa iava uvuipatai ra ora visii vo voriaro rutu outa vo Pauto ruvara-ia. <sup>9</sup> Oearovu viapau oiso Krais vo taraiaro raga sirova utupaaveira. Viapau. Ari osiposiporou raga oupaaro vara-ia oirara tuvetuvepaiveira. Uva voea-a evoea oea viapau oiso Pauto tapo ora tavosipaaveira. Ari voea raga oea Krais vo taraiaro sirova utupaaveira, evoea-a oea Aite vaio tapo ora Oviito ora tavosipaaveira. <sup>10</sup> ♦ Oire vosa irai vii iare karero viro ro ira viapau oiso Krais vo taraiaro ragava urioro, ra viapau oiso rera koata pieri vii vo kepaaro-ia voa rera pau piesa. Viapau. Ari ita, opeita rerava oiso purau, "Vearo voki rutu." <sup>11</sup> Aue vituaro iava vosa ro ira rerava eera vearo vokireve, ira-a rera vo kovoaro ita eva vuri kovo purareve rerava ora tavosioro.

#### *Ovoiopa Reo Vao-ia*

---

❖ 1:2: 2 Pi 1:12; 1 Jo 1:8    ❖ 1:4: 3 Jo 3-4    ❖ 1:5: 1 Jo 2:7, 3:11    ❖ 1:6: Jo 15:10-17    ❖ 1:7: 1 Jo 4:1-3, 2:22  
 ❖ 1:7: Re 13:11-18    ❖ 1:8: Hi 10:35-39    ❖ 1:10: Ro 16:17-19; Re 22:18-19

<sup>12</sup> Ari ita, riroara reoreoara rutu epao ragai varaaro touvira. Uva reasiparai vara iava visii tavitavi arapa vao-ia pepa ora ing. Viapau. Ari ragai oiso raga rugorugooparai rutu raripaoro, oiso ra visii kekeaa rutu. Oa iava vigei rutu uvuipavie i ra ora reoreovio. Ra va iava uvuipavie i ra rorupape rutu.

<sup>13</sup> Oeavu visiiva vearo voki puraivoi, voeao vii taataavaaro ovii iraraaro o iria roporeva Pauto.

Eisivi raga, ra opesipe.

## 3 JON

### Irapa Reoro Vo Vukuo Iava

Jon vao rigatoreva vo pevapa pasi rerapa Gaias. Uva oreoreorovu tapo vatereva Gaias vaaro oirao pie vovou goru piesa. Ora Gaias tapo tavireva ra iravu ro Daiotrefis verareve lotua iava, uvare vuri pitupituro oisoa purapareve, ora oisoa ora rera raga ora ira pieparo rutu.

1. Aviavi pie reoro vo pasio iava, 1-4.
2. Gaias-ia rorureva Jon rera vaaro-ia vearo kovo, 5-8.
3. Daiotrefis vo pitupituroaro iava vuriara rera tavireva, 9-10.
4. Demitrias ira vearo kovo purareva, 11-12.
5. Ovoiopa reoro varao, 13-15.

<sup>1</sup> Ragai-a vao-ia reito ragoa vo rigato puraavoi viipa Gaias viigoa oiraopavira rutu kaviro iraopaaveira. <sup>2</sup> Vatetoa oaa, variriparai oisore ra vearovira rutu toupari. Vao oa iava viapau oiso oavu avu vai vii iare uriopere oiso osa upiara. Ari ita, vearovira taraiparai vii-ia, uvare viapau oiso viria vaiei vii iava sopaua oara-ia. <sup>3</sup>  $\diamond$  Ragai roruavora rutu vo reo uvuoro araoko irara oavi gisipoaro iava. Uvare pou virooro vii iava ragai tavitaviivora oiso-ia, “Viapau oiso raveraveparoi vao oiraopa reo sirova utupaoro.” Ari ita, vii-a taraiparaveira, vo uvare oiraopavira rutu vokiara rutu-ia riro goru reo sirova utupauveira. <sup>4</sup>  $\diamond$  Uva viapau oiso oaei oa uvuipai ra vao-ia putepaive oiso osa ovii irara oaa iava uvupaoro rorupaaveira, vao iava uvare oiraopa reo sirova utupaaveira rutu.

#### *Gaias Vearo Kovo Oiso Purapareve*

<sup>5</sup>  $\diamond$  Vatetoa oaa, kasivarivira araoko irara oave tauvapa kovo purapari. Ari ita, vosa oearovu araoko irara oara oea aapaapauvira uriopaave vii iare, uva voea tapo ita touvira tauvapariveira. <sup>6</sup> Uva evoea araoko irara oave evoava kareaiva, voeao lotupa irara tavitaviivora vova vii vaaro iava vereopa vovou. Uva vii tavipaavoi oiso ra touvira voeavi tauvapari. Ra oisi iavirava topa pievira ita vokapaivere oearovupa siposipopasa Pautoa iava. Oa iava rera roru pierivere ora vii vaaro iavirava tauva. <sup>7</sup>  $\diamond$  Aue iava uvare voea vaaro voka rovoepa Krais-va kovopaoro voraro rutu. Uva voa viapau oiso oearoi oisoa ora voeapa arepaive orekerovu avu vaire voeao ruvara-ia oea oisoa viapau Krais oirao piepaive. <sup>8</sup> Eva-a oa vituaro iava uvui iraopavieie ra voea tauvapave evoea araoko irara oave. Oa iava uvuipaveieie voea tapo kovopasa oiraopa reo kosi piepaoro oearovupa ita.

#### *Daiotrefis Vuri Pitupitu Purareva*

<sup>9</sup> Voviri tuaririvi oavivu gareavi pasia rigatoava voeapa lotupa irara. Uva viapau oisoa ragai vo reoroaro sirova utuparo Daiotrefis. Uva oiso raga vovouparoveira ra ora rera raga ora rei vaisi pieparo lotupa irara tuvetuvepaoro. <sup>10</sup>  $\diamond$  Oire vosa poura viro, ra rera vaaro viria poeraavere oiso vara varao-ia, kiuvu reoa vao-ia oa viapavira rutu akukuvira raga purapareveira vigei toga ragapaoro, ora kuuvu reoro tapo purapareveira vigeire, osa viapau vara evoa rekasispareve. Vo osa oaravu tapo varao-ia oara purapareveira oiso-ia, Viapau oiso araoko irara oave koata piepareveira vo ora rera vo kepaaro-ia paupasa. Uva ita, oearovivure koruparoveira vo osa eisi ruipa ragapaave oearovivu araoko irara koata piepasa. Uva rera vo ruipaaro oiso toupaiveira ra voea kosi piepareve lotupa irara arova.

<sup>11</sup>  $\diamond$  Vatetoa oaa, opeita voeao vioepari oea vuriara purapaveveira. Ari uvuipau ra voea raga vioepari oea vearovpara purapaveveira. Uvare ro ira vearoa purapareve, ira-a eera Pauto reraaro. Ari vosa ro ira viria purapareve, eera-a ira viapau oiso Pauto vo vovouaro eveipareveira, oisore ra oisi va purapareve.

#### *Demitrias Vearo Vovou Oisoa Purapareve*

---

$\diamond$  1:3: 2 Jo 4     $\diamond$  1:4: 1 Ko 4:15; Fm 10     $\diamond$  1:5: 1 Ti 3:1-2; Ro 12:13; Hi 13:2     $\diamond$  1:7: 1 Ko 9:15-18; Ap 5:41, 20:33-35     $\diamond$  1:10: Pro 10:8-10; 2 Jo 12     $\diamond$  1:11: Sam 37:27-29; 1 Jo 2:29, 3:6, 9

<sup>12</sup> ♦ Riro irara rutu Demitrias-ia oisoa egaegapaive rutu. Uva oiraopavira oisoa vearo kovo rutu purapareve. Eva-a oa vituaro iava uvuipaveiei ra vegei tapo voea vo reoroaro oirao pieve. Oire ra ragai tapo ita rera iava oiraopavira tavitavipara. Ari ita, taraipauei ragai vo reoaro-ia vao oiraopa.

*Ovoiopa Reoreo Vao-ia*

<sup>13</sup> Riroara rutu epao reoreoara ragai varaaro. Uva viapau oiso uvuiparai viipa vara rigatoa aue-ia pentoa vai ora ing. <sup>14</sup> Ari rirovira rutu oiso ruipaparai ra vii kekeia utupa visivi. Oa iava uvuipaveiei vegei rutu ra ora reoreove.

<sup>15</sup> Oire uva Pauto arepaavoi oiso ra gavaure vovou vatereve viipa. Uva vate irara oara rutu vo reo viipa sipopaivoi oiso purapaoro viire, “Vearo voki rutu.” Ora vii tapo ita osa varirivira purauvere voeaore igei vate iraraaro katakataivira oiso, “Vearo voki rutu visiipa.”

Evavi raga osa vo pasio opesi piea.

## JUT

### Irapa Reoro Vo Vukuo Iava

Oearovu oiso purapaaveira, Ro Jut ira Jisas araorei ora Jems kokoratoaaro (Mk 6:3; Mt 13:55), vo osa oearovu tarai irara oea oiso purapaaveira, Iravu raga Jut.

Uva vo reoreoro oara toupai vo pasio-ia oreoa vaeapai ora vo reoreoro oara rigatoreva Pita eraopa pasi oaro-ia. Riro goru reo rutu vaterева Kristen irarapa, uvare oearovu vuri vovou irara oea oisoa voea tavitavipaive oiso ra vuri pitupituro purapaive akukuvira raga. Ari ita, kuuvu reoro raga varao-ia. Jut oiso puraroepa, Voeao kuuvu irara oea oiso rutu toupaivoi osa oearovu riro kuuvu irara tuariripa irara (Ju 5-16). Uva voea vaisipaoro ovaisirovu oureva vova Jiu-pa irara vo vukuroaro iava, varao oara viapau toupaiveira vao-ia vigei vaaro Tugoropa Vuku oa-ia pitupai vigei Kristen irara vo vokio (Ju 9, 14-15).

1. Aviavi pie reoro vo pasio iava, 1-2.

2. Tuariripa irara riro kuuvu irara vaisireva voea vo vuriroaro iava tavitavipaoro, 3-16.

3. Uvui iraopaa Kristen irara ra oirao piea-ia uvisivira pitupaive, 17-23.

4. Vearo vaisi vore Pauto, 24-25.

<sup>1</sup> ♦ Ragai-a vao Jut ragoa vo rigato puraavoi Jisas Krais kovopatoaaro, ora tapo Jems arakotoaaro. Uva vo rigato puraavoi voeaopa oeare keeraroepa Pauto, oisore ra rera sirova utuave, evoea oea kaviko iraopareveira Pauto Aite. Oea oriruvira rutu toupaiveira, uvare Jisas Krais tapo ora tavosi iraopaaveira. <sup>2</sup> Uva Pauto arepaavoi, oisore ra siraopa vovou rutu vatereve ora gavaurea ora kaviko vovou uvuivira rutu.

#### *Vearo Siposipova Keripa Irara Vo Reoreoroaro Toupaivoi*

<sup>3</sup> ♦ Vate irara oaa, oiso ruipa rovoraera ra visiipa vo rigato puraa vo raivao vituaro iava, oa iava Pauto vigei vorevira oureverea ora rera iare. Oire uva evo rugoo isivaaro iava oiso ora sovorai, oa iava oiso vovouparai ra visiipa taru goruvira rutu vao rigatoa visii vo vovouroaro goru piesa rutu. Eisi osa iava uvuipatai ra uriri asavira vo vovouro vituaro iava reoreopata oara oirao piepataveira. Evara raga oara vaterева Pauto voeaopa rera voeaaro, oiso ra vo vovouro-ia taraipaave. <sup>4</sup> Eake iava? Uvare oearovu oirao pie vovou asa irara kaviruvira raga koatapaaepa visii tapo toupasa. Voearo oearoa kuuvuvira tavitavipaaveira Pauto vo siraoaro iava. Evoea oea oiso purapaaveira, “Eagara, uvuipaiei ra otopa pitupitu purapaio. Oa-ia Pauto uvuiparoi ra igel vura ragapareve igeipa siraopaoro.” Uva oisi-a eisi osa piepaoro Jisas Krais-re isivapaaaveira ro Reito ora Turaro. Vo osa voari tuariri aue-ia Tugoropa Vuku oiso puraepa, “Voea vo voriaro oa ouiverea eva-ia vuria raga.”

<sup>5</sup> ♦ Oiraopavira rutu vao-ia taraipataveira. Ari visii rugorugoo piepaavoi, oiso ra vearovira rutu vare rugoopata vao-ia oiso osa ro Turaro voeao Jiu-pa irara oureva Isip iava voea orirusa. Oa isivaaro iava oearovu voea iava opesi pie ovoireva, oea viapau oisoa rera oirao piepaive. <sup>6</sup> ♦ Ora vao tapore rugoopata osa voeao enselpa irara ora voea vaisiaro raga rei pieoro ora voea vo tavukiroaro kavuiva. Oire uva oisi-a eisi osa pieoro ora voea voa arava avaaepa. Uva va-a eva oa vituaro iava voeaei, oea tuukepaaiv vo vokio sen iro-ia pupurua sovara-ia. Evoa-a uva voea tovo piereva Pauto vore tuepaoro uva ora voea vo voriaro vuri vori ouiverea rara vo Rei Voki-ia. <sup>7</sup> Uva oiso tapo visii rugoo piepaavoi ra vo uruireore tapo rugoo iraopata Sodom uruirei ora Gomora urui, vo uruairo tapo ouruiroa oisoa vo uruirei ruvara-iavi toupaive. Uvare evo uruairo rutu-ia tou irara eisi vo pitupituro oisoa purapaive otopa pitupituro ora opitupiturovivu, oara tapo viapau oisoa torevokopape, vo rara ora voea ragava oirara toupaive otopaoro. Oa-ia ora voea vo voriaro ouiva vao-ia tuitui kasi. Oire uva oisi-a eisi osa pieoro vigeipa vo ovoovo rutu puraiva vo vokio iare vao iava eto kasi oa viapau opesia vai.

<sup>8</sup> Oiso osa vo vokio-ia oa-ia oearovu oirao pie vovou asa irara vuri urusiro-ia orekerovu oupaoro vara sirova ora voea iava varaura vuri piepaiveira vo pitupituro-ia, oara-ia Pauto

---

♦ 1:1: Ap 1:13; 1 Pi 1:5    ♦ 1:3: Fl 1:27-30    ♦ 1:5: Nam 14:1-38    ♦ 1:6: Re 20:1-3

vo goruarore isivapaaveira. Oa iava voeo takoupaoro oiso purapaaveira, “Voeao reipa irara vuvuiua iava voea-a akuku irara raga.” <sup>9</sup> ♦ Ari ita, ro-ia rovopato enselto Maikel ira viapau oiso eisi oai purareva. Ari vo osa ora uporoepa aueva Seten, vo osa ora kaureosiepa Moses kopii-ia vo rera ousa oiso, “Aa ro-a ro ira rera ouparevoi.” Oire uva Maikel avivikevira rutu rerava ora kaureoparoepa oiso rugoopaoro, Teapi vuri reoreo vai-ia Seten togareve. Oa-a vao oa iava rerare oiso puraroepa, “Reitoa raga Turaro uvuiparoi ra vii torevokoreve. Ra eakau.” <sup>10</sup> Uva vo vokio-ia voeo vuri irara varao tovipaiveira, oara-ia viapau oiso roroiovira rutu rugorugoopaaveira. Ari vo vovouro vuri vovouro oara sovopaiveira vo ora voea sopauro raga-ia. Oiso rutu osa vo karero kaakau kare oisi piepaiveira. Oara-a evara uvuipai ra voea opesi pie ovoipaire.

<sup>11</sup> ♦ Siraovira rutu voeavipa. Uvare vuri pitupitu sirova oisoa utupaave oa purareva Ken. Oire uva va vao osa moni ou ragare oisoa ruijapaave. Eva vituaro oa iava vuri pitupitu sirova utusa oisoa arovipaave, vao oa oisoa purapareve Belam. Ora kaureo vovouro rutu tapo oisoa purapaive, oiso rutu osa ro Kora ira Moses-va ora kaureoroepa. Oa iava voea rutu opesi pie ovoireva Pauto, oiso osa Kora opesi pie rovoreva.

<sup>12</sup> Oea oiso rutu toupaiveira osa varao avekeara oara vatauvira rutu toupaiveira vo uva takuvuvira aiopataveira katai vovou raga-ia. Eake iava? Uvare voa-a evoa uva oirara kove piepaiveira aue-ia vuri pitupitu, vo osa visii tapo aiopaire. Oire uva oisi-a eisi osa piepaiveira ora voea raga-ia rugorugoopaoro arii asavira rutu. Oea evoea oiso rutu toupaiveira osa o rukuta iria-ia viapau kokeva vai oirara tauvapasa. Uvare kiuvu oira pupipareveira uvarovu ruture. Ora tapo uvare oiso rutu toupaiveira osa oevarovu evaovaro varao oara viapau kuepapeira ora vo evaro vo vuutaroaro-ia. Uva va-a eva oa iava oisoa tate ovoi piropa erako ovoisa kopii ovoioro vavurupa kaviro rutu tapo. <sup>13</sup> Oea oiso rutu tapo toupaiveira osa riroa toru kou vo avakava-ia, uvare vuriara purapaiveira vuivuiara. Oa iava ruiruisovira oisoa karekepape vao toru kou vo viara-ia. Ora oiso rutu tapo toupaiveira osa varao ruuso aaviikoro oara viripaiveira voraro rutu. Vo osa Pauto varapa uvavu reesireva vara voaaro. Uva uvuipai ra fauai rutuva roropaire rupa rutu-ia toupaoro. Vo uva viapau opesia vaiei.

#### *Vuri Irara Oiso Voea Vo Voriaro Ouiverea*

<sup>14</sup> ♦ Voari tuariri rutu uva ro oirato Inok oavu ravaa reo ravaavira purareva voeaore vuri irara. Uvare rera ro Inok ira Adam sirova uturoepa katai vatarapa aao puraoro. Ira-a ro ira oiso puraroepa, ‘Keketa. Turaro taru urioroverea riro ipuro (tausen) rutuva enselpa irara tugoropa irara. <sup>15</sup> Oisore ra oirara rutupa voea vo voriaro vatereve. Uva va-a vao oa-ia voeo vuri irara togarevere, oea viapau oiso Pauto oirao piepaiveira. Voea raga ita evoa oea vuri vovouro purapaiveira. Oiso vara tovi reoro-a varao oara purapaiveira Pauto tovipaoro. Oara vituaro iava voeare oiso puraroverea, “Visii raga ita vao visiigoa vuri vovou purapataveira.” ’ <sup>16</sup> ♦ Ari ita, voeo vuri irara rirovira kaureopaoro oearovivu toga ragapaiveira oirara kuuvu reoro-ia. Vo ovusa ora voea vo vovouroaro vuriara raga sirova utupaaveira. Vo vovouro oara iava ora voea vaisiaro raga riro piepaiveira. Ora oiso tapo osa oearovivu tapo agoagoto iraopaire, oisore ra va iava voea vo vovouroaro pura uvropape.

#### *Oirao Pie Vovouro Oavisii-ia Goruvira Pitu Iraopata*

<sup>17</sup> Ari visii vate irara oaa, opeita vo reore ovau iraopata. Oreoa visiipa vateiva aposel irara ro iava vigei reraaro Turaro Jisas Krais voari tuariri. <sup>18</sup> Uva oiso puraaepa visii tavioro, “Vosa ovoiopa vuutaro pou piroverea, uva oearovu oirara karea viroverea, voea oea oearovu agesi piepaiverea visii favirava visii tovipaoro. Uva voea raga-a evoea oea ora voea vo ruiparoaro sirova utupaaverea Pautoa-re isivapaoro.” <sup>19</sup> Evoea raga ita oea lotupa irara roo piepaiveira voeapa orugoorovu rutu vatepaoro. Vo osa oirara raga vo rugooroaro sirova utupaaveira. Uva va-a eva oa vituaro iava viapau oiso voea sopaaro-ia toupareveira ro Tugoropato Uraurato.

<sup>20</sup> ♦ Uva visii-a vao vate irara oaa, viapau uvuipatai ra eisi piepata osa evoea. Ari uvuipatai ra ora visii raga ora tore pie iraopata vao-ia goruvira rutu pitupaoro visii

◊ 1:9: Sek 3:1-10; Dan 10:13    ◊ 1:11: Jen 4:1-15; Nam 22:1-24:25    ◊ 1:14: Jen 5:18-24; Diu 33:2; Dan 7:10

◊ 1:16: 2 Pi 2:18    ◊ 1:20: 2 Ti 2:15; Kl 2:7; Ef 6:18

vaaro oirao pie vovou vo Pautoa-ia, vo osa variripata Pautoa-re Tugoropato Uraurato vo goruaro iavirava. <sup>21</sup> Ora oiso osa uvuipatai ra vo touo rutu purata, oa iava uvuipatai ra ora sovota oiso puraoro, "Oiraopavira rutu. Uva Pauto vo siraoaro vigei-ia toupaivoi." Uva oisi-a eisi osa toupaoro uvuipatai ra vaore tuevira toupaoro Tootoo Ovoi oupata, oa vaterevereia visiipa Turaro Jisas Krais visiipa siraooro rutu. <sup>22</sup> Sirao vovou rutu kareke pie iraopata voeaopa oea vo vovouroaro avavaiavira toupaiveira oiso purapaoro, "Aa vao-a vao oa vearovai? Ari aa vao-a vao oa vuripai?" <sup>23</sup> ♦ Oearovu airerei iraopata voea vorevira kae piepaoro vova tuituia vaopa, teapi rovaave vo vuri tapi. Ora vo osa oearovivupa sirao iraopata vaopa uriripaoro vuri vovou oa purapaiveira. Ari ita, oiraopavira uvuipatai ra voea varaaro varoara veripata, varao oara vuivuipaveira vuriara purapaoro.

*Pautoa-ia Vuurapa Vaisi Purapaa*

<sup>24</sup> ♦ Ari Pauto uvuiparoi ra visii utopareve vaopa, teapi koveta. Oa iava eva visii vorevira ourevereia ora rera iare, vo rara viapau vuri vovouro vai oavisii visii-ia touve roruvira raga toupaoro. Ari ita, visii tovorevereia vo ora rera rutu puaaro-ia, vo uva rera vo kerariaro vo aviaziaro roropaveira vokiara rutu-ia. <sup>25</sup> ♦ Vearovira rutu Pautoa-ia Kataitoa rutu. Ro ira vigei kae piepareveira ro vo kovoaro iavirava Jisas Krais vigei reraaro Turaro. Oirara rutu uvui iraopaa! ra rera-ia vuurapa vaisi purapaive. Oiraopavira rutu oiso osa Pauto rei iraoparoveira oirara rutupa. Ira riroparoi rutu oirara rutupa. Ira-ro Pauto oirara rutuva vurapareveira voea tokipaoro rera vo goruaro iava riroa rutu. Ira oisi raga oisoa toupareve voari tuariri rutu rovoa-ia. Uva vo vokio tapo ita oisi raga touparevoi. Ora voari tapo utupaua uva taru oisi raga ita touparevereia. Ovoiei.

Ragai-a vao, Jut.

## REVELESEN

### Irapa Reoro Vo Vukuo Iava

Jon toupareva tuukepa kepa-ia vo Patmos Toko-ia uva voa rigato purareva. Uva 95 o 96 yia puteva Jisas vo kavauaro isivaaro iava. Uva vo vuuta-a eva oa-ia Rom gavman vuri pitupituro rutu oisoa purapareve Kristen irara opesi pie ovoipaoro. Eva-a oa iava Jon goru reo vaterева voeapa oiso ra tuuvu vovouvira rutu toupaive uriri asavira. Ari ita, viapau oiso rera vo reoroaro rutu-a vara varao. Viapau. Ari Jisas raga ita vo reoro vaterева Jon-pa aue-ia areo uusi. Oa vaisipaiseira popotepa irara vo reoaro-ia oiso, Revelesen.

Uva oreororu oureva ita varao oara-ia reoreoaepa profet irara voeao-ia, Esikel, Danyel, ora Sekaraia. Varao oara epao vo vukuo-ia oara poupa pirovere. Ari oaravu karekeperea vo osa voreroverea Oirato Oviitoaro Jisas. Uvare Jisas-a ro ira oearovu rerava keripa irara opesi pie ovoireverea, ora vao Seten vo goruaro tapo. Osa iava uvuipavie vigei oirao pie vovou irara ra goruvira toupape rerare tuepaoro Jisas.

1. Aviavi pie reoro vo pasio iava, 1:1-8.
2. Tavitaviara varao voeaopa erao vatara (7) sios oara epao erao vatara uruiro-ia, 1:9-3:22.
3. Varao iava oara karekeperea vo utupaua oara kekereva Jon aue-ia areo uusi, 4:1-22:5.
  - a. Vuurapa vaisi puraiverea Pauto-ia vo vuvuua-ia, 4:1-11.
  - b. Vuku viko karureverea Sipsip Kakae, 5:1-14.
  - c. Erao vatara tuukeara kekereva areo uusi-ia, 6:1-8:6.
  - d. Erao vatara utave iava vo reoro, 8:7-11:19.
  - e. Erao vatara karero pisa karero rutu, 12:1-14:20.
  - f. Erao vatara orekeroru vuriara rutu iava varao Pauto vo kasipuroaro, 15:1-16:21.
  - g. Voeao Babilon oea voea vo voriaro vuri vori ouiverea, 17:1-19:10.
  - h. Vaiterei kove ovoisiverea vavaraito vaio ora profetato riro kuuvuto, 19:11-21.
  - i. Seten iava vo reoro vo osa rera tuukeiverea, 20:1-3.
  - j. Krais turarovira toupareverea reipaoro katai tuku ivaro (1,000 yia) sovara-ia, 20:4-6.
  - k. Vorevira Seten karuiverea, 20:7-10.
  - l. Oira rovirieipa voki iava vao rei voki rutu, 20:11-15.
  - m. Airepaua vuvuua vouao ora airepa rasi, 21:1-8.
  - n. Airepa urui Jerusalem urui iava, 21:9-22:5.
4. Ovoiopa reoro vo vukuo iava, ora vo osa Krais oiso puraroepa, Oiraopavira rutu, ikauvira urioravere taru, 22:6-21.

<sup>1</sup> ♦ Vo reo tuariri rutu oisoa kareke asavira rutu toupaive. Oa iava Pauto Jisas Krais-pa poeravira rutu vo reo kareke rovoreva vaore, oiso ra ora rera voeaoaropa kovopa irara vo reo roroiovira kareke piereve. Orekeroru rutu iava vo reo varao oarapa tutuu piepai ra karekepape. Uva vara-a varao oara iava Krais ragai soporereva, ragai rerapa kovopato tarai pieoro. Vao-ia osa ragai iare iravu purapurapato ensel arureva ragaipa vo reo vatepasa. <sup>2</sup> Uva ragai-a vao Jon ragoa vara rutu varao kekeava. Oa iava roroiovira rutu siposipopaa Pauto vo tavitaviaro iava, ora vo reo vao Jisas Krais vo reoaro oa oiraopavira karekereva.

<sup>3</sup> ♦ Uva voeao oea ora voea gisipoara oaive iava vo reo vieipaiverea Pauto vo reoaro vo vukuo iava, oea roruiverea rara. Ora voeao oea vo reo uvupaiverea ra vo reo sirova utupaave, oearoa tapo roruiverea. Oea rutu evoea uvuipaa ra vo reo sirova utupaave rutu. Eake iava? Uvare vuuta-a vao oapa tutuuvoi ra karekepe. Ovuuta-ia vara rutu karekepere varao oarare taviroiva Jisas, vo reo rigatoavora vo vukuo-ia.

*Vo Toupai Vo Reo Iava Vao Oa Rigatoreva Jon Erao Vatarapa (7) Gururo*

♦ 1:1: Jo 12:49; Re 22:16    ♦ 1:3: 1 Te 5:27; Re 22:6-7; Lu 11:28

<sup>4</sup> ♦ Ragai-a vao Jon ragoa vo reo rigatopaavoi visiipa erao vatara (7) lotupa gururo. Visiigoa evoa toupataveira Esia Provins-ia. Ari ita, Pauto toupareveira oiso osa raga tuariri rutu oisoa toupareve. Osa raga-a ita eisi osa utupavira urioroverea. Ira raga uvuiparoi ra visii rutupa kave vovou rutu vatereve ora gavaure vovou. Ora erao vatara tapo aue uraura irara voeao oea paupa vao Pauto vaaro ruvara—ia toupaiveira, oea uvuipaa ra kave vovou vateive ora gavaure vovou visiipa. <sup>5</sup> ♦ Ari ita, ro Jisas Krais torevokovira Pauto vo reoroaro rutu Vatepato. Eera-a avaiotoa rutu Oviito. Ira vorevira toreroepa kopii tapi iava. Reitoa rutu-a turaro voeao rutupa king irara vo rasio-ia tou irara. Ira tapo ita uvuiparoi ra kave vovou vatepareve visiipa.

Eera ira vigeipa siraoparoveira. Oa vituaro iava vigei iava vuriara oavi verareva ora rera iava revasiva-ia. <sup>6</sup> Ira oiso vigei pierava ra oiso karekevio, Vigei-a rera vaaro sara, pris irara Pautoa-pa kovopa irara eera rera Aitetoaaro. Ira Jisas Krais kerariava ora gorua toupareveira vao vokiara rutu iarepa. Ovoieia.

<sup>7</sup> ♦ Vurata! Ira-a eera rukuta vuutaaro-ia uriosa aueparoi. Oa iava oirara rutu ora voeae osireiaro-ia rera kekeiverea. Ora voeao oea rera togaiva, oea tapo rera kekeiverea rara. Osa-a eisi osa iava oirara rutu vo osararovu rutu iava vo rasio-ia rirovira rutu rera-ia rugorugooapaoro gaupaiverea. Oiraopavira ita. Osa eisi vara rutu evara taru karekeperea. Ovoieia.

<sup>8</sup> ♦ Uva Turaro Pauto oiso puraroepa, “*Ragai-a orekerovu rutu vituaro. Ora ragai-a orekerovu rutu opesiaro.*” Ira raga ita eera Pauto, ira vo vokio touparevoi oiso osa raga ita tuariri rutu oisoa toupareve. Uva oisi raga ita eisi osa utupaua urioroverea. Uvare rera raga-a goruara rutu vituaro.

#### *Jon Oirato Oviitoaaro Ro Ropoto Kekereva*

<sup>9</sup> Ragai-a Jon visii araokotoaaro. Uva ita, vigei rutu-a Jisas voeao. Uvare visii tapo ora tavosipaoro upiara vo vavataaro oupaaveira. Ora vo osa Pauto vo tokiaro-ia toupaaveira visii tapo, osa iava vigei rutu tuvuu vovouvira rutu torepavioveira siraoa oupaoro. Ari ita, ragai oisoa Pauto vo reoaro iava siposipopaa ora varao iava oiraopara oara kareke pierava Jisas. Osa-a eisi osa iava ragai siguivora vo toko-ia ragai tovosa oa vaisipaiveira oiso, Patmos Toko. <sup>10</sup> Vo Turaro vo vokiaro-ia Tugoropato Uraurato ragai iava sopaua-ia ora karekeroepa rutu. Uva ora ragai isivaaro-ia ogurukovu riroa rutu uvuavorao oiso rorovira osa utave. <sup>11</sup> Oreoa vao oiso puraerao, “*Auero rutu kekepariveira oara rutu-ia uvuipauei ra vara rigatori vukua-ia. Oire ra vo vuku sipori evoeapa erao vatara gururo oiso, evo Sios Efesas-ia oa toupaiveira, ora varaopa oara Smena-ia toupaiveira, ora Pegamam-ia, ora Taiataira-ia, ora Sadis-ia, ora Filadelfia-ia, ora Leodisia-ia.*”

<sup>12</sup> ♦ Oire uva ora poreraerao rera kekesa ro ira ragai tavitaviparevorao. Uva ora pore ovoiraiva, erao vatara (7) aue vuravu kekeavorao oara puraiva aue iava gol. <sup>13</sup> ♦ Uva iravu kekeavorao osa vara vuruvuruaro-ia varao vuravuara touparevorao. Irapa oiso paerao Oirato Oviitoaaro Ro Ropoto. Ira riro kaekaetao-ia kuvupato kuvupaoro rera rutu tauruparevorao kokotoarei rutu-ia rekasispaoro. Ora gol iro-ia takipa iro takiparoerao ora rera kopukopuaro rutu-ia vo iro taurupaoro. <sup>14</sup> Uva rera kukuearo-ia orui popoteparoerao rutu oiso osa sipsip oruaro. Uva oiso tapo popoteparoerao osa popotepava rutu rukuta. Ora osireitoarei aiterea rera iava aroropavira roropasivorao oiso rutu osa tuituia vuvuaro. <sup>15</sup> Kokotoarei tapo rera iava sisikorevira rutu roropavirao oiso osa bras kasi roropavira tuituia-ia, ra utupavira va tuiaviva va rekorekooro. Ora rera tapo iava okoe uvuavorao iria rera iava rirovira pokoo viro oiso osa riroa uuko sirisiri oa pokopi. <sup>16</sup> Uva erao vatara-ia aaviiko pituparevorao oirapapa vavae iava, ora toorio ira-ia varei avuavuarei toupaiveira. Ira avuparevorao pitupa iava ora rera iava gisipo-ia. Ovusa rera iava tapo puaua roro iraopavirao oiso osa ravireo goruvira roro iraopareveira.

<sup>17</sup> ♦ Uva rera kekeoro koveraerao rera kokotoaro ruvara-ia. Uva ragaipa oiso paerao rutu kopiito. Oa iava ragai-ia ora rera iava oirapapa vavae tovooro oiso puraroerao, “*Opeita uriripau. Ragai-a irapatoa rutu. Ora ragai-a ovoikutoa rutu.*” <sup>18</sup> ♦ Ragai-a vao

❖ 1:4: Jo 1:1; Eks 3:14    ❖ 1:5: Re 3:14; Sam 89:27; Pro 14:5    ❖ 1:7: Sek 12:10    ❖ 1:8: Ais 9:6-7; Re 21:6

❖ 1:12: Eks 25:27; Sek 4:2    ❖ 1:13: Esi 1:26; Dan 7:9-13, 10:5-6    ❖ 1:17: Esi 1:28; Dan 8:18, 10:10    ❖ 1:18: Lu 16:19-31

tootoovira toupaan ragoa tuariri kopiiraera. Ari ita, ragai kekerivoi ovusa vo tootooia toupaavoi Opesi Asa Tootoo, ragoa gorua rutuva toupaavoi vao kopiia vo goruaro vituaro. Osa iava uvuiparai voea tore piepasa vova kopiia iava, ora oearovu tovopasa vo ovoiei kopii-ia. <sup>19</sup> Osa-a eisi osa iavirava vo reo rigatori vara rutu iava varao oara kekerivoi vo vokio iava vara, ora varao tapo oara karekepaperea voari utupaua. <sup>20</sup> Ave erao vatara aaviikoara kekerivo ovusa ragai iava oirapapa vavae-ia toupaivo, ora varao erao vatara aue vuravu golara. Oara eva oiso toupaivoi, Reo ruu. Oara porearo vituaro oiso toupaivoi. Vao-ia erao vatara aue aaviikoara oara oiso toupai, Eovea purapurapa irara ensel erao vatara Siosro voearo. Ora varao vuravuara erao vatara, oara oisi raga ita toupaivoi oiso, Erao vatara aue Siosara.

## 2

*Jisas Jon Tavireva Efesas-pa Irara Iava*

<sup>1</sup> “Reoara rigatori enseltoa iare, ro ira Efesas-ia lotupa irara tokipareveira vo reo iavirava oiso-ia. Ragai erao (7) vatara-ia aaviiko pitupaaveira ora ragai iava oirapapa vavae iava. Ora erao vatara vuruvuruaro-ia aue vuravuara golara vokapaaveira viipa vo reo vao sipopasa.

<sup>2</sup> ♦ “Ragai vii-ia taraiparai vo vovouro rutu iavirava oara purapariveira ora vii vaaro tapo kasivari kovo. Uva taraiparai oiso, Goruvira rutu torepausei raverave asavira vuri irarapa reasipaoro rutu. Voeao oea oiso vii tavipaivora, Igei tapo-a aposel irara. Vo osa viapau. Vo uvare voea vo reoroaro tapo rovirierivora. Oa iava voea vo pitupituroaro iava tarai ourivora oiso, Voea-a riro kuuvu irara raga. <sup>3</sup> ♦ Uvare voea-a evoea oea vii kekeivora vo osa ragai vaisiaroia pituparivora. Oa iava vii vuri pieivora. Ari goruvira rutu torepauveira vo sirao vavataaro kaepaoro. Uva viapau oiso reasiuera tuuvuvira rutu kovo arapa. Oiso osa vii-ia taraiparai. <sup>4</sup> Ari ita, oavivu oa iava vii tavipaavoi. Voari tuariri osa airepavira rutu oisoa oirao piepari, ovuuta-a eva oa-ia oisoa ragai kavikopari rutu. Ari vo vokio, viapau. <sup>5</sup> Voari tuariri uva oisoa vearo vovou rutu purapari. Uva ita, va arova koveuerao. Uva oisi-a eisi osa iava oiso vovouparai ra vorevira ora rugoo pieu vo vovoure eva oa oisoa pura rovopari voari tuariri. Oire uva uvuipaei ra sopaua poreri, ra vo vovou eva purari oa oisoa purapari voari rovovira rutu. Ari vosi viapau ora vii iava sopaua poreri, oire uva voa-a evoa uva urioravere vii arova vuravu verasa vova oira vo tavukiaro iava. <sup>6</sup> Ari ita, touvira vo vovou eva vii-ia toupaivoi, vo uvare keripauveira Nikolas-pa irara vo vovouarova. Uva ragai tapo ita voea vo vovouroaro-pa oisi reasi iraoparaveira.

<sup>7</sup> ♦ “Ro ira-ia kokito toupareve, ira uvuiparoi ra vearovira rutu vo reo uvu iraoreve Tugoropato Uraurato oreoa-ia lotupa gururore reoreoroi. Oiso-ia vosa ro ira upoava ora keevoisiro, eera-a irapa uvuiparai ra vagagaavora, aio ouro vo evaova iava Tootoo Vatepa Ova. Oeva eva Pauto vo kovoaro-ia toupaiveira.

*Jisas Jon Tavireva Smena-pa Irara Iava*

<sup>8</sup> ♦ “Reoara vai rigatori enseltoa iare, ro ira Smena-ia lotupa irara tokipareveira vo reo iavirava oiso-ia. Ragai-a Irapatoa rutu ora ragai-a Ovoikuto rutu. Ragoa tuariri kopiiraepa. Uva vaviopavira tootoovira toupaavoi. Oa iava vo reo sipoavoi vii iare.

<sup>9</sup> ♦ “Taraiparai vii vo siraoroaro-ia ora upiara varao oara vii-ia karekepapeira. Osa iava vii-ia taraiparai oiso, Apotavira rutu touparivoi varaopa vo rasio iava. Vo osa vo vuvuiua-ia uva vii varaaro rutuei oara toupaivoi. Ora vao-ia osa taraiparai vo reo-ia oa-ia oearovu vii tovipaoro oiso purapaaveira, Igei-a Jiu iava voea. Ari ita, osa viapau oiso Jiu iava voea-a. Viapau. Easi, Seten voeaaro evoea. <sup>10</sup> ♦ Utupauavi upiara ourivere. Uva viapau oiso uvuipau ra uriripau vapa eva. Uvuri! Seten visii iava oearoi tuukerevere rara oeai-ia kokarapasa. Oire ra upia oupaive oearoi katai tau [10] rutu-ia aue vokiara. Uva uvui iraopau ra goruvira rutu oirao piea-ia pitupari vo vuutari rutu-ia tugurasa uva kopiuverea. Osa iava vii vateaverea voria vao Tootoo Ovoi rutu.

<sup>11</sup> “Ro ira-ia kokito toupareve, ira uvuiparoi ra vearovira rutu vo reo uvu iraoreve Tugoropato Uraurato oreoa-ia lotupa gururore reoreoroi. Oiso-ia vosa ro ira upoava ora keevoisiro, osa iava eraopa kopii viapau uvuipai ra rera vuri pieve. Viapau rutu.

❖ 2:2: 1 Jo 4:1-6; 2 Ko 11:13 ❖ 2:3: Hi 12:1-3; Ga 6:7-9 ❖ 2:7: Mt 11:15; Re 3:6, 13; Jen 2:9, 3:22-24 ❖ 2:8: Re 1:11, 17-18 ❖ 2:9: Je 2:5; Re 3:9 ❖ 2:10: Dan 1:12, 12:3

*Jisas Jon Tavireva Pegamam-pa Irara Iava*

<sup>12</sup> “Reoara vai rigatori enseltoa iare, ro ira Pegamam-ia lotupa irara tokipareveira vo reo iavirava oiso-ia. Riro kaekaetao-ia toorio pitupaavoi riro avuavuto. Ira-ia varei avuavuarei toupai. Oa iava vii iare vo reo sipoavoi.

<sup>13</sup> “Ragai taraiparai vii vo uruiaro-ia ouruia-ia Seten turarovira rutu touparevoi. Ari ita, vo osa goruvira rutu ragai vaisiaro-ia pitupariveira ora ragai oirao piepariveira tapo. Uva viapau vo oirao pie eva kavurivora. Ari ita, tuariri ro-ia Antipas eera ragai iava siposipopato visii tapo oisoa toupaoro vearovira rutu ragai gisipoaro oisoa sirova utuparo. Oa iava reraupoiva visii vuutaaro-ia vo urui-ia eva oa-ia Seten toupareveira. Uva vo vuuta-a eva oa-ia tapo viapau oisoa ragai vaisiaro vataupata. <sup>14</sup> ♦ Ari ita, ragai oreorovuva toupaa viire. Uvare oearovuei vii voeaaro vo Pegamam oea goruvira rutu Belam vo vovouaro-ia pitupaiseira. Vo vovouo-ia Belam vaaro oiso-ia, Voari tuariri uva Belak tarai pierava vo vovouo iava oirara keakeapa voea Isrel. Oa-ia voea kove pierava vuri vovou iare. Oire uva Belak vo siposipoaro iavirava Isrel-pa irara oisoa vuri vovouro purapaive vo osa tauopa varuerero aiopaive, varao oara oisoa tauopaive kuuvu irarapa pau irara. Ora vo osa vao tapo otopa pitupitu oisoa purapaive. <sup>15</sup> Eisi ita osa raga oearovu epao vii ruvara-ia voeao oea goruvira rutu oearovu vo siposiporoaro varao vuri siposiporo sirova utupaaveira voearo Nikolas iavapa irara. <sup>16</sup> Osa-a eisi osa iavirava ora vii iava sopaua pore iraori. Ari vosa viapau oisi eisi pieri, uva tutuu piepai ra vii iare uriora voea tapo evoea ora uposa rera-ia ro toorio ira ragai gisipoaro-ia touparevoi.

<sup>17</sup> ♦ “Ro ira-ia kokito toupareve, ira uvuiparoi ra vearovira rutu vo reo uvu iraoreve Tugoropato Uraurato oreoa-ia lotupa gururore reoreoroi. Oiso-ia vosa ro ira uptoava ora keevoisiro, uva rera-a eera irapa aioara vai vateaverea vuvuiua iava varao oara vatauvira toupai. Ora irapa tapo eera popotepava aveke vateaverea, iria-ia airepa vaisi rigatoavere. Vo vaisio oa-ia viapau irai uvuiparoi ra tarairo. Ari ro raga ira oira eira aveke oureve, ira raga taraiparoverea.

*Jisas Jon Tavireva Taiataira-pa Irara Iava*

<sup>18</sup> “Reoara vai rigatori enseltoa iare ro ira Taiataira-ia lotupa irara tokipareveira vo reo iavirava oiso-ia. Ragai-a Paulo Oviitoaaro ragoa iava osireito oiso toupareveira osa aroropa tuituia. Oa goruvira rutu roropaoro vuvupai. Ora ragoa iava kokotoa oiso rutu sisikorepaiveira osa bras. Ragoa vo reo sipoavoi vii iare.

<sup>19</sup> “Ragai vii-ia taraiparaveira rutu vo vovouro rutu-ia oara purapariveira. Taraiparai vii-ia viigoa oirarapa siraopauveira ragai oirao piepaoro. Ora vo osa okovorovu rutu purapariveira oirara tauvapaoro. Taraiparai vo uvare goruvira rutu torepauveira otavakarovuva ora keevoisipaoro varao oara vii-ia karekepapeira. Ora oiso taraiparai ovovourovu rutu varari oara oisoa pura rovopari vearovpara. Oire uva vo utupavira pute pievira rutu okovorovu ita aia vearo pievira puraparivorao. <sup>20</sup> ♦ Ari ita, ragai-a vao oreovuva viire, uvare o eaka ragapariveira riakova Jesebel iria vii tapo toupareveira. Eira iria oiso purapaoveira, Ragai-a profetava, ovusa ragai voeaaro kovopa irara tarai piepaeveira otopa pitupituro sirova utupasa, ora tauopara varuara aiopasa varao oara tauopaiveira kuuvu irarapa pau irara. Uva vo vovouroa evara oara-ia voea keakeapaeveira. <sup>21</sup> Oiso ruipaparai oirapa ra ora oira iava sopaua poreeve. Eisi osa iava oira aate piepaeveira, oisore ra ovuutaro-ia tou rovoeve. Ari ita, osa viapau ora oira iava sopaua porepaeveira, oisore ra oisi iavirava otopa pitupiturore oira varaaro eakaeve. <sup>22</sup> Oire uvuri! Ragai riroa siitoka ora upia vateavere oirapa eira. Ora evoea oea oirava vo pitupituro otopara purapaiveira, vosa oisi iavirava viapau ora voea iava sopaura oaive porepaive vo pitupiture eva isivapasa, osa iavirava riroa siitoka voeapa vatepaavere taru. <sup>23</sup> ♦ Ora oira ovii iraraaro tapo kopii pie ovoavere. Osa iava eisi lotupa gururo rutu uvuipaii ra taraiave oiso, Ragai vearovira rutu rugorugooara rovirieipaaveira ora oirara rutu iava sopaura. Osa iavirava vara voriaro visiipa katakataivira kare pieaverea visii vo vovouroarova uvuivira varao oara purapataveira.

❖ 2:14: Nam 24:14-25 ❖ 2:17: Jo 6:49-50; Ais 62:2 ❖ 2:20: 1 Kin 16:31-32, 21:25; 2 Kin 9:7 ❖ 2:23: Jer 11:20, 17:9-10

<sup>24</sup> ♦ “Uva vaviopavira visii tavipaavoi, Oearovu visiigoa evoa Taiataira-ia toupataveira visiigoa viapau oiso vo siposipo sirova utupataveira vao vuria rutu. Ora viapau oiso vo vovou iava vao-ia taraia vai outava oa vaisipaiveira oiso, Seten vaaro vatau reo rutu vituaro. Uva ragai oiso visii tavipaavoi, Viapau oiso visiipa ovavatai vateaverea ita. <sup>25</sup> ♦ Ari ita, ovovourovu rutu vearovpara oara purapataveira, evara oara goruvira rutu pura iraopatavere vo rekasisa ovuuta-ia voreraverea. <sup>26</sup> Ari ita, vosa ro ira upoava ora keevoisi iraoro, eera ita ira ragai vo vovouaro rutu sirova utuparoi vo rekasisa uva rera vo vuutaaro opesiperea. Osa iavirava eisi ragai rera rei vaisi pieaverea, ra oirara rutupa reiparo. <sup>27</sup> Uva aintoa-ia tooro pitureve oirara tokipasa rerava. Oiso rutu osa ro ira pitokava ragioro oira garepa visivi kakiakireve. Vo kovo rerapa vateavere oa vaeapai vo kovova Aite ragaipa oa vaterева oirara rutu tokipaoro voeapa reipasa. <sup>28</sup> Ora tapo vo osa rerapa aviva vateaverea aaviiko. <sup>29</sup> Ro ira-ia kokito toupareve, ira uvuiparoi ra vearovira rutu vo reo uvu iraoreve Tugoropato Uraurato oreoa-ia lotupa gururore reoreoroi.

## 3

*Jisas Jon Tavireva Sadis-pa Irara Iava*

<sup>1</sup> “Reoara vai rigatori enseltoa iare ro ira Sadis-ia lotupa irara tokipareveira vo reo iavirava oiso-ia. Ragai erao vatarava (7) toupaavoi tugoropa urauraro Pauto voeapro. Ora varao-ia tapo erao vatara (7) aue aaviiko pitupaavoi. Ragoa ita vo reo sipoavoi vii iare.

“Uva taraiparai vo vovouro-ia oara purapariveira. Oiso purapaaiveira oearovu viire, Vo guruo lotupa irara tootoovira toupaiveira. Vo osa viapau, uvare kopiiuepa. <sup>2</sup> Erao iraou uusia kavuoro. Vii vo vovouroaro rutu epao touvira raga oara kopiisa auepai. Evara oara vorevira goru pie iraori. Eake iava? Uvare vo vovouro rutu oara oisoa purapari, viapau oiso oai kekepaavoi torevokoa vai ragai reraaro Pauto osireiaro-ia. <sup>3</sup> ♦ Tuariri vao uvuoro Vearo Siposipo va ouriva. Oire vorevira vare rugoo iraou! Ra oisi iavirava va vearovira rutu tokiri ora vii iava sopaua poreoro. Vosa viapau uusia kavuoro toreu, oire uva oisi-a eisi osa iava vii iare karera virovere oiso rutu osa kavirupato. Ovusa viapau taraiu vo vuutao-ia oa-ia vii iare poura viro. <sup>4</sup> ♦ Ari oearovuei vii iava oea Sadis-ia touvira toupai. Oea viapau oiso ora voea varaaro varoara vuivuipaive vuri pitupituro vai-ia. Oea-a evoea oea popotepara-ia varoara tuuoro ragai tapo vokapaiveira oea vaova uvuipaai. <sup>5</sup> Ari ita, vosa ro ira upoava ora keevoisiro, uva rera-a eera ira tuuaverea rara popotepa-ia varoa. Ora ira tapo vaisiaro viapau oiso veraaverea vukua iava vari Tootoopa. Viapau. Ari ira vaisiaro kosi pieaverea Aite oaa puaaro-ia ora enselpa irara puaaro-ia voeari Pauto voeapro.

<sup>6</sup> “Ro ira-ia kokito toupareve, ira uvuiparoi ra vearovira rutu vo reo uvu iraoreve Tugoropato Uraurato oreoa-ia lotupa gururore reoreoroi.

*Jisas Jon Tavireva Filadelfia-pa Irara Iava*

<sup>7</sup> ♦ “Reoara vai rigatori enseltoa iare ro ira Filadelfia-ia lotupa irara tokipareveira vo reo iavirava oiso-ia. Ragai-a Tugoropatoa Rutu ora ragai-a Oiraopa Vovou Rutu Vituaro. Ragoa kii-ia pitupaavoi Devit oiraaro ro ira oisoa turaroparo tuariri. Vosa rataoa karua, ra irai viapau uvuipa ra vorevira va tupareve. Ora vosa vo ratao tupaa, ra viapau oiso irai raga vo ratao ita karureve. Uva ragai raga ita vo reo vii iare sipoavoi.

<sup>8</sup> ♦ “Ovovourovu rutu-ia taraiparai oara purapariveira. Oire vurari! Ratao-a vao viipa karuavoi. Uva viapau irai uvuiparoi ita ra va tupareve. Taraiparai vii-ia gareavie gorua touvira toupaivoi. Ari ita, ragai vo reoaro sirova utupauveira. Osa iavirava viapau oiso ragai vaisiaro taeapariveira. <sup>9</sup> ♦ Taraipauveira voearo-ia voeao iava Seten voeapro oea oiso purapaaiveira, Igei-a Jiu iava voea. Oea ita-a evoea riro kuuvu irara. Oire uvuri! Oea-a evoea oiso pieaverea, ra rekusa urioave vii kokotoaro ruvara-ia. Ra oisi iavirava taraiave oiso, Ragai vii kavikopaaveira rutu. <sup>10</sup> ♦ Vii ita viigoa ragai vo reoaro sirova utupauveira. Oa iava goruvira rutu torepauveira tavakaara rutu-ia varao oara vii-ia karekapeira. Eisi

❖ 2:24: Ap 15:28    ❖ 2:25: Ap 1:11    ❖ 3:3: 1 Te 5:2, 6; 2 Pi 3:10    ❖ 3:4: Ap 1:15; Ju 23; Re 6:11, 7:9, 13  
❖ 3:7: Ais 22:22    ❖ 3:8: Jen 3:1    ❖ 3:9: Ais 49:23, 43:4    ❖ 3:10: 1 Ko 10:12-13

osa iavirava uvuiparai ra vii virivaria vaopa kokara oa karekepe oirara rutu-ia kokarasa. Ra oisi iavirava viapau oiso vii-ia karekepe vii vuri piesa. <sup>11</sup> Ari ita, ragai vii iare ikauvira rutu poura virovere. Vao oa-ia pitupari oa-ia eva uvuipaei ra oriruvira va-ia pitu iraopari. Teapi irai vii vo voriaro veraverareve va kaviruoro. <sup>12</sup> ♦ Ari vosa ro ira upoava ora keevoisiro, ira-a eera tore pieaverea oiso rutu osa tuuta vo kepa-ia toupasa Tugoropa Pauto vaaro ro ragai reraaro. Ra viapau oiso vorevira vo kepa kavureve Tugoropa Kepa. Viapau rutu. Ira-ia Pauto vaisiaro rigatoaverea ora riro urui vaisiaro tapo vao ragai reraaro Pauto vo uruiaro. Vo uruio airepa urui riroa Jerusalem, ouruia vuvuiua iava varaperea Pauto ruvara iava. Ora ragai iava vaisia airepa oa tapo rigatoaverea rera-ia.

<sup>13</sup> “Oire vosa ro ira-ia kokito toupareve, ira uvuiparoi ra vearovira rutu vo reo uvu iraoreve Tugoropato Uaurato oreoa-ia lotupa gururore reoreoroi.

#### *Jisas Jon Tavireva Leodisia-pa Irara Iava*

<sup>14</sup> “Reoara vai rigatori enseltoa iare ro ira Leodisia-ia lotupa irara tokipareveira vo reo iavirava oiso-ia. Ragai-a Oiraopa Reo Rutu Vituaro. Ragoa torevokovira Pauto vo reoroaro rutu kosi piepaaveira. Vokiara rutu-ia oiraopa reo raga kosi piepaaveira, ragai orekerovu rutu vituaro Pauto oara purareva. Ragoa vo reo sipoavoi vii iare.

<sup>15</sup> “Taraiparai ovovourovu rutu-ia oara purapariveira. Taraiparai vii-ia viigoa viapau oiso toupariveira osa vukusi ovi ragaipareasipaoro. Ora vo osa viapau oiso toupariveira osa kasirao ovi ragaipa ruipa iraopao. Uva oiso ruipaparai ra vukusivira touri, eke kasiraovira touri aeapa, teapi avavaipau vo rugoorei-ia. <sup>16</sup> Ari ita, vo osa viapau. Uva gare visivi raga kasirao visivi toupariveira. Viapau oiso ra kasiraopau rutu. Ora viapau oiso ra vukusipau rutu. Osa-a eisi osa iavirava ora ragai gisipoaro iava vii rui iraoavere vii kosi pieoro. <sup>17</sup> ♦ Viigoa oiso purapauveira, Ragai-a riro monito, ragoava riroara rutu epao. Viapau oiso oavu avu vaipa apotaparaveira. Ari ita, osa viapau, uvare vurivira rutu toupari. Viigoapa uvuipaa oirara ra viipa siraopaa, uvare apotavira rutu toupariveira Pauto vo rugooaropa. Ora uvare voosi osireivira toupariveira. Ora gapuvira toupariveira ovusa vii raga viigoa vao-ia viapau taraipauveira. <sup>18</sup> ♦ Eisi osa iava vo rugorugoo vateaavoi viipa. Ragai vaaro gol roroio oa-ia uvuipaei ra va voriri eva gol ragai ruvara-ia, ra oisi iavirava riro moniu. Oa iava uvuipaei ra popotepara varoara voriri ora vii iava varaua rakurakupasa. Ra oisi iavirava viapau oiso oirara uvuipaave ra gapuvira vii kekepaive, ra oisi iava ariipau. Osa iava uvuipaei ra ruvarupara vai marasinara vai voriri ora vii osireiaro-ia oarai tovopasa, ra vuravurari ita. <sup>19</sup> ♦ Ari ita, kasivarivira ragai voeaaro torevokopaaveira vo osa ora voea vaaro raga-ia vuria voea togapaa. Eake iava? Uvare voea kaviko iraopaaaveira rutu. Eisi osa iava uvuipaei ra rugorugoo iraopau ora vii vo vovouroarore. Ra ora vii iava sopaua pore ovoiri. <sup>20</sup> Kekeri! Rataoa-ia to reparai va totopaoro. Vosa ro ira ragai gisipoaro eveireve ra vo ratao karureve, oire ra oisi iava koatara rera tapo aiosa. Ra rera ita ragai tapo aioreve. <sup>21</sup> Ari ita, vosa aa ro avu ro ira upoava ora keevoisiro, irapa eera vagagaavora, ragai tapo pauro paupa-ia ragai vaaro. Eisi osa ita ragai tuariri vo upova ora keevoisiraepa. Oa iava Aite tapo pauraepa rera vaaro-ia reia paupa.

<sup>22</sup> “Ro ira-ia kokito toupareve, ira uvuiparoi ra vearovira rutu vo reo uvu iraoreve Tugoropato Uaurato oreoa-ia lotupa gururore reoreoroi.”

#### 4

#### *Vuvuiua-ia Tou Irara Pautoa-ia Vuurapa Vaisi Purapaveira*

<sup>1</sup> ♦ Evo reo opesieiva, urusia-ia vuvuiua kekeavorao uva rataoa karuvira touvorao. Ora oreovu gurukoaro tuariri ogurukoa uvu rovoavorao oa ragai tavipaivorao oiso gurukopaoro osa utave. Uva vo vokio oiso purae, “Vore ipau, ra vii kareke piea orekerovu rutu iava varao oara utupaua kareke iraopaperea.” <sup>2</sup> ♦ Uva ikauvira raga Tugoropato Uaurato goruvira rutu ragai-ia kareke ovoiroi. Oa iava rera vo goruaro iavirava voa vuvuiua-ia paupa reito vaaro kekeavorao ovusa iravu va-ia pauparoeroa. <sup>3</sup> Uva ro ira

♦ 3:12: Ga 2:9; Re 22:4, 21:2   ♦ 3:17: Hos 12:8; Sek 11:5; 1 Ko 4:8   ♦ 3:18: Ais 55:1; Mt 13:44   ♦ 3:19: Pro 3:11; Hi 12:5-8   ♦ 4:1: Esi 1:1   ♦ 4:2: Esi 1:26-28; Dan 7:9

pauparoerao paupa-ia ira kekeavorao osa roroparevorao sisikorepaoro oiso rutu osa aveke o jaspa-va ora revasipava iriavu aveke konilian-va. Uva iravu govugovuto paupa reito vaaro kovokovoparevorao. Uva ragai rera kekeavorao kokovaravira vo osa oiso roroparevorao osa aveke emeral. <sup>4</sup> Uva erao tau vo resura rutu (24) paupara oara reito vaaro paupa kovokovopaivora. Ora erao tau vo resura (24) turaro irara oea vara-ia paupaaerao. Uva voea evoea turaro irara oea popotepara-ia kuvupaaerao. Ora kuku-vaiparava toupaivora golara. <sup>5</sup> Uva reito vaaro iava paupa varakeoto parakauparevorao. Uva gurukoa karekeerao oa iava varakeoto pokoro virora. Uva paupa ruvara-ia erao vatara (7) ao touro roropaoro toupaivora. Uva vo touro-a evara ao touro uraura irara Pauto voeaaro erao vatara. <sup>6</sup> ♦ Uva voa vo paupa ruvara-ia oavu avu epao oa oiso toupaivora osa rirova avakava. Oa oiso rutu toupaivora osa sisiro roroiova rutu.

Uva okarevu avu vo resura tootoopaoro paupa reito vaaro kovokovopaivora uva torepaerao. Uva vo resura eva okarea-ia riroara rutu osireiara toupaivora kopukop-uuara rutu vo kare iava uvui piepaoro ora oisova vo kare isivaaro-ia. <sup>7</sup> ♦ Uva rovopatoa rutu-a ro ira toootovira toupareveira oiso rera osa laion. Ari eraopatoa-a ro iravu oiso rera osa bulmakau kakae. Uva vo pevapato-a ro iravu oiso puavira touparevorao osa oiratoa iava puaua. Uva vo resurapato-a ro ira oisi touparevorao osa iravu riroto keravo. Ira viara-ia papapareveira. <sup>8</sup> Uva vo resura vao toootovira toupaiveira, oresura rutu-ia katakataivira katai vatara ae putaera toupaivora. Ora riroara osireiara oara voea rutu iava varaura rutu-ia uvui pievira toupaivora ora putaeara reroaro tapo. Uva ravireoura rutu-ia ora vokiararo erapaaveira opesi asavira oiso purapaoro,

“Turaro Pauto ira-ia goruara rutu toupaiveira, eera Tugoropato, eera Tugoropato, eera Tugoropato. Ira tuariri rutu oisoa toupareve. Uva vo vokio tapo toupareveira. Uva uriosa aeparoi.”

<sup>9</sup> ♦ Uva vo kare eva Pauto vaaro iava keraria tavitavipaaveira ira pauparoveira reipa paupa-ia toootovira raga toupaoro vokiara rutu-ia. Oa iava rera vaisiaro-ia vuurapa vaisi purapaiveira. Ora rera-ia vearo vaisi purapaiveira. Uva vuutara rutu-ia vo resura eva toootovira toupaoro oisi raga piepaiveira eisi. <sup>10</sup> Ovuutaroa-ia voea evoea erao tau vo resura (24) turaro irara rekupaiseira rera ruvara-ia ira paupa-ia pauparoi reito vaaro. Uva rerapa vuurapa vaisi purapaiveira ovusa toootovira raga toupareve vokiara rutu-ia. Uva kukuvaipara golara ora voea varapro vikipaiveira, ra vo kovepasa avapape paupa ruvara-ia rera vaaro. Uva oiso purapaaveira,

<sup>11</sup> “Turaro. Vi-a igei reraaro Pauto. Viigoa uvuipauveira rutu ra oirara rutu vii vaaro iava keraria tavitavipaave vii vaisiaro kae piepaoro, ora vii vo goruaro tapo reroarovi toupaoro. Uvare vii raga orekerovu rutu purariva ora vii raga vo ruipaaro-ia. Uva vara purarivoiva, karekeepa. Uva vo vokio vara rutu varao toupaiveira.”

## 5

### *Jon Oavu Vuku Viko Kekereva Oa Tuukeiva*

<sup>1</sup> ♦ Uva Pauto rera vaaro-ia paupa paupaoro oirapapa vavae iava oavu-ia vuku viko pituparevorao oa kekeavorao. Oa-ia rigatoa toupaivora sovara-ia ora vova va varapro-ia. Uva vo viko tuuke-ia erao vatara-ia tep tuukero oara-ia reesiara toupaivora.

<sup>2</sup> ♦ Ora iravu purapurapato ensel gorutoa rutu kekeavorao ovusa paupaoro rirovira takatoparoerao oiso akepaoro, “Irouto-a vearto ira-ia reesia toupaivoi oa iava uvuiparoi ra tep tuukero tokoreve, oiso ra vuku viko vao karureve?” <sup>3</sup> Ari ita, viapau oiso vuvuiua-ia irai epao, ora vo rasitoa-ia, ora vo rasito reroaro irai epao ira uvuiparoi ra vo viko vao vukua karureve va sovara-ia vuravurasa. <sup>4</sup> Ari ita, viapau oiso irai kekepaivora ro ira uvuiparoi ra vao vukua kruoro va sovara-ia vuravurareve. Osa-a eisi osa iavirava gau iraopaavorao. <sup>5</sup> ♦ Uva iravu voea iava turaro irara ira ragai tavirevorao oiso, “Opeita gaupari. Kekeri! Laion-a ro-ia Juda sara iava rera oirato. Devit aao iraraaro iava rera. Ira

♦ 4:6: Re 15:2; Esi 1:5    ♦ 4:7: Esi 1:10, 10:8-22    ♦ 4:9: Sam 47:8    ♦ 5:1: Esi 2:9-10; Ais 29:11; Dan 12:4

♦ 5:2: Ais 63:4-6; Re 10:1    ♦ 5:5: Jen 49:8-12; Ais 11:1, 10

viapau vuri vovou vai, uvare upoava ora keevoisiroepa rutu. Osa iavirava eisi uvuiparoi ra vo vukuo iava tep tuukero toko rovorevora, vo viko karureve.”

### *Sipsip Kakae Kekereva Jon*

<sup>6</sup> ♦ Uva urusia-ia oavu Sipsip Kakae [aue Jisas] oa kekeavorao ovusa torepaaerao oiso osa va upoivoiva, kopiiipa. Oa reito vaaro-ia paupa vuutaarovi-ia torepaaerao ora vo resurao vuruvuruaro-ia, okarea tootoovira toupaiveira turaro irara tapo. Okakaea erao vatarava ketaara toupaivorao, ora erao vatara aue osireiara. Eova ita-a erao vatara uraura irara Pauto voeaaro. Pauto oea arureva voraro ruture rasitoa rutu-ia. <sup>7</sup> Uva Sipsip Kakae avaerao vo vuku ousa ovusa Pautoa iava oirapapa vavae-ia toupaivorao. Vo osa rei-ia paupa pauparoerao rera vaaro. <sup>8</sup> Uva vo vuku ouvorao vo kakae ovusa vo resura eva, okarea tootoovira toupaiveira, ora erao tau vo resura turaro irara oea rutu rekuivorao vo Sipsip kakae ruvara-ia. Uva voea rutu turaro irara katakataivira orekerovu-ia pitupaivorao, oiso roroara osa gitu, ora oaravu disara golara, ora akoroa riro geesia, oa kasipaiveira ra geesipape, oa iava disara agasipaerao. Oara-a evara variriara oirara rutu Pauto voeaaro reesipaivorao. <sup>9</sup> ♦ Uva iriavu-ia erava airepava eraaerao. Iria oiso purapaoi,

“Vii-ia reesia toupaivoi. Uvui iraopaei ra vukua ouri, ra va iava tuukeara tokori. Uvare vii upoiva oa iava kopiiuepa. Oa iava ora vii iava revasiva-ia oirara rutu vorevira voririva Pautoa-pa voea vatesa. Iu. Oirara rutu osararovu rutu iava voririvora, ora oreovu rutu iava, ora ovararovu rutu, ora okantrirovu rutu iava. <sup>10</sup> Voea oiso pieriva, ra oiso toupaive king irara prispaoro Pautoa-pa kovopa irara ro vigei reraaro. Ra oisi iavirava oiso toupaive, Voea-a oirara rutupa reipa irara voeo oea vo rasio-ia toupaiveira.”

### *Sipsip Kakae Vaisiaro Kae Pieiva*

<sup>11</sup> ♦ ♦ Oire uva vorerivira ita oavu kekeavorao. Uva riro irara rutu enselpa irara gisipoaro uvuavorao oea uvuiaro rutu-a voeo oiso uvuipaaerao riroara rutu ipuipuara (handet milion) ora riroara rutu tukuara (tausen tausen). Oea rutu torepaaerao Pauto vaaro paupa kovokovopaoro, ora vo kareo tapo oea tootoovira toupaiveira, ora voeo tapo turaro irara. <sup>12</sup> ♦ Oiso erapaoro rirovira rutu raga piepaivorao,

“Vo kakaeo-ia Sipsip Kakae tuariri oa upoivoiva, oa kopiiipa. Ira uvuiparoi rutu ra gorua oureve, ora orekerovu rutu vearopara, ora vearpa tarairo, ora riroa rutu varivaria. Ira uvuiparoi rutu ra oirara rutu rera vaisiaro kae pie iraopave. Ora rera vaaro iava keraria tavitavi iraopave rera-ia vearo vaisi purapaoro.”

<sup>13</sup> ♦ Oire uva orekerovu rutu reoreoaro uvuavorao Pauto oara purareva, varao oara vuvuiua-ia toupaiveira, ora varao oara rasito reroaro toupaiveira, ora varao oara avakava-ia toupaiveira. Iu. Evara rutu oara uvarovu rutu toupaiveira ragai oara rutu vo reoaro uvuavorao osa oiso puraaerao,

“Pauto rei-ia paupa rera vaaro pauparoveira ora Sipsip Kakae aiterea rutu uvuipasiei ra vuurapa vaisiro rutu ora rei vaisiro ousi, ora keraria, ora varivaria varao vokiara rutu iarepara!”

<sup>14</sup> Oire uva evo reo isivaaro iava vo resurao okarea tootoovira toupaiveira okarea oiso puraaerao, “Ovoiei.” Oa iava turaro irara vaiterei-ia vuurapa vaisi purapaoro rekupajvorao.

## 6

### *Sipsip Kakae Katai Vatara (6) Tep Iroro Vukua Iava Tokova*

<sup>1</sup> Oire uva Sipsip Kakae kekeavorao ovusa vo vuku-ia eva pitupaivorao oa-ia erao vatara tep tuukero toupaiveira. Uva rovo tuuke toko rovovorao. Oa iava ragai oavu uvuavorao vo kareo iava okarea tootoovira toupaiveira. Oa reoreoaro gurukoaro oiso rutu pokorirorao osa varakeoto. Oa oiso puraerao, “Uriou.” <sup>2</sup> Oire uva vorerivira ita vuraavorao.

◊ 5:6: Re 4:6; Ais 53:7; Sek 3:8-10, 4:10   ◊ 5:9: Sam 40:3; 1 Ko 6:20   ◊ 5:11: Dan 7:10; Hi 12:22   ◊ 5:11: Dan 7:10   ◊ 5:12: Fl 2:9-11   ◊ 5:13: 1 Ti 6:16; Re 1:6, 6:16, 7:10

Oa iava iriavu popotepava hos kekeavorao ora ro ira oira ivara-ia paupaoro koetava-ia pituparevorao. Uva rerapa kukuvaipa vateivorao. Oa oiso rutu toupai osa vao oa vatepaiveira ropa ira upoava ora keevoisiro. Oire ra vava avaroera upoara purapasa. Oiso ra voea-ia keripa irara putereve upoa-ia.

<sup>3</sup> Uva Sipsip Kakae eraopa tuukea vukua iava tokovorao. Uva eraopa uvuavorao vo kareo iava okarea tootoovira toupaiveira. Oa oiso puraerao, “Uriou.” <sup>4</sup> ♦ Uva iriavu revasipava rutu hos kosi virooro karekeorao. Uva ro oira-ia pauparoerao ira gorua oureva upoa kareke piesa oirara-ia voeao vo rasio-ia tou irara. Ra oisi iavirava ora upopaoro ora kopii piepaave oearovu tapo. Osa-a eisi osa iava rera vateivorao iravu riroto toorio vo kovo vao purasa.

<sup>5</sup> ♦ Uva Sipsip Kakae vo pevapa tuuke vukua iava tokovorao. Uva vo pevapa uvuavorao vo kareo iava okarea tootoovira toupaiveira. Oa oiso puraerao, “Uriou.” Oire uva iriavu rupava hos kekeavorao. Iria ivara-ia iravu pauparoerao. Ira skel-ia pituparevorao orekerovu atepato ora rera iava vavaea-ia. <sup>6</sup> Uva ogurukovu uvuavorao oapa oiso paierao oavu reoreoa oa uriopaerao vo resurao vuutaaro-ia okarea tootoovira toupaiveira. Oire uva vo reo-a eva oiso puraerao, “Gare pitokavi vai wit ateri aue uvuiaro-ia katai voki voriaro. Ora opevavi rutu gare peva vai rais pitokaro vai ateri katai voki voriaro, uvare viapau riroara aioara epao. Ari opeita oliv ovi korovoaro vuri pieri ora aue tapo wain-ia.”

<sup>7</sup> Uva Sipsip Kakae vo resurapa tuuke vukua iava tokovorao. Uva vo resurapa uvuavorao vo kareo iava okarea tootoovira toupaiveira. Oa oiso puraerao, “Uriou.” <sup>8</sup> Oire uva vorerivira ita vuraavorao. Oa iava iriavu keseva hos kekeavorao ora ro ira oira ivara-ia pauparoerao. Rera vaisiaro ro-ia, Kopiia. Ora ro turaroto kopii urui iava rera ira tapo urioroerao. Aiterea rutu-a evaiterei oirara rutu voeao vo rasio-ia vo resura-ia sara uvuiaro iare voea roo piesiva. Oa iava vo resura iava osaravupa reipasiveira. Oire uva gorua ousiva evo sara kopii piepasa aue-ia toorio upo purapato, ora ogoeto, ora oaravu rutu upiara, ora vo kareo-ia vavarai kare vo rasio iava voeа.

<sup>9</sup> ♦ Uva Sipsip Kakae vo vavaepa tuukea vukua iava tokovorao. Oire uva oearovu kopii irara urauraaro kekeavorao ovusa eravao alta reroaro toupaivorao. Tuariri rutu oea Pauto vo reoaro-ia goruvira rutu pituiva. Oa iava oisoa vo reo iava siposipopai. Uva va-a eva vituaro iava keripa irara voea kopii pieiva. <sup>10</sup> ♦ Uva voeа evoea uraura irara oea rirovira rutu keerapaoro arepaerao oiso purapaoro, “O Reito Turaro King. Orekerovu rutupa tugorovira toupariveira. Ora vo osa vii vovouaro-a oiraopa rutu. Ovirovu rutu vuuta pute rovoverea, ra tavaa purari kort voeaova oirara oea rasitoa-ia toupaiveira. Ra igei revasiaro kare pieri, raa?” <sup>11</sup> Oire uva voeapa popotepa kuvuro vateiva katakataivira oiso voea tavioro, “Rearea rovota. Visii tapo kovopa irara ora voeao araoko irara oavisii oea upoverea keripa irara oisi ita osa visii upo rovoiva. Oire ra oisi iavirava visii rutu vieiaro uvuivira karekeperea vo vieio oa reesi rovoreva Pauto.”

<sup>12</sup> ♦ Oire uva Sipsip Kakae kekeavorao ovusa katai vatarapa tuukea vukua iava tokovorao. Uva vuravuraavorao ita. Oa iava riroto ravurike kekeavorao ira rasitoa rutu-ia karekeroerao. Ovusa ravireo ora poreroerao rupaoro oiso rorovira osa pupuria varoa. Ovusa kekira rutu revasiro virorao rutu oiso rutu osa revasiva. <sup>13</sup> Uva aaviikoara rutu vuvuiua iava kovekoveerao rasitoa iare oiso rutu osa fik kue vao oa viapau viorope. Ra kiuvu va kuki ragareve. Ra oisi iava kovepe. <sup>14</sup> Ora vuvuiua tapo oua vera pirorao oiso rorovira rutu osa urupava mat vikopaiseira. Ovusa pukuiara ora tokotokoara ora vara vo tavukiroaro rutu kavupaivorao ora virupaoro. <sup>15</sup> Oire uva king irara voeа vo rasio-ia, ora rei vaisi irara, ora viurupa irara voeao kepten irara, ora voeao riro moni irara, ora riro varivari irara, ora oirara rutu voeao oea akukupapavira kovo ragapaiseira, ora voeao oea evoeapa reipaiseira. Evoea rutu oearoa vataupaaerao aveke kakiro sovaria vo rasitoa-ia ora oaravu riopara aveke tokutokuro reroaro vagapara-ia. <sup>16</sup> Uva keerapaaerao pukuiara ruture ora avekeara oiso purapaoro, “Igei ivara-ia kovekoveta igei utopaoro Pauto osireiaro asavira ira pauparoi rera vaaro-ia reipa paupa ora Sipsip Kakae

◊ 6:4: Nea 2:1-3 ◊ 6:5: Sek 6:2 ◊ 6:9: Hi 11:32-40 ◊ 6:10: Sam 13:1-6 ◊ 6:12: Joe 2:10-11, 30-32

tapo vo kasipuaro asavira. <sup>17</sup> Uvare rei voki rutu-a vaiterei vaaro oa-ia riroa kasipua toupaivoi vuri vovouro voeapa voriaro tuusa. Ovokia-a vao pou piroi. Uva iroutoa vaiei ira uvuiparoi ra vaitereire korusa keevoisivira torepa, raa? Easi viapau iraiei.”

## 7

*Uva Oiso Uvui Irara Isrel Pauto Vo Reesiaro Ouiva 144,000*

<sup>1</sup> ♦ Vara rutu-a varao oara opesieiva, vo resura purapurapa irara ensel kekeavorao ovusa torepaaerao vo resura rutu roopavira vo rasito vatuarto iava. Oea vo resurare kiuvu korupaaerao. Ra oisi iava kiuvuara viapau oiso rasito pupive, ora avakava, ora evaoara. <sup>2</sup> Oire uva iravu kekeavora enselto osa vova kaero virorao uvava ravireo kaeparo viroveira. Ira Pauto vo reesiarova touparevorao, ro Pauto ira tootoovira raga toupareveira. Ira rirovira rutu keeraparoerao evo resurare enselpa irara, oea gorua ouiva Pauto ruvara-ia rasito vuri piesa ora avakava. <sup>3</sup> Ira oiso puraroerao, “Opeita vagevagepata rasito vuri piepaoro ora avakava ora vegoara. Igei oiso vovoupaiei ra vo reesio tovo rovoio Pauto vaaro rera voeаrо kагaveаrо-ia kovopa irara. Osa iava taru utupaua orekerovu rutu vuri pietaverea!” <sup>4</sup> ♦ Oire uva voea uvuiaro vaisipaivorao voeao oea-ia vo reesi toupaive. Voea uvuiaro 144,000 voeao iava voea Isrel-pa irara. <sup>5</sup> Uva oisi-a eisi osa iava 12,000 Juda sara iava vo reesi ouivorao. Ora voeao Ruben sara iraraaro iava voea 12,000. Ora voeao Gat sara iraraaro iava voea 12,000. <sup>6</sup> Ora voeao Asa sara iraraaro iava voea 12,000. Ora voeao Naptalai sara iraraaro iava voea 12,000. Ora voeao Manasa sara iraraaro iava voea 12,000. <sup>7</sup> Ora voeao Simion sara iraraaro iava voea 12,000. Ora voeao Livai sara iraraaro iava voea 12,000. Ora voeao Isaka sara iraraaro iava voea 12,000. <sup>8</sup> Ora voeao Sebyulan sara iraraaro iava voea 12,000. Ora voeao Josep sara iraraaro iava voea 12,000. Ora voeao Bensamin sara iraraaro iava voea 12,000. Oea-a evoea vo reesi ouivorao va vao Pauto vaaro.

*Riro Irara Rutu Lotupaaveira Pautoa-pa*

<sup>9</sup> ♦ Vara rutu opesieiva, urusia-ia vuravuraavorao ita. Oa iava riro irara rutu kekeavorao ouvurua toupaivorao. Uva viapau irai uvuiparoi ra voea uvuiaro vieireve. Voea rutu-a evoea osararovu rutu iava vo uvuru, ora okantrirovu rutu iava voea, ora ovararovu rutu iava voea, ora oreorovu rutu iava voea, oea torepaaerao reito vaaro paupa ruvara-ia ora Sipsip Kakae ruvara-ia. Oea riro kaekaepa kuvuro-ia kuvupaaerao vao popotepa varo. Ora sorapita raoro-ia pitupaivorao ora voea iava vavaeara-ia. <sup>10</sup> Rirovira rutu raga piepaivorao oiso purapaoro, “Vigei reraaro Pauto ira rera vaaro-ia paupa pauparoi ora Sipsip Kakae tapo aiterea vigei vorevira ousiva. Oa iava oriruvira toupai.”

<sup>11</sup> Uva enselpa irara rutu paupaaro kovokovopaoro torepaaerao turaro irara tapo ora vo resurao okarea tootoovira toupaiveira. Uva voea rutu enselpa irara rekupaivorao taku viropaoro Pauto vaisiaro-ia vuurapa vaisi purapaoro. <sup>12</sup> ♦ Oiso purapaerao, “Oiraopavira rutu. Roru iraopai vigei reraaro-ia Pauto. Ora tavitavipavie rera vaaro iava keraria. Ira-ia veарopara rutu rugorugooara toupaiveira. Osa iava rera-ia veарo vaisi purapai rera vaisiaro kae piepaoro ira riroava gorua touparevoi rutu. Iu. Ira-ia riroa rutu varivaria toupaivoi. Ari ita, vara rutu-a evara rera raga varaaro vokiara rutu iarepara.”

*Siitoka Opesiepa Voeao Iava Vearo Vovou Irara*

<sup>13</sup> Uva iravu turaroto voea iava erao tau vo resura (24) ira oiso ragai akerevorao, “Ovu iava evoea oea riro kaekaepa-ia kuvuparo popotepara kuvupai? Irou irara-a, raa?”

<sup>14</sup> ♦ Uva rera vo reoaro pukooro oiso puraraerao, “Auoro, vii raga oisi voea-ia taraipauei evoea.” Uva ragaire oiso puraroerao, “Oea-a voeao riroa rutu siitoka ouiva ora upiara keripa irara vavaearo-ia vo vuutao-ia vuri vuuta rutu. Oiso osa iava ora voea varaaro kuvupara sisuiva Sipsip Kakae revisiaro-ia. Oa iava kuvupara popotevira karekeepa. <sup>15</sup> ♦ Eva-a oa vituaro iava torepaaive paupa ruvara-ia Pauto vaaro. Uva

❖ 7:1: Re 9:4    ♦ 7:4: Jen 49:1-28; Re 9:16, 14:1    ♦ 7:9: Ais 60:1-5; Ro 11:25    ♦ 7:12: Re 5:12-14    ♦ 7:14: Mt 24:21-31; Sek 3:3-5; Hi 9:14    ♦ 7:15: Ais 4:5-6; Re 21:3

voa-a evoa uva ravireoura rutu-ia ora rupa vokiro rutu-ia Pautoa-pa kovopaiveira rera vo kepaaro-ia Tugoropa Kepa. Uva rera Pauto voa paupaoro uvuipa ra voea tokipaoro voea virivaripareve. <sup>16</sup> Uva viapau uvuipaaai ra vorerivira ogoeave. Ora viapau uvuipaaai ra vorerivira uuko regaave. Ora viapau uvuipai ra ravireo voea kaukau piepaoro voea-ia roropareve. Ora viapau oavu avu vai uvuipai voea iava varaura oaive kasikasi piepaive. <sup>17</sup> ✰ Eake iava? Uvare Sipsip Kakae paupa vuutaarovi-ia toupaiveira. Eera ira voeapa oiso touparevere, Voea tokipato. Ira taru voea tuvetuveparevere tuputupue rikuro iare uva Tootoopa Uukoara kosipa piroveira. Ora vo osa Pauto voea osireiaro iava gau oviro posiposi pierevere. Ra viapau oiso vorerivira gaupaise ita.

## 8

*Sipsip Kakae Erao Vatarapa Tuuke Tokova Vuku Viko Iava*

<sup>1</sup> Uva Sipsip Kakae erao vatarapa (7) tuuke vuku tuukepa tokovorao. Oire uva viapau oavu avu vai gurukoa vai purapaivorao. Ora viapau reoreoa vai voa vuvuiua-ia katai vuutavi rutu uvuiaro-ia (hap aua). <sup>2</sup> ✰ Uva eva isivaaro iava erao vatara enselpa irara kekeavorao oea Pauto ruvara-ia torepaaiveira, vo uva rera ruvara iava erao vatara utaveara ouivorao.

<sup>3</sup> Uva iravu enselto eravao ruvara-ia toresa urioroerao plet-ia golava pitupaoro, iria-ia akoroa-ia riipu kupare purapaiveira geesipa. Uva rera vateivorao riroara rutu akoroara riipu kupare geesi purapa vaore, oiso ra va tapo uverereve oirara rutu vo variriroarova voeao Pauto voeao. Osa iava tauoa purarevere Pautoa-pa oira-ia eira eravao golava iria torepaaiveira reito paupaaro ruvara-ia Pauto vaaro. <sup>4</sup> ✰ Uva vo kupare-a vao akoroa vaaro riipu geesi purapa ora variriara oirara varaaro Pauto voeao ovatako rutu eva enselto vavaearo iava ipaerao Pauto ruvara-ia pou virosa. <sup>5</sup> ✰ Oire uva enselto plet ourevorao riipu kupare geesi purapava, ora tuituia tapo ourevorao eravao iava. Oa iava vara rutu-ia plet agasi pierevorao. Uva va tuitui kasi vikirevorao rasitoa iare. Uva va vikirevoiva, varakeoto pokoro virorao. Vo osa gurukoa karekeerao. Oa iava rera varakeoto parakauoro rororevorao. Uva va-a eva oa iava rasito ravurikeroerao.

*Vo Resura Purapurapa Irara Ensel Utaveara Vuvurepaiva*

<sup>6</sup> Uva voe-a voeao erao vatara enselpa irara oea erao vatara-ia pitupaivorao utaveara vatatopopao, oiso ra vara-ia utaveave.

<sup>7</sup> ✰ Uva rovoto enselto rera oiraaro utave vuvurerevorao. Oa iava ais uvore ora tuituia ora revasiva karekeerao rasitoa iare kovesa. Oa-ia rasito reesiivorao rera roo piesa vo peva uvuiaro iare. Oa iava tuitui kasi oavu uvavuva aiovorao vo peva iava va rasia, ora vegoa, osa kokopa kouro rutu varao oara tootoopapeira oara rovaerao.

<sup>8</sup> ✰ Uva eraopato enselto rera oiraaro utave vuvurerevorao. Oire uva orekevu vikiivorao oiso roroa osa pukuia riroa opukuia rovapaerao. Uva avakava-ia kovesa varaerao. Oa-ia eva avakava reesivorao ita oira roo pieoro vo peva uvuiaro rutu iare. Oa iava orovuvu vo peva iava revasivira pore pirorao. <sup>9</sup> Uva oisi-a oiso osa okarerovu rutu voeao okarea tootoopaaiveira avakava-ia, oea reesiresiivorao vo kare rutu roo pieoro vo peva sara uvuiaro iare oiso, Osaravu kopierao vo peva iava. Ora uvuoara tapo uvuiaro roo pieivorao vo peva sararo uvuiaro iare aue selpa uvuoro. Uva vo peva iava osaravu uvuo sip virierao.

<sup>10</sup> ✰ Uva vo pevapato enselto rera oiraaro utave vuvurerevorao. Ovusa iravu rirova aaviiko rovaorao rutu oiso osa aoa oa vuvuiua iava koveerao. Uva uukoara rutu roo pieivorao vo peva sararo uvuiaro iare aue uuko. Uva aaviiko koveorao osaravu-ia vo peva iava aue uuko ora vara rutu-ia tuputupue uukoro. <sup>11</sup> ✰ Uva oira vaisiaro-a o-ia aaviiko, Itakova iria itakopaaiveira. Iria-ia uuko oviro vieiaro roo pieivorao vo peva rutu uuko

✡ 7:17: Sam 23:1; Jo 10:11, 14; Esi 34:23-31      ✡ 8:2: 1 Te 4:16; 1 Ko 15:52      ✡ 8:4: Eks 30:7-8; Sam 14:1:2      ✡ 8:5: Sam 97:1-6; Lev 16:12      ✡ 8:7: Esi 38:22; Re 9:4      ✡ 8:8: Jer 51:25      ✡ 8:10: Ais 14:12-17      ✡ 8:11: Jer 9:15, 23:15

sararo uvuiaro iare. Uva vo peva iava osaravu uuko itakovira ora pore ovoierao. Oa iava riro irara rutu vo oviro-ia ukaiopaaiva, itakopaoro kopii ovoipaaerao.

<sup>12</sup> ♦ Uva vo resurapato enselto rera oiraaro utave vuvurerevorao. Oa iava ravireo, ora kekira, ora aaviikoara rutu roo pierevorao vo peva sara rutu uvuiaro iare. Oa iava vo peva iava ovarurovu virerao oiso, ravireo varu, ora kekira varu, ora ovarurovu aaviikoara rutu iava. Osa-a eisi osa iava vara rutu rooaro iava varao aviavipara ovarurovu rupavira karekeerao. Eisi osa iava vo ravireopa vuuta-ia uva vo resura vuutaro rutu-ia rupaerao. Ora vokiaro tapo ita uva viapau aviavia vai vo kekira iava oai ora aaviikoara rutu iava oaviavi vo vo resura vuuta rutu sovara-ia.

<sup>13</sup> Uva riroto keravo kekeavorao osa papapaoro vuvuiua-ia avaparoerao. Oire uva rera uvuavorao osa rirovira rutu gaupaoro oiso puraparoerao, "Siraovira! Siraovira! Siraovira rutu oiraravipa voeo oea touvira vo rasio-ia toupaiverea. Uvare vo peva enselpa irara oiso vovoupaai ra utaveara oaive vuvureive. Ra oisi iavirava riro tavaka rutu voea-ia oirara karekepe."

## 9

### *Vo Vavaepato Purapurapato Ensel Utave Vuvurerevorao*

<sup>1</sup> Uva vo vavaepato enselto rera oiraaro utave vuvurerevorao. Oa iava iriavu aaviiko kekeavorao iria vuvuiua iava koveorao yore rasitoa-ia. Uva oira vateivorao kii vaore oira googagare riku oa vituar-ia viapau rekasia vai. <sup>2</sup> ♦ Uva vo riku karuevoiva, kupareto voava vusivusiparevorao riro kasi iava tuituia. Okuparea eva ravireo taturupaivora ora vuvuiua. Oa iava ravireo vaio ora vuvuiua rupapasiera. <sup>3</sup> Uva riro kare rutu tutuvake kare vo kupare iava varapaaero rasitoa iare. Okarea-ia toupaivoi riroa rutu avuavua oiso osa siikopi ro ira oirara upia piepareveira. <sup>4</sup> Oire uva oiso oavu vosi reo uvuavorao vo kareo iava tutuvake kare. Oa oiso puraerao, "Opeita isiso kouro vuri piepata eke orekerovu rutu kokopa kouro ora evaora. Ari visii uvuipatai ra oirara avupata voeao oea kagavearo-ia Pauto vo reesiaro viapau toupaive. <sup>5</sup> Uvuipatai ra voeapa upia vatepata vo vavae rutu kekira uvuiaro-ia. Ari opeita voea kopii piepata rutu! Viapau." Eisi osa iava vo kare eva tutuvake kare vuri upiaro vatepaivora oirarapa oiso rutu osa siikopi oirara avupaoro voea upia piepareveira. <sup>6</sup> ♦ Uva vo vuuta vao vo vavae iava vao kekira oa-ia oirara kopiipa raivare taraa ragapaiverea. Ari ita, ra viapau oiso va kekepaive. Iu. Ruipa irao ragapaaverea oiso ra kopiia voea asavira toripaive.

<sup>7</sup> ♦ Uva ragai vo kare eva tutuvake kare kekeavorao oiso osa hos kare upo purapasa aeupaaveira. Uva vo kare kukuearo-ia kukuvaipara golara toupaivora. Ovusa vo kare iava puaura oiso toupaivora osa oirara puaaro. <sup>8</sup> Ora vo osa voea iava oruara oiso toupaivora osa gegeru, oiso osa riakora oruaro. Ovusa voea iava reuriara oiso toupaivora osa laion reuriaro. <sup>9</sup> Uva vo kare kopukopuaro-ia oaravu oiso rutu kekevira toupaivora osa kaapara kuvupara voea utopasa. Ora vo kare putaearo putaputapaoro pokopa virorao oiso osa riroara rutu karis ururo hos kare ivupaoro ikaupaiseira upoa iare avapaoro, ovusa vara karisara ragaragavaopave pokopoko uviropaoro. <sup>10</sup> Kookoopiara vo kare iava toupaivora oiso osa siikopi, ora rokarokara varao oara-ia kuuva ovi roko piepaiseira avu vuuro iare vituara pukopaoro oirarapa upia vatepasa vo vavae rutu uvuiaro iare kekira. <sup>11</sup> Uva iravu voea reraaro king toupareveira ro-ia enselto, ira googagare rikui-ia tou irarapa reiparoerao o iria-ia viapau rekasia vai. Ira vaisipaiseira Hibrus reo-ia oiso, Abadon. Ari Grik reo-ia oiso rera vaisipaiseira, Apolian. Oa porearo-a vao oiso, Orekerovu Rutu Vuri Piepato.

<sup>12</sup> Ari ita, rovo tavaka rutu opesi rovoerao. Oire uvuta! Touvira otavakareivu epao oarea taru utupaua karekeperea.

### *Katai Vatarapato (6) Purapurapato Utave Vuvurerevorao*

---

◊ 8:12: Re 6:12-13    ◊ 9:2: Jen 19:28; Eks 19:18; Joe 2:2, 10    ◊ 9:6: Jop 3:21; Jer 8:3    ◊ 9:7: Joe 2:4; Nea 3:17;  
Dan 7:8

<sup>13</sup> Oire uva katai vatarapato enselto rera oiraaro utave vuvurerevorao. Uva oreovu vuvuavorao datu resura vurvuruaro-ia aue eravao golava vatuaru iria Pauto ruvara-ia toupaeveira. <sup>14</sup> ♦ Oa-ia oiso puraerao katai vatarapatoare enselto ira utave-ia pitupare, “Vo resurao enselpa irara oea tuukepaaeira riro kara-ia uuko kara Yufretis. Voea iava vase iraori voea tuukearo karuoro, ra avaave.” <sup>15</sup> Oire uva vo resura evoea enselpa irara vatatopo ovoiaerao vo vuuta ragare tuepaoro, ora vo vokio raga, ora vo kekirao raga, ora vo ivao raga-ia vo kovo vao purasa. Oa iava vo kovo purasa voea karurevorao, oiso ra oirara rutu reeresiive voea roo pieoro vo peva uvuiaro rutu iare sara. Ra osaravu vo peva iava upoise. <sup>16</sup> Uva viurupa irara uvuiaro rutu-a voeao oea hos kare-ia paupaaerao oiso voea 200 milion. Voea uvuiaro rutu reesiaro iava vuvuavorao. <sup>17</sup> Uva areo uusi-ia vo kare kekeavorao hos kare ovusa vo kare-ia paupaaerao. Uva voeа oirara kaapa kuvuparo-ia kuvupaaveira. Uva vara siroviearo revasipavira toupaiveira, ora kuuva siroviero, ora kese siroviero. Ovusa hos kare kukuearo oiso osa laion kukuearo. Oire uva tuituiara, ora kupareara, ora aveke viitavokoro solfaara oara rutu vo kare gisipoaro iava kosikosipa pirorao tuituivira pigigipaoro. <sup>18</sup> Uva oirara roo pieivorao vo peva rutu uvuiaro iare sara. Oa iava vo peva iava osaravu kopierao, vo uvare vao tuituiara, ora kupareara, ora aveke viitavokoro solfaara oara rutu vo kare gisipoaro iava hos kare pigigiovira kosikosi piroiva, kopii ovoiaerao. <sup>19</sup> Vo kare vo varivariaro hos kare oa gisipo-ia toupaiveira ora vo kookoopi-ia. Okarea iava kookoopi oiso toupaiveira osa rakoru, iria porikearo kukuearo-ia gisipo toupaeveira. Iria-ia oirara vuri piepaiveira.

<sup>20</sup> ♦ Oire uva oearovu rutu oirara viapau oiso kopiliaepa vo peva-ia eva vuri peva, oea viapau ora voea iava sopaura porepaiveira, ra varaore ovaupaave oara purapaiveira vuriara ora voea raga vavaearo iava. Iu ita, uvare viapau oiso vuri urauraro tugara vuura vaisi purapa vovouro viapau kavupaiveira, ora pau irara tokarasi irara voeao oea purapaiveira aue-ia gol, ora silva, ora bras, ora aveke, ora evaoara. Oara-a rutu evara viapau uvuipapeira ra vuravurapaive, ora viapau uvupaive, ora viapau vokapaise. <sup>21</sup> ♦ Oiso osa oearovu voea iava oira upopaiseira, ora kavokavopaaveira, ora otopa pitupituro purapaiveira, ora orekerovu kavirupaiveira. Ari ita, osa viapau oiso ora voea iava sopaura porepaiveira, ra vo vovoure evara ovaupaave.

## 10

### *Purapurapato Ensel Jon-pa Vukua Vaterevoiva, Va Aioreva*

<sup>1</sup> ♦ Vao opesierao, oa iava iravu riro varivarito purapurapato ensel kekeavorao ovusa vuvuiua iava vararoerao aue-ia rukuta kuvupaoro. Ovusa govugovuto rera kukuearo-ia touparevorao, vo osa rera iava puua sisikorevira roropaivorao oiso osa ravireo. Vo osa rera iava kokotoa tuituivira toupaivorao vuvupaoro. <sup>2</sup> Uva oavivu-ia gare viko vukua pituparevorao ovusa karuvira toupaivorao vo vuku. Uva oirapapa kokoto iava avakava ivara-ia tasiparevorao ovusa koike kokoto iava rasito-ia tasiparevorao. <sup>3</sup> ♦ Oire uva rirovira rutu keeraparoerao, oiso rutu osa laion gaupareveira. Uva oisi-a eisi osa keeraparoerao uva erao vatara (7) varakeoara rera vo keeraaro pukovorao pokoi virooro oiso reoreooro. <sup>4</sup> ♦ Uva erao vatara varakeo pokoi virooro reoreoerao. Uva oiso ruipaparai ra vao rigatoa. Ari ita, ragai oreovu vuvuavorao oa vuvuiua iava urioerao oiso puraoro, “Evo reo erao vatara varakeoara vaaro oa oriru iraori ora vii iava rugorugooa-ia. Viapau uvuipaei ra va rigatori.”

<sup>5</sup> Uva ro enselto ira keke rovoavorao ovusa avakava ivara-ia tasipaoro ora rasito ora rera vaaro oirapapa vavae kae pierevorao vuvuiua iare. <sup>6</sup> Uva oiso puraroerao, “Oiraopavira rutu vavo oiso viara-ia Pauto vaisiaro-ia ro ira tootoovira toupareveira vokiara rutu-ia. Ro Pauto ira vuvuiua purareva ora orekerovu rutu varao oara voa toupaiveira. Ira raga rasito purareva ora orekerovu rutu varao voa toupaiveira. Ora avakava iria purareva, ora orekerovu rutu varao oara voa toupaiveira.” Oire uva enselto

♦ 9:14: Re 16:12 ♦ 9:20: Diu 31:29; 1 Ko 10:20; Sam 115:4, 135:15 ♦ 9:21: Re 21:8 ♦ 10:1: Esi 1:26-28

♦ 10:3: Sam 29:1-11; Ais 31:4 ♦ 10:4: Dan 8:26, 12:4, 9

oiso puraroerao, "Vuuta opesisa tutuuvoi, ra Pauto viapau touvira aate piepareve. <sup>7</sup> Viapau. Ari utupa visivi erao vatarapato enselto utave vuvurerevere rara. Ra oira gurukoaro karekeo. Ovuuta raga-a eva oa-ia Pauto va vao purareverea oa iava tavitaviroepa vatauvira vo osa profet irara tavitavireva voeari rerapa kovopa irara."

<sup>8</sup> Uva vo reo-a vao voviri uvu rovoavora oa vuvuiua iava urioerao oa ragai taviorao ita oiso puraoro, "Vuku viko ousa avau eva oa karuvira toupaivoi enselto vavaearo-ia, eera ira avakava ivara-ia tasipaoro to reparoi ora rasitoa-ia." <sup>9</sup> ♦ Uva enseltoa iare avaraerao. Oa iava rerare oiso puraraerao. "Ragai vateri eva gareavi vuku viko." Oire uva ragai tavioro oiso puraroerao, "Va ouri. Ra va aiori. Ra vii sarearo uureo pieve. Ari ita, vo osa vii iava gisipo-ia oiso rutu gavaurepavira vuta rovo pirovere oiso rutu osa koisiva." <sup>10</sup> ♦ Uva oisi-a oiso osa puraroiva, va eva gare vukuvi ouavorao rera vavaearo iava va aiosa. Uva ragai iava gisipo-ia gavaurepavira rutu vutapa pirorao oiso osa koisiva. Uva va kopa ovoiavoiva, ragai sarearo uureo pievorao.

<sup>11</sup> Oire uva ragai taviivorao oiso puraoro, "Siposipo iraorivere ita Pauto varaaro rutu iava, varao oara oirara rutu-ia karekeperea uvarovu rutu okantrirovu-ia, ora oreorovu-ia, ora oearovu-ia tapo riro irara king irara."

## 11

### *Vo Toupai Oiratoarei Iava Siposipopatoarei*

<sup>1</sup> Uva ragai vateivorao oavu uvviai orekerovu uvuipasa oiso roroa rutu osa vokapato tooro. Uva ragai taviivorao oiso, "Toreu, ra Pauto vo kepaaro ae Tempel uvuiri ora eravao vao alta. Ra oirara vieiaro tapo vieiri voeao oea Pautoa-pa vuurapa vaisi purapaiveira Tugoropa Kepa-ia. <sup>2</sup> Ari opeita uru uvuiri eva ratao Tugoropa Kepa riaaroria. Oa-ia uvuipau ra va kavu iraori. Uvare vo uru-a eva sopaipa irara rupa vovou irara vaaro, oea uriopaavere Jerusalem urui vao-ia Tugoropa Urui tasiasipaoro va vuri piepasa vo resura tau erao (42) kekiraro rutu uvuairo-ia. <sup>3</sup> ♦ Uva ragai vaitereipa vaitereo gorua vateavere aiterea ragai vo reoaro iava siposipopasivere bek karipareivi raga-ia tuupaoro varovira, oiso ra vaiterei vo siraoaro karekepasi. Osa eisi piesivere oiso vo vokiro rutu uvuairo-ia 1,260 vokiro."

<sup>4</sup> ♦ Aiterea oiso toupasiveira osa oliv ovarei, ora vuravurirei vaireo airea Turaro ruvara-ia toupaereveira ro rasito rutupa reipato. Oara rutu iava rigatoreva Sekaraia. <sup>5</sup> ♦ Uva vosa oearoi vaiterei vuri piesa au epaave, osa iava tuitui kasi vaiterei gisipoaro iava kosikosipa piroverea voeao evoea vaitereiva keripa irara kasi ovoisa. Iu. Oiraopavira rutu, ro ira vaiterei vuri piesa au epaoro, ovovoua raga-a eva oa sirova uvuiparoi ra kopii ovoiro.

<sup>6</sup> ♦ Aiterea goruava toupasivoi vuvuiuare korupasa. Ra viapau rutu oiso ae kokeva vai vo vuutarorutu-ia kovepao, varao oara-ia Pauto vo reoaro-ia siposipoporo vokapasi. Ora goruava tapo toupasivoi oa iavarava uvuipasi ra uuko kararo tuputupueara revasivira poresi. Ora oirara rutu vuri piesi voeao vo rasio-ia orekerovu rutu iavirava vuriara. Ari ita, ovuutaro-a evara oara-ia oisi eisi piepasiveira ora vaiterei vo vovoureiaro raga sirova utupaoro.

<sup>7</sup> Uva ora vaiterei vo kovoaro opesi pie rovosivereao vao Pauto vo reoaro iava siposipoporo. Oire ro vavaraito googagare rikui iava kosiro viro vaiterei tapo ora uposa. Eera ira vaiterei-ia pute ovoireverea vaiterei kopii pie ovoioro. <sup>8</sup> ♦ Oa iava vo kopiirei riro raiva-ia toupaivereao vo raivao vore riro urui-ia Jerusalem vao ouruia-ia Turaro vaiterei reraaro kopiiroepa evao parikou-ia. Ouruia vaisiaro ovoovovira oiso vaisipaiveira, Sodom urui, eke vao Isip-ia. <sup>9</sup> Uva oearovu ovararovu rutu iava, ora okantrirovu rutu iava, ora oreorovu rutu iava, ora osararovu rutu iava voearo vo kopiirei keke ragapaivereao rutu varei vura ragapaoro vo peva rutu uvuairo-ia voki ora ovokipavu. Uva ora voeareire korupavereao vaiterei tova arapa. <sup>10</sup> Uva voeao oirara vo rasio iava rorupavereao vo

---

❖ 10:9: Esi 2:8-9; Sam 119:103 ❖ 10:10: Esi 3:3 ❖ 11:3: Dan 7:24-28; Re 19:10 ❖ 11:4: Sek 4:1-14; Sam 52:8 ❖ 11:5: 2 Kin 1:9-12 ❖ 11:6: 1 Kin 17:1-7 ❖ 11:8: Ais 1:9-10; Hi 13:12

rara kopiisi. Uva pupipaiverea egaegapaoro, ora aiopaiverea oearovupa vate irara oaive orekerovu vatevateara vatepaoro. Eake iava? Uvare vaiterei-a evaiterei profetatoarei, aiterea upiara vuriara oisoa vatepasi oirarapa voeao vo rasio-ia. <sup>11</sup> Oire uva vo peva voki ora ovokipavu opesi rovoerao. Oa iava Pauto rera vaaro vovoua vovoureva tootoopa vaiterei sopapro iare vaiterei tootoo piesa. Uva oisi iavirava toresierao. Oa iava voeao rutu vaiterei kekepaoro uriri iraopaaero rutu. <sup>12</sup> Uva oreovu uvusivorao oa vuvuiua iava urioerao vaitereire rirovira rutu keerapaoro. Oiso puraerao “Vore ipasi!” Oire uva ipa ovoisierao vuvuiua iare rukuta sovara-ia ovusa keripa irara voeao vaitereiva vaiterei siituepaivorao. <sup>13</sup> Uva vo vuutavi raga-ia riroto ravurike vusi ovoirevorao. Oa iava uvavuva oavu riro urui iava urui varu vuri pierevorao ovusa vo resura vataru karutu raga kavu pirorao. Uva voeao 7,000 rutu-a oirara oea voa kopiaerao rera-ia eera ravurike. Uva oeavu kavua virorao oea rirovira rutu uriri iraopaaero. Osa-a eisi osa iava Pauto vaisiaro kae pie iraopaaivorao ro oisova vuvuiua-ia.

<sup>14</sup> Oire uva va-a vao erao pie tavaka oa oiso opesierao. Uvu iraota! Gareavi raga, ra vo pevapa tavaka karekepe ita.

#### *Erao Vatarapato Ensel Utave Vuvurerevorao*

<sup>15</sup> ♦ Uva erao vatarapato purapurapato ensel rera oiraaro utave vuvurerevorao, ovusa oreorovu vuvuiua iava rirovira rutu keerapaoro oiso purapaaero, “Turaro oavi vaiterei ora Krais rera reraaro ira oiso karekeroi, Rasitoa rutu reraaro King. Ira touvira rutu turarovira opesi asavira touparevereal!” <sup>16</sup> Oa iava voeao erao tau vo resura (24) turaro oea paupaaveira voea varaaro-ia paupara vo Pauto ruvara-ia oea takupaa virorao Pauto-ia vuurapa vaisi purapaaero. <sup>17</sup> Uva oiso purapaaero,

“O Turaro Pauto goruara rutuva toupariveira. Viigoa vo vokio toupari, ora tuariri rutu tapo oisoa toupari. Viigoa riro rutu varivarria ouriva oa iava turarovira toupari orekerovu rutupa reipaoro. Eisi osa iava vii-ia vearo vaisi purapaiyovoi. <sup>18</sup> ♦ Rupa vovou irara kasipu iraopaa vo osa vii vo kasipuaro kareke ovoiei. Uva vo vuuta-a vao-ia oa-ia kopii irara rovirieia iare kort karekepaa ovuuta vao-ia vearoa voria vatesapa vii voearropa kovopa irara. Evoea ita profet irara, ora voeao oirara vii voearro, ora voearo oearoa viipa avivikepaoro vii reroarovi toupaiveira, ora voeao oea rei vaisirova toupaiveira, ora voeao rei vaisi asa irara, oea rutu-a ovuuta vao-ia voeao vuri piesapa oea rasito oiso vuri piepaiveira.”

<sup>19</sup> ♦ Oire uva oisi-a oiso osa reo rovoaiva, Tugoropa Kepa vao Tempel karuivora Pauto vaaro oa vuvuiua-ia toupaiveira. Uva bokis o iria-ia Reo Ovoi purareva Pauto iria viaevira toupaevorao Tempel sovara-ia. Uva varakeoto parakauoro voare pigigiovira avaparoerao, ovusa gurukoto karekeparoerao ora varakeoto pokoparo virorao. Uva rasito ravurikeroerao ovusa riroara kokeara ora ais koveerao.

## 12

#### *Riakova Vaio Iava Ora Dragon*

<sup>1</sup> ♦ Uva oavu riroa reesia karekeerao vuvuiua iava oiso rorovira osa riakova iria ravireo-ia ora tavorupaoro oiso osa varaoa toupaevorao. Ovusa kekira oira kokotoaro reroaro touparevorao. Uva oira iava kukue-ia katai tau erao (12) toupaivorao aaviiko oiso osa kukuvaipa. <sup>2</sup> ♦ Iria kakae kovuva touevorao, ora upiaorao kakaeto kavausa. Uva vo upia eva vuria rutu oa iava rirovira rutu oivepaoro kakaeto kavausa aeupaorao.

<sup>3</sup> Oire uva oreesivu ita voava vuvuiua-ia karekeerao, oreesia oiso toupaivorao, Iravu riroto dragon. Ira touparevorao revasipato ira-ia erao vataru kukue toupaivorao ora katai tau keta. Ovusa erao vataru king varaaro kukuvaipa vo kukuero-ia toupaivorao.

<sup>4</sup> ♦ Uva rera iava kookoopi osaravu rutu aaviiko guruevorao vara vikisa rasiuaarore, vo uva koveerao ovusa vo sararei raga kavu pirorao vuvuiua-ia. Uva rera-a eera dragon

♦ 11:15: 1 Ko 15:24-28; Dan 2:44, 7:14, 27    ♦ 11:18: Sam 2:1; Dan 7:9-10; 2 Ti 4:6-8    ♦ 11:19: Re 15:5, 8, 8:5

♦ 12:1: Jen 37:8-9    ♦ 12:2: Ais 66:7-14; Ga 4:19    ♦ 12:4: Dan 8:9-14

ira riakova ruvara-ia toreparoerao ovusa kakaeto kavausa auepaorao. Ira oira aate pieparevorao, oiso ra rera aioreve oira reraaro kakaeto. <sup>5</sup> Uva o riakova oira kakae kavauevorao. Uva rera kakaeto ira utupaua ain tooro-ia pitureverea vava oirara rutu tokipasa osararovu rutu iava voea. Oire uva riakova kakaeto kavau ovoievorao. Oa iava ikauvira rera ouivorao viara iare Pauto-a iare rera siposa vo uva pauparoerao rera vaario-ia paupa. <sup>6</sup> Uva eira riakova torioro avaorao uvavure kuvau tapi uva viapau oirara vai toupaive, vo uva Pauto ora rera vo uruiaro ravaareva oirapa. Oisore ra voa oira vearovira rutu tokipaive oirapa aio vatepaoro vo vokiro rutu uvuiaro-ia 1,260 vokiro.

<sup>7</sup> ♦ Uva vo vokio riroa upoa rovoei vuvuiua-ia. Oa-ia Maikel ora rera voeaaro enselpa irara dragonva riroto ora upopai. Ovusa ro dragon ora rera voeaaro enselpa irara oea voeava ita ora upopai. <sup>8</sup> Ari ita, osa viapau varivaria vaiei voeapa upoava ora poesisa. Osa-a eisi osa iava viapau uvuipaai ra touvira toupaive vuvuiua-ia evoea dragon vase. <sup>9</sup> Uva purapurapa irara ensel Pauto voeaaro rera-ia dragon vikiaerao rera kosi pieoro rutu. Eera dragon tuariripatoa rutu ira vaisipaiveira oiso, Seten. Ira oirara rutu iava gasipareveira, ora oirara rutu keakeapareveira voeao vo rasio-ia. Ira vikiivorao rasiuaarore rera voeaaro tapo purapurapa irara.

<sup>10</sup> ♦ Uva oreovu uvuavorao vuvuiua iava oa rirovira rutu oiso puraerao, “Vo vokio-ia vigei reraaro Pauto vigei vorevira ou ovoirevoi. Ora vo osa rera vo varivariaro viaevira rutu ora karekei. Oa iava kingvira toure ora rera reraaro Krais, ira tapo ora rerapa riroa turaro vaisi ourevoi. Eake iava? Uvare ro Seten ira vigei araoko iraraaro iava gasi iraopareveira Pauto osireiaro-ia vo ravireoura rutu-ia ora voki ruparo rutu. Uva vo vokio enselpa irara rera kosi pieivoi vuvuiua iava. <sup>11</sup> Voeao araoko irara oavi oea varivaria ouiva ora gorua Sipsip Kakae revasiaro-ia, varei ora vao oiraopa vovou rutu oa iavirava rera vo reoaro iava oisoa siposipopaive. Oire uva vo pitupitu-a eva oa sirova upoava ora poesiai keripatoa-ia puteoro rutu. Uvare viapau oiso ora voeao vo touroarore vearovpara oisoa rugorugoopaave varao vo rasio-ia ora voeaa raga ora orirupasa. Viapau. Ari oisoa ora eaka ragapaave, ra kopiipaave. <sup>12</sup> Osa-a eisi osa iava vii vuvuiua ora visii rutu visiigoa voa toupataveira evoa vuvuiua-ia visiigoa roru iraopata. Ari ita, vo osa visii vao vo rasio-ia tou irara ora vii avakava visiigoa rutu eva vatatopo iraopata. Uva siraovira rutu visiivipa, uvare riro siitoka rutu visii-ia karekesa auepai. Aue iava uvare Seten epao ira visii iare vararoi. Ira riroava touparevoi kasipua, uvare taraiparoi oiso, Rera vaaro epao poteku vuutavi raga.”

<sup>13</sup> Uva dragon ora rera-ia tarairoerao oiso, Eari, ragai-ia vikiaera vo rasitoa iare. Oire oa iava voa o riakova tarioparevorao iria kakaeto kavauevorao. <sup>14</sup> Ari ita, uva oirapa riakova vearovarei rutu putaeuarei vateivorao riroto keravo putaearo. Ourea iava uvuipaoi ra papapaoro avao oira voaarore vo rasitoa-ia kuvau tapi uva viapau oirara vai toupaive. Uva uvuipaoi ra toripaoro voa toupaeve riroto asavira dragon. Ra voa oira vearovira rutu tokipaive aioara vai-ia vo peva ivaro rutu uvuiaro iare ora okurovu. <sup>15</sup> Uva rera dragon uukoa oerevorao ora rera gisipoaro iava oiso rutu osa uukova iria pirutuvira paruevorao. Oa iava oira tariopaoro utuerao o riakova, uvare dragon oiso vovouparoerao ra oira turove vo pirutu. Ra opesi ovoio. <sup>16</sup> Ari ita, vo osa rasia riakova tauvavorao akaoro. Uva vo rasi eva vo pirutu kopavorao oa oe ragarevorao dragon ora rera gisipoaro iava.

<sup>17</sup> ♦ Uva rera-a eera dragon riroto ira kasipu iraoparoerao oirare o riakova. Oa iava avaroerao, oiso ra okakaeroi oira ovii kakaero vaiaro uporeve ita voearo oearoa Pauto vo reoroaro varao reo goruro sirova utupaaveira, ora Jisas vo reoaro iava siposipopaoro rera tapo sirova utupaaveira. <sup>18</sup> Uva rera eera dragon rogaraua-ia avakava-ia toreparoerao.

## 13

### Vaiterei Vavaraitoarei Aiterea Karekesierao

<sup>1</sup> Uva iravu vavaraito varuereto kekeavorao, ovusa kosiro virorao avakava iava. Ira-ia katai tau keta toupaivorao, ora erao vataro aue kukue. Uva rera iava keta tau kukuearo-ia king vo kukuvaloaro toupaivorao voa. Uva rera iava erao vataro-ia kukue oaravu

◊ 12:7: Dan 10:13 ◊ 12:10: Ais 14:12-17; Jop 1:9-11 ◊ 12:17: Ais 1:9-10

vaisiaro toupaivora, vo vaisiro otakaurovu rutu vaisiaro varao oara-ia Pauto tovipaoro rera takaupaiveira. <sup>2</sup>◊ Uva rera vavaraito ira kekeavorao ira oiso toupareveira osa lepat laion roroto. Uva rera iava kokotoara oiso toupaivora osa bea kokotoaro. Ari rera iava gisipo oiso osa laion gisipoaro. Uva rera-a eera dragon ira ora rera vo varivariaro vaterevorao rerapa eera vavaraito. Oa iava oiso rera tovorevorao rera reraaro king oiso raga ita osa rera. Osa iavirava eisi rerapa riroa rutu gorua vaterevorao orekerovupa reipasa. <sup>3</sup>◊ Uva iriavu kukue rera iava vavaraito oiso toupaevora, Iria togaiva oira kopii pieoro. Ari ita, uva kapua viupa rera kukuearo-ia vasavava. Oa iava vorevira kukue vearoopa ita. Uva oisi-a eisi osa iava oirara rutu vo rasio iava oea rera-ia tavetave iraopaivora eera vavaraito. Oa iava rera sirova utupaaeroa. <sup>4</sup>◊ Uva rera reito dragon ira rerapa ro vavaraito gorua vaterevoiva ora rera vaaro, oirara rera-ia dragon vuurapa vaisi purapaivora. Uva rera tapo-ia eera vavaraito vuurapa vaisi purapaivora oiso purapaoro, “Iroutoa vai rova vavaraito vaepare? Iroutoa vai uvuiparoi ra rera tapo ora uporo? Easi viapau iraiei?”

<sup>5</sup>◊ Uva iravu rerapa eera vavaraito vaserevorao ovusa rirovira takatoparoerao Pauto takaupaoro. Ari ita, goruava touparevorao vo pitupitu eva purasa vo resura tau erao (42) rutu uvuiaro-ia kekira. <sup>6</sup>◊ Uva ora rera iava gisipo aka pieoro rutu Pauto tovipaoro rera takauparevorao, ora rera vaisiaro Pauto, ora rera vo uruiaro Pauto, ora rera vo saraaro Pauto voeao oea vuvuiua-ia toupaiveira. Oara-a varao oara rutu tovipaoro vara takauparevorao vavaraito. <sup>7</sup>◊ Uva iravu rerapa vaserevorao. Oa iava upoa kareke pierevorao Pauto voearov. Uva upoava ora poesiroerao. Oa iava voea kove pierevorao, uvare gorua oureva vao oa iavirava uvuiparoi ra reiparo osararov rutupa, ora okantrirovu rutupa, ora oreorovu rutupa, ora ovararovu rutupa. <sup>8</sup>◊ Oirara rutu voeao vo rasio-ia oea vaisiaro viapau toupaivora Tootoopa Vuku-ia vo vuutao-ia oa-ia Pauto rasito purareva, oea rera-ia vuurapa vaisi purapaverea eera vavaraito. Ari ita, vuku-a eva Sipsip Kakae vaaro vo kakaeo tuariri oa upoivoiva, kopiepa.

<sup>9</sup> Ro ira-ia kokito toupare ira uvuiparoi ra vearovira rutu vo reo uvu iraoreve. <sup>10</sup>◊ Vosa Pauto vo ruipaaro sirova iravu ouive tuukea iare, oire avaro tuukesa. Ora vosa Pauto vo ruipaaro-ia irai upoive toorio vai-ia, oire ra oisi rera upo iraoive rera-ia toorio. Ari ita, vo osa vo pitupitu eva oisi eisi karekepe voea-ia osa iava Pauto voearo uvuipai ra goruvira rutu ora voea vo oirao pie vovouroaro-ia uvisi iraoive.

<sup>11</sup>◊ Uva iravu eraopato vavaraito kekeavorao ovusa rasito sovara iava vusirevorao. Ira-ia vaiterei ketatoarei toupasivorao oiso osa sipsip kakae ketaaro. Ira reoaropa oiso paerao dragon reoaro. <sup>12</sup>◊ Uva rera ro rovopato ira ruvara-ia oisi raga ita vo gorua oureva vavaraito ro eraopato. Oa iava rera vo goruaro iavirava okovorovu rutu purareva rovopato vavaraito sirovavi. Ira oirara rutu oiso piereva ora rasito, ra rera raga-ia eera vavaraito rovopato vuurapa vaisi purapaise. Ira-ia tuariri kapua viupa pura piroiva, vasavava. <sup>13</sup>◊ Uva rera ro eraopato vavaraito oaravu rutu ravotoara puraparevorao oravotovu-a vao-ia oiso, vo uvare oirara rutu osireiaro-ia tuituia vara pierevorao vuvuiua iava vore rasito-ia. <sup>14</sup>◊ Osa iravu rerapa vaserevorao vo osa vo ravotoro rutu evara puraparevorao rovopato vavaraito osireiaro-ia. Oire uva vo pitupitu eva oa-ia oirara rutu voeao vo rasio-ia keakearevorao eraopato vavaraito oiso voea tavioro, “Ro rovopato vavaraito ira urauraaro purata evaoa vai-ia tokarasivira. Ra rera vaisiaro kae piepata ro vavaraito tuariri toorio ira uporeva. Ari ita, uva tootoovira raga rera toupare.” <sup>15</sup>◊ Uva iravu rerapa vaserevoiva, tokarasi-ia tootoo pierevorao eraopato vavaraito rera iare vavauoro. Oa iava rera eera tokarasi reoreoroerao. Oire vosa viapau oearoi ro-ia tokarasi vuurapa vaisi purapaise, ra rera raga ita voea uporeve.

<sup>16</sup>◊ Uva eera eraopato vavaraito oiso taviroerao. Oa iava oreesivu tovoivorao oirapapa vavae-ia, eke vo kagaveara-ia oirara rutu-ia voeao oira akukuro raga, ora voeao oea rei vaisivira toupaiveira, ora voeao monipa irara, ora apota irara, ora voeao oea akukupapavira kovo ragapaiseveira, ora voeao oea evoeapa reipaaveira. <sup>17</sup>◊ Osa-a eisi oiso vosa ro ira-ia viapau vo reesi eva viapau toupaive vavaraito vaisiaro iavirava vo reesi, ora

◊ 13:2: Dan 7:4-6    ◊ 13:7: Dan 7:21; Re 11:7    ◊ 13:8: Fl 4:3; Re 3:5, 20:12-15    ◊ 13:14: 2 Te 2:9-12; Mt 24:23-25

rera vaaro iava vieia vo reesi tapo, ra viapau oaravu avu vai voripareve oearovu ruvara-ia. Ra ita oisi oearovu viapau oaravu avu vai ita voripaive rera ruvara-ia ita ro ira-ia viapau vo reesi toupaive. <sup>18</sup>◊ Vigei uvui iraopavie i ra vaore vearovira rutu rugorugoo iraopavio, Ro ira vearovira rutu taraiparo ira uvuiparoi ra vearovira rutu vo reesi vituaro rutu-ia vao vavaraitoa iava roroiovira taraiparo. Uvare vo reesia vao-ia iravu oirato vaisiaro iavirava vo reesi vao, 666.

## 14

### *Voeao Uvuiaro Oiso-ia 144,000 Airepava-ia Eraaepa Erava*

<sup>1</sup> Uva vorerivira ita vuravuraavorao. Oa iava Sipsip Kakae kekeavorao Saion Pukui-ia, ovusa voeo 144,000 oirara rera tapo voa torepaaeroa oea kagavearo-ia Sipsip Kakae vaisiaro toupaivorao ora Aiteto vaisiaro. Vo vaisio oa rigatoreva Pauto voea iava kagavearo-ia. <sup>2</sup> Uva oreovu uvuavorao vuvuiua iava oa oiso rutu gurukovorao osa uuko sirisiri gurukoaro. Ora oiso tapo osa riro guruko varakeo vo osa pokoro viro. Uva vo guruko eva uvuavorao oiso osa riro irara rerevae pievira gitara toipaivorao. <sup>3</sup> Uva iriavu-ia erava eraaero airepava Pauto vaaro paupa ruvara-ia, ora vo resurao ruvara-ia okarea tootoovira toupaiveira, ora turaro irara ruvara-ia. Uva voea voeo 144,000 oirara Pauto oea vorireva oirara rutu iava voea vo rasio-ia. Ari ita, voea raga uvuipaa i ra taraipaave oira-ia eira erava. Uva viapau oiso irai raga ita uvuiparoi ra oira-ia tarairo. <sup>4</sup>◊ Voea-a evoea oirara oea viapau vuriara vai oisoa purapaise riakora tapo. Viapau. Ari sisigaruevira rutu oisoa toupaive. Ari ita, uvarovu ruture Sipsip Kakae oisoa avapape, uva voea evoea oisoa rera sirova utupaave Pauto oea vorevira ora rerapa vorireva oirara rutu iava voea vo rasio-ia. Oea oiso rutu toupaiveira, Rovopa sara rutu Pauto oea vorevira vorereva ora vaitereipa ora Sipsip Kakae. <sup>5</sup>◊ Oea viapau oisoa kuuvu reoro vai purapaise. Ora viapau vuria vai oavu avu vai-ia voea oaiaro.

### *Vo Peva Purapurapa Irara Ensel Reoa Puraiva*

<sup>6</sup>◊ Uva iravu raga kekeavorao enselto ovusa vuvuiua vurvuruaro-ia papapaoro avaparoeroa Vearo Siposipova vao oa-ia viapau opesia vaiei. Uvare vo kovova touparevorao vao va iava Vearo Siposipo siposipopova kovo oirara rutupa voea vo rasio-ia toupaiveira. Uva va iava siposipoparevorao osararovu rutupa voraro rutu okantrirovu rutu-ia, ora voraro oreorovu rutu-ia, ora voraro ovararovu rutu iava. <sup>7</sup> Uva rirovira rutu takatopaoro oiso puraparoeroa, “Vuuta vao pou piroi oa-ia Pauto oirara rutu rovirieirevere kortua-ia. Eisi osa iavirava uvuipatai ra rerapa uriripaoro rera vaisiaro rei pie iraopata. Ra rera ia Pauto vuurapa vaisi pura iraopata ira vuvuiua purareva, ora rasito, ora avakava, ora tuputupue rikuro rutu uukoara.”

<sup>8</sup> Uva iravu raga purapurapato ensel rovoto purapurapato sirova utuoro urioroeroa. Uva eera eraopato ira oiso puraroeroa, “Rei urui rutu Babilon urui oa vuri ovoiooro koveei. Iu, vuri ovoiei. Uvare vo uruia vao Babilon-ia oa raga osararovu rutu oirara oiso pieva, ra va raga vo vovouaro goruvira sirova utupaave vao otopa pitupitu vo urui vaaro. Oa-a eva oiso toupai, Riro goru ovi wain, oovi-ia oisoa voea ukaio piepaeve, oa iava oira vo pitupituar otopa pitupitu puraiva. Uva Pauto vo kasipuaro voea-ia pou piropa.”

<sup>9-10</sup>◊ Uva iravu purapurapato ensel vaiterei sirova uturoeroa uriooro. Uva rera eera vo pevapato rirovira rutu keerapaoro oiso puraparoeroa, “Vosa oeai ro-ia vavaraito vuurapa vaisi purapaise ora rera tokarasiaro-ia tapo, ora reesia oureve vao kagave iare, eke vavaea iare tapo ora voea iava, oire ra voea evoea iriavu-ia ukaioave wain vo waino Pauto vo kasipuaro. O wain iria viapau uvore vorevira Pauto uukoa vaiva tapo oira vo goruaro kopii pieoro. Viapau. Ari eera vo kasipu rutu petoreverea kap iare vuria vo voriaro kare piesa. Ra voea evoea oirara oira-ia ukaio iraoave. Ra oisi iavirava vurivira rutu upiaave riro kasirao kasi-ia tuitui kasi oa vuvupaisevira solfa viitavokoaro-ia vo enselpa irara osireiaro-ia voeo tugoropa irara ora vo Sipsip Kakae osireiaro-ia. <sup>11</sup>◊ Uva kupareto kosiparoverea vo kasi-ia eva oa voea upia piepavere, eera ira kaeparo viro rutu vokiara

---

◊ 13:18: Sam 9:15-20   ◊ 14:4: 2 Ko 11:2; Re 3:4, 5:9; Je 1:18   ◊ 14:5: Sam 32:2; Ef 5:27   ◊ 14:6: 1 Ko 1:18-25;  
Ro 1:15-18   ◊ 14:9-10: Re 13:14-16; Jer 25:15-17   ◊ 14:11: Ais 34:10

rutu-ia. Ra voeao oea rera-ia vavaraito vuurapa vaisi purapaive ora rera iava tokarasi-ia ora vo rara rera vo reesiaro oupaive rera vaisiaro-ia, oea-a evoea viapau oiso reareaa vai oupaiverea vo ravireoura rutu-ia ora vokiaroro.”

<sup>12</sup> Vo osa vo pitupitu eva karekepapereea osa iavirava uvui iraopaaai Pauto voeao ra goruvira rutu torepaaverea voeao oea Pauto vo reoroaro reo goruro sirova utupaaveira, ora Jisas oirao piea-ia tapo uvisivira rutu pitu iraopaverea.

<sup>13</sup> ♦ Uva oreovu uvuavora oa vuvuiua iava urioerao oiso puraoro, “Vo reoro rigatori, Oirara Turaro oirao piepaoro kopiipaaveira vo vokio ora ovuutarovu rutu-ia varari utupaua, oea evoea kopii irara uvuipaaai ra roru iraoive.” Uva Uraurato-a ro ira tapo oiso puraroerao, “Oiraopaviral! Ra vao virikasi kovo kavuive oa oisoa purapaive, ra reareaave. Rara viapau oiso ava ragaave. Viapau. Ari vearo vovouro oisoa purapaive evara oara voriaro-a ovoriroa voea tapo avaperea.”

### Aio Oupa Vuuta Vo Rasito

<sup>14</sup> ♦ Oire uva vorerivira ita vuravuraavorao. Oa iava iriavu raga popotepava rukuta kekeavorao osa toupaevorao. Uva iravu pauparoerao oira-ia rukuta oiso rera osa Oirato Oviitoaaro Ro Ropoto. Ira kukuvaipava gol touparevorao ora rera iava kukue-ia ora sigoa-ia porokoa pituparevorao riro avuavua rutu. <sup>15</sup> Uva iravu purapurapato ensel kosi virooro urioroerao Rovopa Kepa Tempel iava roarire rirovira rutu keerasa ira rukuta ivara-ia pauparoerao oiso puraoro, “Aio tokopaei vii vaaro-ia sigoa, uvare aioara rutu varao vo rasio-ia vioroerao. Uva oisi-a eisi osa iava vo voki-a vao vo aioro varao oupasa.

<sup>16</sup> ♦ Oire uva ro ira rukuta ivara-ia pauparoerao ira ora rera vaaro-ia sigoa pitupaoro va-ia tosiparevorao rasitoa-ia aioara tosipaooro varao oara vioroerao.

<sup>17</sup> Uva iravu ita enselto Rovopa Kepa Tempel iava kosi viroroerao vuvuiua-ia. Ira tapo ita eera oavu-ia sigo poroko riro avuavua pituparevorao. <sup>18</sup> ♦ Ari iravu raga purapurapato eravao arova urioroerao. Eera purapurapato ensel ira vo kovoaro-a, Pauto vo kasiaro eto kasi tokipato. Ira roarire enselto rirovira keeraparoerao ira sigo porokoa-ia riro avuavua pituparevorao oiso purapaoro, “Sigoava uriou eva oa-ia pituparivoi vii vaaro riro avuavua. Ra va-ia aio kuero rutu roturoturi wain iro iava vo rasio-ia. Ra vara gururi, uvare evara aio kuero vioroerao.” <sup>19</sup> Oire uva rera enselto ira sigoa-ia pitupaoro va-ia tosiparevorao vo rasio-ia aio kuero rutu rotupaoro wain iro kuearo. Oa iava vo kuero guru ovoirevorao. Vo kuero evara rokoroko pieparevorao riro rikui-ia avekea vao wain pigipigipa riku. Oa-a eva oiso toupai, Pauto vo kasipuaro voeare vuri irara. <sup>20</sup> ♦ Oire uva wain iro kuearo pigipigipaoro va-ia tasiasipaivora riro rikui-ia avekea oa riro urui vatuarovi-ia toupaiveira. Oa iava vo tatu uukoaro revasiaro oiso rutu parupaivorao osa oiratoa iava revasiva. Uva ue rutu uvuiaro-ia parupaoro avapaero 300 kilomita. Uva vorevira vo rovu oiso rutu uvuivira vo rovu torearo kaepa pirorao osa oirato torearo uvuiaro rutu.

## 15

### Erao Vatara Purapurapa Irara Ensel Vuriara Rutu-ia Orekerovu Oisoa Pitupaive

<sup>1</sup> Oire uva oavu kekeavorao reia rutu reesia pisa oa karekeerao vuvuiua-ia vao erao vatara (7) enselpa irara va eva reesia. Uva rirovira rutu vare rugorugoo iraoparaerao, uvare voeao enselpa irara kekeavorao ovusa voa toupaivorao erao vatara-ia orekerovu vuriara rutu pitupaoro oira vuri piepara. Uva vara-a evara ovoiokuara rutu. Ra viapau ita vara isivaaro iava oai ita karekepe. Uva vara-a evara vuriara oiso toupai, Pauto vo kasipuaro ovoiaro rutu.

<sup>2</sup> Uva oavu kekeavorao oapa oiso paerao avakava. Oa oiso toupaivorao osa sisiro roroiova rutu. Iria uvareiva tuituia tapo vaore, oiso ra oisi iavirava sisikorepaeve. Oire uva voeao tapo voa kekeavorao oea vaitereiriva ora keevoisiaera upoa-ia vavaraito vaio ora rera tokarasiaro, ora vo osa rera vo reesiaro vo goruaro opesierao voea-ia. Uva voea

◊ 14:13: 1 Ko 15:51-58; Sam 116:15 ◊ 14:14: Dan 7:13; Re 1:13 ◊ 14:16: Mt 13:36-43 ◊ 14:18: Joe 3:13

◊ 14:20: Ais 63:1-6; Hi 13:12; Re 11:8

evoea torepaaerao vo avakava vatuarto-ia oea vaitereiva ora keevoisiaera. Uva Pauto voa voeapa oaravu vate ovoirevorao oara oiso toupaiveira osa gitara. Oa iava voa vara-ia pitupaivorao. <sup>3</sup> ♦ Uva iriavu-ia erava eraaerao Moses oiraaro ro Pautoa-pa kovopato, ora Sipsip Kakae oiraaro tapo iriavu erava o-ia oiso purapaoi,

“Turaro Pauto vii goruara rutu toupariveira. Ora okovorovu rutu varao oara purariva reipara. Oa iava vara kekepaoro vara-ia rirovira rutu tavetave iraopaioveira. King Reitoa rutu vii osararovu rutu oirara reraaro. Vi vo vovouroaro torevokoara rutu ora oiraopara rutu. <sup>4</sup> Turaro vii-a kataitoa raga viigoa tugoropavira toupariveira. Osa iava iroutoa vai uvuipa ra viapau viipa avivikeparo? Ora iroutoa vai viapau uvuipa ra vii vaisiaro kae piepareve? Viapau. Ari osararovu rutu uvui iraopai ra vii-ia vuurapa vaisi purapasa uriopaave. Eake iava? Uvare torevoko vovoutoa rutu-a vii vo vovouo oa poeravira rutu ora karekeerao.”

<sup>5</sup> Uva eva isivaaro iava vuravuraavorao ita vorerivira vo uva Tugoropa Kepa Tempel sovara-ia toupaivorao vuvuiua-ia oa karu pirorao. Eva Lotupa Kepa sel-a Pauto vaaro. Oa-ia Oiraopa Reo rutu karekereva rera vaaro. <sup>6</sup> Uvava voeao erao vatara enselpa irara kosia viroiva, erao vatara-ia orekerovu vuriara rutu pitupaivorao varao oira vuri piepara rutu. Uva voeaa-evoea oea veearopara rutu-ia varoara tuupaaerao sisigarueara rutu, ora sisikorepara, ora gol iroro-ia takipa iroro ora takipaoro ora voea iava kopukopuaria vo iroro tavarupaivorao. <sup>7</sup> ♦ Oire uva iravu vo kareo iava rera oresura tootoovira toupaiveira erao vatara (7) dis golaro vaterevorao voeapa voeao erao vatara enselpa irara, ora Pauto vo kasipuaro ro ira tootoovira toupareveira vokiara rutu-ia, okasipu-a eva oa iava evara erao vatara dis agasi iraoero. <sup>8</sup> Oire uva keraria iava ora Pauto vo goruaro oa iava kupareto kosiro virorao Tempel agasi piesa. Ra viapau oiso irai uvuiparo oiso ra voeare koataro Tugoropa Kepa-ia. Viapau. Ari uvui iraopai ra evoeare erao vatara enselpa irara tue rovopaave ovusa vo kovo opesi pie rovoive evara-ia vuriara rutu.

## 16

### *Erao Vatara (7) Aue Dis Oara-ia Kasipu Koko Toupai Pauto Vaaro*

<sup>1</sup> Uva oreovu uvuavorao oa kosi pirorao Rovopa Kepa Tempel iava. Oa voeaore erao vatara keerapaoro goruvira rutu oiso puraerao, “Ava iraopatai eva erao vatara kasipu kokoro Pauto varaaro petosa. Ra varape rasitoa iare koveoro.”

<sup>2</sup> ♦ Oire uva rovoto purapurapato ensel ora rera vo kokoarova kasipua avaroerao dis-ia rasitoa iare va petopaoro. Oa iava osararovu rutu goru kapuaro karekeerao oirara-ia voeao oea vavaraito vo reesiarova toupaiveira, oea raga ita tokarasipa vuurapa vaisi purapaveira.

<sup>3</sup> ♦ Uva eraopato ita purapurapato ensel ora rera vo kokoarova kasipua petorevorao avakava-ia. Oa iava avakava revasivira ora poreorao oiso osa kopii irara revasiaro. Oa iava vo karero rutu eva avakava sovara-ia tootoopaaveira kopii ovoiaerao.

<sup>4</sup> ♦ Uva ita vo pevapato purapurapato ensel ora rera vo kokoarova kasipua petorevorao riropa uukoro-ia ora tuputupue uukoro-ia tapo. Oa iava vara rutu revasivira ora pore ovoierao. <sup>5</sup> Uva ragai ro uvuavorao purapurapato uukoara reraaro ira oiso puraroerao, “Toupari oiso osa oisoa toupari tuariri rutu. Tugoropatoa Rutu-a vii. Vo vii vaaro-ia tavaa kort oa-ia oirara rovirieirivere rutu torevokovira voeao vuri irara.

<sup>6</sup> ♦ Voeao oea vii voeaaro oisoa upopaike ora profet irara tapo. Oa iava voeaa iava revasiara oisoa petopa piro. Eisi osa iava revasiva vateparivoi voeapa evoeaa vuri irara, ra oisi iavirava oira-ia ukaioave. Ra torevokovira voeaa vaaro vuri vovou vo voriaro ouive.”

<sup>7</sup> Uva oreovu uvuavorao eravao iava oa oiso puraerao,  
“Iu. Oiraopavira rutu, Turaro Pauto vii-ia goruara rutu toupaiveira. Vao oa iavirava oirara rovirieipariveira kortua-ia oiraopa vovou rutu sirova vao torevokoa rutu.”

---

◊ 15:3: Diu 32:3-4; Sam 111:2, 150:1-6; Hos 14:9   ◊ 15:7: Ais 6:1-8; 1 Kin 8:10   ◊ 16:2: Eks 9:8-12   ◊ 16:3: Eks 7:17-21   ◊ 16:4: Eks 7:17-21   ◊ 16:6: Ais 49:24-26

<sup>8-9</sup> Oire uva vo resurapato purapurapato ensel ora rera vo kokoaro kasipua petorevorao ravireo-ia. Uva oisi-a eisi osa iava Pauto ravireo eakarevoiva, oirara rutu kasirevorao va-ia vao riroa tuitui kasi ravireo vaaro. Oa-ia vurivira rutu voea evoea kasirevorao. Osa iavirava eisi rera tovipaoro Pauto rera takupaivorao ro ira-ia gorua toupaiveira vara rutu evara vuriara kareke piepasa. Uva viapau oiso ora voea iava sopaura oaive porepaivora rera vaisiaro kae piepasa.

<sup>10</sup> Uva vo vavaepato ita purapurapato ensel ora rera vo kokoaro kasipua petorevorao rei-ia paupa vavaraito vaaro. Oa iava rupaerao vo sararore oirara oea vavaraito reroarovi toupaiveira. Uva rirovira rutu siitoka iraopaaerao upiapaoro. Uva oisi-a eisi osa iava ora voea iava arevuora oaive kotukotupaivorao vara gatagatapaoro. <sup>11</sup> Uva ora voea vo upiaroarore rugorugoopaoro ora kapuara Pauto tovi iraopaaivorao rera takupaoro ro vuvuiua iava. Ari ita, vo osa viapau oiso ora voea iava sopaura oaive porepaivora vo vovourore evara ovaupaoro oara oisoa purapaive.

<sup>12</sup> Uva katai vatarapato purapurapato ensel ora rera vo kokoaro kasipua petorevorao riro kara-ia uuko kara vao-ia Yufretis. Oa iava voava vo kara raaka ovoierao raiva pura ovoioro turaro irarapa king irara, oisore ra voa urioave oisiriva uva ravireo kaeparo viroveira. <sup>13</sup> ♦ Uva vo peva tugara peva kekeavorao oiso rorovira osa rokoroko kare. Oea dragon gisipoaro iava riroto kosia virorao ora vavaraito tapo gisipoaro iava, ora profetato gisipoaro iava tapo ro riro kuuvuto. <sup>14</sup> Opevaa eva uraura peva vuri irara rutu oea oaravu rutu ravotoara purapaiveira. Uva avapaaveira voea iare oirara rutu voeааро king irara voeао vo rasitoa-ia, voeао guru rovopaoro upoa kosi piepasa vo vokio-ia rei voki Pauto vaaro ro ira-ia ogorurovu rutu toupaiveira.

<sup>15</sup> ♦ “Uvu iraopata! Ragai oiso visii iare sita pievira poura viroverea osa kavirupato! Ra rorupareve ro ira uutupaoro viapau uusiparo. Osa iava uvuipa ra vearovira ora rera vaaro-ia varoa tuuro, ra viapau gapuvira vokareve. Ra oisi iava oirara viapau rera iava ariipa tavuki kekeive. Osa iava uvuiparoi ra roru iraoreve.”

<sup>16</sup> Uva voea vuri irara tugara uraura irara king irara guruivvorao voa evoa oea Hibrueo-ia vaisipaiveira oiso, Amagedon.

<sup>17</sup> Uva erao vatarapato purapurapato ensel ora rera vo kokoaro kasipua petorevorao aue-ia kiuvu. Oa iava Rovopa Kepa Tempel sovara iava ora paupa iava Pauto vaaro oreovu rirovira rutu keeraoro oiso puraerao, “Ovoiei rutu.” <sup>18</sup> Uva varakeoto parakauoru roropaoro avaparoerao, ovusa rera vo gurukoaro karekepavorao, ovusa rera varakeoto pokoparo virorao. Oa iava riroto ravurike karekeroerao. Uva rera-a eera ravurike rirotoa rutu. Ira oravurikerovu rutu-ia puteparevoi varao oara ovuutarovu rutu-ia oisoa karekepape vo osa oirara vo rasio-ia toupaive. Viapau oiso oravurikei oisi roroa vai oisi eisi karekeepa tuariri osa ro-ia. <sup>19</sup> Uva va vao riro urui oa rera-ia vo peva puravorao kaku virooro, ovusa otaererovu rutu iava ouruirovu rutu varao riropa uruiro oara opesi ovoipaerao vuri ovoipaoro. Uva Pauto riroa uruire vao Babilon urui rugorugooroerao. Oa iava vo urui ukaio piervorao o-ia kap iria-ia wain ovi toupaiveira. Wain eva-a riroa rutu kasipua Pauto vaaro. <sup>20</sup> Uva tokotokoara rutu rokovorao opesi ovoioro. Oa iava viapau oiso opukui touvorao vorerivira. <sup>21</sup> Uva rirova rutu kokeva ais koveorao. Uva ogagatarovu rutu aisiara riro vavatapara aue-ia uvuipai 50 kilos vara vavataaro katakataivira. Evaisiro aisirosa vuvuiua iava kovekovepaerao oirara-ia. Oa iava oira-ia ais vuri iraoaerao. Uva oisi-a eisi osa iavirava Pauto takau iraopaaivorao oirava eira ais iria voea vuri pieevorao.

## 17

*Reiva Turarova Riakova Otopava Iria Vuria Voria Oueva. Oira Vaisiaro, Babilon O Vaisia Porearo, Oloturovu Raga Purapa Irara*

<sup>1</sup> Uva iravu purapurapato ensel erao vatara iava oea erao vatara-ia aue dis pitupaivorao ira urioroerao ragai tavisa oiso, “Uriou o tuesa reiva riakova otopava iria uuko karaaro

♦ 16:13: Eks 8:1-6    ♦ 16:15: 1 Te 5:1-11

rutu sirova toupaevoi. Iria oira vaaro vuri vori oupae. Uva oiso vovouparai ra oiraria vii kareke piea. <sup>2</sup> Turaro irara king irara voeao vo rasio-ia oea oisoa riro pitupituro rutu purapaive otopara oira tapo riakova. Ora oirara voeao vo rasio-ia oea oirava va vao otopa pitupitu purapaiveira. Oa iava kokoropaaveira oiso rutu osa ro ira spakpaoro kokoroparo.”

<sup>3</sup> Oire uva Tugoropato Uaurato ragai-ia riro varivarivira rutu karekeriva, eera enselto ragai kaerevorao orasivu iare vo uva viapau oiratoa vai toupareve kuvau tapi. Uva-a eva uva iriavu kekeavorao riakova iria revasipato vavaraito ivara-ia paupaorao. Uva rera-a eera vavaraito ira iava varaua agasi iraopaerao riro vaisiro iava Pauto tovipa vaisiro. Uva rera raga vavaraito ira erao vatarava kukue tourevorao, ora katai tau aue keta. <sup>4</sup> Uva oira-ia riakova aitereivu revasipatoarei kuvutoarei toupasivorao, ora ooritorovu rutu golara, ora oaravu oritopara oara oisoa purapaive vearovpara iava avekeara, ora aasi iroro varao pute pie voriara rutu. Uva ora oira iava vavaea-ia kap-ia golava pitupavirao o iria agasiorao aue-ia opitupiturovutu eruara Pauto osireiaroia, ora opitupiturovutu vuivuipara otopa pitupituro varao oara oisoa purapaeve. <sup>5</sup> ♦ Uva rigatoa oira vaisiaro iava oira kagavearo-ia toupaivirao, vo vaisio oa porearo vituaro vatauvira toupai oiso, “Rei Urui Babilon-ia. Oriakorovu rutu otopa riako aakoaro-a vii ora opitupiturovutu vuriara varao vo rasio-ia.” <sup>6</sup> Iria eira riakova Pauto voearo oisoa upopaooro voea kopii piepaeve ora voeao oea oisoa Jisas oirao piepaeve rera vaisiaro iava siposipopaoro. Uva ragai oira kekeavorao osa voea revasiaro-ia ukaioorao. Oa iava kokorovira karekeorao. Oire uva va eva kekeavoiva, rirovira rutu tavetave iraopaoro vaia eva rirovira rugorugooraaero.

<sup>7</sup> Uva purapurapato ensel ragaire oiso puraroerao, “Eakere rirovira rutu rugorugoo iraopau? Uvuiparai vii soporepaa vatau reo rutu vituaro iava o riakova vaaro ora ro vavaraito ira-ia erao vatarava kukue toupaiveira ora katai tau keta, ira ivara-ia pau-paoveira voraro avapaoro. <sup>8</sup> Rera kekerivorao ro-ia vavaraito tuariri ira oisoa tootoovira toupareve. Uva vo vokio viapau oiso rera epao. Ari ita, uva utupavira vo riku eva kavurevereoa viapau rekasia vai voava kae virooro. Ra oisi iavirava opesiko ovoiro. Ora oearoi oirara vai vo rasio iava voearo oearoa Pauto viapau vaisiaro rigatoreva Vukua-ia Tootoopa vo vuutari-ia oa-ia rasito purareva. Oea-a evoea oea rera vavaraito kekepaoro rirovira rutu tavetave iraopaiverea. Eake iava? Uvare tuariri oisoa tootoovira tourovopareve. Uva vo vokio viapau rera epao ita. Ari vo utupavira ita karekerovere.

<sup>9</sup> “Ro ira vearo rugorugoo rutuva toupareve ira uvuiparoi ra vearovira rutu taraiparo va-ia vao oiso-ia, Varao-ia erao vatarava kukuero oara oiso toupai erao vatarava pukuiara, oara varaaro-ia riakova paupaoveira voa erao vatarava pukuiara. <sup>10</sup> Uva vara-a varao erao vatarava kukue oara erao vatarava king irara reipa irara reesipaiveira, oiso vo vavae opesi ovoiaepta osa iravuei kataito ira vo vokio touparevoi ovusa iravu touvira reipaoro karekerovere. Oire ra utupavira karekerivoiro, ra oisi iavirava gare vuutavi raga-ia toureve. <sup>11</sup> Uva rera eera vavaraito tuariri rutu ira oisoa tootoovira toupareve. Uva vaviopavira viapau rera epao ira oiso toupare, Eera vo peva vatarapato reito. Ari ita, uva rera-a voeao saratoaaro erao vatarava (7) reipa irara ira ita opesi ovoiroverea.

<sup>12</sup> ♦ “Ari ita, katai tau kekerivorao keta oara katai tau reipa irara reesipaivoi oea touvira gorua oupaiverea ro ruvara-ia vavaraito. Oire ra reipaoro toupaive vavaraitoa tapo katai vuutavi raga uvuiaro-ia. <sup>13</sup> Uva voeaa-evoeaa reipa irara oea katai rugorugoo ragava toupaiveira. Oa iava varivariara ora goruara varao oara voeaa-ia toupaiveira evara rutu oiso vateiverea rerapa ro vavaraito. <sup>14</sup> ♦ Uva Sipsip Kakaeva ora upoaverea. Ra oisi iavirava Sipsip kakae voeava ora keevoisioro voeaa-ia puteve rutu. Eake iava? Uvare rera ira turaroparoi rutu oearovu rutupa turaro irara, ora uvare rera-a king irara rutupa king. Ra oirara voeao oea rera tapo toupaiveira rera vo keeraaro sirova utupaave voeao oea ora rerapa reesireva. Oa iava rera vo reoroaro vearovira rutu sirova oisoa utupaave oea-a evoea uvuipaii ra vo upova ora keevoisiate rera tapo ro-ia Sipsip Kakae.”

♦ 17:5: Ais 13:1-18; 2 Te 2:7

♦ 17:12: Dan 2:41-42, 7:20, 24

♦ 17:14: Re 19:16, 19-20; Mt 22:14

<sup>15</sup> Uva ragai tavirevora oiso, “Vo kararo ita kekerivorao riropa kararo uukoara ooviroa sirova paupaoveira oira o otopava. Okararoa osasararoa rutu reesipaiseira ora aue oirara rutu vo okantrirovu rutu-ia, ora ovararovu rutu, ora oreorovu rutu. <sup>16</sup> Ora evara katai tau keta oara tapo ita keke ovoirivorao oara voeao reesipai king irara oea rutu evoea ora rera ro vavaraito oirava eira otopava ora keriaverea. Ra oira vuri pieive rutu oira iava varoara rutu veraoro. Vo osa oira iava tapo varaua iava sopeara aioive oira kasi ovoioro tuitui kasi-ia. <sup>17</sup> Iu, Pauto voea iava sopaura-ia rugorugooara tovo rovoreverea, ra oisi iavirava va vao puraoro oisi va karekeive. Ari ita, katai rugorugoo ragava toupaiverea ora vao gorua oara ouiverea, ra vara iavirava oiso touive osa king. Oara rutu evara vateiverea vavaraitoapa. Uva oisi-a eisi osa piepaiverea vo rutu rekasisa ovuuta-ia Pauto vo reoroaro oiraopavira rutu karekepereea varao iava oara iavirava oisi eisi puraroepa. <sup>18</sup> Uva eira riakova iria kekerivoi, o-ia vao-ia rei urui oa oiso toupai, Reipa irara rutu iava kukue voeа vo rasio-ia.”

## 18

*Babilon Urui Ovoiepa Vurioro*

<sup>1</sup> Uva vao isivaaro iava iravu raga purapurapato ensel kekeavorao urusia-ia ira vuvuiua iava vararoerao. Ira-ia riroa rutu gorua touvorao ora riroa keraria rera vaaro. Oa iavirava rasito aviavirevora rirovira rutu. <sup>2</sup> ♦ Ira rirovira rutu takatooro oiso puraroerao, “Reiva Babilon urui iria opesi ovoioi. Iria opesi ovoioi vurioro. Iria oiso karekeoi vo vokio, Oira-a vuri tugaraaro vo uruiaro. Oa-ia toupaiveira vuri irara tugara ora vuri kare kokio kare. Oea rutu tapo oira-ia toupaiveira.

<sup>3</sup> Eake iava? Uvare osararovu rutu oirara oisoa oirava opitupiturovu rutu otopara purapaive. Uvare oiso toupai, Oira ruvara-ia riro gorupa wainro-ia oisoa ukaiopaave. Osa raga ita reipa irara voeao vo rasio iava oirava otopa pitupituro purapaiveira. Ora voeao oirara oea vo rasio-ia sara kovoro purapaiveira riroara oara purapaoro vara-ia riroara rutu moniara oupaiveira ovovourovu rutu sirova riropara kaureo vovouro oira varaaro.”

<sup>4</sup> ♦ Uva oreovu uvuavorao oreoa vuvuiua iava uriooro oiso puraerao, “Oirara oaa evo urui iava kosita viro. Teapi oira tapo ora taveopata oira vovouaro-ia vuria. Teapi oira tapo ora taveopata vuri vovou vo voriaro oira vaaro ousa.

<sup>5</sup> Oira vaaro vuria oa oiso rutu ora gurupapeira osa oavu torearo pukuia oa ipaepa rutu vuvuiua iare rekasisa. Uva Pauto vo vovouro ruture evara vuriara rugooparoveira vo urui eva varaaro.

<sup>6</sup> Rugoo iraopata vo vovoure eva oira otopava oa purapaeveira. Ra oisi uvuivira rutu oira-ia oisi piepata oiso osa visii piepaeveira. Uvare ora oira vo vovouaro vuriara tavosipaiseira, oa iava rirovira rutu karekepapeira. Eisi raga ita osa uvuipatai ra oira vo voriaro vuria vao eraopa vori tapokopata vo vorirei rutu purapaoro oira-ia. Iria eira riro gorupa uukoro porepaeveira kap-ia. Osa ita uvuipatai ra oira vo goruaro vao eraopa goru tapokopata oira vatepasa voreripavira ita. Ra vara-ia ukaiopao varao-ia vuriara.

<sup>7</sup> Iria oisoa ora oira raga vaisiaro kae piepaeve opitupiturovu rutu purapaoro ora oira raga vo ruiparoaro uvui piepasa. Eisi osa iavirava uvui iraopatai ra oirapa riro upiaro vai rutu vatepata oira vo kaureoroarova uvuipaoro. Ora oira tapo rirovira rutu gau pie iraopata vova oira iava sopaura-ia uvava oiso purapaoveira, Ragai oiso toupa Kwin. Ragoa pauparai Kwin vaaro-ia paupa. Viapau oiso ragai-a raroeva. Siraoa viapau uvuipai ra ragai-ia karekepe, ra oisi iava gaupaa. Viapau rutu.

<sup>8</sup> Uva oisi-a eisi osa iava osasararovu rutu vuriara oira-ia karekepereea katai voki ragai-ia. Riro irara upiapaoro kopiipaaverea. Uva riro irara rutu vurivira gaupaiverea ora riroto ogoeto ira tapo karekerovere. Uva riroa tuitui kasi Babilon urui rutu kasi ovoiverea. Iu. Reito Pauto oira vo vovouaro rovirieverea rutu oira vaaro vuria vo voriaro kare pieoro oirapa, eera Turaro Pauto riro gorutoa rutu.”

Eisi osa puraepa vo reo vuvuiua iava va.

♦ 18:2: Ais 13:21-22; Jer 50:39    ♦ 18:4: Ais 48:20

<sup>9</sup> ♦ Uva voeao reipa irara vo rasio-ia oea oirava otopa pitupituro oisoa purapaive ora oaravu tapo riroara kaureo vovouro rutu oisoa purapaive oira tapo ora voea raga-ia rugorugoopaoro. Eisi osa iava voeao reipa irara kupareto tueiverea ovusa kaero viro, vo rara tuitui kasi oira kasiive. Ra oisi iavirava rirovira rutu gaupaive siraopaoro. <sup>10</sup> Uva uririaverea rutu vaopa viruria rutu upia oa taru oira-ia karekeperea. Ra oisi iavirava oira asavira tauaivi toupaive oiso purapaoro, "Siraovira! Siraovira rutu vii-ia Babilon! Uvare vii-a rei urui rutu. Ora vo uvare riro varivari urui rutu-a vii. Vakoravira raga katai vuuta raga-ia vii vo vuriaro voriaro vii-ia kareke ovoiei."

<sup>11</sup> ♦ Ra voeao oea vo rasio-ia sara kovoro purapaiveira oea vo uruire vao rugorugoopaaverea. Ra oisi iavirava vo uruipa gaupaive rirovira rutu siraopaoro. Eake iava? Uvare viapau ita irai epao ira uvuiparoi ra voea ruvara-ia kotokoto voriparo vorerivira. <sup>12</sup> Vo kotokotoro-ia aue gol, ora silva, ora veearopara avekeara, ora aue aasi riro voriara rutu, ora veearopara rutu popotepa varoro, ora osasarovu rutu revasipa varoro, ora gausisi varoro, ora oaravu rutu evaoara veearopa geesiara. Ora orekerovu rutu oara purapaiveira elefant iava ketaara-ia. Ora orekerovu rutu oara purapaiveira oevaovu-ia evaova riro voria rutu, ora aue bras, ora ainara, ora aveke korikoripara. <sup>13</sup> Ora orekerovu rutu varao oiso, vasirere, ora tagotago o aiopava, ora akoroara geesipa kupare purapara, ora osasarovu rutu tugara geesipara, ora veearopa sandaro, ora aue wain, ora korovo, ora veearopara aue plaua, ora aue wit, ora bulmakau, ora sipsip, ora hos, ora karisara, ora voeao akuku kovo irara, ora oirara tootooroaro tapo ita. Evara rutu voeao vo kotokotoroaro oara-ia sara kovoro oisoa purapaive osa viapau oeai vo vara voripasa. <sup>14</sup> Oea-a voeao oea sara kovoro oisoa purapaive oea oiso puraaerao oirare, "Varao rutu oarapa vii iava sopaua riiriipapeira rutu vara oupasa oara rutu vii kavuvorao. Oaravu rutu veearopara aioara, ora orekerovu riropa voriara, ora orekerovu rutu veearopa oritoro vii varaaro oara rutu evara vii kavu ovoivorao. Oire uva oirara viapau oiso orekerovu avu vai veearopara vai vii-ia vorerivira kekepaiverea."

<sup>15</sup> Uva voeao oea sara kovoro purapaiveira vara-ia rirovira moni oupasa vo urui-ia eva, oea rirovira rutu uriripaaverea vaopa vuri upia oa ouvoi vo urui eva. Osa iavirava vo urui asavira tauaivi oga pievira toupaiverea gaupaoro rirovira rutu siraopaoro. <sup>16</sup> Uva oiso purapaaverea, "Siraovira! Siraovira rutu vo uruivipa vao riro urui! Ouruia oisoa tuariri veearopa varoro popotepara-ia tuupape ora osasarovu rutu revasipa varoro. Ora oiso osa ora vo urui iava varaua oisoa oritopaive aue-ia gol, ora veearopa aveker, ora aasi iroro riro voripara. <sup>17</sup> Ari ita, vakoravira raga oara rutu evara moniara ora oritoara rutu opesi ovoiei."

Oire uva kepten irara rutu selpa uvuoro-ia tou irara, ora voeao rutu voeao oearoa uvuoro-ia voripaoro uvarovure avapaaveira, ora kovopa irara uvuoia-ia, ora oearovu rutu voeao oea sara kovo purapaiveira avakava-ia oea rutu Babilon urui siituepaoro tauai torepaaverea. <sup>18</sup> Oea kupareto kekeivere ovusa tuitui kasi vo urui kasive. Ra rirovira keerapaoro oiso purapaave, "Aa vo uruio vai epao oa vo uruiova vaeavira toupai rei urui, raa?" <sup>19</sup> Uva ora voeao kukuearo-ia rasito poupopuaro vikipaiverea gaupaoro siraopaoro rutu. Ra oiso purapaoro rirovira rutu gaupaive, "Siraovira rutu! Siraovira rutu rei uruipa, oa-ia moni oupaioveira igei vao igoa torevokoaraaro-a uvuoara. Siraovira rutu! Vakoravira raga opesi ovoieei." Eisi osa puraaepa selpa uvuoara-ia kovopa irara.

<sup>20</sup> "Vii vuvuiua, ora oirara rutu Pauto voeao, ora visii aposel irara, ora profet irara visiigoa rutu uvuipatai ra roru iraota va-ia vao oa vo vokio karekei vo uruia vao riro urui. Ouruia rovirieirevoi Pauto vo uruipa vuri vovou vo urui vaaro kare pieoro ovovoua eva oisoa purapaive visii-ia."

<sup>21</sup> Oire uva vo reo opesieiva, iravu riro varivarito enselto iriavu aveke ourevorao rirova rutu wit tatupava. Uva oira kae pieoro oira-ia vikiroerao avakava sovara iare. Uva oiso puraroerao, "Osa oiso vo urui vao rei urui kae pieiverea Babilon-ia va-ia riro varivarivira rutu vikisa. Ra oisi iavirava oirara viapau vo urui vorerivira kekepaive. <sup>22</sup> Osa-a eisi osa iavirava gita guruko ora osasarovu rutu pupipara, ora rivu, ora utave ogurukoa rutu

♦ 18:9: Jer 50:8-16, 46   ♦ 18:11: Esi 27:13, 27, 36

evara viapau uvuipai ra vorevira varao uvuive vii iava riro urui. Ora voeao oearoa tarai oupaiveira okovorovu rutu purapasa, oearoa-a evoea viapau uvuipaai ra voea vorerivira kekepaive vii-ia. O wit tatupava aveke iria gurukoaro-ia viapau uvuipai ra vorerivira oira gurukoaro uvupaive ita vii-ia.<sup>23</sup> Ora vuravu aviaviaro viapau uvuipaoi ra viire aviavieve vorerivira. Ora ro vo reoaro ira airepavira riako oupa, ora o rera oiraaro riakova. Oara rutu-ia evara viapau uvuipai ra vara uvuive vorerivira vii sovara-ia. Voari tuariri vii voeaaro oirara sara kovorova oisoa toupaive oiso rutu varava toupaoro reipa irara rutu oirara vo rasio iava voea. Ora oiso osa oisoa oirara rutu osararovu rutu iava oisoa keakeapari oaravu rutu-ia kavokavoara.”

<sup>24</sup> ♦ Uva Pauto vo urui eva kekerevorao ouruia vuriava toupaiveira profet irara upopa, ora oirara rutu voeao rera voeao oeava oisoa oirara rutu voeao vo rasio-ia keripaave voea kopii pie ovoipasa. Ovuria tapo eva oa voa raga toupaivoi vo-ia Babilon urui raga-ia.”

## 19

### *Oirara Rutu Rorupaiva Uvare Babilon Urui Vuriepa*

<sup>1</sup> ♦ Vao isivaaro iava ragai oavu riro takato gurukoaro uvuavorao oiso rutu osa riro takato riro irara rutu oirara vaaro voeao oea vuvuiua-ia toupaiveira. Oea oiso puraaerao, “Pauto vaisiaro kae piepe vigei reraaro Pauto. Eera-a kataitoa raga ira vorevira vigei ourevoi, rei vaisitoa rutu, ora riro varivarito.<sup>2</sup> ♦ Ira kortua-ia oirara rovirieipareveira oiraopavira rutu torevoko vovou sirova. Uva o otopava riakova oira vaaro-ia otopa pitipitu oirara rutu vuri pieeva voeao vo rasio-ia. Eisi osa iavirava Pauto oira vo vuriaro voriaro vorevira kare pierevoi oirapa. Eira riakova iria Pauto kovopa iraraaro upopaoro oisoa voea kopii piepaeve.”

<sup>3</sup> Oire uva vorerivira ita oiso keeraoro oiso puraaerao, “Pauto vaisiaro kae piepe! Uvare tuitui kasi kuparearo riro urui kasivoi vao oa vokiara rutu-ia ipapapeira!”<sup>4</sup> Oire uva oisi-a eisi osa iava erao tau vo resura (24) turaro irara ora vo resurao vo kareo oea tootoovira toupaiveira oea rutu takua virorao kokoto rekuoro Pautoa-ia vuurapa vaisi puraoro, ira pauparoveira rera vaaro-ia paupa. Uva oiso puraaerao, “Oiraopavira rutu Pauto vaisiaro kae pie iraope. Vigei reraaro!”<sup>5</sup> ♦ Uva voava vo paupa Pauto vaaro oreovu keeraoro oiso puraaerao, “Visii Pautoa-pa kovopa irara, visiigoa rerapa Pauto avivikepataveira visii oira akukuro, ora visii visiigoa oearovu rei vaisirova toupataveira. Visiigoa rutu Pauto vaisiaro kae pie iraota.”

### *Riako Oupa Vurei Puraiva Sipsip Kakaepa*

<sup>6</sup> Oire uva oreovu uvuavorao oa karekeerao riro irara rutu iava oirara oea ora guruaerao. Ogurukoa oiso rutu poko pirorao osa riroa uuko sirisiri gurukoaro, ora oiso osa riroto varakeoto poko piearo gurukoaro. Ogurukoa eva oiso puraerao, “Pauto vaisiaro kae piepe. Reitoa rutu Turaro eera vigei reraaro Pauto. Ira-ia goruara rutu toupaiveira. Ira vo vokio kingvira rutu touparevoi.<sup>7</sup> ♦ Uva uvuipavieie ra vo vokio-ia vearo vovou iraovio rera vaisiaro kae pieoro. Eake iava? Uvare vuuta karekei Sipsip Kakae vaaro oa-ia riako oupai. Uvare riakova ora vatatopooro tuepaoi, voea raga ita Pauto voeao. <sup>8</sup> Uva Pauto oirapa popotea varoa vateresvoi vearoa rutu, ora riro aviavia rutu, ora sisigaruea rutu. Uva va-ia tuuoi va vao popotea varoa.” Oa-ia torevoko vovou rutu reesievoi vo vovou oa purapaveira Pauto voeao.

<sup>9</sup> ♦ Uva purapurapato ensel ragai tavirevorao oiso, “Vo reo rigatori oiso, Pauto oeavure keeraroi riroa iare ora oupa aio Sipsip Kakae vaaro. Oa-ia uvuipaai ra roru iraopave.” Uva oiso ragai tavirevorao, “Oreoa vao-ia oiraopa reo rutu Pauto vaaro.”

<sup>10</sup> Uva takura virorao enselto kokotoaro ruvara-ia rera-ia vuurapa vaisi purasa. Uva ragai tavioro oiso puraroerao, “Opeita eisi ragaire pieri. Uvare ragai-a vii tapo kovopato, ora araoko irara oara tapo. Visiigoa rutu Jisas oirao piepataveira rera vaisiaro iava

♦ 18:24: Hi 11:32-40; Jer 51:49    ♦ 19:1: Sam 118:22-29    ♦ 19:2: Diu 32:43; Re 6:10    ♦ 19:5: Sam 134:1

♦ 19:7: Mt 22:1-10; 2 Ko 11:2; Ef 5:32; Re 21:2, 9    ♦ 19:9: Lu 14:15-17

siposipopaoro. Uvupuauei ra Pautoa-ia vuurapa vaisi pura iraori kataitoa raga. Ari ita, taraipavie oiso, Tugoropato Uraurato profet irara vo rugorugooroaro oisoa toretore piepareve Pauto vaisiaro iava siposipopasa. Eera ira voeao oirara tauvapareveira oea Jisas vaisiaro iava siposipopaiveira.”

*Oirato Popotepava Kaare Hos Ivara-ia Pauparoepa*

<sup>11</sup> ♦ Uva vuvuiua kekeavorao urusia-ia ovusa karu pirorao. Uva toupaevorao kaare hos iria-ia pauparoerao oirato. Ira vaisiaro oiso toupare, Eera oirato ira rera vo kovoaro vearovira rutu tokipareveira. Ora, Eera oirato ira ora rera vo pitupituar oiraopa rutu purapareveira. Vosa oirara rovirieireve kortua-ia, ora vosa upoa tote piereve, oire uva oisi-a eisi osa torevoko vovou raga sirova utuparoi vara purapaoro. <sup>12</sup> Ira iava osireito oiso roroparevorao osa tuituia vuvuaro, ora riroara kukuvaipara reito vararo rera kukuearo-ia toupaivorao. Osa oavu rigatoa rera iava varaua-ia toupaivorao eva rera vaisiaro. Eera kataitoa raga ira raga vo vaisi-ia taraiparoveira vo osa oearovu, viapau. <sup>13</sup> ♦ Uva revasiva varoa veevoraō vao oa-ia tuuparoveira. Oa iava oiso rera vaisiivoraō, Pauto Vo Reoaro. <sup>14</sup> Uva viurupa irara voeao vuvuiua iava hos kare-ia paupaaero kaare kare voea voeaaero. Uva popotepa varoro raga-ia tuuoro vearovara sisigarueara rutu rera sirova utuaerao. <sup>15</sup> ♦ Uva ro irapato voea reraaro tooriova touparevorao riro avuavuto ira rera gisipoaro iava kosiparo virorao, oiso ra oearoi uporeve oirara vai rera ro-ia toorio. Ora kakuto ainto kaeparevorao rerava oirara rutupa reipasa eera kakuto. Ra wain pigireve aveke rikui-ia wain pigipa oa-a eva riroa kasipua Pauto vaaro ro ira ogorurovu rutuva toupareveira. <sup>16</sup> Ira-ia rigatoa toupaivorao rera vaisiaro iava oa varoa-ia toupaivorao ora rera kokotoaro-ia tapo. Vo vaisio oiso-ia, Kingpa irara rutu reraaro King, ora Turaro irara rutu reraaro Turaro.

<sup>17</sup> ♦ Uva iravu ita purapurapato ensel kekeavorao ovusa ravireo osireiaro-ia toreparoerao kokio kare ruture rirovira keerapaoro ovusa vuvuiua vuutaaro-ia papaivoro. Uva oiso puraroerao, “Uriota vo ora gurusa riroa-ia aioa Pauto vaaro. <sup>18</sup> Visiigoa uvuipatai ra kingpa irara varuaro aiota, ora kepten irara tapo varuaro, ora voeao viurupa irara varuaro voeao riro varivaripa irara. Ora hos kare tapo varuaro, ora voeao oea vo kare ivara-ia paupaaeveira hos kare. Ora uvuipatai ra oirara rutu varuaro aiota voeao akuku kovo irara, ora voeao oea evoea tokipaiiveira, ora voeao oea rei vaisirova toupaiveira, ora oira akukuro.”

<sup>19</sup> Oire uva rera vavaraito kekeavorao, ora kingpa irara voeao vo rasio iava, ora voeao voeaaero viurupa irara oea ora guru ovoaerao, oiso ra rera tapo ora upoave ro ira hos ivara-ia pauparoerao. Ora vo osa rera voeaaero tapo viurupa irara ora uposa auepaaerao.

<sup>20</sup> ♦ Ari ita, vo osa vavaraito piturevorao, ora profetato riro kuuvuto ira oisoa riroara rutu ravotoara purapareve vavaraito osireiaro-ia. Opitupitu-a eva oa-ia oisoa oirara keakeapareve, oiso ra vo reesi ouive eva vavaraito vaaro. Ora oiso ra tokarasipa tapo vuurapa vaisi purapaiive. Uva vavaraito vaiterei rutu ora riro kuuvuto profetato aiterea touvira tootoopasiveira aiterea vikiiva rirova-ia rikui, iria-ia riro kasirao kasi tuituia vuvupaiiveira solfa-ia aveke viitavoko. <sup>21</sup> Uva rera roari ira hos ivara-ia pauparoerao oearovu uporevorao viurupa irara vaiterei voeaaero rera-ia toorio riro kaekaeto ro ira kosiparo virorao rera gisipoara iava. Oa iava vo kare rutu kokio kare urioaerao voeaaero evoea oirara aiosa. Oa iava vo kare iava kouvara vukuerao rutu.

## 20

*Seten Ira 1,000 Ivaro Rutu-ia Tuukeparoverea*

<sup>1</sup> Oire uva iravu raga purapurapato ensel kekeavorao urusia-ia ovusa vuvuiua iava vararoerao kii-ia pitupaoro rikui karupava, o iria-ia viapau rekasia vai toupaiveira. Uva riroa-ia tapo sen iro pituparevorao. <sup>2</sup> ♦ Uva rera ro riroto dragon raurevorao eera dragon tuariripatoa rutu ira oirara rutu iava gasipareveira, ro-ia Seten. Uva oisi-a eisi osa iava

❖ 19:11: Sam 9:1-8; Ais 11:4    ❖ 19:13: Jo 1:14; Ais 63:2-3    ❖ 19:15: Ais 11:1-5    ❖ 19:17: Jop 3:9-17; Sek 14:1-7    ❖ 19:20: Dan 7:24-26    ❖ 20:2: 2 Pi 2:4; Ju 6

rera tuukerevorao sen iroro-ia, oiso ra vo tuukeva toupareve 1,000 ivara rutu uvuiaro-ia. <sup>3</sup> Uva enselto rera vikioro rera roko pierevorao rikui-ia o iria-ia viapau rekasia vai. Oa iava voa rera ururao tupa ovoirevorao goruvira rutu. Osa iava viapau uvuipa ra rera Seten vorerivira oirara vai keakeapareve vo vuuta-ia vao. Uva evoa uvuiparoi ra 1,000 ivaro rerare pute rovove. Oire ra utupavira voava rerare karuive. Ra va iava uvarovu vokareve poteku vuutavi raga-ia oisivi raga.

#### *Jisas Ira 1,000 Ivaro Rutu-ia Turaroparoverea*

<sup>4</sup> Uva oaravu kekeavorao reipa irara paupara oara-ia paupaaerao oearovu osa Pauto voeapa kovoara vateparevorao oirara vo vovouroaro rovirieipasa kortua-ia. Uva riro irara tapo urauraaro oirara kekeavorao voeao oea Jisas oisoa oirao piepaive rera vaisiaro iava siposipopaoro. Ora oisoa goruvira rutu Pauto vo reoaro-ia tapo pitupaive. Oa raga-a eva oapa oisoa keripa irara voea okoearo tokopaive, ra oisi iavirava kopiipaave. Uva tapo voeao urauraaro kekeavorao oea viapau vavaraitoa-ia vuurapa vaisi viapau oisoa purapaive ora rera tapo iava tokarasi. Vo rara viapau rera vo reesiaro tapo oupaive ora voea kagavearo iare ora vavaeara. Oea-a evoea oea Tootoo Ovoi ouiva. Oa iava reipaoro Krais tapo toupaiveira 1,000 ivaro rutu uvuiaro iare. <sup>5</sup> Eva-a rovopa vuuta rutu oa-ia oirara tova urui iava vorevira toreaverea. Uva oearovu kopii irara viapau oiso Tootoo Ovoi ouiva vo vuuta-ia eva. Oea vaore 1,000 ivaro tuepaaveira, oiso ra opesi rovope. <sup>6</sup> Uva voea-a voeari oea vorevira tore rovoaepa rovopa vuuta-ia, oea uvuipaai ra roru iraopaive ora airereipaoro. Osa iavirava eraopa kopii viapau uvuipai gorua vai-ia voea kove pieve. Viapau. Ari evoea taru pris kovo-ia pitupaiverea Pauto vaaro ora Krais, ora tapo reipaoro toupaive rera tapo vo ivaro rutu uvuiaro-ia 1,000 ivaro.

#### *Seten Ira Vuri Iraoroepa Rutu*

<sup>7</sup> Utupaua varao 1,000 ivaro opesiperea taru. Ra vara isivaaro iava tuukepa kepa karuive. Ra va iava Seten rera vaaro iava kosiro viro tuukea. <sup>8</sup> Uva voava kosiro viroverea oirara rutu keakeapasa voeao oea vo resura rasito vatuarto-ia toupaiveira aue vo saraaro Gok vaiterei ora Megok. Voea rutu voraro rutuva gurileverea Seten upoa purasa. Oea vieiaro uvuiaro oiso toupai osa rogaraara vieiaro. <sup>9</sup> Uva ora sikasikapaaerao voraro uvarovu rasitoa-ia Pauto voeаrо vo uruiroaro kovokovopaoro ora vao rei urui Pauto oapa siraoparoveira rutu. Ari ita, tuituia vuvuiua iava varaperea voea evoea viurupa irara kasi iraosa. <sup>10</sup> Oisi-a eisi Seten voea kea rovorevoiva, Pauto rera vikirevorao rirova sovara-ia gogagare rikui, o iria-ia riro kasirao vuvu toupaiveira tuituia aue-ia avekea solfa viitavokoaro, vo uva toupasiveira vavaraito vaio ora profetato riro kuuvuto. Uva vo peva rutu evoea vuri upia rutu siitoka oupaiverea ravireoura rutu-ia ora vokiaroro rutu vo uva viapau opesia vai.

#### *Riroa Tavaa Kort Oa Karekeperea*

<sup>11</sup> Oire uva oavu reia paupa popotea turaro vaaro kekeavorao urusia-ia osa voa toupaivorao oa-ia pauparoerao Pauto. Uva rasiarei ora vuvuiua rera asavira toripaivorao. Eisi osa iavirava viapau oarei varei iava vorevira kekeivorao. <sup>12</sup> Uva kopii irara kekeavorao osa voa toupaivorao voeao rei vaisi irara ora voeao akaipa irara oea Pauto vaaro paupa ruvara-ia torepaaerao. Ovusa roari ira va-ia paupa paupaoro vukuara karukaruparevorao. Uva ovukuvu tapo ita karurevorao eva Tootoopa Vuku. Oa iavirava kopii irara rovirieiparevorao, uvare rigatoara kekeparevorao oara vo vukuro-ia toupaivorao. Oa iava voea kopii irara rovirieiparevorao voea vo vovouroaro uvuiarovarari oara oisoa purapaive. <sup>13</sup> Uva avakava voea rutu vorevira kopii irara kosi pieevorao voeao oea oira-ia toupaiveira. Ovusa Kopiia ora vo uva kopii irara toupaiveira oa voare vorevira voea rutu kopii irara kosi pievorao. Osa-a oiso osa iava rovirieipato jas voa voea rutu katakataivira rovirieiparevorao voea vo pitupituroarova uvuivira oiso osa

<sup>◇</sup> 20:3: Re 12:9    <sup>◇</sup> 20:4: Dan 7:9, 22; Ais 11:1-10; Ais 65:17-25    <sup>◇</sup> 20:5: Lu 14:14; Fl 3:11; 1 Te 4:16    <sup>◇</sup> 20:6: 1 Ko 15:51-57    <sup>◇</sup> 20:8: Esi 38:2, 39:1; Re 16:14; Hi 11:12    <sup>◇</sup> 20:9: Esi 38:9, 22, 39:6    <sup>◇</sup> 20:11: Dan 2:35; Re 12:8  
<sup>◇</sup> 20:12: Lu 10:20    <sup>◇</sup> 20:13: Re 6:8; Ais 26:19; Re 2:23

vara oisoa purapaive. <sup>14</sup>◊ Uva Kopiia vikirevorao varei ora vo uva kopii irara toupaiveira, oarea rutu vikirevorao rirova-ia rikui iria-ia tuituia toupaiveira. Uva oira-a eira rikui iria-ia eraopa kopii toupaiveira. <sup>15</sup> Vosa oirara rovirieipato viapau irai vaisiaro oiratoa vai kekereve vukua-ia vao Tootoopa, oire ra rera vikireve oira-ia eira rirova rikui iria-ia tuitui kasi toupaiveira.

## 21

### *Vo Toupai Airepaua Iava Vuvuiua Ora Airepato Rasito*

<sup>1</sup>◊ Oire uva airepaua vuvuiua kekeavorao urusia-ia ora airepato rasito. Uvare rovopaua vuvuiua ora rovopato rasito oarea opesi rovoepa. Uva avakava tapo viapau toupaevorao. <sup>2</sup>◊ Uva vao Tugoropa Urui airepa Jerusalem urui kekeavorao oa Pauto ruvara iava varapaerao vuvuiua iava. Ouruia vearo orito rutuva touvorao oiso rutu osa riakova vearopa orito vatatopovira oisoa purapaeve valuato ousa, oira reraaro. <sup>3</sup> Uva oreovu uvuavorao reito vaaro iava oa paupa urioerao rirovira rutu oiso puraoro, “Kekeri! Vo vokio Pauto vo kepaaro toupai oirara tapo. Oa voea vuruvuruaro-ia toupaiverea, ra oisi iavirava oiso toupaive, Rera voeaaro oirara. Iu. Pautoa raga ita ira pere voea tapo, ra oiso touparevere, Voea reraaro rutu. <sup>4</sup>◊ Ira voea iava gau oviro rutu posiposi pierevere. Ora viapau oiso ra vorerivira ita kopiiave. Ora viapau oiso ita ra vorerivira tavaka vo siraoaro vai oupaive. Ora viapau oiso ra vorerivira gaupaise. Ora viapau vorerivira upiaave. Evara rutu tuariripara oara opesi ovoiei.”

<sup>5</sup> Uva ro ira reito vaaro-ia paupa paupaoro oiso puraroerao, “Kekeri! Ragai orekerovu rutu airepavira kareke pieavo.” Uva oiso ita puraroerao, “Vo reoa vao rigatori oiraopa reo rutu, oa-ia uvuipaa oirara rutu ra va oirao pie iraoive rutu.” <sup>6</sup> Uva ragai ita tavirevorao oiso puraoro vorerivira, “Orekerovu rutu varao kareke ovoiei! Uva ragai raga-a, Irapatoa rutu. Ora ragai raga-a, Ovoiokuto. Ragai-a orekerovu rutu vituaro, ora okovorovu rutu opesiaro. Vosa ro ira uuko regaparo, irapa eera ragai vagagaavere, ra ukaioro tuputupue ovi-ia uukoa Tootoopa. Oa eva vate ragaavere rerapa vatevateavira. <sup>7</sup> Vosa ro ira upoava ora keevoisiro, ira uvuiparoi ra evara rutu varao viraakoara oureve ragai varaaro. Ra oisi iavirava ragai oiso rerapa toupa, Ragai-a rera reraaro Pauto. Vo osa rera oiso toupareve, Rera ita-a oviitoa oaa.”

<sup>8</sup>◊ “Ari ita, vosa voeo oea uriripaaveira vorevira ora ruvupaoro, ora voeo tapo oea viapau oirao piepaiveira, ora voeo oea kaakau kare vo pitupituro rutu purapaiveira, ora voeo oira upopa irara, ora otopa pitupituro purapa irara, ora kavokavoara purapa irara, ora voeo oea kuuvu irara tokarasi irara-ia vuurapa vaisi purapaiveira, ora kuuvu reoro raga purapaiveira, oearoa rutu-a evoea oea ora voea vo uruiaro ouiverea vo rirovaa-ia rikui uva riro kasi vuvupaoro toupaiveira aue-ia solfa viitarokoaro-ia. Uva va vao-ia eraopa kopii voea vaaro.”

### *Airepa Urui Iava Jerusalem Urui*

<sup>9</sup> Uva iravu raga ita purapurapato ensel ragai iare urioroerao. Eera-a iravu voeo iava erao vatara enselpa irara oea disara-ia pitupavirao, varao oara-ia vuriara rutu ovoiopara toupaivora oirara vuri piepasa. Uva rera enselto oiso ragai tavirevorao, “Uriou! Ra vii kareke piea riakova-ia o Sipsip Kakae oiraaro eira iria ourevo.” <sup>10</sup> Oire uva Tugoropato Uaurato ragai-ia goruvira rutu ora karekeroerao. Oa iava enselto ragai kaeoro avaroerao oavu iare riro pukui riro toreao rutu. Uva vo pukui kukuearo-ia toupaoro voava ragai kareke pieparevorao vare vao rei urui Tugoropa Jerusalem urui oa Pauto ruvara iava varapaerao vuvuiua iava. <sup>11</sup> Uva Pauto vaaro aua sisikorevira roropaivo rutu vo urui-ia eva rei urui. Ororoa aviaviaro pisavira rutu toupaivora oiso rutu osa aveke o riro voriva rutu. Iu. Eisi osa aveke jaspa iria oiso rutu roropaeveira osa sisiro. <sup>12</sup>◊ Uva vo urui eva oa-ia rirova kasura toupaevorao riro toreva rutu, okasura-ia katai tau erao (12) rataoara toupaivora. Uva katai tau erao (12) enselpa irara vara riaaro-ia

◊ 20:14: 1 Ko 15:26; Re 6:8   ◊ 21:1: Ais 65:17; 2 Pi 3:13   ◊ 21:2: Hi 11:10-16   ◊ 21:4: 1 Ko 15:26; Ais 35:10, 65:19   ◊ 21:8: Hi 12:14; Re 22:15   ◊ 21:12: Esi 48:30-35

rataoara rutu uutupaoro torepaaerao. Uva katai tau erao (12) sara Isrel-pa irara vaisiaro voa toupaivorao rataoaro rutu riaaro-ia. <sup>13</sup> Uva kasura iava oiso va uvava ravireo kaeparo viroveira uvava opevavu ratao toupaivorao. Osa opevavu ratao oisova oirapapa varata-ia, ari opevavu oisova koike varata-ia, ari opevavu oisova uva ravireo rokopareveira. <sup>14</sup> ♦ Uva vo kasura vao rei urui iava va oa-ia katai tau erao (12) toupaivorao avekeara vo kasura vituaro goru piepasa. Oavekeroa-ia vo vaisiro katai tau erao (12) aposel toupaivorao Sipsip Kakae voeaaro vaisiaro.

<sup>15</sup> Uva rera raga ita eera purapurapato ensel ragai tapo ora reoparoerao ira uvuia-ia pituparevo gol vo urui vao rei urui uvuipasa, ora vo urui iava rataoara, ora vo urui kasuraaro. <sup>16</sup> Uva rera purapurapato vo urui uvuiparevorao rera vaaro-ia uvuia. Oa iava vo urui uvuiaro vao-ia uvuipai, 2,400 vuutaro (kilomita) va kaekaearo-ia, ora vo urui kasuraaro parakaaro-ia, ora vo urui torearo uvuiaro oara rutu vaeapaivorao katai uvui raga-ia. <sup>17</sup> Uva vo urui kasuraaro tapo uvuirevorao, uvare kasura tapo-a riro toрева. Iria aue uvuipaoi 60 mita. Oa-a vao-ia mita oa-ia oirara oiso orekerovu uvuipaive. Uva purapurapato ensel va-ia eva kasura uvuirevorao mita.

<sup>18</sup> ♦ Uva vo kasura eva rei urui iava Pauto oa purareva avekeara-ia varao jaspa. Ora vo urui tapo purareva ae raga-ia gol. Oa iava oiso rutu aviavipaiveira roroiovira roropaoro oiso osa sisiro. <sup>19</sup> Uva vo urui kasuraaro vituaro oritoreva Pauto osararovu rutu-ia avekeara riro voripara. Uva rovova rutu vearovava aveke vo kasura rutu vituaro-ia toupaeveira o-ia jaspa. Ari eraopava kuuvava iriavu aveke sapaia. Ari vo pevapava popoteva aget. Ari vo resurapava kokovarava emeral. <sup>20</sup> Ari vo vavaepava sadonikis eira revasiva ora popote vatakopava. Ari katai vatarapava revasipava konilian. Ari erao vatarapava keseva krisolait. Ari vo peva vatarapava iriavu kokovarava beril. Ari vo resura vatarapava iriavu keseva topas. Ari katai taupava krisopres iria kokovara vatakovira toupaeveira ora kesevira. Ari katai tau kataipava o-ia iriavu kuuvava haiasin. Ari katai tau eraopava o-ia iriavu revasipava ametis. <sup>21</sup> Varao-ia katai tau erao (12) rataoara evara aasiara popotepara riro voriara rutu. Orataovu purareva aisivu iava katai isi riro isi aasi isi. Ora gol raiva raga vo urui sovara-ia, oa oiso rutu roropaiveira osa sisiro roroiovira rutu.

<sup>22</sup> Uva viapau oiso Tugoropa Kepa kekeavorao voa vo uruia oa tavariorevorao Turaro raga Pauto ira-ia goruara rutu toupaiveira ora Sipsip Kakae. Aue iava uvare vaiterei raga oiso toupasivora Tugoropa Kepa ora vaiterei raga-ia. <sup>23</sup> ♦ Uva vo uruia-a eva oa-ia viapau ravireo roro vai ora kekira roro vai. Viapau. Ari Pauto raga vaaro-a aua, oa raga sisikorepaoro voare roropaiveira. Ora vo uvare Sipsip Kakae-a vuravu vo urui oiraaro. <sup>24</sup> Oirara rutu vokapaiverea vo urui raga aviaviaro-ia. Ora reipa irara voeao yo rasio iava oea ora voea varaarova oritoara uriopaave voare riro voripara rutu vo urui-ia. <sup>25</sup> ♦ Uva ravireo-ia viapau uvuipaaai ra rataoara tupapaive varao vo urui kasuraaro-ia vo rataoro. Aue iava uvare viapau rutu rupaa vai karekepape vo urui-ia vao. <sup>26</sup> Orekerovu rutu riropa voriara okantrirovu rutu iava oarava koataaverea rera vaisiaro-ia vuurapa vaisi purapasa. <sup>27</sup> Ari varao vuuviupara, ora voearo oirara oearoa opitupiturov rutu purapaiveira vuriara, ora voearo oea kuuvu reoro raga purapaiveira, oearo-a evoea viapau oiso koataaverea voare. Viapau rutu. Uvare Sipsip Kakae oearovu raga vaisiaro rigatova Tootoopa Vuku-ia. Oea raga-a evoea vo urui-ia koataaverea.

## 22

### Tootoopa Uukoa Ora Tootoopa Ova Evaova

<sup>1-2</sup> ♦ Uva rera ro purapurapato ensel ragai kareke pierevorao okaravure uuko kara eva Tootoopa Kara uukoa oa oiso rutu roropaiveira osa sisiro. Okara paupa iava Pauto vaaro parupaiveira vaiterei ora Sipsip Kakae raiva rutu vuutaaro-ia vao rei urui sovara-ia tou raiva. Uva uuko kara vatuar-ia oisova ora oisiriva uvareava Tootoopa Ova toupaiveira.

◊ 21:14: Lu 22:29-30; Ef 2:20 ◊ 21:18: 2 Kro 3:3-10 ◊ 21:23: Ais 24:23, 60:19-20 ◊ 21:25: Ais 60:1-11

◊ 22:1-2: Esi 47:1-12; Sek 14:8; Re 4:6

Oeva kuepapeira kekiraara rutu-ia katakataivira katai tau erao (12) vuutaro-ia katai iva rutu sovara-ia. Uva vo eva iava guruvara oirara vearo piepaoro voea ruvarupara. <sup>3</sup> ♦ Ari orekerovu rutu varao oarare oiso puraparoveira, “Vuriara” varapa reasipaoro, oara viapau uvuipai ra voa toupaive.

Ari paupa raga Pauto vaaro ora Sipsip Kakae oa uvuipai ra vo urui-ia toupaive. Uva Pauto voeaaro kovopa irara voa rera-ia vuurapa vaisi purapaiverea. <sup>4</sup> ♦ Ora rera tapo puaaro vurapaiverea ira ora rera iava vaisia rigatoreverea voea iava kagaveara-ia. <sup>5</sup> ♦ Uva viapau oiso rupa vai karekepapere. Osa iava viapau vuravu aviaviaropa ruipapaaverea ora ravireo vai aviaviaro tapopa. Viapau. Ari Turaro raga Pauto voeare aviaviparevere. Ra turarovira rutu reipaoro toupaiverea opesi asavira.

### *Jisas Ikauvira Raga Urioroverea*

<sup>6</sup> Uva purapurapato ensel ragai tavirevorao oiso puraoro, “Oiraopa reo rutu-a vao-ia. Oreoa-ia uvuipai oirara rutu ra va oirao pie iraoive. Turaro Pauto oisoa Tugoropato Uraurato topatopapareve profet irara sopaaro-ia. Oa iava oisoa rera vo reoaro iava siposipopaise. Ira purapurapato rera reraaro arureva rera voeaaro rutu kovopa irara roroio piepasa orekerovu rutu iava varao oara ikauvira rutu karekepasa auepapere.”

<sup>7</sup> ♦ “Uvu iraori!” Jisas oiso puraroerao. “Urioparai ikauvira. Vosa irai Pauto vo reoaro sirova utuparo vo vuku vao iava oreoa karekepapere utupaua, oire uva oisi-a eisi osa iavirava eera oirato uvuiparoi ra rorureve.”

<sup>8</sup> Ragai-a vao-ia Jon ragoa vo reo uvuavoiva, vara rutu varao keke ovoivavorao. Oa iava purapurapato ensel kokotoaro ruvara-ia takura viro, ro ira ragai kareke pierevorao vara ruture evara. Osa iava rera-ia vuurapa vaisi purasa aueparaerao. <sup>9</sup> Ari ragaire oiso puraroerao, “Opeita eisi ragai piepari, uvare ragai-a vii tapo kovopato, ora araoko irara oaro tapo voeo profet irara. Ora ragai-a voeo tapo kovopato oea vo reo sirova utupaaveira oreoa vo vukuo-ia toupaiveira. Ari Pautoa raga-ia kataito vuurapa vaisi pura iraori.” <sup>10</sup> Uva ragai tavioro oiso puraroerao, “Vo reo-a vao-ia Pauto vo reoaro oreoa vo vukuo-ia toupaiveira, oreoa-ia viapau uvuipaei ra vo reo rukuri. Viapau rutu. Eake iava? Uvare Pauto vo vuutaaro-a vao vara rutu evara purapasa oa tutuuvoi. <sup>11</sup> Osa iava ro ira viria purapare, osa raga ita vara puraparevere vuriara. Ari ro ira rupa vovou purapareve, ira ita vo vovou rupa vovou puraparevere. Ari ro ira torevoko vovou purapareve, ira oisi raga vo vovou puraparevere. Ora ro ira airerei vovouvira toupareve, eera ita oisi raga airerei vovouvira touparevere.”

<sup>12</sup> ♦ Jisas oiso puraroerao, “Uvu iraori! Ikauvira poura virovere rara oirara rutu vo voriroaro vatesa katakataivira, vo vovoero voriaro uvuiaro oara oisoa purapaise. <sup>13</sup> Uvare ragai raga-a, Irapatoa rutu ora Ovoikutoa rutu. Ora ragai raga-a, Avaioto ora Utupatoa rutu. Ora ragai raga-a, orekerovu rutu Vituaro ora Opesiaro.”

<sup>14</sup> ♦ Voeao oea varoara oaiive sisupaise oea uvuipai roru iraopaise. Vo uvare voeaa evoea oea uvuipai ra aio oupaave vo evao iava Tootoopa Ova. Ora oea uvuipai ra rei urui iava vo rataoro-ia koataave. <sup>15</sup> Ari voeao oea kaakau kare vo pitupituaro purapaise, ora voeao oea kavokavo purapaise, ora voeao oea otopa pitupituro purapaise, ora oirara upopaise, ora tokarasipa kuuvuto vuurapa vaisi purapaise, ora kuuvu vovoupa ruipapaaveira va sirova utupasa, oea rutu-a evoea oea rei uruipa ratau toupaiverea Pauto vo uruiaro.

<sup>16</sup> “Ragai-a Jisas ragoa purapurapato ensel aruavora visii iare. Oa iava visiipa vo reo vao siposiporevora visii lotupa uvururo. Ari ita, uvare ragai-a Ikoto Devit aaotoaaro. Ora vo osa ragai-a, o aaviiko aviva iria sisikorevira roropaeveira.” Osa oiso puraroepa Jisas.

<sup>17</sup> Tugoropato Uraurato vaiterei ora Sipsip Kakae valuavaaro aiterea oiso purasiei, “Uriota!” Ra ro ira vo reo eva uvureve ira tapo ita uvui iraoparoi ra oisi raga ita puraro oiso, “Uriota!” Osa iava ro ira uuko regaparo, ira uvuipa ra urioro. Ora ro ira ita ukaio

◊ 22:3: Jen 3:17-19; Sek 14:11      ◊ 22:4: Mt 5:8      ◊ 22:5: Dan 7:27      ◊ 22:7: Hi 10:36-37; 1 Te 4:13-18

◊ 22:12: Ais 40:10; Jer 17:10      ◊ 22:14: Pro 11:13-31

ruipaparo, ira uvuipa ra urioro uukoa Tootoopa ousa oa oiso toupai, Vate raga siraoa Pauto vaaro.

*Ovoiopa Reo Vao-ia*

<sup>18</sup> ♦ Ragai-a vao Jon goru reo rutu vate iraopaavoi oirara rutupa voeao oea Pauto vo reoaro uvupaiveira vo vukuo iava. Vosa irai oiratoa vai vo reo siguvareve oreoi raga tapo vo reova vao-ia, oire uva vara rutu-a evara vuriara oarare Pauto oiso reoroepa vo vukuo-ia, rera Pauto orekerovu takutakuvureverea rerapa eera oirato. Ra vara iavirava vurivira rutu siitoka iraoparo. <sup>19</sup> Ora vosa irai oreoroi verareve vo vuku iava vao, Pauto ira ita taru oisi verareve. Ra viapau oiso aio ouro vo evao iava Tootoopa Ova. Ora viapau oiso vao-ia rei urui tapo toupareverea ouruia iava vo vukuo oiso purapai.

<sup>20</sup> ♦ Oire uva Jisas oiso puraroi, “*Oiraopavira rutu, ikauvira urioravere taru.*” Ira-a ro ira varao rutu iava siposiporevora oara vo vukuo-ia toupai. Ari ita, Turaro Jisas uriou!

<sup>21</sup> Vereopa vovou Turaro Jisas vaaro uvuipai ra visii rutu tapo toupaiverea visii tauvapasa vokiara rutu-ia. Ovoiei.

## Read the New Testament daily

*January*

date	Scripture
1	Matyu 1:1-2:12
2	Matyu 2:13-3:6
3	Matyu 3:7-4:11
4	Matyu 4:12-25
5	Matyu 5:1-26
6	Matyu 5:27-48
7	Matyu 6:1-24
8	Matyu 6:25-7:14
9	Matyu 7:15-29
10	Matyu 8:1-17
11	Matyu 8:18-34
12	Matyu 9:1-17
13	Matyu 9:18-38
14	Matyu 10:1-23
15	Matyu 10:24-11:6
16	Matyu 11:7-30
17	Matyu 12:1-21
18	Matyu 12:22-45
19	Matyu 12:46-13:23
20	Matyu 13:24-46
21	Matyu 13:47-14:12
22	Matyu 14:13-36
23	Matyu 15:1-28
24	Matyu 15:29-16:12
25	Matyu 16:13-17:9
26	Matyu 17:10-27
27	Matyu 18:1-22
28	Matyu 18:23-19:12
29	Matyu 19:13-30
30	Matyu 20:1-28
31	Matyu 20:29-21:22

*February*

date	Scripture
1	Matyu 21:23-46
2	Matyu 22:1-33
3	Matyu 22:34-23:12
4	Matyu 23:13-39
5	Matyu 24:1-28
6	Matyu 24:29-51
7	Matyu 25:1-30
8	Matyu 25:31-26:13
9	Matyu 26:14-46
10	Matyu 26:47-68
11	Matyu 26:69-27:14
12	Matyu 27:15-31
13	Matyu 27:32-66
14	Matyu 28:1-20
15	Mak 1:1-28
16	Mak 1:29-2:12
17	Mak 2:13-3:6
18	Mak 3:7-30
19	Mak 3:31-4:25
20	Mak 4:26-5:20
21	Mak 5:21-43
22	Mak 6:1-29
23	Mak 6:30-56
24	Mak 7:1-23
25	Mak 7:24-8:10
26	Mak 8:11-9:1
27	Mak 9:2-29
28	Mak 9:30-10:12

date	Scripture
1	Mak 10:13-31
2	Mak 10:32-52
3	Mak 11:1-26
4	Mak 11:27-12:17
5	Mak 12:18-37
6	Mak 12:38-13:13
7	Mak 13:14-37
8	Mak 14:1-21
9	Mak 14:22-52
10	Mak 14:53-72
11	Mak 15:1-47
12	Mak 16:1-20
13	Luk 1:1-25
14	Luk 1:26-56
15	Luk 1:57-80
16	Luk 2:1-35
17	Luk 2:36-52
18	Luk 3:1-22
19	Luk 3:23-38
20	Luk 4:1-30
21	Luk 4:31-5:11
22	Luk 5:12-28
23	Luk 5:29-6:11
24	Luk 6:12-38
25	Luk 6:39-7:10
26	Luk 7:11-35
27	Luk 7:36-8:3
28	Luk 8:4-21
29	Luk 8:22-39
30	Luk 8:40-9:6
31	Luk 9:7-27

date	Scripture
1	Luk 9:28-50
2	Luk 9:51-10:12
3	Luk 10:13-37
4	Luk 10:38-11:13
5	Luk 11:14-36
6	Luk 11:37-12:7
7	Luk 12:8-34
8	Luk 12:35-59
9	Luk 13:1-21
10	Luk 13:22-14:6
11	Luk 14:7-35
12	Luk 15:1-32
13	Luk 16:1-18
14	Luk 16:19-17:10
15	Luk 17:11-37
16	Luk 18:1-17
17	Luk 18:18-43
18	Luk 19:1-27
19	Luk 19:28-48
20	Luk 20:1-26
21	Luk 20:27-47
22	Luk 21:1-28
23	Luk 21:29-22:13
24	Luk 22:14-34
25	Luk 22:35-53
26	Luk 22:54-23:12
27	Luk 23:13-43
28	Luk 23:44-24:12
29	Luk 24:13-53
30	Jon 1:1-28

date	Scripture
1	Jon 1:29-51
2	Jon 2:1-25
3	Jon 3:1-21
4	Jon 3:22-4:3
5	Jon 4:4-42
6	Jon 4:43-54
7	Jon 5:1-23
8	Jon 5:24-47
9	Jon 6:1-21
10	Jon 6:22-40
11	Jon 6:41-71
12	Jon 7:1-29
13	Jon 7:30-52
14	Jon 7:53-8:20
15	Jon 8:21-30
16	Jon 8:31-59
17	Jon 9:1-41
18	Jon 10:1-21
19	Jon 10:22-42
20	Jon 11:1-53
21	Jon 11:54-12:19
22	Jon 12:20-50
23	Jon 13:1-30
24	Jon 13:31-14:14
25	Jon 14:15-31
26	Jon 15:1-27
27	Jon 16:1-33
28	Jon 17:1-26
29	Jon 18:1-24
30	Jon 18:25-19:22
31	Jon 19:23-42

date	Scripture
1	Jon 20:1-31
2	Jon 21:1-25
3	Aposel 1:1-26
4	Aposel 2:1-47
5	Aposel 3:1-26
6	Aposel 4:1-37
7	Aposel 5:1-42
8	Aposel 6:1-15
9	Aposel 7:1-29
10	Aposel 7:30-50
11	Aposel 7:51-8:13
12	Aposel 8:14-40
13	Aposel 9:1-25
14	Aposel 9:26-43
15	Aposel 10:1-33
16	Aposel 10:34-48
17	Aposel 11:1-30
18	Aposel 12:1-23
19	Aposel 12:24-13:12
20	Aposel 13:13-41
21	Aposel 13:42-14:7
22	Aposel 14:8-28
23	Aposel 15:1-35
24	Aposel 15:36-16:15
25	Aposel 16:16-40
26	Aposel 17:1-34
27	Aposel 18:1-21
28	Aposel 18:22-19:12
29	Aposel 19:13-41
30	Aposel 20:1-38

date	Scripture
1	Aposel 21:1-16
2	Aposel 21:17-36
3	Aposel 21:37-22:16
4	Aposel 22:17-23:10
5	Aposel 23:11-35
6	Aposel 24:1-27
7	Aposel 25:1-27
8	Aposel 26:1-32
9	Aposel 27:1-20
10	Aposel 27:21-44
11	Aposel 28:1-31
12	Rom 1:1-17
13	Rom 1:18-32
14	Rom 2:1-24
15	Rom 2:25-3:8
16	Rom 3:9-31
17	Rom 4:1-12
18	Rom 4:13-5:5
19	Rom 5:6-21
20	Rom 6:1-23
21	Rom 7:1-14
22	Rom 7:15-8:6
23	Rom 8:7-21
24	Rom 8:22-39
25	Rom 9:1-21
26	Rom 9:22-10:13
27	Rom 10:14-11:12
28	Rom 11:13-36
29	Rom 12:1-21
30	Rom 13:1-14
31	Rom 14:1-23

date	Scripture
1	Rom 15:1-21
2	Rom 15:22-16:7
3	Rom 16:8-27
4	1 Korin 1:1-17
5	1 Korin 1:18-2:5
6	1 Korin 2:6-3:4
7	1 Korin 3:5-23
8	1 Korin 4:1-21
9	1 Korin 5:1-13
10	1 Korin 6:1-20
11	1 Korin 7:1-24
12	1 Korin 7:25-40
13	1 Korin 8:1-13
14	1 Korin 9:1-18
15	1 Korin 9:19-10:13
16	1 Korin 10:14-11:1
17	1 Korin 11:2-16
18	1 Korin 11:17-34
19	1 Korin 12:1-26
20	1 Korin 12:27-13:13
21	1 Korin 14:1-17
22	1 Korin 14:18-40
23	1 Korin 15:1-28
24	1 Korin 15:29-58
25	1 Korin 16:1-24
26	2 Korin 1:1-11
27	2 Korin 1:12-2:11
28	2 Korin 2:12-17
29	2 Korin 3:1-18
30	2 Korin 4:1-12
31	2 Korin 4:13-5:10

date	Scripture
1	2 Korin 5:11-21
2	2 Korin 6:1-13
3	2 Korin 6:14-7:7
4	2 Korin 7:8-16
5	2 Korin 8:1-15
6	2 Korin 8:16-24
7	2 Korin 9:1-15
8	2 Korin 10:1-18
9	2 Korin 11:1-15
10	2 Korin 11:16-33
11	2 Korin 12:1-10
12	2 Korin 12:11-21
13	2 Korin 13:1-14
14	Galesia 1:1-24
15	Galesia 2:1-16
16	Galesia 2:17-3:9
17	Galesia 3:10-22
18	Galesia 3:23-4:20
19	Galesia 4:21-5:12
20	Galesia 5:13-26
21	Galesia 6:1-18
22	Efesas 1:1-23
23	Efesas 2:1-22
24	Efesas 3:1-21
25	Efesas 4:1-16
26	Efesas 4:17-5:2
27	Efesas 5:3-33
28	Efesas 6:1-24
29	Filipai 1:1-26
30	Filipai 1:27-2:18

date	Scripture
1	Filipai 2:19–3:6
2	Filipai 3:7–4:1
3	Filipai 4:2–23
4	Kolosi 1:1–20
5	Kolosi 1:21–2:7
6	Kolosi 2:8–23
7	Kolosi 3:1–17
8	Kolosi 3:18–4:18
9	1 Tesalonaika 1:1–2:9
10	1 Tesalonaika 2:10–3:13
11	1 Tesalonaika 4:1–5:3
12	1 Tesalonaika 5:4–28
13	2 Tesalonaika 1:1–12
14	2 Tesalonaika 2:1–17
15	2 Tesalonaika 3:1–18
16	1 Timoti 1:1–20
17	1 Timoti 2:1–15
18	1 Timoti 3:1–16
19	1 Timoti 4:1–16
20	1 Timoti 5:1–25
21	1 Timoti 6:1–21
22	2 Timoti 1:1–18
23	2 Timoti 2:1–21
24	2 Timoti 2:22–3:17
25	2 Timoti 4:1–22
26	Taitas 1:1–16
27	Taitas 2:1–14
28	Taitas 2:15–3:15
29	Failimon 1:1–25
30	Hibru 1:1–14
31	Hibru 2:1–18

date	Scripture
1	Hibru 3:1-19
2	Hibru 4:1-13
3	Hibru 4:14-5:14
4	Hibru 6:1-20
5	Hibru 7:1-19
6	Hibru 7:20-28
7	Hibru 8:1-13
8	Hibru 9:1-10
9	Hibru 9:11-28
10	Hibru 10:1-18
11	Hibru 10:19-39
12	Hibru 11:1-16
13	Hibru 11:17-31
14	Hibru 11:32-12:13
15	Hibru 12:14-29
16	Hibru 13:1-25
17	Jems 1:1-18
18	Jems 1:19-2:17
19	Jems 2:18-3:18
20	Jems 4:1-17
21	Jems 5:1-20
22	1 Pita 1:1-12
23	1 Pita 1:13-2:10
24	1 Pita 2:11-3:7
25	1 Pita 3:8-4:6
26	1 Pita 4:7-5:14
27	2 Pita 1:1-21
28	2 Pita 2:1-22
29	2 Pita 3:1-18
30	1 Jon 1:1-10

date	Scripture
1	1 Jon 2:1-17
2	1 Jon 2:18-3:2
3	1 Jon 3:3-24
4	1 Jon 4:1-21
5	1 Jon 5:1-21
6	2 Jon 1:1-13
7	3 Jon 1:1-14
8	Jut 1:1-25
9	Revelesen 1:1-20
10	Revelesen 2:1-17
11	Revelesen 2:18-3:6
12	Revelesen 3:7-22
13	Revelesen 4:1-11
14	Revelesen 5:1-14
15	Revelesen 6:1-17
16	Revelesen 7:1-17
17	Revelesen 8:1-13
18	Revelesen 9:1-21
19	Revelesen 10:1-11
20	Revelesen 11:1-19
21	Revelesen 12:1-18
22	Revelesen 13:1-18
23	Revelesen 14:1-20
24	Revelesen 15:1-8
25	Revelesen 16:1-21
26	Revelesen 17:1-18
27	Revelesen 18:1-24
28	Revelesen 19:1-21
29	Revelesen 20:1-15
30	Revelesen 21:1-27
31	Revelesen 22:1-21

## REOARA VITUARO IAVA

**aposel (apostle)**

Aposel vaisi oa vituaro oiso toupaiveira, reo kaepa irara. Ovaisi-ia Jisas voeaaro oisoa toupaive katai tau erao (12).

**areo uusi (samting olsem driman/vision, revelation)**

Pauto areo uusi vatepareveira oiratoapa vo osa rataa pievira uusiparo. Uva va-a vao oa-ia Pauto vaaro kekereve oiso osa Pita vaio (Aposel 10:3) ora Pol (Aposel 16:9), vo uvare Pauto vo tavitaviaro ravotovira ousiva areo uusi-ia, vo osa orekerovu kekesiva rataa pievira uusipaoro.

**aveke pero (hap ston/stone tablets, Ten Commandments)**

Oa-ia Reo Taisi rigatoreva Pauto Moses vatesa Sinai Pukui-ia (Eksodas 24:12; 2 Korin 3:3).

**disaipel (disaipel/disciple)**

Disaipel vaisi oa vituaro oiso toupaiveira, vo osa iravu reito oaiive vo taraiaro sirova utupaave. Ovaisi-ia Jisas voeaaro oisoa toupaive katai tau erao (12) (Luk 14:33; Jon 8:31).

**eravao (alta/altar of sacrifice)**

Oira o eravao iria ivara-ia oisoa korouou raro purapaive voeao Jiu Pauto roru piepasa. Uva Jisas ovoiopa tauo (offering) purarevora ora rera-ia oirara rutupa vuriaraaro oaiive-ia korouua puraoro vo evao parikou-ia (Jenesis 8:20; Matyu 23:19; Luk 1:11).

**keraria Vo vaisio keraria oa-ia toupaivoi vo peva porearo (mining)**

**oiso,**

1. Rovopa vao-ia varao rutu iava oara purareva Pauto oara kekepai vo rasio-ia ora vo vuvuiua-ia (olgeta samting God i bin wokim/creation).

2. Eraopa vao-ia vo osa Jisas pukuia-ia toupareva Moses vaio tapo ora Ilaija. Uva riroa sovara-ia avavia toupaiva oa rirovira rutu sisikorepaiva voea iava. Oavua vao eraopa oa vaisipaiveira, keraria (lait/light, glory)

(Luk 9:31).

3. Vo pevapa vao vo osa Jisas riroa rutuva keraria toupareveira aue vituaro iava uvare rei vaisitoa rutu rera vao iava rera vo kovoaro (biknem, bikpela namba/glory, honor)

(Revelesen 5:12).

**keri vaeapai aue tapo kegi.**

**kori (kilim/slaughter)**

Vo vaisio kori vaisi oa-ia reoreoroepa Jems vao-ia rugoopaoro oirara vo kasipuaro oa purapaivere oirara tekipaoro, voeao oea ora voea ragare rugorugoopaaveira (Jems 5:5).

**korouou (ofa/sacrifice)**

vaeapai aue tapo tauo (1 Korin 5:7).

**kukuvaipa (hat kapa/helmet) (Efesas 6:17).**

**moni (mani/money)**

Voea vaaro Rom-pa irara tuariri (Mak 12:14).

**meme rakariaro (skin meme/wineskin)**

Vao-ia oa-ia wain ovi kuvuive (Matyu 9:17).

**Oirato Oviitoaaro (Pikinini Bilong Man/Son of Man)**

Uva rera ora vaisiroepa Jisas oiso, Oirato Oviitoaaro, uvare rera raga Jisas vo vaisi vituaro-ia taraiparoepa. Aue iava uvare Pauto rera roporeva rera aruoro vo rasio iare. Oa iava oiravira kavauroepa, Pauto vo siraoaro kareke piesa oirara rutupa, voeao vo rasio-ia tou irara (Jon 9:35-37).

**Onisimas (Onisimas/Onesimus)**

REOARA VITUARO ora utopa pero 499REOARA VITUARO sopaua Vo peva toupaiveira oiratoa-ia oiso-ia,

Onisimas-pa vaisi-a vao ovaisi porearo oiso toupaivoi, Kovo purato. Ovaisi vituaro-ia rugoopaoro rera-ia rugorugoopaoro Pol reoreoroepa Failimon iare, oreoreoro epao vo Failimon vo pasiaro sovara-ia (Failimon 10).  
ora utopa pero (siot kapa/breastplate) (Efesas 6:13).  
purapurapa irara (ol ensel/angels)

Purapurapa irara voeao oea vuvuiua-ia toupaiveira Pauto ruvara-ia. Oea rerapa kovopaiiveira rera vo reoroaro iava tavitavipaoro (Luk 1:26-38), ora rera-ia vuurapa vaisi purapaiiveira rorupaoro (Luk 2:9-14), ora rera vo ruipaaro sirova utupaai rutu. Vo utupaua uva Pauto vo kasipuaro kareke pieiverea voeao-ia vuri irara oea viapau Pauto oirao piepaveira vo vokio (Revelesen 15:1).

Ari iravu-a ro enselto Seten ira oisoa vearovira toupareve vo vuvuiua-ia. Oire uva voava koveroepa Pauto ruvara iava rara ora vaisiaro rei pieparo ora rera raga vo ruipaaro sirova utupaoro (Luk 10:18).

Uva Pol voea iava enselpa irara rigatoreva rara voeao Jiu-pa irara voea-ia rirovira rugorugoopaoro ora voea vo lotuaro sirova oisoa utupaave (Kolosi 2:18).  
rakari verapa pitupitu (katim skin/circumcision)

Rakari verapa pitupitu oa oisoa toupave voea ruvara-ia Jiu-pa irara. Uva vo vokio oearovu tapo va purapai kakae vure-ia (Jenesis 17:10-14; Aposel 15:24).  
ratau tou irara (ol arapela lain, jentael/gentiles)

Vigei vaisipaiiveira oiso, ratau tou irara, aue iava uvare viapau oiso Jiu vo saraaro iava vigei. Ari ratau tou irara voeao oea vaisipaiiveira Jentael (Rom 4:11, 9:30).  
ravoto kovoro (ol mirakol/miracle)

Okovoroa oisoa purapareve Jisas oirara tauvapaoro. Jisas ravotovira vo kovoro purapareve Pauto vo goruaro iava. Oisi raga aposel irara ravotovira oisoa oirara tauvapaive Pauto vo goruaro kareke piepaoro. Ari ita, uvuipai ra oearovu Seten vo goruaro iava oaravu purapave ravoto kovoro tapo (Eksodas 7:8-12; Jon 2:1-11; Aposel 4:30).

reo goruro (ol lo/man's laws)

Oirara rutu reo goruro purapave varao oara-ia uvuipaa vara sirova vearo tou purapave. Osa oisoa Jiu-pa irara oaravu purapave Reo Taisiva vara takuvupasa (Jems 2:8).

reo ovoi (tok promis, kontrak/promise)

Vosa aitereivu ora reosi ra reo ovoi purasi. Aue iava uvare ovoiei reo rutu purasivoi, oiso rutu osa voari tuariri oisoa Rotokasipa irara reo ovoiei purapave aveke taku pierie ivara iare aasi ruipaoro (Hibru 6:16).

Reo Taisi (lo bilong Moses/Moses' Law, Ten Commandments)

Vosa Reo Taisi vaisi kekeri, ra taraiu oiso, Pauto vaaro oa vaterева Moses-pa vo Sinai Pukuia-ia (Matyu 22:40).

Rovopa Kepa Tugoropa Kepa (tempel/temple)

Vo kepa oa Jerusalem-ia touva Rovopa Kepa rutu (Matyu 26:61; Mak 11:11).

ruu reo (tok bokis/parable)

Jisas rirovira ruu reoro-ia reoreoroepa rera vo rugorugooroaro vataupaoro voearo asavira oearoa rera vo kovoaro ora rera vo siposipoaro viapau oisoa oirao piepave (Luk 8:11).

Sara Pauto Vaaro (kingdom bilong God/kingdom of God)

1. Oire va vao-ia Pauto vaaro Sara oa iava rirovira ovoovo reoro purareva Jisas (Mak 1:15).
  2. Oirao pie vovou irara Pauto vo Saraaro-ia toupaveira, aue iava uvare Pauto vaisipaiiveira oiso, Aite rera vo ruipaaro sirova utupaoro (Matyu 7:21).
  3. Vosa Jisas voreroverea torevoko vovou irara ousa ra koataaverea rera vo tokiaro-ia tousa, vo tokio oa viapau opesia vai, va vao airepa sara voeao vo saraaro oirao pie vovou irara (2 Timoti 4:18).
- sisikore vaeapai aue tapo sirusiru.

sopaua Vo peva toupaiveira oiratoa-ia oiso-ia,

1. varaua (bodi/body) Rovopa vao varaua oiratoa iava oua uvuipaai ra va kekepaive oirara (Rom 7:25).
2. sopaua (bel, tewel/soul) Eraopa vao oirato sopapro-ia oa toupaiveira vovoua vo uva rugorugooara poupa piroveira, vao oa kovopaiveira vokiara rutu-ia oirato sopapro-ia. Ora vao oa-ia Pauto vo rugooaro poupa viroveira oirara tavitavipasa vao iava vearoa ora viria, oiso ra viapau viria purapareve (Mak 14:34; Luk 1:46).
3. uraurato (spirit/spirit) Uraurato oirara-ia ora riakora-ia toupareveira ira tootooa vatepareveira varauapa (Jon 6:63). Vareo uraurato ora vovoua oarea kataivira toupaiveira.

Tagausupa Vurei (Pasova/Passover)

Rovopa vurei vao Jiu vaaro oa oisoa purapaise voari tuariri ora vo vokio-ia tapo. Oa purapaise oovapaoro vo osa voea oureva Pauto Isip iava. Uva Pauto enselto arureva kakae vure avaio kakae rutu uposa vo Isip-ia. Oire voeao oea vo keparoaro-ia revasi kipuro kekepareva varao reesiara, oea-ia tagaupareva putepaoro voeao raga upopaoro Isip-ia ora oearovu oea viapau Pauto vo reoreoaro ira pie reoro oirao piepaiva (Eksodas 12:21-30; Mak 14:12; Hibru 11:28).

Tugoropato Uraurato (Holy Spirit/Holy Spirit)

Jisas ro iava Uraurato tavireva oiso, Visii iare rera aruavere visii tapo toupasa visii tokipaoro. Uva rera vo kovoaro-a vao ro-ia Tugoropato Uraurato, oirara tauvapasa, ora Pauto vo reoroaro aviavi piepasa torevokovira, ora Jisas vo kovoaro oirao piepareveira oirara sopapro-ia.

uraurato (aviavi pie reoro kekeri vo vaisio iava vao sopaua vaisi).

utave (biugel/trumpet) (1 Korin 15:52)

utuuva geesi (saylor, ofa i gat gutpela switpela smel/herb)

(Matyu 23:23; Efesas 5:2).

uvaruto (ensel/seraphim)

(Hibru 9:5)

varaua (aviavi pie reoro kekeri vo vaisio iava vao sopaua vaisi).

variria (beten, prayer)

Variripai oirara ora riakora Pautoa tapo ora reopaoro. (Vaeapai aue tapo purea.) (Luk 11:1)

varo kepa (haus lotu sel/tabernacle)

Oa-ia tuariri oisoa lotupaave tariripaoro Jiu-pa irara (Hibru 8:5).

vereopa vovou (marimari/grace)

Pauto vaaro siraoa oa vatepareveira oirarapa akukuvira raga. Oire uva vo sirao-a eva oa purapareveira vereopa vovou akukuvira rutu ora rera vo ruipaoro sirova voea tauvapaoro (Rom 5:21).

vori ou asa kovopa irara (ol wokboi nating/slaves)

Voari tuariri uva oisoa riro moni irara oearovu kovo pieragapaive. Viapau oiso voea voripaive vo kovoro-ia oara oisoa purapaise voeapa. Ari aue raga-ia voea oisoa tokipaive varo, aio, ora oisoa voea tokipaive voea uusi piepaoro kepaara oaive-ia. Viapau oiso uvuipai ra ora voea vo rugorugooroaro sirova utupaave uvarovu avapaoro. Ari oiso rutu oisoa toupaive, tuukepa irara. Oiso rutu osa viria oirara tuukepaiveira vearo rugoro purapa arapa (1 Korin 12:13).

vuku viko (buk scroll)

Tuariri oa-ia oisoa Pauto vo reoroaro rigatopaive (Revelesen 5:1-5).

wit (wit/wheat)

Vao oa oiso rutu toupaiveira osa isiso kou (Matyu 13:3).

yis (yis/yeast)

Yis uverepaiveira oirara aue tapo plaua, ra riropape. Uva yis ora rigapaoro avapepeira vo plaua rutu sovara-ia. Oa-ia reoreoroepa Jisas vuri rugorugooro reesipaoro. Oara uvuipai ra oirara rutu sopapro vuri piepaoro avapape (Luk 13:21).